

Compromisu xi majo xi casahmi nina cojo xuta (El
Nuevo Testamento en el mazateco de Chiquihuitlán
de Juárez ... y en español)

New Testament in Mazatec, Chiquihuitlán (MX:maq:Mazatec,
Chiquihuitlán)

**Compromisu xi majo xi casahmi nina cojo xuta (El Nuevo Testamento en el mazateco
de Chiquihuitlán de Juárez ... y en español)**

New Testament in Mazatec, Chiquihuitlán (MX:maq:Mazatec, Chiquihuitlán)

copyright © 1991 Wycliffe Bible Translators, Inc.

Language: Mazatec, Chiquihuitlán

Translation by: Wycliffe Bible Translators, Inc.

Mazateco, Chiquihuitlán [maq], Mexico

Copyright Information

© 1991, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Chiquihuitlán

© 1991, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 22 Dec 2018

3ee7eab4-2659-54e8-8e90-b0a016392daf

Contents

San Mateo	1
San Marcos	56
San Lucas	92
San Juan	157
Hch.	204
Romanos	259
1 Corintios	283
2 Corintios	304
Gálatas	319
Efesios	327
Filipenses	335
Colosenses	341
1 Tesalonicenses	347
2 Tesalonicenses	351
1 Timoteo	354
2 Timoteo	361
Tito	366
Filemón	369
Hebreos	371
Santiago	390
1 Pedru	396
2 Pedru	403
1 Juan	407
2 Juan	413
3 Juan	414
San Judas	415
Apocalipsis	417

Cjuandajyihi xi catsihindu San Mateo Tsëhë Jesucristu

Xutachanga rë Jesucristu

¹ Xujun vihi ne, setaha xujun ñihi rë xutachanga rë Jesucristu, me xi tjë rë David, hacuaha tjë rë Abraham.

² Abraham ne, me vëhë xi xutachanga xi má nahmi rë Isaac. Isaac ne, me vëhë xi xutachanga xi má nahmi rë Jacob. Jacob ne, me vëhë xi xutachanga xi má nahmi rë Judá cojo hntsé cha. ³ Judá ne, nahmi má me tsëhë Fares cojo Zara; naa rë me ne, Tamar hmí rë. Fares ne, me vëhë xi xutachanga xi má nahmi rë Esrom. Esrom ne, me vëhë xi xutachanga xi má nahmi rë Aram. ⁴ Aram ne, me vëhë xi xutachanga xi má nahmi rë Aminadab me xi xutachanga xi má nahmi rë Naasón, me vëhë xi xutachanga xi má nahmi rë Salmón. ⁵ Salmón ne, nahmi rë Booz me; hane Rahab ne, naa rë me. Booz ne, nahmi má me tsëhë Obed. Naa rë me vë; má Rut. Obed ne, me vëhë xi xutachanga xi má nahmi rë Isaí. ⁶ Isaí ne, me vëhë xi xutachanga xi má nahmi rë David. David jan ne, me vëhë xi cavitexa nangui rë Israel. Hane David ne, me vëhë xi xutachanga xi má nahmi rë Salomón. Naa rë Salomón ne, titjun chjuun rë Urías camá me.

⁷ Salomón ne, me vëhë xi xutachanga xi má nahmi rë Roboam. Roboam ne, me vëhë xi xutachanga xi má nahmi rë Abías. Abías ne, me vëhë xi xutachanga xi má nahmi rë Asa. ⁸ Asa ne, me vëhë xi xutachanga xi má nahmi rë Josafat. Josafat ne, me vëhë xi xutachanga xi má nahmi rë Joram. Hane Joram ne, me vëhë xi xutachanga xi má nahmi rë Uzías. ⁹ Uzías ne, me vëhë xi xutachanga xi má nahmi rë Jotam. Jotam ne, me vëhë xi xutachanga xi má nahmi rë Acaz. Acaz ne, me vëhë xi xutachanga xi má nahmi rë Ezequías. ¹⁰ Ezequías ne, me vëhë xi xutachanga xi má nahmi rë Manasés. Manasés ne, me vëhë xi xutachanga xi má nahmi rë Amón. Amón ne, me vëhë xi xutachanga xi má nahmi rë Josias. ¹¹ Josias ne, me vëhë xi xutachanga xi má nahmi rë Jeconías cojo hntsé cha. Nixtin hya ne, xutaxín ne, cafahaxin me xuta nangui rë Israel, quijicojo me xuta jan nangui Babilonia.

¹² Hane xi cama quiji me Babilonia, Jeconías vë ne, camá me vëhë xutachanga xi má nahmi rë Salatiel. Salatiel ne, me vëhë xi xutachanga xi má nahmi rë Zorobabel.

¹³ Zorobabel ne, me vëhë xi xutachanga xi má nahmi rë Abiud. Abiud ne, me vëhë xi xutachanga xi má nahmi rë Eliaquim. Eliaquim ne, me vëhë xi xutachanga xi má nahmi rë Azor. ¹⁴ Azor ne, me vëhë xi xutachanga xi má nahmi rë Sadoc. Sadoc ne, me vëhë xi xutachanga xi má nahmi rë Aquim. Aquim ne, me vëhë xi xutachanga xi má nahmi rë Eliud. ¹⁵ Eliud ne, me vëhë xi xutachanga xi má nahmi rë Eleazar. Eleazar ne, me vëhë xi xutachanga xi má nahmi rë Matán. Matán ne, me vëhë xi xutachanga xi má nahmi rë Jacob. ¹⁶ Jacob ne, má me nahmi rë José, xihin rë María naa rë Jesús me xi hacuaha yaha ñihi rë Mesías.

¹⁷ Cuatjin camá xi cavatju teñuju ndiya xi cavatju xi cjín xuta tisetsin me nixtin rë Abraham hisca nixtin rë David. Hacuaha cama teñuju ndiya xi cjín xuta tisetsin me nixtin rë David hisca hya xi xutaxín jan ne, cafahaxin me xuta nangui rë Israel, quijicojo me xuta nangui Babilonia. Hane hacuaha camá teñuju ndiya tsëhë nixtin hya hisca nixtin xi catsin Mesías.

Hya xi catsin Jesucristu

¹⁸ Cuitjin camá nixtin xi catsin Jesucristu: María, naa rë Jesús ne, tacun vasen cjuavixan rë na cojo José. Peru chaja sa xi cjuaha xicjin na cojo me ne, casacu rë na quihndi ngatsé rë Hasen rë Nina. ¹⁹ José, me xi cuixan cojo na jan ne, tyjahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na. ²⁰ Cuatjin catsingatahacacun me xi sahmi me peru hora hya ne, cafehetsejen ngu ángel rë Nina ngajni chini rë me, hane cuitjin cachja ángel:

—José, ngaye quihndi tjé rë David, ximacjintacuin xi chjehentse María cuma chjuun riji na ta, sacuaha quihndi xi yaha na ne, ngatsé rë Hasen rë Nina, camá xi casacu rë na. ²¹ Tsin rë na ngu quihndi xihin. Quihndi vë ne, tehe ñihí rë Jesús. Cuatjin cjuaha ñihí ta, tséhë xi cuaxëtje rë xuta rë tséhë jyé rë me.

²² Yéjé xcusun vihi ne cuatjin cama, cojo sa xi cuetjucaa Jain cjua xi cachja profeta nixtin hatséé cuitjin:

²³ Ngayujun ni nutsujun ta ngu chjuun xungun ne, sacu rë na ngu quihndi xihin. Quihndi jan ne, suañhi me Emanuel.

Emanuel ne, vëhë cjua xi vijne: Nina ne, jiya me ngajñi naja.

²⁴ Ngajan xi hya xi cavasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na. ²⁵ Peru hisca xi cavatju catsin quihndi ne, sehe cavyuju cojo xicjin me. Hane casuañhi rë me quihndi jan, Jesús.

2

Ngu jo cha xi vechu cjuatacun rë ne, cavëë cha niñú tséhë Jesucristu

¹ Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne, ngujo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén. ² Hane cuitjin cachja cha:

—¿Jani sacu niji quihndi xi cuitixa nangui Israel? ta cahyin xi cavetjucaa niñú rë me ngajan ladu vetjucaa tsuhi. Hane nduvintjenguin me xi chjihinrcuin me.

³ Hya xi cama ne, jemu cama xti rë Herodes xi tu cahndé me cjua jan; cojo xuta nangui Jerusalén ne, cama xti rë me. ⁴ Hya xi cama ne, Herodes ne, cajindayavaha me yëjé ni nahmi xi matitjun cojo yëjé cha vicuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu? ⁵ Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tséhë nandya jan xi ngajan tsin quihndi:

⁶ Ngaye, nandya Belén, ngaye nandya tséhë xuta tjé rë Judá, hacuaha vengui chji ri xcun xuta matitjun nangui Judá.

Ta ngajñi rë xuta riji ne cuetjutsejen ngu me xi cuitixa rë xuta naha, xuta nangui Israel.

⁷ Hya xi camá ne, Herodes ne, cajindayahma me cha xi vechu cjuatacun rë jan. Cafahataha rë me cha. ¿Mé hora cjuaquixi tséhë mé nixtin camatsejen niñú jan?

⁸ Ngaxtun vëhë ne, sehe cavetixa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsundujun yëjé tséhë quihndi. Hane xi sacu nuju cjuaquixi ne, ningatjun ná cjua sehe cojo ngahan ne hacuaha cjué cjuahárcun quihndi.

⁹ Xi cavihndé cha xi cuicun vi cjua jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndé hiscan xi jiña quihndi, hane ngajan cavasén. ¹⁰ Hane xi cavëë cha niñú xi ngajan cavasen ne, jercu tu ndama camaha ni rë cha. ¹¹ Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmí rë María. Sehe quiji cavixcuhnchi cha cafaharcun cha quihndi jan. Hane sehe cavuxaha cha hiscan hincha rë cha cuatjo, hane casua cha oro cojo tyjungunsa cojo tyjungunjne xi hmí rë mira. ¹² Hya xi cavatju vëhë ne, tséhë xi cachja chini cojo rë cha xi cuyaain cha taha ladu hiscan tacun Herodes ne, tahaxin cavuya cha nangui rë cha.

Quiji me hiscan nangui Egipto

¹³ Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cjua xi cuyun. Cuatjin nihñu ta tséhë xi Herodes ne, cuanguise me quihndi xi tsiquehen me.

¹⁴ Hane cavisatjehnga me nixten quijicojo me quihndi jan cojo naa rë, cafe me Egipto. ¹⁵ Hane xi cafehe me ngajan Egipto ne, ngajan cavyujutaha me hisca nixtin xi cahme Herodes. Cuatjin cama sehe hatuxa camachihin cjua xi catsingatju Nina cojo profeta rë me hatsëe nixtin. Cuitjin chja cjua jan: “Cajindáya rë quihndi naha xi nduvaniji tséhë nangui Egipto.”

¹⁶ Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yéjë ni quihndi xihin xi cjëë cjuë jyan nu, yéjë ni quihndi nandya Belén cojo distritu rë. ¹⁷ Véhë cjua xi cachja Nina xi catsihindu profeta Jeremías:

¹⁸ Vinuhya rë cjuava ngajan nandya Ramá.

Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tséhë xi ha café quihndi.

¹⁹ Hane xi cavatju cahme Herodes ne, cavuya cafehetsejen nga ángel rë Nina ngajñi chini rë José ngajan Egipto ne, ²⁰ cuitjin cachja:

—Tisatjinhngue tihincueje quihndi cojo naa rë. Tihinniji nandya Israel. Tihin ta tséhë xi ha cahme cha xi meje tsiquehen rë quihndi. Cuatjin cachja.

²¹ Hya xi camá ne, cavisatjehnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel. ²² Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen me distritu Galilea. ²³ Cavyujutaha me ngajan ngu nandya xi hmí rë Nasaret. Cuatjin cama sehe cuetjucaa cjua xi catsihindu profeta tséhë me xi xuta ne, cuichja me xi Jesús ne, xuta Nasaret me.

3

Cachja Juan Vitenda rë Xuta ngajan ngu xín tséhë nandya

¹ Nixtin hya ne, cavetjucaa tsejen Juan Vitenda rë Xuta ngajan nguijña tséhë distritu Judea. ² Cuitjin catsiquihndë me xuta:

—Nindeyun cjuatacun nuju ta, camatiña nixtin xi Nina ne, cuitexa me ngasunhndë.

³ Cuatjin tséhë cha Juan vihi, cha vihi xi camahindu tséhë cha xcun xujun xi chja cjua rë profeta Isaías xi chja cuitjin:

Cuitjin jercu hñu tsiquihndë ngu xuta ngajan hiscan jemu xín tséhë nandya:

“Tuhun chjinu ndiya xi cuinduva Nina;

hacuaha ninguixun cjuatacun nuju tséhë me.” Cuatjin cachja me.

⁴ Tsjian rë Juan jan ne, tsja rë chu camellu camá hacuaha cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen. ⁵ Hane jemu cjín xuta quijitjengui me Juan, xuta nandya Jerusalén, xuta distritu Judea cojo xuta xi siutahandee rë ndajyé Jordán. ⁶ Xuta jan, xi cavijacun me jyé rë me cojo Nina camá cavitenda Juan me ngajan ndajyé Jordán.

⁷ Peru xi cavutsejen Juan xi cjín xuta tifehe tixtenda me; cha tséhë partidu fariseo cojo cha tséhë partidu saduceo ne cachja me cojo cha cuitjin:

—¡Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cjuetjuntjun tséhë castigu xi hatuxa tsingatju Nina? ⁸ Sá xi meje jain cjuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. ⁹ Xicanujuun cahntsua xahesen nuju cjua vihi: “Ngayaan ne, tsajin mé cuma naja ta, tséhë xi tjé rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndyojo xi cuicun vi ne, cuma sahmi me xi cumá tjé rë Abraham. ¹⁰ Chutsujun ta ngayun matsejen ne, tangun ngayun cojo yatjé xi ha quitahachjine quicharcu tyjama rë xi cuetsihin xti rë. Yéjë ni yatjé xi suaain tu xi ndaja matsejen ne, xtí rë, sehe cueti. ¹¹ Ngahan matsejen ne, cojo nandá ni tiviténda nuju, peru sehe cuinduva me xi hitsë sa jyé ngahñu tjin rë cjuatacun rë xi cuma ná

ngahan, me xi hitsë sa jyë hnga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahesen nuju, hacuaha tangun me sacuaha ngu ndihi xi tsityjahi rë cjuatacun nuju. ¹² Me vëhë matsejen ne, sacuaha xi ha yahatsja me quicha xi tsicaha rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ndihi xi tsajin nixtin coho. —Cuatjin cachja Juan.

Caxtenda Jesús

¹³ Nixtin hya ne, hacuaha cavetju Jesús tsëhë distritu Galilea hane cafehe me ndajyë Jordán xi xtenda me. ¹⁴ Peru mijí sua Juan cahndé ta cachja me:

—Hitsë sa ndaja xi ngayun cuitendun ná. Hacuiin xi ngahan cuitenda nuju.

¹⁵ Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús. ¹⁶ Xi cama caxtenda Jesús ne, xi tu tivetju me tsëhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacuajyঃihi xcusun rë ngu paloma jyঃihi.

¹⁷ Hacuaha canuhya rë ngu cjua ngajan ngahnga xi cachja cuitjin:

—Cha vihi xi quihndi naha xi hmú cacute. Jemu ndama ná ngatsë rë cha.

4

Cafahachuva Satanás Jesús xi choho sahmi me

¹ Hya xi camá ne, Hasen rë Nina ne, quijiniji xu cojo Jesús ngajan ngu xín tsëhë nandya ta ngajan cjuahachuva xitsehen me.

² Hya xi cama ne, Jesús ne, yachan nixtin cojo yachan nixten cajinii me niñu. Hyá xi cavatju vëhë ne, jercu camavojo rë me. ³ Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye Jain xi Quihndi rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen cojo rë me.

⁴ Peru cuitjin cafayangui me tsëhë xitsehen jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu ta hacuaha mameje rë me tsëhë yëjë ni cjua xi catsingatju Nina.”

⁵ Sehe xitsehen jan quijicojo xu rë me nandya Jerusalén, nandya ximininchacun, quijisun xu me rcu cjin yungun xi matitjun ⁶ sehe ngajan xi cachja xu xitsehen:

—Sá xi ngaye Jain xi Quihndi rë Nina ngaye ne, ningatjin yojo riji tsëhë ndyá ne hisca nangui. Ndaja hye ta tsajin mé cuma ri ta xcun xujun rë Nina ne, cuitjin chja: Nina ne cavitexa me ángel rë me xi sahmi ri cuidadu.

Cjuahántsa ri,

cojo sa xi ntsacui ne, sacuinhmuain rë cojo hisca ngu ndyojo.

⁷ Ngajan xi cafayangui xu Jesús tsëhë xitsehen cuitjin:

—Hacuaha cuitjin chja xcun xujun rë Nina: “Mijí rë xi chjuhunchuvun Nina nuju.”

—Cuatjin xu cachja Jesús.

⁸ Hane ngu ndiya nga quijicojo xitsehen Jesús, quijicojo rë me ngu ndetjún hnga ne, sehe catsingacun xitsehen jan me jinguyjë ni nandya tsëhë ngasunhndë cojo yëjë ni cjuanchina xi tjin rë. ⁹ Ngajan xi cachja xitsehen cojo rë me cuitjin:

—Suá ri yëjë nandya xi cuacún vë cojo cjuanchina rë. Hatuxa suá ri sa xi cuindove cuiticjexcuin nguehe xi chjehercuin ná.

¹⁰ Sehe cafayangui Jesús tsëhë xitsehen cuitjin:

—Tihinxin Satanás, ta tsëhë xi xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha ngu ni me vëhë xi meje rë xi nihñuchuhun hacutjin xi meje rë me.”

¹¹ Xi cuatjin xu cachja Jesús cojo xitsehen jan ne, cavetjuxin tsëhë me. Hane cafehe tjengui ángel me xi cjuahacuenda rë me.

Jesús ne, vetsihin sahmi me xa ngajan distritu Galilea

¹² Xi camachaya rë Jesús xi jiya Juan Vitenda rë Xuta ndavaya ne, quiji me distritu Galilea. ¹³ Hane cavetjuxin me tséhë nandya Nasaret, quiji cavejña me nandya Caper-naum. Nandya jan ne, tacun tjehen rë ndajyë. Hane nandya jan ne tséhë xuta tjë rë Zabulón cojo Neftalí. ¹⁴ Cuatjin cama sehe camachihin cjua xi camahindu xcun xujun xi chja cjua rë profeta Isaías xi chja cuitjin:

¹⁵ Xuta xi viyuju me nangui rë Zabulón cojo Neftalí,
nangui ngajan ngunda ndajyë Jordán, ngajan tjehen rë ndachacun,
tséhë distritu Galilea, nangui rë xutaxín.

¹⁶ Xuta jan xi jñu cjuatacun rë me, cavëë me ngu me xi sacuaha ngu ndihi seti xi sua rë
me cjuahasen.

Xuta xi jemu tsavi siu me tséhë cjuaveya, ndihi jan ne casua rë me hasen rë.

¹⁷ Nixtin hya ne, Jesús ne, cavetsihin catsuyihiya me cachja me cojo xuta cjua rë Nina.
Cuitjin cachja me:

—Nindegún cjuatacun nuju ta tséhë xi camatiña nixtin xi Nina ne cuitexa me
ngasunhndë.

Jesús ne, jindaya me cha xi tjun cumá xuta ladu rë me

¹⁸ Cama ngu nixtin xi tsuyihiya me ngajan tjehen laguna tséhë Galilea ne, cavëë me
jo me xi hntsë, ngu me xi hmí rë Simón cojo ngu me xi hmí rë Andrés. Titsingatjenya
me changa ngajñi ndachacun, tséhë xi hatuxa xá rë me xi faha me chu ti. ¹⁹ Hane Jesús
ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangun nuvun xuta xi cuisehen
me ladu naha ngojo rë xi nuvun chu ti. —Cuatjin cachja me.

²⁰ Hane hora vöhë ni cavyuju me changa jan, hane cavetju me quiji me cojo Jesús.

²¹ Hitsë sa nguvan ne, cavëë Jesús jo cha xi hacuaha hntsë: Jacobo cojo Juan, cha
quihndi rë Zebedeo. Hincha cha cahntsua barcu cojo nahmi rë cha, ngajan.tifuyataha
cha changa rë cha. Hacuaha cajindaya Jesús cha xi cjeocojo me cha. ²² Sehe cavyuju cha
barcu jan, hane cavejña cha nahmi rë cha quiji cha cojo Jesús.

²³ Hane Jesús ne, catsuyihiya me yëjë ni ladu tséhë distritu Galilea. Xi cavisehen me
yungun ne, cavicuya me xuta, cachja me cojo xuta cjuandajyihi tséhë gubiernu xi sahmi
Nina. Hacuaha catsirqui me xuta hmu rë; camandaja xuta tséhë yëjë ni chíhin cojo tséhë
yëjë ni cjuahmu rë me. ²⁴ Hane cavitsojo cjua tséhë cjuarcun xi casahmi Jesús. Cavitsojo
cjua jan hisca yëjë nangui xi hmí rë Siria. Hane xuta ne, cafehetjengui me Jesús yaha
me xuta hmu rë tséhë yëjë xcusun chíhin hane catsirqui me. Hacuaha catsirqui me xuta
xi hincha xitsehan cahntsua xahasen rë me cojo xuta xi má rë me chajan cojo xuta xi
cahme yojo rë. ²⁵ Hane quijitjengui xutacjín jan Jesús ne, xuta tséhë cahndé xi cuicun
vi: tséhë të nandya xi tséhë Decápolis, cojo nandya Jerusalén, cojo yahnga sa xuta tséhë
distritu Judea, cojo xuta tséhë nangui ngunda tséhë ndajyë Jordán.

Xuta xi ndaja tséhë cojo xuta xi hmu tséhë

¹ Hyá xi cavutsejen Jesús xi camatangun xutacjín jan ne, quijiniji me ngu ndetjun, hane
xi cavéjña Jesús ne, casahmitiña xuta tséhë Jesús. ² Sehe cavetsihin cavicuya me xuta jan
cuitjin:

³ —Jemu ndaja tséhë me xi machaya rë me xi tsichaja sa rë cjuatacun rë me xcun Nina
matsejen ta satë rë me gubiernu xi sahmi Nina.

⁴ 'Jemu ndaja tséhë me xi jihndava me tséhë cjuachoho matsejen ta Nina sua rë me
cjuetacun.

⁵ 'Jemu ndaja tséhë xuta jeya, xuta xi hacuin xta me matsejen ta, cjuahatsja me nangui
xi sua Nina.

6 'Jemu ndaja tséhë me xi sacuaha sahmi yahnga xuta xi vojo rë xi fi tjengui rë comida, cuanitjin tjengui me xcusun xi cuma tyjahi cjuatacun rë me xcun Nina matsejen ta, cuechu nixtin xi cuiyujuchihin cjuatacun rë me.

7 'Jemu ndaja tséhë me xi tjin rë cjuayumatacun cojo xuta, ta hacuaha cjuahatsja me cjuayumatacun tséhë Nina.

8 'Jemu ndaja tséhë me xi tjin ngu cjuatacun tyjahi cahntsua xahasen rë me matsejen ta, scuëë me Nina.

9 'Jemu ndaja tséhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

10 'Jemu ndaja tséhë me hya xi tsuuyihiya tjengui xuta me cojo cjuahngatacun ngatsë rë xi tjin rë me ngu cjuatacun cojo Nina matsejen, ta satë rë me gubiernu xi sahmi Nina.

11 'Jemu ndaja tsujun ngayun ne sá xi ngatsë nahal choho cuichja xuta tsujun o sá xi tsuuyihiya tjengui nuju xuta cojo cjuahngatacun o sá xi cojo cjuandesu tsicanijiyë me ngayun. **12** Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi cavyuju hatsëë nixtin.

Xuta ne, meje rë xi sahmi me sacuaha naxa

13 'Ngayun, tjin hacutjin machji rëhë ngayun ngajñi rë xuta sacuaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

Má naja ndihi rë ngasunhndë

14 'Cuanitjin ne, tjin hacutjin machji rëhë ngayun ngajñi rë xuta sacuaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë. **15** Cuanitjin ne, hacuaha tsajin ngu xuta xi ha xcun xi ha cavetaha rë me ngu ndihi ne, sehe cjuaha me cueyahma me ngahma rë ngu caxa. Hatuxa cjuaha me cueñatsejen me cahndé rë cojo sa xi xuta xi siu me hiscan xi seti ndihi jan ne, cuechu hasen rë. **16** Hacuanitjin chuva vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

Cjua xi cachja Jesús tséhë ley rë xuta tjé rë Israel

17 'Xi caningatuuntacuun matsejen xi nduvá tsinguétsun ngahñu rë ley xi catsihindu xutachanga naja Moisés o cjua xi cachja profeta. Cahndé rë xi tsinguétsun ne, sahmechihin cjua jan. **18** Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhndë ne, cumaji chjahanxin rë cjua rë ley jan cojo yéjë ni letra rë ta, cuejña cuaha hiscan cumachihin cjua rë. **19** Vëhë xi tu yo ni xi sahmicuendaain tséhë hisca ngu rquí cjua rë, hane sá cuinchangui me yahnga xuta xi cuanitjin sahmi me, chuva cuengui chji rë me hya xi sahmi Nina gubiernu. Peru tu yo ni me xi cjuahacuenda me hacuaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gubiernu. **20** Nguehe cuichjá cojo nuju ngayun ta meje rë xi hitsë sa tyjahi cjuatacun nuju xi cumá rë cjuatacun rë xuta xi vicuya me ley o sá xi xuta partidu fariseo, ta sá tsajin ne, satiin nuju gubiernu xi sahmi Nina.

Cjua xi cavicuya Jesús tséhë xuta xi hngacacun

21 'Ha hyun cjua xi cafaha xuta hatsëë nixtin xi chja xi canicuun xingun hacuaha chja xi yo xi tsiquehen xicjin matsejen ne, cjue me xcun juez xi tsichuva me jyé rë me. **22** Peru cuichjá cojo nuju xi hisca yo xi macjan rë cojo xicjin ne, satë rë xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tséhë xuta: "Ngarca ngayun", cuechji me tséhë jyé rë me ngajan xcun ndihi xi tsajin nixtin coho.

23 'Ngatsë rë vihi, sá xi hora xi vejñu chjé nuju ngasunscun ne, sá xi tu ñahñu ni vitsjen nuju xi choho canihñu cojo xingun **24** ngajan catejñavasen chjé nuju, titjun cuangun

tjengun xingun, hane chjayun rë me cjuaninchataha hane xi camandaja yun cojo me, sehe cuyun cuejñu chjé nuju jan.

²⁵ 'Sá ndiya tivangun cojo xuta xi meje cuinchajyé nuju xcun xutaxa rë ne, meje rë xi cuisiajmuchuhun cojo me, cojo sa xi ngajñi nuju cuma chihin ta sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane cjue cueya nuju me ndavaya. ²⁶ Ta cuichjá cojo nuju cjuaquixi ta hatuxa tsajin nixtin xi cuetjun tséhë ngajan jinguyéjë rë xi cjéé cuechjun yéjë ni tujún xi quitjun.

Cjua xi cavicuya Jesús tséhë xuta xi sahmi cjuatsehen cojo rë ngu xi hacuiin tséhë me

²⁷ 'Ha hyun cjua xi cafaha xuta hatsëë nixtin xi chja cuitjin: "Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun." ²⁸ Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na, ngajñi cjuatacun rë me ne, ha casahmi me cjuatsehen cojo ran.

²⁹ 'Hindë sá xi cjuatacun nuju meje rë xi nihñu ngu jyé tséhë xcusun xi chutsujun cojo tuxcuun ladu quixi, hitsë sa ndaja tsujun sá xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji röhë xi ma chaja nuju ngu rquí yojo nuju hane hacuiin xi cuangun jingu hiscan xi má hasen rë nima castigu. ³⁰ Cuanitjin ne, sá xi cjuatacun nuju meje rë xi nihñu ngu jyé cojo ntsun quixi ne, hitsë sa venguichji röhë xi chandunxun ntsun jan ta hitsë sa ndaja tsujun xi machaja ngu rquí yojo nuju tséhë xi cuangun jingu hiscan xi má hasen rë nima castigu.

Jyé rë xuta xi tsismi xicjin me sehe cuixan cojo jingu sa

³¹ 'Hacuaha cafaha xuta hatsëë nixtin cjua xi chja cuitjin: "Ngu cha xi tsismi chjuun rë ne catejña cha ngu xujun tsja chjuun jan xi ha quihndë mijí rë cha na." ³² Peru nguehe cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin xi hacjahi, hacuaha tjin rë me jyé ta sehe ngatsë rë xi catsismi me na ne sahmi chjuun jan cjuatsehen. Hacuaha yo xi cuixan cojo chjuun jan ne, tangun jyé rë cojo ngu xi sahmi cjuatsehen cojo ngu chjuun xi hacuiin chjuun rë.

Hacutjin meje rë xi sua cjuaquixi naja

³³ 'Hacuaha hyun cjua xi cafaha xuta hatsëë nixtin xi chja cuitjin: Hya xi cuinújun: "Vëë Nina", hatuxa sahmi nguyé xi nihñuchuhun cjua xi canújun. ³⁴ Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vëë Nina, hacuiin cuinújun xi vëë sa jingu sa quihndi ngasunhndë. Cuinujuun xi vëë ngahnga ta ngahnga ne, tacun Nina xi vitexa me. ³⁵ Hacuaha cuinujuun xi vëë ngasunhndë ta ngasunhndë ne, tangun sacuaha ngu yatë hiscan xi tine ntsacu Nina. Cuinujuun xi vëë Jerusalén ta Jerusalén ne, nandya xi tséhë Nina, Me xi Matitjun. ³⁶ Cuinujuun cuitjin: "Sá xi quixiin Jain cjua naha ne, catinduva ngu cjuacjintacun xi cuatjun", ta tséhë xi ngayun ne, hisca hitsë cumoji cuitexun sá xi cuma jma tsjarcun o sá xi cuma tyjava. ³⁷ Hya xi cuisiajmu, sá xi "joho" nûjun ne, cuanitjin ni cuitejña; o sá xi "jéya" nûjun, hacuaha cuanitjin ni ndatjin ta, sá xi vetjutë visiajmu cjua cjín jan ne, cjua cjín jan ne, nduva tséhë cjuatsehen.

Meje rë xi nihmutacun xuta xi chohovëë naja

³⁸ 'Hyun cjua xi cafaha xuta hatsëë xi chja cuitjin: Cha xi cuahaxin tuxcun xicjin ne, hacuaha chjahaxin rë tséhë cha. Cuanitjin cha xi cuahaxin nehñu xicjin ne, hacuaha cuanitjin ni chjahaxin rë nehñu cha. ³⁹ Peru nguehe cuichjá cojo nuju ta, canicuyun cjuatsehen. Sá xi tjin yo xi vanguilmu nuju, yo xi vajaya ngu ladu tsa nuju matsejen ne, nicuyun sa ngu ladu catajaya. ⁴⁰ Cuanitjin ne, sá xi tjin yo xi cjuecojo nuju xcun juez xi fahataha chingá nuju matsejen ne, hacuaha tuhun rë me cojo yéjë ni tsjian hasu nuju.

⁴¹ Cuanitjin ne sá xi ngu xuta ne, sahmi nuju me nguyé xi chanuju chaha rë me ngu kilómetro, cahndé rë ngu ni, tanguncujun jo kilómetro. ⁴² Yéjë ni xuta xi fehya nuju me mé xi machaja rë me matsejen ne, tuhun rë me. Hane sá xi scuxetaha nuju me, tuhun rë me.

⁴³ 'Hyun cjua xi cafaha xuta hatsëë nixtin xi chja cuitjin: "Nihmutacún xuta xi siutahndee nuju; choho hyun xuta xi má condra nuju." ⁴⁴ Peru cuichjá cojo nuju ta, hacuaha nihmutacún xuta xi má condra nuju; ndaja nihñu cojo xuta xi choho vëë nuju me. Nújyunumuntuhun rë xuta xi tsuyiyhiya tjengui nuju me cojo cjuahngatacun. ⁴⁵ Sá xi cuatjin nihñu ne, cumatsejen xi chjayunngun sacuaha sahmi Nahmi nuju xi tacun ngahnga ta, Nina ne, sahmi me xi ngu chihin ni vetjucaa tsuhi xi casahmi me hane vechu hasen rë hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rë xuta xi tjin xi cun rë me, hane hacuaha xcun jnu rë xuta xi tsajin xi cun rë me xcun Nina. ⁴⁶ Tsajin yo xi sua chjí nuju tséhë xi hmucacún xuta xi hmucacún nuju me matsejen, tséhë xi hacuaha hisca cha faha tujúnsa (xi jemu vaxë cha tujún) matsejen ne, hmucacún cha xuta xi hmucacún rë cha. ⁴⁷ Hacuanitjin ne, sá xi suvun cuinújun nina cojo xuta nuju ne, ¿há hitsë sa ndaja yun xi cuma rë yahnga xuta? ¡Jéya! Hisca xuta xi macjaain rë me Nina ne, tjin rë me xcusun ndaja vë. ⁴⁸ Véhë xi mameje rë xi tangun cojo ngasunhndë nuju cojo ngu xcusun xi tyahi chichihin ni, cumatangun xcusun nuju cojo xcusun rë Nina xi tyahi chichihin cjuatacun rë me.

6

Jesús ne, vicuya me tséhë cjuandaja xi meje rë sahmi xuta

¹ 'Hya xi nihñu ngu cjuandaja ne, nihñu nguñajatacun, hacuiin nihñu tséhë xi scuëë nuju xuta; ta sá tsajin ne, ndastu me chji sacu tséhë Nahmi nuju xi tacun ngahnga. ² Cuanitjin ni sacuaha cjua vë, hya xi tuhun ngu caridad matsejen ne, xi canijanuu ngu tyjo xi tuhun cumachaya rë xuta cjuandaja jan. Hacuaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsë rë xi vaxëndaja xuta me. Tichjá cojo nuju ta ha véhë ni chji sacu rë me. ³ Véhë xi ngayun ne, hya xi tuhun caridad ne, catuun cumachaya rë ntsun ladu xcun mé xi tuhun cojo ntsun ladu quixi. ⁴ Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavëë me cjuandaja xi canihñu ne, sua me chji nuju.

Jesús ne, vicuya me hacutjin nihña oración

⁵ 'Hacuaha hya xi nihñu oración, xi canihñuu sacuaha xuta xi jo xcun jo hntsua me ta me véhë ne, jemu meje sahmi me oración cahntsua yungun cojo sa hiscan sahmi cru ndiya të hiscan xi scuëë xuta me. Nguehe cuichjá cojo nuju ta ha véhë ni chji sacu rë me. ⁶ Véhë xi ngayun ne, hya xi nihñu oración ne, techjun tingotjo ndya nuju hane tangun cahnchun, ngajan hma nihñu oración cojo Nahmi nuju xi tacun ngahnga ta ngu ni me véhë xi tacun me cojo nuju. Hane Nahmi nuju jan xi vëë me yéjë xcusun xi hincha hma ne, sua me chji nuju.

⁷ 'Hacuaha hya xi nihñu oración, caveyunnanguun ngu cjua xi hisca suvun vijniircun sacuaha xcusun xi sahmi xuta xi hvíin me cjua rë Nina, ta xi má rë me vë ne, xi hitsë cjín cjua cuichja me ne, hacuaha hitsë sa cuahacuenda Nina tséhë me. ⁸ Mijí rë xi nihñu xcusun véhë, ta hisca chaja sa xi chjahyun rë Nahmi nuju xi tacun ngahnga ne, ha vëë me mé xcusun xi mameje nuju. ⁹ Cuanitjin nújun hya xi nihñu oración:

Ngayun Nahmi niji xi nechun ngahnga ne,
meje rë xi ngayijin ni xuta ngasunhndë chjihinrcuin nuju.

¹⁰ Nduvun nihñu niji gubiernu.

Catamachihin cjuatacun nuju nguehe ngasunhndë sacuaha ngahnga xi ha camachihin.

¹¹ Nchunchujun ni ne, tuhun niñu xi xini.

¹² Ninchatuhun niji tséhë yéjë ni jyé niji ta hacuaha ngayin suvin ni tininchatihiñ rë xuta xi choho sahmi me cojo niji.

¹³ Caningatjuun xi chjaháchuva niji cojo cjuatacun niji ta, tuhun niji ngahñu xi cuma cuetjinxin tséhë cjuatsehen.

Tsujun suvun gubiernu cojo ngahñu, hacuaha tsujun ni hasen rë ngahñu cjua nuju.
Tsujun yéjë vë, yéjë nu, yéjë nixtin.

¹⁴ 'Hya xi cajnetaha oración jan, cachja sa Jesús cuitjin: sá xi ninchatuhun xuta xi choho casahmi me cojo nuju ne, hacuaha Nahmi nuju xi tacun ngahnga ne, tsinchataha me jyé nuju, ¹⁵ peru sá xi ninchatuun xuta xi choho casahmi me cojo nuju ne, hacuaha Nahmi nuju jan ne, tsinchataain me jyé nuju.

Jesús vicuya me tséhë hya xi nechan xun rë Nina

¹⁶ 'Ngayun ne, nixtin xi nechun xun rë Nina ne, nihñuu va xcusun nuju sacuaha sahmi xuta xi jo xcun jo hntsua me ta sahmi va me xcusun rë me, ta me vëhë ne, hisca catsindeya me xcusun rë me sehe cumatsejen xi tacun me xun rë Nina. Cuichjá quixi cojo nuju ta ha vëhë chji xi sacu rë me. ¹⁷ Vëhë xi ngayun ne, hya xi nechun xun rë Nina ne, tinchacjun, nihñu tyjahi yojo nuju. ¹⁸ Cuatjin nihñu cojo sa xi tsajin yo vëë rë xi nechun xun rë Nina, ta suva Nina, Nahmi nuju vëë me. Hane me vëhë ne cuechji me yun.

Cjuanchina xi tacunya ngahnga

¹⁹ 'Cavetjuun cjuanchina nuju nguehe ngasunhndë, ta nguehe ne, sahmi dañu chu xavi cojo xutsë. Nguehe ne cuma scuxahaya cha chéjë, hane sehe tsichéjë cha. ²⁰ Hitsë sa ndaja ne, tetjún cjuanchina ngajan ngahnga ta ngajan ne tsajin dañu xi sahmi chu xavi cojo sa xutsë. Ngajan ne scuxaain cha sehe xi tsichéjë cha. ²¹ Cuatjin meje rë xi ngajan cuetjun tsujun ta, tséhë xi hiscan tetjo cjuanchina nuju ne, hacuaha ngajan quitaha cjuatacun nuju cojo.

Ndihi rë yojo naja

²² 'Tuxcuun matsejen ne, vëhë xi sacuaha ndihi rë yojo naja. Vëhë xi hya xi tuxcuun ndacun ne, hatuxa seja cjuahasen cahntsua yojo naja. ²³ Peru sá xi tuxcuun hmu matsejen ne, hacuaha ma jñu cahntsua yojo naja. Sacuaha hasen xi jiya cahntsua yojo naja ne, sá xi hacuiin hasen xi cjuaquixi Jain ta, suva jñú ne, jercu tu jñú camahani cuma sa!

Tsajin yo xi ma fahacuenda xa tséhë Nina cojo tséhë cjuanchina

²⁴ 'Tsajin yo xi ma fahacuenda xa tséhë jo patrón ta, tséhë xi choho scuëë rë patrón xi tjun hane tsihmu cacun rë patrón xi majo jan. O sá tsajin ne, jemu cuetaha yojo rë cojo patrón xi tjun hane patrón xi majo jan ne, hisca sahmicuendaain rë. Vëhë xi xi ngu tangun ni ne, cumaji nihñu hacutjin xi meje rë Nina cojo hacutjin meje rë cjuanchina tsehen xi tséhë ngasunhndë.

Sahmi cuidadu Nina xuta ladu rë me

²⁵ 'Vëhë xi cuichjá cojo nuju ta hacuiin cuityjanguntacun sá sacu o sá sacuiin mé xcusun xi xinu xi sua nuju ngahñu. Hacuaha hacuiin cuityjanguntacun sá sacu o sá sacuiin tsjian xi chujun. Hitsë sa vengui chji rë cjuahñu nuju xi cumá rë xi chinu, hacuaha hitsë sa vengui chji rë yojo nuju xi cumá rë tsjian xi chujun. ²⁶ Chutsujun chu nisë xi vitjen chu ngahnga ta hacuiin tsitjé chu, hacuiin fanchi chu, hacuaha tsajin rë chu ndyahnga hiscan cuinchandaja chu xi sinë chu, peru Nahmi nuju xi tacun me ngahnga ne, tsicjen me chu. Ngayun ne, hitsë sa vengui chji nuju xi cumá rë chu nisë vë. ²⁷ Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ta hacuiin cavatsë chji me cjuahñu rë me. Tu mahya ne xi tjercu vityanguicacun me.

²⁸ 'Cuanitjin ne, ¿mé má chji rëhë xi cuityjanguntacun tséhë tsjian xi chujun? Chutsujun naxu liriu xi vetju nguijña ta tsihyaain nachjun hacuaha fahyaain tsjian rë.

²⁹ Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihi tsejen ngu naxu vëhë xi cuma rë tsjian jan.

³⁰ Sá xi cuatjin tsicaja Nina xca nguijña xi ngu nixtin ne siutaha nguijña, hane xi tu cuma nchujun nga ne, cueti ne, hitsë guan sa ngayun xi hatuxa tsicaja nuju me. Peru ngayun ne, cjéë cumangutacunndujun cojo me. ³¹ Vëhë xi hacuiin cumacjintacún hane cuinengunsuun cuitjin: "¿Mé comida xini? o sá ¿jani sacu niji xi sihin? o sá ¿mé tsjian chijin?" ³² Hacuiin ta, tséhë xi xcusun vëhë ne, xuta xi hvíin me cjuá rë Nina ne, me vëhë xi vityanguicacun me xcusun vëhë. Peru ngayun ne, Nina Nahmi naja ne, ha vëë

me xi machaja nuju xcusun vëhë. ³³ Tityjanguntacun hacuaha nechunyun rë gubiernu xi sahmi Nina, hacuaha catama tangun cjuatacun nuju cojo cjuatacun rë me ne, hane yëjë ni xcusun vëhë ne, quitahacoo sa sacú nuju. ³⁴ Cuanitjin ne, hacuiin cumacjintacún tsëhë mé xi cuma cuatju nchujuni, ta xi cumá rë nchujuni matsejen ne, hya yaha cjuacjintacun rë. Ngu nixtin ngu nixtin ne, chjuhun cuendun cjuacjintacun rë ta jima ngu nixtin cojo tsëhë.

7

Mijí rë xi nichuvan jingu sa xuta cojo cjuatacun rë me

¹ 'Hacuiin nichuvun jingu sa xuta cojo cjuatacun rë me, sehe hacuiin tsichuva Nina ngayun. ² Canichuvuun ta sá tsajin ne, chuva xi quixi yun cojo xuta ne, hacuaha cuanitjin quixi Nina cojo nuju; hacuaha chuva xi nichuvunyun matsejen ne, vëhë ni tsichuva Nina yun. ³ ¿Hacutjin má xi matsejen nuju xtë xi jiya tuxcun xingun? ta ngayun ne hitsë sa jyé xi jiya túxcun. ⁴ ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, machayiin nuju xi hitsë sa jyé xta xi jiya túxcun vë ni? ⁵ Ngayun xuta xi jo xcun jo hntsua ne, naxun titjun xtë jyé xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

⁶ 'Sá xi tjin nuju mé xi venguichji röhë sacuaha tjin rë cjuandaja xi casua Nina yun, tetjuhunndujun hacuiin tu yo ni tuhun rë ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaha cuichjataha nuju me.

Chjahyun rë Nina mé xi machaja nuju

⁷ 'Chjahyun rë Nina, hane sua nuju me. Tinchunsun, hane sacú nuju. Tinújun hacuaha chjahyun cahndé, hane Nina sua me cahndé xi cuisuhun cuinújun cjuacjintacun nuju. ⁸ Cuatjin nihñu ta, yëjë ni xuta xi fehya rë me ne, cuahatsja me, hane yo xi vanguise ne, sacu rë me, hane yo xi chja hacuaha fehya cahndé me ne, sacu cahndé cuisehen me.

⁹ '¿Há tjin ngu nahmi xi, hya xi quihndi rë me cjuehya ngu niñu ne, cahndé rë xi vëhë ne, sua me ngu ndyojo, ¹⁰ o sá xi cjuehya quihndi yojo rë chu ti ne, cahndé rë vëhë ne, sua me ngu yë? ¹¹ Sá xi ngayun xi xuta jyé yun ma tuhun rë quihndi nuju xcusun xi ndaja. Hitsë guan sa Nina Nahmi naja xi tacun me ngahnga xi jyé hnga me cojo cjuandaja rë me ne, me vëhë vëe me mé cuatjo ndaja xi cuma sua me xuta xi cjuehya rë me.

¹² 'Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me: cuatjin nihñu ta cojo ngu xcusun ni xi tinihñu vëhë ne, ngayun tinihñuchuhun yëjë ni cjua rë ley cojo yëjë ni cjua xi catsihindu profeta.

Ejemplu tsëhë tingotjo xcu

¹³ 'Cuisuhun hiscan sahmi Nina gubiernu sá xi cuisuhun tingotjo xcu ta, tsëhë xi sá xi cuisuhun táha tingotjo té o ndiya xi cjín me vatjun me ne; vëhë ni cjuecojo nuju cjuaveya hiscan xi jemu cjín xuta cjue me. ¹⁴ Ta tingotjo xcu o ndiya hndé ne, vëhë xi cjue cojo nuju hisca xi sacu nuju cjuahñu. Jemu chuva xuta xi sacu rë me tingotjo xcu jan.

Tsejen mé xcusun xuta me ngatsë rë mé xi sahmi me

¹⁵ 'Cuidadu tsëhë profeta ndacha ta xi tjengui nuju me, jeya tsejen xcusun rë me sacuaha xcusun rë chu tsánga, Peru quixiin vëhë ta suva cjuandacha ta xahasen rë me ne, quitsë rë cjuatsehen sacuaha cahntsua xahasen rë chu lobo. ¹⁶ Tsejen mé xcusun xuta me ngatsë rë xcusun xi sahmi me. Sacuaha ngu ya ne, tsejen mé xcusun rë ngatsë rë tu xi sua. Sacuiin rë xuta uva tsëhë ya nahyálatu, hacuaha sacuiin rë xuta tuhaxi xi hmí higo tsëhë nahyándezya. ¹⁷ Quixi Jain ta ngu yatjë xi ndaja ne, sua tú xi ndaja, hacuaha ngu ya xi machjiriin ne, hacuaha machjiriin tu rë. ¹⁸ Vëhë xi ngu yatjë ndaja ne, cumaji sua tú xi machjiriin, hacuaha ngu ya xi machjiriin ne, cumaji sua tú xi ndaja. ¹⁹ Hane yatjë xi machjiriin tú rë ne, xtíjñi rë tsëhë xi ndaja sehe cueti. ²⁰ Cuanitjin xuta ne, tutjin rë yatë vë ne, cuatjin rë me ta, tsejen xcusun rë xahasen rë me ngatsë rë xcusun xi sahmi me.

Cachja Jesúis xi hacuiin yëjë ni xuta cuisehen me gubiernu xi sahmi Nina

²¹ Tjin yo me xi cuichjacojo ná ta nai rë me ngahan, peru cuiisiin me gubiernu xi sahmi Nina nahmi naha; ta ngajan cuisehen suva xuta xi sahmichihin me cjuatacun xi vitexa Nahmi naha xi tacun me ngahnga. ²² Véhë xi handasa xi jemu cjín me cuichja me nixtin hya jan cuitjin ta: “Nai naha, ngatsë rë xi hñu ngayun, véhë xi caveyinnangui ñihi nuju ne canújin cjua rë Nina, hacuaha xi canújin ñihi nuju ne, canaxinxin xitsehen, hane cojo ngahñu rë ñihi nuju cama canihñi cjuarcun.” Cuatjin cuichja me nixtin hya. ²³ Ngajan xi ngahan ne, cuitjin cjuayanguë tséhë me nixtin hya: “Tángunxun tsahan ta hveen yo ngayun, ngayun xi nihñu cjuatsehen.”

Ejemplu tséhë jo ndihya

²⁴ Yahnga xuta xi visiñuju me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha quicun xi hya xi casahmi cha ngu ndihya matsejen ne, hiscan xcun nanguihñu casahmi cha. ²⁵ Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, peru caticjaainjnii tséhë xi xcun nanguihñu secun. ²⁶ Peru yahnga nga xuta xi visiñujuu me cjua naha hacuaha sahmii me sacuatjin chjá cojo rë me matsejen ne, tangun me cojo ngu cha ngarca xi hya xi casahmi cha ngu ndihya matsejen ne, hiscan xcun nangu tsumi casahmi cha. ²⁷ Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, hane tu ngu ñahñu ne caticja ndihya jan, ngu cafë cavetsunya.

²⁸ Xi cajnetaha cachja Jesús ne, xutacjín ne jercu quijircun rë me tséhë cjua xi cavicuya Jesús ta, ²⁹ tséhë xi cjua xi vicuya me ne, jercu tjin rë ngahñu, hacuiai sacuatjin cjua xi vicuya maestru xi vicuya ley.

8

Casahmi Jesús xi camandaja ngu cha xi yaha chuxin rë cha chíhin vitaha

¹ Hya ha cavijne me tséhë ndetjun jan, jemu cjín xuta tjengui rë me. ² Hya xi camá ne, cafehe ngu cha xi jingujyë ni chuxin rë yaha rë ngu chíhin xi vitaha, caticjarcun cha cafaharcun cha Jesús hane cachja cha cuitjin cojo rë me:

—Tatá. Sá xi meje nuju ne, cuma chjuhunxun chíhin xi yaha ná vi. —Cuatjin cachja cha.

³ Hane xi catsixinga Jesús tsja me ne cavetahatsja me cha ne, sehe cachja me cuitjin:
—Meje ná. Catamandaja ngaye. —Cuatjin cachja me.

Hane chíhin jan ne, ngutjen ni cafëya. ⁴ Sehe cavitexa me cha cuitjin:

—Hisca xi ngu ni canujiin cojo. Tihin ningacuin yojo riji xcun nahmi sehe catutsejen me xi camandaja ye. Sehe tihinchjehe cjuatjo riji xi tehe rë Nina ngatsë rë xi camandaja ngaye tséhë chíhin jan, sacuaha cavitexa Moisés xutachanga naja. Cuatjin nihñi cojo sa xi cumatsejen xi camandaja Jain ngaye.

Casahmi Jesucristu xi camandaja cha mosu xi cavatsë capitán

⁵ Xi cavatju vihi ne, sehe rë cavisehen me nandya Capernaum, hane ngajan cafehe tjengui rë me ngu capitán cafehya cha me favor ⁶ cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rë cha hane jemu jiñañihi cha.

⁷ Ngajan cafayangui Jesús:

—Cjué ngahan, tsírquë rë cha.

⁸ Ngajan xi cafayangui capitán jan cuitjin:

—Hisca hacuiai sahmi ngujyë xi ngayun cuinduvun ndya naha ta tséhë xi hitsë sa hñu cjua yun xi cuma ná ngahan. Quihndë ne, ndastu tinújun xi cumandaja mosu naha hane cuma ndaja cha. ⁹ Hacuaha ngahan ne, tjin ná xuta xi matitjun tsahan, hane hacuaha tjin ná ngu cientu sindadu xi siu ngahma gubiernu naha xi sahmi hacutjin xi meje ná. Hya xi chjá cojo ngu xi cjue ne, fi; hacuaha xi chjá cojo ngu nga xi cuinduva ne, nduva,

hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayanguí capitán.

¹⁰ Hane xi cahndé Jesús cjua vëhë ne, jemu quijircun rë me tséhë capitán jan, hane cachja me cojo xuta xi tjengui rë me cuitjin:

—Cuichjá cojo nuju ngu cjua ta, ngajñi naja ngayejen ni ngayaan xuta tjé rë Israel ne, cjëë scuëë ngu xuta xi cuatjin ndaja mangucacun me cojo ná sacuaha capitán vihi xi hacuin xuta tjé naja me. ¹¹ Hacuaha cuichjá cojo nuju ta cuinduva xutaxín tséhë táha ladu vetjucaa tsuhi cojo táha ladu vetje tsuhi cuiyuju me sinësuhi me cojo Abraham cojo Isaac cojo Jacob ngajan hiscan sahmi Nina gubiernu, ¹² Peru xuta tjé rë Abraham xi quihndi cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.

¹³ Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tséhë xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

Jesucristu casahmi me xi camandaja nahya rë Simón Pedru

¹⁴ Hya xi cama ne, cavisehen Jesús ndava Pedru ne, hane cavëë me xi jiñahmu nahya rë Pedru cojo chíhin suë. ¹⁵ Ngajan xi cavetahatsja Jesús tsja na, hane ngutjen cavetjuxin chíhin jan tséhë na. Hane hora vëhë ni ne, cavisatjenhnga na hisca cama cafahacuenda na me.

¹⁶ Hane hora xi tivetje tsuhi ne, xuta ne, quijicojo me cjín xuta xi hincha rë xitsehen hane quiji me hiscan tacun Jesús. Hane Jesús ne, cavaxëxin me xitsehen jan cojo cjua ni, hacuaha catsirqui me yëjë xuta hmu rë. ¹⁷ Cuatjin casahmi me sehe cumachihin cjua xi cachja profeta Isaías xi cachja me cuitjin: “Cafaha suva me yëjë chíhin hinda xi tjin rë yojo naja, hane suva me cavaha me chíhin naja.”

Xuta xi meje cjue cojo Jesucristu

¹⁸ Xi cavëë Jesús xi jemu tsé xuta hiscan tacun me ne, casua me cjua cojo xicjin me xi cjuexin cojo rë me ngunda laguna. ¹⁹ Ngajan cafehe tjengui rë me ngu cha maestru rë ley sehe cachja cha cuitjin:

—Maestro. Tu yani ni xi cuangun ne, cjué cojo nuju. —Cuatjin cachja cha.

²⁰ Sehe Jesús ne, cafayanguí me cuitjin:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi hatuxa Quihndi rë Xuta ngahan ne, hisca ndya naha tsajin.

—Cuatjin cachja me.

²¹ Ngu nga xuta xi tjengui rë me cachja cojo rë me cuitjin:

—Tatá. Cuanguen cojo nuju Peru hya xi cuatju seyaniji nahmi naha.

²² Peru cafayanguí Jesús cuitjin:

—Hanguen. Tehe vëhë catisahmi xuta xi cahme cjuatacun rë me, me vëhë catinchaniji me nima.

Jesucristu casahmi me xi cuasen tjo cojo tsindyu rë nandan

²³ Hya xi camá ne, cavisehen Jesús cahntsua ngu barcu hane ngajan quiji tjengui rë me xuta ladu rë me. ²⁴ Hora xi cjuí barcu jan ne, canduva ngu tñohñu xi cavanga xcun laguna jan, hane hisca meje tsa rë barcu jan cojo tsindyu rë nandan xi satë rë jan. Peru hora vëhë Jesús ne, jiñafé me. ²⁵ Sehe xuta ladu rë me ne, catsingasca rë me, hane cuitjin cachja me:

—¡Tatá, tatá! ¡Naxuntjun naja! ¡Nguehe cjuéyan! —Cuatjin cachja me cojo Jesús.

²⁶ Hane cachja Jesús cuitjin:

—¿Mé má cuatjin jemu rcun ngayun, ngayun xi cjëë cumangutacún cojo ná?

Hya xi cachja me cuatjin ne, cavisatjenhnga me cavatëcia me ngahñu rë tjo jan cojo tsindyu rë nandan jan, hane jinguýy ni jan ne, cavejñajyuu. ²⁷ Hya xi camá ne, xuta jan ne, jercu quijircun rë me hane cachja me cuitjin:

—¿Yo xuta me vihi xi hisca tjo hisca tsindyu rë nandan vihndë tséhë me?

Cha Gadara xi hincha xitsehen xahasen rë

²⁸ Hya xi camá ne, cafehe Jesús cojo cha ladu rë me ngunda vëhë, hisca ladu rë xuta nandya Gadara ne, ngajan jo me xi hincha xitsehen xahasen rë quiyi tiña me tséhë Jesús. Catsijo me xi cuacun jan ne, siu cahndé me ngojo naxi hisca xi sacuaha tsjun. Hacuaha jemu cjan rë me hisca tsajin yo xi tsujihiya taha vë jan. ²⁹ Hya xi cavechu me hiscan tacun Jesús, cojo ngahñu rë xitsehen jan, cavetsihin cachja me cuitjin:

—Mé má cuatjin ninguisuhunjñu cojo niji ngayun Jesús, Quihndi rë Nina. ¿Há tuhun niji cjuañhi handasa chaja sa nixtin rë?

³⁰ Nixtin hya ne, ngajan tiñataha ne, tacun ngu cahndé hiscan jemu cjín chu chinga hinchataha chu tijine chu. ³¹ Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tséhë xahasen rë cha xi cuicun vi, ningatjun niji hiscan siutaha chinga, hacuaha ningatuhun niji xi cuisihin cahntsua xahasen rë chu.

³² Hane cachja Jesús ta:

—Joho, tangun.

Hya xi camá ne, cavetjuxin xitsehen tséhë cahntsua xahasen rë cha jan, hane cavisehen cahntsua xahasen rë chu chinga jan. Hyá xi camá ne, yéjë ni chu chinga jan ne, cavanga chu quijijne chu taha rcu ndetjún, hane ngajan cavixuya chu ngajñi nandá tséhë laguna, hane ngajan café chu, cahme chu.

³³ Hane ngatsë rë chircun jan ne, cha xi sahmi cuidadu rë chu chinga jan, cavanga cha quiyi cha nandya. Hane xi cavisehen cha nandya, casua cha camachaya rë xuta tséhë xcusun xi camá rë chu chinga jan cojo xcusun xi cavatju jo cha xi hincha rë xitsehen jan.

³⁴ Hya xi camá ne, yéjë xuta tséhë ladu tséhë nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehyá me Jesús xi catje me tséhë ladu rë me jan.

9

Casahmi Jesús xi camandaja ngu xuta xi cahme yojo rë

¹ Hya xi camá ne, cavisehen nga Jesús barcu, cafe me nangui rë me ta tacun ngunda laguna. ² Hya xi camá ne, ngutjen ni quijitjengui xuta me hane xuta jan ne, yahahnga me ngu cha xi cahme yojo rë cha, jiña cha xcun nijñä rë cha. Hane xi cavëë Jesús xi cuatjin mangu cacun xuta xi cuacun jan cojo rë me ne, sehe cachja xu me cojo cha hmu rë jan cuitjin:

—Tuhun cjuasua xahasen nuju ta jyé nuju, tsan ne, ha camanchataha. —Cuatjin cachja me.

³ Ngajan xi ngu jo maestro xi vicuya cjuachacun ne, cavetsihin catsingataha cacun me cuitjin: “Nina tsixcuehyu cha.” ⁴ Hane tséhë xi vëë Jesús cjua xi tsingatahacacun maestro jan ne, cuitjin cavinenguise me cha:

—¿Mé má cuatjin choiyihi ningatuhuntacun? ⁵ Xi má nuju, ¿jarë cjua xi hitsë sa tsaviin fi xi cuichjá: há xi “Jyé nuju ne, ha camanchataha” o há tsajin ne; há “Tisatjunhngun ne, tujuhunyun?” ⁶ Peru nguehe suá cumachaya nuju ta ngahan xi Quihndi rë Xuta Jain ngahan ne, yahá xá xi tsinchátaha jyé rë xuta nguehe ngasunhndë.

Sehe ngajan cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun chjuhun nijñä nuju vë, sehe tjangun ndya nuju.

⁷ Hya xi camá ne, cavisatjenhnga cha quiyi cha ndava cha. ⁸ Xi cavëë xuta xcusun xi camá ne, quijircun rë me, sehe casahmi hnga me Nina ta Nina ne, casua me cahndé Jesús xi cuatjin casahmi me.

⁹ Xi quiji sa xu Jesús ne, cavechu me hiscan cavëë me ngu xihin xi tacun cahndé hiscan xi faha tujúnsa. Mateo hmí rë me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

¹⁰ Ha nixtin vëhë ne, tijine Jesús niñu ndava Mateo. Hane jemu cjín sa cha xi faha tujúnsa cojo yahnga cha xi tsitjungui xuta nangui vë ne, hacuaha tijine cha niñu ngajan.

¹¹ Peru xi cavëë cha partidu fariseo xcusun jan, sehe cavinenguise cha cojo cha ladu rë Jesús cuitjin:

—¿Mé má jinë hvi maestru nuju cojo cha xi faha tujúnsa cojo ngupo sa cha xi hacuaha cha tsehen cha? —Cuatjin cachja cha.

¹² Peru cavihndé Jesús cjua xi cachja cha, hane cafayangui me cuitjin:

—Xuta xi hacuin hmu rë me ne, mamijí rë me xi cjuahacuenda rë me doctor ta suvá ni xuta xi hmu rë me ne, me vëhë meje rë xi cjuahacuenda rë me doctor. ¹³ ¿Há vijnii rcun mé vijne cjua rë Nina vihi?: “Hitsë sa ndama ná xi mayuma nuju xingun xi cuma rë xi nicuhun chu sacuaha cjuatjo xi tuhun ná.” Hacuanitjin ná ngahan ta ngahan ne, hacuin canduvá xi squindáyavaha rë xuta xi tsajin xi cun rë me xcun Nina, ta xa xi canduvá ne, xi squindáyavaha rë xuta tsehen, hane cuichjá cojo me xi tsindeya me cjuatacun rë me.

—Cuitjin cachja Jesús.

Mé tsëhë xi casahmii Jesucristu cojo xuta rë me xun rë Nina.

¹⁴ Ngajan xi xuta ladu rë Juan ne, cafehe me cavinenguise me Jesús cuitjin:

—Ngayijin ni, vinechin xun rë Nina hacuaha cha partidu fariseo hacuaha viyuju cha xun rë Nina. ¿Mé tsëhë xi xuta ladu nuju ne, sahmii me cuatjin ne?

¹⁵ Ngajan xi Jesús ne, cuitjin cachja me cojo cha:

—Cumaji xi xuta rë cha xi tivixan ne, sahmi me xun rë Nina jinguyëjë rë xi cha xi tivixan ne, tacun cha cojo rë me. Peru cuechú nixtin xi cha xi tivixan jan ne, chjaháxin rë cha tséhë xuta rë cha, hane hya cuma sahmi me xun rë Nina. —Cuatjin cachja Jesús.

¹⁶ Hacuaha cachja sa me ta: —Tsajin yo xi cueyacoo ngu tsjian changa cojo ngu rquí tsjian xi cjëë cjueyu ta sá xi cuatjin sahmi me, xi cjueyu tsjian xatsë jan ne, cuicheya rë tsjian changá jan hane sahmi jyë sa rë hiscan xi ntsun. ¹⁷ Cuanitjin ne, tsajin yo xi vincha xan xatsë cahntsua chuxin changá ta, sá xi cuatjin sahmi me ne, tsitsingá rë chuxin jan. Hane cjuë cuixu xan jan, hacuaha cuetsun chuxin jan. Xi meje rë ne, xan xatsë ne, xincha cahntsua chuxin xatsë ta cuatjin ne, catsijo ni ne tsajin mé cuma rë.

Catsicuya Jesucristu cjuahñu rë quihndi rë Jairo; hacuaha camandaja ngu na xi casatëtsja tsjian rë Jesucristu

¹⁸ Hora xi tivisiajmi me cuatjin ne, ceduva ngu me xi xutaxa rë yungun. Hane quiji caticjaxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

¹⁹ Hya xi camá ne, cavetju Jesús quiji me cojo nahmi rë na lihndi jan hacuaha quiji xuta ladu rë Jesús. ²⁰ Hane ngajni cjui me ne, ngu na xi tjin rë tejó nu xi yaha rë na chíshin xahmajni quiji tiña na táha ngaxtun Jesús ne, quiji cavetahatsja na ntsacu tsjian rë me ta, ²¹ catsingatahacacun na cuitjin: “Sá xi cuetahantsa ndastu tsjian rë me ne, cumandaja ngahan.” ²² Peru cavuya Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

²³ Hya xi camá ne, cafehe Jesús ndava xutaxa rë jan. Ngajan cavëë me xi ha siu cha chjinetyjo cojo xutacjín xi jihnda me ngatsë rë cjuandusin. ²⁴ Sehe cachja me cojo xuta cuitjin:

—Tjangunxun. Na lihndi vë ne, hacuin cahme na ta jiñafé ni na. —Cuatjin cachja me.

Ngajan xi xuta jan ne, tu cavejnucëë me Jesús. ²⁵ Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsatisjenhnga me na. ²⁶ Hya xi camá ne, cavitsojo cjua rë xcusun jan jingujyé nanguí vë.

Casahmi Jesús xi camatsejen rë jo cha rcá

²⁷ Xi cavetju Jesús quiji me tséhë ngajan ne, canduva tjengui rë me jo cha rcá hane cajindaya cha cachja cha cuitjin:

—¡Ngayun Jesús, tjé rë David! Catamayuma nuju ngayin. —Cuitjin cachja cha.

²⁸ Xi cavisehen Jesús ndihya ne, sehe cavechutaha cha rcá me, hane cavinenguise Jesús cha cjua vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

²⁹ Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacuaha xi macjain nuju.

³⁰ Hane ha hora vëhë ni ne, catuxaha tuxcun cha hane camatsejen rë cha. Ngajan xi Jesús ne, cavitexa me cha cuitjin:

—Tsajin yo cuinújun cojo tséhë xcusun vihi.

³¹ Peru cavatju xi quiji cha jan ne, cavitsojo cjua tséhë me jingujyé nandya jan.

Cavaxëxin Jesús ngu xitsehen xi casahmi lihmi rë ngu cha

³² Hora xi ha quiji jo cha jan ne, cafehe xuta xi canduva me cojo ngu cha xi hincha rë xitsehen; hane xitsehen jan ne, casahmi lihmi rë cha. ³³ Hane hya xi cavetju xitsehen tséhë cha lihmi jan, cavetsihin cachja cha. Hane xutacjín xi cavutsejen me ne, jemu quijircun rë me ne cachja me cuitjin:

—Nguehe nanguí naja Israel ne, tsajin ngu nixtin xi tsejen cjuarcun sacuaha tijimá quihndë.

³⁴ Peru cha partidu fariseo ne, cachja cha cuitjin:

—Xitsehen xi matitjun ne, vëhë casua rë cha xa xi vaxëxin cha xitsehen.

Jemu cjín xuta xi meje rë xi cuijñu me cjua rë Nina

³⁵ Jesús ne, catsujihiya me jemu cjín nandya cojo ranchun ne, ngajan cavicuya me xuta cahntsua yungun rë me. Casua me camachaya rë me cjuandajyihi xi chja tséhë gubiernu xi sahmi Nina. Hacuaha catsirqui me xuta tséhë yëjë ni chíhin cojo yëjë ni xcusun xi cjuahmu. ³⁶ Peru xi cavëé Jesús xutacjín ne, camayuma rë me xuta jan ta tséhë xi jemu va tjin rë xahasen rë me, jemu camachohocacun me sacuaha chu tsángä xi tsajin yo xi cjuahacuenda rë chu. ³⁷ Vëhë xi cuitjin cachja me cojo cha ladu rë me:

—Xutacjín vi ne siu me sacuaha siu niji ngajan nguijña xi jemu ndaja camá peru tsajin cha mosu xi cuanga rë. ³⁸ Vëhë xi meje rë xi chjahyun rë Nai naja xi tsingatju me xuta xi cuanga me.

10

Cavaxijin Jesús tejó xuta ladu rë me

¹ Cavechú ngu nixtin xi casahmitangun Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacún vë, cuitexa me yëjë xitsehen hane cuaxëxin me xitsehen tséhë xuta; hacuaha sahmi me xi xuta xi hmu rë me ne cuma ndaja me tséhë tu me ni chíhin xi yaha rë me.

² Cha xi tejó jan ne, cuitjin hmí rë cha: titjun ne, Simón, me xi hacuaha yaha ñihi rë Pedru, cojo Andrés hntsë Simón, Jacobo quihndi rë Zebedeo cojo Juan hntsë Jacobo,

³ Felipe cojo Bartolomé, Tomás cojo Mateo, cha xi faha tujúnsa, Jacobo quihndi rë Alfeo cojo Tadeo, ⁴ Simón xi tséhë partidu cananayu cojo Judas Iscariote, me xi sahmi entregadu rë Jesús.

Catsingatju Jesucristu tejó xuta ladu rë me xi cuichja cjuandajyihi rë Nina

⁵ Tejó xuta jan ne, catsingatju Jesús me ne, cavitexa me cuitjin:

—Tanguun ngajan ndiya xi fi xuta xi hviín me cjuá rë Nina, hacuaha cuisuun nandya rë distritu Samaria ta; ⁶ tángun hiscan siu xuta nandya rë Israel, xuta jan ne tangun me cojo ngu chu tsángá rë Nina xi cachaja chu. ⁷ Tuhun cumachaya rë xuta cjuandajiyihi rë Nina xi jima tiña gubiernu xi sahmi me. ⁸ Nihñu xi cuma ndaja xuta hmu rë, nicuyun cjuahñu rë nima, nihñu xi cuma ndaja xuta xi yaha chuxin rë me chihin vitaha, hacuaha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vëhë xi hacuaha tu cuatjo ni tuhun ngahñu jan.

⁹ 'Xicachjuun oro o sá quicha tyava o tu mé ni tujún xi cuinchunndujun cahntsua tsá tujún nuju xi tséhë gastu nuju. ¹⁰ Xicachjuun changa, xicachjuun ngu xúta tsjian, hacuaha xicachjuun ngu xúta chuxinxte o sá ngu bastón ta, xuta xi sahmi me xá ne, tséhë xá jan sacu rë me gastu rë me.

¹¹ 'Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunsun ngu xuta xi ndaja xahesen rë me, ngajan ndava me ne, nechuncahndun hisca xi cuetjunxun tséhë nangui jan. ¹² Hane hya xi cuisuhun ngu ndihya ne, tinújun ngu nina cuitjin: "Nina sua nuju me cjuandaja cjuajeya." ¹³ Hane sá xi nai rë ndihya jan ndaja vëë me yun ne, catisatë rë ndava me jan cjuajeya; peru sá xi hacuiin ndaja vëë me yun ne, satiin rë me cjuajeya jan. ¹⁴ Hane hiscan xi tjin xuta xi cjuahatsjaain nuju me, xi chjuhun ndiya xi cuetjunxun tséhë nandya vëhë ne, titsunu chojo rë ntsacu. ¹⁵ Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tséhë jyé rë me ne, hitsë sa jyé castigu cuatju xuta tséhë nandya xi cafahatsjaain nuju jan, xi cumá rë xuta tséhë nandya Sodoma cojo xuta nandya Gomorra.

Cjuáñhi xi cuatjun cuma

¹⁶ 'Ngahan titsingátju nuju ngayun xuta jeya xi cuangun ngajñi rë xuta hnga cacun sacuaha cjue ngu chu tsángá ngajñi rë chu cjan rë. Vëhë xi meje rë xi ndaja quicuntacun sacuaha quicuncacun chu yé, peru hacuiin tsavi yun sacuaha tsajin tsavi chu paloma. ¹⁷ Peru nechun cuidadu ta, cjuaha nuju xuta cjuecojo nuju me xcun xutaxa rë ndihyavasen, hacuaha cuaja nuju me ngajan yungun rë me, ¹⁸ hisca cjuecojo nuju me xcun gobernador, hacuaha cjuecojo nuju me xcun me xi vitexa me jingujyé ni nandya. Cuatjin cuangun ngatsé rë xi ladu naha má ngayun. Ngatsé rë vëhë sacu nuju cahndé xi ninguijun cjuá xi cavicyá nuju xcun xuta jan cojo xuta xi hviín me cjuá rë Nina. ¹⁹ Hya xi cuatjin cjuecojo nuju me ne, hacuiin cuityjanguntacun tséhë hacutjin xi ninguijun ta, tséhë xi hora vëhë ne, Nina sua me ngayun cjuá xi nicuyun. ²⁰ Ta tséhë xi hacuiin cjuá nuju xi cuinújun ta tséhë Hasen rë Nina cuinduva cjuá xi cuinújun.

²¹ 'Hacuaha xuta ladu naha ne, hntsé me, cuinchajyé rë me, xutacha rë me, cuinchajyé rë me, quihndi rë me cuinchajyé rë me cojo sa xi xutaxa rë ne, cjuaha rë me me ne, tsiquehen rë me. ²² Yéjé ni xuta ne, choho scuëë nuju me, tséhë xi ladu naha ngayun. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. ²³ Hya xi tsuyihiyatjengui nuju me ngu nandya ne, tangun ngu nandya tiñataha ta, cuichjá quixé cojo nuju ta xi chaja sa cuatjun jingujyé ni nandya tséhë nangui rë Israel ne, cuya ngahan Quihndi rë Xuta.

²⁴ 'Ngu cha xi sehe tivutaya matsejen ne, hacuiin hitsë sa matitjun cha xi cumá rë maestru rë cha, cuanitjin ne, ngu cha hndixahan ne, chuva venguichji rë cha xi cumá rë nai rë cha. ²⁵ Catamangucacun cha tséhë xi cuechú nixtin xi tangun cuenguichji rë cha cojo maestru rë cha o tangun cuenguichji rë hndixahan cojo nai rë. Ha chuva vëhë ni cuatjun ta sá xi choho cuichja xuta nai rë ndihya ne, ngu xitsehen me, hitsë sa choho cuichja me tséhë xuta rë nai rë ndihya jan.

Xicarcuun xuta

²⁶ 'Xicarcuun xuta condra nuju. Yéjé ni xcusun xi casetsangui ne, cuechú nixtin xi chjaháxin rë xi titsangui rë. Vëhë xi yéjé ni xcusun xi hma ne, handasa sahmangui ne, peru cuechú nixtin xi cuetjucaa tsejen. ²⁷ Yéjé ni cjuá xi cuichjá cojo nuju hiscan jñu ne,

cuinújunsun hiscan hasen. Yéjë ni cjua xi cuichjáhma ne, cuechú nixtin xi cuinuhya rë jinguyéjë ni nandya. ²⁸ Xicarcuun xuta xi cuma tsiquehen yojo nuju, peru ngaxtun vëhë ne, tsajin me dañu ma sahmi me cojo hasen nuju. Hitsë sa ndaja ne, rcun Nina, me xi tjin rë chuva rë xi tsiquehen me yojo nuju hane hacuaha tsingatjenya nuju me hiscan xi má hasen nuju castigu.

²⁹ 'Chutsujun ta jo chu nisë langa ne, ngu ni tujún chji rë chu, peru handasa cuatjin ne, hiscan ngu chu cumaji cueya chu sá xi suaain Nina cahndé. ³⁰ Hane ngayun ne, hisca jimangu tsjarcun ne xqui tjin rë Nina. ³¹ Vëhë xi xicarcuun ta, tséhë xi jimangu ngayun ne, hitsë sa jercu vengui chji nuju xi cumá rë chu nisë vë, handasa jemu cjín chu.

³² 'Yéjë xuta xi tsinguixi me xcun yahnga xuta xi xuta ladu naha má me ne, hacuaha ngahan tsinguixé xcun Nahmi naha xi tacun ngahnga xi xuta ladu naha má me. ³³ Peru yéjë xuta xi tsinguixiin me xcun yahnga xuta xi hacuiin xuta ladu naha má me ne, hacuaha hacuanitjin ni tsinguixé ngahan xcun Nahmi naha xi tacun ngahnga.

Ngatsë rë cjua rë Jesucristu xi sahmi condra xutacjin xicjin me

³⁴ 'Xi má nuju ngayun ne, ¿há cjua jeya canduvácojo xi cumá rë xuta ngasunhndé? Hacuiin cuatjin. Ngahan ne, si canduvá cojo. ³⁵ Canduvá tsinguetsuntaha xicjin xuta. Cha quihndi ne, sahmi condra cha nahmi rë cha, hane na quihndi ne, sahmi condra na naa rë na, hane jahnda ne, sahmi condra na nahya rë na. ³⁶ Cuatjin xuta condra rë me ne, cuma ni xuta rë me.

³⁷ 'Sá xi ngu me ne hitsë sa tsihmu cacun me nahmi rë o sá xi naa rë me xi cumá ná ngahan ne, vechiin chuva rë xi tsahan cuma me. Hacuaha sá xi ngu me ne hitsë sa tsihmu cacun me quihndi rë me sá xihin sá chjuun xi cuma rë xi tsihmu cacun me ngahan ne, vechiin chuva rë xi tsahan cumá me. ³⁸ Ha cuanitjin ne, sá xi ngu me ne mijí cjuejñahñu xahsen rë me xi cjuecojo me ndiya naha handasa cueya me xcun cru ne, cumaji cuechu me chuva rë xi tsahan cumá me. ³⁹ Xuta xi nguehe ni ngasunhndé meje cjuenduju me cojo cjuahñu rë me ne, titsichajá me cjuahñu xatsë xi sua Nina me. Peru xuta xi titsichajá me cjuahñu rë me nguehe ngasunhndé ne ngatsë naha ne, hatuxa sacú rë me cjuahñu xatsë xi sua Nina me.

Cjuatjo xi sua Nina

⁴⁰ 'Xuta xi cjuahatsja me yun, tangun sacuaha xi cjuahatsja ná me ngahan suva, hane xuta xi cjuahatsja ná me ne, tangun sacuaha xi cjuahatsja me Nahmi naha, me xi catsingatju ná. ⁴¹ Xuta xi cjuahatsja me ngu me xi chja me cjua rë Nina ne ngatsë xi chja me jan cjua rë Nina ne, tangun chji sacu rë me cojo me jan. Hacuaha xuta xi cjuahatsja me ngu xihin xi tyjahi cjuatacun rë me xcun Nina ngatsë rë ndaja xihin jan ne, tangun chji sacu rë me cojo xihin jan. ⁴² Cuanitjin ne, xuta xi sua me ndastu ngu vasu nandá cjuahatsja tu yo ni xi xuta ladu naha ne handasa jemu yuma jyihi me ne, sacu chji rë me ngatsë rë xi cuatjin sahmi me cojo xuta xi tjengui ná.

11

Cha xi catsingatju Juan Vitenda rë Xuta

¹ Hya xi camá ne, xi cajnetaha cjua xi caviteja Jesús cha xi tejó má jan, sehe cavetjuxin me quiji me nandya xi siutahndee, ngajan cavicuya me xuta cachja me cojo tséhë cjuandajyihí rë Nina.

² Nixtin hya ne, ha jiya Juan Vitenda rë Xuta ndavaya, hane ngajan camachaya rë me tséhë xcusun xi sahmi Jesús. Vëhë xi catsingatju me ngujo cha ladu rë me xi quiji cha ³ cavinenguise cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguise xuta xi catsingatju Juan jan.

⁴ Hyá xi camá ne, catsicuya Jesús cjua cojo cha xi cuacun jan hane cuitjin cachja me:
—Tjangun ne, sehe tinújun cojo Juan yéjë cjua xi canuhyun cojo yéjë xcusun xi cahyun. ⁵ Tinújun ta xuta rcá ne, camá camatsejen rë me; xuta rengun ne, camá

quijindaja me; xuta xi yaha rē chíhin vitaha xi setaha yojo naja ne, camandaja me; nima ne, cavuya nga cjuahñu; xuta yuma ne, casacu camachaya rē me cjuandajyihu rē Nina.
⁶ Hacuaha jemu ndaja tséhë tu yo ni xuta xi hacuiin tsismicacun me xi mangu cacun me cojo ná. —Cuatjin cachja Jesús.

⁷ Hane hya xi cavetju quiji xuta ladu rē Juan jan ne, sehe cavetsihin cachja Jesús cojo xutacjín jan cuitjin tséhë Juan:

—Hya xi cavetjun catsangun ngajan ngu xín tséhë nandya catsangun tjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rē me, sacuatjin rē ngu ndeje xi fi nguehe fi ngajan rcu sacuatjin cjui tjo?
⁸ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihu camahani? Hacuiin cuatjin. Ha hyaan matsejen ta xuta xi jercu tu ndacun camahani tsjian vaja me ne, sacuiin naja ngajan xin jan, ta sacu naja ndava ngu xuta nchina. ⁹ Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne, hitsë sa vengui chji rē me xi cumá rē yëjë sa profeta xi Yahnga. ¹⁰ Hacuaha me vëhë xi cachja Nina tséhë me xcun xujun rē me cuitjin:

Ngahan ne, tsingátju titjun ngu cha

xi scuxaha cjuatacun rē xuta tséhë xi cjuehe ngaye.

¹¹ Cuichjá cojo nuju matsejen ta ngajñi rē yëjë xuta xi catsin me tséhë naa rē me matsejen ne, tsajin ngu xi hitsë sa vengui chji rē xi cumá rē Juan. Peru hya xi cuetsihin Nina sahmi me gubiernu nguehe ngasunhndë matsejen ne, xuta xi chuva cuengui chji rē me nixtin hya matsejen ne, hitsë sa cuengui chji rē me nixtin hya, xi cuma rē xi vengui chji rē Juan quihndë.

¹² Hisca nixtin xi caxtenda Juan hisca nixtin quihndë ne, má cjuasuë xi satë rē gubiernu xi sahmi Nina; xuta ne, meje cuisehen me ngajan, handasa cojo cjuachan. ¹³ Xi chaja sa nduva Juan ne, yëjë ni xujun xi catsihindu profeta cojo xujun rē ley ne, suva casua camachaya rē xuta tséhë gubiernu xi sahmi Nina. ¹⁴ Sá xi meje nuhyun cjuaquixi ne: Juan ne, hacui Elías, xi sehe nduva xu. ¹⁵ Yo ngayun xi tjin nuju cjuasua xi cuinuhyun cju vihi matsejen ne, ndaja tetuhunrcun.

¹⁶ Ngayun xuta tséhë nixtin vihi matsejen ne, ¿mé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin ¹⁷ cojo cju vihi: “Canijani tsujun ne, mijí xtun; casin va ne, mijí chjhndun.” Cuatjin jindaya langa. ¹⁸ Cuatjin chjá cojo nuju matsejen ta, Juan xi vitenda nuju ne jinii me niñu hacuaha hviin me xan, hane nújun ta jiya xitsehan xahesen rē me. ¹⁹ Hane ngahan xi Quihndi rē Xuta Jain matsejen ne, jiné hacuaha hvë, hane nújun ta ngu cha cahntsuaníñu ngahan, ngu cha cahntsuañan ngahan, hacuaha ngu cha amigu rē cha xi faha tujúnsa cojo jingu sa xuta tsehan ngahan. Tsejen xi ndaja ngu cjuatacun xi casacu rē ngatsë rē xi ndaja tivetjucaa tsujun xi tininhñuchuhun.

Chojyihu tséhë xuta nandya xi vindeyaain cjuatacun rē me

²⁰ Hya xi cama ne, cavetsihin Jesús chjataha me xuta nandya jani hitsë sa jemu casahmi me cjuarcun camá, ta catsindeyaain me cjuatacun rē me. Cuitjin cachja me:

²¹ —¡Jemu chojyihu tsujun xuta nandya Corazín! ¡Hacuaha jemu chojyihu tsujun xuta nandya Betsaida! Jemu chojyihu tsujun ta, tséhë xi sá xi xutaxín tséhë Tiro cojo xutaxín tséhë Sidón cavëé me cjuarcun xi cahyun ne, ha catsindeya me cjuatacun rē me, hacuaha ha cavajá me tsjian xi sacuaha tsánaxá hacuaha cavyuju me ngajñi ndesu, sacuaha xcusun naja hya xi choho má naja. ²² Vëhë xi hya xi tsichuva Nina yëjë xuta tséhë jyé rē me ne, xuta nandya Tiro cojo xuta nandya Sidón ne, hitsë sa chuva castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida.

²³ Hane ngayun xuta nandya Capernaum ne, ¿há cuangun hisca ngahnga hiscan tacun Nina? ¡Hacuiin! Hatuxa cuangun nduchin, cahndé hiscan fi hasen rē nima ta, tséhë xi sá xi xuta tsehan tséhë Sodoma cavëé me cjuarcun xi cahyun ne, ha catsindeya me

cjuatacun rë me, hane tacun cuaha nandya jan hisca quihndë. ²⁴ Vëhë xi hya xi tsichuva Nina xuta ne, hitsë sa chuva castigu cuatju xuta Sodoma xi cumá nuju ngayun xuta nandya Capernaum.

Casahmi jyë casahmi hnga Jesucristu Nina

²⁵ Nixtin hya ne, cachja Jesús cojo Nina cuitjin:

—Ngayun nahmi naha ne, sahme jyë sahme hnga nuju, ngayun xi Nai rë ngahnga cojo nangui, ngayun, tséhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi jñu tséhë me. ²⁶ Ngayun nahmi naha, cuatjin canihñu ta, tséhë xi cuatjin xi cachuya nuju. —Cuatjin cachja Jesús cojo Nina.

²⁷ Cachja me cojo xuta:

—Yëjë ngarca matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin yo xi vëë Nahmi naha matsejen ne ta, suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. ²⁸ Ngayun xi fenda rë xahasen nuju, ngayun xi hai tjin tacun tséhë jyë nuju ne, nduvun tjengun ná, hane cjuaháxen vëhë xi sahmi hai nuju. ²⁹ Ningatuhun xi chjuhun yugu naha sacuaha má cojo ndyaja hya xi cjuaha chu xa sahmi chu, hacuaha chjayunngun tsahan. Ta ngahan ne, tjin ná cjuandaja cjuajeya, hane sacu hñu rë xahasen nuju. ³⁰ Ta yugu xi suá nuju vihi ne, hacuiin hai, tanguaain cojo tséhë chu ndyaja, hane xa xi suá nuju ne, hacuaha hacuiin hai.

12

Cavotohosun xuta ladu rë Jesucristu trigu nixtin xi chjahájenda rë

¹ Nixtin hya ne, cuatjin camá ngu nixtin xi chjahájenda rë. Hora xi tivatju Jesús cojo xuta ladu rë me hiscan tjin tjë trigu ne, cama vojo rë xuta ladu rë me, cavetsihin cavotohosun xuta jan tsé tsé trigu jan ne, catsufétsja me cajine me. ² Hane cha tséhë partidu fariseo xi cavëë cha xi cuatjin casahmi me, cachja cha cojo Jesús cuitjin:

—Chutsujun ni, xuta ladu nuju ne, tisahmi me xa quihndë nixtin xi chjahájenda rë, handasa chja ley naja xi cumaji xi cuatjin nihñu.

³ Hane cafayanguí Jesús cuitjin:

—Ngayun, ha cachutayun xcusun xi casahmi xutachanga naja David hatsëë nixtin hya xi jercu camá vojo rë me cojo xuta xi siu cojo me. ⁴ Cavisehen me ndava Nina, hane cafaña me pan xi viyuju xcun Nina xi tsajin cahndé xi tu yo ni sinë ta suvá ni nahmi xi cuma sinë me. Peru David ne, cajinë me hacuaha casua me cajinë xuta xi siu cojo me. ⁵ Cuanitjin ne, ha cachutayun xi chja cjua rë ley naja xi nahmi xi sahmi xa ndava Nina ne, ngajan tjin xa xi satë rë me nixtin xi chjahájenda rë peru tsajin jyë xi cuma rë me handasa tisahmi me xa nixtin hya. ⁶ Cuichjá quixë cojo nuju ta nguehe tacun ngu xi hitsë sa meje rë xi chjahanrcun rë xi cumá rë yungun xi matitjun. ⁷ Cjëë cuijnercun cjua xi chja: “Hitsë sa ndama ná xi cumayuma nuju xingun tséhë xi cumá rë xi nicuhun chu sacuaha cjuatjo xi tuhun ná.” ⁸ Hacuaha cachja sa Jesús cuitjin: Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë.

Casahmi Jesucristu xi camandaja cha xi quixíhñu ngu tsja

⁹ Hyá xi camá ne, xi quiji sa Jesús ne, cavisehen me yungun ngajan. ¹⁰ Hane tacun ngu cha cahntsua yungun jan xi quixíhñu tsja quixi cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatihi ley xi nihñu nixtin xi chjahájenda rë? ¿Há sua cahndé xi nirquen rë xuta hmu rë? —Cuatjin cafinenguise cha me xi sehe cuma cuinchajyë cha me.

¹¹ Hane cuitjin cafayanguí Jesús tséhë cha:

—¿Há cuma xi ngu ngayun handasa hya xi nixtin xi chjahájenda rë ne, cuanguun naxun chu tsángu nuju sá xi cjuinenguia chu ngu ngojo xi jemu nungun? ¹² Sá cuatjin

vengui chji rë ngu chu tsángá ne, hitsë sa cjín vengui chji rë ngu xihin. Vëhë xi tsingatihi ley xi nixtin xi chjahájenda rë ne nihña cjuandaja.

¹³ Sehe cachja Jesús cojo cha hmu rë cuitjin:

—Nixingun ntsun. —Cuatjin cachja me.

Hane cuatjin casahmi cha. Hane tsja cha xi quixi ne, ha camandaja sacuatjin jyihi tsja cha xingu. ¹⁴ Hya xi camá ne, cha partidu fariseo jan ne, cavetju cha quiji cha, cachja cha ngajñi rë cha cojo xicjin cha xi meje rë xi sacuya ra xcusun hacutjin cuma tsiquehen cha Jesús.

Cjua xi catsihindu profeta tséhë Jesús

¹⁵ Peru Jesús ne, machaya rë me cjuatacun jan, hane cavetju me quiji me tséhë ngajan. Hacuaha cjín xuta quiji tjengui cojo rë me, hane catsindaja me yëjë ni xuta tséhë chíhin xi má rë me, ¹⁶ sehe cachja me cojo me xi cuichjaain të me yo me jan. ¹⁷ Cuatjin casahmi Jesús xi cuetjucaa cjua xi catsihindu profeta Isaías xi chja cuitjin:

¹⁸ Cha vihi ne, cha mosu naha, cha xi cavitéxa ngahan,
cha xi tsihmúcacun, cha xi ndama ná tséhë.

Suá cha Hasen naha, cuichja cha cojo xutaxín tséhë hacutjin quixi Nina hya xi tsichuva me xuta.

¹⁹ Cha vihi ne, hacuiin cjin cuisiajmi cha cojo xuta; hacuiin jindaya të cha xi chja cha. Cuichjaain hñu cha cojo sa xi jemu catjaha cuenda rë cha xuta xi tsuyihiya me ndiya të.

²⁰ Xcotaain cha cjuatacun rë hisca ngu xuta yuma xi tangun me cojo ngu ndeje xi caxtane, hacuaha sahmi chuvaain cha cjuatacun rë xuta yuma xi tangun me cojo ngu candil xi ha ndiya coho.

Yëjë xcusun vihi ne, sahmii cha hisca xi cumatsejen cjuaquixi rë gubiernu rë cha.

²¹ Hane xuta ngasunhndë ne, cuetahacacun me cha.

Cachja xuta xi Satanás casuaxa rë Jesús

²² Cavechú ngu nixtin xi cafehe tjengui xuta Jesús hane yaha me ngu cha xi jiya xitsehen xahasen rë cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha.

²³ Hane xutacjín ne, jemu quijircun rë me cachja me cuitjin:

—¿Há cumacacun xi cha vihi hacui quihndi tjé rë David xi tsingatju Nina?

²⁴ Peru cha partidu fariseo xi camachaya rë cha cjua jan ne, cachja cha cuitjin:
—Hacuiin suvá cha vaxéxin cha xitsehen ta Beelzebú, xitsehen xi matitjun ne, vëhë casuaxá rë cha xi vaxéxin cha xitsehen.

²⁵ Peru Jesús ne, tséhë xi ha vëë me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tséhë ngu nandya ticjan me ngajñi rë me cojo xicjin me, cjuë ngahñu cjua rë, hane cjuincanii rë me. Hacuaha sá xi xuta tséhë ngu ndihya ne, scaan me ngajñi rë me ne, ngajan chajá ngahñu cjua rë ndihya jan. ²⁶ Ha cuanitjin rë Satanás ta, sá xi Satanás ne vaxéxin xitsehen xi yahnga ne, cavatécia ngahñu cjua rë, hane cumaji cuitexa xicjin. ²⁷ Vëhë xi sá xi Beelzebú casua ná xa xi vaxéxen xitsehen ne, hacuaha ha Beelzebú vëhë casua rë ngu xuta ladu nuju xa xi hacuaha vaxéxin me xitsehen. Vëhë xi me vëhë ni cuma cuichja me xi cuaaintjin cjua xi nújun xi Beelzebú casua ná xa. ²⁸ Peru sá xi hacuiin Beelzebú casua ná xa ta Nina casua me ne, ngajan matsejen xi gubiernu xi sahmi Nina ne, ha tivetsihin.

²⁹ Hisca ngu cha chéjë cumaji tu cuisehen ni cha ndava ngu xuta xi hñu cjua rë sá xi tacun me. Titjun tsihñu cha xuta xi ndava ta cuatjin xi cuma tsichéjë cha tséhë me.

³⁰ 'Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta.

³¹ 'Hacuaha cuichjá cojo nuju cjuaquixi ta tu mé ni jyé xi sahmi xuta hacuaha tu mé ni cjua xi choho cuichja me tséhë xuta ne, sacú rë me cjuaninchataha sa xi cuijacun me jyé jan. Peru tu yo ni xi choho cuichja tséhë Hasen rë Nina ne, tsajin cjuaninchataha xi cuma rë. ³² Cuanitjin ne, tu mé ni cjua xi choho cuichja xuta tséhë Quihndi rë Xuta

Jain ne, cuma sacú rë me cjuaninchataha. Peru tu yo ni xi choho cuichja tséhë Hasen rë Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

Ngatsë ni rë xcusun xi sahmi me ne, tsejen mé xcusun xuta me

³³ ¿Jarë xi meje nuju?, ¿há xi ndaja ya hacuaha ndaja tu rë? o há tsajin ne, ¿há xi ndajin ya hane ndajin tu rë? Jima ngu ya ne, cuma tsejen sá xi ndaja o sá xi ndajin ngatsë rë tu xi sua. ³⁴ Ngayun quihndi rë chu tsehen, maji nújun cjua xi ndaja. Maji ta tséhë xi cjua xi quitsë rë xahesen nuju ne, vëhë cjua xi vetju nújun. ³⁵ Vëhë xi xuta ndaja ne, tséhë cjuandaja xi tetjo rë me cahntsua xahesen rë me cojo cahntsua cjuatacun rë me ne, tséhë ngajan vetju cjuandaja. Cuanitjin ne xuta tsehen ne, tséhë cjuatsehen xi tetjo rë me ne, ngajan vetju cjuatsehen. ³⁶ Cuichjá cojo nuju ta tu mé ni cjua xi cuinújun, handasa tu visiajmu ni ne, tuhuncuenda rë Nina cjua jan nixtin xi tsichuva me yaan. ³⁷ Cuatjin ta cojo cjua xi canújun ne, cjua jan cuma testigu xi cuetjunkun tséhë castigu, o sá tsajin ne, cjua xi canújun vëhë cuma testigu tséhë castigu xi cueyun.

Cafehya xuta tsehen ngu seña xi sua Nina

³⁸ Ngajan xi ngujo cha xi vicuya cjuachacun cojo ngujo cha partidu fariseo catsicuya cha tséhë me, cuitjin cachja cha:

—Maestro, ningacun niji ngu cjuarcun xi sua seña yo ngayun.

³⁹ Ngajan cafayangui Jesús cuitjin:

—Ngayun xuta tjé rë Israel xi nechun nixtin vihi matsejen ne, tsehen cjuatacun nuju, hacuaha majotacun xcun Nina. Vëhë xi chjahyun ná ngu seña xi sua Nina. Peru seña vëhë ne, sacuiin nuju ta ngu ni seña xi sacú nuju matsejen ne, vëhë seña xi casua profeta Jonás hatsëe nixtin. ⁴⁰ Sacuatjin rë profeta Jonás ne, jyan nixtin cojo jyan nixten caseya me cahntsua chu ti jyé, hane ha cuanitjin ni ne cumá rë Quihndi rë Xuta Jain, ta jyan nixtin cojo jyan nixten seya me ngahma nangu. ⁴¹ Hya xi cuechú nixtin xi tsichuva Nina jyé nuju, ngayun xi nechun nixtin vihi ne, yéjé ni xuta nandya Nínive matsejen ne, cjue cuinchajyé nuju me; ta me vëhë ne catsindeya me cjuatacun rë me hya xi casua profeta Jonás camachaya rë me cjua rë Nina. Peru nguehe ne ha tejña ngahan sacuaha ngu seña xi hitsë sa vengui chji rë xi cuma rë profeta Jonás. ⁴² Hacuaha nixtin hya ne, na xi cavitexa ngajan nangu Sabá ne, cjue cuinchajyé nuju ta, tséhë xi jemu cjuañihi cavatju na tséhë xi jercu cjín hiscan canduva na xi cuihndé na cjuatacun ndacun rë Salomón, me xi cavitexa xuta naja nixtin hatsëe. Peru nguehe tejña ngahan xi hitsë sa vengui chji rë cjuatacun naha xi cumá rë cjuatacun rë Salomón.

Xitsehen xi vuya

⁴³ Hya xi vetjuxin xitsehen tséhë xahesen rë ngu xuta hiscan xi camá sacuaha ndava xitsehen jan ne, fi táha hiscan jemu nangu quixí camahani, vanguise cahndé hiscan xi cueñajenda. ⁴⁴ Hane xi sacuiin rë cahndé hiscan cueñajenda ne, cuitjin tsingatahacacun: “Cúya rë cjué ndya naha hiscan xi cavétxuen.” Cuatjin tsingataha cacun xitsehen jan. Hane hya xi vuya fehe xitsehen jan cahntsua xahesen jan ne, vutsejen xitsehen jan cahntsua xahesen jan sacuaha ngu ndihya tiya, ngu xi caxtecha tyjahi tyjahi, hacuaha siundaja chichihin ngu tsé ngu xtí. ⁴⁵ Xi vutsejen xitsehen xi cuatjin jyihí jan ne, sehe fi jaha sa rë yatu sa xitsehen xi hitsë sa tsehen xi cumá rë vëhë ne, sehe visehen nga viyujucahndé jan. Peru xi má ngascan ne, hitsë sa chojyihí tséhë xuta vëhë xi cumá rë titjun. Cuitjin cumá tséhë xuta xi siu nixtin vihi. —Cuatjin cachja Jesús.

Naa rë Jesucristu cojo xicjin me

⁴⁶ Hya xi tichja me cojo xutacjín ne, naa rë me cojo xicjin me ne, cafehetjengui me Jesús, hane maji vechútahacjin me xi cuichja me cojo ta tséhë xi jemu quitsë xuta.

⁴⁷ Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan candatsen, xi meje nduvatjengui nuju me cuichja me cojo nuju. —Cuatjin casacu camachaya rë me.

⁴⁸ Hya xi camá ne, cavuya me catsicuya me cjua cuitjin:

—¿Yo xi má nuju xi ná na ha cojo xingueen?

⁴⁹ Hya xi cuatjin cachja me ne, catsingacun tsja me xuta ladu rë me sehe cachja me cuitjin:

—Ngayun xi nechun nguehe ne, ngayun xi sacuaha ná na ha cojo sacuaha xingueen ngayun ta, ⁵⁰ tu yo ni me xi sahmi me sacuaha meje rë Nahmi na ha xi tacun me ngahnga ne, me vëhë tangun ni cojo xingueen, cojo ná na ha.

13

Ejemplu tséhë cha xi catsitjë trigu

¹ Nixtin hya ne, cavetjuxin Jesús tséhë ndihya ne, quiji me tjehen laguna ngajan cavejña me. ² Hane ngajan camatangun xutacjín. Vëhë xi cavisehen me ngu barcu ngajan cavéjña me. Hane xutacjín jan ne, caviyuju me nangui quixí tjehen nandan jan. ³ Sehe cavicuya Jesús me jemu cjín cjua sacuaha xcusun rë ejemplu. Cuitjin cachja me:

—Cuejñaa ne xi ngu cha xi tsitjë cha trigu matsejen ne, cavetju cha quiji cha xi tsitjë cha trigu. ⁴ Hane jinguyéjë rë xi titsitjë cha matsejen ne, ngujo matsejen ne, cavixu ndiya. Hane canduva chu nisë, catsicjë chu cajine chu. ⁵ Hane ngujo nga matsejen ne, cavixu hiscan xi jemu naxindya, hacuaha jemu chuva nihndë quisun. Ngajan jemu xati cavetju ta tséhë xi hacuiin tain nihndë quisun. ⁶ Hane xi cavetjucaa tsuhi ne, cavaca rë cojo ndavá jan. Hane tséhë xi tsajin tyjama rë xi nungun matsejen ne, caxintsen. ⁷ Ngujo nga ne, cavixu ngajni nahyá. Hane xi camacha tangun matsejen ne, nahyá jan ne, vëhë casahmi hndë rë catsixi rë. ⁸ Hane xi yahnga matsejen ne, cavixu hiscan nihndë ndaja. Hane camayehe ne, ngujo ne casua tutjë rë ngu cientu sa cuatjin sacuatjin xi camatjé, ngujo nga ne, yachantë sa, hane ngujo nga ne, cantë sa sacuatjin xi camatjé. ⁹ Yo ngayun xi tjin nuju cjuasua xi cuinuhyun cjua na ha ne, ndaja tetuhunrcun. —Cuatjin cachja me.

Mé má ejemplu cachja Jesucristu cojo xuta

¹⁰ Hya xi camá ne, cafehetiña xuta ladu rë me cavinenguise me Jesús tséhë ejemplu xi chja me ta, ¿mé tséhë xi ejemplu ni vicuya me cojo? ¹¹ Hane cafayangui me tséhë xuta jan cuitjin:

—Nina ne casua me cahndé xi ngayun ne, cuijne rcu cjuatacun tséhë gubiernu xi sahmi Nina, cjuatahahma xi titjun ne tsajin yo machaya rë. Peru yéjë sa me xi yahnga ne, casuaain me cahndé xi cuijnercu me. ¹² Me xi ha tjin rë cjuatacun jan ne, sua sa Nina me, ndaja cuijne rcu me. Hane me xi tsajin cjín rë cjuatacun jan ne, cjuahahaha Nina hitsé xi tjin rë me. ¹³ Vëhë xi suvá ejemplu tichjá cojo rë me ta, handasa vutsejen me, peru sahmicuendaain me; visiñuju me ne, peru sahmi me sacuaha xi vihndiin me hacuaha vijnii rcu me. ¹⁴ Xi cuatjin sahmi me ne, sahmichihin me cjua xi catsihindu profeta Isaías xi catsihindu cjua vihi:

Handasa cuiñuju ngayun ne, peru ha tuxa cuijnii rcun;

Handasa chutsujun ne, peru cumatsjiin nuju.

¹⁵ Xuta xi cuacun vë ne, tichjá cjuatacun rë me,
tyjavañuju me cojo tuxcun me ne, cavechja me,
ta sá tu scuëe me cojo tuxcun me,
hane sá cuihndë me cojo tyjavañuju me,

hacuaha cuijne rcu me cojo cjuatacun rë me, sehe cuya me ladu na ha xi cuaxétjë me.

¹⁶ 'Peru ngayun ne, jemu ndaja tsujun ngayujun ni tséhë xi hatuxa tichutsujun cojo tuxcun; hacuaha visiñuju cojo tyjavañuju. ¹⁷ Nguehe cuichjá quixé cojo nuju ta jemu ndaja tsujun ta, tséhë xi hacuaha jemu cjín profeta hacuaha jemu cjín xuta xi matitjun xi caviyuju titjun ne, jemu meje scuëe me xcusun xi ngayun tichutsujun, peru casacuiin

cavëë me. Hacuaha jemu meje cuiſiñuju me cjua xi tivisiñuju ngayun, peru casacuiin cavisiñuju me ta, tsëhë xi cjëe cuechu nixtin.

Cachja Jesús mé vijne ejemplu tsëhë cha xi catsitjë trigu

¹⁸ Cuatjin hindë ne, nuhyun mé meje cuichja ejemplu tsëhë cha xi catsitjë trigu. ¹⁹ Hya xi visiñuju ngu xuta cjua tsëhë gubiernu xi sahmi Nina ne, peru vijniircu me cjua jan, sehe vinduva Satanás ne, fahataha cjua jan tsëhë xahasen rë me. Cjua vi ne, hacui sacuaha trigu xi cavixu ndiya. ²⁰ Hane tsëhë trigu xi cavixu hiscan jemu naxindya ne, hacui sacuaha hya xi vihndë xuta cjua rë Nina, hane fahatsja me cojo cjuasua. ²¹ Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin peru hya xi vechú ngu nixtin xi satë rë me cjuañhi o cjuandya xi sua xuta me ngatsë rë cjua rë Nina ne, fëcacun me cojo cjua jan. ²² Hane tsëhë trigu xi cavixu ngajñi nahyá ne, hacui sacuaha hya xi vihndë xuta cjua rë Nina, peru ha xcun xi cjuinduju me cojo nixtin rë me ne, tsingataha cacun me tsëhë cjuatacun xi satë naja nguehe ngasunhndë, hacuaha meje rë me cjuanchina xi cjuicanii rë, hane vëhë suaain cahndé xi cumajyë cjua rë Nina cahntsua xahasen rë me, hacuaha sahmii me ngu cjuandaja xi tsingacun xi xuta rë Nina má me. ²³ Hane hya xi vixu yahnga trigu hiscan nihndë ndaja ne, hacuaha hacui sacuaha hya xi vihndë xuta cjua rë Nina hane vijne rcu me mé vitexa Nina, hane sahmi me cjuandaja. Tjin me xi jercu quisun cjuandaja sahmi, hane tjin nga me ne, chuva cjuandaja sahmi me, hane yahnga me, hitsë sa chuva cjuandaja sahmi me.

Ejemplu tsëhë xi jiyahma cojo tutjë rë trigu

²⁴ Sehe cachja nga me ngu ejemplu cojo me, hane cuitjin cachja me:
—Gubiernu xi sahmi Nina ne, cumá sacuaha camá hya xi catsitjë ngu xuta tutjë rë trigu ndaja xcun nangui rë. ²⁵ Peru nixten ne, hya xi jiñafë xuta ne, cafehe ngu xi condra rë me catsitjë cha ngu ndiji xi meje tanguncun cojo trigu. Ngajan ngajñi rë trigu jan catsitjë hma cha sehe quiji cha. ²⁶ Hya xi camá ne, hisca xi cavetju xca rë, cavetju tú rë, sehe camachaya rë me tsëhë ndiji jan. ²⁷ Hya xi camachaya rë me ne, cafehe mosu rë me xi tsëhë nangui jan, cavinenguise mosu me: “Nai, tutjë ndaja xi camá canitjun, ¿há cutjin cavetjun xi casecjan cojo ndiji ne?” ²⁸ Ngajan cafayangui me tsëhë mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?” ²⁹ Peru cafayangui me cuitjin: “¡Jéya! Caveni chjanujñu ndiji jan ta sá tsajin ne, hacuaha chjanu trigu xi ndaja. ³⁰ Catamacha catsijo, sehe cuichja hya xi tjune rë xi tjun ni cjuaneñi cha ndiji, sahmi cha xtë rë xi cuaca cha. Sehe cjuaya cha trigu, cuinchandaja cha cahndé rë.” Cuatjin fi ejemplu xi cachja Jesús.

Ejemplu tsëhë tutjë lihndi

³¹ Jesús ne, cachja nga me ngu ejemplu cuitjin:
—Gubiernu xi sahmi Nina ne, hacuaha cumajyë tangun cojo ngu tutjë ya mostasa ta jemu lihndi camahani ne. Tutjë jan ne, cafaha ngu cha catsitjë cha xcun nangui rë cha; ³² Tutjë rë ya mostasa ne, handasa hitsë sa lihndi má xi cumá rë yëjë ni tutjë xi yahnga ne, hya xi camá cha ni, hitsë sa jyë camá xi cumá rë yëjë ni ya xi yahnga. Cuma ngu ya xi hiscan nisë xi vitjen chu ngahnga ne, cuma sahmi chu ndava chu rcu ya jan.

Ejemplu tsëhë san rë pan

³³ Cavuya cachja nga Jesús cuitjin:
—Gubiernu xi sahmi Nina ne, hacuaha tangun sahmi sacuaha san rë pan xi visecjan ngu chjuun ngajñi rë jyan chuva rë nahyu rë pan cojo sa xi sahmixa ngajñi rë yëjë ni nahyu cjín jan.

Me tsëhë xi Jesús ne, sahmixa me cojo ejemplu

³⁴ Cuatjin cachja Jesús cojo xutacjín, ta ejemplu ni cachja me cojo xuta ne, cachjaain me chichihin ta, suvá cojo ejemplu. ³⁵ Cuatjin cavicuya me sehe cuetjucaa cjua xi catsihindu profeta ta:

Cjua xi vetju ntsuva ne, suva ejemplu ni;
Cuichjá cjua xi hinchahma hisca ntsacu cavetsihin ngasunhndë.

Cachja Jesús mé vijne ejemplu tséhë ndiji jan

³⁶ Hya xi cavatju cachja me, sehe catsicjé Jesús cjua cojo xutacjín jan, cavisehen me cahntsua ndihya hane ngajan cafehe tjengui rë me cha ladu rë me, cavinenguise cha me zmé vijne ejemplu tséhë ndiji nguiñña jan?

³⁷ Sehe cafayangui Jesús cuitjin:

—Cha xi catsitjé trigu ne, hacui Quihndi rë Xuta Jain. ³⁸ Hane nguiñña ne, hacui ngasunhndë. Tutjé ndaja ne, vëhë xuta xi vihndë me tséhë Nina, hane ndiji jan ne, hacui xuta xi vihndë tséhë xitsehen. ³⁹ Cha condra xi catsitjé cha ndiji jan ne, hacui xitsehen xi matitjun cha. Hacuaha nixtin xi cjuanga ne, hya xi cjué ngasunhndë. Hane cha xi cjuanga ne, hacui ángel. ⁴⁰ Cuanitjin sacuaha ndiji xi casahmi cha xtë rë xi cueti, cuatjin cumá cojo xuta xi hndiin tséhë Nina hya xi cjué ngasunhndë. ⁴¹ Hya ne Quihndi rë Xuta Jain ne, tsingatju me ángel rë me xi cuahaxin me yëjë ni xuta xi candiya xicjin me ngajñi rë cjuatsehen cojo xuta xi sahmi me cjuatsehen, cuaxëxin me tséhë gubiernu xi sahmi Nina. ⁴² Hya xi camá cavaxëxin me ne, scandiya me xuta hiscan cuaca me ngu ndihijyé, ngajan jemu squihnda me hacuaha jemu cuanerii nehñu me. ⁴³ Peru xuta xi tyjahi cjuatacun rë me xcun Nina ne, cumá me sacuaha tsuhi xi seti xi sua hasen rë camá ngajan gubiernu xi sahmi Nina nahmi rë me. Yo ngayun xi tjin nuju cjuasua xi cuinuhyun cjua naha ne, ndaja tetuhunrcun. —Cuatjin cachja me.

Ejemplu tséhë tujún xi caseyanijhma

⁴⁴ 'Xuta xi meje cuisehen gubiernu xi sahmi Nina ne, hacuaha tangun me sacuaha ngu cha xi casacu rë cha ngu cahndé hiscan xi caseyanijhma tujún cjín. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yëjë xi tjin rë cha sehe cavechutaha cha chji rë xâhva jan.

Ejemplu tséhë tuseti xi hnga chji rë

⁴⁵ 'Hacuaha xuta xi meje cuisehen me gubiernu xi sahmi Nina ne, tangun me sacuaha ngu cha viteña xi vanguise cha ngu tuseti xi hitsë sa ndaja seti. ⁴⁶ Hane xi sacu rë cha ngu xi jercu tu vengui chji rë ne, quiji cha caviteña cha yëjë xi tjin rë cha sehe cavechutaha cha chji rë tuseti jan.

Ejemplu tséhë changa rë chu ti

⁴⁷ 'Hacuaha gubiernu xi sahmi Nina ne, cumá sacuaha ngu changa jyë xi catsingatjeya xuta ndachacun. Hane hya xi camá ne, ngajan cahntsua changa jan camá tangun yëjë xcusun chu ti. ⁴⁸ Vëhë xi hora xi catsë rë ne, cajuvë nga xuta changa jan ne cavejña me tjehen rë ndachacun ngajan cavaxijin me chu. Chu xi chine ne, cavinchanndaja me, peru cacandi me chu xi yahnga. ⁴⁹ Cuanitjin ne cumá hya xi cjué ngasunhndë, ta cuinduva ángel ne, cuatéjcia me xuta xi tsehen cjuatacun rë me tséhë xuta xi tyjahi cjuatacun rë me, ⁵⁰ sehe scandi me xuta tsehen hiscan cuaca me ngu ndihijyé. Hane ngajan ne, jemu squihnda me hacuaha jemu cuanerii nehñu me.

Cjuanchina xatsë cojo cjuanchina changa

⁵¹ Hya xi camá ne, Jesús ne, cavinenguise me xicjin me:

—¿Há cavijne rcu cjua vi?

Ngajan cafayangui me:

—Juun, cavijnircuin.

⁵² Sehe ngajan cachja Jesús cuitjin:

—Hya xi ngu maestru xi vicuya me ley ne, sá xi scutaya me xi meje cuisehen me ladu tséhë gubiernu xi sahmi Nina ne, sahmi me sacuaha nai rë ngu ndihya jyé. Xuta

jan ne, vaxë me xcusun xatsë ne, hacuaha vaxë me xcusun changá tsëhë cahndé xi cavinchandaja me.

Jesús ne, cavuya me nangui rë me

⁵³ Hya xi camá cajnetaha cachja Jesús ejemplu vihi ne, sehe cavatju quijixin me. ⁵⁴ Hane xi quiyi me ne, cafehe me nangui rë me, ngajan cavicuya me xuta cahntsua yungun rë. Hya xi camá ne, jercu cavéhërcun me Jesús, hane cachja me cuitjin:

—¿Jani cavutaya cha vihi ta jemu tjin rë cha cjuatacun? ¿Jani casacu rë cha cahndé xi sahmi cha cjuarcun? ⁵⁵ Cha vihi ne, quihndi rë cha chjineya jan. Naa ra ne, María hmí na. Hacuaha xicjin cha ne, hacui Jacobo, José, Simón cojo Judas. ⁵⁶ Hacuaha tichjá cha ne, xuta nandya naja. Ha hyun ta cuatjin peru, ¿jani casacu rë cha cjua xi tichja cha?

⁵⁷ Cuatjin ne mijí cjuaha cuenda me cjua rë Jesús tsëhë xi tangun nangui rë me. Sehe cachja Jesús cuitjin:

—Ngu profeta ne, macjain rë xuta me, peru hatuxa xuta nangui rë me macjaain rë me tsëhë me. Hacuaha xuta ndava me ne, macjaain rë me tsëhë me.

⁵⁸ Cuatjin camá ta tsëhë xi ngatsë rë xi macjaain rë xuta me ne, ndastu cjín cjuarcun casahmi me ngajan.

14

Xi má rë Herodes ne, Jesús ne, hacui Juan Vitenda Xuta

¹ Nixtin hya ne, camachaya rë me xi matitjun xi hmí rë Herodes cjua xi tichja xuta tsëhë Jesús. ² Ngajan xi cachja me cojo xuta xi faha cuenda rë me ta:

—Cha vëhë ne, hacui nima Juan Vitenda Xuta. Handasa cahme nima, peru ha cavascaya rë, vëhë xi tjin rë cha ngahñu xi má sahmi cha cjuarcun.

³ Ta Herodes jan ne, ha catsingatju me cachjaha rë Juan ne, catsihñu me cha xi quiyi cha ndavaya. Cuatjin casahmi Herodes ta tsëhë xi cuatjin cachuya rë na Herodía, chjuun rë hntsë Herodes. ⁴ Tsëhë na vë cachja Juan cojo Herodes cuitjin:

—Chja ley ta ndajintjin camahani xi chjahan chjuun rë xingueen.

⁵ Herodes ne, meje tsiquehen me Juan jan, peru camaji ta tsëhë xi xi má rë xuta ne, cha Juan ne, hacui profeta má cha. Hane Herodes ne, tsacjun me xuta. ⁶ Cuatjin camá xi hya xi cavechu nixtin rë suhi tsëhë Herodes, na quihndi rë na Herodía ne, caté na ngajni xuta xi siu suhi jan. Hane jemu cachuya rë Herodes xi cuatjin caté na. ⁷ Sehe ngajan xi Herodes casua na me cjua quixi rë me xi sua me na tu mé ni xi meje cjuehya na. ⁸ Ngajan xi na vë ne, hya xi ha cavinchangui na naa rë na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

⁹ Hya xi camá ne, jercu choho cama rë Herodes. Peru tsëhë xi hisca Nina caveyanangui me hane tsëhë xi xcun cjín xuta jan casua me cjua ne, catsingatju me cjua xi cuatjin cumá.

¹⁰ Hane cavitexa me sindadu cavatésun cha rcu Juan ngajan ndavaya. ¹¹ Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na naa rë na, casua na naa rë na. ¹² Hya xi camá ne, xuta ladu rë Juan jan, cafehyá me nima caveyaniji me. Sehe quiyi me casua me camachaya rë Jesús.

Catsicjen Jesucristu hñú mil xihin

¹³ Hane xi camachaya rë Jesús ne, cavetju me ngajan cavisehen me ngu barcu quiyi me ngu cahndé xín. Peru xi camachaya rë xuta ne, cavetju me tsëhë nandya ne, quiyi ntsacu me tjehen laguna quiyi tjengui me Jesús. ¹⁴ Xi tu cavetju Jesús tsëhë barcu ngunda ne, cavutsejen me xutacjín jan, hane camayuma rë me xuta jan. Hane catsindaja me xuta hmu rë. ¹⁵ Hane hya xi jimá nguixun ne, cafehe xuta ladu rë me cachja cojo me cuitjin:

—Jemu xín camahani cahndé vi, hane ha quiyi hora. Ninguijnutuhun cjua cojo xutacjín vë ne, sehe catji me nandya xi siu tiñataha catatsë me comida xi sinë me.

¹⁶ Peru Jesús ne, cuitjin cachja me cojo cha xi tejó jan:

—Sahmii nguyjë xi cjuexin me ne, ngayun tuhun xi sinë me.

¹⁷ Sehe ngajan xi cachja cha ladu rë me cuitjin:

—Hñu pan ne cojo jo ti tjin naja. —Cuatjin cachja cha.

¹⁸ Sehe cachja Jesús cuitjin:

—Nduvuncujun.

¹⁹ Hyá xi camá ne, casahmi Jesús xi catiyuju xutacjín jan xcun ndiji; sehe cafahatsja me hñu rquí pan jan cojo jo ti jan. Hane tivutsejenniji me ngahnga ne, casua me nacuechji rë Nina, sehe cavotoho langa me pan casua me pan jan cha ladu rë me xi cjue sua cha siné xuta. ²⁰ Hane xuta ne, yéjé ni me cajiné me hacutjin cachuya rë xahasen rë me. Hane xi cachjaya rë xi cavangui cajiné xuta jan ne, catsé tejó chajne. ²¹ Me xi cajiné pan jan ne, hñu mil má me xi xihin. Ha xin yachjin cojo langa xi hacuiin cojo camaxqui.

Quiji ntsacu Jesucristu xcun nandá

²² Hyá xi camá ne, Jesús ne, casahmi rë me nguyjé xuta ladu rë me xi cuisehen me barcu hane cjue titjun ni me ngunda vëhë, jinguyjé rë xi tsinguijnetaha me cjua cojo xutacjín jan. ²³ Hane hyá xi camá quiji xutacjín ne, sehe camijixin Jesús rcu ndetjún xi cuiisajmi me cojo Nina. Hane hora xi camá nguixun ne, tacun suvá me. ²⁴ Peru barcu jan ne, vasentjin laguna cjui, hane jemu chja cjui ngatsé rë tsindyu rë nandá xi tsivaha rë barcu ta, tséhë xi tjo ne, taha hiscan cjui ne, ngajan nduva.

²⁵ Hane hyá xi tiña sahasen ne, quiji ntsacu Jesús nandan ne quiji tjengui me me tséhë me. ²⁶ Hyá xi cavëe xuta ladu rë me xi nduva ntsacu me xcun nandan ne, jemu camá xti rë me cachja me ta nima xi meje cuincharcun rë me, hane cajindayaté me. ²⁷ Ngajan xi cachja Jesús cojo me ta:

—¡Xi carcuun! ¡Tuhun cjuetacun xahasen nuju ta ngahan vi!

²⁸ Hyá xi camá ne, cafayangui Pedru tséhë Jesús cuitjin:

—Nai, sá xi quixi xi ngayun ne, tuhun ná cahndé nduvá tjenguë nuju.

²⁹ Sehe cachja Jesús cuitjin:

—Nduvun.

Hane cavitujne Pedru tséhë barcu jan, quiji ntsacu me quiji tjengui me Jesús. ³⁰ Peru xi camachaya rë me tjoxtin ne, catsacju me camá, sehe cavetsihin cavisehen ngahma me ngajni nandan. Hyá xi camá ne cajindayaté me Jesús cachja me cuitjin:

—¡Nai, naxuntjun ná!

³¹ Hyá xi camá ne, ngutjen cafahatsja Jesús me, cavaniji me me ne, cachja me cojo me cuitjin:

—Ngayun ne, cjëe cumangutacunndujun cojo ná, ¿mé má macjaain nuju?

³² Hyá xi camá ne, cavisehen catsijo me cahntsua barcu jan, hane hora vëhë ne casejyu tjo jan. ³³ Ngajan xi xuta xi hincha barcu jan ne, cavixcuhnchi me cafaharcun me Jesús cachja me cuitjin:

—Ngayun ne, quixi Jain xi Quihndi rë Nina yun.

Casahmi Jesús xi camandaja xuta nandya Genesaret

³⁴ Xi quiji sa me cojo barcu ne, cafehe me tjehen laguna hiscan nandya xi hmí Genesaret. ³⁵ Hane xi camachaya rë xuta xi Jesús xi cafehe me, catsingatju me cjua rë yéjé ni nandya xi siutahndee, hane xuta ne quijicojo me xuta hmu rë me hiscan tacun Jesús. ³⁶ Sehe cafehya me cojo Jesús xi ndastu satéhaha xuta hmu rë jan ntsacu tsjian rë Jesús. Hane yéjé ni xuta hmu rë xi casatéhaha ntsacu tsjian rë Jesús ne, camandaja me.

15

Cha partidu fariseo ne, fahataha cha Jesús

¹ Ngu ndiya ne, ngujo cha tséhë partidu fariseo cojo ngujo cha maestru rë ley ne, canduva cha tséhë nandya Jerusalén, quiji cha hiscan tacun Jesús, cachja cha cojo me cuitjin:

² —¿Hacutjin cumá xi cha ladu nuju ne, sahmii cha sacuaha yaha xcusun rë xutachanga naja? Ta cuatjin vanii cha tsja cha hora xi jiné cha niñu.

³ Ngajan xi Jesús cafayangui me tséhë cha cuitjin:

—Hane ngayun ne, ¿hacutjin cumá xi vejñuxun cjua xi cavitexa Nina ngatsë rë xi nihñu xu xcusun rë xutachanga naja? ⁴ Cachja Nina ta: “Chjuhunrcun na nuju, chjuhunrcun nahmi nuju”, hacuaha chja ta: “Yo xi choho chja tséhë xutacha rë ne, xuta ne tsiquehen rë.” ⁵ Peru ngayun tuhun cahndé xi cuichja xuta cojo xutacha rë ta: “Ha quihndé cumaji cuisécoo nuju ta yéjë ni xcusun xi tjin ná ne, ha cavejñá tsja Nina.” ⁶ ¿Mé má cuatjin tuhun cahndé xi faharcuiin cha nahmi rë cha? Cuitjin ne, ngatsë rë xcusun nuju sacuaha xi venguichjiin rë cjua rë Nina xi cuma rë xuta. ⁷ Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsujun:

⁸ Xuta xi cuacun vi ne, ndaja chja me tsahan
peru xi cojo xahasen rë me ne, hisca tsinguitsjiin me ngahan.

⁹ Tu mahya xi faharcun ná me ta,
Xi vicuya xicjin me ne, hacuiin cjua naha ta tu cjua rë xuta.

¹⁰ Hya xi camá cachja me cuatjin ne, cajindaya Jesús xutacjín cachja me cojo cuitjin:

—Ngayujun ngarca ni ne, nuhyun ndaja cjua vi: ¹¹ Xcusun xi tsitsehen rë xuta ne, hacuiin xcusun xi chine xi visehen hntsua me, ta xcusun xi tsitsehen rë xuta ne, xcusun xi vetjun tséhë hntsua me.

¹² Sehe cafehe xuta ladu rë Jesús ne, cavinenguise me cuitjin:

—¿Há hyun xi canicjun rë cha partidu fariseo ne xi cuatjin canújun?

¹³ Peru cafayangui Jesús cuitjin:

—Tu mé ni tutjé xi catsitjiin nahmi naha xi tacun ngahnga ne, tJune rë hisca cojo tyjama rë. ¹⁴ ¡Caveni! ¡Nihñuu cuendun me! Me vëhë tangun me cojo xuta rcá xi c juecani xicjin me. Hane sá xi cuatjin ne, cuixuya catsijo me xanga.

¹⁵ Sehe cachja Pedru cuitjin:

—Ningacun niji mé vijne ejemplu jan.

¹⁶ Ngajan xi Jesús cachja cojo me ta:

—¿Há hiscan ngayun cajnii rcun cjua xi cachjá ni? ¹⁷ ¿Há hyuun xi xcusun xi jinë xuta ne visehen cahntsua me? Fë ne, vetjutaha ndatsen. ¹⁸ Peru xcusun xi vetju chja me ne, nduva tséhë xahasen rë me, hane vëhë tsitsehen rë me, ¹⁹ ta tséhë xi tséhë xahasen rë xuta ne, nduva cjuatacun tsehen sacuaha jyé xi tsiquehen xicjin xuta, sacuaha jyé xi sahmi chjuunnahñu rë me jingu sa chjuun, sacuaha yachjin xi viteña yojo rë, sacuaha cjuachéjë, sacuaha testigu xi vindacha me, sacuaha cjuachjataha. ²⁰ Yéjë cjuatsehen xi cuacun vëhë ne, nduva tséhë xahasen rë xuta, hane vëhë tsitsehen rë me; peru sá jinë me niñu cojo tsja me xi cjéé cuane me ne, tsitsiin rë me.

Jesús ne, visecoo me ngu chjuun xutaxín, na xi hacuiin na ladu tséhë Israel

²¹ Hane Jesús ne, cavetju me ngajan, qui ji me ngu nanguixin táha distritu nandya Tiro cojo nandya Sidón. ²² Hya xi camá ne, cafehetjengui rë me ngu chjuun cananea xi tséhë ngajan. Cajindaya na cachja na cojo Jesús cuitjin:

—¡Nai! Ngayun, quihndindaicjin rë David, ¡catamayuma nuju ngahan! ta na quihndi naha ne, jiya xitsehen xi jemu suandyá rë na cahntsua xahasen rë na.

²³ Peru Jesús ne, ndastu me cjua catsicuya me. Hane xuta ladu rë me ne, cafehyá me Jesús cuitjin:

—Ningatjunxun na, ta jemu si nduvatjengui na yaan fehyataha na yun. —Cuatjin cachja me.

²⁴ Ngajan xi cafayangui Jesús cuitjin:

—Nina ne, catsingatju me ngahan ngatsë rë xuta rë nangui Israel, ta me vëhë sacuaha tsángá xi cachaja má me.

²⁵ Hya xi camá ne, cafehetiña na tséhë Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tisecun ná.

²⁶ Ngajan xi cachja Jesús ejemplu vi:

—Sechiye ne catijnetaha catjine nixti ta, hacuiin ndatjin xi chjahantahan niñu tséhë nixti hane sehe tahan rë naña.

²⁷ Hane cafayangui na cuitjin:

—Quixi jain xi nújun, peru naña xi siu ngahma maxë ne, sacu xi rë pan xi vixuhndu ngahma maxë rë nai rë chu hane jinë chu.

²⁸ Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuin cojo ná. Catamandaja quihndi riji sacuaha xi meje ri.

Hya xi camá ne, hora hya ne, camandaja quihndi rë na.

Casahmi Jesús xi camandaja xuta tjehen rë laguna Galilea

²⁹ Hya xi camá ne, cavetju Jesús taha vëhë quiyi me tahndee rë laguna Galilea sehe ngajan camiji me ngu ndetjún, ngajan cavejña me. ³⁰ Hane jemu quijitjengui rë me xutacjín, yaha me xuta rengun, xuta rcá, xuta lihmi, xuta yoho cojo xuta xi má rë hacjahi chíhin ne cavyujutë me xuta jan xcun Jesús hane Jesús ne, casahmi me xi camandaja me. ³¹ Xi cavëe xutacjín xi cuatjin camá ta, cama cachja xuta lihmi, camajingu xuta yoho, findaja xuta rengun hacuaha tsejen rë xuta rcá ne, sehe jercu quijircun rë me, hane casahmi hnga me, casahmi jyë me Nina, Nina jan xi faharcun xuta nanguí Israel.

Cjuarcun xi catsicjen Jesús ñuju mil xihin

³² Ngajan cajindaya Jesús xuta ladu rë me, cafehe me cachja Jesús cojo rë me cuitjin:

—Jemu yuma má ná xutacjín vi ta ha quihndë jyë nixtin hinchataha me cojo naja, hane ha quihndë tsajin camahani mé xi sinë me. Tsajin mangucacun xi tsingátju me cjue me xi cjëe sinë me niñu ta, sá tsajin ne, cjuaha rë me hinda ndiya.

³³ Sehe ngajan xi xuta ladu rë me ne cafayangui me tséhë me cuitjin:

—Peru nguehe nanguí xín ne ¿jani cuma sacú niji pan xi sinë xutacjín vi?

³⁴ Ngajan xi cavinenguise Jesús cojo xuta cuitjin:

—¿Há cjín pan tjin nuju?

Ngajan xi cachja me ta:

—Yatu má pan hacuaha siu ngujo ti langa.

³⁵ Ngajan xi Jesús ne cavitexa me xutacjín xi cuiyujutë me nanguí. ³⁶ Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjín. ³⁷ Cuatjin camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajinë xuta jan ne catsë yatu nisinya. ³⁸ Xuta xi cajinë ne, sacuaha ñuju mil má me xi xihin me, hacjahi má xuta chjuun cojo quihndi.

³⁹ Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

16

Cha partidu fariseo cojo cha partidu saduceo ne fehya cha xi tsingacun Jesús ngu seña

¹ Xi cafehe me ngajan ne, hacuaha cafehe cha tséhë partidu fariseo cojo cha partidu saduceo hane ta tséhë xi meje cjuahachuva cha me, cafehyá cha me ngu cjuarcun xi nduva ngahnga, cojo sa xi scuëe cha xi Nina catsingatju rë Jesús. ² Peru Jesús ne, cafayangui me cojo ejemplu vi cuitjin:

—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihi nixtin.” ³ Cuanitjin hya xi sahasen ne, sá xi má haní ngahnga hane hincha yuffí jma ne, nújun ta: “Va cumá nixtin.” Jo má tacun, ¿Hacutjin cuma xi jemu hyun mé vijne xcusun xi cún ngahnga, peru vijniircun mé vijne xcusun xi tijima nguehe nixtin vihi ni? ⁴ Xuta tséhë nixtin vihi ne, xuta xi tsehen cjuatacun rë me, xi tjenguiin me Nina cojo ngu ni cjuatacun, xuta vë xi fehya me ngu seña. Peru sacuiin rë me seña ta seña xi sacu rë me ne, sacuaha seña xi ha catsingacun profeta Jonás hatsëe nixtin.

Sehe xi cajnetaha cachja Jesús cjuá vëhë ne, cavyuju me xuta jan ne, quiji me.

Ejemplu tséhë san rë pan

⁵ Hya xi cafehe xuta ladu rë me ngunda laguna ne, hacuaha cachaya rë me cjuaha me pan. ⁶ Sehe Jesús cachja cojo me:

—Nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

⁷ Sehe cha ladu rë me ne, cavisiajmi cha cojo xicjin cha cuitjin:

—Tséhë xi cachaya naja pan ne, vëhë xi cuatjin chja me.

⁸ Peru xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—Ngayun ne, cjëë cumangutacun nduju cojo ná. ¿Mé má cuatjin nújun xi chjá ta tséhë xi tsajin nuju pan? ⁹ ¿Há nuhyuun? ¿Há vitsjiin nuju? Hya xi cajinë hñu mil xuta hñu pan ne, ¿há cjín chajne cachjayun tséhë pan xi cavangui jan? ¹⁰ Hacuaha hya xi cajinë ñuju mil xuta yatu pan ne, hya ne ¿há cjín chajne cachjayun? ¹¹ ¿Hacutjin cuma xi nuhyuun xi hacuiin tséhë pan xi cachjá cjua jan? Xi chjá ne, nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

¹² Hya xi camá ne, camachaya rë me xi cachjaain me xi meje cuidadu cojo san xi sahmixa pan ta cachjá me tséhë xi meje cuidadu cojo cjuachacun xi sahmixa cha partidu fariseo cojo cha partidu saduceo.

Catsinguixi Pedru yo Jesucristu

¹³ Ngu ndiya xi ha cavisehen Jesús distritu tséhë nandya Cesarea tséhë Filipo ne, cavinenguise me xuta ladu rë me cuitjin:

—Mé chja xuta tsahan, ¿yo ngahan, Quihndi rë Nina Jain? —Cuatjin cavinenguise me cha.

¹⁴ Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vítenda rë Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

¹⁵ —Hane ngayun ne, ¿má nújun ni, yo ngahan? —Cuatjin cavinenguise Jesús.

¹⁶ Ngajan xi cafayangui Símon Pedru cuitjin:

—Ngayun ne, Mesías xi catsingatju nuju Nina; ngayun, Quihndi rë Nina, Nina quicun jain.

¹⁷ Sehe cachja Jesús cuitjin:

—Ndatjin tsujun, Símon, quihndi rë Jonás. Tsajin ngu xuta xi casua camachaya nuju cjua jan, ta Nahmi naha xi tacun me ngahnga ne, me vëhë xi casua me xi camachaya nuju tséhë. ¹⁸ Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjëya rë. ¹⁹ Suá nuju quicha tséhë gubiernu xi sahmi Nina, ngajan xi xcusun xi nihñucjun nguehe ngasunhndë ne, hacuaha cumahñucjan ngajan ngahnga, hacuaha xcusun xi chundecjun nguehe ngasunhndë ne, hacuaha tundecjan ngajan ngahnga.

²⁰ Sehe Jesús ne, cavitexa me xuta jan xi tsajin camahani yo xi cuichja me cojo tséhë xi Mesías má me.

Cachja Jesús xi tsiquehen xuta me

²¹ Hya xi camá ne, sehe cavetsihin vicuya Jesús xuta ladu rë me tséhë xi sahmi nguyjë xi cjue me nandya Jerusalén, hane ngajan ne, jemu cjín cjuañihi cuátju me cuma xi sahmi xuta changá cojo nahmi xi matitjun tséhë nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu. ²² Ngajan xi Pedru ne, quijixin me cojo Jesús. Sehe cavetsihin cachjataha me Jesús cuitjin:

—Tatá, ¡catamamiji rë Nina! ¡Hatusha cumaji cuatjun cuatjin!

²³ Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin ngaye Satanás, ngaye ne, sacuaha ngu ndyojo xi meje xtenguiya ná ngajní cjuatsehen tséhë xi ningatiintacuin ngaye sacuaha tsingatahacacun Nina ta ningatehetacuin sacuaha ngu xuta ngasunhndë ni.

²⁴ Sehe cachja Jesús cojo cha ladu rë me cuitjin:

—Sá xi tjin yo xi meje rë xi cuma cuisehen me ladu naha ne, ha quihndë mijí rë xi sahmi me hacutjin xi meje rë suvá me ta nchunchujun ni meje rë xi catejñahñu xahasen rë me xi cjuenduju me cojo ndiya naha, handasa hisca cueya me xcun cru. ²⁵ Yo xi mijí cuisehen ladu naha tséhë xi tsacjun me xi cueya me ne, cahndé xi vetjo me cjuahñu rë me ne, tsichaja me cjuahñu xatsë xi sacu rë me. Peru yo xi ngatsë rë xi cavisehen ladu naha cueya ne, sacu rë cjuahñu jan. ²⁶ ¿Mé machji rëhë rë yo xi sacú rë yëjë cjuanchina rë ngasunhndë peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsë. ²⁷ Ta ngahan, quihndi rë Xuta Jain, cuinduvá cojo hasen ndajyঃ hi tséhë Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me? ²⁸ Cuichjá quixë cojo nuju ta tjin yahnga ngayun xi sechun nguehe xi cueyuun jinguyëjë rë xi cjëë chun xi cuitexa Quihndi rë Xuta Jain gubiernu xi sahmi Nina.

17

Cavindeya xcusun rë Jesucristu

¹ Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsé Jacobo, quijiniji me ngu naxi hnga. ² Ngajan camá xi cavëë me xi cavindeya xcusun rë Jesú: Xcun me ne, camaseti sacuaha seti tsuhi, hacuaha tsjian rë me ne, jemu tu tyava camahani camá sacuaha hasen rë ndihi. ³ Hacuaha ngajan cavëë me xi cafehetsejen nima profeta Moisés cojo profeta Elías, me xi cavyuju hatsëë nixtin ne, tivisiajmi me cojo Jesú.

⁴ Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin cachja me.

⁵ Hane hora xi tichja Pedru ne, canduva ngu yufí xi seti tsejen casahmi tjahnguen rë tséhë me, hane canuhya rë ngujo cjua xi cavetju ngajñi yufí jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhun cjua xi chja cha.

⁶ Hya xi cahndé xuta rë me cjua jan ne, caticaxcun me. Hane jemu catsacjun camahani me camá. ⁷ Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun. —Cuatjin cachja me.

⁸ Hane xi cavutsejenniji me ngajan ne, ndastu yo siu ta suva ni Jesús tacun me.

⁹ Xi tu tivijne me tséhë rcu naxi jan cojo xuta ladu rë me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavëë me. Xi cuatju cueya Quihndi rë Xuta Jain, sehe cuya nga me cjuahñu ne, hya cuichja me.

¹⁰ Ngajan xi cavinenguise me cojo Jesús cuitjin:

—¿Mé má cuatjin chja maestru tséhë ley xi titjun Elías cuinduva me, sehe cuinduva Mesías?

¹¹ Ngajan cafayangui Jesús cuitjin:

—Quixi xi Elías cuinduva me titjun ta me vëhë cuiyujuchihin me yëjë ni xcusun.

¹² Peru cuichjá cojo nuju ta ha canduva me, peru xuta ne, hvíin me xi hacui me, hane choho casahmi xuta cojo me hacutjin meje rë xahasen rë me. Hane hacuanitjin sahmi me xi cuátju cjuañhi Quihndi rë Xuta Jain.

¹³ Ngajan xi camachaya rë xuta rë me ta tichja me tséhë Juan Vitenda xuta hya xi chja me Elías.

Jesucristu ne, casahmi me xi camandaja cha xi faha rë chajan

¹⁴ Hane xi quiji me ne cavechutaha me xutacjín ne, ngajan cafehetjengui rë me ngu xihin, cavixcuhnchitaha cha Jesús cachja cha cuitjin:

¹⁵ —Nai. ¡Catamayuma nuju cha lihndi naha ta, jemu faha rë cha chajan hane jemu choho sahmi cojo cha. Jiya hora ne, finenguiya cha ngajñi ndacahi, hane jiya hora nga ne, viticjaya cha ngajñi nandan. ¹⁶ Céjécojo cha xcun xuta ladu nuju xi tsirqui me cha Peru camaji casahmi me.

¹⁷ Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tséhë ndiya ndajyিhi ngayun. ¿Há jyি sa xi cuitejña cojo nuju? ¿Há jyি sa nixtin xi scaa ná cojo nuju? Nduvuncujun cha nguehe. —Cuatjin cachja me.

¹⁸ Hya xi camá ne, cachjataha Jesús xitsehan xi hincha xahasen rë cha, hane cavetjuxin xitsehan jan, hane hora hya ne, camandaja cha.

¹⁹ Hya xi camá ne, xi cafehe xuta ladu rë Jesús cavinenguise me me cuitjin:

—¿Mé má ngayin ne xi camaji canaxinxin xitsehan jan tséhë xahasen rë cha vë?

²⁰ Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixë cojo nuju ta sá xi mangutacún cojo ná ndastu hitsé ne, hacuaha cuma cuinújun cojo naxi vihi: “Catjixin, catjin catisecun ngajan tavéhë.” Hane cuihndë tsujun. Hisca sá xi mangutacún cojo ná ndastu hitsé ne, tsajin me xi cumaji nihñu. ²¹ Peru sacuaha xitsehan xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxxeen.

Cachja nga Jesús xi tsiquehen xuta me

²² Nixtin xi cavyuju Jesús cojo xuta ladu rë me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta ²³ xi tsiquehen ná me. Peru xi cjué xi jyan nixtin ne, cuya nga cjuahñu.

Hane xi cahndë me cjuá jan ne, jemu cafaha me cjuachoho.

Jesucristu ne, cavechjite me tujúnsa tséhë yungun

²⁴ Hya xi cafehe me nandya Capernaum, cafehe xuta xi faha me tujúnsa rë yungun, camatiña me tséhë Pedru cachja me cojo me cuitjin:

—Maestru nuju ne, ¿há vechjite me tujúnsa rë yungun?

²⁵ Ngajan cafayangui Pedru cuitjin:

—Juun, vechjite me.

Hya xi camá ne, xi cavisehen Pedru ndihya ne, Peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaha me xi matitjun tséhë nandya ngasunhndë ne, ¿yo vitexa me xi saté rë xi cuechjite tujúnsa? ¿Há quihndi rë me? ¿Há xutaxín?

²⁶ Ngajan xi cachja Pedru cuitjin:

—Xutaxín cuechji me.

Cachja nga Jesús cuitjin:

—Sá xi cuatjin ne, quihndi rë me xi matitjun jan ne, ha cavatjuhnga tséhë. ²⁷ Quixi vë, Peru cojo sa hacuiin ngatsé rë vëhë cumacjan rë me o maxti rë me cojo naja ne, tangun laguna ne, chandunyun tsitin ngajñi nandan ne, hane hya xi faha tsitin ngu ti ne, chu xi tjun faha rë ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi stetaha cuechjun tujúnsa xi saté ná cojo xi saté nuju.

Yo xi matitjun

¹ Hya ne, xuta ladu rë Jesús cafehe tjengui me me, cavinenguise me cuitjin:

—¿Yo xi hitsé sa cumatitjun hya xi sahmi Nina gubiernu?

² Hya xi camá ne, cajindaya Jesús ngu lihndi, cavejña me cavasencia. ³ Sehe cachja me cuitjin:

—Hisca ngu ngayun cumaji cuisuhun gubiernu xi sahmi Nina ne, sá xi hacuiin nindeyun cjuatacun nuju hisca cuma yun sacuaha ngu quihndi. ⁴ Véhë xi yo xi tsinguijne suvá me yojo rë me xi cuihndë me sacuaha vihndë ngu quihndi ne, me vëhë xi hitsë sa cumatitjun me hya xi sahmi Nina gubiernu. ⁵ Hane tu yo ni xi cjuahatsja rë ngu quihndi xi cuacun vë ngatsë rë xi ladu naha má ne; vëhë cuma sacuaha xi cafahatsja me ngahan.

Xuta xi nduvacojo me xcusun xi tsitsehen rë xicjin

⁶ 'Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tséhë xuta vëhë xi xtyangui ngu ndyojo natsi nguisin me sehe ningatjeya rë me ngajñi ndachacun. ⁷ Jemu choho vatju xuta ngasunhndë ngatsë rë xcusun xi tsitsehen rë me xi sahmi me cjuatsehen. Hatuxa cuinduva xcusun xi meje sahmi xi tsismicacun xuta ndiya rë Nina, peru jemu chojihi tséhë xuta xi nduvacojo me xcusun vëhë.

⁸ 'Hane sá xi cjuatacun nuju meje rë xi nihñu ngu jyé cojo ntsun o sá xi cojo ntsacu ne, vengui sa chji rë xi chandunxun, ta hitsë sa ndaja tsujun xi cuma yoho yun xi cuma rë xi cuechun jingu cojo catsijo ntsun o catsijo ntsacu xcun ndihi xi tsajin nixtin tsajin nixten xi coho. ⁹ Hacuaha sá xi cjuatacun nuju meje rë xi nihñu ngu jyé cojo xcusun xi chutsujun cojo tuxcun ne, chjuhunxun tuxcun jan chandunxun, ta tséhë xi hitsë sa ndaja tsujun xi sacu nuju cjuahñu xatsë handasa cojo ngu ni tuxcun xi cuma xi cojo catsijo tuxcun cuechun xcun ndihi xi sahmi castigu rë nima. ¹⁰ Cojo yëjë ni ne, nihñu cuidadu xi nitjunguun ngu quihndi sacuaha quihndi vihi, ta tséhë xi ángel xi sahmi cuenda me ne, yëjë nixtin yëjë hora ne, siu tangun me cojo Nahmi naha hane sahmii nguyjë xi cjuehya me cahndé xi cuichja me cojo.

Ejemplu tséhë chu tsángá xi cachajá

¹¹ 'Quihndi rë Xuta Jain ne, canduvá me xi cuaxëtje me xuta xi cachajá. ¹² ¿Mé xi nújun? Cuejñaa ne xi ngu xihin tjin rë me ngu centu chu tsángá. Hane sá xi chajá ngu chu rë me, ¿há hyuun xi cuiyujutaha me chu xi ñujuchan tyjuhun ñuju jan nguiñña ne, sehe cjue me cuanguise me ngu chu xi cachajá jan? ¹³ Hane hya xi sacú rë me chu ne, hitsë sa jyé cjuasua tjin rë xahasen rë me ngatsë rë xi casacu rë me chu xi cachaja xi cuma rë cjuasua tséhë ñujuchan tyjuhun ñuju chu xi tetjo. ¹⁴ Cuanitjin xi cuma rë Nahmi nuju xi tacun ngahnga, ta mijí rë me xi chajá hisca ngu quihndi rë me cuatjin.

Hacutjin meje rë xi cuinújantahan xingueen

¹⁵ 'Hane sá xi ngu xingun choho sahmi cojo nuju ne, tangun suvun tinújuntuhun rë, hane sá xi tsindeya cjuatacun rë ne, ndatjin, ta hacuiin cuetsuntaha cjuandaja xi tjin nuju cojo me. ¹⁶ Peru sá xi vihndiin me tsujun ne, tangun chjuhun ngujo xuta tanguncujun xi tinújuntuhun rë tséhë xi hya xi cuma me testigu nuju tséhë, sehe cumatsejen cjuaquixi. ¹⁷ Sá xi hisca cojo me vë vihndiin me tséhë me ne, tangun tinújun tséhë xcun xuta yungun, hane sá xi hacuaha vihndiin me cjuatacun rë xuta yungun jan, cumá me xi cuma nuju sacuaha ngu xutaxín o sacuaha ngu xuta ndacha xi faha rë tujúnsa.

¹⁸ 'Cuichjá quixë cojo nuju ta xcusun xi nihñucjun nguehe ngasunhndë ne, hacuaha mahñucjan ngajan ngahnga, hacuaha xcusun xi nihñu ndaya nguehe, hacuaha mandaya ngajan ngahnga. ¹⁹ Hacuaha cuichjá cojo nuju ta sá nguehe ngasunhndë ne matangun cjuatacun rë jo ngayun tséhë ngu xcusun xi chjahyun rë Nina ne, cuetjucaa Jain tsujun ta sahmi chihin Nahmi naha xi tacun me ngahnga. ²⁰ Ta tu mé ni cahndé xi cuiyujuntangun ngu jo jyan xuta xi ngajan veyanangui ñihi naha, hacuaha ngajan ngajñi rë me tejña ngahan.

²¹ Sehe cafehe Pedru cachja cojo me cuitjin:

—Nai, ¿há cjín ndiya sahmi nguyjë xi tsinchátaha xingueen sá xi choho sahmi me cojo ná? ¿Há ndatjin xi yatu ndiya?

²² Ngajan cafayangui Jesús cuitjin:

—Hacuiin yatu ndiya ni, ta cuichjá cojo nuju ta mameje rë xi jyanchan tē cuatjin xi yatu ndiya ninchatuhun rë me.

Ejemplu tséhë cha xi mijí tsinchataha xicjin cha

²³ 'Ngajan tsejen xi hya xi Nina sahmi me gubiernu ne, cumá sacuaha ngu me xi matitjun xi meje cuaxéchihin me cuenta xi tjin rë me cojo xuta rë me. ²⁴ Hane hora xi tijima ne, cajindaya rë ngu cha xi cafehe cha hane cha jan ne, tē mil tujún quitjen cha. ²⁵ Hane ngatsé rë xi tsajin camahani cha rë tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaha cojo chjuun rë cha cojo quihndi rë cha cojo yëjë ni xi tjin rë cha, hane sehe cuatjin cuma cuechji cha tséhë xi quitjen cha. ²⁶ Hya xi camá ne, cavixcuhnchi cha xcun me cafaharcun cha me cafehya cha me cuitjin: "Nai, catijnehnchan cjuacjan nuju, tuhun ná hitsé cahndé hane cuechjé tsujun." ²⁷ Ngajan xi me xi matitjun jan ne, camayuma rë me cha, catsijyécacun me tséhë cha tséhë cjuacjintacun jan, catsinchataha me cha.

²⁸ 'Peru xi cavetju quiji cha jan, cavechutaha cha jan ngu cha xicjin cha xi quitjen tséhë cha hitsé tujún, hanecafaha cha nguisin xicjin cha jan, cachja cha cuitjin: "Nihñi ngojo yëjë xi quitjin tsahan." ²⁹ Hane xi cavixcuhnchi xicjin cha xcun cha ne, cachja xicjin cha jan cuitjin: "Catijnehnchan cjuacjan nuju, tuhun ná hitsé cahndé ta cuechjé tsujun."

³⁰ Peru mijí sua cha cahndé, hane quiji caveya cha xicjin cha ndavaya, ngajan seja xicjin hisca xi cuma sahmingojo tujún. ³¹ Hya xi cavëe yahnga mosu xcusun xi camá cavatjun jan, jemu camá xti rë me quiji casuacuenda me tséhë cojo me xi matitjun tséhë me.

³² Ngajan xi cajindayavaha me xi matitjun cha jan, cachja me cuitjin: "Ngaye, jemu choho xcusun riji. Catsinchátaha yëjë ni xi quitjin tsahan, tséhë xi jemu cachjahye. ³³ Hane ngaye, ¿hacutjin cumá xi tsajin ri cjuayuma cojo xinguin? ta ngahan ne, cama yuma ná ngaye." ³⁴ Cuatjin camá xi jemu camacjan rë me xi matitjun cojo cha jan, catsingatju me cha cjuañihi ngajan ndavaya jñu hisca nixtin xi cjuë cuechji cha xi quitjen cha.

³⁵ 'Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yëjë xahasen nuju.

19

Cjuachacun tséhë xuta xi tsismi xicjin

¹ Hya xi cajnetaha cachja Jesús cjua vi, sehe cavetju me distritu Galilea ne, cavisehen me distritu Judea ngajan tahndee ndajyé Jordán ladu vetjucaa tsuhi. ² Hacuaha quiji tjengui rë me xutacjín hane casahmi me xi camandaja xuta hmu rë.

³ Hya xi camá ne, ngajan cafehe cha tséhë partidu fariseo ne, quiji cha hiscan tacun Jesús hane tséhë xi meje cjuahachuva cha me cojo cjua rë me ne, cachja cha cuitjin:

—¿Há tsingathi ley xi ngu xihin ne, tsismi chjuun rë ngatsé rë tu mé ni xcusun xi chuyiin rë me tséhë?

⁴ Ngajan xi cafayangui me cuitjin:

—Ngayun ne, ¿há cachutayun ta tséhë xi hisca ntsacu cavetsihin casahmi Nina ngasunhndé ne, casahmi me xi chjuun xi xihin xuta? ⁵ Cachja Nina ta ngatsé rë xi cuatjin casahmi me xuta ne: "Véhë xi ngu xihin ne, cuejña cha nahmi rë cha, hacuaha cuejña cha naa rë cha, hane cumatangun cha cojo chjuun rë cha sacuaha ngu ni xahasen." ⁶ Ha quihndé hacuiin jo ta sacuaha xi ngu ni xahasen. Hane tséhë xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tséhë xicjin me. —Cuatjin cachja Jesús.

⁷ Ngajan cavinenguise cha cuitjin:

—Sá xi cuatjin ne, ¿mé má casua Moisés cahndé xi ngu xihin cuma cuejña cha ngu xujun tsja chjuun rë cha xi ha quihndé mijí rë cha na? Hane xi cuatjin ne, cuma tsismi cha na.

⁸ Sehe ngajan xi Jesús ne, cachja me cojo cha ta:

—Ngatsë rë cjuataja rë xahasen nuju ne, vëhë xi Moisés ne casua me cahndé xi nismu chjuun nuju, perú hacuiin cuatjin cavitexa Nina ntsacu cavetsihin.⁹ Cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyé rë me ta tséhë xi ngatsë rë cjua rë me sahmi chjuun jan cjuatsehen.

¹⁰ Ngajan xi cachja xuta ladu rë Jesús cuitjin:

—Sá xi cuatjin sacuha xi nýjun, ndajintjin tsajan xi cuixan.

¹¹ Cachja nga Jesús cuitjin:

—Hacuiin yéjé ni xuta ma vijnercu me cjua vi, suva xuta xi Nina casua cahndé xi vijnercu me ne, me vëhë vihndé me.¹² Tjin xuta xi cumaji cuixan me, sacuha xihin xi hisca chaja sa catsin me ne, maji matangun me cojo ngu chjuun. Hacuaha tjin yahnga me xi catsixindé xuta me, hacuaha tjin yahnga me xi faain me ngu chjuun ngatsë rë xi sahmixa rë gubiernu xi sahmi Nina. Catjahatsja cjua vi tu yo ni xi cuma cjuahatsja rë.

Catsinchacun Jesucristu nixti

¹³ Hacuaha quijicojo xuta nixti rë me hiscan tacun Jesús xi cuisanetsja me nixti jan hacuaha cjuehya me cjuandaja rë Nina ngatsë rë me. Perú hya xi cavëë xuta ladu rë Jesús xi cuatjin tijima ne, cavatëcja me cjuatacun rë xuta jan.

¹⁴ Peru Jesús ne, cachja me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tséhë xi gubiernu xi sahmi Nina ne, má tséhë nixti xi cuacun vë.

¹⁵ Hane ngajan cavisanetsja me nixti jan sehe cavetju me tséhë cahndé jan.

Jemu chja cuisehen xuta nchina ladu rë Nina

¹⁶ Hya xi camá ne, cafehe ngu cha nixti xi cavinenguise cha Jesús cuitjin:

—Ngayun Maestro, ¿mé cjuandaja meje rë xi sahme cojo sa xi sacú ná cjuahñu xatsë xcun Nina? —Cuatjin cachja cha.

Ngajan xi cachja Jesús cuitjin:

¹⁷ —¿Mé má noje tsahan xi ndaja ngahan? Ngu ni Nina xi ndaja me. Perú sá xi meje sacú ri cjuahñu xatsë jan, nohye cjua rë ley xi cavitexa Nina.

¹⁸ Ngajan cafayangui cha cuitjin:

—¿Jarë cjua jan?

Hane cachja Jesús ta:

—Xicanicuun xuta, xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanihñuu cjuachéjë, xicanujuun cjuandesu tséhë xuta,¹⁹ chjuhunrcun nahmi nuju hacuaha chjuhunrcun na nuju. Hacuaha nihñu hmutacun xingun sacuaha hmutacun suva yojo nuju.

²⁰ Ngajan cachja cha nixti jan ta:

—Yéjé ni cjua vëhë ne, ha cahndé tséhë hisca cjualihndi naha. ¿Mé sa meje rë xi sahme? —Cuatjin cachja cha.

²¹ Ngajan cafayangui Jesús cuitjin:

—Tjin sa ngu cjua sehe cuma chihin yéjé ni: yéjé ni xcusun xi tjin ri ne, titeñi, hane sehe tichecke tujún rë ngajñi rë xuta yuma. Hane xi cuatjin nihñi ne, jemu jyé cjuanchina sacú ri ngajan ngahnga. Hane xi cjué cuichecje tujún vëhë ne, sehe ndove tisecue ná.

²² Peru xi cahndé cha nixti cjua xi cachja Jesús ne, jemu va camá cacun cha hane quiyi cha, tséhë xi jemu nchina camahani cha.

²³ Hya xi camá quiyi cha ne, cachja Jesús cojo xuta ladu rë me cuitjin:

—Cuichjá quixé cojo nuju ta jemu chja xi ngu xuta xi tjin rë me cjuanchina cuisehen me hiscan sahmi Nina gubiernu.²⁴ Hisca cuichjá nga xi hitsë sa chjaain cuatju ngu chu camellu ngojo rë ngu níndu xi cuma rë xi cuisehen ngu xuta nchina hiscan sahmi Nina gubiernu.

²⁵ Ngajan xi xuta ladu rë me ne jemu quijircun rë me cjua rë me tséhë xi cachja me tséhë xuta nchina hane cavinenguise me Jesús cuitjin:

—Sá cuatjin ne, ¿yo xi cuma cuetjutje ni?

²⁶ Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yéjë ni xi maji sahmi xuta ne, Nina ne, hatuxa ma sahmi me.

²⁷ Sehe cachja Pedru cojo me cuitjin:

—Chutsujun ni. Ngayin ne, ha canismitacuin yéjë ni xcusun xi tjin niji, hane tivisecuin nuju. Hindë ne, ¿mé sacu niji?

²⁸ Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsë yéjë ni ne, nixtin xi cuejña Quihndi rë Xuta Jain xcun silla xi sahmi me gubiernu ne, ngayun xi tejó ne, ngayun xi cavisuhun ladu naha hacuaha cuinechun xcun silla nichuvun cjuatacun rë yéjë tejó tjé naja, ngayaan xi tjé rë xutachanga naja Israel ngayaan. ²⁹ Hacuaha yéjë xuta xi tsismicacun me ndava me, tsismicacun me xicjin me, tsismicacun me xutacha rë me, tsismicacun me quihndi rë me, tsismicacun me nangui rë xitjé rë me, ngatsë naha; sacú rë me ngu cientu sa quisun tséhë hane hacuaha sacú rë me cjuahñu xatsë. ³⁰ Peru xuta xi matitjun quihndë ne, jemu cjín me xi cumachjiriin me hya, hane xuta xi hacuiin matitjun quihndë ne, hya ne cumachji rëhë me xi cumatitjun me.

20

Ejemplu tséhë chji rë mosu

¹ 'Sua Nina cahndé xi cuisehen xuta gubiernu xi sahmi me ne, sacuaha casahmi ngu me xi nai rë ngu ranchun. Xati nguitajñu quiji me cavanguise me mosu xi sahmi xá hiscan catsitjé me uva. ² Hya xi casacu rë me ngujo cha, casahmi me compromisu hane cavejña chji rë cha xi ngu tujún xi hmí rë denario xi ngu nixtin. Hane hora hya casua me cha xá quiji cha nguijña xitjé. ³ Hya xi camá ne, sacuaha fane ñaja ne, cavuya nai jan ndetsin hane ngajan cavëe me cha xi hacjahi hane mahya rë cha. ⁴ Sehe cachja me cojo cha cuitjin: "Hacuaha tangun xitjé naha, sehe sua nuju hacutjin satë nuju." Hane quiji cha jan. ⁵ Hane jo ndiya nga ne, sacuaha nchisen hane sacuaha fane jyan ne, quiji nai jan ndetsin, tangun casahmi me tangun cachja me. ⁶ Hane xi cavechu sacuaha fane hñu nguixun ne, quiji nga me ndetsin, ngajan casacu rë me yahnga cha xi mahya rë, sehe cachja me cojo cha cuitjin: "¿Mé má tu nechun ni nguehe cuahanixtin?" ⁷ Hane cafayangui cha cuitjin: "Tséhë xi tsajin yo xi casua niji xa." Sehe cachja me cuitjin: "Hacuaha tangun nihñu xa xitjé naha." ⁸ Hane hya xi ha camá nguixun, nai rë xitjé ne, cachja me cojo cha xi fahacuenda rë xitjé jan cuitjin: "Chjindayun rë mosu ne, tuhun rë me chji rë yéjë ni me, titjun ne tuhun chji rë cha xi cafehe ngascan hane cuatjin ne hisca xi cuijnetaha ne, sehe tuhun rë cha xi tjun cafehe." ⁹ Hane xi cafehe cha xi casacu rë xa sacuaha fane hñu nguixun ne, cafahatsja cha chji ra xi ngu denario. ¹⁰ Hane xi camachaya rë cha xi tjun casacu rë xá ne, xi má rë cha ne, hitsë sa hnga cumá chji rë cha, peru hacuaha cafahatsja cha ngu denario ni. ¹¹ Hane xi cafahatsja cha chji rë cha ne, cachjataha cha nai jan cuitjin: ¹² "Cha vë ne, ngascan cafehe cha, ngu ni hora casahmi cha xa, hane tangun catuhun chji rë cha cojo niji. Ngayin ne, canihñi xa cuaha nixtin hacuaha caca niji ndavá." ¹³ Peru nai rë xitjé jan ne, cafayangui me tséhë cha jan cuitjin: "Tai, tsajin me cjuachan, ¿há quixi, há quixiin xi cavigajme xi chji nuju ne, ngu denario? ¹⁴ Chjuhun tujún xi satë nuju hane cuangun; ta ngahan ne, cachuya ná ngahan xi ngu chichihin suá rë cha hacuaha suá nuju. ¹⁵ Ngahan xi tsahan ne, ngahan cuitixa. ¿O há tsajin ne, há machinitacun tséhë xi casahme cuatjin?" ¹⁶ Hacuaha chuva vëhë ni, xuta xi matitjun quihndë ne, cumachjiriin hya, hane xuta xi hacuiin matitjun me quihndë ne, cumachji rëhë me xi cumatitjun me. Jemu cjín má me xi cachjindaya rë xi canduva me, peru tséhë yéjë me jan ne, chuva má me xi catuxijin rë.

Camá jyan ndiya cachja Jesucristu xi cueya me

¹⁷ Hya xi camá ne, hora xi jiya ndiya Jesús xi cjui me nandya Jerusalén, quijixin me cojo xuta ladu rë me xi tejó ni cachja me cojo me cuitjin:

¹⁸ —Chutsujun ni, tivanguen Jerusalén, hane ngajan ne, ngahan xi Quihndi rë Xuta Jain ne, cuma ngahan entregadu tsja nahmi xi matitjun cojo maestru tséhë ley; hane cuichja me jyé na ha ne, vechu chuva rë xi cueya ngahan. ¹⁹ Sehe sahmi entregar me ngahan xutaxín, cuejnucéë ná xuta, cuéhénatya ná me, cuaja ná me ne, sehe cuetaha ná me xcun cru. Peru xi má jyan nixtin ne, cuya nga cjuahñu.

Meje scaaya xuta ladu rë Jesús tséhë yo me xi cumatitjun

²⁰ Hya xi camá ne, naa rë quihndi rë Zebedeo quijitjengui na Jesús cojo cha quihndi rë na. Cavixcuhnchi na xcun Jesús tséhë xi fehya na ngu favor. ²¹ Sehe cavinenguise Jesús na cuitjin:

—¿Mé xi meje rë xahasen nuju?

Hane cuitjin cafayangui na:

—Tuhun cahndé xi cuiyujutaha cha quihndi na ha ngu ngu ladu tjehen nuju, hya xi nihñu gubiernu nuju.

²² Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañili xi cuátu ngahan ni?

Sehe cafayangui catsijo cha:

—Juun, scaa niji.

²³ Ngajan xi cachja nga Jesús cojo cha cuitjin:

—Cjuañili xi cuátu ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjehen na ha ne, hacuiin ngahan cuichjá ta Nina cuichja me yo xuta xi sua rë me cahndé xi cuiyujutaha me.

²⁴ Xi cahndé yahnga xuta xi té jan cjua xi cachja Jesús ne, cavetsihin camacjan rë me cojo jo me xicjin me jan. ²⁵ Ngajan xi cajindaya Jesús yéjé ni me, cachja cojo me cuitjin:

—Ngayun ne ha hyun ta yéjé ni xuta xi matitjun nguehe ngasunhndé ne, jemu sahmi yehe me yojo rë me sacuaha xi me vëhë xi nai rë xuta, hacuaha jercu meje cuitexa me.

²⁶ Peru hacuiin cojo ngayun cuatjin nihñu ta xi meje rë ne, ngu ngayun xi meje nihñi yehe yojo nuju ne; ninguijnu yojo nuju tisecun xingun. ²⁷ Hane ngu ngayun xi meje cumatitjun ngayun, nihñu xi cuma yun sacuaha ngu mosu rë xingun. ²⁸ Ta cuanitjin ne, casahme ngahan Quihndi rë Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisécoo rë xuta, hacuaha tsingatehen xi tsiquehen ná xuta, cojo sa xi ngatsé rë vëhë cjín xuta cuaxétje Nina me. —Cuatjin cachja Jesús.

Casahmi Jesucristu xi camatsejen nga rë jo cha rcá ngajan Jericó

²⁹ Hya xi cavetju me nandya Jericó ne, jemu xutacjín quijitjengui rë me. ³⁰ Hane ngajan hiscan cavatju me siu jo cha rcá xi viyuju cha tjehen ndiya, hane xi canuhya rë xi Jesús tivatju me, cajindaya cha cachja cha cuitjin:

—¡Nai, ngayun tjé rë David! Catamayuma nuju ngayin. —Cuatjin cachja cha.

³¹ Hane xuta xi siu ne, cavisiajmicjan me cojo cha xi sejyu cha, peru cha vëhë ne, hitsé sa jercu cajindaya cha chja cha ta:

—¡Nai, ngayun tjé rë David! Catamayuma nuju ngayin.

³² Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguise me cha cuitjin:

—¿Mé xi meje nuju xi sahme cojo nuju ni?

³³ Ngajan xi cachja cha rcá jan ta:

—Tatá, xi meje niji ne, xi cuma tsejen niji.

³⁴ Hane Jesús ne, camayuma rë me cha; cavisanetsja me tuxcun cha. Hane ngutjen ni, camatsejen nga rë cha, sehe quiyi cha cojo Jesús.

21

Cafehe Jesús nandya Jerusalén

¹ Hane hya xi ha jima tiña Jesús xi cjuehe me Jerusalén, cavechu me nandya Betfajé, ngajan ndetjún xi hmí rë Ndetjún Olivu ne, sehe catsingatju me jo xuta ladu rë me xi cjue tixa rë me, ² hane cuitjin cachja me cojo me:

—Tángun nandya xi tsejen tacun vë. Hane ngutjen xi cjuhun tjehen rë ne, sacú nuju ngu burru xi tjihñu chu cojo quihndi rë chu. Hane chundecjun chu, nduvuncujun chu. ³ Hane sá xi tjin yo xi cuichja cojo nuju tséhë chu, sehe tinújun ta: “Maestru niji ne, meje rë me chu.” Hane sehe sua me cahndé.

⁴ Cuatjin camá cojo sa xi cuetjucaa Jain cjua xi cachja profeta cuitjin:

⁵ Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun. Hacuiin xta me ne, nduva me quisun me chu burru, quisun me quihndi rë chu xi vaniji chaha.”

⁶ Sehe xuta ladu rë me jan, cavetju quiji me hane casahmi me hacutjin cachja Jesús, ⁷ canduvacojo me chu burru cojo quihndi rë chu hiscan tacun Jesús. Hane cavyujusun me tsjian rë me ngaxtun chu, sehe camiji Jesús burru jan. ⁸ Hane xi quiji Jesús ne, quisun me burru jan, hane xutacjín ne, táha cacandi me tsjian rë me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin cjui Jesús. ⁹ Hane yéjë ni me xi cjui tjun cojo yéjë me xi tjengui jan ne, cavetsihin jercu cajindaya me cachja me:

—¡Hosana! ¡Nacuechji rë Nina xi cafehe me xi cuitexa naja sacuaha cavitexa David hatsëë! ¡Jemu catsinchacun Nina me xi nduva vi tséhë xi Nina catsingatju rë me! ¡Hisca ngahnga ne, cuechu cjua rë cjuandaja rë Nina!

¹⁰ Hya xi camá ne, xi cavisehen me nandya Jerusalén jercu jyë cjuandya camá hane cavinenguise xuta nandya cuitjin:

—¿Yo me vihi?

¹¹ Ngajan cafayangui xutacjín jan cuitjin:

—Me vihi, hacui profeta Jesús, xuta Nasaret tséhë distritu Galilea.

Cavaxë Jesucristu xuta xi sahmi ndetsin ndatsen yungun

¹² Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxë me xuta xi sahmi me ndetsin. Hacuaha catsindefa me maxë xi xinchasun tujún xi tsindeya cha cojo tujún rë xuta ngu nangui cojo puestu rë cha xi viteña nisétyava. ¹³ Sehe cachja me cojo cha jan cuitjin:

—Chja cjua rë Nina ta: “Ndyá naha ne, tacunxa xi cjue xuta sahmi me oración rë me. Peru ngayun ne, tinihñuxun cojo sacuaha ngu cahndé xi matangun xuta xi sahmi cjuamaña.”

¹⁴ Hya xi ha cavatju vëhë ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me. ¹⁵ Ngajan xi cavëë nahmi xi matitjun cojo cha xi vicuya cjuachacun ne cjuarcun xi casahmi Jesús, hacuaha cahndé me xi jindaya nixti ta: “¡Hosana! ¡Nacuechji rë Nina xi cafehe me xi cuitexa naja sacuaha cavitexa David hatsëë!”; hane jemu cama xti rë me. ¹⁶ Cachja me cojo Jesús cuitjin:

—¿Há nuhyun cjua xi tichja me?

Ngajan xi cafayangui Jesús cuitjin:

—Juun, vihndé. Hane ngayun ne, ¿há cjëë chutahanyun cjua rë Nina xi chja tséhë? Chja cjua ta:

Hisca cjua rë nixti hisca cjua rë quihndinda ne canihñu xi cuetju xi sahmi hnga nuju.

¹⁷ Hya xi camá cachja me ne, cavetju Jesús tséhë Jerusalén quiji me nandya Betania cavejña me nguixun.

Jesús ne, cachja xi quihndé cuaquiin tu rë ngu yaxujun xi cavangui me tú rë hya xi vojo rë me

¹⁸ Xi camanchujun jan ne, xi cavuya nga Jesús Jerusalén ne, cama vojo rë me. ¹⁹ Hyá xi camá ne, tjehen ndiya ne, cavëë me ngu yaxujun xi chine tú rë, peru xi cavechu me ngajan ne, ndastu me tú yaja rë, ta suva xca ni yaja rë. Ngajan xi cachja Jesús tséhë:

—Quihndë tsajin nixtin xi cuaquí tú riji.

Hane ngutjen ne, caxintsen ya jan. ²⁰ Hyá xi cavëë xuta ladu rë me xi cuatjin camá ne, cafaharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

²¹ Ngajan cafayangui Jesús tséhë me cuitjin:

—Cuichjá quixë jain cojo nuju ta sá xi macjain nuju Nina hane hacuiin jo cjuatacun nuju ne, cumá nihñu sacuaha casahme cojo yaxujun vi. Hacuaha hisca sá xi cuinújun cojo ndetjún vihi ta: “Tihinxin tséhë nguehe. Tihin tisihin ngajñi ndachacun.” Hane cuatjin cumá. ²² Yëjë ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjucaa quixi.

Cavinenguise xuta cojo Jesús yo cavitexa rë me

²³ Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguise me Jesús:

—¿Yo cavitexa nuju xi nihñu xa vi? ¿Yo casuaxa nuju?

²⁴ Hane xi cafayangui Jesús ne, cuitjin cachja me:

—Hacuaha cuinenguësë nuju ngu cjua, hane sá xi chjayunngun tsahan ne, sehe cuichjá cojo nuju yo cavitexa ná xi sahme xcusun vihi. ²⁵ ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisajmicjín me ngajñi rë me, cachja me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “Sá cuatjin ne, ¿mé má camacjaain nuju cha?” ²⁶ Hane sá xi cuinújan xi xuta cavitexa rë cha ne, tsajin yo hvë mé sahmi xuta cojo naja ta, tséhë xi yëjë ni xuta ne, ha macjain rë me xi cha vëhë ne, profeta cha.

²⁷ Hane xi cafayangui xuta jan tséhë Jesús ne chja me ta:

—Hyiin.

Ngajan xi hacuaha Jesús ne, cachja me ta:

—Hacuaha cuichjaan cojo nuju yo cavitexa ná xi sahme xá vihi.

Ejemplu tséhë jo cha quihndi

²⁸ Peru ¿mé nújun tséhë cuentu vi? Ngu xihin ne, jo má cha quihndi rë me. Hyá xi camá ne, cafehe cachja me cojo ngu cha cuitjin: “Tsan, tihin nihñi xá ngajan hiscan camatjë xca rë uva.” ²⁹ Peru cha quihndi jan ne, cafayangui cha cuitjin: “¡Jéyal! ¡Mijí cjué!” Peru hyá xi camá ne, cavindeya cjuatacun rë cha hane quiji cha xcun xá jan.

³⁰ Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, cjué.” Peru quijiin cha. ³¹ Hindë ne, ¿jarë cha xi casahmi chihin cha xcusun xi meje rë nahmi rë cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixë cojo nuju ta xuta xi cojo cjuamaña faha tujúnsa cojo chjuun xi viteña na yojo ran hitsë sa tjun cuisehen me gubiernu xi sahmi Nina xi cuma nuju ngayun, ³² ta cafehe Juan cavicuya me ngayun hacutjin nihñu xcun Nina hane camacjaain nuju cjua rë me. Peru xuta xi faha tujúnsa cojo chjuun xi viteña yojo rë na, me vëhë camacjain rë me. Ngayun ne, handasa cahyun yëjë xcusun vëhë ne, canindeyuun cjuatacun nuju; camacjaain nuju.

Ejemplu tséhë cha xi sahmixa xi jemu tsehen cha

³³ Nuhyun sa ngu ejemplu xi cuitjin fi: Ngu nai rë ngu ranchun matsejen ne, catsitjë me xcun nangui rë me xca rë uva. Hacuaha casahmi me hnchua xondyojo tahndee rë

xitjë jan, hane ngajan ni ne, cafahnguiya me ngu ndyojotë hiscan cuaxë nandá rë uva jan. Hacuaha casahmi me ngu cahndé hiscan xi cavesun me ngu nachan ngahnga xi sesun xuta xi sahmi cuidadu xitjë rë me. Sehe casua me ngujo cha sahmixa xi cjuahacuenda cha. Sehe cjuaha tsé tsé me cojo cha. Hane hya xi camá ne, cavetju me quiji me ngu nangui xin. ³⁴ Xi cavechú nixtin rë tútjé jan matsejen ne, sehe catsingatju me mosu rë me xi quiji cachja cha cojo cha xi fahacuenda xitjë jan xi sua cha hitsé tutjé xi saté rë me. ³⁵ Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga. ³⁶ Sehe catsingatju nga me mosu hacjahi xi hitsé sa cjín má cha tséhë mosu xi tjun catsingatju me, peru cha xi sahmixa jan ne, ha chuva vëhë ni casahmi cha cojo yéjé ni.

³⁷ 'Hya xi camá ne, hisca catsingatju me suva quihndi rë me ta catsingatahacacun me cuitjin: "Tuxa cjuaharcun rë cha, xi quihndi naha." ³⁸ Peru xi cavëe cha xi hatuxa quihndi rë me xi nduva ne, cavisiajmjcín cha cojo xicjin cha cuitjin: "Cha vihi ne, quihndi xi cjuahatsja xitjé vi cha. Niquen cha, cojo sa xi tsajan cuma nangui vi." Cuatjin cavisiajmjcín cha. ³⁹ Hya xi camá ne, cafaha cha cha quihndi jan quijicojo cha ndatseen cahndé jan, sehe catsiquehen cha cha.

⁴⁰ 'Hindé ne, xi má nuju ne, ¿mé sahmi nai rë xitjë jan cojo cha xi cuacun fahacuenda jan?

⁴¹ Ngajan cafayangui me tséhë Jesús cuitjin:

—Cjue tsiquehen me cha xi tsehen cjuatacun rë jan, sehe sua me xitjë jan cjuahacuenda jingu sa cha sahmixa, cha xi sua cha xitjë xi saté rë me hya xi cuechú nixtin rë. —Cuatjin cafayangui me.

⁴² Sehe cachja Jesús cojo me cuitjin:

—¿Há cachutayun xujun rë Nina xi chja cuitjin?:

Ndyojo xi catsitjungui chjinevexo ne, vëhë ndyojo xi cavéjña tjun tjun yuju rë xihndé-naña.

Cuatjin casahmi Nina xi cuma. Hane xi chutsejen ngayaan ne, jemu chjahanrcun xahasen naja.

⁴³ Vëhë xi cuichjá cojo nuju ta, chjhataha nuju cahndé xi cuisuhun gubiernu xi sahmi Nina, hane sua Nina xuta nanguixin cahndé jan, xuta xi sua me xi saté rë me. ⁴⁴ Hane ndyojo jan ne, hya xi ngu xuta cjuinenguisun me xcun ndyojo vëhë matsejen ne, cuatélanga rë me. Hane hya xi ndyojo vëhë cuinenguisun rë ngu xuta matsejen ne, ña cumá tē me.

⁴⁵ Hane xi cahndé nahmi xi matitjun cojo cha partidu fariseo ejemplu xi cachja Jesús tséhë xuta vë ne, camachaya rë me xi condra rë me tichja Jesús. ⁴⁶ Vëhë xi cavangui me chuva rë hacutjin cuma xi cjuaha me Jesús peru camaji ta tsacjun me xuta, ta xi má rë xuta ne, ngu profeta má Jesús.

22

Ejemplu tséhë ngu suhi cjuavixan

¹ Sehe quijinduju sa cachja Jesús ejemplu cojo rë me cuitjin:

² —Nina ne sahmi me cojo xuta xi cuisehen me gubiernu xi sahmi me sacuaha casahmi ngu xihin xi matitjun tséhë ngu nangui hya xi casahmi me suhi xi cuijan quihndi rë me.

³ Hya xi casune hora rë, catsingatju me mosu hndixahan rë me quiji cha ndava xuta xi ha casua me camachaya rë xi nduva me cjuavixan, peru canduvaain me suhi. ⁴ Sehe catsingatju me hndixahan xi hacjahi ne, cuitjin cavitexa me: "Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tséhë suhi vi, hane cachjan yojo. Tjin chihin yéjé ni: nduvun ne, xinéésuhi." ⁵ Peru casahmi cuendaain me cjua jan, hane quijixin me cafahacuenda me cjuacjintacun rë me. Ngu me quiji me xcun xitjë rë me, ngu nga me hiscan sahmi me negocio. ⁶ Hane yahnga nga me ne, cafaha me mosu hndixahan jan, choho casahmi me cojo cha hisca catsiquehen me cha. ⁷ Hya xi camá ne, me xi matitjun jan ne, cama cjan rë me. Catsingatju me sindadu rë me.

Catsiquehen sindadu cha tsiquehen jan hane cavaca me nandya rë cha. ⁸ Hya xi camá ne, cachja nga me cojo hndixahan rë me cuitjin: “Ha tjin ndaja xcusun rë cjuavixan. Peru xuta xi cuinduva ne, hacuiin ndaja cjuatacun rë me ndajintjin xi nduva me. ⁹ Véhë xi tihin hisca cruci ndiyatë ne, hane tu hacutjin cjín má xuta xi sacu ri, noje cojo yéjë ni me xi catinduva me catjinesuhi me.” ¹⁰ Ngajan xi quihi hndixahan jan hiscan ndiyatë rë nandya ne, hane yéjë ni xuta xi cavechutaha cha, sá xuta tsehen, o sá xuta ndaja ne, casahmi cha xi camatangun me quihi me suhi. Hane ña catséxtin xuta ndava suhi.

¹¹ Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyihi cojo tsjian rë. ¹² Ngajan xi cachja me cojo cha cuitjin: “Tai, ¿hacutjin cama xi cavisuhun nguehe handasa jemu yuma jyihi tsjian nuju?” Peru cavejñajyuu cha vë cachjaain cha. ¹³ Sehe cachja me xi matitjun jan cojo hndixahan rë me cuitjin: “Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hincha xuta xi tijihnda me, hacuaha titsijanerii me nehñu me.” ¹⁴ Cjín má me xi cachjinda rë xi nduva me, peru chuva má me xi tuxijijñi rë.

Cjuacjintacun tséhë tujúnsa

¹⁵ Hya xi camá ne, cha partidu fariseo ne, cavisajmichihin cha casacuse rë cha ngu cjuacjintacun xi tsavi fi xi cjuayangui Jesús tséhë. ¹⁶ Hya xi camá ne, catsingatju cha ngujo cha ladu jan, cojo cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixindaja xi níjun, ha ndasa cojo xuta nchina visiajmu o sá cojo xuta yuma. ¹⁷ Xi má nuju ne, mé xi ndaja cuintújan. Sacuaha ley rë Moisés ne, ¿há tsingatihi xi cuechjen tujúnsa naja cojo César, me xi matitjun, o há tsingatiin?

¹⁸ Peru Jesús ne, tséhë xi ha vacun rë me xi jemu chocho xcusun rë cha ne, cachja me cojo cha cuitjin:

—¿Mé má cuatjin meje chjuhunchuvun ná? Xuta ndacha ngayun. ¹⁹ Ningacun ná ngu tujún jan scutsejen.

Hane canduvacojo cha ngu tujún tyava.

²⁰ Sehe cavinenguise me cha cuitjin:

—¿Yo xcusun rë hacuaha yo ñihí rë xi quitaha xcun tujún vë? —Cuatjin cavinenguise Jesús.

²¹ Hane cha xi cuacun vë ne, cuitjin cafayangui cha:

—Tséhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tséhë me, hane tuhun rë Nina xi tséhë me.

²² Hya xi cahndë cha cju xi cachja Jesús ne, quijircun rë cha, sehe cavetju cha quihi cha tséhë cahndë xi tacun me.

Cjuachjinenguise tséhë xi cuya nima cjuahñu

²³ Sehe nixtin hya ne, cafehe tjengui Jesús cha partidu saduceo, cha xi vicuya cjuachacun xi chja xi xuta xi cahme ne, cuyaain nga me cjuahñu. Sehe cavinenguise cha Jesús cuitjin:

²⁴ —Maestro, Moisés ne cachja me ta: “Sá xi ngu xihin cueya, hane tsajin rë chjuun rë hisca ngu quihndi ne, hntsé nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuha quihndi rë nima vëhë.” ²⁵ Quihndë ne, siu yatu cha cojo hntsé cha. Hane cha tjun ne, cafaha cha chjuun. Peru cahme cha, hane tséhë xi tsajin quihndi rë cha, hntsé nima vë ne, cafaha cha chjuun jan. ²⁶ Hane cuanitjin cavatju cha xi majo cojo cha xi majyan hisca chuva ngu chuva ngu cha hisca cojo cha xi má yatu.

²⁷ Hane xi cajnetaha ne, sehe cahme chjuun jan. ²⁸ Quihndë ne, hya xi cuya yéjë nima cjuahñu ne, ¿jarë cha xi cuacún vë xi chjuun rë cha na xi cjuaquixi ta, tséhë xi yéjë ni xi yatu cha ne, camá chjuun rë cha na? —Cuatjin cachja cha.

²⁹ Ngajan xi cachja Jesús cojo cha ta:

—Ngayun ne, cuaintjin xi nujun, tséhë xi vijnii rcun cjua xi chja xujun tséhë Nina, hacuaha hyuun xi Nina ne, jemu hñu cjuatacun rë me. ³⁰ Ta hya ne, cumaji cjuavixan hacuaha tsinguixaain xicjin me hya ta, sacuaha ángel xi siu ngahnga ne, cuatjin cuiyuju me. ³¹ Quihndë xi tinújun tséhë nima xi cuya cjuahñu ne, cuinenguësë nuju ne, ¿há cjëe chutayun cjua xi cachja Nina cojo nuju xcun xujun rë me tséhë nima xutachanga nuju xi cuicun vi? ³² “Ngahan xi Nina rë Abraham ngahan, Nina rë Isaac hacuaha cojo Nina rë Jacob.” Cuatjin cachja Nina. Peru ndaja hyun ta Nina ne, hacuiin Nina rë nima ta Nina rë xuta xi quicun me.

³³ Hya xi cahndë xutacjín cjua jan, jercu tu quijircun rë me cjua xi catsicuya Jesús.

Cjuachjinenguise tséhë jarë artículo tséhë ley xi hitsë sa matitjun

³⁴ Peru cha partidu fariseo xi camachaya rë cha xi catsinguejyu Jesús cjua rë cha partidu saduceo ne, camatangun cha cojo xicjin cha, ³⁵ hane sehe cavitexa cha ngu maestru rë ley xi cavinenguise cha me cjua vi cojo sa xi cuma cjuahachuva cha me. Cuitjin cachja maestru jan:

³⁶ —Maestro, tséhë yëjë ni cjua xi cavitexa Nina naja xcun xujun ley ne, ¿jarë artículo xi hitsë sa matitjun?

³⁷ Ngajan xi cafayanguí Jesús cuitjin:

—“Meje rë xi nihmutacún Nina naja cojo nguñajatacún, cojo yëjë ni xahesen nuju, cojo yëjë ni ngahñu nuju, cojo yëjë ni cjuatacun nuju.” ³⁸ Cjua vë xi hitsë sa venguchji rë ne, hitsë sa matitjun xi cumá rë yëjë ni cjua rë ley. ³⁹ Hane xi má jo ni: “Meje rë xi nihmutacún xingun sacuatjin hmutacún suvun yojo nuju.” ⁴⁰ Tséhë jo artículo vi ne vetjun sa yëjë cjua rë ley xi catsihindu Moisés cojo yëjë cjua xi catsihindu profeta. —Cuatjin cachja Jesús cojo cha.

¿Yo tjë rë má me xi catsingatju Nina?

⁴¹ Hya xi ha camá tangun cha partidu fariseo ne, sehe cavinenguise Jesús cha cuitjin:

⁴² —¿Mé nujun? Mesías o sa Cristu ne, ¿yo tjë rë má me?

Cafayanguí me ta:

—Tjë rë David má me.

⁴³ Sehe cachja Jesús cuitjin:

—Sá xi quixi xi cuatjin ne, ¿hacutjin cavátju xi suva David ne, hya xi catsihindu me cjua xi cachja Hasen tséhë Nina cojo rë me, “Nai” cachja me tséhë Mesias? ta cuitjin catsihindu me:

⁴⁴ Nina ne, cachja me cojo Nai naha cuitjin:

“Tinechin nguehe ladu quixi naha,

hisca hya xi yëjë ni xi sahmi ri condra ne, cuiyúju ngahan ngahma gubiernu riji.”

⁴⁵ Quihndë ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me má me vëhë?

⁴⁶ Ngajan camá xi ndastu mé cafayanguí cha, hacuaha hisca hya ne, tsacjun cha cjuinenguise sa cha me.

23

Cachjajyé Jesucristu cojo xutacjín tséhë cha xi vicuya cjuachacun

¹ Hyá xi camá ne, cachja Jesús cojo xutacjín hacuaha cojo xuta ladu rë me cuitjin:

² —Cha xi vicuya cjuachacun cojo cha partidu fariseo ne, casatë rë cha xá rë ley xi casatë rë Moisés hatsëe. ³ Vëhë xi meje rë xi nuhyun cjua rë cha hacuaha nihñuchuhun yëjë ni xi vicuya cha; peru nihñuu sacuaha sahmi cha ta, ndaja chja cha jan Peru hacjahi sahmi cha. ⁴ Cjua xi vicuya cha jemu chja sahmi chihin xuta ta tangun sacuaha ngu chaha xi hai vaniji tyja rë me, Peru suva ni cha ne, visecuaain cha me hisca hitsë. ⁵ Yëjë ni xi sahmi cha ne, sahmi cha ngatsë rë xi scuëe xuta cha, sahmihnga xuta cha. Vatjutaha cha chuva rë xujun xi chja ley xi setaha xten xuta, cojo tsjahya xi tsingaqui cha ntsacu tsjian rë cha. ⁶ Hacuaha jemu chuya rë cha hya xi satë rë cha cahndë xi matitjun tséhë

ngu ndava suhi o tséhë yungun. ⁷ Hacuaha hora xi fi tsuyihiya cha, jemu chuya rë cha xi cuatjin fi xuta chja me nina cojo cha ngajan ngajñi ndetsin, maestro chja xuta tséhë cha.

⁸ 'Peru ngayun ne, xi cuichjaain xuta tsujun Maestro ta ngu ni me xi Maestru nuju, hane ngajñi nuju ngayun ne, xingun má yun. ⁹ Hacuaha xuta ngasunhndë ne, canujuun tséhë me xi Nahmi ta ngu ni me xi tacun me ngahnga ne, hacui Nahmi nuju. ¹⁰ Cuanitjin ne, xi cuichjaain xuta tsujun Nai ta ngu ni me xi Nai nuju, me vëhë ne, Cristu. ¹¹ Hane ngu ngayun xi meje cumatitjun ngayun ne, sahmi me sacuaha ngu mosu rë xicjin. ¹² Tséhë xi yëjë xuta xi sahmi yehe suvá me yojo rë me ne, cuechu nixtin xi Nina ne, tsinguijne me cjuatacun rë. Hane xuta xi tsinguijne suvá me cjuatacun rë me, hya ne, Nina ne, sahmi yehe rë me.

¹³ 'Jemu choyihi tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun!, ta vechjun tingotjo hisca visehen gubiernu xi sahmi Nina cojo sa xi cumaji cuisehen xuta. Tivisuun suvun, hacuaha tituun cahndé xi cuisehen xuta xi meje cuisehen me.

¹⁴ 'Jemu choyihi tsujun, ngayun cha xi vicuya cjuachacun cojo ngayun cha partidu fariseo. Jemu cjín tujún naxun yachjin cahan xi hisca ndava na tsajin. Hane hya xi nûjyunymun ne jemu nduju hora nihñu, peru hacuiin nguñaja tacun nûjun ta, vindachun ni. Vëhë xi hitsë sa jyë cuma castigu xi cumá nuju.

¹⁵ 'Jemu choyihi tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! ta cuangun jingujyë ni ngasunhndë xi sacu ngu ni me xi cuisehen ladu nuju. Peru hya xi cavicuyun rë me, hitsë sa jyë castigu satë rë me xi cuma nuju.

¹⁶ 'Jemu choyihi tsujun, ¡xuta rcá yun xi meje ningacun ndiya! Nûjun ta: "Sá xi tuhun cjua nuju hane cuinújun ta: Quixi, vëë yungun xi matitjun ne, sahmii ngujyë xi nihñu chihin cjua nuju, peru sá xi tuhun cjua nuju cojo oro xi jiya yungun xi matitjun ne, vëhë sahmi ngujyë xi tuhun xi canújun."

¹⁷ ¡Ngarca ni ngayun! ¡Rcá yun! ¡Jarë xi meje rë xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsë rë yungun ne, vëhë xi camanchacun oro xi hincha cahntsua. ¹⁸ Hacuaha nûjun ta: "Sá xi tuhun cjua nuju hane cuinújun xi ngasunscun yungun cuma testigu ne, sahmii ngujyë xi nihñu chihin cjua nuju, peru sá xi nûjun ta cuatjo xcun ngasunscun jan cuma testigu ne, sehe sahmi ngujyë xi tuhun xi canújun."

¹⁹ ¡Rcá yun! ¡Jarë xi meje rë xi chjaanrcun? ¿Há cuatjo jan? o sá tsajin ne, ¿há ngasunscun ta, tséhë xi xcun vëhë ngajan camachacun cuatjo? ²⁰ Vëhë xi yo xi cuisiajmi hane cuichja me xi vëë ngasunscun ne, hacuaha tichja me xi vëë yëjë xi hinchasun xcun; ²¹ hacuaha yo xi cuisiajmi hane cuichja me xi vëë yungun xi matitjun ne, hacuaha tichja me xi vëë Nina xi tacun me ngajan. ²² Hane yo xi cuisiajmi hane cuichja me xi vëë ngahnga ne, hacuaha tichja me xi vëë cahndé hiscan sahmi Nina gubiernu hane hacuaha xi vëë Nina xi sahmi me.

²³ 'Jemu choyihi tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! Ngayun ne, handasa tuhun diezmu nuju hisca cojo nchurca cojo ruda cojo yëjë sa xcusun ndeya ne, peru nihñucuenduun xi nihñuchihin artículo rë ley xi hitsë sa meje rë Nina xi nihñuchuhun sacuaha xi chja cuitjin: nihñu hacutjin xi cjuaquixi cojo xingun, sacuaha xi mayuma nuju xingun, hane sacuaha xi ngu ni má cjua nuju; hitsë sa ndaja sa canihñu yëjë xcusun vihi, hane canihñucuendun tséhë xcusun xi canihñu. ²⁴ ¡Ngayun ne xuta rcá yun xi meje ningacun ndiya! Nihñu sacuaha sahmi ngu xuta xi tsicaha me vinu rë me, sehe cuetjuxin ngu chu xihi xi jiya ngajñi rë. Peru cuma tsinguijne jingu me ngu chu camellu.

²⁵ 'Jemu choyihi tsujun, ngayun cha xi vicuya cjuachacun cojo ngayun cha partidu fariseo. ¡Jo xcun jo ntsuvun yun! Nihñu tyjahi táha ngaxtun ngu vasu cojo ngu tyuva, Peru cahntsua ne, quitsë camahani rë cjuachëjë cojo cjuatacun xi nimuju yëjë ni xcusun.

²⁶ Fariseo rcá, titjun nihñu tyjahi cahntsua vasu cojo tyuva jan ta tséhë xi cuatjin ne, hacuaha cuma tyjahi táha ngaxtun.

²⁷ 'Jemu chojiyi tsujun, ngayun cha xi vicuya cjuachacun cojo ngayun cha partidu fariseo. ¡Jemu ndacha yun! Ngayun ne, tangun cun cojo ngu tsjun xi cahvi rë xujñu, ta ndaja tsejen tsjun jan, peru cahntsua ne, quitsë rë cojo ninda rë nima cojo yéjë ni xi jehndu. ²⁸ Cuanitjin cun ngayun ta xi vutsejen xuta yun, tsejen sacuaha xuta ndaja tyjahi yun, peru cahntsua xahasen nuju ne, quitsë rë cojo cjuandacha cojo cjuatsehen.

²⁹ 'Jemu chojiyi tsujun, ngayun cha xi vicuya cjuachacun cojo ngayun cha partidu fariseo. Ngayun ne, nindujun tsjun ndacun tséhë yéjë ni nima profeta, hacuaha nihñu ndacun tsjun tséhë nima xi tsajin xi cun rë me xcun Nina. ³⁰ Hacuaha ngayun nújun ta: "Sá xi ngayin cavinechin nixtin hatsëxi quicun xutachanga niji ne, caviseuciin rë me xi tsiquehen me profeta xi cuacun vëta cumacjain niji." ³¹ Quihndëne, cahyun ta cojo cjua nuju vë, tuhun testigu condra nuju ta tséhë xi ngayun ne hatuxa quihndi rë xutachanga nuju ngayun, hane me vëhë ne xi catsiquehen me profeta jan. ³² Quihndëngayun ne, ¡tangun cuéchun chuva rë cjuatsehen xi casahmi xutachanga nuju!

³³ 'Sacuaha cun yë chacun cuatjin cun ngayun, ¡quihndi rë yë yun! ¡Hacutjin cumá cuetjuntjun tséhë castigu xi má hasen rë nima? ³⁴ Vëhë xi tsingátju sa nuju profeta cojo xuta xi quicun cjuatacun rë me cojo maestru ne, hane ngujo me ne, ngayun ne nicuhun me hacuaha cuetuhun me xcun cru. Ngujo nga me cujun rë me ngayun ngajan ndatsen yungun hacuaha tuhun rë me cjuañihi xi cuatju me sehe cuanga me ngu nandya ngu nandya. ³⁵ Cojo chuva vëhë ne, chanujujyun cjuaveya rë yéjë ni xuta xi tyjahi cjuatacun rë me xi cahme nguehe ngasunhndë. Chanujujyun cjuaveya rë xutachanga naja Abel cojo hisca cjuaveya rë xutachanga naja Zacarías quihndi rë Berequías, me xi canicuhun tiña ngasunscun hiscan ndatsen rë ndava Nina. ³⁶ Cuichjá quixë cojo nuju ta tséhë cjuaveya rë yéjë ni me vë chanujujyun ngayujun ni xi nechun quihndë.

Jemu choho camá rë Jesucristu ngatsë rë xuta Jerusalén

³⁷ ¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajñi nuju! ¡Jemu choho má ná tsujun! ¡Mé hitsë ndiya xi meje scávëaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu! Peru ngayun ne, mijí nuju. ³⁸ Chutsujun ni, Nina ne, catsismicacun me ngayun. ³⁹ Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: "¡Catsinchacun Nina me xi titsingatju me ngajñi naja!" —Cuatjin cachja Jesús.

24

Cachja Jesús xi cuetsun yungun

¹ Hora xi tivetju Jesús tséhë ndatsen yungun xi matitjun jan xi cjui xin me ne, ngajan cafehe xuta ladu rë me caveyanangui me hane catsingacun tsja me xi yungun jan ne, jemu ndajiyhi. ² Hya xi camá ne, cuitjin cachja Jesús tséhë yungun jan:

—Sacuaha yéjë ni ndihya vihi xi chutsujun tséhë yungun ne, cuichjá cojo nuju ta cuechú nixtin xi hisca ngu ndyojo ndacun xi cuicun vi ne, tsajin xinchasunc oo xicjin ta cjuë yéjë cuixujne. —Cuitjin cachja Jesús.

Hacutjin sacú cumachaya naja xi ha meje cuijnetaha nixtin vihi

³ Xi cafë cachja Jesús cuitjin ne, sehe cafehe me tiña rcu Ndetjún Olivu. Hane xi tacun suvá me, ngajan cafehe xuta ladu rë me, cavinenguise rë me cuitjin:

—¿Mé nújun? ¿Janihya cuetjucaa xcusun vëhë ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuë nixtin rë ngasunhndë vi?

⁴ Ngajan xi cachja Jesús cojo rë me cuitjin:

—Nechun cuidadu, cojo sa xi hacuiin cuma ndacha ngayun ta, ⁵ tséhë xi jemu cjín xuta cuetjucaa me xi cuichja me xi hacui me xi catsingatju Nina me. "Ngahan Cristu", cuichja me. Hane cuatjin jemu cjín xuta cumacjain rë me cjuandacha rë me xi cuacun vë. ⁶ Hacuaha hya xi cumachaya nuju cjua xi jemu yehe si tijima ngu nación o sá xi tjin cjuacjintacun xi jemu yehe si nduva ne, xicarcuun ta, hatuxa tjin xi titjun xcusun

véhë cuma. Peru hacuiin ha hya cuijnetaha nixtin vihi. ⁷ Hacuiin hya cuma ta, titjun ne, scaan xuta ngu nación cojo jingu sa nación. Hacuaha scaan xuta ngu nandya cojo ngu nga nandya. Hacuaha jemu cjín cahndé xi cuma cuechu jindya. Jemu cjín cahndé xi cjuani nangui. ⁸ Peru xi cuatjin cumá yéjë ni xcusun vihi ne, sehe ntsacu tivetsihin cjuañihi xi cuatju xuta.

⁹ 'Sehe cjuaha nuju xuta, cjuecojo nuju me xi cuatjun cjuañihi, xi tsiquehen me ngayun. Hacuaha jemu chohovëe xuta rë yéjë nangui yun ngatsë naha. ¹⁰ Hya xi cumá ne, cjín xuta tsismicacun me ladu naha, hane tsindeya me cjuatacun rë me. Sehe cojo cjuá ni cuiteña xicjin me. ¹¹ Hacuaha jemu cjín profeta xi vindacha me xuta cuetjucaa me. Hane cuatjin jemu cjín xuta cumacjain rë me cjuandacha rë me. ¹² Hacuaha cjuatsehen ne, jemu cumayehetaha. Véhë xi hya ne, cumachuva cjuahmutacun xi tjin rë xuta. ¹³ Peru jarë ngayun xi scaa nuju cojo cjuacjintacun véhë hisca xi cueyun ne, cuechun xcun Nina. ¹⁴ Hane xuta ne, cjue me jingujyé ni ngasunhndë cuichja me cjuandajyihí vihi tséhë gubiernu xi sahmi Nina, xi cumachaya rë xuta ngasunhndë. Hane hisca xi cuma chihin yéjë xcusun véhë cuijnetaha nixtin vihi.

¹⁵ 'Profeta Daniel ne, catsihindu me xcun xujun rë Nina tséhë ngu xcusun tsehen xi tsinguetsun. Cuechún nixtin xi cuejña véhë xu cahndé ximinchacun —xuta xi vutaya cjuá vi, catjahacuenda me cjuá—. Hya xi cuatjin tsejen ne, ¹⁶ hya ne, xuta xi siu yéjë nandya tséhë distritu Judea ne, catanga me hane catangahma me hiscan ndetjún. ¹⁷ Hacuaha jarë me xi hinchasun me rcu ndava me ne, mé tséhë me xi siu cahntsua ndihya ne, mijí rë xi cjuejaha me. ¹⁸ Hacuaha ha chuva véhë ni ne, xuta xi siutaha me nguijña ne, mijí rë xi cuya cjuejaha me tsjanga rë me ndava me. ¹⁹ ¡Jemu chojyihí tséhë yéjë yachjin xi hinchahma quihndi rë cojo yéjë me xi tjin rë quihndi vaqui xi cojo me cuanga me nixtin hya! ²⁰ Chjahyun rë Nina xi cjuañihi véhë ne, hacuiin cuinduva nixtin chan hnchan o sá nixtin xi chjahájenda rë ta, ²¹ tséhë xi cjuañihi jyé xi cuma ne, ngu cjuandya jyé xi cjéé camahani camá hisca ntsacu cavetsihin ngasunhndë. Hacuaha cuyaain cuma nga. ²² Jemu jyé cjuañihi jan, sá tsajin xi ha camachuva nixtin rë cjuañihi véhë ne, hisca ngu xuta ne, cuetjintjiin me. Peru ngatsë rë cjuahmutacun xi tjin rë Nina cojo xuta xi cavaxijin me xi cuma ladu rë me ne, casahmichuva me nixtin véhë.

²³ 'Hya ne, sá xi cuichja yahnga me cojo nuju ta: "Cuajyihí Cristu nguehe", o sá "Cuajyihí me ngajan." Xi camacjaain nuju cjuá jan ta, ²⁴ tséhë xi nixtin hya ne, jemu cjín xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tséhë xi meje cuindacha me xuta, hisca cojo xuta xi cavaxijin Nina. ²⁵ Quihndë ne cojo chaja sa xi cuechu nixtin véhë ne, ngahan ne, ha cachjá cojo nuju. ²⁶ Véhë xi sá xi cuichja yahnga me cojo nuju ta: "Jemu xín tséhë nandya tacun me", hacuiin cuangun cojo me. O sá xi cuichja me ta: "Ndihya cahnchun tacun me", camacjain nuju tséhë me ta, ²⁷ sacuaha sahmi hasen ndihichuhún xi ha tu ñahñu sahmi hasen rë jingujyé ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu ñahñu scutsejen ná yéjë ni xuta hya xi cuinduvá nga ngahan xi Quihndi rë Xuta Jain. ²⁸ Cuatjin cuma nixtin hya sacuaha chja cjuá ta hiscan jiña chu xi cahme ne, hacuaha ngajan matangun chu lote.

Hya xi cuya nduva Quihndi rë Xuta Jain

²⁹ 'Ngutjen xi camá cavatju cjuañihi jan ne, cuinduva nixtin xi cjué ndavá rë tsuhi. Hacuaha sá ne, ha quihndë suaain ndavá rë. Hane niñú ne, cuixu tséhë ngahnga. Hisca ngahñu xi tjin ngahnga ne, cjuiniyaya. ³⁰ Hya xi camá ne, ngajan cuma tsejen seña tséhë Quihndi rë Xuta Jain. Hane yéjë xuta xi siu ngasunhndë ne, jindayava me. Sehe hya scuëë xuta ngahan, xi Quihndi rë Xuta Jain ngahan, xi cuinduvá ngajñi rë yufí cojo jemu jyé ngahñu, hisca seti hisca vatë jyihi ngahan xi cuinduva. ³¹ Hya ne, tsingátju ángel naha, hane xi ndaja hñu cuinuhya rë xi fane ngu tyjo, sehe cjuejaha rë yéjë ni xuta naha xi cavaxejen, sahmitangun rë me tséhë jinguyéjë ni ladu ngasunhndë.

³² 'Quihndë ne, ningatuhuntacún tséhë ejemplu xi sua yaxujún: Hya xi cuetsihin cumá xcuén tsja rë tséhë xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin. ³³ Hacuaha chuva vëhë ni ne, hya xi chun xi cuetsihin cumá yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin rë, hisca meje cumá. ³⁴ Cuichjá cjuaquixi cojo nuju ta xuta xi siu nixtin vihi ne siu cuaha me hya xi cuetjucaa xcusun xi cachjá cojo nuju jan. ³⁵ Ngahnga cojo nguehe ngasunhndë ne, hatuxa cjuë. Peru hisca ngu cjuá naha ne, tsajin xi cuetjincaain.

³⁶ 'Sacuaha nixtin xi cuetjucaa cjuatacun vëhë ne, tsajin yo vëë rë. Hisca víin ángel xi siu ngahnga. Hisca hveen ngahan xi Quihndi rë Xuta Jain. Suva tutu ni Nina nahmi naja ne, me vëhë xi vëë me.

³⁷ 'Sacuaha casahmi xuta hya xi cavéjña xutachanga naja Noé ne, hacuanitjin ni sahmi xuta hya xi cuinduva Quihndi rë Xuta Jain. ³⁸ Tséhë xi hya ne, xi chaja sa casesuntë nandan ngasunhndë ne, jine tjihvi xuta, vixan me, tsinguixan me quihndi rë me. Cuatjin casahmi cuaha me hisca nixtin xi cavisehen Noé cahntsua barcu. ³⁹ Hacuaha camachayiin rë me hisca xi casesuntë nandá quijicojo rë yëjë ni me jan. Hacuaha cuanitjin ni sahmi xuta hya xi cuinduvá ngahan xi Quihndi rë Xuta Jain ngahan. ⁴⁰ Jo cha ne, cuiyujutaha cha nguijña. Ngu cha ne, chjaháxin rë cha, hane cha xingu jan ne, cuejña cha. ⁴¹ Hacuaha jo nga yachjin ne, cuiyujutaha na coho na. Ngu na ne, chjaháxin rë na, hane na xingu jan ne, cuejña na.

⁴² Vëhë xi nechun cuidadu. Hacuaha ningascun rë cjuatacun nuju ta ngayun ne, hyúun janihya cjuhe Nai nuju. ⁴³ Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chëjë ndava me ne, suaain me cahndé xi scuxaha cha ndava me ne, sehe tsichëjë cha. ⁴⁴ Hacuanitjin ni meje rë xi ngayujun ni ngayun ne, tuhun chjinu yojo nuju ta, tséhë xi hora xi ningatuuntacún xi cujëhë ngahan xi Quihndi rë Xuta Jain ngahan ne, hora vëhë cjuëhë.

Xuta xi vihndë cojo xi vihndiin tséhë Nina

⁴⁵ 'Yo ngayun xi nihñu sacuaha sahmi ngu mosu hndixahan xi jemu quicun cacun xi sahmichihin yëjë ni hacutjin xi meje rë nai rë? Ngu hndixahan xi cjuahaxa xi cjuahacuenda rë yëjë sa hndixahan xi hora tjin sua xi sinë. ⁴⁶ Jemu ndaja tséhë ngu hndixahan jan xi tisahmi tutjin xi casuaxa rë nai rë. ⁴⁷ Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me. ⁴⁸ Peru cuejñaa ne xi hndixahan vëhë ne, jemu choho xcusun rë me, tsingataha cacun cojo cjuatacun rë cuitjin: "Nai naha ne, tijima tafi sa xi cjuehe me." Cuatjin tsingataha cacun. ⁴⁹ Sehe cuetsihin cuaja rë hndixahan xi yahnga jan, hacuaha cuatjutaha sinë cuihi hisca cuma chihi. ⁵⁰ Peru cuechú ngu nixtin xi tsajin tacunya hndixahan vëhë, ngu hora xi hisca hvíñ ne, hya cjuehe nai rë. ⁵¹ Hane jemu jyë castigu sahmi me, sehe tsingatju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaha tsijanerii me nehñu me.

25

Ejemplu tséhë tē na nixti xi quiji na cjuavixan

¹ 'Hya xi cuechú nixtin xi sahmi Nina gubiernu ne, cumá sacuaha cavatju tē na nixti xi cafaha na ndihi tséhë aceite, sehe quiji na xi cuejñaya na cha xi cuixan hora xi nduva cha. ² Hya xi camá ne, hñu na jan ne, rcu taja na, hacuiin ndaja tsingatahacacun na. Peru hñu nga na jan ne, ndaja quicun na. ³ Cavejña xi na rcu taja ne, hora xi cafaha na ndihi ne, cafaain na aceite xi cuya cuincha na tséhë. ⁴ Peru sacuaha na quicun jan ne, cafaha na ndihi ne, hacuaha xin cafaha na aceite. ⁵ Hane xi ma tafi xi nduva cha xi cuixan jan ne, cafaha rë na nijña ne, cavyujufé na. ⁶ Hya xi camá ne, sacuaha vasen nixten ne, canuhya rë xi jindaya xuta ta: "¡Nduva cha xi cuixan! Tangun tjengun cha xi cuanguncujun." ⁷ Xi cuatjin canuhya rë ne, cavisatjenhnga na nixti jan ne, cavéhëchjine na ndihi jan. ⁸ Hya xi camá ne, cachja na xi taja rcu cojo na quicun cuitjin: "Tuhun niji hitsë aceite nuju ta meje

cjuë xi tsijin ne, coho ndihu niji.” ⁹ Peru cafayangui na quicun cuitjin: “Cumaji tihin nuju ta sá cuatjin ne, cuechutaain tséhë xi cuma meje nuju hacuaha tséhë xi cuma meje niji. Hitsë sa ndaja ne, tangun hiscan xi xteña ne, hiscan ngajan chuhun.” ¹⁰ Cuatjin camá xi hora xi qui ji cavatsë na jan aceite ne, cafehe cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya. ¹¹ Hya xi camá ne, cafehe na nixti xi qui ji jan, hane cajindaya na tingotjo ndihya cuitjin: “Tatá, chuxuhun tingotjo tsijin.” ¹² Peru me vëhë jan ne, cafayangui me cuitjin: “Hveen jani nduvun ngayun.”

¹³ ’Vëhë xi nechun cuidadu, hacuaha ningascun rë cjuatacun nuju ta ngayun ne, hyúun mé hora, hyúun mé nixtin xi cumá.

Ejemplu tséhë tujún xi casua nai rë hndixahan

¹⁴ ’Cuejña ne xi ngu xuta jan ne, qui ji me ngu nangui cjin. Hane chaja sa xi cjue me ne, cajindaya me mosu hndixahan rë me casua me xi cuejñatsja cha xi tséhë me. ¹⁵ Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatjin casua me cha hatucutjin tsejen xi chutaha cha. Hya xi camá ne, cavetju me qui ji me. ¹⁶ Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rë cha hñu cuatjin sa. ¹⁷ Hacuaha cha xi cafahatsja cha jo mil tujún ne, cuanitjin ne cavesun rë cha jo cuatjin sa. ¹⁸ Peru cha xi cafahatsja cha ngu mil tujún tséhë nai rë cha ne, qui ji cha cafahangui cha ngu ngojo nangui. Hane ngajan caveyanijihma cha tujún jan.

¹⁹ ’Hya xi jercu cavatju nixtin xi qui ji nai jan, cavuya cafehe me, cajindaya me cha xi sua cuenda cha tséhë tujún jan. ²⁰ Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá, hñu mil catuhun ná, hindë ne, cavesun ná hñu cuatjin sa.” ²¹ Ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.” ²² Sehe cafehe cha xi cafahatsja cha jo mil tujún. Hane cachja cha cuitjin: “Tatá, jo mil catuhun ná, hindë nguehe tacun tsujun jo cuatjin sa xi cavesun ná.” ²³ Ngajan cachja nai jan cuitjin: “Ndatjin. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.”

²⁴ ’Hacuaha cafehe cha xi cafahatsja cha ngu mil tujún. Hane cuitjin cachja cha: “Tatá, ha machaya ná xi ngayun ne, jemu hñu cjua nuju. Nangun xitjë handasa hacuia ngayun xi canitjun. Ngayun ne, hacjahi sahmi xa ne, ngayun chjuhunntsun chji rë. ²⁵ Vëhë xi tsácjun ngahan. Hane cëjë caveyaneje hma tujún nuju. Cuajyihi tujún nuju nguehe.” ²⁶ Ngajan xi nai rë cha ne, catsicuya me tséhë cha cuitjin: “Ngaye ne, machjiriin ngaye. Ngaye ne, mosu hndixahan tsehen. Sá xi hye xi fanga handasa hacuia ngahan xi catsitjë, hye xi hacjahi sahmi xa ne, peru ngahan fahántsa chji rë, ²⁷ hitsë sa ndaja xi xcun bancun cahmi chani tujún xi casuá ri, cojo sa xi hya xi cjuéhë ne, cuya cjuahántsa tujún naha, peru cojo quihndi rë.” ²⁸ Sehe cachja me cojo me xi hincharun jan cuitjin: “Chjuhunntuhun tujún xi yaha cha vë. Sehe tuhun rë cha xi tjin rë të mil tujún ta, ²⁹ me xi ha tjin rë ne, sua sa Nina me, hisca vesun tséhë. Hane me xi tsajin cjín jan ne, cjuahataha Nina hitsë xi tjin rë me. ³⁰ Hacuaha chandunxin hndixahan xi machjiriin hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.”

Ejemplu tséhë chu tsángä cojo chu tentsun

³¹ ’Hya xi cuya Quihndi rë Xuta Jain cuinduva me cojo hasen ndajyihi tséhë Nina hacuaha cojo ángel rë Nina cuinduva me, cuejña me cahndé hñu hiscan tsichuva me xuta. ³² Hane ngajan xcun me ne, cumatangun xuta rë jinguyéjë ni ngasunhndë ne, sehe scuxijin me xuta sacuha sahmi ngu cha xi faha cuenda rë chu hora xi vaxijin cha chu tsanga tséhë ngajñi rë chu tentsun. ³³ Vinchaxin cha chu tsángä taha quixi rë cha, hane vinchaxin cha chu tentsun taha xcun. ³⁴ Hya xi cumá ne, me xi matitjun jan, cuichja me cojo xuta taha quixi ta: “Ndrevun nechun, ngayun xi catsinchacun Nina Nahmi naha.

Ngayun xi satë nuju cuisuhun gubiernu xi Nina cavéhëchjini me tsujun hisca ntsacu cavetsihin ngasunhndë. ³⁵ Cuatjin satë nuju ta tséhë xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndé cavitejñajenda ndya nuju. ³⁶ Tsajin ná tsjian, peru catuhun ná tsjian xi mameje; hmu ná hane cafuhun cachusuhunyun ná; tejñaya ndavaya hane cafuhun cachutsujun ná.” ³⁷ Sehe xuta tyjahi jan, tsicuya me cjua cuitjin: “Tatá, ¿janihya camachaya niji xi vojo nuju, hane canicjin nuju? ¿O sá xi xinda nuju, hane catihin nuju nandá? ³⁸ ¿O janihya cachutsijin nuju nujuhunyun sacuaha xutaxín hane catihin cahndé nechunjendun ndya niji? ¿Janihya cahyin xi tsajin nuju tsjian hane catihin? ³⁹ Hacuaha ¿janihya cahyin xi hmu nuju o nechunyun ndavaya xi canduvintjenguin nuju?” ⁴⁰ Sehe cuichja me xi matitjun jan ta: “Cuichjá quixi cojo nuju ta hya xi canihñu cjuandaja vë xi cavisecun rë tuyoni xuta yuma ladu naha ne, cavisecun ná ngahan.”

⁴¹ Hya xi camá ne, cachja me xi matitjun jan cojo xuta xi siu ladu scun rë me cuitjin: “Tangunxun ngayun xi cuatjun castigu rë Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rë. Ndihi jan ne, tsajin nixtin tsajin nixten xi coho. ⁴² Cuatjin satë nuju ta tséhë xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndé cavitejñajenda ndya nuju; ⁴³ Tsajin ná tsjian, peru catuun ná tsjian xi mameje; hmu ná hane cafuuun cachusunuun ná; tejñaya ndavaya hane cafuun chutsuun ná.” ⁴⁴ Sehe cuinenguise me cuitjin: “Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuhunyun sacuaha xutaxín, o xi tsajin nuju tsjian? Hacuaha ¿janihya cahyin xi hmu nuju o nechunyun ndavaya? ¿Janihya cahyin vë xi cavisecuiin nuju?” ⁴⁵ Sehe cuichja me xi matitjun jan ta: “Cuichjá quixé cojo nuju ta tséhë xi mijí nihñu cjuandaja vë xi cuisecun rë tuyoni xuta yuma ladu naha ne, mijí cuisecun ná ngahan.” ⁴⁶ Sehe xuta jan ne, cuisehen me castigu xi nixtin nixten cumá, peru xuta xi tyjahi cjuatacun rë me ne, satë rë me cjuahñu xatsë xcun Nina.

26

Camachihin cjua hacutjin xi chjahá rë Jesucristu

¹ Hya xi camá ne, xi cajnetaha cachja Jesús yéjé cjua cuatjin ne, sehe cachja me cojo xuta ladu rë me cuitjin:

² —Ha hyun xi chaja sa jo nixtin xi cuechú suhi tséhë pascua ne hane ngahan xi Quihndi rë Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

³ Nixtin hya ne, yéjé nahmi xi matitjun cojo xuta changá rë xuta tjé rë Israel ne, casahmi me ngu junta ngajan ndihya jyé rë Caifás, me xi vitexa yéjé nahmi xi matitjun.

⁴ Ngajan xi caviyuju me cjuatacun rë me hacutjin xi cuma cuindacha me Jesús cojo sa xi cuma cjuahahma me me xi tsiquehen me me. ⁵ Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rë xutacjín, hane cumá ngu sué jyé.

Cavitejnu ngu chjuun aceite rcu Jesucristu

⁶ Hya ne, Jesús ne, nandya Betania quitaha me. Tacun me ndava cha Simú, cha xi camandaja tséhë chíhin vitaha xi casatë chuxin rë cha. ⁷ Hane ngajan camá xi cafehetjengui rë me ngu chjuun xi yaha na ngu frascu xi ndyojo camá, hincha ngu aceite ndaja xi jercu hnga chji rë. Hya xi camá ne, cavitejnu na aceite jan rcu Jesús hora xi tijinë me niñu. ⁸ Peru xi cavutsejen cha ladu rë me xi cuatjin casahmi na jan ne, camacjan rë cha cachja cha cuitjin:

—¿Mé má tu mahya ni catsichaja na aceite vë? ⁹ Sá xi xteña ne ndaja sacú tujún rë. Hane tujún vëhë ne cuma cuisecoo rë xuta yuma. —Cuatjin cachjataha cha na.

¹⁰ Peru xi camachaya rë Jesús xi cuatjin chja cha ne, catsicuya me cjua cuitjin:

—¿Mé má cuatjin tivichuncjun tséhë na ta jemu vengui chjí rë xcusun xi casahmi na cojo ná? ¹¹ Xuta yuma ne, yéjë nu yéjë nixtin ne, siu me cojo nuju. Peru ngahan ne, hacuiin yéjë nu yéjë nixtin tejña cojo nuju. ¹² Tséhë xi xi cavitejnu ná na aceite jan ne cojo tjun ni ne cuéhëchjine na yojo naha xi seyaniji ngahan. ¹³ Cuichjáquixë cojo nuju ta tuyani ni tséhë jinguyjë ni ngasunhndë xi cuichja xuta cjua tséhë Nina ne, hacuaha cueyanangui me na vihi, cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

Judas casahmi cha compromisu xi cuiteña cha Jesús

¹⁴ Hya xi camá ne, ngu cha tséhë ngajñi rë me xi tejó xi má ladu rë Jesús, cha xi hmí rë Judas Iscariote ne, quiji cavisiajmi cha cojo nahmi xi matitjun ¹⁵ cavinenguise cha me cuitjin:

—¿Há cjín tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantë tujún tyava. ¹⁶ Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

Hacutjin cajiné Jesús tséhë suhi rë Pascua

¹⁷ Hya xi camá ne, nixtin xi tjun tjun tséhë suhi xi chinë pan xi tsajin san rë, cafehe xuta ladu rë Jesús xi tejo jan, cachja cha cojo me cuitjin:

—¿Jani meje nuju xi cuihinchjini xi xine nguixun tséhë suhi?

¹⁸ Sehe cafayangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rë cha cuitjin: “Chja maestru naja cuitjin: Meje cuechú hora naha, hindë ne, ndya nuju ne sínë niñu tséhë pascua cojo xuta ladu naha.”

¹⁹ Sehe quiji xuta ladu rë me ne, casahmi cha sacuaha xi cavitexa Jesús cha, hane cavéhëndaja cha xi sinënguixun me tséhë pascua.

²⁰ Hya xi quiji hora jan ne, tijinë me niñu cojo xuta ladu rë me xi tejó jan, ²¹ hane ngajñi hora xi tijinë me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

²² Ngajan xi jemu choho camá rë cha, cavetsihin cha cachja chuva ngu chuva ngu cha cojo rë me cuitjin:

—Nai, ¿há cumácacun xi ngahan sahme?

²³ Hya xi camá ne, cafayangui Jesús cuitjin:

—Ngu cha xi ngu ni tyuva tsinguísehenquinda niñu naha cojo ne, cha vëhë xi sahmi ná entregadu. ²⁴ Ngahan xi Quihndi rë Xuta Jain ngahan ne, hatuxa tjin ná xi cueya sacuatjin ha camá camahindu xcun xujun tsahan, peru jemu chojyhi tséhë cha xi sahmi ná entregadu. Vengui sa chji rë xi catsiin cha.

²⁵ Sehe Judas, cha xi sahmi rë me entregadu cachja cha ta:

—Maestro, ¿há cumácacun xi ngahan sahme?

Ngajan xi cafayangui Jesús tséhë cha cuitjin:

—Juun, quixi.

²⁶ Hora xi tijinë me comida ne, cafaha me ngu niñutsju hacuaha casua me nacuechji rë Nina ne, sehe cavotohocja me niñutsju jan, casua rë me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

²⁷ Hya xi camá ne, cafaha me ngu vasu ne, sehe casua me nacuechji rë Nina, sehe cachja me cuitjin:

—Juhun vihi sehe siuhun ngajñi ngayujun ni, ²⁸ ta xan rë uva vihi ne, vihi jni naha xi cuetju ngatsë rë xuta sehe cuma chihin compromisu xi cuaxëtje rë xuta tséhë jyé rë me.

²⁹ Hacuaha cuichjá cojo nuju ta quihndë cojo nixtin xi cjuiniji sa ne, ha quihndë cuyaan cuéhë xan rë uva. Cuéhë, peru hisca hya xi cuéhë nga cojo nuju ngajan hiscan sahmi Nina gubiernu.

Casua Jesucristu camachaya rë Pedru xi cuichja me xi hvíin me yo Jesucristu

³⁰ Xi cajnetaha cajinë me ne, casë me ngu tséhë Nina. Sehe cavetju me quiji me Naxi Olivu. ³¹ Hane sehe ngajan cachja Jesús cojo xuta ladu rë me cuitjin:

—Ngayujun ni ngayun ne, nismutacun ná hacuaha cuma ndaya cjuatacun nuju quihndë nguixun vi ne, hane cuejñu ná suva ta cumá sacuaha camahindu xcun xujun rë Nina xi chja xi: “Nina ne, tsiquehen me cha xi sahmi cuidadu rë chu tsángä, hane chu tsángä vë ne cuitsojo chu.” ³² Cuatjin cumá, peru hya xi cuya nga cjuahñu naha ne cjué titjun tsujun hisca distritu Galilea.

³³ Pedru ne, cafayangui cha cuitjin:

—Ha ndasa ngayëjë cha xi cuicun vi cuejña suva cha ngayun, hatuxa tsajin nixtin xi cojo ngahan sahme cuatjin.

³⁴ Hya xi camá ne, cuitjin cachja Jesús cojo cha:

—Cuichjáquixë cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

³⁵ Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun.

Hacuaha cuanitjin ni cachja cha xi yahnga.

Casahmi Jesucristu oración rë me ngajan Getsemani

³⁶ Sehe quiji Jesús cojo cha xi tejó jan ne, cafehe me ngu cahndë xi hmí rë Getsemani. Ngajan cachja Jesús cuitjin:

—Nechun ni nguehe. Cjué nguvan hitsë ni cuisajme cojo Nina. —Cuatjin cachja me.

³⁷ Hya xi camá ne, cavaxë me Pedru cojo jo cha quihndi rë Zebedeo xi quiji cojo me cha. Hane xi cjui me ne, cavetsihin jemu camá va rë me, hacuaha jemu macjincacun me.

³⁸ Sehe cachja me cojo cha cuitjin:

—Jercu chocho camahani má rë xahasen naha, sacuaha xi vëhë ni tsiquehen ná. Nguehe nechuncun ngayun cojo ná.

³⁹ Sehe ngajan xi Jesús ne, quiji me hitsë nguvan. Hane ngajan cafañatsacjan me, cafehya rë me Nina cuitjin:

—Ngayun Nahmi naha, sá tjin sa ngu chuva rë ne, catisatiin ná cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

⁴⁰ Hya xi camá ne, cavuya cafehe me hiscan siu jyan xuta ladu rë me xi quijicojo me jan ne, casacutsja me xi siufë me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora ni? ⁴¹ Nechuncun ngayun, nihñu oración nuju, sótu chjaháchuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuvacacun.

⁴² Hya xi camá ne, camá jo ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rë xi satiin ná cjuañihi ne, catama sacuatjin xi meje nuju ngayun.

⁴³ Hya xi camá ne, cavuya nga cafehe me hiscan siu jyan xuta jan casacutsja me xi siufë me ta jemu hai nijña rë me. ⁴⁴ Hya xi camá ne, camá jyan ndiya xi quiji me nguvan ne hacuaha cojo vëhë nga ne, cafehya me Nina. ⁴⁵ Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cuhun? Chutsujun ne, ha cavechú hora xi ngahan Quihndi rë Xuta Jain ne, cjuaha ná xuta xi sahmi ná entregadu cojo xuta tsehen. ⁴⁶ Tisatjunhngun, cuanguen chutsejen ta ha nduva cha xi sahmi ná entregadu.

Cafaha xuta Jesucristu

⁴⁷ Jinguyëjë rë xi tichja cuaha Jesús ne, cafehe Judas, cha xi cojo jiyajñi ngajñi rë cha xi tejó xi catsuyiyhiya cojo me. Hacuaha jemu cjín xuta tivisecoo rë cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya. ⁴⁸ Chaja sa xi cjuehe cha jan xi sahmi cha entregadu Jesús ne, cachja cha cojo xutacjín jan cuitjin:

—Cha xi cjué cuitatsuha xi suá rë nina ne, cha vëhë xi hacui cha.

⁴⁹ Xi tu cavechu cha hiscan nduva Jesús ne, ngutjen quiji casahmitiña cha tsëhë me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me. ⁵⁰ Ngajan xi cachja Jesús cojo cha cuitjin:

—Tai, Nihñichihin xa vëhë xi candove.

Hya xi camá ne, quiji xuta jan ne, cafaha me Jesús. ⁵¹ Ngajan xi ngu cha xi secun cha cojo Jesús ne, cavaxë cha quichanduju rë cha, hane cavaja rë cha ngu cha mosu rë nahmi xi matitjun, hane cavatësun cha ngu ladu tyjavañuji.

⁵² Ngajan xi cachja Jesús cojo cha cuitjin:

—Teyendeje quicha riji vë. Xuta xi tsicojo me quicha ne, hacuaha cojo quicha cueya me.

⁵³ ¿Há hyuun ta sá xi cjuehya rë Nahmi naha ne, jemu cjín mil ángel tsingatju me cuisecoo ná? ⁵⁴ Peru sá xi cuatjin sahme ne, ¿hacutjin cumachihin cjua rë xujun rë Nina? ta cuitjin meje rë xi cumá.

⁵⁵ Hya xi cajnetaha cachja Jesús cojo xuta ladu rë me ne, sehe cachja me cojo xutacjín cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni? Xi cavitejñaya cojo nuju nchunchujun ni ndatsen yungun jan ne, cavetuhunntsun ná cachjuun ná. ⁵⁶ Peru cuitjin tijima cojo sa xi cuetjucaa Jain hacutjin camahindu xcun xujun rë Nina xi catsihindu profeta.

Quiji me cojo Jesús ndava nahmi xi matitjun

⁵⁷ Hya xi camá ne, xi cafaha xuta jan Jesús ne, quijicojo me me ndava Caifás, nahmi xi matitjun tsëhë yëjë ni nahmi ta tsëhë xi ngajan ha camá tangun yëjë ni cha xi vicuya cjuachacun cojo yëjë ni xuta changá. ⁵⁸ Pedru ne, hacuaha tjengui cha cjui cha tu cjín tu cjín ni hacutjin cjui xuta jan cojo Jesús hisca xi cavisehen cha ndatsen rë ndava nahmi xi matitjun jan. Hane ngajan cavéjña cha cojo cha nísë rë yungun cojo sa xi cumachaya rë cha mé cumá.

⁵⁹ Hane nahmi xi matitjun jan cojo yëjë sa xuta xi matitjun ne, cavangui me xuta ndacha xi tsinguixi jyé rë Jesús, cojo sa xi cuma tsiquehen me me. ⁶⁰ Peru tsajin mé jyé rë Jesús xi casacu rë me handasa jemu cjín má xuta ndacha xi cachja me. Hisca xi ha tisacuiyiin rë me hacutjin cuma, sehe cafehe jo cha ndacha xi cachja cha ⁶¹ cuitjin:

—Cha vi cuitjin cachja cha ta: “Ngahan ne, cuma tsinguétsun yungun xi matitjun vi xi casahmi xuta tsëhë Nina, hane cahntsua xi jyan nixtin ne, sahme nga ngu.”

⁶² Ngajan xi nahmi xi matitjun tsëhë nahmi xi yahnga jan ne casecunvasen me, cavinenguise me Jesús cuitjin:

—¿Há chjayinnguiin hisca ngu cjua? ¿Mé noje tsëhë jyé xi vincha xuta jan?

⁶³ Hane Jesús ne, tu jyuu ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsë rë xi macjain ri tsëhë ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rë Nina? ¿Há ngaye xi Cristu?

⁶⁴ Ngajan cafayangui Jesús tsëhë me ta:

—Sacuatjin nújun vë ne, cuatjin Jain. Hacuaha cjuehe nixtin xi chutsujun ná xi tejña ladu quixi tsëhë ngahñu rë Nina. Hacuaha chutsujun ná xi cuinduvajne ngajñi rë yufí tsëhë ngahnga.

⁶⁵ Hane ngajan xi nahmi xi matitjun tsëhë nahmi xi yahnga jan ne xi jemu camacjan rë me ne, hisca tsjian rë me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjua testigu xi mameje. Ngayun ne, ha canuhyun hacutjin tsixcuehyu cha Nina. ⁶⁶ ¿Mé nújun quihndë?

Ngajan cafayangui me cuitjin:

—¡Meje rë xi cueya cha!

⁶⁷ Hyá xi camá ne, ngu jo me cavetsihin me cavéhénatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús. ⁶⁸ Cachja me cuitjin:

—Tinoje, ngaye Cristu, ¿yo xi cavaja ri?

Cachja Pedru xi hvíin me yo Jesucristu

⁶⁹ Jinguyéjë rë xi cuatjin tijima ne, Pedru ne, tacun me ndatsen ndihya. Hyá xi camá ne canduva ngu na mosu hndixahan tséhë nahmi jan, cafehe cachja na cojo Pedru cuitjin:

—Ngaye ne, ladu rë Jesús tséhë distritu Galilea má ye.

⁷⁰ Peru xcun yéjë me xi siu me ne, cafahahma me cachja me cuitjin:

—Hisca hveen mé xi noje.

⁷¹ Hyá xi camá ne, sehe cavetju me quiji me casecun me hiscan tu cuiseen ni tséhë ndatsen ndihya. Hane ngajan xi ngu nga na cachja na cojo xuta xi siu ta:

—Cha vihi ne, ladu rë Jesús nandya Nasarét má cha.

⁷² Hyá xi camá ne, ngu ndiya nga ne cafahahma me cuitjin:

—Vëë Nina xi hveen xuta jan.

⁷³ Hyá xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajyihí vë, ta tséhë xi cjua riji tsingacun xi xuta distritu vë ngaye.

⁷⁴ Ngajan xi cavetsihin nga Pedru cafahahma me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vëë Nina Jain xi hveen yo me xi nújun vë.

Hane hora vëhë ne, cajihnda ngu xahnda. ⁷⁵ Hane Pedru ne, catsinguitsjen me cjua xi cachja Jesús cojo rë me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

27

Casahmi entregadu me Jesucristu xcun Pilatu

¹ Hyá xi camá nchujun ni ne, yéjë ni nahmi xi matitjun cojo yéjë xuta changá ne camatangun nga me xi sacuya rë me xcusun hacutjin cuma tsiquehen me Jesús. ² Sehe catsihñu me Jesús ne, quijicani me xcun gobernador xi hmí rë Pilatu.

Cahme Judas

³ Hyá xi camá ne, Judas ne, cha xi casahmi rë me entregadu, camachaya rë cha xi cueya Jesús. Ngajan xi choho camá rë cha hane catsindeya cha cjuatacun rë cha. Quiji cha catsicuya cha catë tujún tyava jan cojo nahmi xi matitjun cojo xuta changá. ⁴ Cuitjin cachja cha:

—Jemu tjin jyé naha ta tséhë xi casahme entregadu ngu me xi tsajin xi cun rë.

Peru cafayangui me cuitjin:

—¡Mé tsijin vë! Cjuacjintacun vë hatuxa tsiji sove.

⁵ Hyá xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndé xi cavityjangui cha yojo rë cha hisca xi camá cahme cha.

⁶ Nahmi xi matitjun jan cafa me tujún tyava jan Peru cachja me cuitjin:

—Cumaji cuinchan tujún vi cahntsua caxa tujún rë yungun ta tséhë xi tujún vi ne, cavengui chji rë jni rë cha.

⁷ Hyá xi camá ne, cachuya rë me xi cuatsë me ngu xáhva xi chja xuta Nangui rë Cha Chjineti. Xáhva jan ne cumachji rëhë xi xinchaniji xutaxín xi cueya me nangui vë.

⁸ Ngatsë rë xi cuatjin casacu xahva jan ne, hisca nixtin quihndé ne cahndé vëhë ne yaha ñihi xi Cahndé Tséhë Jni. ⁹ Xi cuatjin camá ne, camachihin cjua xi catsihindu profeta Jeremías xi cuitjin chja: “Cafaha me catë tujún tyava, xi cavejña chji rë cha xi cafehya

xuta nangui Israel, ¹⁰ sehe casua me tujún jan xi cjuaha me nangui rë cha chjinetiji. Cuatjin casahmi me sacuaha cavitexa Nina.”

Xcusun xi cavatju Jesús xcun Pilatu

¹¹ Hya xi camá ne, Jesús ne secun me xcun gobernador. Ngajan cavinenguise me Jesús cuitjin:

—¿Há ngaye xu matitjun ngaye tséhë xuta tjé rë Israel? —Cuatjin cavinenguise me.

Hane Jesús ne, cuitjin cafayangui me:

—Cuatjin sacuatjin nújun vë. —Cuatjin cafayangui me.

¹² Peru hora xi nahmi xi matitjun cojo xuta changá jan cavincha jyé me Jesús ne, ndastu mé cafayangui Jesús. ¹³ Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjín jyé riji cavincha me.

¹⁴ Peru Jesús ne ha quihndë cafayanguin me hisca ngu cjua. Hane Pilatu ne, jemu quijircun camahani rë me.

Camá entregadu Jesús xi cjue cueya me

¹⁵ Tjin ngu xcusun xi nu nu ni, hya xi cumá nixtin rë suhi jan ne, tsismi gobernador ngu presu xi xuta vaxijin me. ¹⁶ Nixtin hya ne, jiya ngu presu xi jemu tjin cjua tséhë, Barrabás hmí rë cha. ¹⁷ Ngajan xi camá xi hya xi camatangun xutacjín ne, ngajan cavinenguise Pilatu xuta cuitjin:

—¿Jarë cha xi meje nuju xi tsisme? ¿Há Barrabás ne? ¿Há Jesús xi Mesías xu?

¹⁸ Cuatjin cachja me cojo xuta ta tséhë xi ha vëe me xi ngatsë ni rë cjuxain sahmi nahmi xi matitjun jan cojo Jesús, vëhë xi casahmi me entregadu xi meje rë me xi cueya.

¹⁹ Hora xi tijimá vë, tacun Pilatu xcun sillan hiscan vejña me hora xi vitexa me, ngajan xi chjuun rë me ne, catsingatju na cjua xi cuitjin chja: “Caninguisuunjñuu cjuacjintacun tséhë cha vë xi tyjahi cjuatacun rë cha, ta nguchjin ne ngajni nijña naha jemu cjín xcusun xi chocun camá ná chini ngatsë rë cha.” Cuatjin fi cjua xi catsingatju na.

²⁰ Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús. ²¹ Ngajan cachja nga gobernador cuitjin:

—Tséhë jo cha vë ne, ¿jarë cha xi meje nuju xi tsisme?

Ngajan cafayangui xutacjín jan cuitjin:

—Nismu Barrabás.

²² Sehe cachja nga Pilatu cuitjin:

—Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yëjë xutacjín jan cuitjin:

—¡Tetuhun cha xcun cru!

²³ Ngajan xi cachja Pilatu cojo rë me ta:

—Peru ¿mé xi rcu jyé casahmi cha?

Peru xutacjín ne hitsë sa hñu cajindaya me cachja me cuitjin:

—¡Tetuhun cha xcun cru!

²⁴ Hya xi camachaya rë Pilatu xi sahmi cuendaain xuta xi chja me ta tu hitsë sa tijima ngu suë jyé ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitjeen jyé tséhë cjuaveya rë cha vihi ta, tsajin jyé rë cha. Vëhë ne, ha chaha nuju vëhë.

²⁵ Hya xi camá ne, yëjë xutacjin jan ne, ngu tangun ni cafayangui me cuitjin:

—Tséhë cjuaveya rë cha vëhë ne, chanijiyin cojo quihndi niji. —Cuatjin cachja me.

²⁶ Hya xi camá ne, catsismi me Barrabás, peru casahmi me xi Jesús ne casehen rë me sehe casua Pilatu me xi cjue cueya me xcun cru.

²⁷ Hya xi camá ne cha sindadu xi vitexa gobernador ne, quiyi cojo cha Jesús taha cahntsua ndava gobernador jan. Hane sehe casahmitangun sa cha yëjë sindadu cjín.

²⁸ Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani.

²⁹ Hacuaha catsihya cha ngu corona nahiá sehe cavesun cha rcu Jesús hane cavisengui cha ngu bastón tsja me. Hya xi camá ne, cavixcuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tséhë xuta tjë rë Israel.

³⁰ Hacuaha cavéhénatya cha me, hacuaha cafaha cha bastón jan xi yaha tsja me hane cavaja cha rcu me. ³¹ Hya xi camá xi cuatjin catsixcuehyu cha me ne, cafahaxin cha tsjian hani jan, catsicaja nga cha me tsjian rë me. Hya xi camá ne, sehe quijicojo cha me xi cuetaha cha me xcun cru.

Casetaha Jesucristu xcun cru

³² Hya xi cavetjun cjuicojo sindadu Jesús ne, cavechutaha cha ngu me xi hmí rë Simón tséhë nandya Cirene. Sehe sindadu jan ne, casahmi cha nguyé xi cuaniji me cru jan.

³³ Hane xi cafehe cha cojo Jesús hiscan xi hmí rë Gólgota, cjua xi meje cuichja Naxi Nínda Rcuun. ³⁴ Hya xi camá ne, casua cha me xan rë uva xi tecjan rë nandá rë tyjungunsa xi cuihi Jesús. Peru xi cavutaha me hitsé ne, cahviin me.

³⁵ Ngajan xi sindadu jan ne, xi cavatju casetaha me xcun cru ne, sehe cafaha cha tsjian rë me hane cavaxé cha suerte tséhë ne, jarë cha xi satë rë cha jima ngu tsjian. ³⁶ Sehe ngajan ne caveññataha cha cavutsejensun cha Jesús xcun cru. ³⁷ Hacuaha camahindu ngujo cjua xi casetaha xcun cru ngatihin rcu Jesús sacuha xcusun rë me xi setaha xujun jyé rë xuta, hane cuitjin chja cjua jan: “Jesús, me xi Matitjun Tséhë Xuta Israel.”

³⁸ Hacuaha cavityangui cha ngu chéjë ngu ngu ladu tjehen rë me, jima ngu cojo cru rë. ³⁹ Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

⁴⁰ —Ngaye xi ha canoje xi cuma ninguetin yungun xi matitjun, hane cahntsua xi jyan nixtin ne; cama nga canindeje ngu. Quihndë ne, sá cuatjin cuma nihñi ne, naxetje sove yojo riji. Sá xi Quihndi Jain rë Nina ngaye, titujni tséhë cru vë.

⁴¹ Ha chuva vëhë ni ne, nahmi xi matitjun ne cojo cha vicuya cjuachacun rë ley cojo xuta changá ne cachja me cuitjin:

⁴² —Cavaxétje xu cha xuta, peru quihndë ne, cumaji cuaxétje suva cha yojo rë cha. Sá xi hacui jain cha xi Matitjun Tséhë Xuta Israel ne, catitujne cha tséhë cru chutsejen, cojo sa xi cumacjain naja tséhë cha. ⁴³ Macjain xu rë cha tséhë Nina, quihndë ne cataxétje Nina cha sá xi Nina meje rë me cha; ta cachja cha ta: “Quihndi rë Nina, ngahan.”

⁴⁴ Hacuaha cha chéjë xi cojo caxtyangui taha cru jan ne, cojo cha choho cachja cha tséhë Jesús.

Xcusun xi camá hya xi cahme Jesucristu

⁴⁵ Hane hora vëhë ne, camajñu jinguyé ni. Cavetsihin xi camanchisen ne, quiji cani rë hisca fane jyan. ⁴⁶ Hya xi camá ne, jercu hñu camahani cachja Jesús cuitjin:

—Elí, Elí, ¿lama sabactani? -cjua vëhë meje cuichja ta: Ngayun Nina na, mé má canismutacun ná.

⁴⁷ Hane ngujo xuta xi hinchacun jan ne, xi cajnii rcu me hne jan hane cachja me cuitjin:
—Tijindaya me profeta Elías.

⁴⁸ Hya xi camá ne, ngutjen ni, cavanga ngu me, quiji catsicahnchi me ngu tsjian hindu cojo xan rë uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihingui me. ⁴⁹ Ngajan xi yahnga xuta ne, cachja me cuitjin:

—Caveni tuhun. Cuinechanyan hitsé ne, ¿há cuinduva jain Elías cuaxétje me cha?

⁵⁰ Hane Jesús ne, hora vëhë ne, jercu cajindaya nga me hane cahme me. ⁵¹ Hacuaha hora vëhë ni ne, tsjian nduju xi tyjangui cahntsua yungun xi matitjun jan ne, hisca rcu hisca ntsacu canduva catiyavasen. Hacuaha cafani nangui. Hacuaha cavacjan ndyojo.

⁵² Hacuaha hora vëhë ni ne, catuxaha tsjun rë nima, hane jemu cjín xuta xi tyjahi cjuatacun rë me xcun Nina ne, cavuya cjuahñu rë me. ⁵³ Cavetjun xuta jan tséhë tsjun. Hane hya xi ha cavuya cjuahñu rë Jesús ne, sehe cavisehen me nandya Jerusalén hane ngajan ne, cjín xuta ne, cavëë rë me.

⁵⁴ Hora xi cahme Jesús ne, cha capitán tséhë cha sindadu cojo yahnga sindadu xi hinchacun me ngajan vutsejensun me Jesús ne, camachaya rë cha xi fani nangui cojo cjin xcusun sa xi cavatju camá. Hane jercu quijircun camaha ni rë cha. Hacuaha cachja cha cuitjin:

—Hacui jain me vihi xi Quihndi Jain rë Nina, me.

⁵⁵ Hacuaha ngajan ne, tséhë cjin ne hinchacun cuaha cjín yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me. ⁵⁶ Ngajñi yachjin jan ne, hinchajñi na xi cuicun vi: na María na Mágdala, hacuaha na María naa rë Jacobo cojo José, hacuaha cojo naa rë cha quihndi rë Zebedeo.

Caseya nima Jesucristu cahntsua tsjun

⁵⁷ Hya xi cajne hora ne, ngu cha nchina xi hmí rë José, ngu xuta Arimatea cha xi hacuaha xuta ladu rë Jesús cha. ⁵⁸ Cha vëhë quiyi cha xcun Pilatu, cafehya cha cahndé sá xi cuma cjuahaxin cha nima Jesús. Hane Pilatu ne, casua me cha cahndé. ⁵⁹ Ngajan xi cafahatsja cha nima jan ne, sehe catsitjingui rë cha tsjian tyjahi, sacuaha xcusun rë me. ⁶⁰ Sehe caveya cha nima cahntsua ngu tsjun xatsë rë suva cha xi ha casahmi cha xi camá catjuhngui rë taha naxi. Sehe catsindefajne cha ngu ndyojo jyë xi cuechja rë tingotjo rë tsjun jan. Hya xi camá casahmi cha ne, quiyi cha cojo xuta ra. ⁶¹ Peru na María na Mágdala cojo na María xi hacjahi ne, caviyuutaha na xcun tsjun.

Cha sindadu siu cuidadu cha tsjun

⁶² Hya xi cumá nchujun ni ne, hya nixtin xi cjuahajenda rë me ne, hya camatangun nahmi xi matitjun cojo cha partidu fariseo sehe cachja cha cojo Pilatu. ⁶³ Cuitjin cachja cha tséhë Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vë cuitjin: “Cahntsua jyan nixtin ne, cuya cjuahñu naha.” ⁶⁴ Ngatsë rë vëhë ne, meje rë xi nihñu cuendun xi sehñu ndaja tsjun rë cha hisca xi ha cavatju jyan nixtin jan, cojo sa xi cumaji nduva cha ladu rë nima vë ne, cjuahaxin cha nima tséhë tsjun jan, sehe cuichja cha xi cavuya cjuahñu rë nima. Cuatjin nihñu ta tséhë xi sá xi cuatjin sahmi cha, hisca hitsë sa choho cuatjuun cumá.

⁶⁵ Ngajan xi cachja Pilatu cojo rë me cuitjin:

—Sacu nuju sindadu jan xi sahmi cuidadu rë tsjun, sehe tanguncujun ne, hacuaha ndaja techjunhñu tsjun vë hacutjin cuma xi nihñu.

⁶⁶ Sehe quiyi me cojo sindadu jan, cavechjahñu me tsjun, cojo sa xi cumatsejen sa xi cuaxë cha nima, hacuaha caviyuju cha sindadu xi sahmi cuidadu rë.

28

Cavuya Jesucristu cjuahñu

¹ Xi cavatju nixtin xi chjahájenda rë jan ne, xi tu casahasen ni tséhë nixtin ngu tséhë totje ne, na María na Mágdala jan cojo na María xi hacjahi ne, cavitju na quiyi vutsejen na xcun tsjun rë nima Jesús. ² Hya xi camá ne, jercu cafani nangui ta tséhë xi canduvajne ngu ángel rë Nina tséhë ngahnga. Hane ángel jan ne, quiyi catsivahaxin ndyojo xi cavechja rë tingotjo rë tsjun jan, sehe cavejña xcun. ³ Ángel jan ne, sacuaha ndihi chuhun ne, cuatjin jyihi ángel. Hacuaha tsjian rë ne, jemu tu tyava camahani jyihi, sacuaha jyihi hnchan xi hmí rë nieve. ⁴ Xi camachaya rë me tséhë ángel jan ne, jemu catsacjun sindadu xi siu cuidadu ngajan, hisca cafatsë hnchan cha hisca sacuaha cahme yojo ra cojo chircun.

⁵ Ngajan xi cachja ángel cojo yachjin xi siutaha jan cuitjin:

—Xicarcuun. Ha hvë xi Jesús vinchunsun me, me xi cavetaha xuta xcun cru. ⁶ Me vëhë ne, tsajin me nguehe ta cavuya me cjuahñu sacuaha cachja me. Nduvun chutsujun cahndé hiscan cafaña me. ⁷ Quihndé ne tangun sanii ne, tuhuncuendum rë xuta ladu rë me cuitjin: “Ha cavuya cjuahñu rë me; hane cjue titjun me tsujun Galilea. Hane ngajan sacu xingueen.” Hindë ne, vëhë cjuá xi cuichjá cojo nuju.

⁸ Hya xi camá ne, cavetju quiji yachjin jan. Jercu quijircun rë na peru hacuaha jercu ndama rë na. Cuatjin quiji na xi suacuenda na xuta ladu rë Jesús tséhë cjua xi cachja ángel. ⁹ Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tséhë Jesús, caticjarcun na cafaha na ntsacu Jesús hane cafharcun na me. ¹⁰ Hya xi camá ne, Jesús ne, cachja me cojo na cuitjin:

—Xicarcuun. Tangun tuhuncuendun rë hermano naja, tinújun cojo me xi cjue me distritu Galilea. Hane ngajan sacu xingueen.

Cjua xi casua sindadu

¹¹ Jinguyéjë rë xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tséhë xcusun xi camá. ¹² Sehe nahmi jan ne, hya xi ha camátangun me cojo xuta changá hane cavisiajmi cjin me tséhë mé xi sahmi me. Hane xi cama chihin cjua ne, jemu cjín camahani tujún casua me cha sindadu jan, ¹³ hacuaha cachja me cojo sindadu cuitjin:

—Vihi cjua xi cuinújun ni. Cuinújun ta xuta ladu rë me ne, nguixun ne, hora xi catsuñufun ne, cafehe me. Hane tahahma ne catsichéjë me nima. ¹⁴ Hane sá xi cumachaya rë gobernador tséhë cjua jan ne, ngayin ne, cuanguin cuinújin cojo rë me cojo sa xi cuijnecacun me tsajin mé sahmi me cojo nuju.

¹⁵ Cuatjin camá xi cafahatsja cha tujún jan, hane cachja cha sacuaha cavitexa nahmi jan. Cjua vëhë ne, cavitsojo ngajñi rë xuta nangui Israel. Hane cuatjin chja cjua hisca nixtin quihndë.

Jesús ne, casuaxa me xuta ladu rë me xi cjue cuichja me cjua rë Nina

¹⁶ Hya xi camá ne, xuta ladu rë Jesús xi má tengu me ne, quiji me distritu Galilea, hisca naxi xi cachja Jesús. ¹⁷ Hya xi camá ne, ngajan cavëë me Jesús ne, cafharcun me me. Peru ngujo ni me macjaain rë me. ¹⁸ Ngajan xi camatiña Jesús tséhë me, cachja me cojo me cuitjin:

—Ha cafahantsa ngahñu xi cumá sahme tu mé ni xcusun sá xi tséhë ngahnga o sá xi tséhë ngasunhndë. ¹⁹ Ngatsé rë ngahñu vëhë ne, tsingátju nuju ne, tangun jinguyéjë rë nandya ngasunhndë, cuinújun cojo xuta jan cojo sa xi cuisehen me ladu naha. Catiseyanangui ñihi rë Nina Nahmi, cojo ñihi naha, Quihndi rë Nina, cojo ñihi rë Hasen rë Nina hora xi xtenda me. ²⁰ Hacuaha ticuyun rë me xi cuihndë me ne, sahmichihin me yëjë xcusun xi cavitexa nuju ngahan. Hane xi cuatjin ne, hacuaha cuitejñacuaha cojo nuju yëjë ni hora hisca cuijnetaha nixtin rë ngasunhndë.

Cjuandajyihi xi catsihindu San Marcos Tséhë Jesucristu

Juan ne, vitenda rë xuta ngajan ngu xín tséhë nandya

- ¹ Cuitjin cavetsihin cjua tséhë Jesucristu, me xi Quihndi rë Nina Jain.
² Isaías ne, ngu xutachanga xi cama cafaha cjua rë Nina hacuaha cachja me cojo xuta hatséé nixtin. Cuitjin catsihindu me, hacutjin cachja Nina cojo me:
 Tsingátju titjun ngu cha xi cjuaha cjua naha, cojo sa xi scuxaha cha cjuatacun rë xuta, tséhë xi cjuehe ngaye.
³ Hane hiscan jemu xín tséhë nandya ne, ngajan cuejña cha. Hane cuitjin cuichja cha: "Sacuatjin matyjahi ndiya hya xi nduva ngu xuta rcun ne, cuatjin nihñu tyjahi cjuatacun nuju tséhë xi cuinduva me xi matitjun tsajan." Cuatjin cuichja cha.
- ⁴ Sacuatjin jain catsihindu Isaías ne, cuatjin jain camá ta cafehe cha xi catsingatju Nina, cha xi hmí rë Juan, ngajan hiscan jemu xín tséhë nandya. Casua cha camachaya rë xuta ta meje rë xi tsindeya me cjuatacun rë me hacuaha xtenda me, cojo sa xi tsinchataha Nina me tséhë jyé rë me. ⁵ Hane jercu cjín xuta quijitjengui me cha, xuta tséhë distritu Judea cojo nandya Jerusalén. Hane cavitenda cha me xi cavijacun jyé rë cojo Nina ngajan ndajyé Jordán.

⁶ Tsjian rë cha Juan jan ne, tsja rë chu camellu camá. Cojo ngu cinturón chuxin quitaha cahntsua cha. Xi camá niñu rë cha ne, chu nchahva. Cojo tsjen rë chu tuden cahvi cha.

⁷ Cuitjin cachja cha:

—Canduvá ngahan titjun. Peru sehe cuinduva ngu me xi hitsé sa vechu cjuatacun rë xi cumá ná ngahan, xi hisca chuxinxte rë me cumaji tsinguisehercu sahme tyjahi. ⁸ Ngahan ne, tu caviténda ni nuju. Peru me vëhë ne, cueya me Hasen rë Nina cahntsua xahasen nuju.

Jesús ne, caxtenda me

⁹ Sacuaha nixtin vëhë ne, cavetju Jesús tséhë nandya Nasaret, distritu Galilea. Quijitjengui me cha Juan xi cuitenda cha me. Hane cavitenda cha me ngajan ndajyé Jordán. ¹⁰ Xi camá caxtenda me ne, xi tu tivetju me tséhë nandan jan ne, cavëé me xi ngahnga ne tituxaha, hacuaha Hasen rë Nina ne, nduvajne sacuaha tsejen ngu paloma, quiji cavisehen cahntsua xahasen rë me. ¹¹ Hacuaha canuhya rë ngu cjua ngajan ngahnga xi chja cuitjin:

—Ngaye ne, quihndi naha ngaye. Jercu hmucacun ri. Jercu ndama ná ngatsé riji.

Jesús ne, cahachuva xitsehen me

¹² Ngajan xi Jesús ne, ngutjen ni quiji me ngajan ngu xín ta tséhë xi Hasen rë Nina ne, cavaxëxin rë me. ¹³ Casetaha me ngajan xín yachan nixtin. Hacuatjin cojo Satanás quijitjengui rë me. Hane handasa jercu cavangui Satanás chuva rë xi chocho sahmi Jesús ne, peru casahmii me. Hacuaha quiji ángel cavyujutaha xi cjuahacuenda rë me.

Jesús ne, vetsihin me cojo xa rë me

¹⁴ Hacuaha camá nga ngu xcusun xi xuta xi matitjun ne, caveya me cha Juan ndavaya. Cavatju vëhë ne, sehe cavuya cafe nga Jesús distritu Galilea, cachja me cojo xuta cjua rë Nina. ¹⁵ Cuitjin cachja me:

—Camatiña nixtin xi Nina ne, cuitexa me ngasunhndë. Vëhë xi meje rë xi nindeyun cjuatacun nuju hacuaha catamacjain nuju cjua xi tichjá cojo nuju.

Jesús ne, cajindaya me ñuju cha xi tsuva rë chu ti xi cuma cha ladu rë me

¹⁶ Nixtin xi catsuyiyihiya me hya ne, cavatju me tjehen laguna tséhë Galilea. Hora hya ne, cavëé me cha Simón cojo cha Andrés hntsé cha. Titsingatjenya cha nahya ngajni laguna jan, tséhë xi ha tuxa xa vëhë sahmi cha. ¹⁷ Hane ngajan xi cachja me cojo cha ta:

—Nduvun cuanguen cojo ná. Hane cuicuyá nuju xi nuvun xuta xi cuisehen me ladu naja ngojo rë xi chu ti nuvun. —Cuatjin cachja me.

¹⁸ Hane hora vëhë ni cavyuju cha nahya jan ne, quiji cha cojo me. ¹⁹ Ha xcun xi ha cjui Jesús cojo cha xi cuacun jan hitsé ni nguvan ne, cavëë me cha Jacobo cojo cha Juan hntsé cha, quihndi rë Zebedeo. Hincha cha cahntsua barcu, tifuyataha cha nahya. ²⁰ Hane hacuaha cajindaya me cha. Sehe cavyuju cha nahmi rë cha xi hmí Zebedeo cojo mosu rë me ngajan cahntsua barcu. Sehe quiji cha cojo Jesús.

Ngu cha xi jiya rë ngu xitsehen

²¹ Hya xi camá ne, cafehe me cojo catsiñuju cha xi cuacun vëhë nandya Capernaum. Hane hya xi cavechu nixtin xi chjahájenda rë ne, quiji me yungun, cavicuya me xuta.

²² Hane xuta jan ne, quijircun rë me hacutjin vicuya Jesús ta, tséhë xi tivicuya me sacuaha

ngu xi matitjun jain, hacuiin sacuatjin maestru xi vicuya ley rë xuta tséhë nangui Israel.

²³ Hacuaha ha tu ñahñu canduva ngu cha xi jiya xitsehen cahntsua xahasen rë cha ngajan cahntsua yungun jan. ²⁴ Hane cuitjin cajindaya cha:

—Ngayun ne, ¿mé cuenda nuju tsijin? ¿Há nduvun nicjun niji? Ngayun ne, Jesús tséhë nandya Nasaret ngayun. Hacuaha hvë xi ngayun xi tsajin jyé nuju ngayun xi catsingatju nuju Nina.

²⁵ Hane Jesús ne, cachja cjan me cojo xitsehen xi jiya xahasen rë cha jan. Cuitjin cachja me:

—Jyuu nechin. Hacuaha tetjixin tséhë cha vi.

²⁶ Xi tu cahmexcuén cha xi casahmi xitsehen ne, hisca cajindaya, hane cavetjuxin tséhë cha. ²⁷ Yéjë ni xuta jan ne, jemu quijircun rë me, hisca cavisajmi me cojo xicjin me cuitjin:

—¿Mé nga xcusun vihi ni? Ngu cjua xatsé xi vicuya me vihi, ta hisca xitsehen, hacuaha hndë tséhë me.

²⁸ Hacuaha marcu macjain canuhya rë tséhë me jinguyéjë ni ladu tséhë distritu Galilea.

Jesús ne, sahmi me xi mandaja nahya rë Simón Pedru

²⁹ Hya xi camá ne, cavetju me yungun jan, quiji me ndava cha Simón. Quiji me cojo cha Jacobo cojo cha Juan, hacuaha cojo cha Andrés hntsé cha Simón. ³⁰ Hane nahya rë cha Simón ne, jiña na xi hmu rë na cojo chihinsuë. Hane ngutjen cachja cha cojo Jesús xi hmu rë na. ³¹ Ngajan xi quiji tiña Jesús hiscan jiña na, cafaha me tsja na, catsisatjen me na. Hane hora vëhë ni, casejyu suë xi má rë na. Hisca cafaha cuenda na xi sinë me cojo xicjin me.

Jesús ne, sahmi me xi mandaja xutacjín xi hmu rë

³² Hane xi cavetje tsuhi ne, jemu cjín xuta quijicojo me xuta hmu rë hiscan tacun Jesús, hacuaha cojo me xi hincha xitsehen xahasen rë, ³³ camatangun me cojo xuta nandya ngajan tingotjo ndihya. ³⁴ Hane jemu cjín xuta hmu rë camandaja me xi casahmi Jesús, xuta xi má rë me tu mé ni chishin xi má rë xuta. Hacuaha jemu cjín xitsehen cavaxéxin me tséhë xahasen rë xuta. Hane casuaain me cahndé xi cachja xitsehen ta tséhë xi ha vëë rë me. Hane ngutjen cuichja ta me vëhë xi catsingatju Nina me.

Jesús ne, sua machaya rë xuta cjua rë Nina ngajan yungun

³⁵ Xi camá nchujuni, jñu sa nguitajñu cavisatjenhnga me. Hane cavetju me ndihya quiji me ngu cahndé hiscan xin. Hane ngajan cavisajmi me cojo Nina. ³⁶ Ngajan xi cha Simón cojo cha xi yahnga jan ne, cavanguise cha Jesús. ³⁷ Hane xi casacu rë cha me ne, sehe cachja cha cojo me ta:

—Jemu cjín xuta cafehetjengui nuju me. —Cuatjin chja cha.

³⁸ Ngajan xi cachja me cojo cha ta:

—Cuanguen sa nandya xi siu tahndee, cojo sa xi hacuaha cuichjá cojo xuta vëhë cjua rë Nina ta tséhë xi xa vëhë canduvá. —Cuatjin cachja me.

³⁹ Hane sehe quiji sa me yungun xi siu yëjë ni nandya tsëhë Galilea. Cachja me cojo xuta cjua rë Nina, hacuaha cavaxëxin me xitsehen xi hincha xahasen rë ngujo xuta xi siu nandya jan.

Jesús ne, sahmi xi mandaja ngu cha xi ma rë chíhin xi vitaha rë yojo naja

⁴⁰ Hyo xi catsuyiyhiya me nandya xi cuacun vëhë, hya cachja ngu cha xi yaha rë ngu chíhin vitaha xi setaha chuxin naja. Hane cachjajyë cha cojo Jesús, hisca cavixcuhnchi cha xcun me, sehe cachja cha cuitjin:

—Sá xi nihñu favor ne, cuma naxunxun chíhin xi yaha ná.

⁴¹ Jesús ne, camayuma rë me cha. Hane cavetahatsja me cha. Sehe cachja me cojo cha cuitjin:

—Joho. Ha camandaja ngaye. —Cuatjin cachja me.

⁴² Hane ngutjen ni cavetjuxin chíhin jan ne, camandaja cha. ⁴³ Hane sehe casua me cha cuidadu. Hane ngutjen ni catsingatju me cha, quiji cha. ⁴⁴ Cuitjin cachja me:

—Ndaja cuidadu xi canujiin camahani xcusun vi cojo hisca ngu. Peru tihin ningacuin yyo riji cojo nahmi ngajan yungun. Hane tejñi ngu cjuatjo sacuatjin chja ley tsëhë Moisés ta camandaja ngaye, cojo sa xi xuta ne, cumacjain rë me. —Cuatjin cachja me cojo cha.

⁴⁵ Peru xi cavetju cha quiji cha ne, cavetsihin casua cha camachaya rë xuta. Jercu cachjatë cha tsëhë xcusun vëhë. Vëhë xi Jesús ne, ha quihndë cavisii me nandya ta tsëhë xi ha ngutjen jercu tsë xuta. Hane ngajan ni nguijña casetaha me. Peru xuta ne, yëjë ni ladu cavetju me, quijitjengui me Jesús.

2

Jesús ne, sahmi me xi mandaja ngu cha xi cahme yojo rë

¹ Hane cahntsua xi ngujo nixtin ne, cavuya quiji nga Jesús cojo cha ladu rë me ngajan nandya Capernaum. ² Hane xi casacu cjua xi tacun ndihya me ne, jercu camatangun xuta, hisca tingotjo ndihya quitsë me. Hane sehe cachja Jesús cjua rë Nina. ³ Ngajan xi canduva ñuju cha hiscan tacun Jesús, yahahnga cha ngu cha xi cahme yojo rë. ⁴ Hane xi maji ficojo cha cha hisca hiscan tacun Jesús, tsëhë xi jemu quitsë xuta ne, cavuxaha cha rcu ndihya quixi rë hiscan tacun me. Sehe ngajan catsinguehen cha cha hmu rë jan cojo ni nachan xi quisun cha. ⁵ Hya xi cavëé Jesús hacutjin xi macjain rë cha me ne, sehe cachja me cojo cha hmu rë jan ta:

—Jyé riji tsan ne, ha camanchataha. —Cuatjin cachja me.

⁶ Hora vëhë ne, hacuaha tivisiñuju ngujo cha maestru tsëhë ley, hacuaha taha titsingatahacacun cha cuitjin: ⁷ “Mé má cuitjin chja cha xi cuijyahi vi?, ta Nina tsixcuehyu cha. Tsajin yo xi cuma tsinchataha jyé rë ngu xuta ta suva ni Nina má sahmi me.” ⁸ Jesús ne, ha hisca vëe me cojo cjuatcacun rë me xi cuatjin tsingatahacacun cha xi cuacún vë, hane sehe cavinenguise me cuitjin:

—¿Mé má cuatjin ningatuhuntacun cjuatcacun vëhë? ⁹ ¿Jarë xi hitsë sa tsavi xi cuichjá cojo cha hmu rë vi? ¿Há xi: “Jyé riji ne, ha camanchataha?” O há tsajin ne, ¿há xi: “Tisatjinhngue ne, chjaye nijña riji, hane tjihin?” ¹⁰ Hindë cojo sa xi cumachaya nuju xi Nina cavitexa me ngahan xi tsinchátaha jyé rë xuta nguehe ngasunhndë ne, nguehe chutsujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

¹¹ —Tisatjinhngue tsan. Chjaye nijña riji ne, tjihin ndya riji. —Cuatjin cachja me.

¹² Ngajan xi cha hmu rë jan ne, ngutjen ni cavisatjehnga cha, cafaya cha nijña rë cha, sehe cafe cha xcun ni ngayëjë xuta. Vëhë xi ngayëjë ni xuta jan ne, jemu quijircun rë me. Hacuaha cachja me ta:

—Jemu cjuarcun Jain Nina. Vëhë xi cuatjin camá casahmi me. Cjëé camahani chaan xcusun sacuaha vëhë. —Cuatjin cachja xuta.

Jesús ne, jindaya me Leví xi má me xuta ladu rë Jesús

¹³ Ngu nixtin nga ne, cavatju Jesús tjehen laguna. Hane jemu cjín xuta quijitjengui rë me. Hane cavicuya me xuta jan. ¹⁴ Hane hya xi cjui cjui me ne, cavechu me hisca tacun cha Leví, quihndi rë cha Alfeo. Tacun cha ndihya hiscan faha cha xi machjitje tséhë xi xeña. Sehe cachja Jesús cojo cha cuitjin:

—Cuanguen cojo ná.

Hya xi camá ne, cavetju cha, quiji cha cojo me.

¹⁵ Cuitjin camá nga ngu nixtin jan, tijinë Jesús niñu ndava cha Leví. Hacuaha jemu cjín sa cha xi faha tujúnsa cojo jingu sa cha tsehen tijinë cha cojo Jesús cojo cha ladu rë me, ta hacuaha jemu cjín xuta xi cuacún vë xi tjengui rë me. ¹⁶ Peru cha maestru tséhë ley cojo cha tséhë partidu fariseo ne xi tu cavëë cha xi tijinë Jesús cojo cha xi cuacún jan ne, sehe cavinenguise cha cojo cha ladu rë me cuitjin:

—¿Mé má cuatjin tijinë Jesús cojo cha xi choho xcusun rë vë ni?

¹⁷ Xi tu cahndë Jesús cjua rë cha ne, sehe ngajan xi cachja me cojo cha ngu ejemplu cuitjin:

—Xuta xi hacuiin hmu rë me ne, mijí rë me doctor. Me xi hmu ni rë me ne, me vëhë xi mameje rë me. Hacuaha ha chuva vëhë ni canduvá ngahan. Canduvá cuanguë xuta xi choho cjuatacun rë, cuichjá cojo rë me cjua rë Nina. Peru hacuiin cojo me xi ha tyjahi cjuatacun rë. —Cuatjin cachja me.

Vinenguise xuta tséhë xun rë Nina

¹⁸ Camá xi cha ladu rë cha Juan cojo cha tséhë partidu fariseo ne, nixtin hya ne siu cha xun tséhë Nina. Hane cafehe ngujo cha xi cavinenguise rë Jesús cuitjin:

—¿Mé má cha ladu rë cha Juan cojo cha tséhë partidu fariseo ne, tijinii cha quihndë ta, siu cha xun rë Nina, hane cha ladu nuju ne, faharcuiin cha cuatjin ni?

¹⁹ Sehe catsicuya Jesús cjua cojo ngujo ejemplu cuitjin:

—Jinguyëjë rë xi cha xi cuixan ne, tacun cha cojo xuta rë cha ne, cumaji cuiyuju me xun rë Nina. ²⁰ Peru cuinduva nixtin hya xi cha xi vixan ne, cojo cjuachan cjuecojo condra rë cha cha. Hane hya cuiyuju xuta rë me xun rë Nina.

Ejemplu tséhë tsjian cojo chuxin xi xincha xan

²¹ Hacuaha cachja me cojo cha cuitjin:

—Tsajin yo xi fuyataha tsjian changá cojo ngu rqui tsjian xatsë ta tséhë xi cjéë cjueyu. Cuatjin ta, sá xi cuatjin sahmi me ne, xi cjueyu tsjian xatsë jan ne, cuicheya rë tsjian xi changá jan hane sahmi jyë sa rë hiscan xi ntsun. ²² Hacuaha tsajin yo xi vincha xan xatsë cahntsua chuxin changá ta, sá xi cuatjin sahmi me ne xan jan ne, tsitsinga rë chuxin jan. Hane xan jan ne, chajan. Hacuaha cuetsun chuxin jan. Vëhë xi xan xatsë ne meje rë chuxin xi xatsë. Maji secjan jo xcusun.

Cha ladu rë Jesús ne, fane cha trigu nixtin xi chjahájenda rë

²³ Cuitjin camá nga ngu nixtin xi chjahájenda rë. Hora xi tivatju Jesús cojo cha ladu rë me hiscan tjin tjë trigu ne, cavetsihin cavotohosun cha tsé tsé trigu jan. ²⁴ Sehe cha tséhë partidu fariseo cavinenguise cha me cuitjin:

—¿Mé má cuatjin quihndë nixtin xi chjahájenda rë ne, sahmi cha ladu nuju xa xi chja ley xi cumaji nihñä?

²⁵ Sehe Jesús ne, cafayangui me tséhë cha cuitjin:

—¿Há cjéë camahani chutayun xujun hiscan chja tséhë xcusun xi casahmi David hya xi tjin rë me cjuandya xi jemu vojo rë me cojo cha xi siutaha cojo me? ²⁶ Hya xi Abiatar má me nahmi xi matitjun jan ne, hya cavisehen me ndava Nina. Hane David ne, cajinë me pan xi viyuju xcun Nina. Hacuaha casua me cajinë cha xi siu cojo me. Cuatjin casahmi me handasa xi chja ley ta suva ni nahmi tjin cahndë xi cuma sinë me pan xi cuacún vë. —Cuatjin cachja Jesús.

²⁷ Ngajan xi cachja me cojo cha ta:

—Xi má nuju ngayun ne, ¿há titjun cavejña Nina nixtin xi chjahájenda rë, sehe catsindaja me xuta xi cjuaharcun rë nixtin vëhë? ¡Hacuiin cuatjin camá! Nina ne, titjun catsindaja me xuta, hane xi camá ngascan ne, cavajña me nixtin xi cjuahajenda xuta. ²⁸ Cuatjin ne, ngahan xi tséhë Nina canduvá ne, hacuaha satë ná ngahan sacuaha nai rë xi cuichjá mé xi ndatjin xi cuma nixtin xi chjahájenda rë. —Cuatjin cachja Jesús.

3

Jesús ne, sahmi me xi cama ndaja ngu cha xi quixinhñu ngu ladu tsja cha nixtin sabadu

¹ Ngu nixtin nga xi quiji Jesús ngu yungun ne, ngajan tacun ngu xihin xi quixihñu ngu ladu tsja cha. ² Hane cha tséhë partidu fariseo ne, cojo sa xi cuma cuinchajyé cha Jesús ne, siu cha cuidadu, ¿há tsindaja Jesús hiscan hmu rë xihin jan nixtin xi chjahájenda rë?

³ Hane ngajan xi cachja Jesús cojo cha xi quixihñu tsja jan cuitjin:

—Xcun ni yéjé xuta vi ne, tisechin.

⁴ Sehe cavinenguise me xuta xi siu me cuitjin:

—¿Mé xi sacu cahndé nixtin xi chjahájenda rë? ¡Há xi ndaja ne, o há xi ndajin, há xi naxentjen xuta o há xi niquen me?

Peru cafayinnguiin me hisca hitsë. ⁵ Vëhë xi Jesús ne, cama cjan rë me. Hacuaha cama vacacun me ta, tséhë xi sahmi yumahesen xuta. Xi tu cavutsejen Jesús yéjé ni xuta ne, sehe cachja me cojo xihin hmu rë jan cuitjin:

—Nixingun ntsun.

Xi tu catsixinga cha tsja cha ne, ha camandaja. ⁶ Ngajan xi cha tséhë partidu fariseo ne, cavetju cha yungun. Quiji casahmitangun cha cjua cojo cha tséhë partidu Herodes xi tsiquehen cha Jesús.

Xutacjín xi camandaja me

⁷ Ngajan xi Jesús cojo cha ladu rë me ne, quiji nga me laguna. Hacuaha jemu cjín xuta tséhë distritu Galilea quijitjengui me Jesús. ⁸ Hane xi camachaya rë xuta xcusun xi casahmi Jesús ne, canduva camaha sa xuta tséhë cahndé xi cuicun vi: nandya Jerusalén cojo yéjé sa nandya tséhë distritu Judea, cojo distritu Idumea, cojo ngunda vëhë tséhë ndajyé Jordán cojo hisca tahndee rë nandya Tiro cojo nandya Sidón. ⁹ Sehe ngajan xi cachja me cojo cha ladu rë me ta meje rë xi cuejña cha ngu barcu tiña hiscan tacun me, ta jemu cuehnchun xuta me. ¹⁰ Hane tséhë xi jemu cjín xuta camandaja me xi casahmi Jesús ne, vëhë xi yéjé ni me xi hmu rë catsëxti me ne, cojo sa xi ndastu satë tsja me Jesús. ¹¹ Hane xi cavëë xitsehen xi hincha xahasen rë xuta jan Jesús ne, quiji caticja xuta jan hisca tacun Jesús. Sehe ña jindayatë xuta jan, ta xitsehen casahmi xi cachja me cuitjin:

—Ngayun xi Quihndi rë Nina ngayun. —Cuatjin cajindaya me.

¹² Ngajan xi Jesús ne, cavitexa me xitsehen xi tsajin yo cuichja cojo yo me.

Jesús ne, vuxijin me tejó me xi cumá apóstol

¹³ Hyá xi camá ne, camiji Jesús ngu naxi. Sehe catsingatju me cjua rë cha xi meje rë me. Hane quijitjengui cha me. ¹⁴ Hane cavaxijin me tejó cha xi cuisecoo rë me, hane hacuaha tsingatju me cha cjue cuicuya cha xuta cjua rë Nina, ¹⁵ hacuaha cuaxëxin cha xitsehen xi hincha xahasen rë xuta. ¹⁶ Cha xi tejó tséhë cha ladu rë me cuitjin hmí ra: cha Simón ne, hacui cha xi cachja Jesús xi hmí rë Pedru, ¹⁷ cha Jacobo cojo cha Juan hntsé cha ne, xi quihndi rë Zebedeo, cha xi casuañhi me Boanergerne, ngu ñihi xcuehyu xi meje cuichja Jemu Xti Naja, ¹⁸ cha Andrés, cha Felipe, cha Bartolomé, cha Mateo, cha Tomás, cha Jacobo, quihndi rë Alfeo, cha Tadeo, cha Simón xi tséhë partidu cananayu, ¹⁹ hane cha Judas tséhë nandya Queriote, cha xi cuiteña rë Jesús cojo condra rë me.

Jyé xi cumajin cumanchataha

²⁰ Hyá xi camá ne, cavuya quiji nga Jesús ndihya hiscan véjña me. Hacuanitjin nga camatangun xuta cjín. Hisca xi siné Jesús niñu cojo cha ladu rë me maji. ²¹ Hyá xi

camachaya rë xuta rë me cjua vëhë ne, quiji me xi cuaxëxin rë me, tsëhë xi há sa má rë me, sca rë Jesús.

²² Hane cha maestru tsëhë ley ne, canduva cha tsëhë Jerusalén. Sehe cavisiajmi cha cojo xicjin cha cuitjin:

—Jiya Satanás xahasen rë me. Hane ngatsë rë xitsehen xi matitjun vë ne, vëhë xi ma vaxëxin Jesús xitsehen. —Cuatjin cachja cha.

²³ Ngajan xi casahmi tangun Jesús cha xi cuacun vëhë ne, sehe cojo nguko ejemplu cachja me cojo cha cuitjin:

—Jemu yuma hasen rë Satanás sá xi suva ni cuaxëxin xicjin. ²⁴ Ha hyan ta sá xi xutaxa rë tsëhë ngu nandya scaan me ngajñi rë me ne, cjuicanii rë me. ²⁵ Hacuaha sá xi xuta xi ngu ndava me ne, scaan me ngajñi rë me ne, ngajan chaja. ²⁶ Ha cuanitjin rë Satanás ta sá xi scaan cojo xicjin ne, ha quihndë cumachjiriin xi matitjun ta, tsëhë xi ha quihndë cuihndiin xicjin tsëhë.

²⁷ 'Hacuanitjin ne, hisca ngu cha chéjë cumaji tu cuisehen ni cha ndava ngu xuta xi hñu ngahñu rë me xi tsichëjë cha tsëhë me. Cumaji sa xi hacuiin titjun tsihñu cha me ta cuatjin xi cuma tsichëjë cha tsëhë me.

²⁸ 'Cuichjá cojo nuju cjuaquixi ta tu mé ni jyé xi sahmi xuta hacuaha tu mé ni cjua xi choho cuichja me ne, sacu rë me cjuanchataha, sá xi cuijacun me jyé rë me cojo Nina.

²⁹ Peru tu yo ni xi choho cuichja tsëhë Hasen rë Nina ne, tsajin ngu nixtin xi sacu rë cjuanchataha ta jemu jyé jyé rë.

³⁰ Cuatjin cachja Jesús ta tsëhë xi cachja cha jan xi jiya xitsehen xahasen rë me.

Naa rë Jesús cojo xicjin me

³¹ Hane cafehe naa rë me cojo hntsë me ne, ngajan ni ndatsen hinchacun me ne, catsingatju me cjua xi meje cuisiajmi me cojo Jesús. ³² Vëhë ta jemu cjín xuta siundee me Jesús ne, sehe cachja xuta cojo rë me cuitjin:

—Nutsujun ni. Ná nuju cojo tsuhun cojo tichjun ne, jindaya nuju me ngajan candatsen.

³³ Sehe cafayangui Jesús cuitjin:

—¿Yo xi má nuju xi ná naha cojo xingueen?

³⁴ Cavutsejen me xuta xi siundee rë me, sehe cachja me cuitjin:

—Ngayun xi nechun nguehe, ngayun xi sacuaha ná naha cojo xingueen ³⁵ ta, tu yo ni xi sahmi sacuatjin chja Nina ne, vëhë xi sacuaha ná naha sacuaha xingueen.

4

Ejemplu tsëhë cha xi tsitjë

¹ Ngu ndiya nga ne, cavetsihin cavicuya Jesús xuta tjehen laguna. Hane ngu cuatjin nga jercu tu catsë camahani xuta hiscan tacun me. Vëhë xi cavisehen me ngu barcu cavéjña me. Hane quijicojo rë me hitsë xcun nandá, ngajan cavéjña. Hane yéjë ni xutacjín jan ne, caviyuju me nangui quixí tjehen nandan. ² Sehe cavicuya Jesús me jemu cjín cjua. Cuitjin cachja me ngu ejemplu:

³ —Cuejña ni xi ngu xihin ne, quiji catsitjë cha trigu. ⁴ Hane hora xi ticandi cha tjë rë ne, nguko ne, cavixu ndiya. Hane canduva nisë ne, cajinë chu. ⁵ Ngujo nga ne, cavixu hiscan xi jemu ndyojotë, hacuaha jemu chuva nihndë quisun. Hane jemu xati cavetju ta tsëhë xi hacuiin tjain nihndë quisun. ⁶ Hane xi jemu suë camá ne, caxiya tsëhë xi jemu chuva tyjama rë. ⁷ Ngujo nga ne, cavixu ngajñi rë nahyá. Xi tu camayehe nahyá ne, casahmihndë rë xitjë, hane camayiin. ⁸ Hane nguko nga ne, cavixu hiscan ndajyihí nangui. Vëhë ne, jemu ndaja camá, hisca yehe hnga camá ya rë. Ngujo ne jemu ndaja camá. Ngujo nga jan ne, hitsë sa ndaja camá. Hane xi yahnga jan ne, jercu vatjutaha ndaja camá. Cuatjin fi ejemplu tsëhë cha xi tsitjë trigu.

⁹ Jarë ngayun xi meje nuju cuma nuju ne, ningatuhuntacun nduju mé vijne cjua vë.

¹⁰ Hyá xi cafe xutacjín jan ne, ngajan xi me xi siundee cuaha jan cojo cha xi tejó jan ne, cavinenguise me tséhë cuentu jan. ¹¹ Sehe cafayangui Jesús cuitjin:

—Ngayun ne casua nuju Nina cahndé xi vijne rcun cjuatahahma tséhë gubiernu xi sahmi me. Peru me xi hacuiin ladu naja ne, cojo suva ejemplu tichjá cojo rë me, ¹² cojo sa xi handasa cuihndé me ne, peru cuijnii rcu me ta, sá tu tsindeya me cjuatacun rë me ne, hacuaha cumanchataha me. —Cuatjin cachja Jesús.

Jesús ne, chja me mé vijne ejemplu tséhë cha xi tsitjé

¹³ Sehe ngajan xi cachja Jesús cojo cha ladu rë me ta:

—Sá xi ha canuhuyun ejemplu vëhë ne, hacutjin cuinuhuyun sa xi yahnga ni. Nguehe cuichjá cojo nuju mé vijne ejemplu xi cachjá cojo nuju vë. ¹⁴ Cha xi tsitjé trigu ne, sacuaha ngu cha xi chja cjua rë Nina cojo xuta. ¹⁵ Ngujo me xi vihndé cjua vëhë ne, sacuaha tjé rë trigu xi cavixu ndiya ta cjua ndajyihí xi vihndé me ne, ngutjen ni nduva Satanás ne, fahataha cjua xi caseya cahntsua xahesen rë me. ¹⁶ Yahnga nga me xi vihndé cjua vëhë ne, sacuaha tjé xi cavixu hiscan jemu ndyojoté ta hya xi vihndé me cjua ndajyihí ne, ngutjen ni jemu cojo cjuasua macjain rë me cjua. ¹⁷ Peru tséhë xi hacuiin nguñaja cacun me macjain rë me ne, vëhë xi seyaain cahntsua xahesen rë me hya xi má cjuandya, sacuaha cumá rë tjé xi jemu chuva tyjama rë ne ta, cain rë xi jyé nixtin. ¹⁸ Hane ngujo nga me xi vihndé cjua vëhë ne, sacuaha tjé xi cavixu ngajní nahyá. Vihndé me cjua. ¹⁹ Peru tséhë xi jemu tjin rë me cjuandya hacuaha jercu meje rë me xi cuma nchina me, vëhë xi chuva cuenda sahmi me cjua ndajyihí xi cavisíñuju me. Fë ne, tsajin mé vetjucaa. ²⁰ Ngujo nga me xi vihndé cjua ndajyihí vëhë ne sacuaha tjé xi camatjé hiscan ndajyihí nanguí ta xi tu vihndé me cjua vëhë ne, faha nguñajacacun me. Vëhë xi ngujo me ne, ndaja cuyujuchihin cjuatacun rë me. Ngujo nga me ne, hitsé sa ndaja cuyujuchihin cjuatacun rë me. Hane me xi yahnga jan ne, jercu tu ndaja camahani cuyujuchihin cjuatacun rë.

Ejemplu tséhë lámpara

²¹ Hacuaha cachja me cojo rë me cuitjin:

—Hya xi setaha rë candil ne, ¿jani cuejña? ¿Há ngahma caxa ne? o ¿há ngahma nachan? Hacuiin cuatjin nihñu ta, cuejña cahndé rë. ²² Sacuaha ndaja tsejen ndihi jan ne, hatuxa cuechu nixtin xi cuijne rcu xuta cjua naha xi hacuiin ndaja vijne rcun me quihndé. ²³ Jarë ngayun xi meje nuju cumá nuju ne, ningatuhuntacunndujun mé vijne cjua vë. ²⁴ Hacuaha cachja sa me cojo xutacjín cuitjin:

—Ndaja tetuhunrcun xi tivisiñuju. Chuva xi tuhun ne, ha chuva vëhë sua nuju Nina. Hisca quisun sa sua nuju me. ²⁵ Me xi ha tjin rë ne, sua sa Nina me, hane me xi tsajin cjín rë ne, cjuahataha Nina xi tjin rë me.

Ejemplu tséhë tutjé xi majyé

²⁶ Sehe cachja Jesús cojo xutacjín jan ngu ejemplu cuitjin:

—Xuta xi cuisehen me ladu rë Nina ne, ha tuxa cumá cjín me sacuaha tjé tséhë trigu xi tsitjé ngu xihin xcun nanguí rë me. ²⁷ Fañafé cha nguixun ne, visatjenhnga cha nguitajñu. Hane tjé ne, vetju, hacuaha mayehe xitjé. Peru xihin jan ne, hvíin hacutjin camá xi camayehe xitjé jan. ²⁸ Nanguí ne, ha tuxa má xitjé. Titjun ne, cuetju xca rë. Xi cuijin sa ne, cuetju tú chihndé rë. Hiscan xi cuijnetaha ne, jemu cjín tutjé rë cuetju. ²⁹ Hane hya xi camacha tutjé rë ne, sehe tsingatju xihin jan mosu xi cjue cuaté ta tséhë xi ha cavechu nixtin xi xtí rë.

Ejemplu tséhë tutjé rë mostasa

³⁰ Sehe cachja Jesús cuitjin:

—Nguehe cuichjá cojo nuju ngu nga ejemplu tséhë gubiernu xi sahmi Nina. ³¹ Xuta xi cuisehen ladu rë Nina ne, cumacjín me sacuaha majyé ngu ya mostasa. Tutjé rë ya vëhë ne, hitsé sa langa xi cumá rë yéjé ni tutjé xi tjin ngasunhndé. ³² Peru hya xi matjé ngu ne, sehe cuetju xca rë hacuaha hitsé sa jyé má xi cuma rë yéjé ni xca xi chine. Hane tsja rë ne, hacuaha yehe, hisca nisé ma sahmi chu ndava chu xcun tsja rë hiscan tjahnguen.

Mé tséhë xi Jesús ne, sahmixa me cojo ejemplu

³³ Jemu cjín ejemplu sacuaha vëhë cachja Jesús hya xi tivicuya me xuta cjua rë Nina, hatucutjin hora xi cama cavetaharcu xuta. Hane cojo xuta ne, cachja me suva ejemplu.

³⁴ Peru hya xi suva siu cha ladu rë me ne, casua cuenda me cha mé vijne yëjë ejemplu jan.

Jesús ne, tsisejyu me tjo cojo tsindyu rë laguna

³⁵ Xi quiji hora tséhë nixtin vëhë ne, Jesús ne, cachja me cojo cha ladu rë me cuitjin:
—Cuanguen ngunda vëhë. —Cuitjin cachja me.

³⁶ Ngajan xi cavyuju ni me xutacjín jan ne, sehe cha ladu rë me ne, quiji cha cojo me tu cuanitjin ni. Hacuaha cojo sa barcu xi yahnga jan ne, quiji tangun cojo rë me.

³⁷ Hora xi cjui barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsé rë barcu cojo nandá. ³⁸ Hane Jesús ne, hisca cahnchun barcu jan jiñafé me, tijiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

³⁹ Hane cavasca rë me ne, cachja me cojo tjo cojo laguna cuitjin:
—Jyuu nechun.

Xi tu cachja me cuatjin ne, casejyu yëjë ni. ⁴⁰ Ngajan xi cachja me cojo rë cha cuitjin:
—¿Mé má cuatjin jemu rcun? ¿Hacuyihi ni xi hisca cjëe cumacjain ndaja nuju ngahan?

⁴¹ Hya xi camá ne, jercu catsacjun camahani cha ladu rë me jan. Hane sehe ngajñi rë cha jan ne, cavisajmi cha cuitjin:

—¿Yo me xi cuiyyihi vi? ta, hisca tjo hisca laguna hndë tséhë me.

5

Cha tséhë nandya Gadara xi jiya ra xitsehen

¹ Hya xi camá ne, cafehe Jesús cojo cha ladu rë me ngunda vëhë tséhë laguna, hiscan ladu rë xuta nandya Gadara.

² Hane xi cavetju me barcu jan, canduva tiña ngu xihin xi hincha xitsehan xahasen rë, canduva cha tséhë ngajñi rë tsjun ngajan tahndë. ³ Hacuaha ha ngajan tacun cahndë cha tahndë. Hacuaha tjihñu cha xi sejyu cha hisca cojo cadena. ⁴ Jemu cjan rë cha, cjín ndiya camahñu tsja camahñu ntsacu cha cojo cadena, peru tu cavicheya ni cha. Vëhë xi tsajin yo xi cama casahmi cojo cha. ⁵ Catsuyihiya cha nixtin nixten ngajan tahndë cojo ngajñi nguijña cha. Hane cajindayatëcjin ni cha, hacuaha cavanguihmucjin ni cha yojo rë cha cojo ndyojo. ⁶ Hane hora xi cavëe cha Jesús ne, cjin sa nduva cha ne, vanga cha quiji cavixcuhnchi cha xcun Jesús xi cjuaharcun cha me. ⁷ Na cajindayatë cha cachja cha cuitjin:

—¿Mé cuenda nuju tsahan, Jesús, Quihndi rë Nina xi matitjun? Catamaniji rë Nina xi tuhundyun ná.

⁸ Cuatjin cachja cha ta tséhë xi ha tichja Jesús xi cuetjuxin xitsehen jan tséhë xahasen rë cha. ⁹ Sehe cavinenguise me ñihi rë cha. Hane cafayangui cha tséhë me cuitjin:

—Ñihi naha ne, Sindadu Cjín, tséhë xi jemu cjín ngayin.

¹⁰ Sehe jercu cafehya cha cojo Jesús xi hacuiin cjín camaha tsingatju me xitsehen jan tséhë cahndë vëhë. ¹¹ Jinguyéjë rë xi cuatjin tijima ne, ngajan tiñataha ne, tacun ngu cahndë hiscan chu chinga hinchataha chu tijinë chu. ¹² Hane xitsehen jan ne, ña yuma chja cojo Jesús cachja cuitjin:

—Ningatjun niji hiscan siutaha chinga, xi cuisihin cahntsua xahasen rë chu.

¹³ Hane Jesús ne, joho cachja me. Hane hora xi cavetju xitsehen xahasen rë xihin jan ne, quiji cavisehen cahntsua xahasen rë chingajan. Sehe yëjë ni chingajan, xi meje jo mil

jan ne, cavanga chu qui ji cavetje chu ngu ndetjun tséhë rcu naxi hane ngajan cavixuya chu ngajni laguna. Ngajan camiji rë chu, hane cahme chu.

¹⁴ Hane cha xi titsicjén rë chinga jan ne, cavanga cha qui ji cha. Casua cha camachaya rë xuta xi siutaha nguijña, cavechu hisca nandya cachja cha. Ngajan xi xuta xi cahndë cjua jan ne, qui ji cavutsejen me mé xi camá jan. ¹⁵ Cafehe me hisca tacun Jesús, hane cavëe me cha xi jemu cjín xitsehen caxincha xahesen rë, tacun cha, yaja cha tsjian rë cha, hacuaha ha quihndë tsajin mé má rë cjuatacun rë cha. Hane xuta jan ne, jemu catsacjun me camá. ¹⁶ Hacuaha xuta xi cavëe hacutjin cavatju cha camá hacuaha hacutjin cavatju chinga camá ne, cachja me cojo xuta xi yahnga. ¹⁷ Sehe cavetsihin cachja me cojo Jesús xi catje me tséhë ladu rë me xi cuicun vi.

¹⁸ Hya xi camá ne, hora xi tivisehen Jesús barcu ne, jercu cafehya cha xi caxincha xitsehen xahesen rë jan xi cjue cha cojo me. ¹⁹ Peru Jesús ne casuaain me cahndë xi cjue cha. Hane cuitjin cachja me cojo cha:

—Tjihin ndya riji. Tjihin tjengui xuta riji, hane tinoje cojo rë me xi Nina ne, camayuma rë me ngaye. Hacuaha tinoje tséhë cjuandaja xi casahmi me cojo ri.

²⁰ Ha xcun xi cafë cahndë cha cjua xi cachja Jesús ne, sehe cavetju cha qui ji cha ladu hiscan xi hmí rë Të Nandya. Hane cavetsihin cha casuacuenda cha cjuandaja xi casahmi Jesús cojo cha. Sehe xuta xi siu cahndë jan ne, jemu quijircun rë me.

Jesús ne, sahmi me xi mandaja na chjuun xi ma rë xahmajni ndiya ndava Jairo

²¹ Xi tu cavuya nga Jesús cojo barcu ladu vihi tséhë laguna ne, jercu catsë nga xuta hiscan cafehe me tjehen laguna. ²² Hacuaha cafehe ngu xutaxa rë yungun rë ngu nandya. Cha vëhë ne, Jairo hmí rë cha. Hya xi cavëe cha Jesús ne, qui ji cavixuhnchi cha xcun me. ²³ Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cueña sa na cjuahñu.

²⁴ Xi tu cahndë Jesús cjua rë cha ne, sehe qui ji me cojo cha. Hacuaha jemu cjín camahani xuta qui ji me hacutjin qui ji Jesús. Qui ji hnchun hnchun me cojo me.

²⁵ Hane ngajni rë xuta jan ne, jiyajni ngu chjuun xi ha nduva tejó nu xi hmu rë na tséhë chíhin xahmajni. ²⁶ Hane jemu jyé cjuañihi cavatju na camá ta ha ndasa jemu cjín doctor catsirqui me na, tu mahya catsicjé na tujún rë na ta tsajin mé cavetjucaa. Tu hitsë sa jyé camá chíhin rë na. ²⁷ Xi tu cahndë na cjua tséhë xcusun xi casahmi Jesús ne, qui ji tiña na taha ngaxtun me, cavetahatsja na tsjian rë me. ²⁸ Cuatjin casahmi na ta catsingatahacacun na cuitjin: “Sá xi cuetaha ntsa ndastu tsjian rë me ne, cumandaja ngahan.” ²⁹ Hane ngutjen ni caxiya jni xi vixu rë na. Hane hacuaha camachaya rë na ta camandaja na tséhë chíhin xi má rë na. ³⁰ Jesús ne, camachaya rë me xi tjin xa xi casahmi ngahñu rë me. Cavuya me taha ngaxtun me ne, cavutsejen me xuta jan ne, sehe cavinenguise me cuitjin:

—¿Yo xi casatétsja tsjian naha?

³¹ Sehe ngajan xi cha ladu rë me jan ne, cachja cha cojo me cuitjin:

—¿Hacutjin meje nuju xi cuinújin yo xi casahmi? ta ha chutsujun xutacjín xi ñia tisatéthaa me ngayun ndya jan.

³² Sehe cavutsejen nga me xuta tahndee rë me ne, ¿yo xi cuatjin casahmi? ³³ Sehe chjuun xi casahmi jan ne ta ha vëe na hacutjin cavatju na camá ne, ña fatsë na xi catsacjun na camá. Sehe qui ji cavixuhnchi na xcun Jesús, hane cachja na yëjë ni hacutjin xi cjuaquixi. ³⁴ Sehe ngajan xi Jesús ne, cachja me cojo na cuitjin:

—Ha camandaja ngayun ta camacjain nuju. Tjangun cojo cjuasua ta chíhin vë ne, ha quihndë cuyaain suaxti nuju.

³⁵ Jinguyëjë rë xi Jesús tichja cuaha me ne, canduva ngujo me tséhë ndava xutaxa rë yungun jan. Hane cuitjin cachja me:

—Ha cahme quihndi nuju. Tahannyaan sa rë maestru.

³⁶ Peru Jesúis ne, handasa cahndé me cjua xi cachja me xi cafehe jan ne, sehe cachja me cojo xutaxa rë yungun jan ta:

—Xi camacjiintacun. Ningatuhuntacun ni xi cumandaja na. —Cuatjin cachja Jesúis.

³⁷ Sehe casuaain me cahndé xi cjue yéjé xuta jan. Suva ni cha Pedru, cha Jacobo cojo cha Juan hntsé cha Jacobo, cha vëhë quiyi cha cojo me. ³⁸ Xi cafehe me ndava xutaxa rë yungun jan ne, ngajan siu xutacjín xi jihnda me jindaya me ngatsé rë cjuandusin. ³⁹ Hane xi cavisehen Jesúis ndihya ne, sehe cachja me cojo xuta jan cuitjin:

—¿Mé má cuatjin va má ngayun chjhindun? Na lihndi vë ne, hacuiin cahme na ta jiñafé na. —Cuatjin cachja me.

⁴⁰ Sehe ngajan xi xuta xi siu jan ne, tu vejnucjéé me tséhë cjua xi cachja Jesúis. Sehe ngajan xi Jesúis ne, catsítéé me xuta xi siu jan candatsen. Hane suva ni nahmi rë nima quihndi cojo naa rë cojo cha xi ticojo me cavisehen me cojo hiscan jiña. ⁴¹ Sehe cafaha me tsja nima quihndi jan ne, sehe cachja me cojo cuitjin:

—Talita cumi —cjua xi meje cuichja: Tichjá cojo ri, tsan, tisatjinhngue.

⁴² Xi café cachja Jesúis cuatjin ne, cavuya cjuahñu rë na lihndi jan hacuaha ngutjen ni cavisatjehnha na catsuyiyihiya na. Na lihndi jan ne, tejó nu tjin rë na. Hane me xi siu jan ne, jercu quijircun camahani rë me. ⁴³ Hya xi camá ne, jemu cachja camahani Jesúis cojo xuta rë na xi tsajin yo cuichja me cojo xcusun jan. Hacuaha cachja me cojo xuta rë na xi sua me xi siné na.

6

Jesús ne, fi nga me Nazaret

¹ Hya xi cavetju Jesúis tséhë Capernaum ne, cavuya cafe me cojo cha ladu rë me nandya Nasaret, hiscan xi camacha me. ² Hya xi cavechu nixtin xi chjahájenda rë ne, cavetsihin cavicya me xuta ngajan yungun. Hane xutacjín xi tivisiñuju cjua rë Jesúis jan ne, jemu quijircun rë me. Sehe cachja me ngajni rë me cuitjin:

—¿Jani cavutaya cha xi cuijyahi vi cjua xi tichja cha? Jemu tjin rë cha cjuatacun. Hacuaha jemu yehe cjuarcun sahmi cha. ³ Há hyan ngayaan xi cha vihi xi chjineya jan ni, cha xi quihndi rë na María. Hntsé cha ne, hacui cha Jacobo, cha José, cha Judas cojo cha Simón. Hacuaha nandya naja tacun ndava táchja cha.

Hane jemu xti rë xuta jan, tséhë xi ha vëe me Jesúis. ⁴ Vëhë xi Jesúis ne, cachja me cojo xuta jan cuitjin:

—Xuta ne, ha tuxa faharcun me ngu xihin xi suacuenda cjua rë Nina. Suva ni xuta rë xihin jan cojo xuta xi tangun nangui rë cojo, me vëhë xi faharcuaain me xihin jan.

⁵ Ngajan ne, hacuiin cjín cjuarcun casahmi me, tséhë xi macjaain rë xuta me. Tu cavanetsja ni me ngujo xuta hmu rë, hane camandaja xuta hmu rë jan. ⁶ Hane Jesúis ne quijircun rë me ta, tséhë xi xuta jan ne, cuatjin camacaain rë me. Hane sehe quiyi catsuyiyihiya Jesúis nandya tahndee rë jan, cavicya me xuta.

Jesús ne, tsingatju me cha ladu rë me xi sua cha machaya rë xuta tséhë gubiernu rë Nina

⁷ Sehe casahmitangun me cha xi tejó jan hane cavetsihin catsingatju me jo jo cha jima ngu ladu. Hacuaha casua me cha ngahñu xi cuma cuaxëxin cha xitsehen. ⁸ Hacuaha cachja me cojo yéjé ni cha xi tsajin mé xi cjuaha cha xi cjue cha. Suva ni ngu ya xi cuisecoo rë cha. Hacuiin niñu ne, hacuiin morra, hacuiin xi tujún. ⁹ Chuxinxte ni catincha ntsacu cha. Hacuaha cuaain cha chingá. ¹⁰ Ngajan xi cachja me cojo yéjé ni cha cuitjin:

—Hya xi cjuhun ngu ndihya ne, xi cuisuhun ne, ha ngajan ni tinechun nguixun nguixun ni hisca xi cuetjun tséhë nandya hiscan xi casaté nuju. ¹¹ Tuyani ni xi tsingatiin nuju me hacuaha hisca cuisiñiji me tsujun ne, tetjun tséhë ngajan ne, titsunu chojo rë ntsacu. Vëhë cuma ngu seña tséhë jyé rë me.

¹² Xi cajnetaha cachja Jesúis cuatjin ne, sehe cavetju cha quiyi cha hiscan xi casaté rë cha. Cachja cha cojo xuta xi tsindeya me cjuatacun rë me. ¹³ Hacuaha jemu cjín xitsehen cavaxëxin cha. Hane xuta hmu rë ne, aceite tséhë tuxine xi hmí olivu catsufé cha xten me hane camandaja me jan.

Cjuaveya rë Juan Vitenda rë Xuta

¹⁴ Me xi matitjun xi hmí rë Herodes ne, cahndë me cjua tséhë Jesús, tséhë xi xuta ne, jercu cachja me tséhë Jesús. Hane ngujo me ne, cuitjin cachja me:

—Nima Juan, cha xi cavitenda rë xuta ne, ha ndasa cahme cha, peru cavascaya rë cha. Véhë xi ma sahmi cha cjuarcun.

¹⁵ Hane ngujo nga me ne, cachja me ta Jesús ne, hacui rë Elías, ngu xutachanga xi casuacuenda cjua rë Nina hatsëë. Hane cachja sa yahnga me ta Jesús ne, hacui rë ngu profeta, sacuaha me xi casuacuenda xutachanga xi cavyuju titjun. ¹⁶ Peru Herodes ne, hya xi cahndë me cjua véhë ne, sehe cachja me ta:

—Nima Juan má me. Catsingátju catisun rë rcu cha, hane cavuya rë cjuahñu rë cha.
—Cuatjin cachja Herodes.

¹⁷ Herodes ne, ha catsingatju me cachjaha rë cha Juan xi cjue cha ndavaya. Cuatjin casahmi me ngatsë rë na Herodía. Na véhë cafaha Herodes, camá chjuun rë me ha ndasa xi ha chjuun rë cha Felipe hntséjnu me má na. ¹⁸ Hane ngatsë rë véhë, cuitjin cachja cha Juan cojo rë me:

—Chja ley ta ndajintjin camahani xi chjahan chjuun rë xingueen. Véhë xi ngayun ne, ndajintjin xi cuatjin canihñu. —Cuatjin cachja cha Juan.

¹⁹ Ngajan xi na Herodía ne, caveyamacun na cavutsejen na cha Juan. Hane meje rë na xi cueya cha. Peru camaji ta tséhë xi ²⁰ Herodes ne, cafaharcun me cha, tséhë xi vëë me ta Juan ne, ngu xihin xi tyjahi cjuatacun rë cha, hane cavéjña cha tséhë Nina. Hane véhë xi casahmi me cha cuidadu. Hacuaha hya xi Herodes cavisiñu me cjua rë cha Juan ne, jercu cachuya rë me ha ndasa casecjan cjuatacun rë me. ²¹ Peru casacu rë na Herodía cahndë tséhë xi meje rë na hya xi cavechu nixtin tséhë suhi rë Herodes. Hyo cachja Herodes cojo ngujo xutaxa rë ndihyavasen cojo me xi matitjun tséhë sindadu, cojo sa ngujo xuta changá xi matitjun tséhë distritu Galilea, xi cjue me ta casehenchjine ngu comida tséhë suhi rë me. ²² Hane hora xi tijiné me ne, cavisehen na quihndi rë na Herodía, catë na. Hane jercu cachuya rë Herodes cojo me xi yahnga jan hacutjin catë na. Sehe ngajan xi Herodes, me xi matitjun jan ne, cachja me cojo na cuitjin:

—Tu mé ni xi meje ri ne, chjahye ná, hane suá ri. ²³ Vëë Nina Jain ta suá ri hisca vasentjin nandya xi siu ntsa. —Cuatjin cachja me.

²⁴ Xi tu cavetju na quiji na hiscan tacun naa rë na ne, cavinenguise na cuitjin:

—¿Mé xi ndatjin cjuéhya rë me?

Sehe ngajan xi chja naa rë na ta:

—Chjaye rcu cha Juan, cha xi vitenda rë xuta. —Cuatjin cavinchangui naa rë na na.

²⁵ Xi tu cavuya cavisehen na hiscan tacun Herodes ne, ngajan xi cachja na cuitjin:

—Meje ná xi ngutjen ni ne, cahntsua ngu tyuva ne tuhun ná rcu cha Juan. —Cuatjin cachja na quihndi jan.

²⁶ Ngajan xi Herodes ne, jemu chocho camá rë me Peru tséhë xi hisca Nina caveyanangui me xi casua me cjua rë me, hacuaha tséhë xi yéjë ni amigu rë me cahndë me cjua jan, véhë sahmi xi má sava rë me tsindeya me cjua rë me cojo na. ²⁷ Ngajan xi Herodes ne, ngutjen catsingatju me ngu sindadu hiscan jiya cha Juan. Hacuaha cavitexa me xi cuinduva cojo cha rcu cha Juan. Sehe ngajan xi cha sindadu jan ne, quiji cha ndavaya, cavatësun cha rcu cha Juan. ²⁸ Sehe caveya cha cahntsua tyuva, quijicojo cha. Xi cafehe cha cojo ne, casua cha na quihndi rë na Herodía. Hane sehe casua na naa rë na. ²⁹ Sehe hya xi cahndë cha ladu rë cha Juan tséhë mé xi cavatju cha cama ne, sehe quiji cha cafaha cha nima caveyaniji cha.

Jesús ne, tsicjen me hñu mil xihin

³⁰ Hya xi cajnetaha catsuyihiya cha apóstol xi catsingatju Jesús jan ne, cavuya camatangun nga cha cojo me. Sehe cachja cha hacutjin casahmi cha hacuaha hacutjin cavicuya cha. ³¹ Sehe ngajan xi Jesús ne, cachja me cojo cha cuitjin:

—Nduvun suvun ni ne, cuanguen hiscan xín, chjahanjeyan hitsë.

Cuatjin meje cjue cjuahajeya me ta tséhë xi jemu cjín xuta xi cjui nduva me hiscan tacun Jesús. Hisca maxatiin jinë me niňu. ³² Sehe quiji me cojo cha ladu rë me cojo barcu ngajan hiscan xín. ³³ Hane xuta jan ne, cavëë me xi cjui me cojo cha ladu rë me. Hacuaha vëë me xi hacui Jesús. Sehe xuta tséhë nandya tahndee jan ne, cavanga me quiji me taha vëhë. Hisca tjun sa me cafehe me, sehe cafehe Jesús cojo cha ladu rë me. ³⁴ Xi tu cavetju Jesús tséhë barcu jan ne, cavëë me xi jemu cjín xuta siu me. Hane camayuma rë me xuta jan ta tséhë xi siu me sacuaha chu tsánga xi tsajin yo xi cjuahacuenda rë chu. Sehe cavetsihin cavicuya me xuta jan, jemu cjín cjua cavicuya me. ³⁵ Hya xi ha quiji hora jan ne, ngajan xi cachja cha ladu rë me cojo me ta:

—Nguehe ne jemu xín camahani. Hacuaha jemu quiji hora. ³⁶ Ninguijnutuhun cjua cojo xutacjín vi cojo sa xi catji me nandya xi siu tiñataha, hane catatsë me xi sinë me.

—Cuatjin cachja cha.

³⁷ Hane cuitjin cafayangui Jesús:

—Tuhun ngayun xi sinë me.

Sehe ngajan xi cachja cha ladu rë me cuitjin:

—¿Hacutjin sacú niji xi sinë me xi cuarcu cjín me? Xi cuatjin cjín pan chihin ne, meje miji chji rë jo cientu mosu. —Cuatjin cachja cha.

³⁸ Sehe cachja Jesús cuitjin:

—Tangun chutsujun ¿há cjín pan tjin ngajñi nuju ngayujun ni?

Xi tu cavëë cha há cjín pan tjin ra ne, sehe cachja cha cojo me cuitjin:

—Hñú pan, cojo jo ti má.

³⁹ Sehe ngajan xi cachja Jesús cojo cha ta catichja cha cojo xuta, catiyuju me xcun ndiji, ngujo ngujo me ngu ngu cahndé. ⁴⁰ Hane cavyuju me ngu cientu me ngu cahndé, o vasen cientu ngu cahndé hisca xi cafë yëjë me cavyujuchihin me. ⁴¹ Sehe Jesús ne,cafaha me xi hñú pan cojo jo ti jan, cavutsejenniji me ngahnga ne, casua me nacuechji rë Nina, sehe cavotoho langa me pan jan. Hane casua me cha ladu rë me xi sua cha sinë xuta. Hacuaha cojo catsijo ti jan cavatëcja Jesús xi sinë xuta. ⁴² Jercu caxuva pan cojo ti jan. Hane yëjë ni me cajinë me hacutjin xi cachuya rë xahasen rë me. ⁴³ Xi cavatju cajinë xuta jan ne, sehe cafaya cha pan cojo ti xi cafiin jan ne, hane catsinguitsë cha tejó chajne cojo. ⁴⁴ Me xi cajinë pan jan ne, hñú mil má me xi xihin. Hacuaha xin má yachjin cojo langa xi cajinë me.

Jesús ne, fi ntsacu me xcun ndachacun

⁴⁵ Ngajan xi Jesús ne, catsingatju me cha ladu rë me cojo barcu jan xi cjue titjun ni cha ngunda vëhë, hiscan nandya Betsaida, jinguyëjë rë xi tsinguijnetaha me cjua cojo xuta.

⁴⁶ Hya xi camá catsinguijnetaha me cjua jan, sehe camiji me ngu ndetjún xi cuiisiajmi me cojo Nina. ⁴⁷ Hane hora xi camá nguixun ne, barcu jan ne, vasencja laguna cjui. Hane Jesús ne, tacun suva cuaha me nangui quixí. ⁴⁸ Hacuaha cavutsejen me ta jemu chja tivatju cha xi cjui cha cojo barcu, tséhë xi tjo ne, taha hiscan cjui cha ne, ngajan nduva.

Hane xi tiña sahasen ne, camatiña Jesús tséhë cha, cjui me xcun nandan. Hane cuatjin cjui me sacuaha xi meje cuatjutaha me cha. ⁴⁹ Xi tu cavëë cha xi cjui me xcun nandan ne, catsingatahacacun cha ta nima xi meje cuincharcun rë cha. Hane jercu cajindayatë cha,

⁵⁰ tséhë xi catsacjun cha xi cavëë cha me. Hane ngutjen ni cachja Jesús cojo cha cuitjin:
—Xi carcuun.

⁵¹ Hane sehe cavisehen Jesús barcu hiscan siu cha. Hora vëhë ne, casejyu tjo. Ngajan xi jemu quijircun camahani rë cha ta, ⁵² ha ndasa cavëë cha cjuarcun xi casahmi Jesús cojo pan jan ne, peru cajnii rcu cha, tséhë xi vechiin cjuatacun rë cha.

Jesús ne, sahmi me xi mandaja xuta xi hmu rë tséhë nandya Genesaret

⁵³ Xi quiji sa me cojo barcu ne, cafehe me tjehen laguna, tiña nandya xi hmí Genesaret. Hane ngajan catsihñu me barcu. ⁵⁴ Hya xi cavetju Jesús tséhë barcu ne, cavëë xuta ta hacui Jesús. ⁵⁵ Hane xuta jan ne, marcu macjain quiji me yëjë ni ladu tséhë nandya jan, xi quiji jaha me xuta hmu rë, cavyuju me xcun Jesús. ⁵⁶ Hane tuyani ni xi quiji Jesús,

há nandya langa ne, há nandya hñu, o há xi ranchun, caviyuju me xuta hmu rë hiscan ndetsin. Sehe cafehya me cojo Jesús xi ndastu satétaha xuta hmu rë jan tsjian rë Jesús. Hane yéjé ni xuta hmu rë xi casaté tsjian rë Jesús ne, camandaja me.

7

Jesús ne, chjataha me cha fariseo

¹ Ngujo cha tséhë partidu fariseo cojo ngujo cha maestru tséhë ley ne canduva cha tséhë nandya Jerusalén quiji cha ngajan hiscan tacun Jesús, ngajan camatangun cha. ² Xi cafehe cha ngajan ne, cavëe cha xi ngujo cha ladu rë Jesús ne tjin sa jyé rë tsja cha ne, tijiné cha niñu ta cavanii cha tsja cha. ³ Hane cachuyiin rë cha ta tséhë xi ngayéjé ni xuta nangui niji ne, sahmi nguyé xi cuane me tsja me sehe siné me niñu. Yaha me xcusun rë xutachanga niji. ⁴ Hacuaha hisca sa xi fehe me xi fi me ndetsin ne, sá xi cjëe cuane me tsja me ne, sinii me niñu. Hacuaha jemu cjín sa xcusun rë xutachanga niji xi yaha me ta sacuaha xi ha tyjahi trasti ne, cuane nga me. Hacuaha cuanitjin sahmi me cojo nachan. ⁵ Ngajan xi cha tséhë partidu fariseo cojo cha maestru tséhë ley ne, cachja cha cojo Jesús cuitjin:

—¿Mé má cuatjin sahmiichiin cha ladu nuju ley rë xutachanga naja? ta, tséhë xi vanii cha tsja cha xi jiné cha niñu.

⁶ Ngajan xi cafayangui Jesús cuitjin:

—Ngayun ne, jo xcun jo ntsuvun yun. Jemu quixi cjua xi catsihindu Isaías tsujun xcun xujun rë me sacuatjin cachja Nina xi xuta ne, jemu ndacha me. Cuitjin fi cjua jan: Xuta xi cuicun vi ne, ndaja chja me tsahan, pero xi cojo xahasen rë me ne, hisca tsinguitsjiin me ngahan.

⁷ Tu mahya xi faharcun ná me ta

xi vicuya xicjin me ne, hacuín cjua na ha cuicuya me ta, tu cjua rë xuta.

⁸ Cuanitjin ngayun ta nismutacun cjua rë Nina, hane hitsé sa tivetuhunrcun xcusun rë xutachanga naja.

⁹ Cachja sa me cuitjin:

—Xi má nuju ne, jemu ndatjin casacuse nuju hacutjin vejñuxun cjua rë Nina cojo sa xi nihñuchuhun xcusun rë xutachanga naja. ¹⁰ Moisés ne, cuitjin catsihindu me hacutjin xi cachja Nina xi nihña ngayaan xuta rë me: “Chjuhunrcun ná nuju, chjuhunrcun nahmi nuju”, hacuaha: “Yo xi chocho chja tséhë xutacha rë ne, xuta ne tsiquehen rë.” ¹¹ Peru ngayun ne, cjuatacun rë xutachanga naja vicuyun ta, nújun ta ngu cha ne cuma cuichja cha cojo xutacha rë cha cuitjin: “Ha quihndé cumaji cuisecoo nuju ta yéjé ni xcusun xi tjin ná ne, ha cavejñá tsja Nina.” ¹² Hane xi cuatjin cuichja cha ne, ha quihndé sahmii nguyé xu xi cuisecoo cha xutacha rë cha. ¹³ Xi cuatjin ne, ha camachjiriin nuju cjua rë Nina ta, nihñu sacuaha xcusun rë xutachanga naja, hacuaha vicuyun rë jingu sa. Hacuaha cjín sa xcusun ndacha sacuaha vëhë nihñu. —Cuatjin cachja Jesús cojo maestru jan.

¹⁴ Hacuaha cajindaya Jesús xuta xi cumatangun me. Hya xi camá ne cuitjin cachja me cojo:

—Ngayujun ngarcun ni ne, tinuhyun cjua xi cuichjá vi. ¹⁵ Xcusun xi vixuya cahntsua xuta ne, hacuín vëhë tsitsehan rë me ta, cjuatacun xi nduva rë me ne, vëhë tsitsehan rë me. ¹⁶ Jaré ngayun xi meje nuju xi cumá nuju ne, tetuhunrcun.

¹⁷ Xi cavatju cachja me vëhë ne, caviyuju xuta ngajan ne, sehe cavisehen me cojo cha ladu rë me cahntsua ndihya. Ngajan xi cha ladu rë me ne, cavinenguise cha me tséhë cjua vëhë. ¹⁸ Ngajan xi cachja me cuitjin:

—¿Há hisca ngayun cajnii rcun cjua xi cachjá ni? Nguehe cuichjá cojo nuju mé vijne cjua vëhë. Cuma xinëé yéjé xcusun comida ta tsajin ngu xcusun xi jiné xuta xi cuma tsitsehan rë me ¹⁹ ta xi siné me ne, hacuín cahntsua xahasen rë me cjui ta cahntsua me. Fi ne vetjutaha ndatsen.

²⁰ Hacuaha cachja sa Jesús cuitjin:

—Cjuatacun xi nduva tséhë xahasen rë xuta ne, vëhë tsitsehën rë me ta, ²¹ tséhë xi xi nduva tséhë xahasen rë me ne, cjuatacun tsehen, sacuha yachjin xi viteña yojo rë, sacuha jyé tséhë xi sahmi me chjuunnahñu rë me jingu sa chjuun, cojo cjuachéjë, cojo xi tsiquehen xicjin, ²² cojo xi jercu meje rë me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rë me cjuaxin, sahmi me cjuachjataha, tjin rë me cjuaxihin, sahmi me cjuangarca. ²³ Yëjë cjuatsehen xi cuacun vëhë ne, nduva tséhë xahasen rë xuta, hane vëhë tsitsehën rë me.

Ngu chjuun xi xutaxin má na ne, camacjain ran Jesús

²⁴ Xi cavetju me tséhë distritu Galilea, cafe me ladu tséhë nandya Tiro cojo nandya Sidón. Xi cafehe me ngajan ne, cavisehen me cahntsua ngu ndihya, tséhë xi mijí rë me xi scuëë xuta xi cafehe me. Peru camaji cavejñahma me. ²⁵ Xi cafehe Jesús ngajan ne, ngutjen camachaya rë naa rë ngu na xi jiya xitsehen cahntsua xahasen rë na. Hane quiji na cavixcuhnchi na xcun Jesús xi cjuaharcun na me. ²⁶ Na vëhë jan ne, xutaxin na, na ladu tséhë distritu Sirofenisia, hacuiin na xuta tjë rë Israel. Hane cafehya na cojo Jesús xi cuaxë me xitsehen xi jiya cahntsua xahasen rë na quihndi rë na. ²⁷ Hane xi cafayangui Jesús tséhë na jan ne, cuitjin cachja me ngu ejemplu cojo rë na.

—Sechiye ni, catijnetaha catjinë nixti ta hacuiin ndatjin xi chjahatahan niñu tséhë nixti hane sehe tahan rë naña.

²⁸ Ngajan xi naa rë na hmu rë jan ne, cuitjin cajnercu na xi tichja me tséhë xuta tjë rë Israel cojo xutaxin. Hane cafayangui na cuitjin:

—Nai. Quixi xi nújun, peru naña xi siu ngahma maxë ne, sacu xi vixuhya hntsua nixti, sehe jinë chu.

²⁹ Hane sehe cachja Jesús cojo rë na cuitjin:

—Ndatjin xi canoje. Quihndë ta cuatjin ne, cuma cjuihin ta xitsehen xi caseya cahntsua xahasen rë na quihndi riji ne, ha cavetjuxin.

³⁰ Xi cavuya cafe na ndava na ne, quihndi rë na ne, ha jyuu jiña na hacuaha xitsehen xi caseya cahntsua xahasen rë na ne, ha cavetjuxin.

Jesús ne, sahmi me xi mandaja ngu cha xi loho hacuaha lihmi cha

³¹ Sehe cavetju Jesús ladu tséhë nandya Tiro, cavatju me nandya Sidón cojo ladu xi hmí Të Nandya, vëhë cafehe me laguna tséhë Galilea. ³² Hane cafehecojo nga xuta ngu cha xi loho hacuaha lihmi cha. Hane cafehya xuta jan cojo Jesús xi cuetahatsja me cha, sehe cumandaja cha. ³³ Ngajan xi Jesús ne cavaxëxin me cha tséhë ngajñi rë xuta ne, sehe cavyujutaha me rcu tsja me ngu ngu ladu ngojo tyjavañuju cha. Hane hacuaha cavéhénatya me rcu tsja me sehe cavetaha me neje cha. ³⁴ Hya xi camá ne, cavutsejenniji me ngahnga hane cafécacun me. Sehe cachja me cuitjin:

—¡Efata! —cjua xi meje cuichja: ¡Nuxuhunyun!

³⁵ Hane xi tu cachja me cuatjin ne, catuxaha tyjavañuju cha xi loho. Hacuaha hora vëhë ni ne, camá ndandaja cachja cha. ³⁶ Sehe ngajan xi cachja Jesús cojo xuta xi tsajin yo cuichja cojo me xcusun vëhë. Peru xuta jan ne, hitsë sa jercu cachjatë me tséhë xcusun xi casahmi Jesús. ³⁷ Jercu quijircun camahani rë xuta. Cuitjin cachja me:

—Tu mé xcusun ni jercu ndaja sahmi Jesús. Xuta xi loho ne, vihndë sahmi me, hacuaha xuta xi lihmi ne, sahmi me xi ma chja.

Jesús ne, tsicjen me ñuju mil xihin

¹ Nixtin hya ne, hacuaha jercu cjín xuta siu me hisca tacun Jesús. Hane tséhë xi tsajin camahani mé xi sinë me ngajan ne, vëhë xi Jesús ne, cajindaya me cha ladu rë me, sehe cachja me cojo cha cuitjin:

² —Jemu yuma má ná xutacjín vi ta ha quihndë jyan nixtin hinchataha me cojo naja, hane ha quihndë tsajin camahani mé xi sinë me. ³ Sá xi tsingátju me cjue me xi cjéë sinë

me niñu ne, cjuaha rë me hinda ndiya. Ngujo xuta xi cuicun vi ne, jemu cjín canduva me. —Cuatjin cachja me.

⁴ Sehe ngajan xi cha ladu rë me ne, cafayangui cha tséhë me cuitjin:

—¿Jani cuma sacú naja xi sinë xuta vi ta nguehe ne, jemu xín camahani tséhë nandya?

⁵ Ngajan xi cavinenguise Jesús cojo cha cuitjin:

—¿Há cjín pan tjin nuju?

Ngajan xi chja cha ta:

—Yatu má.

⁶ Ngajan xi Jesús ne, cavitexa me xutacjín jan xi cuiyuju me nangu. Xi cafë xuta caviyuju me nangu ne, sehecafaha Jesús pan jan sehe casua me nacuechji rë Nina. Hane cavotoho langa me pan jan, casua me cha ladu rë me xi cuiyuju cha sinë xutacjín jan. Hane cuatjin casahmi cha. ⁷ Hacuaha tjin ra ngujo ti. Hane Jesús ne casua me nacuechji rë Nina tséhë ti jan, hane sehe cachja me cojo cha ladu rë me xi sua cojo ti jan sinë xuta. ⁸ Xi camá cajinë xuta jan ne, jemu ndaja camá rë xahesen rë me. Hane xi cafaya cha ladu rë Jesús xi cavangui cajinë xuta jan ne, catsë yatu nisinya. ⁹ Xuta jan ne, sacuaha chuva rë ñuju mil má me. ¹⁰ Hane hisca xi cajnetaha cjuandaja vëhë ne, sehe catsingatju Jesús xuta, cafe xuta ndava me. Hya xi camá ne, cavisehen me barcu cojo cha ladu rë me, hane cavuya me ngunda vihi taha ladu rë hiscan xi hmí rë Dalmanuta.

Cha fariseo ne, fehya cha seña

¹¹ Xi cafehe me ngajan ne, hacuaha cafehe cha tséhë partidu fariseo. Hane cavetsihin cha cavisiajmi cha cojo Jesús ta meje cjuahachuva cha me. Cafehya cha cojo rë me xi tsingacun me ngu cjuarcun xi nduva ngahnga, cojo sa xi scuëë cha xi Nina catsingatju Jain rë me. ¹² Ngajan xi Jesús ne, cojo cjuachohotacun ne, cachja me cojo cha cuitjin:

—¿Mé má cuatjin chjahyun xi sahme ngu cjuarcun xi nduva ngahnga? Cuichjá quixë cojo nuju ta hisca ngu xcusun vëhë ne, sahmee xi xcun cojo xcun.

¹³ Ngajan xi caviyuju me cha xi cuacun jan ne, cavisehen me barcu cojo cha ladu rë me. Hane sehe cavuya quiji me ngunda vëhë tséhë laguna.

Xcusun rë cha fariseo ne, visehetë cjuatacun rë xuta sacuaha sahmi san rë pan

¹⁴ Peru cha ladu rë me ne, cachaya rë cha xi cjuaha cha pan, hane cahntsua barcu ne, ngu tutu sa pan jiya ndaja. ¹⁵ Sehe ngajan xi chja Jesús cojo cha cuitjin:

—Nechun cuidadu cojo san rë pan tséhë cha tséhë partidu fariseo cojo cha ladu rë Herodes.

¹⁶ Sehe ngajan xi cavisiajmijín cha ngajní rë cha cuitjin:

—¿Há tséhë xi tsajin naja pan ne, há tséhë vëhë xi cuatjin chja me?

¹⁷ Xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—¿Mé má cuatjin nújun xi tsajin pan? ¿Há nuhyuun? ¿Há vijnii rcun? ¿Há jemu taja rcun? ¹⁸ Tjin nuju túxcun hacuaha tjin tyjavañuju. ¿Mé má matsijin nuju? hacuaha ¿mé má nuhyuun? ¿Há vitsjiin nuju? ¹⁹ Hya xi cavótoho langa hñú pan ngajní rë xi hñú mil xuta, ¿há cjín chajne sa quitsë cachjayun tséhë pan xi cavangui jan? —Cuatjin cavinenguise me.

Ngajan xi cafayangui cha ladu rë me ta:

—Tejó.

²⁰ —Hane hya xi cavótoho langa yatu pan jan xi cajinë ñuju mil xuta, ¿ha cjín nisinya sa cavangui?

Ngajan xi cha ladu rë me ne, cuitjin cachja nga cha:

—Yatu.

²¹ Ngajan xi cavinenguise Jesús cojo cha cuitjin:

—¿Há cjëë camahani cuijne rcun cjua xi cachjá tséhë san rë pan?

Jesús ne, sahmi xi cumatsejen rë ngu cha rcá ngajan nandya Betsaida

²² Hya xi camá ne, cavechu barcu tjehen laguna. Hane xi cavitujne me barcu ne, cafehe me nandya xi hmí Betsaida. Xi cafehe me ngajan ne, cafehe nga xuta cojo ngu cha xi rcá. Hane jercu cachja xuta jan cojo Jesús xi cuetahatsja me cha, hane sehe cumatsejen rë cha. ²³ Hya xi camá ne, cafaha me tsja cha hane quijicojo me cha ngajan tjehen nandya. Xi cafehe me cojo cha ngajan ne, cavéhë natya me tuxcun cha hacuaha cavetahatsja me tuxcun cha, sehe cavinenguise me cha cuitjin:

—¿Há tsejen ri hitsë quihndë?

²⁴ Xi catsiquijin cha xcun cha cavutsejen cha ne, chja cha ta:

—Vutsejen xuta. Peru sacuaha tsejen ya, cuatjin tsejen me xi cjui me.

²⁵ Ngajan xi Jesús ne, cavetahatsja nga me tuxcun cha. Sehe casahmi cha nguyjë cavutsejen ndaja cha, hane camandaja cha, camatsejen ndaja rë cha. Hane sehe catsingatju me cha cafe cha ndava cha. ²⁶ Hacuaha cachja me cojo cha cuitjin:

—Xi cavisiin ngajñi nandya xi cuinoje cojo xuta jan xcusun xi casahme cojo ri.

Pedru ne, tsinguixi me xi Jesús ne, me vëhë xi Mesías me

²⁷ Hya xi camá ne, cavetju nga Jesús tsëhë ngajan cojo cha ladu rë me ne, quiji me ngujo nandya xi siu tahndee rë nandya xi hmí Cesarea Felipe. Hane ndiya jiya me cojo cha ne, cavinenguise me cha cuitjin:

—¿Mé chja xuta, yo ngahan? —Cuatjin cachja me.

²⁸ Ngajan xi cafayangui cha ladu rë me cuitjin:

—Ngujo me ne, chja me ta ngayun xi cha Juan ngayun, cha xi cavitenda rë xuta. Ngujo nga me ne, chja me ta Elías. Hane ngujo nga me ne, chja me ta ngu profeta xi suacuenda cjua rë Nina. —Cuatjin cafayangui cha.

²⁹ Ngajan xi cachja nga Jesús cojo cha ta:

—Hane ngayun ne, ¿mé nújun? ¿Yo ngahan?

Ngajan xi cha Pedru ne, cuitjin cafayangui cha:

—Ngayun xi tjin cjua xi tsingatju nuju Nina. Ngayun xi Cristu.

³⁰ Ngajan xi Jesús ne, cavitexa me cha ta tsajin yo xi cuichja cha cojo tsëhë.

Chja Jesucristu xi cueya me

³¹ Hya xi camá ne, cavetsihin cavicuya me cha tsëhë xi ha ndasa xi Cristu, Quihndi rë Xuta Jain má me ne, peru jemu cjín cjuañhi cuatju me cumá ta tsingatiin xuta changá me, hacuaha tsiquehen xuta changá jan me, peru xi cjuë jyan nixtin ne, cuya nga me cjuahñu. ³² Cjua vëhë ne cachja quixi camahani me cojo cha. Ngajan xi cha Pedru ne, quijixin cha cojo Jesús. Sehe cavetsihin cachja cha cojo me xi ¿mé má cuatjin chja me?

³³ Ngajan xi cavuya Jesús cavutsejen me hiscan siu cha ladu rë me. Sehe cachja me cojo cha Pedru cuitjin:

—Tihinxin ngaye Satanás, tsëhë xi ningatiintacuin ngaye sacuaha tsingatahacacun Nina ta, ningatehetacuin sacuaha ngu xuta.

Hacutjin xi meje rë xi nihña xa cojo cjuahñu naja

³⁴ Ngajan xi Jesús ne, cajindaya me xutacjín jan cojo cha ladu rë me xi cuinduva me hiscan tacun Jesús, sehe cachja me cuitjin:

—Sá xi tjin yo xi meje cuisehen ladu naha ne, meje rë xi nichuvun cjuatacun nuju, hane hacuaha tejñuhñu xahasen nuju xi cuanguncujun ndiya naha handasa xi cueyun xcun cru. ³⁵ Yo ngayun xi mijí cuisuhun ladu naha tsëhë xi rcun xi cueyun ne, cahndé xi ndaja ne, nichujun xahasen nuju. Peru yo ngayun xi ngatsë naha o sá xi ngatsë rë cjua rë Nina cueyun ne, hacuiin nichujun xahasen nuju ta Nina ne, cuaxëtje me. ³⁶ Mé ndaja cuma nuju xi sacu nuju yéjë xi tjin ngasunhndë, sá xi cueyun hane cuma nuju castigu,

³⁷ ta sá xi cuaxintiin Nina xahasen nuju hya xi cueyun ne, ha quihndë tsajin rqui rë.

³⁸ Yo ngayun xi ma sava nuju ngatsë naha o sá xi ngatsë rë cjua naha nguehe xcun xuta tsehen xi manguaaincacun cojo cjua rë Nina ne, hacuaha cojo ngahan xi canduvá tsëhë

Nina ne, cuma sava ná ngahan ngatsë nuju ngayun, hya xi cuinduvá cojo cjuandajiyhi tséhë nahmi naha ne, hacuaha cojo ángel xi vejña tséhë Nina cuinduvá cojo.

9

¹ Hacuaha cachja sa Jesús cuitjin:

—Cuichjá quixë cojo nuju ta tecjan yahnga xuta nguehe xi hisca xi scuëë me xi cuitexa jain Nina ne, sehe cueya me.

Cavindeya xcusun rë Jesús

² Xi cafë jyun nixtin jan ne, quijixin Jesús ngu rcu naxi hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rë me. ³ Tsjian rë me ne, ña seti tsejen, tséhë xi jercu tu tyava camahani, hisca xi ngu xuta cumaji cuane me xi cuatjin tyava. ⁴ Hya xi camá ne, ha tu ñahñu camatsejen hasen rë Elías cojo hasen rë nima Moisés, tivisiajmi cojo Jesús. ⁵ Ngajan xi cachja cha Pedru cojo Jesús ta:

—Maestro, tu ma rë xi nguehe nechin cojo nuju ne, nihñi jyan puestu: ngu tsujun ne, cojo ngu ngu tséhë Moisés cojo Elías.

⁶ Cuatjin cachja cha Pedru ta, sacuinyiin rë cha mé sa cuichja cha ta tséhë xi jercu catsacjun camahani cha camá. ⁷ Hora vëhë ne, canduva ngu yufí casahmi tjahnguen rë. Hane ngajni rë yufí jan ne, canuhya rë nguko cjua xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

⁸ Xi tu cahndë cha ladu rë Jesús cjua vëhë ne, vutsejen nguehe vutsejen ngajan cha, hane suva sa Jesús tacun me xi cavëë cha.

⁹ Xi tu tivitujne me tséhë rcu naxi jan cojo cha ladu rë me xi quijicojo me jan ne, ngajan xi chja xu me cojo cha ta tsajin yo xi cuichja cha cojo xcusun xi cavëë cha. Xi cuatju cueya Quihndi rë Xuta Jain ne, cuya nga me cjuahñu, sehe hya cuichja cha. ¹⁰ Vëhë xi cavaha cha cjua jan cahntsua xahasen rë cha. Ngajni rë ni cha cojo xicjin cha cavisiajmijcín cha ¿mé vijne cjua xi cuya nga me cjuahñu?

¹¹ Ngajan xi cavinenguise cha cojo Jesús cuitjin:

—¿Mé má cuatjin chja maestru tséhë ley xi titjun Elías cuinduva me, sehe cuinduva me xi cuaxëtje naja?

¹²⁻¹³ Ngajan xi cafayangui Jesús cuitjin:

—Quixi xi Elías cuinduva me titjun ta, me vëhë cuiyujuchihin me yéjë ni xcusun. Peru ha canduva me, handasa hacuiin cojo ñihi rë me ta cojo ñihi rë cha Juan. Hane choho casahmi xuta cojo me sacuatjin chja xujun rë Nina. Hacuaha chja xujun xi cuacun vëhë ta handasa xi Quihndi rë Xuta Jain ngahan ne, hacuanitjin ne jemu jyë cjuañihi cuátju hacuaha tsitjungui xuta ngahan.

Jesús ne, sahmi xi mandaja ngu cha nixti xi jiya ra xitsehen

¹⁴ Xi tu cavuya cafehe Jesús cojo cha xi quijicojo me hiscan siu yahnga cha ladu rë me xi tejó jan ne, cavëë me xi tjercu siu xuta jan cojo nguko cha maestru tséhë ley siu me visiajmi me cojo cha. ¹⁵ Xi tu cavëë xuta jan xi cafehe Jesús ne, jemu quijircun rë me, vanga sanii me quiji cachja me nina cojo Jesús. ¹⁶ Ngajan xi Jesús ne, cavinenguise me cojo cha ladu rë me cuitjin:

—¿Mé xi visiajmu cojo xuta xi cuacun vë?

¹⁷ Hane ngajan ngajni rë xutacjín xi siu jan ne, cavetjujñi ngu me xi cachja me cuitjin:

—Maestro, canduvá cojo quihndi naha, tséhë xi jiya xitsehen cahntsua xahasen rë cha. Hane tséhë vëhë xi sahmi lihmi rë cha. ¹⁸ Hora xi faha xitsehen jan cha ne, ngutjen tsiticjahñu rë cha, hacuaha vaxë natyaxu hntsua cha, hisca tsijanerii nehñu cha jiñha cha. Hane ngatsë rë vëhë ne, jemu jima ndaya cha. Hacuaha cachjá cojo cha ladu nuju xi cuaxëxin cha xitsehen tséhë quihndi naha. Peru camaji cavaxëxin cha. —Cuatjin cachja me.

¹⁹ Ngajan xi Jesús ne, cachja me cojo xuta xi siu jan cuitjin:

—¿Mé camá nuju ngayun xi macjaain camahani nuju? ¿Há jyë sa nixtin meje rë xi cuitejña cojo nuju? Nduvun cojo cha nguehe. —Cuatjin cachja me.

²⁰ Hya xi camá ne, cafehe xuta cojo cha hiscan tacun Jesús. Xi tu cavëë xitsehen jan Jesús ne, marcu macjain catsiticja rë cha nixti jan. Hane xi caticja cha ne, cavuya cavindefa cha cafaña cha. Hacuaha cavetju natyaxu hntsua cha. ²¹ Ngajan xi Jesús ne, cavinenguise me cojo nahmi rë cha cuitjin:

—¿Há tsëë xi cuitjin má rë cha?

Ngajan xi chja nahmi rë cha ta:

—Hisca cjuaquihndi rë cha, cuatjin má rë cha. ²² Jiya hora xi faha xitsehen jan cha ne, tsingatjeya rë cha xcun ndacahi. Tjin nga ne, tsingatjenya rë cha ngajñi nandan, ta meje tsiquehen rë cha. Véhë xi sá xi tsejen xi ha hyun mé nihñu cojo cha ne, catamayuma nuju ngahan cojo quihndi naha, hane tisecun niji.

²³ Ngajan xi cachja Jesús cojo nahmi rë cha ta:

—Há xa vë xi hvë. Sá xi macjain nuju ne, yëjë ni ne, cuma.

²⁴ Ngajan xi nahmi rë cha ne, ngutjen cachja me cuitjin:

—Tatá. Macjain ná. Peru tisecun ná cojo sa xi cumacjain sa ná.

²⁵ Xi vutsejen Jesús xi jercu tijima tangun xuta ne, cacjan me cojo xitsehen jan. Cuitjin cachja me:

—Ngaye xitsehen loho lihmi, tetjixin tsëhë cha vi. Hacuaha ha quihndë cuyiin cuisihin cahntsua xahasen rë cha.

²⁶ Ngajan xi xitsehen jan ne, hisca cajindaya xi catsicuya catsindefa rë cha. Sehe cavetju quiji. Hane cha vëhë ne, jiñña cahme cha. ²⁷ Peru Jesús ne, cafaha me tsja cha catsisatjenhnga me cha, hane casecun cha.

²⁸ Hya xi camá ne, quiji Jesús cojo cha ladu rë me, hane cavisehen me cahntsua ndihya. Xi cavisehen me jan ne, sehe ngajan xi chja cha cojo rë me cuitjin:

—¿Mé má ngayin xi camaji canaxinxin xitsehen jan tsëhë cahntsua xahasen rë cha vë?

²⁹ Ngajan xi cachja Jesús cojo cha cuitjin:

—Cuatjin camá nuju ta tsëhë xi xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxenxen.

Jesús ne, cachja me ta cueya me peru cuya me cjuahñu

³⁰ Hya xi camá ne, sehe cavetju me quiji me taha distritu Galilea. Hacuaha mijí rë me xi cumachaya rë xuta jani taha tsujiyihya me ta, ³¹ tsëhë xi tivicuya me cha ladu rë me hacutjin cuatju me cumá. Cuitjin cavicuya me:

—Ha ndasa tsëhë Nina canduva Quihndi rë Xuta Jain ne, peru cjuaha xuta me ne, tsiquehen me me. Peru xi cjuë xi jyan nixtin ne, cuya nga me cjuahñu.

³² Peru cha ladu rë me ne, vijnii rcu cha tsëhë xi cueya Jesús, hacuaha cuya me cjuahñu. Hacuaha tsacjun cha cuinenguise cha me cjuja jan.

¿Yo xi hitsë sa matitjun?

³³ Hya xi camá ne, cafehe me nandya Capernaum. Hya xi cafehe me jan ne, cavisehen me cahntsua ndihya hisca cuiyuju me. Sehe ngajan xi cavinenguise me cojo cha ladu rë me mé xi cavisajmi cha cojo xicjin cha ngajan ndiya. ³⁴ Hane tu jyuu ni caviyuju cha ta xi cavisajmi cha ndiya jan ne, cuitjin cachja cha:

—¿Jarë ngayaan xi hitsë sa venguichji naja?

³⁵ Hya xi camá ne, quiji Jesús cavéjña me. Sehe ngajan xi cajindaya me yëjë tejó cha ladu rë me jan ne, sehe ngajan xi cachja me cojo cha cuitjin:

—Sá xi tjin ngu yun xi meje nuju xi cumatitjun ngayun ne, meje rë xi hacuiin jemu jyë nihñu yojo nuju hacuaha cuysecun xingun.

³⁶ Hya xi camá ne, cafaha me ngu lihndi, cavejña me cavasencja, hane sehe cavataha me. Hane ngajan xi cachja me cojo cha cuitjin:

³⁷ —Jarë ngayun xi ndaja nihñu cojo ngu lihndi sacuaha vihi xi ngatsë na ha ne, sacuaha xi ngahan ndaja nihñu cojo ná. Hacuaha jarë ngayun xi ndaja nihñu cojo ná ne, hacuiin ngahan ni ta, hacuaha cojo Nahmi na ha xi catsingatju ná me, cojo me vëhë ndaja nihñu cojo rë me.

Me xi hacuiin condra naja ne, ladu naja má me

³⁸ Ngajan xi cachja cha Juan cojo Jesús cuitjin:

—Maestro, cahyin ngu cha xi tijima tivaxéxin xitsehén tséhë xahasen rë xuta, hane xi sahmi cha ne, cojo ñihi nuju veyanangui cha. Peru tséhë xi hacuiin cha ladu naja cha ne, canújin cojo cha ta ha quihndë sahmii cha cuitjin.

³⁹ Ngajan xi Jesús ne, cachja me cuitjin:

—Xi cavichecjiin tséhë cha ta xuta xi cuma sahmi me cjuandaja vëhë, sacuaha xi ngahan Jain cavitexa rë me ne, cumaji xi ngutjen choho cuichja me tsahan. ⁴⁰ Xuta xi hacuiin choho vëë naja me ne, chuya rë me tsajan. ⁴¹ Cuichjá quixë cojo nuju ta yo me xi sua ngu vasu nandá siuhun, tséhë xi vëë me xi xuta ladu naha ngayun, hacuaha vëë me xi ngahan xi catsingatju ná Nina ne, me vëhë ne, sacu rë me ngu cjuandaja xi sua Nina.

Cjuatsavi xi ticojo rë xi cuixuya ngayaan xcun ngu jyé

⁴² 'Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tséhë xuta vëhë xi xtyangui ngu ndyojo natsi nguisin me sehe ningatjeya rë me ngajni ndachacun. ⁴³ Hane sá xi cjuatacun nuju meje rë xi nihñu ngu jyé cojo ntsun ne, vengui sa chji rë xi chandunxun ntsun ta, jemu sa ndaja tsujun xi cuma yoho yun xcun Nina, xi cumá rë xi cuechun xcun xitsehén cojo ntsun ngajni rë ndihi jyé xi tsajin nixtin hvo. ⁴⁴ Ngajan cuinechun, hiscan xi cjiuin nuju cjuañihi ta ndihi ne, tsajin nixtin xi hvo. ⁴⁵ Sá xi cjuatacun nuju meje rë xi nihñu ngu jyé jani xi cuangun ne, vengui sa chji rë xi chandunxun ntsacun ta, jemu sa ndaja cuechun xcun Nina xi yoho yun xi cuma rë xi cuechun xcun xitsehén cojo ntsacun. ⁴⁶ Ngajan xcun xitsehén vëhë ne, cjiuin nuju cjuañihi ta ndihi ne, tsajin nixtin hvo. ⁴⁷ Hacuaha sá xi cjuatacun nuju meje rë xi chutsujun xcusun xi ndajintjin xi chutsujun ne, chuhunxun tuxcun jan chandunxun, ta tséhë xi hitsë sa ndaja tsujun xi sacu nuju cahndé ngajan hiscan sahmi Nina gubiernu handasa cojo ngu ni tuxcun xi cuma rë xi cojo catsijo tuxcun cuechun xcun ndihi xi sahmi castigu rë nima. ⁴⁸ Ngajan xcun xitsehén ne, ngajan cjiuin nuju cjuañihi ta ndihi ne, tsajin nixtin hvo.

⁴⁹ 'Hya xi tsichuva Nina ngayëjë ni xuta há ndaja há ndajin casahmi me ne, me xi tsajin mé casahmi ne, Nina ne, jemu chuya rë me. Hya xi Nina cjuahatsja me ngu cjuatjo xi tahan rë me ne, sá xi cojo naxa sehen ndaja ne, jemu chuya rë me.

⁵⁰ 'Naxa ne, jemu ndaja. Peru sá xi cjuë xtya rë ne, machjiriin. Cjuandaja rë Nina ne, hacuaha jemu ndaja. Vëhë xi chjuhun cjuandaja rë Nina, teyun cahntsua xahasen nuju, hacuaha ndaja tinechun cojo xingun.

10

Jesús ne, fi nga me nandyá Nasaret

¹ Hya xi camá ne, cavetju Jesús tséhë nandyá Capernaum qui ji me distritu Judea cojo ngunda ndajyé Jordán. Hacuaha jercu cjín nga xuta quijitjengui rë me. Hane sacuaha xcusun xi ha sahmi Jesús ne, cavetsihin cavicuya nga me xuta jan. ² Hya xi camá ne, ngujo cha tséhë partidu fariseo ne, qui ji cha hiscan tacun Jesús. Vinenguise cha me tséhë xi ngu xihin, ¿há ndatjin xi tsismi chjuun rë? Cuatjin cachja cha ta tséhë xi meje cjuahachuva cha me cojo cjuá rë me. ³ Ngajan xi cafayangui me tséhë cha cuitjin:

—Moisés ne, xutachanga naja ne, ¿mé cavitexa naja me?

⁴ Ngajan xi cafayangui cha tséhë me cuitjin:

—Moisés ne, casua me cahndé xi ngu xihin ne, cuma cueñña cha ngu xujun tsja chjuun rë cha xi ha quihndë mijí rë cha na. Hane xi cuatjin ne, cuma tsismi cha na.

⁵ Sehe ngajan xi Jesús ne, cachja me cojo cha cuitjin:

—Ngatsé rë cjuataja rë xahasen nuju ne, vëhë xi Moisés ne, casua me cahndé xi cuatjin nihñu. ⁶ Peru hya xi casahmi Nina ngasunhndé ne: “Casahmi me xi chjuun xi xihin xuta.”

⁷ “Vëhë xi ngu xihin ne, cuejña cha nahmi rë cha, hacuaha cuejña cha naa rë cha, ⁸ hane cumatangun cha cojo chjuun rë cha sacuaha ngu ni xahasen.” ⁹ Ha quihndé hacuiin jo ta sacuaha xi ngu ni xahasen. Hane tséhë xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tséhë xicjin me. —Cuatjin cachja Jesús.

¹⁰ Ngajan xi hya xi Jesús tacun ndihya me cojo cha ladu rë me ne, cavinenguise nga cha me ngu ndiya tséhë cjuavisiajmi vëhë. ¹¹ Ngajan xi cachja me cojo cha cuitjin:

—Yo xi tsismi chjuun rë hane cuixan cojo ngu sa chjuun ne, jemu jyé jyé rë xi cuatjin sahmi. ¹² Hacuaha sá xi ngu chjuun tsismi na xihin rë na hane cuixan na cojo ngu sa xihin ne, hacuaha jemu jyé jyé rë na.

Jesús ne, tsinchacun me langa

¹³ Jinguyéjé rë xi tivisiajmi Jesús cojo cha ladu rë me ne, cavetsihin tjemu canduva xuta cojo quihndi rë me, xi cisanetsja Jesús nixti jan cojo sa xi sacú rë cjuandaja rë me. Peru cha ladu rë Jesús jan ne, cacjan cha cojo xuta jan ta, xi má rë cha ladu rë me ne, mahyiin rë Jesús. ¹⁴ Hya xi cavéé Jesús xi cuatjin sahmi cha ladu rë me ne, camacjan rë me cojo cha. Ngajan xi cachja me cuitjin:

—Tuhun cahndé catinduva tjengui suva ná nixti. Xi canichuun cahndé xi cuma rë ta, xuta xi sahmi me yojo rë me sacuaha ngu quihndi ne, xuta vëhë xi sahmi me sacuatjin vitexa Nina. ¹⁵ Cuichjá cojo nuju cjuaquixi ta yo xi meje cuisehen gubiernu rë Nina ne, cuma cuisehen peru sacuaha ngu quihndi. Sá sahmii cuatjin ne, cumaji cuisehen.

¹⁶ Ngajan xi Jesús ne, cavataha me nixti jan. Hane hora xi cavisanetsja me ne, cachja me cjuandaja rë me cojo.

Ngu cha nchina ne, chja cha cojo Jesús

¹⁷ Hya xi camá ne, cavetju me quiji me jingu sa cahndé. Hane ndiya cjui me ne, vanga ngu cha cafehe cha cavixuhnchi cha xcun me xi faharcun cha me. Sehe chja cha cojo me cuitjin:

—Ngayun maestro. Jemu ndaja ngayun. Nújun, ¿mé xi sahme xi cuma sacú ná cjuahñu xatsé? —Cuatjin cachja cha.

¹⁸ Ngajan xi Jesús ne, cafayangui me tséhë cha cuitjin:

—¿Mé má cuatjin noje xi ndaja ngahan? Tsajin xuta xi ndaja suva ni Nina xi ndaja me. ¹⁹ Ha hye cjua xi cavitexa Nina: “Xi caniquiin xuta. Xi canihñii chjuun nahñu riji jingu sa chjuun. Hacuiin mé chjehemí tséhë xuta. Xi canuijin cjuandesu tséhë xuta. Xi cavindachiin rë xuta. Chjehercuin nahmi riji hacuaha chjehercuin ná riji.” Vëhë cjua xi cavitexa Nina.

²⁰ Ngajan xi cachaja cha cojo Jesús ta:

—Maestro, yëjé cjua vëhë ne, hisca cjuanixti naha ne, ha cahndé.

²¹ Xi cahndé Jesús cjua rë cha ne, jemu cachuya rë me tséhë cha. Ngajan xi chja me cojo cha ta:

—Machaja sa ri ngu xcusun. Tjihin ne, titeñi yëjé xi tjin ri hane tujún xi sacu ri ne, tehe rë xuta yuma. Hane sehe ndovetjengui ná. Sá xi nihñi cuatjin ne, xi cjuehe xcun Nina ne, ngajan sacú ri cjuanchina xi ndajiyhi.

²² Xi cahndé cha cjua vëhë ne, jemu choho camá rë cha. Va va má cacun cha, cavetju cha cafe cha ta, tséhë xi jemu nchina cha.

Jesús ne, chja me tséhë cjuanchina

²³ Ngajan xi Jesús ne, vutsejen me yëjé ni ladu hiscan siu cha ladu rë me ne, sehe cachja me cojo cha cuitjin:

—Jemu chja tséhë ngu xuta nchina xi cuisehen me ladu rë Nina.

²⁴ Ngajan xi cha ladu rë me ne, jemu quijircun rë cha xi cuatjin cachja me. Ngajan xi cachja nga Jesús cojo cha cuitjin:

—Compañero, jercu chja tséhë xuta xi cuisehen me ladu rë Nina. ²⁵ Sacuatjin rë naxin xi cumaji cuatju chu ngojo rë nindu ne, cuatjin rë xuta xi jemu meje rë me cjuanchina ta, cumaji cuisehen me ladu rë Nina.

²⁶ Xi cahndë cha ladu rë me cjua vëhë ne, jemu quijircun camahani rë cha. Ngajan xi cachja cha ngajñi rë cha cojo xicjin cha:

—¿Peru yo ni xi cuma cuetjutje ni?

²⁷ Xi cavuya me vutsejen me hiscan siu cha ne, ngajan xi cachja me cuitjin:

—Yéjë ni xi maji sahmi xuta ne, Nina ne, hatuxa ma sahmi me.

²⁸ Ngajan xi cavetsihin cachja cha Pedru cojo Jesús cuitjin:

—Chutsujun ni. Ngayin ne, canismitacuin yéjë ni xcusun, hane cavisihin ladu nuju.

²⁹ Ngajan xi cachja Jesús ta:

—Cuichjá quixë cojo nuju ta, tu yo ni xi tsismicacun ndava, tsismicacun hntsë, tsismicacun tichja, tsismicacun naa rë o sá nahmi rë o sá quihndi rë, hacuaha tsismicacun nangui rë xitjë rë ngatsë naha cojo ngatsë rë cjua rë Nina ne, jinguyéjë rë xi ngasunhndë vihi tacun me ne, ³⁰ sacú rë me ngu cientu sa quisun tséhë ngu ngu xcusun xi catsismaticacun me. Cjín ndava me sacu rë me. Cjín hntsë me sacu rë me. Cjín tichja me sacu rë me. Cjín naa rë me sacú rë me. Cjín quihndi rë me sacú rë me. Hacuaha cjín nangui rë xitjë rë me sacu rë me. Handasa cojo cjuañihi, peru sacú rë me. Hane hya xi cueya me ne, cuechú me cjuahñu xatsë xcun Nina. ³¹ Tséhë xuta xi matitjun quihndë ne, jemu cjín me xi cumachjiriin hya xi cuinduva Nina ngasunhndë. Hane xuta xi hacuuin matitjun quihndë ne, hya ne, cumachji rë me xi cuma titjun me. —Cuatjin cachja me.

Jesús ne, camá jyan ndiya xi chja me xi cueya me

³² Hya xi camá ne, hora xi jiya ndiya Jesús cjui me cojo cha ladu rë me nandya Jerusalén ne, titjun Jesús cjui me. Hane cha ladu rë me ne, jercu fircun ra, tséhë xi tsacjuin Jesús xi cjui me. Hane xuta xi tjengui cjui cojo me jan ne, hacuaha jemu tsacjun me má. Ngajan xi Jesús ne, cajindaya nga me cha ladu rë me xi tejó ni jan, sehe cavetsihin cachja me cojo cha xcusun xi ha tacun xati xi cuatju me cuma. ³³ Cuitjin cachja me:

—Tinuhyun ni, tivanguen nandya Jerusalén. Hane ngajan ne, tjin yo me xi cuiteña ná ngajan cojo nahmi xi matitjun cojo cha maestro tséhë ley. Cuatjin sahmi me ha ndasa xi ngahan xi Quihndi rë Xuta Jain. Hane xuta xi cuacun vë cuichja me xi cueya ngahan, hacuaha sua nga me ngahan cojo xuta rë jingu sa nandya. ³⁴ Sehe tsixcuehyu me ngahan. Cuéhénatya me ngahan, cuaja me ngahan, hisca tsiquehen me ngahan. Peru xi cjué jyan nixtin ne, cuya nga cjuahñu.

Santiago cojo Juan ne, fehya me Jesús ngu cjuandaja

³⁵ Xi cajnetaha cachja Jesús cuatjin ne, sehe quiji cha Jacobo cojo cha Juan, quihndi rë Zebedeo, quiji tjengui tiña cha Jesús. Ngajan xi chja cha cojo rë me cuitjin:

—Maestro. Nihñu favor ne, cjua xi chjahyin nuju ne, ningatuhun niji.

³⁶ Ngajan xi cachja me cojo cha cuitjin:

—¿Mé xi meje nuju xi sahme ni?

³⁷ Ngajan xi chja cha cojo rë me cuitjin:

—Tuhun cahndë xi ngu ngu ngayin ne, cuinechintihin ngu ngu ladu tjehen nuju, hya xi nihñu gubiernu nuju.

³⁸ Ngajan xi cachja Jesús cojo cha cuitjin:

—Ngayun ne, hyuun mé xi chahyun. ¿Há scaa nuju cuatju cjuañihi xi cuátju ngahan ni?

³⁹ Ngajan xi cachja cha ta:

—Scaa niji.

Ngajan xi cachja nga Jesús cojo cha cuitjin:

—Cjuañihi xi cuatju ngahan cumá ne, hacuaha cojo ngayun cuatjun cumá. ⁴⁰ Peru xi cuinechuntuhun ngu ngu ladu tjehen nahe ne, hacuiin ngahan cuichjá ta xcusun vëhë ne, sacu rë xuta xi cuichja Nina xi sacu rë me cahndé.

⁴¹ Xi cahndé cha xi tē jan cjua xi cachja Jesús ne, cavetsihin camacjan rë cha cojo cha Jacobo cojo cha Juan. ⁴² Hya xi camá ne, cajindaya Jesús cha xi tē jan ne, cachja me cojo cha cuitjin:

—Ngayun ne, ha hyun ta xuta matitjun nguehe ngasunhndé jemu sahmi yehe me yojo rë me, ta jercu meje cuitexa me. ⁴³ Peru hacuiin cojo ngayun cuatjin nihñu ngajñi nuju ta xi meje rë ne, jarë ngayun xi meje nuju xi cumatitjun ngayun ne, nihñu xa rë xingun sacuha mosu. ⁴⁴ Hane jarë ngayun xi meje nuju xi xingun ne, cjuaharcun me yun ne, nihñu xa rë xingun sacuha mosu xi caxteña. ⁴⁵ Hisca ngahan ne, Quihndi rë Xuta Jain má ngahan, peru hacuiin canduvá xi xuta cuisecoo ná me ta ngahan cuisecoo rë xuta. Hisca tsingatehen xi tsiquehen ná xuta, cojo sa xi cjín xuta cuaxëtje Nina me. —Cuatjin cachja Jesús.

Jesús ne, sahmi me xi cuma scutsejen cha rcá xi hmí rë Bartimeo

⁴⁶ Hya xi camá ne, cjui cjui me cojo cha ladu rë me ne, cavechu me nandya Jericó. Xi cavatju me tséhë nandya vëhë cojo xutacjín xi ticojo me ne, cavechutaha me cha quihndi rë Timeu, cha xi hmí rë Bartimeo, ngu cha rcá, hane tifehyá cha caridad tjehen ndiya.

⁴⁷ Xi cahndé cha rcá jan xi Jesús tséhë nandya Nasaret hacui me xi nduva me, jercu cachja cha:

—Jesús, quihndindaicjin rë David, catamayuma nuju ngahan.

⁴⁸ Hane cavisajmicjan xuta jan cojo cha ta, catisejyu cha. Peru hitsë sa hñu chja cha cuitjin:

—Quihndindaicjin rë David, catamayuma nuju ngahan.

⁴⁹ Ngajan xi casecunhñu Jesús. Sehe ngajan xi chja me cojo cha ladu rë me cuitjin:

—Chjindayun rë cha.

Hya xi camá ne, cha ladu rë me jan ne, cajindaya cha cha rcá jan, sehe cachja cha cojo cha cuitjin:

—Tehe cjuetacun xahesen riji quen. Tisatjinhngue ta, jindaya me ngaye.

⁵⁰ Cuatjin camá xi cafaha cha tsjanga rë cha catsingatjenxin cha. Sehe marcu macjain casecun cha. Sehe quijitjengui cha Jesús. ⁵¹ Hane xi cavechutaha cha me ne, ngajan xi cachja me cojo cha cuitjin:

—¿Mé xi meje ri xi sahmi cojo ri?

Ngajan xi cachja cha rcá jan ta:

—Maestro, xi meje ná ne, xi cuma tsejen ná.

⁵² Ngajan xi cachja Jesús cojo cha cuitjin:

—Ndatjin. Cuma cjuihin ta, camandaja ye, tséhë xi camacjain ri ngahan.

Hane ha hora vëhë ni ne, camatsejen rë cha. Hane quiji cha cojo rë me hacutjin cjui me.

11

Tivisehen Jesús nandya Jerusalén

¹ Hane xi camatiña me Jerusalén xi ha cjuaha me nandya Betfajé cojo Betania, quiji me ndetjun xi hmí rë Ndetjun Olivu, ngu ndetjún xi tiña tacun cojo nandya xi cuacun vëhë ne, catsingatju me jo cha ladu rë me quiji cha tixa. ² Cuatjin cachja me cojo cha:

—Tangun nandya xi tsejen vë. Hane xi tu cjuhun tjehen nandya ne, sacú nuju ngu burru xatsë xi hisca ngu cjëe cuijin rë chu, quitahahñu chu ngajan. Hane chundecjun chu, sehe nduvuncujun chu. ³ Sá xi yo xi cuichja cojo nuju ta: “¿Mé má cuatjin chundecjun chu ne?”, cuitjin tinújun: “Me xi matitjun tsijin meje rë me chu. Peru sehe tsicuya nga me chu.” —Cuatjin cachja Jesús cojo cha.

⁴ Hya xi camá ne, quiji cha tixa xi cachja Jesús cojo cha. Xi tu cafehe cha ngajan ne, casacu rë cha ngu chu burru xatsë quitahahñu chu ngajan ndiya tiña tingotjo ndihya. Hane cavundecja cha chu.

5 Hane ngujo cha xi hinchacun jan ne, cachja cha cojo cha ladu rë Jesús cuitjin:
—¿Mé má cuatjin cachundecjun chu burru vë?

6 Ngajan xi cachja cha ladu rë Jesús hacutjin cachja me cojo cha. Sehe cha xi cuacun jan ne, casua cha cahndé quijicojo cha cha ladu rë Jesús chu burru jan. ⁷ Hane sehe quijicojo cha chu hiscan tacun Jesús. Hacuaha casua cha tsjian rë cha casesun ngaxtun chu sehe camiji me chu. ⁸ Hya xi camá ne, jemu cjín xuta xi cacandi me tsjian xcun rë me ndiya hacutjin cjui Jesús. Hane ngujo nga me ne quiji cavotohosun me xca xcuen ngajan nguijña, hane hacuaha cacandi me ndiya hacutjin cjui Jesús cojo sa xi tifaharcun me me.

9 Hane yéjë me xi cjui titjun cojo yéjë me xi tjengui jan ne, cavetsihin jercu cajindaya me cachja me:

—Nacuechji rë Nina ta cafehe me xi catsingatju Nina. ¹⁰ Catsinchacun me me xi cuitexa naja sacuaha cavitexa David xutachanga naja. Jemu catsinchacun Nina me xi nduva tséhë xi Nina catsingatju rë me. —Cuatjin cajindaya xuta.

11 Xi tu cavisehen me nandya Jerusalén ne, quiji me yungun xi matitjun. Xi tu cavutsejen nguehe cavutsejen ngajan me ne, mé ta quiji hora ne, cavetju nga me cojo cha ladu rë me xi tejó jan ne, cavuya cafehe nga me nandya Betania.

12 Xi camá nchujun jan ne, cavuya cavetju nga Jesús tséhë nandya Betania. Hane ha jemu vojo rë me hora xi cavetju me. ¹³ Hya xi camá ne, tséhë cjín ni cavëë me ngu yaxujun xi chine tú rë xi jemu ndaja tsejen yaha xca rë. Hane quiji me hiscan secun, sá sacu sinë me. Peru xi cafehe me ngajan ne, tsajin camahani mé xi casacu rë me, tséhë xi hacuiin nixtin rë tuhaxi jan. ¹⁴ Ngajan xi cachja me cojo ya jan cuitjin:

—Quihndë tsajin nixtin xi cuaqi tú riji xi sinë xuta.

Hane cha ladu rë me ne, cahndë cha cjua rë me.

Cavaxë Jesús xuta xi sahmi ndatsin ngajan yungun xi matitjun

15 Hya xi camá ne, cafehe me nandya Jerusalén. Xi cafehe me ngajan ne, quiji me ndatsen yungun xi matitjun jan. Hane cavetsihin cavaxë me xuta xi sahmi ndetsin ngajan. Catsindefa me maxë rë xuta xi tsindeya tujún. Hacuaha cacandi me siya rë xuta xi viteña nisë tyava. ¹⁶ Hane casuaain me cahndé xi tjin mé xi cjuaha xuta xi cuatjuvasen me ndatsen yungun jan.

17 Sehe cavetsihin cavicuya me xuta jan cuitjin:

—Ngayujun ni ne, ha hyun xi cuitjin cachja Nina xcun xujun rë me: “Ndya naha ne, ngu ndihya xi vinduva xuta tséhë yéjë ni nandya cuisiajmi me cojo ná.” Peru ngayun ne, tinihñu ndava Nina vi sacuaha ndava chéjé. —Cuatjin cachja Jesús.

18 Hya xi camá ne, xi cahndë nahmi xi matitjun cojo maestru tséhë ley cjua jan ne, cavetsihin cavangui me chuva rë xi cuma tsiquehen me Jesús. Cuatjin meje rë me tséhë cjuaxin xi tjin rë me, tséhë xi yéjë xuta ne, jemu quijircun rë hacutjin cavicuya Jesús.

19 Xi quiji hora ne, cavetju nga Jesús tséhë nandya jan cojo cha ladu rë me.

Caxi ya xujun xi cama cjan rë Jesús cojo

20 Hane xi camá nchujun jan ne, cavuya cafe nga me nandya Jerusalén. Hane xi cavatju nga me hiscan secun ya xujun jan ne, cavëë me xi ya xujun jan ne, cafë caxi hisca rcu hisca ntsacu. ²¹ Ngajan xi cha Pedru ne, catsinguitsjen cha cjua xi cachja Jesús cojo ya jan nguijña ne, sehe ngajan xi cachja cha cojo Jesús cuitjin:

—Maestro. Chutsujun ta ya xujun xi canújuncjun cojo jan ne, cafë caxi.

22 Ngajan xi cafayangui Jesús tséhë cha cuitjin:

—Catamacjain nuju tséhë Nina. ²³ Cuichjá cojo nuju ngu cjuaquixi ta tu yo ni xi cuichja cojo naxi vëhë cuitjin: “Tihinxin tséhë nguehe, tihin tisihin ngajñi ndachacun”, sá xi hacuiin majo cacun, sá xi macjain Jain rë hacutjin xi cachja ne, cuatjin Jain cuma. ²⁴ Vëhë xi chjá cojo nuju ta yéjë ni xi chjahyun cojo Nina ne, ningatuhuntacun sacuaha xi ha

casacu nuju ta xi cuatjin ne, sacu jain nuju. ²⁵ Hora xi chjahyun rë Nina ne, sá xi tjin yo xi choho cachja tsujun, o sá xi choho casahmi tsujun ne, ninchatuhun rë, cojo sa xi Nahmi naja xi tacun ngahnga ne, hacuaha tsinchataha nuju me tséhë jyé nuju ta, ²⁶ sá xi ninchatuun rë me ne, Nahmi naja xi tacun ngahnga ne, hacuaha tsinchataain nuju me. —Cuatjin cachja me.

Finenguisen xuta ¿yo casuaxa rë Jesús?

²⁷ Cjui cjui me ne, cafehe me nandya Jerusalén. Hane xi cafehe me jan ne, quiji me yungun xi matitjun. Hora xi tsuyihiya me ndatsen yungun jan ne, nahmi xi matitjun cojo maestru tséhë ley cojo sa xuta changá xi yahnga jan ne, cafehe tjengui me Jesús. ²⁸ Hane cuitjin cavinenguise me:

—¿Yo cavitexa ri xi cuatjin nihñi xcusun vë? ¿Yo casuaxa ri?

²⁹ Ngajan xi Jesús ne, cachja me cojo xuta jan cuitjin:

—Cjuinenguésé nuju ngu cjua. Hane sá xi nicuyun tsahan ne, sehe cuichjá cojo nuju yo cavitexa ná xi sahme xcusun vëhë. ³⁰ Ngayun mé nújun, ¿Yo xi cavitexa rë cha Juan xi cavitenda cha xuta? ¿Há Nina cavitexa me cha ne, há xuta cavitexa me cha? Tinújun cojo ná.

³¹ Ngajan xi vetsihin visiajmi xuta jan ngajñi rë me cojo xicjin me cuitjin:

—Sá xi cuinújan xi Nina cavitexa me ne, cuichja me vihi cojo naja cuitjin: “Sá xi cuatjin ne, ¿mé má camacjaain nuju xi cachja cha ni?” ³² Peru ¿há cuma cuinújan xi xuta cavitexa me cha?

Cuatjin casacuinyiin rë xuta xi cuacun vë mé cjua xi tsicuya me tséhë Jesús ta, tséhë xi tsacjun me xutacjín, tséhë xi yéjë ni xuta jan ne, macjain rë me xi cha Juan ne, Nina cavitexa jain me cha xi suacuenda cha cjua rë Nina. ³³ Vëhë xi hya xi cafayangui me tséhë Jesús ne, cachja me cuitjin:

—Hyiin.

Ngajan xi hacuaha Jesús ne, cachja me ta:

—Sá xi cuatjin ne, ta mijí nicuyun cjua tsahan ne, hacuaha cuichjaain cojo nuju yo cavitexa ná xi sahme xcusun vihi.

12

Ejemplu tséhë cha mosu xi choho cjuatacun rë

¹ Sehe cavetsihin cavicuya Jesús xuta jan ngujo cjua, peru cojo suva ejemplu cachja me. Cuitjin cavetsihin me cjua:

—Cuejñaa xi ngu xihin ne, catsitjé me nahñu rë uva ngu rqui nangui. Hacuaha casahmi me hnchua xondyojo rë tahndee rë xitjé jan. Ha ngajan ne ne, cafahanguiya me ngu ndyojotë hiscan cuaxë nandá rë tuhaxi jan. Hacuaha casahmi me ngu cahndé hiscan xi cavesun me ngu nachan ngahnga xi sesun xuta xi sahmi cuidadu xitjé rë me.

'Hya xi camá ne, casuatsja me cojo jingu sa xuta xi sahmi cha cuidadu rë, hane cjuaha me tsé tsé cojo rë cha. Sehe cavetju me quiji me ngu nanguicjin. ² Xi cavechú nixtin tséhë tutjé jan ne, catsingatju me xi tséhë jan ngu mosu hiscan xi quitaha xitjé rë me, xi cjuahatsja cha tséhë xi saté rë me. ³ Hya xi camá ne, xi cavechu cha mosu jan ne, cavaja xuta xi tacun tsja xitjé jan cha mosu jan. Hane catsicuya cha cha cafe cha. ⁴ Ngajan xi me xi tséhë jan ne, cavuya catsingatju nga me ngu mosu quiji. Hane xi cavechu mosu vëhë ngajan ne, me xi siutaha jan ne, cavanguihmu me rcu cha, hacuaha choho cachja me cojo cha. ⁵ Cafè ne, me xi tséhë jan ne, cavuya catsingatju nga me ngu mosu. Peru mosu jan ne, catsiquehen me xi cuacun jan cha. Cafè vëhë ne, catsingatju camaha sa cha mosu. Hane ngujo mosu jan ne, tu cavaja ni cha. Hane ngujo nga ne, catsiquehen camahani cha.

⁶ 'Quihndé me xi tséhë cahndé jan ne, ngu ni quihndi tjin rë me ne, vëhë sa tacun. Handasa jemu hmucacun me cha ne, peru catsingatju me cha, tséhë xi cuitjin catsingatahacacun me: “Quihndi naha vi ne, cjuaharcun me cha.” ⁷ Peru xi cafehe cha quihndi rë me ngajan ne, ngajan xi chja xuta xi sahmi cuidadu xitjé jan cojo xicjin me ta:

“Cha vihi quihndi xi cjuahatsja cha cahndé vihi. Quihndé ne, niquen cha, cojo sa xi cumá tsajan nangui.” ⁸Hya xi camá ne, cafaha me cha catsiquehen me cha, sehe catsingatjexin me cha tséhë cahndé jan. Cuatjin casahmi me xi cuacun vë.

⁹Hindë ne, me xi tséhë nangui jan ne, ¿mé sahmi me cojo xuta xi siutaha cuidadu rë xitjë jan? Hatuxa cjue me ne, tsiquehen me me, hane sua me cahndé jan cojo jingu sa xuta.

¹⁰Quihndë, ngayun ne, ha chutayuun cjua tséhë xujun rë Nina xi chja cuitjin: Ndyojo xi chja cha chjinevexo xi machjiriin ne, ndyojo vëhë xi cachja Nina xi cuejña tjun tjun yuju rë xihndënaña.

¹¹Cuatjin casahmi Nina xi cumá hacuaha jemu chuya rë xahasen naja xi cuatjin camá.

¹²Hya xi camá ne, xuta changá xi cafehe tjengui rë Jesús jan ne, meje cjuaha me me, tséhë xi camachaya rë me xi condra rë me xi cachja Jesús. Ha ndasa meje cjuaha xuta changá jan Jesús ne, peru xi tsacjun me tséhë xutacjín jan ne, ha quihndë tsajin mé casahmi me, hane cafe me.

Cjuacjintacun tséhë tujúnsa

¹³Hya xi camá ne, xuta changá xi cuacun jan ne, catsingatju me ngujo cha tséhë partidu fariseo cojo ngujo cha ladu rë Herodes xi cjuahangahma cha Jesús, cojo sa xi xuta changá jan ne, cuma cuinchajyë me me. Xi tu cafehe cha ne, ngajan xi cachja cha cojo rë me ta:

¹⁴—Maestro. Ngayin ne, hyin ta ngayun ne, quixi cjua tsujun. Ha tuxa cjuaquixi xi nújun ha ndasa xi cojo xuta nchina visiajmu o sá cojo xuta yuma. Tu yo ni ne tangun ni visiajmu cojo ta tséhë xi ngayun ne, vicuyun ndiya rë Nina cojo cjuaquixi camahani. Quihndë ne, sacuaha ley rë Moisés ne, ¿há sua cahndé xi cuechjen tujúnsa naja cojo César, me xi matitjun, o há suaain cahndé? —Cuatjin cavinenguise cha.

¹⁵Peru Jesús ne, tséhë xi ha vacun rë me xi jemu ndacha cha ne, cuitjin xu cachja me cojo cha:

—¿Mé má cuatjin meje chuhunchuvun ná? Nduvuncujun ngu tujún scutséjen.

¹⁶Hya xi camá ne, cha xi cuacun jan ne, canduvacojo cha ngu tujún tyava. Ngajan xi cachja me cojo cha cuitjin:

—¿Yo xcusun rë hacuaha yo ñahi rë xi quitahá xcun tujún vë? —Cuatjin cavinenguise Jesús.

Ngajan xi chja cha cojo rë me cuitjin:

—Tséhë César. —Chja xu cha.

¹⁷Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tséhë me; hane tuhun rë Nina xi tséhë me.

—Cuatjin cachja Jesús.

Hya xi camá ne, jemu quijircun rë cha xi cuatjin ndaja cachja Jesús.

Cjua chjinenguise hacutjin cumá xi cuya cjuahñu

¹⁸Hacuaha canduva tjengui rë me ngujo cha tséhë partidu saduceo, cha xi vicuya ngu cjuachacun xi chja xi hya xi cueyan ne, ha quihndë cuyaain cjuahñu naja. Hane cuitjin cachja cha ngujo cjua cojo Jesús:

¹⁹—Maestro. Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaha quihndi rë nima vëhë. ²⁰Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiin rë na hisca ngu quihndi cojo cha. ²¹Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi. Hacuanitjin ni cafaha cha xi majyan jan na, ²²hisca xi café yëjë xi yatu cha cafaha cha na. Peru yëjë cha xi cuacun vëhë ne, café cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vëhë.

Hiscan xi cajnetaha ne, hacuaha cahme na. ²³ Quihndë ne, ¿mé nújun? Hya xi cuya yéjë nima cjuahñu ne, ¿jarë jain cha xi chjuun rë cha na xi cjuaquixi? ta yéjë xi yatu cha ne, cavixan cha cojo rë na. —Cuatjin cavinenguise cha.

²⁴ Ngajan xi cachja Jesús cojo cha cuitjin:

—Ngayun ne, cuaintjin xi nújun, tséhë xi vijnii rcun cjua xi chja xujun rë Nina, hacuaha hyuun xi Nina ne, jemu hñu cjuatacun rë me. ²⁵ Hya xi cuya cjuahñu rë nima ne, ha quihndë hacuiin cuixan me hacuaha hacuiin tsinguixan me, ta tangun cumá sacuaha xi siu ángel ngahnga ne, cuatjin cuyuju me. ²⁶ Hacuaha quihndë xi tinújan tséhë nima xi cuya cjuahñu rë ne, ngayun ne, sacuaha xi cjéé chutayun xujun xi catsihindu Moisés hacutjin cahndé me cjua rë Nina xi cavetju tséhë cahntsua ngu ya lhindi xi seti. Cuitjin cachja Nina cojo me hya: “Ngahan xi Nina rë Abraham ngahan. Nina rë Isaac, hacuaha cojo Nina rë Jacobo má ngahan.” Cuatjin cachja Nina tséhë xuta xi ha cahme me. ²⁷ Peru Nina ne, hacuiin nina rë nima ta nina rë xuta xi quicun me. Hane sá xi quicun nima jan, ngajan tsejen xi cjuachacun xi nújun ne, quixiin.

Artículo tséhë ley xi hitsë sa venguichji rë

²⁸ Hacuaha cafehe ngu cha maestru tséhë ley hiscan tacun Jesús. Hane xi cahndé cha cjuavisiajmi rë me ne, xi ndaja cama catsicuya Jesús, ngajan xi cavinenguise cha me cuitjin:

—Maestro, tséhë yéjë ni cjua xi cavitexa Nina naja xcun xujun ley ne, ¿jarë artículo xi hitsë sa matitjun?

²⁹ Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rë nangui Israel, Nina naja ne, ngu tu tu ni me. ³⁰ Meje rë xi nihña hmutacun Nina, me xi matitjun tsajan, cojo ngayéjë ni cjuatacun naja, cojo ngayéjë ni xahesen naja, hacuaha cojo ngayéjë ni ngahñu naja.” ³¹ Hane xi má jo ne hacui vihi: “Meje rë xi nihña hmutacun xingueen sacuatjin hmutacun suvaan yojo naja.” Tséhë yéjë ni artículo xi cavitexa Nina ne, jo ni cjuatacun vëhë xi matitjun. —Cuatjin cachja Jesús.

³² Ngajan xi cachja cha maestru tséhë ley cojo rë me cuitjin:

—Ndatjin canújun, maestro. Canújun cjuaquixi ta Nina naja ne, ngu tu tu ni me. ³³ Hacuaha ndatjin canújun xi meje rë xi nihña hmutacun Nina cojo ngayéjë ni cjuatacun naja, cojo ngayéjë ni ngahñu naja, hacuaha meje rë xi nihña hmutacun xingueen sacuaha nihña hmutacun yojo naja suvaan. Cjua vëhë ne, tjercu venguichji rë. Hisca vengui sa chji rë xi cuma rë yéjë ni cjuandaja cojo yéjë cjuatjo xi cjue xcun Nina.

³⁴ Xi tu cahndé Jesús ta ndatjin cafayangui cha maestru jan ne, ngajan xi cachja me cojo cha cuitjin:

—Ha jemu hitsë sa chaja xi cuisuhun ladu rë Nina.

Ha quihndë tsajin yo xi macacun sa cjuinenguise rë me ngu cjua.

¿Yo tjé rë má me xi hmí rë Mesías?

³⁵ Ngajan xi Jesús ne, hora xi tivicuya me xuta ngajan yungun xi matitjun ne, cachja me cojo xuta cuitjin:

—Maestru tséhë ley ne, chja cha ta Cristu, me xi tsingatju Nina xi cumatitjun tsajan ne, tjé rë David má me. ³⁶ Peru suva David ne, catsihindu me cjua xi cachja Hasen rë Nina cojo rë me cuitjin:

Nina ne, cachja me cojo Nai naha cuitjin:

“Tinechin ladu quixi naha

hiscan hya xi yéjë xi sahmi condra ne, cuyuju ngahan ngahma gubiernu riji.”

³⁷ Ndatjin, sá xi cuatjin cachja David tséhë me ne, ¿há cuma xi hisca tjé rë David má me ni, hacuaha matitjun nga me tséhë David ni? —Cuatjin cachja Jesús.

Hane xutacjín ne, jemu cojo cjuasua cavisíñu me cjua rë Jesús.

³⁸ Hacuaha cuatjin cachja nga me ngu ndiya xi tivicuya me xuta:

—Tjin nuju cuidadu. Hacuiin cojo ngayun nihñu sacuatjin sahmi cha maestru tséhë ley. Cha xi cuacun vëhë ne, jemu meje tsuyiyhiya chacun cha hacuaha meje rë cha xi cuichja xuta nina cojo cha ngajñi ndetsin.³⁹ Hacuaha hora xi fi cha yungun ne, cjue cha cuyuju cha ngu cahndé ndatjin hiscan viyuju xuta xi matitjun. Ha cuanitjin ni hiscan xi cjue sinë cha ngu ndava suhi ne, fi cha viyuju cha cahndé ndatjin hiscan viyuju xuta xi matitjun.⁴⁰ Hacuaha yachjin cahan ne, jemu cjín tujún vaxë cha na. Hisca ndava na tsajin. Hane hisca xi chjayuma cha ne, jemu nduju hora chja cha, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatjun cha, xi cuma rë jingu sa xuta.

Tujún chjë rë na cahan

⁴¹ Sehe quiyi cavéjña me tiña hiscan xi tacun caxa xi xincha tujún chjë rë Nina, vutsejen me hacutjin vincha xuta tujún. Hane jemu cjín xuta nchina quiyi cavincha me chjë rë, jercu cjín tujún cavincha me.⁴² Hya xi camá ne, cojo ngu na cahan xi jemu yuma camahani quiyi cavincha na jo tujún siné xi jemu chuva chji rë cahntsua caxa jan.⁴³ Ngajan xi Jesús ne, casahmitangun me cha ladu rë me, sehe cachja me cojo cha cuitjin:

—Cuichjá cojo nuju cjuaquixi ta xuma chjuun cahan vihi ne, hitsë sa vengui chji rë tujún xi cavincha na, xi cumá rë tujún xi jemu cjín cavincha cha nchina jan ta,⁴⁴ tséhë xi cha xi cuacun vëhë ne, xi vangui rë cha ne, vëhë xi cavincha cha. Hane ha ndaja na vëhë ne, cojo cjuayuma xi tacun na ne, tujún xi cavincha na jan ne, ha vëhë yëjë ni xi tjin rë na. —Cuatjin cachja Jesús.

13

Jesús ne, chja me ta yungun xi matitjun ne, cuetsunya

¹ Hya xi camá ne, hora xi tivetju Jesús tséhë ndatsen yungun xi matitjun jan cojo cha ladu rë me ne, ngajan xi chja nga cha ladu rë me jan cojo rë me cuitjin:

—Maestro, chutsujun ndyojo xi texo yungun vihi ta tjercu tu ndacun camahani. Hacuaha ndihya tséhë ne, jercu tu cun camahani.

² Ngajan xi chja Jesús cojo cha cuitjin:

—Sacuaha ndihya ndacun xi chutsujun ne, cuechu nixtin xi hisca xi ngu ndyojo vi ne, tsajin hinchasunc oo xicjin ta, cjuë yëjë cuixujne.

Hacutjin cumá hya xi cjuë ngasunhndë

³ Cafë cachja me cuitjin ne, sehe cavitju me quiyi me cojo cha ladu rë me, cafehe me tiña rcu Naxi Olivu, quixi rë tingotjo yungun xi matitjun jan. Hane xi quijixin me cojo cha Pedru cojo cha Jacobo cojo cha Juan cojo cha Andrés, sehe cavinenguise cha me cuitjin:

⁴ —¿Janihya cuetjucaa xcusun vëhë xi canújun?

⁵ Ngajan xi cachja Jesús cojo cha cuitjin:

—Nechun cuidadu cojo sa xi hacuiin cuma ndacha ngayun ta,⁶ tséhë xi jemu cjín xuta cjuehe me xi cuichja me cueyanangui me ñihi naha cuichja me xi hacui me xi Cristu me. Hane cuatjin jemu cjín xuta cumacjain rë me cjuandacha rë me xi cuacun vë.

⁷ 'Hacuaha hya xi cumachaya nuju cjuá xi jemu yehe si tijima ne o sá xi tjin cjuacjintacun ta jemu yehe si nduva ne, hacuiin cumacjintacun ta ha tuxa cuatjin cuma. Peru hacuiin ha hya cjuë nixtin rë ngasunhndë vihi.⁸ Xuta nandya scaan cojo xuta xi hacjahi. Ngu nación cojo ngu nga ne, scaan. Hacuaha cjín cahndé xi cjuani nangu. Hacuaha cjín cahndé ne, cuma jindya. Cuatjin cumá xi cuetsihin cjuañihi xi cuatju xuta.

⁹ 'Nechun cuidadu ta, cuechu nixtin xi xuta nandya ne, cjue cani nuju me xcun xutaxa rë yungun ne, hacuaha cuaja nuju me. Hacuaha tjin nuju xi cuangun xcun xutaxa rë ndihyavasen cojo xcun gobernador ngatsë rë xi macjain nuju ngahan. Hane ngajan ninguixun yëjë cjuá hacutjin cavicyá nuju.¹⁰ Peru chaja sa xi cjuë ngasunhndë ne, meje rë xi cuichja xuta ladu naha cjuá rë Nina jinguyjë ni nandya tséhë ngasunhndë.¹¹ Hora xi cjuí chani nuju xcun xutaxa rë ne, hacuiin cumacjintacun tséhë cjuá xi cuinújun jan ta, Hasen rë Nina ne, scuxaha cjuatacun nuju hora vëhë hacutjin cuinújun. Hacuaha vëhë

ni cuinújun ta tséhë xi hacuiin cjuatacun nuju xi cuinújun ta cjuatacun rë Nina xi sua nuju Hasen rë Nina. ¹² Xuta nandya ne, cuinchajyë me hntsë me, cuinchajyë me xutacha rë me, hacuaha cuinchajyë me quihndi rë me, cojo sa xi xutaxa rë ne, cjuaha me xuta xi cuacun vë ne, tsiquehen me. ¹³ Hane yëjë xuta ne, choho scuëë nuju me ngatsë nahá. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. —Cuatjin cachja Jesús.

Cjuacjintacun jyë xi cuma

¹⁴ 'Yo xi scutaya cjua xi sehe nduva vi ne, meje rë xi ndaja catetaharcun. Tjin xcusun xi tsinguetsun rë cahntsua yungun xi matitjun. Hane hya xi cjuuehe ngu xcusun xi cuacun vë hiscan xi ndajintjin xi cjuuehe ne, yëjë ni xuta xi siu ladu tséhë distritu Judea nixtin hya ne, ngutjen ni catangahma me hiscan ndetjun. ¹⁵ Hacuaha jarë me xi hinchasun rcu ndava xi cuitujne me, hacuiin cijne me xi cuisehen me cahntsua ndihya cjuaha me mé tséhë me xi cjuaha me. ¹⁶ Hacuaha yo xi hinchataha me nguijña ne, mijí rë xi cuya cjuue me ndava me xi cjuuejaha ndastu tsjanga rë. ¹⁷ Jemu chojyihí tséhë yëjë ni yachjin xi hinchahma quihndi rë cojo yëjë me xi tjin rë quihndi vaqui ne nixtin hya. ¹⁸ Chjahyun rë Nina xi cjuanihi vëhë ne, hacuiin cuinduva nixtin chan hnchan ta, ¹⁹ cjuanihi xi cuma ne, ngu cjuanihi jyë xi cjeë camahani cumá hisca ntsacu cavetsihin ngasunhndë hacuaha cuyaain cuatjin cuma. ²⁰ Sá xi jemu cjin nixtin cjuecani rë cjuanihi vëhë ne, hisca ngu xuta ne, cuetjintjiin me. Peru ngatsë rë cjuahmutacun xi tjin rë Nina cojo xuta xi cavaxijin me xi cumá me ladu rë me ne, sahmichuva me nixtin vëhë.

²¹ 'Nixtin vëhë ne, sá xi yo xi cuichja cojo nuju xi ngajan o sá xi nguehe tacun me xi má Cristu, xi camacjaain nuju ta quixiin xi chja me. ²² Ngujo xuta vindacha ne, cuichja me ta: "Ngahan xi Cristu xi cumatitjun ngahan tsujun." Ngujo nga me ne, cuichja me ta: "Ngahan xi chjá cjuá rë Nina." Peru vindacha ni me, quixiin cjuá xi cuichja me. Hacuaha sahmi me xcusun sacuaha cjuarcun, tséhë xi hisca cojo xuta xi cavaxijin Nina meje cuindacha me. ²³ Nechun cuidadu ta cojo chaja sa xi cuechu nixtin vëhë ne, ngahan ne, ha casua camachaya nuju xi cuatju vë.

Xi cuya nga Jesús ne, cumatsejen hasen rë ngahñu rë me

²⁴ 'Xi cuatjun nixtin tséhë cjuanihi jan ne, cuinduva nixtin xi cjuë ndavá rë tsuhi. Sá ne, hacuaha ha quihndë suaain ndavá rë. ²⁵ Hane niñu ne, cuixu tséhë ngahnga. Hisca ngahñu xi yaha ngahnga ne, cjuiniyaya. ²⁶ Xcun cjuacjintacun vëhë ne, scuëë xuta xi ngahan, Quihndi rë Xuta Jain, cuinduvá ngajñi rë yufí cojo jemu jyë ngahñu hisca seti tsejen ngahan xi nduvá. ²⁷ Hya ne, tsingátju ángel naha yëjë ni ladu tséhë ngasunhndë, cjuuejaha rë yëjë xuta naha xi cavaxejen, sahmi tangun rë hiscan tejña.

²⁸ 'Quihndë ne, cuetaharcun ngujo cjuá tséhë yaxujun xi chine tú rë. Hya xi cuetsihin cumá xcuén tsja rë yaxujun jan tséhë xi cuetsihin cuetjusehen ne, ngayun ne ha hyun ta ha jemu camatiña chan tsi. ²⁹ Hacuaha xi cjuuehe cjuanihi xi cachjá cojo nuju ne, vëhë sua cumachaya nuju ta ha tiña tacun xi cjuë ngasunhndë, hisca meje cumá. ³⁰ Cuichjá cjuaquixi cojo nuju ta xuta xi siu quihndë ne, siu cuaha me hya xi cuetjucaa xcusun xi cachjá cojo nuju. ³¹ Cuechu nixtin xi cjuë nangui, cjuë ngahnga. Peru cjuá naha ne, tsajin nixtin xi cjuë.

³² 'Sacuaha nixtin xi cuetjucaa cjuatacun vëhë ne, tsajin yo vëë rë janihya cuetjucaa. Hisca hvíin ángel xi siu ngahnga. Hisca hveen ngahan xi Quihndi rë Nina. Suva ni Nina ngu tutu nahmi naja ne, me vëhë xi vëë me janihya cumá.

³³ 'Vëhë xi nechun cuidadu, hacuaha ningascun rë hitsë cjuatacun nuju ta, ngayun ne, hyuun janihya xi cjuuehe Nai nuju. Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cuya, ¿há jñu ne?, ¿há ñahñu cjuéhë? ³⁴ Ngahan ne, sacuaha ngu xuta xi cuetju cjuue ngu nangui cjin. Chaja sa xi cuetjun me tséhë ndava me, cuichja me cojo mosu rë me mé xa sahmi jimangu mosu. Hacuaha cuitexa ngu mosu xi cuahacuenda tingotjo ndava me. Cuatjin sahme. ³⁵ Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cuya, ¿há jñu ne, há nixten ne, há

tiña sahasen, o sa sahasen camahani cuya? Sa xi ñahñu cjuëhë hane tsajin tjin chjine ngayun. ³⁶ Cuidadu sá xi ngu ñahñu nduvá hane ngayun ne, tsajin tjin chine ngayun. ³⁷ Xi chjá cojo nuju ne, ha cuanitjin ni chjá cojo yéjë ni xuta: Meje rë xi catitsingasca me hitsë cjuatacun rë me. —Cuatjin cachja Jesús.

14

Me xi matitjun ne visiajmicjin me hacutjin cuma xi cjue Jesús ndavaya

¹ Hya xi camá ne, casahmi chaja sa jo nixtin xi cuechu suhi tséhë pascua ne, sacuaha xcusun niji ne, hya chini pan xi tsajin san rë. Ngajan xi nahmi xi matitjun jan cojo cha maestru tséhë ley ne, jemu tivangui me chuva rë xi cuindacha me Jesús, cojo sa xi cuma cjuaha me me tsiquehen me me. ² Peru cachja me cojo xicjin me cuitjin:

—Ndatjin xi cuinechanyan ne, cuatju suhi sehe chjahanhma cha, ta sá xi tsajin ne, tu cumacjan rë xutacjín hane cumá ngu suë jyë.

Cavitejnu ngu chjuun aceite xi jemu ndaja jne rcu Jesús

³ Hya ne, Jesús ne, nandya Betania quitaha me. Tacun me ndava cha Simón, cha xi camandaja tséhë chíhin cjan rë xi cafaha rë chuxin yojo rë. Hora xi tacun me tijinë me niñu ne, cafehe ngu na xi yaha na ngu frascu ndyojo, hincha aceite tséhë nardo xi jercu hnga chjí rë. Hane xi cavotohosun na rcu frascu hiscan hincha aceite jan ne, sehe quiji cavitejnu na aceite jan rcun Jesús. ⁴ Ngujo me xi siu jan ne, camacjan rë me xi cuatjin casahmi na. Hane sehe cachja me ngajñi rë me cojo xicjin me cuitjin:

—¿Mé má cuatjin tu catsinguetsun na aceite vë? ⁵ Sá xi xteña vë, sacú tujún sacuaha tujún xi sacu rë ngu mosu xi casahmi xa ngu nu, hane tujún vëhë ne, cuma cuisecoo rë xuta yuma. —Cuatjin cachjataha me na.

⁶ Ngajan xi cachja Jesús cuitjin:

—Xi canujuun tséhë na. ¿Mé má cuatjin tivichuncun tséhë na? ta, jemu venguichji rë xcusun xi casahmi na cojo ná. ⁷ Xuta yuma ne, yéjë nu yéjë nixtin siu me ngajñi nuju. Peru ha ndaja ngahan ne, hacuiin jyë nixtin tejña cojo nuju. ⁸ Na vihi ne, casahmi na hacutjin xi chutaha na. Hane cojo chaja sa xi cueya ngahan ne, cavitejnu ná na aceite xi cuéhëchjine ni na yojo na ha xi seyaniji ngahan. ⁹ Cuichjá quixë cojo nuju ta tuyani tséhë jingujuë ngasunhndë xi cuichja xuta cju tséhë Nina ne, hacuaha cueyanangui me na vihi cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

Judas ne, viteña me Jesús

¹⁰ Hya xi camá ne, cha Judas tséhë nandya Queriote, cha ladu rë Jesús tséhë cha xi tejó jan ne, quiji cha xun nahmi xi matitjun ne, cavéhë chíhin cha cju cojo rë me xi sahmi me entregadu cha Jesús cojo rë nahmi jan. ¹¹ Hya xi cahndë nahmi xi matitjun jan cju rë Judas ne, jercu ndama camahani rë me. Hacuaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavangui cha chuva rë hacutjin xi cuma sahmi entregadu cha Jesús.

Tisehen chjinë xi sinë me tséhë pascua

¹² Hya xi camá ne, nixtin tjun tjun tséhë suhi xi chini pan xi tsajin san rë, nixtin xi hacuaha niquihin chu tsángä tséhë suhi tséhë pascua ne, hya ne, cha ladu rë Jesús ne, cavinenguisse cha cojo rë me cuitjin:

—¿Jani hiscan xi meje nuju xi cuanguin cuihinchjini xi xinëë nguixun tséhë suhi vi?

¹³ Ngajan xi catsingatju me jo cha ladu rë me quiji cha tixa. Hane cuitjin cachja me cojo cha:

—Tangun nandya Jerusalén. Hane ngajan cuechuntuhun ngu cha xi nduva ne, quisun rcu cha ngu nisa nandá. Tangun cojo cha hacutjin cjui cha. ¹⁴ Hane ndihya xi cuisehen cha ne, tinújun cojo me xi nai rë ndihya jan cju vihi: “Cuitjin chja maestru ta, ¿jarë cuartu hiscan xi sinë nguixun me cojo niji tséhë pascua?” Cuatjin tinújun cojo me.

¹⁵ Hane me vëhë ne, cjue tsingacun nuju me ngu cuartu jyë ngajan ndihya ngahnga hiscan xi ha tjin chjine. Hane ngajan tuhunndujun xi xinëë.

¹⁶ Hane ngajan xi cavetju cha xi cuacun jan quiji cha. Xi cafehe cha nandya Jerusalén ne, cuatjin camá tu tjin cachja Jesús cojo cha. Hane cavëhë ndaja cha xi sinë nguixun me cojo rë cha.

Pascua xi vijnetaha cajinë Jesús

¹⁷ Xi quiji hora jan ne, cafehe Jesús cojo yëjë tejó cha ladu rë me. Hane quiji me cavyuju me. ¹⁸ Sehe cavetsihin cajinë me. Hora xi tijinë me jan ne, ngajan xi cachja Jesús cuitjin:

—Nguehe cuichjá cojo nuju cquaquixi ta ngu ngayun xi nechan tichine cojo nuju nguehe ne, nihñu ná entregadu. —Cuatjin cachja me.

¹⁹ Ngajan xi jemu choho camá rë cha, cavetsihin cha cachja cha chuva ngu chuva ngu cha, cuitjin cachja cha:

—Hacuiin ngahan.

²⁰ Ngajan xi cachja Jesús cuitjin:

—Ngajñi nuju xi tejó ngayun, ngajan jiyajñi ngu xi sahmi cuitjin. Ngu me xi ngu ni tyuva tsinguísehen quinda niñu naha cojo ne, me vëhë xi sahmi ná me entregadu.

²¹ Ngahan xi Quihndi rë Xuta Jain ne, hatuxa tjin xi cueyá ta, xujun rë Nina ne, cuatjin chja. Peru xuma cha xi cuiteña ná. Vengui sa chji rë sá xi catsiin camahani cha.

Jesús ne, vindeya me xcusun rë pascua, cumá cena tséhë Nai naja

²² Hora xi ha camatiña xi cuijnetaha sinë me niñu ne, cafaha Jesús ngu niñutsju, hane casua me nacuechji rë Nina, sehe cavotohocja me niñutsju jan. Hane sehe casua me ngu rquí ngu rquí niñu jan cha ladu rë me, hane cuitjin cachja me cojo cha:

—Juhun vihi ta, vihi ne, yojo naha. —Cuatjin cachja me.

²³ Hacuaha cafaha nga me ngu vasu xi hincha xan rë uva, hane casua nga me nacuechji rë Nina. Hane sehe casua me tsé tsé cahvi cha jima ngu cha ladu rë me. ²⁴ Hacuaha cachja me cojo cha cqua vihi:

—Vihi jni naha xi cuetju ná ngatsë rë xuta. Xcusun vihi ne, ngu compromisu xatsë xi sehe tivëhëchihin Nina cojo xuta cojo sa xi jni naha ne, vëhë cuaxëtje rë xuta. ²⁵ Cuichjá quixë cojo nuju ta ha quihndë cueen xan rë uva nguehe ngasunhndë. Cuëhë, peru hisca hya xi nduva Nina cuitexa me ngasunhndë, hya cuëhë, peru hacuiin tangun cumá. —Cuatjin cachja Jesús cojo cha ladu rë me.

Jesús ne, chja me ta Pedru cuichja me xi viin me yo xi Jesús

²⁶ Xi cajnetaha cajinë me ne, casë me ngu tséhë Nina. Sehe cavetju me quiji me Naxi Olivu. ²⁷ Hane sehe ngajan xi chja me cojo cha ladu rë me cuitjin:

—Ngayujun ni ngayun cumanguaintacuun cojo ná ta cuma sacuaha camahindu xcun xujun rë Nina xi chja cuitjin: “Nina ne, tsiquehen me cha xi sahmi cuidadu rë chu tsánga. Hane chu tsánga ne, cuitsojo chu.” ²⁸ Cuatjin cumá, peru hya xi cuya nga cjuahñu naha ne, cjué titjun tsujun hiscan distritu Galilea.

²⁹ Ngajan xi cachja cha Pedru cojo Jesús cuitjin:

—Ha ndasa ngayëjë cha xi cuicun vi cuejña suva cha ngayun ne, peru ngahan ne, cuejñaa nuju suvun.

³⁰ Ngajan xi cachja Jesús cojo cha cuitjin:

—Cuichjá quixë cojo ri ta tajñu ni xi chaja sa squindaya xahnda ne, ha jyan ndiya cuinoje xi hyiin yo ngahan. —Cuatjin cachja me.

³¹ Peru cha Pedru ne, cavuya cachja nga cha cqua vihi:

—Ha ndasa hisca cueya cojo nuju ne, peru cuichjaain xi hveen yo ngayun. —Cuatjin cachja cha.

Hacuaha cuanitjin ni cachja cha xi yahnga.

Jemu chja vatju Jesús ngajan Getsemaní

³² Hya xi camá ne, cavetju me quiyi me ngu cahndé xi hmí rë Getsemani. Ngajan xi cachja me cojo cha ladu rë me cuitjin:

—Nechun ni nguehe ne, cjué cuiasajme cojo Nina. —Cuatjin cachja me.

³³ Hya xi camá ne, cavaxé me cha Pedru cojo cha Jacobo cojo cha Juan, quiyi me cojo cha. Ha xcun xi ha cjui cjui me jan ne, cavetsihin jemu casercun rë me, hacuaha macjincacun me. ³⁴ Ngajan xi cachja me cojo cha cuitjin:

—Jercu chocho má camahani rë xahasen naha. Xi má ná ne, cueya tséhë. Nечун ni nguehe cuacun ngayun cojo ná. —Cuatjin cachja me.

Oración xi tjun

³⁵ Sehe ngajan xi Jesús ne, quiyi me hitsé ni nguvan. Hane ngajan cafañatsacjan me, cafehya rë me Nina sá xi tjin tu mé ni xi cumá cojo sa xi cuatjiin me cjuacjintacun xi cuatju me jan. ³⁶ Hane cuitjin cafehya rë me Nina:

—Papá. Xi cumá nuju ngayun ne, yéjé ni xcusun ne, hacuiin chja cuma. Véhë xi tiféhya nuju xi naxuntjun ná tséhë cjuacjintacun xi cuátju cumá. Cuatjin meje ná, peru cjua xi cuinújun ne, cuatjin catama. —Cuatjin cafehya rë me Nina.

³⁷ Hya xi camá ne, cavuya cafehe nga me hiscan siu cha ladu rë me xi quijicojo me jan. Hane xi vutsejen me ne, siufé cha. Ngajan xi chja me cojo cha Pedru cuitjin:

—Simón, ¿mé má tsjuñife? ¿Há camaji cavacun ngayun cojo ná hisca ngu hora?

³⁸ Nechun quicun, hacuaha chjahyun rë Nina cjuandaja rë me, cojo sa xi hacuiin chjaha chuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuva caa rë. —Cuatjin cachja me cojo cha.

Oración xi majo

³⁹ Hya xi camá ne, quiyi nga me ngu ndiya hitsé ni nguvan. Hane ha cjua véhë nga ni cavuya cafehya rë me Nina. ⁴⁰ Hya xi cavuya nga me ne, siufé nga cha ladu rë me xi jyan jan, tséhë xi ha quihndé ticaain rë cha xi jemu nijña rë cha. Xi catsingasca Jesús cha ne, sacuinyiin rë cha mé cuichja cha cojo me.

Oración xi má jyan

⁴¹ Xi cavuya me xi quiyi me má jyan ndiya ne, cachja me cojo cha ladu rë me jan cuitjin:

—Ha tsjuñufun cuaha. Juun, peru ha camá. Ha cavechu hora xi ngahan, Quihndi rë Xuta Jain, cjuaha ná xuta tsehen ta, ha caxteña ngahan. ⁴² Tisatjunnungun, cuanguen chutsejen ta, ha nduva cha xi sahmi ná entregadu. —Cuatjin cachja me.

Cjuicojo cha Jesús ndavaya

⁴³ Ha tu tichja cuaha Jesús cojo cha ladu rë me ne, cafehe cha Judas, cha xi cojo jiyajñi ngajñi rë cha xi tejó jan. Hacuaha jercu cjín xuta tivisecoo rë cha hora xi nduva cha. Yaha me quicha. Yaha me ya. Nahmi xi matitjun cojo cha maestru tséhë ley cojo xuta changá jan ne, me véhë cavitexa me xutacjín jan xi quiyi jaha me Jesús. ⁴⁴ Chaja sa xi cjuehe cha Judas cojo xutacjín jan hiscan tacun Jesús ne, ha cachja cha cojo xuta jan cjua vihi:

—Cha xi cjué cuitátsuha xi suá rë nina ne, cha véhë xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

⁴⁵ Xi tu cavechu cha hiscan nduva Jesús cojo cha ladu rë me xi yahnga jan ne, ngutjen quiyi casahmi tiña cha tséhë me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Café cachja cha cuitjin ne, sehe cavitatsuha cha Jesús. ⁴⁶ Hya xi camá ne, quiyi xuta jan ne, cafaha me Jesús.

⁴⁷ Ngajan xi ngu cha xi secun jan ne, cavaxé cha quicha nduju rë cha, hane cavaja rë cha ngu cha mosu rë nahmi xi matitjun ne, cavatésun cha ngu ladu tyjavañuju. ⁴⁸ Ngajan xi cachja Jesús cuitjin:

—¿Mé má sacuaha vangun chjuhun xuta chéjé ne, cuatjin nduvun chjuhun ná? ta, quichuhun quicha quichuhun ya. ⁴⁹ Ngahan ne, nchunchujun ni caviteñaya yungun xi

matitjun, cavicuyá rë xuta, hane ¿mé má cachjuun ná ngajan? Juun, peru cuatjin tijima cojo sa xi cuetjucaa jain hacutjin camahindu xcun xujun rë Nina.

⁵⁰ Hya xi camá ne, cha ladu rë Jesús ne, cavejña suva cha me, hane cafë yëjë cha cavanga cha.

Cha nixti xi cavanga hya xi cachjahá rë Jesús

⁵¹ Ngu sa cha jan yaja cha ngu tsjian tu tē ni. Hane xi tu meje cjuaha xuta cha jan ne, tsjian ni rë cha cama cafaha me. ⁵² Peru cha vëhë ne, cama cavanga cha tu quixti ni.

Ficojo cha Jesús xcun nahmi xi matitjun

⁵³ Hya xi camá ne, quijicojo xuta jan Jesús xcun nahmi xi matitjun. Hane xi cafehe cha cojo Jesús jan ne, sehe camatangun yëjë ni nahmi xi matitjun cojo xuta changá cojo cha maestru tséhë ley. ⁵⁴ Ngajan xi cha Pedru ne, quijitjengui cha Jesús tu cjin tu cjin ni. Cafehe cha hiscan ndatsen ndava nahmi xi matitjun jan. Hane ngajan cavéjña cha cojo cha nísë tjehen ndava ndihi, tsihasu rë cha yojo rë cha cojo cha nísë jan.

⁵⁵ Hane nahmi xi matitjun jan cojo yëjë sa xuta xi matitjun ne, cavangui me xuta xi tsinguixi jyé rë Jesús, cojo sa xi cuma tsiquehen me me. Peru tsajin mé jyé rë Jesús casacu rë me. ⁵⁶ Ha ndasa jemu cjin xuta xi cavinchajyé me Jesús ne, peru suva cjuandesu yëjë ni cjuá xi cachja me ta, hacjahi chja ngu ne, hacjahi chja ngu. Hacuiin tangun má cjuá rë me. ⁵⁷ Ngujo me ne, chja me ta cahndë me xi cuitjin cachja Jesús: ⁵⁸ “Ngahan ne, tsinguétsun yungun xi matitjun xi casahmi xuta vë, hane cahntsua xi jyan nixtin ne, sahme nga ngu. Peru hacuiin cojo tsja xuta xi cuma hya.” Cuahaxutjin cahndë me xi cachja Jesús. ⁵⁹ Hisca me xi cuacun jan ne, hacuaha hacuiin tangun camá cjuá rë me.

⁶⁰ Ngajan xi nahmi xi matitjun tséhë nahmi xi yahnga jan ne, casecunvasen me, hane sehe cavinenguise me Jesús cuitjin:

—¿Há chjayinguiin hisca xi ngu cjuá tséhë jyé riji xi vincha xuta xi cuicun vi?
—Cuatjin cachja me.

⁶¹ Hane Jesús ne, tu jyuu ni casecun me. Hisca ngu cjuá cafayanguin me. Hya xi camá ne, cavinenguise nga nahmi xi matitjun jan ngu ndiya cojo Jesús cuitjin:

—¿Há ngaye xi Quihndi rë Nina naja? ¿Há ngaye xi catsingatju me xi cumá titjun tsijin?

⁶² Ngajan xi cafayanguí Jesús cuitjin:
—Juun, ngahan. Hacuaha cjuhe nixtin xi chutsujun ná xi tejña ladu quixi tséhë Nina. Hacuaha chutsujun ná xi cuinduva ngajñi rë yufí, xi cuya nga tséhë Nina.

⁶³ Hane ngajan xi nahmi xi matitjun jan ne, jemu camacjan rë me ne, hisca tsjian rë me cavicheya me. Hane cuitjin cachja me:

—¿Mé sa cjuá xi mameje? ⁶⁴ Ngayun ne, ha canuhyun hacutjin xi tsixcuehyu cha Nina. ¿Mé xi nújun quihndë?

Ngajan xi yëjë xuta jan ne, cachja me ta meje rë xi cueya Jesús.
⁶⁵ Hane cavetsihin ngujo me cavéhë natya me Jesús. Hane hacuaha cavatsa me xcun Jesús, sehe cavetsihin cavaja me. Sehe ngajan xi cachja me cuitjin:
—Tinoje yo xi cavaja ri.

Hya xi camá ne, cavetsihin xi cha nísë jan ne, jemu cavaja cha me.

Pedru ne, fahma me Nai naja

⁶⁶ Jinguyëjë rë xi cuatjin tijima ne, cha Pedru ne, tacun cha ndatsen ndihya. Hya xi camá ne, hora vëhë canduva ngu na xi sahmi xa ndava nahmi xi matitjun jan. ⁶⁷ Hane cavéë na xi tacun cha Pedru tsihasu rë cha yojo rë cha hiscan tacun ndava ndihi. Hane casecun na cafahacuenda na cha. Sehe ngajan xi cachja na cojo cha cuitjin:

—Ngayun ne, ladu rë Jesús tséhë nandya Nasaret ngayun.

⁶⁸ Ngajan xi cachja cha Pedru cuitjin:
—Hisca hveen mé xi noje.

Hya xi camá ne, sehe cavetju cha quiji cha casecun cha hiscan tu cuiseen ni tséhë ndatsen ndihya.⁶⁹ Hane ngajan xi na xi sahmi xa tséhë nahmi jan ne, cafahacuenda nga na cha hiscan quisecun cha. Hacuaha cavetsihin nga na cachja na cojo xuta xi hinchacun jan cuitjin:

—Cha vëhë ne, ladu rë Jesús má cha.

⁷⁰ Xi tu cahndë cha Pedru xi cuatjin cachja na jan ne, ngutjen cafayangui cha xi quixiin xi chja na. Xi cafë ngu hora lihndi ne, hacuaha cachja xuta xi hinchacun jan cojo cha cuitjin:

—Quixi jain xi ladu rë Jesús má ngaye ta distritu Galilea ne, ngajan nangui riji.

⁷¹ Sehe ngajan xi hisca Nina caveyanangui cha Pedru ne, cachja cha xi hvíin cha me, cuitjin cachja cha:

—Vëe Nina jain xi hveen yo me xi nújun vë.

⁷² Hane hora vëhë ne, cajihnda xahnda. Hya xi camá ne, catsinguitsjen cha Pedru cjua xi cachja Jesús cojo cha xi cachja me cuitjin: “Chaja sa xi squihndajo xahnda ne, ngaye ne, ha jyan ndiya cuinoje xi hyiin yo ngahan.” Hora xi catsinguitsjen cha cjua vëhë ne, cajihnda cha.

15

Ficojo cha Jesús xcun Pilatu

¹ Hya xi casahasen xi camá nchujun jan ne, camatangun nga nahmi xi matitjun cojo xuta changá cojo cha maestru tséhë ley cojo yahnga sa xutaxa rë xi hinchajñi me. Sehe catsihñu me Jesús ne, sehe quijicani me xcun gobernador xi hmí rë Pilatu. ² Xi cafehe me cojo Jesús xcun Pilatu ne, sehe cavinenguise Pilatu cojo Jesús cuitjin:

—¿Há ngaye xi matitjun ngaye tséhë xuta nangui Israel?

Ngajan xi cafayangui Jesús cuitjin:

—Cuatjin sacuaha canújun vë.

³ Hane ngajan xi nahmi xi matitjun jan ne, jemu cjín xcusun jyé xi cavincha me tséhë Jesús. ⁴ Ngajan xi Pilatu ne, cavuya cavinenguise nga me Jesús cuitjin:

—¿Há chjayinnguiin camahani? Jercu cjín jyé riji cavincha me.

⁵ Peru Jesús ne, ha quihndë cafayinnguiin camahani me. Hane Pilatu ne, jemu quijircun camahani rë me.

Hacuïn Jesús ta Barrabás mandaya

⁶ Suhi vëhë ne, Pilatu ne, ha tuxa xcusun rë me xi nu nu ni vëhëndaya me ngu presu xi meje rë xuta xi cumandaya. ⁷ Ndavaya ne, jiya ngu presu xi hmí rë Barrabás cojo ngujo sa presu xi catsiquehen rë xuta tséhë ngu si. ⁸ Hya xi camá ne, canduva xutacjín ne, cafehya me cojo Pilatu xi sahmi me vëhë sacuatjin xi ha xcusun rë me. ⁹ Ngajan xi cachja Pilatu cojo rë xuta jan cuitjin:

—¿Há meje nuju xi cuáxë cha xi matitjun tsujun?

¹⁰ Cuatjin cachja Pilatu ta tséhë xi ha vëe me xi ngatsë rë cjuixin sahmi nahmi xi matitjun jan cojo Jesús, vëhë xi quijicani me Jesús ngajan. ¹¹ Peru nahmi xi matitjun jan ne, quiji cavinchangui me xutacjín jan xi meje rë me xi cuichja xuta jan xi catéhëndaya Pilatu Barrabás. ¹² Ngajan xi cavinenguise nga Pilatu cojo xutacjín jan cuitjin:

—¿Mé sahme cojo cha xi nújun xi matitjun tsujun ni?

¹³ Ngajan xi xuta jan ne, cuitjin jercu cachja me:

—Tetuhun cha xcun cru.

¹⁴ Ngajan xi cachja Pilatu cojo rë me cuitjin:

—Peru ¿mé xi chocho casahmi cha?

Peru xuta jan ne, hitsë sa rcu cachja me cuitjin:

—Tetuhun cha xcun cru.

¹⁵ Hya xi camá ne, ta meje rë Pilatu xi cumangucacun xuta ne, cavëhëndaya me Barrabás. Hane xi cavatju catsingatju me Jesús casehen rë ne, sehe cavuya casua nga me cojo cha sindadu xi cje cuetaha cha me xcun cru.

Jesús ne, quisun ngu corona tséhë nahya rcu me

¹⁶ Hya xi camá ne, quijicojo cha Jesús taha cahntsua hnchua hiscan ndatsen ndava Pilatu. Hane sehe casahmi tangun sa cha yéjë sindadu cjín. ¹⁷ Hya xi camá ne, cavaxé cha tsjian rë Jesús, hane sehe catsicaja cha me ngu tsjian hani. Hacuaha catsihya cha ngu corona nahyá xi cavesun cha rcu me. ¹⁸ Sehe cavetsihin cavincha cha viva rë me xi tsixcuehyu cha me, sacuaha xi macjain rë me xi me vëhë matitjun me tséhë xuta tséhë nangui Israel.

¹⁹ Hya xi camá ne, sehe cavaja cha ngu rquí ya rcu me. Cavéhë natya cha me. Hacuaha cavixuhnchi cha xcun me, sacuaha xi faharcun cha me. ²⁰ Hya xi cajnetaha catsixcuehyu cha me cuatjin ne, sehe cavaxé cha tsjian hani xi catsicaja cha me, hane sehe cavuya catsicaja nga cha me tsjian rë me xi tséhë jain me. Hya xi camá ne, sehe quijicojo cha me xi cuetaha cha me xcun cru.

Cavetaha cha Jesús xcun cru

²¹ Ndiya cjui cha cojo me ne, cavechutaha cha ngu xuta changá xi hmí rë Simón tséhë nandya Cirene, nahmi rë cha Alejandru cojo cha Rufu. Nduva me xi quiji me nguijña. Hane xi cavechutaha cha me, casahmi cha me ngujyé xi cuesuntyja me cru rë Jesús. Hya xi camá ne, cavesuntyja me, sehe quiji me cojo.

²² Sehe cavechu yéjë xuta jan hiscan xi hmí rë Gólgota, cjua xi meje cuichja Naxi Nínda Rcuun. ²³ Sehe xuta jan ne, tisua me xan rë uva xi tecjan rë nandá rë tyjungunsa xi cuihi Jesús, peru cahviin me. ²⁴ Hya xi camá ne, cavetaha cha me xcun cru. Hane tsjian rë me ne, cavincha rë cha ngu suerte ne, sehe cumatsejen mé xcusun tsjian rë me xi satë rë xingu xingu cha.

²⁵ Hya ne, chuva rë fane ñaja tséhë nguitajñu. ²⁶ Hane camahindu ngu letreru cojo jyé rë me xi chja cuitjin: “Me xi Matitjun tséhë Xuta nangui Israel.” Sehe quiji casetaharcu cru. ²⁷ Hacuaha cavityangui cha ngu chéjë ngu ladu rë tjehen rë me, jimangu cojo cru rë. ²⁸ Cuatjin cavetjucaa cjua xi camahindu xcun xujun rë Nina xi chja cuitjin: “Cuichja xuta ta me vihi ne, ngu xuta tsehen me.”

²⁹ Hya xi camá ne, xuta xi cavatju jan ne, xi catsixcuehyu me Jesús ne, catsiniya me rcu me, hacuaha cuitjin cachja me:

—Canoje xi cuma ningueltsin yungun xi matitjun, hane cahntsua xi jyan nixtin ne, cama nga canindeje sove. ³⁰ Quihndë ne, sá cuatjin cuma nihni ne, naxetje sove yojo riji, titujni tséhë cru vë. —Cuatjin cachja xuta.

³¹ Ha chuva vëhë ni, cavisajmi nahmi xi matitjun cojo cha maestru tséhë ley ne, ngajni rë me cojo xicjin me xi tsixcuehyu me Jesús. Cuitjin chja me:

—Cavaxétje cha xuta, peru quihndë ne, maji vaxétje cha yojo rë cha. ³² Sá xi hacui jain cha xi catsingatju Nina xi cumatitjun tsajan ne, catitujne cha tséhë cru chutsejen, cojo sa xi cumacjain naja tséhë cha. —Cuatjin cachja me tséhë Jesús.

Hacuaha cha chéjë xi cojo xtyangui taha cru jan ne, cojo cha choho cachja cha tséhë me.

³³ Xi camanchisen tséhë nixtin vëhë ne, jingujyé ni ladu vëhë ne, camajñu. Jyan hora quijicani rë. ³⁴ Xi cafë jyan hora vëhë ne, jercu cajindaya Jesús, cachja me hne rë me cuitjin:

—Eloí. Eloí, ¿lama sabactani? —cjua xi meje cuichja cuitjin: Ngayun, Nina naha, ¿má canismutacun ná?

³⁵ Hane ngujo xuta xi hinchacun jan ne, xi cavijniinrcu me hne rë Jesús ne, xi má rë xuta jan ne, nima Elías, ngu profeta tséhë nixtin hatséé, jindaya Jesús me.

³⁶ Hane sehe cavanga ngu me quiji catsicahnchi me ngu tsjian hinda cojo xan rë uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechanyan hitsé ne, ¿há cuinduva jain Elías tsitujne me Jesús tséhë cru?

³⁷ Peru Jesús ne, hora vëhë jercu cajindaya me, hane cahme me. ³⁸ Hacuaha hora vëhë ni ne, tsjian nduju xi tyjangui cahntsua yungun xi matitjun ne, hisca rcu hiscan ntsacu

canduva catiyavasen. ³⁹ Hya xi camá ne, ngu cha capitán tséhë sindadu xi secun tiña cru hisca tyjangui Jesús jan ne, xi cavëe cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quihndi rë Nina me.

⁴⁰ Hacuaha hinchacun sa ngujo yachjin, vutsejen na tséhë cjin ni. Ngajñi rë na xi cuacun vëhë ne, quisecun na Salomé cojo na María tséhë nandya Mágdala cojo na María naa rë cha Jacobo lihndi cojo cha José. ⁴¹ Na yachjin xi cuacun vë ne, cojo na cavisecoo na catsindaja na xi cajinë Jesús cojo cha ladu rë me, hya xi catsuyiyhiya me ngajan ladu tséhë distritu Galilea. Hacuaha jercu cjín sa yachjin hinchacun na jan xi hacuaha cojo na quiji na ngajan nandya Jerusalén cojo Jesús.

Jesús ne, caseya me tsjun rë me

⁴² Nixtin xi cahme Jesús ne, hacuaha hya vispra tséhë nixtin xi chjahájenda rë. Hane xi quiji hora jan ne, ⁴³ ngu xutaxa rë xi tjemu chjahanrcun rë, xi hmí rë José tséhë nandya Arimatea, me xi hacuaha tacunya nixtin xi cjuehe Nina cuma titjun me tséhë yéjé Israel, cavejñahñu me cjuatacun rë me sehe quiji me ndava Pilatu. Hane cafehya me cahndé cojo Pilatu xi cjuahaxin me nima Jesús. ⁴⁴ Hya xi camá ne, Pilatu ne, quijircun rë me xi cuatjin cachja José xi ha cahme nima ta, tséhë xi cjëe jyë hora xi casetaha Jesús xcun cru. Hane vëhë xi catsingatju me quiji chjaha rë cha capitán. Hane sehe cavinenguise me cha sá xi quixi xi ha cahme Jain Jesús. ⁴⁵ Xi tu camachaya rë me cjua tséhë cha capitán jan xi ha cahme Jain Jesús ne, sehe ngajan xi cachja me cojo José ta cuma cjue tsitujne me nima.

⁴⁶ Ngajan xi José ne, vëhë ta cavatsë me ngu tsjantë xatsë ne, sehe quiji catsitujne me nima Jesús tséhë cru, sehe cavaxtë rë me tsjian jan. Hane sehe cavaha me nima quijicojo me hiscan tacun rë me ngu tsjun xi cafahanguitaha me cahntsua ngu naxi. Hane ngajan caveya me nima. Sehe catsindefajne me ngu ndyojo jyë xi cavechja rë tingotjo tsjun jan.

⁴⁷ Hane na María tséhë nandya Mágdala cojo na María naa rë cha José ne, cavëe na hiscan caseya nima.

16

Vuya nga Jesús cjuahñu

¹ Xi camá nguixun tséhë nixtin xi chjahájenda rë jan ne, na Salomé cojo na María tséhë nandya Mágdala cojo na María naa rë cha Jacobo ne, cavatsë na rqui xi ndaja jne xi cuitejnu na nima. ² Xi casahasen domingu ne, hora xi tivetjucaa tsuhi ne, cavatju na yachjin jan quiji na hiscan tacun tsjun rë nima. ³ Hane ngajñi cjui na jan ne, ngajan xi chja na cojo xicjin na cuitjin:

—¿Yo cuiseeco naja xi nindefajne ndyojo xi quitaha tingotjo rë tsjun jan?

⁴ Peru xi tu cafehe na jan ne, ndyojo jyë xi quitaha tingotjo rë tsjun jan ne, ha quihndé tsajin quitaha cahndé rë ta ha xin jiña. ⁵ Xi cavisehen na cahntsua tsjun jan ne, cavëe na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na. ⁶ Ngajan xi cachja cha cojo rë na cuitjin:

—Xicarcuun. Ngahan ne, ha hvë xi Jesús tséhë nandya Nasaret vinchunsun me, me xi cavetaha xuta xcun cru. Peru me vëhë ne, tsajin me nguehe ta cavuya cjuahñu rë me. Chutsujun cahndé hiscan xi cafaña xuta me. ⁷ Quihndé ne, tjangun sanii ne, tinújun cojo cha ladu rë me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuhatjin xi ha cachja me cojo nuju.

⁸ Xi tu cavetju na tséhë tsjun jan ne, ña fatsë na xi jemu catsacjun na camá. Hane vanga sanii na cafe na. Hane hisca xi ngu cachjaain na cojo, tséhë xi jemu catsacjun na camá.

Jesús ne, ñahñu ni camatsejen me na María Magdalena

⁹ Jesús ne, xati camaha sa tséhë nixtin domingu ne, hya cavuya cjuahñu rë me. Hya xi camá ne, tjun sa na María tséhë nandya Mágdala cavëe na me, na xi cavaxë me yatu xitsehen xahasen rë hatsëe. ¹⁰ Hane na vëhë quiji quicun na xuta ladu rë me xi jemu

jihnda tséhë cjuachoho. ¹¹ Hane xi cahndë me cjua ta Jesús tacun nga me cjuahñu hane na vëhë ne, cavëë na me, camacjaain rë xuta jan.

Hya xi cavuya Jesús cjuahñu ne, jo cha ladu rë me cavëë cha me

¹² Hya xi cavatju vëhë ne, jo cha ladu rë Jesús ne cjui cha nguijña. Hane cojo Jesús cjui me cojo cha, peru ha ngu xcusun jyihi me. ¹³ Hane cha xi cuacun jan ne, xi tu cavëë cha xi hacui me ne, cavuya cha ne, quiji cachja cha cojo cha xi yahnga xi cavëë cha me. Peru hacuaha camacjaain rë cha xi yahnga jan.

Jesús ne, casuaxa me cha apóstol

¹⁴ Ngu ndiya nga ne, cafehe nga me hiscan siu cha ladu rë me xi tengu jan, tijinë cha niñu. Hane cachjataha me yëjë ni cha ngatsë rë xi jemu taja rcu cha, tséhë xi camacjaain rë cha tséhë xuta xi cavëë rë me xi tacun nga me cjuahñu. ¹⁵ Cavatju cacjan me cojo cha ne, sehe ngajan cavetsihin cachja me cojo cha cuitjin:

—Tangún jingujyë ni ngasunhndë ne, tinújun cojo yëjë ni xuta cjua rë Nina. ¹⁶ Yo xi cumacjain rë cjua vëhë hacuaha xtenda ne, cuechu xcun Nina. Yo xi cumacjaain rë ne, cuechu me castigu xi sahmi Nina xi cueyun. ¹⁷ Hane xuta xi cumacjain rë me ne, sahmi me xcusun vihi xi cueyanangui me ñihi naha ne: cuma cuaxë me xitsehen xi hincha xahasen rë xuta; cuma cuichja me ngu ngu xcusun hne; ¹⁸ yë ne, sá xi cjuahatsja me chu, o sá xi cuihi me ngu venenu ne, tsajin mé cumá rë me; hane tu cuetahatsja ni me xuta hmu rë ne, cumandaja xuta hmu rë jan.

Jesús ne, cjuinji me ngahnga

¹⁹ Xi cajnetaha cachja Jesús, me xi Nai naja, cojo cha ladu rë me cjua vëhë ne, quiji me ngahnga, cavéjña me ladu quixi tséhë Nina. ²⁰ Hane cha ladu rë me ne, cavetju cha quiji cha, cachja cha cjua rë Nina yëjë ni ladu. Hacuaha Nai naja ne, caviseoo me cha. Hane ngatsë rë xcusun xi cavëë xuta xi casahmi cha jan ne, vëhë xi tsejen xi quixi cjua xi cachja cha.

Cjuandajyihi Xi Catsihindu San Lucas Tsëhë Jesucristu

¹ Jemu cjín xuta xi ha catsihindu me cjua xi chja tsëhë yéjë xcusun xi sehe casahmi Nina ngajñi naja ngayaan xuta ngasunhndë. ² Meje tsihindu me cjua vëhë sacuatjin camahani casua camachaya naja me xi cavéendaja cojo tuxcun hisca ntsacu cavetsihin sehe cafahaxa me xi tsinguitsojo me cjua jan. ³ Hisca hatsëe ne, ngahan ne, hacuaha ha jemu ndaja cavinenguësë yéjë ni hacutjin camá. Vëhë xi xi má ná ne, hacuaha ndatjin xi tsihindu chichihin nuju cjua tsëhë yéjë hacutjin camá, ngayun tatá Teófilo, ⁴ cojo sa xi sacúndaja nuju cjuaquixi tsëhë cjua xi ha camachaya nuju jan.

Cafehe cjua xi tsin Juan Vitenda rë Xuta

⁵ Nixtin hya xi Herodes cavitexa me yéjë ni xuta tjë rë Israel ne, cavéjña xu ngu nahmi xi hmí rë Zacarías, me xi má ladu rë Abías. Hane chjuun rë Zacarías ne, Elisabet hmí rë me, hacuaha tjë rë Aarón xu má me. ⁶ Hane Zacarías cojo Elisabet ne, tyjahi cjuatacun rë me xcun Nina ta, tsëhë xi tsajin xu jyé rë me xi tisahmichihin me yéjë ni sacuatjin cavitexa Nina. ⁷ Hane tsajin rë me quihndi ta, tsëhë xi Elisabet ne, hatuxa maji xu sacu rë me quihndi, hacuaha catsijo ni me ne, ha jemu changá xu me.

⁸ Hya xi camá ne, cavechú nixtin xi casatë rë Zacarías cojo yéjë sa nahmi xi má ladu rë Abías xi sahmi xu me xá xcun Nina xi má me nahmi. ⁹ Hane sacuaha xcusun rë nahmi ne, catsintsavë xu me ngu suerte cojo sa xi cuma tsejen ne, jarë xu me xi satë rë xi cuisehen ndava Nina, cuaca tyjungunsa. Hya xi camá ne, casatë xu rë Zacarías. ¹⁰ Hane yéjë xutacjín jan ne, caviyuju xu me candatsen sahmi me oración rë me, hora xi tivaca xu Zacarías tyjungunsa cahntsua ndava Nina. ¹¹ Hane hora xi tivaca me tyjungunsa jan ne, camatsejen xu ngu ángel secun taha ladu quixi tsëhë ngasunscun hiscan xi tí tyjungunsa. ¹² Hane xi cavéë Zacarías ángel jan ne, jemu quijircun rë me hacuaha jemu catsacjun xu me camá. ¹³ Ngajan xi ángel jan ne, cuitjin xu cachja cojo rë me:

—Xicarcuiin ngaye Zacarías ta, cjua xi cachjahye ne, cahndë Nina. Vëhë xi na Elisabet chjuun riji ne, sacú rë na ngu quihndi, hane quihndi vëhë ne, Juan tehe ñihi rë. ¹⁴ Hane jemu cjue ri cjuasua hacuaha jemu ndaja cuma ri, hacuaha jemu cjín xuta xi jercu tjin rë me cjuasua xi catsin quihndi vëhë ta, ¹⁵ tsëhë xi jemu jyé hnga cuma cojo cjuatacun rë ngajan xcun Nina. Hacuaha cuiin camahani xan hacuaha cuiin camahani nandá machihi. Hacuaha hisca hya xi caseya quihndi vë cahntsua naa rë ne, Hasen rë Nina quitsë rë xahasen rë. ¹⁶ Hacuaha quihndi vëhë sahmi xi jemu cjín xuta tjë rë Israel cuya nga me ndiya rë Nina rë me. ¹⁷ Quihndi vë ne, vëhë cuinduva titjun, sehe cuinduva Nina. Hane sacuatjin jyé hnga profeta Elías cojo cjuatacun rë me hatsëe nixtin ne, hacuanitjin ni jyé hnga cuma quihndi vëhë cojo cjuatacun rë, cojo sa xi quihndi vëhë ne, sahmi xi cuya cuma ndaja cacun nga yéjë ni nahmi rë nixti cojo nixti rë me, hacuaha sahmi xi yéjë xuta xi vihndiin me tsëhë Nina ne, cuma tangun cjuatacun rë me cojo cjuatacun rë xuta xi tyjahi cjuatacun rë me. Hane cuatjin chuva vëhë ne, cuéhëchjine quihndi vëhë xuta xi cuihndë me tsëhë Nina. —Cuahaxutjin cachja ángel.

¹⁸ Sehe ngajan xi Zacarías ne, cuitjin xu cavinenguise me ángel:

—¿Hacutjin sacú ná cjuaquixi xi cuatjin Jain cuma ni? ta ngahan ne, ha jemu changá ngahan, hacuanitjin ni chjuun naha ta jemu changá na. —Cuahaxutjin cachja me.

¹⁹ Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan; ngahan xi tejña ngajan xcun Nina. Hacuaha ngahan xi catsingatju ná Nina xi cuiisiajme cojo ri hacuaha suá cumachaya ri cjuandajyihi vëhë.

²⁰ Chutsijin ni, quihndë ta camacjaain ri tsëhë cjua xi cachjá cojo ri ne, cumaji cuinoje, tsëhë xi cuma lihmi ngaye hisca hya xi cuetjucaa cjua xi cachjá cojo ri. Cjua vëhë ne, hatuxa cuetjucaa hya xi cuechú nixtin rë. —Cuahaxutjin cafayangui ángel.

²¹ Jinguyëjë rë ne, xutacjín jan ne, jercu siuya xu me Zacarías, hisca fircun rë me tsëhë xi cuatjin jercu vindeya rë Zacarías xi cavisehen xu me ndava Nina. ²² Hane hya xi cavetju

me ne, maji xu chja me cojo xuta. Hane xuta jan ne, cavacun rë me ta Zacarías ne, tjin mé xi cavëe me. Hacuaha tu tisahmitsja ni me ta, tsëhë xi lihmi cuaha xu me. ²³ Hya xi cavatju nixtin xi satë rë me xi sahmi me xá xi má me nahmi ne, cavuya cafe xu me ndava me.

²⁴ Hya xi camá ne, xi cavatju sa nixtin ne, casacu xu rë chjuun rë me quihndi, hane cahntsua hñú sá xi jiya quihndi rë Elisabet jan ne, cuatjin caseyahma xu me ndava me. Hane cuitjin xu cachja suvá me: ²⁵ “Cuitjin casahmi Nina cojo ná ngu cjuandaja, quihndë xi camayuma rë me ngahan hane cafahaxin me cjuasava xi má ná ngajñi rë xuta tsëhë xi sacuiin ná quihndi.” Cuahaxutjin cachja me.

Cafehe cjua xi tsin Jesucristu

²⁶ Xi ma jyun sá xi jiya xu quihndi rë Elisabet ne, catsingatju Nina ángel xi hmí rë Gabriel ngu nandya xi hmí rë Nasaret, tsëhë distritu Galilea, ²⁷ ndava ngu chjuun xungun xi hmí xu rë María. Hane María jan ne, tacunvasen cjuavixan rë me cojo ngu xihin xi hmí rë José, ngu me xi tjé rë David, ngu xutachanga xi camatitjun xu tsëhë xuta tjé rë Israel.

²⁸ Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rë yéjë ni yachjin ne, ngaye xi jercu catsinchacun ri Nina. —Cuatjin xu cachja ángel.

²⁹ Xi cahndë xu María cjua xi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me. ³⁰ Sehe ngajan xi ángel ne, cuitjin xu cachja cojo rë me:

—Xicarcuiin María ta Nina ne, jemu tjin rë me cjuandaja cojo ri. ³¹ Quihndë ne, sacú ri ngu quihndi, hane hacuaha cuechú nixtin xi tsin ri quihndi vëhë. Quihndi vëhë ne, tehe ñihi rë Jesús. ³² Hacuaha jemu jyé hnga cuma cojo cjuatcacun rë, hacuaha Quihndi rë Nina xi Matitjun cjuahañihi. Hacuaha Nina sahmi me xi cuitexa quihndi vëhë sacuatjin cavitexa xutachanga rë, me xi hmí rë David. ³³ Hane vëhë cuitexa rë xuta tjé rë Israel, hane gubiernu rë ne, tsajin nu tsajin nixtin cuijnetaha. —Cuatjin xu cachja ángel.

³⁴ Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjëë sacú xihin naha. —Cuatjin xu cachja me.

³⁵ Hane xi cafayangui ángel ne, cuitjin xu cachja:

—Hasen rë Nina xi Matitjun ne, cuinduva cuaxtë ri sacuaha ngu tjahnguen. Vëhë xi quihndi xi tsin ri ne, hatuxa tyahi cojo cjuatcacun rë, hacuaha Quihndi rë Nina Jain.

³⁶ Hacuaha na Elisabet xinguin ne, handasa ha jemu changá na ne, hacuaha casacu rë na ngu quihndi. Ha quihndë jyun sá yaha na quihndi, na xi chja cjua xi hatuxa maji sacu rë quihndi. ³⁷ Cuatjin camá ta, xi cuma rë Nina ne, tsajin camahani mé xi cumaji cuma.

—Cuatjin xu cachja ángel.

³⁸ Ngajan xi María ne, cuitjin xu cafayangui me:

—Ngahan ne, sacuaha ngu hndixahan rë Nina ngahan. Catisahmi Nina cojo ná sacuatjin cjua xi canújun. —Cuatjin xu cachja me.

Ngaxtun vëhë ne, sehe cafe ángel.

Cavusehenya María Elisabet

³⁹ Nixtin hya ne, cavetju xu María, ngu quixi ni quiji me ngu nandya ngajan nangu ndetjún tsëhë distritu Judea. ⁴⁰ Hane xi cafehe me ngajan ne, cavisehen xu me ndava Zacarías, sehe cachja me nina cojo Elisabet. ⁴¹ Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina. ⁴² Hane sehe jercu hñu xu cachja me cjua vihi cojo María:

—Ngajñi rë yéjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri. ⁴³ ¡Mé má ngahan xi tu ngaye xi naa rë nai naha ngaye, ndove tichusihinye ná! ⁴⁴ Xi tu cahndë xi canoje nina cojo ná ne, hora vëhë cafiniya quihndi xi jiya cahntsua xi ndama rë. ⁴⁵ Jemu ndaja tsiji xi macjain ri xi yéjë ni cjua xi cachja Nina cojo ri ne, cuetjucaa jain. —Cuatjin xu cachja Elisabet.

⁴⁶ Sehe ngajan xi María ne, cuitjin xu cachja me:
 Ngahan ne, jercu sahme jyë sahme hnga Nina;
⁴⁷ hacuaha jercu ndama ná tséhë Nina, me xi vaxëtje ná.
⁴⁸ Casahmicuenda Nina ngahan, ngahan xi sacuaha ngu hndixahan rë me ngahan ta,
 quihndë cojo nixtin xi cjui sa ne, cuichja yëjë xuta xi siu cojo xuta xi sehe tsin sa xi jemu
 ndaja tsahan;
⁴⁹ tséhë xi Nina xi jemu jyë hnga me cojo ngahñu rë me ne, jemu vengui chji rë xcusun
 xi casahmi me cojo ná.
 ¡Jemu tyjahi me cojo cjuatacun rë me!
⁵⁰ Nina ne, hatuxa jemu tjin rë me cjuayumatacun cojo yëjë xuta xi faharcun rë me
 ha tucutjin cjín xuta tisetsin me jima ngundiya jima ngundiya.
⁵¹ Nina ne, sahmi me hacutjin xi meje sahmi me cojo ngahñu jyë xi tjin rë me:
 tsinguitojo me yëjë xuta xi jemu tjin rë cjuaxta cahntsua xahasen rë;
⁵² tsinguijne me xuta xi matitjun tséhë xcun xá rë,
 hacuaha sahmi yehe sahmi hnga me xuta yuma.
⁵³ Xuta xi machaja rë me ne, jemu yehe cjuandaja sua Nina me,
 pero xuta nchina ne, suvá tsja tiya me tsicuya Nina me cjue me.
⁵⁴ Nina ne, cuisecoo naja me ngayejen ni xuta tjé rë Israel, ngayaan xi tséhë me ngayaan,
 hacuaha tsinguitsjen me xi cumayuma rë me ngayaan.
⁵⁵ Xi cuatjin ne, cuetjucaa Jain sacuatjin xi ha cachja me cojo xutachanga naja Abraham,
 cojo yëjë sa tjé rë me.
 Cuatjin xu cachja María.
⁵⁶ Hya xi camá ne, María jan ne, cavéjña xu me jyan sá ndava Elisabet, sehe cavuya cafe
 me nangui rë me hiscan tjin ndava me.

Hacutjin camá hya xi catsin Juan Vitenda rë Xuta

⁵⁷ Quihndë ne, cavechú nixtin xi tsin rë Elisabet quihndi, hane catsin rë me ngu
 quihndi xihin. ⁵⁸ Xi camachaya rë yëjë xuta xi siu tahndee ndava me cojo yëjë xicjin
 Elisabet xi jercu camayuma rë Nina Elisabet ne, jercu ndaja camá rë me xingu xingu me
 cojo Elisabet. ⁵⁹ Hya xi camá xu ne, xi cavetjucaa quihndi jan jyin nixtin ne, cafehe nga
 me xi siu tahndee ndava me jan cojo xicjin Elisabet xi cuma suhi tséhë xi xtí chuxin rë
 quihndi. Hane meje suañihi me quihndi jan Zacarías, tséhë xi cuatjin hmí rë nahmi rë.
⁶⁰ Ngajan xi cachja xu naa rë quihndi jan cuitjin:
 —Hajín ta quihndi vi ne, Juan cjuahañihi. —Cuatjin xu cachja me.
⁶¹ Hane xuta jan ne, cuitjin xu cachja me:
 —Peru ngayun ne, tsajin hisca ngu xingun xi cuatjin hmí rë. —Cuatjin xu cachja xuta
 jan.
⁶² Ngajan xi xuta xi cuacun jan ne, tu casahmi tsjá xu ni me cojo nahmi rë quihndi xi
 cavinenguise me hacutjin meje rë nahmi rë quihndi xi cjuahañihi quihndi jan. ⁶³ Ngajan
 xi Zacarías ne, cafehya xu me ngu pizarra, sehe ngajan catsihindu me cjua vihi: “Juan
 cjuahañihi.” Cuatjin xu catsihindu me. Hya xi camá ne, yëjë ni me ne, jemu quijircun xu
 rë me. ⁶⁴ Hane hora vëhë ni ne, camá xu cachja Zacarías, hane jemu ndaja cavaxëndaja
 me Nina. ⁶⁵ Ngajan xi xuta xi siu tahndee ndava me jan ne, jemu catsacjun xu me
 camá, hane jinguijë ni ladu nangui ndetjún tséhë distritu Judea hiscan xi siu xuta ne,
 jercu cavisiajmi xu me tséhë cjuacjintacun vëhë. ⁶⁶ Hane yëjë xuta xi camachaya rë
 cjuacjintacun vëhë ne, jercu cjín catsingataha cacun me, hisca cachja xu me cuitjin:
 —¡Cuechú nixtin xi quihndi vi ne, cuma ngu xihin xi jyë hnga cojo cjuatacun rë!

Cuatjin xu cachja xuta xi cuacun jan ta, tséhë xi quihndi vëhë ne, Nina yahangui Jain
 me.

Cjua rë Nina xi cachja Zacarías

⁶⁷ Zacarías, nahmi rë quihndi jan ne, ña catsë rë me cojo Hasen rë Nina, hane cachja
 xu me cuitjin cjua xi cafahatsja me tséhë Nina:
⁶⁸ ¡Tjemu ndaja Nina naja ngayaan xuta tjé rë Israel!

tséhë xi cuinduva me cjuaha naja me xi cuma yaan xuta rë me.

⁶⁹ Nina sahmi me xi ngajñi rë tjë rë David, ngu xuta rë Nina ne, cuetujñi ngu xihin xi cuaxëtje naja,

⁷⁰ sacuatjin xi ha cachja profeta xi cavejña me tséhë Nina,
hya xi cachja me cojo xutachanga naja cjua rë Nina hatsëë nixtin.

⁷¹ Hacuaha cachja Nina xi cuaxëtje naja me tséhë condra naja,
hacuaha cuaxëtje naja me tséhë yëjë xuta xi choho vëë naja,

⁷² hacuaha cumayuma rë me tséhë xutachanga naja
hacuaha tsinguitsjen me compromisu ximininchacun xi casahmi me cojo xutachanga naja.

⁷³ Nina ne, cachja me: “Ngahan suva hvë”, hya xi casahmi me compromisu jan cojo xutachanga naja Abraham.

⁷⁴ Hya xi casahmi me compromisu vëhë ne, cachja me xi cuëhëndaya naja me tséhë condra naja,

cojo sa xi ngayaan ne, hacuiin cojo chircun chjahanrcun me ta

⁷⁵ chjahanrcun me cojo ngu cjuatacun tyjahi, xi tsajin jyé naja xcun me
hacutjin nixtin xi nechan xcun cjuahñu naja.

⁷⁶ Ngaye tsan ne, hacuaha cuma ngaye ngu profeta tséhë Nina xi Matitjun ta,
tséhë xi ngaye cuihintitjin, choxehe ndiya tséhë Nina,

⁷⁷ hacuaha tehe cumachaya rë xuta rë Nina xi cuaxëtje Nina me,
cuma cuinújan ne, tsinchataha me tséhë jyé rë

⁷⁸ ngatsë rë ta tséhë xi Nina ne, jemu tjin rë me cjuayumatacun cojo naja.

Hacuaha ngatsë rë cjuayumatacun vëhë ne, Nina tsingatju me tséhë ngahnga ngu xi
sacuaha tsuhi,

⁷⁹ cojo sa xi sua hasen rë ngajñi naja xi nechan cojo ngu cjuacjintacun jyé xi hisca
sacuinyiin naja hacutjin naxentjeen yojo naja,
ngayaan xi tjemu tsavi nechantahan tséhë cjuaveya,
hacuaha cojo sa xi cjuecojo naja
ndiya tséhë cjuajeya.

Cuatjin cachja xu Zacarías.

⁸⁰ Hya xi camá ne, quihndi jan ne, camajyé, hacuaha cavejñahñu xu cjuatacun rë. Hane
xi camá ngu xihin jyé ne, quiji cavéjña xu ngajan ngu xín camahani tséhë nandya, hisca
hya xi cavechú nixtin xi cavetsihin cachja cjua rë Nina cojo xuta tjë rë Israel.

2

Hacutjin camá hya xi catsin Jesucristu

¹ Cuitjin xu camá nga ngunixtin hya xi Herodes vitexa me xuta tjë rë Israel. Me xi
matitjun camahani xi hmí rë César Augusto ne, cavitexa xu me xi yëjë ni xuta xi siu
ngahma gubiernu rë me ne, cjue me cuiyujutahaxujun me xi cuechijite me. ² Hacuaha
hya xi cuatjin tjuntjun cavyujutaha xujun xuta ne, hya vitexa xuta Cirene ngajan distritu
Siria. ³ Ngajan xi yëjë ni xuta ne, quiji xu me cavyujutaha xujun me, jima ngu me hiscan
nangui rë xutachanga rë me.

⁴ Cuatjin camá xi José ne, cavitju xu me tséhë nandya Nasaret, distritu Galilea, quiji me
distritu Judea, nangui rë xutachanga rë me David, hiscan xi hmí rë Belén, tséhë xi José ne,
tjë rë David xu má me. ⁵ Quiji casetahaxujun tangun me cojo María, me xi tacunvasen
cjuavixan rë me cojo. Hane María ne, jiya xu quihndi rë me hya xi quiji me. ⁶ Hya xi
camá ne, jinguyëjë rë xi siutahá xu me ngajan ne, cavechú nixtin xi tsin xu quihndi rë
me, ⁷ hane catsin rë me ngu quihndi xihin, xi quihndi tjun rë me. Hane xi cavatju catsin
quihndi jan ne, sehe cafaha me cavaxtë me ngu tsjian, sehe cafaña xu me quihndi jan
cahntsua hiscan jineyá chu ta, tséhë xi casacuiin xu cahndé cahntsua ndihya xi cuiyuju
me, tséhë xi jemu quitsé camahani xuta.

Cachja ángel cojo cha xi sahmi cuidadu rë chu

⁸ Ha taha ladu vēhē ni ne, siutahá ngujo cha nguixun ngajan nguijña, xi sahmi cuidadu xu cha chu tsángá rē cha. ⁹ Hya xi camá ne, ha tu ñahñu camatsejen xu ngu ángel tséhë Nina hiscan xi siutahá cha, hane hora vēhē ni ne, hasen ndajiyihi rē Nina ne, jercu casahmi hasen xu rē jingujyé ni hiscan xi siutahá cha, hane jemu catsacjun camahani cha camá. ¹⁰ Ngajan xi cachja xu ángel cojo cha cuitjin:

—Xicarcuun ta, nguehe nduva tisuá cumachaya nuju ngu cjuandajiyihi xi hisca yéjë xuta tjé rē Israel jercu ndaja cuma rē me ¹¹ ta nguehe Belén, nangui rē xutachanga nuju David ne, quihndë catsin ngu quihndi xi cuaxétje nuju, quihndi xi Nina catsingatju rē xi cumatitjun tsujun. ¹² Hane cuitjin sacú nuju cjuauquixi tséhë cjua xi cachjá cojo nuju vë: xi cjuhun jan ne, cuechun hiscan xi chun ngu quihndi tixtë rē tsjian, jiña cahntsua hiscan jineyá chu. —Cuatjin xu cachja ángel.

¹³ Hane ha tu ñahñu camatsejen sa jercu cjín camahani ángel xi nduva xu ngahnga, cafehe hiscan xi secun ángel xi cafehe titjún, tivaxéndaja rē Nina cojo cjua vihi:

¹⁴ ¡Jemu jyé hnga Nina cojo Hasen rē me ngajan ngahnga!

¡Hane nguehe nangui ne, cuisehen cjuajeya rē Nina cahntsua xahasen rē xuta xi chuya rē Nina tséhë!

Cuatjin xu cachja ángel cjín jan.

¹⁵ Hya xi camá ne, hya xi cavuya quiji nga ángel jan ngahnga ne, cha xi sahmi cuidadu chu tsángá rē jan ne, cuitjin cachja cha cojo xicjin cha:

—¡Cjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

¹⁶ Hya xi camá ne, ngusun xu ni cafe cha, hane xi cafehe cha nandya ne, casacuse rē cha hiscan tacun María cojo José, cojo quihndi jan, jiña cahntsua hiscan jineyá chu. ¹⁷ Hya xi cavëë xu cha quihndi jan ne, sehe cavetsihin casuacuenda cha yéjë cjua xi cachja ángel cojo rē cha tséhë quihndi vëhë. ¹⁸ Hane xi cahndë xuta cjua xi cachja cha xi cuacun jan cojo rē me ne, jemu quijircun xu rē me. ¹⁹ Peru María ne, cavetjo cavetjo ni me yéjë ni cjua vëhë cahntsua xahasen rē me, hacuaha jercu cjín xu catsingataha cacun me. ²⁰ Hane xi cavuya quiji nga cha xi sahmi cuidadu chu rē jan ngajan nguijña ne, taha tisahmi jyé tisahmi hnga xu cha Nina hacuaha taha tivaxéndaja cha me tséhë yéjë cjua xi cahndë cha cojo xcusun xi cavëë cha, sacuatjin cachja ángel cojo rē cha.

Quiji caningacun rē Jesucristu cojo Nina ngajan Jerusalén

²¹ Xi cavechú xu jyin nixtin quihndi ne, hacuaha hatuxa hya cavechú nixtin xi xtí chuxin rē, hane cuatjin camá cojo quihndi. Hacuaha Jesús cafahañihi xu quihndi, ñihi xi ha cachja ángel hisca chaja sa xi seyahma quihndi cahntsua naa rē.

²²⁻²⁴ Hya xi camá ne, xi cavechú xu nixtin xi cjue naa rē quihndi yungun xi matitjun cojo quihndi xi cuma tyjahi me xcun Nina tutjin chja ley rē Moisés ne, quiji José cojo María Jerusalén, quiji cani me ngu cjuatjo ta, tséhë xi chja ley rē Nina ta meje rē xi cjue jo chu tucjin, o sá xi jo chu paloma chihndë. Hacuaha quijicojo xu me quihndi jan Jerusalén xi tsingacun me quihndi jan cojo Nina. Quitahá xujun xcun ley rē Nina xi yéjë ni quihndi tjun xi xihin ne, hatuxa tséhë Nina cuma.

²⁵ Cavéjña xu ngu xihin xi hmí rē Simeón ngajan Jerusalén. Xihin vëhë ne, tyjahi xu me cojo cjuatcacun rē me ngajan xcun Nina, hacuaha jemu faharcun me Nina. Hacuaha jemu meje xu rē me xi cjuehe xuta xi yaha cjuetacun jan xi cuma rē xuta tjé rē Israel. Hacuaha Hasen rē Nina ne, jiya cahntsua xahasen rē Simeón. ²⁶ Hane Hasen rē Nina jan ne, casua xu camachaya rē me xi jinguyéjë rē xi cjéë scuëë me xuta xi tsingatju Nina jan ne, hatuxa cueyaaín xu me. ²⁷ Hane quiji me yungun xi matitjun, tséhë xi cuatjin cachja Hasen rē Nina cojo rē me. Hacuaha xutacha rē quihndi xi hmí rē Jesús jan ne, quijicojo xu me quihndi jan yungun vëhë, xi sahmichihin me sacuaha xcusun xi vitexa ley rē Moisés hacutjin cuatju quihndi cuma. ²⁸ Hya xi camá ne,cafaha xu Simeón quihndi jan cavataha me, sehe hacuaha cavaxéndaja me Nina cojo cjua vihi:

²⁹ Ngayun Nina naha, ngayun ne, ha cuma tuhun cahndé xi ngahan hndixahan nuju ne,
cueya cojo cjuandaja cojo cjuajeya
sacuatjin xi ha canújun.

³⁰ Cuma cueya ta, tséhë xi quihndé ne, cahvë suva xuta xi caningatjun xi cuaxëtje niji,

³¹ me xi caningatjun xcun cojo xcun yëjë ni xuta,

³² me xi cuinduva sacuaha ngu ndihi xi sua me cjuahasen xi cuma rë xutaxín,
hacuaha cuinduva me xi sahmi yehe sahmi hnga niji me, ngayin xuta nuju, xuta tjë rë
Israel.

Cuatjin xu cachja Simeón.

³³ Hane xutacha rë quihndi jan ne, jemu quijircun xu rë me tséhë xi cuatjin cachja
Simeón tséhë quihndi jan. ³⁴ Hane Simeón ne, catsinchacun me me xi cuacun jan, sehe
cachja xu me cojo María naa rë quihndi jan cuitjin:

—Quihndi vihi ne, hacuaha sahmi xi jemu cjín xuta tjë rë Israel chajá me, hacuaha
sahmi xi jemu cjín xuta tjë rë Israel cuetjutje me. Hacuaha quihndi vihi ne, sua
cumachaya rë xuta mé xi meje rë Nina, hacuaha jemu chocho cuichja xuta tséhë quihndi.

³⁵ Cuatjin cuma cojo sa xi ngajan sesunhngatsejen yëjë hacutjin xi tsingataha cacun jemu
cjín xuta cojo cjuatacun rë me. Hacuaha ngayun ne, jercu cuma rë xahasen nuju, sacuaha
xi quicha casehen rë xahasen nuju. —Cuatjin xu cachja Simeón.

³⁶ Hacuaha tacun xu ngu chjuun xi hmí rë Ana ngajan yungun, quihndi rë Fanuel, tjë
rë xutachanga xi hmí rë Aser. Chjuun jan ne, profeta xu má me. Hacuaha jercu changá
xu me. Xi cavixan me ne, cavéjña me cojo xihin rë me yatu nu. ³⁷ Ngaxtun vëhë ne,
cavéjña cahan me. Hane xi casacu xicjin xu me cojo xutacha rë Jesús ne, ñujuchan ñuju
nu xu tjin rë me. Hacuaha jemu quiji camaha xu ni me yungun xi matitjun. Jemu cjín
ndiya ne, cajinii xu me niñu xi faharcun me Nina. Hacuaha jercu sahmi xu me oración
rë me. Nixtin nixten faharcun me Nina. ³⁸ Hacuaha ha hora xi siu xu ni xutacha rë Jesús
ngajan yungun jan ne, cafehe Ana. Hane xi cavëe me quihndi Jesús jan ne, casua xu me
nacuechji rë Nina. Ngaxtun vëhë ne, sehe cavetsihin cachja xu me tséhë Jesús cojo yëjë
xuta xi jemu meje rë xi cuechú nixtin xi cuaxëtje Nina nandya Jerusalén.

Cavuya me cojo Jesucristu nandya Nasaret

³⁹ Xutacha rë Jesús ne, hya xi ha café casahmichihin xu me yëjë xcusun xi vitexa
ley rë Nina ne, cavuya cafe me nangui rë me, hiscan xi hmí Nasaret, distritu Galilea.

⁴⁰ Quihndi jan ne, camajyë hacuaha casacuhñu rë, hacuaha jercu cavechútáha cjuatacun
rë, hacuaha jercu cavisehen xu cjuandaja rë Nina cahntsua xahasen rë.

Casetaha suvá Jesucristu ngajan yungun xi matitjun

⁴¹ Chuva nu chuva nu ne, xutacha rë Jesús ne, fi xu me suhi tséhë Pascua ngajan
Jerusalén. ⁴² Hane hya xi Jesús cavechú me tejó nu ne, sacuaha xcusun rë xuta cojo suhi
vëhë ne, quiji xu Jesús cojo xutacha rë me ngajan Jerusalén. ⁴³ Xi cavatju suhi jan ne,
xutacha rë Jesús ne, cavetju xu me tséhë Jerusalén xi cuya cjue me nangui rë me. Peru
Jesús ne, hisca camachayiin rë xutacha rë me ne, casetaha suvá xu me Jerusalén. ⁴⁴ Xi
má rë xutacha rë me ne, jiyajñi me ngajñi rë xutacjín tife me. Hane xi café ngu nixtin
tife xutacha rë me ndiya ne, cavetsihin cavanguise xu me Jesús jan ngajñi rë xuta rë me
cojo ngajñi rë yëjë xuta xi vinga rë me. ⁴⁵ Hane xi casacuiin rë me Jesús jan ngajñi rë
xutacjín jan ne, cavuya quiji xu me hisca Jerusalén, xi tivanguise me me.

⁴⁶ Hya xi camá ne, xi majyan nixtin jan ne, sehe casacu xu rë me Jesús ngajan yungun xi
matitjun, tacun me ngajñi rë maestru xi vicuya cjuachacun, tivisiñuju me cjua rë maestru
hacuaha tivinenguise xu rë me jingu sa cjuachacun. ⁴⁷ Hane yëjë ni xuta xi tivisiñuju cjua
rë Jesús jan ne, jercu fircun xu rë me, tséhë xi cuarcu quicun cacun me hacuaha tséhë xi
jercu ndaja titsicuya me cjua tséhë maestru jan. ⁴⁸ Hane hya xi cavëe xu xutacha rë Jesús
xi ngajan tacun me ne, tu quiji tséhë me, sehe cachja naa rë me cuitjin:

—¿Mé má cuatjin canihñi cojo niji, tsan? Chutsijin ta cuajyihí ngahan cojo nahmi riji
ne, cojo cjín cjuacjintacun niji ne, catujyihinyin cavinchinsin ri. —Cuatjin xu cachja me.

⁴⁹ Ngajan xi Jesús ne, cuitjin xu cachja me cojo xutacha rë me:
 —¿Mé má cuatjin tu nguehe tu ngajan cavinchunsun ná ni? ¿Há hyúun ta hatuxa meje
 rë xi cuitejña ndava nahmi naha? —Cuatjin xu cachja Jesús.
⁵⁰ Peru xutacha rë Jesús ne, cajnii xu rcu me cjua xi cachja Jesús cojo rë me.
⁵¹ Hya xi camá ne, cavuya cafe xu Jesús cojo xutacha rë me nangui rë me ngajan
 Nasaret. Hacuaha cahndë me tséhë xutacha rë me hacutjin xi quiyi sa nixtin rë me.
 Hane naa rë Jesús ne, cavetjo cavetjo xu ni me yéjë ni cjua vëhë cahntsua xahasen rë
 me. ⁵² Sacuaha Jesús ne, jima jyë xu me cojo yojo rë me, hacuaha jima jyë jima hnga me
 cojo cjuatacun rë me. Hacuaha tichuya sa xu rë Nina tséhë me, hacuaha tichuya sa rë
 xuta tséhë me.

3

Cachja Juan Vitenda rë Xuta cjuandajyihí rë Nina

¹ Cuitjin xu camá hya xi cafë tyuhun nu jiya me xi matitjun camaha ni xi hmí rë Tiberio
 César xcun xá rë me xi vitexa me jingu ni ladu. Poncio Pilatu ne, me vëhë vitexa xu me
 distritu Judea, hane Herodes ne, me vëhë xu vitexa me distritu Galilea, hane hntséjñu me
 xi hmí rë Felipe ne, me vëhë xu vitexa me distritu Iturea cojo distritu Traconite, hacuaha
 Lisanias ne, me vëhë xu vitexa me distritu Abilinia. ² Hane sacuaha nahmi xi matitjun
 xu ne, Anás cojo Caifás má me. Hane sacuaha nixtin vëhë ne, Juan quihndi rë Zácarías
 ne, hya xi quitahá me ngajan ngu xín tséhë nandya ne, cafahatsja me cjua xi catsingatju
 xu Nina. ³ Hane quiyi catsuyiyhiya me yéjë ni ladu tiña tséhë ndajyé Jordán, tichja me xi
 meje rë xi tsindeya xu xuta cjuatacun rë me hacuaha xtenda me, cojo sa xi tsinchataha
 Nina xuta tséhë jyé rë me. ⁴ Xi cuatjin xu casahmi Juan ne, casahmichihin me sacuatjin
 camahindu hatsëë nixtin xcun xujun xi chja cjua rë profeta Isaías xi chja cuitjin:
 Cuitjin jercu hñu cuichja ngu xuta ngajan hiscan jemu xín tséhë nandya:
 “Tuhunchjinu ndiya tséhë Nai naja;
 ninguijun ndiya tséhë me.

⁵ Yéjë ni hiscan nangui cahntsua ne, tséya rë,
 yéjë ni ndetjún cojo yéjë ni naxi ne, cuijnenangui,
 yéjë ni ndiya lahñi ne, cuma quixi,
 yéjë ni ndiya xi hacuiin chihin ne, cuma chihin.

⁶ Hane yéjë ni xuta ne, scuëe me hacutjin vaxétje Nina xuta rë me.”
 Cuatjin xu catsihindu Isaías cjua xi jercu hñu cuichja xuta jan.

⁷ Ngajan xi hya xi quiyi xutacjín xi xtenda me ne, cuitjin xu cachja Juan cojo xuta:
 —¡Ngayujun ni ngayun quihndi rë chu tsehen matsejen ne!, ¿yo cavinchangui nuju
 xi nihñu ngahñu xi cuetjuntjun tséhë castigu xi hatuxa tsingatju Nina? ⁸ Sá xi meje
 Jain cuetjuntjun matsejen ne, nihñu suvá cjuandaja sacuatjin sahmi xuta xi catsindeya
 Jain me cjuatacun rë me. Xicanujuun cahntsua xahasen nuju cjua vihi: “Ngayaan ne,
 tsajin mé cuma naja ta, tséhë xi tjé rë Abraham ngayaan.” Xicanujuun cuatjin matsejen
 ta, nguehe cuichjá cojo nuju ta Nina ne, hisca ndyojo xi cuicun vi ne, cuma sahmi me
 tjé rë Abraham. ⁹ Chutsujun ta ngayun matsejen ne, tangun ngayun cojo yatjé xi ha
 quitaháchjine quicharcu tyjama rë xi cuetsihin xtí. Yéjë ni yatjé xi suaain tu xi ndaja
 matsejen ne, xtí rë, sehe cjue cueti. —Cuatjin xu cachja Juan.

¹⁰ Ngajan xi xutacjín jan ne, cuitjin xu cavinenguise rë me Juan:
 —¿Hacutjin ndatjin nihñi xi cuma nihñi cjuandaja xi nýjun vë ni? —Cuatjin xu
 cavinenguise me.

¹¹ Hane xi cafayangui Juan ne, cuitjin xu cachja me:
 —Jarë ngayun xi tjin nuju jo tsjian nuju ne, tuhun rë ngu yo xi tsajin rë. Jarë ngayun
 xi tjin xi chinu ne, ha chuva vëhë ni tuhun hitsë catjinë me xi tsajin xi sinë. —Cuatjin xu
 cachja me.

¹² Hacuaha ceduva sa xu ngujo cha xi faha tujúnsa xi meje rë cha xi xtenda cha, hane
 cuitjin xu cavinenguise cha:

—Tatá, ¿mé xi ndatjin nihñi ngayin? —Cuatjin xu cavinenguise cha.

¹³ Sehe ngajan xi Juan ne, cuitjin xu cachja me cojo cha:

—Hacuiin cjín sa tujún chjahyun rë xuta. Chjahyun rë me hacutjin xi casatéxa ni nuju.

—Cuatjin xu cachja me.

¹⁴ Hacuaha cavinenguise nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguise cha.

Sehe cachja xu me cojo cha cuitjin:

—Xicanaxuun rë xuta tujún cojo cjuachan, o sá xi cojo ngu cjuandacha. Cata-mangutacún ni cojo tujún xi ha ma chji nuju. —Cuatjin xu cachja me.

¹⁵ Xuta ne, jercu siuya camahani me mé xi cuma, hacuaha vinenguise xu me cahntsua xahasen rë me cuitjin: “Hyaan sa xi Juan rë vi Xihin xi Tsingatju Nina xi cuaxëtje naja me.” Cuatjin xu cavinenguise me. ¹⁶ Sehe ngajan xi Juan ne, cuitjin xu cachja me cojo yëjë xuta jan:

—Ngahan matsejen ne, cojo nandá ni tiviténda nuju, peru sehe cuinduva me xi cueyá me Hasen rë Nina cahntsua xahasen nuju, hacuaha cuaha me sacuaha ngu ndihi xi tsityjahi rë cjuatacun nuju. Me vëhë ne, hitsë sa jyë hnga me cojo cjuatacun rë xi cumá ná ngahan, hisca cumaji tsinguissehercu sahme tyjahi chuxinxte rë me. ¹⁷ Me xi tsingatju Nina jan matsejen ne, sacuaha xi ha yahatsja me quicha xi tsinguitjen rë xtë rë trigu cojo sa xi cuma tyjahi ndaja trigu xi casechun rë tséhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

¹⁸ Hacuaha hacuiin suvá xu ni cjua vëhë cachja Juan cojo xuta hya xi cachja me cjuandajyঃ rë Nina ta cachja sa xu me jemu cjín cjua. ¹⁹ Herodes, me xi cavitexa ngajan distritu Galilea ne, hacuaha cachjataha xu Juan me ngatsë rë xi cafaha Herodes na Herodía, chjuun rë hntsëjñu me, xi cumá chjuun rë me na. Hacuaha cachjataha sa xu Juan me tséhë jingu sa xcusun tsehen xi casahmi me. ²⁰ Peru xcun yëjë cjuatsehen vëhë ne, cavetahacoo sa Herodes xcusun vihi: caveya xu me Juan ndavaya.

Caxtenda Jesucristu

²¹ Hane hya xi chaja sa xu cjue Juan ndavaya ne, ngu nixtin xi caxtenda yëjë ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tisahmi xu me oración rë me ne, ngahnga ne, catuxaha, ²² hane Hasen rë Nina ne, canduvajnetsejen casesun rcu me. Sacuajyঃ ngu paloma jyঃ. Hacuaha hora vëhë ni ne, canuhya xu rë ngu cjua ngajan ngahnga xi cachja xu cuitjin: “Ngaye xi quihndi naha ngaye xi jemu hmú cácul ri. Jemu ndama ná ngatsë riji.” Cuatjin xu cachja.

Xutachanga rë Jesucristu

²³ Quihndë ne, Jesús ne, tjin xu rë me sacuaha cantë nu hya xi cavetsihin me cojo xá rë me. Hacuaha xi má xu rë xuta ne, quihndi rë José má me. Hane José ne, quihndi rë Elí. ²⁴ Elí ne, quihndi rë Matat. Matat ne, quihndi rë Leví. Leví ne, quihndi rë Melqui. Melqui ne, quihndi rë Jana. Jana ne, quihndi rë José. ²⁵ José ne, quihndi rë Matatías. Matatías ne, quihndi rë Amós. Amós ne, quihndi rë Nahum. Nahum ne, quihndi rë Esli. Esli ne, quihndi rë Nagai. ²⁶ Nagai ne, quihndi rë Maat. Maat ne, quihndi rë Matatías. Matatías ne, quihndi rë Semei. Semei ne, quihndi rë José. José ne, quihndi rë Judá. ²⁷ Judá ne, quihndi rë Joana. Joana ne, quihndi rë Resa. Resa ne, quihndi rë Zorobabel. Zorobabel ne, quihndi rë Salatiel. Salatiel ne, quihndi rë Neri. ²⁸ Neri ne, quihndi rë Melqui. Melqui ne, quihndi rë Adi. Adi ne, quihndi rë Cosam. Cosam ne, quihndi rë Elmodam. Elmodam ne, quihndi rë Er. ²⁹ Er ne, quihndi rë Jesús. Jesús ne, quihndi rë Eliezer. Eliezer ne, quihndi rë Jorim. Jorim ne, quihndi rë Matat. ³⁰ Matat ne, quihndi rë Leví. Leví ne, quihndi rë Simeón. Simeón ne, quihndi rë Judá. Judá ne, quihndi rë José. José ne, quihndi rë Jonán. Jonán ne, quihndi rë Eliaquim. ³¹ Eliaquim ne, quihndi rë Melea. Melea ne, quihndi rë Mainán. Mainán ne, quihndi rë Matata. Matata ne, quihndi rë Natán. ³² Natán ne, quihndi rë David. David ne, quihndi rë Isaí. Isaí ne, quihndi rë

Obed. Obed ne, quihndi rë Booz. Booz ne, quihndi rë Salmón. Salmón ne, quihndi rë Naasón. ³³ Naasón ne, quihndi rë Aminadab. Aminadab ne, quihndi rë Aram. Aram ne, quihndi rë Esrom. Esrom ne, quihndi rë Fares. Fares ne, quihndi rë Judá. ³⁴ Judá ne, quihndi rë Jacob. Jacob ne, quihndi rë Isaac. Isaac ne, quihndi rë Abraham. Abraham ne, quihndi rë Taré. Taré ne, quihndi rë Nacor. ³⁵ Nacor ne, quihndi rë Serug. Serug ne, quihndi rë Ragau. Ragau ne, quihndi rë Peleg. Peleg ne, quihndi rë Heber. Heber ne, quihndi rë Sala. ³⁶ Sala ne, quihndi rë Cainán. Cainán ne, quihndi rë Arfaxad. Arfaxad ne, quihndi rë Sem. Sem ne, quihndi rë Noé. Noé ne, quihndi rë Lamec. ³⁷ Lamec ne, quihndi rë Matusalén. Matusalén ne, quihndi rë Enoc. Enoc ne, quihndi rë Jared. Jared ne, quihndi rë Mahalaleel. Mahalaleel ne, quihndi rë Cainán. ³⁸ Cainán ne, quihndi rë Enós. Enós ne, quihndi rë Set. Set ne, quihndi rë Adán. Adán ne, me vëhë xi Nina casahmi rë me.

4

Cafahachuva xitsehen Jesucristu

¹ Hya xi camá ne, hya xi catsë rë Jesús cojo Hasen rë Nina hya xi caxtenda me ne, cavuya xu me tséhë ndajyé Jordán xi cjue me ndava me, peru Hasen rë Nina ne, qui ji nguehe qui ji ngajan xu cojo rë me ngajan ngu xín tséhë nandya ² cahntsua yachan nixtin. Hacuaha yasen ni tifahachuva xitsehen xi matitjun me. Hacuaha Jesús ne, tsajin camaha xu ni mé xi cajinë me cahntsua nixtin xi cuacun vëhë. Hane xi cavatju nixtin xi cuacun vë ne, jercu camavojo xu rë me. ³ Sehe ngajan xi xitsehen jan ne, cuitjin xu cachja cojo Jesús:

—Sá xi Quihndi jain rë Nina ngaye ne, tinoje cojo ndyojo vihi ne, catama niñu.
—Cuatjin xu cachja xitsehen.

⁴ Hane Jesús ne, cuitjin xu cafayangui me tséhë xitsehen jan:

—Xcun xujun rë Nina ne, cuitjin camahindu: “Hacuín suvá ngatsë rë niñu xi siu xuta cjuahñu.” —Cuatjin xu cafayangui Jesús.

⁵ Hane xi quijicojo xitsehen me ngu ndetjún hnga ne, sehe nguhñusasa xu catsingacun ni xitsehen jan me jinguyjé ni nandya tséhë ngasunhndë. ⁶ Sehe cachja xu xitsehen cuitjin cojo rë me:

—Suá ri yéjë nandya xi cuacun vë cojo yéjë cjuanchina rë xi ngaye nihñi gubiernu. Cuma suá ri ta, tséhë xi hatuxa ngahan cafahántsa, hane ha tu yo ni xi meje suá rë ne, suá rë. ⁷ Quihndé ne, sá xi cuindove cuiticjexcuin nguehe xi chjehercuin ná ne, cumá tsiji yéjë ni nandya vë. —Cuatjin xu cachja xitsehen.

⁸ Sehe ngajan xi cafayangui xu Jesús cuitjin:

—Xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha suvá ni me vëhë meje rë xi nihñu hacutjin xi meje rë me.” —Cuatjin xu cachja Jesús cjua vëhë.

⁹ Hya xi camá ne, xitsehen jan ne, quijicojo xu rë Jesús ngajan Jerusalén, hane quijicani rë me hisca rcu cjin yungun xi matitjun. Sehe cachja xu cojo rë me cuitjin:

—Sá xi Quihndi jain rë Nina ngaye ne, ningatjin yojo riji ndyá hisca nangui. ¹⁰ Ha hye ta tsajin mé cuma ri ta xcun xujun rë Nina ne, cuitjin chja:
Nina cuitexa me ángel rë me xi sahmi ri cuidadu.

¹¹ Cuahatsjá ri,

cojo sa xi hisca ntsacui ne, sacuinhmaain rë cojo ngu ndyojo.

Cuatjin xu cachja xitsehen cjua vëhë.

¹² Hane Jesús ne, cuitjin xu cafayangui me tséhë xitsehen:

—Xujun rë Nina ne, cuitjin chja: “Mijí rë xi chjuhunchuvun Nina naja.”

¹³ Hya xi camá ne, xi cajnetaha cafahachuva xitsehen jan Jesús ne, cavetjuxin xu tséhë me hisca janihya cuya nga.

Cavetsihin cavicuya Jesucristu xuta Galilea

¹⁴ Ngajan xi Jesús ne, cojo ngahñu rë Hasen rë Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tséhë

me ngajan Galilea cojo jingujyë ni nandya xi siu tahndee rë. ¹⁵ Hane quiji me yungun rë jimangu nandya tsöhë Galilea, cavicuya me xuta. Hane yëjë ni xuta jan ne, casahmi jyë casahmi hnga xu me Jesús.

Tacun Jesucristu nandya Nasaret

¹⁶ Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaha xcusun xi tjin rë me ne, nixtin xi chjahájenda rë ne, quiji xu me yungun. Sehe quiji casecunvasen me xi cuichjasun xu me xujun rë Nina. ¹⁷ Hya xi camá ne, casengui tsja me xujun xi hincha cjua rë Nina xi catsihindu profeta Isaías. Hane xi titsixinga xu me xujun jan ne, táha tivanguise me cahndé xi quitahá cjua xi meje rë me. Hane xi casacu rë me cahndé vëhë ne, sehe cavetsihin cachjasun xu me cjua vihi xcun xuta:

¹⁸ Hasen rë Nina ne, jiya cahntsua xahasen na, vëhë xi casuaxa ná Nina xi suá cumachaya rë xuta yuma cjuandajyihí rë me: catsingatju ná me xi suá cumachaya rë xuta xi hincha ndavaya ta hatuxa cuma ndaya me, suá cumachaya rë xuta xi rcá me ta hatuxa cuya cuma tsejen nga rë me; cuéhëndaya xuta xi jemu choho sahmi jingu sa xuta cojo rë me.

¹⁹ Hacuaha suá cumachaya rë xuta xi cavechú nu xi jercu sahmi Nina cjuandaja cojo xuta rë me.

Cuatjin chja cjua rë xujun xi cachjasun Jesús.

²⁰ Hane xi cavuya catsijeyu nga Jesús xujun jan ne, sehe cavuya casua nga me me xi sahmi xá cahntsua yungun jan. Sehe cavéjña Jesús xi cuicuya rë me xuta. Hane yëjë ni xuta xi siu cahntsua yungun jan ne, jercu cavéhërcun me Jesús. ²¹ Sehe ngajan xi Jesús ne, cavetsihin cachja me cuitjin cojo xuta:

—Quihndé, jinguyëjë rë xi cavinuhyun cjua xi camahindu xcun xujun rë Nina xi cavutaya jan ne, ngajan cavetjucaa cjua vëhë. —Cuatjin xu cachja Jesús.

²² Yëjë ni xuta ne, jemu ndaja xu cachja me tsöhë Jesús, hacuaha hisca quijircun rë me tsöhë xi jemu ndaja camahani cjua xi cachja Jesús. Sehe cachja xuta jan cuitjin:

—¡Peru cha vihi xi quihndi rë cha José jan! —Cuatjin xu cachja me.

²³ Hane Jesús ne, cuitjin xu cachja me cojo xuta jan:

—Ngahan matsejen ne, ha hvë ta ngayun ne, cuinújun cojo ná cjua vihi: “Doctor, nircun suvun rë yojo nuju.” Hacuaha cuinújun nga cuitjin: “Xcusun xi camachaya niji xi canihñu ngajan Capernaum matsejen ne, hacuaha nihñu xcusun vëhë nguehe xi nangui nuju.” ²⁴ Cuichjá cojo nuju cjuaquixi ta hisca xi ngu profeta matsejen ne, hatuxa macjaain rë xuta nangui rë me tsöhë me. ²⁵ Hacuaha ha cjuaquixi ta jemu cjín chjuun cahan xi cavyuju na nguehe Israel hya xi cavéjña profeta Elías hatsëë nixtin. Hacuaha nixtin vëhë matsejen ne, cavaain camahani tsi sacuaha jyan nu vasen, hane jercu jyë camahani jindya cavéjña jingujyë ni ladu. ²⁶ Peru catsingatjiin Nina profeta Elías xi cjue cuisecoo me hisca ngu na cahan xi cuacun vë matsejen ta ngu ni na cahan xi hisca hacuiin na tjë rë Israel na catsingatju Nina profeta xi cuisecoo me na ngajan nandya Sarepta, ladu tsöhë nandya Sidón. ²⁷ Hacuaha nguehe Israel matsejen ne, jemu cjín xuta xi yaha rë ngu chíhin vitaha xi setaha yojo naja cavyuju me hya xi cavéjña profeta Eliseo hatsëë nixtin. Peru hisca xi ngu me xi cuacun vë camandajin me matsejen ta ngu ni Naamán xi hisca hacuiin xuta tjë rë Israel ta xuta Siria me matsejen ne, me vëhë ni xi camandaja me. —Cuatjin xu cachja Jesús.

²⁸ Hane yëjë ni xuta xi siu xu cahntsua yungun jan ne, hya xi cahndé me cjua xi cachja Jesús jan ne, jemu camacjan rë me. ²⁹ Hya xi camá ne, xi caxinchacun xuta jan ne, cavaxëxin xu me Jesús, quijicojo me me hisca ngajan ngu xín tsöhë nandya, ngu rcu ndetjún hnga hiscan xi cavéjña nandya rë me, xi meje tsingatjen me Jesús. ³⁰ Peru Jesús ne, cavatju xu me ngajñi rë xuta jan quijixin me.

Cha xi jiya xitsehen xahasen rë

³¹ Hya xi camá ne, quiji xu Jesús Capernaum, ngu nandya tséhë distritu Galilea. Hane nixtin xi chjahájenda rë ne, quiji xu me yungun cavicuya me xuta. ³² Hane yéjë xuta xi siu jan ne, jercu quijircun xu rë me tséhë cjua xi vicuya Jesús ta, tséhë xi cjua xi vicuya me ne, sacuaha cjua xi chja ngu xi matitjun Jain.

³³ Hacuaha cahntsua yungun jan ne, tacun xu ngu cha xi jiya xitsehen cahntsua xahasen rë cha. Hane xitsehen jan casahmi xi jercu cajindaya cha cachja cha cuitjin:

³⁴ —¡Ja! ¿Mé má cuatjin ninguisuhunjü cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvë yo ngayun. Ngayun xi hatuxa vinechun tséhë Nina ngayun. —Cuatjin xu casahmi xitsehen xi cachja cha.

³⁵ Hya xi camá ne, cuitjin xu cachja Jesús xi cavatëcja me cjua rë xitsehen xi jiya cahntsua xahasen rë cha:

—¡Jyuu nechin, hacuaha tetjixin tséhë cha vë! —Cuatjin xu cachja Jesús.

Hya xi camá ne, catsiticja xu xitsehen jan cha ngajñi rë xuta, sehe cavitju quiji tséhë xahasen rë cha, pero tsajin camahani mé cavanguihmu rë cha. ³⁶ Hya xi camá ne, yéjë xuta jan ne, jercu quijircun rë me, hisca cachja xu me ngajñi rë me cojo xicjin me cuitjin:

—¿Mé nga xcusun cjua vihi xi cojo yéjë ni ngahñü vitexa rë hisca xitsehen, hacuaha vetjuxin ni? —Cuatjin xu cachja xuta ngajñi rë me cojo xicjin me.

³⁷ Hya xi camá ne, jinguyjë ni ladu tahndé jan ne, cavitsojo xu cjua xi cachja xuta tséhë Jesús.

Camandaja nahya rë Simón Pedru xi casahmi Jesucristu

³⁸ Xi cavitju Jesús tséhë yungun ne, quiji xu me ndava ngu me xi hmí rë Simón. Hane nahya rë Simón ne, jemu hmu xu rë me xi yaha rë me chihinsuë. Hane yéjë xuta rë me ne, cafehya me cojo Jesús xi cuisecoo Jesús nahya rë Simón. ³⁹ Hane xi quiji cavutsejenya xu Jesús xcun nahya rë Simón ne, cavatëcja me chihinsuë xi má rë xuta changá vëhë, hane cavitjuxin xu chihin jan tséhë me. Hane hora vëhë ni ne, cavisatjenhngah nahya rë Simón cavetsihin cafahacuenda me cjuandaja xi sahmi me cojo yéjë ni me xi cafehe jan.

Jemu cjín xutahmu rë camandaja me xi casahmi Jesús

⁴⁰ Hane hora xi tivetje tsuhi xu ne, yéjë ni xuta xi tjin rë me xutahmu rë tséhë tu mé ni xcusun chihin ne, quijicojo me xutahmu rë jan nixtin hya hiscan tacun Jesús. Hane xi cavisanetsja xu Jesús jima ngu xutahmu rë jan ne, camandaja me. ⁴¹ Hacuaha jemu cjín xu xuta xi siu jan cavitjuxin xitsehen xi hincha rë me. Hane xi cavitju xitsehen jan quiinne, jercu cachja camahani cuitjin:

—¡Ngayun xi Quihndi jain rë Nina ngayun! —Cuatjin xu cachja xitsehen jan.

Peru cavatëcja xu Jesús cjua xi tichja xitsehen jan, casuaain me cahndé xi cuichja xitsehen ta, tséhë xi ha vëë xu xitsehen xi me vëhë xi catsingatju Nina me.

Catsuyihiya Jesucristu cojo cjuandajyihu rë Nina

⁴² Hane xi casahasen jan ne, cavitju xu Jesús quiji me ngajan ngu xín tséhë nandya. Hane xutacjín jan ne, cuatjin quiji cavanguise xu me Jesús, hane xi cavechú me hiscan tacun Jesús ne, meje tsinguijnehai me Jesús cojo sa xi hacuiin cuetjuxin me tséhë xuta jan. ⁴³ Peru Jesús ne, cuitjin xu cachja me cojo xuta jan:

—Hacuaha sahmi ná nguyjë xi cjué jingu sa cahndé, suá cumachaya rë xuta cjuandajyihu tséhë gubiernu xi sahmi Nina ta ngatsë rë vëhë xi catsingatju ná Nina. —Cuatjin xu cachja Jesús.

⁴⁴ Hane cuatjin xu catsuyihiya casua me camachaya rë xuta cjuandajyihu vëhë yéjë ni yungun tséhë ladu vëhë.

Cjuarcun xi casahmi Jesucristu tséhë chu ti

¹ Cuitjin xu camá nga ngu nixtin jan. Jercu cjín camahani xuta quijitjengui me Jesús xi cuihndé me cjua rë Nina. Na cavehnchun xu me Jesús xi secun me tjehen laguna

Genesaret, xi hacuaha hmí rë laguna Galilea. ² Hya xi camá ne, cavëë Jesús jo barcu ngajan tjehen rë laguna jan, hane cha xi tsëhë barcu jan ne, ha cavitujne xu cha tsëhë barcu, hane hincha vane cha nahya rë cha. ³ Hane Jesús ne, quiji cavisehen xu me ngu barcu xi cavëë me jan. Barcu jan ne, tsëhë Simón. Sehe cachja me cojo Simón xi cjuecojo me hitsë barcu ngajñi nandá. Hya xi camá ne, quiji cavéjña me sehe cavicuya xu me xutacjín jan tsëhë ngajan ni cahntsua barcu. ⁴ Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Tángunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

⁵ Sehe ngajan xi cafayangui xu Simón tsëhë Jesús cuitjin:

—Tatá, cuaha nixten tinihñí xá vëhë ne, ndastu mé sacu niji. Peru sá xi cuatjin nújun ne, cuichjá cojo compañeru naha ne, ningatjinyin nahya. —Cuatjin cafayangui xu Simón.

⁶ Hane xi casahmi me cuatjin ne, jercu tu cjín camaha xu ni ticafaha me, ña meje xtiya nahya rë me. ⁷ Hya xi camá ne, casahmitsja xu me cojo xicjin me xi hincha barcu xingu jan xi cjuecico xicjin me. Sehe quiji me xi cuacun jan. Hya xi camá ne, catsinguitsë me catsijo barcu cojo ti xicafaha me jan. Hane xi jercu catsë barcu ne, ña meje xtyusehen. ⁸ Hane xi cavëë Simón Pedru xcusun xi camá jan ne, sehe quiji caticjaxcun me xcun Jesús, sehe cachja xu me cuitjin:

—Tatá. Tángunxun hitsë tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

⁹ Cuatjin cachja me ta, tsëhë xi jercu quijircun camahani rë me cojo compañeru rë me ngatsë rë ti xi jemu cjín camahani chucafaha me. ¹⁰ Hacuanitjin xu ni quijircun rë yahnga compañeru rë Simón, me xi hmí rë Jacobo cojo Juan, me xi quihndi rë Zebedeo. Sehe ngajan xi Jesús ne, cuitjin xu cachja me cojo Simón:

—Xicarcuun ta quihndë cojo nixtin xi cjuiniji sa vi ne, ngayun cuangun nuvun xuta xi cuisehen me ladu naha ngojo rë xi nuvun chu ti. —Cuatjin xu cachja me.

¹¹ Hya xi camá ne, Simón cojo compañeru rë me ne, cavaxëxin xu me barcu jan tsëhë xcun nandá, cavyuju me nangui quixí. Sehe cavyuju me yëjë ni tsëhë me ne, sehe quiji me cojo Jesús.

Casahmi Jesucristu xi camandaja cha xi yaha rë chíhin xi setaha yojo naja

¹² Cuitjin camá nga xu hya xi casetaha Jesús ngu nandya jan. Cafehe xu ngu cha xi jinguyé ni yojo rë yaha rë ngu xcusun chíhin vitaha. Hane xi cavëë xu cha Jesús ne, quiji cha caticjaxcun cha xcun Jesús cafehyá cha cjuandaja xi sahmi me cojo rë cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

¹³ Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin. ¹⁴ Sehe cavitexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavitexa Moisés xutachanga naja hatsëe nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun rë Nina tsëhë xi camandaja ngayun. Cuatjin nihñu cojo sa xi cumatsejen xi camandaja Jain ngayun. —Cuatjin xu cachja me.

¹⁵ Peru handasa cuatjin xu cachja Jesús cojo cha ne, hitsë sa jercu cavitsojo cjua tsëhë xcusun xi casahmi me. Hya xi camá ne, jercu tu cjín camahani xuta quijitjengui xu me Jesús xi cuihndë me cjua rë Jesús hacuaha cumandaja me tsëhë chíhin xi ma rë me.

¹⁶ Peru Jesús ne, yasen xu ni cavaxëxin me yojo rë me fi me ngajan ngu xín camahani, sahmi me oración rë me cojo Nina.

Casahmi Jesucristu xi camandaja cha xi cahme yojo rë

¹⁷ Cuitjin camá nga xu ngu nixtin hya xi tivicuya Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yéjë ni nandya tséhë distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rë Nina xi sahmi me xi cumandaja xuta hmu rë. ¹⁸ Hya xi camá xu ne, hora vëhë cafehe ngu cha xi cahme yojo rë, quichahahnga rë cha cojo nijña rë cha. Hane cha xi yahahnga rë cha ne, casahmi cha cjuandya xi cuisehen cha cahntsua ndihya xi cuejña cha cha hmu rë jan hiscan tacun Jesús. ¹⁹ Peru xi casacuiin xu rë cha chuva rë hacutjin cuisehen cha ngatsë rë xuta xi jercu quitsë camahani me jan ne, camiji xu cha rcu ndihya, hane cafahaxin cha tyjavanitja, sehe catsitujne cha cha hmu rë jan taha rcu ndihya cojo ni nijña rë cha, xi camá cavejña cha cha ngajñi rë xuta hiscan tacun Jesús. ²⁰ Hane xi cavëë Jesús xi cuatjin mangucacun cha xi cuacun jan cojo rë me ne, sehe cachja xu me cuitjin cojo cha hmu rë jan:

—Jyé nuju tsan ne, ha camanchataha. —Cuatjin xu cachja me.

²¹ Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijyিhi vi xi tsixcuehyu cha Nina? ¡Hatusa tsajin yo xi cuma tsinchataha jyé rë xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

²² Peru tséhë xi Jesús ne, ha vëë me mé xi titsingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju? ²³ ¡Jarë cjua xi hitsë sa tsaviin xi cuichjá? ¿Há xi: “Jyé nuju ne, ha camanchataha?”, o ¿há xi: “Tisatjunhngun ne, tujyuhunyun?” ²⁴ Peru nguehe suá cumachaya nuju xi ngahan xi Quihndi rë Xuta Jain ngahan ne, yahá xá xi tsinchátaha jyé rë xuta nguehe ngasunhndë.

Sehe ngajan xi cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun, chjuhun nijña nuju vë ne, sehe tjangun ndya nuju. —Cuatjin xu cachja Jesús.

²⁵ Hya xi camá ne, ngutjen ni cavisatjenhnga xu cha ngajñi rë yéjë ni xuta, sehe cafaña cha nijña rë cha, cafe cha, taha sahmi jyé sahmi hnga cha Nina. ²⁶ Hane yéjë ni xuta jan ne, jercu quijircun xu rë me, hacuaha cojo me casahmi jyé casahmi hnga xu me Nina, hisca catsacjun me camá. Hacuaha cachja xu me cuitjin:

—Quihndë cahyan xcusun xi tsajin nixtin xi hyan. —Cuatjin xu cachja me.

Cavaxijin Jesucristu Leví xi hacuaha hmí rë me Mateo

²⁷ Hya xi camá xu ne, xi cavetju Jesús jan ne, cavechú me ngu cahndé hiscan xi tacun ngu me xi faha tujúnsa, me xi hmí rë Leví. Sehe cachja xu me cojo me cuitjin:

—Nduvun, cuanguen cona. —Cuatjin xu cachja me.

²⁸ Hya xi camá ne, Leví jan ne, cavyuju yéjë mé xcusun xi sahmixa me cojo jan ne, sehe cavetju xu me quiqi me cojo Jesús.

²⁹ Hane xi cavatju vëhë ne, sehe casahmi xu me ngu suhi ngajan ndava me ngatsë rë Jesús. Hacuaha jercu cjín camaha xu ni cha xi faha tujúnsa cojo jingu sa xuta tijinë me niñu cojo Jesús cojo Leví. ³⁰ Hane cha fariseo cojo cha xi vicuya cjuachacun cavetsihin cachjataha xu cha xuta ladu rë Jesús cuitjin:

—¿Mé má cuatjin chinu hyun tangun cojo cha xi faha tujúnsa cojo ngujo sa cha xi hacuaha cha tsehen cha? —Cuatjin xu cachjataha cha.

³¹ Hane xi cafayangui Jesús tséhë cha ne, cuitjin xu cachja me:

—Xuta xi hacuiin hmu rë me ne, mijí rë xi cjuahacuenda rë me doctor ta suvá ni xuta xi hmu rë me ne, me vëhë xi meje rë xi cjuahacuenda rë me doctor. ³² Hacuanitjin ná ngahan ta ngahan ne, hacuiin canduvá nguehe xi squindáyavaha rë xuta xi tsajin jyé rë me ta xi canduvá ne, xi squindáyavaha rë xuta tsehen. Cuichjá cojo rë me xi tsindeya me cjuatacun rë me. —Cuatjin xu cachja me.

Mé tséhë xi casahmii Jesucristu cojo xuta rë me xun rë me

³³ Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús:

—Yéjë xuta ladu rë Juan ne, yasen ni sahmi me xun rë me hacuaha sahmi me oración rë me cojo Nina. Hacuanitjin ni yéjë xuta ladu rë cha fariseo. Peru xuta ladu nuju ne, jiné jihvi me. —Cuatjin xu cachja cha.

³⁴ Ngajan xi Jesús ne, cuitjin xu cachja me cojo cha:

—Cumaji xi xuta rë cha xi tivixan ne, sahmi me xun rë me jinguyéjë rë xi cha xi tivixan ne, tacun cha cojo rë me. ³⁵ Peru cuechú nixtin xi cha xi tivixan chjaháxin rë cha tséhë xuta rë cha ne, hya sahmi me xun rë me. —Cuatjin xu cachja Jesús.

³⁶ Hacuaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsë sehe cueyacoo cojo ngu tsjian changá ta sá xi cuatjin sahmi me ne, tsjian xatsë jan ne, tsinguetsun me. Hacuaha cumatanguaain ngu rquí tsjian xatsë cojo tsjian changá jan. ³⁷ Hacuaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaha chuxin jan ne, cuetsun. ³⁸ Xi meje rë ne, xan xatsë ne, xincha cahntsua chuxin xatsë. ³⁹ Hacuaha ngu xuta xi ha cahvi me xan changá ne, ha quihndé mijí cuihi me xan xatsë, tséhë xi chja me ta xan changá ne, vëhë xi ndaja hyun. —Cuatjin xu cachja Jesús.

6

Cavotoho xuta ladu rë Jesucristu trigu nixtin xi chjahájenda rë

¹ Hacuaha cuitjin camá nga xu ngu nixtin xi chjahájenda rë. Hya xi tivatju xu Jesús cojo xuta ladu rë me hiscan tjin tjë trigu ne, cavotohosun xuta ladu rë me tsë tsë trigu jan, sehe catsufétsja me, sehe cajinë me. ² Sehe ngajan xi ngujo cha fariseo xi cojo cjiu jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndé xi nihña xá nixtin xi chjahájenda rë? —Cuatjin xu cachja cha.

³ Ngajan xi Jesús ne, cuitjin xu cafayangui me tséhë cha:

—Ngayun ne, ha cachutayun xcusun xi casahmi xutachanga naja David hatsëë nixtin. Hya xi jercu camavojo rë me cojo xuta xi siu cojo me ne, ⁴ cavisehen me ndava Nina, hane cafaña me pan xi viyuju xcun Nina xi tsajin cahndé xi tu yo ni sinë ta suvá ni nahmi xi cuma sinë me. Peru me vëhë ne, cajinë me hacuaha casua me cajinë xuta xi siu cojo rë me.

⁵ Hacuaha cachja sa Jesús cuitjin:

—Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë. —Cuatjin xu cachja Jesús.

Casahmi Jesucristu xi camandaja cha xi quixíhñu ngu tsja

⁶ Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixíhñu tsja quixi cha. ⁷ Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, ¿há sahmi me xi cumandaja xuta nixtin xi chjahájenda rë?, cojo sa xi cuma cuinchajyé cha me tséhë xi sahmi me xá nixtin xi chjahájenda rë. ⁸ Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixíhñu tsja jan cuitjin:

—Tisatjunhngun, hane tisechun nguehe cavasencia. —Cuatjin xu cachja Jesús.

Hane sehe cavasatjenhngu xu cha cavisecun cha. ⁹ Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, ¿mé xi sua cahndé ley xi nihña?, ¿há xi cjuandaja ne?, o ¿há xi cjuatsehan? ¿Há xi naxentjeen cjuahñu rë xingueen ne?, o ¿há xi nicjeen? —Cuatjin xu cachja Jesús.

¹⁰ Xi cavutsejen Jesús xuta jingujyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jyihi titjún.

¹¹ Hya xi camá ne, cha xi cuacun jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

Cavaxijin Jesucristu tejó me xi cuma apóstol

¹² Hacuaha cuitjin camá nga xu ngu nixtin nixtin xi cuacun vë. Cavetju Jesús qui ji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina. ¹³ Hane xi casahasen ne, cajindayavaha xu me xuta ladu rë me, hane ngajñi rë xuta xi cuacun vë ne, cavaxijinjñi xu me tejó xihin. Hane me xi tejó vëhë ne, me vëhë xu xi cachja Jesús tséhë me apóstol. ¹⁴ Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntsé Simón, Jacobo cojo Juan, Felipe cojo Bartolomé, ¹⁵ Mateo cojo Tomás, Jacobo quihndi rë Alfeo cojo Simón, me xi tséhë partidu zelota, ¹⁶ Judas xuta rë Jacobo cojo Judas Iscariote, me xi sahmi entregadu rë Jesús.

Cafahacuenda Jesucristu jemu cjín xuta

¹⁷ Hane xi cavuya canduvajne xu Jesús tséhë naxi jan cojo xuta ladu rë me jan ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjín sa xuta ladu rë me xi siuya jan, siuya tangun cojo jemu cjín camaha xu ni xuta tséhë nandya Jerusalén cojo tséhë yéjë sa nación Israel, hisca cojo xu xuta xi nduva tséhë nandya Tiro cojo Sidón, xi siu ladu tséhë tjehen ndachacun. ¹⁸ Yahnga xu xuta xi cuacun vë ne, canduva me xi meje cuiñuju me cjua rë Jesús, hacuaha yahnga nga me ne, canduva me xi meje rë me xi cumandaja me tséhë chihin xi yaha rë me. Hacuaha me xi jemu tivatju cjuañihi xi hincha xitsehen cahntsua xahasen rë me ne, hacuaha camandaja xu me. ¹⁹ Yéjë ni xutacjín jan ne, cavanguise me chuva rë xi satétsja me Jesús ta, tséhë xi Jesús ne, jemu tjin rë me ngahñu rë Nina, hane ngahñu vëhë tisahmi xi mandaja xu yéjë xuta hmu rë.

Xuta xi ndaja tséhë cojo xuta xi chojyঃ ihi tséhë

²⁰ Ngajan xi ngaxtun vëhë xu ne, cavutsejen Jesús xuta ladu rë me, sehe cachja xu me cojo cuitjin:

—Jemu ndaja tsujun ngayun xi yamu matsejen ta, tséhë xi ngayun matsejen ne, satë nuju gubiernu xi sahmi Nina.

²¹ Jemu ndaja tsujun ngayun xi vojo nuju quihndë matsejen ta, tséhë xi cuechú nixtin xi jemu chuya rë xahasen nuju.

'Jemu ndaja tsujun ngayun xi tichjhndun quihndë matsejen ta, tséhë xi cuechú nixtin xi cuéjnu.

²² 'Hacuaha jemu ndaja tsujun ngayun hya xi choho scuëë nuju xuta, o hya xi cuaxëxin nuju me tséhë ngajñi rë me, o hya xi choho cuichja me cojo nuju, o hya xi tsitjungui nuju me, ngatsé rë xi tjin tangun cjuatacun nuju cojo ná ngahan xi Quihndi rë Xuta Jain ngahan. ²³ Hisca chijhngun xi ndama nuju xi cuatjin tivatjun tijima nixtin hya matsejen ta, tséhë xi jemu jyé ngu cjuandaja xi tacunya nuju ngajan ngahnga. Jemu ndaja tsujun matsejen ta, tséhë xi cuanitjin ni choho casahmi xutachanga naja cojo profeta hatsëë nixtin, hane jemu cachuya rë Nina tséhë profeta xi cuacun vë.

²⁴ 'Peru jemu chojyঃ ihi tsujun ngayun xi nchina ngayun matsejen ta, tséhë xi ha casacu nuju cjuetacun xi cuma nuju.

²⁵ Jemu chojyঃ ihi tsujun ngayun xi ha jemu chuya rë xahasen nuju quihndë matsejen ta, tséhë xi cuechú nixtin xi cuma vojo nuju.

'Jemu chojyঃ ihi tsujun ngayun xi tivéjnu quihndë matsejen ta, tséhë xi cuechú nixtin xi jercu chjhndun xi cuma va rë xahasen nuju.

²⁶ 'Hacuaha jemu chojyihí tsujun ngayun hya xi ndaja cuichja yéjé xuta tsujun matsejen ta, tséhë xi cuanitjin ni ndaja casahmi xutachanga naja cojo profeta ndacha hatséé nixtin, hane profeta ndacha xi cuacun vë ne, cachuyiin rë Nina tséhë me.

Meje rë xi nihmu tacun condra naja

²⁷ 'Peru ngayun xi tinuhyun xi chjá matsejen ne, cuichjá cojo nuju cuitjin: Nihmutacún xuta xi má condra nuju, ndaja nihñu cojo xuta xi choho vëe nuju me, ²⁸ chjahyun rë Nina cjuandaja xi cuma rë xuta xi fehya rë me Nina cjuahngatacun xi cuatjun cuma. Ngajñi rë oración nuju matsejen ne, chjahyun rë Nina cjuandaja xi cuma rë xuta xi vangui nuju me si. ²⁹ Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rë hisca chingá ngahma nuju. ³⁰ Yéjé ni xuta xi fehya nuju me mé xi fehya nuju me matsejen ne, tuhun rë me. Yo xi fahatahá mé xi fahatahá tsuhun matsejen ne, xicanujuun xi tsicuya nga me. ³¹ Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me.

³² 'Tsajin yo sua nacuechji nuju tséhë xi hmutacún xuta xi hmucacun nuju me matsejen ta, tséhë xi hacuaha hisca xuta tsehen matsejen ne, hmucacun me xuta xi hmucacun rë me. ³³ Hacuaha tsajin yo sua nacuechji nuju tséhë xi ndaja nihñu cojo xuta xi ndaja sahmi me cojo nuju matsejen ta, tséhë xi hacuaha hisca xuta tsehen matsejen ne, hacuanitjin ni sahmi me. ³⁴ Hacuaha tsajin yo sua nacuechji nuju tséhë xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tséhë xi hacuaha hisca xuta tsehen matsejen ne, sua me vuxetaha xicjin me, cojo sa xi cuya cjuahatsja nga me chuva vëhë ni. ³⁵ Cuya cuichjá nga cojo nuju, nihmutacún xuta xi má condra nuju. Ndaja nihñu, hacuaha tuhun tuxetaha rë, peru xicavetuun tacún xi cuya chjuhunntsun nga. Sá xi cuatjin nihñu matsejen ne, jemu jyé cjuandaja xi sua nuju Nina ngascan, hane cjuandaja xi nihñu ngayun matsejen ne, tangun cojo cjuandaja xi sahmi Nina matsejen ta, tséhë xi me vëhë matsejen ne, hatuxa jemu ndaja me cojo xuta tsehen xi hisca nacuechji rë Nina suaain me. ³⁶ Meje rë xi tjin nuju cjuayumatacun sacuatjin tjin rë Nina Nahmi naja cjuayumatacun.

Mijí rë xi nichuvan jingu sa xuta cojo cjuatacun rë me

³⁷ 'Hacuiin nichuvun jingu sa xuta cojo cjuatacun rë me, sehe hacuiin tsichuva Nina ngayun. Hacuiin ninguijun jyé rë jingu sa xuta, sehe hacuiin tsinguixi Nina jyé nuju. Ninchatuhun rë jingu sa xuta matsejen ne, sehe hacuaha tsinchataha nuju Nina. ³⁸ Tuhun rë jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rë, hacuaha hisca xotje rë chuva xi sua nuju me. Cuatjin nihñu matsejen ta, tséhë xi chuva xi nichuvun matsejen ne, hacuaha chuva vëhë tsichuva Nina xi sua nuju me. —Cuatjin xu cachja Jesús cojo xuta ladu rë me.

³⁹ Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuecani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga. ⁴⁰ Ngu cha xi sehe tivutaya matsejen ne, hacuiin hitsé sa vengui chjí rë cha xi cuma rë maestru rë cha matsejen ta hya xi ha ndaja cavutaya cha yéjé ni matsejen ne, sehe ngajan xi cuechútáha cjuatacun rë cha sacuaha cjuatacun rë maestru rë cha.

⁴¹ '¿Hacutjin má xi matsejen nuju xtë xi jiya tuxcun xingun, hane machayiin nuju tséhë yasin xi jiya túxcun suvun ni? ⁴² ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyéjë rë xi suvun matsejen ne, matsijin nuju yasin xi jiya túxcun vë ni? Ngayun xuta ndacha, naxun titjun yasin xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

Tsejen mé xcusun xuta me ngatsé ni rë cjua xi chja me

⁴³ 'Ha hyan matsejen ta tsajin hisca xi ngu yatjé xi ya ndaja xi sua tú xi ndajin, hacuaha tsajin hisca xi ngu ya xi ya machjiriin xi sua tú xi ndaja matsejen ta, ⁴⁴ jima ngu ya ne, cuma tsejen sá xi ndaja o sá xi ndajin ngatsé rë tú xi sua. Hatuxa sacuiin naja tú xi hmí

higo rcu ngu yanahyálatu, hacuaha sacuiin naja uva rcu ngu yanahyátindu. ⁴⁵ Cuanitjin ni rë xuta matsejen ta sacuaha xuta ndaja matsejen ne, tséhë cjuandaja xi tetjo rë me cahntsua xahasen rë me cojo cahntsua cjuatcacun rë me matsejen ne, tséhë ngajan vetju cjuandaja. Peru xuta tsehen matsejen ne, tséhë cjuatsehen xi tetjo rë me matsejen ne, tséhë ngajan vetju cjuatsehen. Cuatjin matsejen ta, tséhë xi yéjë ni xuta ne, cjua xi quitsë rë xahasen rë me cojo cjuatcacun rë me matsejen ne, vëhë cjua xi vetju hntsua me.

Ejemplu tséhë jo ndihya

⁴⁶ 'Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni? ⁴⁷ Yahnga ngayun xi nduvuntjengun ná hacuaha visiñuju cjua na ha hacuaha nihñu sacuatjin chjá cojo nuju matsejen ne, nguehe cuichjá cojo nuju yo xi tangun ngayun cojo: ⁴⁸ tangun ngayun cojo ngu cha xi hya xi casahmi cha ngu ndihya matsejen ne, ndaja nungun crafahngui cha, sehe ngajan caveñña cha xihndënaña rë hisca xcun ndyojohñu. Hane hya xi camajyë ndajyë hacuaha casesuntë nandá matsejen ne, jercu hñu catsivaha rë ndihya jan, peru hisca catsiniyaain rë, tséhë xi jemu ndatjin casecun. ⁴⁹ Peru yahnga nga ngayun xi visiñuju cjua na ha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya suvá xcun nangui ni, xi tsajin xihndënaña rë. Hane hya xi camá ne, xi camajyë ndajyë matsejen ne, catsivaha rë ndihya jan, hane ngutjen ni caticja. Hane cavetsun camahani ndihya vëhë. Cuatjin xu cajnetaha cavicuya Jesús.

7

Casahmi Jesucristu xi camandaja hndixahan rë capitán xi vitexa me ngu cientu sindadu

¹ Xi cajnetaha xu cachja Jesús yéjë ni cjua xi meje cuichja me cojo xuta ne, sehe cavuya qui ji nga me nandya Capernaum. ² Hane nandya jan ne, ngajan xu tacun ngu capitán xi tjin rë me ngu hndixahan xi cavatsë me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan. ³ Hane xi camachaya xu rë capitán jan xi tacun Jesús ne, catsingatju xu me ngujo xuta changá rë xuta tjé rë Israel xi qui ji cachja me cojo Jesús xi cjue sahmi me xi cumandaja hndixahan rë capitán jan. ⁴ Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tisecun rë capitán hitsë ta, tséhë xi jemu ndaja me. ⁵ Handasa hisca hacuiin tjé rë xutachanga naja me ne, peru jemu hmucacun me ngayaan xuta tjé rë Israel, hacuaha casahmi me yungun niji cojo ngahñu rë suva me. —Cuatjin xu cachja xuta changá jan.

⁶ Hya xi camá ne, qui ji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijitjengui me Jesús. Hane xi cavechútáha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatuñndyuun yojo nuju. Ngahan ne, vechiin chuva rë xi ngayun cuinduvun ndya na ha ta, tséhë xi ngayun xi jemu jyë hnga ngayun cojo cjuatcacun nuju.

⁷ Vëhë xi hacuaha tsingátaha cárcon xi jemu chúa ngahan cojo cjuatcacun na ha xi cjué cuichjá cojo nuju. Quihndë ne, ndastu nihñu favor ne, tinújun xi cumandaja hndixahan na ha. ⁸ Ngahan ne, hvë xi cuma nihñu xcusun vëhë ta, ngahan ne, hacuaha tjin xuta xi matitjun tsahan, hane hacuaha tjin ná sindadu xi siu ngahma gubiernu na ha xi sahmi hacutjin xi meje ná. Hya xi chjá cojo ngu xi cjue ne, fi. Hacuaha hya xi chjá cojo ngu nga xi cuinduva ne, nduva. Hane hndixahan na ha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

⁹ Hane xi cahndë xu Jesús cjua vëhë ne, jemu quijircun rë me tséhë capitán jan. Hane xi cavuya me cavutsejen me xutacjín xi tjengui rë me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjé rë Israel ne, cjéë scuëë ngu xuta xi cuatjin ndaja mangucacun me cojo ná. —Cuatjin xu cachja Jesús.

¹⁰ Hane xi cavuya xu me xi quiji tixa jan ne, cavëë me xi ha camandaja cha hndixahan jan.

Casahmi Jesucristu xi cavuya ngu nima cjuahñu

¹¹ Xi cavatju vëhë ne, quiji nga xu Jesús ngu nandya xi hmí rë Naín. Cavisecoo xuta ladu rë me me quiji me, cojo jingu sa xutacjín xi cojo me quiji me. ¹² Hane xi tijima tiña xu me tsëhë tingotjo hnchua tsëhë nandya jan ne, cjui seyaniji xu ngu nima, ngu nima xi quihndi ngu tsëhë naa rë. Hacuaha naa rë nima jan ne, cahan xu me. Jercu cjín camahani xuta nandya visecoo me chjuun jan cjui me. ¹³ Hane xi cavëë xu Nai naja chjuun jan ne, camayuma rë me me. Sehe cachja me cojo chjuun jan cuitjin:

—Ha quihndë xicachjhnduun. —Cuatjin xu cachja me.

¹⁴ Hane xi quiji tiña xu Jesús hiscan xi cjui me cojo nima jan ne, sehe quiji cavetahatsja xu me nachan xi quisun nima jan. Hane xuta xi yahahnga rë nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndë ne, ngayun tsan ne, tisatjunhngun. —Cuatjin xu cachja me.

¹⁵ Hane nima jan ne, cavisatjenhnga xu cha cavéjña cha. Sehe cavetsihin cachja cha. Sehe cachja Jesús cojo naa rë cha jan xi cjuahatsja nga me quihndi rë me. ¹⁶ Hya xi camá xu ne, yëjë ni xuta jan ne, jemu catsacjun me camá. Hacuaha casahmi jyë casahmi hnga me Nina, cuitjin xu cachja me:

—Cavetujñi ngajñi naja ngu profeta xi jercu vengui chji rë me, hacuaha casahmi Nina cjuandaja rë me cojo naja ngayaan xuta rë me. —Cuatjin xu casahmi jyë casahmi hnga me Nina.

¹⁷ Hya xi camá ne, cavitsojo xu cjua vëhë tsëhë Jesús jingujyë ni ladu vëhë cojo jingujyë ni nación Israel.

Cavinenguise Juan Jesucristu, ¿há me vëhë xi catsingatju Nina me?

¹⁸ Cuitjin xu camá nixtin xi cuacun vë. Xuta ladu rë Juan ne, casua me camachaya rë me yëjë xcusun xi casahmi Jesús. Sehe ngajan xi Juan ne, cajindaya xu me jo xuta ladu rë me jan ne, ¹⁹ sehe catsingatju me me xi cjue cjuinenguise xu me Nai naja sá xi me vëhë xi chja xujun rë Nina xi tsingatju Nina me, o sá xi meje rë xi cuiyuuya rë xi cuinduva nga ngu. ²⁰ Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin:

—Juan Vitenda rë Xuta ne, catsingatju niji me xi nduvín vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguise xuta xi catsingatju Juan jan.

²¹ Hane ha hora vëhë ni ne, Jesús ne, casahmi me xi jemu cjín xu xuta camandaja me tsëhë tu mé ni xcusun chíhin xi má rë me. Hacuaha jemu cjín sa xuta xi cavaxëxin Jesús xitsehen xi hincha cahntsua xahsen rë. Hacuaha jemu cjín sa xu xuta rcá xi casahmi Jesús xi camá camatsejen rë me. ²² Hya xi camá ne, xi catsicuya me cjua cojo xuta ladu rë Juan ne, cuitjin xu cachja me:

—Tjangun ne, sehe tinújun cojo Juan yëjë xcusun xi cahyun cojo yëjë cjua xi canuhyun. Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; xuta xi loho me ne, camá cahndë me; nima ne, cavuya nga cjuahñu; xuta yuma ne, casacu camachaya rë me cjuandajyihí rë Nina. ²³ Hacuaha jemu ndaja tsëhë tu yo ni xuta xi hacuiin tsismicacun me xi mangu cacun me cojo ná. —Cuatjin xu cachja Jesús.

²⁴ Hane hya xi cavuya cafe xu xuta ladu rë Juan jan ne, sehe cachja Jesús cojo xutacjín jan cuitjin tsëhë Juan:

—Hya xi cavetjun catsangun ngajan ngu xín tsëhë nandya catsanguntjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rë me?, sacuatjin rë ngu ndeje xi fi nguehe fi ngajan rcu sacuatjin cjui tjo.

²⁵ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihí camahani? Hacuiin cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua siu me matsejen ne,

sacuiin naja me ngajan ngu xín camaha ni tséhë nandya matsejen ta hiscan xi sacu naja me ne, ndava ngu xuta nchina. ²⁶ Peru ngayun matsejen ne, catsangun cachutsujun ngu profeta. Hacuaha cju aquixi xi vëhë cachutsujun. Peru profeta Juan vë matsejen ne, hitsë sa vengui chji rë me xi cuma rë yëjë sa profeta xi yahnga. ²⁷ Hacuaha me vëhë xi cachja Nina tséhë me xcun xujun rë me cuitjin:

Ngahan ne, tsingátju titjun ngu cha

xi scuxaha cjuatacun rë xuta tséhë xi cjuehë ngaye.

Cuatjin cachja Nina cojo Quihndi rë me. ²⁸ Cuichjá cojo nuju matsejen ta ngajñi rë yëjë xuta xi catsin me tséhë naa rë me matsejen ne, tsajin ngu xi hitsë sa vengui chji rë xi cuma rë Juan. Peru hya xi cuetsihin Nina sahmi me gubiernu nguehe ngasunhndë matsejen ne, xuta xi chuva cuengui chji rë me quihndë matsejen ne, hitsë sa cuengui chji rë me nixtin hya, xi cuma rë xi ha vengui chji rë Juan quihndë.

²⁹ Hane hya xi yëjë ni xuta hisca cojo cha xi faha tujúnsa cahndë me cjua xi cachja Juan matsejen ne, catsingatihin me xi cuitenda Juan me. Hane chuva vëhë matsejen ne, catsingacun me xi macjain rë me xi Nina matsejen ne, yëjë xcusun xi sahmi me matsejen ne, hatuxa cju aquixindaja jain. ³⁰ Peru jemu cjín cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vëhë matsejen ne, catsitjungui cha xcusun xi meje sahmi Nina xi cuma tséhë cha.

³¹ 'Ngayun xuta tjé rë Israel tséhë nixtin vihi matsejen ne, ¿mé xi tangun ngayun cojo? ³² Tangun ngayun cojo langa xi siu ngajan ndetsin, xi jindaya xicjin cojo cjua vihi: "Canijani tsujun ne, mijí xtun; casin va ne, mijí chjihndun." Cuatjin jindaya langa.

³³ Cuatjin chjá cojo nuju matsejen ta, Juan xi vitenda nuju ngayun matsejen ne, jinii me niñu hacuaha hviin me xan, hane ngayun nújun ta jiya xitsehen xahasen rë me. ³⁴ Hane ngahan xi Quihndi rë Xuta Jain matsejen ne, jiné hacuaha hvë, hane nújun xi ngahan matsejen ne, ngu cha cahntsuaníñu ngahan, ngu cha cahntsuxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. ³⁵ Peru xuta xi fitjengui me cjuatacun rë Nina matsejen ne, xuta xi cuacun vëhë xi tsingacun naja me xi cjuatacun vëhë matsejen ne, ndaja jain. —Cuatjin xu catsinguijnetaha Jesús cjua rë me cojo xuta.

Catsinchataha Jesucristu ngu chjuun tsehen

³⁶ Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue sinë me cojo cha niñu ndava cha. Hane xi cavisehen me ndava cha fariseo jan ne, sehe quiyi cahfa xu me cahndë rë me xcun maxë xi sinë me niñu. ³⁷ Ngajan xi ngu chjuun tsehen tséhë nandya vëhë ne, camachaya xu rë na xi Jesús ne, tacun me ndava ngu cha fariseo tijinë me niñu cojo cha ne, yaha xu na ngu frascu xi ndyojo camá, hincha ngu xcusun aceite ndaja xi jercu hnga chji rë. ³⁸ Quiyi xu na secun na táha ntsacu me, jihnda na. Hane cojo ndatuxcun na ne, cavetsihin catsicahnchi xu na ntsacu me. Hane cojo tsjarcu na ne, cavujnu na, sehe cavitatsuha na. Hya xi camá xu ne, sehe cavitejnu na aceite. ³⁹ Peru xi cavëe xu cha fariseo xi quijicojo rë me jan xi cuatjin casahmi na ne, catsingataha cacun cha cuitjin: "Cha xi cuijyihí vihi ne, sá xi profeta jain cha ne, ha vëë cha mé xcusun chjuun na xi cuatjin satëtsja rë cha ta, tséhë xi na vëhë ne, ngu chjuun tsehen na." Cuatjin catsingataha cacun xu cha. ⁴⁰ Sehe ngajan xi Jesús ne, catsicuya xu me cjua tséhë cjuatacun xi catsingataha cacun cha fariseo jan, cuitjin xu cachja me:

—Simón, tjin ná ngupo cjua xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tséhë me:

—Maestro, tinújun. —Cuatjin xu cachja cha.

⁴¹ Hya xi camá xu ne, cachja Jesús cuitjin cojo cha ngu ejemplu:

—Cuejña ne xi jo cha jan ne, quitjen cha tujún tséhë ngu cha nchina. Ngu cha ne, quitjen cha tujún tséhë hñu cientu nixtin xi sahmi ngu mosu xá. Hane ngu nga cha ne, quitjen cha tujún tséhë yachan té nixtin. ⁴² Hane xi tsajin rë cha xi cuacun vë tujún xi

sahmingojo cha ne, cha nchina jan ne, catsinchataha cha catsijo cha. *¿Jaré cha xi cuicun vi xi hitsë sa tsihmu cacun cha cha nchina jan, xi má nuju? —Cuatjin xu cachja me.*

⁴³ Sehe ngajan xi cafayangui xu cha Simón cuitjin:

—Xi má ná ne, cha xi hitsë sa cjín quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjua xi canújun. —Cuatjin xu cachja Jesús.

⁴⁴ Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavísehen ndya nuju ne, catuun nandá xi cjuengui ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na. ⁴⁵ Hacuaha ngayun ne, cavitatsuun ná. Peru na vihi ne, hisca hora xi cavísehen ne, cjéé cuejñaxin na xi vitatsuha na ntsacú. ⁴⁶ Ngayun ne, cavitejnuu aceite rcú. Peru chjuun vihi ne, cavitejnu na aceite ntsacú, aceite xi jemu ndaja jne camahani. ⁴⁷ Véhë xi cuichjá cojo nuju ta tsejen xi ha camanchataha na tséhë jyé cjín xi tjin rë na ta, tséhë xi jemu tjin rë na cjuahmutacun. Peru yo xi manchataha tséhë hitsë jyé xi tjin rë ne, hacuaha chúva cjuahmutacun tjin rë. —Cuatjin xu cachja Jesús.

⁴⁸ Ngajan xi cachja xu Jesús cojo chjuun jan cuitjin:

—Jyé nuju ne, ha camanchataha. —Cuatjin xu cachja me.

⁴⁹ Hane xuta xi tjiné xu cojo rë me jan ne, cavetsihin cavinenguise me ngajñi rë me cojo xicjin me cuitjin:

—¿Yo rë cha xi cuijyihi vi xi hisca jyé rë xuta tsinchataha cha? —Cuatjin xu cachja me.

⁵⁰ Peru Jesús ne, cachja nga xu me cojo rë chjuun jan cuitjin:

—Ngayun ne, ha cavetjuntjun ta, tséhë xi camangutacún cojo ná. Cuma cuangun cojo cjuasua. —Cuatjin xu cachja me.

8

Yachjin xi cafahacuenda rë Jesucristu

¹ Cuitjin camá nga xu ngu nixtin. Jesús ne, titsuyihiya xu me jemu cjín nandya cojo ranchun tisua me tijimachaya rë xuta cjuandajyahi xi chja tséhë gubiernu xi sahmi Nina. Hacuaha cojo tejó xuta ladu rë me jan cavisecoo xu rë me. ² Hacuaha cojo sa ngujo yachjin xi cavetju xitsehen xi hincha xahesen rë me hacuaha camandaja me tséhë chíhin xi má rë me ne, cojo xu me quiji me. María, na xi hacuaha hmí rë na Mágdala, ngu chjuun xi cavetju yatu xitsehen xahesen rë, ³ cojo Juana, chjuun rë Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjín sa yachjin xi hacjahi. Yéjë ni yachjin xi cuacun vë ne, cojo xcusun xi tjin rë suvá me ne, cafahacuenda xu me Jesús cojo yéjë ni xuta xi ticojo me.

Ejemplu tséhë cha xi catsitjé trigu

⁴ Cuitjin camá xu ngu ndiya nga. Hyá xi jemu cjín xuta camatangun me xi canduva nguehe canduva ngajan me jingu sa nandya xi nduva tjengui xu me Jesús ne, cachja Jesús cojo xuta jan ngu ejemplu vihi:

⁵ —Cuejñaa ne xi ngu cha xi tsitjé trigu matsejen ne, cavetju cha quiji cha xi tsitjé cha trigu. Hane jinguyéjë rë xi titsitjé cha matsejen ne, ngujo matsejen ne, cavixu ndiya, hane canune rë. Hane xi canduva chu nisë matsejen ne, catsicjé chu cajiné chu. ⁶ Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tséhë xi tsajin mé xcuen rë. ⁷ Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, véhë casahmi hndë rë catsixi rë. ⁸ Hane xi yahnga nga matsejen ne, cavixu hiscan nihndë ndaja. Hane xi camayehe matsejen ne, casua tutjé rë, ngu cientu sa cuatjin sacuatjin xi camatjé.

Xi cafë cachja me cjua vëhë ne, sehe jercu hñu xu cachja me cuitjin:
—Yo ngayun xi tjin nuju cjuasua xi cuinuhyun cjua naha ne, ndaja tinuhun.
—Cuatjin xu cachja me.

Mé má ejemplu cachja Jesucristu cojo xuta

⁹ Ngajan xi xuta ladu rë me jan ne, cavinenguise xu me mé meje cuichja ejemplu xi cachja Jesús jan. ¹⁰ Hane Jesús ne, cachja xu me cuitjin:

—Nina ne, casua me cahndé xi ngayun ne, cuijne rcun cjuatacun tsëhë gubiernu xi sahmi Nina, cjuatacun xi titjún ne, tsajin yo machaya rë. Peru yëjë sa me xi yahnga ne, tichjá cojo rë me cojo suvá ejemplu, cojo sa xi handasa cuihndë me cjua naha ne, peru cuijnii rcu me.

Cachja Jesús mé vijne ejemplu tsëhë cha xi catsitjë trigu

¹¹ 'Quihndë ne, nguehe cuichjá cojo nuju mé meje cuichja ejemplu vëhë. Trigu xi tsitjë ngu cha jan ne, vëhë xi sacuaha cjua rë Nina. ¹² Hane hya xi vixu ngujo trigu ndiya ne, hacui sacuaha hya xi visiñuju xuta cjua rë Nina. Sehe vinduva Satanás ne, fahatahá cjua rë Nina tsëhë xahasen rë me, cojo sa xi cuetjintjiin me ngatsë rë xi cumacjain rë me. ¹³ Hane hya xi vixu ngujo trigu hiscan xi jemu naxindya ne, hacui sacuaha hya xi vihndë xuta cjua rë Nina, hane fahatsja me cojo cjuasua. Peru trigu xi cuacun vë ne, jemu chúa tyjama rë vetju. Hacuanitjin ni vatju ngujo xuta má. Macjain rë me ngujo nixtin ni, peru hya xi vechú ngunixtin xi chjaháchuva rë me ne, fi ngaxtun me. ¹⁴ Hane hya xi vixu ngujo trigu ngajñi nahyá ne, hacui sacuaha hya xi vihndë xuta cjua rë Nina, peru ha xcun xi ha cjuinduju me cojo nixtin rë me ne, tsingataha cacun me tsëhë cjuacjintacun tsëhë cahntsua ndava me, tsingataha cacun me tsëhë cjuanchina, hacuaha tsingataha cacun me tsëhë cjuasua xi tjin ngasunhndë, hane vëhë suaain cahndé xi cumajyé cjua rë Nina cahntsua xahasen rë me, hacuaha sahmii me ngu cjuandaja xi tsingacun xi xuta rë Nina me. ¹⁵ Hane hya xi vixu yahnga trigu hiscan nihndë ndaja ne, hacuaha hacui sacuaha hya xi vihndë xuta cjua rë Nina cojo ngu xahasen ndaja, ngu xahasen tyjahi, hacuaha tsismicacuaain me. Hane cuatjin cojo jeya ne, caa rë me sahmi me cjuandaja.

Ejemplu tsëhë ngu ndihi

¹⁶ 'Hacuaha tsajin hisca xi ngu xuta xi ha xcun xi ha cavetaha rë me ngu ndihi ne, sehe faha me veyahma me ngahma rë ngu tyucu o sá xi faha me vejña me ngahma nachan ta, hatuxa faha me vejña me cahndé rë, cojo sa xi yëjë xuta xi visehen me hiscan setí ndihi jan ne, scuëe me hasen rë. ¹⁷ Hacuanitjin ni chuva vëhë, yëjë cjua rë Nina xi tivicuyá nuju suvun ni ngayun xuta ladu naha ne, handasa hinchahma yëjë cjua vëhë quihndë ne, peru cuechú nixtin xi cuetjucaa tsejen, hacuaha cuicuyun rë yëjë xuta.

¹⁸ 'Vëhë xi meje rë xi nihñu ngahñu xi ndaja cuiñuju cjua rë Nina ta, tsëhë xi tu yo ni xi tjin rë cjua vëhë ne, Nina ne, sua sa rë me. Hane tu yo ni xi tsajin rë cjua vëhë ne, hitsë cjua vëhë xi má rë xi tjin rë ne, chjahátaħá rë. —Cuatjin xu cavicuya Jesús xuta ladu rë me.

Naa rë Jesucristu cojo xicjin me

¹⁹ Ngajan xi naa rë Jesús cojo xicjin me ne, cafehetjengui xu me Jesús. Hane maji vechútahacjin rë me ta, tsëhë xi jercu quitsë camaha xu ni xuta. ²⁰ Hane tjin xu yo casua camachaya rë Jesús cuitjin:

—Naa nuju cojo nixti xingun ne, hincharacun me ngajan candatsen, xi nduvatjengui nuju me. —Cuatjin xu casacu camachaya rë me.

²¹ Peru Jesús ne, cuitjin xu cafayangui me:

—Xuta xi vihndë me cjua rë Nina hacuaha sahmi me sacuatjin chja cjua vëhë ne, hacuaha tangun ni hmú cárden me sacuatjin hmú cárden naa naha cojo xingueen. —Cuatjin xu cafayangui me.

Cavatēcja Jesucristu ngahñu rë tjo cojo cjuasca rë nandá

²² Cuitjin camá nga xu ngu nixtin jan. Cavisehen Jesús cahntsua ngu barcu cojo xuta ladu rë me, sehe cachja xu me cojo xuta jan cuitjin:

—Cuanten ngunda vëhë. —Cuatjin xu cachja me.

Sehe quiyi me. ²³ Hane ngajni cji xu barcu cojo rë me ne, Jesús ne, cafañafé xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me. ²⁴ Hane xi quiyi tiña xu me hiscan jiñafé Jesús ne, sehe catsingasca me me, cuitjin xu cachja me:

—¡Tatá, tatá! ¡Nguehe tifé ngayaan! —Cuatjin xu cachja xuta ladu rë Jesús jan.

Hane xi cavasca xu rë Jesús ne, cavatécja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavéjñajyuu jingujyé ni. ²⁵ Sehe ngajan xi Jesús ne, cuitjin xu cachja me cojo xuta ladu rë me jan:

—¿Há manguaaintacún cojo ná ni? —Cuatjin xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajni rë me cojo xicjin me cuitjin:

—¡Mé xcusun xuta me vi xi hisca tjo hisca nandá vitexa me, hacuaha vihndé tséhë me ni! —Cuatjin xu cachja xuta ladu rë me jan.

Cha Gadarena xi hincha xitsehen xahsen rë

²⁶ Hya xi camá xu ne, cafehe me nandya Gadara, ngu nandya xi tacun ngunda vëhë tséhë laguna Galilea. ²⁷ Hane xi cafehe xu Jesús nangui quixí cojo xuta ladu rë me ne, cavechútáha me ngu cha tséhë nandya vëhë xi hincha xitsehen xahsen rë cha. Cha vëhë ne, ha jemu tséé xu xi vajin cha tsjian, hacuaha hacuiin cahntsua ndihya véjña cha ta ngajan tahndé véjña cha. ²⁸ Xi cavéé xu cha Jesús ne, jercu cajindaya cha quiyi caticjaxcun cha xcun me, hacuaha jercu hñu cachja cha cuitjin:

—¿Mé má cuatjin ninguisuhunjü cojo ná ngayun Jesús, Quihndi rë Nina xi hatuxa jyé hnga cojo Hasen rë? Nihñu favor ne, xicatuun ná cjuañihi. —Cuatjin xu cachja cha.

²⁹ Cuatjin cachja cha ta, tséhë xi Jesús ne, ha caviteha me xitsehen xi cuetjuxin tséhë cha. Ha jemu tséé xu nduva nixtin xi visehen xitsehen xahsen rë cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndé cuetjiin cha cjue cha. Peru xi vicheya cha cadena ne, xitsehen ne, ficojo cjuachan rë cha ngajan ngu xín camahani tséhë nandya. Jemu cjín ndiya xu xi cavatju cha camá cuatjin. ³⁰ Ngajan xi Jesús ne, cuitjin xu cavinenguise me cha:

—¿Hacutjin hmí nuju? —Cuatjin xu cachja me.

Hane cha vëhë ne, cuitjin cafayangui cha:

—Sindadu Cjín. —Cuatjin xu cachja me.

Cuatjin cachja cha ta, tséhë xi jemu cjín xitsehen cavisehen xahsen rë cha. ³¹ Hane ngajan xi xitsehen xi cuacun jan ne, jemu cafehya xu favor cojo Jesús xi hacuiin cuitexa me xi cjue ngajan nduchin. ³² Hane tiña ngajan ne, jemu cjín xu chinga hinchataha chu tijiné chu ngajan ngu ndetjún. Hane xitsehen jan ne, cafehya cojo Jesús xi sua me cahndé xi cuisehen xitsehen jan xahsen rë chinga. Hane casua xu me cahndé. ³³ Hane xi cavetju xu xitsehen jan tséhë xahsen rë cha vëhë ne, quiyi cavisehen xahsen rë chinga. Hya xi camá xu ne, chinga jan ne, cavanga chu quijijne chu tséhë rcu ndetjún, hane ngajan cavixuya xu chu ngajni nandá tséhë laguna, hane ngajan camiji rë chu nandá ne, ngajan cafë xu chu.

³⁴ Ngajan xi xi cavéé xu cha xi sahmi cuidadu rë chu chinga jan xcusun xi camá ne, cavanga cha quiyi casua cha camachaya rë nandya cojo ranchun xcusun vëhë. ³⁵ Hya xi camá ne, xuta jan ne, cavetju xu me quiyi cavutsejen me xcusun xi camá jan. Hane xi cavechútáha me Jesús ne, hacuaha cavéé me cha xi cavetju xitsehen xahsen rë jan, yaja xu cha ngu tsjian, hacuaha ha cavéjña chihin cjuatacun rë cha, tacun cha tiña ntsacu Jesús. Hane xuta jan ne, jemu catsacjun me camá. ³⁶ Hane xuta xi cavéé xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi

caxinchá xitsehén xahasen rē jan. ³⁷ Hya xi camá ne, yéjé xuta tséhē ladu tséhē nandya Gadara ne, cafehya xu me cojo Jesús xi cuetjuxin Jesús tséhē xuta xi cuacun jan ta, tséhē xi jemu catsacjun camaha ni yéjé me camá. Hane ngajan xi Jesús cojo xuta ladu rē me ne, cavisehen xu me barcu sehe cavuya nga me ngunda vihi. ³⁸ Hane chaja sa xi cjue Jesús ne, cha xi cavetju xitsehén xahasen rē jan ne, cafehya cha cojo rē me xi cjue cha cojo rē me. Peru Jesús ne, catsinguijnetaha xu me cjua cojo rē cha, cachja me cuitjin:

³⁹ —Tuyun tjangun ndya nuju ne, hacuaha tinújun cojo xuta tséhē cjuandaja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavetsihin catsuyiyhiya casuacuenda cha xuta jingujyé ni ngajní nandya yéjé ni cjuandaja xi cuacun casahmi Jesús cojo cha.

Catsicuya Jesucristu cjuahñu rē quihndi rē Jairo hacuaha camandaja na xi casatëtsja tsjian rē Jesucristu

⁴⁰ Hya xi cavuya Jesús ngunda vihi ne, yéjé ni xutacjín jan ne, jemu ndaja cafahatsja xu me Jesús ta, tséhē xi hatuxa siuya me me. ⁴¹ Hane hora věhē ne, canduva xu ngu me xi hmí rē Jairo, me xi má xutaxa rē yungun. Hane quiji caticjaxcun xu me xcun Jesús. Hane cafehya me favor cojo Jesús xi cjue Jesús ndava me ta, ⁴² tséhē xi me věhē ne, tjin xu rē me ngu na lihndi xi quihndi ngu tséhē me. Hane na lihndi vě ne, sacuaha tejó na nu. Hane meje cueya xu na.

Ngajan xi Jesús ne, quiji xu me. Hane ngajní cjui me ne, jemu tivehnchun xu xuta me.

⁴³ Hane ngu na jan ne, tjin rē tejó nu xi yaha rē na chíhin xahmajni. Hane cafë tujún rē na cavechji na xcun doctor. Peru tsajin xu yo camá cafahaxin chíhin xi má rē na. ⁴⁴ Hane xi quiji tiña na táha ngaxtun Jesús ne, quiji na casatëtsja na ntsacu tsjian rē me. Hya xi camá xu ne, ha tu ñahñu cavasen xi vanga rē na jni. ⁴⁵ Ngajan xi Jesús ne, cachja xu me cuitjin:

—¿Yo xi casatëtsja ná? —Cuatjin xu cachja me.

Hane xi cachja yéjé xuta xi hacuiin me casatëtsja me ne, sehe cachja xu Pedru cuitjin:

—Tatá, xutacjín ne, tivehnchun nuju me, hacuaha hisca titsivaha nuju me. —Cuatjin xu cachja Pedru.

⁴⁶ Peru Jesús ne, cachja nga xu me cuitjin:

—Peru tjin yo xi casatëtsja ná ta ngahan ne, camachaya ná xi cavetju ná hitsé ngahñu.

—Cuatjin xu cachja Jesús.

⁴⁷ Hane xi vutsejen na xi cumaji seyahma na ngajní rē xuta ne, ña fatsé xu na quiji caticjaxcun na xcun Jesús. Sehe catsinguixi na xcun yéjé ni xuta mé má cuatjin quiji na casatëtsja na Jesús, cojo tséhē xi ngutjen ni camandaja na. ⁴⁸ Sehe ngajan xi Jesús ne, cuitjin cachja xu me cojo rē na:

—Ngayun tsan ne, camandaja ngayun ta, tséhē xi camangutacún cojo ná. Cuma cuangun cojo cjuasua. —Cuatjin xu cachja Jesús.

⁴⁹ Tu tichja cuaha xu Jesús cojo na xi camandaja jan ne, cafehe nga ngu me xi canduva me tséhē ndava xutaxa rē yungun jan, hane cuitjin xu cachja me cojo xutaxa rē jan:

—Quihndi nuju ne, ha cahme na. Ha quihndé xicatuhunndyuun rē maestru. —Cuatjin xu cachja me.

⁵⁰ Hane hya xi cahndé Jesús cjua věhē ne, sehe cachja xu me cojo xutaxa rē jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na.

—Cuatjin xu cachja me.

⁵¹ Hya xi camá xu ne, xi cafehe Jesús ndava xutaxa rē yungun jan ne, casuaain me cahndé xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rē nima lihndi jan cuisehen me cahntsua ndihya. ⁵² Hane yéjé ni xuta ne, hisca chja hisca jihnda xu me tséhē nima jan. Ngajan xi Jesús ne, cuitjin xu cachja me cojo xuta jan:

—Ha quihndé xicachjhndyuun. Na lihndi vě ne, hacuiin cahme na ta jiñafé na.

—Cuatjin xu cachja me.

⁵³ Peru xuta jan ne, tu cavejnucéë xu me Jesús ta, tséhë xi vëëndaja me xi cahme jain nima. ⁵⁴ Hane xi cavisehen Jesús hiscan jiña nima lihndi jan ne, sehe quiji me cafaha me tsja, sehe ndaja hiñu cachja xu me cuitjin:

—¡Tisatjinhngue, tsan! —Cuatjin xu cachja me.

⁵⁵ Hya xi camá xu ne, cavuya hasen rë nima, sehe ngutjen ni cavisatjehnga na. Hane sehe cavitexa xu Jesús xi sua xuta rë na lihndi jan niñu sinë na. ⁵⁶ Hya xi camá xu ne, xutacha rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

9

Catsingatju Jesucristu tejó xuta ladu rë me xi cuichja cjuandajyihí rë Nina

¹ Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhë cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me. ² Hya xi camá xu ne, sehe catsingatju Jesús me xi sua me cumachaya rë xuta tséhë gubiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me. ³ Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin niñu, hacuiin tujún, hacuaha hacuiin jo tsjian ngahma chuhun jima ngu ngayun. ⁴ Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tséhë nandya vëhë. ⁵ Hya xi xuta tséhë ngu nandya cjuahatsjaain nuju me ne, xi cuetjun tséhë nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

⁶ Sehe ngajan xi cavetju xu xuta ladu rë Jesús jan, quiji catsuyiyhiya me yëjë ni nandya tséhë distritu Galilea, casua me camachaya rë xuta tséhë cjuandajyihí xi chja tséhë gubiernu xi sahmi Nina hacuaha casahmi me xi xuta hmu rë ne, camandaja xu me jingujyé ni ladu vëhë.

Hvíin xuta yo xi Jesucristu

⁷ Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tséhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu. ⁸ Ngujo nga me ne, chja me ta profeta Elías xi cavuya, hane yahnga nga me ne, chja xu me ta ngu nima profeta xi hacjahi, xi cavéjña hatséë nixtin ne, handasa cahme ne, peru cavuya cjuahñu. ⁹ Peru Herodes ne, catsingataha cacun xu me cuitjin: “Nima Juan ne, ha cavitexa xi catisun rcu. Peru quihndë ¿yo rë cha xi cuajyihí vë xi jemu cjín cjua nuhya rë tséhë cha?” Cuatjin xu catsingataha cacun me. Jemu casahmi xu me ngujyé xi scuëë me Jesús.

Catsicjen Jesucristu hñú mil xihin

¹⁰ Hane xi cavuya xu apóstol tséhë hiscan xi quiji me jan ne, sehe casuacuenda xu me Jesús xcusun xi casahmi me. Ngajan xi Jesús ne, quijicojo xu me suvá ni apóstol jan ngu cahndé xín, tiña tséhë ngu nandya xi hmí Betsaida. ¹¹ Peru xi camachaya rë xutacjín jan ne, quijitjengui xu me Jesús. Hane Jesús ne, jemu ndaja cafahatsja me xuta jan, hane sehe cachja me cojo xuta jan tséhë gubiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

¹² Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjín vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndé xi cuiyuju me hacuaha cuanguise me xi sinë me ta, tséhë xi jemu xín tséhë nandya hiscan xi nechantahan vi. —Cuatjin xu cachja apóstol.

¹³ Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me. —Cuatjin xu cachja me.
 Ngajan xi apóstol ne, cafayangui xu me cuitjin:
 —Hñú tutu pan cojo jo ti tjin naja. ¿Há cuanguin chíhin niñu xi sinë yéjë xuta xi cuicun vi ni? —Cuatjin xu cachja me.

¹⁴ Cuatjin cachja me ta, tséhë xi ngajni rë yéjë xuta xi siutahá jan ne, sacuaha hñú mil má xuta xi xihin. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuji me sacuaha yachantë me ngu ngu cahndé.
 —Cuatjin xu cachja me.

¹⁵ Ngajan xi xuta ladu rë Jesús jan ne, cuatjin casahmi me, hane caviyuju xu yéjë xuta.

¹⁶ Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatélanga me ti jan, sehe casua xu me cojo xuta ladu rë me xi cjue sua rë me xutacjín jan. ¹⁷ Hane xuta ne, yéjë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

Catsinguixi Pedru yo Jesucristu

¹⁸ Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjín jan ne, yo ngahan? —Cuatjin xu cachja me.

¹⁹ Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta xi hacjahi, xi cavéjña hatsëe nixtin, xi handasa cahme ne, peru cavuya cjuahñu.
 —Cuatjin xu cachja xuta ladu rë Jesús.

²⁰ Sehe Jesús ne, cuitjin xu cavinenguise nga me:

—Hane ngayun ne, ¿mé nújun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin. —Cuatjin xu cafayangui Pedru.

Cachja Jesucristu xi tsiquehen xuta me

²¹ Peru Jesús ne, cavitexa xu me xuta jan xi tsajin camahani yo xi cuichja cojo me cjuatacun jan. ²² Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjín cjuañihi cuátju cuma; xuta changá cojo nahmi xi matitjun tséhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

²³ Hane sehe cavuya cachja nga me cojo yéjë ni xuta jan cuitjin:

—Sá xi tjin yo xi meje rë xi cuma xuta ladu naha matsejen ne, ha quihndé mijí rë xi sahmi hacutjin xi meje rë suvá matsejen ta nchunchujun ni matsejen ne, catejñahñu xahasen rë xi cjuecojo ndiya naha, handasa hisca cueya xcun cru. ²⁴ Cuatjin matsejen ta, tséhë xi yo xi meje cjuenduju cojo ngasunhndë rë cojo cjuatacun rë suvá matsejen ne, cuechintaain cjuahñu xatsë. Peru yo xi cuatju cjuañihi o hisca cueya ngatsë naha matsejen ne, vëhë xi cuechútáha cjuahñu xatsë. ²⁵ ¿Mé machjirëhë rë yo xi sacú rë yéjë cjuanchina rë ngasunhndë sá xi cueya hacuaha cuma castigu? ²⁶ Machjiriin matsejen ta, tséhë xi yo xi ma sava rë ngatsë naha cojo ngatsë rë cjua naha matsejen ne, ngahan xi Quihndi rë Xuta Jain ngahan matsejen ne, hacuaha cuma sava ná tséhë hya xi cuinduva cojo hasen ndajyihi naha hacuaha tséhë Nahmi naha hacuaha tséhë ángel xi vejña tséhë me. ²⁷ Nguehe cuichjá cojo nuju cjuaquixi matsejen ta tjin yahnga ngayun xi sechun nguehe xi cueyuun jinguyéjë rë xi cjëe chun gubiernu xi sahmi Nina. —Cuatjin xu cachja Jesús.

Ñahñu camatsejen nima Moisés cojo xutachanga xi hmí rë Elías visiajmi cojo Jesucristu

²⁸ Cuitjin camá nga xu ngundiya hya xi cavatju sacuaha jyin nixtin xi cavicuya Jesús cjua vëhë. Quijicojo me Pedru cojo Juan cojo Jacobo quijiniji xu me ngu ndetjún xi sahmi me oración rë me. ²⁹ Hora xi tisahmi xu Jesús oración rë me ne, xcun me ne, cavindeya xcusun rë. Hane tsjian rë me ne, jercu tu tyava camahani camá, ña setí jyihi. ³⁰ Hacuaha camatsejen xu jo xihin hinchacun visajmi cojo rë me. Xihin jan ne, hacui xu nima profeta Moisés cojo profeta Elías. ³¹ Me xi cuacun vëhë ne, camatsejen me cojo ngu hasen ndajyihu, tivisiajmi xu me tséhë cjuaveya xi hatuxa tjin rë xi cuechútáha Jesús ngajan Jerusalén. ³² Peru Pedru cojo jo sa me xi yahnga jan ne, ha siufé me, tséhë xi jercu nijñá rë me. Peru xi cavascandaja xu rë me ne, cavëë me hacutjin jercu setí camahani tsejen hiscan secun Jesús, hacuaha cavëë xu me jo me jan hinchacuntangun me cojo Jesús. ³³ Hya xi camá ne, hora xi tivetjuxin me xi cuacun vë tséhë Jesús ne, sehe cachja xu Pedru cojo Jesús cuitjin:

—Tatá. Tu ma rë xi nguehe nechin ne, nihñi jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin xu cachja Pedru, peru hisca hviín me mé xi chja me.

³⁴ Hane hora xi tichja xu Pedru cuatjin ne, canduva ngu yufí casahmi tjahnguen rë tséhë me. Hane jemu catsacjun me camá xi caxinchavasen me tséhë yufí jan. ³⁵ Hya xi camá ne, canuhya xu rë ngujo cjua xi cavetju ngajñi yufí jan xi cachja cuitjin:

—Cha vihi xi Quihndi naha cha, cha xi ngahan cavejñá cárden xi tsingáju. Tinuhyun cjua xi chja cha. —Cuatjin xu cachja cjua jan.

³⁶ Hane xi cavatju cachja cjua jan ne, Jesús ne, camasuvá sa me secun me. Hya xi camá xu ne, jyan xuta ladu rë Jesús jan ne, tu cavyujujuuu ni me. Hane nixtin hya ne, cachjaain camaha xu ni me cojo hisca ngu tséhë xcusun xi cavëë me.

Casahmi Jesucristu xi camandaja cha lihndi xi jiya xitsehen xahsen rë

³⁷ Cuitjin camá nga xu camá nchujun hya xi canduvajne Jesús tséhë ndetjún cojo jyan xuta ladu rë me jan. Tjercu cjín camahani xuta canduvatjengui xu rë me ndiya. ³⁸ Hane ngajñi rë xutacjín jan ne, cavetjuyñi ngu xihin xi jercu cajindaya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha. ³⁹ Hane cuitjin sahmi ngu xitsehen cojo rë cha: faha rë cha, hane tu ñahñu jindaya, sehe vitsuneya rë cha, ña vetju natyaxu hntsua cha, hane hisca hya xi ndiya cjuë cha ne, sehe vetjuxin tséhë cha. ⁴⁰ Xuta ladu nuju, caféhya rë me favor xi cuaxëxin me, peru camaji cavaxëxin me. —Cuatjin xu cachja xihin jan cojo Jesús.

⁴¹ Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tséhë ndiya ndajyihu ngayun. ¿Jani hisca hya xi tjin ná xi cuitejña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

⁴² Hane hora xi tijima tiña xu cha lihndi jan tséhë Jesús ne, xitsehen ne, catsiticja rë cha, hacuaha vitsuneya rë cha. Hya xi camá ne, cavatécja Jesús tséhë xitsehen, hane casahmi me xi camandaja xu cha lihndi jan. Sehe casua me cha cojo nahmi rë cha. ⁴³ Hane yéjë ni xuta jan ne, jemu quijircun camaha xu ni rë me xi cuatjin yéjë hnga Nina cojo Hasen rë me.

Cachja nga Jesucristu xi tsiquehen xuta me

Hane jinguyéjë rë xi cuatjin tifircun rë xutacjín jan tséhë yéjë ni xcusun xi sahmi Jesús ne, cachja xu me cojo xuta ladu rë me cuitjin:

⁴⁴ —Ndaja tetuhunrcun cjua xi tichjá cojo nuju vi: Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

⁴⁵ Peru xuta ladu rë Jesús jan ne, cavijnii rcu me mé vijne cjua jan ta, tséhë xi casetsa xu rë cjuatacun rë me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vijne cjua vëhë.

Yo xi matitjun

⁴⁶ Ngu nixtin jan ne, cavetsihin sacuaha xi meje scaanya xu xuta ladu rë Jesús ngajñi rë me yo xi hitsë sa matitjun. ⁴⁷ Peru Jesús ne, xi ha vëë me hacutjin tsingataha cacun xuta ladu rë me jan ne, sehe cafaha me ngu lihndi cavisecun me ndaya rë me, ⁴⁸ sehe cachja xu me cojo xuta ladu rë me jan cuitjin:

—Tu yo ni xi cjuahatsja rë lihndi vihi tsëhë xi ladu naха má ne, hacuaha hora vëhë cjuahatsja ná ngahan. Hacuaha xi cuatjin cjuahatsja ná ngahan ne, hacuaha cjuahatsja rë Nina xi catsingatju ná. Hane tu yo ni xi má nuju xi ma tjengui tsëhë ngajñi nuju ngayujun ni ne, vëhë xi matitjun xi má rë Nina. —Cuatjin xu cachja Jesús.

Xuta xi hacuiin condra nuju má me ne, hatuxa favor nuju fi me

⁴⁹ Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaha xi suvun catuhun rë me xá. Hane canúijin cojo rë me xi ha quihndë sahmii me cuatjin ta, tsëhë xi me vëhë ne, tsuyiyihintjenguiin me ngayun sacuatjin niji ngayin. —Cuatjin xu cachja me.

⁵⁰ Hane Jesús ne, cuitjin xu cafayangui me:

—Xicanujuun cojo rë me cuatjin ta, tsëhë xi xuta xi hacuiin condra naja má me ne, hatuxa favor naja fi me. —Cuatjin xu cachja Jesús.

Catsingatiin xuta distritu Samaria Jesucristu

⁵¹ Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rë me xi cjue me ngajan Jerusalén. ⁵² Vëhë xi catsingatju titjun xu me jo xuta ladu rë me. Xi quiji me ne, cafehe me ngu nandya tsëhë xuta Samaria, xi cuanguise me cahndé xi cuejña Jesús cojo xuta ladu rë me. ⁵³ Peru xuta jan ne, cafahatsjaain xu me Jesús ta, tsëhë xi Jesús ne, hatuxa tjin cacun me xi cjue me hisca Jerusalén. ⁵⁴ Peru hya xi camachaya xu rë Jacobo cojo Juan, xuta ladu rë Jesús, cjuá vëhë ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëe nixtin? ¿Há cuitexan xi cuinduva ndihi tsëhë ngahnga, tsicjé rë xuta xi cuicun vi? —Cuatjin xu cachja me.

⁵⁵ Ngajan xi Jesús ne, cavuya vutsejen me xuta ladu rë me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tsëhë nuju. ⁵⁶ Ngahan xi Quihndi rë Xuta Jain ngahan ne, hacuahnandya xi tsicjé xuta ta xi canduvá ne, xi cuáxetjé me. —Cuatjin xu cachja Jesús.

Sehe quiji xu me ngu nga nandya.

Xuta xi camameje cjue cojo Jesucristu

⁵⁷ Hane ndiya cjui Jesús cojo xuta ladu rë me ne, cachja xu ngu me jan cojo rë me cuitjin:

—Tatá. Tu yani ni xi cuangun ne, cjué cojo nuju. —Cuatjin xu cachja me.

⁵⁸ Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, Peru ngahan xi Quihndi rë Xuta Jain ngahan ne, hisca ndya naха tsajin. —Cuatjin xu cachja me.

⁵⁹ Cachja sa xu me cuitjin cojo ngu nga xuta jan:

—Nduvun, cuanguen cojo ná. —Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndé, titjun cjué xi seyaniji nahmi naха. —Cuatjin xu cachja ngu nga xuta jan.

⁶⁰ Ngajan xi Jesús ne, cuitjin xu cachja me:

—Xuta xi sacuaha xi cahme cjuatacun rë me xi sahmicuendaain me Nina ne, me vëhë catinchaniyi me nima rë me. Peru ngayun ne, tángun tuhun cumachaya rë xuta tsëhë gubiernu xi sahmi Nina. —Cuatjin xu cachja me.

⁶¹ Ngu nga xuta ne, cachja xu me cojo Jesús cuitjin:

—Tatá. Ngahan ne, hacuaha cjué cojo nuju. Peru tuhun ná cahndé, cjué tsinguijne-taha cjua cojo xuta naha. —Cuatjin xu cachja xuta jan.

⁶² Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rë Nina sehe cumangu cumajo cacun me ¿há cjue, há cjuiin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vëhë xi cuisecoo me Nina hiscan xi sahmi Nina gubiernu. —Cuatjin xu cachja Jesús.

10

Catsingatju Jesucristu jyanchan tejó xuta ladu rë me xi cuichja cjuandajyihu rë Nina

¹ Xi cavatju xu vëhë ne, sehe casuaxa Nai naja jyanchan tejó sa xuta ladu rë me, sehe catsingatju titjun me chuva jo chuva jo xuta jan yëjë ni nandya cojo yëjë ni cahndé xi catsingataha cacun Jesús xi sehe cjue me. ² Hane cuitjin xu cachja me cojo:

—Jemu tjin camahani xuta xi meje cuiñuju me cjua rë Nina, peru me xi sua cumachaya rë xuta ne, jemu chuva má me. Vëhë xi meje rë xi chjahyun rë Nina favor xi tsingatju me me xi cjue sua cumachaya rë xuta cjua rë Nina. ³ Tángun ni. Ngahan titsingátu nuju ngayun xuta jeya ngajñi rë xuta hnga cacun, sacuaha cjue ngu chu hnditsángä ngajñi rë chu cjan rë. ⁴ Xicachjuun tujún, xicachjuun changa, hacuaha xicachjuun chuxinxte. Xicavisiajmuu cojo xuta hora xi sacu xingun cojo rë me ndiya. ⁵ Hane tu jarë ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun. ⁶ Hane sá xi ndihya vëhë tjin quihndi tséhë cjuajeya ne, hacuaha sacú rë me cjuajeya. Peru sá xi hacuiin quihndi tséhë cjuajeya xi siu jan ne, sacuin rë me. ⁷ Hane xi cuisuhun ngu ndihya ne, ha ngajan ni tinechun, xinu siuhun cojo rë me mé xi sua me. Cuatjin nihñu ta, tséhë xi ngu xuta xi sahmi me xá ne, vechú chuva rë xi sacú chji rë me. Vëhë xi mijí rë xi cuangun nguehe cuangun ngajan cuinechun. ⁸ Hane tu jarë ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu, ⁹ hacuaha nihñu xi xutahmu rë tséhë nandya jan ne, cumandaja me, hacuaha cuitjin tinújun cojo yëjë xuta: “Ha camatiña nixtin xi cuma nuju xi sahmi Nina gubiernu.” Cuatjin tinújun. ¹⁰ Hane tu jarë ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cuetjunkun tséhë nandya vëhë ne, cuitjin tinújun cojo xuta: ¹¹ “Hisca chojo rë ngajñi nandya nuju xi cavaqui rë ntsacuin ne, cuitsuni cojo sa xi cuma tsejen xi ngayun cún nuju. Peru meje rë xi cijne rcun xi ha camatiña nixtin xi sahmi Nina gubiernu.” Cuatjin tinújun. ¹² Cuichjá cojo nuju ta hya xi cuechú nixtin xi tsichuva Nina xuta tséhë jyé rë me ne, hitsë sa jyé castigu cuatju xuta tséhë nandya xi fahatsjaain nuju, xi cuma rë xuta tséhë nandya Sodoma xi jercu tu casahmi camahani me cjuatseen.

Cjuachoho xi cuma rë ciudad xi camacjaain rë cjua rë Jesús

¹³ ’Jemu chojyihu tséhë xuta nandya Corazín! ¡Hacuaha jemu chojyihu tséhë xuta nandya Betsaida! Jemu chojyihu tséhë me ta, tséhë xi miji tsindeya me cjuatacun rë me, handasa cavëë me cjuarcun xi casahme ngajñi rë me. Xuta nandya Tiro cojo xuta nandya Sidón ne, hisca hacuiin xuta ladu rë Nina má me sacuatjin rë xuta Corazín cojo Betsaida. Peru sá xi xuta Tiro cojo Sidón cavëë me cjuarcun xi cuacun vë ne, ha catsindeya me cjuatacun rë me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja, cojo sa xi cuma tsejen xi jemu choho má Jain rë me tséhë jyé rë me. ¹⁴ Vëhë xi hya xi tsichuva Nina yëjë xuta tséhë jyé rë me ne, xuta nandya Tiro cojo xuta nandya Sidón ne, hitsë sa chúva castigu cuatju me cuma xi cuma rë xuta Corazín cojo xuta Betsaida. ¹⁵ Hane xuta nandya Capernaum ne, ¿há cjue me hisca ngahnga hiscan tacun Nina? ¡Hacuiin! Hatuxa cjue me nduchin, cahndé hiscan ma hasen rë nima castigu.

16 'Xuta xi cuihndé me tsujun ne, hacuaha tivihndé me tsahan. Hane xuta xi tsitjungui nuju me ne, hacuaha titsitjungui me ngahan. Hane xuta xi tsitjungui ná me ne, hacuaha titsitjungui me Nina xi catsingatju ná. Cuatjin xu cachja Jesús cojo xuta ladu rë me, sehe cavetju xuta ladu rë me jan quiji me.

Cavuya xuta ladu rë Jesucristu xi jyanchan tejó

17 Hyá xi camá ne, xi cavuya xu xuta ladu rë Jesús xi jyanchan tejó jan ne, jercu sua rë xahasen rë me. Hane cuitjin xu cachja me cojo Jesús:

—¡Tatá! ¡Xi veyinnanguin ñihi nuju hora xi tinihñí xá xi cavitexun niji ne, hisca xitsehén vihndé tsijin! —Cuatjin xu cachja xuta xi cuacun jan.

18 Sehe ngajan xi Jesús ne, cuitjin xu cachja me cojo xuta jan:

—Jinguyéjé rë xi tivutsején ngahnga hiscan tacun Nina ne, cjanengui Satanás sacuaha camá ni ngu ndihichuhún. Hane cuatjin cahvë xi tichjahátáha rë gubiernu xi sahmi Satanás. **19** Chutsujun ni, ngahan casuá nuju chuva rë xi tsajin mé cuatjun cuma, handasa nunú chu yé o sá nunú chu naya o sá xi suvá camahani Satanás choho meje sahmi cojo nuju. **20** Hacuiin ndaja cuma nuju tséhë xi vihndé xitsehén tsujun ta xi meje rë ne, ndaja catama nuju tséhë xi ha quitaháxujun ñihi nuju ngajan ngahnga. —Cuatjin xu cachja Jesús cojo xuta ladu rë me jan.

Casahmi jyé casahmi hnga Jesucristu Nina

21 Hane ha hora vëhë ni ne, Hasen rë Nina casahmi xi jemu sua camahani camá rë xahasen rë Jesús, sehe cachja xu me cuitjin cojo Nina:

—Ngayun nahmi naha ne, sahmejéyé sahmehnga nuju cojo Hasen nuju, ngayun xi Nai rë ngahnga cojo nangui ngayun, tséhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi hvíin camahani. Ngayun nahmi naha, cuatjin canihñu ta, tséhë xi cuatjin xi cachuya nuju. —Cuatjin xu cachja Jesús cojo Nina.

22 Hane xi cojo yéjé ni xuta ne, cuitjin xu cachja me:

—Yéjé ngarca ni matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin hisca xi ngu xi vëë yo xi Nahmi naha matsejen ta suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. —Cuatjin xu cachja me cojo yéjé xuta.

23 Cavuya vutsejen nga me hiscan siu xuta ladu rë me ne, sehe cachja xu me cojo suvá ni me xi cuacun vëhë cuitjin:

—Jemu ndaja tsujun ngayujun ni xi tichutsujun xcusun xi tijima nixtin vihi. **24** Nguehe cuichjá cojo nuju ta jemu ndaja tsujun ta, tséhë xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuiñuju me cjua xi tivisiñuju ngayun, Peru casacuiin cavisiñuju me ta, tséhë xi cjëë cuma xcusun vëhë nixtin hya. —Cuatjin xu cachja Jesús cojo xuta ladu rë me.

Ejemplu tséhë cha Samaria xi casahmi cjuandaja

25 Ngundiya nga hya xi tacun xu Jesús cojo xuta ne, casecun ngu cha xi vicuya cjuachacun cavinenguise xu cha cuitjin xi cjuahachuva cha me:

—Maestro. ¿Mé ndatjin xi sahme cojo sa xi cuéchutáha cjuahñu xatsë xcun Nina? —Cuatjin xu cavinenguise cha me.

26 Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rë Moisés? ¿Mé xi chutayun jan? —Cuatjin xu cachja me.

27 Hane xi cafayangui cha ne, cuitjin xu cachja cha:

—“Meje rë xi nihmutacún Nina naja cojo nguñajatacún, cojo yéjé xahasen nuju, cojo yéjé ngahñu nuju, cojo yéjé cjuatacun nuju, hacuaha cuatjin nihmutacún xingun sacuatjin hmutacún suvun yojo nuju.” —Cuatjin xu cachjasun cha cjua rë ley.

²⁸ Hane cuitjin xu cachja Jesús cojo cha:
 —Cjuaquixi cjua xi canújun. Cuatjin nihñu, sehe cuechuntuhun cjuahñu xatsë.
 —Cuatjin xu cachja Jesús.

²⁹ Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rë cha ne, cuitjin xu cavinenguise cha cojo Jesús:
 —¿Yo xi xingueen ni? —Cuatjin xu cachja cha.

³⁰ Hane ngajan xi Jesús ne, cojo ngu ejemplu cafayangui xu me tséhë cha cuitjin:
 —Cuejña ne xi ngu xuta jan ne, cavetju me tséhë nandya Jerusalén ne, cjui me nandya Jericó. Hane ndiya cjui me ne, cavechútáha ngujo cha chéjë me. Hane cafahatahá cha yéjë tséhë me xi yaha me, sehe cavaja cha me. Ña catsiquehenñaja cha me, hane sehe cavanga cha. ³¹ Hya xi camá ne, hora vëhë canduva ngu nahmi cavatju me ndiya vëhë, hane xi cavëë me xuma xuta xi casacuhmu rë jan ne, tjehen ndiya ladu xingu cavatju me quiji me. ³² Ha chuva vëhë ni ne, cafehe ngu sangrista cahndé vëhë. Hane xi cavëë cha xi jiña me xi casacuhmu rë jan ne, cavetahaxin cha hitsë ndiya rë cha sehe cavatju cha quiji cha. ³³ Peru ngu cha tséhë distritu Samaria xi quiji cha ndiya vëhë ne, cafehe cha hiscan jiña xutahmu rë jan. Hane xi cavëë cha me ne, jemu camayuma rë cha me. ³⁴ Hane xi quijivaha cha xcun me ne, catsirqui cha me, cavitejnu cha aceite cojo xan hiscan casacuhmu rë me sehe catsitjinguiya cha me tsjian. Hya xi camá ne, sehe catsiquijin cha me naxin rë cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu. ³⁵ Hane xi camá nchujun jan ne, cavaxë cha jo denario, tujún xi faha ngu mosu xi sahmixa jo nixtin, sehe casua cha me xi nai rë ndihya jan, sehe cachja cha cojo rë me cuitjin: “Nihñu cjuandaja ne, chjuhuncuendun xuma xutahmu rë vi. Hane xi quisun sa nicujun tséhë xcun tujún xi suá nuju vi ne, xi cuya ne, sehe cuechjë tsujun.” Cuatjin cachja cha Samaria.

³⁶ Ngajan xi Jesús ne, xi cuatjin cajnetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jarë tséhë catsijyan xuta xi cuacun vë xi má nuju xi cjuaquixi xi camá xicjin me xi cavanguihmu chéjë jan? —Cuatjin xu cachja Jesús.

³⁷ Ngajan xi cha xi vicuya cjuachacun jan ne, cuitjin xu cafayangui cha tséhë Jesús:
 —Cha xi ngatsë rë cjuayuma ne, casahmi cjuandaja cojo me xi casacuhmu rë jan.
 —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndë xi cuangun ne, hacuaha cuatjin nihñu. —Cuatjin xu cachja Jesús.

Quiji Jesucristu ndava na Marta

³⁸ Hane xi cjui sa xu Jesús cojo xuta ladu rë me ne, xi cavisehen me ngu nandya jan ne, ngu na xi hmí rë Marta ne, cafahatsja na Jesús ndava na. ³⁹ Na Marta jan ne, tjin ngu tichja na xi hmí rë María. Hane na María jan ne, quiji xu na cavéjña na táha ntsacu Jesús, tivisiñuju na cjua xi tivicuya me. ⁴⁰ Peru na Marta ne, jemu cjín xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuaain nuju xi na tichja ne, cavejñasuva ná na cojo xá xi tacunvasen tisahme? Tinújun cojo rë na, catisecoo na ngahan. —Cuatjin xu cachja na.

⁴¹ Ngajan xi Jesús ne, cuitjin xu cafayangui me tséhë na:
 —Marta, jercu marcun nuju tséhë jemu cjín xcusun. ⁴² Peru ngu xcusun ni xi sahmi ngujyë. Na María ne, cavaxijin na xcusun xi ndaja vë, hane hacuiin chjahátahá rë tséhë na. —Cuatjin xu cachja me.

Cavicuya Jesucristu hacutjin meje rë xi nihña oración

¹ Cuitjin camá xu ngundiya hya xi tisahmi Jesús oración rë me ngu cahndé jan. Hane xi cajnetaha casahmi me oración rë me ne, ngu xuta ladu rë me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rë me. —Cuatjin xu cachja me.

² Ngajan xi Jesús ne, cuitjin xu cafayangui me:

—Hya xi nihñi oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndé chjihinrcuin nuju.

Meje niji xi cuinduvun nihñi niji gubiernu.

³ Nchunchujun ni tuhun niñu xi xiní.

⁴ Ninchatuhun niji tséhë jyé xi jemu quitjin ta
ngayin suvin ne, hacuaha tininchatihiñ rë
yëjë ni xuta xi quitjen me jyé tsijin.

Xicatuun cahndé xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu rë me.

⁵ Hya xi camá ne, cachja nga xu Jesús ngu ejemplu cojo xuta ladu rë me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo rë me cuitjin: “Amigu, nihñu favor tuhun jyan niñu scuxétaha ta, ⁶ tséhë xi ngu amigu naha cafehe ndya naha xi cjui me ngu nangui, hane tsajin ná mé xi suá sinë me.” Cuatjin cuinújun cojo rë me. ⁷ ¿Há cjuayangui me tsujun cuitjin tséhë hisca cahntsua ndihya?: “Xicatuuhunndyuun ná ta tingotjo ndihya ne, ha tichjá, hacuaha quihndi naha ne, nguehe siufé cojo ná. Cumaji cuisátjenhnga suá nuju.” ¿Há cuatjin cjuayangui me tsujun? Hacuiin cuatjin. ⁸ Cuichjá cojo nuju ta handasa amigu nuju me, peru hacuiin ngatsë rë vëhë xi cuisatjenhnga me sua nuju me ta ngatsë rë xi ngajan cjui ngajan nduva cuinújun ne, cuisatjenhnga me sua nuju me ha tucutjin xi chjahyun. ⁹ Hacuaha cuichjá cojo nuju cuitjin: Chjahyun rë Nina, hane sua nuju me. Tinchunsun, hane sacú nuju. Tinújun, hane Nina ne, sua me cahndé cuisuhun. ¹⁰ Cuatjin nihñu ta, yëjë ni xuta xi fehya me ne, fahatsja me, hane yo xi vanguise ne, sacu rë, hane yo xi chja ne, sacu cahndé visehen.

¹¹ ’Tsajin ngu nahmi xi, hya xi quihndi rë me cjuehya ngu niñu ne, cahndé rë xi sua me ngu niñu ne, sua me ngu ndyojo, o sá xi hya xi quihndi cjuehya ngu chu ti ne, cahndé rë xi sua me ngu chu ti ne, sua me ngu chu yë, ¹² o sá xi hya xi quihndi cjuehya ngu chjoo ne, sua me ngu chu naya. ¹³ Ngayun xi tsehen cjuatacun nuju ne, ma tuhun rë quihndi nuju xcusun xi ndaja. Hitsë guan Nahmi naja xi tacun me ngahnga ta hitsë sa jercu meje sua me Hasen rë me cojo xuta xi cjuehya rë me. —Cuatjin xu cachja Jesús.

Cachja xuta xi Satanás casuaxa rë Jesucristu

¹⁴ Cavechú xu ngu nixtin xi cavaxéxin Jesús ngu xitsehen xi casahmi lihmi rë ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjín jan ne, jemu quijircun rë me. ¹⁵ Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vëhë casua rë cha xá xi vaxéxin cha xitsehen.
—Cuatjin xu cachja xuta jan.

¹⁶ Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga. ¹⁷ Peru Jesús ne, tséhë xi ha vëë me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tséhë ngu nandya ticjan me ngajni rë me cojo xicjin me ne, nandya vëhë ne, ha tivéjña xahva, hisca ndihya ne, tivixusun xcun xicjin. ¹⁸ Hacuanitjin ni sá xi Satanás scaan cojo xitsehen xi yahnga xi hacuaha Satanás má nai rë ne, tsichajá ngahñu rë xi vëhë matitjun. Cuatjin chjá ta, tséhë xi nújun xi Beelzebú casua ná xá xi vaxéxen xitsehen. ¹⁹ Peru sá xi Beelzebú casua ná xá xi vaxéxen xitsehen ne, hacuaha ha Beelzebú vëhë casua rë ngu ngu xuta ladu nuju xá xi hacuaha vaxéxin me xitsehen. Vëhë xi ha me vëhë ni cuichja me xi cuaaintjin xi nújun xi Beelzebú casua ná xá. ²⁰ Peru sá xi Nina

casua ná me xá xi vaxéxen xitsehen ne, ngajan matsejen xi gubiernu xi sahmi Nina ne, ha tivetsihin.

²¹ 'Satanás ne, tangun cojo ngu cha xi jemu hñu ngahñu rë. Hya xi ha ndaja tjin chjine cha cojo quicha rë cha xi sahmi cuidadu cha ndava cha ne, yéjé xcusun xi tjin rë cha ne, hacuaha ha ndaja cuidadu tjin. ²² Peru ngahan ne, tangun ngahan cojo ngu me xi hitsé sa jemu hñu camahani ngahñu rë. Hya xi me xi hitsé sa hñu ngahñu rë scaan me cojo cha xi hñu ngahñu rë jan hacuaha tsinguijne me cha ne, cjuahatahá me quicha xi vetaha cacun cha xi cuaxétje rë cha, hane sehe cuatécja me yéjé xcusun xi tjin rë cha jan ngajñi rë me cojo xicjin me.

²³ 'Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta. —Cuatjin xu cachja Jesús.

Xitsehen xi vuya

²⁴ Hya xi camá ne, Jesús ne, quijinduju sa xu cachja me cuitjin:

—Hya xi vetjuxin xitsehen tséhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndé hiscan xi cuejñajenda. Hane xi sacuiin rë cahndé hiscan cuejñajenda ne, cuitjin tsingataha cacun: “Cúya rë cjué ndya naha hiscan xi cavétjuxen.” Cuatjin tsingataha cacun xitsehen jan. ²⁵ Hane xi vuya fehe xitsehen jan cahntsua xahasen rë xuta jan ne, vutsejen xitsehen jan cahntsua xahasen jan sacuaha ngu ndihya xi caxtechy tyjahi tyjahi, hacuaha siundaja chichihin ngu tsé ngu xtí. ²⁶ Xi vutsejen xitsehen jan xi cuatjin jyihí jan ne, sehe fi jaha sa rë yatu sa xitsehen xi hitsé sa tsehen xi cuma rë vëhë ne, sehe visehen nga viyujucahndé jan. Peru xi ma ngascan ne, hitsé sa chojyihí tséhë xuta vëhë xi cuma rë titjún. —Cuatjin xu cachja Jesús.

Xuta xi ndaja Jain tséhë me

²⁷ Peru jinguyéjé rë xi tichja xu Jesús cjua vëhë ne, ngu na xi jiyajñi ngajñi rë xutacjín jan ne, cajindaya na cachja xu na cuitjin:

—Jemu ndaja tséhë chjuun xi catsin rë ngayun, hacuaha jemu ndaja tséhë ndanisin xi cavacuntuhun. —Cuatjin xu cachja na.

²⁸ Peru Jesús ne, cuitjin xu cafayangui me tséhë na:

—Quixi, peru hitsé sa ndaja tséhë xuta xi visiñuju me cjua rë Nina hacuaha vihndé me tséhë. —Cuatjin xu cafayangui Jesús.

Cafehyá xuta tsehen ngu seña xi sahmi Nina

²⁹ Vëhë ta jima tangun camaha sa xutacjín jan ne, cavetsihin cachja xu Jesús cuitjin:

—Ngayujun ni ngayun xuta tjé rë Israel tséhë nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaha seña xi catsingacun profeta Jonás hatséé nixtin.

³⁰ Sacuatjin rë profeta Jonás xi me vëhë camá me ngu seña xi cuma rë xuta nandya Nínive hatséé nixtin matsejen ne, ha cuanitjin ni ná ngahan xi Quihndi rë Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi. ³¹ Hya xi cuechú nixtin xi tsichuva Nina xuta tséhë jyé rë me matsejen ne, na xi cavitexa ngajan nangui Sabá hatséé nixtin matsejen ne, cjue cuinchajyé nuju na ngayujun ni ngayun xuta tjé rë Israel xi nechun nixtin vihi. Cuatjin sahmi na matsejen ta, tséhë xi jercu tu cjin camahani xi canduva na xi cuihndé na cjuatacun ndacun xi jercu tu ma camahani rë Salomón, me xi cavitexa rë xutachanga naja hatséé nixtin. Peru ha tejña ngahan nguehe sacuaha ngu seña xi hitsé sa vengui chji rë xi cuma rë Salomón.

³² Hacuaha hya xi cuechú nixtin xi tsichuva Nina xuta tséhë jyé rë me matsejen ne, yéjé xuta nandya Nínive matsejen ne, cjue cuinchajyé nuju me ngayujun ni ngayun xuta tjé rë Israel xi nechun nixtin vihi. Cuatjin sahmi me matsejen ta, tséhë xi me xi cuacun vëhë matsejen ne, catsindeya me cjuatacun rë me hya xi casua profeta Jonás camachaya rë me

cjua rë Nina. Peru ha tejña ngahan nguehe sacuaha ngu seña xi hitsë sa vengui chji rë xi cuma rë profeta Jonás. —Cuatjin xu cachja Jesús.

Ndihí rë yojo naja

³³ Hane xi quijindu sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rë me ngu ndihí matsejen ne, faha me veyahma me o sá xi faha me veya me ngahma ngu caxa matsejen ta faha me vejña me cahndé rë, cojo sa xi yëjë xuta xi visehen me hiscan setí ndihí jan matsejen ne, scuëe me hasen rë. ³⁴ Tuxcuun matsejen ne, vëhë xi sacuaha ndihí rë yojo naja. Vëhë xi hya xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuaha ma jñu cahntsua yojo naja. ³⁵ Ndandaja ningatuhuntacún matsejen ne, sacuaha hasen xi jiya cahntsua yojo nuju matsejen ne, ¿há hasen xi cjuaquixi jain?, o há tsajin ne, ¿há jñú? ³⁶ Quihndé matsejen ne, sá xi jingujuë ni yojo nuju jiya hasen, hisca xi hitsë jñú tsajin rë matsejen ne, jingujuë ni yojo nuju matsejen ne, jiya hasen sacuaha hya xi sahmi hasen tsajan hasen rë ngu ndihí. —Cuatjin xu cachja Jesús.

Cacjan Jesucristu cojo cha fariseo cojo cha xi vicuya cjuachacun

³⁷ Hane xi cajnetaha xu cachja Jesús ne, ngu cha fariseo ne, cachja cha cojo Jesús xi cjue sinë me cojo cha niñu. Xi cavisehen Jesús ndihya ne, quiyi xu me cafaha me cahndé rë me xcun maxë. ³⁸ Peru xi cavëë xu cha fariseo xcusun rë Jesús ne, jemu quijircun rë cha tséhë xi hacuiin titjun cavane xu me tsja me sehe sinë me niñu sacuaha vitexa xcusun rë xutachanga rë me. ³⁹ Ngajan xi Nai naja ne, cachja xu me cojo cha cuitjin:

—Ngayujun ni ngayun xuta fariseo ne, xcusun nuju xi nihñu tyjahi táha ngaxtun ni ngu vasu o sá xi ngu tyuva, peru cahntsua xahasen nuju ne, quitsë camahani rë cjuatsehen cojo cjuatacun xi nimuju yëjë ni xcusun. ⁴⁰ Sca nuju ngayun. Catijne rcun ta ha me xi casahmi ni táha ngaxtun ne, hacuaha ha me vëhë ni casahmi me táha cahntsua. ⁴¹ Peru xi hincha cahntsua ne, vëhë tuhun sacuaha caridad. Sá xi cuatjin nihñu ne, yëjë ni xcusun ne, tyjahi xi cuma nuju.

⁴² 'Peru jemu chojyihí tsujun ngayun xuta fariseo, tséhë xi ngayun ne, handasa nihñu cuidadu xi tuhun diezmu nuju hisca cojo nchurca cojo ruda cojo yëjë sa xcusun ndeya ne, peru nihñucuenduun xi nihñu hacutjin xi cjuaquixi cojo xingun, hacuaha nihñucuenduun xi nihmutacún Nina. Ngayun ne, meje rë xi ha canihñucuendun Nina, peru hacuaha hacuiin nichayun diezmu nuju vë.

⁴³ 'Hacuaha jemu chojyihí tsujun ngayun xuta fariseo, tséhë xi ngayun ne, jemu ndama nuju xi cuatjin satë nuju cahndé xi matitjun tséhë cahntsua yungun. Hacuaha jemu ndama nuju xi cuatjin fi chja xuta nina cojo nuju ngajan ngajñi ndetsin.

⁴⁴ 'Hacuaha jemu chojyihí tsujun ta, handasa matsijin ne, peru jemu chocun xahasen nuju. Vëhë xi tangun ngayun cojo tsjun xi hisca matsijin, hane xuta ne, hisca machayiñ rë me cjuí nduva me sune me xcun. —Cuatjin xu cachja Jesús.

⁴⁵ Ngajan xi ngu cha xi vicuya cjuachacun ne, cachja xu cha cuitjin cojo Jesús:

—Maestro, hya xi nýjun cjua vëhë ne, hacuaha cojo ngayin choho nýjun tsijin. —Cuatjin xu cachja cha.

⁴⁶ Hane Jesús ne, cuitjin xu cachja me:

—Hacuaha cojo ngayun cha xi vicuya cjuachacun, jemu chojyihí tsujun, tséhë xi vicuyun rë xuta jemu cjín xcusun xi jemu chja camahani cuma sahmichihin me, hane suvun ne, visecuún rë me hisca hitsë.

⁴⁷ Jemu chojyihí tsujun ngayun ta, tséhë xi ngayun ne, nindujun tsjun ndacun tséhë yëjë ni nima profeta xi xutachanga nuju catsiquehen me hatsëë nixtin. ⁴⁸ Ngayun suvun ningacun xi chuya nuju xcusun xi casahmi xutachanga nuju ta, tséhë xi ngu ladu ne, me vëhë catsiquehen me profeta xi cuacun vë, hane ngu ladu nga ne, ngayun nindujun tsjun rë.

⁴⁹ 'Véhë xi Nina, me xi jemu vechútaha cjuatacun rë me ne, cachja me cuitjin: "Tsingátju profeta cojo apóstol ngajñi rë xuta xi siu nixtin vihi, hane yahnga me xi cuacun vë ne, tsiquehen xuta me, hane yahnga me ne, sua xuta cjuañihí xi cuatju me xi cuacun vë." Cuatjin cachja Nina. ⁵⁰ Hane cojo chuva véhë ne, xuta xi siu nixtin vihi ne, me véhë cháha rë me tséhë cjuaveya rë yéjë profeta xi cahme hisca ntsacu cavetsihin ngasunhndë, ⁵¹ vetsihin cojo hisca cjuaveya rë xutachanga naja Abel vijnetaha cojo hisca cjuaveya rë xutachanga naja Zacarías, me xi catsiquehen rë xuta tiña ngasunscun hiscan ndatsen rë ndava Nina. Cuichjá nga cojo nuju ta yéjë cjuaveya xi cuacun vë ne, cháha rë xuta xi siu nixtin vihi.

⁵² 'Jemu choy়িhi tsujun, ngayun cha vicuya cjuachacun ta, tséhë xi cavejñuxun cjuatacun rë Nina. Canitjungun cjuatacun rë me, hacuaha hisca catuun cahndé xi sacú rë xuta xi meje rë me cjuatacun rë Nina jan. —Cuatjin xu cachja Jesús.

⁵³ Hane hya xi tivetju xu Jesús tséhë cahndé hiscan cajinë me niñu jan ne, cha xi vicuya cjuachacun cojo cha fariseo jan ne, jemu cjan rë cha, jemu cjín cjua cafahataha xu cha me, ⁵⁴ hacuaha jemu cavangui xu cha chuva rë hacutjin xi sacú rë cha ngu cjua rë me xi cuaintjin cuichja me.

12

Cjuandacha xi sahmi cha fariseo

¹ Jinguyéjë rë xi tichja sa xu Jesús cojo cha xi cuacun jan ne, jercu jima tangun camahani xuta, ña vehnchun xicjin me. Sehe ngajan xi Jesús ne, cavetsihin cachja xu me tjutjun cojo xuta ladu rë me cuitjin:

—Xicaninguisuhunjñuu cojo cha fariseo xi cuacun vë ta, tséhë xi cjuandacha xi sahmi cha ne, tangun cojo san rë pan xi hatuxa vitsojo ngajñi rë yéjë ni nahyu. ² Yéjë ni xcusun xi casetsangui ne, cuechú nixtin xi chjaháxin rë xi titsangui rë. Véhë xi yéjë ni xcusun xi hma ne, handasa sehmangui ne, peru cuechú nixtin xi cuetjucaa tsejen. ³ Yéjë ni cjua xi má hiscan jñu ne, cuechú nixtin xi cuinuhyá rë hiscan hasen. Véhë xi yéjë ni cjua xi má táha hma ne, cuechú nixtin xi cuinuhyá rë táha tsejen.

Yo xi meje rë xi rcún

⁴ 'Nguehe cuichjá cojo nuju, ngayujun ni. Xicarcuun xuta xi tsiquehen nuju me, hane ngaxtun véhë ne, ha quihndë tsajin mé sa xi cuma sahmi me cojo nuju. ⁵ Peru nguehe cuichjá cojo nuju yo xi meje rë xi rcún. Meje rë xi Nina xi rcún me. Me xi ngaxtun xi ha catsiquehen nuju ne, tjin rë me cahndé xi tsingatjenya nuju me hiscan xi má hasen rë nima castigu. Cuichjá nga cojo nuju ta hatuxa me véhë xi meje rë xi rcún me.

⁶ 'Chutsujun ta hñú chu nisë langa ne, jemu xtengui chji rë chu. Peru Nina ne, tsichayaain me hisca xi ngu chu. ⁷ Hacuaha ngayun ne, hisca tsjarcun xqui tjin rë Nina. Véhë xi xicarcuun ta, tséhë xi jima ngu ngayun ne, hitsë sa jercu vengui chji nuju xi cuma rë xi jemu cjín chu nisë vë.

Xuta xi tsinguixi me xi xuta ladu rë Jesucristu má me

⁸ 'Nguehe cuichjá cojo nuju ta yéjë xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rë Xuta Jain ngahan ne, tsinguixë xcun yéjë ni ángel rë Nina xi xuta ladu naha má xuta xi cuacun vë. ⁹ Peru yéjë xuta xi tsinguixi me xcun xuta xi yahnga xi hacuiin xuta ladu naha má me ne, hacuaha hacuanitjin ni tsinguixë ngahan xcun ángel rë Nina.

¹⁰ 'Hacuaha yéjë xuta xi choho chja me tsahan, ngahan xi Quihndi rë Xuta Jain ngahan ne, tsinchataha Nina me, sá xi cjuehya me cjuaninchataha. Peru yéjë xuta xi choho chja me tséhë Hasen rë Nina ne, tsajin cjuaninchataha xi cuma rë me.

¹¹ 'Hya xi xuta nandya cjuaha nuju me cjuecojo nuju me xcun xutaxa rë yungun o sá xi xcun xutaxa rë ndihyavasen ne, hacuiin cumacjintacún tséhë chuva rë hacutjin xi chjayunngun o tséhë xi cuinújun ta, ¹² tséhë xi ha hora véhë ni ne, Hasen rë Nina cuichja cojo nuju mé cjua xi meje rë xi cuinújun. —Cuatjin xu cachja Jesús.

Mijí rë xijercu nimeje cjuanchina

¹³ Hya xi camá ne, ngu xuta tséhë ngajñi rë xutacjín jan ne, cachja xu me cojo Jesús cuitjin:

—Maestro, tinújun cojo cha vëhë xingueen, catisua cha ngahan xcusun xi satë ná xi cavejña nahmi niji hya xi cahme me. —Cuatjin xu cachja me.

¹⁴ Sehe ngajan xi Jesús ne, cuitjin xu cachja me:

—Peru ngahan ne, hacuiin xá na ha xi ngahan cuátécja xcusun xi satë nuju xingu xingu ngayun. —Cuatjin xu cachja Jesús cojo xuta jan.

¹⁵ Sehe cachja nga xu me cojo xutacjín jan cuitjin:

—Nechun cuidadu, hacuiin jercu nimuju cjuanchina matsejen ta, tséhë xi hacuiin ngatsë rë cjuanchina xi tjin naja matsejen ne, vëhë xi ndacun cjuahñu naja. —Cuatjin xu cachja me.

¹⁶ Ngaxtun vëhë ne, sehe cachja xu Jesús ngu ejemplu cojo xuta cuitjin:

—Cuejña ne xi ngu cha nchina jan matsejen ne, jercu ndaja camá xitjë xcul nangui rë cha. ¹⁷ Hya xi camá ne, cuitjin catsingataha cacun cha: “¿Mé xi ndatjin sahme quihndë? Ha quihndë tsajin ná cahndë hiscan xinchandaja tutjé na ha. ¹⁸ Ndatjin rë xi cuitjin sahme. Tsinguetsun ndihya hiscan hinchandaja tutjé na ha, hane tsindaja xi hitsë sa yehe. Hane ngajan cuinchandaja yéjë tutjé na ha cojo ngu tsé ngu xtí sa xi tjin ná. ¹⁹ Hane sehe cuichjá cojo xahasen na ha cuitjin: Jercu cjín camahani xcusun hinchandaja ná quihndë, hacuaha jemu cjín nu cjuecani rë. Cuitejñajenda quihndë. Sínë cuéhë tsahan. Suá cjuasua xahasen na ha.” Cuatjin catsingataha cacun cha nchina jan. ²⁰ Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndë ne, cueye. Hane yéjë xcusun xi cavetje ne, tsajin mé sacú ri tséhë.” Cuatjin cachja Nina. ²¹ Cuatjin rë xuta xi jercu vetjo cjuanchina xi cuma rë suvá me, peru xcul Nina matsejen ne, tsajin mé xi tjin rë me. —Cuatjin xu cachja Jesús ejemplu vëhë.

Sahmi cuidadu Nina xuta ladu rë me

²² Ngajan xi Jesús ne, cuitjin cachja xu me cojo xuta ladu rë me:

—Vëhë xi cuichjá cojo nuju ta: Hacuiin cumacjintacún tséhë xcusun xi xinu xi sua nuju ngahñu. Hacuaha hacuiin cumacjintacún tséhë tsjian xi chujun. ²³ Hacuiin cumacjintacún ta, tséhë xi hitsë sa vengui chji rë cjuahñu nuju xi cuma rë xi chinu. Hacuaha hitsë sa vengui chji rë yojo nuju xi cuma rë tsjian xi chujun. ²⁴ Chutsujun chu chenda ta hacuiin tsitjé chu, hacuiin fanga chu, hacuaha tsajin rë chu ndyahnga hiscan cuinchandaja chu xi siné chu. Peru Nina tsicjen me chu. Ngayun ne, hitsë sa jercu vengui chji nuju xi cuma rë chu nisë. ²⁵ Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ngatsë rë xi ma cjín cacun me. ²⁶ Sá xi hitsë lihndi xcul vëhë maji nihñu ne, ¿má má jercu macjintacún tséhë xcul xinu xi yahnga jan ni?

²⁷ Chutsujun naxu liriu ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihü ngu naxu vëhë. ²⁸ Sá xi cuatjin tsicaja Nina xca nguijña xi ngu nixtin ne siutahá nguijña, hane xitú ngu nixtin ne cueti ne, hitsë sa ngayun ta hatuxa tsicaja nuju me, ngayun xi cjéé cumangutacúnndujun cojo me. ²⁹ Hacuiin jercu nijendun rë xahasen nuju xi vinchunsun xi xinu xi siuhun ta, ³⁰ tséhë xi xcul vëhë ne, yéjë xutaxín tséhë jingujyé ni ngasunhndë ne, me vëhë xi vangu me xcul vëhë. Peru ngayun ne, Nina Nahmi naja ne, ha vëe me xi hatuxa sahmi nguyjé xi sacú nuju xcul vëhë. ³¹ Catamaran nuju tséhë gubiernu xi sahmi Nina, hane xcul vëhë ne, quitahácoo sa sacú nuju.

Cjuanchina xi tacun ngahnga

³² Xicamacjiintacún ngayun xuta ladu na ha xi jemu chúa má ngayun ta, tséhë xi Nina Nahmi naja ne, ha cavejña cacun me xi cojo cjuandaja rë me ne, sua nuju me xá xi nihñu gubiernu hiscan xi sahmi me gubiernu. ³³ Titeñu xcul xinu xi tjin nuju, hane tujún xi sacú nuju ne, tuhun rë xuta xi tsajin rë me, sacuaha tuhun ngu caridad. Nihñu nguyjé xi sacú

nuju cjuanchina xi jercu cjuecani rë. Cuma cuinújan ne, ngu cjuanchina xi tsajin nixtin cjué xi cuetjún ngajan ngahnga hiscan xi cha chéjé ne, maji ma tiña cha, hisca chu quixún ne, tsinguetsiin chu. ³⁴ Cuatjin meje rë xi nihñu ta, tséhë xi hiscan tetjo cjuanchina nuju ne, hacuaha ngajan quitahá cjuatacun nuju.

Meje rë xi tjinchjine ngayaan tséhë xi cjuehe Nai naja

³⁵ 'Tuhunchjinu yojo nuju, hacuaha catisetí ni ndihi nuju, tséhë xi cjuehe Nai nuju. ³⁶ Nihñu sacuatjin sahmi hndixahan xi viyujuya me nai rë me, hya xi nai rë me quiji ngu ndava suhi. Siuchjine ni me cojo sa xi hora xi cjuehe nai rë me ne, xi tu cuichja ne, ngutjen cjue scuxaha me tingotjo xi cuisehen nai rë me. ³⁷ Jemu ndaja tséhë yéjé hndixahan xi, hora xi cjuehe nai rë ne, sacútsja rë xi siu quicun. Nguehe cuichjá cojo nuju cjuaquixi ta, xi scuëë nai rë hndixahan jan xi cuatjin quicun hndixahan ne, cuéhëchjine me yojo rë me, sehe cjuecojo me hndixahan xcun maxë, sehe cuiyuju me xi sinë me. ³⁸ Jemu ndaja tséhë hndixahan xi sacútsja rë nai rë xi siu quicun, handasa nixten cjuehe me o sá hisca tiña sahasen cjuehe me. ³⁹ Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chéjé ndava me ne, suaain me cahndé xi scuxaha cha ndava me, sehe tsichjéjé cha. ⁴⁰ Hacuanitjin ni meje rë xi ngayujun ni ngayun ne, tuhunchjinu yojo nuju ta, tséhë xi hora xi ningatuuntacún xi cjuéhë ngahan xi Quihndi rë Xuta Jain ngahan ne, hora vëhë rë cjuéhë. —Cuatjin xu cachja Jesús.

Xuta xi vihndé cojo xi vihndiin tséhë Nina

⁴¹ Hya xi camá ne, Pedru ne, cuitjin xu cachja me cojo Nai naja:
—Tatá. Ejemplu xi canújun vë ne, ¿há suvin ni ngayin xuta ladu nuju meje rë xi cuetihinrcuin?, o há tsajin ne, ¿há cojo yéjé sa xuta xi yahnga cuetaharcu me? —Cuatjin xu cachja Pedru.

⁴² Ngajan xi Nai naja ne, cuitjin xu cafayangui me:
—Ngayujun ni ne, meje rë xi nihñu sacuaha sahmi ngu hndixahan xi jemu quicun cacun xi sahmichihin yéjé ni hacutjin xi meje rë nai rë, ngu hndixahan xi cjuahaxa xi cjuahacuenda rë yéjé sa hndixahan xi hora tjin sua xi sinë. ⁴³ Jemu ndaja tséhë ngu hndixahan xi, hora xi cjuehe nai rë ne, sacútsja me hndixahan jan xi tisahmi tutjin xi casuaxa rë nai rë. ⁴⁴ Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yéjé sa xcusun xi tjin rë me. ⁴⁵ Peru cuejña ne xi hndixahan vëhë ne, tsingataha cacun cojo cjuatacun rë cuitjin: "Nai naha ne, tijima tafi sa xi cjuehe me." Cuatjin tsingataha cacun. Sehe cuetsihin cuaja rë hndixahan xi yahnga jan, hacuaha cuetsihin cuatjutaha sinë cuihi hisca cuma chihí. ⁴⁶ Peru cuechú ngu nixtin xi tsajin tacunya hndixahan vëhë, ngu hora xi hisca hvíin ne, hya cjuehe nai rë, hane jemu jyë castigu sahmi me. Sehe tsingatju me cuatjutangun cjuañihí cojo hndixahan xi yahnga xi casahmichiin tutjin xi casatëxa rë.

⁴⁷ 'Hndixahan xi ha ndaja vëe hacutjin xi meje rë nai rë hane cavihinchjinii, hacuaha casahmii tutjin meje rë nai rë ne, jemu sehen camahani rë. ⁴⁸ Peru hndixahan xi hvíin hacutjin xi meje rë nai rë hane casahmi xcusun xi vechú chuva rë xi cuma castigu ne, chúva sehen rë. Hane yéjé ni hndixahan xi jemu cjín xcusun xá casua nai rë xi sahmi ne, hacuaha cuatjin jercu cjín cjua chjahya rë hya xi sahmi entregadu cuenta rë.

Sahmi Jesucristu xi sahmi condra xuta xicjin me

⁴⁹ 'Ngahan ne, canduvá ne xi cuétaha rë sacuaha ngu ndihi ngasunhndë, ngu ndihi xi tsingacun mé cún cjuatacun rë xuta. Hacuaha jemu meje ná xi ha hisca ha casetaha rë. ⁵⁰ Ngahan ne, tjin ná xi cuátju ngu cjuañihí sacuatjin rë ngu xuta xi tjin rë me xi satë rë me nandá hya xi xtenda me. Hacuaha jercu choho má ná hisca xi cuma chihín cjuacjintacun vëhë. ⁵¹ Xi má nuju ngayun ne, ¿há cjuajeya canduvácojo xi cuma rë xuta ngasunhndë? Hacuiin cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tséhë xi ngujo me ne, cumangu cacun me

cojo ná, hane ngujo nga me ne, cumanguaain cacun me cojo ná. ⁵² Xi cuetsihin nixtin vihi ne, hisca cojo xi cjuiniji sa ne, cuejña ne xi ngu ndihya ne, siu hñú xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan. ⁵³ Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jahnda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

Camamiji cuijne rcu xuta xcusun xi casahmi Jesucristu

⁵⁴ Hya xi camá ne, cachja nga xu Jesús cojo xutacín jan cuitjin:

—Nguehe nangui naja matsejen ne, hya xi chutsujun xi tivisecún ngu yufí ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má. ⁵⁵ Hane hya xi vanga ngu tjo xi cjui táha ladu ngatihin matsejen ne, ngayun matsejen ne, nújun ta cuma suë, hane cuatjin jain má. ⁵⁶ Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

Meje xati rë xi cuichancjan si xi tacun ngajñi naja cojo Nina

⁵⁷ 'Hane ngayun matsejen ne, ¿má nichuvuun suvun cojo cjuatacun nuju xcusun xi cjuaquixi ni? ⁵⁸ Ndiya tivangun cojo xuta xi meje cuinchajyé nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjue cueyá nuju me ndavaya. ⁵⁹ Hane cuichjá cojo nuju cjuaquixi matsejen ta hatuxa cuetjuun tséhë ngajan jinguyéjë rë xi cjëë cuechjun yëjë ni tujún xi quitjun. —Cuatjin xu cachja Jesús.

13

Sahmi nguyjyé xi nindeyan cjuatacun naja

¹ Ha hora vëhë ni ne, cafehe xu ngujo xuta hiscan tacun Jesús. Hane cachja xu me cojo Jesús tséhë ngujo xuta tséhë distritu Galilea xi cavitea Pilatu xi cueya hya xi titsiquehen xuta xi cuacun vë chu rë me xi sua me cjuatjo cojo Nina.

² Ngajan xi Jesús ne, cuitjin xu cachja me cojo xuta xi cachja cojo rë me jan:

—Hane tséhë xi cuatjin cahme ngujo xuta Galilea xi cuacun vë ne, ¿há vëhë xi má nuju xi hitsë sa tsehen me xi cuma rë yëjë sa me xi yahnga? ³ Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. ⁴ O há tsajin ne, xuta xi tyuhunjyan xi cahme hya xi caticjane rë torre tséhë Siloé jan ne, ¿há má nuju xi hitsë sa tsehen me xi cuma rë yëjë sa xuta xi caviyuju ngajan Jerusalén? ⁵ Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesús.

Ejemplu tséhë ya xi cavaquiin tú rë

⁶ Sehe ngajan xi Jesús ne, cachja sa xu me ngu ejemplu cojo xuta jan, cojo sa xi sua me cumachaya rë xuta xi jemu chûva camá nixtin xi cuma tsindeya xuta cjuatacun rë me. Cuitjin cachja me:

—Cuejñaa ne xi ngu ya túhaxi jan ne, secun xcun nangui rë ngu cha jan. Hane xi canduva cha xi tséhë jan, vanguise cha tú rë ne, casacuiin rë cha. ⁷ Sehe ngajan xi cachja cha cojo cha mosu rë cha cuitjin: “Ha tjin rë jyan nu xi vinduva vanguësë tú rë ya vi ne, sacuiin ná. Tiche. ¿Mé má tu cuenda cuiseun tsinguetsun rë nangui?” Cuatjin cachja cha xi tséhë jan. ⁸ Ngajan xi cha mosu jan ne, cuitjin cafayangui cha: “Tatá. Tuhun rë cahndé catisecun ndastu ngu nu sa, hane cuacján nangui rë, hacuaha cuíncha rë abono.

⁹ Xi cuatjin ne, ¿há suaain tú rë nduva nga ngu nu? Hane sá xi hacuaha ni suaain tú rë ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesús.

Casahmi Jesucristu xi camandaja ngu chjuun nixtin xi chjahájenda rë

¹⁰ Ngu nixtin xi chjahájenda rë, hya xi tivicuya xu Jesús cahntsua ngu yungun jan ne, ¹¹ ngajan tacun ngu chjuun xi ha cjui tyuhunyan nu xi camaticua na hane ha quihndé maji xu ma quixi nínda ngaxtun na. ¹² Xi cavëë Jesús na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tséhë xi cuatjin jyihu ngayun vë. —Cuatjin xu cachja Jesús.

¹³ Hane ha hora vëhë ni cavisanetsja xu me na, hane ngutjen ni camaquixi nínda ngaxtun na. Hya xi camá ne, casahmi jyë casahmi hnga xu na Nina. ¹⁴ Peru presidente rë yungun jan ne, jemu camacjan xu rë me tséhë xi casahmi Jesús xi camandaja ngu chjuun nixtin xi chjahájenda rë. Vëhë xi cachja xu me cojo xutacjín jan cuitjin:

—Tjin naja jyun nixtin xi nihña xá. Vëhë xi meje rë xi ngajni rë jyun nixtin vëhë matsejen ne, hya nduvun xi cumandaja ngayun, hacuiin xi tu nixtin xi chjahájenda rë matsejen ne, hya cuinduvun. —Cuatjin xu cachja presidente rë yungun jan.

¹⁵ Peru Nai naja ne, cuitjin xu cachja me:

—Jercu chocho ningatuhuntacún! Jima ngu ngayun matsejen ne, hatuxa vuhanndayun ndyaja vuhanndayun burru nuju tséhë cahndé rë chu xi cuangun nicuhun chu nandá, handasa nixtin xi chjahájenda rë. ¹⁶ Hane na vihi xi xuta ladu rë Nina na hacuaha tjinhñu rë Satanás na cahntsua tyuhunyan nu matsejen ne, ¿há ndaintjin xi sehenndaya na nixtin xi chjahájenda rë ni? —Cuatjin xu cachja Nai naja.

¹⁷ Hane xi cafë xu cachja Jesús cjua vëhë ne, yëjë ni xuta xi má condra rë me ne, jemu camasava xu rë me. Peru yëjë sa xuta xi yahnga ne, jercu ndaja camá xu rë me tséhë yëjë ni xcusun ndaja xi casahmi Jesús.

Ejemplu tséhë tutjé lihndi

¹⁸ Hacuaha cachja sa xu Jesús ejemplu vihi:

—Gubiernu xi sahmi Nina ne, ¿mé xi tangun cojo? ¹⁹ Tangun cojo ngu tutjé xi jemu lihndi camahani. Hya xi ngu xuta tsitjé me tutjé vëhë xcun nangui rë me ne, cuetju, cuma ngu ya, hisca nisë xi vitjen chu ngahnga ne, sahmi chu ndava chu rcu. —Cuatjin xu cachja Jesús.

Ejemplu tséhë san rë pan

²⁰ Cavuya cachja nga xu Jesús cuitjin:

—Gubiernu xi sahmi Nina ne, ¿mé xi tangun cojo? ²¹ Tangun cojo san rë pan xi visecjan ngu chjuun ngajni rë nahyu rë pan cojo sa xi sahmixa ngajni rë yëjë ni nahyucjín jan. —Cuatjin xu cachja Jesús.

Ejemplu tséhë tingotjo xcu

²² Ndiya cjui xu Jesús ngajan Jerusalén ne, cavatju xu me nandya cojo ranchun xi siu ndiya cjui me jan, hane cachja me cojo xuta cjua rë Nina. ²³ Hya xi camá ne, cavinenguise xu ngu me xi cavinenguise rë Jesús cuitjin:

—Tatá. ¿Há jemu chúva xuta xi tivetjutje me? —Cuatjin xu cavinenguise xuta jan.

Sehe ngajan xi Jesús ne, cachja xu me cojo xuta xi siu jan cuitjin:

²⁴ —Nihñu ngahñu xi cuma cuisuhun hiscan sahmi Nina gubiernu táha tingotjo xi xcu ta, tséhë xi nguehe cuichjá cojo nuju ta cuechú nixtin xi jemu cjín xuta xi cuma meje cuisehen me jan, peru cumaji. ²⁵ Ta hya xi ngahan xi nai rë cahndé vëhë ngahan, cuinduva cuéchja tingotjo ne, ngayun ne, cuinechun candatsen, sehe cujunntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin cuinújun. Hane xi cjuayanguë tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju. ²⁶ Hane ngayun ne, cuitjin cuinújun nga: “Cachini

cahyin tangun cojo nuju, hacuaha nangui niji canujyuhunyun cavicuyun cjua rë Nina.” Cuatjin cuinújun. ²⁷ Hane cuitjin cuichjá nga cojo nuju: “Hveen jani nandya nuju. Tángunxun tsahan, ngayujun ni ngayun xuta sahmi cjuatsehen.” Cuatjin cuichjá. ²⁸ Ngajan ni ne, jemu chjhindun hacuaha nijanurii nehñu, hya xi chutsujun Abraham cojo Isaac cojo Jacob, cojo yéjé profeta xi siu me ngajan hiscan xi sahmi Nina gubiernu, perú ngayun ne, cavyujú nuju candatsen. ²⁹ Hane cuinduva xuta tséhë táha ladu vetjucaa tsuhi cojo táha ladu vetje tsuhi cojo yéjé sa ladu, cuinduva me sinë tangun me hiscan xi sahmi Nina gubiernu. ³⁰ Nguehe cuichjá cojo nuju ta yahnga xuta xi tjengui me quihndë ne, me vëhë cuma titjun me, hane yahnga me xi titjun quihndë ne, me vëhë cuma tjengui me hya xi cuejña Nina gubiernu rë me jan. —Cuatjin xu cachja Jesús.

Jemu cho ho camá rë Jesucristu ngatsë rë xuta Jerusalén

³¹ Ha hora vëhë ni ne, cafehe xu ngujo cha fariseo, hane cuitjin xu cachja cha cojo Jesús:

—Ndatjin xi tetjunxun tséhë nguehe ta, tséhë xi Herodes ne, meje tsiquehen nuju me.
—Cuatjin xu cachja cha xi cuacun jan.

³² Hane ngajan xi Jesús ne, cuitjin cafayangui xu me:

—Tángun ne tinújun cojo rë chu ninda vë cuitjin: “Chutsujun ni, quihndë cojo nchujun ni ne, cuáxexen xitsehan hacuaha sahme xi cuma ndaja xuta hmu rë, hane nguini ne, tsinguínetaha xá xi tisahme.” Cuatjin tinújun. ³³ Peru hacuaha sahmi ná nguyjé xi cjué sa quihndë nchujun ni cojo nguini hisca xi cjuéhë hiscan xi tifé ta, tséhë xi profeta ngahan, hane ngu profeta ne, cumaji xi cueya jingusa nandya xi hacuiin nandya Jerusalén.

³⁴ ¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajni nuju! ¡Jemu choho má ná! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu, perú ngayun ne, mijí nuju! ³⁵ Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajni naja!” —Cuatjin xu cachja Jesús.

14

Casahmi Jesucristu xi camandaja cha xi yaha rë chihinsquee

¹ Cuitjin camá xu ngu nixtin xi chjahájenda rë hya xi quiji cajiné Jesús niñu ndava ngu cha xi matitjun ngajni rë cha fariseo. Xi cafehe Jesús jan ne, cha xi siu jan ne, siu tifahachuva xu ni cha Jesús. ² Hacuaha hiscan tacun Jesús ne, ngajan xu tacun ngu cha xi yaha rë chihinsquee. ³ Ngajan xi Jesús ne, cavinenguise xu rë me cha xi vicuya cjuachacun cojo cha fariseo cuitjin:

—¿Há tjin cahndé nixtin xi chjahájenda rë xi nihñia xi cumandaja xuta, o há tsajin cahndé? —Cuatjin xu cavinenguise Jesús.

⁴ Hane cha xi cuacun jan ne, tu cavyujujuu xu ni cha. Hyá xi camá ne, cafaha xu Jesús cha hmu rë jan, hane casahmi me xi camandaja cha, sehe catsingatju me cha cafe cha.

⁵ Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rë ne, cuanguun marcú macjain naxun quihndi nuju o sá ndyaja nuju sá xi cjuinenguiya ngu ndava nandá xi jemu nungun?
—Cuatjin xu cavinenguise me.

⁶ Hane cha xi cuacun jan ne, camaji cafayangui xu cha hisca xi ngu cjua xi meje rë Jesús.

Meje rë xi ninguijne yojo naja

⁷ Hyá xi camá ne, tséhë xi vutsejen xu Jesús xi xuta xi cachjindaya rë tséhë suhi jan ne, tivaxijin me cahndé xi matitjun ngajan xcun maxë ne, vëhë xi cachja xu me cojo xuta jan cuitjin:

⁸ —Hya xi chjindaya nuju cuangun xinu ngu comida ne, xicachjuun cahndé xi matitjun ngajan xcun maxë ta sá tu hacuaha cachjindaya rë ngu me xi hitsë sa meje rë xi chjahárcun rë xi cuma nuju ngayun. ⁹ Hane cuinduva me xi cajindaya nuju catsijotjun ni ne, cuichja me cojo nuju cuitjin: “Tuhun rë me vihi cahndé nuju vë.” Cuatjin cuichja me cojo nuju. Ngajan xi ngayun ne, cojo jyë cjuasava ne, cuangun chjuhun cahndé xi ma tjengui. ¹⁰ Xi meje rë ne, hya xi cuatjin chjindaya nuju ne, tángun chjuhun cahndé xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndé xi hitsë sa matitjun.” Cuatjin cuichja me. Ngajan xi ngayun ne, jercu sahmi jyë sahmi hnga nuju me ngajñi rë yéjë xuta xi siu jan. ¹¹ Cuatjin cuma ta, tséhë xi yéjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi yehe rë me.

¹² Hacuaha cachja nga xu Jesús cuitjin cojo me xi cajindaya rë me:

—Hya xi nihñu ngu suhi ne, xicachjindayuun rë amigu nuju, xicachjindayuun rë xingun, hacuaha xicachjindayuun rë xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rë me, hane cojo vëhë ni ne, ha camangojo cjuandaja nuju. ¹³ Cahndé rë vëhë ne, hya xi nihñu ngu suhi ne, chjindayun rë xuta yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá. ¹⁴ Sá xi cuatjin nihñu ne, jemu ndaja tsujun ta, tséhë xi xuta xi cuacun vë ne, tsajin rë me mé cojo sahmingojo me cjuandaja nuju. Peru Nina sahmingojo me tsujun hya xi tsicuya me cjuahñu xuta xi tsajin jyë rë. —Cuatjin xu cachja Jesús.

Ejemplu tséhë ngu suhi jyë

¹⁵ Hane xi cahndé xu ngu cha xi cojo tijinë jan cjua xi cachja Jesús ne, cuitjin xu cachja cha cojo rë me:

—Jemu ndaja tséhë xuta xi sinë me niñu hiscan xi sahmi Nina gubiernu! —Cuatjin xu cachja cha.

¹⁶ Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjín xuta cajindaya rë cha me. ¹⁷ Xi casune hora xi sinë cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjua vihi: “¿Há cuangun xu ta, ha tjin chjine yéjë ni?” Cuatjin cachja hndixahan jan. ¹⁸ Hya xi camá ne, cavetsihinjima ngu me cachja me mé tséhë xi cumaji cjue me. Hane me xi tjutjun ne, cuitjin cachja me cojo hndixahan jan: “Ngu rquí nangui cavátsë ne, sahmi ná nguyjë xi cjué scutséjen. Vëhë xi cumaji cjué ndava suhi.” Cuatjin cachja me. ¹⁹ Hane ngu nga me ne, cuitjin cachja me: “Cavátsë hñú ninchin ndyaja, hane cjué cjuaháchuva chu. Vëhë xi cumaji cjué ndava suhi.” Cuatjin cachja me. ²⁰ Hane ngu nga me ne, cuitjin cachja me: “Cumaji cjué ta, tséhë xi ngahan ne, ha cavíxan.” Cuatjin cachja me. ²¹ Hya xi camá ne, hndixahan jan ne, quiji cachja cojo nai rë cjua xi cachja xuta xi cuacun jan. Hane xi camacjan rë nai rë ndihya jan ne, cuitjin cachja cha cojo hndixahan rë cha: “Tetji ne, tihin sanii ngajan ndiyatë cojo ndiyahndé tséhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha. ²² Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndé.” Cuatjin cachja hndixahan jan. ²³ Ngajan xi cachja nga nai rë hndixahan jan cojo rë cuitjin: “Tihin nga hisca ndiya nguijña, hane nihñi rë xuta nguyjë ndovecueje me, cojo sa xi catitsë rë ndya naha. ²⁴ Nguehe cuichjá cojo ri ta hisca xi ngu me xi cajindáya rë tjun tjun ne, satiin rë me sinë me tséhë suhi xi tisahme.” Cuatjin cachja nai rë hndixahan jan. —Vëhë cajnetaha xu ejemplu xi casuacuenda Jesús.

²⁵ Ngajan xi hya xi quiji sa xu Jesús ndiya rë me xi cjui me Jerusalén ne, jemu cjín camahani xuta cjui me cojo rë me. Hane xi cavuya me cavutsejen me xutacjín jan ne, cuitjin xu cachja me:

²⁶ —Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha. ²⁷ Jarë ngayun xi nduvuntjengun ná matsejen ne, sá xi cuejñuhñuu xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha. ²⁸ Ha hyan matsejen ta hya xi ngu xuta meje sahmi me ngu ndihya jyé ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya. ²⁹ Cuatjin sahmi me cuenta rë me matsejen ta sá tsajin ne, sá xi ngutjen sahmi me xihndënaña rë hane cumaji tsinguijnetaha me sahmi me ndihya matsejen ne, yëjë ni xuta xi scuëe me matsejen ne, jemu cuejnucëe me me. ³⁰ Cuitjin cuichja me: “Cha xi cavetsihin casahmi ngu ndihya jyé vi ne, camaji catsinguijnetaha cha casahmi cha.” Cuatjin cuichja xuta. ³¹ Hacuaha ha hyan matsejen ta hya xi ngu me xi matitjun cjue sahmi me ngu si jyé cojo jingu sa me xi matitjun xi condra rë me matsejen ne, titjun tsingataha cacun ndaja me, ¿há scaa rë me cojo té mil xuta rë me xi sahmi me si cojo condra rë me xi ticojo can mil xuta rë? ³² Sá xi vutsejen me ta scaain rë me matsejen ne, jinguyëjë rë xi cjin sa nduva condra rë me matsejen ne, tsingatju me ngujo xuta xi tsinguijnehnchan cjuia. ³³ Vëhë xi ngayujun ni matsejen ne, meje rë xi cuatjin titjun ndaja ningatuhuntacún ¿há scaa nuju, há scaain nuju? matsejen ta, tsëhë xi yëjë ni ngayun xi nismutacuun yëjë ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

Yo xi hacuiin ndaja tjengui rë Jesús ne, tangun cojo naxa xi fë xtya rë

³⁴ Hacuaha cachja sa xu Jesús cojo xutacjín jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjuë xtya rë matsejen ne, ¿hacutjin cuma xincha nga tutju rë ni? ³⁵ Ha quihndë tsajin mé cumachjirëhë. Cumaji nicojonxan sacuaha nihndë, hacuaha cumaji nicojonxan sacuaha abono. Chjahá rë cuixu candatsen. Yo ngayun xi tjin nuju cjuasua xi cuinuhyun cjuia naha matsejen ne, ndaja tinuhyun. —Cuatjin xu cachja Jesús.

15

Ejemplu tsëhë chu tsángä xi cachajá

¹ Ngundiya jan ne, jemu cjín xu cha faha tujúnsa cojo xuta tsehen xi yahnga jan quiji casahmi tiña me tsëhë Jesús, xi meje cuišnuu me cjuia xi cuichja Jesús. ² Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijyihí vi ne, tsingatihin cha visiajmi cha cojo xuta tsehen hacuaha jinetangun cha cojo me. —Cuatjin xu cachjahma cha.

³ Sehe ngajan xi Jesús ne, cachja xu me ngu ejemplu cojo cha xi cuacun vë cuitjin:

⁴ —Cuejña ne xi ngu ngayun tjin nuju ngu cientu chu tsángä. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguijña ne, sehe cuangun cuinchunsun ngu chu xi cachajá jan hisca xi sacú nuju chu. ⁵ Hane xi sacú nuju chu ne, chjuhun chu cuesuntuhun chu xi jercu ndama nuju. ⁶ Hane xi cjuhun ndya nuju ne, nihñutangun yëjë xuta xi vinga nuju cojo me xi siu tahndee ndya nuju, hane cuitjin cuinújun cojo rë me: “Cuinechan cojo ná cjuasua ta casacu ná chu tsángä naha xi cachajá.” Cuatjin cuinújun. ⁷ Nguehe cuichjá cojo nuju ta hacuaha hitsë sa jyé cjuasua cuejña ngajan ngahnga ngatsë rë ngu xuta tsehen xi tsindeya me cjuatacun rë me xi cuma rë ngatsë rë ñujuchan tyjuhunñuju xuta ndaja xi tsajin mé má tsindeya me cjuatacun rë me. Cuatjin xu cachja Jesús.

Ejemplu tsëhë tujún quicha xi cachajá

⁸ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rë me tē tujún quicha xi jercu hnga chji rë. Hane sá xi tsichajá me ngu ne, hatuxa cuetaha rë me ndihí, sehe cuitecha me ndihya sehe cuanguise chichihin me hisca xi sacú rë me. ⁹ Hane xi sacú rë me ne, sahmitangun me yéjë xuta xi vinga rë me cojo me xi siu tahndee ndava me ne, hane cuitjin cuichja me cojo rë me: “Cuinechan cojo ná cjuasua ta casacu ná tujún naha xi catsichajá.” Cuatjin cuichja me. ¹⁰ Nguehe cuichjá cojo nuju ta hacuaha jemu jyé cjuasua cuiyuju ángel tséhë Nina ngatsé rë ngu xuta tsehen xi tsindeya me cjuatacun rë me. Cuatjin xu cachja Jesús.

Ejemplu tséhë cha xi catsismi cacun ndava nahmi rë

¹¹ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu me jan ne, tjin rë me jo quihndi. ¹² Hane cavechú ngunixtin xi cha quihndi ngascan tséhë me vihi ne, cachja cha cojo rë me cuitjin: “Papá, tséhë yéjë ni xcusun xi saté ná hya xi cueyun ne, meje ná xi tuhun ná quihndé.” Cuatjin cachja cha. Sehe ngajan xi nahmi rë cha jan ne, cavatécjá me hacutjin xi saté rë xingu xingu quihndi rë me. ¹³ Hane hacuiin tséé ni jan ne, cha quihndi ngascan jan ne, xi casahmi tangun cha yéjë xcusun xi casaté rë cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyé catsicojo cha tujún rë cha, casahmi cha yéjë ni hacutjin xi ndama rë xahasen rë cha. ¹⁴ Hane xi cafë catsicojo cha tujún jan ne, hya canduva ngu jindya jyé jinguijyé ni ladu vëhë. Hya cavetsihin camachaja rë cha. ¹⁵ Hya xi camá ne, cavetsihin casahmi cha xá sacuaha mosu rë ngu me tséhë nandya jan. Hane me vëhë catsingatju me cha xi cjue sahmi cuidadu cha chu chinga rë me ngajan ranchun. ¹⁶ Hane tséhë xi jemu vojo camahani rë cha ne, hisca meje siné cha xi tijiné chu chinga jan, peru tsajin yo casua rë cha. ¹⁷ Hane hya xi catsingataha cacun ndaja cha ne, cuitjin catsingataha cacun cha: “Yéjë mosu rë nahmi naha ne, tsajin mé machaja rë xi siné, hane ngahan ne, tivéya jindya nguehe xi vojo ná. ¹⁸ Jemu sa rë ndaja ne, cuya cjué nga ndava nahmi naha, hane cuitjin cuichjá cojo rë me: Cahndeen tséhë Nina hacuaha cahndeen tsujun. ¹⁹ Ha quihndé vechiin chuva rë xi cuitejña cojo nuju sacuaha quihndi nuju. Nihñucuendun sacuaha xi mosu nuju ngahan quihndé xi cavúya.” Cuatjin catsingataha cacun cha. ²⁰ Hya xi camá ne, sehe cavuya café cha nangui rë cha xi cjue cha ndava nahmi rë cha.

’Peru cjin sa cjuí cha tséhë ndava nahmi rë cha ne, cavéé nahmi rë cha xi nduva cha, hane jemu camayuma rë me cha. Sehe vanga me quijitjengui me cha, catsuvacija me cha hisca cavitatsuha me cha. ²¹ Sehe ngajan xi cavetsihin cachja cha cojo nahmi rë cha cuitjin: “Papá, cahndeen tséhë Nina hacuaha cahndeen tsujun. Ha quihndé vechiin chuva rë xi cuitejña cojo nuju sacuaha quihndi nuju.” Cuatjin cavetsihin cachja cha. ²² Peru nahmi rë cha ne, cachja me cuitjin cojo ngujo hndixahan rë me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaha nduvuncujun ngu xtungun sehe teyun rcutsja cha, hacuaha nduvuncujun chuxinxte xi cuinchun ntsacu cha. ²³ Xi camá vëhë ne, sehe tángun chjuhun ngu ndyaja xi ndaja hñu cacun chu cueya chu xinéé chu. Nihñia ngu suhi, tahan cjuasua xahasen naja ta, ²⁴ tséhë xi cha quihndi naha vi ne, sacuaha xi cahme cha hane sehe cavuya cha cjuahñu, sacuaha xi cachajá cha hane sehe casacu nga cha.” Cuatjin cachja nahmi rë cha. Hya xi camá ne, sehe cavetsihin casahmi me suhi.

²⁵ ’Peru cha quihndi tjun rë me vihi ne, tsajin cha ta nguijña quiji cha. Hane xi camatiña cha tséhë ndava cha xi cavuya cha xi quiji cha nguijña ne, cahndé cha xi fane tyjó ndava cha hacuaha tité xuta. ²⁶ Hya xi camá ne, sehe cajindaya cha ngu cha hndixahan rë nahmi rë cha, sehe cavinenguise cha mé jima jan. ²⁷ Hane cha hndixahan jan ne, cuitjin cafayangui cha: “Cha tsuhun cavuya cha. Hane hacuaha cavitexa nahmi nuju xi cahme ngu ndyaja xi ndaja hñu cacun xi cuma suhi, tséhë xi cavuya cafahatsja nga me xingun cojo ngu cjuahñu ndajyihi.” Cuatjin cafayangui hndixahan jan. ²⁸ Peru cha quihndi tjun jan ne, jemu camacjan rë cha, hisca ndihya mijí cuisehen cha. Hane xi cavetju nahmi rë cha ne, jercu cjín cachja me cojo cha xi cuisehen cha ndihya. ²⁹ Ngajan xi cha vëhë

ne, cuitjin cafayangui cha tséhë nahmi rë cha: “Chutsujun ni, ngahan ne, ha jemu tsëë nduva nixtin xi tivisécoo nuju, hacuaha tsajin ngu cjua xi cahndeen tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha. ³⁰ Peru quihndë xi cafehe cha quihndi nuju vë xi tu ngajan quiji catsicjë cha cjuanchina nuju cojo yachjin tsehen jan ne, canicuhun ngu ndyaja hñu cacun xi xinu cojo cha.” Cuatjin cafayangui cha. ³¹ Hya xi camá ne, cuitjin cachja nga nahmi rë cha: “Ngaye tsan xi nchunchujun ni nechin cojo ná ne, yéjë ni xi tsahan ne, hacuaha tsiji. ³² Ndatjin xi nihñä ngu suhi cuitjin, cuinechan cjuasua ta, cha tsajan vi ne, sacuaha xi cahme cha peru cavuya cha cjuahñu, sacuaha xi cachajá cha Peru casacu nga cha.” Cuatjin cachja nahmi rë cha. Véhë xu ejemplu xi cachja Jesús cojo cha fariseo cojo cha xi vicuya cjuachacun.

16

Ejemplu tséhë cha xi matitjun tséhë xa xi cuaaintjin casahmi

¹ Hacuaha cachja nga xu Jesús cojo xuta ladu rë me ngu ejemplu cuitjin:

—Cuejña ne xi cavéjña ngu xuta nchina xi hacuaha tjin rë me ngu cha xi matitjun tséhë yéjë ni xa rë me. Hane cha xi matitjun tséhë xa jan ne, cavinchajyë ngu xi cavinchajyë rë cha cojo me xi tséhë xa tséhë xi jemu catsicojo cha tujún rë me xi matsijin mé casahmi cha cojo. ² Hane xi cajindaya me xi tséhë xa jan cha ne, sehe cachja me cojo cha cuitjin: “Ngaye ne, cafahántsa ngu jyé riji. Quihndë ne, nihñi ná entregadu cuenta tséhë xa xi tacun ntse ta, ngaye ne, ha quihndë cumaji cuihinnduju cojo xa xi nechintehé.” Cuatjin cachja me. ³ Sehe ngajan xi cha xi matitjun tséhë xa jan ne, cuitjin catsingataha cacun cha: “¿Mé xi ndatjin sahme quihndë xi tivaxéxin ná nai naha tséhë xa xi tejñataha? Ngahan ne, maji sahme xa xi hai. Hacuaha sava ná cjué cjuéhya caridad. ⁴ Haan, ha hvé mé xi sahme cojo sa xi cjuahatsja ná xuta ndava me hya xi cuétjuxen tséhë xa xi tejñataha.” Cuatjin catsingataha cacun cha. ⁵ Hya xi camá ne, cajindaya cha chuva ngu chuva ngu xuta xi quitjen tséhë nai rë cha. Hane cuitjin cachja cha cojo ngu me: “Ngayun ne, ¿hacutjin quitjen tséhë nai naha?” Cuatjin cachja cha. ⁶ Sehe ngajan xi me xi quitjen jan ne, cuitjin cafayangui me: “Ngu cientu tonel tséhë aceite.” Cuatjin cafayangui me. Hane cha xi matitjun tséhë xa jan ne, cuitjin cachja cha cojo rë me: “Juhun xujun tséhë cuenta nuju vi ne, tinechun sanii, nihñu sa ngu, hane tetuhun yachantë ni.” Cuatjin cachja cha. ⁷ Hya xi camá ne, cachja nga cha cojo ngu nga me cuitjin: “Ngayun ne, ¿há cjín quitjen tséhë nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigu.” Cuatjin cafayangui me. Hane cha xi matitjun tséhë xa jan ne, cuitjin cachja cha: “Juhun xujun tséhë cuenta nuju vi ne, nihñu sa ngu, hane tetuhun ūjuchan ni.” Cuatjin cachja cha. ⁸ Ngajan xi xuta nchina xi nai rë xa jan ne, cavaxéndaja me cha tsehen xi matitjun tséhë xa ngatsë rë xi jemu quicun cacun cha xi cuatjin casahmi cha. Hitsë sa quicun cacun xuta tsehen cojo ngasunhndë rë me, xi cuma rë xuta xi fitjengui me ndiya rë Nina.

⁹ ’Nguehe cuichjá cojo nuju ngayun xuta ladu naha ta hacuaha meje rë xi chjuhun tujún nuju, handasa hatuxa tsehen ta tséhë xi tséhë ngasunhndë, hane nicujunxun, cojo sa xi cuinga rë xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndë cumachjiriin nuju tujún ne, cjuahatsja nuju Nina ngajan hiscan xi cuinechan cojo rë me yéjë nu yéjë nixtin.

¹⁰ ’Yo xi tjin rë cjuaquixi xi ndaja sahmi ngu xa xi chúa ne, hacuaha hatuxa tjin rë cjuaquixi xi ndaja sahmi ngu xa xi jyé. Hacuaha yo xi vindacha hya xi sahmi ngu xa xi chúa ne, hacuaha hatuxa vindacha hya xi sahmi ngu xa xi jyé. ¹¹ Véhë xi ngayun ne, sá xi vindachun hya xi nicujunxun tujún tsehen xi tséhë ngasunhndë ne, hatuxa cuejñaa Nina ntsun cjuanchina xi cjuaquixi, xi tséhë me. ¹² Hacuaha sa xi vindachun hya xi nicujunxun cjuanchina tséhë jingu sa ne, Nina ne, hatuxa suaain nuju me cjuanchina xi cuma tsujun suvun.

¹³ ’Tsajin ngu hndixahan xi ma fahacuenda xa tséhë jo nai rë xa ta, tséhë xi choho scuëë rë ngu nai rë hane tsihmu cacun nai rë xi majo jan. O sá tsajin ne, jemu cuetaha

yojo rë cojo ngu nai rë, hane nai rë xi majo jan ne, hisca sahmicuendaain rë. Vëhë xi xi ngu ñahñu ni ne, maji nihñu hacutjin xi meje rë Nina cojo hacutjin meje rë cjuanchina tsehen xi tsëhë ngasunhndë. Cuatjin xu cachja Jesús cojo xuta ladu rë me.

¹⁴ Cha fariseo, xi hacuaha jemu chuya rë cha tsëhë tujún ne, cahndë xu cha yëjë cjua xi cachja Jesús cojo xuta ladu rë me jan. Hane cavejnucëe cha Jesús. ¹⁵ Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vëë me cjuatacun xi jiya cahntsua xahasen nuju. Hane cjuatacun xi sahmi yehe sahmi hnga xuta ne, Nina ne, chuyiin camahani rë me tsëhë.

Cumaji chjaháxin rë hisca ngu cjua tsëhë ley rë Nina

¹⁶ 'Hya xi chaja sa tsuyihiya Juan Vitenda Xuta ne, yëjë xuta ne, casacu camachaya rë me cjua rë Nina ngatsë rë ley xi cavejña Nina tsja Moisés, cojo ngatsë rë profeta xi hacuaha cachja me cjua rë Nina. Hisca nixtin rë Juan ne, hisca quihndë ne, tisuá ngahan tijimachaya rë xuta cjuandajyihi xi chja xi Nina ne, sahmi me gubiernu. Hane yëjë ni xuta ne, meje cuisehen me hiscan sahmi Nina gubiernu, handasa cojo cjuachan.

¹⁷ 'Ngahnga cojo nangui ne, hitsë sa chjaain cjuë xi cuma rë xi chjaháxin rë ngu cjua tsëhë ley rë Nina.

Jyé rë xuta xi tsismi chjuun rë sehe cuixan cojo jingu sa chjuun

¹⁸ 'Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuiin chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuiin chjuun rë.

Ejemplu tsëhë cha nchina cojo cha yuma xi hmí rë Lázaro

¹⁹ 'Cuejña ne xi cavéjña ngu cha xi jemu nchina, xi jercu ndaja camahani tsjian vajá. Nchunchujun ni ne, jemu ndajyihi suhi sahmi cha. ²⁰ Hacuaha cavéjña ngu xuma cha yuma xi hmí rë Lázaro, xi jingujiye ni yojo rë cha camatsë. Hane jiña cha ngajan tingotjo ndava cha nchina jan. ²¹ Hane hacuaha cojo cha yuma jan jemu meje sinë cha hitsë xi vangui jinë cha nchina jan. Hatuxa jemu choho vatju cha má, hisca vinduva naña chimajnu chu tsë xi yaja rë cha. ²² Hya xi camá ne, xi cahme xuma cha yuma jan ne, quijicojo ángel hasen rë cha ngajan cahndé ndajyihi, cavéjña tangun cojo hasen rë nima Abraham. Hane cha nchina jan ne, hacuaha cahme cha, hane caseyanji cha.

²³ 'Hane hya xi jiya hasen rë cha nchina jan cahndé hiscan xi fi hasen rë nima ne, jercu tivatju cjuañhi. Hane xi cavuya cavutsejenniji hasen rë cha ne, cavëë rë hasen rë nima Abraham tsëhë cjin ni, hacuaha cavëë rë hasen rë nima Lázaro, tacun tangun cojo hasen rë nima Abraham. ²⁴ Hya xi camá ne, cajindaya hasen rë cha nchina jan tsëhë hasen rë nima Abraham, cuitjin cachja: "Tatá Abraham, catamayuma nuju ngahan ne, tinújun cojo cha Lázaro vë ne, catitsicahnchi cha rcutsja cha cojo nandá, sehe ningatjun cha catinduva catitsinguijnehnchan cha hitsë neje ta, tsëhë xi jercu má camahani ná cojo ndihi vi." Cuatjin cachja hasen rë cha nchina jan. ²⁵ Peru hasen rë nima Abraham ne, cuitjin cafayangui: "Ninguitsjin tsan ta xcun cjuahñu riji ne, jemu ndaja cavatji camá, hane xuma cha Lázaro vi ne, jemu choho cavatju cha camá. Peru quihndë ne, tisacu rë cha cjuetacun nguehe, hane ngaye ne, tivatji cjuañhi. ²⁶ Hacuaha tjin sa ngu cjua xi cuichjá cojo ri: Nina ne, cavejña me ngu xanga jyé xi jiayavasen tsëhë hiscan xi nechintihin ngayin cojo tsëhë hiscan xi nechintehe ngaye, cojo sa xi yo ngayin xi meje cuátjin xi cuinduvin ndyá ne, cumaji, hacuaha yo ngayun xi meje cuatjun cuinduvun nguehe ne, hacuaha cumaji." Cuatjin cafayangui hasen rë nima Abraham. ²⁷ Sehe ngajan xi hasen rë cha nchina jan ne, cuitjin cachja: "Tatá, nihñu favor ne, ningatjun cha Lázaro ngajan ndava nahmi naha, ²⁸ cojo sa xi sua cha cumachaya rë catsihñú xingueen xi siu jan, cojo sa xi hacuiin cojo cha cuechú cha cahndé vihi hiscan xi tacun cjuañhi xi tivatjin tijima." Cuatjin cachja hasen rë cha nchina. ²⁹ Hane hasen rë nima Abraham ne, cuitjin

cachja: “Peru cha xi cuacun vë ne, cuma cuiſiñu cha cjua xi ha catsihindu Moisés cojo cjua xi ha catsihindu profeta hatsëe nixtin. Vëhë catetaharcu cha.” Cuatjin cachja hasen rë nima Abraham. ³⁰ Ngajan xi hasen rë cha nchina jan ne, cuitjin cafayanguí: “Tatá Abraham, cumaji xi cojo cjua vëhë ni. Peru sá xi yo cuetju tsëhë ngajñi rë nima xi cjue cuichja cojo cha ne, ngajan xi tsindeya cha cjuatacun rë cha.” Cuatjin cafayanguí hasen rë cha nchina jan. ³¹ Peru hasen rë nima Abraham ne, cuitjin cachja: “Sá xi mijí cuihndë cha tsëhë cjua xi catsihindu Moisés cojo cjua xi catsihindu profeta ne, hacuanitjin ni cumacjaain rë cha, handasa ngu nima cuya cjuahñu, cjue cuichja cojo rë cha.” Cuatjin cachja hasen rë nima Abraham. Cuatjin xu fi cjua xi cachja Jesús cojo cha fariseo cojo xuta ladu rë me.

17

Miji rë xi nihñu xi tsismicacun ngu xuta ndiya rë Nina

¹ Ngu nixtin jan ne, hacuaha cachja xu Jesús cojo xuta ladu rë me cuitjin:

—Hatuxa cuinduva xcusun xi meje sahmi xi nismetacuun ndiya rë Nina, peru jemu chojyঃhi tsëhë xuta xi nduvacojo xcusun vëhë. ² Hitsë sa ndaja tsëhë xuta vëhë xi xtyangui ngu ndyojo natsi nguisin me sehe ningatjenya rë me ngajñi ndachacun, xi cuma rë xi sahmi me xi ngu xuta ladu naha tsismicacun me ndiya rë Nina.

³ Nechun cuidadu tsëhë xcusun xi nihñu. Sá xi ngu xingun choho sahmi cojo nuju ne, tinújuntuhun rë. Hane sá xi tsindeya cjuatacun rë ne, ninchatuhun rë. ⁴ Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vëhë cjue cuichja cojo nuju xi tsindeya cjuatacun rë ne, ninchatuhun rë. —Cuatjin xu cachja Jesús.

Cuma cuinuhyan tsëhë Nai naja sá xi mangutacuun ndastu hitsë cojo rë me

⁵ Ngajan xi apóstol ne, cuitjin xu cachja me cojo Nai naja:

—Nihñu xi hitsë sa ndaja cumangu tacuín cojo nuju. —Cuatjin xu cachja me.

⁶ Sehe ngajan xi Nai naja ne, cuitjin xu cafayanguí me:

—Sá xi mangutacún cojo ná ndastu hitsë ne, hacuaha cuma cuinújun cojo ya vihi catjixin tsëhë cahndé hiscan secun, hane catji catisecun ngajan ngajñi ndachacun, hane hacuaha cuihndë tsujun.

Hacutjin meje rë xi sahmi hndixahan cojo nai rë

⁷ Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rë chu nuju. Hane xi cjuehe hndixahan vëhë xi quiyi nguijña ne, ¿há cuinújun cojo cuitjin: “Ndove sanii ne, xini niñu”? ⁸ Jéya, hacuia ta cuitjin cuinújun cojo: “Tehe chjini xi sínë, hacuaha tehe chjini yojo riji xi cuindove chani xi sínë xi cuëhë, hane xi cuijnetaha sínë ne, sehe xini sihi ngaye.” Cuatjin cuinújun. ⁹ Hacuaha tuun nacuechji rë hndixahan vëhë tsëhë xi casahmi yéjë ni hacutjin xi cavitexun rë. ¹⁰ Hacuanitjin nuju ngayun ta hya xi ha cafë canihñu yéjë ni hacutjin cavitexa nuju Nina ne, cuitjin meje rë xi ningatuhuntacún: “Ngahan ne, ngu hndixahan tujyë ni ngahan ta xi casahme ne, hacutjin xi casatëxa ná ne, vëhë ni xi casahme. Cuatjin meje rë xi ningatuhuntacún.” Vëhë xu cjua xi cachja Jesús cojo xuta ladu rë me.

Casahmi Jesucristu xi camandaja té cha hmu rë

¹¹ Hane hya xi tivatju xu Jesús vasencia tsëhë distritu Samaria cojo distritu Galilea xi cjui me ngajan Jerusalén ne, cuitjin camá. ¹² Hora xi ha cuisehen me ngu nandya jan ne, nduvatjengui xu té cha me, cha xi yaha rë ngu xcusun chíhin vitaha xi setaha yojo naja. Hane caxinchacunhñu xu cha hitsë jan, ¹³ hane tsëhë cjin ni cajindaya xu cha cachja cha cuitjin:

—¡Tatá Jesús! ¡Catamayuma nuju ngayin! ¡Nihñu xi cumandaja ngayin! —Cuatjin xu cajindaya cha cachja cha.

¹⁴ Hane xi cavëë Jesús cha ne, cuitjin xu cachja me:

—Tángun hiscan xi siu nahmi, ningacun rë me yojo nuju xi tsajin mé cún ngayun. —Cuatjin xu cachja me.

Hane ndiya cji cha ne, camandaja xu cha. ¹⁵ Hya xi camá ne, xi cavëë xu ngu cha xi camandaja cha ne, cavuya quijitjengui xu cha Jesús, jindaya cha chja cha xi tisahmi jyë tisahmi hnga xu cha Nina. ¹⁶ Hane xi cafehe xu cha hiscan secun Jesús ne, qui ji caticjaxcun cha xcun me, xi tisua cha nacuechji rë me. Cha xi cuajyihi jan ne, cha Samaria cha. ¹⁷ Sehe ngajan xi Jesús ne, cuitjin xu cavinenguise me xuta ladu rë me:

—¿Hacuiin yëjë tê cha xi cuicun vi xi camandaja cha ni? ¿Cha xi ñaja sa ne, jarë cha ne? ¹⁸ ¿Há suvá ni cha xi cuijyihi vi xi ngu xutaxín cha xi cavuya cha xi sahmi jyë sahmi hnga cha Nina ni?

¹⁹ Sehe cachja xu me cojo cha xi camandaja jan cuitjin: —Tisatjunhngun, hane tjangun. Ngatsë rë xi camangutacún cojo ná ne, vëhë xi camandaja ngayun. —Cuatjin xu cachja Jesús.

Hacutjin cuma hya xi cuinduva Nina sahmi me gubiernu

²⁰ Cuitjin xu camá nga ngundiya. Cha fariseo ne, cavinenguise cha Jesús janihya cuinduva Nina sahmi me gubiernu. Sehe ngajan xi Jesús ne, cuitjin xu cafayangui me tséhë cha:

—Nina ne, hya xi cuinduva me sahmi me gubiernu ne, hacuiin titjun sua me cumachaya naja sehe cuinduva me. ²¹ Tsajin yo cuichja: “Cuajyihi Nina nguehe”, o sá: “Cuajyihi Nina ngajan”; ta Nina ne, ha tisahmi me gubiernu ngajñi nuju. —Cuatjin xu cachja me cojo cha fariseo.

²² Hya xi camá ne, cuitjin xu cachja me cojo xuta ladu rë me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rë Xuta Jain ngahan, peru cumaji. ²³ Yahnga me cuichja me cojo nuju: “Cuajyihi me nguehe”, o sá: “Cuajyihi me ngajan”; peru hacuiin cuangun cojo me, hacuiin cuanguntjengun me ta ²⁴ sacuaha sahmi hasen ndihichuhún xi ha tu ñahñu sahmi hasen rë jinguyé ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tséhë yëjë ni ladu hya xi cuechú nixtin xi cuinduva nga ngahan xi Quihndi rë Xuta Jain ngahan. ²⁵ Peru chaja sa xi cuechú nixtin vëhë ne, hatuxa meje rë xi jemu cjín cjuañhi cuátju cuma, hacuaha xuta xi siu nixtin vihi ne, tsitjungui ná me. ²⁶ Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva. ²⁷ Nixtin rë Noé vë ne, jiné jihvi xuta, vixan me, tsinguixan me quihndi rë me. Cuatjin sahmi cuaha me hisca nixtin xi cavisehen Noé cahntsua barcu, hacuaha casesunté nandá, hane ngajan café yëjë xuta cahme me. ²⁸ Hacuanitjin ni xcusun vëhë casahmi xuta nixtin hya xi cavéjña ngu xutachanga xi hmí rë Lot: jiné hvi me, vatsë me, viteña me, vincha me tjé, hacuaha sahmi me ndihya. ²⁹ Peru nixtin xi cavetju Lot tséhë nandya Sodoma ne, cavixu ndihi tséhë ngahnga, hacuaha cavixu ndyojo xi yaha rë ndihi, sacuaha xi cavaha ngu tsihñu, hane ngajan café yëjë xuta cahme me. ³⁰ Hacuaha cuanitjin ni sahmi xuta hya xi cuinduva ngahan xi Quihndi rë Xuta Jain ngahan.

³¹ 'Nixtin hya ne, xuta xi hinchasun me rcu ndava me ne, mé tséhë me xi siu cahntsua ndihya ne, miji rë xi cuitujne me cjue jaha me. Hacuaha ha chuva vëhë ni ne, xuta xi siutahá me nguijña ne, miji rë xi cuya cjue me ndava me. ³² Ninguitsjun sacuaha xcusun xi cavatju nima chjuun rë Lot. ³³ Yo xi meje cjuenduju cojo ngasunhndë rë cojo ngahñu rë suvá ne, cuechintaain cjuahñu xatsë; peru yo xi cuatju cjuañhi o hisca cueya ngatsë naha ne, vëhë xi cuechútáha cjuahñu xatsë.

³⁴ 'Nguehe cuichjá cojo nuju ta nguixun nixtin hya ne, jo xuta cuiyujufë tangun me ngu nachan. Ngu me ne, chjaháxin rë me, hane me xingu jan ne, cuejña me. ³⁵ Hacuaha jo nga yachjin ne, cuiyujuhá na coho na. Ngu na ne, chjaháxin rë na, hane na xingu jan ne, cuejña na. ³⁶ Hacuaha jo nga cha ne, cuiyujuhá cha nguijña. Ngu cha ne, chjaháxin rë cha, hane cha xingu jan ne, cuejña cha. —Cuatjin xu cachja Jesús.

³⁷ Hane xuta ladu rë me ne, cuitjin xu cavinenguise rë me:

—¿Hane jani cuma xcusun vëhë ni, tatá? —Cuatjin xu cavinenguise me.

Sehe ngajan xi Jesús ne, cachja xu me ngu ejemplu cuitjin:
—Hiscan jiña chu xi cahme ne, hacuaha ngajan matangun chu lote. —Cuatjin xu cachja Jesús.

18

Ejemplu tséhë chjuun cahan cojo juez tsehen

¹ Hacuaha cachja sa xu Jesús ngu ejemplu cojo xuta ladu rë me xi sua me cumachaya rë xi meje rë xi yasen ni ne, sahmi me oración rë me, miji rë xi sahmi chúva cacun me.
² Cuitjin xu cachja me:

—Cuejñaa ne xi ngu nandya jan ne, tjin ngu juez xi tsacjuin rë Nina hacuaha faharcuaain rë xuta. ³ Hacuaha nandya jan ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucuendun jyé xi vincha xuta tsahan.” Cuatjin cachja na. ⁴ Peru juez jan ne, jemu jyé nixtin xi mijí sahmicuenda me tséhë na. Peru xi camá ngascan ne, cuitjin catsingataha cacun me: “Handasa tsacjuun Nina hacuaha faharcuun xuta ne, ⁵ peru ngatsë rë xi jemu tsuaxti na cahan vi ngahan ne, vëhë xi cjuahácuenda cjuacjintacun rë na, sá tsajin ne, jemu tsijenda na ngahan xi ngajan cjui ngajan nduva na.” Cuatjin xu catsingataha cacun me.

⁶ Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vë. ⁷ Nina ne, ¿haciuin hatuxa cjuahacuenda me cjuacjintacun rë xuta xi cavaxijin me, xi nguixun nguitajñu fehya rë me xi cjuahacuenda me tséhë? ¿Há jemu cuindeya cjuahacuenda me? ⁸ Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rë Xuta Jain ngahan ne, ¿há tjin xuta xi mangucacun cojo ná nguehe ngasunhndë? —Cuatjin xu cachja Nai naja.

Ejemplu tséhë oración rë cha fariseo cojo oración rë cha faha tujúnsa

⁹ Hacuaha siu sa xu ngujo xuta xi tsingataha cacun suvá me xi tsajin jyé rë me xcun Nina hacuaha sahmi xta me cojo xuta xi yahnga. Hane xuta xi cuacun vë ne, cuitjin xu cachja Jesús ngu ejemplu cojo rë me:

¹⁰ —Cuejña ne xi jo cha jan ne, quiji cha yungun xi matitjun xi sahmi cha oración rë cha. Ngu cha ne, cha fariseo cha, hane cha xingu ne, cha faha tujúnsa cha. ¹¹ Cha fariseo jan ne, cavisecun cha casahmi cha oración rë cha cahntsua xahesen ni rë cha, cachja cha cuitjin: “Ngayun Nina, suá nacuechji nuju ta ngahan ne, hacuiin tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguaain ngahan cojo cha faha tujúnsa vi. ¹² Sahme xun naha jo ndiya xi ngu totje, hacuaha vátécja té cahndé tséhë yéjë ni xi sacu ná, hane suá nuju ngu cahndé.” Cuatjin casahmi cha fariseo oración rë cha. ¹³ Peru cha faha tujúnsa ne, hitsë ni cjin secun cha, hacuaha hisca cavuyaain cavutsejen cha ngahnga ta tu cavisanetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyé naha.” Cuatjin cachja cha. ¹⁴ Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha cafë jyé rë cha xcun Nina, peru cha fariseo jan ne, hacuiin cuatjin cafë jyé rë cha. Cuatjin camá ta, tséhë xi yéjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi jyé rë me. —Cuatjin xu cachja Jesús.

Catsinchacun Jesucristu nixti

¹⁵ Hacuaha cjuicojo xu xuta nixti rë me hiscan tacun Jesús xi cuisanetsja me nixti jan. Peru hya xi cavëë xu xuta ladu rë Jesús xi cuatjin cjui xuta cojo nixti rë me ne, cavatéjcia xu me cjuatacun rë xuta jan. ¹⁶ Peru Jesús ne, cajindaya xu me nixti jan xi cjuetjengui rë me, sehe ngajan xi cachja xu me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tséhë xi nixti xi cuacun ne, hatuxa visehen ngajan hiscan xi sahmi Nina gubiernu. ¹⁷ Cuichjá cojo

nuju cjuaquixi ta suvá ni xuta xi tsingatihin me xi sahmi Nina me gubiernu sacuatjin tsingatihin nixti ne, me vëhë ni xi cuisehen me hiscan xi sahmi Nina gubiernu. —Cuatjin xu cachja Jesús.

Jemu chja cuisehen xuta nchina ladu rë Nina

¹⁸ Ngu xuta xi matitjun ne, cavinenguise xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsé? —Cuatjin xu cachja me.

¹⁹ Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me. ²⁰ Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachéjé, xicanujuun cjuandesu tséhë xuta, chjuhunrcun nahmi nuju hacuaha chjuhunrcun na nuju.” —Cuatjin xu cachja Jesús cjua rë ley rë Nina.

²¹ Hane ngajan xi xuta xi matitjun jan ne, cuitjin xu cachja me cojo Jesús:

—Yéjé cjua vëhë ne, ha cahndë tséhë hisca cjualihndi naha. —Cuatjin xu cachja me.

²² Hane xi cahndë xu Jesús cjua rë me ne, sehe cachja xu me cuitjin:

—Tjin sa ngu cjua xi machaja nuju: yéjé ni xcusun xi tjin nuju ne, titeñu, hane sehe tichuncjun tujún rë ngajñi rë xuta yuma. Hane xi cuatjin nihñu ne, jemu jyé cjuanchina sacú nuju ngajan ngahnga. Hane xi cjué cuichuncjun tujún vëhë ne, sehe nduvun tisecun ná. —Cuatjin xu cachja Jesús.

²³ Peru xi cahndë xu xuta xi matitjun jan cjua xi cachja Jesús ne, jemu va camá cacun me, tséhë xi jercu nchina camahani me. ²⁴ Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:

—Jemu chja xi ngu xuta xi tjin rë me cjuanchina cuisehen me hiscan sahmi Nina gubiernu. ²⁵ Ha hitsé sa chjaain cuatju ngu chu camellu ngojo rë ngu níndu xi cuma rë xi cuisehen ngu xuta nchina hiscan sahmi Nina gubiernu. —Cuatjin xu cachja Jesús.

²⁶ Ngajan xi xuta xi cahndë me cjua jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

²⁷ Hane Jesús ne, cuitjin xu cafayangui me:

—Yéjé ni xi maji sahmi xuta ne, Nina ne, hatuxa ma sahmi me. —Cuatjin xu cafayangui Jesús.

²⁸ Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismítacuín yéjé ni xcusun xi tjin niji, hane tivisecuin nuju. —Cuatjin xu cachja Pedru.

²⁹ Hane Jesús ne, cuitjin xu cachja me:

—Cuichjá cojo nuju cjuaquixi ta yéjé xuta xi tsismicacun me ndava me, tsismicacun me chjuun rë me, tsismicacun me xicjin me, tsismicacun me xutacha rë me, tsismicacun me quihndi rë me, xi cjuetjengui me ndiya rë Nina ne, ³⁰ hatuxa cjín sa cahndé sacú rë me xi cuma sacuaha ndava me, hacuaha hatuxa cjín sa xuta sacú rë me xi cuma sacuaha xuta rë me, quihndé xi siu me ngasunhndé vihi, hane hya xi cueya me ne, sacú rë me ngu cjuahñu xatsé. —Cuatjin xu cachja Jesús.

Camá jyan ndiya cachja Jesucristu xi cueya me

³¹ Hya xi camá xu ne, quijicojoxin Jesús tejó xuta ladu rë me, sehe cachja xu me cojo cuitjin:

—Quihndé ne, tivanguen Jerusalén. Hane xi cjuehen jan ne, cuetjucaa yéjé sacuatjin catsihindu profeta tsahan, ngahan xi Quihndi rë Xuta Jain ngahan. ³² Ngahan ne, cuma ngahan entregadu tsja xutaxín, cuejnucéé ná xuta, choho cuichja me tsahan, cuéhénatya ná me. ³³ Hane xi cjué cuaja ná me ne, sehe tsiquehen ná me. Peru xi ma jyan nixtin ne, cúya nga cjuahñu. —Cuatjin xu cachja Jesús.

³⁴ Peru xuta ladu rë me jan ne, hisca ngu xu cjua vëhë cajnii rcu me ta tjihma cjuatacun vëhë xi cuma rë me. Vëhë xi hvíin xu me mé vijne cjua xi cachja Jesús jan.

Casahmi Jesucristu xi camatsejen nga rë ngu cha rcá ngajan Jericó

³⁵ Hya xi camá ne, xi camatiña xu Jesús tséhë nandya Jericó cojo xuta ladu rë me ne, ngajan tacun xu ngu cha rcá tjehen ndiya, fehya cha caridad. ³⁶ Hane xi cahndë cha xi jercu cjín xuta fane ntsacu me ne, sehe cavinenguise xu cha mé jima jan. ³⁷ Hane tjin xu yo cachja cojo cha xi Jesús tséhë nandya Nasaret tivatju me cojo xuta ladu rë me. ³⁸ Hane cha rcá jan ne, cuitjin xu cajindaya cha cachja cha:

—¡Ngayun Jesús, tjé rë David! Catamayuma nuju ngahan. —Cuatjin xu cachja cha.

³⁹ Hane xuta xi cjui titjun jan ne, cavisiajmi cjan xu me cojo cha xi sejyu cha. Peru cha vëhë ne, hitsë sa jercu cajindaya xu cha cachja cha, cuitjin cachja cha:

—¡Ngayun tjé rë David! Catamayuma nuju ngahan. —Cuatjin xu cachja cha.

⁴⁰ Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tséhë Jesús ne, sehe cavinenguise xu me cha cuitjin:

⁴¹ —¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

⁴² Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tséhë xi camangutacún cojo ná. —Cuatjin xu cachja Jesús.

⁴³ Hane ha hora vëhë ni ne, camatsejen nga xu rë cha. Sehe quiji xu cha cojo Jesús táchá sahmi jyé sahmi hnga cha Nina. Hane xi cavëë yéjë xuta xcusun xi camá jan ne, jemu cavaxëndaja xu me Nina.

19

Jesucristu cojo cha Zaqueo

¹ Hya xi camá ne, cavisehen xu Jesús nandya Jericó xi cuatju me vasencia nandya.

² Hane ngajan tacun xu ngu cha xi hmí rë Zaqueo, ngu cha xi matitjun tséhë cha faha tujúnsa, hacuaha jemu nchina cha. ³ Hane cha vëhë ne, jemu meje scuëë xu cha yo xi Jesús, peru camaji ta, tséhë xi jercu cjín camahani xuta quitsë me, hacuaha cha vëhë ne, jemu patú xu cha. ⁴ Hane xi cavangatitjun cha ne, quiji camiji xu cha ngu ya jyé, cojo sa xi cuma scuëë cha Jesús ta, tséhë xi hatuxa ngajan cuatju me. ⁵ Hane xi cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunjnu sanii ta, tséhë xi sahmi ná nguyjé xi ndya nuju cuitejña quihndë.

—Cuatjin xu cachja me.

⁶ Ngajan xi cha Zaqueo ne, marcu macjain xu cavitujne cha, cafahatsja cha Jesús cojo yéjë ni cjuasua, quijicojo cha me ndava cha. ⁷ Hane xi cavëë yéjë xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavéjña me cojo ngu cha tsehen. —Cuatjin xu cachjahma me.

⁸ Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasentjin tséhë yéjë ni xcusun xi tjin ná ne, suá rë xuta yuma. Hane sá xi tjin yo xi cavaxé rë tujún cojo cjuandacha ne, ñuju cuatjin sacuatjin xi cafahá ne, tsicúya tséhë me. —Cuatjin xu cachja cha.

⁹ Ngajan xi Jesús ne, cuitjin xu cachja me:

—Quihndë ta cuatjin ne, ngayujun ni tséhë ndihya vihi ne, cavetjuntjun ta, me xi cuijyিhi vi ne, hacuaha cojo me má me xuta ladu rë Nina. ¹⁰ Hane ngahan xi Quihndi rë Xuta Jain ngahan ne, canduvá xi cuanguésé hacuaha cuaxéjtë xuta ladu rë Nina xi cachajá me tséhë ndiya rë Nina. —Cuatjin xu cachja Jesús.

Ejemplu tséhë tujún xi casua nai rë hndixahan

¹¹ Xi tu cajnetaha cavisiñuju xuta cjua vëhë ne, Jesús ne, cachja sa xu me ngu ejemplu cojo xuta jan ta, tsëhë xi tiña siutahá me cojo nandya Jerusalén, hane má xu rë xuta ta ha hisca tacun xati xi cuinduva Nina sahmi me gubiernu.

¹² Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjuahaxa me xi cumatitjun me tsëhë estadu rë me, sehe cuya nga me. ¹³ Hane chaja sa xi cjue me ne, cajindaya me té hndixahan rë me, sehe casua rë me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi jinguyéjë rë xi cjué sehe cúya.” Cuatjin cachja me. ¹⁴ Peru xuta tsëhë estadu rë me ne, jemu choho vëë rë me. Vëhë xi hya xi ha quiji xuta chacun ja ne, catsingatju xuta estadu rë me jan ngujo cha xi cuichja cha cuitjin cojo xuta xi suaxa rë xuta chacun jan: “Mamijí niji xi me xi cuajyihu vë cumatitjun me tsijin.” Cuatjin cuichja cha. ¹⁵ Hya xi camá ne, xi cavuya xuta chacun jan xi cafë cafhatsja me xa ne, cavitexa me xi chjindaya rë cha hndixahan rë me xi casua rë me tujún jan, cojo sa xi sua cha cumachaya rë me há cjín cavesun rë cha jima ngu cha xi casahmi cha xa cojo tujún xi casua me cha. ¹⁶ Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná té cuatjin sa.” Cuatjin cachja cha. ¹⁷ Sehe ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsé rë xi jemu ndaja canihñi xa xi chúva vë ne, suá ri té nandya xi cumatitjun ngaye tsëhë.” Cuatjin cachja me. ¹⁸ Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñú cuatjin sa.” Cuatjin cachja cha. ¹⁹ Hane nai rë hndixahan jan ne, cuitjin cachja me: “Ngaye ne, cumatitjun ngaye tsëhë hñú nandya.” Cuatjin cachja me. ²⁰ Hya xi camá ne, xi canduva nga ngu cha ne, cuitjin cachja cha: “Tatá. Cuajyihu tujún xi catuhun ná nguehe. Tujún vi ne, cavinchánda cahntsua ngu pañutu ta, ²¹ tsëhë xi tsácjun nuju. Ta ngayun ne, jemu hñu cjua nuju. Tangun ngayun cojo ngu xuta xi fanga me handasa hacuiin me vëhë catsitjë me ta, tsëhë xi ngayun ne, hacjahi sahmi xa ne, ngayun chjuhunntsun chji rë.” Cuatjin cachja cha hndixahan vëhë. ²² Ngajan xi xuta chacun jan ne, cuitjin cachja me cojo hndixahan vëhë: “Ngaye, hndixahan tsehen ne, cojo cjua riji sove ni tsichúva ri. Ngaye xi noje xi hye xi jemu hñu cjua naha, hacuaha tangun ngahan cojo ngu xuta xi fanga me handasa hacuiin me catsitjë me, tsëhë xi ngahan ne, hacjahi sahmi xa ne, ngahan fahántsa chji rë. ²³ Sá xi hye xi cuatjin ne, zmé má hacuiin xcun bancun cahmi chani tujún xi casuá ri, cojo sa xi hya xi cjuéhë ne, cúya cjuahántsa tujún naha, peru cojo quihndi rë ni?” Cuatjin cachja xuta chacun jan cojo hndixahan rë me. ²⁴ Sehe cachja sa me cojo ngujo hndixahan rë me xi hinchacun jan cuitjin: “Chjuhunthuhun tujún xi yaha cha vë ne, sehe tuhun rë cha xi cavesun rë té cuatjin sa sacuatjin tujún xi casuá rë.” Cuatjin cachja xuta chacun jan. ²⁵ Hane hndixahan jan ne, cuitjin cafayangi: “Tatá. ¡Peru cha vëhë ne, ha tjin rë cha té cuatjin sal!” Cuatjin cachja cha. ²⁶ Ngajan xi xuta chacun jan ne, cuitjin cachja me: “Nguehe cuichjá cojo nuju ta yéjë xuta xi cavesun rë me xcun xi ha tjin rë me ne, suá sa rë me. Hane xuta xi tsajin mé cavesun rë me ne, hisca xi tjin rë me ne, cjuahátahá. ²⁷ Hane sacuaha condra naha xi mijí rë xi ngahan cumatitjun ngahan tsëhë ne, tángun chjuhun, nduvuncujun nguehe, sehe nicuhun nguehe xcún.” Cuatjin cachja xu xuta chacun xcun ejemplu xi cachja Jesús.

Cafehe Jesucristu nandya Jerusalén

²⁸ Hya xi camá xu ne, xi cavatju cachja Jesús cjua vëhë ne, sehe cavetju me quiji sa xu me xi cjuehe me Jerusalén. ²⁹ Hane hya xi camatiña me tsëhë nandya Betfajé cojo nandya Betania, nandya xi siu tiña tsëhë ndetjún xi hmí rë Ndetjún Olivu ne, sehe catsingatju xu me jo xuta ladu rë me xi cjue tixa rë me, ³⁰ hane cuitjin xu cachja me:

—Tángun nandya xi tsejen tacun vë. Hane xi cjuhun jan ne, ngajan cuechuntuhun ngu chu burru xatsé, xi hisca ngu cjéé cuijin rë chu, tjihñu chu. Hane chundecjun chu, nduvuncujun chu. ³¹ Hane sá xi yo cjuinenguise nuju mé má cuatjin chundecjun chu ne,

sehe tinújun cuitjin: “Nai niji meje rë me chu.” Cuatjin tinújun. —Cuatjin xu cachja Jesús.

³² Hane me xi casatëxa rë jan ne, quiji xu me, hane cavetjucaa jain sacuatjin cachja Jesús cojo rë me. ³³ Hane jinguyéjë rë xi tivundecja me burru jan ne, nai rë chu ne, cuitjin xu cachja me:

—¿Mé má cuatjin chundecjun burru vë? —Cuatjin xu cachja me.

³⁴ Hane xuta ladu rë Jesús jan ne, cuitjin xu cafayangui me:

—Nai niji meje rë me chu. —Cuatjin xu cachja me.

³⁵ Sehe quijicojo xu me chu hiscan tacun Jesús. Hane cavyujusun me tsjian rë me ngaxtun chu, sehe catsiquijin xu me Jesús burru jan. ³⁶ Hane xi cjui Jesús quisun me burru jan ne, táha ticandi xu xuta tsjian rë me hiscan cjui Jesús. ³⁷ Ngajan xi xi jima tiña xu Jesús cojo yéjë xutacjín jan nandya Jerusalén, hiscan xi cafaha rë xi ha cuitsingaxten ndiya tséhë Ndetjún Olivu ne, yéjë ni xutacjín xi xuta ladu rë Jesús jan ne, jercu ndama xu rë me, hisca cavetsihin cajindaya me cachja me xi cavaxéndaja me Nina tséhë yéjë ni cjuarcun xi cavéé me. ³⁸ Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tséhë xi Nina catsingatju rë me. Ngahnga ne, hatuxa jemu tjin cjuandaja cjuajeya, hacuaha Nina ne, hatuxa jyé hnga me cojo Hasen rë me. —Cuatjin xu cavaxéndaja xuta Nina.

³⁹ Hane ngujo cha fariseo xi hinchajñi ngajñi rë xutacjín jan ne, cachja xu cha cojo Jesús cuitjin:

—Maestro, tichuncjun cjua xi tichja xuta ladu nuju vë. —Cuatjin xu cachja cha.

⁴⁰ Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi sejyu me ne, ndyojo vi cuetsihin squindaya cuichja nga. —Cuatjin xu cafayangui me.

⁴¹ Hane xi camatiña sa xu Jesús tséhë Jerusalén ne, xi cavéé me nandya jan ne, cajihnda xu me ngatsë rë. ⁴² Sehe cachja xu me sacuaha xi tichja me cojo xuta Jerusalén, cuitjin xu cachja me:

—¡Sá mé ni xi hacuaha cojo ngayun hyun cjuatacun xi yaha cjuandaja cjuajeya! Peru quihndë matsejen ne, cjuatacun vëhë matsejen ne, jiyahma xi cuma nuju. Vëhë xi hyúun.

⁴³ Peru cuechú nixtin xi yéjë ni condra nuju matsejen ne, sahmi me ngujyé xi cuma cuisehen me nandya nuju, xinchandee nuju me yéjë ni ladu xi cuinchahñu nuju me.

⁴⁴ Tsixujne me yéjë ni ndihya tséhë nandya nuju, tsicanguin me hisca ngu ndyojo xi tinecoo, hacuaha tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tséhë xi ngayun matsejen ne, cajnii rcun hya xi cafehe Nina xi cuaxéjté nuju me. Cuatjin xu cachja Jesús.

Cavaxë Jesucristu xuta tsehen tséhë ndatsen yungun

⁴⁵ Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxë me xuta xi sahmi ndetsin jan.

⁴⁶ Cuitjin xu cachja me:

—Cuitjin camahindu xcun xujun rë Nina sacuatjin xi cachja me: “Ndyá naha ne, vejña xa xi cjue xuta sahmi me oración rë me.” Cuatjin chja Nina. Peru ngayun ne, tinihñuxun cojo sacuaha ngu cahndé hiscan xi matangun xuta chéjë. —Cuatjin xu cachja Jesús.

⁴⁷ Hyá xi camá ne, nchunchujun xu ni quiji Jesús cavicuya me xuta ngajan ndatsen yungun xi matitjun. Hane yéjë ni nahmi xi matitjun cojo yéjë cha xi vicuya cjuachacun cojo yéjë sa xuta xi matitjun ne, jemu cavangui xu me chuva rë xi tsiquehen me Jesús,

⁴⁸ Peru casacuinyiin xu rë me mé sahmi me ta, tséhë xi yéjë ni xuta ne, tivisiñuju xu me cjua rë Jesús nguñaja cacun me.

¹ Cuitjin camá xu ngu nixtin hya xi tivicuya Jesús xuta hacuaha tisua me jimachaya rë cjuandajyihi rë Nina ngajan ndatsen yungun xi matitjun. Hacuaha camatangun xu nahmi xi matitjun cojo cha xi vicuya cjuachacun cojo xuta changá, ² hane cuitjin xu cavinenguise me Jesús:

—Tinújun cojo niji ne, ¿yo cavitexa nuju xi cuatjin nihñu? ¿Yo casuaxa nuju?
—Cuatjin xu cavinenguise me.

³ Hane xi cafayangui Jesús ne, cuitjin xu cachja me:

—Hacuaha cjuinenguésé nuju ngu cjua, hane chjayunngun tsahan: ⁴ ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

⁵ Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “¿Mé má camacjaain naja cha?” ⁶ Hane sá xi cuinújan xi xuta cavitexa rë cha ne, yëjë ni xuta ne, tsiquehen naja me cojo ndyojo ta, tséhë xi yëjë ni xuta ne, ha macjain rë me xi cha vëhë ne, profeta cha. —Cuatjin xu cavisiajmicjín me.

⁷ Ngajan xi xuta xi cuacun jan ne, cachja me xi hvíin me. ⁸ Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo cavitexa ná xi cuitjin sahme. —Cuatjin xu cachja Jesús.

Ejemplu tséhë cha sahmixa xi jemu tsehen cha

⁹ Hya xi camá ne, cavetsihin cachja xu Jesús cojo yëjë ni xuta jan ejemplu vihi:

—Cuejña ne xi ngu me jan matsejen ne, catsitjé me xcun nangui rë me xca rë uva. Sehe casua me ngupo cha sahmixa xi cjuahacuenda cha sehe cjuaha tsé tsé me cojo cha. Hya xi camá ne, sehe cavetju me quiji me ngu nangui jemu tsé camahani. ¹⁰ Hane xi cavechú nixtin rë tutjé jan matsejen ne, sehe catsingatju me ngu mosu hndixahan rë me xi quiji cachja cha cojo cha xi fahacuenda xitjé jan xi sua cha hitsé tutjé xi saté rë me xi casacu rë cha xcun nangui rë me jan. Peru cha xi fahacuenda xitjé jan matsejen ne, tu cavaja cha cha hndixahan jan, sehe catsingatju cha cafe, ndastu mé casua rë cha. ¹¹ Hya xi camá ne, cavuya catsingatju nga me ngu hndixahan rë me. Hndixahan vëhë matsejen ne, jemu cavaja rë cha, jemu chocho cachja cha cojo, sehe catsingatju cha cafe, ndastu mé casua rë cha. ¹² Hya xi camá ne, cavuya catsingatju nga me ngu hndixahan xi majyan. Hndixahan vëhë matsejen ne, jemu cavanguihmu rë cha, sehe cavaxëxin cha tséhë ngajan.

¹³ 'Ngajan xi nai rë xitjé jan matsejen ne, cuitjin catsingataha cacun me: “¿Mé xi ndatjin sahme quihndë? Ndatjin rë xi tsingátju quihndi naха xi jemu hmú cácul. Cjuaharcun rë cha, xi quihndi naха.” Cuatjin catsingataha cacun me. ¹⁴ Peru xi cavëë cha xi fahacuenda xitjé jan cha vëhë matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rë me xi cuahatsja cha xitjé vi. Niquen cha, cojo sa xi tsajan cuma nangui vi.” Cuatjin cavisiajmicjín cha. ¹⁵ Hane xi cavaxëxin cha cha tséhë nangui jan matsejen ne, sehe tsiquehen cha.

‘Xi má nuju matsejen ne, ¿mé sahmi nai rë xitjé jan cojo cha xi cuacun fahacuenda jan? ¹⁶ Cjue tsiquehen me cha, sehe sua me xitjé jan cjuahacuenda jingu sa cha sahmixa.
—Cuatjin xu cachja Jesús.

Hane xi cahndë yëjë xuta cjua vëhë ne, cachja xu me cuitjin:

—¡Catamamiji cacun Nina xi cuatjin cuma! —Cuatjin xu cachja me.

¹⁷ Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rë Nina?:

Ndyojo xi catsitjungui chjinevexo ne,

vëhë ndyojo xi cavéjña tjun tjun yuju rë xihndënaña.

Cuatjin camahindu. ¹⁸ Hya xi ngu xuta cjuinenguisun me xcun ndyojo vëhë matsejen ne, cuatélanga rë me. Hane hya xi ndyojo vëhë cjuinenguisun rë ngu xuta matsejen ne, ña cuma të me. —Cuatjin xu cachja Jesús.

¹⁹ Véhë xi cha xi vicuya cjuachacun cojo nahmi xi matitjun ne, jemu cavangui xu me chuva rë hacutjin cuma xi cjuaha me Jesús hora véhë ni, tséhë xi vëe me xi ejemplu xi cachja Jesús ne, condra rë me chja. Peru tséhë xi tsacjun xu me xuta ne, véhë xi cafaain xu me Jesús ngutjen.

Cjuacjintacun tséhë tujúnsa

²⁰ Tu siu xu ni me cuidadu tséhë cjua rë Jesús, hisca catsingatju xu me ngujo cha xi tsejen sacuaha xuta ndaja, xi cuangui cha chuva rë xi cuaxë rë cha Jesús ngu cjua xi cuaaintjin, cojo sa xi cuma chjahá rë me cjuechani rë me xcun xutaxa rë ndihyavasen.

²¹ Hane cha xi cuacun jan ne, cuitjin xu cachja cha cojo Jesús.

—Maestro, ngayin ne, hyin ta ngayun ne, vicuyun rë xuta cojo cjuaquixi. Hacuaha tangun ni nújun cojo yéjë xuta ta, tséhë xi ngayun ne, hatuxa vicuyun ndiya rë Nina cojo cjuaquixi. ²² Quihndë ne, sacuaha ley rë Moisés ne, ¿há sua cahndé xi cuechjen tujúnsa naja cojo César, me xi matitjun, o há suaain cahndé? —Cuatjin xu cachja cha.

²³ Peru Jesús ne, tséhë xi ha vacun rë me xi jemu ndacha cha ne, cuitjin xu cachja me cojo cha:

²⁴ —Ningacun ná ngu tujún. Quihndë ne, ¿yo xcusun rë hacuaha yo ñihi rë xi quitahá xcun tujún vë? —Cuatjin xu cavinenguise Jesús.

Hane cha xi cuacun vë ne, cuitjin xu cafayangui cha:

—Tséhë César. —Chja xu cha.

²⁵ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tséhë me, hane tuhun rë Nina xi tséhë me. —Cuatjin xu cachja me.

²⁶ Hane camaji cavaxë xu rë cha Jesús ngu cjua xi cuaaintjin xi cuihndë xuta. Hane xi quijircun xu rë cha tséhë cjua xi cafayangui Jesús ne, tu cavyujujuuu xu ni cha.

Cjuachjinenguise tséhë xi cuya nima cjuahñu

²⁷ Hya xi camá ne, cafehe xu ngujo cha saduceo hiscan tacun Jesús. Cha xi cuicun vi ne, vicuya cha cjuachacun xi chja xi xuta xi cahme ne, cuyaain nga me cjuahñu. Ngajan xi cha xi cuacun cafehe jan ne, cachja xu cha cojo Jesús cuitjin:

²⁸ —Maestro, Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima véhë ne, meje rë xi cjuaha rë chjuun cahan véhë, cojo sa xi sacú rë na quihndi xi cuma sacuaha quihndi rë nima véhë. ²⁹ Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha véhë ne, casacuiin rë na hisca ngu quihndi cojo cha. ³⁰ Hya xi camá ne, hntsë nima véhë, cha xi majo ne, cafaha cha na cahan véhë camá chjuun rë cha na, peru hacuaha cahme cha hane casacuiin rë na quihndi. ³¹ Hacuanitjin ni cafaha cha xi majyan jan na hisca xi café yéjë xi yatu cha cafaha cha na. Peru yéjë cha xi cuacun vë ne, café cha cahme cha chuva ngu chuva ngu cha. Hane na véhë ne, casacuiin rë na hisca ngu quihndi cojo cha xi cuacun vë. ³² Hiscan xi cajnetaha ne, na véhë ne, hacuaha cahme na. ³³ Quihndë ne, hya xi cuya yéjë nima cjuahñu ne, ¿jarë cha xi cuacun vë xi chjuun rë cha na xi cjuaquixi ta, tséhë xi yéjë ni xi yatu cha ne, camá chjuun rë cha na? —Cuatjin xu cachja cha saduceo cojo Jesús.

³⁴ Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndë quihndë ne, tsinguixan me hacuaha vixan me. ³⁵ Peru xuta xi vechú chuva rë xi cuya me cjuahñu xi ha cuatju cueya me hacuaha sacú rë me cjuahñu xatsë ne, cuixaain me hacuaha tsinguixaain me hya ta, ³⁶ tséhë xi ha quihndë cueyaain nga me, tséhë xi tangun cuma me cojo ángel. Hacuaha cuma me quihndi rë Nina, tséhë xi cuya me cjuahñu. ³⁷ Hacuaha hya xi chutayan cjua xi cachja Moisés ngajan hiscan xi catí yanahyá xcuén ne, hya sacu machaya naja tséhë xi nima ne, cuya cjuahñu ta, tséhë xi cachja Moisés xi Nina naja ne, Nina rë Abraham, Nina rë Isaac, cojo Nina rë Jacob má me. ³⁸ Peru Nina ne, hacuiin nina rë nima ta nina rë xuta xi quicun me ta, tséhë

xi xi cuma rë Nina ne, yëjë ni xuta ne, quicun me, handasa cahme yahnga me. —Cuatjin xu cachja Jesús.

³⁹ Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cjua xi canújun.

⁴⁰ Cuatjin xu cachja cha ta, tsëhë xi tsacjun xu cha cjuinenguise sa cha me.

¿Yo tjë rë má me xi catsingatju Nina?

⁴¹ Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjë rë David má me?

⁴² Ta suvá David ne, cachja me cuitjin xcun xujun tsëhë Salmo:

Nina ne, cachja me cojo Nai naha cuitjin:

“Tinechin nguehe ladu quixi naha,

⁴³ hisca hya xi yëjë ni xi sahmi ri condra ne, cuiyujú ngahan ngahma gubiernu riji.”

Cuatjin cachja David cjua xi cachja Nina. ⁴⁴ Quihndë ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me ni? —Cuatjin xu cachja Jesús.

Cachajyë Jesucristu cojo xuta ladu rë me tsëhë cha vicuya cjuachacun

⁴⁵ Jinguyejë rë xi tivisiñuju yëjë xuta jan ne, Jesús ne, cachja xu me cuitjin cojo xuta ladu rë me:

⁴⁶ —Xicaninguisuhunjñuu cojo cha xi vicuya cjuachacun, xi jemu ndama rë cha xi cuatjin vajá cha tsjian nduju, hora xi fi tsuyiyihiya cha, jemu chuya rë cha xi cuatjin fi chja xuta nina cojo cha ngajan ngajñi ndetsin, hacuaha jemu chuya rë cha xi cuatjin satë rë cha cahndé xi matitjun tsëhë cahntsua yungun, o hiscan ngu ndava suhi. ⁴⁷ Cha xi cuacun vë ne, hacuaha jemu cjín tujún vaxë cha yachjin cahan. Hisca xi chjayuma cha ne, hacuaha jemu nduju hora, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatju cha xi cuma rë jingusa xuta. —Cuatjin xu cachja Jesús.

21

Tujún xi cavincha chjuun cahan cahntsua alcancía

¹ Ngu nixtin jan ne, jinguyejë rë xi tivutsejen xu Jesús xi tivincha xuta nchina tujún cahntsua alcancía tsëhë cjuandaja rë me cojo Nina ne; ² hacuaha cavëe xu me xi canduva ngu chjuun cahan xi jemu yuma, hane hacuaha cavincha na jo tujún langa cahntsua alcancía jan. ³ Sehe ngajan xi cachja xu Jesús cojo xuta ladu rë me cuitjin:

—Cuichjá cojo nuju cjuaquixi ta na cahan vë xi jemu yuma na ne, hitsë sa vengui chji rë tujún xi cavincha na xi cuma rë tujún xi jemu cjín cavincha yëjë xuta nchina xi cuacun vë ta, ⁴ tsëhë xi me xi cuacun vë ne, tsëhë cjuanchina xi tjin rë me ne, ngajan cavaxë me tujún xi cavincha me. Peru na vëhë ne, handasa jemu tjin rë na cjuachaja ne, hitsë lihndi tujún xi tjin rë na ne, cavincha na yëjë cahntsua alcancía. —Cuatjin xu cachja Jesús.

Cachja Jesucristu xi cuetsun yungun

⁵ Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

⁶ —Sacuaha xcusun xi chutsujun vi ne, cuechú nixtin xi hisca ngu ndyojo ndacun xi cuicun vi ne, tsajin hinchasuncoo xicjin ta cjuë yëjë cuixujne. —Cuatjin xu cachja Jesús.

Hacutjin sacú cumachaya naja xi ha meje cijnetaha nixtin vihi

⁷ Ngajan xi xuta jan ne, cavinenguise xu me cojo Jesús cuitjin:

—Maestro, hane ¿janihya cuetjucaa xcusun vëhë ni? ¿Hacutjin cuma sacú niji cjuaquixi xi xcusun vëhë ne, ha tivechú nixtin xi cuetjucaa ni? —Cuatjin xu cavinenguise me.

⁸ Ngajan xi Jesús ne, cuitjin xu cachja me:

—Nechun cuidadu, cojo sa xi hacuiin cuma ndacha ngayun ta, tséhë xi jemu cjín xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjenguun me. ⁹ Hacuaha hya xi cuma chaya nuju cjua xi jemu yehe si tijima ngu nación ne, o sá xi tjin cjuatacun xi jemu yehe si nduva ne, xicarcuun ta, hatuxa tjin xi titjun xcusun vëhë cuma. Peru hacuiin ngutjen hya cuijnetaha nixtin vihi.

¹⁰ Hacuaha quijinduju sa xu cachja me cuitjin:

—Scaan xuta tséhë ngu nación cojo jingu sa nación, hacuaha scaan xuta tséhë ngu nandya cojo ngu nga nandya. ¹¹ Hacuaha jemu cjín cahndé xi cjuani nangui, jemu cjín cahndé xi cuatju chíhin vitaha, jemu cjín cahndé xi cuma jindya, hacuaha jemu yehe chircun cuma tsejen ngajan ngahnga xi sua cumachaya nuju mé xi cuma.

¹² 'Peru chaja sa xi cuma yëjë xcusun vëhë ne, xuta ne, tsuyiyihiatjengui nuju me cojo cjuahngatacun. Cjuaha nuju me cjuecojo nuju me xcun xutaxa rë yungun, hisca cuincha nuju me ndavaya. Cjuecojo nuju me xcun xutaxa rë ndihyavasen, hisca xcun gobernador, ngatsé rë xi ladu naha má ngayun. ¹³ Xi cuatjin cuatjun cuma ne, vëhë sua nuju cahndé xi ninguixun yëjë cjua hacutjin cavicuyá nuju. ¹⁴ Tejñungutacún xi hacuiin titjun jemu cjín ningatuhuntacún hacutjin chjayunngun tséhë xutaxa rë ta, ¹⁵ tséhë xi ngahan suá nuju cjuatacun xi cuinújun ngu cjua xi condra nuju ne, cumaji tsitjungui me hacuaha cumaji cuichja me xi quixiin. ¹⁶ Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyé nuju me. Hacuaha tjin yahnga ngayun ne, hisca tsiquehen nuju me. ¹⁷ Yëjë ni xuta ne, choho scuëë nuju me, tséhë xi ladu naha ngayun. ¹⁸ Peru xicamacjiintacún ta tsajin camahani mé xi nichujun. ¹⁹ Caticaa nuju ta, tséhë xi cuatjin xi cuetjuntjun.

²⁰ 'Peru hya xi chun xi jemu cjín xuta nduvacjin cuetsihin xinchandee me nandya Jerusalén xi sahmi me ngu si jyé cojo nuju ne, vëhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë. ²¹ Nixtin hya ne, ngayujun ni xi nechun yëjë nandya tséhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjunxun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju. ²² Cuatjin meje rë xi nihñu ta, tséhë xi nixtin hya ne, sahmi Nina castigu nandya vihi, cojo sa xi xi cuatjin ne, cuetjucaa yëjë hacutjin camahindu xcun xujun rë Nina. ²³ Jemu chojyihí tséhë yëjë yachjin xi hinchahma quihndi rë me cojo yëjë me xi tjin rë quihndi vaqui nixtin hya ta, tséhë xi cuatju ngu cjuandya jyé nación vihi, hacuaha cuatju xuta nguehe ngu castigu. ²⁴ Hacuaha jemu cjín xuta nguehe cueya me cojo quicha, hacuaha jemu cjín xuta nguehe tsihñu xuta tséhë jingu sa nación me sehe tsingatju me me yëjë ni nación. Hane xi cuatju vëhë ne, suvá xutaxín cjue nduva me sunesun me xcun nangui tséhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

Xcusun xi cuma hya xi cuinduva nga Jesucristu

²⁵ Nixtin hya ne, hacuaha cuma tsejen cjuarcun xi cuma xcun tsuhí cojo sá cojo niñú. Hane nguehe ngasunhndé ne, jercu cjín tsingataha cacun xuta tséhë yëjë ni nación, ña cuya sca me tséhë xi jercu cjuane ndachacun, hacuaha jercu tsiquijin rë tsindu rë. ²⁶ Yëjë xuta ne, ña cuma ndaya cacun me xi tsacjun me, xi tsingataha cacun me tséhë chircun xi cuma nguehe ngasunhndé ta, tséhë xi hisca ngahñu xi yaja ngahnga ne, cjuiniyaya. ²⁷ Sehe hya scuëë xuta ngahan, xi Quihndi rë Xuta Jain ngahan, xi cuinduva ngajni rë yufí cojo jemu jyé ngahñu, hisca setí hisca vaté jyihi ngahan xi cuinduva. ²⁸ Hyá xi xcusun xi cuacun vë cuetsihin cuma ne, tisechun chutsujun ngahnga ta camatiña nixtin xi cuetjuntjun.

²⁹ Xi quijinduju sa cjuavisiajmi rë Jesús ne, cachja xu me ngu ejemplu vihi:

—Quihndé ne, ningatuhuntacún tséhë yaxujún o sá yahnga sa ya xi vixu xca rë. ³⁰ Xi tu chun xi cuetjusehen ya xi cuacun vë ne, ha hyun ta ha camatiña chan tsi. ³¹ Hacuaha

chuva vëhë ni ne, hya xi chun xi cuetsihin cuma yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin xi nduva Nina sahmi me gubiernu.

³² 'Cuichjá cojo nuju cjuauquixi ta ngayujun ni xi nechun nixtin vihi ne, hacuiin ngayujun caveyun chaja sa xi cuatju yëjë xcusun xi cachjá cojo nuju jan. ³³ Ngahnga cojo nguehe ngasunhndë ne, hatuxa cjuë. Peru hisca ngu cjuá naha ne, tsajin xi cuetjincaaín.

³⁴ 'Nechun cuidadu tsëhë xcusun xi nihñu. Xicatuun cahndé xi cjuatacun nuju ne, tsé rë cojo cjuatacun tsëhë cjuachihi, cojo cjuacjintacun tsëhë xcusun xi mameje nuju xcun ngasunhndë nuju, sá tu tsajin tjin chjine ngayun hya xi cuechú nixtin vëhë,

³⁵ sacuatjin tsajin tjin chjine ngu chu hya xi finenguisun rë chu chen. Vëhë xi nechun cuidadu ta, tsëhë xi hatuxa cuechú nixtin vëhë, hya xi sahmi Nina gubiernu yëjë ni xuta jingujuyé ni ngasunhndë. ³⁶ Nechun cuidadu. Yasen ni chjahyun rë Nina xi cuechú chuva rë xi cuetjuntjun tsëhë yëjë ni cjuacjintacun xi ha tu hora sa xi cuinduva. Hacuaha chjahyun rë Nina xi cuma cuetjunndujun hora xi cuisechun xcún xi cjuaháchuva nuju cojo cjuatacun nuju, ngahan xi Quihndi rë Xuta Jain ngahan. —Cuatjin xu cachja Jesús.

³⁷ Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rë Ndettjún Olivu. ³⁸ Hane yëjë ni xuta ne, tajñu tajñu xu ni fi me yungun jan xi cuiñuju me cjuá xi vicuya Jesús.

22

Camachihin cjuá hacutjin xi chjahá rë Jesucristu

¹ Hya xi camá xu ne, camatiña suhi tsëhë pan xi hacuiin cojo san rë pan má, suhi xi hmí rë Pascua. ² Hane nahmi xi matitjun cojo cha vicuya cjuachacun ne, jemu tivangui xu me chuva rë hacutjin xi tsiquehen me Jesús. Peru táhahma xu tisahmi me xcusun vëhë ta, tsëhë xi tsacjun xu me xuta.

³ Hya xi camá xu ne, Satanás ne, cavisehen xu cahntsua xahasen rë Judas, cha xi hacuaha hmí rë Iscariote, ngu cha ngajñi rë me xi tejó xi má ladu rë Jesús. ⁴ Ngajan xi Judas jan ne, quiji cavisiajmjcín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vë Jesús. ⁵ Hane nahmi xi matitjun cojo mayu jan ne, jemu ndaja camá xu rë me, hisca cavyuju cacun me xi sua me cha tujún. ⁶ Hane Judas ne, cojo cjuatacun vëhë ne, camangu cacun cha, sehe ngajan xi cavangui xu cha ngu hora xi tsajin cjín xuta, xi sahmi cha entregadu Jesús cojo xuta xi cuacun jan.

Hacutjin cajiné Jesucristu tsëhë suhi rë Pascua

⁷ Cavechú xu nixtin tsëhë suhi rë pan xi hacuiin cojo san rë pan má, nixtin hya xi meje rë xi cueya chu tsángá. ⁸ Sehe ngajan xi Jesús ne, catsingatju xu me Pedru cojo Juan ngu tixa, hane cuitjin xu cachja me:

—Tángun tuhunchjinu xi xinéënguixuun tsëhë suhi. —Cuatjin xu cachja me.

⁹ Sehe ngajan xi me xi cuacun jan ne, cavinenguise xu me Jesús cuitjin:

—¿Hane jani meje nuju xi cuihinchjini ni? —Cuatjin xu cavinenguise me.

¹⁰ Hane Jesús ne, cuitjin xu cachja me:

—Chutsujun ni, xi cjuhun tjehen nandya jan ne, ngajan cuechuntuhun ngu cha xi yaniji ngu nisa nandá, hane tánguntjengun cha hisca xi cjuhun ndihya hiscan cjuá cha, ¹¹ sehe tinújun cojo nai rë ndihya jan cuitjin: “Cuitjin cjuá xi catsingatju maestru tsujun: ¿Jaré cuartu xi tuhun, sehe ngajan sínë niñu tsëhë suhi cojo xuta ladu naha?” Cuatjin tinújun cojo rë me. ¹² Hane me vëhë ne, tsingacun nuju me ngu cuartu jyé xi tacun ngahnga hiscan xi ha tjin chjine ndihya. Hane ngajan tuhunchjinu xi xinéë. —Cuatjin xu cachja Jesús.

¹³ Hane xi quiji me xi jo jan ne, cavetjuaa Jain yëjë cjuá xi cachja Jesús cojo rë me. Hane ngajan cavéhëndaja xu me xi siné nguixun Jesús cojo rë me tsëhë suhi.

¹⁴ Hane xi cavechú hora ne, cafaha xu Jesús cahndé rë me xcun maxë cojo xingu xingu apóstol. ¹⁵ Hane sehe cachja xu me cojo apóstol jan cuitjin:

—Jemu meje sínë cojo nuju comida tséhë suhi vihi chaja sa xi cjuehe cjuaveya naha ta,
¹⁶ tséhë xi nguehe cuichjá cojo nuju ta ha quihndë tsajin nixtin xi cuya sínë nga comida
 tséhë suhi vihi. Sínë nga, peru hisca hya xi cuinduva Nina sahmi me gubiernu ta, tséhë
 xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

¹⁷ Hane xi cafahatsja xu me ngu vasu ne, sehe casua me nacuechji rë Nina, sehe cachja
 xu me cuitjin:

—Juhun vihi ne, sehe siuhun tsë tsë cojo xingun ta, ¹⁸ hacuaha cuichjá nga cojo nuju
 ta quihndë cojo nixtin xi cjuiniji sa ne, ha quihndë cuyaan cuéhë xan rë uva. Cuéhë, peru
 hisca hya xi cuinduva Nina sahmi me gubiernu. —Cuatjin xu cachja Jesús.

¹⁹ Hane xi cafaha me ngu niñutsju hacuaha casua me nacuechji rë Nina ne, sehe
 cavotohocja xu me niñutsju jan. Hane xi casua rë me apóstol jan ne, sehe cachja xu
 me cuitjin:

—Vihi ne, yojo naha vi, xi tisuá xi cueya ngatsë nuju. Cuitjin nihñu xcusun vihi yasen
 ni, cojo sa xi ninguitsjun ná. —Cuatjin xu cachja Jesús.

²⁰ Hane xi cajnetaha cajinë nguixun me ne, hacuanitjin xu ni casahmi me cojo vasu.
 Hora xi casua rë me apóstol ne, cuitjin xu cachja me:

—Xan vihi ne, vihi jni naha xi cuetju ngatsë nuju. Cuatjin xi cuma chihin compromisu
 xatsë xi tisahmi Nina cojo xuta.

²¹ Peru chutsujun ni, cha xi sahmi ná entregadu ne, nguehe tacun cha ngajñi naja.

²² Hane ngahan xi Quihndi rë Xuta Jain ngahan ne, hatuxa tjin ná xi cueya sacuatjin
 cavichaya Nina tsahan. Peru jemu chojyিhi tséhë cha xi sahmi ná entregadu. —Cuatjin
 xu cachja Jesús.

²³ Ngajan xi yéjë xu apóstol jan ne, cavetsihin cavinenguise xicjin me jarë me xi sahmi
 xcusun véhë.

Yo xi hitsë sa matitjun

²⁴ Hyá xi camá xu ne, cavetsihin sacuaha xi meje scaanya me ngajñi rë me yo xi chja
 xuta xi hitsë sa matitjun. ²⁵ Ngajan xi Jesús ne, cuitjin xu cachja me:

—Yéjë ni xuta xi matitjun nguehe ngasunhndë ne, jercu sahmi yehe me yojo rë me
 sacuaha xi me véhë má me nai rë xuta. Hacuaha jercu meje rë me xi yéjë xuta ne, cuichja
 me xi jemu ndaja me xi matitjun vë. ²⁶ Peru ngayun ne, mijí rë xi cuatjin nihñu ta xi meje
 rë ne, ngu xi matitjun tséhë ngajñi nuju ne, catitsinguijne yojo rë sacuaha ngu xi chúva
 nu rë. Hane ngu xi vitexa tséhë ngajñi nuju ne, hacuaha catitsinguijne yojo rë sacuaha
 ngu hndixahan. ²⁷ ¿Yo xi hitsë sa matitjun ni? ¿Há ngu xi tijinë ne, o há tsajin ne, há
 ngu hndixahan xi cjui cani comida? Xi tijinë ne, hatuxa véhë xi hitsë sa matitjun. Peru
 ngahan ne, tejña ngajñi nuju sacuaha ngu hndixahan nuju.

²⁸ 'Ngayun ne, ngayun xi caca nuju cojo yéjë cjuañihi xi cavatjuun camá. ²⁹ Véhë xi
 sacuaha casuaxa ná Nahmi naha xi ngahan sahme gubiernu ne, cuatjin suáxa nuju xi
 nihñu gubiernu, ³⁰ cojo sa xi ngayun ne, hacuaha xinu siuhun cojo ná ngajan hiscan
 sahme gubiernu. Hacuaha suáxa nuju xi nichuvun cjuatacun rë yéjë tejó tjë naja,
 ngayaan xi tjë rë xutachanga naja Israel ngayaan. —Cuatjin xu cachja Jesús.

Casua Jesucristu camachaya rë Pedru xi cuichja me xi hvíin me yo Jesucristu

³¹ Hacuaha cachja sa xu Jesús cuitjin cojo Pedru xi hacuaha hmí rë me Simón:

—Chutsujun ni Simón. Satanás ne, casacu rë cahndé xi tsichuva cjuatacun nuju
 ngayujun ni. ³² Peru ngayun Simón ne, caféhya rë Nina ngatsë nuju, cojo sa xi hacuin
 cumandaya tacún sacuatjin xi mangutacún cojo ná. Hane hya xi ngayun cuyun nga ndiya
 naha ne, tuhun ngahñu xingun. —Cuatjin xu cachja Jesús.

³³ Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjué ndavaya cojo nuju hisca tsingatehen cueya cojo
 nuju. —Cuatjin xu cachja Pedru.

³⁴ Ngajan xi Jesús ne, cuitjin xu cafayangui me tséhë Pedru:

—Nguehe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canújun xi hyúun yo ngahan. —Cuatjin xu cachja Jesús.

Camatiña hora xi chjahá rë Jesucristu

³⁵ Hacuaha cachja me cojo xuta ladu rë me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuaha chuun chuxinxte ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rë me jan ne, cuitjin xu cachja me:

—Juun, tsajin mé. —Cuatjin xu cachja me.

³⁶ Hane Jesús ne, cachja nga xu me cuitjin:

—Peru quihndé ne, jaré ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rë ngu quichandujú ne, catiteña tsjanga rë ne, sehe catatsé ngu quichandujú. ³⁷ Cuatjin meje rë ta, tséhë xi nguehe cuichjá cojo nuju ta hacutjin xi camahindu tsahan xcun xujun rë Nina ne, hatuxa tjin rë xi cuetjucaa, cjua xi chja cuitjin: “Cuichja xuta tséhë me xi ngu xuta tsehen me.” Cuatjin camahindu. Hatuxa cuetjucaa sacuatjin camahindu. —Cuatjin xu cachja Jesús.

³⁸ Sehe ngajan xi xuta ladu rë Jesús jan ne, cuitjin xu cachja me:

—Chutsujun ni, tatá. Nguehe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayanguí me:

—Cojo vëhë ne, ha cuma. —Cuatjin xu cachja me.

Casahmi Jesucristu oración rë me ngajan Ndetjún Olivu

³⁹ Hya xi camá ne, xi cavetju xu me tséhë nandya Jerusalén ne, sacuatjin xi ha xcusun rë me ne, quiji xu me Ndetjún Olivu. Hacuaha cojo yéjë xuta ladu rë me quiji xu me cojo rë me. ⁴⁰ Hane xi cafehe me jan ne, cachja xu me cojo xuta jan cuitjin:

—Chjahyun rë Nina xi hacuiin chjaháchuva nuju cojo cjuatacun nuju. —Cuatjin xu cachja me.

⁴¹ Hane xi quijixin me hitsë tséhë xuta ladu rë me jan ne, sehe ngajan cavixcuhnchi xu me xi sahmi me oración rë me, ⁴² cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañhi xi cuátu cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

⁴³ Hya xi camá ne, cavëë xu me ngu ángel xi canduva tséhë ngahnga, casua rë me ngahñu. ⁴⁴ Hane xi jemu jima ndaya cacun xu me ne, hitsë sa jercu cafehya rë me Nina. Hacuaha ndasueya xi cavetju rë me ne, sacuaha jni xu cún xi cavixu nangui.

⁴⁵ Hane xi cavisatjenhnga xu Jesús xi cajnetaha casahmi me oración rë me ne, xi cavuya quiji me hiscan siu xuta ladu rë me jan ne, casacutsja xu me xi siufé, ngatsé rë cjuachoho rë. ⁴⁶ Sehe ngajan xi Jesús ne, cuitjin xu cachja me cojo xuta jan:

—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

Cafaha xuta Jesucristu

⁴⁷ Jinguyéjë rë xi tichja cuaha xu Jesús ne, ha tu ñahñu jercu cjín xuta cafehe me. Hane cha xi hmí rë Judas, ngu cha ngajñi rë me xi tejó xi má ladu rë Jesús jan ne, titjun xu cha xcun xuta cjín jan cjui cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina. ⁴⁸ Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuun ná xi nihñu ná entregadu, ngahan xi Quihndi rë Xuta Jain ngahan? —Cuatjin xu cachja me.

⁴⁹ Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cuíjin rë me quicha? —Cuatjin xu cachja me.

⁵⁰ Hya xi camá xu ne, ngutjen cavaja ngu me jan cha hndixahan rë nahmi xi matitjun tséhë yéjë ni nahmi, hane cavatësun xu me tyjavañuju quixi cha. ⁵¹ Hane ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rë cha ne, camandaja xu cha casahmi Jesús.

⁵² Hane nahmi xi matitjun cojo cha mayu yungun xi matitjun cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuaha ngu xuta xi chéjë me, xi cuatjin nduvun cojo ya cojo quicha vë ni? ⁵³ Xi cavitejñaya cojo nuju nchunchujun ni ndatsen yungun jan ne, cavetuhunntsuuun ná. Peru quihndé cavechú hora xi casua Nina cahndé xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

Cachja Pedru xi hviín me yo Jesucristu

⁵⁴ Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tséhë yéjë ni nahmi. Pedru ne, hacuaha tjengui xu me cjui me tu cjin tu cjin ni hacutjin cjui xuta jan cojo Jesús. ⁵⁵ Hane xi cafehe xu me jan ne, casahmi me ngu ndava ndihi ngajan ndatsen ndihya, sehe ngajan quiyi me cavyuju tangun me. Hacuaha cojo xu Pedru quiyi me cavéjña tangun me cojo xuta jan. ⁵⁶ Hane xi cavëe xu na hndixahan rë nahmi jan Pedru, tacun me xcun ndihi jan ne, xi cavutsejenndaja na me ne, sehe cachja xu na cuitjin:

—Me xi cuiyিhi vi ne, cojo me tacun me cojo me xi cuajyিhi vë hya. —Cuatjin xu cachja na.

⁵⁷ Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

⁵⁸ Xi cavatju nga ngu hora lihndi ne, xi cavëe nga ngu cha Pedru ne, cachja xu cha cuitjin:

—Ngayun ne, hacuaha ladu rë me xi cuacun vë má ngayun. —Cuatjin xu cachja cha.

Ngajan xi Pedru ne, cuitjin xu cachja me:

—Jéya, hacuiin! —Cuatjin xu cachja me.

⁵⁹ Xi cavatju sacuaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuiyিhi vi ne, cojo cha tacun cha cojo cha xi cuajyিhi vë, tséhë xi hacuaha cha Galilea cha. —Cuatjin xu cachja cha.

⁶⁰ Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan. ⁶¹ Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjua xi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Cjua vëhë xi catsinguitsjen xu Pedru. ⁶² Hane xi cavetju xu me candatsen ne, cajihnda susu me.

Catsixcuehyu xuta Jesucristu

⁶³ Hane cha xi siutahá sahmi cuidadu rë Jesús jan ne, titsixcuehyu xu cha me hacuaha tivaja cha me. ⁶⁴ Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin:

—¡Tinoje! ¿Yo xi tivaja ri? —Cuatjin xu cachja cha.

⁶⁵ Hacuaha jemu cjín sa xu cjua cachja cha xi choho chja cha tséhë me.

Casahmicuenda xuta xi matitjun jyé rë Jesucristu

⁶⁶ Hane xi camá nchujun jan ne, camatangun xu xuta changá tséhë nandya jan cojo nahmi xi matitjun cojo cha xi vicuya cjuachacun. Sehe quiyi chani xu rë Jesús xcun xuta xi cuacun jan xi chjahácuenda rë jyé rë me. ⁶⁷ Hane xi cafehe Jesús jan ne, sehe cavinenguise xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji. —Cuatjin xu cavinenguise xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjaain nuju xi cuichjá. ⁶⁸ Hacuaha sá xi cjuinenguésé nuju ngu cjua ne, hatuxa chjayunnguun tsahan. ⁶⁹ Peru cuetsihin cojo

quihndë ni ne, ngahan xi Quihndi rë Xuta Jain ngahan ne, cuitejña ladu quixi tsëhë Nina, me xi jemu hñu ngahñu rë. —Cuatjin xu cafayanguí Jesús.

⁷⁰ Ngajan xi yéjë ni xuta jan ne, cavinenguise xu me Jesús cuitjin:

—¿Há ngaye xi Quihndi rë Nina ngaye ni? —Cuatjin xu cavinenguise me.

Hane Jesús jan ne, cuitjin xu cafayanguí me:

—Sacuatjin nújun vë ne, cuatjin jain. —Cuatjin xu cafayanguí Jesús.

⁷¹ Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihñá xuta xi tsinguixi me jyé rë cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

23

Cavisehen Jesucristu xcun Pilatu

¹ Hya xi camá ne, cavisatjenhnga yéjë xu xuta xi matitjun jan ne, sehe quijicojo me Jesús xcun Pilatu. ² Hane cavetsihin xu cavinchajyé me cuitjin:

—Casacuntsin cha xi cuijyihí vi tivisecjan cha cjuatacun rë xuta. Hacuaha mijí rë cha xi cuechjin tujúnsa niji cojo César, me xi matitjun. Hacuaha chja sa cha ta hacui cha xi catsingatju Nina cha, hacuaha matitjun xu cha. —Cuatjin xu cachja me xi cavinchajyé me Jesús.

³ Sehe ngajan xi Pilatu ne, cavinenguise xu me Jesús cuitjin:

—¿Há ngaye xu matitjun ngaye tsëhë xuta tjé rë Israel? —Cuatjin xu cavinenguise Pilatu.

Hane Jesús ne, cuitjin xu cafayanguí me:

—Cuatjin sacuatjin nújun vë. —Cuatjin xu cafayanguí me.

⁴ Ngajan xi Pilatu ne, cuitjin xu cachja me cojo nahmi xi matitjun cojo yéjë xutacjín jan:

—Sacuiin ná hisca ngu jyé rë cha xi cuijyihí vi. —Cuatjin xu cachja Pilatu.

⁵ Peru quijinduju sa xu cachja xuta xi matitjun jan cuitjin:

—Jemu tivisecjan cha cjuatacun rë xuta ngatsë rë cjua xi tivicuya cha jinguwyé ni distritu Judea vi. Cavetsihin cha hisca ngajan distritu Galilea, hisca nguehe cafehe cha.

—Cuatjin xu cachja me.

Cavisehen Jesucristu xcun Herodes

⁶ Hane xi cahndë Pilatu cjua vëhë ne, sehe cavinenguise xu me xuta jan cuitjin:

—¿Há cha Galilea cha xi cuijyihí vi ni? —Cuatjin xu cavinenguise me.

⁷ Hane xi casacu xu rë Pilatu cjuaxixi xi hiscan xi vitexa Herodes canduva Jesús ne, sehe catsingatju xu Pilatu me xcun Herodes, tsëhë xi Herodes ne, hacuaha quitahá xu me ngajan Jerusalén nixtin hya. ⁸ Hane hya xi cavëë Herodes Jesús ne, jemu ndaja camá xu rë me, tsëhë xi ha titjun sa ne, jemu meje scuëë me Jesús, tsëhë xi ha machaya rë me cjua tsëhë Jesús, hacuaha meje scuëë xu me xi sahmi Jesús ngu cjuarcun. ⁹ Hane jercu cjín cjuachjinenguise casahmi xu me Jesús, peru Jesús ne, tsajin camahani mé xi cafayanguí xu me. ¹⁰ Hane nahmi xi matitjun cojo cha xi vicuya cjuachacun ne, jemu tivincha xu me jyé rë Jesús. ¹¹ Ngajan xi Herodes cojo sindadu rë me ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajyihí camahani ne, sehe cavuya catsingatju nga xu me Jesús xcun Pilatu. ¹² Hane nixtin hya ne, Herodes cojo Pilatu ne, jemu cavinga xu rë me xicjin me, handasa titjún xu ne, mají vëë xicjin me.

Camá entregadu Jesucristu xi cjue cueya me

¹³ Hya xi camá ne, xi casahmitangun xu Pilatu nahmi xi matitjun cojo xutaxa rë cojo xuta nandya ne, ¹⁴ sehe cachja xu me cojo cuitjin:

—Ngayujun ni matsejen ne, canduvuncujun cha xi cuijyihí vi nguehe matsejen, tsëhë xi xi má nuju matsejen ne, tivisecjan cha cjuatacun rë xuta. Peru quihndë matsejen ne, chutsujun ta, xcún ni matsejen ne, cafahátaha rë cha, peru casacuiin ná hisca xi ngu jyé

rë cha sacuatjin jyé xi cavinchun. ¹⁵ Hacuanitjin ni Herodes matsejen ta, casacuiin rë me jyé rë cha, vëhë xi catsicuya nga me cha. Chutsujun ta tsajin camahani mé casahmi cha xi vechú chuva rë xi niquen cha. ¹⁶ Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

¹⁷ Hatuxa xcusun xu rë Pilatu xi tsismi me ngu presu xi xuta vaxijin me nu nu ni nixtin rë suhi. ¹⁸ Peru yéjé ni xuta xi matitjun jan ne, ngu tangun ni camá xu me cajindaya me cachja me cuitjin:

—¡Nicuhun cha vi ne, Barrabás nismu cha! —Cuatjin xu cajindaya me.

¹⁹ Cha Barrabás ne, quiji cha ndavaya ngatsé rë xi casahmi xu cha ngu si cojo xutaxa rë, hacuaha catsiquehen xu cha. ²⁰ Peru ngu ndiya nga cachja xu Pilatu cojo xuta xi matitjun jan, tséhë xi Pilatu ne, meje tsismi me Jesús. ²¹ Peru xuta xi matitjun jan ne, cavuya cajindaya nga me cachja xu me cuitjin:

—¡Tetuhun cha, tetuhun cha xcun cru! —Cuatjin xu cajindaya me.

²² Hane xi ma jyan ndiya ne, cavinenguise xu Pilatu xuta xi matitjun jan cuitjin:

—Peru ¿mé xi jemu choho casahmi cha ni? Tsajin camahani mé jyé rë cha casacu ná xi vechú chuva rë xi niquen cha. Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

²³ Peru yéjé ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Vëhë xi cajne cacun xu Pilatu, ²⁴ hacuaha cavejña cacun xu me xi sahmi me hacutjin xi fehya xuta jan. ²⁵ Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tséhë xi casahmi xu si cojo xutaxa rë hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rë xuta xi matitjun jan.

Casetaha Jesucristu xcun cru

²⁶ Hane xi cjuicojo sindadu Jesús ne, ngajan ndiya jan cavechútáha xu cha ngu me xi hmí rë Simón tséhë nandya Cirene, xi nduva xu me quiji me nguiñña. Hane cafaha xu sindadu jan me, catsicaniji xu cha me cru xi cjue me cojo hacutjin cjui Jesús.

²⁷ Hane jercu cjín camaha xu ni xuta quiji me cojo Jesús hacuaha jercu cjín xu yachjin xi hisca chja hisca jihnda na xi jemu choho má rë na ngatsé rë Jesús quiji xu na cojo me.

²⁸ Hane xi cavuya Jesús cavutsejen me na ne, sehe cachja xu me cuitjin:

—Ngayun na quihndi nandya Jerusalén, xicachjhnduu ngatsé na. Chjhndun ngatsé nuju suvun cojo ngatsé rë quihndi nuju ta, ²⁹ cuechú nixtin xi cuichja xuta cuitjin: “Jemu ndaja tséhë yachjin xi hatuxa maji sacu rë na quihndi; jemu ndaja tséhë yachjin xi hisca ngu quihndi casacuiin rë na; hacuaha jemu ndaja tséhë yachjin xi casacuiin quihndi catsicha na.” Cuatjin cuichja xuta. ³⁰ Nixtin hya ne, hacuaha cuichja xuta cojo ndetjún cuitjin: “Tjinengunsun niji.” Hane naxi ne, cuitjin cuichja me cojo: “Tatsun niji.” Cuatjin cuichja me ta, ³¹ sá xi cuitjin choho tisahmi xuta vi cojo ná quihndé, ngahan xi tangun ngahan sacuaha ngu ya xcuen ne, hatuxa hitsé sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

³² Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús. ³³ Hane xi cafehe cha cojo Jesús hiscan xi hmí rë Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun cru rë cha. Ngu cru xi quitahá ngu cha ne, casecun xu táha xcun tséhë Jesús, hane ngu nga ne, táha quixí. ³⁴ Ngajan xi Jesús ne, cachja xu me cuitjin:

—Ngayun Nahmi na. Ninchatuhun rë xuta vi ta, hvíin me mé xi tisahmi me. —Cuatjin xu cachja Jesús.

Hane xi cuatécea sindadu tsjian rë Jesús jan ne, cavaxé xu cha ngu suerte. ³⁵ Hane xutacjín jan ne, caxinchacun xu me cavutsejen me xcusun xi tijima jan. Hacuaha xutaxa rë jan ne, cavejnucéé me Jesús, cuitjin xu cachja me:

—Cavaxétje cha jingu sa xuta. Quihndé ne, cataxétje suvá cha yojo rë cha, sá xi hacui Jain cha xi cavaxijin Nina hacuaha catsingatju me. —Cuatjin xu cachja xutaxa rë.

³⁶ Hacuaha sindadu jan ne, catsixcuehyu xu cha Jesús. Quijitiña cha hiscan tyjangui me xcun cru, hane meje sua xu cha xan yufa cuihi me, ³⁷ sehe cachja xu cha cuitjin cojo rë me:

—Sá xi ngaye jain matitjun ngaye tséhë xuta tjé rë Israel ne, naxetje sove yojo riji.
—Cuatjin xu cachja cha.

³⁸ Hacuaha camahindu xu ngujo cjua rcu cru rë Jesús xi chja cuitjin: “Matitjun cha vihi tséhë xuta tjé rë Israel.” Cuatjin xu camahindu. Jyan hne camahindu cjua xi cuacun vë: hne griego cojo latín cojo hebreo.

³⁹ Hane ngu cha tsehen xi cojo casetaha xcun cru jan ne, cuitjin xu choho cachja cha tséhë Jesús:

—¿Hacuuiin ngaye xi catsingatju ri Nina ni? ¡Naxetje sove yojo riji ne, hacuaha naxetje niji! —Cuatjin xu cachja cha.

⁴⁰ Hane xi cavatëcja xu cha xingu jan cjua rë cha xi choho chja tséhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima?
⁴¹ Ngayaan ne, cojo cjuaquixi xi tivatjun tijima ta, ngatsë rë xcusun xi canihñä ne, vëhë xi vechú chuva rë xi cuitjin tivatjun castigu. Peru me vihi ne, tsajin mé xi jemu choho casahmi me. —Cuatjin xu cachja cha.

⁴² Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gubiernu. —Cuatjin xu cachja cha.

⁴³ Hane Jesús ne, cuitjin xu cafayangui me:

—Cuichjá cojo nuju cjuaquixi ta ha cojo quihndë ni ne, cuinechun cojo ná ngajan cahndé ndajyিhi hiscan xi hmí rë Paraíso. —Cuatjin xu cafayangui Jesús.

Xcusun xi camá hya xi cahme Jesucristu

⁴⁴ Hane hora vëhë ne, camajñu xu jingujyë ni. Cavetsihin xi camanchisen ne, quiji cani rë hisca fane jyan, ⁴⁵ tséhë xi tsuhi ne, ha quihndë casuaain xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu. ⁴⁶ Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me.

Hane xi cavatju cachja me cuatjin ne, cahme xu me.

⁴⁷ Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyé casahmi hñga cha Nina, cachja xu cha cuitjin:

—Quixi Jain xi cha xi cuijyিhi vi ne, tsajin jyé rë cha. —Cuatjin xu cachja cha.

⁴⁸ Hane yéjë ni xutacjín xi camatangun me xi scutsejen xu me xcusun jan ne, xi cavatju cavëë me yéjë xcusun xi camá jan ne, cavuya me cafe xu me, ña yaha xu me rcu me ngatsë rë cjuachoho rë me. ⁴⁹ Peru yéjë ni xuta xi cavinga xu rë Jesús cojo yéjë yachjin xi cavitju me tséhë distritu Galilea cojo Jesús ne, tséhë cjin ni hincharcun cuaha xu me tivutsejen me xcusun xi tivatju Jesús.

Caseya nima Jesucristu cahntsua tsjun

⁵⁰ Hane tacun ngu xu me xi hmí rë José, ngu xuta nandya Arimatea, ngu nandya rë xuta tjé rë Israel. Me vëhë ngu xihin ndaja me hacuaha tsajin xu mé jyé rë me tjin.

⁵¹ Hacuaha cachuyiin xu rë me sacuatjin cavyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gubiernu. ⁵² Ngajan xi me vëhë ne, quiji xu me xcun Pilatu, hane cafehya xu me nima Jesús. ⁵³ Hane xi casacu cahndé ne, quiji catsitujne me, sehe cavaxtë xu me ngu tsjian. Hyá xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hisca ngu xu nima cjéé seyaniji. ⁵⁴ Nixtin hya ne, vispra xu. Ha hisca meje cuechú xu hora xi cuisehen nixtin xi chjahájenda rë.

⁵⁵ Hane yachjin xi cojo xu me cavitjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya

nima. ⁵⁶ Hane xi cavuya me ne, cavéhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujujyuu xu me, sacuatjin vitexa ley rë Moisés.

24

Cavuya Jesucristu cjuahñu

¹ Peru tu casahasen ni tsëhë nixtin ngu tsëhë totje ne, yachjin jan ne, cavuya quiji nga xu me xcun tsjun jan hacuaha cavaha xu me rqui xi ha cavéhëchjine me jan. ² Hane xi cafehe me jan ne, cavëë xu me xi ndyojo xi cavechja rë tingotjo rë tsjun jan ne, ha canivahaxin rë. ³ Hane xi cavisehen me cahntsua tsjun jan ne, cavëë xu me xi tsajin nima Nai naja Jesús. ⁴ Hane jinguyéjë rë xi sacuinyiin rë me mé sahmi me ne, ha tu ñahñu camatsejen xu jo ángel jan, xi jercu tu setí camaha xu ni tsjian rë. ⁵ Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rë me:

—¿Mé má ngajñi rë nima vinchunsun me xi quicun? ⁶ Me vëhë ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea, ⁷ hya xi cachja me xi me xi Quihndi rë Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjin xu cachja ángel jan.

⁸ Sehe ngajan xi yachjin jan ne, catsinguitsjen xu me cjua rë Jesús. ⁹ Hane xi cavuya me xi quiji me xcun tsjun jan ne, quiji casua xu me camachaya rë xuta ladu rë Jesús xi tengu jan cojo yëjë sa me xi yahnga tsëhë yëjë ni hacutjin cavatju me camá. ¹⁰ Quihndë ne, yachjin xi casua camachaya rë apóstol jan ne, hacui xu na María na Mágdala cojo na Juana cojo na María naa rë Jacobo cojo sa yachjin xi yahnga. ¹¹ Peru apóstol jan ne, xi má xu rë me ne, suvá cjuangarca xi chja yachjin jan, vëhë xi camacjaain xu rë me.

¹² Peru Pedru ne, vangasanii xu me quiji me hiscan tacun tsjun jan. Hane xi cafehe me jan ne, catsiquindi xu me yojo rë me, sehe cavutsejenya xu me cahntsua tsjun jan ne, hane cavëë xu me suvá tsjian jan siu. Sehe cavuya cafe xu me. Jercu quijircun xu rë me tsëhë xcusun xi camá jan.

Ndiya Emaús

¹³ Hya xi camá ne, ha nixtin hya xu ni ne, jo cha ladu rë Jesús jan ne, cavetju xu cha quiji cha ngu nandya xi hmí rë Emaús, xi tacun sacuaha chuva rë tengu kilómetro tsëhë Jerusalén. ¹⁴ Hane ndiya cju cha jan ne, cavisajmi xu cha ngajñi rë cha tsëhë yëjë xcusun xi camá. ¹⁵ Hane jinguyéjë rë xi tivisiajmi cha jan ne, cavechútáha xu Jesús cha, hane quijitangun xu me cojo cha. ¹⁶ Peru handasa vutsejen cha me ne, casuaain xu Nina cahndé xi scuëë cha xi hacui me. ¹⁷ Sehe ngajan xi Jesús ne, cavinenguise xu me cha cuitjin:

—¿Mé cjua xi tivisiajmu xi táha tivangun? —Cuatjin xu cavinenguise me.

Hane cha xi cuacun jan ne, caxinchacunhñu xu cha, hacuaha jemu va tjin cacun cha. ¹⁸ Hane ngu cha xi cuacun jan xi hmí rë Cleofas ne, cachja xu cha cojo Jesús cuitjin:

—¿Há ngu tu tu ngayun xi nechuntuhun nguehe Jerusalén xi cuatjin hyúun mé xi sehe cavatju camá ni? —Cuatjin xu cachja cha cojo Jesús.

¹⁹ Sehe ngajan xi Jesús ne, cuitjin xu cachja me cojo cha:

—¿Mé xcusun jan? —Cuatjin xu cachja me.

Hane cha xi cuacun jan ne, cuitjin xu cachja cha:

—Xcusun xi cavatju ngu me xi hmí rë Jesús camá, ngu me xi canduva tsëhë nandya Nasaret. Me vëhë ne, xi camá rë Nina cojo xi camá rë yëjë ni xuta ne, ngu profeta me, xi jemu tjin rë me ngahñu xi casahmi me yëjë ni xcusun xi casahmi me, hacuaha xi cavicuya me yëjë ni cjua xi cavicuya me. ²⁰ Hacuaha nahmi xi matitjun cojo xutaxa rë yungun naja ne, casahmi me entregadu me vëhë cojo xutaxa rë Roma xi cueya me. Hane cuaha jain tjin cavetaha me xcun cru. ²¹ Ngayin ne, ha cavetihin tacuín xi me vëhë xi cuaxëtje naja

me ngayejen ni ngayaan xuta tjé rë Israel. Cojo yéjé sa ne, quihndé ne, ha camá jyan nixtin cavatju xcusun xi cuacun vë. ²² Hacuaha ngujo yachjin tséhë ladu niji ne, catsisca na cjuatacun niji, tséhë xi xati sa nguitajñu ne, quiji xu na xcun tsjun, ²³ hane xi casacuiin rë na nima ne, cafehe cachja na cojo niji xi cavëë na sacuaha ángel ngajan, hane cachja cojo rë na xi me vëhë ne, tacun me cjuahñu. ²⁴ Hya xi camá ne, ngujo cha xi siu cojo niji ne, quiji cha xcun tsjun jan, cavëë cha xi quixi Jain cjua xi cachja na, peru me vëhë ne, cahviin cha me. —Cuatjin xu cachja cha cojo Jesús.

²⁵ Sehe ngajan xi Jesús ne, cuitjin xu cachja me cojo cha:

—Ngayun yuma hasen, ngayun xi jemu tafi sehe macjain nuju yéjé cjua xi cachja profeta. ²⁶ ¿Hacuiin hatuxa casahmi nguyjé xi me xi catsingatju Nina ne, cuatjin cavatju me cjuañhi, sehe camajyé camahnga me cojo hasen ndajyihí rë me? —Cuatjin xu cachja Jesús.

²⁷ Hane sehe ngajan xi Jesús ne, casuacuenda xu me cha mé vijne yéjé ni cjua xi camahindu tséhë me xcun yéjé ni xujun rë Nina, cavetsihin me cojo cjua xi catsihindu Moisés, hane cajnetaha me cojo hisca cjua xi catsihindu yéjé sa profeta.

²⁸ Hya xi camá ne, xi camatiña xu cha cojo Jesús nandya hiscan cjui cha jan ne, Jesús ne, casahmi xu me sacuaha xi cjuenduju sa me. ²⁹ Peru cha xi cuacun jan ne, jercu cjín xu cachja cha cojo rë me cuitjin:

—Tinechun cojo niji ta quihndé ne, ha quiji hora hacuaha hisca meje cjuë nixtin.
—Cuatjin xu cachja cha.

Ngajan xi Jesús ne, quiji xu me cojo cha, hane cavisehen me ndava cha xi cuejña me cojo cha. ³⁰ Hane xi ha cafaha me cahndé rë me xcun maxë xi sinë me niñu cojo cha ne, sehe cafaha xu me ngu niñu, hane casua me nacuechji rë Nina, sehe cavatélanga me, casua xu me cha. ³¹ Hane hora vëhë xu casua Nina cahndé xi camá cavëë cha xi hacui Jesús. Hya xi camá ne, ha tu ñahñu cafëya xu me. ³² Hane sehe cachja xu cha ngajñi rë cha cojo xicjin cha cuitjin:

—Jercu ndaja camahani camá rë xahesen naja, hora xi tichja me cojo naja ngajan ndiya jan mé vijne cjua xi hincha xcun xujun rë Nina! —Cuatjin xu cachja cha cojo xicjin cha.

³³ Hane hora vëhë ni ne, cavisatjehnga xu cha tséhë maxë jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa. ³⁴ Hane sehe cachja xu me cojo cha cuitjin:

—Quixi Jain xi cavuya Nai naja cjuahñu, hacuaha cha Simón ne, cavëë cha me.
—Cuatjin xu cachja me.

³⁵ Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacuaha hacutjin camá cavëë cha xi hacui Jesús hya xi cavatélanga me niñu.

Cafehe Jesucristu hiscan tjin tangun xuta ladu rë me

³⁶ Hane tu tichja cuaha xu cha xi cuacun jan cojo me vëhë cjua jan ne, ha tu ñahñu cavëë xu yéjé me Jesús, secun me ngajñi rë me. Hane Jesús ne, cachja xu me nina cojo rë me cuitjin:

—Nina sua nuju me cjuandaja cjuajeya. —Cuatjin xu cachja me.

³⁷ Hane yéjé xuta ladu rë Jesús jan ne, jemu catsacjun camaha xu ni me camá tséhë xi xi má rë me ne, tivutsejen me ngu hasen. ³⁸ Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacuaha ¿má cuatjin mangú majo tacún?

³⁹ Chutsujun ntsa cojo ntsacú ta ngahan vi. Nduvun tetuhun ntsun ná, hacuaha chutsujun ná ta ngu hasen ne, tsajin yojo rë hacuaha tsajin nínda rë sacuatjin chutsujun ná ngahan cojo yojo cojo nínda naha. —Cuatjin xu cachja Jesús.

⁴⁰ Hane xi cavatju cachja me cjua vëhë ne, sehe catsingacun xu me tsja me cojo ntsacu me. ⁴¹ Hane xuta ladu rë Jesús jan ne, hisca maji xu macjain rë me ngatsë rë xi jercu tu ndaja má camahani rë me hacuaha hisca fircun rë me. Ngajan xi Jesús ne, cavinenguise xu me xuta jan cuitjin:

—¿Há tjin nuju hitsë xi xinëë nguehe? —Cuatjin xu cavinenguise me.

⁴² Hane ngu me jan ne, casua xu me ngu rquí ti camatsju. ⁴³ Hane xi cafaha me ne, cajinë xu me xcun yëjë ni xuta. ⁴⁴ Sehe cachja xu me cuitjin:

—Yëjë xcusun xi cavátju camá ne, tsëhë vëhë cjua xi cachjá cojo nuju hya xi tejña cuaha ngajñi nuju. Cachjá cojo nuju ta hatuxa meje rë xi cuetjuca yëjë hacutjin camahindu tsahan xcun xujun xi catsihindu Moisés cojo xcun xujun xi catsihindu profeta, cojo xcun xujun tsëhë Salmo. —Cuatjin xu cachja Jesús.

⁴⁵ Sehe ngajan xi Jesús ne, cavuxaha xu me cjuatacun rë xuta jan, cojo sa xi cuijnercu me cjua xi camahindu xcun xujun rë Nina. ⁴⁶ Hacuaha cachja xu me cuitjin:

—Cuitjin camahindu xi me xi catsingatju Nina ne, hatuxa cuatju me cjuañihi, hane xi cjuë jyan nixtin xi cueya me ne, cuya nga me cjuahñu, ⁴⁷ hacuaha sacú cumachaya rë yëjë ni xuta tsëhë ngasunhndë xi sá xi mangucacun me cojo me vëhë hacuaha tsindeya me cjuatacun rë me ne, tsinchataha Nina me tsëhë jyé rë me. Jerusalén vi ne, nguehe cuetsihin cuitsojo cjua vëhë. ⁴⁸ Ngayun cuinújun cojo xuta cjua vihi ta ngayun xi cahyun hacutjin camá. ⁴⁹ Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunntsun Hasen vëhë, xi cuinduva hisca ngahnga. —Cuatjin xu cachja Jesús.

Quiji Jesucristu ngahnga

⁵⁰ Hya xi camá ne, cavaxëxin xu Jesús xuta ladu rë me tsëhë nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu Jesús tsja me hane catsinchacun me xuta jan. ⁵¹ Hane ngajñi rë xi titsinchacun me xuta jan ne, cavetjuxin xu me quiyi me ngahnga. ⁵² Hane xuta ladu rë Jesús jan ne, xi cavatju cafaharcun me Jesús ne, sehe cavuya nga xu me Jerusalén cojo jemu jyé cjuasua. ⁵³ Hacuaha nchunchujun ni quiyi xu me yungun xi matitjun, vaxëndaja me Nina.

Cjuandajyঃ কি কাত্সিহিন্দু সান জুয়ান ত্সেহে জেসুক্রিস্টু

¹ Ntsacu cavetsihin ngasunhndë ne, ha tacun ngu me xi hmí rë Cjua. Me vëhë ne, tacun me cojo Nina, hacuaha Nina me. ² Me vëhë ne, hisca ntsacu cavetsihin ne, ha cuatjin tacun me cojo Nina. ³ Yëjë ni xi tjin ne, cojo me vëhë catsindaja Nina. Tsajin mé xi camandaja xi cuajin me vëhë camandaja. ⁴ Me vëhë xi hatuxa tjin rë me cjuahñu, hane cjuahñu vëhë ne, vëhë sua cjuahesen xi cuma rë xuta. ⁵ Hane cjuahesen vëhë ne, vitsojo ngajñi rë cjuatsehen sacuatjin sahmi hasen ngu ndihi ngajñi jñú, peru cjuatsehen ne, cacaain rë catsicjë rë cjuahesen jan.

⁶ Cavéjña ngu me xi hmí rë Juan, xi Nina catsingatju rë. ⁷ Me vëhë ne, cavetjujñi me xi cuichja me cojo xuta hane tsinguixi me tséhë cjuahesen jan, cojo sa xi ngatsë rë cjuia xi cuichja me ne, cumacjain rë yëjë ni xuta. ⁸ Hacuiin me vëhë xi cjuahesen jan me ta me vëhë ne, cavetjujñi me cojo sa xi cuichja me tséhë cjuahesen jan. ⁹ Cjuahesen xi cjuaquixi jan ne, xi visehen ngajñi rë cjuatacun rë yëjë xuta ne, sehe canduva nguehe ngasunhndë.

¹⁰ Me xi hmí rë Cjua jan ne, cavéjña me ngasunhndë. Hacuaha handasa cojo me xi catsindaja Nina ngasunhndë ne, peru xuta ne, hvíin me yo. ¹¹ Canduva me ngasunhndë rë suvá me, peru xuta nangui rë suvá me ne, cafahatsjaain rë me. ¹² Peru ngu jo xuta nangui rë me xi cafahatsja rë me hacuaha camangu cacun cojo rë me ne, me xi Cjua jan ne, casua me chuva rë xi cuma xuta xi cuacun jan quihndi rë Nina. ¹³ Xuta xi cuacun jan ne, hacuiin camá me quihndi rë Nina chuva rë xi meje rë ngu xihin ngu quihndi ta suvá Nina casahmi me xi camá xuta xi cuacun jan quihndi rë me.

¹⁴ Me xi Cjua jan ne, camá me ngu xuta, hacuaha cavéjñacahndë me ngajñi niji. Hatuxa quitsë rë xahasen rë me cjuandaja, quitsë rë xahasen rë me cjuaquixi. Ngayin ne, cahyin hacutjin xi jemu jyë hnga me cojo hasen rë me. Jyë hnga me sacuatjin casahmi rë me Nahmi rë me. ¹⁵ Juan Vitenda rë Xuta ne, cachja me cojo xuta tséhë me xi Cjua jan, cuitjin cachja me:

—Me vihi xi cachjá tséhë, xi me xi sehe cuinduva ne, handasa ngahan canduvá titjun ne, peru me vëhë xi hitsë sa venguichji rë me xi cuma ná ngahan, tséhë xi ha tacun me hya xi catsin ngahan.

¹⁶ Tséhë xi hatuxa jemu quitsë rë xahasen rë me cjuandaja ne, vëhë xi ngayejen ni ne, hacuaha jemu cachjahanntsan cjuandaja. ¹⁷ Ley rë Nina ne, nima Moisés casua naja me, peru cjuandaja cojo cjuaquixi ne, Jesucristu casua naja me. ¹⁸ Tsajin camahani yo xi cavëë rë Nina. Suvá ni Quihndi ngu rë Nina xi hacuaha nina me hacuaha tacun tangun me cojo Nina Nahmi naja ne, me vëhë casua me camachaya naja yo xi Nina.

Cjua xi cachja Juan Vitenda rë Xuta

¹⁹ Cuitjin cachja Juan hya xi catsingatju xutaxa rë tséhë nandya Jerusalén ngu jo nahmi cojo sacrístán xi cjue cjuinenguise rë me Juan cuitjin:

—Ngayun ne, ¿yo ngayun? —Cuatjin cjuinenguise me. ²⁰ Hane hora xi cuatjin cavinenguise me ne, Juan ne, catsinguixi me, hacuiin cavetsangui me, cuitjin catsinguixi me:

—Hacuiin ngahan Xihin xi Tsingatju Nina. —Cuatjin cachja me.

²¹ Ngajan xi cavinenguise nga nahmi xi cuacun jan cuitjin:

—¿Mé ni ni? ¿Há xutachanga naja Elías ngayun? —Cuatjin cavinenguise me.

Ngajan xi Juan ne, cuitjin cafayangui me:

—Hacuiin ngahan. —Cuatjin cafayangui me.

Ngajan xi cavinenguise nga nahmi xi cuacun jan cuitjin:

—¿Há ngayun profeta xi jemu nechanyan rë? —Cuatjin cavinenguise me.

Hane Juan ne, cuitjin cafayangui nga me:

—Jéya. —Cuatjin cafayangui nga me.

²² Ngajan xi nahmi xi cuacun jan ne, cavinenguise nga me cuitjin:

—¿Yo ngayun ni? Tinújun cojo niji ne, cojo sa xi cuma nicuyin ngu cjua tséhë me xi catsingatju niji. ¿Mé nújun tsujun suvun? —Cuatjin cachja me.

²³ Ngajan xi Juan ne, cuitjin cafayangui me:

—Ngahan ne, xuta xi jercu hñu chjá nguehe hiscan jemu xín tséhë nandya, xi catitsinguixi xuta ndiya tséhë Nai naja, sacuatjin cachja profeta Isaías hatsëë nixtin. —Cuatjin cafayangui me.

²⁴ Quihndë ne, xuta xi cuacun catsingatju cha partidu fariseo xi cuichja me cojo Juan ne, ²⁵ cuitjin cavinenguise me:

—¿Mé má cuatjin vitendun xuta sa xi hacuiin ngayun xi Tsingatju Nina ngayun, hacuiin ngayun xi profeta Elías ngayun, hacuiin ngayun xi profeta xi jemu nechanyan rë ngayun ni? —Cuatjin cavinenguise me.

²⁶ Ngajan xi Juan ne, cuitjin cafayangui me:

—Ngahan ne, cojo nandá tivitenda nuju, peru ngajñi nuju secun ngu me xi hyúun yo.

²⁷ Ngahan ne, canduvá titjun, sehe canduva me vëhë, peru hisca tsajin mé cumachjirëhë ngahan xi cuma rë me. —Cuatjin cafayangui Juan.

²⁸ Xcusun vëhë ne, camá ngajan ngu cahndë hiscan xi hmí Betania, ngunda vëhë tséhë ndajyë Jordán, hiscan tivitenda Juan xuta.

Jesucristu sacuaha chu tsángä xi sua Nina

²⁹ Xi camá nchujun jan ne, cavëë Juan xi nduva Jesús hiscan secun me. Hane cuitjin cachja Juan cojo xuta:

—¡Chutsujun ni! Cuajyঃhi me xi sacuaha chu tsángä xi sua Nina xi tsicjë jyé rë xuta.

³⁰ Me vëhë xi cachjá cojo nuju xi me xi sehe cuinduva. Handasa ngahan canduvá titjun ne, peru me vëhë xi hitsë sa venguichji rë me xi cuma ná ngahan, tséhë xi ha tacun me hya xi catsin ngahan. ³¹ Ngahan suva ne, hveen yo me. Peru cojo sa xi ngayaan xuta tjë rë Israel cumachaya naja yo me ne, vëhë xi cuitjin tivitenda xuta. —Cuatjin cachja Juan.

³² Hacuaha cachja Juan cuitjin tséhë Jesús:

—Ngahan ne, cahvë Hasen rë Nina xi canduvajne tséhë ngahnga sacuaha ngu paloma, quiji casesun rcu me. ³³ Ngahan suva ne, hveen yo me, peru me xi cavitexa ná xi cuiténda xuta cojo nandá ne, cuitjin cachja me cojo ná: “Me xi che xi cuinduvajne Hasen naha cjue sesun rcu ne, me vëhë xi cuitenda me xuta cojo Hasen naha.” Cuatjin cachja Nina cojo ná. ³⁴ Ngahan ne cahvë hacuaha cachjá cojo xuta xi me vëhë xi Quihndi rë Nina me. —Cuatjin cachja Juan.

Me xi tjun tjun camá xuta ladu rë Jesucristu

³⁵ Xi camá nchujun nga jan ne, secun Juan cojo jo xuta ladu rë me. ³⁶ Hane xi cavëë Juan Jesús xi tivatju me jan ne, cachja me cuitjin:

—¡Chutsujun ni! Cuajyঃhi me xi sacuaha chu tsángä xi sua Nina. —Cuatjin cachja me.

³⁷ Xi cahndë jo xuta ladu rë Juan cjua jan ne, quijitjengui me Jesús. ³⁸ Xi cavuya Jesús cavutsejen me xi cjuitjengui xuta jan me ne, sehe cavinenguise Jesús me cuitjin:

—¿Mé meje nuju ngayun? —Cuatjin cavinenguise me.

Ngajan xi xuta jan ne, cuitjin cafayangui me:

—Maestro, ¿jani nechun? —Cuatjin cavinenguise me.

³⁹ Ngajan xi Jesús ne, cuitjin cachja me cojo jo xuta jan:

—Nduvun chutsujun. —Cuatjin cachja me.

Hane xi quiji vutsejen xuta jan ne, sehe cavëë me hiscan véjña Jesús. Sacuaha chuva rë fane ñuju hora vëhë. Hane cavyuju me ngajan cojo Jesús nixtin hya.

⁴⁰ Ngu xuta ladu rë Juan xi cahndë sacuatin cachja me hacuaha quijitjengui rë Jesús ne, hacui Andrés, me xi hntsë Simón Pedru. ⁴¹ Me vëhë titjun quiji jaha me hntsë me Simón, hane xi casacu rë me ne, cuitjin cachja me cojo:

—¡Cahyin Mesías! —Cuatjin cachja me. (Mesías ne, hacui cjua xi meje cuichja: Me xi Tsingatju Nina.)

⁴² Hya xi camá ne, Andrés ne, quijicojo me Simón xicjin me ngajan hiscan tacun Jesús. Hane xi cafehe me jan ne, cavutsejenya Jesús xcun Simón ne, sehe cachja me cuitjin cojo rē me:

—Ngayun ne, Simón hmí nuju, peru chjuhunñuhu Cefas. —Cuatjin cachja Jesús. (Ñihi xi Cefas ne, tangun vijne cojo ñihi xi Pedru ta catsijo ni ne, ndyojo, meje cuichja.)

Cavaxijin Jesucristu Felipe cojo Natanael

⁴³ Hane xi camá nchujun jan ne, cavejña cacun Jesús xi cjue me ngu nandya tséhë distritu Galilea. Chaja sa xi cjue me ne, cavechútáha me Felipe, hane cachja me cojo cuitjin:

—Nduvun, cuanguen cojo ná. —Cuatjin cachja me.

⁴⁴ Felipe ne, Betsaida nangui rē me, hiscan nangui rē Andrés cojo Pedru. ⁴⁵ Hya xi camá ne, Felipe ne, quiji jaha me Natanael, hane xi casacu rē me ne, cachja me cuitjin:

—Cahyin ngu xuta Nasaret xi hmí rē Jesús, quihndi rē José. Me vëhë xi catsihindu Moisés cojo jingu sa profeta tséhë, ngajan xcun xujun rē Nina. —Cuatjin cachja Felipe cojo Natanael.

⁴⁶ Ngajan xi Natanael ne, cavinenguise me cojo Felipe cuitjin:

—Ja! ¿Há cuma cuetjujní ngajan Nasaret ngu xuta xi jemu venguichji rē ni? —Cuatjin cavinenguise Natanael.

Ngajan xi cafayangui Felipe cuitjin:

—Ndove chutsijin ni. —Cuatjin cafayangui me.

⁴⁷ Hane xi cavëë Jesús xi camatiña Natanael ne, sehe cachja me cuitjin tséhë:

—Chutsujun ni, cuajyihí ngu me xi xuta tjé rē Israel xi cjuaquixi Jain, ngu me xi tsajin cjuandacha cahntsua xahasen rē. —Cuatjin cachja Jesús tséhë Natanael.

⁴⁸ Ngajan xi Natanael ne, cuitjin cavinenguise me Jesús:

—¿Hacutjin má xi cuatjin hyun yo ngahan ni? —Cuatjin cavinenguise Natanael.

Ngajan xi Jesús ne, cuitjin cafayangui me:

—Chaja sa xi cuichja Felipe cojo nuju ne, ngahan ne, ha cahvë nuju hya xi sechun ngahma yaxujun jan. —Cuatjin cafayangui Jesús.

⁴⁹ Hane Natanael ne, cuitjin cachja me:

—Maestro, Ngayun xi Quihndi rē Nina ngayun, ngayun xi matitjun ngayun tsajan ngayaan xuta tjé rē Israel. —Cuatjin cachja Natanael.

⁵⁰ Ngajan xi Jesús ne, cachja me cuitjin:

—Ngayun ne, camangu tacún cojo ná, tséhë xi cachjá xi cahvë nuju hya xi nechun ngahma ya higo jan. Peru sehe chutsujun sa xcusun xi cuetjucaa xi hitsë sa venguichji rē.

⁵¹ Hacuaha cachja sa Jesús cjua vihi:

—Cuichjá cojo nuju cjuaquixi ta ngayujun ni ne, cuechú nixtin xi chutsujun xi ngahnga ne, sacuaha xi tixaha, hacuaha ángel rē Nina ne, sacuaha xi cjuijne cjuiniji hiscan tejña ngahan xi Quihndi rē Xuta Jain ngahan. —Cuatjin cachja Jesús.

Cjuavixan xi camá ngajan Caná

¹ Hane xi cavatju jyan nixtin ne, camá ngu cjuavixan ngajan Caná, distritu Galilea. Naa rē Jesús ne, ngajan quitahá me ndava suhi. ² Hacuaha Jesús cojo xuta ladu rē me ne, hacuaha camá me invitar xi cjue me ndava suhi, hane quiji me. ³ Hya xi camá ne, café xan xi tséhë suhi jan. Sehe ngajan xi naa rē Jesús ne, cuitjin cachja me cojo Jesús:

—Ha quihndé tsajin rē me xan nguehe. —Cuatjin cachja me.

⁴ Ngajan xi Jesús ne, cuitjin cafayangui me:

—Hacuia cuenda naha xi ngahan nújun cojo ná. Cjëë cuechú hora xi sahme mé xi sahme. —Cuatjin cafayangui Jesús.

⁵ Ngajan xi naa rē Jesús ne, cuitjin cachja me cojo cha xi vincha xan jan:

—Tu mé ni xi cuichja cha cojo nuju ne, cuatjin nihñu. —Cuatjin cachja naa rē Jesús.

⁶ Quihndë ne, siu ngajan jyun tiji xi ndyojo camá, xi xincha nandá xi vitejnu xuta tjë rë Israel hitsë tu mé ni xcusun xi sahmixa me cojo, sacuatjin xi ha xcusun rë yungun rë me. Jima ngu tiji jan ne, xincha sacuaha yachantë o sa jyanchantë litru nandá. ⁷ Ngajan xi cachja Jesús cojo cha xi vincha xan cuitjin:

—Ninguitsun rë tiji xi cuacun vë cojo nandá. —Cuatjin cachja me.

Ngajan xi cha xi cuacun jan ne, catsinguitsë camahani rë cha tiji jan cojo nandá.

⁸ Hya xi camá ne, sehe cachja nga Jesús cuitjin cojo cha:

—Quihndë ne, chjuhun hitsë xi cavinchun tiji vë ne, tángun chanu rë xutacha.

—Cuatjin cachja me.

Hane cuatjin casahmi cha xi cuacun jan. ⁹ Hya xi camá ne, cavutaha xutacha jan nandá xi camá xan jan. Me vëhë ne, hisca hvíin me jani canduva xan jan, peru cha xi vincha xan xi cafaha quijicojo jan ne, vëe cha. Ngajan xi xutacha jan ne, cajindaya me cha xutavixan jan ne, ¹⁰ sehe cachja me cojo cha cuitjin:

—Xcusun naja ne, titjun xan xi ndajyihí taan hvi xuta, hane ha xcun xi ha cjín cahvi me ne, sehe taan rë me xan xi ha va jyíhi. Peru ngaye ne, hisca ndicumaha ni titehe xan xi ndajyihí. —Cuatjin cachja xutacha jan.

¹¹ Cjuarcun xi tjun tjun casahmi Jesús vë ne, casahmi me ngajan Caná, distritu Galilea. Cuatjin catsingacun me xi jemu jyë hnga me cojo hasen rë me. Hane xuta ladu rë me ne, camangu cacun me cojo rë me.

¹² Xi cavatju vëhë ne, cavetju me quijijne me nandya Capernaum. Quiji me cojo naa rë me cojo xicjin me cojo xuta ladu rë me. Hane ngajan caviyujutaha me ngujo nixtin.

Cavaxë Jesucristu xuta xi sahmi ndetsin ndatsen yungun

¹³ Cavechú nixtin xi camatiña suhi xi hmí rë Pascua, ngu suhi xi sahmi xuta tjë rë Israel. Ngajan xi Jesús ne, quijiniji me ngajan nandya Jerusalén. ¹⁴ Hane xi cafehe me jan ne, quiyi me yungun xi matitjun. Ngajan cavëë me xuta xi tiviteña chu ndyaja cojo chu tsánga cojo chu nisétyava, hacuaha cavëë me xuta xi siu titsindeya tujún tséhë xuta cojo tujún rë yungun. ¹⁵ Hane xi cavëë Jesús xi cuatjin tisahmi xuta jan ne, cafaha me ngu nahñu xi jiña ne, casahmi me ngu cuarta, sehe catsicanga me yéjë ni chu xteña, sa ndyaja sa tsánga. Hacuaha cacandi me tujún rë xuta xi tsindeya tujún, hacuaha catsindefa me maxë xi xinchasun tujún jan. ¹⁶ Hane xuta xi tiviteña chu nisétyava jan ne, cuitjin cachja Jesús cojo rë me:

—Tángunxun cojo chu xi cuicun vi. Xicanihñuu ndava Nahmi naha sacuaha ngu ndetsin. —Cuatjin cachja Jesús.

¹⁷ Ngajan xi xuta ladu rë Jesús jan ne, catsinguitsjen me xi camahindu xcun xujun rë Nina cuitjin: “Ngayun Nina naha, xi jemu hmú cácun camahani ndya nuju ne, ña sca má rë xahasen naha.” Cuatjin camáhindu.

¹⁸ Ngajan xi xutaxa rë yungun jan ne, cuitjin cachja me:

—Quihndë ne, ijarë ngu cjuarcun xi nihñu cojo sa xi cumachaya niji xi tjin Jain nuju chuva rë xi cuatjin nihñu! —Cuatjin cachja me.

¹⁹ Ngajan xi Jesús ne, cuitjin cafayangui me:

—Ninguetsun yungun vihi ne, cahntsua xi jyan nixtin ne, ngahan sahme ndaja nga.

—Cuatjin cafayangui Jesús.

²⁰ Hane xutaxa rë yungun xi matitjun ne, cuitjin cachja nga me:

—Yachan jyun nu quiyi cani rë xi camandaja yungun naja vi. Hane sehe ngayun nujún ne, jcahntsua xi jyan nixtin ne, cuyun nindujun nga ni! —Cuatjin cachja xutaxa rë yungun jan.

²¹ Peru Jesús ne, hya xi cachja me tséhë yungun jan ne, tséhë yojo rë suvá me xi cachja me. ²² Vëhë xi hya xi cavuya Jesús cjuahñu ne, xuta ladu rë me ne, catsinguitsjen me xi cuatjin cachja Jesús, hane camacjain rë me cjuá xi chja xujun rë Nina hacuaha camacjain rë me cjuá xi cachja Jesús jan.

Vëe Jesucristu xahasen rë yéjë ni xuta

²³ Jinguyéjë rë xi cuatjin quitahá Jesús ngajan Jerusalén nixtin rë suhi tséhë Pascua ne, jemu cjín xuta camangu cacun me cojo rë me, xi cavëë me cjuarcun xi Jesús tisahmi me. ²⁴ Peru suvá Jesús ne, camanguaain cacun me cojo xuta xi cuacun jan ta, tséhë xi ha vëë me xahasen rë yéjë me xi cuacun vë. ²⁵ Hacuaha cuatjin camanguaain cacun me cojo xuta jan ta, tséhë xi hacuiin sahmi nguwyé xi tjin yo xi cuichja cojo rë me tséhë xuta ta, tséhë xi ha vëë me mé cjua xi hincha cahntsua xahasen rë xuta.

3

Cjuvisajmi rë Jesucristu cojo Nicodemo

¹ Cavéjña ngu xuta fariseo xi hmí rë Nicodemo. Me vëhë ne, ngu xuta matitjun me tséhë ngajñi rë xuta tjë rë Israel. ² Ngundiya jan ne, nguixun quiji cavisajmi me cojo Jesús, hane cuitjin cachja me:

—Maestro, ngayin ne, hyin ta ngayun ne, ngu maestru xi Nina catsingatju rë. Cuatjin hyin ta, tséhë xi tsajin yo xi cuma sahmi cjuarcun xi nihñu ngayun sa xi hacuiin Nina visecoo rë. —Cuatjin cachja Nicodemo cojo Jesús.

³ Ngajan xi Jesús ne, cuitjin cafayanguí me:

—Cuichjá cojo nuju cjuaquixi ta sa xi ngu xuta tsiin me ngu ndiya nga ne, cumaji cuisehen me hiscan sahmi Nina gubiernu. —Cuatjin cafayanguí Jesús.

⁴ Hane Nicodemo ne, cavinenguise me Jesús cuitjin:

—¿Peru hacutjin cuma xi ngu xihin xi ha changá ne, cuya tsin nga ni? ¿Há cuma cuisehen nga cahntsua naa rë sehe tsin nga ngu ndiya? —Cuatjin cavinenguise Nicodemo.

⁵ Ngajan xi Jesús ne, cuitjin cafayanguí me:

—Cuichjá cojo nuju cjuaquixi ta hatuxa sahmi nguwyé xi cuisehen xuta ngu cjuahñu xatsë ngatsë rë nandá cojo ngatsë rë Hasen rë Nina ta, ha chuva rë vëhë ni xi cuma cuisehen me hiscan sahmi Nina gubiernu. ⁶ Hyá xi ngu xuta tsin me ngatsë rë xutacha rë me ne, sacu rë me cjuahñu xi tséhë ngasunhndë. Peru hyá xi tsin me ngatsë rë Hasen rë Nina ne, sacu rë me cjuahñu xatsë xi tséhë Nina. ⁷ Hacuiin cjuercun nuju xi cuatjin cachjá cojo nuju xi mameje rë xi tsin nga ngayun ngu ndiya. ⁸ Tjo ne, hatuxa vanga hiscan meje rë, peru suva machaya naja xi vanga ta nuhya rë xi fane vanga, ta matsijin hiscan nduva o hiscan vechú. Hane xuta xi tsin me ngatsë rë Hasen rë Nina ne, tjin rë me sacuaha tjo jan, ta tsin me ngu ndiya nga, peru matsijin hacutjin. —Cuatjin cafayanguí Jesús.

⁹ Ngajan xi Nicodemo ne, cuitjin cavinenguise me cojo Jesús:

—Peru ¿hacutjin cuma sacuatjin nýjun vë ni?

¹⁰ Hane Jesús ne, cuitjin cafayanguí me:

—¿Hacutjin nga ne xi ngayun ne, maestru má ngayun tséhë xuta tjë rë Israel, hane sehe hyúun mé vijne cjua xi cachjá cojo nuju vë ni? ¹¹ Cuichjá cojo nuju cjuaquixi ta ngayin ne, nýjin cjua xi hyin hacuaha nýjin tséhë xcusun xi cachutsijín, peru cjua xi nýjin cojo nuju ne, mijí chjuhunntsun. ¹² Sa xi camacaain nuju hyá xi cachjá cojo nuju cjua tséhë xcusun tséhë ngasunhndë ne, ¿hacutjin cumacjain nuju sa xi cuichjá cojo nuju cjua tséhë xcusun tséhë ngahnga ni?

¹³ 'Tsajin hisca ngu xuta xi quiji cavutsejen me hacutjin jyíhi ngahnga sehe cavuya me xi sua cuenda nuju me. Suvá ni me xi ha tséhë ngajan canduva me ne, me vëhë xi cuma sua cuenda nuju me, suvá ni me xi Quihndi rë Xuta Jain. ¹⁴ Chuva rë xi casahmi Moisés hatsëë nixtin xi cavunihnga me ngu quicha xcusun rë chu yé taha rë ngu ya ngajan ngu xín camahani jan ne, ha chuva vëhë ni ne, me xi Quihndi rë Xuta Jain ne, meje rë xi tjunihnga rë me taha rë ngu ya. ¹⁵ Cuatjin meje rë, cojo sa xi yéjë ni xuta xi cumangu cacun me cojo rë me vëhë ne, sacú rë me cjuahñu xatsë. —Cuatjin cafayanguí Jesús tséhë Nicodemo.

Cjuahmutacun rë Nina cojo xuta

¹⁶ —Tséhë xi jemu catsihmu cacun Nina xuta ne, hisca casua me Quihndi ngu rë me, cojo sa xi yéjë ni xuta xi cumangu cacun me cojo me vëhë ne, hacuiin cjue hasen rë

me xcun cjuahñihi ta sacú rë me cjuahñu xatsë xcun Nina. ¹⁷ Nina ne, catsingatju me Quihndi rë me nguehe ngasunhndë, peru hacuiin xi cjuahachuva rë xuta ngasunhndë ta xi cuaxëtje rë xuta.

¹⁸ 'Xuta xi mangucacun cojo Quihndi rë Nina ne, hacuiin chjaháchuva rë me. Peru me xi hacuiin mangucacun cojo Quihndi rë Nina ne, ha cachjaháchuva rë me ta, tséhë xi hacuiin mangucacun me cojo me xi Quihndi ngu rë Nina. ¹⁹ Hane cuitjin fahachuva Nina xuta ngasunhndë: Nina ne, ha catsingatju me Quihndi rë me ngasunhndë sacuaha ngu ndihi xi sua hasen rë. Peru xuta ne, hitsë sa cachuya rë me tséhë jñu xi cuma rë hasen ta, tséhë xi xcusun xi casahmi me ne, suvá cjuatsehen. ²⁰ Yéjë ni xuta xi sahmi xcusun tsehen ne, hatuxa chuyiin rë me tséhë hasen, hisca sahmitiñaa me hiscan xi hasen, sa tu sesunhnga xcusun xi sahmi me. ²¹ Peru xuta xi ndiya rë cjuaquixi xcusun xi sahmi me ne, sahmitiña me hiscan xi hasen, cojo sa xi sesunhnga xi xcusun xi sahmi me ne, vëhë xcusun xi meje rë Nina.

Chja Juan Vitenda rë Xuta tséhë Jesús

²² Hya xi camá ne, quiji Jesús cojo xuta ladu rë me ngajan nguijña tséhë distritu Judea. Hane ngajan caviyujutahá cojo me xuta xi cuacun vë. Hane cavitenda me xuta. ²³ Hacuaha ha nixtin hya ni ne, Juan Vitenda rë Xuta ne, tivitenda me xuta ngajan hiscan xi hmí rë Enón, tiña tséhë Salim. Ngajan quitahá me ta, tséhë xi ngajan ne, jemu yehe nandá tjin. Hane hacuaha quiji xuta caxtenda me. ²⁴ Nixtin hya ne, cjëë cjue Juan jan ndavaya.

²⁵ Quihndë ne, ngujo xuta ladu rë Juan ne, cavetsihin ticjanjo cjuá rë me cojo ngu xutaxa rë yungun tséhë xcusun changá rë me xi ma tyjahi me xcun Nina. ²⁶ Hya xi camá ne, quiji cachja me cojo Juan cuitjin:

—Maestro, ¿Há vitsjen nuju me xi casetaha cojo nuju ngunda vëhë tséhë ndajyë Jordán, me xi canújun cojo niji tséhë jan? ¡Chutsujun ta hacuaha cojo me vëhë tivitenda me, hane yéjë ni xuta cjuajengui rë me! —Cuatjin cachja xuta xi cuacun jan.

²⁷ Ngajan xi Juan ne, cuitjin cafayangui me:

—Tsajin mé xi sacú cjuahatsja ngu xuta sa xi Nina suaain rë me. ²⁸ Ngayun suvun ne, ha canuhyun xi cachjá xi hacuiin ngahan Xihin xi Tsingatju Nina ta ngahan ne, cha xi catsingatju titjun Nina, sehe catsingatju Nina me vëhë. ²⁹ Chutsujun ta na xutavixan ne, tséhë cha xutavixan na. Peru ngu cha amigu ndaja rë cha xutavixan xi secun tivisiñuju cjuá rë cha xutavixan jan ne, jercu ndama rë cha tséhë cjuá rë cha vëhë. Vëhë xi ngahan xi sacuaha cha amigu rë cha xutavixan vë ne, jercu tu ndaja camahani má ná. ³⁰ Me vëhë ne, meje rë xi quihndë nga nchujun cuma jyé cuma hnga sa me cojo xa rë me, peru ngahan ne, hacuiin cuatjin ta xi meje rë ne, cuijnetaha xa naha. —Cuatjin cafayangui Juan.

Me xi nduva tséhë ngahnga

³¹ Me xi nduva tséhë ngahnga ne, me vëhë xi hitsë sa jemu vengui chji rë me xi cuma rë yéjë xuta. Ngayaan xi tséhë ngasunhndë ngayaan ne, ha xuta ngasunhndë ni ngayaan, hacuaha suvá cjuatacun rë ngasunhndë xi visiajme. Me xi nduva tséhë ngahnga ne, me vëhë xi hitsë sa jemu vengui chji rë me xi cuma rë yéjë xuta. ³² Me vëhë ne, sua me machaya naja tséhë xcusun xi cavëë me cojo tséhë cjuá xi cahndë me, peru xuta ne, fahatsjaain me cjuá xi chja me vëhë. ³³ Peru ngujo xuta ne, fahatsja me cjuá rë me vëhë, hane cuatjin maquixi xi Nina ne, quixi Jain me cojo cjuá rë me. ³⁴ Me xi Nina catsingatju rë ne, cjuá rë Nina chja me ta, tséhë xi Nina ne, hacuiin chuva hitsë sua me Hasen rë me. ³⁵ Nina Nahmi naja ne, jemu hmu cacun me Quihndi Ngu rë me, hacuaha yéjë ni xcusun ne, cavejña me tsja Quihndi rë me jan. ³⁶ Xuta xi mangucacun me cojo Quihndi rë Nina jan ne, tjin rë me cjuahñu xatsë. Peru xuta xi vihndiin me tséhë Quihndi rë me jan ne, sacuiin rë me cjuahñu xatsë ta castigu rë Nina cuatju me cuma.

Cjuavisiajmi rë Jesús cojo na samaritana

¹ Quihndé ne, cha fariseo ne, camachaya rë cha xi Jesús ne, hitsë sa cjín jima xuta ladu rë me xi cuma rë xuta ladu rë Juan, hacuaha hitsë sa cjín xuta tivitenda me xi cuma rë xuta xi tivitenda Juan. ² Peru suvá Jesús ne, cavitendaain me ta xuta ladu rë me ne, me vëhë xi cavitenda me xuta. ³ Hane xi camachaya rë Jesús xi cuatjin camachaya rë cha fariseo xi cuacun vë ne, cavetjuxin me tsëhë distritu Judea. Hane cavuya quiji nga me ngu nandya tsëhë distritu Galilea.

⁴ Hane ndiya xi cjui me jan ne, tjin xi cuatju me ngujo nandya tsëhë distritu Samaria.

⁵ Hyá xi camá ne, cafehe me ngu nandya tsëhë distritu Samaria xi hmí rë Sicar, ngu nandya xi tacun tiña tsëhë nangui xi casua Jacob quihndi rë me José jemu hatsëe camahani. ⁶ Hane cahndé vëhë ne, tacun ngu ndava nandá xi casahmi Jacob. Hane tsëhë xi jemu cafenda rë Jesús tsëhë ndiya xi nduva me ne, quiji me cavéñña me hiscan ndava nandá jan. Sacuaha chuva rë nchisen xi cafehe me jan.

⁷ Hora vëhë ne, canduva ngu na samaritana, canduva jaha na nandá. Hane cuitjin cachja Jesús cojo rë na:

—Tuhun hitsë nandá cuëhë. —Cuatjin cachja me.

⁸ Hora vëhë ne, tsajin xuta ladu rë Jesús ta nandya quiji me xi cuatsë me xi sinë me cojo Jesús. ⁹ Ngajan xi na samaritana jan ne, cuitjin cachja na cojo Jesús:

—Ngayun xi xuta tjé rë Israel ngayun ne, ¿hacutjin má xi tichjahyun ná nandá, ngahan xi na samaritana ngahan ni? —(Cuatjin cachja na ta, tsëhë xi xuta tjé rë Israel ne, hatuxa tsinguishinjñii me cojo xuta samaritana.) ¹⁰ Ngajan xi Jesús ne, cuitjin cafayangui me tsëhë na:

—Sa xi ngayun hyun cjuatjo xi Nina sua me hacuaha hyun yo ngahan xi tifehya nuju nandá ne, ngahan cachjahyun ná nandá, hane ngahan casuá nuju nandá xi sua cjuahñu. —Cuatjin cafayangui Jesús.

¹¹ Hane na vëhë ne, cuitjin cachja na:

—Tatá, peru ndava nandá vi ne, jemu nungun, hane tsajin quichuhun mé xi naxun cojo nandá. ¿Jani naxun nandá xi sua cjuahñu vë ni? ¹² Xutachanga naja Jacob casua niji me ndava nandá vi. Hacuaha cojo me cojo quihndi rë me cojo chu rë me cahvi me nandá tsëhë ndava nandá vihi. ¡Ja! Peru ¿há hitsë sa matitjun ngayun xi cuma rë me vëhë ni? —Cuatjin cachja na.

¹³ Hane xi cafayangui Jesús ne, cuitjin cachja me cojo rë na:

—Yéjë ni xuta xi hvi me nandá vihi ne, cuma xinda nga rë me. ¹⁴ Peru xuta xi cuihi me nandá xi suá ngahan ne, hatuxa ha quihndé tsajin nu tsajin nixtin xi cuya cumaxinda nga rë me ta nandá xi suá ngahan ne, cuma sacuaha ngu nandá xi ña vangatë xi sua rë me cjuahñu xatsë. —Cuatjin cachja me.

¹⁵ Ngajan xi na vëhë ne, cuitjin cachja na cojo Jesús:

—Tatá, tuhun ná hitsë nandá xi nýjun vë, cojo sa xi cumaxindaain ná hacuaha ha quihndé cuinduvaan jaha nandá. —Cuatjin cachja na.

¹⁶ Hane Jesús ne, cuitjin cachja me cojo rë na:

—Tángun chjuhun xihin nuju, sehe nduvuncujun me nguehe. —Cuatjin cachja me.

¹⁷ Ngajan xi na vëhë ne, cuitjin cafayangui na:

—Tsajin xihin naha. —Cuatjin cafayangui na.

Hane cuitjin cachja Jesús cojo rë na:

—Ndaja nýjun xi tsajin xihin nuju ta ¹⁸ hñú cha xi cavinechuncujun, hane cha xi nechuncujun quihndé ne, hacuiin xihin nuju cha. Canújun cjuaquixi. —Cuatjin cachja Jesús cojo rë na.

¹⁹ Ngajan xi na vëhë ne, cuitjin cafayangui na:

—Tatá. Xi má ná ne, ngayun ne, ngu profeta ngayun. ²⁰ Xutachanga niji ne, nguehe ndetjún vihi canduva cafaharcun me Nina. Hane ngayujun ni xuta nangui rë Israel

ne, nújun ta Jerusalén ne, ngajan tacun cahndé xi meje rë xi cjue chjahárcun rë Nina.
—Cuatjin cafayangui na.

²¹ Ngajan xi cachja Jesús cojo rë na cjua vihi:

—Ngayun chjuun, catamacjain nuju cjua xi cuichjá vi: cuechú nixtin xi hacuiin ndetjún vihi hacuiin Jerusalén chjuhunrcun Nina Nahmi naja. ²² Ngayun xuta samaritano ne, chjuhunrcun Nina, peru hyúun me xi ndandaja. Ngayin ne, ha hyinnndijin Nina ta, tséhë xi me xi cuaxétje rë xuta ne, cuetujñi me ngajñi niji ngayin xuta nanguí Israel. ²³ Cuechú nixtin o ha hisca cavechú nixtin xi xuta xi cjuaquixi xi faharcun me Nina Nahmi naja ne, Hasen rë Nina cuisecoo rë me xi cjuaharcun me Nina cojo cjuaquixi. Ha cjuaquixi ta xuta xi cuatjin sahmi me ne, me vëhë xi meje rë Nina Nahmi naja xi cjuaharcun rë me. ²⁴ Nina ne, Hasen me. Hane xuta xi faharcun rë me ne, hatuxa meje rë xi Hasen rë Nina cuisecoo rë me xi cjuaharcun me Nina cojo cjuaquixi. —Cuatjin cachja Jesús.

²⁵ Hane chjuun jan ne, cuitjin cachja na cojo Jesús:

—Ngahan ne, ha hvë xi cuinduva Me xi Tsingatju Nina, me xi hmí rë Cristu. Hane hya xi cuinduva me vëhë ne, suacuenda naja me yëjë ni cjuatacun. —Cuatjin cachja na.

²⁶ Ngajan xi Jesús ne, cuitjin cachja me cojo rë na:

—Ngahan xi tichjá cojo nuju vi ne, ha ngahan xi nújun vë. —Cuatjin cachja me.

²⁷ Hane hora vëhë cavuya xuta ladu rë Jesús xi quiji jaha me comida. Hane jemu quijircun rë me xi cavëë me xi visiajmi Jesús cojo rë ngu chjuun. Peru hisca ngu me xi cuacun vë cavinenguisiin me cuitjin: “¿Mé xi meje nuju?” o “¿mé xi visiajmu cojo rë na?” Cuatjin camá. ²⁸ Chjuun jan ne, cavejña na nisa rë na, sehe cavuya quiji na nandya, hane cuitjin cachja na cojo xuta:

²⁹ —Nduvun cuanguen chutsejen ngu me xi cachja cojo ná yëjë xcusun xi casahme. ¿Hacuiin hacui me vëhë xi Tsingatju Nina? —Cuatjin cachja na.

³⁰ Hya xi camá ne, cavetju xuta quiji me cojo rë na hiscan quitahá Jesús. ³¹ Jinguyëjë rë ne, xuta ladu rë Jesús jan ne, cuitjin cachja me:

—Maestro, xinu niñu. —Cuatjin cachja me.

³² Peru Jesús ne, cuitjin cafayangui me:

—Ngahan ne, ha tjin xi sínë xi ngayun ne, hyúun mé jan. —Cuatjin cafayangui me.

³³ Ngajan xi xuta ladu rë Jesús jan ne, cuitjin cavinenguise xicjin me xingu xingu me:

—¿Há cuma cacun sa xi tjin yo xi cafehe cani xi cajinë me? —Cuatjin cavinenguise xicjin me.

³⁴ Hane Jesús ne, cuitjin cachja me cojo xuta ladu rë me jan:

—Jemu chuya rë xahesen naja xi chinë niñu. Peru ngahan ne, hitsë sa chuya rë xahesen naha xi sahme sacuatjin meje rë me xi catsingatju ná, hacuaha hitsë sa chuya rë xahesen naha xi tsinguínetaha xa xi casua ná me. ³⁵ Chja ngu cjua ta: “Chaja sa ñuju sá, sehe tjunihnga rë xitjé.” Peru ngahan cuichjá cojo nuju ta chutsujun xuta ta, tséhë xi tangun me cojo xitjé xi ha camacha, ha cuma tjunihnga rë. ³⁶ Me xi tivunihnga xitjé ne, ha tifaha me chji rë me, cuma cuinújan ne, tisahmi tangun me xuta xi sacú rë xuta xi cuacun vë cjuahñu xatsë. Cuatjin tijima cojo sa xi tangun cuiyujusua me xi vincha tjé cojo me xi vunihnga xitjé. ³⁷ Quixi cjua xi chja xi: “Hacjahi cha xi vincha tjé ne, hacjahi cha xi vunihnga xitjé.” ³⁸ Ngahan catsingátju nuju chunihngun xitjé hiscan xi hacuiin ngayun canihñu xa. Jingusa me casahmi me xa, hane ngayun cavisuhunjñu ngajñi rë xa rë me. —Cuatjin cachja Jesús cojo xuta ladu rë me.

³⁹ Jemu cjín xuta samaritano tséhë nandya jan camangu cacun me cojo Jesús, ngatsë rë cjua xi cachja chjuun jan cuitjin: “Cachja me cojo ná yëjë xcusun xi casahme.” ⁴⁰ Ngajan xi hya xi cafehe xuta samaritano ngajan hiscan quitahá Jesús ne, cachja xuta jan cojo rë me xi cjue cuejña me cojo rë me. Hane Jesús ne, quiji cavejña me jo nixtin cojo xuta xi cuacun jan. ⁴¹ Hane jemu cjín sa xuta xi camangu cacun me ngatsë rë cjua rë suvá Jesús.

⁴² Hane chjuun jan ne, cuitjin cachja xuta jan cojo rë na:

—Ha quihndé hacuiin ngatsë rë cjua riji xi mangutacuín ta, tséhë xi suvin canuhinyin cjua rë me, hane ngayin ne, hyin ta cjuaquixindaja xi me vihi xi cuaxëtje me xuta.
—Cuatjin cachja xuta jan.

Camandaja quihndi rë ngu xutaxa rë casahmi Jesús

⁴³ Xi cavatju jo nixtin jan ne, cavetju Jesús cojo xuta ladu rë me, qui ji me ngu nandya tséhë distritu Galilea. ⁴⁴ Ta suvá Jesús cachja me xi quixi xi xuta ne, faharcuaain me profeta xi tséhë nangui rë me. ⁴⁵ Véhë xi hya xi tivatju Jesús ngujo nandya tséhë distritu Galilea ne, ndaja cafahatsja xuta me ta, tséhë xi hacuaha cojo xuta jan qui ji me suhi ngajan Jerusalén, hane ngajan caveë me yéjë xcusun xi casahmi Jesús nixtin rë suhi jan.

⁴⁶ Hya xi camá ne, cavuya cafehe me Caná, ngu nandya tséhë distritu Galilea, hiscan xi casahmi me xi nandá ne, cavuya camá xan rë uva. Hane ngajan nandya Capernaum ne, cavéjña ngu xutaxa rë xi hmu rë cha quihndi rë me. ⁴⁷ Hane xi camachaya rë me xi cafehe Jesús ngajan Caná ne, cavetju me quijitjengui me Jesús. Hane xi cafehe me jan ne, cafehya me favor cojo Jesús xi cjue Jesús cojo rë me nangui rë me xi sahmi Jesús xi cumandaja quihndi rë me ta ha tu hora sa xi cueya. ⁴⁸ Ngajan xi Jesús ne, cachja me cuitjin cojo xutaxa rë jan:

—¡Ngayujun ni ngayun ne, sa xi chuun cjuarcun ne, cumanguaain camahani tacún cojo ná! —Cuatjin cachja Jesús.

⁴⁹ Ngajan xi xutaxa rë jan ne, cuitjin cafayangui me:

—Tatá, cuanguen sanii, chaja sa xi cueya quihndi naha. —Cuatjin cafayangui me.

⁵⁰ Hane Jesús ne, cuitjin cachja me:

—Cuma cuangun ta, quihndi nuju ne, jimandaja cha. —Cuatjin cachja Jesús.

Hya xi camá ne, xutaxa rë jan ne, camac Jain rë me cjua xi cachja Jesús, hane cavetju me qui ji me. ⁵¹ Hane ndiya cjui me ne, cavechútáha me ngujo cha mosu hndixahan rë me, hane cachja cha cojo rë me xi cha quihndi rë me ne, tijimandaja cha. ⁵² Ngajan xi xutaxa rë jan ne, cavinenguise me cojo cha hndixahan rë me jan mé hora cavetsihin camandaja cha hmu rë jan. Hane cha hndixahan rë me jan ne, cuitjin cachja cha:

—Ngujña fane ngu cavetjuxin chíhinsuë xi sahmi cojo cha. —Cuatjin cachja cha.

⁵³ Hane nahmi rë quihndi jan ne, ha vëe me ta hora vëhë xi cachja Jesús cojo rë me xi quihndi rë me ne, tijimandaja cha. Cuatjin camá xi xutaxa rë jan cojo yéjë xuta rë me ne, camangu cacun me cojo Jesús.

⁵⁴ Cuatjin camá xi, hya xi cavetju Jesús tséhë ladu rë distritu Judea hane cafehe me Caná, distritu Galilea ne, casahmi me cjuarcun xi majo xi casahmi me ngajan.

5

Ndava nandá xi hmí rë Betesda

¹ Xi cavatju nixtin xi cuacun vë ne, qui ji Jesús ngajan Jerusalén xi cjue me suhi xi cuma ngajan yungun xi matitjun.

² Quihndé ne, ngajan Jerusalén ne, tiña tingotjo Chu Tsángá ne, ngajan tacun ngu ndava nandá xi tjin rë hñú cahndé ngahma ndihya. Hane ndava nandá vëhë ne, xi hne hebreo ne, Betesda hmí rë. ³ Cahndé jan ne, jemu cjín xuta siuhmu me. Siu xuta rcá, siu xuta rengun, siu xuta xi quixlhñu yojo rë xi tacunya rë me xi cuiniya nandan ⁴ ta jiya hora jiya hora ne, finiya nandan ta ngu ángel ne, vijne tsiniya nandan jan. Sehe cha xi tjun cuisehen ne, marqui rë tséhë chíhín xi má rë. ⁵ Hane ngajñi rë xuta hmu rë xi cuacun jan ne, jiña ngu cha xi ha tjin rë can tyjuhunyan nu xi hmu rë cha. ⁶ Hane xi caveë Jesús xi cuatjin jiña cha hacuaha ha vëe me xi ha jemu tséë hmu rë cha ne, cavinenguise me cha cuitjin:

—¿Há meje nuju xi cuma ndaja ngayun? —Cuatjin cavinenguise Jesús.

⁷ Hane cha hmu rë jan ne, cuitjin cafayangui cha:

—Tatá, tsajin yo xi tsinguisehen ná ndava nandá hora xi finiya nandá. Jinguyéjë rë xi tifé tiña ne, hacjahi me xi ha cavisehen. —Cuatjin cafayangui cha.

⁸ Ngajan xi Jesús ne, cuitjin cachja me cojo cha:

—Tisatjunnungun, chjuhun nijña nuju, sehe tujyuhunyun. —Cuatjin cachja Jesús.

⁹ Cha vëhë ne, ha tu ñahñu camandaja cha, cafaha cha nijña rë cha, cavetsihin catsuyiyiha cha.

Nixtin vëhë ne, nixtin xi chjahájenda rë. ¹⁰ Ngajan xi xutaxa rë yungun ne, cachja me cojo cha xi camandaja jan cuitjin:

—Quihndë ne, nixtin xi chjahájenda rë. Ndajintjin xi cuatjin quichehe nijña riji.

—Cuatjin cachja me.

¹¹ Hane cha xi camandaja jan ne, cuitjin cafayangui cha:

—Me xi casahmi xi camandaja ngahan ne, me vëhë cachja me cojo ná xi cjuahá nijña na ha sehe tsujiyéhëya. —Cuatjin cachja cha.

¹² Ngajan xi xutaxa rë jan ne, cavinenguise nga me cuitjin:

—¿Hane yo xi cachja cojo ri xi chjehe nijña riji ne, sehe tujyihije? —Cuatjin cavinenguise me.

¹³ Peru cha xi camandaja jan ne, hvíin cha yo ta, tsëhë xi Jesús ne, cavetjuxin me tsëhë cahnđé vëhë, tsëhë xi jemu xutacjín quitsë me.

¹⁴ Hane xi cavatju vëhë ne, cavechútáha Jesús cha ngajan yungun xi matitjun, hane cachja me cojo cha cuitjin:

—Chutsujun ni, camandaja ngayun. Quihndë ne, xicavinechunyuun sa ndiya rë cjuatsehen, sa tu choho sa cuatjun cuma. —Cuatjin cachja Jesús cojo cha.

¹⁵ Sehe cavitju cha quiji cachja cha cojo xutaxa rë ta me xi casahmi xi camandaja cha ne, Jesús. ¹⁶ Vëhë xi xutaxa rë jan ne, tsujiyihiyatjengui me Jesús cojo cjuahngatacun ta, tsëhë xi casahmi Jesús xcusun vëhë nixtin xi chjahájenda rë. ¹⁷ Ngajan xi Jesús ne, cuitjin cachja me cojo xutaxa rë jan:

—Nahmi na ha ne, hisca quihndë tisahmi me xa, hacuaha ngahan ne, tisahme xa.

—Cuatjin cachja Jesús.

¹⁸ Ngatsë rë cjuahájenda ne, xutaxa rë jan ne, hitsë sa cavangui me chuva rë xi tsiquehen me Jesús. Cuatjin casahmi xutaxa rë ta, tsëhë xi hacuiin suvá ni cafaharcuaain Jesús nixtin xi chjahájenda rë ta hacuaha cachja me xi Nahmi rë me ne, Nina. Hane xi cuatjin cachja Jesús ne, tsingacun me xi tangun me cojo Nina.

Xa xi tjin rë Quihndi rë Nina

¹⁹ Ngajan xi Jesús ne, cuitjin cachja me cojo xutaxa rë xi cuacun jan:

—Cuichjá cojo nuju cjuauquixi ta ngahan xi Quihndi rë Nina ngahan ne, tsajin mé xi cuma sahme xi cojo cjuatacun na ha suva ta xi vutsején xi sahmi Nahmi na ha ne, vëhë xi sahme. Xcusun xi sahmi me vëhë ne, hacuaha xcusun vëhë sahme ngahan Quihndi rë me. ²⁰ Nahmi na ha ne, hmu cacun ná me, ngahan Quihndi rë me, hacuaha tsingacun ná me yëjë xcusun xi sahmi me. Hane xcusun xi sehe tsingacun ná me ne, hisca yehe sa xi cuma rë xcusun xi casahme xi camandaja cha hmu rë jan. Cuatjin cuma cojo sa xi ngayun ne, cjuercun nuju. ²¹ Sacuatjin faha Nahmi na ha nima sehe sua nga rë me cjuahñu ne, hacuanitjin ni ngahan Quihndi rë me ta suá rë cjuahñu yo xi meje suá rë. ²² Nahmi na ha ne, tsajin yo tsichuva me cojo cjuatacun rë ta ntsa ngahan cavejña me yëjë xa vëhë, ²³ cojo sa xi yëjë ni xuta ne, cjuaharcun me ngahan sacuatjin faharcun me Nahmi na ha. Yo xi cjuaharcuaain ná ngahan ne, faharcuaain rë Nahmi na ha, me xi catsingatju ná.

²⁴ 'Cuichjá cojo nuju cjuauquixi ta xuta xi vihndë me cjuahájenda me cojo rë Nina, me xi catsingatju ná ne, tjin rë me cjuahñu xatsë. Hacuaha cumachuvaain me cojo cjuatacun rë me ta sacuaha xi ha cahme me hacuaha ha casacu rë me cjuahñu xatsë. ²⁵ Cuichjá cojo nuju cjuauquixi ta cuechú nixtin o ha hisca cavechú nixtin xi xuta xi hndiin tsëhë Nina sacuaha nima ne, cuihndë me xta na ha, ngahan xi Quihndi rë Nina ngahan. Hane me xi cuihndë tsahan ne, sacú rë me cjuahñu xatsë.

²⁶ Cjuahñu xi tjin rë Nina ne, tsajin yo casua rë me, ta nduva tsëhë cjuandaja rë suva me. Hane hacuanitjin ná ngahan, ta casua ná cahndé xi hacuaha tjin ná cjuahñu tsëhë cjuandaja rë suvá. ²⁷ Hacuaha casua ná me xa xi tsichúva xuta cojo jyé rë me ta, tsëhë

xi ngahan ne, Quihndi rē Xuta Jain ngahan. ²⁸ Hacuiin cjuercun nuju tséhë cjua naha. Cuechú nixtin xi yéjé ni nima xi hincha cahntsua tsjun rē ne, cuihndë xta naha, ²⁹ sehe cuetju tséhë tsjun rē. Hane nima xi ndaja xcusun casahmi xcun cjuahñu rē ne, sacú rē cjuahñu xatsë. Hane nima xi choho xcusun casahmi ne, cuatju castigu. ³⁰ Ngahan ne, hatuxa tsajin mé xi sahme xi cojo cjuatacun naha suva ta, sacuatjin cjua xi víhndë xi chja Nahmi naha ne, cuatjin tsichúva xuta cojo cjuatacun rē me. Hane hatuxa quixi ngahan cojo cjuatacun naha ta, tséhë xi sahmee hacutjin xi meje ná suva ta sacuatjin xi meje rē Nahmi naha, me xi catsingatju ná ne, cuatjin xi sahme. —Cuatjin cachja Jesús.

Hacutjin cumachaya naja yo xi Jesucristu

³¹ Cjuinduju sa tichja Jesús cojo xutaxa rē yungun cuitjin:

—Sa xi ngahan cuichjá favor naha suva ne, cuinújun ta quixiin cjua xi chjá. ³² Peru tjin sa ngu xi tichja favor naha, hane hvé ta cjua xi chja me vöhë tsahan ne, cjuaquixi. ³³ Ngayun ne, caningatjun xuta quiyi cavinenguise rē me Juan ngu cjua, hane Juan ne, catsicuya me cjua xi cjuaquixi. ³⁴ Peru ngahan ne, me xi tichja me favor naha hacuiin xuta me, peru cjua xi tichjá vi ne, tichjá cojo sa xi ngayun ne, cuetjuntjun. ³⁵ Juan vë ne, sacuaha ngu ndihi xi setí xi sua hasen rē camá me. Hane ngayun ne, cachuya nuju tséhë xi cavinechun sua ngujo nixtin ngajñi rē cjuahasen rē Juan. ³⁶ Peru ngahan ne, tjin xcusun xi hitsé sa ndaja tsingacun yo ngahan xi cuma rē cjua xi cachja Juan tsahan. Xa xi casua Nahmi naha ngahan xi sahmechehen ne, cuma cuinújan ne, xa xi ha tisahme ne, suvá xa vöhë tsingacun xi Nahmi naha catsingatju ná me. ³⁷ Hacuaha Nahmi naha, me xi catsingatju ná ne, chja me favor naha. Ngayun ne, hisca xta rē me cjéé cuinuhuyun, hacuaha cjéé chun hacutjin jyihí me. ³⁸ Hisca cjua rē me ne, tsajin tetjo ngajñi rē cjuatacun nuju ta, tséhë xi ngahan xi catsingatju ná me vöhë ne, manguaain tacún cojo ná. ³⁹ Ngayun ne, jemu chutayun xujun rē Nina ta, tséhë xi ningatuhun tacún ta xi cuatjin chutayun ne, sacú nuju cjuahñu xatsë. Hane xujun vöhë ne, vöhë xi chja favor naha. ⁴⁰ Hane ngayun ne, mijí cuisuhun ladu naha xi sacú nuju cjuahñu xatsë.

⁴¹ 'Ngahan ne, hacuiin sahmi nguyé xi xuta sahmi jyé sahmi hnga ná me. ⁴² Hacuaha ngahan ne, ha hvé xcusun nuju ta tsajin cjuahmutacun rē Nina jiya cahntsua xahasen nuju. ⁴³ Ngahan ne, canduvá ta, tséhë xi Nahmi naha casuaxa ná me, peru ngayun ne, mijí chjuhunntsun ná. Hane sa xi jingu sa xuta cuinduva me cojo cjuatacun rē suvá me ne, ha hvé ta me vöhë ne, hatuxa chjuhunntsun me. ⁴⁴ Tsajin nixtin xi cumangu tacún cojo ná ngahan jinguyéjé rē xi tivinchun chuva rē xi ngajñi nuju cojo xingun ni ne, sahmi yehe sahmi hnga nuju me hane vinchunsuun xi Nina xi ngu tu tu ni ne, me vöhë sahmi yehe sahmi hnga nuju me. ⁴⁵ Xicaningatuun tacún xi ngahan cuíncha jyé nuju xcun Nahmi naha ta xutachanga naja Moisés, me xi jemu vetuhun tacun ne, me vöhë xi cuincha jyé nuju me. ⁴⁶ Sa xi camacjain nuju cjua xi catsihindu Moisés ne, hacuaha camacjain nuju cjua naha ta Moisés vë catsihindu me tsahan. ⁴⁷ Peru sa xi macjaain nuju cjua xi catsihindu Moisés ne, ¿hacutjin cumacjain nuju cjua xi chjá ngahan ni?

6

Catsicjen Jesucristu hñú mil xihin

¹ Xi cavatju yéjé xcusun vöhë ne, cavetju Jesús quiyi me ngunda vöhë tséhë laguna Galilea, xi hacuaha hmí rē laguna Tiberias. ² Hane jemu xutacjín camahani xi quijitjengui me Jesús ta, tséhë xi cavëé me cjuarcun xi casahmi Jesús cojo xuta hmu rē. ³ Hane Jesús ne, quijiniji me ngu ndetjún, hane ngajan cavéjña me cojo xuta ladu rē me. ⁴ Hane Pascua, suhi xi sahmi xuta tjé rē Israel ne, hacuaha ha camatiña. ⁵ Hane xi vutsejen Jesús xi jemu xuta cjín nduvatjengui rē me ne, sehe cachja me cojo Felipe cuitjin:

—¿Jani cuanguen chaan niñu xi siné xuta xi cuacun vë? —Cuatjin cachja Jesús.

⁶ Cuatjin cachja me xi cjuahachuva me Felipe ta, tséhë xi Jesús ne, ha vëë me mé xi sahmi me. ⁷ Ngajan xi Felipe ne, cuitjin cafayangui me:

—Sa xi chaan niñu cojo tujún xi chji rë xuta jo cientu nixtin ne, hisca chutaain xi sacú tsé tsé siné jima ngu xuta vë. —Cuatjin cafayangui Felipe.

⁸ Ngajan xi ngu xuta ladu rë Jesús, Andrés hntsé Simón Pedru ne, cuitjin cachja me cojo Jesús:

⁹ —Nguehe secun ngu cha lihndi xi yaha hñú niñu cojo jo chu ti. Peru ¿mé chutaha vë xi siné xuta xi cuarcumu cjin me? —Cuatjin cachja Andrés.

¹⁰ Ngajan xi Jesús ne, cuitjin cachja me:

—Tinújun cojo xuta vë ne, catiyuji me. —Cuatjin cachja me.

Quihndé ne, ngajan cahndé vëhë ne, jemu jyé cahndé tjin ndiji. Hya xi camá ne, ngajan cavyuju sacuha hñú mil xihin. ¹¹ Ngajan xi Jesús ne, cafaha me niñu jan, hane, xi cafë casua me nacuechji rë Nina ne, sehe cavatëcja me niñu jan ngajni rë xuta xi siu jan. Hacuanitjin ni casahmi me cojo chu ti jan. Casua me ha tucutjin xi meje siné xuta jan. ¹² Hane hya xi ha catsé rë xuta xi cajinë me ne, sehe cachja Jesús cojo xuta ladu rë me jan cuitjin:

—Quihndé ne, chjayun yëjë xi cavángui vë ne, cojo sa xi hacuiin chajá hisca hitsë.

—Cuatjin cachja Jesús.

¹³ Hane xi cafaya xuta ladu rë Jesús yëjë ni xi cavángui tséhë hñú niñu xi cajinë yëjë xutacjín jan ne, catsinguitsé me tejó chajne. ¹⁴ Hane xi cavëë xuta cjuarcun xi casahmi Jesús jan ne, cuitjin cachja me:

—Cjuaquixi xi me vihi profeta xi cuinduva ngasunhndé. —Cuatjin cachja xuta jan.

¹⁵ Peru Jesús ne, ha vëë me xi ha tu hora sa xi cjuaha xuta me cojo nguyjë camahani xi suaxa rë me xi cuma titjun me. Vëhë xi Jesús ne, cavetjuxin nga me, quiji suvá ni me hisca rcu ndetjún.

Quiji ntsacu Jesucristu xcun nandá

¹⁶ Quihndé ne, xi quiji hora jan ne, quijijne xuta ladu rë Jesús tjehen laguna. ¹⁷ Hane xi cavisehen me ngu barcu ne, cavuya canduva nga me ngunda vihi tséhë laguna xi cjue me nandya Capernaum. Hya xi camá ne, camajñu, peru Jesús ne, cjëë cjuetjengui me xuta ladu rë me jan. ¹⁸ Hane hora vëhë ne, xi jercu tu hñu camahani tivanga tjo ne, sacuha xi sexu nandá tséhë laguna jan. ¹⁹ Ha xcun xi ha quiji me xi cuacun jan cojo barcu sacuha hñú o sa jyun kilómetro xcun nandá jan ne, cavëë me xi nduva ntsacu Jesús xcun nandá, tisahmitiña me tséhë barcu. Hane xuta ladu rë me jan ne, catsacjun me camá. ²⁰ Peru Jesús ne, cachja me cuitjin cojo xuta ladu rë me jan:

—Ngahan vi. Xicarcuun. —Cuatjin cachja me.

²¹ Ngajan xi xuta ladu rë Jesús jan ne, cojo yëjë ni cjuasua ne, cafahatsja me Jesús cahntsua barcu. Hane ha tu ñahñu cafehe barcu cojo rë me nanguí quixí, cahndé hiscan cjui me.

Cavanguise xuta Jesús

²² Hane xi camá nchujun jan ne, xutacjín xi cavyuju ngunda vëhë tséhë laguna jan ne, catsinguitsjen me xi nguyjña ne, ngu tu tu barcu tacun jan. Hacuaha vëë me xi Jesús ne, quijiin me cojo xuta ladu rë me barcu vëhë ta suvá ni xuta ladu rë Jesús quiji me. ²³ Peru nguyo barcu xi canduva tséhë nandya Tiberias ne, cafehe tiña hiscan xi cajinë xutacjín jan niñu hora xi cafë casua Nai naja nacuechji rë Nina. ²⁴ Hane xi cavëë xutacjín jan xi hacuiin Jesús hacuiin xuta ladu rë me siu cuaha me jan ne, sehe cavisehen me barcu xi sehe cafehe jan, quiji me nandya Capernaum xi cuanguise me Jesús.

Jesucristu ne, sacuha niñu xi sua cjuahñu me

²⁵ Hane xi casacu rë xuta xi cuacun jan Jesús ngunda vihi tséhë laguna jan ne, cavinenguise me cuitjin:

—Maestro, ¿janihya canduvun nguehe ni? —Cuatjin cavinenguise xuta xi cuacun jan.

²⁶ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta ngayujun ni ngayun ne, nduvuntjengun ná, peru hacuiin ngatsé rë xi cahyun cjuarcun xi casahme ta ngatsé rë xi cachinu niñu jan hisca

xi catsë nuju. ²⁷ Nihñu ngatsë rë xichine, peru hacuiin xichine xi vetsun ta xichine xi hacuiin vetsun hacuaha hisca sua cjuahñu xatsë. Vëhë xichine xi suá nuju ngahan xi Quihndi rë Xuta Jain ngahan, ngahan xi sahme cjuarcun cojo sa xi cumatsejen xi cjuaquixi jain xi Nina Nahmi naha catsingatju ná me. —Cuatjin cafayangui Jesús.

²⁸ Ngajan xi xuta xi cuacun jan ne, cuitjin cavinenguise me cojo Jesús:

—¿Hacutjin ndatjin nihñi, cojo sa xi nihñi hacutjin xi chuya rë Nina? —Cuatjin cavinenguise xuta jan.

²⁹ Hane Jesús ne, cuitjin cafayangui me:

—Cuitjin meje rë Nina xi nihñu: catamangu tacún cojo ná, ngahan xi catsingatju ná me. —Cuatjin cafayangui Jesús.

³⁰ Ngajan xi xuta jan ne, cuitjin cavinenguise me Jesús:

—¿Mé cjuarcun nihñu xi sacú chutsijín, cojo sa xi cumangu tacuín cojo nuju? ¿Mé xi nihñu? ³¹ Yëjë ni xutachanga naja ne, cajinë me niñu xi camá cojo scuan maná ngajan ngu xín camahani tséhë nandya, sacuatjin camahindu xcun xujun rë Nina xi chja cuitjin: “Nina ne, tséhë ngahnga catsingatju me niñu xi cajinë xuta.” Cuatjin camahindu. —Vëhë cju xi cavinenguise xuta xi cuacun jan Jesús.

³² Ngajan xi Jesús ne, cuitjin cachja me cojo xuta jan:

—Cuichjá cojo nuju cjuaquixi ta hacuiin Moisés xi casua me niñu xi nduva tséhë ngahnga ta Nahmi naha xi sua nuju me niñu jain xi nduva tséhë ngahnga. ³³ Niñu xi sua Nina ne, vëhë niñu xi nduvajne tséhë ngahnga hacuaha sua rë xuta cjuahñu. —Cuatjin cachja Jesús.

³⁴ Hane xuta xi cuacun jan ne, cuitjin cafehya me cojo Jesús:

—Tatá, tuhun niji niñu vëhë nchunchujun ni. —Cuatjin cafehya xuta jan.

³⁵ Ngajan xi Jesús ne, cuitjin cachja me:

—Ngahan xi sacuaha niñu jan xi sua cjuahñu ngahan. Xuta xi cuisehen me ladu naha xi mangucacun me cojo ná ne, ña tsé rë xahasen rë me cjuandaja, sacuaha xi ha quihndë cumavajin rë me cumaxindaain rë me ngundiya nga. ³⁶ Ngahan ne, ha cachjá cojo nuju ta ha tichutsujun xcusun xi sahme Peru manguaain tacún cojo ná. ³⁷ Yëjë ni xuta xi Nahmi naha casua ná me ne, cuinduvatjengui ná me. Hane me xi cuinduvatjengui ná ne, hatuxa tsitjungueen me ta, ³⁸ tséhë xi ngahan ne, xi canduvajne tséhë ngahnga ne, hacuiin xi sahme sacuatjin xi meje ná ta sacuatjin xi meje rë me xi catsingatju ná. ³⁹ Hane me xi catsingatju ná vë ne, meje rë me xi hisca ngu xuta tséhë yëjë ni me xi casua ná me ne, tsichajan me ta tsicúya me cjuahñu nixtin xi chjaháchuva rë sa nima sa xuta cojo cjuatacun rë. ⁴⁰ Hacuaha Nahmi naha ne, meje rë me xi yëjë ni xuta xi vijnercu me yo ngahan xi Quihndi rë Nina ngahan hacuaha cumangu cacun me cojo ná ne, sacú rë me cjuahñu xatsë. Hane ngahan tsicúya me cjuahñu nixtin xi tsichuva Nina sa nima sa xuta. —Cuatjin cachja Jesús.

⁴¹ Vëhë xi xutaxa rë yungun xi cuacun jan ne, cavetsihin cavisiajmihma me tséhë Jesús ta, tséhë xi cachja Jesús ta: “Ngahan sacuaha niñu xi nduvajne tséhë ngahnga ngahan.”

⁴² Cuitjin cavisiajmihma me:

—¿Hacuiin cha Jesús vihi, xi quihndi rë José? ¿Hacuiin ha hyan nahmi rë cha hacuaha ha hyan naa rë cha? ¿Hacutjin má xi quihndë ne, chja cha xi tséhë ngahnga canduvajne cha ni? —Cuatjin cavisiajmihma me.

⁴³ Ngajan xi Jesús ne, cuitjin cachja me cojo xutaxa rë jan:

—Camá ni cuinújunhmú cojo xingun xingu xingu ngayun. ⁴⁴ Xuta xi cuma cuisehen me ladu naha ne, suvá ni xuta xi cuisecoo Nahmi naha, me xi catsingatju ná. Me vëhë xi cuma cuisehen me, hane ngahan tsicúya me cjuahñu nixtin xi tsichuva Nina sa nima sa xuta. ⁴⁵ Cuitjin camahindu xcun xujun rë Nina xi catsihindu profeta: “Suvá Nina scuxaha me cjuatacun rë yëjë ni xuta.” Cuatjin camahindu. Hane xuta xi vetaharcu cju rë Nina hacuaha Nina vuxaha me cjuatacun rë ne, visehen me ladu naha.

⁴⁶ ’Hacuiin xi ha tjin yo xi cavutsejen rë Nahmi naha ta suva ni ngahan xi tséhë Nina canduva ne, ngahan xi cahvë Nahmi naha. ⁴⁷ Cuichjá cojo nuju cjuaquixi ta yo

xi mangucacun cojo ná ne, tjin rë cjuahñu xatsë. ⁴⁸ Ngahan xi sacuha niñu xi sua cjuahñu ngahan. ⁴⁹ Yéjë ni xutachanga nuju ne, cajinë me niñu xi camá cojo scuan maná ngajan ngu xín camahani tséhë nandya, peru cavechú nixtin xi cahme me. ⁵⁰ Peru niñu xi nduvajne tséhë ngahnga xi chjá ngahan tséhë ne, sa xi yo sinë niñu vëhë ne, cueyaain. ⁵¹ Ngahan xi quicun ngahan ne, ngahan xi sacuha niñu xi canduvajne tséhë ngahnga jan ngahan. Sa xi ngu xuta sinë me niñu vëhë ne, handasa cueya me ne, peru hasen rë me ne, cjue xcun Nina. Niñu xi suá ngahan vë ne, hacui yojo naha xi suá cojo sa xi xuta ngasunhndë ne, sacú rë me cjuahñu xatsë. —Cuatjin cachja Jesús cojo xutaxa rë.

⁵² Hya xi camá ne, xutaxa rë jan ne, cavetsihin cavisiajmiçjan me tséhë Jesús ngajni rë me cojo xicjin me, cuitjin cachja me:

—¿Hacutjin cuma sua cha xi cuajyিhi vë yojo rë cha xi xinëë ni? —Cuatjin cachja xutaxa rë jan.

⁵³ Hane Jesús ne, cuitjin cachja me cojo xuta xi cuacun jan:

—Cuichjá cojo nuju cjuaquixi ta sa xi ngayun xinuu yojo naha ngahan xi Quihndi rë Xuta Jain ngahan hacuaha siuun jni naha ne, tsajin nuju cjuahñu xi cjuaquixi. ⁵⁴ Xuta xi jinë me yojo naha hacuaha hvi me jni naha ne, tjin rë me cjuahñu xatsë, hacuaha ngahan tsicuya me cjuahñu nixtin xi tsichuva Nina sa nima sa xuta. ⁵⁵ Cuatjin cuma ta, tséhë xi yojo naha ne, vëhë comida xi cjuaquixi, hane jni naha ne, vëhë nandá xi cjuaquixi. ⁵⁶ Me xi jinë yojo naha hacuaha hvi me jni naha ne, visehen me yojo naja, hacuaha ngahan ne, visehen yojo rë. ⁵⁷ Nahmi naha, me xi hatuxa tjin rë cjuahñu ne, catsingatju ná me, hane ngatsë rë me vëhë xi tejña cjuahñu ngahan. Ha chuva vëhë ni ne, xuta xi jinë ná ne, cuejña me cjuahñu ngatsë naha. ⁵⁸ Cuatjin sahmi niñu xi canduvajne tséhë ngahnga. Hacuiin tangun cojo niñu xi cajinë xutachanga nuju ta cavechú nixtin xi cahme me. Ha ndaja xuta xi sinë me niñu xi chjá ngahan ne, handasa cueya me ne, peru hasen rë me ne, cjue xcun Nina. ⁵⁹ —Cuatjin cachja Jesús hya xi cavicuya me xuta ngu yungun ngajan nandya Capernaum.

Cjua xi sua machaya naja tséhë cjuahñu xatsë

⁶⁰ Hya xi camá ne, jemu cjín xuta ladu rë Jesús xi cuitjin cachja me hya xi cahndë me cjua jan:

—¡Jemu chocho visiajmi me! ¡Scaain naja cojo cjua vëhë! —Cuatjin cachja me.

⁶¹ Peru Jesús ne, ha vëë me cojo cjuatacun rë me xi cuatjin visiajmihma xuta ladu rë me xi cuacun jan. Vëhë xi cachja me cuitjin:

—Sa xi meje cuetjunxun tséhë ndiya naha ngatsë rë cjua xi cachjá cojo nuju vë ne, ⁶² ¿mé ningatuhun tacún sa xi chutsujun xi cuya cjuéneje nga ngahnga hiscan xi cavitejña titjun, ngahan xi Quihndi rë Xuta Jain ngahan? ⁶³ Hasen rë Nina ne, vëhë xi sua cjuahñu. Peru ngu xuta ngasunhndë ne, hatuxa cumaji sahmi me cuatjin. Yéjë ni cjua xi ngahan cachjá cojo nuju ne, vëhë sua machaya nuju tséhë Hasen rë Nina cojo tséhë cjuahñu xi sua. ⁶⁴ Peru tjin yahnga ngayun xi manguaain tacún cojo ná. —Cuatjin cachja Jesús ta, tséhë xi hisca ntsacu cavetsihin ne, ha vëë me yo xuta xi cumanguaain cacun cojo rë me hacuaha ha vëë me yo xi sahmi rë me entregadu.

⁶⁵ Hacuaha cachja sa me cuitjin:

—Vëhë xi cuatjin cachjá cojo nuju xi xuta xi cuma cuisehen me ladu naha ne, suvá ni xuta xi cuichja Nahmi naha xi cuisehen. —Cuatjin cachja Jesús.

⁶⁶ Ngatsë rë vëhë xi jemu cjín xuta ladu rë Jesús ne, quiji ngaxtun me, hacuaha ha quihndë catsujiyiin me cojo Jesús. ⁶⁷ Ngajan xi Jesús ne, cavinenguise me xuta ladu rë me xi tejó jan cuitjin:

—¿Hacuiin cojo ngayun meje cuangunxun? —Cuatjin cavinenguise me.

⁶⁸ Hane Simón Pedru ne, cuitjin cafayangui me:

—Ngayun nai naha, ¿yo cuanguintjenguin?, ta ngayun ne, tjin nuju cjua xi sua machaya niji tséhë cjuahñu xatsë. ⁶⁹ Hacuaha ngayin ne, mangutacuín cojo nuju hacuaha hyin xi tséhë jain Nina ngayun. —Cuatjin cafayangui Simón Pedru.

⁷⁰ Ngajan xi Jesús ne, cuitjin cachja me:

—Handasa ngahan suva cavaxejen nuju ngayujun ni xi tejó ngayun, peru ngajñi nuju ne, jiayjñi ngu xi ha jiya xitsehan xahasen rë. —Cuatjin cachja Jesús.

⁷¹ Jesús ne, tichja me tséhë ngu cha tséhë ngajñi rë xi tejó xuta ladu rë me, ngu cha xi hmí rë Judas, quihndi rë Simón Iscariote. Cuatjin cachja me ta, tséhë xi cha vëhë sahmi cha me entregadu cojo condra rë me.

7

Jesucristu cojo xicjin me

¹ Xi cavatju vëhë ne, catsuyihiya Jesús ngupo nandya tséhë distritu Galilea. Mijí tsuyihiya me nandya xi siu ladu tséhë distritu Judea ta, tséhë xi xutaxa rë yungun ne, tivanguise me Jesús xi tsiquehen me. ² Quihndé ne, ha camatiña suhi tséhë Ndihya Tsjian, suhi xi sahmi xuta tjë rë Israel. ³ Ngajan xi me xi xicjin Jesús jan ne, cuitjin cachja me cojo Jesús:

—Tihin ngajan distritu Judea, cojo sa xi hacuaha cojo xuta ladu riji xi siu jan ne, scuëë me xcusun xi nihñi ta ⁴ tséhë xi ngu cha xi meje rë xi cumachaya rë xuta xcusun xi sahmi cha ne, hacuiin táha hma sahmi cha. Ngaye ta cuatjin jemu nihñi cjuandaja ne, ningacuin rë yéjë xuta cjuandaja vëhë. —Cuatjin cachja xicjin Jesús cojo rë me ta, ⁵ tséhë xi me xi cuacun vë ne, camanguaain cacun me cojo Jesús.

⁶ Ngajan xi Jesús ne, cuitjin cafayangui me:

—Cjëë cuechú nixtin xi sahme mé xi sahme. Peru ngayun ne, tu mé ni nixtin ne, ndatjin xi cuma nuju. ⁷ Ngayun ne, cumaji chocho scuëë nuju xuta, peru ngahan ne, chocho vëë ná me ta, tséhë xi ngahan ne, chjá cjuaquixi xi xcusun xi sahmi me ne, hatuxa tsehen.

⁸ Tángun ni ngayun ta ngahan ne, cjueen suhi vëhë. Cjueen ta cjëë cuetjucaa nixtin xi sahme mé xi sahme. —Cuatjin cafayangui Jesús.

⁹ Xi cavatju cachja me cojo xicjin me cjua vëhë ne, cavéjña ni me nangui rë me.

Quiji Jesucristu suhi tséhë Ndihya Tsjian

¹⁰ Hane xi cavatju quiji xicjin Jesús suhi jan ne, hacuaha cojo Jesús quiji me. Peru hacuiin táha tsejen ta sacuaha xi táha hma quiji me. ¹¹ Hya xi camá ne, xutaxa rë yungun jan ne, cavanguise me Jesús hiscan jima suhi jan. Cuitjin cavinenguise me:

—Jani tacun cha vëhë? —Cuatjin cavinenguise me.

¹² Hane xutacjín jan ne, jercu visiajmihma me ngajñi rë me tséhë Jesús. Ngujo me ne, cuitjin cachja me:

—Ngu xuta ndaja me. —Cuatjin cachja me.

Peru ngupo nga xuta ne, cuitjin cachja me:

—Jéya, vindacha cha xutacjín! —Cuatjin cachja me.

¹³ Peru tsajin hisca ngu xuta xi cachjatë me tséhë Jesús ta, tséhë xi tsacjun me xutaxa rë yungun.

¹⁴ Quihndé ne, hya xi camavasen tijima suhi jan ne, quiji Jesús yungun xi matitjun, sehe cavetsihin cavicuya me xuta cjua rë Nina. ¹⁵ Hane xutaxa rë yungun jan ne, quijircun rë me xi cuatjin jemu ndaja chja Jesús. Cuitjin cachja me ngajñi rë me cojo xicjin me:

—¿Hacutjin má xi cuarcu vechú cjuatacun rë cha vë xi hisca hacuiin cavutaya cha?

—Cuatjin cachja me.

¹⁶ Ngajan xi Jesús ne, cuitjin cachja me cojo xutaxa rë xi cuacun jan:

—Cjua xi vicuyá rë xuta ne, hacuiin cjua nahá suva ta cjua rë me xi catsingatju ná.

¹⁷ Sa xi ngu xuta meje sahmi me sacuatjin xi meje rë me xi catsingatju ná ne, ngajan sacú cumachaya rë me tséhë cjua xi vicuyá, ¿há xi tséhë Nina ne? o ¿há xi nduva tséhë cjuatacun nahá suva? ¹⁸ Xuta xi chja me cjua xi nduva tséhë cjuatacun rë suvá me ne, meje sahmi jyé sahmi hnga suvá me yojo rë me. Peru xuta xi meje sahmi jyé sahmi hnga me me xi catsingatju rë me ne, me vëhë ne, quixi me cojo cjua rë me hacuaha tsajin cjuatsehan cahntsua xahasen rë me.

¹⁹ Moisés ne, casua nuju me ley rë Nina, peru hisca ngu ngayun nihñuchuun sacuatjin chja ley vëhë. ¡Tséhë vëhë rë xi meje nicuhun ná! —Cuatjin cachja Jesús.

²⁰ Ngajan xi xutacjín jan ne, cuitjin cafayangui me:

—¿Yo xitsehen xi cachja cojo nuju? ta nguehe ne, tsajin yo xi meje tsiquehen nuju.
—Cuatjin cafayangui xutacjín jan.

²¹ Hane xi cafayangui Jesús ne, cuitjin cachja me:

—Ngayujun ni ngayun ne, quijircun nuju ngatsë rë ngu xcusun xi casahme nixtin xi chjahájenda rë. ²² Peru suvá Moisés hacuaha cavejña me xcusun xi xtí chuxin rë quihndi xihin. (Xi cjuaquixi ne, hacuiin Moisés ta xutachanga nuju xi cavejña me xcusun vëhë.) Hane vëhë xi ngayun ne, vichun chuxin rë quihndi xihin handasa nixtin xi chjahájenda rë. ²³ Sa xi vichun chuxin rë quihndi xihin nixtin xi chjahájenda rë cojo sa xi nihñuchuhun sacuatjin cjua xi chja ley rë Moisés ne, ¿mé má cuatjin ma cjan nuju cojo ná xi casahme xi camandaja camahani ngu xuta nixtin xi chjahájenda rë ni? ²⁴ Ha quihndë hacuiin tujyë nichuvun ná ta nichuvun ná cojo ngu cjuatacun xi cjuaquixi. —Cuatjin cachja Jesús.

¿Jani hiscan canduva Jesucristu?

²⁵ Ngajan xi ngujo xuta nandya Jerusalén ne, cuitjin cachja me ngajñi rë me:

—¿Hacuiin me vihi xi vinchise rë xi cueya ni? ²⁶ Peru chutsujun ta cuajyঃhi me secun me tichja tichja me cojo xuta, hane ndastu ngu cjua chja xutaxa rë cojo rë me. ¡Hyaan sa xi vëendaja xutaxa rë xi me vihi xi catsingatju jain Nina me! ²⁷ Me vihi ne, ha hyan jani canduva me, peru hya xi cuinduva me xi Nina tsingatju rë ne, tsajin yo vëe jani cuetju me cuinduva me. —Cuatjin cachja xuta xi cuacun jan.

²⁸ Ngajan xi Jesús ne, xi quijinduju sa cavicuya me xuta ngajan yungun xi matitjun ne, jercu hñu cachja me cuitjin:

—¿Há quixi xi hyun ná hacuaha hyun jani canduva? Peru ngahan ne, hacuiin cjuatacun naha suva xi canduva. Me xi catsingatju ná ne, hatuxa quixi me cojo cjua rë me, peru ngayun ne, hyúun me. ²⁹ Ngahan ne, hvë me ta, tséhë xi hiscan tacun me ne, ngajan canduvá. Hacuaha me vëhë catsingatju ná me. —Cuatjin cachja Jesús.

³⁰ Tséhë xi cuatjin cachja Jesús cjua vëhë ne, vëhë xi meje cjuaha xuta xi cuacun jan me. Peru tsajin yo xi cavetahatsja rë me ta, tséhë xi cjëe cuetjucaa nixtin xi cuatjin cuma.

³¹ Hane jemu cjín xuta ngajñi rë xutacjín jan ne, camangu cacun me cojo Jesús. Cuitjin cachja me:

—Hya xi cuinduva me xi Nina tsingatju rë ne, ¿há hitsë sa cjín cjuarcun sahmi me xi cuma rë cjuarcun xi casahmi me vihi? —Cuatjin cachja xuta xi cuacun jan.

Catsingatju xutaxa rë yungun cha xi cjuaha rë Jesucristu

³² Hane ngujo cha fariseo ne, cahndë cha xi visiajmihma xutacjín jan ngajñi rë me cojo xicjin me cjua vëhë. Ngajan xi yéjë ni nahmi xi matitjun cojo cha fariseo jan ne, catsingatju me mayu cojo nisë rë cha xi chjahá rë Jesús. ³³ Hane Jesús ne, cuitjin cachja me:

—Ngujo nixtin sa xi cuitejña cojo nuju, sehe cúya cjué nga hiscan tacun me xi catsingatju ná. ³⁴ Ngayun ne, cuinchunsun ná, peru sacuiin nuju ngahan ta, tséhë xi hiscan xi cuitejña ne, cumaji cuangun. —Cuatjin cachja Jesús.

³⁵ Ngajan xi xutaxa rë jan ne, cavinenguise xicjin me cuitjin:

—¿Jani cjue cha xi cuijyঃhi vi xi sacuiin naja cha? ¿Há cjue cha ngu nangui cjin, cjue tjengui cha xuta naja xi cavitsojo ngajñi rë xutaxín hane ngajan cuicuya cha xutaxín jan ni? ³⁶ ¿Mé vijne cjua xi chja cha xi cuinchaseen cha ne, sacuiin naja cha, tséhë xi hiscan cuejña cha ne, cumaji cuanguen? —Cuatjin cavinenguise xicjin xutaxa rë jan.

Nandá xi sua cjuahñu

³⁷ Quihndë ne, nixtin xi cajnetaha suhi jan ne, vëhë nixtin jyë tséhë suhi jan. Hane casecun Jesús cachjahñu me cojo xuta cuitjin:

—Sa xi tjin yo xi xinda rë ne, catinduva tjengui ná catihi. ³⁸ Xuta xi mangucacun me cojo ná ne, cuatju me sacuatjin chja xujun rë Nina xi chja cuitjin: “Cuetju tséhë xahasen rë me sacuaha nandá xi ña vangatë xi sua rë me cjuahñu xatsë.” —Cuatjin cachjahñu Jesús.

³⁹ Xi cuatjin cachja Jesús ne, cachja me tséhë Hasen rë Nina xi sehe sacú rë xuta xi mangucacun me cojo Jesús. Cuatjin cachja Jesús ta, tséhë xi Nina ne, cjéé sua me Hasen rë me, tséhë xi Jesús ne, cjéé cuma jyé cuma hnga me cojo Hasen rë me.

Hacuiin ngu ni cjuatacun catsingataha cacun xutacjín

⁴⁰ Hane xi cahndë xutacjín jan cjua vëhë ne, ngujo me ne, cuitjin cachja me:

—Me vëhë ne, cjuaquixi xi me vëhë profeta xi jemu nechanyan rë. —Cuatjin cachja ngujo me.

⁴¹ Hane ngujo nga me ne, cuitjin cachja me:

—Me vëhë xi Tsingatju Nina. —Cuatjin cachja me.

Peru ngujo nga me ne, cachja me cuitjin:

—¡Peru Me xi Tsingatju Nina ne, hacuiin ngajñi rë xuta Galilea cuetjuyñi me! ⁴² ¡Ha hyan xi xujun rë Nina ne, chja ta Me xi Tsingatju Nina ne, cuinduva me tséhë tjë rë xutachanga naja David, ngajan Belén hiscan nangui rë David! —Cuatjin cachja me xi cuacun jan.

⁴³ Cuatjin camá xi ngatsë rë Jesús ne, hacuiin ngu ni cjuatacun catsingataha cacun xutacjín jan. ⁴⁴ Vëhë xi ngujo xuta jan ne, meje cjuaha me Jesús cjuecojo me ndavaya. Peru tsajin yo xi cavetahatsja rë me.

Camanguaain cacun xutaxa rë cojo Jesucristu

⁴⁵ Hya xi camá ne, mayu cojo nisë rë cha ne, cavuya qui ji nga cha xcun nahmi xi matitjun cojo xcun cha fariseo xi cuacun jan, hane xutaxa rë xi cuacun jan ne, cuitjin cachja me cojo mayu jan:

—¿Mé má canduvuun cojo cha? —Cuatjin cachja me.

⁴⁶ Ngajan xi cha mayu cojo nisë rë cha jan ne, cuitjin cafayangui cha:

—¡Cjéé camahani cuinuhuyin xi chja ngu xuta sacuatjin chja me vëhë! —Cuatjin cafayangui cha.

⁴⁷ Hane cha fariseo jan ne, cuitjin cachja cha cojo cha xi cuacun jan:

—¡Tu ma rë sa xi cojo ngayun camandacha ngayun! ⁴⁸ ¡Ngayun ne, hyun ta hisca ngu xutaxa rë, hisca xi ngu xuta fariseo ne, cjéé cumangu cacun me cojo cha xi cuajyihí vë!

⁴⁹ Peru xutacjín xi cuacun hisca hvíin hacutjin chja ley rë Moisés ne, ¡mijí rë Nina me! —Cuatjin cachja cha fariseo jan.

⁵⁰ Ngajan xi ngu cha fariseo xi hmí rë Nicodemo, cha xi qui ji tjengui rë Jesús hatsëë ne, cuitjin cachja cha cojo cha xi cuacun vëhë:

⁵¹ —Chja ley naja ta cumaji nihñña castigu ngu xuta xi cjéé cuinuhyan mé cuichja me hacuaha sacú naja cjuaquixi mé casahmi me. —Cuatjin cachja cha Nicodemo.

⁵² Ngajan xi cha fariseo xi cuacun jan ne, cuitjin cafayangui cha:

—¿Hacuaha cojo ngayun má ngayun xuta rë distritu rë Galilea ni? Chutayun xujun rë Nina ne, sehe ngajan sacú cumachaya nuju ta ngajan Galilea ne, cuetjinjñii hisca ngu profeta. —Cuatjin cafayangui cha fariseo xi cuacun jan.

Chjuun xi cachjahá rë xcun cjuatsehen xi tisahmi

⁵³ Hya xi camá ne, jima ngu xuta jan cafe me ndava me.

¹ Peru Jesús ne, cavetju me qui ji me ndetjún Olivu. ² Hane xi casahasen camá nchujun jan ne, cavuya qui ji nga Jesús ndatsen yungun xi matitjun. Hane yéjé xuta jan ne, casahmitiña me tséhë Jesús. Hane xi qui ji cavéjñña Jesús ne, sehe cavetsihin cavicuya me xuta jan. ³ Ngajan xi ngujo cha vicuya cjuachacun cojo ngujo cha fariseo ne, cafehecojo cha ngu chjuun xi cachjahá rë na xcun cjuatsehen xi tisahmi na cojo ngu xihin xi hacuiin

xihin rë na. Hane cha xi cuacun jan ne, qui ji cavise cun cha na ngajñi rë xuta hiscan tacun Jesús,⁴ sehe cachja cha cojo Jesús cuitjin:

—Maestro, chjuun vihi ne, cachjahá rë na xcun cjuatsehen xi tisahmi na cojo ngu xihin xi hacuiin xihin rë na.⁵ Quihndë ne, xcun ley xi cavejña naja Moisés ne, cavitexa me xi tu yo ni xuta xi sahmi xcusun vëhë ne, cueya me cojo ndyojo. Ngayun ne, ¿mé xi cuinújun?⁶ —Cuatjin cavinenguise cha xi cuacun vëhë, xi tifahachuva cha Jesús, cojo sa xi sacú rë cha chuva rë xi cuinchajyé cha me.

Ngajan xi Jesús ne, catsiquindi me yojo rë me, sehe cavetsihin catsihindu me nangui cojo rcutsja me.⁷ Hane tsëhë xi cjuinduju sa tivinenguise cha xi cuacun jan Jesús ne, catsinguixi me yojo rë me, sehe cachja me cojo cha cuitjin:

—Tu jarë ni ngayun xi tsajin jyé nuju ne, ngayun tjun tjun tetuhun rë na ndyojo.
—Cuatjin cachja Jesús.

⁸ Hane sehe catsiquindi nga me yojo rë me, hane catsihindu sa me nangui. ⁹ Hane xi cahndë cha xi cuacun jan xi cuatjin cachja Jesús ne, ta vëe me xi hacuiin tyjahi cjuatacun rë me, chuva ngu chuva ngu cha cavetju cha cafe cha. Cavetsihin cavetju tjun tjun cha xi hitsë sa changá. Hane camá suvá sa Jesús, cojo chjuun xi secun ngajñi rë xutacjín jan.

¹⁰ Hane xi catsinguixi me yojo rë me ne, cavinenguise me chjuun jan cuitjin:

—Ngayun chjuun, ¿jarë me ne? ¿Há tsajin yo xi casahmi nuju castigu? —Cuatjin cavinenguise Jesús.

¹¹ Ngajan xi chjuun jan ne, cuitjin cafayangui na:

—Tsajin yo, tatá. —Cuatjin cafayangui na.

Ngajan xi Jesús ne, cuitjin cachja me:

—Ngahan ne, hacuaha sahmee nuju castigu. Cuma cuangun, peru ha quihndë xicanihñuu sa cjuatsehen. —Cuatjin cachja Jesús.

Jesucristu ne, sacuaha hasen xi cuma rë xuta

¹² Hya xi camá ne, cachja nga Jesús cojo xutacjín jan cuitjin:

—Ngahan ne, sacuaha hasen xi cuma rë xuta ngasunhndë ngahan. Xuta xi cuisehen me ladu naha ne, hatuxa cuiyijin me ngajñi jñú ta ngajñi hasen xi sua cjuahñu xatsë cuiyuju me. —Cuatjin cachja Jesús.

¹³ Ngajan xi cha fariseo xi cuacun jan ne, cuitjin cachja cha cojo Jesús:

—Ngayun ne, tinújun favor nuju suvun. Vëhë xi cjua xi nujun ne, tsajin rë cjuaquixi.
—Cuatjin cachja cha.

¹⁴ Hane xi cafayangui Jesús ne, cuitjin cachja me:

—Handasa chjá favor naha suva ne, cjua xi chjá ne, cjuaquixi ta, tsëhë xi ngahan ne, hvë jani canduva hacuaha hvë jani cuya cjué nga. Peru ngayun ne, hyúun jani canduva hacuaha hyúun jani cuya cjué nga.¹⁵ Ngayun ne, xi nichuvun xuta cojo cjuatacun rë me ne, chuva xi tsingatahacacun xuta ngasunhndë ne, cuatjin ningatuhuntacún. Ngahan ne, titsichuvaan hisca ngu xuta cojo cjuatacun rë me.¹⁶ Peru sa xi tsichúva ngu xuta ne, hatuxa cjuaquixi cjua xi cuichjá ta, tsëhë xi hacuiin suva sahme ta ngahan cojo me xi catsingatju ná nihñi tangun.¹⁷ Xcun ley xi vitexa nuju ne, hacuaha camahindu xi hya xi jo xuta sua me cjuaquixi rë me xcun xutaxa rë hane ngu tangun ni cjua chja me ne, cjuaquixi cjua xi chja me.¹⁸ Ngahan xi chjá favor naha suva, hane Nahmi naha xi catsingatju ná me ne, hacuaha cojo me chja me favor naha. —Cuatjin cafayangui Jesús.

¹⁹ Ngajan xi cha fariseo jan ne, cuitjin cavinenguise cha Jesús:

—¿Jani tacun nahmi nuju ni? —Cuatjin cavinenguise cha.

Hane Jesús ne, cuitjin cafayangui me:

—Hacuiin ngahan hyun ná ne, hacuiin Nahmi naha hyun me. Sa xi ngahan hyun ná ne, hacuaha hyun Nahmi naha. —Cuatjin cafayangui Jesús.

²⁰ Cjua vëhë ne, cachja Jesús hya xi tivicuya me xuta ngajan yungun xi matitjun, ngu ndihya hiscan xi siu alcancía. Peru hisca ngu xuta cafaain rë me, tsëhë xi cjéé cuetjucaa nixtin xi cuatjin cuma.

“Cumaji cuangun hiscan xi cjué”, chja Jesucristu

²¹ Hya xi camá ne, quijinduju sa cachja Jesús cojo xuta cuitjin:

—Ngahan ne, cuétju cjué, hane ngayun ne, cuinchunsun ná. Peru ngatsë rë cjuatsehen xi cún ngayun ne, cuechuun xcun Nina hya xi cueyun. Hiscan xi cjué ne, ngayun ne, cumaji cuangun. —Cuatjin cachja Jesús.

²² Ngajan xi xutaxa rë xi cuacun jan ne, cuitjin cachja me ngajñi rë me cojo xicjin me:

—Tu ma rë sa xi cjue tsiquehen suvá me yoho rë me xi cuatjin chja me xi hiscan cjue me ne, cumaji cuanguen. —Cuatjin cachja xutaxa rë xi cuacun jan.

²³ Ngajan xi Jesús ne, cuitjin cachja me cojo me xi cuacun vë:

—Ngayun ne, tséhë nguehe nangui ngayun. Ngahan ne, tséhë ngahnga ngahan. Ngayun ne, tséhë ngasunhndë vihi ngayun. Ngahan ne, hacuiin tséhë ngasunhndë vihi ngahan. ²⁴ Véhë xi cuatjin cachjá cojo nuju xi ngatsë rë cjuatsehen xi cún ngayun ne, cuechuun xcun Nina hya xi cueyun. Sa xi macjaain nuju xi Ngahan Vi, hmí ná ne, ngatsë rë cjuatsehen xi cún ngayun ne, cuechuun xcun Nina hya xi cueyun. —Cuatjin cachja Jesús.

²⁵ Ngajan xi xuta xi cuacun jan ne, cavinenguise me Jesús cuitjin:

—¿Yo ngayun ni? —Cuatjin cavinenguise me.

Hane Jesús ne, cuitjin cachja me:

—¡Sacuatjin cachjá cojo nuju hisca ntsacu cavetsihin! ²⁶ Jemu tjin ná cjua xi cuichjá tsujun, hacuaha jemu tjin xi cjuaháchuva tsujun. Peru me xi catsingatju ná ne, quixi Jain me cojo cjua rë me, hane ngahan ne, cjua xi cahndë xi cachja me ne, cjua véhë xi chjá nguehe ngasunhndë. —Cuatjin cachja Jesús.

²⁷ Peru xutaxa rë xi cuacun jan ne, cajnii rcu me xi Jesús ne, tséhë Nina Nahmi naja xi tichja me. ²⁸ Véhë xi Jesús ne, cuitjin cachja me:

—Hya xi ngayun chjunihngun ná ngahan xi Quihndi rë Xuta Jain ngahan ne, hya cuijne rcun xi Ngahan Vi hmí ná. Hane ngahan ne, hatuxa tsajin mé xi sahme xi cojo cjuatacun na ha suva ta sacuaha cjua xi cachja Nahmi na ha cojo ná ne, cjua véhë xi chjá. ²⁹ Hacuaha me xi catsingatju ná ne, tacun me cojo ná, cavejñaaí ná me xi suva ta, tséhë xi ngahan ne, hatuxa sahme tutjin xi chuya rë me. —Cuatjin cachja Jesús.

³⁰ Hane xi cachja Jesús cjua véhë ne, jemu cjín xuta camangu cacun me cojo rë me.

Cuéhendaya naja cjuaquixi

³¹ Ngajan xi Jesús ne, cachja me cuitjin cojo xutaxa rë yungun xi camacjain rë tséhë cjua rë me:

—Sa xi ngayun cuangun nduju xi quitahá rcun cjua na ha ne, quixi xi ha camá ngayun xuta ladu na ha. ³² Hacuaha cuijne rcun xi hmí rë cjuaquixi, hane cjuaquixi jan ne, cuéhendaya nuju. —Cuatjin cachja Jesús.

³³ Ngajan xi xutaxa rë xi cuacun jan ne, cuitjin cafayangui me:

—Peru ngayaan ne, tjé rë xutachanga naja Abraham má ngayaan, hane cjëë camahani cuma ngayaan mosu hndixahan rë xuta. ¿Mé má nýjun xi cumandaya ngayin? —Cuatjin cafayangui me.

³⁴ Hane Jesús ne, cuitjin cafayangui me:

—Cuichjá cojo nuju cjuaquixi ta yéjé ni xuta xi hincha me ndiya rë cjuatsehen ne, hatuxa tjinhñu me cojo cjuatsehen sacuatjin tjinhñu ngu mosu hndixahan cojo nai rë.

³⁵ Ngu mosu hndixahan ne, hacuiin hatuxa cuiyujucahndë ngajñi xuta xi ndava, peru ngu quihndi xi cjuaquixi ne, hatuxa tséhë xuta xi ndava. ³⁶ Véhë xi sa xi Quihndi rë Nina cuéhendaya nuju ne, cumandaya Jain ngayun cojo cjuaquixi. ³⁷ Ngahan ne, hacuaha hvë xi tjé rë Abraham má ngayun. Peru ngayun ne, tivinchun chuva rë xi nicuhun ná, tséhë xi tuun cahndé xi cuisehen cjua na ha cahntsua xahesen nuju. ³⁸ Ngahan ne, xcusun xi cahvë hiscan tacun Nahmi na ha ne, tséhë véhë xi tichjá. Peru ngayun ne, sacuatjin canuhyun xi cachja nahmi nuju ne, cuatjin tinihñu. —Cuatjin cafayangui Jesús.

³⁹ Ngajan xi xutaxa rë xi cuacun jan ne, cuitjin cachja me:

—Nahmi niji ne, hacui xutachanga naja Abraham. —Cuatjin cachja me.

Ngajan xi Jesús ne, cuitjin cachja me:

—Sa xi quixi xi quihndi rë Abraham má ngayun ne, sacuatjin casahmi Abraham ne, hacuaha cuatjin nihñu. ⁴⁰ Ngahan ne, cachjá cojo nuju cjuaquixi xi cahndë xi cachja Nina, peru quihndë ne, tivinchun chuva rë xi nicuhun ná. Xutachanga naja Abraham ne, casahmii me cuatjin. ⁴¹ Ngayun ne, sacuatjin casahmi nahmi nuju ne, hacuanitjin ni tiniñu. —Cuatjin cachja Jesús.

Ngajan xi xutaxa rë xi cuacun jan ne, cachja me cuitjin:

—Ngayin ne, hacuiin quihndi xca ngayin. Nina ne, ngu ni me vëhë xi Nahmi niji.

—Cuatjin cachja xutaxa rë xi cuacun jan.

⁴² Hane Jesús ne, cuitjin cachja me:

—Sa xi quixi xi Nahmi nuju Nina ne, hacuaha canihñu hmu tacún ná ta, tsëhë xi ngahan ne, Nina catsingatju ná me, hane quihndë ne, nguehe tejña. Ngahan ne, hacuiin cjuatacun na ha suva xi canduvá ta me vëhë catsingatju ná me. ⁴³ ¿Mé má vijnii rcun cjua xi chjá? Cuatjin vijnii rcun ta, tsëhë xi caain nuju visiñuju cjua na ha. ⁴⁴ Ngayun ne, quihndi rë nahmi nuju Satanás ngayun, hane xcusun xi meje rë nahmi nuju ne, xcusun vëhë xi meje nihñu. Xitsehen xi matitjun vë ne, hisca ntsacu cavetsihin ne, hatuxa tsiquehen vë xuta. Hatuxa tsajin jiya vë ngajni rë cjuaquixi ta, tsëhë xi tsajin cjuaquixi ngajni rë cjuatacun rë. Hya xi chja xitsehen vë cjuandacha ne, chja sacuatjin xcusun rë suvá ta, tsëhë xi hatuxa ndacha, hacuaha nahmi rë yéjë ni cjuandacha. ⁴⁵ Peru ngahan ne, tsëhë xi chjá cjuaquixi ne, vëhë xi macjaain nuju ngahan. ⁴⁶ ¿Jarë ngayun xi cuma ninguijun xi ngahan ne, tjin jyé na ha? Sa xi chjá xi cjuaquixi ne, ¿má má macjaain nuju ngahan? ⁴⁷ Me xi tsëhë Jain Nina ne, vetaharcu me cjua rë Nina. Ngayun ne, tsëhë xi hacuiin tsëhë Nina ngayun ne, vëhë xi mijí cuetuhunrcun cjua rë me. —Cuatjin cachja Jesús.

Ngahan Vi hmí rë Jesucristu hisca chaja sa xi tsin Abraham

⁴⁸ Hane xutaxa rë xi cuacun jan ne, cuitjin cachja me cojo Jesús:

—¡Hatuxa cjuaquixi xi nujin hya xi nujin xi ngayun ne, ngu xuta samaritano ngayun hacuaha jiya xitsehen xahasen nuju! —Cuatjin cachja xutaxa rë jan.

⁴⁹ Ngajan xi Jesús ne, cuitjin cafayangui me:

—Tsajin xitsehen xahasen na ha. Ngahan ne, fahárcun Nahmi na ha, hane ngayun ne, choho nujun tsahan. ⁵⁰ Hacuaha mijí sahme jyé sahme hnga suva yojo na ha. Tjin ngu me xi meje sahmi jyé sahmi hnga ná, hane me vëhë ne, tsichuva naja me cojo cjuatacun naja. ⁵¹ Cuijchjá cojo nuju cjuaquixi ta xuta xi cuihndë me tsëhë cjua na ha ne, hatuxa tsajin nu tsajin nixtin xi cueya me. —Cuatjin cafayangui Jesús.

⁵² Hane xutaxa rë xi cuacun jan ne, cuitjin cachja me cojo Jesús:

—Quihndë matsejenndaja xi jiya Jain xitsehen xahasen nuju. Xutachanga naja Abraham ne, cahme me, hacuaha yéjë profeta ne, cahme me, hane sehe ngayun nujun xi xuta xi cuihndë me tsëhë cjua nuju ne, hatuxa tsajin nu tsajin nixtin xi cueya me. ⁵³ ¡Ja!, peru ¿há hitsé sa matitjun ngayun xi cuma rë xutachanga naja Abraham, me xi cahme ni? ¡Hacuaha cahme yéjë profeta! ¡Ngayun tiniñu yojo nuju sacuaha xi jemu matitjun ngayun! —Cuatjin cachja xutaxa rë jan.

⁵⁴ Hane Jesús ne, cuitjin cafayangui me:

—Sa xi sahme jyé sahme hnga suva yojo na ha ne, cjua xi cuijchjá tsahan ne, cuenguiin camahani chji rë. Peru Nahmi na ha, me xi nujun xi Nina nuju ne, me vëhë xi sahmi jyé sahmi hnga ná me. ⁵⁵ Ngayun ne, hyúun me, peru ngahan ne, hvé me. Sa xi ngahan cuijchjá xi hveen me ne, tangun ndacha ngahan cojo nuju ngayun. Peru ngahan ne, hvé me, hacuaha víhndë tsëhë cjua rë me. ⁵⁶ Xutachanga naja Abraham ne, jemu ndaja camá rë me xi satë rë me xi scuëe me nixtin xi cuinduva ngahan. Hane cavëe Jain me, hacuaha jemu sua camá rë me. —Cuatjin cafayangui Jesús.

⁵⁷ Ngajan xi xutaxa rë xi cuacun jan ne, cuitjin catsixcuehyu me Jesús:

—Hisca cjéë yachantë nu tjin nuju. ¿Há cahyun xutachanga naja Abraham ni?
—Cuatjin cachja me.

⁵⁸ Hane Jesús ne, cuitjin cachja me:

—Cuichjá cojo nuju cquaquixi ta hisca chaja sa xi tsin xutachanga naja Abraham ne, ngahan ne, Ngahan Vi hmí ná. —Cuatjin cachja Jesús.

⁵⁹ Véhë xi xutaxa rë yungun xi cuacun jan ne, cafaha me ndyojo xi cuetaha me Jesús xi meje tsiquehen me. Peru Jesús ne, cavetjuhmá me tséhë yungun xi matitjun jan.

9

Camandaja ngu cha rcá casahmi Jesús

¹ Hyá xi camá ne, xi cavatju Jesús ngu cahndé jan ne, cavëë me ngu cha rcá xi ha cuatjin rcá cha hisca hya xi catsin cha. ² Hane xuta ladu rë me jan ne, cuitjin cavinenguise me:

—Maestro, ¿yo casahmi cjuatsehen xi cuatjin rcá cha xi catsin cha? ¿Há suvá cha vihi ne?, o há tsajin ne, ¿há xutacha rë cha? —Cuatjin cavinenguise me.

³ Ngajan xi Jesús ne, cuitjin cafayangui me:

—Hacuiin cha vihi ne, hacuiin xutacha rë cha casahmi me cjuatsehen ta cuatjin camá cojo sa xi ngatsé rë cjuandaja xi sahmi Nina cojo cha vihi ne, cumatsejen xa xi sahmi Nina.

⁴ Meje rë xi nihña xa rë me xi catsingatju ná jinguyéjë rë xi hasen sa ta cuechú hora xi cumajñu, hane tsajin yo xi cuma sahmi xa. ⁵ Jinguyéjë rë xi tejña nguehe ngasunhndë ne, sacuaha hasen xi cuma rë xuta ngasunhndë ngahan. —Cuatjin cafayangui Jesús.

⁶ Xi cavatju cachja Jesús cjua véhë ne, sehe cacandi me natya rë me nangui, hane casahmi me hitsé ndasi, sehe catsufé me tuxcun cha rcá jan. ⁷ Sehe cachja me cojo cha cuitjin:

—Tángun tinchacjun ngajan nda Siloé. —Cuatjin cachja Jesús. (Siloé ne, meje cuichja Caningatjun rë.)

Hya xi camá ne, quiji cha cavinchacjan cha. Xi tu cavuya cafe cha ndava cha ne, ha tsejen rë cha. ⁸ Ngajan xi xuta xi siu tahndee ndava cha cojo me xi cavëë rë cha xi casahmi cha caridad ne, cavinenguise xicjin me cuitjin:

—¿Hacuiin cha véhë xi véjña sahmi caridad jan ni? —Cuatjin cavinenguise me xi cuacun jan.

⁹ Ngujo me jan ne, cuitjin cachja me:

—Juun, hacui cha vë. —Cuatjin cachja me.

Hane ngujo nga me ne, cuitjin cachja me:

—Cuatjin tsejen, peru hacuiin cha. —Cuatjin cachja me.

Hane suvá cha ne, cuitjin cachja cha:

—Ngahan vi. —Cuatjin cachja cha.

¹⁰ Ngajan xi xuta xi cuacun jan ne, cavinenguise me cha cuitjin:

—¿Hacutjin camá xi camandaja túxcun ngayun? —Cuatjin cachja me.

¹¹ Ngajan xi cha véhë ne, cuitjin cafayangui cha:

—Me xi hmí rë Jesús ne, casahmi me hitsé ndasi, sehe catsufé me túxcun, sehe cachja me cojo ná xi cjué cuínchacjan nda Siloé. Hane xi céjë cavinchácjan jan ne, camatsejen ná. —Cuatjin cafayangui cha.

¹² Cavinenguise nga me cha cuitjin:

—¿Jani tacun me ni? —Cuatjin cavinenguise me.

Hane cha véhë ne, cuitjin cachja cha:

—Hveen. —Cuatjin cachja cha.

Fahatáha cha fariseo cha xi camandaja tuxcun

¹³ Ngajan xi xuta xi cuacun jan ne, quijicojo me cha xi sehe camatsejen rë jan hiscan xi siu cha fariseo. ¹⁴ Quihndë ne, nixtin xi casahmi Jesús ndasi hane casahmi me xi camandaja tuxcun cha rcá jan ne, nixtin xi chjahájenda rë. ¹⁵ Ngajan xi cha fariseo xi

cuacun jan ne, hacuaha cavinenguise cha cha xi camandaja tuxcun jan hacutjin camá xi camatsejen rë cha. Hane cuitjin cafayangui cha:

—Ndasi catsufé me túxcun, sehe céjé cavinchácjan, hane cama camatsejen ná.
—Cuatjin cafayangui cha.

¹⁶ Hane ngujo cha fariseo xi cuacun jan ne, cuitjin cachja cha:

—Me vëhë ne, tsejen xi hacuiin Nina catsingatju rë me, tséhë xi faharcuaain me nixtin xi chjahájenda rë. —Cuatjin cachja cha.

Peru ngujo nga cha ne, cuitjin cachja cha:

—Cumaji sahmi me cjuarcun xi cuacun vëhë sa xi ngu cha tsehen me. —Cuatjin cachja cha.

Hacuiin ngu tangun ni camá cjua rë cha. ¹⁷ Hane ngajan xi cavuya cachja nga cha cojo cha xi camandaja tuxcun jan cuitjin:

—Quihndë ta casahmi me xi camandaja tuxcuin ne, ¿mé noje tséhë me? —Cuatjin cachja cha.

Hane cha xi camandaja tuxcun jan ne, cuitjin cafayangui cha:

—Ngu profeta me. —Cuatjin cafayangui cha.

¹⁸ Peru xutaxa rë yungun jan ne, macjaain rë me xi titjun ne, rcá cha hane quihndë ne, tsejen rë cha. Hisca xi cajindaya me xutacha rë cha xi camandaja tuxcun jan ne, ¹⁹ sehe cafahatáha rë me cuitjin:

—¿Há cha vihi xi quihndi nuju, cha xi nújun xi ha cuatjin rcá hisca hya xi catsin?
¿Hacutjin camá xi quihndë ne, tsejen rë cha? —Cuatjin cafahatáha me.

²⁰ Ngajan xi xutacha rë cha ne, cuitjin cafayangui me:

—Hyin xi cha vihi xi quihndi niji cha, hacuaha ha cuatjin rcá cha hisca hya xi catsin cha. ²¹ Peru hyíín hacutjin camá xi quihndë ne, tsejen rë cha. Hacuaha hyíín yo xi casahmi xi camandaja tuxcun cha. Chjinengunsun rë cha ta ha jiya nu rë cha. Suvá cha sua nuju cha cjuaquixi rë cha. —Cuatjin cafayangui me.

²² Cuatjin cachja xutacha rë cha ta, tséhë xi tsacjun me xutaxa rë jan ta, xutaxa rë xi cuacun jan ne, ha casahmi tangun me cjua xi yo xi cuichja xi Nina catsingatju me Jesús ne, tsichohotje rë me yungun. ²³ Vëhë xi xutacha rë cha ne, cachja me: “Ha jiya nu rë cha ne, chjinengunsun rë cha.”

²⁴ Vëhë xi cajindaya nga xutaxa rë majo ndiya cha xi camandaja tuxcun jan, hane sehe cachja me cojo cha cuitjin:

—“Vëe Nina”, noje xi cuatjin camá. Ngayin ne, hyin xi me xi casahmi xi camandaja tuxcuin ne, ngu cha tsehen me. —Cuatjin cachja xutaxa rë jan.

²⁵ Ngajan xi cha vëhë ne, cuitjin cafayangui cha:

—Ngahan ne, hveen sa xi ngu cha tsehen me. Ngu xcusun ni xi hvë ne, titjun ne, rcá ngahan, peru quihndë ne, tsejen ná. —Cuatjin cafayangui cha.

²⁶ Hane xutaxa rë jan ne, cavinenguise me cha cuitjin:

—¿Mé casahmi me cojo ri? ¿Hacutjin casahmi me xi camandaja tuxcuin? —Cuatjin cavinenguise me.

²⁷ Hane cha vëhë ne, cuitjin cafayangui cha:

—Ha cachjá cojo nuju ne, mijí cuetuhunrcun. ¿Mé má meje cuiñuju nga ngundiya?
¿Há cojo ngayun meje cuisuhun ladu rë me? —Cuatjin cafayangui cha.

²⁸ Hane xutaxa rë jan ne, cacjan me cojo cha, cuitjin cachja me:

—¡Ngaye xi ladu rë cha vëhë má ngaye! ¡Ngayin ne, ladu rë Moisés má ngayin!

²⁹ Ngayin ne, hyin xi Moisés ne, cachja me cjua xi casua Nina me, peru cha vëhë ne, hisca hyíín jani cavetju cha canduva cha. —Cuatjin cachja me.

³⁰ Ngajan xi cha vëhë ne, cuitjin cafayangui cha:

—Jemu sihya xi ngayun ne, hyúun jani cavetju me canduva me, handasa casahmi me xi camandaja túxcun ngahan! ³¹ Ha hyan ta Nina ne, fahacuendaain me cjua xi chja xuta tsehen. Peru sa xi ngu xuta faharcun me Nina hacuaha sahmi me hacutjin xi meje rë Nina ne, me vëhë ne, fahacuenda Nina cjua xi chja me. ³² Cjéé camahani cuinuhya rë xi

ngu xuta sahmi me xi mandaja tuxcun ngu xuta xi rcá me hisca hya xi catsin me. ³³ Sa xi hacuiin Nina catsingatju rë me vëhë ne, tsajin camahani mé xi cuma sahmi me. —Cuatjin cafayangui cha.

³⁴ Ngajan xi xutaxa rë jan ne, cuitjin cachja me:
—¡Ngaye ne, ngajñi rë cjuatsehen camahani catsin ngaye! ¡Machjiriin camahani ngaye xi cuicoye niji! —Cuatjin cachja me.

Sehe cavaxë me cha candatsen.

Xuta xi jñu tséhë me
³⁵ Hya xi camá ne, camachaya rë Jesús xi cavaxë xutaxa rë yungun cha xi camandaja tuxcun jan candatsen. Hane xi casacu xicjin Jesús cojo cha ne, cachja me cojo cha cuitjin:

—¿Há mangutacún ngayun cojo me xi Quihndi rë Xuta Jain? —Cuatjin cachja me.

³⁶ Hane cha vëhë ne, cuitjin cafayangui cha:
—Tatá, tinújun cojo ná yo me vë ne, cojo sa xi cumangu cárdenas cojo rë me. —Cuatjin cafayangui cha.

³⁷ Ngajan xi Jesús ne, cuitjin cachja me cojo cha:
—Ngayun ne, ha cahyun me ta, ngahan xi tichjá cojo nuju vi ne, ha ngahan xi Quihndi rë Xuta Jain ngahan. —Cuatjin cachja me.

³⁸ Hane cha vëhë ne, cuitjin cachja cha:
—Mangucáun, Tatá. —Cuatjin cachja cha, sehe cafaharcun cha me.

³⁹ Ngajan xi Jesús ne, cuitjin cachja me:
—Canduvá ngahan ngasunhndë vi ne, xi tsichúva xuta cojo cjuatacun rë me, sehe ngajan xi xuta xi cjéé ndaja cuijne rcu me cjua rë Nina ne, cuijnercundaja me, hane xuta xi cuenda chja me xi jemu ndaja vijne rcu me cjua rë Nina ne, cumajñu tséhë me.
—Cuatjin cachja Jesús.

⁴⁰ Hane ngujo cha fariseo xi hinchacun tiña hiscan secun Jesús ne, cahndë cha cjua vëhë, hane cuitjin cachja cha:

—¿Peru hacuiin cojo ngayin jñu tsijin? —Cuatjin cachja cha.

⁴¹ Ngajan xi Jesús ne, cuitjin cachja me:
—Sa xi jñu tsujun ne, tsajin jyé nuju. Peru quihndë xi nújun xi hacuiin jñu tsujun ne, ngajan matsejen xi tjin jyé nuju. —Cuatjin cachja Jesús.

10

Ejemplu tséhë paxtu rë chu tsángá

¹ Ngajan xi Jesús ne, cachja sa me cuitjin:
—Cuichjá cojo nuju cjuaquixi ta xuta xi visiin me táha tingotjo hnchua rë chu tsángá ta tu táha xín mijisun me hnchua ne, me vëhë ne, chéjë me hacuaha fahatahá cjuachan me. ² Peru me xi visehen táha tingotjo hnchua ne, me vëhë xi paxtu rë chu tsángá. ³ Cha xi quitahá cuidadu rë tingotjo hnchua ne, vuxaha cha tingotjo tséhë me vëhë. Chu tsángá ne, vihndë chu xta rë me, hane jindaya me chu xi tséhë me, jimangu chu cojo ñíhi rë chu, sehe vaxë me chu. ⁴ Hane hya xi ha cavaxë me yéjë chu xi tséhë me ne, sehe cjui titjun me, hane chu tsángá ne, fitjengui chu me, tséhë xi vëe chu xta rë me. ⁵ Peru jingu sa xuta ne, hatuxa cjuiin tjenguiin chu me ta tu cuanga chu tséhë me, tséhë xi hvíin chu xta rë jingu sa xuta jan.

⁶ Cuatjin cachja Jesús ejemplu vëhë cojo xuta xi cuacun vë, peru cajnii rcu me mé vijne cjua xi cachja Jesús.

Sacuaha paxtu rë chu xi ndaja sahmi cuidadu rë chu má Jesucristu

⁷ Jesús ne, cachja sa me cojo xutaxa rë xi cuacun jan cuitjin:
—Cuichjá cojo nuju cjuaquixi ta ngahan ne, sacuaha tingotjo xi vatju chu tsángá ngahan. ⁸ Yéjë ni cha xi cavetjujñi ngajñi rë xuta xi meje cumatitjun cha hya xi chaja sa cjuehë ngahan ne, sacuaha cha chéjë cha, cha fahatahá cjuachan cha. Peru xuta ladu rë Nina ne, casahmicuendaain me cha, sacuatjin rë chu tsángá xi fitjenguiin chu jingu sa

xuta. ⁹ Ngahan ne, sacuaha tingotjo ngahan. Sa xi ngu xuta cuisehen me táha tingotjo jan ne, cuetjutje me. Hacuaha tsajin mé cumacjín cacun me cuetju cuisehen me jan, hane tsajin mé cuma chaja rë me. ¹⁰ Cha chéjé ne, xi vinduva cha ne, suvá ni xi tsichéjé cha, tsiquehen cha, hacuaha tsinguetsun cha. Peru ngahan ne, canduvá cojo sa xi sacú rë xuta cjuahñu xatsé, hacuaha jercu sacú camahani rë me cjuahñu vëhë.

¹¹ 'Ngahan ne, sacuaha paxtu rë chu xi jemu ndaja fahácuenda chu tsángá. Paxtu ndaja jan ne, hisca sua me yojo rë me xi cueya me ngatsé rë chu tsángá. ¹² Ngu mosu xi hacuiin paxtu rë chu má cha, hacuiin tséhë cha chu tsángá ne, xi scuëë cha xi nduva tiña chu lobo ne, viyujutahá ni cha chu tsángá jan, hane vanga cha. Hane chu lobo jan ne, faha chu ngujo chu tsángá, sehe tsicangacojo chu chu xi yahnga jan tu nguehe tu ngajan. ¹³ Cuatjin sahmi cha ta, tséhë xi mosu ni má cha, hane marcuaain rë cha tséhë chu tsángá. ¹⁴⁻¹⁵ Ngahan ne, sacuaha paxtu ndaja jan ngahan. Sacuatjin vëë ná Nahmi na ha hane ngahan ne, hvë Nahmi na ha ne, ha chuva vëhë ni ne, ngahan ne, hvë chu tsahan hane chu tsahan ne, vëë chu ngahan. Hacuaha suá yojo na ha xi cueya ngatsé rë chu. ¹⁶ Tjin sa ná chu tsángá xi hacuiin tséhë hnchua vihi chu. Chu xi cuacun vë ne, hacuaha meje rë xi sahme chu cuidadu. Xi cuihndë chu xta na ha ne, cuinduvatjengui chu ngahan, hane cuma tangun chu cojo chu xi ha tisahme cuidadu, hacuaha ngu ni ngahan xi paxtu rë chu.

¹⁷ 'Ngahan ne, hmu cacun ná Nahmi na ha, tséhë xi suá yojo na ha xi cueya, hane sehe sahme xi cúya nga cjuahñu. ¹⁸ Tsajin yo xi cjuahatahá cjuahñu na ha ta ngahan ne, cojo cjuatacun na ha suva suá yojo na ha xi cueya. Tjin ná chuva rë xi suá yojo na ha, hacuaha tjin ná chuva rë xi sahme xi cúya nga cjuahñu. Cuatjin cavitexa ná Nahmi na ha xi sahme. —Cuatjin cachja Jesús.

¹⁹ Hya xi camá ne, ngu ndiya nga hacuiin ngu tangun ni camá nga cjua rë xutaxa rë jan ngatsé rë cjua vëhë. ²⁰ Hane jemu cjín me xi cuacun jan ne, cuitjin cachja me:

—¡Jiya xitsehan xahasen rë cha, vëhë xi sca rë cha! ¡Venguiin chji rë xi cuatjin visiñuju cjua rë cha! —Cuatjin cachja me.

²¹ Peru yahnga nga me ne, cuitjin cachja me:

—Cjua vëhë ne, hacuiin cjua rë ngu xuta xi jiya xitsehan xahasen rë me. ¿Ngu xitsehan ne, cumaji sahmi xi cumandaja tuxcun ngu xuta xi rcá me? —Cuatjin cachja yahnga me jan.

Tsitjungui xutaxa rë yungun Jesucristu

²² Quihndë ne, hya xi cavechú nixtin rë chan hnchan ne, camá suhi rë yungun xi matitjun ngajan Jerusalén. ²³ Hane Jesús ne, tsuyihiya me ndatsen yungun xi matitjun, ngajan Ngahma Ndihya tséhë Salomón. ²⁴ Hane xutaxa rë yungun jan ne, qui ji caxinchacunnde me Jesús, sehe cachja me cojo me cuitjin:

—¿Jani hisca hya tuhun niji cjuaquixi? Sa xi ngayun jain xi tsingatju Nina ngayun ne, tinújunquixin cojo niji. —Cuatjin cachja xutaxa rë jan.

²⁵ Ngajan xi Jesús ne, cuitjin cafayangui me:

—Ha cachjá cojo nuju, peru macjaain nuju. Xcusun xi tisahme sacuatjin tivitexa ná Nahmi na ha ne, xcusun vëhë ni tsingacun yo ngahan. Peru ngayun ne, macjaain nuju, ²⁶ tséhë xi hacuiin xuta ladu na ha má ngayun. ²⁷ Xuta xi ladu na ha má me ne, tangun me sacuaha chu tsángá. Me xi cuacun vë ne, vëë me xta na ha, hacuaha ngahan ne, hvë me, hane fitjengui ná me. ²⁸ Ngahan ne, suá rë me cjuahñu xatsé, hane hatuxa tsajin nu tsajin nixtin xi cjue hasen rë me xcun cjuañihi, hacuaha tsajin yo cuaxëxin rë me xi siu ntsa me. ²⁹ Xuta xi cuacun casua ná Nahmi na ha ne, hitsé sa venguijhi rë me xi cuma rë yéjé sa xcusun. Hacuaha tsajin yo cuma cuaxëxin rë me xi siu tsja Nahmi naja me. ³⁰ Ngahan cojo Nahmi naja me, ngu ni xahasen niji, ngu ni cjuatacun niji, ngu ni hasen niji. —Cuatjin cafayangui Jesús.

³¹ Ngajan xi xutaxa rë xi cuacun jan ne, cafaha nga me ndyojo xi cuetaha me Jesús xi tsiquehen me me. ³² Hane Jesús ne, cuitjin cachja me:

—Ngahan ne, jemu cjín xcusun ndaja casahme ngajní nuju sacuatjin cavitexa ná Nahmi naja. Hane ¿jaré xcusun věhë tséhë xi cuetuhun ná ndyojo ni? —Cuatjin cachja Jesús.

³³ Ngajan xi xutaxa rë jan ne, cuitjin cafayangui me:

—Hacuiin tséhë ngu xcusun ndaja xi canihñi xi cuetihin ri ndyojo ta ngatsë rë xi nixuehyi Nina, ngatsë rë xi handasa ngu xuta ni ngaye ne, peru noje xi tangun ngaye cojo Nina. —Cuatjin cafayangui me.

³⁴ Ngajan xi Jesús ne, cuitjin cachja me:

—Ley rë Moisés xi vitexá nuju ne, ha ndaja hyun xi camahindu cjua vihi xi cachja Nina: “Ngayujun ni ne, nina ngayun.” Cuatjin camahindu. ³⁵ Ngayejen ni ne, ha hyan ta cjua xi chja xcun xujun rë Nina ne, hatuxa cjuaquixi jain. Hane Nina ne, cachja me nina tséhë xuta xi cuacun cafahatsja cjua rë me. ³⁶ Quihndë ta Nina cavaxijin ná me hacuaha catsingatju ná me nguehe ngasunhndë ne, ¿hacutjin má xi nújun xi ngahan ne, choho chjá, tséhë xi cachjá xi Quihndi rë Nina ngahan ni? ³⁷ Sa xi ngahan tisahmee xcusun xi caviteja Nahmi naha xi sahme ne, xicamacjaain nuju ngahan. ³⁸ Peru sa xi tisahmee ne, handasa cumacjaain nuju ngahan ne, ndastu tséhë xcusun xi sahme ne, catamacjain nuju, cojo sa xi cuijne rcun ngundiyaxa ni xi Nahmi naja ne, jiya me xahesen naha, hane ngahan ne, tejñaya xahesen rë me. —Cuatjin cachja Jesús.

³⁹ Ngajan xi casahmi nga xutaxa rë jan cjuandya xi cjuaha me Jesús, peru Jesús ne, cavetjutje me tséhë xuta jan quiji me.

⁴⁰ Hya xi camá ne, cavetju Jesús quiji nga me ngunda věhë tséhë Ndajyé Jordán, ngajan hiscan xi casetaha Juan cavitenda me xuta ntsacu cavetsihin. Hane ngajan casetaha me.

⁴¹ Hane jemu cjín xuta quijitjengui me Jesús. Hane cuitjin cachja xingu xingu me cojo xicjin me:

—Juan ne, handasa casahmii me cjuarcun, peru yéjé ni cjua xi cachja me tséhë me vihi ne, cjuaquixi jain.

⁴² Hane jemu cjín xuta camangu cacun me cojo Jesús ngajan cahndé věhë.

11

Cjuaveya rë Lázaro

¹ Tacun ngu cha hmu rë xi hmí rë Lázaro, ngu cha Betania, nangui rë na María cojo na Marta týchja na. ² Na María věhë ne, na věhë xi cavitejnu na ntsacu Nai naja ngu xcusun aceite xi jemu ndaja jne camahani hacuaha jercu hnga chji rë, sehe catsixiya na cojo tsjarcu na. Na věhë xi hmu rë cha Lázaro hntsé na. ³ Ngajan xi catsijo na věhë ne, catsingatju na cjua vihi tséhë Jesús:

—Tatá, chutsujun ni, cha xi jemu vinga nuju jan ne, jemu hmu rë cha. —Věhë cjua xi catsingatju na.

⁴ Hane xi cahndé Jesús cjua věhë ne, cuitjin cachja me:

—Chíhin věhë ne, cuetjincaain cjuaveya rë cha Lázaro cojo ta xi cuetjucaa ne, cuma jyé cuma hnga Nina cojo Hasen rë me, cojo sa xi Quihndi rë Nina ne, hacuaha cuma jyé cuma hnga me cojo Hasen rë me ngatsë rë chíhin věhë. —Cuatjin cachja Jesús.

⁵ Quihndë ne, Jesús ne, jemu vinga rë me na Marta cojo týchja na cojo cha Lázaro. ⁶ Peru xi camachaya rë Jesús xi hmu rë cha ne, casetaha me jo nixtin sa hiscan xi ha quitahá me jan. ⁷ Xi cavatju věhë ne, sehe cachja me cojo xuta ladu rë me jan cuitjin:

—Cuyan cuanguen nga ngu cahndé tséhë distritu Judea. —Cuatjin cachja me.

⁸ Ngajan xi xuta ladu rë me jan ne, cuitjin cachja me:

—Maestro, xutaxa rë yungun jan ne, ¡sehe tiña nixtin xi casahmi me cjuandya xi tsiquehen nuju me cojo ndyojo! ¡Xi meje rë ne, cuanguun ngajan! —Cuatjin cachja me.

⁹ Hane Jesús ne, cuitjin cafayangui me:

—¿Hacuiin tejó hora tjin rë xi ngu nixtin ni? Quihndë xi cjéé cuechú hora xi cuichja Nina xi cueya ngahan ne, tsajin mé cuma ná, sacuatjin xtenguiin naja xi nguinxint tséhë

xi tsejen naja hasen rë tsuhi. ¹⁰ Peru xi cuechú hora xi cuichja Nina xi cueya ngahan ne, cueya, sacuatjin xtengui naja xi nixten tséhë xi tsajin hasen xi cuma naja.

¹¹ Cuatjin cafayangui Jesús cjua vëhë, hane sehe cachja sa me cuitjin:

—Cha amigu naja, cha Lázaro ne, cafañafë cha. Peru cjué ngahan tsingásca rë cha.

—Cuatjin cachja Jesús.

¹² Ngajan xi xuta ladu rë me jan ne, cuitjin cachja me:

—Tatá, sa xi cafañafë jain cha ne, vëhë tsejen xi cumandaja cha. —Cuatjin cachja xuta ladu rë me jan.

¹³ Quihndë ne, cjua xi cachja Jesús vë ne, tséhë cjuaveya rë cha Lázaro. Peru xi má rë xuta ladu rë me jan ne, tichja me tséhë nijñá ni rë cha. ¹⁴ Ngajan xi Jesús ne, cachja quixi me cuitjin:

—Cha Lázaro ne, cahme cha. ¹⁵ Hane ngahan ne, jemu ndama ná xi hacuiin ngajan tejña hora vëhë ta, xi chutsujun hacutjin cuma ne, cumangu tacún cojo ná. Peru cuanguen tjenguen nima. —Cuatjin cachja Jesús.

¹⁶ Ngajan xi Tomás, me xi chja me tséhë cha Lihma ne, cuitjin cachja me cojo xuta ladu rë Jesús xi yahnga jan:

—Hacuaha cuanguen ngayaan, cojo sa xi cueyan tangun cojo rë me. —Cuatjin cachja Tomás.

Sehe cavetju yëjë me quiji me cojo Jesús.

Sua Jesús cjuahñu hacuaha tsicuya me nima cjuahñu

¹⁷ Hya xi camá ne, xi cafehe me ngajan Betania ne, camachaya rë Jesús xi ha tjin rë ñuju nixtin xi jiyani nima Lázaro. ¹⁸ Betania jan ne, sacuaha chuva rë jyan kilómetro tacun tséhë Jerusalén. ¹⁹ Hane jemu cjín xuta quiji tjengui me na Marta cojo na María xi sua me na cjuetacun tséhë cjuaveya rë hntsë na. ²⁰ Hane xi camachaya rë na Marta xi nduva Jesús ne, cavetju na quiji cafhatsja na me. Peru na María ne, cavéjña ni na ndava na. ²¹ Hya xi camá ne, xi casacu xicjin na Marta cojo Jesús ne, cuitjin cachja na cojo rë me:

—Tatá, sa ngayun nechun nguehe ne, cahmii nima xingueen. ²² Peru hvë ta hisca quihndë ne, tu mé ni xi chjahyun rë Nina ne, sua nuju me. —Cuatjin cachja na.

²³ Ngajan xi Jesús ne, cuitjin cachja me cojo rë na:

—Nima xingun ne, cuya cjuahñu. —Cuatjin cachja Jesús.

²⁴ Hane na Marta ne, cuitjin cachja na:

—Hvë ta cuya nima xingueen cjuahñu hya xi hacuaha yëjë nima cuya cjuahñu, nixtin xi tsichuva Nina sa nima sa xuta. —Cuatjin cachja na.

²⁵ Ngajan xi Jesús ne, cuitjin cachja me cojo rë na:

—Ngahan xi suá cjuahñu hacuaha tsicuya nima cjuahñu. Xuta xi mangucacun me cojo ná ne, ha ndasa cueya me ne, peru cuya me cjuahñu. ²⁶ Hane yëjë xuta xi tjin rë me cjuahñu xatsë hacuaha mangucacun me cojo ná ne, hatuxa tsajin nu tsajin nixtin xi cje hasen rë me xcun cjuañihi. ¿Há macjain nuju cjua vëhë? —Cuatjin cachja Jesús.

²⁷ Ngajan xi na vëhë ne, cuitjin cafayangui na:

—Juun, macjain ná, Tatá. Macjain ná xi ngayun xi catsingatju nuju Nina, ngayun xi Quihndë rë Nina ngayun. Hacuaha ngayun xi jemu cavinechinyin nuju xi cuinduvun ngasunhndë. —Cuatjin cafayangui na Marta.

Jihnda Jesucristu xcun tsjun rë nima Lázaro

²⁸ Xi cafë cachja na Marta cuatjin ne, sehe cavuya na quiji jaha na na María táchja na. Hane xi cafehe na jan ne, sehe cajindayahma na na María, cuitjin cachja na:

—Cafehe maestru, hane jindaya me ngaye. —Cuatjin cachja na.

²⁹ Xi tu cahndë na María cjua vëhë ne, marcu macjain cavisatjen na quiji tjengui na Jesús. ³⁰ Quihndë ne, cjëë sa cuisehen Jesús nandya ta secun cuaha me cahndë hiscan cavechútaha na Marta me. ³¹ Hane xuta xi siu cojo na María ndava na xi tisua me na cjuetacun ne, xi cavëë me xi marcu macjain cavisatjen na quiji na ne, quiji tjengui me na. Xi má rë me ne, xcun tsjun cjui na, cojo sa xi ngajan squihnda na.

³² Hane xi cafehe na María hiscan secun Jesús ne, xi cavëë na me ne, quiji caticjaxcun na xcun me, sehe cachja na cuitjin:

—Tatá, sa xi ngayun nechun nguehe ne, cahmii nima xingueen. —Cuatjin cachja na.

³³ Hane xi cavëë Jesús xi cuatjin jihnda na hacuaha jihnda yëjë xuta xi ticojo na jan ne, camandya cacun me, jemu choho camahani camá rë xahasen rë me. ³⁴ Hane cuitjin cavinenguise me:

—¿Jani tacun tsjun xi caveyun nima? —Cuatjin cavinenguise me.

Hane xuta jan ne, cuitjin cafayangui me:

—Tatá, nduvun chutsujun. —Cuatjin cafayangui me.

³⁵ Hane cajihnda Jesús. ³⁶ Ngajan xi xuta jan ne, cuitjin cachja me ngajñi rë me:

—Chutsujun ni hacutjin catsihmu cacun me nima. —Cuatjin cachja me.

³⁷ Peru ngujo me ne, cuitjin cachja me:

—Me vihi xi casahmi me xi camandaja tuxcun cha rcá jan ne, ¿há camaji casahmi me xi cahmii nima vëhë? —Cuatjin cachja ngujo xuta jan.

Cavuya nima Lázaro cjuahñu

³⁸ Ngajan xi Jesús ne, ngu ndiya nga jemu camandya cacun me. Sehe quiyi me xcun tsjun. Tsjun jan ne, ngu nguijo, hane tingotjo rë ne, titsa ngu ndyojo. ³⁹ Ngajan xi Jesús ne, cuitjin cachja me:

—Chjuhunxun ndyojo vë. —Cuatjin cachja me.

Ngajan xi na Marta, tichja nima ne, cuitjin cachja na:

—Tatá, ha choho jne vë ta, ha tjin rë ñuju nixtin. —Cuatjin cachja na.

⁴⁰ Hane Jesús ne, cuitjin cachja me cojo rë na:

—Ha cachjá cojo nuju ta sa xi cumacjain nuju cjua naha ne, ngayun ne, chutsujun hacutjin jyë hniga Nina cojo Hasen rë me. —Cuatjin cachja Jesús.

⁴¹ Hya xi camá ne, cachjaháxin rë ndyojo jan. Hane hora vëhë cavutsejenniji Jesús ngahnga, sehe cachja me cuitjin:

—Ngayun Nahmi naha, suá nacuechji nuju ta canihñucuendun cjua xi cachjá cojo nuju. ⁴² Hacuaha ha hvë ta ngayun ne, hatuxa nihñucuendun cjua naha. Vëhë xi hacuiin nguyé xi cuichjá cojo nuju cjua vihi, peru ngatsë rë xuta xi hinchacunnde vi ne, vëhë xi cuitjin tichjá, cojo sa xi cumacjain rë me xi ngayun caningatjun ná. —Cuatjin cachja Jesús.

⁴³ Hane xi cajnetaha cachja me cuatjin ne, sehe ña cajindaya me cachja me cuitjin:

—¡Lázaro, tetjun! —Cuatjin cachja me.

⁴⁴ Hya xi camá ne, cavetju Lázaro tsöhë tsjun jan, tjinguiya tsjian ntsacu me, tjinguiya tsjian tsja me, hacuaha tjihnú xcun me cojo ngu pañtu. Hane Jesús ne, cuitjin cachja me cojo xuta jan:

—Chundecjun tsjian vë sehe cumandaya me. —Cuatjin cachja Jesús.

Meje cjuaha xutaxa rë yungun Jesucristu

⁴⁵ Quihndë ne, jemu cjín xuta quiyi cavusehenya rë na María hacuaha cavëë me hacutjin casahmi Jesús. Hane xuta xi cuacun jan ne, camangu cacun me cojo Jesús.

⁴⁶ Peru ngujo xuta ne, quiyi cachja me cojo cha fariseo hacutjin casahmi Jesús. ⁴⁷ Ngajan xi yëjë nahmi xi matitjun cojo cha fariseo xi cuacun jan ne, casahmi me ngu junta. Hane xcun junta jan ne, cuitjin cachja me:

—¿Mé ndatjin nihña? ta cha xi cuajiyihi vë ne, jemu tisahmi cha cjuarcun. ⁴⁸ Sa xi tsajin mé xi nihña ne, yëjë xuta ne, cumangu cacun me cojo cha. Hane vëhë xi xutaxa rë Roma ne, cuma cjan rë me, hane cjuahatahá me yungun xi matitjun naja hacuaha cjuahatahá me gubiernu xi tinihña. —Cuatjin cachja me xi cuacun jan.

⁴⁹ Peru ngu me xi cuacun jan xi hmí rë Caifás, me xi hacuaha má nahmi xi matitjun tsöhë yëjë nahmi nu vëhë ne, cachja me cuitjin:

—Ngayun ne, hyúun camahani. ⁵⁰ Vijnii rcun xi ndaja tsujun xi ngu xihin ni cueya ngatsë rë yëjë ni xuta, hane hacuiin yëjë xuta cueya me. —Cuatjin cachja Caifás.

⁵¹ Peru me vëhë ne, hacuiin cachja me cojo cjuatacun rë suvá me ta, ngatsë rë xi má me nahmi xi matitjun nu vëhë ne, cachja me cjua xi casua Nina me xi Jesús cueya me ngatsë rë xuta. ⁵² Peru hacuiin ngatsë rë suvá ni xuta tjé rë Israel ta hacuaha cueya me cojo sa xi sahmi tangun me yëjë quihndi rë Nina xi tinguitsojo, sehe cuma yëjë me sacuaha ngu ni xcusun xuta.

⁵³ Ngajan xi hisca nixtin xi cachja Caifás cuatjin ne, nahmi xi matitjun cojo cha fariseo xi cuacun jan ne, caviyuju me cjuatacun rë me xi tsiquehen me Jesús. ⁵⁴ Vëhë xi Jesús ne, catsujiyihiyaintë me nandya xi siu ladu rë distritu Judea ta cavetjuxin me tsëhë ngajan, quiji me ngu nandya xi hmí rë Efraín, tiña hiscan xi faha rë xi ha jemu xín camahani tsëhë nandya. Hane ngajan casetaha me cojo xuta ladu rë me.

⁵⁵ Quihndë ne, ha camatiña suhi tsëhë Pascua. Hane jemu cjín xuta quiji me Jerusalén chaja sa nixtin rë suhi jan xi cuma tyjahi me sacuatjin xi ha xcusun rë xutachanga.

⁵⁶ Jemu siu me cuidadu há cjuehe Jesús suhi jan. Hane jinguyéjë rë xi hinchacun me yungun xi matitjun jan ne, vinenguise xicjin me xingu xingu me cuitjin:

—¿Mé xi má nuju? —Há cuinduvaain me suhi? —Cuatjin cavinenguise xicjin me.

⁵⁷ Quihndë ne, nahmi xi matitjun cojo cha fariseo xi cuacun jan ne, ha cavitexa me xi yo xi vëe hiscan tacun Jesús ne, sua cumachaya rë me, cojo sa xi chjahá rë Jesús.

12

Xtejnu aceite ntsacu Jesucristu

¹Jyun nixtin chaja sa xi cuechú suhi tsëhë Pascua ne, cavuya quiji Jesús ngajan Betania, hiscan xi tacun cha Lázaro, cha xi catsicuya Jesús cjuahñu hya xi cahme cha. ² Hane ngajan casehenndaja ngu comida xi sinë me. Na Marta tivincha na comida, peru cha Lázaro ne, cojo cha tijinë cha cojo Jesús cojo me xi yahnga sa. ³ Hane na María ne, cafaha na ngu frascu xi hincha jo cuartu aceite nardo xi jemu ndaja jne hacuaha jemu hnga chji rë, quiji cavitejnu na ntsacu Jesús, sehe catsixiya na cojo tsjarcu na. Hane cahntsua ndihya jan ne, ña catsë rë cojo xta rë aceite jan. ⁴ Ngajan xi Judas Iscariote, ngu cha ladu rë Jesús, cha xi sahmi rë me entregadu ne, cuitjin cachja cha:

⁵ —¿Mé má cuatjin casahmi na? Aceite vë ne, cuma xteña hane sacú chji rë jyan cientu nixtin xa xi sahmi ngu xuta, hane tujún vëhë ne, tahan rë xuta yuma. —Cuatjin cachja cha.

⁶ Peru Judas ne, hacuiin tsëhë xi marcum rë cha tsëhë xuta yuma xi cuatjin cachja cha ta tsëhë xi chëjë cha, hacuaha cha vëhë tjin tsja cha tsá xi hincha yëjë tujún, hane jiya hora ne, tsichëjë cha tsë tsë. ⁷ Ngajan xi Jesús ne, cuitjin cachja me:

—Xicanújiin cojo rë na. Catetjo na xi tjin rë na hisca hya xi seyaniji ngahan. ⁸ Xuta yuma ne, yëjë nu yëjë nixtin ne, siu me cojo nuju, peru ngahan ne, hacuiin yëjë nu yëjë nixtin tejña cojo nuju. —Cuatjin cachja Jesús.

Meje tsiquehen xutaxa rë yungun cha Lázaro

⁹ Hyá xi camá ne, jemu xutacjín tsëhë nandya xi siu distritu Judea ne, camachaya rë me xi Jesús ne, Betania quitahá me. Ngajan xi quiji xuta ngajan, hacuiin tsëhë xi meje scuëë ni me Jesús ta hacuaha tsëhë xi meje scuëë me cha Lázaro, cha xi catsicuya Jesús cjuahñu. ¹⁰ Hane nahmi xi matitjun jan ne, caviyuju cacun me xi hacuaha cojo cha Lázaro tsiquehen me cha, ¹¹ tsëhë xi ngatsë rë cha vëhë ne, jemu cjín xuta titsitjungui me nahmi jan, hane tijimangu cacun me cojo Jesús.

Cafehe Jesucristu nandya Jerusalén

¹² Xi camá nchujun jan ne, xutacjín xi cafehe suhi jan ne, camachaya rë me xi Jesús ne, hacuaha nduva me Jerusalén. ¹³ Hane cafaha me xca jne, sehe cavetju me quijitjengui me Jesús hiscan nduva me. Hane hisca jindaya me cachja me cuitjin:

—¡Jemu ndaja Nina! ¡Jemu catsinchacun Nina me xi nduva vi tsëhë xi Nina catsingatju rë me, me xi cumatitjun tsajan ngayaan xuta tjé rë Israel! —Cuatjin cajindaya me cachja me.

¹⁴ Hane xi casacu rë Jesús ngu burru chihndë ne, sehe camiji me chu, sacuatjin camahindu tséhë me xcun xujun rë Nina hiscan xi chja cuitjin:

¹⁵ ¡Xicarcuun ngayun xuta Jerusalén;
chutsujun ni, me xi matitjun tsujun ne, nduva me quisun me ngu burru chihndë!

¹⁶ Hya xi cuatjin camá ne, xuta ladu rë Jesús ne, cajnii rcu me. Peru hya xi Jesús cama jyë cama hnga me cojo Hasen rë me ne, hya xi cavuya cjuahñu rë me hya catsinguitsjen xuta xi cuacun jan xi cuatjin camahindu tséhë Jesús hane cuatjin Jain cavatju me camá.

¹⁷ Xuta xi siu cojo Jesús hya xi cajindaya me cha Lázaro xi cuetju cha tséhë tsjun hacuaha catsicuya me cha cjuahñu ne, casua me camachaya rë jingu sa xuta hacutjin camá. ¹⁸ Véhë xi xutacjín jan ne, cavetju me quijitjengui me Jesús, tséhë xi camachaya rë me xi casahmi Jesús cjuarcun véhë. ¹⁹ Véhë xi cha fariseo ne, cachja cha ngajñi rë cha cojo xicjin cha cuitjin:

—Cahyun ni ne, tsajin mé xi cuma nihña. Chutsujun ta yéjë ni xuta ne, tjengui rë cha.
—Cuatjin cachja cha.

Meje scutsejen ngujo xutaxín Jesucristu

²⁰ Quihndë ne, ngajñi rë xuta xi qui ji me suhi xi cjuaharcun me Nina ne, hinchajñi ngujo xutaxín. ²¹ Hane me xi cuacun véhë ne, quijitjengui me Felipe, xuta Betsaida, ngu nandya tséhë distritu Galilea, hane cuitjin cachja me:

—Tatá, ngayin ne, meje cuiasajmí cojo Jesús. —Cuatjin cachja me.

²² Ngajan xi Felipe ne, qui ji cachja me cojo Andrés, sehe catsijo ni me qui ji casua me camachaya rë Jesús. ²³ Ngajan xi Jesús ne, cuitjin cachja me cojo rë me:

—Cavechú hora xi ngahan xi Quihndi rë Xuta Jain ngahan ne, cuma jyë cuma hnga ngahan cojo hasen naha. ²⁴ Cuichjá cojo nuju cjuaquixi ta ngu tú rë trigu xi cjuinengui nangui ne, sa xi cueyaain ne, ha ngu tu tu ni má yéjë nu yéjë nixtin. Peru sa xi cueya ne, jemu cjín tjé sua. ²⁵ Xuta xi vangui me suvá ni xi ndaja cjuahñu rë me nguehe ngasunhndë ne, titsichajá me cjuandaja xi sua Nina me cjuahñu xatsë. Peru xuta xi marcuaain rë me tséhë suvá ni xi ndaja cjuahñu rë me nguehe ngasunhndë ne, hatuxa sacú rë me cjuandaja xi sua Nina me cjuahñu xatsë. ²⁶ Xuta xi meje cuisehen me ladu naha ne, catinduva tjengui ná me. Hane hiscan xi cuitejña ngahan ne, hacuaha ngajan cuejña me xi má ladu naha. Xuta xi má me ladu naha ne, sahmi jyë sahmi hnga Nina Nahmi naja me. —Cuatjin cachja Jesús.

Chja Jesucristu tséhë cjuaveya rë me

²⁷ Cachja sa Jesús cuitjin:

—Quihndë ne, jemu macjín cácul. Peru ¿mé cuichjá ni? ¿Há cuichjá cuitjin: “Ngayun Nahmi naha, naxuntjun ná tséhë xcusun xi cuátju cuma quihndë?” Peru cuichjaan cuatjin ta, tséhë xi hatuxa canduvá xi cuatjin cuátju cuma. ²⁸ Ngayun Nahmi naha, tuhun cumachaya rë xuta hacutjin jyë hnga ngayun cojo Hasen nuju. —Cuatjin cachja Jesús.

Ngajan xi canuhya rë ngu xta xi canduva ngajan ngahnga xi cachja cuitjin:

—Ha casuá camachaya rë me, hacuaha cuya suá nga cumachaya rë me. —Cuatjin cachja xta jan.

²⁹ Hane ngujo xuta xi hinchacun jan xi cahndë me xta jan ne, cachja me ta chuhun xi catsingá. Hane ngujo nga me ne, cachja me xi ngu ángel cachja cojo Jesús. ³⁰ Ngajan xi Jesús ne, cuitjin cachja me cojo xuta jan:

—Hacuiin xi cuíhndë ngahan xi cachja xta véhë ta xi cuinuhyun ngayun. ³¹ Cavechú nixtin xi cuma chuva xuta cojo cjuatacun rë me. Cavechú nixtin xi cjuahatahá Nina gubiernu xi tisahmi Satanás. ³² Hane ngahan ne, hya xi tjunihnga ná tséhë nangui ne, sahme xi xuta ne, cuisehen me ladu naha. —Cuatjin cachja Jesús.

³³ Xi cuatjin cachja Jesús ne, casua me camachaya rë xuta mé chuva rë cueya me.

³⁴ Ngajan xi xuta jan ne, cuitjin cafayangui me tséhë Jesús:

—Ngayin ne, hyin xi chja ley ta me xi Nina tsingatju rë ne, tsajin nixtin xi cueya me. ¿Hacutjin má xi nújun ngayun xi me xi Quihndi rë Xuta Jain ne, tjunihnga rë me? ¿Yo me xi Quihndi rë Xuta Jain vë ni? —Cuatjin cafayangui xuta jan.

³⁵ Ngajan xi Jesús ne, cuitjin cachja me cojo xuta jan:

—Ha tu chúva sa nixtin xi ngahan xi sacuaha hasen ngahan ne, tejña ngajñi nuju. Tángun xcun sa cojo ndiya xi ha tivangun jinguyéjë rë xi tacun sa hasen ngajñi nuju, sa tu cuechútáha nuju jñú. Xuta xi cjui me ngajñi jñú ne, hvíin me jani cjui me. ³⁶ Vëhë xi jinguyéjë rë xi tejña ngajñi nuju ne, catamangu tacún cojo ná, cojo sa xi tsë rë xahasen nuju cojo cjuahasen naha. —Cuatjin cachja Jesús.

Jemu cjín xuta xi camanguaain cacun me cojo Jesucristu

Hane xi cavatju cachja Jesús cjua vëhë ne, cavetju me quijhma me tsëhë xuta jan.

³⁷ Handasa cavëë xuta xi jemu cjín cjuarcun casahmi Jesús ne, peru camanguaain cacun me cojo rë me. ³⁸ Cuatjin camá xi cavetjucaa cjua rë profeta Isaías xi camahindu xcun xujun rë Nina hiscan xi chja cuitjin:

Ngayun Nina niji, tsajin yo camacjain rë cjua xi canújin;

Tsajin yo cajne rcu hacutjin xi hñu ngahñu rë Nina.

Cuatjin cachja profeta Isaías. ³⁹ Vëhë xi xuta jan ne, camaji camangu cacun me cojo Jesús ta, tsëhë xi hacuaha cachja nga profeta Isaías cuitjin:

⁴⁰ Sacuaha ngu xuta xi tsihñu me xcun ngu nga xuta cojo sa xi cumatsijin rë me ne, cuatjin casahmi jñu Nina tsëhë cjuatacun rë xuta, cojo sa xi cuijnii rcu me hacuaha cuyaain me ladu rë Nina xi sahmi Nina xi cumandaja me.

⁴¹ Cuatjin cachja Isaías cjua vëhë ta, tsëhë xi cavëë me hacutjin jyé hnngia Jesús cojo hasen rë me hane cuatjin cachja me tsëhë Jesús.

⁴² Handasa cuatjin casahmi Nina ne, jemu cjín xutaxa rë camangu cacun me cojo Jesús. Peru tsëhë xi tsacjun me cha fariseo ne, catsinguixiin me ngajñi rë xuta, sa tu cumachohotje rë me yungun. ⁴³ Xutaxa rë xi cuacun vë ne, hitsë sa meje rë me xi sahmi yehe sahmi hnngia xuta me, xi cuma rë xi sahmi yehe sahmi hnngia Nina me.

Cjua rë Jesucristu tsichuva rë xuta cojo cjuatacun rë me

⁴⁴ Ngu ndiya nga jan ne, jemu hñu cachja Jesús cuitjin:

—Xuta xi mangucacun me cojo ná ne, hacuiin suva ni mangucacun me cojo ná ta hacuaha mangucacun me cojo Nina Nahmi naja, me xi catsingatju ná. ⁴⁵ Hane xuta xi vijné rcu me yo ngahan ne, hacuaha vijné rcu me yo me xi catsingatju ná. ⁴⁶ Ngahan xi sacuaha hasen xi cuma rë xuta ngahan ne, canduvá nguehe ngasunhndë, cojo sa xi yëjë xuta xi mangucacun me cojo ná ne, cjuë xi jñu tsëhë cjuatacun rë me. ⁴⁷ Hane sa xi ngu xuta vetaha rcu me cjua xi chjá Peru faharcuaain me ne, ngahan ne, tsichuvaan me cojo cjuatacun rë me ta, tsëhë xi ngahan ne, hacuiin canduvá xi tsichúva xuta cojo cjuatacun rë me ta canduvá xi cuáxetje me. ⁴⁸ Xuta xi tsitjungui ná me hacuaha fahatsjaain me cjua naha ne, ha tjin yo xi tsichuva rë me. Cjua xi cachjá ne, cjua vëhë xi tsichuva rë me nixtin xi tsichuva Nina sa nima sa xuta. ⁴⁹ Ngahan ne, cjua xi cachjá ne, hacuiin cachjá cojo cjuatacun naha suva ta Nina Nahmi naja, me xi catsingatju ná ne, suvá me cavitexa ná me hacutjin meje rë xi cuichjá. ⁵⁰ Hane hvé ta cjua xi vitexa me vëhë ne, sua naja cjuahñu xatsë. Vëhë xi cjua xi chjá ne, suvá cjua xi cavitexa Nina Nahmi naja.

13

Vane Jesucristu ntsacu xuta ladu rë me

¹ Quihndë ne, cavechú nixtin xi chaja sa ngu nixtin xi cuma suhi tsëhë Pascua. Hane Jesús ne, ha vëe me xi cavechú hora xi cuetju me tsëhë ngasunhndë vihi, cjue tjengui me Nina Nahmi naja. Hatuxa catsihmu cacun me xuta ladu rë me xi siu ngasunhndë vihi, hacuaha hacuanitjin ni catsihmu cacun me hisca xi cahme me.

² Jesús cojo xuta ladu rë me ne, tijinë nguixun me. Hane cha Judas, quihndi rë Simón Iscariote ne, ha casahmi Satanás xi cuejña cacun cha xi sahmi entregadu cha Jesús. ³ Peru

Jesús ne, ha vëe me xi ha cavejña Nina yéjé xcusun tsja me. Hacuaha ha vëe me xi hiscan tacun Nina canduva me, hane hacuaha ngajan ni cuya cjue nga me.⁴ Hya xi camá ne, cavejña Jesús xi tijiné me jan ne, cavasatjenhnga me, sehe cavaxé me chingá rë me cavejñaxin me, hane cafaha me ngu toalla cavityanguitaha me.⁵ Sehe cafaha me nandá cojo nisu, hane cavetsihin cavane me ntsacu xuta ladu rë me hacuaha catsixiya me cojo toalla xi tyjanguitaha rë me jan.

⁶ Hane xi cafehe me xcun Simón Pedru ne, cachja Pedru cuitjin:

—Tatá, ¿há xi ngayun cuanu ntsacú? —Cuatjin cachja Pedru.

⁷ Ngajan xi Jesús ne, cuitjin cafayangui me:

—Xcusun xi tisahme vi ne, vijnii rcun quihndë, peru ngascan ne, hya cuijne rcun.

—Cuatjin cafayangui Jesús.

⁸ Hane Pedru ne, cuitjin cachja me:

—¡Hatuxa tsajin nu tsajin nixtin xi ngayun cuanu ntsacú! —Cuatjin cachja me.

Ngajan xi Jesús ne, cuitjin cafayangui me:

—Sa xi cuánee ntsacun ne, hacuiin xuta ladu naha ngayun. —Cuatjin cafayangui Jesús.

⁹ Ngajan xi Simón Pedru ne, cuitjin cachja me cojo Jesús:

—Tatá, sa cuatjin ne, ¡hacuiin suvá ni ntsacú ta hacuaha cojo ntsa cojo rcú tanu!

—Cuatjin cachja me.

¹⁰ Ngajan xi Jesús ne, cuitjin cafayangui me tséhë Pedru:

—Xuta xi ha cavinduya me ne, suvá ni ntsacu me meje rë xi cjuengui ta, tséhë xi ha tyjahi me. Ngayujun ni ne, ha tyjahi ngayun. Peru ngu ngayun ne, hacuiin cuatjin.

—Cuatjin cafayangui Jesús.

¹¹ Tséhë xi ha vëe Jesús yo xi sahmi rë me entregadu, vëhë xi cachja me xi: “Hacuiin ngayujun xi tyjahi ngayun.”

¹² Hane xi cavatju cavane Jesús ntsacu xuta ladu rë me ne, sehe cavuya cavajá me chingá rë me, sehe quiyi cafaha nga me cahndé rë me xcun maxë. Hane sehe cachja me cojo xuta ladu rë me cuitjin:

—¿Há vijné rcun xcusun xi casahme cojo nuju vë? ¹³ Ngayun ne, maestru niji hacuaha nai niji nýjun tsahan. Hane ndatjin xi cuatjin nýjun ta, tséhë xi cuatjin jain. ¹⁴ Quihndë ne, quihndë ta ngahan xi nai nuju hacuaha maestru nuju ngahan cavane ntsacun ne, hacuaha meje rë xi cuatjin cuanu ntsacu xingun xingu xingu ngayun. ¹⁵ Ngahan ne, cavejñá nuju ngu ejemplu vë, cojo sa xi sacuaha xcusun xi casahme cojo nuju vë ne, hacuaha cuatjin nihñu. ¹⁶ Cuichjá cojo nuju cjuaquixi ta ngu mosu hndixahan ne, hacuiin hitsë sa venguichji rë xi cuma rë nai rë, hacuaha ngu xi ningatjun rë ne, hacuiin hitsë sa matitjun xi cuma rë me xi catsingatju rë. ¹⁷ Quihndë ta ha vijné rcun cjua vëhë ne, jemu ndaja tsujun sa xi nihñu cuatjin.

¹⁸ ’Peru ngahan ne, hacuiin tichjá tsujun ngayujun ni ta ngahan ne, ha hvë yo xi cavaxejen. Peru meje rë xi cuetjucaa cjua xi camahindu xcun xujun rë Nina xi chja cuitjin: “Cha xi cajiné tangun cojo ná ne, camá cha condra naha.” Cuatjin camahindu.

¹⁹ Tichjá cojo nuju cjua vëhë quihndë chaja sa xi cuetjucaa, cojo sa xi hya xi cuetjucaa ne, ngayun ne, cumacjain nuju xi Ngahan Vi hmí ná. ²⁰ Cuichjá cojo nuju cjuaquixi ta xuta xi cjuaquixi ta ngu ngayun ne, nihñu ná entredadu. —Cuatjin cachja me.

²¹ Hane xuta ladu rë Jesús xi cuacun jan ne, cavutsejenya me xcun xicjin me xingu xingu me. Hvíin camahani me yo tséhë xi cuatjin cachja Jesús. ²² Hane ngu cha ladu rë

Chja Jesucristu xi Judas sahmi rë me entregadu xcun xutaxa rë yungun

²¹ Xi cavatju cachja Jesús cuatjin ne, jemu camandyá cacun me, hane cuitjin cachja me:

—Cuichjá cojo nuju cjuaquixi ta ngu ngayun ne, nihñu ná entredadu. —Cuatjin cachja me.

²² Hane xuta ladu rë Jesús xi cuacun jan ne, cavutsejenya me xcun xicjin me xingu xingu me. Hvíin camahani me yo tséhë xi cuatjin cachja Jesús. ²³ Hane ngu cha ladu rë

Jesús xi jemu vinga rë me ne, tjehen rë Jesús ne, ngajan tijinë cha niñu. ²⁴ Vëhë xi Simón Pedru ne, casahmi rcu me cojo cha vëhë, sehe cachja me cuitjin:

—Chjinengunsun rë me yo tséhë xi chja me. —Cuatjin cachja Pedru.

²⁵ Hane xi catsicuya cha vëhë xcun cha tiña xcun Jesús ne, sehe cavinenguise cha me cuitjin:

—Tatá, ¿yo xi nújun vë? —Cuatjin cavinenguise cha.

²⁶ Ngajan xi Jesús ne, cuitjin cafayangui me:

—Cha xi suá rë ngu rquí niñu vi hora xi cjué tsinguísehan quinda ne, cha vëhë xi hacui cha. —Cuatjin cafayangui me.

Hane hora xi camá catsinguisehen quinda me niñu jan ne, sehe casua me cha Judas, quihndi rë Simón Iscariote. ²⁷ Hane xi cavatju cafaha Judas ngu rquí niñu jan ne, hora vëhë cavisehen Satanás xahasen rë cha. Ngajan xi Jesús ne, cuitjin cachja me cojo cha:

—Xcusun xi nihñu ne, nihñu ni ngu ndiya xa. —Cuatjin cachja Jesús cojo cha.

²⁸ Peru hisca ngu me xi tijinë niñu jan hvíin me mé má cuatjin cachja Jesús cojo cha.

²⁹ Yahnga me ne, catsingataha cacun me xi tséhë xi Judas yaha cha tsá tujún ne, vëhë xi cachja Jesús cojo cha xi cjué cuatsë cha xi mameje tséhë suhi o sa xi sua cha tsé tsé xuta yuma.

³⁰ Hane xi cavatju cafaha cha ngu rquí niñu jan ne, ngutjen ni cavetju cha quiji cha. Hora vëhë ne, ha camajñu.

Cjua xatsë xi cavitexa Jesucristu

³¹ Ngajan xi, xi cavetju Judas quiji cha ne, sehe cachja Jesús cuitjin:

—Ngahan xi Quihndi rë Xuta Jain Ngahan ne, quihndë cuetsihin cuma jyë cuma hnaga ngahan cojo hasen naha, hacuaha ngahan tsingácun hacutjin jemu jyë hnaga Nina cojo hasen rë me. ³² Hane sa xi ngahan tsingácun hacutjin jemu jyë hnaga Nina cojo Hasen rë me ne, Nina ne, hacuaha tsingacun me hacutjin jemu jyë hnaga ngahan cojo hasen naha. Hane ngutjen ni sahmi me cuatjin. ³³ Jemu chúva sa nixtin xi cuitejña cojo nuju, tsan. Ngayun ne, cuinchunsun ná, peru quihndë cuichjá cojo nuju sacuatjin cachjá cojo xutaxa rë yungun xi hiscan xi cjué ne, cumaji cuangun. ³⁴ Nguehe cuitéxa nuju ngu cjua xatsë cuitjin: “Meje rë xi nihñu hmu tacún xingun xingu xingu ngayun. Sacuatjin casahme hmu cárden nuju ngahan, cuatjin meje rë xi nihñu hmu tacún xingun.” ³⁵ Hane xi cuatjin tjin cjuahmutacun ngajñi nuju cojo xingun ne, ngajan cumachaya rë yéjë xuta ta ngayun ne, xuta ladu naha má ngayun. —Cuatjin cachja Jesús.

Chja Jesucristu xi cuichja Pedru xi hvíin me yo Jesucristu

³⁶ Ngajan xi Simón Pedru ne, cuitjin cavinenguise me:

—Tatá, ¿jani cuangun ni? —Cuatjin cavinenguise me.

Ngajan xi Jesús ne, cuitjin cafayangui me:

—Hiscan xi cjué ne, quihndë ne, cumaji cuanguntjengun ná. Peru xi cuma ngascan ne, cuanguntjengun ná. —Cuatjin cafayangui Jesús.

³⁷ Hane Pedru ne, cuitjin cachja me cojo Jesús:

—Tatá, tsajin mé má cumaji cjué tjéngüé nuju quihndë. Hisca yojo naha suá ngatsë nuju. —Cuatjin cachja Pedru.

³⁸ Ngajan xi Jesús ne, cuitjin cafayangui me:

—¿Há xi tuhun yojo nuju ngatsë naha? Cuichjá cojo nuju cjuaquixi ta chaja sa xi squihnda xahnda ne, ngayun ne, ha jyan ndiya cuinújun xi hyúun yo ngahan. —Cuatjin cafayangui Jesús.

Sacuaha ndiya xi cjui xcun Nina má Jesucristu

¹ Quijinduju sa cachja Jesús cojo xuta ladu rë me cuitjin:

—Xicamandyain tacún. Catamangu tacún sa cojo Nina, hacuaha catamangu tacún sa cojo ná. ² Ngajan ngahnga hiscan tacun Nahmi naha ne, jemu cjín cahndé tjin xi

cuiyuju yéjé xuta ladu rë me. Sa xi hacuiin cuatjin ne, ngahan ne, ha cachjá cojo nuju. Peru xicamacjiin tacún ta cjué cuéhendaja cahndé xi cuma nuju. ³ Hane hya xi ha cøjé cavéhendaja cahndé xi cuma nuju ne, sehe cuya nga, hane cjuécojo nuju, cojo sa xi hiscan xi cuitejña ne, hacuaha ngajan cuinechun. ⁴ Hacuaha hiscan xi cjué ne, ngayun ne, ha hyun ndiya. —Cuatjin cachja Jesús.

⁵ Hane Tomás ne, cuitjin cachja me cojo Jesús:

—Tatá, hyín jani cuangun. ¿Hacutjin má xi nújun xi ha hyin ndiya ni? —Cuatjin cachja me.

⁶ Hane Jesús ne, cuitjin cafayangui me tséhë Tomás:

—Ngahan ne, sacuaha ndiya xi cjui xcun Nina ngahan. Ngahan ne, hatuxa tjin ná cjuaquixi rë Nina, hatuxa tjin ná cjuahñu. Suvá ni xuta xi visehen me ladu naha ne, me vëhë ni xi cuma cuechú me xcun Nina Nahmi naja. ⁷ Ngatsë rë xi ha hyun ná ne, vëhë xi hatuxa chun Nahmi naha. Quihndé ne, hyun me, hacuaha ha cachutsujun me. —Cuatjin cafayangui Jesús.

⁸ Ngajan xi Felipe ne, cuitjin cachja me cojo Jesús:

—Tatá, ningacun niji Nina Nahmi naja, hane cojo vëhë cumangu tacuín. —Cuatjin cachja Felipe.

⁹ Ngajan xi Jesús ne, cuitjin cachja me:

—Ngahan ne, ha jemu jyé nixtin tejña cojo nuju, hane ¿há hyúun ná ni, Felipe? Xuta xi ha cavëë ná me ne, ha cavëë me Nina Nahmi naja. ¿Hacutjin má xi nújun xi tsingácun nuju Nina Nahmi naja ni? ¹⁰ ¿Há macjaain nuju xi ngahan ne, tejñaya xahasen rë Nina Nahmi naja, hane me vëhë ne, jiya me xahasen naha? Cjua xi chjá cojo nuju ne, hacuiin chjá cojo cjuatacun naha suva. Nina Nahmi naja xi jiya me xahasen naha ne, me vëhë sahmi me xa rë me. ¹¹ Catamacjain nuju xi ngahan ne, tejñaya xahasen rë Nina Nahmi naja hacuaha me vëhë ne, jiya me xahasen naha. O sa xi macjaain nuju cjua naha ne, catamacjain nuju ngahan ndastu ngatsë rë cjuarcun xi casahme. ¹² Cuichjá cojo nuju cjuaquixi ta xuta xi mangucacun me cojo ná ne, cjuarcun xi sahme ngahan ne, hacuaha cojo me sahmi me. Ha hisca yehe sa cjuarcun sahmi me ta, ngahan ne, cjué tjëngüë Nina Nahmi naja. ¹³ Hane tu mé ni xi chjahyun rë Nina ngatsë rë xi ladu naha ngayun ne, vëhë sahme, cojo sa xi cuma jyé cuma hnga Nina Nahmi naja cojo Hasen rë me ngatsë rë xcusun xi sahme, ngahan xi Quihndi rë me ngahan. ¹⁴ Sa xi chjahyun ná ngu cjuandaja ngatsë rë xi ladu naha ngayun ne, ngahan ne, sahme. —Cuatjin cachja Jesús cojo xuta ladu rë me.

Chja Jesucristu xi cuinduva Hasen rë Nina

¹⁵ Quijinduju sa cachja Jesús cuitjin:

—Sa xi ngayun nihñu hmu tacún ná ne, hacuaha cuinuhyun sacuatjin vitéxa nuju, ¹⁶ hane ngahan cuichjá cojo Nina Nahmi naja, hane tsingatju me ngu nga xi cuiseecoo nuju, xi cuejña cahndé cojo nuju yéjé nu yéjé nixtin. ¹⁷ Hane vëhë ne, vëhë Hasen xi hatuxa tjin rë cjuaquixi rë Nina. Xuta xi marcuaain rë me tséhë Nina ne, cumaji xi cuisehen Hasen vëhë xahasen rë me ta, tséhë xi tsijin rë me Hasen vëhë hacuaha hvíin me Hasen vëhë. Peru ngayun ne, hyun Hasen vëhë ta, tséhë xi tacun cahndé cojo nuju hacuaha cuisehen xahasen nuju.

¹⁸ 'Ngahan ne, hacuiin cuiyuju nuju suvun ta cuya nga cuitejñacahndé cojo nuju. ¹⁹ Ha tu hitsë sa ne, ha quihndé scuiin ná xuta. Peru ngayun ne, chun ná. Hane tséhë xi ngahan ne, hatuxa tjin ná cjuahñu ne, vëhë xi ngayun ne, hatuxa sacú nuju cjuahñu xatsë. ²⁰ Nixtin hya ne, cuijne rcun xi ngahan ne, tejñaya xahasen rë Nahmi naha, hane ngayun ne, nechunyun xahasen naha, hane ngahan ne, tejñaya xahasen nuju.

²¹ 'Xuta xi tivihndé sacuatjin vitéxa ne, me vëhë xi hmu cacun ná me. Hane xuta xi cuatjin hmu cacun ná me ne, hacuaha sahmi hmu cacun Nahmi naha me. Ngahan ne, hacuaha sahme hmú cárcon me, hacuaha suá cumachaya rë me yo ngahan. —Cuatjin cachja Jesús.

²² Judas, me xi hacuiin cha Judas Iscariote jan ne, cavinenguise me cuitjin:
—Tatá, ¿hacutjin má xi tuhun cumachaya niji yo ngayun, hane hacuiin cojo yéjé sa xuta ni? —Cuatjin cavinenguise me.

²³ Ngajan xi Jesús ne, cuitjin cafayangui me:
—Xuta xi hmu cacun ná me ne, hacuaha cuihndé me tséhë cjua na. Hane sahmi hmu cacun Nahmi na. Hacuaha cuinduvín cuinechinyincahndín xahesen rë me.
²⁴ Xuta xi hacuiin hmu cacun ná me ne, vihndiin me tséhë cjua na. Cjua xi tinuhun vi ne, hacuiin cjua na suva ta cjua rë Nina Nahmi naja, me xi catsingatju ná.

²⁵ 'Jemu cjín cjua tichjá cojo nuju jinguyéjé rë xi tejña sa cojo nuju. ²⁶ Peru Hasen rë Nina xi tsingatju Nina Nahmi naja xi cuejña cahndé na. Véhë cuisecoo nuju, tsinguixi cojo nuju yéjé sa cjua xi machaja, hacuaha tsinguitsjen nuju tséhë yéjé cjua xi ha cachjá cojo nuju.

²⁷ 'Cjuandaja cjua jeya cuejñá nuju. Cjuandaja cjua jeya na suá nuju. Peru hacuiin sacuatjin sua xuta ngasunhndé suá nuju. Xicamandyain tacún, xicamacjiin tacún. ²⁸ Ha canuhun xi cachjá cojo nuju ta cjué Peru cuya nga cuinduva tjéngue nuju. Sa xi ndaja Jain hmu tacún ná ne, hacuaha ndama nuju xi cjué tjéngue Nina Nahmi naja ta, Nina Nahmi naja ne, hitsé sa venguchji rë me xi cuma ná ngahan. ²⁹ Ha cachjá cojo nuju quihndé, chaja sa xi cuetjucaa cjua véhë, cojo sa xi hya xi cuetjucaa ne, ngayun ne, cumacjain nuju. ³⁰ Ha quihndé cuichjaan sa cojo nuju cjín cjua ta, ha nduva Satanás, xi matitjun tséhë ngasunhndé. Peru ngahan ne, tsajin mé xi cuma sahmi cojo ná. ³¹ Ngahan ne, sahme sacuatjin cavitexa Nina Nahmi naja, cojo sa xi yéjé xuta ne, cumachaya rë me xi hmú cárdena Nina Nahmi naja.

'Nduvun ne, cuanguenxeen tséhë nguehe. —Cuatjin cachja Jesús.

15

Chja Jesucristu xi sacuaha nahñu naa rë xca rë uva má me

¹ Hacuaha cachja sa Jesús cuitjin:
—Ngahan ne, sacuaha nahñu naa cjuaquixi rë xca rë uva ngahan, hane Nahmi na. Sacuaha me xi tsicha xcatjé véhë me. ² Jima ngu nahñu tsja rë xi vaquiin tú rë ne, vaté me. Hane jima ngu nahñu tsja rë xi vaquí tú rë ne, vatéjní me tsja langa rë, cojo sa xi cjín sa tú rë cuaquí. ³ Hacuanitjin ni nuju ngayun xi sacuaha nahñu tsja rë jan ngayun ta, cjua xi cachjá cojo nuju ne, ha catsityahi rë cjuatacun nuju. ⁴ Nihñutangun sa cjuatacun nuju cojo ná, hane ngahan ne, sahmetangun cjuatacun na. Cojo nuju. Ha hyan ta nahñu tsja rë ne, cumaji sua tú rë sa xi tsajin quitahácoo cojo nahñu naa rë. Hacuanitjin ni nuju ngayun ta cumaji ninguitsujun cjuandaja rë Nina sa xi tsajin tjin tangun cjuatacun nuju cojo ná.

⁵ 'Ngahan ne, sacuaha nahñu naa rë xca rë uva ngahan, hane ngayun ne, sacuaha nahñu tsja rë. Xuta xi tjin tangun cjuatacun rë me cojo ná hacuaha tjin tangun cjuatacun na. Cojo rë me ne, me véhë ne, jercu tsinguitsojo me cjuandaja rë Nina. Véhë xi sa xi tsajin tjin tangun cjuatacun nuju cojo ná ne, cumaji camahani ninguitsujun cjuandaja rë Nina. ⁶ Xuta xi tsajin tjin tangun cjuatacun rë me cojo ná ne, cuatju me cuma sacuatjin vatju nahñu tsja rë xca rë uva xi tijñi jan má: chandi rë, sehe xi; sehe chjaya rë cjue cueti. ⁷ Sa xi nihñu tangun sa cjuatacun nuju cojo ná hacuaha cuiyujucahndé sa cjua na. Hane ngajñi rë cjuatacun nuju ne, chjahyun tu mé ni xi meje nuju, hane sacú nuju. ⁸ Nahmi na. Ma jyé ma hnga me cojo Hasen rë me hya xi ningacun xi xuta ladu na. Hacuaha cuanitjin hmú cárdena nuju. Xicanichayun cjuahmutacun na. ¹⁰ Sa xi vinuhun tséhë cjua xi vitéxa nuju ne, ngayun ne, hatuxa nichayun cjuahmutacun na. Sacuatjin ná ngahan xi cavitexa ná Nahmi na. Hacuaha tsichayaan cjuahmutacun rë me.

¹¹ 'Cuatjin chjá cojo nuju, cojo sa xi cjuasua xi tjin ná ne, cuejña cahntsua xahasen nuju, sehe jercu tu ndaja camahani cuma nuju. ¹² Vihi cjua xi vitéxa nuju: nihñu hmu tacún xingun xingu xingu ngayun, sacuatjin sahme hmú cácul nuju ngahan. ¹³ Tsajin yo xi hitsë sa jyé cjuahmutacun tjin rë xi cuma rë ngu xuta xi sua me yojo rë me ngatsë rë amigu rë me. ¹⁴ Hane ngayun ne, amigu naha má ngayun, sa xi nihñu sacuatjin xi vitéxa nuju. ¹⁵ Ha quihndë cuichjaan xi hndixahan naha ngayun ta, tséhë xi ngu mosu hndixahan ne, hvín mé xi sahmi nai rë. Ngayun ne, amigu naha chjá tsujun ta, tséhë xi yéjé cjua xi cahndë xi cachja Nahmi naha ne, casuá camachaya nuju. ¹⁶ Hacuiin ngayun canaxujun ná ta ngahan cavaxejen nuju. Hacuaha casuáxa nuju xi cuangun ninguitsujun cjuandaja rë Nina. Hane cjuandaja vëhë ne, tsajin nu tsajin nixtin xi cjué. Xi cuatjin nihñu ne, tu mé ni xi chjahyun rë Nina Nahmi naja ngatsë rë xi xuta ladu naha má ngayun ne, sua nuju me. ¹⁷ Vihi cjua xi vitéxa nuju: nihñu hmu tacún xingun xingu ngayun. —Cuatjin cachja Jesús.

Choho vëë xuta Jesucristu cojo xuta ladu rë me

¹⁸ Quijinduju sa cachja Jesús cuitjin:

—Sa xi choho vëë nuju xuta xi marcuaain rë tséhë Nina ne, suá cumachaya nuju ta chaja sa xi choho scueë nuju me ne, ngahan ne, ha choho vëë ná me. ¹⁹ Sa xi hacuaha xuta xi marcuaain rë tséhë Nina má ngayun ne, xuta xi cuacun vë ne, sahmi hmu cacun nuju me ta, ngayun ne, ladu rë me ngayun. Peru tséhë xi ngayun ne, hacuiin xuta xi marcuaain rë tséhë Nina má ngayun ta ngahan cavaxejen nuju xi cuetjunkun tséhë xuta xi cuacun vë, vëhë xi choho vëë nuju me. ²⁰ Ninguitsjun cjua xi cachjá cojo nuju hya xi cachjá cojo nuju cuitjin: “Ngu mosu hndixahan ne, hacuiin hitsë sa venguichji rë xi cuma rë nai rë.” Sa xi catsuyiyiha tjengui ná xuta cojo cjuahngatacun ne, hacuaha tsuyiyihiyatjengui nuju me cojo cjuahngatacun. Sa xi cahndë me tséhë cjua naha ne, hacuaha cuihndë me tséhë cjua nuju ngayun. ²¹ Yéjé xcusun vëhë sahmi xuta xi cuacun vë cojo nuju ngatsë naha ta, tséhë xi hvín me Nina, me xi catsingatju ná. ²² Tsajin mé jyé quitjen xuta xi cuacun vë sa xi canduvaan cachjá cojo rë me. Peru quihndë ne, sacuinyiñ rë me mé xi cuichja me xi cuaxëtje me yojo rë me. ²³ Xuta xi choho vëë ná ngahan ne, hacuaha cojo Nahmi naha choho vëë me. ²⁴ Tsajin mé jyé quitjen xuta xi cuacun vë sa xi casahmee ngajñi rë me cjuarcun xi tsajin sa ngu xuta xi ha casahmi me. Peru quihndë ne, ha cavëë me cjuarcun xi casahme, hane choho vëë ná me cojo Nahmi naha. ²⁵ Peru cuatjin camá cojo sa xi cuetjucaa cjua xi camahindu xcun xujun rë Nina xi chja xuta xi cuacun vë xi jemu vihndë me tséhë, cjua xi chja cuitjin: “Choho cavëë ná me, handasa vechiin chuva rë.” Cuatjin chja cjua jan.

²⁶ 'Cuinduva Hasen rë Nina, xi hatuxa tjin rë cjuaquixi rë Nina, hane cuisecoo nuju. Ngahan tsingátju nuju Hasen vëhë xi cuetju hiscan tacun Nina Nahmi naja, hane xi cjuehe ne, cuichja tsahan. ²⁷ Hacuaha ngayun ne, cuinújun tsahan cojo xuta, tséhë xi ngayun ne, ha nechun cojo ná hisca ntsacu cavetsihin.

16

¹ 'Cuatjin tichjá cojo nuju, cojo sa xi hacuiin cuetjunkun tséhë ndiya naha. ² Cuechú nixtin xi cumachohotje nuju yungun. Cuechú nixtin xi xuta xi tsiquehen nuju me ne, tsingataha cacun me xi jemu ndaja faharcun me Nina xi cuatjin sahmi me. ³ Cuatjin sahmi me ta, tséhë xi hvín me Nina Nahmi naja, hacuaha vijnii rcu me yo ngahan. ⁴ Cachjá cojo nuju cjua vëhë, cojo sa xi hya xi cuechú hora xi cuetjucaa ne, ninguitsjun xi cuatjin cachjá cojo nuju. —Cuatjin cachja Jesús.

Hacutjin sahmi Hasen rë Nina

Quijinduju sa cachja Jesús cuitjin:

—Cachjaan cojo nuju cjua vëhë ntsacu cavetsihin ta, tséhë xi ngahan ne, tejña cuaha cojo nuju. ⁵ Peru quihndë ne, cjuétjéngüe me xi catsingatju ná, hane hisca ngu ngayun ne, chjinengunsuun ná jani cjué. ⁶ Hane tséhë xi cuatjin cachjá cojo nuju cjua vëhë ne, ña

catsë rë xahasen nuju cjuachoho. ⁷ Peru ngahan ne, cuichjá cojo nuju cjuaquixi ta tsujun ndaja xi cjué ta, sa xi cjueen ne, Hasen xi cuisecoo nuju jan ne, hatuxa cuinduvaain. Peru sa xi cjué ne, tsingátju nuju Hasen rë Nina vë. ⁸ Hane hya xi Hasen vëhë cuinduva ne, vëhë tsinguixi xi hacuiin cuatjin xi tsingataha cacun xuta tséhë cjuatsehen, hacuiin cuatjin xi tsingataha cacun me tséhë cjuandaja, hacuiin cuatjin xi tsingataha cacun me tséhë chuva rë xi cjuahachuva Nina xuta cojo cjuatacun rë me. ⁹ Hacuiin cuatjin xi tsingataha cacun xuta tséhë cjuatsehen ta, tséhë xi manguaain cacun me cojo ná. ¹⁰ Hacuiin cuatjin xi tsingataha cacun xuta tséhë cjuandaja ta, tséhë xi ngahan ne, cjuétjéngüë Nina Nahmi naja hane ngayun ne, ha quihndë chuun ná. ¹¹ Hacuiin cuatjin xi tsingataha cacun xuta tséhë xi cjuahachuva Nina xuta cojo cjuatacun rë me ta, tséhë xi Satanás, xi matitjun tséhë ngasunhndë vihi ne, ha catsichuva Nina cojo cjuatacun rë.

¹² Jemu tjin sa ná cjua xi cuichjá cojo nuju, peru ngayun ne, scaain nuju cuinuhyun quihndë. ¹³ Peru hya xi cuinduva Hasen xi hatuxa tjin rë cjuaquixi rë Nina ne, vëhë cuinchandiyandaja nuju ndiya rë cjuaquixi. Hacuiin cojo cjuatacun rë suvá xi cuichja ta sacuatjin cjua xi chja Nina cojo ne, cjua vëhë cuichja. Hacuaha vëhë cuichja cojo nuju hacutjin cuma nixtin nduva. ¹⁴ Hasen vëhë ne, vëhë sahmi jyë sahmi hnga ná cojo cjuatacun naha ta, tséhë xi vëhë cjuaha xi tsahan sehe sua cumachaya nuju tsahan. ¹⁵ Yéjë ni xi tséhë Nina Nahmi naja ne, hacuaha tsahan. Vëhë xi cachjá xi Hasen jan ne, cjuaha xi tsahan sehe sua cumachaya nuju tsahan. —Cuatjin cachja Jesús.

Cuya cjuasua cjuachoho rë xuta ladu rë Jesús

¹⁶ Hacuaha cachja sa Jesús cuitjin:

—Ha tu hitsë sa ne, ha quihndë chuun ná, hane ha tu hitsë nga sa ne, chun ná.
—Cuatjin cachja Jesús.

¹⁷ Ngajan xi ngujo xuta ladu rë Jesús jan ne, cuitjin cachja me cojo xicjin me:

—¿Mé vijne cjua xi cuatjin chja me cojo naja? Chja me xi: “Ha tu hitsë sa ne, chuun ná, hane ha tu hitsë nga sa ne, chun ná”, hacuaha chja sa me xi: “Tséhë xi cjué tjéngüë Nina Nahmi naja”. ¹⁸ ¿Mé vijne cjua xi “ha tu hitsë sa”? Vijnii rcuun mé xi chja me. —Cuatjin cachja me cojo xicjin me.

¹⁹ Jesús ne, ha vëe me xi meje cjuinenguise xuta xi cuacun jan me tséhë cjua vëhë, vëhë xi Jesús ne, cachja me cojo rë xuta jan cuitjin:

—¿Há tichjinengunsun xingun tséhë xi cachjá xi ha tu hitsë sa ne, chuun ná hane ha tu hitsë nga sa ne, chun ná? ²⁰ Cuichjá cojo nuju cjuaquixi ta ngayun ne, chjihndun hacuaha chjihndunsun, peru xuta xi marcuaain rë me tséhë Nina ne, jercu ndaja cuma rë me. Ngayun ne, jemu chocho cuma nuju, peru cjuachoho nuju ne, cuya sua. ²¹ Hyá xi ngu chjuun tsin rë me quihndi ne, jemu tjin rë me cjuachoho ta, tséhë xi cavechú hora xi cuatju me cjuañihi. Peru hya xi cavatju catsin quihndi ne, ha quihndë vitsjiin rë me tséhë cjuañihi jan, ngatsë rë cjuasua rë me xi catsin ngu quihndi. ²² Cuatjin nuju ngayun ta quihndë ne, tjin nuju cjuachoho. Peru ngahan ne, cuya scuëë nga nuju, hane ngayun ne, jemu ndaja cuma rë xahasen nuju, hane cjuasua nuju jan ne, tsajin yo cuma cjuahatahá. ²³ Hane nixtin hya ne, chjinengunsun ná hisca ngu cjua.

‘Cuichjá cojo nuju cjuaquixi ta tu mé ni xi chjahyun rë Nina Nahmi naja ne, sua nuju me tséhë xi ladu naha má ngayun. ²⁴ Hisca quihndë ne, cjéé chjahyun ná ngu cjuandaja tséhë xi ladu naha má ngayun. Chjahyun ne, sehe sacú nuju, cojo sa xi xahasen nuju ne, tsé rë cjuasua. —Cuatjin cachja Jesús.

Cacaa rë Jesucristu catsinguijne me cjuatsehen rë ngasunhndë

²⁵ Quijinduju sa cachja Jesús cuitjin:

—Ngahan ne, cojo ejemplu cachjá cojo nuju. Peru cuechú nixtin xi ha quihndë hacuiin cojo ejemplu cuichjá cojo nuju ta cuichjáquixë cojo nuju tséhë Nina Nahmi naja. ²⁶ Nixtin hya ne, hatuxa chjahyun cjuandaja tséhë xi ladu naha má ngayun. Hane chjaan cojo nuju xi cuichjá ngatsë nuju cojo Nina Nahmi naja ta, ²⁷ suvá Nina Nahmi naja ne, jemu meje

rë me ngayun, tséhë xi ngayun ne, hacuaha jemu meje nuju ngahan hacuaha macjain nuju xi ngahan ne, Nina catsingatju ná me. ²⁸ Ngahan ne, hiscan tacun Nina cavétju canduvá nguehe ngasunhndë. Quihndë ne, cuétju tséhë ngasunhndë, cuya cjuétjëngüë Nina Nahmi naja. —Cuatjin cachja Jesús.

²⁹ Ngajan xi xuta ladu rë Jesús ne, cuitjin cachja me:

—Chutsujun ni. Quihndë ne, hacuiin cojo ejemplu tinújun ta tinújunquixun. ³⁰ Quihndë ne, hyin ta ngayun ne, hyun yéjë ni cjuatacun, hacuaha hacuiin sahmi nguyjë xi cjuinenguise nuju xuta ngu cjua cojo sa xi cumachaya nuju mé xi tsingataha cacun xuta jan. Ngatsë rë vëhë xi macjain niji xi Nina catsingatju nuju me. —Cuatjin cachaja xuta ladu rë Jesús.

³¹ Ngajan xi Jesús ne, cuitjin cafayangui me:

—¿Há macjain Jain nuju quihndë? ³² Chutsujun ni. Cuechú hora o ha hisca cavechú xi cuitsojo ngayun, jima ngu ngayun cojo ndya nuju, hane cuejñu ná suva. Peru ngahan ne, hacuiin suva tejña ta Nina Nahmi naja tacun me cojo ná. ³³ Cuatjin chjá cojo nuju cojo sa xi sacú nuju cjuandaja cjuajeya ngatsë rë xi tjin tangun cjuatacun nuju cojo ná. Nguehe ngasunhndë ne, vatjun cjuañihi. Peru tuhun cjuasua xahasen nuju ta, ngahan ne, hacuaha cacaá ná catsinguíne cjuatsehén rë ngasunhndë. —Cuatjin cachja Jesús cojo xuta ladu rë me jan.

17

Fehya Jesucristu cjuandaja xi cuma rë xuta ladu rë me

¹ Xi cavatju cachja Jesús cuatjin ne, sehe cavutsejenniji me ngahnga, hane cachja me cuitjin:

—Ngayun Nahmi naha, ha cavechú hora. Nihñu jyë nihñu hnga ná cojo Hasen naha ngahan xi Quihndi nuju ngahan, cojo sa xi ngahan ne, hacuaha sahme jyë sahme hnga nuju cojo Hasen nuju. ² Ngayun catuhunxun ná xi matitjun ngahan tséhë yéjë xuta, cojo sa xi yéjë me xi catuhun ná ne, suá rë me cjuahñu xatsë. ³ Hane cuitjin xi sacú rë me cjuahñu xatsë, xi vëe me ngayun, ngayun xi ngu ni ngayun xi Nina xi cjuaquixi ngayun, hacuaha xi vëe ná me, ngahan xi Jesucristu ngahan, ngahan xi ngayun caningatjun ná.

⁴ Ngahan ne, casahme jyë casahme hnga nuju nguehe ngasunhndë ta, catsinguínetaha xa xi catuhun ná xi sahme. ⁵ Quihndë ne, nihñu jyë nihñu hnga ná cojo Hasen naha ndyá hiscan nechun, ngayun Nahmi naha. Tuhun ná Hasen ndajyhi xi ha tjin ná hya xi nechan tangun cojo nuju hisca hya xi chaja sa cuejñia ngasunhndë.

⁶ Ngahan ne, casuá camachaya rë xuta xi catuhun ná nguehe ngasunhndë yo ngayun. Me xi cuacun vë ne, tsujun me, peru catuhun ná me. Hane cahndë me tséhë cjua nuju. ⁷ Ha vëe me quihndë xi yéjë ni xcusun xi catuhun ná ne, ngayun caningatjun. ⁸ Cuatjin vëe me ta, tséhë xi yéjë ni cjua xi catuhun ná ne, hacuaha casuá rë me. Hane me xi cuacun vë ne, cafahatsja me cjua vëhë, hacuaha vëendaja me xi hiscan nechun cavétju canduvá nguehe, hacuaha macjain rë me xi ngayun caningatjun ná.

⁹ Ngahan ne, tichjá cojo nuju ngatsë rë me xi cuacun vë. Tichjaan ngatsë rë xuta xi marcuaain rë tsujun ta tichjá ngatsë rë me xi catuhun ná, tséhë xi tsujun me. ¹⁰ Yéjë ni xi tsahan ne, hacuaha tsujun, hane xi tsujun ne, hacuaha tsahan. Hane ngahan ne, cama jyë cama hnga ngahan cojo Hasen naha ngatsë rë xi tjin tangun cjuatacun rë me xi cuacun vë cojo ná. ¹¹ Ha quihndë cuitejñaa sa nguehe ngasunhndë. Me xi cuacun vë ne, siu me ngasunhndë, peru ngahan ne, cuinduvatjëngüë nuju. Ngayun Nahmi naha, ngayun xi hatuxa tyjahi cjuatacun nuju ne, nihñu me cuidadu cojo ngahñu nuju, ngahñu xi catuhun ná, cojo sa xi tjin tangun cjuatacun rë me cojo xicjin me, sacuatjin naja ngayaan. ¹² Hya xi tejña cojo rë me ne, casahme cuidadu me cojo ngahñu nuju xi catuhun ná. Casahme cuidadu me, hane hisca ngu me cachajin me. Suvá ni cha xi hatuxa chajá ne, cha vëhë xi cachajá cha, cojo sa xi cuetjucaa cjua xi camahindu xcun xujun nuju. ¹³ Peru quihndë ne, cuinduvatjëngüë nuju. Hane tichjá cjua vihi nguehe ngasunhndë, cojo sa xi xuta ladu naha ne, tsé rë xahasen rë me cojo cjuasua xi quitsë rë xahasen naha suva. ¹⁴ Ngahan

ne, casuá camachaya rë me cjua nuju. Hane xuta ngasunhndë xi marcuaain rë tsujun ne, choho vëë rë me, tsëhë xi hacuiin tsëhë ngasunhndë má me, sacuatjin ná ngahan xi hacuiin tsëhë ngasunhndë má ngahan. ¹⁵ Cjuehyaan nuju xi naxunxun me tsëhë ngasunhndë ta tiféhya nuju xi nihñu me cuidadu tsëhë Satanás. ¹⁶ Xuta ladu naha jan ne, hacuiin tsëhë ngasunhndë má me, sacuatjin ná ngahan xi hacuiin tsëhë ngasunhndë má ngahan. ¹⁷ Nihñu tsujun jain me cojo cjua xi hatuxa cjuaquixi. Cjua nuju ne, vëhë xi hmí rë cjuaquixi. ¹⁸ Sacuatjin caningatjun ná ngahan ngajñi rë xuta xi marcuaain rë tsujun ne, hacuaha cuatjin catsingátju xuta ladu naha ngajñi rë xuta xi cuacun vë. ¹⁹ Hane ngatsë rë xuta ladu naha ne, suá nuju yojo naha, cojo sa xi me xi cuacun vë ne, hacuaha tsujun jain cuma me cojo cjuaquixi.

²⁰ 'Quihndë ne, hacuiin ngatsë rë suvá ni xuta ladu naha vi xi tichjá cojo nuju ta hacuaha cojo ngatsë rë me xi sehe cumangu cacun cojo ná xi cuihndë me cjua xi chja xuta ladu naha tsahan. ²¹ Ngahan ne, xi meje ná ne, xi yéjë ni me xi cuacun vë ne, cuma tangun cjuatacun rë me cojo xicjin me. Sacuatjin nuju ngayun, Nahmi naha, xi nechunyun xahasen naha hane ngahan ne, tejñaya xahasen nuju ne, meje ná xi me xi cuacun vë ne, hacuaha hincha me xahasen naja, cojo sa xi xuta ngasunhndë ne, cumacjain rë me xi ngayun caningatjun ná. ²² Ngahan ne, casahme yehe casahme hnga me cojo cjuatacun rë me sacuatjin canihñu jyé canihñu hnga ná ngahan cojo cjuatacun naña, cojo sa xi cuma tangun cjuatacun rë me cojo xicjin me, sacuatjin tjín tangun cjuatacun naja ngayaan cojo xingueen. ²³ Meje ná xi ngahan ne, cuitejñaya xahasen rë me, sacuatjin nechunyun xahasen naña. Meje ná xi cuma tangun camahani cjuatacun rë me cojo xicjin me, cojo sa xi xuta ngasunhndë ne, cuijne rcu me xi ngayun caningatjun ná, hacuaha xi nihñu hmu tacún me sacuatjin nihñu hmu tacún ná ngahan.

²⁴ 'Ngayun, Nahmi naña, xuta xi catuhun me xi cuma me ladu naha ne, meje ná xi hiscan xi cuitejña ne, hacuaha ngajan cuiyuju me cojo ná, cojo sa xi scutsejen me hacutjin jyé hnga ngahan cojo hasen ndajyihu naña xi ngayun catuhun ná, tsëhë xi canihñu hmu tacún ná hisca chaja sa xi cuejña ngasunhndë. ²⁵ Ngayun Nahmi naña, ngayun xi quixi ngayun cojo cjuatacun nuju, xuta ngasunhndë ne, hvíñ nuju me, Peru ngahan ne, hvë nuju, hane xuta ladu naha vi ne, vëë me xi ngayun caningatjun ná. ²⁶ Ngahan casuá camachaya rë me yo ngayun, hane suá sa cumachaya rë me, cojo sa xi cjuahmutacun xi tjín nuju cojo ná ne, cuejña cahntsua xahasen rë me hacuaha ngahan ne, cuitejñaya cahntsua xahasen rë me. —Cuatjin cafehya Jesús cjuandaja cojo Nina.

18

Hacutjin camá xi cachjahá rë Jesucristu

¹ Hya xi camá ne, xi cavatju cachja Jesús cjua vëhë ne, sehe cavitju me quiji me cojo xuta ladu rë me ngunda vëhë tsëhë caniña Cedrón. Hane ngajan cavisehen Jesús cojo xuta ladu rë me ngu ngajñi yatjé xi tjín jan. ² Quihndë ne, cha Judas, cha xi sahmi rë entregadu Jesús ne, hacuaha vëë cha cahndé vëhë ta, jemu quiji Jesús cahndé vëhë camatangun me cojo xuta ladu rë me. ³ Ngajan xi cha Judas ne, quijicojo cha ngujo sindadu cojo cha mayu cojo cha nisë rë cha, cha xi catsingatju nahmi xi matitjun cojo cha fariseo. Quiji cha xi cuacun jan ngajan cojo ndihi cojo quicha. ⁴ Hane Jesús ne, tsëhë xi ha vëë me yéjë xcusun xi cuatju me cuma ne, quijivaha me xcun cha xi cuacun jan, sehe cavinenguise me cha cuitjin:

—¿Yo xi meje nuju? —Cuatjin cavinenguise me.

⁵ Ngajan xi cha xi cuacun jan ne, cuitjin cafayangui cha:

—Xuta Nasaret xi hmí rë Jesús. —Cuatjin cafayangui cha.

Hane Jesús ne, cuitjin cachja me:

—Ngahan xi nújun vë. —Cuatjin cachja me.

Quihndë ne, Judas, cha xi sahmi rë me entregadu ne, cojo cha secun cha cojo cha xi cuacun vë. ⁶ Hane hya xi cachja Jesús xi: "Ngahan xi nújun vë" ne, quijingaxtun yéjë cha xi cuacun jan, hane caticja cha. ⁷ Ngajan xi Jesús ne, cavinenguise nga me cha cuitjin:

—¿Yo xi meje nuju? —Cuatjin cavinenguise me.
 Hane cha xi cuacun jan ne, cuitjin cachja nga cha:
 —Xuta Nasaret xi hmí rë Jesús. —Cuatjin cachja cha.
⁸ Hane Jesús ne, cuitjin cafayangui me:
 —Ha cachjá cojo nuju ta ngahan xi nújun vë. Sa xi ngahan meje nuju ngahan ne, tuhun cahndé catje me xi cuicun vi. —Cuatjin cafayangui me.
⁹ Cuatjin cachja Jesús cjua vëhë cojo sa xi cuetjucaa cjua xi ha cachja me cuitjin: “Xuta xi catuhun ná me ne, hisca ngu me catsichajan me.” ¹⁰ Ngajan xi Simón Pedru ne, cavaxë me quichandujú xi yaha me, hane cavatésun me tyjavañuju quixi mosu hndixahan rë nahmi xi matitjun jan, cha xi hmí rë Malco. ¹¹ Ngajan xi Jesús ne, cuitjin cachja me cojo Pedru:
 —Teyunndujun quicha nuju vë. Hatuxa tsingatehen xi cuátju cjuañihi sacuatjin xi meje rë Nina Nahmi naja. —Cuatjin cachja Jesús.

Nahmi xi matitjun ne, sahmi cuenda me jyé rë Jesús

¹² Hya xi camá ne, cha sindadu cojo capitán rë cha, cojo mayu cojo cha nisë rë cha, cha xi catsingatju xutaxa rë yungun jan ne, cafaña cha Jesús, catsihñu cha me, ¹³ sehe qui ji cani cha me titjun xcun Anás. Anás vë ne, nahmichahya rë Caifás má me. Hane nu vëhë ne, nahmi xi matitjun tséhë yéjë ni nahmi má Caifás. ¹⁴ Quihndë ne, Caifás vë ne, me vëhë xi cavinchangui me xutaxa rë xi ndaja tséhë xutaxa rë xi ngu xihin ni cueya ngatsë rë yéjë ni xuta.

Chja Pedru xi hacuiin ladu rë Jesucristu má me

¹⁵ Quihndë ne, Simón Pedru cojo ngu sa cha ladu rë Jesús jan ne, tjengui me qui ji me cojo Jesús. Hane cha ladu rë Jesús xingu jan ne, tséhë xi vëe nahmi xi matitjun jan cha ne, cojo cha cavisehen cha cojo Jesús cahntsua hnchua ndatsen ndava nahmi xi matitjun jan. ¹⁶ Peru Pedru ne, casecun ni me ngajan candatsen tingotjo hnchua jan. Ngajan xi cha ladu rë Jesús xi vëe nahmi jan ne, cavetju nga cha qui ji cachja cha cojo na xi quitahá cuidadu rë tingotjo hnchua jan. Hane sehe catsinguehen cha Pedru cahntsua hnchua. ¹⁷ Hane na xi sahmi cuidadu tingotjo hnchua jan ne, cuitjin cavinenguise rë na Pedru:

—¿Hacuiin cojo ngayun má ngayun ladu rë me xi cuajyahi vë? —Cuatjin cavinenguise na.

Hane Pedru ne, cuitjin cafayangui me:
 —Jéya, hacuiin. —Cuatjin cafayangui me.

¹⁸ Hane mosu rë nahmi jan cojo cha sindadu jan ne, cavejña cha ngu ndava ndihi, tséhë xi jemu hnchan. Sehe hinchacun cha tijima hasu rë cha jan. Hacuaha cojo Pedru secun me jan, jima hasu rë me.

Fahatáha nahmi xi matitjun jan Jesucristu

¹⁹ Hane xi cafehe cha xi cuacun jan cojo Jesús jan ne, sehe cavetsihin cahafatáha nahmi xi matitjun jan me tséhë xuta ladu rë me cojo tséhë cjuachacun rë me. ²⁰ Hane Jesús ne, cuitjin cafayangui me:

—Ngahan ne, xcun cojo xcun cachjá cojo yéjë ni xuta, hacuaha cavicuyá rë me ngajan yungun langa o sa xi ngajan yungun xi matitjun, hiscan xi matangun ngayejen ni xuta tjé rë Israel. Tsajin mé xi cachjá xi táhahma. ²¹ Hane ¿mé má ngahan chjuhantuhun ná ni? Chjuhantuhun rë me xi cahndé cjua na. Chjinengunsun rë me mé xi cachjá cojo rë me. Me xi cuacun vë ne, vëe me cjua xi cachjá. —Cuatjin cafayangui Jesús.

²² Hane xi cuatjin cachja Jesús cjua vëhë ne, ngu cha mayu xi secun tiña jan ne, cavajaya cha ngu xcun Jesús, sehe cachja cha cuitjin cojo rë me:

—¿Há cuatjin chjayengui tséhë nahmi xi matitjun? —Cuatjin cachja cha.
²³ Ngajan xi Jesús ne, cuitjin cafayangui me tséhë cha:
 —Sa xi choho cachjá ne, tinújun cojo yéjë xuta mé xi choho cachjá. Peru sa xi ndaja cachjá ne, ¿mé má cuatjin vujun ná ni? —Cuatjin cafayangui me.

²⁴ Ngajan xi Anás ne, hacuanitjin ni tjihñu cuaha Jesús ne, catsingatju me Jesús xcun nahmi xi matitjun tséhë yéjë ni nahmi.

Chja nga Pedru xi hacuiin ladu rë Jesucristu má me

²⁵ Jinguyéjë rë xi tichjahátáha rë Jesús jan ne, Pedru ne, secun me xcun ndihi tijima hasu rë me. Hane cachjahátáha rë me cuitjin:

—¿Hacuiin cojo ngayun má ngayun ladu rë me vëhë? —Cuatjin cachjahátáha rë me.

Hane Pedru ne, cavetsangui me, cuitjin cachja me:

—Jéya, hacuiin. —Cuatjin cachja me.

²⁶ Ngajan xi ngu mosu rë nahmi xi matitjun jan, cha xi xicjin rë cha xi cavatësun Pedru tyjavañuju jan ne, cuitjin cachja cha cojo Pedru:

—¿Há cahveen nuju cojo rë me ngajñi yatjë jan ni? —Cuatjin cachja cha.

²⁷ Cavetsangui nga Pedru ngu ndiya. Hane ha hora vëhë ni ne, cajihnda xahnda.

Fahatáha Pilatu Jesucristu

²⁸ Ngajan xi xuta matitjun tséhë xuta tjë rë Israel jan ne, cavaxë me Jesús tséhë ndava Caifás, hane quijicojo me ndihya jyé hiscan tacun Pilatu, xutaxa rë xi matitjun. Nguitajñu xati hora vëhë. Hane xuta xi quijicojo rë Jesús jan ne, cavisiin me cahntsua ndihya jyé jan, ngatsë rë xcusun rë me xi ma chocun yojo rë me xcun Nina hya xi visehen me ndava xutaxín. Hane sa xi cuatjin cuma chocun yojo rë me ne, cumaji sinë nguixun me comida suhi tséhë Pascua. ²⁹ Vëhë xi cavetju Pilatu quijitjengui rë me candatsen. Hane cuitjin cavinenguise me:

—¿Mé jyé vinchun tséhë cha xi cuijyahi vi? —Cuatjin cavinenguise Pilatu.

³⁰ Hane xuta xi cuacun jan ne, cuitjin cafayangui me:

—Sa xi hacuiin choho tisahmi cha ne, canduvinchanii nuju cha. —Cuatjin cafayangui me.

³¹ Hane Pilatu ne, cuitjin cachja me:

—Chjuhun cha ne, chjuhunchuvun suvun cha cojo jyé rë cha sacuatjin chja ley nuju.

—Cuatjin cachja Pilatu.

Ngajan xi xutaxa rë yungun xi cuacun jan ne, cuitjin cachja me:

—Ley nuju ngayun ne, chja ta ngayin ne, cumaji niquihin xuta. —Cuatjin cachja xuta xi cuacun jan.

³² Cuatjin camá cojo sa xi cuetjucaa cjua xi cachja Jesús hya xi cachja me mé chuva rë cueya me.

³³ Ngajan xi Pilatu ne, cavuya cavisehen nga me ndihya. Hane cajindaya me Jesús, sehe cavinenguise me cuitjin:

—¿Há ngaye xu matitjun ngaye tséhë xuta tjë rë Israel? —Cuatjin cavinenguise me.

³⁴ Hane Jesús ne, cuitjin cafayangui me:

—¿Há cojo cjuatacun nuju suvun chjinengunsun ná cjua vëhë?, o há tsajin ne, ¿há tjin yo cachja cojo nuju tsahan? —Cuatjin cafayangui me.

³⁵ Ngajan xi Pilatu ne, cuitjin cafayangui me:

—¡Peru ngahan ne, hacuiin xuta Israel ngahan! Suvá xuta nangui riji cojo nahmi xi matitjun casahmi ri me entregadu cojo ná. ¿Mé canihñi? —Cuatjin cafayangui Pilatu.

³⁶ Ngajan xi Jesús ne, cuitjin cafayangui me:

—Xa naha xi sahme gubiernu ne, hacuiin ngasunhndë vihi cafahántsa. Sa xi ngasunhndë vihi cafahántsa xa xi sahme gubiernu ne, xuta ladu naha ne, scaan me cojo sa xi cumaji cuma ngahan entregadu tsja xutaxa rë yungun. Peru xa naha xi sahme gubiernu ne, hacuiin nguehe cafahántsa. —Cuatjin cafayangui Jesús.

³⁷ Hane Pilatu ne, cuitjin cachja me cojo Jesús:

—¿Ngajan xi ngaye xi matitjun ngaye ni? —Cuatjin cachja me.

Hane Jesús ne, cuitjin cafayangui me:

—Cuatjin sacuatjin nújun vë. Ngahan ne, canduvá nguehe ngasunhndë hacuaha catsin ngahan cojo sa xi cuichjá cojo xuta cjua xi cquaquixi. Yëjë xuta xi marcun rë me tséhë cquaquixi ne, hatuxa vetaharcu me cjua naha. —Cuatjin cafayangui Jesús.

³⁸ Hane Pilatu ne, cuitjin cachja me:

—¿Mé xi hmí rë cquaquixi ni? —Cuatjin cachja Pilatu.

Chja xutaxa rë yungun xi meje rë xi cueya Jesucristu.

Hane xi cafë cachja Pilatu cjua vëhë ne, sehe cavetju nga me quiji cachja me cojo xutaxa rë yungun, cuitjin cachja me:

—Sacuiin ná hisca ngu jyé rë cha xi cuajyihí vë. ³⁹ Peru ngayun ne, tjin nuju ngu xcusun xi tsisme ngu presu nixtin rë suhi rë Pascua. ¿Há meje nuju xi tsisme me xi matitjun tsujun? —Cuatjin cachja me.

⁴⁰ Hane xuta xi cuacun jan ne, cajindaya me cachja me cuitjin:

—¡Hacuiin cha vëhë ta Barrabás nismu cha! —Cuatjin cajindaya me cachja me.

Quihndë ne, Barrabás jan ne, ngu cha fahataha cjuachan cha.

19

¹ Ngajan xi Pilatu ne, catsingatju me Jesús casehen rë me. ² Hane cha sindadu xi cuacun jan ne, xi camá catsihya cha ngu corona nähýa ne, sehe cavesun cha rcu Jesús, hacuaha catsicaja cha me ngu tsjian moradu. ³ Hya xi camá ne, quijivaha cha jima ngu cha xcun me, sehe cavetsihin cavincha cha viva rë me xi tsixcuehyu cha me sacuaha xi me vëhë matitjun me tséhë xuta tjé rë Israel. Hacuaha cavajaya cha xcun me.

⁴ Hya xi camá ne, Pilatu ne, cavetju nga me candatsen, hane cuitjin cachja me cojo xuta xi cuacun jan:

—Chutsujun ni, cuáxë cha nguehe, cojo sa xi cumachaya nuju ta sacuiin ná hisca ngu jyé rë cha. —Cuatjin cachja Pilatu.

⁵ Ngajan xi Jesús ne, cavetju me candatsen, quisun rcu me corona nähýa hacuaha yaja me tsjian moradu jan. Sehe cachja Pilatu cojo xuta cuitjin:

—Chutsujun ni, cuajyihí cha nguehe. —Cuatjin cachja me.

⁶ Hane hya xi cavëe nahmi xi cuacun matitjun jan cojo cha mayu cojo nisë rë cha Jesús ne, cajindaya cha cachja cha cuitjin:

—¡Tetuhun cha xcun crul! ¡Tetuhun cha xcun crul! —Cuatjin cajindaya cha cachja cha.

Ngajan xi Pilatu ne, cuitjin cachja me:

—¡Chjuhun suvun cha, tetuhun cha xcun cru ta, ngahan ne, sacuiin ná hisca ngu jyé rë cha! —Cuatjin cachja Pilatu.

⁷ Ngajan xi xutaxa rë xi cuacun jan ne, cuitjin cachja me:

—Ngayin ne, tjin ngu ley xi vitexa niji, hane sacuatjin chja ley vëhë ne, vechú chuva rë xi cueya cha ta, tséhë xi cachja suvá cha xi Quihndi rë Nina cha. —Cuatjin cachja xutaxa rë jan.

⁸ Hane xi cahndë Pilatu cjua vëhë ne, hitsë sa catsacjun me camá. ⁹ Sehe cavuya cavisehen nga me cahntsua ndihya, hane sehe cafahatáha me Jesús cuitjin:

—Ngayun ne, ¿jani canduvun? —Cuatjin cafahatáha me Jesús.

Peru Jesús ne, cafayanguin me tséhë Pilatu. ¹⁰ Ngajan xi Pilatu ne, cuitjin cavinenguise me cojo Jesús:

—¿Há chayunguuun tsahan? ¿Há hyúun ta ngahan ne, cuma tsisme nuju hacuaha cuma cuitéxa xi setaha ngayun xcun cru? —Cuatjin cavinenguise Pilatu.

¹¹ Hane Jesús ne, cuitjin cafayangui me:

—Ngayun ne, cuma nihñu cojo ná cuatjin, peru suvá ni ngatsë rë xi Nina casua nuju me cahndë. Vëhë xi me xi casahmi ná entregadu cojo nuju ne, hitsë sa jyé jyé rë me xi cuma nuju ngayun. —Cuatjin cafayangui Jesús.

¹² Xi cahndë Pilatu cjua vëhë ne, cavangui me chuva rë xi tsismi me Jesús. Peru xutacjín jan ne, cajindaya me cachja me cuitjin:

—Sa xi nismu cha xi cuajyihu vë ne, hacuiin amigu rë César, me xi matitjun camahani, má ngayun. Ngu xuta xi chja suvá me xi matitjun me ne, hatuxa condra rë César má me.
—Cuatjin cajindaya me cachja me.

¹³ Hane xi cahndé Pilatu cjua vëhë ne, sehe cavaxë nga me Jesús candatsen, sehe quiyi me cavéjña me hiscan sahmi cuenda me jyé rë xuta, cahndé hiscan hmí rë Texondaja rë, hane xi hne hebreo ne, Gabata hmí rë. ¹⁴ Hora vëhë ne, sacuaha nchisen tséhë nixtin vispra rë suhi tséhë Pascua. Ngajan xi Pilatu ne, cuitjin cachja me cojo xuta:

—¡Chutsujun ni, cuajyihu me xi matitjun tsujun nguehe! —Cuatjin cachja me.

¹⁵ Hane xuta jan ne, cuitjin cajindaya me cachja me:

—¡Naxunxun cha, naxunxun cha tséhë nguehe! ¡Tetuhun cha xcun cru! —Cuatjin cajindaya me cachja me.

Ngajan xi Pilatu ne, cuitjin cavinenguise me:

—¿Há cuétaha me xi matitjun tsujun xcun cru ni? —Cuatjin cavinenguise me.

Ngajan xi nahmi xi cuacun matitjun jan ne, cuitjin cafayangui me:

—¡Ngu ni César, me vëhë xi matitjun me tsijin! —Cuatjin cafayangui me.

¹⁶ Ngajan xi Pilatu ne, cajne cacun me. Hane casahmi me entregadu Jesús xi cjue setaha me xcun cru xi cueya me. Sehe cafahatsja xuta xi cuacun jan me.

Setaha Jesucristu xcun cru

¹⁷ Hya xi camá ne, quisuntyja suvá Jesús cru, cavetju me quiyi me cojo xuta cahndé hiscan xi hmí rë Nínda Rcuun, hane xi hne hebreo ne, Gólgota hmí rë. ¹⁸ Hane ngajan casetaha me xcun cru. Hacuaha cojo sa jo cha cavyuyutaha cha xcun cru rë cha, ngu ngu cha ngu ngu ladu tjehen rë me. Hane Jesús ne, cavasen caseya me. ¹⁹ Hacuaha catsihindu Pilatu ngujo cjua xi casetaha rcu cru rë Jesús, cuitjin camahindu: “Jesús, Xuta Nasaret, Xi Matitjun Tséhë Xuta Israel.” ²⁰ Cjua vëhë ne, jemu cjín xuta cavutaya me, tséhë xi cahndé hiscan casetaha Jesús xcun cru ne, tiña tacun nandya. Camahindu cjua vëhë cojo hne hebreo cojo latín cojo griego. ²¹ Ngajan xi nahmi xi matitjun tséhë xuta tjë rë Israel jan ne, cuitjin cachja me cojo Pilatu:

—Ndajintjin xi cuatjin canihindun “Xi Matitjun Tséhë Xuta Israel” ta, xi ndatjin ne, “Cachja Cha: Ngahan Matitjun Ngahan Tséhë Xuta Israel.” —Cuatjin cachja me.

²² Hane Pilatu ne, cuitjin cafayangui me:

—Ha catsihindu cjua xi meje tsihindu. —Cuatjin cafayangui me.

²³ Ngajan xi sindadu jan ne, xi cavatju cavetaha cha Jesús xcun cru ne, sehe cafaha cha tsjian xcun rë me cojo yéjë sa xi tsé xi xtí xi sahmixa cojo me, cavatéjcha cha ngajni catsiñuju cha. Hacuaha cafaha cha tsjian ngahma rë me. Quihndé ne, tsjian vëhë ne, hacuiin casehencoo ta tsjian tu të ni. ²⁴ Ngajan xi cha sindadu jan ne, cachja cha cojo xicjin cha cuitjin:

—Tsjian vëhë ne, hacuiin cuichan ta naxeen suerte tséhë ne, jarë ngayaan xi satë naja.

—Cuatjin cachja cha.

Cuatjin camá cojo sa xi cuetjucaa cjua xi camahindu xcun xujun rë Nina xi chja cuitjin: Cavatéjcha cha tsjian naha ngajni rë cha,
hacuaha cavaxë cha suerte ngatsë rë tsjian naha.

Cuatjin casahmi cha sindadu jan.

²⁵ Quihndé ne, tiña cru rë Jesús jan ne, secun naa rë me, cojo táchja naa rë me, cojo na María chjuun rë Cleofas, cojo na María na Mágdala. ²⁶ Hane xi cavéé Jesús naa rë me cojo cha ladu rë me xi jemu vinga rë me jan xi secun tangun cha cojo naa rë me ne, sehe cachja me cuitjin cojo naa rë me:

—Ngayun chjuun, cuajyihu quihndi nuju ndyá.

²⁷ Hane cha ladu rë me jan ne, cuitjin cachja me cojo rë cha: —Cuajyihu naa nuju ndyá.
—Cuatjin cachja Jesús.

Ha nixtin hya ni ne, quijicojo cha ladu rë Jesús jan naa rë me ndava cha, ngajan cavéñacahndé me.

Cjuaveya rë Jesucristu

²⁸ Hane xi camá ngascan ne, Jesús ne, ha vëë me xi camachihin yëjë xa xi cachja Nina xi sahmi me. Hane cojo sa xi cuetjucaa cjua xi camahindu xcun xujun rë Nina ne, cuitjin cachja me:

—Jemu xinda ná. —Cuatjin cachja me.

²⁹ Quihndë ne, tacun jan ngu hiscan jemu hincha xan yufa. Ngajan xi sindadu jan ne, catsicahnchi cha ngu tsjian hinda cojo xan jan ne, sehe catsitjinguiya cha rcu ngu ya nduju, sehe catsiquijin cha cavetaha cha hntsua Jesús. ³⁰ Hane xi camá cahvi Jesús xan jan ne, sehe cachja me cuitjin:

—Camachihin quihndë. —Cuatjin cachja Jesús.

Hane xi catsiquindi me rcu me ne, hora vëhë cahme me.

Cavitengui cha sindadu quicha ngu ladu ntsacu ndanisin rë Jesucristu

³¹ Hya xi camá ne, xutaxa rë yungun ne, cafehya me favor cojo Pilatu xi cuitexa me ne, xtotoho ntsacu me xi caviyujutaha xcun cru rë jan, sehe chjaháxin rë nima. Cuatjin cafehya me ta, tséhë xi nixtin hya ne, vispra tséhë suhi, hane mijí rë me xi caviyujutaha nima xcun cru rë hisca cuma nchujun, tséhë xi, xi cuma nchujun jan ne, nixtin chjahájenda rë hacuaha jemu nixtin jyë. ³² Ngajan xi sindadu jan ne, quiji cavotoho cha ntsacu catsijo ni cha xi hacuaha cojo caviyujutaha xcun cru rë cojo Jesús.

³³ Peru xi cafehe cha xcun cru rë Jesús ne, xi cavëë cha xi ha cahme me ne, cavotaain cha ntsacu me. ³⁴ Peru ngu cha sindadu jan ne, quiji cavitengui cha quicha ngu ladu ntsacu ndanisin rë Jesús, hane ngutjen ni cavetju jni cojo nandá. ³⁵ Cha xi cavëë ne, chja cha tséhë xcusun vëhë, cojo sa xi ngayujun ni ngayun ne, cumacjain nuju. Cjua xi chja cha ne, cjuaquixi, hacuaha cha vëhë ne, vëë cha ta cjuaquixi cjua xi chja cha. ³⁶ Cuatjin camá xcusun vëhë, cojo sa xi cuetjucaa cjua xi chja xujun rë Nina xi chja cuitjin: “Hisca ngu nínda rë me xtotaain.” ³⁷ Hacuaha chja nga ngu cahndé xujun rë Nina cuitjin: “Scuëë xuta me xi caxtengui rë quicha.” Cuatjin chja xujun rë Nina.

Seyaniji Jesucristu

³⁸ Xi cavatju xcusun vëhë ne, José, ngu xuta Arimatea ne, cafehya me cahndé cojo Pilatu xi cjuahaxin me nima Jesús. José jan ne, hacuaha xuta ladu rë Jesús má me, handasa catsingacuiin me xi xcun cojo xcun, tséhë xi tsacjun me xutaxa rë yungun. Hane Pilatu ne, casua me cahndé. Hya xi camá ne, quiji cafahaxin José nima. ³⁹ Nicodemo, me xi quiji cavisiajmi cojo Jesús ngu nguixun jan ne, hacuaha cojo me quiji me cojo José. Yaha me sacuaha cantë kilu aceite xi jemu ndaja jne xi cuëhächjine me yojo rë nima jan. ⁴⁰ Ngajan xi, xi cañaha me nima jan ne, sehe cavitejnu rë me aceite hacuaha catsitjingui rë me tsjian, sacuatjin xcusun rë xuta tjé rë Israel hya xi vinchaniji me nima rë me. ⁴¹ Quihndë ne, tiña hiscan cavetaha xuta Jesús xcun cru xi catsiquehen me ne, tjin ngu ngajñi yatjé. Hane ngajñi yatjé jan ne, tacun ngu tsjun xatsé, xi hisca ngu nima cjëë seya. ⁴² Ngajan ni caveya me nima Jesús, tséhë xi ngajan xi tiña, hacuaha ha vispra tséhë suhi nixtin hya.

Tsjun tiya

¹ Quihndë ne, nixtin xi tjun tjun tséhë totje jan ne, na María na Mágdala jan ne, nglitajñi jñu sa ne, cavetju na quiji na xcun tsjun rë nima Jesús. Hane xi cafehe na jan ne, cavëë na xi ndyojo xi quitahá tingotjo rë tsjun jan ne, cachjaháxin rë. ² Ngajan xi vangasanii na quiji na hiscan tacun Simón Pedru cojo cha ladu rë Jesús xingu jan, cha xi jemu vinga rë Jesús. Hane xi cafehe na jan ne, cuitjin cachja na:

—Cavaxë me nima Nai naja tséhë tsjun rë, hane hyaan jani quiji chani rë. —Cuatjin cachja na.

³ Ngajan xi Pedru cojo cha xingu jan ne, cavetjusani me, quiji me xcun tsjun jan.

⁴ Vanga me catsijo me quiji me, peru cha xingu jan ne, hitsé sa hñu cavanga cha xi cuma rë

Pedru, hane tjun cha vëhë cafehe cha xcun tsjun. ⁵ Hane xi cafehe cha jan ne, catsiquindi cha yojo rë cha, hane cavëe cha tsjian xi cavitjingui rë nima Jesús, siu jan. Peru cavisin cha. ⁶ Hane xi cafehe Simón Pedru xi camá ngascan ne, cavisehen me cahntsua tsjun jan. Hane cavëe me tsjian jan siu, ⁷ hane pañutu xi camahñu rcu nima jan ne, hacuiin tacun tangun cojo tsjian jan ta tjeyu ne, xín tacun. ⁸ Ngajan xi cha ladu rë Jesús xi cafehe titjun xcun tsjun jan ne, hacuaha cavisehen cha. Hane cavëe cha hacuaha camac Jain rë cha. ⁹ Nixtin hya ne, cjëe sa cuijne rcu cha xi chja xujun rë Nina xi nima Jesús ne, meje rë xi cuya me cjuahñu. ¹⁰ Hya xi camá ne, xuta ladu rë Jesús jan ne, cavuya cafe me.

Cavëe na María na Mágdala Jesucristu

¹¹ Hane na María ne, hacuaha cavuya quiji nga na xcun tsjun jan, hane ngajan casecun na tingotjo cajihnda na. Hane táha tijihnda na ne, catsiquindi na yojo rë na, cavutsejenya na cahntsua tsjun jan. ¹² Hane cavëe na jo ángel xi tyava tsjian rë, siu hiscan cafaña nima; ngu ne, táha hiscan cafaña rcu nima hane xingu ne, táha hiscan cavyuju ntsacu. ¹³ Ngajan xi ángel jan ne, cuitjin cavinenguise rë na:

—Ngaye chjuun, ¿mé má chjhinde? —Cuatjin cavinenguise ángel jan na.

Hane na vëhë ne, cuitjin cachja na:

—Cavaxë me maestru naha ne, hveen jani quiji chani rë. —Cuatjin cachja na.

¹⁴ Hane xi cavatju cachja na cjua vëhë ne, sehe cavuya na táha ngaxtun na, hane cavëe na Jesús secun me jan. Peru hvíin na xi hacui Jesús. ¹⁵ Ngajan xi Jesús ne, cuitjin cachja me:

—Ngaye chjuun, ¿mé má cuatjin chjhinde? ¿Yo xi vinchise? —Cuatjin cachja me.

Hane xi má rë na vëhë ne, cha xi sahmi cuidadu yatjé jan xi cachja. Vëhë xi cachja na cuitjin:

—Tatá, sa xi ngayun canaxun nima ne, tinújun jani catsangun chanu, sehe cjué jaha.

—Cuatjin cachja na:

¹⁶ Ngajan xi Jesús ne, cuitjin cachja me cojo rë na:

—¡María! —Cuatjin cachja me.

Hane xi cavuya na ne, sehe cachja na hne hebreo cuitjin:

—¡Rabuni! —Cuatjin cachja na cjua xi meje cuichja Maestro.

¹⁷ Ngajan xi Jesús ne, cuitjin cachja me cojo rë na:

—Ha quihndë xicachunhñuu sa ná ta cjëe cjuéneje cjuétjëngüe Nina Nahmi naja. Peru tánguntjengun xuta ladu naha xi yahnga, hane cuitjin tinújun cojo rë me: “Cjuéneje, cjuétjëngüe Nahmi naha, me xi hacuaha Nahmi nuju, me xi Nina naha hacuaha Nina nuju ngayujun ni.” Cuatjin tinújun. —Cuatjin cachja Jesús.

¹⁸ Ngajan xi na María na Mágdala jan ne, quiji cachja na cojo xuta ladu rë Jesús cuitjin:

—¡Cahvë maestru naja! —Cuatjin cachja na.

Hacuaha cachja na cjua xi cachja Jesús cojo rë na.

Cavëe xuta ladu rë Jesucristu me

¹⁹ Hane xi camajñu ndaja tséhë nixtin tjun tjun tséhë totje jan ne, tjin tangun xuta ladu rë Jesús jan. Hane tichjáhñu tingotjo ndihya siu me, tséhë xi tsacjun me xutaxa rë yungun jan. Hya xi camá ne, cafehetsejen Jesús casecun me ngajñi rë xuta ladu rë me, hane cuitjin cachja me:

—Cjuandaja cjuajeya catejña cojo nuju. —Cuatjin cachja me.

²⁰ Hane xi cavatju cachja me cjua vëhë ne, sehe catsingacun me tsja me hacuaha catsingacun me ngu ladu ntsacu ndanisin rë me. Ngajan xi xuta ladu rë me jan ne, jemu ndaja camá rë me hora xi cavëe me maestru naja. ²¹ Hane cachja nga Jesús cojo rë me xi cuacun jan cuitjin:

—Cjuandaja cjuajeya catejña cojo nuju. Sacuatjin catsingatju ná Nina Nahmi naja ne, hacuaha cuatjin tsingátju nuju ngayun. —Cuatjin cachja Jesús.

²² Hane xi cavatju cachja me cjua vëhë ne, sehe cachimatjo me xuta jan, sehe cachja me cuitjin:

—Chjuhunntsun Hasen rë Nina cahntsua xahasen nuju. ²³ Xuta xi ninchatuhun jyé rë me ne, ha camanchataha. Hane xuta xi ninchattuun jyé rë ne, ha camanchataaain.
—Cuatjin cachja Jesús.

Cavëë Tomás Jesucristu

²⁴ Tomás, me xi chja me tséhë Cha Lihma, ngu xuta ladu rë Jesús ngajñi rë me xi tejó jan ne, cuajin me tacun me hya xi cafehe Jesús hiscan xi tjin tangun xuta ladu rë me xi yahnga jan. ²⁵ Ngajan xi xuta ladu rë Jesús xi yahnga jan ne, cuitjin cachja me cojo Tomás:

—Cahyin Nai naja. —Cuatjin cachja me.

Peru Tomás ne, cuitjin cachja me:

—Sa xi scueen hiscan cavanguihmu rë xin tsja me hacuaha tsinguiseen rcuntsa hiscan cavisehen xin jan hacuaha cuetahanntsaan ngu ladu ntsacu ndanisin rë me ne, cumacjaain camahani ná. —Cuatjin cachja Tomás.

²⁶ Xi cavatju jyin nixtin jan ne, tjin tangun nga xuta ladu rë Jesús cahntsua ndihya, hacuaha cojo Tomás tacun me cojo me xi cuacun vë. Hane cafehe nga Jesús casecun me ngajñi rë me xi cuacun vë, ha ndasa tichjá tingotjo ndihya. Hane sehe cachja Jesús cuitjin:

—Cjuandaja cjuajeya catejña cojo nuju.

²⁷ Sehe cachja me cojo Tomás cuitjin: —Jarë rcuntsun. Chutsujun ntsa ne. Hacuaha jarë ntsun. Ninguisuhun ngu ladu ntsacu ndanisin naha. Tejñuxun xi cuatjin macjaain nuju. Catamacjain nuju. —Cuatjin cachja Jesús.

²⁸ Ngajan xi Tomás ne, cuitjin cafayangui me tséhë Jesús:

—¡Ngayun Nai naha! ¡Ngayun Nina naha! —Cuatjin cafayangui me.

²⁹ Hane Jesús ne, cuitjin cachja me:

—¿Há macjain nuju ngatsë rë xi tichutsujun ná? Ndatjin, peru jemu ndaja tséhë me xi macjain rë, ha ndasa vutsijin ná me. —Cuatjin cachja Jesús.

Cuitjin titsihindu Juan cojo sa xi cumacjain rë xuta

³⁰ Quihndë ne, jemu cjín sa cjuarcun casahmi Jesús xcun xuta ladu rë me xi camahindiin xcun xujun vihi. ³¹ Peru cjuarcun vihi ne, camahindu cojo sa xi ngayujun ni ngayun ne, cumacjain nuju xi Jesús ne, hacui me xi Catsingatju Nina, hacuaha hacui Quihndi rë Nina me. Hacuaha camahindu cojo sa xi, xi cuatjin cumacjain nuju ne, sacú nuju cjuahñu xatsë ngatsë rë xi ladu rë me má ngayun.

21

Cavëë yatu xuta ladu rë Jesucristu me

¹ Xi camá ngascan ne, cavetjuatsejen nga Jesús ngajñi rë xuta ladu rë me ngajan tjehen laguna Tiberias, xi hacuaha hmí rë laguna Galilea. Hane cuitjin camá. ² Siu tangun me xi cuicun vi: Simón Pedru, cojo Tomás, me xi chja me tséhë Cha Lihma, cojo Natanael, xuta Caná, ngu nandya tséhë distritu Galilea, cojo quihndi rë Zebedeo, cojo jo sa xuta ladu rë Jesús jan. ³ Hane Simón Pedru ne, cuitjin cachja me cojo xicjin me:

—Ngahan ne, cjué cúaxë chu ti. —Cuatjin cachja me.

Hane me xi yahnga jan ne, cuitjin cachja me:

—Hacuaha cuanguin ngayin cojo nuju. —Cuatjin cachja me.

Sehe cavetju me quiji me cojo xicjin me, cafaha me barcu, quiji me xcun nandá. Peru nguixun hya ne, casacuiin camahani rë me chu ti. ⁴ Hane hora xi tisahasen jan ne, cavëë me Jesús secun me tjehen laguna jan, peru hvíin me xi hacui Jesús. ⁵ Ngajan xi Jesús ne, cuitjin cajindaya me cavinenguise rë me me xi cuacun jan:

—¿Há sacuiin nuju chu ti, tsan? —Cuatjin cavinenguise Jesús.

Hane me xi cuacun jan ne, cuitjin cajindaya me cafayangui me:

—¡Sacuiin niji chu! —Cuatjin cafayangui me.

⁶ Ngajan xi Jesús ne, cuitjin cajindaya me cachja nga me cojo rë me:

—¡Ningatjunyun nahya vë táha ladu quixi tsëhë barcu ne, sehe sacú nuju chu!
—Cuatjin cachja me.

Hane xi catsingatjenya xuta ladu rë me jan nahya táha ladu quixi ne, caain rë me cavaxë me nahya jan, ngatsë rë ti xi jemu cjín chu hincha chu. ⁷ Ngajan xi cha ladu rë Jesús xi jemu vinga rë Jesús jan ne, cuitjin cachja cha cojo Pedru:

—¡Nai naja vë! —Cuatjin cachja cha.

Ngajan xi Simón Pedru ne, xi cahndë me cjua xi hacui Nai naja ne, cavajásanii me tsjian rë me, tsëhë xi quixti me xi sahmi me xa jan. Hane sehe catsingatjenya me yojo rë me ngajni nandá xi cjuetjengui me Jesús tjehen laguna jan. ⁸ Peru xuta ladu rë Jesús xi yahnga jan ne, quijitjengui me Jesús cojo barcu jan, táha javë me nahya, ña quitsë rë cojo chu ti. Hacuiin cjín hincha me tsëhë tjehen nandá ta sacuaha ngu cientu metru ni cjín. ⁹ Hane xi cafehe me tjehen nandá jan ne, sehe cavetju me barcu, hane ngajan cavëë me ngu ndava ndihi tacun, quisun ngu ti xcun ndixuhi, hacuaha cavëë me niñu. ¹⁰ Ngajan xi Jesús ne, cuitjin cachja me cojo me xi cuacun vë:

—Tuhun ngujo chu ti xi sehe canaxun vë. —Cuatjin cachja Jesús.

¹¹ Sehe quiyi Simón Pedru cajavë me nahya jan cavaxë me nangui quixí, quitsë rë cojo sváti yehe, sacuaha ngu cientu cojo yachan tejyan má chu. Hane handasa cuatjin cjín chu ti hincha chu nahya jan ne, catiyaain. ¹² Ngajan xi Jesús ne, cuitjin cachja me cojo xuta ladu rë me jan:

—Nduvun xinu tajñu. —Cuatjin cachja me.

Peru hisca ngu xuta ladu rë me cavetjiin cacun me cavinenguise me cuitjin: “Yo ngayun”, tsëhë xi ha vëë me xi hacui Nai naja. ¹³ Ngajan xi Jesús ne, cafaha me niñu jan, casua me xuta ladu rë me. Hacuaha cuanitjin ni casua me chu ti jan.

¹⁴ Vihi majyan ndiya xi cavetjuatsejen Jesús ngajni rë xuta ladu rë me, quihndë xi cavuya nga me cjuahñu.

Visajmi Jesucristu cojo Simón Pedru

¹⁵ Hane xi cajnetaha cajinë tajñu me ne, sehe cavinenguise Jesús Simón Pedru cuitjin:
—Ngayun Simón, quihndi rë Jonás, ¿há hitsë sa hmu tacún ná ngayun xi cuma rë me xi cuicun vi? —Cuatjin cavinenguise me.

Hane Pedru ne, cuitjin cafayangui me tsëhë Jesús:

—Juun. Tatá, ngayun ne, hyun ta hmú cárdenas nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁶ Cavinenguise nga Jesús Pedru majo ndiya cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Hane Pedru ne, cuitjin cafayangui me:

—Juun. Tatá, ngayun ne, hyun ta hmú cárdenas nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁷ Cavinenguise nga Jesús xi majyan ndiya Simón Pedru cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Ngajan xi Pedru ne, choho camá rë me xi cuatjin cavinenguise Jesús me xi majyan ndiya sa xi hmu cacun me Jesús, hane cuitjin cachja me:

—Tatá, ngayun ne, yéjë ni ne, hyun. Ngayun ne, hyun ta hmú cárdenas nuju. —Cuatjin cachja Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. ¹⁸ Hacuaha cuichjá cojo nuju cjuauquixi ta hya xi chúva sa nixtin nuju ne, cachujun suvun tsjian nuju sehe catsangun hiscan xi meje cuangun. Peru hya xi cuma

changá ngayun ne, nicujun tyja nuju, hane hacjahi xuta tsihñu me cahntsua nuju, sehe cjuecojo nuju me hiscan xi mijí cuangun. —Cuatjin cachja Jesús cojo Pedru.

¹⁹ Xi cuatjin cachja Jesús ne, casua me camachaya rë Pedru mé chuva rë cueya Pedru, hacuaha casua me camachaya rë me xi sahmi jyé sahmi hnga me Nina xi cuatjin cueya me. Xi cavatju cachja Jesús cjua vëhë ne, sehe cachja me cuitjin cojo Pedru:

—Nduvun cuanguen cojo ná. —Cuatjin cachja Jesús.

Xuta ladu rë Jesús xi jemu vinga rë me jan

²⁰ Xi cavuya cavutsejen Pedru táha ngaxtun me ne, cavëë me xi tjengui cha xi jemu vinga rë Jesús jan nduva cha, cha xi quijivalha tiña xcun Jesús hya xi tjinë me comida jan hacuaha cavinenguise cha me cjua vihi: “Tatá, ¿yo xi sahmi nuju entregadu ni?” ²¹ Hane xi cavëë Pedru cha vëhë ne, cavinenguise me cuitjin cojo Jesús:

—Tatá, hane me vëhë ne, ¿mé cuatju me cuma ni? —Cuatjin cavinenguise Pedru.

²² Ngajan xi Jesús ne, cuitjin cachja me cojo Pedru:

—Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni? Ngayun ne, nduvun cuanguen cojo ná. —Cuatjin cachja Jesús.

²³ Hane cavitsojo ngajñi rë xuta ladu rë Jesús cjua xi cha xi jemu vinga rë Jesús jan ne, cueyaain cha. Peru Jesús ne, hacuiin cachja me cojo Pedru xi cueyaain cha vëhë ta xi cachja me ne, cjua vihi: “Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni?” Vëhë cjua xi cachja me.

²⁴ Cha xi cuajyihí jemu vinga rë Jesús jan ne, cha vëhë xi cachja cha cjua vëhë hacuaha cha vëhë catsihindu cha. Hacuaha ngayin xi tinihindin ngujo cjua vihi ne, hyin ta cjuaquixi cjua xi cachja cha.

²⁵ Hacuaha jemu cjín sa xcusun xi casahmi Jesús. Peru sa xi cumahindu yëjë ni xcusun vëhë chuva ngu chuva ngu ne, xi má ná ne, chutaain cahndé setjo yëjë ni libru xi cumahindu, handasa jingujyé ni ngasunhndé.

Hacutjin Casahmi Apóstol

¹ Ngayun Teófilo, xcun xujun naha xi catsihindu nuju tjun tjun ne, cachjá cojo nuju yéjé ni hacutjin cavetsihin casahmi xu Jesús cojo hacutjin cavetsihin cavicuya me. Cavétsehen hisca ntsacu cuetsihin ne, ² catsinguínetaha hisca hya xi quiji me ngahnga. Hya xi chaja sa cjue me ngahnga ne, cachja xu me cojo apóstol xi ha cavaxijin me xi camá ladu rë me jan, hacutjin sahmi. Hacuaha cojo ngahñu rë Hasen rë Nina xi cachja xu me. ³ Hya xi ha cavatju nixtin xi cahme me ne, cavuya cafehetjengui nga me apóstol jan, casua me camachaya xu rë ta quixi jain xi tacun quicun nga me. Hane ngajñi rë xi yachan nixtin ne, cavëe apóstol jan Jesús, hacuaha cachja sa Jesús cojo me ngujo cjua tséhë hacutjin cuma hya xi cuinduva Nina sahmi me gubiernu.

⁴ Hane xi tacun Jesús cojo apóstol jan ngajan Jerusalén ne, cavitexa xu me me cuitjin:
—Hacuiin cuetjunnun tséhë nandya vi ta nechunyun rë cjuandaja xi sua nuju Nahmi naha, sacuatjin xi ha cachjá cojo nuju. ⁵ Cuatjin nihñu ta, xuta ne, handasa cojo nandá cavitenda Juan me, peru ngayun ne, xtenda ngayun cojo Hasen rë Nina cahntsua xi ngujo sa nixtin. —Cuatjin cavitexa me.

Quiji Jesús ngahnga

⁶ Hya xi camá ne, ngu nixtin xi siu tangun xu apóstol cojo Jesús ne, cavinenguise me Jesús cuitjin:

—Tatá, ¿há cavechú nixtin xi tuhun cahndé xi xutaxa rë nangui naja ne, cuya cuitexa nga me nguehe nangui naja cojo jingu sa nangui, sacuatjin xi cavitexa me hatsëë ni?
—Cuatjin cavinenguise me.

⁷ Ngajan xi cafayangui xu Jesús cuitjin:
—Satiin nuju ngayun xi cumachaya nuju jarë nixtin xi Nina cavejña cacun me cojo cjuatacun rë suvá me xi cuma yéjé ni xcusun vëhë. ⁸ Peru hya xi cuinduva Hasen rë Nina cuisehen cahntsua xahesen nuju ne, hya sacú sa nuju ngahñu, sehe cuinújun cjua naha cojo xuta nguehe nandya Jerusalén, cojo yéjé ni nandya distritu Judea cojo Samaria, hisca cojo yéjé sa nangui xi siu ngasunhndë. —Cuatjin xu cafayangui me.

⁹ Xi cafë cachja xu Jesús cjua vëhë ne, tivutsejen ni apóstol ne, cavetsihin quiji me ngahnga. Sehe cavisehen me ngajñi rë yufí, ha quihndë camatsijin sa me. ¹⁰ Ha tu tivutsejen cuaha xu apóstol ngahnga hacutjin cjui Jesús ne, xi tu camachaya rë me ne, hincharacun jo xihin xi tyava tsjian rë hiscan siu me. ¹¹ Hane cuitjin cavinenguise xu xihin jan me:

—Ngayun, cha Galilea. ¿Mé má cuatjin chutsujun ngahnga? Jesús, me xi quiji ngahnga vë ne, cuatjin tutjin xi cahyun xi quiji me ne, tjin ngu nixtin ne, ha cuanitjin ni cuya nga me. —Cuatjin cachja xu xihin jan.

Catuxijin rë me xi cuisehen ngojo rë nima Judas

¹² Hya xi camá xu ne, apóstol jan ne, cavetjuxin me tséhë ndetjún xi hmí ndetjún Ya Olivu, hane cavuya quiji nga me Jerusalén, xi tacun sacuaha ngu mil metru tséhë ndetjún vëhë. ¹³ Hya xi cafehe me ngajan ne, quiji me ndihya hiscan xi viyuju me, hane quijiniji me pisu ngahnga. Me xi cuicun xu vi xi viyuju me ngajan: Pedru, Jacobo, Juan, Andrés, Felipe, Tomás, Bartolomé, Mateo, Jacobo xi quihndi rë Alfeo, Simón xi tséhë partidu zelota, cojo Judas xi xuta rë Jacobo. ¹⁴ Yéjé ni me xi cuacun jan, cojo yéjé ni me xi xicjin Jesús, cojo María naa rë me, cojo yachjin xi yahnga ne, nchunchujun ni camatangun me xi sahmi me oración rë me.

¹⁵ Ngu ndiya hya xi camatangun xu sacuaha chuva rë ngu cientu cojo can xuta xi cuacun ladu rë Jesús ne, casecunvasen Pedru ne, sehe cachja me cojo xuta jan cjua vihi:

¹⁶ —Ngayujun ngarcun ni ngayun xuta ladu rë Jesús. Cavetjucaa Jain cjua xi catsihindu xutachanga naja David xcun xujun rë Nina hatsëë. Hatuxa cuatjin camameje rë xi cuma ta, tséhë xi chaja sa xi cuma matsejen ne, Hasen rë Nina ne, ha casua camachaya rë

xutachanga naja jan hacutjin sahmi nima Judas, nima xi cavisecoo rë xuta xi cafaha rë Jesús, catsihñu rë me. ¹⁷ Nima Judas jan matsejen ne, hacuaha camá ladu rë Jesús sacuaha ngayaan matsejen ta, tséhë xi cavaxijin Jesús nima xi cuisecoo rë me xcun xa rë Nina xi sahmi me. —Cuahaxutjin cachja Pedru.

¹⁸ 'Nima Judas jan ne, cavatsë xu ngu rquí nangui cojo tujún xi cafaha tséhë xcusun tsehen xi casahmi xi casahmi rë entregadu Jesús. Hane ha xcun nangui xi cavatsë xu nima jan ne, caticja xcun, hane catsingá xu cahntsua nima, hisca cavitju yëjë ni ntsehen rë. ¹⁹ Sacuatjin camá xu xi cahme nima ne, yëjë cjua vëhë ne, cavechútáha rë yëjë xuta ngajan Jerusalén. Vëhë xi xuta ngajan ne, casuañhi xu rë me cahndé jan Acéldama, ñihi xi meje cuichja xi hne rë me ne, Cahndé Tséhë Jni.

²⁰ Hacuaha quijinduju sa cachja Pedru cuitjin:

—Hacuaha xcun xujun tséhë Salmo matsejen ne, cuitjin camahindu:
Catejña cuatjin ndava cha,
hacuaha hisca ngu cuiyijin jan.
Hacuaha camahindu sa cuitjin:
Xa rë cha ne, catjaha jingu sa xuta.
Cuatjin camahindu matsejen.

²¹ 'Vëhë xi meje rë xi cuinchise rë ngu cha xi cuma tangun cojo niji matsejen, ngu cha xi ha cuatjin cavisecoo niji yëjë ni nixtin xi canujyihinyin cojo Nai naja Jesús, ²² hisca nixtin xi cavitenda Juan me cojo hisca nixtin xi quiyi me ngahnga. Cha vëhë matsejen ne, cuma tangun cha cojo niji, xi tsinguixi cha hacutjin camá xi cavuya Jesús cjuahñu. —Cuatjin cachja Pedru.

²³ Hya xi cajnetaha cachja Pedru cuatjin ne, catuxijin xu rë jo xihin: José cojo Matías. José jan ne, hacuaha hacui me xi hmí rë Barsabás cojo Justo. ²⁴ Sehe cafehya rë me Nina cuitjin:

—Ngayun Nai niji, ngayun xi hyun cjuatacun rë ngayëjë ni xuta ne, tséhë jo cha xi cuicun vihi ne, naxujun jarë cha xi chuya nuju ngayun ²⁵ xi cuisehen cha xa sacuaha apóstol cahndé rë nima Judas ta, tséhë xi nima vëhë ne, cavéjña tiya cahndé rë xi quiyi hiscan xi casatë rë. —Cuatjin cafehya rë me Nina.

²⁶ Xi cajnetaha cachja apóstol cuatjin ne, sehe cavaxë xu me ngu suerte, hane Matías casatë rë me. Ngajan xi Matías ne, camatangun me cojo tengu apóstol jan.

2

Hya xi canduva Hasen rë Nina

¹ Hya xi camá ne, xi cavechú nixtin tséhë suhi xi hmí Pentecostés ne, ngu cahndé ni camatangun xu yëjë ni xuta ladu rë Jesús. ² Xi siu tangun me jan ne, ha tu ñahñu cahndé xu me xi jercu cafane ngajan ngahnga, sacuaha nuhya rë xi fane vanga tjo xi jemu hñu camahani. Sehe yëjë ni xuta jan ne, cahndé xu me xi canduva cafane hisca cahntsua ndihya hiscan siu me. ³ Hacuaha cavëë xu me ndihi xi langa sacuaha neje xuta, hane cavitsojo quiyi casatë xu rë jima ngu jima ngu me. ⁴ Hya xi camá ne, catsë xu rë Hasen rë Nina xahasen rë jima ngu me jan, hacuaha cavetsihin cachja xu me jima ngu me cjuandaja rë Nina ne, cachja xu me jingu sa hne xi maji rë me, tucutjin xi Hasen jan casahmi xi camá cachja me.

⁵ Ngajan Jerusalén ne, siu xuta tjé rë Israel xi faharcun jain me Nina, canduva me tséhë yëjë ni nangui xi tjin ngasunhndé. ⁶ Hane hya xi canuhya rë xi cuatjin jercu fane ne, jercu xutacjín camatangun xu me xi quiyi cavutsejen me mé xi camá. Hane xutacjín jan ne, jemu quijircun xu rë me, tséhë xi hora xi tichja xuta ladu rë Jesús ne, xuta jan ne, hne ni rë suva me cahndé me jima ngu me xi cuacun jan. ⁷ Ngajan xi cachja xu me cojo xicjin me cuitjin:

—¿Mé nga vihi ni? ¡Yëjë ni me xi tichja vi ne, xuta distritu Galilea me! ⁸ ¿Hacutjin má xi jima ngu ngayaan ne, tinuhyan hne naja suvaan ta, ⁹ tséhë xi jemu cjín nangui canduvan? Ngujo ngayaan ne, xuta Partia ngayaan. Ngujo nga ngayaan ne, xuta Media

ngayaan. Cojo sa xuta Elam, xuta Mesopotamia, xuta Judea, xuta Capadocia, xuta Ponto, xuta Asia,¹⁰ xuta Frigia, xuta Panfilia, xuta Egipto, xuta ladu Libia, tiñataha nandya xi hmí Cirene, xuta Roma,¹¹ xuta Creta, xuta Arabia. Ngayaan xuta ngu nangui xi macjain naja Nina rë xuta tjé rë Israel ne, jemu cjín ngayaan xi nechanyanjñe nguehe ngajñi rë xuta tjé rë Israel. Hacuaha ngayejen ngarca ni tinuhyan xi tichja me hne naja. Tichja me tséhë cjuandaja xi jercu casahmi Nina. —Cuatjin xu cachja xuta xi cuacun jan.

¹² Hane tséhë xi cuatjin camacjíncacun me xi jemu quijircun camahani rë me ne, cavinenguise xicjin xu me cuitjin:

—¿Mé rë meje cuichja xcusun vi? —Cuatjin cavinenguise me.

¹³ Peru yahnga me ne, catsixcuehyu me xuta ladu rë Jesús, hane cachja xu me ta chihi xuta jan.

Cjua xi cachja Pedru

¹⁴ Hya xi camá ne, caxinchacun yëjë tengu apóstol jan ne, sehe cachja xu Pedru cojo xutacjín jan cuitjin:

—Ngayujun ngarcun ni ngayun xuta tjé rë Israel xi nechun nguehe Jerusalén matsejen ne, tinuhun ngujo cjua xi cuichjá cojo nuju vi, cojo sa xi cumachaya nuju.¹⁵ Ngayujun ni matsejen ne, nújun ta me xi cuicun vi ne, chihi me. Peru quixiin xi nújun ta ndicumaha ni ne, sehe fane ñaja tséhë nguitajñu.¹⁶ Peru xcusun xi sehe cavatju camá nguehe matsejen ne, cavetjucaa cjua xi cachja xutachanga naja profeta Joel hatséé nixtin, hya xi catsihindu me cjua xi casua Nina. Cuitjin catsihindu me:

¹⁷ Cjua xi cuicun vi xi chja Nina cojo naja:

Hya xi cuma tiña nixtin xi cjué ngasunhndë ne,
hya tsingátju Hasen naha xi cuisehen xahesen rë xuta jingujyë ni ngasunhndë;
hane quihndi nuju, sa chjuun sa xihin ne, suacuenda me cjua naha,
hacuaha cha nixti nuju cojo xuta changá nuju ne,
cuichja chini cojo rë me tséhë cjuatacun naha.

¹⁸ Hacuaha nixtin hya ne, tsingátju Hasen naha xi cuisehen xahesen rë me xi sahmi
cjuatacun naha, sa chjuun, sa xihin,
hane me vëhë ne, suacuenda me cjua naha.

¹⁹ Hya sahme xcusun cjuarcun vihi ngajan ngahnga, cojo nguehe nangui xi chutsujun:
cuáxécaa jni, cojo ndihi, cojo nihndi cjín.

²⁰ Tsuhi ne, cuma jma;

sá ne, cuma hani sacuaha jni.

Cuatjin cuma hya xi chaja sa xi cuechú nixtin xi ngahan xi Nina ngahan ne, tsichúva yëjë
ni xuta cojo cjuatacun rë me;

ngu nixtin jyë ngu nixtin ndajyihu nixtin vëhë.

²¹ Hane nixtin hya ne, yëjë ni xuta xi cjuehya ná me cjuandaja naha ngahan xi Nina
ngahan ne,
cuetjutje me.

Cuatjin catsihindu profeta Joel cjua xi cachja Nina.

²² Cjuinduju sa tichja Pedru cjua vihi:

—Quihndë matsejen ne, tinuhun cjua xi cuichjá cojo nuju, ngayujun ngarcun ni xuta
tjé rë Israel. Jesús, me Nasaret matsejen ne, camachaya naja xi Nina catsingatju rë me
matsejen ta, tséhë xi jemu cjín xcusun cjuarcun casahmi me ngajñi naja sacuatjin xi ha
ndaja hyun. Camá casahmi me cjuarcun jan matsejen ta, ngatsë rë xi Nina casua rë me
cahndé xi cuatjin casahmi me.²³ Nina matsejen ne, ha vëe me yëjë ni xcusun. Vëhë xi
cojo tjun sa ne, ha catsingataha cacun me ta Jesús vë ne, cuma me entregadu cojo xuta
tsehen. Cuatjin cavejña Nina cjuatacun rë me hisca chaja sa xi cuetjucaa xcusun vëhë.
Sacuaha xi ngayun canicuhun Jesús ta, ngatsë nuju xi cavetaha xuta tsehen me xcun
cru.²⁴ Peru cavéhëndaya Nina me tséhë cjuaveya, catsicuya me me cjuahñu ta, tséhë xi
hatuxa camaji xi cavéjña me ngahma gubiernu rë cjuaveya.²⁵ Xutachanga naja David
matsejen ne, catsihindu me tséhë Jesús cuitjin:

Cahvë Nina xi cjui titjun me tsahan yëjë ni nixtin;
ticojo ná me, cojo sa xi tsajin mé cuma ná.

²⁶ Véhë xi xahasen naha ne, jemu sua rë, hacuaha ntsuva ne, suvá cjuandaja chjá.
Hacuaha vëhë xi ngahan ne, vetahá cákun Nina.

²⁷ Cuatjin sahme ta, tséhë xi ngayun Nina ne, hacuiin nismutacun hasen naha xi cuejña
ngajan Hades hiscan siu nima,
hacuaha hatuxa tuun cahndé xi cjuehndu yojo naha, ngahan xi hatuxa tjënguë nuju cojo
yëjë xahasen naha.

²⁸ Ngayun ne, catuhun camachaya ná ndiya xi cuéchu hiscan sacú ná cjuahñu ndajyihi.
Hacuaha ninguitsun rë xahasen naha cjuasua xi cuéchutaha nuju hiscan nechun.
Cuatjin catsihindu David.

²⁹ Hacuaha cachja sa Pedru cuitjin:

—Ngayujun ngarcun ni matsejen ne, nguehe cuichjáquixë cojo nuju matsejen ta,
xutachanga naja David ne, cahme me, hacuaha caseyaniji me hatsëé nixtin. Hane tsjun
rë me ne, tacun cuaha hisca quihndé hiscan xi cavéjña. ³⁰ Peru xi chaja sa xi cueya David
jan matsejen ne, ngu profeta me, hacuaha ha vëe me xi ha cachja Nina cojo rë me cuitjin:
Ngahan suva hvë xi ngu xuta tjë riji ne, cuitexa rë xuta, sacuatjin tivitexe ngaye. Cuatjin
cachja Nina cojo David. ³¹ Véhë xi camachaya rë David xcusun xi sahmi Nina ngascan.
Ha vëe me xi cuya nga cjuahñu me xi tsingatju Nina, hane vëhë xi cachja me ta hacuaha
hacuiin cuejña me vëhë ngajan Hades ngajñi rë nima, hacuaha hacuiin cjuehndu yojo
rë me. ³² Hane ngayijin ni matsejen ne, cahyin suvin xi Jesús, me xi catsingatju Nina
vë ne, catsicuya Nina me cjuahñu. ³³ Hane quihndé matsejen ne, ha catsiquijin Nina me
xi cavechú me ngahnga hiscan véjña suvá Nina. Hacuaha cafahatsja me Hasen rë Nina
sacuatjin xi cachja Nina Nahmi rë me xi sua rë me. Véhë xi Jesús matsejen ne, tisahmi
me xcusun xi tijima nguehe ngajñi niji. ³⁴ Xi tsejen ne, cachjaain David tséhë suvá me
ta, tséhë xi hacuiin quiji me ngahnga sacuatjin quiji Jesús matsejen ta, catsihindu sa me
cuitjin:

Nina ne, cachja me cojo Nai naha cuitjin:

“Tinechin nguehe, ladu quixi naha,

³⁵ hisca hya xi yëjë ni xi sahmi ri condra ne, cuiyujú ngahan ngahma gubiernu riji.”

Cuatjin catsihindu David hatsëé nixtin.

³⁶ Véhë xi ngayujun ni xuta nangui Israel matsejen ne, ndaja catijne rcun cjua xi
chjá cojo nuju vi: Jesús vë, me xi ngayun catuhun xi cahme xcun cru matsejen ne, Nina
casahmi me xi me vëhë ne, camá me Nai naja hacuaha catsingatju Nina me xi cuaxëtje
naja me. —Cuahaxutjin cachja Pedru cojo xutacjín jan.

³⁷ Xi cahndé xutacjín jan cjua vëhë ne, jemu choho camá rë me. Ngajan xi cavinenguise
me Pedru cojo apóstol xi yahnga jan cuitjin:

—Xi má nuju ngayun ne, ¿mé xi ndatjin nihñi? —Cuatjin cavinenguise xuta jan.

³⁸ Ngajan xi cachja xu Pedru cojo rë me cuitjin:

—Nindeyun cjuatacun nuju. Hacuaha jima ngu ngayun ne, catixtenda ngayun, ngatsë
rë xi camangu tacún cojo Jesucristu, sehe ngajan xi tsinchataha nuju Nina tséhë jyé nuju.
Xi cuatjin ne, hacuaha sahmi me cjuandaja xi sua nuju me Hasen rë me. ³⁹ Cjuandaja
vëhë ne, ha cachja Nina xi sua nuju me ngayun cojo quihndi nuju, hisca cojo yëjë xuta
tjë nuju. Nina naja ne, sua me cjuandaja vëhë xi cuma rë yëjë ni xuta xi cuaxijin me.
—Cuahaxutjin cachja Pedru.

⁴⁰ Hacuaha jemu cjín sa cjua cachja me cuitjin, hacutjin meje rë xi sahmi xuta jan:

—Naxunxun yojo nuju tséhë xuta tsehen xi siu quihndé. —Cuatjin cachja xu me.

⁴¹ Ngajan xi xuta xi cachuya rë me cjua xi cachja Pedru ne, caxtenda me. Hane cuatjin
xi nixtin vëhë xu ne, sacuaha jyan mil xuta xi cavisehen me ladu rë Jesús. ⁴² Casua me
yojo rë me cojo cjua xi tivicuya apóstol jan, hacuaha nguñaja cacun xu me xi ma tangun
me cojo yëjë sa xuta ladu rë Jesús. Nchunchujun ni ne, camatangun me cojo xicjin me xi
sahmi me oración, cojo xi sinë tangun me niñu.

Cjuandaja xi caviyuju xuta ladu rē Jesucristu cojo xicjin me

⁴³ Jemu cjín xcusun xu cjuarcun casahmi apóstol ngatsé rē ngahñu xi casua Nina me, hane vēhë xi yéjé ni xuta xi hacuiin ladu rē Jesús ne, jemu tsacjun me. ⁴⁴ Peru yéjé ni xuta ladu rē Jesús ne, camatangun xu cjuatacun rē me, hacuaha yéjé ni xcusun xi tséhë jima ngu xu me ne, hacuaha camá tséhë yéjé ni me xi yahnga jan. ⁴⁵ Caviteña xu me xcusun xi tjin rē me ne, sehe cavatëcja xu me tujún ngajñi rē yéjé ni me xi casahmi chaja rē. ⁴⁶ Nchunchujun xu ni ne, camatangun me nguñaja cacun me ngajan yungun xi matitjun xi cjuaharcun me Nina. Hacuaha xi cajinë xu me niñu ndava me cojo xicjin me ne, jemu cojo cjuasua, cojo cjuandaja cojo cjuajeya. ⁴⁷ Hacuaha jemu cavaxëndaja me Nina. Hane yéjé xuta xi yahnga jan ne, xi cavëë xu me xcusun rē xuta ladu rē Jesús jan ne, cachja xu me ta xuta ndaja me xi cuacun vë. Hacuaha nchunchujun ni ne, tivaxëtje Nai naja ngujo ngujo sa xuta. Vēhë xi nchunchujun ni ne, jima cjín sa xuta yungun jan.

3

Casahmi Pedru cojo Juan xi camandaja ngu cha xi maji fi

¹ Ngu nixtin jan ne, Pedru cojo Juan ne, quijiniji tangun xu me yungun xi matitjun chuva rē fane jyan, hora xi fi chjayuma xuta. ² Hane ngu cha xi maji fi, tséhë xi tsehen ntsacu cha hisca hya xi catsin cha ne, hacuaha hora vēhë cjuicojo xuta rē cha cha yungun. Nchunchujun ni quiji chani rē cha ngajan tingotjo hnchua xondyojo rē yungun xi hmí Tingotjo Ndajyihi, xi sahmi cha caridad tséhë xuta xi visehen ndatsen yungun jan. ³ Hane xi cavëë cha hmu rē jan xi camatiña Pedru cojo Juan hiscan tacun cha xi cuisehen me ndatsen yungun jan ne, cafehya xu cha me cjuandaja rē me. ⁴ Ngajan xi cavutsejenndaja me cha. Hane Pedru ne, cuitjin cachja me cojo cha:

—Chutsjin niji hitsé —Chja xu me.

⁵ Hane cavutsejen cha me ta, xi má rē cha ne, tjin mé xi sua me cha. ⁶ Ngajan xi cavuya cachja nga Pedru cojo rē cha cuitjin:

—Tsajin camahani ná tujún. Peru xi tjin ná, tsan ne, suá ri. Jesucristu, me Nasaret ne, casua ná me ngahñu, hane vēhë xi chjá cojo ri ta, tisechin, hane tujyihye. —Cuatjin cachja xu me cojo cha.

⁷ Sehe cafaha me tsja quixi cha hmu rē jan hane catsisatjenhnga xu me cha. Hane ngutjen ni casacuhñu rē ntsacu cha cojo ndyojo naxa rē cha. ⁸ Xi tu cafaha Pedru tsja cha ne, cacaahnga cha, hacuaha casecun cha. Sehe cavetsihin catsujihiya cha. Hacuaha cavisehen cha yungun xi matitjun cojo me xi cuacun jan, cjuia cha, hisca chijihnga cha, taha tivaxëndaja cha Nina. ⁹ Yéjé ni xuta xi siu ndatsen yungun jan ne, cavëë me xi cjuia cha, hacuaha cahndé me xi tivaxëndaja cha Nina. ¹⁰ Hane jemu quijircun rē xuta jan tséhë xcusun xi cavatju cha camá ta, tséhë xi ha vëe me xi ha hacui cha vēhë xi véjña cha sahmi cha caridad ngajan tingotjo yungun xi hmí Tingotjo Ndajyihi.

Cjua xi cachja Pedru cojo xuta ngajan yungun xi matitjun

¹¹ Cha xi camandaja xu jan ne, mijí cjuexin cha tséhë Pedru cojo Juan. Hane tséhë xi jemu quijircun rē xuta ne, cavanga me quiji me hiscan siu me xi cuacun jan, camatangun me ngajan ngu ngahma ndihya tséhë yungun, cahndé xi hmí Tséhë Salomón. ¹² Xi cavëë xu Pedru xi cuatjin camatangun xuta ne, cuitjin cachja me:

—Ngayujun ngarcun ni xuta tjé rē Israel matsejen ne, ¿má cuatjin fircun nuju tséhë cha xi cuijyihí vi? ¿Má cuatjin jercu chutsujun niji sacuaha xi ngatsé rē cjuatacun niji suvin o ngatsé rē xi jemu ndaja chjihinrcuin Nina ne, vēhë xi camá canihñi xi camandaja cha? ¡Jéya! Hacuiin cuatjin. ¹³ Nina rē Abraham cojo Isaac cojo Jacob, Nina rē xutachanga naja matsejen ne, casahmi jyé casahmi hnga me Jesús, me xi casahmi xa rē Nina. Hane ngatsé rē me cama cjuarcun vi. Peru ngayun matsejen ne, catuhun Jesús cojo xutaxa rē. Hane ngajan xcun gobernador Pilatu matsejen ne, hora xi meje tsismi me Jesús ne, catuun cahndé. ¹⁴ Jesús jan ne, hatuxa tjengui me Nina cojo yéjé xahasen rē me, hatuxa cjuaquixi xi sahmi me. Peru ngayun matsejen ne, canitjungun me. Hane cahndé rē xi

chjahyun rë Pilatu xi tsismi me Jesús matsejen ne, cachjahyun rë me xi tsismi me ngu cha tsiquehen. ¹⁵ Hane Jesús, me xi sua cjuahñu naja ne, ngayun catuhun me xi cahme me. Peru Nina matsejen ne, catsicuya me Jesús jan cjuahñu. Hane ngayin ne, hisca cahyin me quihndë xi tacun nga me cjuahñu. ¹⁶ Cha xi cuijyihu tichutsujun vi ne, ha hyun yo cha. Casacu rë ntsacu cha ngahñu ta, tséhë xi ngayin matsejen ne, mangutacuín cojo Jesús. Hacuaha ngatsë rë xi cuatjin mangutacuín cojo Jesús ne, vëhë casahmi xi camandaja cha sacuahatjin xi cahyun ngayujun ni.

¹⁷ 'Quihndë ne, ha hvë ta ngayujun ni cojo yëjë xutaxa rë yungun naja matsejen ne, hya xi catuhun Jesús xi cahme me ne, hyúun yo xi canihñu cojo. ¹⁸ Peru Nina matsejen ne, cuatjin casahmi me xi cavetjucaa cjua xi cachja yëjë ni profeta cojo xutachanga naja hatsëë nixtin hya xi cachja profeta jan, tséhë cjuañihi xi cuatju ngu me xi tsingatju naja Nina nchujun ni nguini. ¹⁹ Vëhë xi meje rë xi nindeyun cjuatacun nuju, tisuhun ndiya rë Nina, cojo sa xi Nina matsejen ne, cjuahaxin me yëjë ni jyë nuju. ²⁰ Xi cuatjin nihñu ne, Nina ne, sua me cahndë xi cjuahajenda hitsë xahasen naja. Hacuaha xi cuatjin ne, tsingatju nga naja me Jesús ta, tséhë xi ha me vëhë xi cachja Nina hisca hatsëë xi cjuaha me xa xi cuaxëtje naja me. ²¹ Peru Jesús jan ne, meje rë xi cuejña sa me ngajan ngahnga hisca xi Nina ne, cuya sahmi ndaja nga me yëjë ni xcusun, sacuatjin xi ha cachja profeta rë me, hya xi cachja me cojo xutachanga naja cjua rë Nina hatsëë nixtin. ²² Xutachanga naja Moisés matsejen ne, cuitjin cachja me ngu cjua xi catsingatju Nina tséhë me hatsëë: "Nina ne, sahmi me xi cuetjuyñi ngajñi nuju ngu xi cuma profeta sacuaha ngahan. Tetuhunrcun yëjë cjua xi cuichja me cojo nuju ta, ²³ sa xi yo xi cuetaharcuaain cjua rë profeta jan ne, hatuxa cueya, ha quihndë cuejñaa ngajñi naja ngayaan xuta rë Nina." Cuahaxutjin cachja Pedru cjua rë Moisés.

²⁴ Sehe cachja sa Pedru cojo xuta cuitjin:

—Hacuahanitjin yëjë profeta, xi cavetsihin cojo xutachanga naja Samuel cojo xi canduvaniji sa ne, jemu cachja me tséhë xcusun xi camá nixtin xi nechan vi. ²⁵ Cjuandaja xi cachja Nina xi sua me xutachanga naja nchujun ni nguini ne, vëhë cjuandaja xi tisua naja me quihndë. Hacuaha compromisu xi casahmi me cojo xutachanga naja matsejen ne, tisahmichihin me cojo naja quihndë. Nina ne, casahmi me compromisu jan nixtin xi cachja me cojo xutachanga naja Abraham cuitjin: "Ngatsë rë ngu xuta tjë riji ne, ngahan ne, tsinchácun yëjë ni xuta ngasunhndë." Cuatjin cachja Nina cojo Abraham. ²⁶ Sehe ngajan xi Nina matsejen ne, hya xi cavaxijin me Jesús xi cjuaha xa rë me ne, tjun tjun ngayaan xuta tjë rë Israel catsingatju naja Nina me. Cuatjin xi tsinchacun naja me xi cuetjunxeen jima ngu ngayaan tséhë ndiya tsehen xi tivanguen. —Cuahaxutjin cachja Pedru cojo xuta.

4

Casua Pedru cojo Juan cjuaquixi rë me

¹ Hya xi camá ne, Pedru cojo Juan ne, tichja cuaha sa me cojo xutacjín jan, hora xi cafehe xu ngujo nahmi. Hacuaha cha mayu rë yungun xi matitjun cojo ngujo sa cha saduceo ne, cafehe xu cha cojo nahmi xi cuacun jan. ² Hane jemu xti má rë yëjë me ta, tséhë xi tivicuya apóstol jan xuta, tichja me xi ngatsë rë xi catsicuya Nina Jesús cjuahñu ne, vëhë xi machaya naja xi cuechú nixtin ne, tsicuya nga Nina yëjë ni nima cjuahñu. ³ Hya xi camá ne, cachjaha rë Pedru cojo Juan. Peru tséhë xi ha quiji xu hora ne, tu caxincha ni me ndavaya. ⁴ Peru jemu cjín xuta xi cahndë cjua rë apóstol jan ne, camacjain xu rë me. Vëhë xi yëjë xuta xihin xi macjain rë ne, sacuaha hñú mil xu camá me, cojo me xi hatsëë camacjain rë cojo me xi sehe camacjain rë.

⁵ Xi camá nchujun jan ne, ngujo xutaxa rë yungun cojo ngujo xuta changá cojo ngujo cha xi vicuya cjuachacun ne, camatangun xu me ngajan Jerusalén. ⁶ Camatangun me cojo Anás, me xi matitjun tséhë yëjë ni nahmi, cojo Caifás, cojo Juan, cojo Alejandru, cojo yëjë sa me xi xuta rë me xi matitjun tséhë nahmi jan. ⁷ Hya xi camá xu ne, catsingatju me quiji

chjahá rë Pedru cojo Juan, cavyuju me me cavasencia jan ne, sehe cavinenguise me me cuitjin:

—¿Hacutjin canihñu xi camá camandaja cha hmu rë jan? ¿Yo casua nuju chuva rë xi cuatjin canihñu? —Cuatjin cavinenguise me.

⁸ Ngajan xi Pedru ne, cojo ngahñu rë Hasen rë Nina xi quitsë rë xahasen rë me ne, cuitjin cafayangui xu me:

—Ngayun xi má ngayun xutaxa rë tsajan, ngayun xi má ngayun xuta changá naja matsejen ne, ⁹ quihndë xi meje cumachaya nuju hacutjin canihñu ngu cjuandaja xi camandaja ngu cha hmu rë. ¹⁰ Nguehe cuinújin cojo nuju cojo sa xi cumachaya rë yéjë ni xuta tjë rë Israel ta cha hmu rë vi ne, nguehe secun cha xcun ngayujun ni matsejen ta, tséhë xi camandaja cha ngatsë rë ngahñu rë Jesucristu, me xi tséhë nandya Nasaret. Ngayun ne, catuhun me xi cahme me xcun cru, peru Nina matsejen ne, catsicuya rë me cjuahñu. ¹¹ Me vëhë xi canitjungun ta, tséhë xi xi má nuju matsejen ne, machjiriin camahani Jesucristu. Canitjungun me sacuha tsitjungui chjinevexo ngu ndyojo xi chuyiin rë me tséhë. Peru quihndë matsejen ne, camatitjun me tsajan ngayejen ni, sacuha ndyojo ngahñu rë ndihya. ¹² Tsajin sa yo xi cuaxëtje naja. Tsajin sa ngu xuta nguehe ngasunhndë xi catsingatju Nina xi cuma cuaxëtje naja. —Cuahaxutjin cachja Pedru.

¹³ Hya xi camá xu ne, cavëë xuta xi cuacun jan xi Pedru cojo Juan ne, tsacjuuin camahani me xi sua me cjuaquixi rë me, hacuaha cavacun rë xuta jan xi Pedru cojo Juan ne, xuta yuma me, xi hisca cavutayaain me cjuachacun. Ngajan xi xuta jan ne, jemu quijircun rë me. Hacuaha ha vëë me xi Pedru cojo Juan ne, hacui me xi catsuyiyihiya cojo Jesús. ¹⁴ Hane tséhë xi cha xi camandaja jan ne, ngajan secun tangun xu cha cojo Pedru cojo Juan ne, vëhë xi sacuinyiin rë xuta xi cuacun jan hacutjin cuma xi cuichja me condra tséhë Pedru cojo Juan. ¹⁵ Hya xi camá ne, cavaxë me Pedru cojo Juan cojo cha xi camandaja jan candatsen. Sehe cavisajmicjín sa me cojo xicjin me. ¹⁶ Cuitjin cachja me:

—¿Mé xi ndatjin nihña cojo cha xi cuacun vë? Yéjë ni xuta nandya ne, ha camachaya rë me tséhë cjuarcun jyë xi casahmi cha. Hane cumaji cuinújan xi quixiin. ¹⁷ Peru cojo sa xi hacuiin cuitsojo sa cjuacjintacun vihi ngajñi rë xuta nandya ne, cuinchanrcun rë cha. Cuinújan cojo rë cha ta ha quihndë cuichjaain sa cha tséhë nima vëhë cojo xuta. —Cuahaxutjin cavisajmicjín xuta xi cuacun jan cojo xicjin me.

¹⁸ Hya xi camá ne, cajindaya nga xuta xi cuacun jan Pedru cojo Juan, sehe cachja xu me cojo me xi ha quihndë cuyaain cuichja me tséhë Jesús cojo xuta. ¹⁹ Peru Pedru cojo Juan ne, cuitjin cafayangui me:

—Xi má nuju suvun ne, ¿jarë xi hitsë sa chuya rë Nina? ¿Há xi cuinuhinyin tsujun ne?, o há tsajin ne, ¿há xi cuinuhinyin tséhë me? ²⁰ Peru ngayin matsejen ne, hatuxa cumajin nisejyin xi cuinújin cjuandaja xi canuhinyin cojo xcusun xi cahyin. —Cuatjin xu cafayangui me.

²¹ Hya xi camá ne, xuta xi cuacun jan ne, cavincharcun sa xu me Pedru cojo Juan, sehe cavéhëndaya xu me. Casacuinyiin rë me hacutjin sahmi me castigu me ta, tséhë xi yéjë ni xuta tichja me xi jemu jyë hnga Nina cojo Hasen rë me, ngatsë rë cjuarcun xi cuatjin camá jan. ²² Cha xi camandaja ngatsë rë cjuarcun jan ne, ha vatju yachan nu xu tjin rë cha.

Cafehya sa xuta ladu rë Jesús ngahñu cojo Nina

²³ Hya xi camá ne, xi tu camandaya Pedru cojo Juan ne, quijitjengui sa xu me xuta xi yahnga xi hacuaha ladu rë Jesús, sehe casuacuenda me yéjë cju xi cachja xuta xi cuacun jan cojo rë me. ²⁴ Hya xi cahndë me xi yahnga jan cju xi cachja Pedru cojo Juan ne, ngu tangun ni cachja me xi cafehya rë me Nina cuitjin:

—Ngayun Nai niji. Ngayun xi canihñu ngahnga, canihñu nangui, canihñu ndachacun, hacuaha canihñu yéjë ni xcusun xi siu jan ne, ²⁵ cojo Hasen nuju ne, cachuxuhun cjuatacun rë xutachanga niji David, me xi casahmi xa nuju. Hane me vëhë ne, cuitjin cachja me cju xi catuhun rë me:

¿Má rcu hngacacun xuta?

¿Mé má cuatjin tsingatahacacun me ngu cjuatacun tsehen xi tsajin mé machjirëhë?

²⁶ Me xi matitjun tsöhë jingu sa nangui, cojo xutaxa rë jingu sa nandya ne, matangun me xi sahmi me condra Nina hacuaha sahmi me condra me xi tsingatju Nina xi cuaxëtje naja.

Cuatjin cachja xutachanga niji David.

²⁷ 'Hacuaha cavetjucaa Jain cjua vëhë ta, tsöhë xi ha nguehe nandya vihi ne, cuatjin camatangun Herodes cojo Poncio Pilatu cojo xutaxín cojo xuta tjë rë Israel. Camatangun me xi cuacun vëhë xi sahmi condra me Jesús, me xi hatuxa sahmi xa nuju cojo yëjë xahasen rë, me xi ngayun caningatjun ngasunhndë. ²⁸ Cuatjin casahmi me yëjë hacutjin xi ha cavejñu cjuatacun nuju hatsëe xi cuma ta, tsöhë xi cuatjin meje nuju ngayun. ²⁹ Quihndë ne, ngayun xi Nai niji ngayun ne, chjuhuncuendun cjua xi cachja xuta xi cuacun vë hacutjin xi chocho sahmi me cojo niji. Hane ngayin xi má ngayin mosu hndixahan nuju ne, tuhun niji hitsë ngahñu xi rcuiin camahani xi cuinújin cjua nuju cojo xuta. ³⁰ Hacuaha cojo ngahñu nuju ne, nihñu xi cuma ndaja xuta hmu rë, hacuaha nihñu hitsë cjuarcun xi cueyinnanguin ñihi rë Jesús, me xi hatuxa sahmi xa nuju cojo yëjë xahasen rë. —Cuatjin xu cafehya rë me Nina.

³¹ Hane xi cajnetaha casahmi xuta ladu rë Jesús jan oración ne, cafani nangui ngajan hiscan tjin tangun xu me. Hane cojo Hasen rë Nina ne, catsë rë xahasen rë yëjë ni me, sehe cavetsihin cachja me nguñaja cacun me cjua rë Nina cojo xuta.

Casahmi tangun me yëjë xcusun xi tjin rë me

³² Quihndë ne, ngayëjë ni me xi cuatjin camangu cacun me cojo Jesús ne, ngu cjuatacun ni rë me, ngu xahasen xu ni rë me. Hacuaha hisca ngu me cachjaain me xi yëjë ni xi tjin rë me ne, tsöhë suvá me ta xi tsöhë me ne, hacuaha tsöhë xu yëjë xicjin me. ³³ Hane cojo ngahñu jyë xi casua Nina apóstol xi cuacun jan ne, cuatjin quijinduju me casua me camachaya rë xuta hacutjin catsicuya Nina Nai naja Jesús cjuahñu. Hane jercu casua Nina cjuandaja rë me cojo yëjë xuta ladu rë me. ³⁴ Hacuaha ngajñi rë me xi cuacun jan ne, tsajin xu hisca ngu me xi tjin rë cjuachaja ta, tsöhë xi yëjë me xi nai rë ngu rquí nangui o sa xi ngu ndihya ne, viteña me, sehe fi cani me chji rë jan ³⁵ tsja apóstol. Sehe ngajan xi apóstol xi cuacun jan ne, vatëcja xu me ngajñi rë yëjë xuta, ha tucutjin cjuachaja xi tjin rë xuta jan. ³⁶ Hacuaha cuatjin casahmi ngu cha xi hmí rë José, ngu cha xi casuañihi apóstol ngu ñihi xi ma jo xi hmí Bernabé, ñihi xi meje cuichja cuitjin: Ngu Cha Xi Sua Cjuetacun. Cha vëhë ne, tjë rë Leví má cha, peru catsin xu cha ngajan ngu nangui hiscan xi hmí rë Chipre. ³⁷ Hane cha vëhë ne, caviteña cha ngu rquí nangui xi tjin rë cha, sehe quiji cani cha chji rë, cafahatsja apóstol.

5

Cha Ananías cojo na Safira

¹ Peru ngu nga cha xi hmí rë Ananías cojo na Safira chjuun rë cha ne, hacuaha caviteña xu cha ngu rquí nangui. ² Peru cafahaxin suvá cha hitsë tujún jan, sehe quiji cani cha hitsë tujún xi cavangui jan tsja apóstol, sacuaha xi ha vëhë yëjë ni chji rë nangui jan. Hane na chjuun rë cha jan ne, hacuaha vëë xu na xi cuatjin casahmi cha. ³ Ngajan xi cachjataha xu Pedru cha cuitjin:

—¿Mé má cuatjin caningatihin xi catsë Satanás xahasen riji, ngaye Ananías? ¡Xitsehen vëhë casahmi xi cachjehexin sove hitsë tujún tsöhë chji rë nangui xi caviteñi! ¡Xitsehen vëhë casahmi xi meje cuindache rë Hasen rë Nina! ⁴ Xi chaja sa cuiteñi nangui jan ne, ha hye ta tsiji. Hacuaha ngu ndiya xi ha caviteñi ne, hacuaha hye ta tujún rë ne, tsiji. ¿Mé má cuatjin caningatehetacuin xi nihñu ngu cjuatacun tsehen vi ni? Hacuin ngayin ni xuta xi meje cuindache niji ta hisca cojo Nina meje cuindache rë me. —Cuatjin cachja Pedru.

⁵ Xi tu cahndë cha Ananías cjua jan ne, caticja cha, hane cahme xu cha. Hane yéjë xuta xi camachaya rë cjuacjintacun jan ne, jemu catsacjun camaha xu ni me camá. ⁶ Ngajan xi ngujo cha ne, cavaxtë cha nima ngu tsjian ne, sehe cafaha cha quiji caveyaniji cha.

⁷ Hya xi camá ne, xi cavatju sacuaha chuva rë jyan hora xi cahme nima jan ne, cafehe xu chjuun rë nima ngajan hiscan siu apóstol jan. Peru cjëë cumachaya rë na hacutjin xi cavatju nima xihin rë na camá. ⁸ Ngajan xi cavinenguise xu Pedru na cuitjin:

—Tinoje cojo ná. ¿Há caviteñu nangui sacuatjin chji vihi?

—Juun. Chji vëhë caviteñi. —Cuahaxutjin cachja na.

⁹ Sehe ngajan xi cavinenguise nga xu Pedru na cuitjin:

—¿Mé má cuatjin sacuaha catsingataha cacun nima xihin riji ne, cuatjin caningatehetacuin xi meje cuindachun Hasen rë Nina? Chutsijin ta cuacun cha xi quiji caveyaniji rë nima xihin riji nduva cha jan. Quihndë ne, hacuaha cojo ngaye cuatjin cuatji cuma. —Cuatjin cachja Pedru.

¹⁰ Ha hora vëhë ni ne, caticja xu na hiscan secun Pedru, hane cahme na. Xi tu cavisehen nga cha xi cuacun jan ne, ha cahme xu na xi tu cavëë cha. Sehe ngajan xi cafaha cha nima jan, quiji caveyaniji cha tjehen rë hiscan caseyaniji nima xihin rë. ¹¹ Hya xi camá ne, yéjë xuta rë yungun cojo yéjë sa xuta xi camachaya xu rë cjuacjintacun jan ne, jemu catsacjun camahani me camá.

Casahmi apóstol cjuarcun

¹² Hacuaha apóstol xi cuacun jan ne, jemu cjín cjuarcun xi casahmi xu me ngajñi rë xuta nandya. Hane ngajan ndatsen yungun xi matitjun, hiscan ngahma Ndihya Tséhë Salomón ne, ngajan xu ma tangun yéjë xuta ladu rë Jesús. ¹³ Peru xuta xi hacuiin ladu rë Jesús me ne, hisca vetjiin cacun me xi cuma tiña me ngajan, handasa yéjë xuta jemu ndaja chja me tséhë xuta ladu rë Jesús jan. ¹⁴ Peru hacuaha jemu cjín sa xuta sa chjuun sa xihin me ne, jimangu cacun xu me cojo Jesús, hacuaha jima tangun me cojo xuta ladu rë Jesús. ¹⁵ Hacuaha jemu cjín xuta ne, vaxë me xuta hmu rë, viyuju me me xcun nijña ngajan ndiyatë, cojo sa xi hora xi cuatju xu Pedru ne, ndastu tjahnguen rë me satë rë xuta hmu rë xi cuacun jan, hane cumandaja me. ¹⁶ Hacuaha jemu cjín camaha xu ni xuta nandya tahndee rë Jerusalén ne, ficojo me xuta hmu rë hacuaha cojo me xi hincha xitsehan rë, ngajan Jerusalén. Hane camandaja ngayëjë xu ni me.

Cavatju apóstol cjuañihi

¹⁷ Hya xi camá ne, nahmi xi matitjun tséhë yéjë ni nahmi, cojo yéjë sa xuta saduceo xi tjin tangun cojo rë me ne, jercu camaxín camaha xu ni rë me. ¹⁸ Vëhë xi cachjaha rë apóstol, caxinchá me ndavaya. ¹⁹ Peru hya xi camanguixun ne, ngu ángel tséhë Nina quiji cavuxaha xu tingotjo ndavaya, sehe cavaxë rë apóstol xi cuacun jan. Hya xi cavetju me ne, cachja ángel jan cojo rë me cuitjin:

²⁰ —Tángun yungun xi matitjun ne, tuhuncuendun rë xuta yéjë ni cjua tséhë ndiya xatsë xi tisua nuju Nina. —Cuatjin cachja ángel jan.

²¹ Ngajan xi apóstol jan ne, casahmi me sacuatjin cachja ángel. Vëhë xi, xi casahasen xi camá nchujun ne, quiji xu me yungun xi matitjun. Hane xi cafehe me ndatsen yungun jan ne, cavetsihin casuacuenda me xuta cjua tséhë ndiya xatsë jan.

Hacuaha sacuaha hora vëhë ne, nahmi xi matitjun cojo xuta xi tjin tangun cojo rë me ne, casahmi tangun xu me yéjë xuta changá tséhë xuta tjë rë Israel xi cuma ngu junta jyë. Sehe catsingatju me ngujo cha nísë xi cjue cuaxë xu cha apóstol tséhë ndavaya, cjuecojo cha me hiscan tijima junta. ²² Peru xi cafehe cha ngajan ndavaya jan ne, casacuiin xu rë cha me. Ngajan xi cavuya quiji casuacuenda cha xuta changá jan cuitjin:

²³ —Xi cafihin tingotjo ndavaya jan ne, nda ndaja tichjáhñu, hacuaha cha xi sahmi cuidadu jan ne, hincharun cha tingotjo jan. Peru xi catuxaha tingotjo ne, tsajin yo casacu niji xi hincha cahntsua. —Cuatjin casuacuenda cha.

²⁴ Ngajan xi cha mayu yungun cojo yéjé nahmi xi matitjun ne, hya xi cahndé xu me cjua vëhë ne, jemu cavinenguise xicjin me tséhë xcusun xi camá jan. ²⁵ Hane ha hora vëhë ni ne, cafehe xu ngu cha xi cachja cojo rë me cuitjin:

—Nijyun tacún. Ngu xa xi nduva ngahan ne, cha xi cuacun cavinchun ndavaya jan ne, hinchatahá cha ndatsen yungun, tichja cha cojo xuta. —Cuatjin cachja cha xi cafehe jan.

²⁶ Sehe ngajan xi cha mayu yungun jan ne, quiji cha cojo cha nísé, quijijaha xu cha apóstol xi cuacun jan. Hane xi cafaha cha me ne, quijicojo cha me hiscan tijima junta, peru hacuiin cojo cjuachan ta, tséhë xi jemu tsacjun xu cha xuta nandya, sá tu cuetaha me cha ndyojo. ²⁷ Hya xi cafehecojo cha me jan ne, sehe cavyuju cha me xcun nahmi cojo xuta changá xi cuacun jan. Ngajan xi nahmi xi matitjun ne, cachja xu me cojo rë me cuitjin:

²⁸ —Ha canújin cojo nuju ta ha quihndé cuyuun cuinújun tséhë nima vëhë cojo xuta. Peru quihndé ne, caninguitsujun sa cjuachacun nuju jingujyé nandya Jerusalén, hacuaha meje ningatjunsun jyé tséhë cjuaveya rë nima vëhë ngaxtin ngayin.

²⁹ Ngajan xi Pedru cojo apóstol xi yahnga xu jan ne, cuitjin cafayangui me:

—Meje rë xi cuinuhyan tséhë Nina cahndé rë xi cuinuhyan tséhë xuta. ³⁰ Ngayun matsejen ne, catuhun Jesús xi catyangui me xcun ngu cru, hane ngajan cahme me. Peru Nina rë xutachanga naja matsejen ne, catsicuya me Jesús cjuahñu. ³¹ Hane Jesús vë matsejen ne, casahmi jyé casahmi hnng Nina me, hacuaha cavejña me Jesús ladu quixi tséhë me, xi cumatitjun Jesús tsajan hacuaha cuaxëtje naja me. Cuatjin casahmi Nina, cojo sa xi ngayaan xuta tjé rë Israel matsejen ne, nindeyan cjuatacun naja hacuaha tsinchataha naja me tséhë jyé naja. ³² Ngayin matsejen ne, cahyin xcusun vëhë, vëhë xi titihín jimachaya rë xuta. Hacuaha Hasen rë Nina matsejen ne, cuatjin tisua jimachaya rë xuta tséhë xcusun xi camá jan. Hane Nina ne, casua me Hasen rë me cojo xuta xi vihndé tséhë me. —Cuatjin cafayangui apóstol jan.

³³ Ngajan xi yéjé me xi cuacun tisahmi xu junta jan ne, hya xi cahndé me cjua xi cachja apóstol jan ne, jercu camacjan camahani rë me. Hisca meje tsiquehen xu me apóstol jan.

³⁴ Peru ngajñi rë xuta xi sahmi junta jan ne, jiyajñi ngu me xi vicuya cjuachacun xi hmí rë Gamaliel, ngu xuta fariseo. Hane yéjé ni xuta ne, jemu faharcun xu me me. Gamaliel jan ne, casecunvasen me, sehe cavitexa me xi cuetjuxin apóstol ngu hora lihndi candatsen.

³⁵ Sehe cachja xu me cojo xuta xi tisahmi junta jan cuitjin:

—Ngayujun ngarcun ni xuta tjé rë Israel matsejen ne, nechun cuidadu sa xi mé meje nihñu cojo cha xi cuacun vë. ³⁶ Ninguitsjun ta hatsëe nixtin matsejen ne, cavetjujñi nima cha Teudas ngajñi rë xuta. Jercu cachja nima xi jemu cha venguichji rë cha, hane sacuaha ñuju cientu xihin cavisehen ladu rë nima. Hya xi camá ne, catsiquehen xuta nima, hane yéjé ni xuta ladu rë nima jan ne, cavitsojo me, hane ngajan café cjuandya xi casahmi me. ³⁷ Hane xi camá ngascan ne, sacuaha nixtin xi camá censu matsejen ne, hacuaha cavetjujñi nima Judas, cha Galilea. Cavindacha nima xuta, hane jemu cavisehen me ladu rë nima. Peru nima vëhë matsejen ne, hacuanitjin ni cahme. Hane yéjé ni xuta ladu rë nima jan ne, café me cavitsojo me. ³⁸ Vëhë xi nguehe cuichjá cojo nuju ta mijí rë xi nihñu cjuahngatacun cojo cha xi cuacun vë. Mijí rë xi chasen cha ta, sa xi suvá cjuatacun ni rë xuta xi tijima matsejen ne, cjuëya suvá vë. ³⁹ Peru sa xi cjuatacun rë Nina xi tijima ne, cumaji cuichancjan cjuatacun rë cha. Ndaja cuidadu, sá tu cuechú nixtin xi cumachaya naja ne, Nina tichicjaan cojo rë me. —Cuatjin cachja Gamaliel.

Hya xi cajnetaha cachja Gamaliel cuatjin ne, yéjé ni xuta xi tisahmi junta jan ne, cajne cacun me. ⁴⁰ Ngajan xi cajindaya nga me apóstol jan, sehe cavitexa me casehen rë. Hya xi camá ne, cachja xu me cojo rë apóstol xi ha quihndé cuyaain cuichja me tséhë Jesús cojo xuta, sehe cavéhëndaya xuta jan me. ⁴¹ Ngajan xi apóstol jan ne, cavetjuxin xu me tséhë hiscan jima junta jan. Hane jemu ndama camahani rë me xi cavechú chuva rë xi chohó cavatju me camá ngatsë rë Jesús. ⁴² Peru nchunchujun ni ne, ngajan ndatsen yungun cojo ndava xuta ne, casejyiin xu xi casua me camachaya rë xuta cjuandajyihi xi chja xi Jesús ne, hacui me xi catsingatju Nina.

Catuxijin rë yatu cha xi cuisecoo rë apóstol

¹ Hya xi camá ne, xi quiyi sa nixtin ne, camacjín sa xuta ladu rë Jesús. Hane ngajní rë me xi cuacun vëhë ne, me xi visiajmi hne griego ne, cavetsihin cavinchajyé xu me me xi visiajmi hne rë xuta tjé rë Israel. Jyé xi cavincha xu me ne, yachjin cahan tséhë ngajní rë me ne, ndajin xu má cuenda me nchunchujun ni hora xi ticja xcusun xi saté rë me xingu xingu me xi tjin rë cjuachaja. ² Ngajan xi apóstol xi tejó jan ne, cajindayavaha me yëjé sa xuta ladu rë Jesús, sehe cachja xu ngu apóstol jan cuitjin:

—Ndajintjin xi tu fë tu vetsihin vejñixin cjua rë Nina ngatsé rë xi chjihincuendin cjuacjintacun xi ma cuenda nchunchujun ni. ³ Vëhë xi ngayujun ni ne, naxujun ngajní nuju yatu xihin xi tsajin mé cún mé má hacuaha quitsé rë xahasen rë cojo Hasen rë Nina hacuaha vechútaha cjuatacun rë. Sehe tahan rë xa xi cjuahacuenda cjuacjintacun vëhë. ⁴ Xi cuatjin ne, ngayin ne, tihín yojo niji cojo xa xi nihñi oración hacuaha tihín cumachaya rë xuta cjua rë Nina. —Cuatjin cachja apóstol jan.

⁵ Hane jemu cachuya xu rë yëjé xuta xi cuacun jan cjua xi cachja apóstol jan. Sehe ngajan xi cavaxijin xu me yatu xihin xi cuicun vi: Esteban, ngu xihin xi jemu mangucacun cojo Jesús hacuaha quitsé rë xahasen rë cojo Hasen rë Nina; Felipe; Prócoro; Nicanor; Timón; Parmenas; cojo Nicolás, ngu xutaxín xi hacuiin xuta tjé rë Israel, Peru camacjain rë me Nina rë xuta tjé rë Israel. Nicolás jan ne, canduva me ngu nandya xi hmí rë Antioquía. ⁶ Hya xi camá xu ne, quijicojo xuta jan xihin xi cavaxijin me jan xcun apóstol. Sehe apóstol jan ne, casahmi me oración, sehe cavisanetsja xu me xihin xi cuacun jan xi suaxa rë me.

⁷ Xi quiyi sa nixtin ne, xuta Jerusalén ne, jemu jima chaya sa xu rë me cjua rë Nina, hacuaha jercu jima cjín sa xuta ladu rë Jesús ngajan Jerusalén. Hisca nahmi ne, jemu cjín me xi jimangu cacun xu me cojo cjuandajyhi xi chja tséhë Jesús.

Caxinchajyé rë Esteban

⁸ Nixtin hya ne, Esteban, ngu xihin xi hacuaha cojo cavaxijin xuta jan ne, quitsé rë xahasen rë me cjuandaja rë Nina, hacuaha quitsé rë me ngahñu rë Nina. Vëhë xi jemu tisahmi xu me cjuarcun ngajní rë xuta. ⁹ Peru ngujo cha tséhë yungun xi hmí rë Yungun Rë Hndixahan Xi Ha Ndaya Tjin ne, cojo xu cha ma tangun cha cojo cha nandya Cirene, cha nandya Alejandría, cha estadu Cilicia, cojo cha estadu Asia, xi cuisajmi cha. Cavechú ngu nixtin xi camatangun xu cha xi cuacun vë cojo Esteban ne, cavetsihin cafahataha cha me. ¹⁰ Peru ngatsé rë xi Hasen rë Nina jemu casua rë me cjuatacun xi cuisajmi me cojo cha ne, cacaain xu rë cha casahmi condra cha cjua rë me. ¹¹ Hya xi camá ne, cavanguisehma xu cha ngujo cha xi cuichja cjuandesu cuitjin:

—Canuhuyin xi chocho cachja cha xi cuajyhi vë tséhë Moisés hacuaha chocho cachja cha tséhë Nina. —Cuatjin cuichja cha.

¹² Hane xi cachja cha cjuandesu vëhë ne, casahmi cha xi yëjé xuta cojo xuta changá cojo cha xi vicuya cjuachacun ne, jemu camaxti xu rë me. Ngajan xi cachjahá rë Esteban, quiyi chani rë me xcun yëjé xuta xi matitjun. Sehe casahmi me xi matitjun jan ngu junta. ¹³ Ngajan xi cha xi cuacun jan ne, cuitjin cachja xu cha cjuandesu hora xi cavinchajyé cha Esteban:

—Cha xi cuijyhi vi ne, sejyiin cha xi chocho chja cha tséhë yungun rë Nina xi matitjun vi. Sejyiin cha xi chocho chja cha tséhë ley rë yungun naja. ¹⁴ Hacuaha canuhuyin xi cachja cha xi Jesús, cha Nasaret vë ne, tsinguetsun cha yungun naja vi hacuaha tsindeya cha xcusun xi cavejña xutachanga naja Moisés hatséé hacutjin nihña. —Cuatjin cavinchajyé cha me.

¹⁵ Ngajan xi yëjé xuta xi siu xu xcun junta jan ne, cavutsejenndaja me Esteban. Hane cavëé me xi xcun Esteban ne, tangun jyhi xu cojo xcun ngu ángel.

¹ Hya xi camá ne, nahmi xi matitjun xu jan ne, cavinenguise me Esteban cuitjin:

—¿Há quixi cjua xi chja cha xi cuacun vë? —Cuatjin xu cachja me.

² Hane Esteban ne, cuitjin xu cavetsihin casua me cjuaquixi rë me:

—Ngayujun ni quihndi nandya, ngayujun ni xuta changá matsejen ne, tisiñuju cjua xi cuichjá cojo nuju vi. Nina naja, xi jemu jyé hnga camahani me cojo hasen rë me matsejen ne, cajnetsejen me cachja me cojo xutachanga naja Abraham, hya xi tacun cuaha Abraham táha ladu tséhë nangui Mesopotamia, hya xi chaja sa cjue setaha cahndé me ngajan Harán. ³ Hane cachja Nina cojo rë me cuitjin: “Nismitacuin nangui riji. Nismitacuin xuta riji. Hane tihin ngajan ngu nangui cjin, tuyani ni hiscan xi ngahan tsingácun ri.” Cuatjin cachja Nina. ⁴ Ngajan xi Abraham matsejen ne, cavetju me tséhë nangui rë me, nangui xi hmí Mesopotamia, hiscan xi cavyuju xuta nangui rë me, xuta Caldea. Cavetju me quiji casetahacahndé me ngajan nandya Harán. Hane xi cavatju cahme nahmi rë me ne, Nina casahmi me xi cavetju nga Abraham tséhë Harán, canduva casetahacahndé me nguehe nangui hiscan xi nechan quihndé. ⁵ Peru xi ngutjen ni ne, casuaain Nina me hisca hitsë nangui vihi xi cuma tséhë me ta xi cachja me ne, hisca xi cuma ngascan ne, sehe sua me nangui vihi xi cuma tséhë Abraham, cojo yëjë sa xuta tjé rë me xi cuinduva ngascan. Hya xi cachja Nina cojo rë me cuatjin ne, cjëe sacú rë chjuun rë Abraham quihndi. ⁶ Hacuaha cachja sa Nina cojo Abraham cuitjin: “Cuechú nixtin xi xuta tjé riji ne, cjue cuiyujutaha me ngu nangui cjin. Hane xuta xi nangui rë jan ne, sahmi me mosu hndixahan rë me xuta xi cuacun tjé riji vë, hacuaha jemu choho sahmi me cojo rë me. Ñuju cientu nu xi cuatjin sahmi me xcusun vëhë. ⁷ Peru cuechú nixtin xi ngahan ne, sahme castigu xuta xi nangui rë jan. Hane xi cuatju xcusun vëhë ne, sehe cuetju xuta tjé riji ne, cuya cuinduva nga me nguehe cahndé vihi, hane nguehe cjuaharcun cjuahajeya ná me.” Cuatjin cachja Nina cojo Abraham. ⁸ Hane cojo sa xi cuma tsejen xi camangu cacun Abraham cojo compromisu xi casahmi Nina cojo rë me matsejen ne, cavejña Nina ngu xcusun xi xtí chuxin naja ngayaan xi xihin ngayaan. Ngajan xi hya xi cavechú jyin nixtin xi catsin Isaac, quihndi rë Abraham ne, cavatë me chuxin rë quihndi jan sacuatjin xi cachja Nina. Hane hacuanitjin ni casahmi Isaac cojo quihndi rë me Jacob. Hacuaha Jacob ne, cuatjin casahmi me cojo yëjë tejó quihndi rë me xi xutachanga naja.

⁹ 'Hane xi camá ngascan matsejen ne, cavechú ngu nixtin xi xutachanga naja xi quihndi rë Jacob jan ne, jemu casahmi xín cacun me cojo hntsë me xi hmí rë José. Vëhë xi caviteña me José. Hane quijicojo xuta xi cavatsë rë José jan me hisca nangui Egipto. Peru Nina ne, caviseecoo me José jan, ¹⁰ hacuaha cavaxétje Nina me tséhë yëjë cjuacjintacun xi cavatju me camá. Jemu casua Nina me cjuatacun, hacuaha jemu casua me me cjuandaja. Vëhë xi me xi matitjun tséhë yëjë ni nación Egipto ne, jemu cachuya rë me tséhë José jan. Vëhë xi me xi matitjun jan ne, casua me José xa xi cuitexa me jinguwyë ni nación jan hacuaha cjuahacuenda me yëjë cjuacjintacun xi tjin ndava me xi matitjun jan.

¹¹ 'Hya xi camá ne, jercu camajindya camahani jinguwyë ni ladu tséhë Egipto cojo Canaán. Jercu jyé camahani ngu cjuañihi xi cavatju xuma xutachanga naja camá. Casacuiin rë me mé xi sinë me. ¹² Peru hya xi camachaya rë xutachanga naja Jacob xi jemu tjin xichinë ngajan Egipto matsejen ne, ngajan catsingatju me quihndi rë me ngu ndiya titjun xi cjue cuatsë me xichinë. ¹³ Hane hya xi ma jo ndiya quiji quihndi rë Jacob ngajan Egipto ne, cachja quixi José cojo hntsë me cuitjin: “Ngahan xi tsuhun ná.” Cuatjin cachja me. Hacuaha nixtin hya ne, me xi matitjun tséhë Egipto matsejen ne, camachaya rë me yo tjé rë má José. ¹⁴ Sehe ngajan xi José ne, catsingatju me hntsë me jan xi cjue jaha me Jacob, nahmi rë me, cojo yëjë sa xuta rë me. Xi yëjë xuta xi cuacun vëhë ne, jyanchan tyjuhun xuta má me. ¹⁵ Ngajan xi Jacob cojo xuta rë me matsejen ne, quiji cavyujutaha cahndé me ngajan Egipto. Hane xi camachangá me ne, ngajan cahme me. Hacuaha yëjë sa xutachanga naja xi cuacun jan ne, hacuaha ngajan cahme me. ¹⁶ Xi camá ngascan ne, quiji chani rë yojo rë nima Jacob ngajan nandya Siquem. Ngajan caseyaniji nima tsjun

xi cavatsë Abraham hatsëë, hya xi caviteña xuta rë ngu cha xi hmí rë Hamor, ngajan Siquem.

¹⁷ 'Hya xi camá ne, xi camatiña nixtin xi cuetjucaa sacuaha cjua xi ha cachja Nina cojo Abraham matsejen ne, yéjë xutachanga naja xi siutaha cahndë ngajan nangui Egipto ne, ha jercu cjín camahani camá me. ¹⁸ Sehe cavisehen nga ngu me xi xatsë xi camatitjun me ngajan nangui Egipto jan. Hane me vëhë ne, hvíñ me hacutjin casahmi nima José hatsëë. ¹⁹ Hacuaha me vëhë ne, jemu cavindacha me xutachanga naja. Jemu choho casahmi me cojo rë me ta casahmi me nguyjë xi xutachanga jan ne, cuaxë me quihndinda rë me, cuiyuju me candatsen cojo sa xi cueya. Hane cuatjin xi ha quihndë hacuiin cuma cjín sa me. ²⁰ Ngajni rë cjuacjintacun vëhë matsejen ne, hya catsin Moisés, ngu quihndi xi jemu ndajyihi camahani. Hane quihndi jan ne, ndava nahmi rë camacha sacuaha chuva rë jyan sá. ²¹ Peru hya xi cavaxë me quihndi jan xi cueya ne, na quihndi rë me xi matitjun jan ne, cafaha na quihndi jan, hane catsicha na sacuaha quihndi rë suvá na. ²² Hane xi quihi sa nixtin ne, cavetsihin cavutaya Moisés yéjë ni cjuahasen xi tjin rë xuta Egipto, sehe ngajan xi camá me ngu xihin xi jercu vengui chji rë xi chja me cojo xi sahmi me.

²³ 'Hya xi cavechú Moisés yachan nu matsejen ne, catsingataha cacun me xi cjue scusehenya me xuta tjé rë Israel, xuta xi tangun xutachanga rë me cojo. ²⁴ Hya xi camá ne, cavëë Moisés xi ngu cha Egipto ne, tisahmi cha cjuahngatacun cojo ngu cha tjé rë Israel. Ngajan xi Moisés ne, cavisecoo me cha xi choho tivatju tijima jan. Catsiquehen me cha Egipto jan, hane cuatjin casahmingojo me. ²⁵ Xi má rë Moisés matsejen ne, cuijnercu yéjë xuta tjé rë Israel xi Nina tsingatju me Moisés xi cuaxëtje me xuta jan. Peru cajnii rcu me. ²⁶ Xi camá nchujun jan ne, cavechútaha me jo cha tjé rë Israel xi ticjan cha cojo xicjin cha. Hane meje cuatëcja me si xi tisahmi cha. Vëhë xi cachja me cojo cha cuitjin: "¿Mé má cuatjin nihñu cjuahngatacun cojo xingun? ta ngayun ne, tangun xutachanga nuju." Cuatjin xu cachja Moisés. ²⁷ Peru cha xi tisahmi cjuahngatacun cojo cha xingu jan ne, catsivaha cha Moisés, sehe cachja cha cojo me cuitjin: "¿Yo casuaxa nuju xi nduvun vitexun niji hacuaha nduvun nichuvun jyé niji? ²⁸ ¿Há meje nicuhun ná ngahan sacuatjin canicuhun cha Egipto ngujña?" Cuatjin cachja cha. ²⁹ Hane xi cuatjin cachja cha cojo Moisés ne, catsacjun me camá. Vëhë xi quihi cavanga me hiscan ngu nangui cjin xi hmí rë Madián, ngajan casetahacahndë me. Hane xi quihi nixtin matsejen ne, camá me nahmi rë jo quihndi xihin.

³⁰ 'Hane hya xi cafë nga yachan nu xi casetaha Moisés ngajan ne, cavechú ngu nixtin xi cavëë me sacuaha ngu ángel ngajni rë ndihi tséhë ngu ya lihndi xi seti ngajan ngu xín camahani tséhë nandya, tiña Naxi Sinaí. ³¹ Hane jemu quijircun rë Moisés xi cavëë me xcusun jan. Hane xi quijitiña sa me xi scutsejenndaja me matsejen ne, cahndë me cjuá rë Nina xi cachja cuitjin: ³² "Ngahan xi Nina rë xutachanga riji ngahan, Nina rë Abraham cojo Isaac cojo Jacob." Cuatjin cachja cjua rë Nina jan. Ngajan xi Moisés ne, cavetsihin ña cafatsë me xi catsacjun me camá; ha hisca quihndë cavetjiin cacun me xi scutsejen sa me. ³³ Sehe cachja nga Nina cojo rë me cuitjin: "Naxe chuxinxte riji ta cahndë hiscan sechin ne, catsinchácun. ³⁴ Hacuaha nguehe cuichjá cojo ri ta ngahan ne, ha cahvë hacutjin choho tisahmi xuta Egipto cojo xuta ladu naha, hacuaha ha cahndë hacutjin tifë cacun xuta ladu naha xi choho tivatju me tijima. Vëhë xi ngahan ne, canduvajne xi cuaxëtje me. Quihndë ne, ndove ta tsingátju ri ngajan Egipto." Cuatjin cachja Nina cojo Moisés.

³⁵ 'Moisés vë ne, hacui me xi catsitjungui xuta hya xi cachja xuta cuitjin: "¿Yo casuaxa nuju xi nduvun vitexun niji, hacuaha nduvun nichuvun jyé niji?", chja me. Hacuaha hacui me xi Nina catsingatju rë xi cuma titjun hacuaha cuéhëndaya rë xuta. Hane sacuaha ángel xi camatsejen ngajni ndihi rë ya lihndi jan ne, cavisecoo rë Moisés xi cuatjin casahmi me. ³⁶ Hacuaha hacui me xi cavaxë rë xutachanga naja tséhë nangui Egipto. Jemu casahmi me cjuarcun ngajan Egipto, cojo ngajan ndachacun Hani, cojo ngajan ngu xín camahani tséhë nandya. Cahntsua yachan nu xi cuatjin casahmi me. ³⁷ Moisés vë ne, hacui me xi cachja cojo xutachanga naja cuitjin: "Nina ne, cuya tsingatju

nga nuju me ngu profeta xi cuetjujñi ngajñi nuju. Tsingatju nuju Nina profeta vëhë sacuatjin catsingatju ná me ngahan." Cuatjin cachja Moisés. ³⁸ Hacuaha ha hacui ni me xi casetaha cojo xutachanga naja, hya xi caviyujutaha me ngajan ngu xín camahani tséhë nandya. Hacui me xi cachja ángel cojo rë ngajan Naxi Sinaí. Hacuaha hacui me xi cafahatsja cjua rë Nina xi sacú rë xutachanga naja hacuaha hisca cojo xi sacú naja ngayaan quihndë.

³⁹ 'Peru xutachanga naja xi cuacun jan ne, mijí cuihndë me tséhë Moisés. Catsitjungui me Moisés, hisca cavuya catsinguitsjen nga me nangui Egipto cahntsua xahesen rë me.

⁴⁰ Ngajan xi cachja me cjua vihi cojo xutachanga naja Aarón, hntsé Moisés: "Nindujun sa nina xi scuxaha ndiya tsajan ta, cha Moisés vë, cha xi cavaxë naja tséhë nación Egipto ne, hyaan mé camá rë cha xi vuyaain cha." Cuatjin cachja xuta jan. ⁴¹ Ngajan xi nixtin hya ne, catsindaja xuta jan ngu nina rë me xi xcusun rë ngu hndindyaja. Hya xi camá ne, catsiquehen me ngujo chu, sehe quiyi caviyuju me chu xcun nina jan. Hacuaha casahmi me suhi tséhë nina xi catsindaja suvá me jan. ⁴² Vëhë xi Nina naja ne, catsismi cacun me xutachanga jan, cojo sa xi cjuaharcun xuta jan niñú xi siutaha ngahnga, sacuatjin catsihindu profeta xcun xujun rë Nina cjua xi cachja Nina hya xi cachja me cuitjin: Ngayujun ngarcun ni xuta tjé rë Israel matsejen ne,

hya xi canicuhun chu sacuaha cjuatjo xi tuhun ná ngahan cahntsua yachan nu xi cavinechuntuhun ngajan ngu xín camahani tséhë nandya matsejen ne, hacuiin ngahan xi cuatjin cachjuhunrcun ná ta ngayun ne, ha canindujun suvun nina xi chjuhunrcun.

⁴³ Ndava nina nuju xi hmí Moloc

cojo niñú rë nina nuju xi hmí Refán, jo vëhë xi cachuhunhngun catsanguncujun xi má nina nuju.

Vëhë xi ngahan sahme xi cjuecojo cjuachan nuju xuta cjin sa tséhë hiscan xi hmí Babilonia.

Cuatjin catsihindu profeta cjua xi cachja Nina.

⁴⁴ 'Hya xi caviyujutaha xutachanga naja hatséë ngajan ngu xín camahani tséhë nandya matsejen ne, cavejña rë me ngu ndihya tsjian hiscan camá acuerdu cojo Nina. Hane vëhë xi vëë me xi cavejña Nina cojo rë me. Ndava Nina jan matsejen ne, camandaja tutjin xi cachja Nina cojo Moisés, camandaja sacuatjin xcusun xi catsingacun Nina Moisés.

⁴⁵ Hane hya xi cafahatsja xutachanga naja ndava Nina jan ne, hacuaha cuatjin quijicojo me ha tuyani ni xi quiyi caviyujutaha nga me. Hane xi camá ngascan ne, cavechú nixtin xi cafehecojo Josué xutachanga naja nguehe nangui naja vi, nangui xi Nina cavisecoo rë xutachanga naja xi cavaxëxin me xuta xi nangui rë. Hacuaha nixtin hya xi camá cuatjin ne, hacuaha cafehecojo me ndava Nina jan. Cuatjin camá sa hisca hya xi cavechú nixtin rë xutachanga naja David. ⁴⁶ Hane David jan matsejen ne, jemu cachuya rë Nina tséhë me. Ngajan xi cafehyá David cahndé cojo Nina xi tsindaja me ngu ndihya hiscan cuejña Nina.

⁴⁷ Hane hisca xi camá ngascan ne, xutachanga naja Salomón catsindaja me ndava Nina.

⁴⁸ Peru Nina xi matitjun matsejen ne, hacuiin vejñacahndë me ngu ndihya xi tsindaja xuta ta žhá vitsjiin nuju hacutjin cachja ngu profeta xi cachja me cjua rë Nina cuitjin?:

⁴⁹ Ngahnga ne, sacuaha ngu sillá ndajyihí hiscan xi vitejña,

hane nangui ne, sacuaha ngu yaté hiscan xi visane ntsacu, chja Nina.

Tsajin yo cuma tsindaja ngu ndihya hiscan xi cuitejñacahndë,

Tsajin ngu cahndé xi cuacun vë xi cuma cjuahájenda.

⁵⁰ Ngahan catsindaja yéjë ni xcusun xi tjin ngasunhndë.

Cuatjin cachja profeta jan cjua rë Nina.

⁵¹ 'Ngayujun ni ne, jercu taja camahani rcun. Xahesen nuju cojo cjuatacun nuju ne, tangun cojo xutaxín xi hatuxa macjaain rë Nina. Hatuxa nihñu condra Hasen rë Nina.

Tangun camahani ngayun cojo xutachanga naja. ⁵² Hacuaha xutachanga naja ne, jercu catsuyiyhiya tjengui me yéjë profeta cojo cjuahngatacun. Hisca catsiquehen me profeta xi casua camachaya rë me xi sehe cuinduva ngu me xi hatuxa tyjahi Jain cojo cjuatacun

rë. Hane quihndë xi cafehe jain me ne, ngayun canihñu me entregadu, ngayun catuhun me xi catsiquehen xuta me. ⁵³ Ngayun xi casua ángel xutachanga nuju ley rë Nina ne, hisca nuhyuun tséhë ley vöhë. —Cuatjin casua Esteban cjuanaixi rë me xcun yéjë xuta xi matitjun ngajan xcun junta.

Cojo ndyojo catsiquehen xuta Esteban

⁵⁴ Ngajan xi yéjë xuta xi cuacun tisahmi junta jan ne, hya xi cahndë me cjua xi cachja Esteban jan ne, hisca catsijanerii me nehñu me xi jercu tu camacjan camahani rë me. ⁵⁵ Peru Esteban ne, quitsë rë xahasen rë me cojo Hasen rë Nina. Hane xi cavutsejenniji me ngahnga ne, cavëë me hasen ndajiyhi rë Nina xi jercu seti camahani. Hacuaha cavëë me Jesús, secun me cojo Nina. ⁵⁶ Ngajan xi cachja Esteban cuitjin:

—Chutsujun ni. Ngahan ne, xi tivutsején ngahnga vë ne, tsejen xi tixaha sacuaha tingotjo rë, hacuaha tsejen xi me xi Quihndi rë Xuta Jain ne, secun me cojo Nina. —Cuatjin cachja Esteban.

⁵⁷ Peru me xi cuacun jan ne, cavetsihin cajindayatë me hacuaha cavahahñu me tyjavañuju me, tséhë xi mijí sa cuihndë me xi tichja Esteban. Sehe ngutjen ni ne, ngu tangun ni cavanga me quiji cavehnchun me Esteban xi cafaha me me. ⁵⁸ Sehe cavaxëxin me me ngajan tjehen nandya, sehe cavitexa me ngujo cha xi cavetsihin cavetaha cha ndyojo Esteban. Cha xi cuacun casahmi jan ne, cavaxë cha tsjian xcun rë cha, caviyuju cha hiscan xi secun ngu cha xi hmí rë Saulo, xi casahmi cha cuidadu. ⁵⁹ Jinguyëjë rë xi tisatë rë Esteban ndyojo xi tivetaha cha xi cuacun jan ne, cafehya me cjuandaja cojo Jesús cuitjin:

—Jesús, ngayun Nai naha, chjuhunntsun hasen naha. —Cuatjin cachja me.

⁶⁰ Hya xi camá ne, cavixcuhnchi me, hane sehe jercu cajindaya me, cachja me cjua vihi: —¡Ngayun Nai naha, ninchatuhun rë xuta xi cuicun vi tséhë cjuatsehen xi tisahmi me cojo ná! —Cuatjin cajindaya me cachja me.

Xi café cachja me cjua vöhë ne, cahme me.

8

Catsuyihiya tjengui Saulo xuta ladu rë Jesús cojo cjuahngatacun

¹ Hane Saulo ne, hacuaha cachuya rë me xi cuatjin catsiquehen cha xi cuacun jan Esteban.

Ha nixtin hya ni ne, cavetsihin catsuyihiya tjengui xuta xi matitjun jan yéjë xuta ladu rë Jesús cojo cjuahngatacun ngajan Jerusalén. Hya xi camá ne, yéjë xuta ladu rë Jesús jan ne, café cavitsojo me táha ladu tséhë distritu Judea cojo distritu Samaria. Suvá sa apóstol xi tsajin cavitsojo xu me. ² Hane ngujo cha xi faharcun jain rë Nina ne, cavinchaniji cha nima Esteban, hacuaha jemu cajihnda xu cha tséhë nima. ³ Peru Saulo ne, cavetsihin catsuyihiya tjengui me xuta ladu rë Jesús cojo cjuahngatacun. Quiji cavisehen xu me ndava xuta xi cuacun jan, cajuvéjne me cavaxë me sa chjuun sa xihin, quijicani me ndavaya. Vöhë xi cuatjin cavitsojo xuta jan.

Sacu machaya rë xuta Samaria cjuandajyhi xi chja tséhë Jesucristu

⁴ Quihndë ne, xuta xi cavitsojo tséhë Jerusalén jan ne, catsuyihiya casua xu me camachaya rë xuta cjuandajyhi xi chja tséhë Jesucristu. ⁵ Hane Felipe ne, quiji xu me ngu nandya táha distritu Samaria, hane ngajan casua me camachaya rë xuta ta ha cafehe me xi catsingatju Nina xi cuaxétje naja. ⁶ Hane xi cavisiñuju xuta cjua xi cachja Felipe cojo xi cavutsejen me cjuarcun xi casahmi me ne, jemu ndaja cavetaharcu me cjua xi cachja Felipe jan. ⁷ Jemu cjín xuta xi hincha xitsehen xahasen rë me ne, camandaja xu me. Hisca cajindaya xitsehen jan hora xi cavetjuxin. Hacuaha jemu cjín xuta xi cahme yojo rë me cojo cjín sa xuta xi rengun me ne, camandaja xu me. ⁸ Vöhë xi xuta nandya vöhë ne, jercu ndaja camá xu rë me.

⁹ Peru ngu cha xi hmí rë Simón ne, ha quitahá cha ngajan, tisahmi xu cha cjuasurqui. Hane yéjë xuta distritu Samaria ne, jemu quijircun rë me xi casahmi cha. Hacuaha cachja

xu suvá cha xi jemu jyé hnga cha cojo cjuatacun rë cha. ¹⁰ Yéjé xuta Samaria jan, sa quihndi sa changá me ne, jemu ndaja cavetaharcu xu me tséhë cha Simón jan. Hisca cachja xu me tséhë cha cuitjin:

—Cha vihi ne, hacui cha xi tjin rë ngahñu rë Nina, ngahñu xi hmí rë ngahñu jyé.
—Cuatjin cachja xuta jan.

¹¹ Véhë xi jemu ndaja cavetaharcu xu xuta tséhë cha ta, tséhë xi ha jemu jyé nixtin xi casahmi cha xi quijircun rë xuta tséhë cjuasurqui xi casahmi cha.

¹² Peru hya xi camacjain rë xuta tséhë Felipe, hya xi casua me camachaya rë xuta tséhë cjuandajiyihi xi chja xi cuinduva Nina sahmi me gubiernu hacuaha cojo cjuandajiyihi xi chja tséhë Jesucristu ne, caxtenda xu me, sa chjuun sa xihin me. ¹³ Hacuaha hisca cha Simón jan ne, camacjain xu rë cha tséhë Felipe. Hane xi cavatju caxtenda cha ne, sehe catsihñu cha yojo rë cha cojo Felipe. Hane xi cavutsejen cha yéjé cjuarcun yehe xi jima ne, jemu quijircun rë cha.

¹⁴ Hyá xi camachaya rë apóstol xi siu ngajan Jerusalén xi xuta Samaria ne, camacjain xu rë me cjua rë Nina ne, catsingatju me Pedru cojo Juan quijitjengui rë xuta jan. ¹⁵ Hyá xi cafehe jo apóstol jan ngajan ne, casahmi xu me oración tséhë xuta jan cojo sa xi sacú rë me Hasen rë Nina. ¹⁶ Cuatjin casahmi me ta, tséhë xi hisca xi ngu xuta jan ne, cjëe cuinduva xu Hasen rë Nina cuisehen xahasen rë me. Suvá ni ñihi rë Nai naja Jesús caseyanangui hora xi caxtenda me. ¹⁷ Ngajan xi Pedru cojo Juan ne, cavisanetsja me xuta Samaria jan, sehe cavisehen xu Hasen rë Nina cahntsua xahasen rë me.

¹⁸ Xi cavëe cha Simón xi casacu rë xuta jan Hasen rë Nina ngatsé rë xi cavisanetsja apóstol jan me ne, meje sua xu cha me tujún, ¹⁹ hacuaha cuitjin cachja xu cha cojo rë me:

—Tuhun ná cjuatacun véhë, cojo sa xi tu yo ni xi cuisanentsa ne, sacú rë Hasen rë Nina. —Cuatjin cachja cha.

²⁰ Ngajan xi Pedru ne, cuitjin cafayangui xu me:

—¡Tujún riji ne, catjé tangun cojo ri! ta, tséhë xi caningatehetacuin xi cjuandaja rë Nina ne, cuma chaha rë cojo tujún. ²¹ Ngaye ne, satiin camahani ri xa véhë ta, tséhë xi hacuuiin tyjahi xahasen riji xcun Nina. ²² Nindeye cjuatacun riji. Tejñixin cjuatsehen riji vé. Hacuaha chjahye rë Nina cjuandaja rë me, há tsinchataain me ngaye tséhë cjuatacun xi jiya ngajni rë cjuatacun riji. ²³ Ngahan ne, vacun ná xi ngaye ne, cuma ngaye ngu xuta xi ngundiyaxa ni tsihñu me yojo rë me cojo cjuatsehen. —Cuatjin cafayangui Pedru.

²⁴ Ngajan xi cha Simón ne, cuitjin cafehya xu cha:

—Nihñu favor ne, chjahyun rë Nina ngatsé naha cojo sa xi hisca xi ngu cjua xi canújun vé ne, cuatjuun cuma. —Cuatjin cafehya cha.

²⁵ Hyá xi camá ne, Pedru cojo Juan ne, xi cavatju cachja xu me cojo xuta Samaria jan cjua xi chja tséhë Nai naja ne, cavuya quiyi nga me ngajan Jerusalén. Peru yéjé ni nandya xi vatju me hacutjin cjui me jingunduju ni ndiya ngajan distritu Samaria ne, ha cuatjin cachja sa me cjuandajiyihi jan cojo xuta.

Felipe cojo ngu xutaxa rë nación Etiópia

²⁶ Camá nga ngu nixtin xi ngu ángel tséhë Nina ne, cachja cojo Felipe ngajan Jerusalén cuitjin:

—Tihinjni ndiya Gaza. —Cuatjin cachja ángel.

Ndiya véhë ne, vatju ngajan ngu xín camahani tséhë nandya. ²⁷ Ngajan xi cavetju xu Felipe, quiyi me. Hane ndiya cjui me ne, cavechútaha xu me ngu xutaxa rë nación Etiópia, ngu xihin xindë xi fahacuenda yéjé cjuanchina rë na xi matitjun tséhë yéjé xuta Etiópia jan. Xihin jan ne, quiyi me ngajan Jerusalén xi cjuaharcun me Nina. ²⁸ Hane xi cavuya tife me nanguí rë me ne, jiya me carreta rë me cjue me, táha tivutaya me xujun rë Nina xi catsihindu profeta Isaías. ²⁹ Ngajan xi cachja xu Hasen rë Nina cojo Felipe cuitjin:

—Tihinvehe hiscan cjui carreta xi cuayihi vé, nihñitanguin cojo. —Cuatjin cachja Hasen rë Nina.

³⁰ Ngajan xi cuatjin casahmi Felipe. Xi tu camatiña me hiscan cjui carreta jan ne, cahndë xu me xi cjua rë xujun xi catsihindu profeta Isaías ne, vëhë tivutaya me xi jiya carreta jan. Sehe cavinenguise Felipe me cuitjin:

—¿Há vijnercun cjua xi tichutayun vë? —Cuatjin cavinenguise Felipe.

³¹ Ngajan xi cuitjin cafayangui xu me:

—Ngahan ne, vijniiircú ta, tséhë xi tsajin yo cuicuya ná. —Cuatjin cafayangui me.

Sehe ngajan xi cachja xu me cojo Felipe xi cuisehen cuejñatangun xu me cojo rë me.

³² Tivutaya me xujun rë Nina hiscan xi chja cuitjin:

Sacuaha ficojo xuta ngu chu tsánga xi tsiquehen me chu ne, cuatjin cjuecojo xuta me; hacuaha sacuaha jindayaain ngu hnditsánga hora xi secun chu xcun me xi cuejnu rë chu ne,

cuatjin tsajin camahani mé xi cuichja me hora xi secun me xcun me xi cjuahataha rë me.

³³ Sahmichuva xuta me, hacuaha tsichoho xuta cjuandaja xi cuma rë me;

Tsajin cuichja xuta tséhë quihndi rë me ta, casacuiin rë me

tséhë xi cjuahñu xi casacu rë me nguehe ngasunhndë ne, quijicanii rë me.

Vëhë cjua rë Nina xi tivutaya xihin jan.

³⁴ Hya xi camá ne, sehe cafinenguise me cojo Felipe cuitjin:

—Xi má nuju ne, ¿yo tséhë xi cuatjin chja profeta vë? ¿Há tséhë suvá me ne?, o há tsajin ne, ¿há tséhë jingu sa xuta? —Cuatjin cafinenguise me.

³⁵ Ngajan xi Felipe ne, cavetsihin me cojo cjua rë Nina xi tivutaya xihin jan, hane casua xu me camachaya rë xihin jan yëjë ni cjuandajyihu xi chja tséhë Jesús. ³⁶ Xi cjui me ndiya ne, cavechú xu me hiscan jiya ngu nandá. Ngajan xi chja xihin jan cojo Felipe cuitjin:

—Chutsujun ni. Nguehe jiya ngu nandá. ¿Há cumaji xtenda ngahan? —Cuatjin cachja xihin jan.

³⁷ Ngajan xi cachja xu Felipe cojo rë me cuitjin:

—Sa xi nguñaja xahasen nuju xi macjain nuju ne, cuma. —Cuatjin cachja Felipe.

Hane xihin xi cuajyihu jan ne, cuitjin cafayangui me:

—Macjain ná xi Jesucristu ne, hacui Jain me xi Quihndi rë Nina me. —Cuatjin cafayangui me.

³⁸ Hya xi camá ne, cachja xu xihin jan cojo cha xi ficojo carreta xi secunhñu cha cojo, hane sehe cavitujne me cojo Felipe, sehe quiji catsijo me xcun nandá, hane caxtenda xu xihin jan. ³⁹ Xi cavetju me tséhë nandá ne, Hasen rë Nina ne, ngutjen quijicojo xu rë Felipe. Hane xihin jan ne, ha quihndé cavuyaain cavëë rë Felipe ta, cavuya cafaha me ndiya rë me cafe me cojo cjuasua. ⁴⁰ Hya xi camá ne, cavechú Felipe nandya Azoto. Hane xi cavetju me ngajan ne, jima ngu nandya xi cavatju me ne, ha cuatjin casua me camachaya rë xuta cjuandajyihu xi chja tséhë Jesucristu hisca xi cafehe me nandya Cesarea.

9

Hacutjin camá xi cavisehen Saulo ladu rë Jesús

¹ Jinguyëjë rë xi cuatjin tijima ne, Saulo ne, hacuaha ni cjuinduju sa me vincharcun me xuta ladu rë Nai naja ta tsiquehen me. Quiji me xcun nahmi xi matitjun ne, ² cafehya me ngu carta cojo sa xi cumacjain rë tséhë me xutaxa rë yungun ngajan nandya Damasco. Hane cojo xujun jan sa xi sacú rë me xuta Damasco xi tjengui ndiya rë Jesús, sa chjuun sa xihin ne, tsihñu me cjucojo me ngajan Jerusalén. ³ Hya xi camá ne, cavetju me quiji me. Hane xi tijima tiña me Damasco ne, ha tu ñahñu canduva ngu ndihi tséhë ngahnga casahmi hasen rë hiscan cjui me. ⁴ Hane xi caticja me ne, cahndë me ngu cjua xi cachja cojo rë me cuitjin:

—Saulo, Saulo, ¿mé má cuatjin nujyihuie tjengui ná cojo cjuahngatacun? —Cuatjin cachja.

⁵ Ngajan xi Saulo ne, cuitjin cafayangui me:

—¿Yo ngayun, Tatá? —Cuatjin cafayangui me.

Ngajan xi cjua jan ne, cuitjin cafayangui tsëhë me:

—Ngahan xi Jesús ngahan, xi tinujyihye tjengui ná cojo cjuahngatacun.

⁶ Tisatjinhngue ne, tisihin nandya Damasco, hane ngajan sacú ri cjua mé xi meje rë xi nihñi. —Cuatjin cachja cjua jan.

⁷ Ngajan xi xuta xi cjuicojo Saulo jan ne, caxinchacun lihmi ni me ngajan. Cahndë me cjua jan, peru tsajin yo xi cavëe me. ⁸ Hya xi camá ne, cavisatjenhnga Saulo, hane xi cavuxaha me tuxcun me ne, matsijin camahani rë me. Sehe ngajan xi cavaha xuta jan tsja me ne, quijicojo me me hisca nandya Damasco. ⁹ Jyan nixtin cavéjña me jan xi matsijin rë me, hacuaha tsajin mé cajinë me, tsajin mé cahvi me.

¹⁰ Hane ngajan Damasco ne, ngajan tacun ngu xuta ladu rë Jesús xi hmí rë Ananías. Ha tu ñahñu cavëe me Nai naja ne, cachja cojo rë me cuitjin:

—¿Há nechin, Ananías? —Cuatjin cachja Nai naja.

Ngajan xi Ananías ne, cuitjin cafayangui me:

—Juun, tejña, Nai naha. —Cuatjin cafayangui me.

¹¹ Ngajan xi Nai naja ne, cuitjin cachja me cojo Ananías:

—Tihin ndiya xi hmí rë Taha Quixi. Hane ndava cha Judas ne, ngajan chjinenguise ngu cha Tarso xi hmí rë Saulo. Cha vëhë ne, tisahmi cha oración rë cha, ¹² hane sacuaha xi ngajñi nijñá rë cha ne, cavëe cha ngu xihin xi hmí rë Ananías xi cavisehen hiscan tacun cha, hane cavisanetsja rë cha xi cuma tsejen nga rë cha. —Cuatjin cachja Nai naja.

¹³ Ngajan xi Ananías ne, cuitjin cafayangui me:

—Ngayun Nai naha, jemu cjín xuta chja me hacutjin xi jemu choho casahmi cha xi cuajyihí vë cojo xuta ladu nuju ngajan Jerusalén. ¹⁴ Quihndë ne, hacuaha hisca nahmi xi matitjun catsingatju rë cha nguehe xi cjuaha cha xuta xi fehya nuju me cjuandaja nuju.

—Cuatjin cafayangui me.

¹⁵ Peru Nai naja ne, cuitjin cachja nga me cojo rë me:

—Tihin ta, cha xi cuajyihí vë ne, ngahan cavaxejen cha xi cjue sua cha cumachaya rë xutaxín, cojo xuta xi vitexa, cojo xuta tjë rë Israel, cuichja cha yo ngahan. ¹⁶ Ngahan tsingácun rë cha há cjín cjuacjintacun xi meje rë xi cuatju cha cuma ngatsë naha. —Cuatjin cachja Nai naja.

¹⁷ Hya xi camá ne, cavetju Ananías quiji me ndava Judas. Hane xi cavisehen me ndava Judas ne, cavisanetsja me Saulo, cuitjin cachja me:

—Ngayun Saulo, Nai naja Jesús, me xi cahyun ndiya nduvun jan ne, catsingatju ná me, cojo sa xi ngayun ne, cuma tsejen nga nuju hacuaha tsë nuju cojo Hasen rë Nina. —Cuatjin cachja me.

¹⁸ Hane ha hora vëhë ni ne, cavixu tsëhë tuxcun Saulo ngu xcusun sacuaha tujún rë ti, hane camatsejen nga rë me. Hya xi camá ne, caxtenda me. ¹⁹ Hane xi cajinë me niñu ne, casacuhñu rë me.

Sua Saulo machaya rë xuta tsëhë Jesús

Hya xi camá ne, cavéjña Saulo nguko nixtin ngajan Damasco cojo xuta ladu rë Jesús.

²⁰ Quiji me yëjë ni yungun, casua me camachaya rë xuta xi Jesús ne, hacui me xi Quihndi rë Nina, xi Mesías. ²¹ Hane yëjë xuta xi cavisinuju cjua jan ne, jemu quijircun rë me, cuitjin cachja me cojo xicjin me:

—¡Peru me vihi xi jemu casahmi cjuahngatacun cojo xuta xi veyanangui ñihi vëhë ngajan Jerusalén! ¡Hacuaha ha xa vëhë canduva me nguehe, xi cjuaha me xuta xi cuacun vë, cjuecojo me xcun nahmi xi matitjun! —Cuatjin cachja xuta jan.

²² Peru Saulo ne, hitsë sa casacuhñu rë me xi tichja me cojo xuta, hisca quijircun rë xuta tjë rë Israel casahmi me ta, tsëhë xi tsejen xi cjuaquixi xi chja me xi Jesús ne, me vëhë Jain xi catsingatju Nina.

Vetjutje Saulo tsëhë xuta tjë rë Israel

²³ Hane xi ha jemu cavatju nixtin jan ne, casahmichihin xuta tjë rë Israel cjua xi tsiquehen me Saulo. ²⁴ Peru cjua vëhë ne, casacu camachaya rë Saulo. Xuta xi cuacun

jan ne, nixtin nixten jemu casahmi me cuidadu tingotjo hnchua rë nandya jan cojo sa xi cuma tsiquehen me Saulo. ²⁵ Peru xuta ladu rë Saulo ne, nguixun qui ji catsitujne me Saulo taha ngaxtun hnchua cojo nahñu jiya me cahntsua ngu nisinya. Cuatjin camá, sehe cavetjutje me.

Hacutjin cavatju Saulo ngajan Jerusalén

²⁶ Hya xi camá ne, xi cafehe Saulo ngajan Jerusalén ne, meje cjue sahmitangun me cojo xuta ladu rë Jesús. Peru yéjé ni xuta xi cuacun jan ne, jemu tsacjun me Saulo. Macjaain rë me xi hacuaha xuta ladu rë Jesús camá me. ²⁷ Ngajan xi Bernabé ne, quijicojo me Saulo xcun apóstol, hane ngajan casuacuenda me hacutjin xi ngajan ndiya ne, cavéé Saulo Nai naja, hacuaha cachja Nai naja cojo rë me. Hacuaha casuacuenda Bernabé apóstol jan hacutjin tsacjuiin Saulo xi cachja me tséhë Jesús. ²⁸ Cuatjin camá xi cjui nduva me catsuyihiya tangun me ngajan Jerusalén cojo xuta ladu rë Jesús. Hatuxa tsacjuiin me chja me tséhë Jesús. ²⁹ Hacuaha jercu cavisajmi me cojo xuta xi visajmi hne griego. Peru xuta xi cuacun jan ne, casahmi me nguyjé xi tsiquehen me Saulo. ³⁰ Peru hya xi camachaya rë xuta ladu rë Jesús cjuá vöhë ne, quijicojo me Saulo nandya Cesarea, hane ngajan catsingatju me me qui ji me nandya Tarso.

³¹ Cuatjin camá xi yéjé xuta ladu rë Jesús ngajan estadu Judea, cojo Galilea cojo Samaria ne, cafë rë me cjuacjintacun hacuaha camajyé sa cjuandaja rë Nina ngajñi rë me. Hane xi cuatjin quijinduju me cafaharcun me Nai naja hacuaha xi cuatjin cavisecoo rë me Hasen rë Nina ne, camacjín sa xuta ladu rë Jesús.

Camandaja Eneas

³² Pedru ne, catsuyihiya me jingu ni ladu. Hya xi camá ne, qui ji cavusehenya me xuta ladu rë Nina xi siu ngajan Lida. ³³ Hane ngajan cavechútaha me ngu xihin xi hmí rë Eneas, xi ha tjin rë jyin nu xi jiña xi cahme yojo rë. ³⁴ Ngajan xi Pedru ne, cuitjin cachja me cojo xihin jan:

—Ngayun Eneas, Jesucristu tisahmi me xi cumandaja ngayun. Tisatjunhngun, chjayun nijña nuju vë. —Cuatjin cachja Pedru.

Hane ngutjen ni cavisatjenhnga xihin jan. ³⁵ Hane yéjé ni xuta xi siu ngajan Lida cojo xuta xi siu ngajan Sarón cavéé me Eneas hane hacuaha cavisehen me ladu rë Nai naja.

Cavuya Dorcas cjuahñu

³⁶ Ngajan nandya Jope ne, cavéjña ngu chjuun ladu rë Jesús xi hmí rë Tabita. Hane xi hne griego ne, Dorcas hmí rë me. Chjuun vöhë ne, jemu sahmi me cjuandaja, hacuaha jemu visecoo me xuta xi tjin rë cjuachaja. ³⁷ Hya xi camá ne, nixtin xi quitahá Pedru ngajan nandya Lida ne, chjuun vöhë ne, camahmu rë me, hane cahme me. Hane xuta jan ne, catsinduya me nima. Hane xi cafë catsinduya me ne, sehe qui ji catsijaña me cahntsua ndihya ngahnga. ³⁸ Vöhë ta nandya Lida ne, tiña tacun tséhë nandya Jope. Hane hya xi camachaya rë xuta ladu rë Jesús ngajan Jope xi Pedru ne, quitahá me ngajan Lida ne, catsingatju me jo xihin qui jijaha rë Pedru, cuitjin cachja me:

—Nihñu cjuandaja ne, cuanguen cojo niji ngajan Jope marcu macjain.

³⁹ Ngajan xi Pedru ne, cavetju me qui ji me cojo xihin jan. Xi tu cafehe me ngajan ndava nima ne, quijicojo me me ndihya ngahnga hiscan jiña nima. Hane jemu cjín yachjin cahan ne, qui ji caxinchacun me xcun Pedru, hisca chja hisca jihnda me titsingacun me tsjian xi casahmi nima Dorcas hya xi tacun nima cjuahñu. ⁴⁰ Ngajan xi Pedru ne, cachja me cojo yéjé xuta xi cuetju xuta candatsen. Hane xi cafë xuta cavetju me candatsen ne, sehe cavixcuhnchi Pedru, casahmi me oración rë me. Hane xi cavuya cavutsejen me nima ne, sehe cachja me cuitjin:

—Tabita, tisatjunhngun. —Cuatjin cachja me. Hane chjuun jan ne, cavuxaha tuxcun. Hane xi cavéé rë Pedru ne, cavisatjenhnga cavéjña. ⁴¹ Hane xi casua Pedru ngu tsja me chjuun jan ne, catsisatjenhnga me. Xi tu cajindaya me xuta ladu rë Jesús cojo chjuun cahan jan ne, sehe catsingacun me chjuun jan xi tacun quicun nga. ⁴² Hane cjua vöhë ne, casacu camachaya rë xuta jingujié ni Jope. Hane jemu cjín me xi camangu cacun me

cojo Nai naja. ⁴³ Ngajan xi Pedru ne, jemu cjín nixtin casetaha me ngajan Jope, cavéjña me ndava cha Simón, ngu cha vechjanchuxin.

10

Jindaya Cornelio Pedru

¹ Ngajan nandya Cesarea ne, cavéjña ngu xihin xi hmí rë Cornelio. Capitán má me tséhë sindadu tséhë nangui Italia. ² Me vëhié ne, jemu ndaja faharcun me Nina cojo yéjë xuta xi siu ndava me, hacuaha jemu sua me cjuandaja cojo xuta tjë rë Israel, hacuaha yéjë ni hora fehya rë me Nina cjuandaja rë me. ³ Ngu nixtin jan sacuaha chuva rë fane jyan tséhë nguinxitin ne, cavééndaja me xi cafehe ngu ángel rë Nina cachja cojo rë me cuitjin:

—Cornelio. —Cuatjin cachja.

⁴ Hane xi cavutsejenndaja sa me ángel jan ne, jemu catsacjun me camá, sehe cachja me cuitjin:

—¿Mé jan, Tatá? —Cuatjin cachja me.

Ngajan xi ángel jan ne, cuitjin cafayanguí:

—Ngatsé rë oración riji cojo ngatsé rë cjuandaja xi jemu tehe ne, Nina ne, hacuaha tsinguitsjen me ngaye. ⁵ Quihndë ne, ningatji ngujo xihin ngajan Jope, chjindaye rë cha Simón, cha xi hacuaha hmí rë Pedru. ⁶ Cha Simón vëhë ne, ngajan tacun cha ndava ngu cha vechjanchuxin, xi hacuaha hmí rë Simón, cha xi tacun ndava tiña ndachacun.

—Cuatjin cafayanguí ángel jan.

⁷ Hane xi cavatju cafe ángel xi cachja cojo rë me jan ne, sehe cajindaya me jo mosu hndixahan rë me cojo ngu sindadu xi sahmixa ndava me hacuaha faharcun rë Nina.

⁸ Hane xi café casuacuenda me yéjë ni cjuacjintacun rë me ne, sehe catsingatju me cjue ngajan Jope.

⁹ Hane xi camá nchujun xi ha jima tiña cha xi cuacun jan nandya Jope ne, sacuaha chuva rë nchisen ne, sehe camiji Pedru ngajan xcun ndihya xi sahmi me oración.

¹⁰ Hya xi camá ne, camavojo rë me, meje sinë me hitsé tu mé ni xi sinë me. Hane jinguyéjë rë xi tisehencjine xi sinë me ne, sacuaha xi canduva cachja ngu chini cojo rë me. ¹¹ Tivutsejen me xi ngahnga ne, catuxaha, hane nduvajne sacuaha ngu tsjian jyé, quichahahñu rë catsiñuju yuju rë xi nduvajne nangui. ¹² Cahntsua tsjian jan ne, ngajan hincha yéjë xcusun chu xi tsujiyiha nangui cojo chu xi vitjen ngahnga xi tsavi xi sinë xuta nangui Israel. ¹³ Hya xi camá ne, Pedru ne, cahndë me ngu cjua xi cachja cojo rë me cuitjin:

—Pedru, tisatjinhngue. Niquihin ngu chu ne, sehe xini chu. —Cuatjin cachja cjua jan.

¹⁴ Hane Pedru ne, cuitjin cachja me:

—Cumaji, Tatá, ta ngahan ne, cjéé camahani sínë ngu xcusun xi tsavi vë. —Cuatjin cachja me.

¹⁵ Peru xi ma jo ndiya ne, cuitjin cachja nga cjua jan cojo rë me:

—Xi ha Nina cachja me xi hacuin tsavi ne, xi canujiin ngaye xi tsavi. —Cuatjin cachja cjua jan.

¹⁶ Jyan ndiya camá xcusun vëhë. Hya xi camá ne, ngutjen ni cavuya quiji nga tsjian jan ngahnga. ¹⁷ Hane jinguyéjë rë xi titsingataha cacun Pedru mé vijne xcusun xi cavéé me jan ne, tivinenguise cha xi catsingatju Cornelio jan jani xi ndava Simón. Hane xi cafehe cha jan ne, caxinchacun ni cha tingotjo, ¹⁸ sehe cafenguise cha há ngajan tacun Simón xi hacuaha hmí rë Pedru. ¹⁹ Hane jinguyéjë rë xi titsingataha cacun Pedru tséhë xcusun xi cavéé me jan ne, cuitjin cachja Hasen rë Nina cojo rë me:

—Chutsijin ni. Hincharcun jo jyan cha xi tivanguise ri. ²⁰ Tihinjni ne, tihin cojo cha. Xicamaciin tacuin ta cha xi cuacun vë ne, ngahan catsingátju cha. —Cuatjin cachja Hasen rë Nina. ²¹ Hane xi quijijne Pedru hiscan hincharcun cha xi cuacun jan ne, cuitjin cachja me:

—Ngahan xi vinchunsun ná. ¿Mé xa canduvun? —Cuatjin cachja Pedru.

²² Ngajan xi cha xi cuacun jan ne, cuitjin cachja cha:

—Ngu capitán xi hmí Cornelio catsingatju niji me xi canduvin nguehe. Me vëhë ne, ngu xihin ndaja me, hacuaha jemu faharcun me Nina. Yëjë ni xuta tjë rë Israel ne, ndaja chja me tsëhë Cornelio. Ngu ángel rë Nina cachja cojo rë me xi squindaya me ngayun xi cuangun ndava me cojo sa xi cuiñuju me cjua xi cuinújun cojo rë me. —Cuatjin cachja cha xi cuacun jan.

²³ Hya xi camá ne, cachja me cojo cha xi cuisehen cha cahntsua ndihya, hacuaha casua me cahndé xi cuiyuju cha ngajan. Hane xi camá nchujun jan ne, cavetju me quiji me cojo cha, hacuaha cojo sa ngujo xuta ladu rë Jesús xi siu ngajan Jope quiji me cojo rë me.

²⁴ Hane xi camá nchujun nga jan ne, cafehe me nandya Cesarea. Cornelio ne, ha casahmitangun me xuta rë me cojo amigu ndaja rë me, siuya me Pedru. ²⁵ Hane xi ha cuisehen Pedru jan ne, cavechútaha Cornelio me. Cornelio ne, quiji cafañatsacjan me xcun Pedru xi cafaharcun me. ²⁶ Peru Pedru ne, catsisatjenhnga me Cornelio, hacuaha cachja me cojo cuitjin:

—Tisatjunhngun ta ngahan ne, hacuaha ngu xuta ni ngahan. —Cuatjin cachja me.

²⁷ Hane taha visiajmi me cojo Cornelio ne, cavisehen me ndihya, ngajan cavëe me xi jemu cjín xuta tjin tangun me jan. ²⁸ Sehe ngajan xi cachja Pedru cojo rë xuta jan cuitjin:

—Ngayun ne, ha ndaja hyun xi ngu xuta tjë rë Israel ne, sacuiin cahndé xi tsihñu me yojo rë me cojo xutaxín, hacuaha sacuiin cahndé xi cuisehen me ndava. Peru ngahan ne, casua Nina camachaya ná xi mijí rë xi cuichjá xi tsavi cojo ngu xcusun xuta. ²⁹ Vëhë xi xi tu quiji chjahá ná ne, ngutjen canduvá ni, hisca ngu cjua cachjaan. Quihndé ne, meje ná cumachaya ná mé nihñu ná xi cachjindayun ná. —Cuatjin cachja Pedru.

³⁰ Ngajan xi Cornelio ne, cuitjin cachja me:

—Cuyatje fane jyan, sacuaha hora vihi ne, tisahme oración naha nguehe ndya naha. Hane ha tu ñahñu cahvë ngu xihin, secun xcun, yaja ngu tsjian xi jemu tu seti camahani, ³¹ hane cuitjin cachja cojo ná: “Cornelio, Nina ne, cahndé me oración riji, hacuaha ngatsë rë cjuandaja xi jemu tehe ne, Nina ne, hacuaha tsinguitsjen me ngaye. ³² Quihndé ne, ningatji cjua ngajan Jope, hane chjindaye rë cha Simón, cha xi hacuaha hmí rë Pedru. Cha vëhë ne, tacun cha ndava cha Simón, ngu cha vechjanchuxin, xi tacun cha tiña ndachacun.” Cuatjin cachja xihin jan cojo ná. ³³ Vëhë xi marcu macjain catsingátju cjua nuju, hane jemu ndatjin canihñu xi canduvun. Vëhë xi quihndé ne, ha tjin tangun ngayin ngayijin ni nguehe xcun Nina xi cuiñiji yëjë cjua xi casua nuju Nina xi cuinújun cojo niji. —Cuatjin cachja Cornelio.

Cjuandajyihu xi cachja Pedru ndava Cornelio

³⁴ Ngajan xi Pedru ne, cuitjin cachja me:

—Ngahan vutsején ne, Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë ta ³⁵ yëjë ni nación ne, tu jarë ni xuta xi faharcun me Nina hacuaha sahmi me cjuandaja ne, jemu chuya rë Nina tsëhë me. ³⁶ Nina ne, catsingatju me cjuandajyihu rë me tsijin, ngayin xuta tjë rë Israel; casua me camachaya niji xi ngatsë rë Jesucristu ne, sacú niji cjuandaja cjuajeya. Me vëhë xi Nai rë yëjë ni xuta. ³⁷ Ngayun ne, ha machaya nuju tsëhë xcusun xi camá jingujuë ni nación Judea. Cavetsihin hisca distritu Galilea, hya xi cavatju cachja nima Juan xi meje rë xi xtenda xuta. ³⁸ Hacuaha ha hyun xi Jesús, xuta Nasaret ne, Nina ne, catsinguitsë rë me cojo Hasen rë me hacuaha cojo ngahñu rë me. Jesús vë ne, catsuysihiya casahmi me cjuandaja hacuaha casahmi me xi camandaja yëjë xuta xi jemu tisuaxti Satanás. Cuatjin casahmi me ta, tsëhë xi Nina ne, hacuaha tacun cojo rë me. ³⁹ Ngayin tihín machaya rë xuta tsëhë yëjë xcusun xi cahyin xi casahmi me ngajan Jerusalén, cojo jingujuë ni nación Judea. Xi cavetaha xuta tjë rë Israel jan me xcun ngu cru ne, catsiquehen xuta jan me. ⁴⁰ Me vëhë ne, Nina catsicuya rë me cjuahñu xi ma jyan nixtin, hacuaha casua Nina cahndé xi cavuya camatsejen nga me. ⁴¹ Peru hacuiin ngajñi rë yëjë xuta camatsejen me ta suvá ni ngajñi rë me xi Nina cavaxijin rë cojo tjun sa, cuma cuinújan ne, ngajñi niji ngayin, xi

cachini cahyin tangun cojo rë me hya xi cavatju cavuya me cjuahñu. ⁴² Hacuaha me vëhë cavitexa niji me xi tihín cumachaya rë xuta xi me vëhë xi casuaxa Nina me xi tsichuva me xuta cojo cjuatacun rë, sa siu quicun me o sa cahme me. ⁴³ Yéjë ni profeta ne, cachja me ta yéjë ni xuta xi cumangu cacun cojo Jesús ne, sacú rë me cjuandinchataha tséhë jyé rë me, xi cuatjin mangucacun me. —Cuatjin cachja Pedru.

Casacu rë xutaxín Hasen rë Nina

⁴⁴ Hora xi tichja cuaha Pedru cjua vëhë ne, canduva Hasen rë Nina cavisehen xahasen rë yéjë xuta xi tivisiñuju cjua xi tichja Pedru jan. ⁴⁵ Hane xuta ladu rë Jesús xi tjë rë Israel xi cojo me canduva me cojo Pedru ne, jemu quijircun rë me xi cojo xutaxín casua Nina Hasen rë me xi cuma rë me. ⁴⁶ Cuatjin quijircun rë me ta, tséhë xi cahndë me xi xutaxín jan ne, tichja me ngujo hne xi hisca hvíin xutaxín vë xi tisahmi jyé tisahmi hnga me Nina.

⁴⁷ Ngajan xi Pedru ne, cuitjin cachja me:

—Cumaji nichoon ngayaan nandá xi xtenda xuta, ta me xi cuicun vi ne, hacuaha casacu rë Hasen rë Nina sacuatjin casacu naja ngayaan. —Cuatjin cachja Pedru.

⁴⁸ Sehe cavitexa me xi caxtenda xuta xi cuacun vë xi cavisehen me ladu rë Jesucristu. Ngajan xi xuta jan ne, cafehya sa rë me Pedru xi cuejña sa me ngujo nixtin cojo rë me.

11

Sua Pedru machaya rë xuta rë yungun Jerusalén hacutjin camá ndava Cornelio

¹ Quihndë ne, apóstol cojo xuta ladu rë Jesús xi siu jingujyé ni Judea ne, camachaya rë me cjua xi cojo xutaxín cafahatsja me cjua rë Nina. ² Hane hya xi cavuya quiji Pedru ngajan Jerusalén ne, xuta ladu rë Jesús xi tjë rë Israel ne, cacjan me cojo, ³ cuitjin cachja me:

—¿Mé má cuatjin catsangun ndava xuta xi hacuiin tjë rë Israel hacuaha hisca cachinu niñu cojo rë me? —Cuatjin cachja me.

⁴ Ngajan xi Pedru ne, cavetsihin casuacuenda chichihin me cuitjin:

⁵ —Ngahan ne, tisahme oración naha hya xi tejñataha Jope. Hane sacuaha xi cachja ni chini cojo ná xi cahvë ngu xcusun sacuaha ngu tsjian jyé, quichahahñu rë catsiñuju yuju rë xi nduvajne nangui, camatiña tsahan. ⁶ Hane xi cavutsejénnada cahntsua ne, cahvë chu xi tsuyiyhiya nangui, chu xi cjaain rë cojo chu xi cjan rë, cojo chu xi vitjen ngahnga hincha chu cahntsua. ⁷ Hacuaha cahndë ngu cjua xi cachja cojo ná cuitjin: “Pedru, tisatjinhngue. Niuihin ngu chu ne, sehe xini chu.” Cuatjin cachja cjua jan. ⁸ Ngajan xi ngahan ne, cuitjin cachjá: “Cumaji, Tatá, ta ngahan ne, cjéé camahani cuíncha ntsuva ngu xcusun xi tsavi vë.” ⁹ Ngajan xi cjua xi nduva ngahnga jan ne, cachja nga cojo ná ma jo ndiya cuitjin: “Xi ha Nina cachja me xi hacuiin tsavi ne, xi canuijn ngaye xi tsavi.” Cuatjin cachja cjua jan cojo ná. ¹⁰ Jyan ndiya camá xcusun vëhë. Hya xi camá ne, sehe cavuya cachjuvë nga rë tsjian jan, quiji yéjë hisca ngahnga. ¹¹ Hya xi camá ne, ha tu ñahñu cafehe jyan xihin ndihya hiscan xi tejña. Hisca nandya Cesarea casatëxa rë xihin jan xi canduvatjengui ná. ¹² Hane Hasen rë Nina cachja cojo ná xi cumaciin cárunc xi cjué cojo xihin xi cuacun jan. Hya xi camá ne, cëjë cojo rë, hacuaha cavisecoo ná jyun xuta ladu naja xi cuicun vi xi catsanguin. Hane xi cafihin jan ne, cavetsihin ndava Cornelio.

¹³ Hane me vëhë ne, casuacuenda niji me hacutjin xi cavëe me ngu ángel cahntsua ndava me, cuitjin cachja cojo rë me: “Ningatji cjua ngajan Jope, chjindaye rë cha Simón, cha xi hacuaha hmí rë Pedru. ¹⁴ Hane cha vëhë cuichja cha cojo ri ngujo cjua hacutjin cuma xi cuetjite ngaye cojo yéjë ni xuta xi siu ndya riji.” Cuatjin cachja ángel jan. ¹⁵ Hane xi cavetseen cachjá cjua rë Nina cojo rë me ne, cavisehen Hasen rë Nina cahntsua xahasen rë me sacuatjin cavisehen cahntsua xahasen naja ntsacu cavetsihin, ngayaan xuta tjë rë Israel. ¹⁶ Ngajan xi ngahan ne, catsinguísjen cjua rë Nai naja xi cachja me cuitjin: “Juan ne, cojo nandá cavitenda me, Peru ngayun ne, cojo Hasen rë Nina xtenda ngayun.” Cuatjin cachja me. ¹⁷ Vëhë xi hya xi suvá Nina casua rë me cjuandaja xicjin xi casua naja me ngayaan hya xi camangu tacuun cojo Nai naja Jesucristu ne, hatuxa camaji cavátëcia xcusun xi Nina casahmi me. —Cuatjin casuacuenda Pedru.

¹⁸ Xi cahndé me xi cuacun jan xi cuatjin cachja Pedru ne, cajnehnchan cjuatacun rë me, sehe cavetsihin casahmi jyé casahmi hnga me Nina, cuitjin cachja me:

—Xi matsejen ne, cojo xutaxín casua Nina cahndé xi tsindeya me cjuatacun rë me cuisehen me ndiya rë Nina cojo sa xi sacú rë me cjuahñu xatsë.

Xuta rë yungun Antioquía

¹⁹ Quihndé ne, xuta ladu rë Jesús xi cavitsojo me ngatsë rë cjuañihi xi camá hya xi cahme Esteban ne, cavechú me hiscan nanguí xi hmí rë Fenicia. Ngujo nga me cavechú me nandya Chipre, ngu cahndé xi vetjucaa tséhë ndachacun. Hane me xi yahnga ne, cavechú me nandya Antioquía xi cavanga me. Hane casuaain me camachaya rë xutaxín cjuandajyihi xi chja tséhë Jesucristu ta suvá ni xuta tjé rë Israel casua me camachaya rë.

²⁰ Peru tjin yahnga xuta ladu rë Jesús xi canduva me tséhë Chipre cojo Cirene. Xi cafehe me nandya Antioquía ne, cachja me cojo xuta xi chja hne Griego, casua me camachaya rë xuta cjuandajyihi xi chja tséhë Nai naja Jesús. ²¹ Hane Nina ne, jemu casua rë me ngahñu. Hacuaha jemu cjín xuta camacjain rë me, hane cavisehen me ladu rë Nai naja.

²² Hane xuta ladu rë Jesús xi siu ngajan Jerusalén ne, hya xi camachaya rë me xcusun vëhë ne, catsingatju me Bernabé xi cjuetjengui me xuta ngajan Antioquía. ²³ Hane xi cafehe me jan ne, xi cavëë me hacutjin tisahmi Nina cjuandaja cojo xuta xi cuacun vë ne, jemu ndaja camá rë me. Sehe ngajan xi cachja me cojo yéjé xuta jan xi catjinduju me cojo yéjé xahasen rë me ndiya rë Nai naja. ²⁴ Cuatjin casahmi me ta, tséhë xi me vëhë ne, ngu xihin ndaja me, ña quitsë rë me Hasen rë Nina, hacuaha jercu mangucacun me cojo Nina. Nixtin hya ne, jemu camacjín sa xuta ladu rë Nai naja.

²⁵ Hyá xi camá ne, cavetju Bernabé quiji me ngajan Tarso, cavanguise me Saulo. ²⁶ Hane xi casacu rë me Saulo ne, cavuya quijicojo me me ngajan Antioquía. Caviyuju catsijo me ngajan ngu nu jingu, casahmitangun me cojo xuta rë yungun jan. Jemu cjín xuta cavicuya rë me cjua rë Nina. Hacuaha ngajan Antioquía xi tjuntjun cachja xuta tséhë yéjé xuta ladu rë Jesús xi xuta rë Cristu xi meje cuichja cjua vë cristiano.

²⁷ Nixtin hya ne, cafehe ngujo profeta ngajan Antioquía xi canduva me tséhë Jerusalén.

²⁸ Ngajan xi cavetjuñi ngu me ngajni rë profeta xi cuacun vë, ngu me xi hmí rë Agabo, hane cachja me cjua xi Hasen rë Nina casua rë me xi ha tu hitsë sa ne, cuinduva ngu jindya jyé jingujiyé ni ngasunhndé. Jindya vë ne, cavetjucaa jain hya xi Claudio matitjun camahani me. ²⁹ Ngajan xi xuta ladu rë Jesús ngajan Antioquía ne, caviyuju me cjuatacun rë me jima ngu me xi cuisecoo me ha tucutjin xi chutaha me hane tsingatju me tséhë xuta ladu rë Jesús xi siu ngajan Judea. ³⁰ Hyá xi camá ne, cuatjin casahmi me. Catsingatju me cjuandaja vëhë, cavaha Bernabé cojo Saulo xi sua me tsja xuta changá xi siu ngajan Judea.

12

Cjuañihi xi cavatju xuta rë yungun

¹ Hane ngajni rë nixtin xi cuacun vë ne, Herodes, me xi matitjun ne, cavitexa me cachjahá rë ngujo xuta rë yungun xi sahmi me cojo cjuahngatacun. ² Hacuaha cavitexa me xi cueya Jacobo, hntsé Juan, cojo quicha. ³ Xi vutsejen me xi cachuya rë xuta tjé rë Israel xcusun vëhë ne, hacuaha cavitexa me cachjahá rë Pedru, nixtin rë suhi rë pan xi tsajin san rë. ⁴ Sehe caveya me ndavaya, hacuaha cavitexa me tyjuhunngu sindadu xi cjue sahmi rë me cuidadu nixtin nixten chuva ñuju chuva ñuju sindadu jima ngu ndiya. Xi catsingataha cacun me ne, xi cuatju suhi tséhë Pascua ne, sehe cuaxé me xcun yéjé ni xuta. ⁵ Cuatjin camá xi Pedru ne, casetjo me ndavaya. Peru xuta rë yungun ne, cafehya me cojo nguñaja xahasen rë me cjuandaja rë Nina xi cuma rë Pedru.

Cavaxëtje Nina Pedru tséhë ndavaya

⁶ Ngu nguixun chaja sa xi cuitexa Herodes xi cuetju Pedru xi cumacuenda jyé rë me ne, Pedru ne, jiñafé me, tjinhñu me cojo jo cadena ngajni rë jo sindadu. Hacuaha siu sa jo sindadu tingotjo ndavaya xi sahmi cuidadu. ⁷ Hyá xi camá ne, cafehe ngu ángel

tséhë Nina, hane jercu camahasen cahntsua ndavaya. Hane xi qui ji cavéhëtsja ángel jan ndanisin rë Pedru ne, catsisatjenhnga rë me, sehe cachja cojo rë me cuitjin:

—Tisatjinhngue sanii. —Cuatjin cachja.

Hane hora vëhë ne, cavixuhndu cadena xi tjinhñu tsja me. ⁸ Sehe ngajan xi ángel ne, cachja nga cojo rë me cuitjin:

—Cheje tsjian riji, hacuaha tinche chuxinxte riji. —Cuatjin cachja.

Hane Pedru ne, cuatjin casahmi me. Cachja nga ángel cuitjin:

—Cheje tsjanga riji, hane ndove hacutjin cjué. —Cuatjin cachja ángel jan.

⁹ Hane xi cavetju me ne, qui ji me hacutjin qui ji ángel. Peru hvíin me xi xcusun xi tisahmi ángel jan ne, cju aquixi ta xi má rë me ne, chini tichja cojo rë me. ¹⁰ Hane xi cavatjutaha me ngu cavatjutaha me jo sindadu ne, sehe cafehe me tingotjo quicha xi cuéjuun xi cuanguen ngajñi nandya. Tingotjo vëhë ne, catuxaha suvá. Xi cavetju me ne, sehe qui ji me. Hane xi cafehe me hiscan xi faha rë ngu nga ndiya ne, ha tu ñahñu quijixin ángel tséhë me.

¹¹ Sehe ngajan xi cajnercu Pedru xi cju aquixi xcusun xi camá, hane cachja me cuitjin ngajñi rë suvá me:

—Quihndë ne, hvé Jain xi Nina ne, catsingatju me ángel rë me, hane cavaxëtje ná me tséhë Herodes, hacuaha cavaxëtje ná me tséhë yéjë xcusun xi meje sahmi xuta tjë rë Israel cojo ná. —Cuatjin cachja me ngajñi rë suvá me.

¹² Hane xi tu catsingataha cacun me cuatjin ne, sehe qui ji me ndava María naa rë Juan, me xi hacuaha hmí rë Marcos. Ngajan ne, jercu tjin tangun xuta xi tisahmi me oración. ¹³ Hane xi cafehe me jan ne, catsijke me tingotjo. Hane sehe canduvavaha ngu na hndixahan xi hmí rë Rode xi cju inenguise na yo xi titsijke. ¹⁴ Hane xi camachaya rë na xi xta rë Pedru xi tichja ne, tséhë xi jercu ndaja camá rë na ne, hisca cavuxaain na tingotjo ta marcu macjain cavuya na qui ji cachja na cojo me xi yahnga jan xi Pedru ne, secun me tingotjo taha candatsen. ¹⁵ Peru me xi cuacun jan ne, cuitjin cachja me cojo rë na:

—Sca ri ngaye. —Cuatjin cachja me.

Peru na vëhë ne, cachja sa na xi hatuxa cju aquixi xi hacui me. Hane me xi cuacun vë ne, cachja me cuitjin:

—¿Hacuiin ángel xi sahmi rë me cuidadu? —Cuatjin cachja me.

¹⁶ Hane Pedru ne, qui jinduju sa me titsijke me tingotjo jan. Hane xi cavuxaha me tingotjo jan ne, cavëe me xi hacui Jain Pedru, hane jemu qui jircun rë me. ¹⁷ Ngajan xi Pedru ne, casahmitsja me cojo rë me xi cuiyujujuu me, sehe cavetsihin casua cuenda me hacutjin camá xi Nai naja ne, cavaxë rë me ndavaya. Sehe ngajan xi cachja me cuitjin:

—Tuhun cumachaya rë Jacobo cojo sa xuta ladu rë Jesús xi yahnga tséhë xcusun xi camá vi. —Cuatjin cachja me.

Hya xi camá ne, sehe cavetju me qui ji me jingu sa cahndé.

¹⁸ Hane xi casahasen jan ne, ngu cju andya jyé casahmi sindadu jan, tséhë xi hvíin cha mé hacutjin camá rë Pedru. ¹⁹ Hane Herodes ne, cavitexa me qui ji cavinga rë Pedru, Peru casacuiin me. Hane vëhë xi cafahataha rë me sindadu xi casahmi cuidadu jan, sehe cavitexa me cachjaha rë sehe cueya cha. Hya xi camá ne, cavetju Herodes cavuya qui ji me ngajan Cesarea, cavejña me.

Cju aveya rë Herodes

²⁰ Quihndë ne, Herodes me xi matitjun ne, jemu cjan rë me cojo xuta nandya Tiro cojo nandya Sidón. Ngajan xi xuta xi cuacun vë ne, camatangun me, sehe qui jitjengui me Herodes. Xi tjun tjun ne, camá casahmi me xi cavinga rë Blasto me. Blasto ne, me vëhë xi fahacuenda me ndava Herodes. Hya xi camá ne, xuta xi cuacun jan ne, cafehya rë me Herodes xi cuijnetaha si ngajñi rë me cojo me vëhë. Cuatjin cafehya me xi cuacun vë ta, tséhë xi nangui rë Herodes ne, ngajan vinduva xichinë tséhë nandya Tiro cojo Sidón. ²¹ Cavechú nixtin xi cavejña Herodes xi cuichja me cojo xuta xi cuacun jan ne,

sehe cavaja me tsjian tséhë xi matitjun me, sehe quiji me cavéjña me cahndé rë me xi cuichja me cojo xuta. ²² Hane xi cajnetaha cachja Herodes ne, ngajan xi xuta ne, cuitjin cajindaya me cachja me:

—¡Cjua vëhë ne, cjua rë ngu nina, hacuiin cjua rë ngu xuta! —Cuatjin cajindaya me cachja me. ²³ Ha hora vëhë ni ne, ngu ángel tséhë Nina ne, casahmi xi cafaha rë Herodes ngu chihin, tséhë xi hacuiin casahmi jyé casahmi hnga me Nina. Hya xi camá ne, cajinë rë me chundu, hane cahme me.

²⁴ Peru cjua rë Nina ne, quijinduju sa cavitsojo.

²⁵ Ngajan xi Bernabé cojo Saulo ne, casahmichihin me cjuandaja rë xuta yuma sehe cavuya me tséhë Jerusalén. Hacuaha canduvacojo me Juan, xi hacuaha hmí rë me Marcos.

13

Casuaxa Nina Bernabé cojo Saulo

¹ Quihndë ne, ngajni rë xuta rë yungun xi tacun ngajan Antioquía ne, hinchajñi me xi má profeta hacuaha hinchajñi me xi vicuya cjuachacun. Cuitjin hmí rë xuta xi cuacun vë: Bernabé, Simeón, me xi cachja xuta tséhë Nchava Jma, Lucio, ngu xuta Cirene, Manaén, me xi camacha tangun cojo Herodes, me xi matitjun, hacuaha cojo Saulo. ² Hane jinguyéjë rë xi tisahmi me xi cuacun vë xa rë Nina hacuaha tisahmi me xun rë me ne, Hasen rë Nina ne, cuitjin cachja cojo rë me:

—Tuhunxun rë Bernabé cojo Saulo, cojo sa xi sahmi me xa xi ha casuáxa rë me.

³ Ngajan xi casahmi me xi cuacun jan xun rë me, hacuaha casahmi me oración rë me ne, sehe cavisanetsja me Bernabé cojo Saulo hane chuva vëhë cafaha me xa rë Nina. Hya xi camá ne, sehe catsinguijnetaha me cjua cojo xicjin me.

Quiji apóstol ngajan Chipre

⁴ Ngajan xi Bernabé cojo Saulo ne, quiji me sacuatjin cachja Hasen rë Nina cojo rë me. Cavetju me quiji me nandya Seleucia. Hane xi cafehe me ngajan ne, cavisehen me ngu barcu, sehe quiji me Chipre, ngu rquí nangui xi vetjucaa xcun ndachacun. ⁵ Hane xi cafehe me Salamina, ngu nandya tséhë Chipre ne, casua me camachaya rë xuta cjua rë Nina ngajan yungun rë xuta tjé rë Israel. Hacuaha cavisecoo Juan Marcos me xi quiji me jan.

⁶ Hane xi quiji me jinguyé ni ladu vëhë ne, cavechú me hisca nandya Pafos. Hane ngajan cavechútaha me ngu cha surqui xi hmí rë Barjesús. Cha vëhë ne, ngu profeta ndacha cha, hacuaha tjé rë Israel cha. ⁷ Hane tangun tsujihiya cha cojo me xi matitjun xi hmí rë Sergio Paulo, ngu me xi jemu vechú cjuatacun rë. Me vëhë ne, cajindaya me Bernabé cojo Saulo tséhë xi meje cuihndë me cjua rë Nina. ⁸ Peru cha surqui jan ne, xi hacuaha hmí rë Elimas xi hne griego ne, casahmi condra cha me xi cuacun vë, tséhë xi mijí rë cha xi me xi matitjun jan ne, cumangucacun me cojo Jesucristu. ⁹ Peru Saulo, me xi hacuaha hmí rë Pablo ne, catsé rë me cojo Hasen rë Nina. Cavutsejenndaja me cha surqui jan ne, sehe cachja me cojo cha cuitjin:

¹⁰ —¡Ngaye xindesu, ngaye cha ndacha, ngaye quihndi rë xitsehen, ngaye condra rë yéjë ni cjuandaja ne! ¡Hatuxa cuihinnduju sa ninguetin ndiya ndajyihi rë Nina?

¹¹ Quihndë chutsijin ta Nina ne, sahmi ri me castigu. Cuma rcá ngaye, cumatsijin ri ndavá rë tsuhi ngujo nixtin. —Cuatjin cachja me.

Hane ngutjen ni camá rë cha sacuaha xi canduva ngu yufí xi cavetsa rë tuxcun cha, hane cama rcá cha. Hane cjui nguehe cjui ngajan cha vanguisetsja cha yo xi cuaha tsja cha. ¹² Ngajan xi me xi matitjun jan ne, xi cavéë me xcusun xi camá ne, camacjain rë me cjuachacun xi chja tséhë Nina ta, tséhë xi jemu quijircun rë me tséhë cjuachacun vëhë.

Quiji apóstol ngajan Antioquía, distritu Pisidia

¹³ Hya xi camá ne, xi cavetju Pablo cojo me xi siutaha cojo me ngajan Pafos ne, sehe cavisehen me ngu barcu, quiji me nandya Perge, ngajan distritu Panfilia. Hane ngajan cavetjuxin Juan Marcos tséhë me, hane cavuya nga me Jerusalén. ¹⁴ Hane Pablo cojo

Bernabé ne, cavetju me tséhë Perge, hane cafehe me Antioquía, ngajan distritu Pisidia. Hane xi cavechú nixtin xi chjahájenda rë ne, quiji me cavisehen me yungun ne, quiji me cavyuju me. ¹⁵ Hane xi cavatju cachutaya rë ngujo cjua xi catsihindu Moisés cojo ngujo cjua xi catsihindu profeta ne, xutaxa rë yungun jan ne, catsingatju me cjua tséhë Pablo cojo Bernabé, hane cuitjin cachja me:

—Ngayun ne, sa xi tjin mé cjuandajyihu xi meje cuinújun cojo xuta ne, cuma cuinújun.
—Cuatjin cachja me.

¹⁶ Hane xi casecun Pablo ne, casahmitsja me cojo xuta sehe cachja me cuitjin:

—Ngayujun ngarcun ni xuta tjé rë Israel cojo sa ngayujun ni xi hacuaha chjuhuncun Nina ne, tisiñuju cjua xi cuichjá cojo nuju. ¹⁷ Nina naja ngayaan tjé rë Israel ne, cavaxijin me xutachanga naja, hane tséhë me vëhë casahmi cjín sa Nina xuta. Sehe tséhë me casahmi me ngu nación xi hñu vetju cjua rë hya xi cavyujutaha me ngajan nación Egipto. Hane cojo ngahñu xi tjin rë Nina ne, cavaxë me xuta xi cuacun vë tséhë ngajan. ¹⁸ Hane Nina ne, cacaa rë me cojo xuta xi cuacun vë, hya xi catsuyiyiha me ngajan ngu xín tséhë nandya sacuaha yachan nu. ¹⁹ Hane xi cavatju catsinguetsun Nina yatu nación ngajan nangui Canaán ne, sehe casua me xutachanga naja jan xi cuma tséhë me ²⁰ sacuaha ñuju cientu vasen nu. Hane xi cavatju vëhë ne, sehe cavaxijin me xuta xi camá me juez, hisca nixtin xi cavéjña profeta Samuel. ²¹ Hya xi cavatju vëhë ne, cafehyá xutachanga naja jan ngu me xi cumatitjun tséhë me. Cuatjin camá xi Nina ne, casuaxa me xutachanga naja Saúl, quihndi rë Cis, ngu xihin tjé rë Benjamín, xi cumatitjun me cahntsua yachan nu. ²² Hane xi cafahaxin Nina me vëhë xi matitjun me ne, cavejña me xutachanga naja David xi cuma titjun me. Cuitjin cachja Nina tséhë David: “Ngahan vutsején ne, cha David, quihndi rë cha Isaí ne, cha vëhë ngu cha xi jemu chuya ná tséhë, ngu cha xi sahmi yéjé hacutjin xi meje ná.” Cuatjin cachja Nina. ²³ Ngu xuta tjé rë xutachanga naja David, me vëhë ne, xi hacui Jesús, me xi catsingatju Nina xi cuaxëtje naja ngayaan xuta tjé rë Israel, sacuatjin xi ha cachja me. ²⁴ Hane xi chaja sa xi cjuehe Jesús ne, nima Juan ne, cachja me cojo yéjé xuta tjé rë Israel xi meje rë xi tsindeya me cjuatacun rë me, hacuaha xtenda me. ²⁵ Quihndé ne, hya xi ha camatiña nixtin xi cueya nima Juan ne, cuitjin cachja me: “Hacuiin ngahan xi tsingatju Nina, xi nechunyun rë ta ngaxtun ne, nduva ngu me xi hitsé sa vechu cjuatacun rë xi hisca cumajin tsinguissehercu sahme tyjahi chuxinxte rë.” Cuatjin cachja nima Juan.

²⁶ Ngayejen ngarca ni ngayaan xuta tjé rë xutachanga naja Abraham cojo sa ngayujun ni xi hacuaha chjuhuncun Nina ne, ngayaan catsingatju naja Nina cjuandajyihu vihi xi chja hacutjin cuetjuntjeen. ²⁷ Yéjé xuta xi siu ngajan Jerusalén cojo xutaxa rë jan ne, hvíin me xi Jesús ne, hacui me xi catsingatju Nina, hacuaha cajnii rcu me cjua rë yéjé ni profeta xi chutaya rë yéjé ni nixtin xi nixtin chjahájenda rë. Vëhë xi hya xi catsicanijyé xuta xi cuacun vë Jesús ne, casahmi me xi cavetjucaa cjua xi cachja profeta vë. ²⁸ Hane handasa casacuiin rë me jyé xi vechú chuva rë xi cueya Jesús ne, peru cafehyá rë me Pilatu xi cuitexa me xi cueya Jesús. ²⁹ Hane xi cajnetaha casahmi me yéjé xcusun sacuatjin camahindu tséhë Jesús ne, sehe catsitujne me tséhë cru, sehe caseyaniji cahntsua ngu tsjun. ³⁰ Peru Nina catsicuya rë me cjuahñu. ³¹ Hya xi camá ne, jemu cjín nixtin xi camatsejen me ngajni rë xuta xi cavetju tangun me cojo ngajan Galilea hane hacuaha quiyi tangun me cojo ngajan Jerusalén. Quihndé ne, xuta xi cuacun vë ne, tisua me jimachaya rë xuta tséhë Jesús.

³² Hane ngayin ne, hacuaha titihín jimachaya nuju ta cjuandajyihu xi ha cachja Nina cojo xutachanga naja ne, ³³ cjua vëhë Nina casahmi me xi cavetjucaa ngajni naja ngayaan tjé rë xutachanga naja hya xi catsicuya me Jesús cjuahñu. Hacuaha cuitjin camahindu xcun Salmo xi ma jo: “Ngaye xi quihndi naha ngaye; quihndé ngahan suá ri cjuahñu.” Cuatjin cachja Nina xcun Salmo vëhë. ³⁴ Hacuaha Nina ne, ha cachja me xi tsicuya me Jesús cjuahñu, hacuaha yojo rë Jesús ne, hacuiin cjuehndu, cuitjin cachja me xcun xujun rë me: “Hatuxa suá ri ximincharacun naha, sacuatjin xi ha cachjá xi suá rë David.” Cuatjin cachja Nina. ³⁵ Hacuaha catsihindu sa David xcun ngu nga Salmo cuitjin: “Tuun

cahndé xi cjuehndu yojo rë me, xi hatuxa tjengui nuju cojo yëjë xahasen rë me.” Cuatjin camahindu. ³⁶ Peru David ne, xcun xi ha cavatju casahmi me sacuatjin meje rë Nina ne, cahme me, caseyaniji tangun me cojo nima xutachanga rë me, hacuaha cafehndu yojo rë me. ³⁷ Peru Jesús, me xi Nina catsicuya rë cjuahñu ne, cafehndiin yojo rë me. ³⁸ Vëhë xi ngayujun ngarcun ni ne, meje rë xi cuijnercun xi ngatsë rë me vëhë ne, tisacu jimachaya nuju xi tjin cjuarinchataha tsëhë jyé nuju, ³⁹ hacuaha ngatsë ni rë me vëhë ne, yëjë ni xuta xi mangucacun cojo rë me ne, tsicjé Nina yëjë jyé rë me ta xcun ley rë Moisés ne, sacuin rë cjuarinchataha. ⁴⁰ Vëhë xi meje rë xi cuinechun cuidadu, sá tu cuatjun cuma sacuatjin xi catsihindu profeta xcun xujun rë Nina hatsëe nixtin, cuitjin catsihindu me:

⁴¹ Chutsujun ni, ngayun xi macjaain nuju ne,
catjircun nuju, sehe tjangun ta
jinguyëjë rë xi nechun ne, sahme ngu chircun
xi hisca cumacjaain nuju sa xi yo cuichja cojo nuju.

Cuatjin catsihindu profeta. Hacuaha cojo cjua vëhë ne, catsinguijnetaha Pablo cachja me.

⁴² Hane hora xi tivetju Pablo cojo Bernabé tsëhë yungun jan ne, cachja xuta cojo me xi cuetjucaa totje nga ne, meje rë me xi cuya cuichja nga Pablo tsëhë cjuacjintacun vëhë.

⁴³ Hane hya xi cavetju xuta tsëhë yungun ne, jemu cjín xuta tjë rë Israel hacuaha jemu cjín xutaxín xi hacuaha faharcun me Nina ne, quiji me cojo Pablo cojo Bernabé. Hane Pablo cojo Bernabé ne, cachja me cojo xuta xi cuacun jan xi catjinduju sa me cojo ndiya rë cjuandaja rë Nina.

⁴⁴ Hane xi cavetjucaa nga totje nixtin xi chjahájenda rë ne, ha ña meje yëjë ni xuta nandya camatangun me xi cuiñuju me cjua rë Nina. ⁴⁵ Peru hya xi cavëë yahnga xuta tjë rë Israel xutacjín jan ne, catsë rë xahasen rë me cojo cjuachini, hacuaha cachja me condra tsëhë cjua xi cachja Pablo, hisca chocho cachja me tsëhë me. ⁴⁶ Ngajan xi Pablo cojo Bernabé ne, cachja me cojo xuta tjë rë Israel jan cuitjin:

—Hatuxa ngayun titjun camameje rë xi canújin cojo nuju cjua rë Nina. Peru quihndë ta nitjungun hacuaha xi má nuju ne, machjiriin ngayun xi cojo ngayun satë nuju cjuahñu xatsë ne, cuanguin tihín cumachaya rë xutaxín cjuandajyihi vëhë. ⁴⁷ Cuatjin nihñi ta, tsëhë xi cuitjin cavitexa niji Nina:

Ngahan tsingátju ri sacuaha ngu ndihi xi tehe cjuahasen xi cuma rë xutaxín, cojo sa xi ngatsë rë cjuandajyihi xi cuinoje ne, cuetjutje xuta jinguyjë ni, hisca hiscan vijnetaha ngasunhndë.

Cuatjin cavitexa niji Nina. —Cuatjin catsacjuuin Pablo cojo Bernabé, cachja me.

⁴⁸ Hane xi cahndë xutaxín jan cjua vëhë ne, jemu ndaja camá rë me, hacuaha casahmi jyé casahmi hnga me cjua rë Nina. Hane yëjë ni xuta xi cavaxijin Nina xi sacú rë cjuahñu xatsë ne, camacjain rë me cjuandajyihi vëhë.

⁴⁹ Hyá xi camá ne, jercu cavitsojo cjuandajyihi xi chja tsëhë Nai naja jinguyjë ni ladu vëhë. ⁵⁰ Peru xuta tjë rë Israel jan ne, cavisiajmi me cojo ngujo yachjin nchina tsëhë yungun jan, cojo ngujo xuta xi matitjun tsëhë nandya jan, sehe cavetsihin casua me ngu cjuañihi xi cuma rë Pablo cojo Bernabé, sehe cavaxëxin me tsëhë nangui rë me. ⁵¹ Peru Pablo cojo Bernabé ne, cavitsune me chojo rë ntsacu me, xi sua me machaya rë xuta xi cuacun jan xi vutsejen me me sacuaha xutaxín xi hvíin cjua rë Nina. Sehe cavetju me quiji me nandya Iconio. ⁵² Hane xuta ladu rë Jesús ne, quitsë rë me cjuasua hacuaha quitsë rë me tsëhë Hasen rë Nina.

14

Quiji apóstol ngajan Iconio

¹ Hyá xi camá ne, Pablo cojo Bernabé ne, quiji tangun me yungun rë xuta tjë rë Israel ngajan nandya Iconio. Hane xi cachja me cojo xuta ne, jercu cjín camahani xuta tjë rë Israel cojo xutaxín camacjain rë me cjua jan. ² Peru xuta tjë rë Israel xi ha mijí cumacjain rë ne, cachja me cojo xutaxín, catsinguetsun me cjuatacun rë me xi cuacun vë condra

tséhë apóstol xi cuacun jan. ³ Peru jemu jyë nixtin cavyujutaha me hacuaha hacuiin catsacjun me xi cachja me tséhë Nai naja. Hane Nai naja ne, casua me cahndé xi casahmi apóstol cjuarcun, cojo sa xi cumatsejen xi quixi cjua xi chja me tséhë cjuandaja rë Nai naja. ⁴ Peru xuta nandya jan ne, hacuiin tangun camá cjuatacun rë me ta ngujo me ne, cachuya rë me tséhë xuta tjë rë Israel, peru yahnga nga me ne, cachuya rë me tséhë apóstol jan. ⁵ Hya xi camá ne, xutaxín cojo xuta tjë rë Israel cojo xutaxa rë jan ne, cavyujucun me xi choho sahmi me cojo apóstol xi cuacun jan hacuaha tsiquehen me cojo ndyojo. ⁶ Peru apóstol jan ne, camachaya rë me cjua jan, hane cavanga me quiji me ngajan nandya Listra cojo nandya Derbe, ngajan distritu Licaonia, cojo ngujo sa cahndé tahndee jan. ⁷ Hane yëjë cahndé hacutjin catsujihiya me ne, cachja me cojo xuta cjuandajyihi xi chja tséhë Jesucristu.

Meje tsiquehen xuta Pablo ngajan Listra

⁸ Cavéjña ngu cha ngajan nandya Listra, ngu cha xi tsajin rë ngahñu ntsacu, tséhë xi tsehen hisca hya xi catsin cha. Maji camahani fi cha. ⁹ Tacun cha tivisiñuju cha cjua xi tichja Pablo. Ngajan xi xi cavutsejenndaja Pablo cha ne, cavacun rë me xi mangucacun cha xi hatuxa cumandaja cha, ¹⁰ sehe ngajan xi cachja me cojo cha cuitjin:

—Tisechunquixun. —Cuatjin cachja me.

Hya xi camá ne, hisca cacaahnga cha xi casecun cha, sehe cavetsihin quiji ntsacu cha.

¹¹ Ngajan xi xutacjín jan ne, xi cavëe me xcusun xi casahmi Pablo ne, cavetsihin cajindaya me cachja me hne rë me, xi hmí rë hne Licaonia, cuitjin cachja me:

—¡Me xi cuicun vi ne, nina me vi, xi canduva me tséhë ngahnga, canduvatjengui naja me, tu xi tsejen me sacuaha xuta! —Cuatjin cachja me.

¹² Bernabé ne, xi má rë xuta jan ne, nina Zeus me, hane Pablo ne, nina Hermes me, tséhë xi me vëhë xi hitsë sa jercu cachja me, ¹³ Ngajan xi nahmi tséhë nina Zeus jan, me xi tacun yungun rë tjehen nandya ni ne, canduvacojo me chu ndyaja hacuaha canduvacojo me naxu ngajan hiscan tingotjo tséhë nandya. Hane nahmi cojo xutacjín jan ne, meje tsiquehen me ndyaja jan hacuaha sua me naxu jan xi cjuaharcun me Pablo cojo Bernabé.

¹⁴ Hya xi apóstol Bernabé cojo Pablo camachaya rë me hacutjin tisahmi xuta jan ne, cajavë me tsjian rë me cavicheya me, ta cuatjin xcusun rë xuta tjë rë Israel hya xi cjan rë me. Sehe cavanga me quiji me ngajñi rë xutacjín jan, cajindaya me cachja me cuitjin:

¹⁵ —Ngayujun ni ne, ¿jmé má cuitjin tiniñu? Ngayin ne, hacuaha xuta ni ngayin sacuatjin nuju ngayun. Canújin cojo nuju ngu cjuandajyihi xi quichihin, cojo sa xi cuejñuxun xcusun xi machjiriin vi, hacuaha cojo sa xi cuisuhun ndiya rë ngu Nina xi quicun, me xi casahmi ngahnga cojo nangui cojo ndachacun, cojo yëjë ni xi tjin jan.

¹⁶ Nina ne, casua me cahndé xi, nixtin xi cavatju ne, xuta tséhë yëjë ni nación ne, casahmi me hacutjin xi ha xcusun rë suvá me. ¹⁷ Peru tséhë xi casahmi me cjuandaja ne, casua me camachaya nuju xi me vëhë xi Nina me; catsingatju me tsi tséhë ngahnga xi cuma nuju, hacuaha casua nuju me nixtin rë tutjë nuju, casua me xi chinu, hacuaha catsinguitsé me xahasen nuju cjuasua. —Cuatjin cajindaya me cachja me.

¹⁸ Handasa cachja me cuatjin ne, peru ha tu hitsë sa ne, camaji cavatëcja me xi tsiquehen xutacjín jan chu xi sua me cjuatjo cojo apóstol jan sacuaha nina rë me.

¹⁹ Hya xi camá ne, canduva ngujo xuta tjë rë Israel tséhë nandya Antioquía cojo nandya Iconio. Hane catsinguetsun me cjuatacun rë xutacjín jan, sehe cavetaha me ndyojo Pablo hane cajavëjne me cavaxë me ngajan xín tséhë nandya, tséhë xi xi má rë me ne, ha cahme Pablo. ²⁰ Peru xi tu catséxtin xuta ladu rë Jesús jan hiscan jiña Pablo ne, cavisatjenhnga me quiji me cavisehen nga me nandya. Hane xi camá nchujun jan ne, cavetju me quiji me cojo Bernabé ngajan nandya Derbe.

Cavuya Pablo cojo Bernabé ngajan Antioquía, distritu Siria

²¹ Hane xi cafehe me jan ne, casua me camachaya rë xuta cjuandajyihi xi chja tséhë Jesucristu. Hane jemu cjín xuta xi cavisehen me ladu rë Jesús. Hya xi camá ne, cavuya

nga me Listra cojo Iconio cojo Antioquía, distritu Pisidia. ²² Caviyujuhñu me cjuatacun rë xuta ladu rë Jesús, hacuaha cachja me cojo rë me xi catjinduju me xi mangucacun me cojo Jesús. Hacuaha cachja sa me cojo rë me cuitjin:

—Meje rë xi jemu cjín cjuañihí cuatjuun cuma sehe cuiseen hiscan sahmi Nina gubiernu. —Cuatjin cachja me.

²³ Hacuaha casuaxa rë me nguyo xuta changá jima ngu yungun jan, xi cjuahacuenda me xuta rë yungun. Hane xi cavatju casahmi me oración hacuaha casahmi me xun rë me ne, sehe caviyuju me xuta rë yéjë yungun jan tsja Nai naja, me xi camangucacun xuta jan cojo. ²⁴ Hya xi camá ne, cavuya cavatju nga me distritu Pisidia, sehe cafehe me nandya Perge, distritu Panfilia. ²⁵ Hane xi cafë cachja me cojo xuta jan cjuandajyihi ne, sehe cavetju me quiji me nandya Atalia. Hane xi cavetju me ngajan ne, sehe cavisehen me barcu cavuya quiji me Antioquía, ²⁶ nandya hiscan xi caviyuju xuta me ngahma cjuandaja rë Nina xi sahmi me xa xi sehe cajnetaha casahmi me jan. ²⁷ Hane xi cafehe Pablo cojo Bernabé jan ne, sehe casahmitangun me yéjë xuta rë yungun, casuacuenda me yéjë hacutjin xi casahmi Nina, nixtin xi quiji casahmi me xa rë Nina. Hacuaha casuacuenda me xi Nina ne, cavuxaha me ndiya xi cumangucacun xutaxín cojo Jesús. ²⁸ Hane hacuiin hitsë nixtin caviyujutaha me jan cojo xuta ladu rë Jesús.

15

Junta xi camá ngajan Jerusalén

¹ Hya xi camá ne, nguyo me xi xuta tjé rë Israel ne, cavetju tséhë Judea hane cafehe me Antioquía, cachja me cojo yahnga xuta ladu rë Jesús cuitjin:

—Sa xi xtiin rë chuxin nuju sacuaha xcusun xi cavejña Moisés ne, cumaji cuetjuntjun.

—Cuatjin cachja me.

² Ngajan xi Pablo cojo Bernabé ne, hacuiin hitsë casedjan cjua rë me cojo xuta xi cachja cuatjin jan. Véhë xi xuta rë yungun jan ne, casuaxa me Pablo cojo Bernabé cojo nguyo sa me xi cjue me xcun apóstol cojo xcun xuta changá rë Jerusalén, xi ha vëë me cjua rë Nina xi cuinenguise me tséhë cjuacjintacun xi casuandya rë me ngajan.

³ Ngajan xi xuta xi cuacun cavitexa xuta rë yungun jan ne, cavatju me distritu Fenicia cojo distritu Samaria. Hane cuatjin tisuacuenda me hacutjin xi xutaxín ne, hacuaha cavisehen me ndiya rë Jesús. Hane yéjë xuta ladu rë Jesús xi cavisiñju cjua jan ne, jemu ndaja camá rë me.

⁴ Hane xi cafehe me Jerusalén ne, jemu ndaja cafahatsja xuta rë yungun jan me. Hacuaha jemu ndaja cafahatsja apóstol cojo xuta changá jan me. Hya xi camá ne, sehe casuacuenda me yéjë hacutjin xi casahmi Nina, nixtin xi quiji casahmi me xa rë Nina.

⁵ Peru nguyo xuta fariseo xi hacuaha camá me ladu rë Jesús ne, cavetjuyñi me cachja me cuitjin:

—Xutaxín xi visehen ladu rë Jesús ne, meje rë xi xtí chuxin rë me hacuaha cuinújan cojo rë me xi sahmi me yéjë sacuatjin chja ley rë Moisés. —Cuatjin cachja me.

⁶ Hya xi camá ne, camatangun apóstol cojo xuta changá xi cjuahacuenda me cjuacjintacun véhë. ⁷ Hane ha xcun xi ha jemu cavisiajmicjín me ngajñi rë me ne, sehe ngajan xi cavetjuyñi Pedru, cachja me cuitjin:

—Ngayujun ngarcun ni matsejen ne, ngayun ne, ha hyun ta hisca nixtin titjun ne, ngahan cavaxijin ná Nina ngajñi nuju cojo sa xi ngatsë nahá ne, cumachaya rë xutaxín cjuandajyihi xi chja tséhë Jesucristu hane cumacjain rë me. ⁸ Hane Nina, me xi vëë yéjë cjuatacun rë xuta matsejen ne, catsingacun me xi cachuya rë me tséhë xutaxín, hya xi casua me Hasen rë me xi cuma rë xuta xi cuacun vë, sacuatjin casua naja me ngayaan. ⁹ Tangun ni casahmi Nina cojo rë me sacuatjin casahmi Nina cojo naja ngayaan, xi catsiyahi me cjuatacun rë xuta xi cuacun vë ta, tséhë xi camangucacun me cojo Nina.

¹⁰ Quihndë ta cuatjin ne, ¿má cuatjin meje chjuhunchuvun rë Nina cojo chuva rë ley rë Moisés, xi cuatjin tivitexun rë xuta ladu rë Jesús xi cuacun jan xi sahmichihin me ngu xcusun xi hisca xutachanga naja cacaain rë me casahmichihin me hacuaha hisca

ngayaan matsejen ne, cacaain naja canihñachehen? ¹¹ Peru hacuiin cuatjin ta ngayaan ne, mac Jain naja xi cuetjuntjeen ngatsë rë cjuandaja rë Nai naja Jesús sacuatjin rë me xi cuacun vëhë. —Cuatjin cachja Pedru.

¹² Ngajan xi xutacjín jan ne, ngu cavyujuju me cavisiñuju me cjua xi cachja Bernabé cojo Pablo hora xi casuacuenda me hacutjin casahmi Nina cjuarcun ngajni rë xa xi casahmi me ngajan nanguí rë xutaxín. ¹³ Hane hora xi cajnetaha cachja Bernabé cojo Pablo cjua vëhë ne, sehe cachja Jacobo cuitjin:

—Ngayujun ngarcun ni matsejen ne, tinuhyun cjua xi cuichjá cojo nuju. ¹⁴ Sehe cajnetaha casuacuenda Simón hacutjin camá xi tjuntjun catsingacun Nina xi hacuaha meje rë me xutaxín, hya xi cavaxijin me ngujo xutaxín jan xi cuma xuta ladu rë me. ¹⁵ Cjua rë Nina xi catsihindu profeta hatsëe nixtin matsejen ne, tjin tangun cjuatacun rë cojo cjua xi café cachja Simón. Cuitjin camahindu:

¹⁶ Xi cuatju xcusun vëhë ne, cuya nga,
hane sahme xatsë ndava David xi cavetsun;
cuya sahmendaja nga xi cavixujne,
tsindaja nga ngundiya,

¹⁷ cojo sa xi xuta xi yahnga ne, sahmi me ngahñu xi cuisehen me ladu na, cuma cuinújan ne, yëjë xutaxín xi ngahan cavaxejen xi cuma tsahan me.

¹⁸ Cuatjin chja Nina, me xi ha casua cjua vëhë hatsëe nixtin.
Cuatjin camahindu.

¹⁹ Vëhë xi xi má ná ngahan matsejen ne, mijí rë xi tahan xti rë xutaxín xi visehen ladu rë Nina. ²⁰ Xi meje rë xi nihñá ne, xi nihinduun rë me xi sinii me xichiné xi cavyuju xcun nina ndyojo, sahmii me cjuatsehan xi sahmi xuta cojo ngu xi hacuiin chjuun rë hacuiin xihin rë me, sinii me yojo rë chu xi caxinchahndu rë xi cahme, hacuaha sinii me jni.

²¹ Cuatjin meje rë ta, tséhë xi hisca jemu nu tsëe jan hisca quihndë ne, jima ngu nandya ngajni xuta tjé rë Israel ne, tjin me xi sua machaya rë xuta cjua tséhë ley rë Moisés. Ley vëhë ne, chutaya rë yëjë ni yungun jima ngu nixtin xi nixtin chjahájenda rë. —Cuatjin cachja Jacobo.

Xujun xi catsingatju apóstol tséhë xutaxín

²² Ngajan xi apóstol cojo xuta changá cojo yëjë sa xuta rë yungun ne, cavyujucacun me xi tuxijin rë ngujo xihin ngajni rë me xi tsingatju me ngajan Antioquía, cjuetangun cojo Pablo cojo Bernabé. Me xi cuicun vi xi catuxijin rë: Judas, me xi hacuaha hmí rë Bársabas, cojo Silas, jo xihin xi jemu chjaharcun rë ngajni rë xuta ladu rë Jesús. ²³ Sehe ngajan xi catsihindu me ngu xujun catsingatju me cojo me xi jo xi cuacun vë. Cuitjin chja xujun jan:

“Ngayin xuta ladu rë Jesús, apóstol cojo xuta changá ne, ningatjin ngu nina niji tsujun ngayujun ni ngayun xuta ladu rë Jesús xi hacuiin xuta tjé rë Israel ngayun, xi nechun nandya Antioquía cojo distritu Siria cojo distritu Cilicia. ²⁴ Ngayin ne, camachaya niji xi cavetju ngujo xihin ngajni niji xi cafehe ndya casuaxti nuju cojo cjua rë hacuaha caviseçjan cjuatacun nuju. Me xi cuacun vë ne, ngayin ne, cavitxiin rë me xi qui ji me.

²⁵ Vëhë xi ngu tangun ni camá cjua niji hane cavejñi tacuín xi tuxijin rë xihin xi ningatjin xi nduvatjengui nuju, cuinduvatangun cojo Bernabé cojo Pablo, me xi jemu vinga niji.

²⁶ Me xi cuacun vë ne, casua me yojo rë me xi cavyujutaha tsavi me xi sahmi me xa rë Nai naja Jesucristu. ²⁷ Cuatjin xi Judas cojo Silas ne, ningatjin nuju me. Hane me vëhë ne, cuichja me cojo nuju cjua hntsua me, cjua xi ningatjin nuju vi. ²⁸ Ngayin ne, ngu tangun ni camá cjua niji cojo Hasen rë Nina xi cuitexin nuju xi nihñu suvá ni xcusun xi hitsë sa sahmi nguyjë vi: ²⁹ xicachinuu xichiné xi cavyuju xcun nina ndyojo, xicachinuu jni, xicachinuu yojo rë chu xi caxinchahndu rë xi cahme, xicamihñuu cjuatsehan xi sahmi xuta cojo ngu xi hacuiin chjuun rë hacuiin xihin rë. Sa xi nihñuu yëjë xcusun vëhë ne, ndatjin nihñu. Vëhë ni cjua xi nujin cojo nuju.” Cuatjin chja xujun jan.

³⁰ Hyá xi camá ne, cavetju me xi cuacun jan qui ji me Antioquía. Hane xi cafehe me jan ne, casahmitangun me yëjë ni xuta rë yungun, sehe casua me xujun xi yaha me.

³¹ Hane xi cavutaya xuta ladu rë Jesús xujun jan ne, jemu ndaja camá rë me tséhë cjua jan.
³² Hane Judas cojo Silas jan ne, tséhë xi tjin rë me chuva xi cuichja me cjua xi cafahatsja me tséhë Nina ne, jercu cachja me cojo xuta jan, hacuaha jemu casua rë me cjuetacun.
³³ Hane xi ha caviyujutaha me ngujo nixtin jan ne, xuta rë yungun jan ne, catsingatju me cafe nga cojo yéjë ni cjuandaja cjuajeya ngajan hiscan xi cavetju me. ³⁴ Hane Silas, xi má rë me ne, hitsë sa ndaja xi ngaja caviyujutaha me. ³⁵ Peru Pablo cojo Bernabé ne, caviyujutaha sa me ngajan Antioquía, cavicuya me cjuachacun rë cjua rë Nina, hacuaha casua me camachaya rë xuta cjuandajyihi xi chja tséhë Nai naja. Hacuaha jemu cjín sa xuta xi cuatjin casahmi me.

Catsismi xicjin Pablo cojo Bernabé

³⁶ Hya xi camá ne, xi cavatju ngujo nixtin ne, Pablo ne, cuitjin cachja me cojo Bernabé:
—Cuyan cuanguen tjenguen nga xuta ladu rë Jesús yéjë ni nandya hiscan xi ha catahan camachaya rë me cjuandajyihi xi chja tséhë Nai naja, cuanguen chutsejen ne, hacutjin tivatju me tijima.

³⁷ Hane Bernabé ne, meje cjuecojo me Juan, me xi hacuaha hmí rë Marcos. ³⁸ Peru Pablo ne, mijí cjuecojo me, tséhë xi Marcos ne, catsismicacun me xicjin me hane cavetjuxín me tséhë Pablo cojo Bernabé ngajan Panfilia, quiijinndujain me cojo xa. ³⁹ Hane cojo cjuatacun vöhë ne, cavetjucaa ngu si ngajñi rë Pablo cojo Bernabé. Cuatjin camá xi cavetjuxin me tséhë xicjin me. Hya xi camá ne, Bernabé ne, quiijicojo me Marcos jan ne, cavisehen me ngu barcu, hane quiji me Chipre. ⁴⁰ Peru Pablo ne, cavaxijin me Silas xi cjuecojo me. Hane xuta ladu rë Jesús ne, caviyuju me me xi cuacun jan ngahma cjuandaja rë Nai naja. Hya xi camá ne, cavetju Pablo cojo Silas, ⁴¹ quiji me yéjë ni nandya tséhë distritu Siria cojo Cilicia, casua rë me ngahñu xuta rë yungun jan.

16

Cavetsihin catusiyihya Timoteo cojo Pablo

¹ Hane xi cavatju vöhë ne, cafehe me nandya Derbe cojo Listra. Ngajan ne, tacun ngu xuta ladu rë Jesús xi hmí rë Timoteo, quihndi rë ngu chjuun xuta tjë rë Israel xi hacuaha cavisehen me ndiya rë Jesucristu. Nahmi rë Timoteo jan ne, xutaxín me. ² Xuta ladu rë Jesús ngajan nandya Listra cojo Iconio ne, jemu ndaja chja me tséhë Timoteo vë. ³ Pablo ne, meje rë me xi cjue Timoteo cojo rë me. Vöhë xi quiijicojo me Timoteo hiscan xi ti chuxin rë xuta tjë rë Israel. Cuatjin casahmi me ngatsë rë xi nandya xi cuacun vöhë ne, siu xuta jan, hane yéjë xuta xi cuacun jan ne, vëë me xi nahmi rë Timoteo ne, ngu xutaxín me. ⁴ Ngajan xi cavetju Pablo cojo Silas cojo Timoteo, quiji me. Hane jima ngu nandya xi tivatju me ne, casua me camachaya rë xuta tséhë cjua xi caviyuju apóstol cojo xuta changá ngajan Jerusalén, cojo sa xi xuta ne, cuihndé me tséhë cjua vöhë. ⁵ Cuatjin camá xi xuta tséhë yéjë yungun jan ne, casacuhñu rë me xi mangucacun me cojo Jesús. Hane nchunchujun ni ne, cuatjin jima cjín sa me.

Cachja nijñá cojo Pablo

⁶ Hya xi camá ne, cavatju me distritu Frigia cojo distritu Galacia ta, tséhë xi Hasen rë Nina ne, casuaain cahndé xi cuichja me cojo xuta cjua rë Nina ngajan distritu Asia. ⁷ Hane xi cafehe me tiña distritu Misia ne, meje cjue me distritu Bitinia, Peru Hasen rë Jesús ne, casuaain cahndé. ⁸ Cuatjin camá xi cavatjutaha me Misia, hane quiji me nandya Troas. ⁹ Hane ngu nguixun xi siutaha me ngajan ne, cachja ngu nijñá cojo rë Pablo. Cavëë me ngu xihin tséhë distritu Macedonia xi secun tichja cojo rë me cuitjin: “Nduvun nguehe Macedonia ne, cuisecun niji.” Cuatjin cachja nijñá jan. ¹⁰ Cuatjin camá xi xi tu cachja nijñá cojo Pablo cuatjin ne, ngutjen ni cavinchin chuva rë hacutjin cuma xi cuanguin Macedonia ta, tséhë xi xi má niji ne, Nina cajindaya niji me xi cuanguin cuinújin cojo xuta jan cjuandajyihi xi chja tséhë Jesús.

Cavisehen na Lidia ladu tséhë Jesucristu

¹¹ Hya xi camá ne, xi cavetjin nandya Troas ne, cachjihin ngu barcu sehe catsanguin ngu quixi rë nandya Samotracia. Hane xi camá nchujun jan ne, catsanguin nandya Neápolis. ¹² Hane tséhë ngajan ne, catsanguin nandya Filipos, ngu nandya xi hitsë sa matitjun tséhë ngu cahndé tséhë distritu Macedonia. Jemu cjín xuta Roma siu me jan. Hane cavinechintihin nandya vëhë ngujo nixtin. ¹³ Hane xi cavechú nixtin xi nixtin chjahájenda rë ne, cavetjin tingotjo hnchua tséhë nandya jan hiscan jiya ndajyé. Xi má niji ne, ngajan tjin ngu cahndé xi má oración. Hane cavinechin ngajan, canújin cjua rë Nina cojo yachjin xi camatangun me jan. ¹⁴ Hane ngu chjuun xi cahndé cjua xi cachja Pablo ne, Lidia hmí rë na, ngu na tséhë nandya Tiatira, viteña na tsjian moradu. Na vëhë ne, hacuaha faharcun na Nina, hane Nai naja ne, cavuxaha me cjuatacun rë na xi ndaja cavetaharcu na cjua xi cachja Pablo. ¹⁵ Hane hya xi caxtenda na cojo yëjë xuta rë na ne, cachja na cojo niji cuitjin:

—Quihndë ta ha hyun xi ngahan ne, camangucácun cojo Nai naja ne, nduvun ndya naha, hane ngajan cuinechun. —Cuatjin jemu cjín cachja na cojo niji, vëhë xi catsangu.

Quiji Pablo cojo Silas ndavaya ngajan Filipes

¹⁶ Cavechú ngu nixtin hya xi tivanguin cahndé hiscan xi má oración ne, cavechútaha niji ngu na hndixahan rë xuta, xi jiya xitsehén xahesen rë. Hane nai rë na hndixahan jan ne, jemu cjín tujún sacu rë me, tséhë xi chja na cojo xuta mé xi cuatju me cuma. ¹⁷ Na vëhë ne, catsujihiya tjengui na ngayin cojo Pablo, jindaya na chja na cuitjin:

—Xuta xi cuicun vi ne, mosu rë Nina xi matitjun má me, hacuaha sua me machaya nuju cjua hacutjin cuetjuntjun. —Cuatjin cajindaya na cachja na.

¹⁸ Jemu cjín nixtin xi cuatjin casahmi na. Hya xi camá ne, tséhë xi jemu camaxti rë Pablo ne, cavuya me cavutsejen me na, sehe cachja me cojo xitsehén jan cuitjin:

—Tséhë xi Jesucristu casuaxa ná me ne, jtetjixin tséhë na! ¡Vëhë xi chjá cojo ri!
—Cuatjin cachja Pablo.

Hane hora vëhë ni ne, cavetjuxin xitsehén jan.

¹⁹ Hya xi camá ne, xi vutsejen nai rë na hndixahan jan xi ha quihndë tsajin cjuetacun xi sacú sa rë me tujún ne, cafaha me Pablo cojo Silas, cajavéjne me quijicani me ngajan hiscan ma tangun xutaxa rë ngajan hiscan má ndetsin. ²⁰ Hane xi cafehe me ngajan xcun xutaxa rë ne, cuitjin cavinchajyé me:

—Cha xi cuicun tjé rë Israel vi ne, jemu tivisecjan cha cjuatacun rë xuta nangui naja.

²¹ Meje rë cha xi nihña xcusun rë xutachanga rë cha, peru ngayaan xuta Roma ne, ndajintjin xi cuanguentjengueen xcusun xi cuacun vë.

²² Hane hacuaha cojo xutacjín jan, cavetsihin cavinchajyé me Pablo cojo Silas. Ngajan xi xutaxa rë ne, cavaxéhndu me tsjian rë me xi cuacun jan, sehe cavitexa me xi sehen rë.

²³ Hane ha xcun xi ha jercu cavaja rë me ne, sehe cavincha me ndavaya. Hacuaha cachja me cojo cha xi sahmi cuidadu ndavaya xi ndaja cuidadu cuma me xi cuacun jan. ²⁴ Hane hya xi cafahatsja mayu cjua vëhë ne, quiji cavinchahñu cha me cahntsua ndavayajñu, hacuaha cavinchanguihñu cha ntsacu me ngojo xi casehenchjine tséhë jo ya xi sahmi rë me castigu hacuaha hitsë sa cjuaquixi jiya me.

²⁵ Hane sacuaha chuva rë vasen nixten ne, Pablo cojo Silas ne, tisahmi me oración hacuaha tisë me tséhë Nina. Hane presu xi yahnga jan ne, tu tivisiñuju ni me. ²⁶ Hane ha tu ñahñu jercu cafani nangui, hisca xihndénaña rë ndavaya jan vitsuneya rë. Hacuaha yëjë ni tingotjo ndavaya jan ne, ngutjen ni catuxaha, hane cadena xi tjinhñu xingu xingu presu ne, cavixuhndu. ²⁷ Hya xi camá ne, cavasca rë cha xi sahmi cuidadu ndavaya jan. Hane xi cavëe cha xi tixaha yëjë tingotjo tséhë ndavaya jan ne, cavaxë cha quicha rë cha hane ha tu hitsë sa ne, catsiquehen cha yojo rë cha ta, tséhë xi xi má rë cha ne, yëjë presu ne, cavanga. ²⁸ Peru Pablo ne, jercu cajindaya me cachja me cuitjin:

—Xicanihñuu cuatjin ta ngayigin ni nechinyin nguehe. —Cuatjin cachja Pablo.

²⁹ Ngajan xi cha xi sahmi cuidadu jan ne, cafehya cha ngu ndihi, sehe vangasanii cha quiji cha cahntsua ndavaya, ña fatsë cha xi tsacjun cha, quiji cafañatsacjan cha xcun

Pablo cojo Silas xi faharcun cha me. ³⁰ Hane xi cavaxë cha me tséhë ndavayajñu jan ne, sehe cafinenguise cha cuitjin:

—Tatá, ¿mé xi meje rë xi sahme, cojo sa xi cuétjutjë? —Cuatjin cafinenguise cha.

³¹ Hane me xi cuacun jan ne, cuitjin cachja me:

—Catamangu tacún cojo Nai niji Jesús, sehe cuetjuntjun ngayun cojo yëjë xuta xi siu ndya nuju. —Cuatjin cachja me.

³² Sehe ngajan xi cha vëhë ne, cajindaya cha yëjë xuta xi siu ndava cha, hane Pablo cojo Silas ne, casua me camachaya rë cha cjua rë Nina cojo yëjë xuta xi cajindaya rë cha jan.

³³ Ha hora vëhë ni tséhë nixten vëhë ne, cafaha cha me ne, cavane cha hiscan casacuhmu rë me. Hya xi camá ne, ngutjen ni caxtenda cha cojo yëjë xuta rë cha jan. ³⁴ Sehe quijiniji cha cojo Pablo cojo Silas ndava cha, hane casua cha niñu cajinë me. Hacuaha jercu ndaja camá rë cha cojo yëjë xuta xi siu ndava cha, tséhë xi camangucacun cha cojo Nina.

³⁵ Hya xi camá ne, xi casahasen jan ne, catsingatju xutaxa rë jan nísë, quiji cachja cojo cha xi sahmi cuidadu ndavaya jan cuitjin:

—Naxun xu cha xi caxincha ndavaya nguchjin jan. —Cuatjin cachja cha.

³⁶ Ngajan xi cha xi sahmi cuidadu ndavaya jan ne, quiji cachja cha cojo Pablo cjua vihi:

—Catsingatju xutaxa rë cjua xi cuáxë xu nuju. Vëhë xi cuma cuetjun ne, cuangun cojo cjuandaja cjuajeya. —Cuatjin cachja cha.

³⁷ Peru Pablo ne, cuitjin cachja me cojo cha xi cuacun jan:

—Xutaxa rë ne, cavitexa me casehen niji xcun yëjë ni xuta, handasa cjëë cjuahacuenda me jyé niji, ngayin xi xuta Roma ngayin. Sehe cavinchaniji me ndavaya. ¿Há taha hma meje cuaxë niji me quihndë? ¡Cumaji xi cuatjin! Catinduva suvá me cataxë niji me. —Cuatjin cachja Pablo.

³⁸ Hane cha nísë jan ne, catsicuya cha cjua cojo xutaxa rë cuatjin. Hane xi camachaya rë xutaxa rë xi xuta Roma má me xi cuacun jan ne, catsacjun me camá. ³⁹ Ngajan xi xutaxa rë ne, quiji cachja me cojo Pablo cojo Silas xi tsifyécacun me xi cuatjin camá. Sehe cavaxë me me, sehe cafehya rë me xi sahmi me cjuandaja ne, cuetjuxin me tséhë nandya jan. ⁴⁰ Hane xi cavetju Pablo cojo Silas tséhë ndavaya ne, cavuya quijitjengui me na Lidia. Hane xi cavëë me yëjë xuta ladu rë Jesús jan ne, sehe cachja me cojo xuta jan xi catjinduju me cojo ndiya rë Jesús, sehe cavetju Pablo cojo Silas quiji me.

17

Cafehe Pablo ngajan nandya Tesalónica

¹ Hya xi camá ne, Pablo cojo Silas jan ne, cavatju me nandya Anfípolis cojo nandya Apolonia, sehe cafehe me nandya Tesalónica, hiscan xi tacun ngu yungun rë xuta tjë rë Israel. ² Hane sacuatjin xi ha xcusun rë Pablo ne, ngajan quijitjengui me xuta tjë rë Israel jan nixtin xi chjahájenda rë. Hane jyan nixtin, tséhë jyan totje ne, Pablo ne, cavicuya me xuta cjua rë Nina. ³ Casua me camachaya rë xuta xi chja cjua rë Nina xi Me xi Tsingatju Nina ne, hatuxa tjin xi cueya me sehe cuya nga me cjuahñu. Hacuaha cachja Pablo cuitjin:

—Jesús, me xi tisuá jimachaya nuju tséhë ne, me vëhë xi catsingatju Nina. —Cuatjin cachja me.

⁴ Ngajan xi ngujo xuta xi cuacun jan ne, camac Jain rë me, hane cavisehen me ladu rë Pablo cojo Silas. Hane ngajni rë me xi cuacun camac Jain rë vë ne, hacuaha jemu cjín xutaxín xi faharcun rë Nina hinchajni me cojo hacuiin hitsë yachjin xi matitjun jan hinchajni me. ⁵ Ngajan xi ngujo xuta tjë rë Israel xi camac Jain rë jan ne, camachini me. Hane hora xi camá casahmitangun me ne, jemu cjín xuta tsehan xi tujyë tsuyihiya jan ne, cavetsihin casahmi me ngu suë jyé ngajni nandya xi cjue jaha me Pablo cojo Silas. Quiji me ndava Jasón xi vanguise me me xi cuacun vë xi cuaxë me xcun xutacjín jan.

⁶ Hane xi casacuiin rë me Pablo cojo Silas ngajan ne, cajavëjne me Jasón cojo ngujo sa xuta ladu rë Jesús, quijicojo me xcun xutaxa rë, jindaya me cachja me, cavincha me jyé cuitjin:

—Cha xi cuacun jemu casuaxti jingujyë ni ngasunhndë ne, hacuaha cojo nguehe cafehe cha. ⁷ Hane cha Jasón vi ne, cafahatsja cha cha xi cuacun jan ngajan ndava cha. Hane yéjë cha xi cuacun vë ne, tisahmi cha condra ley rë emperador Romano xi hmí rë César, me xi matitjun camahani, ha chja cha xi tjin sa ngu me xi matitjun xi hmí rë Jesús.

—Cuatjin cavinchajyë xutacín jan me xi cuacun jan xcun xutaxa rë.

⁸ Ngajan xi xutacín cojo xutaxa rë jan ne, xi cahndë me cjua jan ne, jemu camacjín-cacun me. ⁹ Hane ha xcun xi cavechji Jasón cojo xuta xi yahnga jan tujún cojo xutaxa rë ne, sehe catsismi xutaxa rë jan me.

Cafehe Pablo cojo Silas ngajan nandya Berea

¹⁰ Ngajan xi xuta ladu rë Jesús ne, xi tu camá nguixun jan ne, catsingatju me Pablo cojo Silas ngajan nandya Berea. Hane xi cafehe me ngajan ne, quiyi me yungun rë xuta tjë rë Israel. ¹¹ Hane xuta jan ne, hitsë sa tixaha cjuatacun rë me xi cuma rë xuta xi siu ngajan Tesalónica. Hane me xi cuacun jan ne, cafahatsja me cjua rë Nina cojo nguñaja xahasen rë me. Hacuaha nchunchujun ni ne, cavutaya me xujun rë Nina, cojo sa xi sacú rë me cjuaquixi tséhë cjua xi cachja Pablo. ¹² Cuatjin camá xi jemu cjín xuta jan camacjain rë me. Ngajni rë xuta jan ne, hacuaha hacuiin hitsë xutaxín nchina sa chjuun sa xihin me hinchajni me jan. ¹³ Peru hya xi camachaya rë xuta tjë rë Israel ngajan Tesalónica xi cojo nandya Berea tisua Pablo jimachaya rë xuta cjua rë Nina ne, hacuaha quiyi xuta xi cuacun jan casua me cjuacjintacun xutacín xi siu jan. ¹⁴ Ngajan xi xuta ladu rë Jesús xi siu jan ne, catsingatju me Pablo hisca ndachacun. Peru Silas cojo Timoteo ne, caxinchataha ni me ngajan. ¹⁵ Hane xuta xi quijicani rë Pablo jan ne, quijicojo me me hisca nandya Atenas. Xi tu cafehe me ngajan ne, cachja Pablo cojo xuta xi quijicani rë me jan ne, catji catichja me cojo Silas cojo Timoteo ne, marcu macjain catjitjengui me Pablo. Hya xi camá ne, sehe cafe xuta xi cuacun jan.

Cafehe Pablo ngajan nandya Atenas

¹⁶ Jinguyéjë rë xi tacunya Pablo Silas cojo Timoteo ngajan Atenas ne, jemu camaxti rë xahasen rë me, tséhë xi tivutsejen me nandya jan xi ña quitsë rë cojo nina ndyojo.

¹⁷ Véhë xi Pablo ne, cachja me cojo xuta tjë rë Israel cojo xutaxín xi faharcun rë Nina ngajan yungun. Hane ngajan ndetsin ne, nchunchujun ni cachja sa me cojo xuta xi fehe jan. ¹⁸ Hacuaha cojo maestru xi tjengui cjuatacun xi hmí epicúreo cojo ngujo sa maestru xi tjengui cjuatacun xi hmí estóico cavisiajmi me cojo Pablo. Hane ngujo me ne, cachja me cuitjin:

—Cha machjiriin xi cuajyihu vë ne, ¡tsajin camahani mé vengui chji rë cjua xi chja cha!
—Cuatjin cachja maestru xi cuacun jan.

Ngujo nga me ne, cuitjin cachja me:

—Cha xi cuajyihu vë ne, tisua cha jimachaya naja tséhë nina rë jingu sa xuta.

Cuatjin cachja ngujo nga me ta, tséhë xi Pablo ne, tisua me jimachaya rë xuta cjuandajyihu xi chja tséhë Jesús cojo tséhë hacutjin cavuya me cjuahñu. ¹⁹ Ngajan xi xuta jan ne, quijicojo me Pablo ngajan Areópago, cahndë hiscan matangun me xi sahmi me junta, sehe cachja me cojo me cuitjin:

—Tinújun cojo niji mé cjuachacun xatsë xi quichuhun ta ²⁰ jemu ha ngu xcusun cjua xi canuhiyin xi canújun. Véhë xi meje cumachaya niji mé vijne cjua véhë.

Cuatjin cachja xuta Atenas jan ta, ²¹ tséhë xi yéjë xuta xi cuacun vë cojo xuta ngu nangui xi siu cahndë jan ne, hatuxa chuya rë me xi cuiñuju me ngu cjua xatsë hacuaha jemu nduju cuichja me cojo xicjin me.

²² Hyá xi camá ne, sehe casecunvasen Pablo cahndë véhë, sehe cachja me cuitjin:

—Ngayujun ngarcun ni xuta Atenas matsejen ne, vutsején jingujyë ni ne, ngayun ne, hacuaha jemu chjuhunrcun nina nuju. ²³ Ta jinguyéjë rë xi catsuwyéhëya ngajni nandya nuju hacuaha tivutsején yéjë cahndë hiscan chjuhunrcun nina nuju ne, cavéchutaha ngu yungun lihndi hiscan xi camahindu ngujo cjua xi chja cuitjin: “Tséhë ngu nina xi hyaan me.” Cuatjin camahindu. Véhë xi nina xi chjuhunrcun xi hisca hyuun ne, me véhë xi

nduva tisuá jimachaya nuju tséhë me. ²⁴ Nina xi casahmi ngasunhndë cojo yéjë xi tjin xcun, me xi nai rë ngahnga cojo nangui ne, hacuiin véjñacahndë me yungun xi sahmi xuta. ²⁵ Hacuaha me vëhë ne, tsajin mé xi ma chaja rë me xi ngayaan xuta cuma tahan rë me ta, me vëhë xi sua naja me cjuahñu, sua me xta naja, hacuaha sua naja me yéjë ni xi mameje naja.

²⁶ 'Hane tjë rë xi ngu ni xuta ne, casahmi Nina yéjë xcusun xuta, xi cuiyuju me jingujyë ni ngasunhndë. Hacuaha Nina cachja me janihya xi cumatitjun jimangu xcusun xuta hacuaha jani hiscan xi cuiyuju me. ²⁷ Cuatjin casahmi Nina cojo sa xi ngayaan xuta ne, cuinchaseen me, hane xi cuatjin cuinchaseen me ne, hyaan sa xi sacú naja me, handasa hacuiin cjin tacun Nina xi cuma naja xingu xingu ngayaan. ²⁸ Sacuatjin chja ngu cjua xi chja cuitjin: "Nina ne, sua naja me cjuahñu, sahmi me xi ma finiya ngayaan, hacuaha sua naja me xi nechan cojo cjuahñu naja." Cuatjin chja cjua. Hacuaha yahnga xuta tséhë ngajni nuju xi tsihindu me cjua xi jemu ndaja fi ne, cuitjin catsihindu me: "Ngayaan ne, tjë rë Nina ngayaan." Cuatjin catsihindu me. ²⁹ Quihndë ta quihndi rë nina ngayaan ne, mijí rë xi cuma tacuun xi Nina ne, tangun me cojo nina oro o sa xi nina quicha tyava, o sa xi nina ndyojo, xi xuta casahmi me cojo cjuatacun rë suvá me. ³⁰ Nina ne, catsingatjuhnga me nixtin xi xuta ne, hvíin me. Peru quihndë ne, Nina ne, tivitexa me xi yéjë ni xuta tséhë jingujyë ni ladu ne, tsindeya me cjuatacun rë me ta, ³¹ tséhë xi Nina ne, ha cavejña me ngu nixtin xi tsichuva me xuta tséhë ngasunhndë cojo cjuaquixi tu cutjin jyé rë ne, cuatjin sahmi me cojo. Hacuaha ha cavaxijin me ngu xuta xi sahmi xa vëhë. Hacuaha ha hyan xi cjuaquixi xi cuatjin cuma, tséhë xi Nina catsicuya me cjuahñu xuta vëhë. —Cuatjin cachja Pablo.

³² Hane hya xi cahndë xuta jan cjua xi ngu nima ne, cavuya cjuahñu ne, ngujo me ne, catsixcuehyu me cjua jan, peru ngujo nga me ne, cuitjin cachja me:

—Cuisiriji xi cuinújun nga ngundiya cjua vëhë. —Cuatjin cachja ngujo me jan.

³³ Ngajan xi Pablo ne, cavetju me tséhë ngajni rë xuta jan. ³⁴ Hane ngujo xuta ne, cavisehen me ladu rë Pablo sehe camacjain rë me cjua jan. Hane ngajni rë me xi cuacun vë ne, jiyajni me xi hmí rë Dionisio, ngu xutaxa rë tséhë nandya, hacuaha cojo sa ngu chjuun xi hmí rë Dámaris jiyajni me jan, cojo ngujo sa me.

18

Cafehe Pablo ngajan nandya Corinto

¹ Hyá xi camá ne, hyá xi cavatju xcusun vëhë ne, cavetju Pablo tséhë nandya Atenas, hane quiyi me nandya Corinto. ² Hane xi cafehe Pablo ngajan ne, cavechútaha me ngu xihin tjë rë Israel xi hmí rë Aquila. Aquila jan ne, tséhë distritu Ponto má me, peru hacuaha sehe cafehe me Corinto cojo chjuun rë me xi hmí rë Priscila, xi quiyi cavyujucahndë me ngajan nación Italia. Cavetjuxin me tséhë Italia ta, tséhë xi me xi matitjun jan, me xi hmí rë Claudio ne, cavitexa me xi yéjë ni xuta tjë rë Israel ne, hatuxa cuetjuxin me tséhë nandya Roma. Hane Pablo ne, quijitjengui me Aquila. ³ Hane tséhë xi ha ngu xcusun ni xa xi sahmi catsijo ni me ne, cavejñatangun me cojo me xi cuacun vë, hacuaha tangun casahmi me xa. Xa xi sahmi me ne, xi tsindaja me ndihya tsjian. ⁴ Ngajan xi Pablo ne, cachja me cjua rë Nina ngajan yungun rë xuta tjë rë Israel jima ngu nixtin xi chjahájenda rë ta, tséhë xi meje rë me xi sa xuta tjë rë Israel o sa xi xutaxín ne, cumacjain rë me cjua vëhë.

⁵ Hane xi cafehe Silas cojo Timoteo xi cavetju me tséhë distritu Macedonia ne, Pablo ne, cavetsihin xi nichunchujun ni tichja me cojo xuta cjua rë Nina, tichja me cojo xuta tjë rë Israel xi Jesús ne, me vëhë xi catsingatju Nina. ⁶ Peru hya xi casahmi xuta xi cuacun jan condra Pablo hacuaha chocho cachja me tséhë me ne, cavitsune Pablo chojo rë tsjian rë me sacuaha xi tivaxë me xuta xi mijí cuihndë cjua rë Nina, sehe cachja me cojo xuta jan cuitjin:

—Ngayun suvun cún nuju tséhë xcusun xi cuátju cuma. Hacuiin ngahan cún ná. Quihndë cojo nixtin xi cjui sa ne, cjué cuichjá cojo xutaxín cjua rë Nina. —Cuatjin cachja me.

⁷ Hane xi cavetjuxín me tséhë xuta xi cuacun vë ne, quiji me ndava ngu me xi hmí rë Ticio Justo, ngu xutaxín xi hacuaha faharcun me Nina. Ndava me vëhë ne, ngu ndaya ni rë yungun rë xuta tjë rë Israel jan tacun. ⁸ Hane Crispo, me xi xutaxa rë yungun jan ne, camangucacun me cojo Nai naja Jesucristu, hacuaha cojo yéjë sa me xi siu ndava me camangucacun me. Hacuaha jemu cjín xuta Corinto ne, xi cahndé me cjua ndajyihí rë Nina jan ne, camacjain rë me sehe caxtenda me. ⁹ Hane ngu nguixun jan ne, ngajñi nijña rë Pablo ne, cachja Nai naja cojo rë me cuitjin:

—Xicarcuiin. Tinoje sa. Xicanisejyiin cjua xi noje. ¹⁰ Cuatjin nihñi ta, tséhë xi ngahan ne, tejña cojo ri, hane tsajin yo xi cuma choho sahmi cojo ri ta ngahan ne, jemu tjin ná xuta ladu naha nguehe nandya vihi. —Cuatjin cachja Nai naja.

¹¹ Hane cavéjña Pablo ngajan ngu nu vasen, xi vicuya rë me xuta cjua rë Nina.

¹² Peru hya xi Galión matitjun me tséhë distritu Acaya ne, camatangun xuta tjë rë Israel jan ne, cafaha me Pablo, quijicani me xcun xutaxa rë, ¹³ cuitjin cachja me:

—Cha xi cuiyihi vi ne, tsuyiyihiya cha tichja cha cojo xuta xi hacjahi xcusun meje rë xi nihña xi chjahanrcun Nina. Peru xcusun vëhë ne, condra tséhë ley naja. —Cuatjin cachja xuta jan.

¹⁴ Hane ha tu hora sa xi cuichja Pablo ne, cachja Galión cojo xuta xi cuacun jan cuitjin:

—Ngayun xuta tjë rë Israel, sa xi ngu cjuatsehen o sa xi ngu jyé jyé xi casahmi cha ne, tjin ná chuva rë xi scaa ná cojo nuju. ¹⁵ Peru xi tséhë ngu cjuachacun cojo tséhë ñihí rë ngu xuta cojo tséhë ley nuju suvun ne, ndyá chutsujun suvun hacutjin cuma chihin ta, tséhë xi ngahan ne, hatuxa sahmecuendaan cjuacjintacun xi cuacun vë. —Cuatjin cachja Galión.

¹⁶ Ngajan xi Galión ne, catsicanga cojo me xuta tjë rë Israel jan tséhë ndihyavasen.

¹⁷ Ngajan xi yéjë xuta jan ne, cafaha me Sóstenes, me xi matitjun tséhë yungun rë xuta tjë rë Israel, cavaja rë me ngajan ndatsen ndihyavasen. Peru Galión ne, casahmicuendaain camahani me yéjë ni cjuacjintacun vëhë.

Cavuya nga Pablo nandya Antioquía

¹⁸ Peru hya xi ha jemu cavatju nixtin xi quitaha Pablo ngajan Corinto ne, catsinguijnetaha me cjua cojo xuta ladu rë Jesús, sehe cafaha me ngu barcu xi cjue me ngajan distritu Siria. Priscila cojo Aquila ne, hacuaha cojo me quiji me cojo Pablo. Hane xi cafehe me nandya Cencrea ne, ngajan casejnu rë rcu Pablo ta, tséhë xi casahmichihin me ngu cjua cojo Nina. ¹⁹ Hane xi cavatju vëhë ne, sehe quiji me nandya Efeso. Hane Pablo ne, ngajan caviyujutaha me Priscila cojo Aquila. Hya xi camá ne, Pablo ne, quiji me yungun, cachja me cojo xuta tjë rë Israel jan cjua rë Nina. ²⁰ Hane xi cafehyá xuta me xi setaha sa me ngupo nixtin ngajan ne, catsingatiin me. ²¹ Hya xi camá ne, catsinguijnetaha me cjua cojo xuta jan, cuitjin cachja me:

—Sa xi Nina meje rë me ne, cuya nga, nduvatjéngüë nuju. —Cuatjin cachja me.

Ngajan xi cafaha me ngu barcu xi cavetju me tséhë Efeso.

Quiji nga Pablo cavusehenhya me xuta rë yungun

²² Hane xi cafehe me Cesarea ne, ngajan cavetju me quiji me Jerusalén xi sua me ngu nina xuta rë yungun ngajan. Hya xi camá ne, sehe cavuya cafehe me nandya Antioquía.

²³ Hane xi ha casetaha me ngupo nixtin jan ne, sehe cavetju nga me quiji me yéjë ni nandya tséhë distritu Galacia cojo distritu Frigia, casua rë me ngahñu yéjë ni xuta ladu rë Jesús.

Quiji Apolos nandya Efeso cojo nandya Corinto

²⁴ Ngajan nandya Efeso ne, cafehe ngu xuta tjë rë Israel xi hmí rë Apolos. Nangui rë me ne, Alejandría. Jemu ndaja tsichihin me cjua xi chja me, hacuaha jemu vëe me tséhë cjua rë xujun rë Nina. ²⁵ Me vëhë ne, tjin yo xi casuacuenda rë me tséhë ndiya rë Nai naja.

Cojo nguñaja xahasen rë me ne, chichihin ni casua me camachaya rë xuta cjuandajiyhi xi chja tséhë Jesús. Peru hvíin me mé vijne xi xtenda xuta sacuatjin tixtenda xuta ladu rë Jesús ta xi vëe me ne, suvá ni mé vijne xi xtenda xuta sacuatjin cavitenda Juan Vitenda rë Xuta. ²⁶ Apolos vë ne, hacuiin cojo chiricun rë me cuetsihin cuichja me cojo xuta cjua rë Nina ngajan yungun rë xuta tjë rë Israel. Hane xi cahndë Priscila cojo Aquila sacuatjin cachja Apolos ne, cavaxëxin me ne, sehe casuacuenda ndaja sa me tséhë ndiya rë Nina. ²⁷ Hya xi camá ne, catsingatahacacun Apolos xi cjue me ngajan distritu Acaya. Hane xuta ladu rë Jesús jan ne, cachuya rë me hacuaha catsihindu me ngu xujun tséhë xuta ladu rë Jesús ngajan, cachja me cojo xuta jan xi ndaja cjuahatsja me Apolos. Hane xi cafehe me jan ne, jemu cavisecoo me xuta xi cojo cjuandaja rë Nina ne, ha camangucacun me cojo Jesús. ²⁸ Hane xcun ni yëjë xuta ne, jercu catsitjungui me cjua rë xuta tjë rë Israel. Jemu cjín cahndë tséhë xujun rë Nina xi cachja me cojo xuta, xi tsingacun me xuta xi Jesús ne, me vëhë xi catsingatju Nina me.

19

Cafehe Pablo nandya Efeso

¹ Cuitjin camá jinguyéjë rë xi quitahá cuaha Apolos ngajan Corinto. Xi cavatju catsujyihya Pablo taha ladu ngatihin ne, cafehe me nandya Efeso, hane ngajan cavechútaha me ngujo xuta ladu rë Jesús. ² Hane cuitjin cachja me cojo xuta jan:

—¿Há cavisehen Hasen rë Nina cahntsua xahasen nuju hya xi camangutacún cojo Jesús? —Cuatjin cachja me.

Hane xuta jan ne, cuitjin cafayangui me:

—Hisca camachayiin niji cjua xi tjin xi hmí rë Hasen rë Nina. —Cuatjin cafayangui me.

³ Ngajan xi Pablo ne, cuitjin cachja nga me:

—¿Hacutjin caxtenda ngayun ni? —Cuatjin cachja me.

Hane xuta jan ne, cuitjin cafayangui me:

—Caxtenda ngayin sacuatjin cavitenda nima Juan. —Cuatjin cafayangui me.

⁴ Ngajan xi Pablo ne, cuitjin cachja nga me:

—Juan vë ne, cavitenda me xuta hya xi xuta jan ne, catsindeya me cjuatacun rë me, hacuaha cachja me cojo xuta jan xi catamangucacun me cojo me xi sehe cjuehe, me xi hacui Jesús. —Cuatjin cachja nga Pablo.

⁵ Xi cahndë xuta jan cjua vëhë ne, caxtenda me xi cumatangun cjuatacun rë me cojo Nai naja Jesús. ⁶ Hane xi cavisanetsja Pablo xuta jan ne, canduva Hasen rë Nina, cavisehen cahntsua xahasen rë xuta, hane cachja me hne xi hisca hvíin me, hacuaha cachja me cjua xi casua Nina me. ⁷ Hane má sacuaha tejó xihin me xi yëjë me.

⁸ Hya xi camá ne, quiji Pablo yungun rë xuta tjë rë Israel, cachja me cojo xuta. Hane cahntsua jyan sá ne, cuatjin fi me yungun, hane hacuiin cojo chiricun rë me chja me cojo xuta tséhë gubiernu xi sahmi Nina. ⁹ Peru ngujo xuta jan ne, casahmitaja rcu me, hane camacjaain rë me, hane chocho cachja me tséhë ndiya rë Jesús xcun yëjë ni xuta. Vëhë xi Pablo ne, cavetjuxin me tséhë xuta jan, hacuaha quijicojo me xuta ladu rë Jesús. Cavetsihin me nchunchujun ni cachja me cojo xuta ngajan scuela rë ngu me xi hmí rë Tirano. ¹⁰ Cuatjin casahmi me cahntsua jo nu, vëhë xi yëjë xuta xi siu ngajan Asia ne, camachaya rë me tséhë cjua rë Nai naja, sa xuta tjë rë Israel ne, o sa xutaxín.

Yatu quihndi rë Sceva

¹¹ Jemu jyë cjuarcun casahmi Nina ngajñi rë xa xi casahmi Pablo. ¹² Hisca tsjian xi sahmixa cojo Pablo ne, quijicojo xuta casua rë me xuta hmu rë, hane chíhin rë me ne, cavetjuxin, hisca xitsehni hincha xahasen rë yahnga me ne, hacuaha cavetjuxin.

¹³ Peru ngujo cha tjë rë Israel xi tsuyyihya vaxëxin cha xitsehni hincha xahasen rë xuta ne, hacuaha camameje cueyanangui cha ñihi rë Nai naja Jesús hora xi tivaxëxin cha xitsehni, hane cuitjin cachja cha:

—Tséhë xi Jesús casuaxa ná me, me xi chja Pablo tséhë ne, tivitéxa nuju xi cuetjunkun.
—Cuatjin cachja cha.

¹⁴ Cha xi cuatjin sahmi vë ne, hacui yatu cha quihndi rë ngu nahmi xi hmí rë Sceva, ngu nahmi xi matitjun tséhë xuta tjë rë Israel.

¹⁵ Hane ngu ndiya xi cuatjin cachja cha ne, cuitjin cafayangui xitsehen jan:

—Jesús ne, hvë me vëhë. Hacuaha hvë Pablo. Peru ngayun ne, ¿yo ngayun? —Cuatjin cafayangui xitsehen jan.

¹⁶ Hya xi camá ne, me xi hincha xitsehen xahsen rë jan ne, cacaataha me cha, hane cacaal rë me catsinguijne me yëjë yatu cha, tséhë xi jemu hñu ngahñu rë me. Cuatjin camá xi jemu casacuhmu rë cha xi cuacun jan, hane cavanga cha tu quixti ni tséhë ndihya hiscan siu cha jan. ¹⁷ Xcusun xi camá vë ne, camachaya rë yëjë xuta nandya Efeso, sa xuta tjë rë Israel ne, o sa xutaxín. Hane ngayëjë ni me ne, jemu catsacjun me camá, hane camá jyë camá hnga Nai naja Jesús.

¹⁸ Hane jemu cjín xuta xi ha cavisehen me ladu rë Jesús ne, fitjengui me Pablo vijacun me tséhë cjuasurqui xi sahmi me. ¹⁹ Hya xi camá ne, jemu cjín xuta xi sahmi cjuasurqui ne, quijicojo me xujun rë me jan, cavaca me ngajan xcun yëjë ni xuta. Hane xi casahmi me cuenta chji rë yëjë xujun rë me jan ne, jemu jyë camahani tujún cavitju chji rë. ²⁰ Cuatjin camá xi cjua rë Nai naja ne, jercu cavitsojo sa hacuaha casacuhñu sa rë.

Suë jyë xi camá ngajan Efeso

²¹ Hane xi cavatju camá yëjë xcusun vëhë ne, cavejñacacun Pablo xi cjue me Jerusalén, cuatju me yëjë nandya tséhë distritu Macedonia cojo yëjë nandya tséhë distritu Acaya. Hacuaha cachja me cuitjin:

—Xi cuatju cjué Jerusalén ne, hacuaha tjin ná xi cjué hisca nandya Roma. —Cuatjin cachja me.

²² Ngajan xi catsingatju me jo xuta xi visecoo rë me jan, Timoteo cojo Erasto, ngajan distritu Macedonia. Peru me vëhë ne, casetaha sa me ngajan distritu Asia.

²³ Ngu nixtin xi quitahá me jan ne, cavechú ngu cjuandya jyë tséhë ndiya rë Jesús.

²⁴ Ngu xihin xi hmí rë Demetrio ne, sahmi me yungun langa cojo suvá quicha tyava, xcusun rë yungun rë nina Diana. Hane xuta xi sahmi xa rë Demetrio ne, jemu casacu rë me tujún tséhë xa vëhë. ²⁵ Ngajan xi Demetrio ne, casahmi tangun me yëjë xuta xi sahmi xa rë me cojo jingu sa xuta xi sahmi me xa vëhë ni ne, sehe cachja me cuitjin:

—Ngayujun ni ne, ha hyun ta tséhë xa vihi ne, sacu naja yëjë tujún xi tjin naja.

²⁶ Ngayun ne, chutsujun hacuaha machaya nuju cjua xi hacuiin suvá ni nguehe ta cojo jingujiyë ni distritu Asia ne, tsujiyihya cha Pablo vë, sahmi cha xi vijnecacun xuta cjín hacuaha tsismicacun me nina naja ta, tséhë xi chja cha xi nina xi nindajan cojo ntsan ne, hacuiin nina Jain me. ²⁷ Jemu tsavi ta hacuiin suvá ni xa naja chajá ta cojo yungun rë nina naja Diana ne, cuechú hora xi cuenguiin chji rë, hacuaha hisca suvá nina naja ne, chajá me xi jyë hnga me cojo cjuatacun rë me ta me vëhë ne, yëjë ni xuta tséhë jingujiyë ni distritu Asia cojo xuta tséhë jingujiyë ni ngasunhndë ne, jemu faharcun rë me. —Cuatjin cachja me.

²⁸ Xi cahndë xuta cjua jan ne, jemu camacjan camahani rë me, sehe cajindaya me cachja me cuitjin:

—Jemu jyë hnga nina Diana naja. —Cuatjin cajindaya me cachja me.

²⁹ Jinguyjë ni ngajñi nandya ne, jemu jyë suë cavejña. Ngajan xi xuta jan ne, vanga me cjui cuma tangun me ngajan ndatsen ndihyavasen, taha tijuvéhya me Gayo cojo Aristarco, jo me tséhë distritu Macedonia, me xi visecoo rë Pablo. ³⁰ Ngajan xi Pablo ne, meje cuisehenjñi me ngajñi rë xuta cjín jan, peru xuta ladu rë Jesús ne, casuaain me cahndé. ³¹ Hacuaha ngujo xutaxa rë xi vinga rë Pablo ne, catsingatju me cjua tséhë Pablo xi cjuiin me ngajan ndatsen ndihyavasen. ³² Ngujo xutacjín jan ne, jindaya me chja me cuitjin, ngujo nga me ne, jindaya me chja me cuatjin ta, tséhë xi yëjë ni xuta ne, jemu camasuë rë cjuatacun rë me. Jercu cjín me xi hisca hvíin me mé má cuatjin

quiji camatangun me jan. ³³ Peru ngujo xutacjín jan ne, casuacuenda me Alejandru mé tséhë xi cuatjin tijima, hya xi catsivaha xuta tjé rë Israel me xi secun me xcun. Ngajan xi Alejandru ne, casahmi tsja me cojo xutacjín jan xi sejyu me cojo sa xi cuma cuichja Alejandru ngatsé rë xuta tjé rë Israel. ³⁴ Peru xi cavëë xutacjín jan xi Alejandru ne, xuta tjé rë Israel má me ne, ngu tangun ni cajindaya me, vatju sa jo hora cachja me cuitjin:

—Jemu jyë hnga nina Diana naja! —Cuatjin cajindaya me cachja me.

³⁵ Hya xi camá ne, xi camá catsinguejyu secretariu xutacjín jan ne, sehe cachja me cuitjin:

—Ngayujun ngarcun ni ngayun xuta nandya matsejen ne, ha hyun ta tsajin hisca ngu xuta xi hviín me xi nguehe Efeso tacun yungun rë nina Diana hacuaha nguehe tacun suvá nina xi cjanengui nguehe xi canduva ngahnga. ³⁶ Tséhë xi tsajin yo xi cuma cuichja xi hacuin cuatjin ne, vëhë xi meje rë xi catisejyu ni ngayun, tsajin mé xi nihñu sa xi cjëe ningatuhuntacúnndujun. ³⁷ Cha xi cuicun canduvuncujun nguehe ne, tsajin mé xi choho casahmi cha cojo yungun naja, hacuaha tsajin mé xi choho chja cha tséhë nina naja. ³⁸ Peru sa xi Demetrio cojo xuta xi sahmi xa rë me tjin yo xi sahmi si me cojo ne, tacun ndihyavasen, hacuaha tjin xutaxa rë. Ngajan catinchajyé xicjin me, jima ngu me. ³⁹ Hane sa xi tjin sa mé xi meje nuju ne, nixtin xi satë rë junta xi sehe cuma ne, hya cuma chihin. ⁴⁰ Sacuaha xcusun xi tijima vi ne, cuma tsingatahacacun me xi matitjun xi ngayaan ne, tinihñña ngu si jyë condra tséhë gubiernu. Ta sa xi cjuinenguise naja me mé má cuatjin canihñña ne, sacuiin naja chuva rë hacutjin cuinújan mé má cuitjin tinihñña ngu suë jyë vi.

⁴¹ Cuatjin cachja secretariu, sehe catsinguijnetaha me cjua cojo xutacjín ne, sehe cafe xingu xingu me.

20

Quiji Pablo distritu Macedonia cojo distritu Acaya

¹ Hya xi camá ne, xi cavatju suë jyë jan ne, cajindaya Pablo xuta ladu rë Jesús, casua rë me cjuetacun. Sehe catsinguijnetaha me cjua, sehe cavetju quiji me distritu Macedonia.

² Hane jima ngu nandya xi cavatju me xi cafehe me Macedonia ne, hacuaha jercu cachja me cojo xuta ladu rë Jesús hacuaha casua rë me cjuetacun. Hane xi cavatju me yëjë nandya vëhë ne, cafehe me distritu Acaya. ³ Hane ngajan casetaha me jyan sá. Hane hya xi ha cjuaha me barcu xi cjue me distritu Siria ne, casacu camachaya rë me xi xuta tjé rë Israel ne, caviyuju me xi tsiquehen rë me. Vëhë xi catsingatahacacun me xi hitsë sa ndatjin cuya cjue ntsacu me xi táha ladu tséhë Macedonia. ⁴ Hane cojo me xi cuicun vihi quiji me cojo rë me: Sópater, ngu xuta Berea xi quihndi rë Pirro; cojo Aristarco cojo Segundo, jo xuta Tesalónica; cojo Gayo, ngu xuta Derbe; cojo Timoteo; cojo Tíquico cojo Trófimo, jo xuta tséhë distritu Asia. ⁵ Me xi cuacun vë ne, camatitjun me quiji me, hane ngajan caviyujuya niji me nandya Troas. ⁶ Peru ngayin ne, xi cavatju suhi tséhë pan xi tsajin san rë ne, sehe cachjihin barcu xi cavetjin tséhë Filipos, hane xi café hñú nixtin ne, sehe cavechintihin me ngajan Troas. Hane ngajan cavinechintihin yatu nixtin.

Quitahá Pablo ngajan nandya Troas

⁷ Ngajan xi nixtin ngu tséhë totje ne, camatangun ngayin xi xinitanguin niñu ngayijin ni. Hane Pablo ne, cachja me cojo xuta. Hane tséhë xi cuetju me cjue me xi cuma nchujun jan ne, quijinduju cachja me hisca cavechú vasen nixten. ⁸ Jemu cjín ndihi seti ngajan ndihya ngahnga hiscan camatangun ngayin. ⁹ Hane ngu cha xi hmí rë Eútico ne, tacun cha xcun ventana. Hane xi quijinduju sa cachja Pablo ne, jemu camanijñá rë cha. Hane tséhë xi cacaain rë cha nijñá ne, cafañafé tjain camahani cha, hane cjanengui cha hisca xi má jyan pisu ndihya jan. Hane xi quiji catjunihnga rë cha ne, ha cahme cha. ¹⁰ Hane xi quijijne Pablo hiscan jiña nima ne, catsiquindi me yojo rë me sehe catsuvacija me nima. Hacuaha cachja me cuitjin:

—Xicamacjiin tacún ta, quicun cha vi. —Cuatjin cachja Pablo.

¹¹ Ngajan xi Pablo ne, cavuya quijiniji me, sehe cajinë me niñu. Sehe cavisiajmi camaha sa me hisca xi casahasen, sehe cavetju me quiji me. ¹² Hacuaha quicun cha xi cjanengui jan, cafecojo xuta cha. Hane jercu casacu rë me cjuetacun xi quicun cha.

Quiji Pablo nandya Mileto

¹³ Ngayin ne, camatitjun ngayin catsanguin cavisihin barcu, hane sehe catsanguin nandya Aso, cojo sa xi chjihinntsins Pablo cahntsua barcu ngajan ta, tséhë xi ha cuatjin camachihin cjua ta, tséhë xi me vëhë ne, meje cjue ntsacu me. ¹⁴ Hane xi casacu xinguin cojo rë me ngajan Aso ne, cavisehen me barcu, sehe catsanguin tangun Mitilene. ¹⁵ Hane xi cavetjin ngajan ne, xi camá nchujun ne, cavatjin quixi rë Quío. Hane xi camá nchujun nga ne, cafihi Samos. Hane camá nchujun nga ne, cafihi nandya Mileto, ¹⁶ tséhë xi Pablo ne, cavejñamacun me xi cuájtincin tséhë nandya Efeso, cojo sa xi hacuiin cuma tafi me ngajan distritu Asia, tséhë xi me vëhë ne, jemu meje xati rë me cojo sa xi xati cuechú me ngajan Jerusalén, hane ngajan tsingatju me suhi Pentecostés.

Catsinguijnetaha Pablo cjua cojo xuta changá rë yungun Efeso

¹⁷ Hane jinguyéjë rë xi quitahá Pablo ngajan Mileto ne, catsingatju me quiji chjahá rë xuta changá rë yungun ngajan Efeso. ¹⁸ Hane xi cafehe xuta changá jan xcun Pablo ne, cuitjin cachja Pablo cojo rë me:

—Ngayun ne, ha hyunndujun hacutjin cavitejñataha cojo nuju yëjë ni nixtin hisca hya xi sehe tu caföhë nguehe distritu Asia. ¹⁹ Ha hyun hacutjin casahme xa rë Nai naja: catsinguíne yojo naña, hisca cajlhnda, hacuaha jemu cjín cjuañihi cavátju camáta, tséhë xi xuta tjé rë Israel ne, jemu choho meje sahmi me cojo ná. ²⁰ Ngayun ne, ha hyun hacutjin xi cachjá yëjë cojo nuju yëjë cjua xi ndaja xi cuma nuju. Hacuaha ha hyun hacutjin casuá camachaya nuju cjuachacun hya xi camatangun ngayujun ni, hacuaha cëjë ndya nuju jima ngu ngayun, cachjá cojo nuju. ²¹ Cachjá cojo xuta tjé rë Israel hacuaha cachjá cojo xutaxín xi meje rë xi tsindeya me cjuatacun rë me hacuaha cuisehen me ladu rë Nina hacuaha meje rë xi cumangucacun me cojo Nai naja Jesús. ²² Quihndë ne, ngahan ne, tifé Jerusalén sacuatjin cavitexa ná Hasen rë Nina. Hveen mé xi cuájtju cuma jan. ²³ Peru Hasen rë Nina ne, yëjë ni nandya xi vátju ne, chja cojo ná xi hatuxa cjué ndavaya hacuaha jemu cuájtju cjuañihi. ²⁴ Xi má ná ne, tangun ni xi tejña cjuahñu o sa xi cueya. Xi meje ná ne, xi tsinguíjnetaha xa xi casua ná Nai naja Jesús, xa xi suá cumachaya rë xuta cjuandajyihí xi chja tséhë cjuandaja rë Nina.

²⁵ 'Quihndë ne, ha hvë ta ha quihndë cuyuun chun ná, ngayujun ni xi casuá camachaya nuju tséhë gubiernu xi sahmi Nina. ²⁶ Vëhë xi nguehe cuichjá cojo nuju ta, sa xi tjin ngu ngayun xi cuechuun xcun Nina ne, hacuiin ngahan quítjen jyé ta, ²⁷ tséhë xi ngahan ne, casuácuenda chichihin nuju yëjë hacutjin xi cavejña Nina cjuatacun rë me. ²⁸ Nechun cuidadu, hacuaha nihñucidadun yëjë xuta ladu rë Jesús, xi suvá Hasen rë Nina casuaxa nuju xi cuma titjun ngayun tséhë sacuaha obispos, cojo sa xi ngayun nihñu cuidadu xuta rë yungun rë Nina. Me xi cuacun vë ne, casacu rë Nina me cojo jni rë Quihndi rë suvá me hya xi cahme me. ²⁹ Hya xi ha cavatju cavétjuxen tsujun ne, ngahan hvë ta cuinduva xuta, xi meje tsinguetsun me cjuatacun rë yëjë xuta ladu rë Jesús, sacuatjin tsiquehen chu lobo cjan rë chu tsánga. ³⁰ Hacuaha ngajñi nuju suvun ne, cuetujñi xuta xi cuichjá me cjuandacha, cojo sa xi cuaxëxin me xuta ladu rë Jesús xi cuma ladu rë me. ³¹ Nechun cuidadu. Hacuaha ninguitsjun ta, cahntsua jyan nu ne, nguixun nguitajñu cavicuyá nuju jima ngu ngayun. Jiya hora ne, hisca cajlhnda.

³² 'Quihndë ne, nguehe cuiyujú nuju tsja Nai naja, cojo sa xi sahmi nuju me cuidadu cojo cjuandaja rë me. Me vëhë xi ma sahmi me xi cuma yehe sa cjuatacun nuju, hacuaha sua tangun nuju me cjuahñu xatsë cojo yëjë sa xuta xi cavaxijin me. ³³ Ngahan ne, hacuiin catsihmucacun tujún o sa tsjian rë jingu sa xuta. ³⁴ Ngayun ne, hyun ta ngahan ne, casahmexa cojo ntsa vi xi casacu cjuachaja naña cojo me xi cavisecoo ná. ³⁵ Ngajñi rë yëjë ni xcusun xi casahme ne, ngahan ne, catsingácun nuju xi, xi cuatjin hñu nihña xa ne, meje rë xi cuisecoo rë xuta xi jemu tjin rë cjuachaja. Hacuaha meje rë xi ninguitsjen

cjua rë Nai naja Jesús, hya xi cachja me cuitjin: “Hitsë sa sua má naja xi tahan, xi cuma rë xi chjahanntsan.” Cuatjin cachja Nai naja.

³⁶ Hane xi café cachja Pablo cuatjin ne, sehe cavixcuhnchi me, casahmi me oración cojo yéjé xuta jan. ³⁷ Yéjé ni me jemu cajihnda me, quiji me catsuvacija me Pablo, hisca cavitatsuha me. ³⁸ Cjua xi hitsë sa casua rë me cjuachoho ne, cjua xi cachja Pablo xi ha quihndë cuyaain scuëe xuta jan me. Sehe quiji me cojo Pablo hiscan cavisehen Pablo barcu.

21

Quiji Pablo ngajan Jerusalén

¹ Hya xi camá ne, xi cavejñi xuta jan ne, sehe ngu quixi ni quiji barcu cojo niji ne, cafihin Cos. Hane xi camá nchujun jan ne, cafihin Rodas. Hane xi cavetjin ngajan ne, cafihin Pátara. ² Hane xi casacu niji ngu barcu xi cjue distritu Fenicia ne, cavisihin sehe catsanguin. ³ Hane xi cachutsijin Chipre ne, cavatjin taha ladu quixi tséhë jan, catsanguin nduju xi cafihin quixi rë distritu Siria, sehe cafihin nandya Tiro ta, tséhë xi ngajan cuitujne chaha xi hincha cahntsua barcu. ⁴ Hane xi casacu xinguin cojo xuta ladu rë Jesús jan ne, cavinechintihin ngajan yatu nixtin. Hane ngujo profeta xi siu ngajan Tiro ne, tjin mé cachja Hasen rë Nina cojo rë me, sehe cachja profeta jan cojo Pablo xi cjuiin me Jerusalén. ⁵ Xi cavechú nixtin xi cuetjin jan ne, sehe cavetjin catsanguin. Hane yéjé xuta jan, cojo chjuun rë me cojo quihndi rë me ne, quiji cani niji me hisca tjehen ndachacun, hiscan fë nandya. Sehe ngajan cavixcuhnchin, sehe canihñi oración. ⁶ Hane xi caninguijnitihin cjua cojo rë me ne, sehe cavisihin barcu, hane me vëhë ne, cavuya cafe me ndava me xingu xingu me.

⁷ Hane ngayin ne, catsanguin cojo barcu xi cavétjin tséhë Tiro, hane cafihin Tolemaida. Hane xi catsanguin catihin rë xuta ladu rë Jesús nina ne, ngajan cavinechin cojo rë me ngu nixtin. ⁸ Hane xi camá nchujun jan ne, cavetjin catsanguin, hane cafihin Cesarea. Sehe catsanguin ndava Felipe, me xi sua machaya rë xuta cjuandajyihí xi chja tséhë Jesús. Me vëhë ne, ngu me tséhë me xi ma yatu xi cavaxiji me xi visecoo rë apóstol. Hane ngajan cavinechin cojo rë me. ⁹ Me vëhë ne, tjin rë me ñuju na nixti quihndi rë me, xi má na profeta. ¹⁰ Hane jinguyéjë rë xi nechintihin ngajan ngujo nixtin ne, cafehe ngu profeta xi canduva tséhë Judea, ngu me xi hmí rë Agabo. ¹¹ Hane xi cafehetjengui niji me ne, quiji me cafaha me cinturón rë Pablo, sehe catsihñu me tsja me cojo ntsacu me cinturón jan, sehe cachja me cuitjin:

—Cuitjin chja Hasen rë Nina: “Xihin xi tséhë cinturón vi ne, cuitjin tsihñu xuta tjë rë Israel me ngajan Jerusalén, hacuaha sahmi me entregadu xihin vëhë tsja xutaxín.”

—Cuatjin cachja profeta jan cjua rë Nina.

¹² Xi canuhycin cjua vëhë ne, ngayin cojo xuta xi siu jan ne, canújin cojo Pablo xi cjuiin me Jerusalén. ¹³ Ngajan xi Pablo ne, cuitjin cafayangui me:

—¿Mé má cuatjin chjihndun? ¿Mé má cuatjin nihñuchuvun cjuatacun naha? Ngahan ne, ha tjin chjine ngahan, hacuiin suvá ni xi cjué ndavaya ta hacuaha hisca cueya ngajan Jerusalén ngatsë rë xi ladu rë Nai naja Jesús ngahan. —Cuatjin cafayangui Pablo tsijin.

¹⁴ Hane xi catsingatiin me cjua xi canújin ne, ha quihndë canujiin sa cjua vëhë ta cuitjin canújin:

—Catama sacuatjin Nai naja meje rë me. —Cuatjin canújin.

¹⁵ Xi cavatju nixtin xi cuacun vë ne, sehe cavihinchjini tsijin, sehe catsanguin Jerusalén. ¹⁶ Hacuaha cojo ngujo xuta ladu rë Jesús ngajan Cesarea quiji me cojo niji. Me xi cuacun vë quijicojo niji me hiscan xi cuinechin, ndava ngu xuta Chipre xi siutaha me Jerusalén, xi hmí rë Mnasón. Me vëhë ne, ha jemu hatsëe camahani xi xuta ladu rë Jesús má me.

Quiji Pablo xi cuisajmi me cojo Jacobo

¹⁷ Xi cafihin ngajan Jerusalén ne, xuta ladu rē Jesús jan ne, cafahatsja niji me cojo yéjé ni cjuasua. ¹⁸ Hane xi camá nchujun jan ne, Pablo ne, quiyi me cojo niji xi cuisiajmi me cojo Jacobo. Hacuaha ha tjin tangun yéjé xuta changá rē yungun jan. ¹⁹ Hane xi cavatju cachja Pablo nina cojo rē me ne, sehe casuacuenda chichihin me yéjé ni xcusun xi casahmi Nina ngajni rē xa rē Nina xi casahmi Pablo ngajni rē xutaxín. ²⁰ Hane xi cavatju cahndé xuta jan cjua xi cachja Pablo ne, casahmi jyé casahmi hnga me Nina, sehe cachja me cojo Pablo cuitjin:

—Ngayun ne, ha hyun xi ngajni rē xuta tjé rē Israel ne, chuva mil xuta tjin me xi cavisehen me ndiya rē Jesús. Hacuaha yéjé ni me ne, jemu ndaja faharcun me ley rē Moisés. ²¹ Hacuaha xuta xi cuacun vē ne, casacu camachaya rē me xi ngayun ne, nújun cojo yéjé xuta tjé rē Israel xi siu ngajan nangui rē xutaxín xi meje rē xi tsismicacun me ley rē Moisés, hacuaha mijí rē xi cuaté me chuxin rē quihndinda xi xihin, ha quihndé mijí rē xi cjuetjengui sa me xcusun changá naja. ²² ¿Mé xi cuma ni? Hatuxa jyihi ni ne, sacú cumachaya rē me xi cafuhun. ²³ Véhë xi quihndé ne, nihñu tutjin xi cuinújin cojo nuju. Nguehe ngajni niji ne, siu ñuju xihin xi casahmichihin me ngu cjua cojo Nina. ²⁴ Chjuhun cha vihi ne, tangun cojo cha yungun xi matitjun, cojo sa xi ngajan cuma tyjahi cha tangun cojo ngayun tséhë xcusun xi tsavi xi cojo Nina sacuatjin xi ha xcusun naja. Hacuaha techjun tséhë cha, cojo sa xi cuma sejnu rē rcu cha. Hane xi cuatjin nihñu ne, yéjé ni xuta ne, cumachaya rē me xi yéjé cjua xi camachaya rē me tsujun ne, quixiin ta ngayun ne, hacuaha ha tuxa nihñuchuhun sacuatjin chja ley rē Moisés. ²⁵ Hane sacuaha xutaxín xi cojo cavisehen ladu rē Jesús ne, ha caningatjin ngu xujun tséhë me, hane xujun vëhë ne, chja xi meje rē xi sinii me xichinë xi cavyuju xcun ninandyojo, sinii me jni, sinii me yojo rē chu xi caxinchahndu rē xi cahme, sahmii me cjuatsehen xi sahmi xuta cojo ngu xi hacuun chjuun rē hacuun xihin rē. —Cuatjin cachja xuta changá jan cojo Pablo.

²⁶ Hane xi camá nchujun jan ne, sehe quijicojo Pablo cha xi cuacun jan, sehe catsityahi tangun me yojo rē me cojo cha, sacuatjin xi ha xcusun rē xuta tjé rē Israel. Sehe ngajan xi Pablo cojo cha xi cuacun jan ne, cavisehen me yungun xi matitjun, xi cuichja me há cjín sa nixtin xi cuijnetaha xi cuma tyjahi camahani me, hane hacuaha cjue cjuatjo xcun Nina ngatsé rē jima ngu me.

Cafaha sindadu Pablo ngajan yungun xi matitjun

²⁷ Hya xi camá ne, xi ha meje cuechú xi cuma yatu nixtin jan ne, xuta tjé rē Israel xi canduva tséhë distritu Asia jan ne, cavëe me Pablo ngajan cahntsua yungun xi matitjun tséhë xi nchunchujun ni quiyi me yungun tséhë nixtin jan. Catsisuë me cjuatcun rē xutacjín jan, sehe quiyi cafaha me Pablo, ²⁸ hisca cajindaya me cachja me cuitjin:

—¡Ngayujun ni ngayun xuta tjé rē Israel, nduvun tisecuun niji! ¡Cha vihi xi tsuyiyihiya chja cha condra naja ngayaan xuta rē Nina, cojo condra rē ley xi vitexa naja, cojo condra tséhë cahndé vihi! Cuatjin tsuyiyihiya chja cha cojo yéjé xuta jinguyjé ni. Hacuaha catsinguetsun cha cahndé rē Nina vi, tséhë xi canduvacojo cha xutaxín nguehe cahntsua yungun xi matitjun vi.

Cuatjin cajindaya me cachja me ta, ²⁹ tséhë xi titjun ne, ha cavëe me Pablo cojo ngu xutaxín xi hmí rē Trófimo ngajan ngajni nandya, hane xi má rē me ne, quijicojo Pablo me cahntsua yungun.

³⁰ Hane yéjé xuta nandya ne, camasuë rē cjuatcun rē me. Hane vanga me quiyi camatangun me yungun xi matitjun hiscan secun Pablo, sehe cafaha me cajavéjne me, cavaxë me tséhë yungun jan. Sehe ngutjen ni casechja yéjé tingotjo jan. ³¹ Hane jinguyjé rē xi tisahmi xutacjín jan cjuandya xi tsiquehen me Pablo ne, quiyi cjua rē capitán tséhë sindadu xi yéjé xuta Jerusalén ne, tjemu jyé suë tisahmi me. ³² Ngajan xi capitán jan ne, ngutjen ni quijijne me cojo sindadu rē me hiscan xi hinchataha xutacjín jan. Hane xi cavëe xutacjín jan sindadu cojo capitán rē cha ne, sehe casejyu me xi tivaja rē me Pablo. ³³ Hane xi quiyi tiña capitán jan ne, sehe cafaha me Pablo. Sehe cavitexa me

xi cumahñu Pablo cojo jo cadena. Hya xi camá ne, sehe cavinenguise capitán jan cojo xuta jan yo xuta Pablo jan, hacuaha mé casahmi me. ³⁴ Hane ngujo xuta jan ne, hisca jindaya me chja me cuitjin, ngujo nga me ne, hisca jindaya me chja me cuatjin. Peru tséhë xi casacuiin rë capitán jan cjuaquixi ngatsë rë suë jyë xi tijima jan ne, cavitexa me xi cjuecojo sindadu Pablo ngajan hiscan hincha sindadu. ³⁵ Hane xi cafehe sindadu cojo Pablo hiscan ndë rë ne, hisca cavahahnga cha Pablo ngatsë rë cjuahtngatacun xi sahmi xutacjín jan ta, ³⁶ tséhë xi tjengui me cjui me jindaya me chja me cuitjin:

—¡Nicuhun cha! —Cuatjin chja me.

Sua Pablo cjuaquixi rë me xcun xutacjín

³⁷ Hya xi ha tsinguisehen sindadu jan Pablo cahntsua ndihya ne, cachja Pablo cuitjin cojo capitán:

—¿Há tuun cahndé cuichjá cojo nuju ngujo cjua? —Cuatjin cachja Pablo.

Ngajan xi capitán jan ne, cuitjin cachja me:

—¡Han, peru ma noje griego! ³⁸ Hane ngajan xi hacuahn ngaye cha Egipto xi sehe tiña nixtin cavunihnga ngu si jyë hacuaha quijicojo rë ñuju mil cha tsiquehen ngajan ngu xín tséhë nandya jan ni. —Cuatjin cachja capitán jan.

³⁹ Ngajan xi Pablo ne, cuitjin cachja me:

—Ngahan ne, ngu cha tjé rë xuta Israel ngahan. Nangui naha ne, ngu nandya xi hacuaha jemu vengui chji rë xi hmí rë Tarso, tséhë distritu Cilicia. Nihñu favor ne, tuhun cahndé cuichjá cojo xuta xi cuicun vi. —Cuatjin cachja Pablo.

⁴⁰ Hane xi casua capitán jan cahndé xi cuichja Pablo ne, hora xi secun Pablo hiscan ndë jan ne, casahmitsja me cojo xuta xi sejyu me hitsë. Hane hora xi café xuta cavyujuju yuu me ne, ngajan xi Pablo ne, cachja me cojo xuta jan hne hebreo, cuitjin cachja me:

22

¹ —Ngayujun ngarcun ni xi hacuaha xingueen nuju ne, nihñu favor ne, tisiñuju hacutjin suá cjuaquixi naha quihndé xcun ngayujun ni. —Cuatjin cavetsihin cachja me.

² Hane xi cahndé xutacjín jan xi hne hebreo cachja Pablo cojo rë me ne, hitsë sa jercu cavyujuju yuu me. Sehe cachja sa Pablo cuitjin:

³ —Ngahan ne, ngu cha tjé rë Israel ngahan. Hacuaha catsin ngahan ngajan nandya Tarso tséhë distritu Cilicia. Peru xi camacha ne, nguehe Jerusalén. Hane maestru Gamaliel caviguya ná me sacuatjin camahani chja ley rë xutachanga naja. Hatuxa jemu ndaja fahárcun Nina, sacuatjin tiniñu ngayujun ni quihndé. ⁴ Ngahan ne, cojo cjuahtngatacun ne, catsużyöhëya tjéngüe xuta xi tjengui ndiya xatsë vihi. Hisca cavitexa xi cueya me. Cafahá me céjecojo me ndavaya, sa chjuun sa xihin me. ⁵ Hisca nahmi xi matitjun cojo yéjë xuta changá rë yungun ne, cuma sua me cjuaquixi rë me tséhë cjua vihi ta, tséhë xi hacuaha me xi cuacun vëhë casua ná me xujun xi suá rë xuta naja ngajan Damasco. Vëhë xi céjë ngajan xi cjuahtngatacun ne, cojo sa xi cuma me castigu.

Cachja Pablo hacutjin camá xi cavisehen me ladu rë Jesús

⁶ Hya xi camá ne, hora xi ha tijima tiña ngayin xi tivanguin Damasco, sacuaha chuva rë nchisen ne, ha tu ñahñu canduva ngu ndihi jyë tséhë ngahnga casahmi hasen rë hiscan tifé. ⁷ Na catícja, hane cahndé ngu cjua xi cachja cojo ná cuitjin: “Saulo, Saulo, ¿mé má cuatjin nujyihye tjengui ná cojo cjuahtngatacun?” Cuatjin cachja cjua jan. ⁸ Ngajan xi ngahan ne, cuitjin cafayanguë: “¿Yo ngayun, Tatá?” Cuatjin cafayanguë. Sehe cachja nga cjua jan cojo ná cuitjin: “Ngahan xi Jesús tséhë nandya Nasaret ngahan, xi tinuuyihye tjengui ná cojo cjuahtngatacun.” Cuatjin cachja nga cjua jan cojo ná. ⁹ Yéjë xuta xi cavisecoo ná xi tivanguin ne, cavëë me ndihi jyë jan, peru cahndiin me cjua xi cachja cojo ná jan. ¹⁰ Sehe ngajan xi ngahan ne, cachjá cuitjin: “¿Mé xi meje rë xi sahme, Tatá?” Cuatjin cachjá. Hane Nai naja ne, cuitjin cachja me cojo ná: “Tisatjinhngue ne, tisihin Damasco. Hane ngajan cumachaya ri yéjë xcusun xi meje rë Nina xi nihñi.” Cuatjin

cachja Nai naja cojo ná. ¹¹ Peru tséhë hasen jyé xi cavisehen túxcun jan ne, camatsijin ná. Ngajan xi xuta xi tivisecoo ná xi tivanguin ne, cavaha me ntsa, sehe camá caféhë Damasco.

¹² Hya xi camá ne, ngu xihin xi hmí rë Ananías, xi jemu faharcun rë Nina hacuaha sahmi yéjë sacuatjin chja ley xi vitexa naja ne, ndaja chja yéjë xuta tjé rë Israel xi siu jan tséhë. ¹³ Hane cafehetjengui ná me hiscan tejña, hane cachja me cojo ná cuitjin: “Ngayun Saulo, catamatsejen nga nuju ngundiya.” Cuatjin cachja me. Hane ha hora vëhë ni ne, camatsejen nga ná hane cahvë me. ¹⁴ Hya xi camá ne, sehe cachja me cojo ná cuitjin: “Nina rë xutachanga naja ne, cojo tjun sa ne, casuaxa nuju me xi cumachaya nuju mé xi meje rë me, hacuaha chun me xi hatuxa tyjahi cojo cjuatacun rë, hacuaha cuinuhyun cjua xi chja me cojo nuju. ¹⁵ Cuatjin camá ta, tséhë xi Nina meje rë me xi ngayun tuhun cumachaya rë yéjë xuta tséhë me, cojo tséhë xcusun xi cahyun cojo tséhë cjua xi canuhyun. ¹⁶ Quihndë ne, ¿mé nechunyun rë ni? Tángun ni catixtenda ngayun, chjindayun rë Jesús cahntsua xahasen nuju, cojo sa xi cjué jyé nuju.” Cuatjin cachja Ananías cojo ná.

Cachja Pablo hacutjin camá xi quiji cachja me cjua rë Nina cojo xutaxín

¹⁷ Hane xi cavatju vëhë ne, cavúya nga Jerusalén. Hane ngu ndiya hya xi tejñaya yungun xi matitjun tisahme oración naha ne, sacuaha xi camá ná xi cachja ngu chini cojo ná. ¹⁸ Cahvë Nina, hane cachja me cojo ná cuitjin: “Xati nihñi tacuin ne, tetjixin tséhë Jerusalén ta, tséhë xi xuta nguehe ne, cumacjaain rë me cjua xi noje tsahan.” Cuatjin cachja Nina. ¹⁹ Hane ngahan ne, cuitjin cachjá: “Ngayun Nina naha, xuta nguehe ne, vëë me xi ngahan ne, catsuyjéhëya yungun jinguyjé ni, cafahá xuta xi tjengui me ndiya nuju, cavajá rë me, hacuaha cavinchá me ndavaya. ²⁰ Hane hora xi titsiquehen xuta Esteban, me xi cachja cjua nuju ne, hacuaha cojo ngahan sécun jan, tichuya ná, hacuaha hisca ngahan tisahme cuidadu tsjian rë cha xi titsiquehen rë Esteban jan.” Cuatjin cachjá. ²¹ Sehe ngajan xi Nina ne, cuitjin cachja me cojo ná: “Tihin ta, ngahan tsingátju ri hisca nangui cjin, cuihin cuinoje cojo xutaxín cjua naha.” Chja Nina cojo ná. —Cuatjin cachja Pablo.

Cavitexa capitán xi sehen rë Pablo

²² Hisca ngajan ni cacaa rë xutacjín cavisiñuju me cjua xi cachja Pablo, sehe cavetsihin me cajindayataha me cachja me cuitjin:

—¡Nicuhun cha xi cuajyihí vë ta ha quihndë vechiin chuva rë xi cuejña sa cha cjuahñu!
—Cuatjin cajindaya me cachja me.

²³ Jinguyjéjë rë xi cuatjin jercu tijindayataha xuta, titsiniya me tsjian rë me, hacuaha titsicjin me nihndë scuan ne, ²⁴ capitán jan ne, cavitexa me xi cjue chani rë Pablo cahntsua hiscan hincha sindadu. Hacuaha cavitexa me xi chjahátaha rë Pablo táha sehen rë me, cojo sa xi sacú cjuaquixi mé má cuatjin jindayataha xuta Pablo. ²⁵ Hane hya xi ha camahñu me xi sehen rë me ne, sehe cachja me cuitjin cojo sindadu xi secun jan:

—¿Há chja ley xi cuma sehen rë ngu xuta Roma jinguyjéjë rë xi cjéé cuma cuenda jyé rë me? —Cuatjin cachja me.

²⁶ Hane xi cahndë sindadu cjua vëhë ne, quiji cachja me cojo capitán cuitjin:
—¿Há hyun mé xi nihñu ni? Cha vëhë ne, cha Roma cha. —Cuatjin cachja sindadu jan.

²⁷ Ngajan xi capitán jan ne, quijitjengui me Pablo, sehe cachja me cuitjin:
—Tinoje cojo ná ne, ¿há xuta Roma Jain ngaye? —Cuatjin cachja me.

Ngajan xi Pablo ne, cuitjin cafayangui me:
—Juun. —Cuatjin cafayangui me.

²⁸ Ngajan xi capitán jan ne, cuitjin cachja me:
—Ngahan ne, jemu jyé tujún cavechjé xi camá ngahan xuta Roma. —Cuatjin cachja me.

Ngajan xi Pablo ne, cuitjin cachja me:

—Peru ngahan ne, xuta Roma ngahan hisca xi catsin ngahan. —Cuatjin cachja me.

²⁹ Hya xi camá ne, sindadu xi cjuahataha rë Pablo jan ne, ngutjen quijixin cha tséhë Pablo. Hacuaha capitán jan ne, jemu catsacjun me camá xi cuatjin catsihñu me Pablo tséhë xi camachaya rë me xi Pablo ne, xuta Roma me.

Cavisehen Pablo xi cuma cuenda jyé rë me xcun me xi matitjun tséhë xuta tjé rë Israel

³⁰ Hane xi camá nchujun jan ne, tséhë xi meje cumachaya rë capitán jan cjuaquixi mé má cuatjin cavinchajyé xuta tjé rë Israel Pablo ne, cavitexa me quiji casehennday Pablo, hacuaha cavitexa me xi cumatangun yéjé nahmi xi matitjun cojo yéjé sa xuta xi matitjun. Hane xi cafehecojo sindadu Pablo jan ne, sehe quijicani capitán me xcun yéjé xuta xi matitjun jan.

23

¹ Ngajan xi Pablo ne, xi cavutsejenya me xcun yéjé xuta xi matitjun jan ne, sehe cachja me cuitjin:

—Ngayujun ni ne, nguehe cuichjá cojo nuju ta ngahan ne, hisca ntsacu cavetsihin hisca quihndé ne, hatuxa tyjahi cjuatacun naha xcun Nina. —Cuatjin cachja me.

² Hane Ananías, nahmi xi matitjun jan ne, cavitexa me xi xuta xi hinchacun hiscan secun Pablo xi cuajaya me hntsua Pablo. ³ Ngajan xi Pablo ne, cachja me cuitjin:

—¡Nina cuaja nuju me, ngayun xuta ndacha! ¡Nechun ndyá xi chjuhunchuvun ná cojo ley rë Moisés, sehe vitexun xi cuajaya xuta ntsuva, handasa chja ley xi ndajintjin xi cuatjin nihñu! —Cuatjin cachja me.

⁴ Hane xuta xi hinchacun hiscan secun Pablo jan ne, cuitjin cachja me:

—Haján, ¿há cuatjin choho noje cojo nahmi xi matitjun xi Nina casuaxa rë? —Cuatjin cachja me.

⁵ Sehe ngajan xi Pablo ne, cuitjin cafayangui me:

—Haan, peru ngahan ne, hveen xi me vëhë xi nahmi xi matitjun me ta, ngahan ne, ha hvë xi xcun xujun rë Nina ne, cuitjin camahindu: “Mijí rë xi choho cuinújun cojo me xi matitjun tsujun.” —Cuatjin cachja Pablo cjuá xi camahindu xcun xujun rë Nina.

⁶ Hane ha vëë Pablo xi ngujo xuta xi matitjun jan ne, xuta saduceo me, hane ngujo nga me ne, xuta fariseo me. Vëhë xi cachjahñu me xcun junta cuitjin:

—Ngayujun ni ne, nguehe cuichjá cojo nuju ta ngahan ne, xuta fariseo ngahan, hacuaha quihndi rë xuta fariseo. Ngatsé rë xi vetahácacun xi nima ne, cuya cjuahñu ne, vëhë xi tichjahachuva ná. —Cuatjin cachjahñu Pablo.

⁷ Hane xi cachja Pablo cuatjin ne, cavetsihin cacjan xuta fariseo cojo xuta saduceo, hane hacuiin tangun camá me cojo cjuatacun rë me. ⁸ Xuta fariseo ne, chja me ta nima ne, cuya cjuahñu, hacuaha chja sa me xi tjin ángel hacuaha tjin hasen naja. Peru xuta saduceo ne, chja me ta quixiin. ⁹ Hya xi camá ne, cavisatjenhnga ngu suë jyé. Ngajan xi cavetjujñi ngujo cha xi vicuya cjuachacun xi hacuaha fariseo cha ne, cachja cha cuitjin:

—Sacuiin niji hisca ngu jyé rë cha xi cuijyihí vi. ¿Há ngayaan hyan sa xi ngu ángel o sa xi ngu hasen cachja cojo rë cha? —Cuatjin cachja cha.

¹⁰ Hane hya xi suë xi tacun jan camajyé sa ne, jemu catsacjun capitán jan tséhë xi tsiquehen xuta Pablo. Hane vëhë xi cavitexa me sindadu xi cjuejne, cuaxëxín cha Pablo tséhë ngajñi rë xuta jan, cjuecojo cha me cahntsua hiscan hincha sindadu.

¹¹ Hane xi camá nguixun nchujun jan ne, quijitjengui Nai naja Pablo, cuitjin cachja me cojo rë me:

—Tejñi hñu xahesen riji ta, tséhë xi sacuatjin canoje ngatsé nahá nguehe Jerusalén ne, hacuaha cuatjin tjin ri xi cuinoje ngajan Roma. —Cuatjin cachja Nai naja.

Casahmichihin xuta cjuá xi tsiquehen me Pablo

¹² Hane xi camá nchujun nga jan ne, ngujo xuta tjé rë Israel jan ne, casahmitangun me cjuá xi hacuiin siné hacuiin cuihi me jinguyéjé rë xi cjéé tsiquehen me Pablo. ¹³ Quisun

sa xi yachan xuta xi cuatjin cavyujucacun me. ¹⁴ Hya xi camá ne, qui ji me xcun yéjé nahmi xi matitjun cojo xuta changá jan, hane cachja me cojo me cuitjin:

—Ngayin ne, canihñitanguín cjua xi xinii síín jinguyéjé rë xi cjéé niuihin cha Pablo. ¹⁵ Quihndé ne, ngayin cojo sa me xi yahnga xi matitjun ne, tuhun cumachaya rë capitán ne, cataxé me cha Pablo, catinduvacojo me cha xcun junta xi cuma, sacuaha xi meje sa nuju cjuaquixi tséhë jyé rë cha. Hane ngayin ne, ha tjin chjine ngayin xi niuihin cha chaja sa xi cjuehe cha xcun junta. —Cuatjin cachja xuta jan.

¹⁶ Peru cha quihndi rë na tichja Pablo ne, xi camachaya rë cha tséhë cjuandacha jan ne, qui ji cha hiscan hincha sindadu hane casuacuenda cha Pablo tséhë cjua xi camachaya rë cha. ¹⁷ Sehe ngajan xi Pablo ne, cajindaya me ngu cha xi matitjun tséhë sindadu, sehe cachja me cojo cha cuitjin:

—Tángun cojo cha vihi xingueen xcun capitán tséhë xi tjin cjua xi cuichja cha cojo rë me. —Cuatjin cachja Pablo.

¹⁸ Ngajan xi sindadu jan ne, quijicojo cha cha xicjin Pablo jan xcun capitán, sehe cachja cha cuitjin:

—Cha Pablo xi jiya ndavaya jan ne, cajindaya cha ngahan, sehe cachja cha cojo ná xi cuinduva cojo cha vihi nguehe ta, tséhë xi tjin xu cjua xi cuichja cha cojo nuju. —Cuatjin cachja cha sindadu jan.

¹⁹ Ngajan xi capitán jan ne, cafaha me tsja cha xicjin Pablo ne, sehe quijixin me cojo cha ngu ladu sehe ngajan cafinenguise me cha cuitjin:

—¿Mé cjua xi cuinoje cojo ná? —Cuatjin cafinenguise me.

²⁰ Hane cha xicjin Pablo jan ne, cuitjin cachja cha:

—Ngujo xuta tjé rë Israel ne, casahmitangun me cjua xi cuichja me cojo nuju xi cuanguncujun tsini na ha xcun me xi matitjun tséhë me, sacuaha xi tjin sa cjua xi meje cjuinenguise rë me. ²¹ Peru xicamacjaain nuju cjua rë me ta, vatju sa yachan xuta xi hinchaya rë me ngajan ndiya, xi casahmichihin me cjua xi sinii cuiin me jinguyéjé rë xi cjéé tsiquehen me tsini na ha. Ndicumaha ni ne, siuya me xi cuinújun xi ndatjin. —Cuatjin cachja cha xicjin Pablo.

²² Ngajan xi capitán jan ne, cuitjin cachja me cojo rë cha:

—Tjihin ne, tsajin yo xi cuinoje cojo xi catehe camachaya ná cjua vihi. —Cuatjin cachja me.

Quiji chani rë Pablo xcun Félix, me xi matitjun

²³ Hya xi camá ne, capitán jan ne, cajindaya me jo sindadu rë me, sehe cachja me cojo cha cuitjin:

—Tuhunchjinu jo cientu sindadu cojo jyanchan té cha xi miji naxin cojo jo cientu sa cha xi vaha lanza ne, cojo sa xi fane ñaja tséhë nguixun ne, cuetju cha, cjue cha hisca nandya Cesarea. ²⁴ Hacuaha tuhunchjinu ngujo naxin xi cuijin Pablo, xi cuangun chanu me xcun Félix, me xi matitjun. —Cuatjin cachja capitán.

²⁵ Sehe catsihindu me ngu xujun xi chja cuitjin:

²⁶ “Ngahan, Claudio Lisias ne, tsingátju ngu nina na ha tsujun, ngayun Félix, ngayun xi matitjun ngayun tsahan. ²⁷ Cha xi cuiyyihi vi ne, cafaha xuta Israel cha. Hitsé sa ne, catsiquehen me cha. Hane xi camachaya ná xi cha Roma cha ne, cejé cojo sindadu na ha, cavaxéjté cha. ²⁸ Hane tséhë xi meje cumachaya ná mé má cuatjin vinchajyé xuta cha ne, cejécojo cha xcun xutaxa rë yungun cojo xcun xuta changá rë xuta Israel. ²⁹ Hane ngahan ne, camachaya ná ta vinchajyé me cha, tséhë xi faharcuaain cha ley rë suvá me. Peru jyé xi vincha me tséhë cha ne, vechiin chuva rë xi cueya cha o sa cjue cha ndavaya.

³⁰ Hane xi camachaya ná xi casahmichihin xuta cjua xi tsiquehen me cha ne, ngutjen ni catsingátju cha xcun ngayun, hacuaha cavitéxa rë xuta xi vinchajyé rë cha cuinduva me ndyá cuichja me cojo nuju mé má cuatjin vinchajyé me cha.” Cuatjin chja xujun jan.

³¹ Hya xi camá ne, cafaha sindadu jan Pablo, quijicojo cha me nguixun hya nandya Antípatris, sacuatjin cjua xi cachja capitán cojo cha. ³² Hane xi camá nchujun jan ne,

cavuya sindadu xi fi ntsacu jan ngajan Jerusalén, hane cha xi hinchasun naxin jan ne, quiji sa cha cojo Pablo. ³³ Hane xi cafehe cha cojo rë me Cesarea ne, casahmi entregadu cha xujun xi yaha cha, hacuaha casahmi entregadu cha Pablo tsja me xi matitjun. ³⁴ Hya xi camá ne, xi cafë cavutaya me xujun jan ne, sehe cavinenguise me jani distritu rë Pablo. Hane xi camachaya rë me xi Pablo ne, distritu Cilicia distritu rë me ne, ³⁵ cuitjin cachja me:

—Hya xi cjuehe xuta xi vincha me jyé riji ne, hya cuíhndë cjua riji. —Cuatjin cachja me.

Sehe cavitexa me xi setjo Pablo ngajan ngu cahndé tséhë ndihya jyé xi casahmi Herodes, hiscan xi má ndava me xi matitjun.

24

Cavinchajyé xuta tjé rë Israel Pablo

¹ Hane xi cavatju hñú nixtin jan ne, cafehe nahmi xi matitjun xi hmí rë Ananías ngajan Cesarea, cojo ngujo xuta changá cojo ngu me xi cuichjatje ngatsë rë xuta xi cuacun vë, ngu me xi hmí rë Tértulo. Me xi cuacun vë ne, quiji cavinchajyé me Pablo xcun me xi matitjun. ² Hane xi cachjindaya rë Pablo ne, cavetsihin cavinchajyé Tértulo me, cuitjin cachja me:

—Ngatsë nuju ngayun ne, jemu tjin cjuandaja cjuajeya ngajñi niji. Hacuaha tséhë xi jemu ndaja chjuhuncuendun yëjë ni nandya niji ne, vëhë xi cjui xcun nandya. ³ Jemu tihín camahani nacuechji nuju, ngayun Félix, tséhë yëjë cjuandaja xi tinihñu vë. ⁴ Cojo sa xi ha quihndë suaan sa nuju cjuandaya ne, nihñu favor ne, nihñujyun tacún cojo niji ne, tisiñuju hitsë ngujo cjua xi cuinújin. ⁵ Cha xi cuijyঃ vi ne, jemu cjuaxti camahani cha. Jinguyjé ni ngasunhndë ne, titsujihiya tivunihnga cha si ngajñi niji ngayijin ni xuta tjé rë Israel. Hacuaha cha vihi ngu cha xi matitjun ngajñi rë xuta ladu rë cha Nasaret. ⁶ Hisca cahntsua yungun xi matitjun meje sahmi cha ngu xcusun xi ndajin tjin xi nihña, vëhë xi cachjihin cha. Ngayin ne, meje chjihinchuvn cha sacuatjin vitexa ley niji, ⁷ peru cafehe capitán Lisias ne, cafahatahá me cha, hacuaha cavitexa niji me xi ngayin xi vinchin jyé rë cha ne, cuinduvn hisca nguehe xcun ngayun. ⁸ Hora xi chjuhuntuhun rë cha ne, ngayun suvun ni sacú nuju cjuaquixi tséhë yëjë ni jyé xi vinchin tséhë cha. —Cuatjin cavinchajyé Tértulo.

⁹ Yëjë xuta tjé rë Israel xi cojo siu jan ne, hacuaha cachja me xi cuatjin Jain.

Casua Pablo cjuaquixi rë me xcun Félix

¹⁰ Hane hora xi casahmitsja me xi matitjun cojo Pablo xi cuichja me ne, Pablo ne, cuitjin cachja me:

—Ngayun ne, ha hvë xi jemu tsëe chjuhunchuvn xuta nación naha tséhë jyé rë me. Vëhë xi ngahan ne, cojo yëjë ni cjuasua ne, suá cjuaquixi naha cojo nuju. ¹¹ Sa xi chjinengunsun suvun ne, cuma sacú nuju cjuaquixi ta ngahan ne, sehe tjin rë tejó nixtin xi cëjë Jerusalén xi cjuahárcun Nina. ¹² Peru casacuintsjaain ná me xi tivisiajmecjen o sa tisuá suë rë cjuatacun rë xuta, sa cahntsua yungun xi matitjun, sa cahntsua tu jarë ni yungun langa, o sa jinguyjé ni ngajñi nandya. ¹³ Hacuaha hisca cumaji tsinguixi me xi cjuaquixi Jain tséhë jyé xi vincha me tsahan quihndë. ¹⁴ Peru ngu nga ne, nguehe cuichjá cojo nuju cjuaquixi ta ngahan ne, hatuxa fahárcun Jain Nina rë xutachanga naha, sacuatjin faharcun xuta xi hincha ndyá xi chja me xi cuicun vihi xi ngu ndiya ndacha. Hacuaha macjain ná yëjë ni cjuat tséhë ley rë Moisés cojo yëjë cjuat xi catsihindu profeta. ¹⁵ Hacuaha vétahacácun Nina sacuatjin vetahacacun me xi cuicun vi xi nima ne, cuya cjuahñu, sa tyjahi o sa xi hacuiin tyjahi cjuatacun rë. ¹⁶ Vëhë xi ngahan ne, yëjë ni hora ne, sahme nguyjé xi tyjahi cjuatacun naha xi cuma rë Nina cojo xi cuma rë xuta.

¹⁷ Hane xi ha jemu cavatju nixtin ne, cavúya canduvatjéngüe xuta naha, yahá tujún xi cuisécoo rë me hacuaha suá cjuatjo xi cjue xcun Nina. ¹⁸ Hane xi cuatjin canduva ne, me xi cuicun vi ne, cavëë ná me ngajan yungun xi matitjun, tyjahi ngahan sacuatjin xi

ha xcusun niji. Hacuaha hacuiin jemu cjín xuta siu me cojo ná hacuaha tsajin ngu sué jyé xi tijima. ¹⁹ Peru siu ngujo xuta tjé rë Israel xi canduva me tséhë distritu Asia. Me xi cuacun vë xi sa tjin mé jyé meje cuincha me tsahan ne, catinduva catincha me jyé nahua nguehe xcun ngayun. ²⁰ O sa tsajin ne, suvá me xi cuicun vi catichja me mé cjuatsehen nahua casacu rë me, hya xi cavisécun xcun xutaxa rë yungun niji. ²¹ Ngu tu tu ni cjua xi cajindáya cachjá hya xi sécun ngajñi rë me ne, cuitjin cachjá: “Ngatsé rë xi macjain ná xi nima ne, cuya cjuahñu ne, vëhë xi tichjahachuva ná quihndë xcun ngayun.” Cuatjin cachjá. —Cjua vëhë xi cachja Pablo xcun Félix, me xi matitjun.

²² Hya xi camá ne, tséhë xi ha vëe ndaja Félix cjua tséhë Ndiya Xatsé ne, xi cuejñavasen me cjuacjintacun vëhë ne, cuitjin cachja me:

—Hya xi cjuehe Capitán Lisias ne, sehe sahmechehen cjuacjintacun nuju vi. —Cuatjin cachja me. ²³ Hane sehe cavitexa me sindadu rë me xi cuetjo cha Pablo, peru sahmi cha cjuandaja ne, hacuiin cuitijaya rë cha xuta rë Pablo xi cjue cjuahacuenda rë me.

Cavisajmi Pablo cojo Félix cojo Drusila

²⁴ Hane xi cavatju ngujo nixtin ne, cavuya cafehe Félix, xi quiyi me ngu nangui. Cafehe me cojo Drusila, chjuun rë me, ngu chjuun xuta tjé rë Israel. Hya xi camá ne, catsingatju me quiyi chjahá rë Pablo, sehe cavisíñuju me cjua xi cachja Pablo tséhë hacutjin xi cumangutacuun cojo Jesucristu. ²⁵ Jinguyéjë rë xi tichja Pablo tséhë ngu cjuatacun tyjahi, tséhë ngu xahasen tyjahi, cojo tséhë nixtin xi tsichuva Nina xuta tséhë jyé rë me ne, Félix ne, catsacjun me camá, sehe cachja me cojo Pablo cuitjin:

—Quihndë ne, cuma cjuihin. Hane hya xi cumahya ná ne, sehe squindáya nga ri. —Cuatjin cachja me.

²⁶ Peru hacuaha tsingatahacacun me sa xi sua Pablo me tujún. Vëhë xi jemu cjín ndiya cajindaya me Pablo, cavisajmi me cojo.

²⁷ Xi cavatju jo nu ne, cavetju Félix tséhë xcun xa rë me, hane cavisehen nga ngu cahndé rë me, ngu me xi hmí rë Porcio Festo. Peru tséhë xi Félix ne, meje sahmi me cjuandaja cojo xuta tjé rë Israel ne, caseya cuaha Pablo ndavaya.

25

Cafehya Pablo xi cuma me consina tsja César

¹ Hya xi camá ne, cafehe Festo xi cjuahaxa me ngajan Cesarea. Hane xi cafë jyan nixtin ne, cavetju me quiyi me Jerusalén. ² Hane xi cafehe Festo ngajan Jerusalén ne, nahmi xi matitjun cojo me xi matitjun tséhë ngajñi rë xuta tjé rë Israel ne, casua me camachaya rë Festo tséhë jyé xi vincha me tséhë Pablo. ³ Hane cafehya me favor xi tsingatju Festo cjue chjahá rë Pablo xi cjue me ngajan Jerusalén. Cuatjin meje rë me xi cuma ta, tséhë xi ha cavisajmichihin me xi tsiquehen me Pablo ngajan ndiya. ⁴ Ngajan xi Festo ne, cachja me ta Pablo ne, tacunñihi me ngajan Cesarea, hacuaha suvá Festo ne, ha cjue xati me ngajan. ⁵ Hacuaha cachja sa me cuitjin:

—Catji xutaxa rë yungun nuju cojo ná, hane sa xi tjin mé jyé rë cha ne, ngajan catincha me jyé rë cha cojo ná. —Cuatjin cachja me.

⁶ Hya xi camá ne, cavejña sa Festo ngajan Jerusalén sacuaha jyin o sa té nixtin, sehe cafe me Cesarea. Hane camá nchujun tséhë nixtin xi cafehe me jan ne, quiyi me cavéjña me xcun xa rë me, sehe cavitexa me cjue chjahá rë Pablo. ⁷ Hane xi cafehe Pablo ne, quiyi caxinchacunnde xuta tjé rë Israel xi canduva tséhë Jerusalén jan tjehen rë me, hane jemu cjín xcusun jyé rë Pablo xi cavincha me, peru hisca camaji catsinguixi me xi cjuaquixi Jain. ⁸ Hane Pablo ne, xi casua me cjuaquixi rë me ne, cuitjin cachja me:

—Tsajin camahani mé jyé xi casahme, hacuiin condra rë ley niji ngayin xuta tjé rë Israel ne, hacuiin condra rë yungun xi matitjun tsijin ne, hacuiin condra rë César, me xi matitjun tsajan. —Cuatjin cachja Pablo.

⁹ Hane xi meje sahmi Festo cjuandaja cojo xuta tjé rë Israel ne, cuitjin cafinenguise me Pablo:

—¿Há meje cuihin Jerusalén, cojo sa xi ngajan tsichúva ri cojo jyé riji vi? —Cuatjin cafinenguise me.

¹⁰ Ngajan xi Pablo ne, cuitjin cafayangui me:

—Ha ndihyavasen rë César, me xi matitjun camahani, sécun, hane ha nguehe xi meje rë xi chjahachuva ná cojo jyé na. Xuta tjé rë Israel ne, tsajin camahani mé xi choho sahme cojo rë me. Ngayun ne, ha ndaja hyun. ¹¹ Sa xi tsejen ta casahme ngu xcusun xi vechú chuva rë xi cueya ne, tsingatehen xi cueya. Peru sa xi tsajin cjuaquixi tséhë hisca ngu jyé xi vincha me tsahan ne, tsajin yo xi cuma sahmi ná entregadu tsja xuta xi cuacun vë. Ngahan ne, féhya nuju xi nihñu ná consina tsja César, me xi matitjun camahani. —Cuatjin cafayangui me.

¹² Ngajan xi Festo ne, xi cavisiajmicjín me cojo yéjë me xi visecoo rë me ne, sehe cachja me cuitjin cojo Pablo:

—Cachjahye xi sahme ri consina tsja César ne, tsja César tsingátju ri. —Cuatjin cachja Festo.

Cavisehen Pablo xcun Agripa

¹³ Hane xi cavatju nguko nixtin jan ne, ngu me xi matitjun tséhë jingu sa distritu, me xi hmí Agripa ne, cafehe me Cesarea cojo Berenice na xicjin me, xi sua me ngu nina Festo. ¹⁴ Hane tséhë xi caviyuju me nguko nixtin jan ne, cachja Festo cojo rë me tséhë cjuaqcintacun xi tacun tsja me tséhë Pablo. Cuitjin cachja me:

—Nguehe ne, tacunñihi ngu cha xi cavejñavasen Félix cjuaqcintacun rë. ¹⁵ Hya xi cøjë Jerusalén ne, nahmi xi matitjun cojo xuta changá tséhë xuta tjé rë Israel ne, casua me camachaya ná tséhë cha vöhë, hacuaha cafehyá me xi cuichjá xi cuma cha castigu. ¹⁶ Peru ngahan ne, cachjá cojo rë me ta ngayin xuta Roma ne, tsajin niji xcusun xi nihñi castigu ngu xuta xi hincha jyé rë me jinguyéjë rë xi cjëe cuisehen me xcun cojo xcun cojo me xi vincha jyé rë me, hacuaha sacú rë me cahndé xi sua me cjuaquixi rë me tséhë jyé xi hincha tséhë me. ¹⁷ Hane hya xi cafehe yéjë xuta xi cuacun vë nguehe ne, catsichajan hora ta xi tu camá nchujun jan ne, cøjë ndihyavasen ne, catsingatju quiji chjahá rë cha.

¹⁸ Hane xi caxinchacun xuta xi cuacun jan cachja me ne, hisca ngu jyé jyé sacuatjin tsingátaha cákun ne, cavinchaain me tséhë cha ta, ¹⁹ suvá ni cjua tséhë xcusun rë yungun rë me xi casahmichiin xu cha, cojo cjua tséhë ngu nima xi hmí rë Jesús, xi chja cha ta tacun quicun. ²⁰ Peru ngahan ne, casacuinyiin ná hacutjin sacú ná cjuaquixi tséhë cjuaqcintacun vöhë ne, cafinenguësë rë cha sa xi meje cjue cha Jerusalén hane ngajan chjahachuva rë cha tséhë cjuaqcintacun xi yaha rë cha. ²¹ Peru tséhë xi cafehyá cha xi seyañihi sa cha hisca xi suvá me xi matitjun camahani tsichuva me cjuaqcintacun rë cha ne, cavitexa xi quiji caseyañihi sa cha hisca hya xi cuma tsingátju cha tsja me. —Cuatjin cachja Festo.

²² Ngajan xi Agripa ne, cuitjin cachja me cojo Festo:

—Ngahan ne, hacuaha catsingátahacácun xi cuiñujú cjua rë cha xi cuajyihí vë. —Cuatjin cachja me.

Hane Festo ne, cuitjin cafayangui me:

—Sa cuatjin ne, nchujun ni cuiñuju cjua rë cha. —Cuatjin cafayangui me.

²³ Hane xi camá nchujun jan ne, ngu cjuandya jyé tjin xi cafehe Agripa cojo Berenice. Hane quiji cavisehentangun me ndihyavasen cojo yéjë capitán cojo yéjë xuta xi matitjun tséhë nandya jan. Sehe cavitexa Festo quiji chjahá rë Pablo. ²⁴ Hane xi cafehe Pablo ne, sehe cachja Festo cuitjin:

—Ngayun Agripa, cojo ngayujun ni xi tjin tangun ngayaan nguehe ne, nguehe tacun cha vihi xi yéjë xuta tjé rë Israel ne, cavinchajyé me cha cojo ná ngajan Jerusalén, hacuaha cavinchajyé me cha hisca nguehe. Jindaya me chja me ta ha quihndé mijí rë xi cuejña sa cha cjuahñu. ²⁵ Peru ngahan ne, casacuiniin ná hisca ngu xcusun xi casahmi

cha xi vechú chuva rë xi cueya cha. Hane xi cafehya suvá cha xi cuma cha consina tsja me xi matitjun camahani ne, cavejñá cárjun xi tsingátju cha. ²⁶ Peru tsajin ngu cjua xi cuma tsihindu rë nai naha, ¿há vihi ne, há vöhë casahmi cha? Vöhë xi cavitéxa xi cuisehen cha xcun ngayun, Agripa, cojo sa xi cjuë chjahantahan rë cha ne, sacú ná cjua xi tsihindu. ²⁷ Xi má ná ne, tsajin ná cjuatacun sa xi tsingátju ngu presu hacuaha cuichjaan mé jyé xi caxincha tséhë. —Cuatjin cachja Festo.

26

Casua Pablo cjuaquixi rë me xcun Agripa

¹ Hya xi camá ne, cuitjin cachja Agripa cojo Pablo:

—Quihndë ne, tjin cahndé xi cuinoje ngatsë riji. —Cuatjin cachja me.

Ngajan xi Pablo ne, catsiquijin me tsja me, sehe casua me cjuaquixi rë me cuitjin:

² —Agripa, ngayun xi matitjun ngayun ne, jemu ndaja tsahan xi xcun ngayun suá cjuaquixi naha quihndë tséhë yéjë jyé xi vincha xuta tjé rë Israel tsahan. ³ Jemu ndaja tsahan ta, tséhë xi ngayun ne, ha hyun yéjë xcusun naja cojo cjuacjintacun naja ngayaan xuta tjé rë Israel. Vöhë xi nihñu cjuandaja ne, nihñu jyé tacún xi cuiñuju ngujo cjua naha.

Xcusun changá rë Pablo

⁴ Quihndë ne, yéjë xuta tjé rë Israel ne, vëë me hacutjin xcusun naha hisca cjua lihndi naha, hya xi cavitejña nangui naha cojo hya xi cavitejña Jerusalén. ⁵ Hacuaha, sa xi meje cuichja me cojo nuju ne, cuma cuichja me ta ha vëë me xi ngahan ne, hatuxa xuta fariseo ngahan, xuta xi chinchihin tjengui me ndiya rë Nina naja. ⁶ Quihndë ne, nguehe sécun tichjaháchuva ná cojo cjuatacun naha ngatsë rë xi vétahacácun cjua xi cachja Nina cojo xutachanga naja. ⁷ Ngayejen ni xi tjé rë tejó xutachanga naja ne, vetahantacun xi cuechuntahan cjua vöhë. Vöhë xi cojo yéjë ni xahasen naja ne, chjahanrcun Nina nixtin nixten. Hane tséhë xi vetahácacun cjua vöhë ne, vöhë xi vinchajyé ná xuta tjé rë Israel. ⁸ Ngayujun ni ne, ¿má macjaain nuju xi Nina ne, tsicuya me nima cjuahñu?

Pablo ne, catsuyihiya tjengui me cojo cjuahngatacun xuta ladu rë Nina

⁹ Titjun ne, ngahan ne, catsingátaħacácun xi jemu cjín xcusun meje rë xi sahme condra tséhë Jesús, xuta Nasaret. ¹⁰ Hane cuatjin casahme ngajan Jerusalén. Ngahan ne, jemu cjín xuta ladu rë Nina cavinchá me ndavaya ta, tséhë xi nahmi xi matitjun casuaxa ná me xi cuatjin casahme. Hane hya xi cavitexa xutaxa rë xi cueya xuta ladu rë Nina xi cuacun jan ne, cojo ngahan cachjá xi ndatjin. ¹¹ Jemu cjín ndiya cëjë yéjë yungun naja, cavitéxa xi cuma xuta castigu, hacuaha jemu casahme ngahñu xi choho cuichja me tséhë Jesús. Tjemu camacjan ná cojo rë me, hacuaha catsuyjéhëya tjëngüé me cojo cjuahngatacun hisca cojo jingu sa nandya rë xutaxín.

Cachja nga Pablo hacutjin camá xi cavisehen me ladu rë Jesús

¹² Ngayun Agripa, ngu nixtin jan ne, tifé Damasco xi sahme cjuahngatacun jan, yahá xa xi ha casua ná nahmi xi matitjun. ¹³ Hane ndiya jan ne, sacuaha chuva rë nchisen ne, cahvë ngu ndihí xi canduva ngahnga, xi hitsë sa hñu ndavá rë xi cuma rë ndavá rë tsuhí, xi cavaja rë hasen rë jingundee ni hiscan tifé cojo me xi tifé cojo. ¹⁴ Hane xi ha caticjin ngayijin ni ne, ngahan ne, cahndë ngu cjua xi cachja cojo ná hne hebreo, cuitjin cachja: “Saulo, Saulo, ¿má cuatjin nujyihye tjengui ná cojo cjuahngatacun? Sacuahatjin tjin rë chu ndyaja tjin ri, ta chu vë ne, tsun chu nahñu quicha nahya ne, vanguihmu suva chu yojo ru hya xi vöhë hñu chu yojo ru xi vihndiin chu. Hane cuanitjin ni tjin ri, ye.” Cuatjin cachja cjua jan. ¹⁵ Ngajan xi ngahan ne, cuitjin cavinenguës: “¿Yo ngayun, Tatá?” Cuatjin cavinenguës. Hane Nai naja ne, cuitjin cafayangui me: “Ngahan ne, Jesús ngahan, xi nujyihye tjengui ná cojo cjuahngatacun. ¹⁶ Tisatjinhngue, tisechin ta, tséhë xi canduvá tjëngüé ri cojo sa xi suáxa ri xi cuisecuee ná hacuaha cuinoje cojo xuta xi cuitjin cahye ná, hacuaha cuinoje cojo xuta hacutjin camá hya xi ha canduvá tjëngüé

nga ri ngujo ndiya. ¹⁷ Ngahan cuáxetjé ri tséhë xuta tjé rë Israel. Hacuaha cuáxetjé ri tséhë xutaxín. Tsingátju ri ngajni rë xuta xi cuacun vë, ¹⁸ cojo sa xi choxehe cjuatacun rë me, sehe cuetjuxin me tséhë cjuatsehen, hane cuisehen me ndiya rë cjuandaja, cuetjuxin me tséhë ladu rë Satanás hane cuisehen me ladu rë Nina. Choxehe cjuatacun rë me, sehe sacú rë me cjuaninchataha tséhë jyé rë me, hacuaha cuisehen me ladu rë xuta xi ha camá tséhë Nina me ngatsë rë xi camangucacun me cojo ná.” Cuatjin cafayangui Nai naja.

Cachja Pablo tséhë xa xi sahmi me

¹⁹ ’Ngayun Agripa, ngahan ne, hatuxa cahndë tséhë cjua xi cachja Jesús hya xi canduvatjengui ná me xi canduva me tséhë ngahnga. ²⁰ Tjun tjun ne, cachjá cojo xuta ngajan Damasco, sehe cachjá cojo xuta ngajan Jerusalén cojo jingujué ni nación Israel, hisca cojo xutaxín. Cachjá cojo rë me xi tsindeya me cjuatacun rë me hacuaha cuisehen me ladu rë Nina. Hacuaha cachjá cojo rë me xi catisahmi me cjuandaja xi tsingacun xi catsindeya Jain me cjuatacun rë me. ²¹ Ngatsë rë vëhë xi cafaha ná xuta tjé rë Israel ngajan yungun xi matitjun hisca casahmi me cjuandya xi tsiquehen ná me. ²² Peru Nina ne, visecoo ná me, vëhë xi tiféxcun hisca quihndë, tichjá cojo xuta sa quihndi sa changá me. Tichjá suvá cjua xi cachja profeta cojo cjua xi cachja Moisés tséhë yéjë xcusun xi sehe cuetjucaa. ²³ Cachja me xi cuacun vë xi Cristu ne, Me xi Tsingatju Nina ne, tjin rë me xi cueya me, hacuaha tjin rë me xi tjun tjun me cuya me cjuahñu, sehe sua me cumachaya rë xuta tjé rë Israel cojo xutaxín tséhë xi cuaxetje Nina xuta xi cuacun vë. —Cuatjin cachja Pablo.

Pablo ne, meje rë me xi cjuijnecacun Agripa ne, cumac Jain rë me xi cavuya cjuahñu rë Jesús

²⁴ Hane xi cuatjin cachja Pablo xi voxetje me yojo rë me ne, cavisehenjñi Festo cojo cjua rë me, cachjahñu me cuitjin:

—¡Sca ri, Pablo! ¡Tséhë xi jercu chutaye ne, vëhë sahmi sca rë cjuatacun riji! —Cuatjin cachja Festo.

²⁵ Ngajan xi Pablo ne, cuitjin cafayangui me:

—Hacuiin sca ná, ngayun Festo. Ngahan ne, tichjá cjua xi cjuaquixi. ²⁶ Agripa, me xi matitjun vë ne, hacuaha ndaja vëe me cjua vihi. Vëhë xi tsacjuun xi chjá cojo rë me. Xi má ná ne, tsajin ngu cjua xi cuicun vi xi hvíin me ta, tséhë xi xcusun vihi ne, hacuiin ngu cahnchun camá. ²⁷ Ngayun Agripa, ¿há mac Jain nuju cjua xi catsihindu profeta? Ha hvé ta mac Jain nuju. —Cuatjin cafayangui Pablo.

²⁸ Ngajan xi Agripa ne, cuitjin cachja me cojo Pablo:

—Cojo hitsë cjua xi canoje vë ne, meje ri xi cuisehen ladu rë Cristu. —Cuatjin cachja me.

²⁹ Hane Pablo ne, cuitjin cafayangui me:

—Nina meje rë me xi há hitsë o há cjín cjua xi cuichjá ne, hacuiin suvun ni ta cojo yéjë me xi tivisiñuju cjua xi tichjá quihndë ne, cuma me sacuha ngahan, peru hacuiin cojo cadena vihi. —Cuatjin cafayangui me.

³⁰ Hya xi camá ne, cavasatjenhngia Agripa, me xi matitjun, cojo Festo, hacuaha cojo sa Berenice cojo yéjë me xi caviyujutangun me cojo, cavasatjenhngia me. ³¹ Sehe quijixin me, cachja me cojo xingu xingu me cuitjin:

—Cha xi cuajyihi vë ne, tsajin mé sahmi cha xi vechú chuva rë xi cueya cha o sa xi cjue cha ndavaya. —Cuatjin cachja me.

³² Sehe ngajan xi Agripa ne, cachja me cojo Festo cuitjin:

—Cha xi cuajyihi vë ne, sá tsajin xi cafehya cha xi cuma cha consina xcun me xi matitjun camahani ne, cuma nismi rë cha. —Cuatjin cachja me.

Cavetju Pablo xi cjue me Roma

¹ Hane hya xi cavechú nixtin xi cavejñacacun me xi matitjun jan xi cuanguin ngajan Italia ne, Pablo cojo yahnga sa presu jan ne, camá me entregadu tsja ngu capitán xi hmí

rë Julio, capitán tséhë sindadu rë me xi matitjun camahani. ² Hane xi cavisihin ngu barcu xi cavetju tséhë nandya Andramitio xi cjue jingunduju ni ndaya tséhë distritu Asia ne, sehe quiji barcu cojo niji. Hacuaha quiji cha Aristarco cojo niji, ngu cha Tesalónica tséhë distritu Macedonia. ³ Hane xi camá nchujun jan ne, cafehe barcu cojo niji nandya Sidón. Hane Julio ne, casahmi me cjuandaja cojo Pablo, casua me cahndé xi cjue Pablo ndava amigu rë me xi cjue acuenda amigu jan xcusun xi ma chaja rë Pablo. ⁴ Hane xi quiji barcu cojo niji tséhë ngajan ne, cavatjin jingunduju ni taha ngaxtun Chipre, ngu rquí nangui xi vetjucaa xcun ndachacun, tséhë xi tjo ne, casuaain cahndé xi ngu quixi ni cjue barcu cojo niji. ⁵ Hane xi cavatjin xcun ndachacun quixi rë distritu Cilicia cojo distritu Panfilia ne, cafihi nandya Mira, ngajan distritu Licia. ⁶ Hane ngajan casacu rë capitán ngu barcu tséhë Alejandría xi cjue Italia. Sehe catsinguehen niji me barcu vëhë.

⁷ Hane xi catsanguin tafi tafi ngujo nixtin sa ne, cojo jemu jyë cjuandaya ne, cafihi quixi rë nandya Gnido. Hane tséhë xi casuaain tjo cahndé xi ngu quixi ni quiji barcu cojo niji ne, cavatjin taha ngaxtun Creta, quixi rë Salmón. ⁸ Handasa jemu chja cavatjin camá, peru quiji barcu cojo niji tafi tafi hisca xi cafihi ntu cahndé xi hmí rë Cahndé Ndajyihi, tiña nandya Lasea.

⁹ Jemu tivatju nixtin, hacuaha jemu tsavi xi cjue barcu xcun nandá, tséhë xi camatiña chan hnchan. Vëhë xi Pablo ne, cachja me cojo xuta jan cuitjin:

¹⁰ —Ngayujun ni ne, nguehe cuichjá cojo nuju ta vutsején ne, xi tivanguen vi ne, jemu tsavi, jemu jyë nichajan tséhë chaha cojo tséhë barcu, hacuaha hisca tjin yahnga ngayaan xi chajá yaan. —Cuatjin cachja me.

¹¹ Peru capitán jan ne, hitsë sa casahmicuenda me cjua xi cachja cha xi cjuicojo barcu jan xi cuma rë cjua xi cachja Pablo. ¹² Hane tséhë xi cahndé xi tacun barcu jan ne, machjiriin xi ngajan cuejña barcu nixtin rë chan hnchan, vëhë xi hitsë sa cjín xuta xi cachja me xi cuetjuxin ni barcu cojo rë me tséhë ngajan tuxa ma sa xi cuma cuechú me hisca Fenice, ngu nandya ngajan Creta, xi ndatjin cahndé tacun, hane ngajan cuma cuiyuju me yëjë nixtin rë chan hnchan.

Tjo hñu xi cavanga ngajan xcun ndachacun

¹³ Hya xi camá ne, cavetsihin cavanga ngu tjo jeya jeya ni xi canduva táha ladu xi ndatjin. Sehe ngajan xi xi má rë me ne, cuma sahmi me sacuatjin xi ha catsingatahacacun me. Vëhë xi cavetju me quiji me, ndaya ndaya rë Creta. ¹⁴ Peru sehe tu hitsë cjui barcu jan ne, canduva ngu tjo hñu ladu xi choho tjin, ¹⁵ catsivaha rë barcu. Hane tséhë xi maji fi barcu taha hiscan nduva tjo ne, catihin cahndé quiji barcu hacutjin xi cjui tjo.

¹⁶ Hane xi cavatjin taha ngaxtun ngu rquí lihndi nangui quixí xi hmí rë Claudia hiscan xi yiin cjuachan vanga tjo ne, cojo chja ne, peru camá cachjihin barcu lihndi xi tjengui jan,

¹⁷ sehe cachjuvinniji caveyín cahntsua barcu jyë. Sehe ngajan xi cha xi cjuicojo barcu jan ne, camá catsihñuhñu cha barcu jyë. Hane tséhë xi tsacjun me xi cjuecojo tjo jan barcu ngu cahndé chojyihisca xi jemu tsavi xi cjue barcu ne, catsitujne me tsjian xi faha rë tjo, casua me cahndé quiji barcu hacutjin cjui tjo. ¹⁸ Peru tséhë xi quijinduju sa cavanga tjo hñu jan ne, xi camá nchujun jan ne, cavetsihin cacandiya me chaha xi hincha barcu jan ngajñi ndachacun. ¹⁹ Hane xi camá nguini, cojo tsja ni me, cafaha me yëjë ni xcusun xi tséhë barcu jan, cavetsihin cacandiya me ngajñi ndachacun. ²⁰ Hane xi ha jemu cjín nixtin xi cahyiin tsuhi cahyiin niñu hacuaha tjo jan ne, cjuinduju sa tivanga jercu tu hñu camahani ne, ngajan cafë cjuetacun xi cuetjintjin.

²¹ Hane tséhë xi ha jemu cjín nixtin xi cjëe sinë xuta jan niñu ne, cavetjuyñi Pablo ngajñi rë me, cachja me cuitjin:

—Ngayujun ni ne, nguehe cuichjá cojo nuju ta hitsë sa ndatjin sa xi cavetuhun rcun cjua xi cachjá cojo nuju hane cavetjuun ni tséhë Creta. Tsajin mé cjuañihi xi cuitjin cuatjun cuma hacuaha tsajin mé xi cuitjin nichajan. ²² Quihndé ne, tuhun cjuetacun xahasen nuju ta hisca xi ngu ngayun ne, chajin ngayun. Xi chajá ne, barcu. ²³ Hvë xi

cuatjin cuma ta, nguchjin ne, cafehe ngu ángel rë Nina xi Nai naha hacuaha xi fahárcun. ²⁴ Hane cachja cojo ná cuitjin: "Xi carcuiin Pablo. Hatuxa tjin ri xi cuechi xcun César, me xi matitjun camahani. Hacuaha Nina ne, sahmi me cjuandaja cojo ri xi cuetjutje yéjë xuta xi cjui cojo ri." Cuatjin cachja ángel cojo ná. ²⁵ Véhë xi tuhun cjuetacun xahasen nuju ngayujun ni ta, tséhë xi ngahan ne, mangucácun cojo Nina, hane hatuxa cuatjin cuma sacuatjin cachja ángel cojo ná. ²⁶ Peru tjin rë xi scandi naja tjo jan xcun ngu rquí nangui quixí. —Cuatjin cachja Pablo.

²⁷ Xi cavatju teñuju nguixun xi cuatjin cjui nguehe cjui ngajan tjo cojo barcu xi nechinyin xcun ndachacun xi hmí rë Adriático ne, sacuaha chuva rë vasen nixten ne, catsingatahacacun cha xi cjuicojo barcu jan xi ha jima tiña barcu tséhë nangui quixí.

²⁸ Hane catsichuva cha hacutjin nungun nandá hiscan quisun barcu, hane casacuse rë cha xi can tyuhun ngu metru nungun nandá jan. Hane xi quijsa barcu hitsë ni nguvan ne, catsichuva nga cha nandá, hane can yatu metru nungun nandá jan. ²⁹ Hane tséhë xi tsacjun cha xi satécoo barcu jan cojo ngu naxi ne, cacandiya cha ñuju quicha hai xi machjiréhë xi cuiyujuhñu barcu ngajñi nandá xi tsuvahñu rë, hacuaha jercu cafehya rë cha Nina xi sahasen sanii. ³⁰ Hya xi camá ne, yahnga cha xi cjuicojo barcu jan ne, meje cuetjuxin cha tséhë barcu xi cuetjutje cha. Véhë xi catsitujne cha barcu lihndi jan xcun ndachacun, sacuaha xi meje scandiya sa cha quicha ngajñi nandá taha xcun barcu.

³¹ Sehe ngajan xi Pablo ne, cachja me cojo capitán cojo sindadu xi yahnga jan cuitjin:

—Sa xi cuiyijin cha xi cuacun vë cahntsua barcu jyé ne, ngayun ne, cumaji cuetjuntjun.

—Cuatjin cachja me.

³² Ngajan xi sindadu jan ne, cavatë cha nahñu xi yaha rë barcu lihndi jan, sehe catsismi cha.

³³ Hya xi ha tiña sahasen ne, cachja Pablo cojo yéjë xuta jan xi sinë me niñu, cuitjin cachja me:

—Ha quihndë teñuju nixtin xi nechunyun rë mé xi cuatjuun cuma hacuaha hisca hitsë niñu cjéé xinu. ³⁴ Véhë xi tichjá cojo nuju ta, xinu niñu. Xi cuatjin ne, scaa nuju cuetjuntjun ta hisca ngu ngayun ne, chajin hisca ngu tsjarcun. —Cuatjin cachja Pablo.

³⁵ Hane xi cafë cachja me cuatjin ne, cafaha me niñu ne, sehe casua me nacuechji rë Nina xcun yéjë ni xuta jan. Hane xi cavatëcia me niñu jan ne, sehe cavetsihin cajinë me.

³⁶ Hya xi camá ne, yéjë ni xuta jan ne, casacu rë me cjuetacun, hane hacuaha cojo me cajinë me niñu. ³⁷ Ngayijin ni xi nechinyin barcu jan ne, jo cientu cojo jyanchan tyuhun ngu má ngayin. ³⁸ Hane hya xi ha ndaja camá rë xahasen rë me xi cajinë me niñu jan ne, cacandiya me trigu jan ngajñi ndachacun xi cuma nguijna sa barcu.

Cavetsun barcu casahmi tjo

³⁹ Hane xi casahasen ne, cavëe me ngu cahndé hiscan xi hvíin me jani jan. Peru hacuaha cavëe me ngu cahndé hiscan xi jemu jyé tsumi jiña tjehen rë. Hane caviyujucacun me xi sahmi me cjuandya xi barcu ne, ngajan cuechú. ⁴⁰ Hya xi camá ne, cavatë me nahñu xi yaha rë quicha hai jan, sehe caxincha ni ngajan ngajñi nandá. Hacuaha cavéhëndaya me ya xi veayaquxi rë barcu hacutjin cjue. Hane xi catisquijin me tsjian xi faha rë tjo jan ne, sehe cavetsihin quijsa barcu jan quixi rë tsumi jan. ⁴¹ Peru xi cafehe barcu ngu cahndé hiscan tacun ngu naxi ngahma nandá ne, ngajan casatë. Hane taha xcun barcu jan ne, ngajan casetahahñu, ha quihndë camaji quijsa. Peru taha ngaxtun barcu jan ne, jercu tivetsun tséhë tsindyu rë nandá xi vaja rë.

⁴² Hane sindadu jan ne, catsingatahacacun cha xi tsiquehen cha presu, sá tu cuatë presu jan nandá ne, cuanga. ⁴³ Peru capitán jan ne, tséhë xi meje cuaxëtje me Pablo ne, casuaain me cahndé xi sahmi sindadu jan hacutjin xi meje rë cha. Hya xi camá ne, cavitexa me yéjë ni xuta xi ma vaté nandá ne, tjun tjun me caticandiya me yojo rë me ngajñi nandá, catji me quixi rë tsumi jan. ⁴⁴ Hane me xi yahnga xi maji vaté nandá jan ne, catjaha me ngu rquí yatë o sa ngu ya tséhë barcu jan. Cuatjin camá xi ngayijin ni ne, cafihin nangui quixí, hacuaha cavetjintjin.

28

Cafehe Pablo ngajan Malta

¹ Hane xi ha cavatju cavetjintjin ne, sehe casacu camachaya niji xi ngu rquí nangui xi vetjucaa xcun ndachacun jan ne, Malta hmí rë. ² Hane xuta xi nangui rë jan ne, hacuin hitsé cjuandaja casahmi me cojo niji. Cavejña me ngu ndava ndihi jyé ne, sehe cajindaya niji me ngayijin ni, tséhë xi hacuaha cavetsihin cavaha tsi hane jemu hnchan. ³ Hane xi cafaha Pablo ngu tyá chaquin quiji cavyujusun me xcun ndihi jan ne, tséhë suë rë ndihi jan ne, vanga ngu yé cavetju chu ngajñi rë chaquin xi cavyujusun me jan, hane cafaha chu tsja me, hane catsismii chu ngutjen. ⁴ Hane xi cavéé xuta xi nangui rë jan xi tyjanguitaha cuaha yé jan tsja Pablo ne, sehe cachja me cojo xicjin me cuitjin:

—Ngu cha tsiquehen jain rë cha vi, vëhë xi handasa cavetjutje cha tséhë ndachacun ne, peru nina ne, suaain me cahndé xi cuejña sa cha cjuahñu. —Cuatjin cachja xuta jan.

⁵ Hane xi cavitsune Pablo tsja me ne, cjanenguiya chu ngajñi ndihi jan. Peru me vëhë ne, tsajin mé camá rë me xi cafaha chu me. ⁶ Xuta jan ne, xi má rë me ne, cuijin squee Pablo o sa xi tu ñahñu ne, cueya me. Peru xi ha jemu jyé hora vutsejen xuta jan xi tsajin mé má rë Pablo ne, catsindeya me cjua rë me, hane sehe cavetsihin cachja me xi Pablo ne, ngu nina me.

⁷ Hane tiña tséhë cahndé jan ne, siutahá nangui rë me xi matitjun tséhë nangui xi vetjucaa xcun ndachacun jan, me xi hmí rë Publio. Me vëhë cafahatsja niji me, hacuaha casahmi me cjuandaja xi casua niji me cahndé ndava me xi cavinechin jan jyan nixtin.

⁸ Hya xi camá ne, nahmi rë Publio jan ne, jiña me xi hmu rë me tséhë chíhin suë cojo chíhin jni. Hane Pablo ne, quiji vutsejen me me, hane cafehya rë me Nina ngatsé rë xuta hmu rë jan. Hane xi cavisanetsja Pablo me ne, camandaja me. ⁹ Xi cavatju vëhë ne, hacuaha canduva tjengui yéjé sa xuta hmu rë tséhë nangui vëhë Pablo ne, camandaja me. ¹⁰ Xuta jan ne, jemu casahmi me cjuandaja cojo niji, hane xi cavetjin catsanguin nga cojo barcu ne, casua me hacutjin xcusun xi machaja niji.

Cafehe Pablo ngajan Roma

¹¹ Xi cavatju jyan sá ne, cavetjin catsanguin cojo ngu barcu xi cavéjña jan yéjé nixtin tséhë chan hnchan. Barcu jan ne, nandya Alejandría canduva, hacuaha Nina Lihma hmí rë. ¹² Hane xi catsanguin sa hitsé ne, cafihin nandya Siracusa, hane ngajan cuinechin jyan nixtin. ¹³ Hane xi cavetjin ngajan ne, quiji nduju sa barcu cojo niji ne, cafihin nandya Regio. Hane xi cafë ngu nixtin xi nechintihin jan ne, cavetsihin cavanga ngu tjo xi ndatjin cjui, sehe quiji nga barcu cojo niji, hane xi camá nchujun ne, cafihin nandya Puteoli.

¹⁴ Hane xi cafihin jan ne, cavechintihin ngujo xuta ladu rë Jesús, hane cachja me xi cuinechintihin ngu totje cojo rë me jan. Hane ha cuatjin chuva vëhë ne, cavetjin Cesarea hane cafihin hisca Roma. ¹⁵ Hane xuta ladu rë Jesús xi siu ngajan Roma ne, xi camachaya rë me xi ha jima tiña ngayin ne, canduvatjengui niji me ndiya. Ngujo me ne, cafehe me hisca hiscan hmí rë Ndetsin Apio. Hane ngujo nga me ne, cafehe me hiscan hmí rë Jyan Cantina. Hane xi cavéé Pablo xuta jan ne, casua me nacuechji rë Nina, hacuaha casacu rë me cjuetacun. ¹⁶ Hane xi cafihin Roma ne, xutaxa rë jan ne, casua me cahndé xi cjuin Pablo ndavaya hane cjue me ndava ngu xuta cuejña me, peru cojo ngu sindadu xi sahmi cuidadu xi hacuiin cuanga me.

Catsinguijnetaha Pablo cjua cojo xuta changá rë yungun

¹⁷ Hya xi camá ne, xi cafë jyan nixtin quitahá Pablo jan ne, casahmi tangun me xuta xi matitjun tséhë ngajñi rë xuta tjé rë Israel. Hane xi camatangan xuta jan ne, sehe cachja Pablo cojo rë me cuitjin:

—Ngayujun ni ngayun xuta tjé rë Israel matsejen ne, nguehe cuichjá cojo nuju ta handasa tsajin mé casahme condra yéjé xuta naja o condra rë xcusun rë xutachanga naja ne, peru cafaha ná me, casahmi ná me entregadu tsja xutaxa rë Roma ngajan Jerusalén.

¹⁸ Hane xi cafahataha ná xutaxa rë jan ne, meje tsismi ná me, tséhë xi tsajin jyé naha xi

vechú chuva rë xi cueya. ¹⁹ Peru xi cachja xutaxa rë yungun naja xi ndajintjin xi cuma ndaya ngahan ne, casahmi ná nguyjé xi caféhya xi cuma ngahan consina tsja César, me xi matitjun camahani. Cuatjin casahme, handasa tsajin mé jyé meje cuíncha tséhë xuta naja. ²⁰ Ngatsé rë cjuacjintacun vëhë ne, vëhë xi cachjá xi cuinduvun tjengun ná, cojo sa xi cuichjá cojo ngu nguyo cjua ta, tséhë xi ngatsé rë me xi vetahantacun ngayejen ni ngayaan xuta tjé rë Israel ne, vëhë xi cuitjin tjinhñu ngahan vi. —Cuatjin cachja Pablo.

²¹ Ngajan xi xuta xi cuacun jan ne, cuitjin cafayangui me:

—Peru ngayin ne, hisca ngu xujun xi chja condra nuju xi nduva tséhë Jerusalén ne, cjéé chjihinntsins. Hacuaha tsajin hisca ngu xuta naja xi nduva me tséhë ngajan xi choho chja me tsujun cojo niji. ²² Quihndé ne, meje cuiñiji hacutjin fi cjuatacun nuju ta, tséhë xi sacuaha cjuatacun vihi ne, hyin ta jinguyjé ni ne, choho chja xuta tséhë. —Cuatjin cafayangui xuta xi cuacun jan.

²³ Hya xi camá ne, cavejña xuta xi cuacun jan ngu nixtin xi cuya nga me. Hane xi cavuya me ne, hitsé sa jercu cjín me xi cafehe me hiscan tacun Pablo. Ngajan xi Pablo ne, cuaha nixtin cachja me cojo xuta jan tséhë gubiernu xi sahmi Nina. Hacuaha casahmi Pablo ngahñu xi cumacjain rë yéjé xuta jan xi Jesús ne, me vëhë xi catsingatju Nina me, sacuatjin chja xujun rë Nina xi catsihindu Moisés cojo xi catsihindu profeta hatséé nixtin. ²⁴ Ngujo me ne, camacjain rë me cjua xi cachja Pablo, peru nguyo nga me ne, camacjaain rë me. ²⁵ Hane tséhë xi hacuiin tangun camá cjuatacun rë me ne, cavetju me cafe me. Peru chaja sa xi cjue me ne, Pablo ne, cachja me cuitjin:

—Jemu quixi cjua rë Hasen rë Nina xi cachja profeta Isaías cojo xutachanga naja, cjua xi cachja cuitjin:

²⁶ Tihin tjengui xuta naha hane tinoje cojo rë me xi
hatuxa cuihndé me, peru cuijnii rcu me hisca hitsé.
Hatuxa scuëé me, peru hvífin me mé jan.

²⁷ Cuatjin cuma ta, tséhë xi cjuatacun rë me ne, tichjá,
tyjavañuju me cojo tuxcun me ne, cavechja me,
sá tu scuëé me cojo tuxcun me
hane cuihndé me cojo tyjavañuju me
hacuaha cuijne rcu me cojo cjuatacun rë me,
sehe cuya me ladu naha xi cuaxëtjé me.

Cuatjin cachja cjua jan. ²⁸ Sa xi mijí cuiñiju ngayun sacuatjin camamiji cuiñiju xutachanga naja xi cuacun jan ne, nguehe suá cumachaya nuju ta Nina ne, cjua xi cuaxëtje me xuta ne, quihndé catsingatju me cjua vëhë tséhë xutaxín. Me xi cuacun vë ne, cuiñiju me. —Cuatjin cachja Pablo.

²⁹ Hya xi camá ne, xuta tjé rë Israel xi cahndé me cjua rë Pablo ne, quiji cavetju me, tichja cjín me cojo xicjin. ³⁰ Ngajan xi Pablo ne, jo nu jingu cavéjña me ndihya xi caféhya me cojo renta jan. Hane ngajan cafahatsja me xuta xi quiji tjengui rë me, ³¹ casua me camachaya rë xuta tséhë gubiernu xi sahmi Nina, hacuaha cavicuya rë me xuta cjua xi chja tséhë Nai naja Jesucristu. Hisca ngu quijiin cavatécja tséhë me xi cuatjin casahmi me.

Xujun xi catsingatju San Pablo xi cafahatsja xuta Roma

¹ Ngahan, Pablo ne, visécoo rë Jesucristu sacuaha ngu mosu hndixahan rë me, hacuaha Nina cavaxijin ná me xi cuma ngahan apóstol, casuaxa ná me xi suá cumachaya rë xuta cjuandajyihi rë me. ² Hane ha jemu hatséé casahmi Nina xi profeta rë me ne, tsihindu me cjuandajyihi vë xcun xujun rë Nina. ³⁻⁴ Cjuandajyihi vë ne, hacui cjua xi sua machaya naja tséhë Quihndi rë Nina, Nai naja Jesucristu. Hya xi catsin Jesucristu, sacuaha ngu xuta tjé rë David, catsin me. Peru Hasen rë Nina ne, jemu ndaja casua camachaya naja xi hatuxa Quihndi rë Nina me ta catsingacun naja hya xi cavuya me cjuahñu hya xi cavatju cahme me. ⁵ Hane ngatsé rë Jesucristu ne, casacu niji cjuandaja rë Nina xi camá ngayin apóstol, cojo sa xi cuisecuin rë xuta yéjë ni nanguí, sehe cumangucacun me cojo Nina hacuaha cuihndé me tséhë Nina. Hane xi cuatjin ne, cuma jyé cuma hnga Jesucristu. ⁶ Hacuaha cojo ngayujun ni xi xuta nanguixin ngayun ne, cavaxijin nuju Nina xi camá tséhë Jesucristu ngayun.

⁷ Ngahan ne, titsihíndu nuju ngayujun ni xi nechun ngajan nandya Roma, ngayujun ni xi hmucacun nuju Nina, ngayujun ni xi cavaxijin nuju me xi camá ngayun xuta rë me. Nina Nahmi naja cojo Nai naja Jesucristu ne, catisua nuju me cjuandaja cjuajeya.

Pablo ne, meje cjue me nandya Roma

⁸ Quihndé ne, hora xi sahme oración naha cojo Jesucristu ne, suá nacuechji rë Nina naha ngatsé nuju ngayujun ni ta jingu ni ladu ne, jimachaya rë xuta hacutjin xi mangutacún cojo Jesucristu. ⁹ Ngahan ne, nguñaja xahasen naha sahme xa rë Nina xi suá cumachaya rë xuta cjuandajyihi xi chja tséhë Quihndi rë Nina. Hane vëé Nina Jain xi hatuxa veyanangé nuju, ¹⁰ yéjë ni hora xi sahme oración naha. Féhya rë Nina xi sua me cahndé xi cuechú hora cuechú nixtin xi cuma cjuëtjéngé nuju, sa xi cuatjin meje rë me. ¹¹ Hatuxa meje cjuëtjéngé nuju, cojo sa xi suá nuju ngu cjuandaja rë Nina. Sehe ngayun ne, hitsé sa ndaja cumangutacun cojo Jesucristu. ¹² Cuma cuinújan ne, meje cjuëtjéngé nuju, cojo sa xi tahan cjuasua xahasen naja xingu xingu ngayaan, ngatsé rë xi ndaja mangutacun xingu xingu ngayaan cojo Jesucristu.

¹³ Ngayujun ni ne, meje ná xi cumachaya nuju ta jemu cjín ndiya cavejñá cjuatacun naha xi cjuëtjéngé nuju, peru hisca quihndé ne, camaji. Meje ná xi ngujo xuta nanguí nuju ne, cuisehen me ndiya rë Jesucristu ngatsé rë xi ngahan suá cumachaya rë me cjua xi yahá, sacuatjin xi ha camá jingu sa nanguí. ¹⁴ Xi má na ne, hatuxa sahmi ná nguhyé xi cuichjá cjua jan cojo yéjë ni xuta; sa xuta rcun, sa xuta yuma; o sa xuta vechu cjuatacun rë, sa xuta yuma hasen. ¹⁵ Véhë xi hacuaha jemu meje cjuëtjéngé nuju ngajan Roma, suá cumachaya rë xuta nanguí nuju cjuandajyihi xi chja tséhë Jesucristu.

Cjuandajyihi xi sua Pablo cachaya rë xuta

¹⁶ Ngahan ne, ma savaain ná tséhë cjuandajyihi xi chja tséhë Jesucristu ta, tséhë xi cjua vëhë ne, sua machaya rë xuta ta vaxëtje Nina yéjë ni xuta xi mangucacun cojo Jesucristu. Tjun tjun xuta Israel cuaxëtje me, peru hacuaha cuaxëtje me xutaxín. ¹⁷ Cjuandajyihi vëhë ne, sua machaya naja ta Nina ne, tsicjé me jyé xi quitjen, peru suvá ni hya xi mangutacun cojo Jesucristu. Hacuaha cuatjin chja ngu cjua xi camahindu xcun xujun rë Nina: “Xuta xi tsajin jyé rë me ngatsé rë xi mangucacun me cojo Nina ne, sacú rë me cjuahñu xatsé.” Cuatjin camahindu.

Jyé xi tjin rë xuta ngasunhndé

¹⁸ Nina xi tacun me ngahnga ne, sua me machaya naja hacutjin jemu cjan rë me ngatsé rë xi faharcuain xuta me, cojo ngatsé rë yéjë ni cjuatsehen xi sahmi xuta. Hacuaha cojo cjuatsehen xi sahmi xuta jan ne, vetsa me cjua xi cjuaquixi. ¹⁹ Cjuatacun xi cuma cumachaya naja tséhë Nina ne, hatuxa vëé xuta xi cuacun tsehen jan ta, tséhë xi Nina

ne, ha casua me camachaya rë xuta cjuatacun vëhë. ²⁰ Nina ne, matsijin me; peru hisca nixtin xi catsindaja me ngasunhndë cojo hisca nixtin quihndë ne, matsejen ta hacui jain me xi Nina me hacuaha tjin rë me ngahñu xi tsajin nuju tsajin nixtin cjuë. Cuatjin ma vijne rcu tu yo ni xuta hya xi vutsejen me yëjë ni xcusun xi catsindaja Nina. Vëhë xi xuta xi cuacun tsehen jan ne, sacuiyiin rë me mé xi cuichja me hya xi sua me cjuaquixi rë me xcul Nina. ²¹ Handasa vëë xuta xi tacun jain Nina ne, peru casahmijiin casahmihngaain me Nina, hacuaha hisca casuaain me nacuechji rë Nina. Vëhë xi camachjiriin cjuatacun rë me. Hacuaha cjuatacun yuma hasen rë me ne, camajñu tséhë. ²² Chja suvá me xi jemu vechu cjuatacun rë me, peru ngajñi rë xi chja me cuatjin ne, hitsë sa ngarca cavuya me cojo cjuatacun rë me. ²³ Hacuaha catsitjungui me Nina xi hatuxa jyë hnga me cojo cjuá rë me, Nina xi hatuxa hmii me. Sehe cavetsihin cafaharcun xuta xi cuacun jan tu mé ni nina ndyojo xi catsindaja suvá me. Cafaharcun me xcusun rë xuta xi hatuxa hme me, cojo xcusun rë chu nisë, cojo xcusun rë chu yë, cojo jingu sa xcusun rë chu xi yahnga.

²⁴ Vëhë xi Nina ne, catsismaticacun me xuta xi cuacun tsehen jan, cojo sa xi sahmi xuta cjuatsehen xi fehya rë xahasen tsehen xi tjin rë me. Hane casahmi xuta jan cjuatsehen cojo yojo rë me ngajñi rë me cojo xicjin me. ²⁵ Catsitjungui me Nina xi cjuaquixi. Cafaharcun me nina ndyojo xi nina ndacha ni. Hacuaha cahndé rë xi cjuaharcun me Nina, cafaharcun me hacuaha casahmi cuidadu rë xcusun xi Nina casahmi me. Peru mameje jain xi chjaharcun rë Nina yëjë ni nu yëjë ni nixtin. Cuatjin jain.

²⁶ Vëhë xi Nina ne, catsismaticacun me xuta xi cuacun tsehen jan, cojo sa xi cuma tsehen sa xahasen rë me. Hisca yachjin ne, catsitjungui ne xcusun xi ndatjin xi sacú xihin rë ne, hane casahmi na xcusun xi cuaaintjin. ²⁷ Hacuaintjin ni casahmi cha xi xihin; catsitjungui cha xcusun xi ndatjin xi sacu chjuun rë cha, hane jercu cavitju suë cha xi cuatjin meje sahmi cha cjuatsehen ngajñi rë cha cojo xicjin cha. Xihin cojo xihin cha casahmi cha cjuasava jan, hacuaha casacu rë cha jima ngu cha castigu xi cavangui xcusun tsehen xi casahmi cha jan.

²⁸ Xi má rë xuta xi cuacun tsehen jan ne, machjiriin xi tsinguitsjen me nina. Vëhë xi Nina ne, catsismaticacun me xuta jan, cojo sa xi hatuxa cumachjiriin cjuatacun rë me, hacuaha sahmi me xcusun xi ndajintjin xi nihñu. ²⁹ Quitsë rë xahasen rë me cojo yëjë ni cjuatsehen xi fehya xahasen rë me sacuha xcusun vi: jemu choho tsingatahacacun me; ña quitsë rë xahasen rë me cojo cjuaxin; meje tsiquehen xicjin me; jemu meje scaanya me tu mé ni xcusun; jemu ndacha me; jemu tsehen me; jemu ndesu me; ³⁰ choho chja me tséhë xicjin me; choho vëë me Nina; jemu hnga cacun me; jemu xta me; vaxëndaja suvá me yojo rë me; tsindajaya me cjuatsehen; vihndiin me tséhë xutacha rë me; ³¹ machjiriin cjuatacun rë me; sahmiichiin me ngu cjuá xi chja me; tsajin rë me cjuahmutacun; tsajin rë me cjuayumatacun. ³² Nina ne, cavitexa me xi yëjë ni xuta xi cuatjin sahmi xcusun tsehen vë ne, hatuxa vechú chuva rë xi cueya me. Hane xuta xi cuacun tsehen jan ne, handasa ha vëë me xi cuatjin cavitexa Nina, peru sahmiciendaain me ta finduju me cojo cjuatsehen jan, hisca ndama rë me tséhë xuta xi yahnga xi cuatjin sahmi.

2

Nina ne, tsichuva me xuta cojo cjuatacun rë me hacutjin xi cjuaquixi

¹ Tu yo ni ngayun xi nichuvun jingu sa xuta cojo cjuatacun rë me ne, sacuiyiin nuju mé xi cuinújun hya xi tuhun cjuaquixi nuju xcul Nina ta, tséhë xi hora xi nichuvun xuta ne, cjuachojoyihi xi sahmi ni me ne, ha xcusun vëhë ni nihñu. ² Ha hyan ta xuta xi cuatjin sahmi xculun tsehen vëhë ne, hya xi tsichuva Nina me cojo cjuatacun rë me ne, tsichuva me hacutjin xi cjuaquixi. ³ Peru ngayun xi nichuvun xuta xi cuatjin sahmi xculun tsehen vëhë ne, ¿há má nuju xi cuatjuhnga ngayun xi tsichuvaain nuju Nina xi cojo ngayun nihñu xculun tsehen vëhë? ⁴ O há tsajin ne, ¿há cuendaain nuju tséhë cjuandaja xi sua nuju Nina? ¿Há cuendaain nuju xi Nina ne, jemu jyë cacun me cojo nuju? ¿Há hyuun xi cuatjin sahmi Nina cjuandaja cojo nuju, cojo sa xi nindeyun cjuatacun nuju? ⁵ Peru ngayun ne, jemu taja rcun, hatuxa mijí nindeyun cjuatacun nuju. Xi cuatjin nihñu ne,

tinihñu xi jima cjan sa rë Nina cojo nuju, hisca xi cuechú nixtin xi Nina ne, jemu cuma cjan rë me hacuaha sua me cumachaya nuju hacutjin tsichuva nuju me cojo cjuaquixi. ⁶ Nina ne cuechji me xingu xingu xuta tu cutjin xcusun xi casahmi xuta jan. ⁷ Xuta xi scaa rë me sahmi me cjuandaja ngatsë rë xi meje rë me xi cuma yehe cuma hnga me, hacuaha meje rë me xi chuya rë Nina tséhë me. Meje rë me xi cuechiin nixtin xi cueya me ne, me vëhë xi sua Nina me cjuañhu xatsë. ⁸ Peru xuta xi meje rë me xi suvá ni me xi ndaja tséhë me, hacuaha vihndiin me tséhë cjuaquixi ta suvá cjuatsehen yëjë ni xi sahmi me ne, me vëhë xi jemu cuma cjan camahani rë Nina cojo rë me. ⁹ Yëjë ni xuta xi sahmi cjuatsehen ne, sacú rë me cjuañhi, hisca sacuiin rë me chuva rë hacutjin cuaxëtje me yojo rë me. Tjun tjun xuta Israel cuatju me cuma cuatjin, peru hacuaha cojo xutaxín cuatjin cuatju me cuma. ¹⁰ Peru yëjë ni xuta xi sahmi cjuandaja ne, me vëhë xi jemu cuma yehe cuma hnga me, hacuaha jemu chuya rë Nina tséhë me, hacuaha jemu sacú rë me cjuañjey. Me vëhë xi má xuta tjë rë Israel ne, tjun tjun cuatju me cuma cuatjin, peru hacuaha cojo xutaxín cuatju me cuma.

¹¹ Ta Nina ne, hatuxa quixi Jain me cojo cjuatecun rë me xi tsichuva me yëjë ni xuta cojo cjuatecun rë. ¹² Yëjë xuta xi tsajin rë me ley rë Moisés hacuaha sahmi me cjuatsehen ne, hacuiin ley vëhë vitexá mé castigu xi cuma me; peru hatuxa cuetjintjiin me. Hane yëjë xuta xi tjin rë me ley jan hacuaha sahmi me cjuatsehen ne, tsichuva Nina me tu cutjin xi vitexá ley vëhë. ¹³ Xuta xi tu visiñuju ni sacuatjin chja ley ne, hacuiin me vëhë xi tsajin jyé quitjen me xcun Nina ta xuta xi sahmi sacuatjin chja ley jan ne, me vëhë xi cuichja Nina ta tsajin jyé quitjen me. ¹⁴ Xutaxín xi tsajin rë me ley rë Moisés jan ne, hya xi sahmi me sacuatjin chja ley vëhë cojo cjuatecun rë suvá ni me ne, ngajan ma tsejen xi sacuaha xi me vëhë má me ley rë suvá ni me. ¹⁵ Xcusun xi sahmi me tsingacun naja xi cjua xi vitexá ley ne, ha hincha cahntsua cjuatecun rë me. Ha vëe suvá me cojo cjuatecun rë me mé xi ndaja, mé xi ndajin. Vëhë xi vinchajyé cjuatecun rë me me, o sa tsajin ne, chjatje cjuatecun rë me ngatsë rë me. ¹⁶ Ngajan xi hatuxa cuechji Nina xuta nixtin hya xi Nina tsingatju nga me Jesucristu xi tsichuva me cjua xi hinchahma rë xuta. Hacuaha cuatjin chjá hya xi suá machaya rë xuta cjuañjeyi xi chja tséhë Jesucristu.

Xuta tjë rë Israel xi faharcun me ley ne, vëhë sua machaya rë me xi xuta jyé me

¹⁷ Quihndë ne, ngayun xi níjun xi xuta tjë rë Israel ngayun ne, jemu vetuhuntacun ley rë Moisés. Jemu naxunndujun yojo nuju ngatsë rë xi Nina xi cjuaquixi ne, me vëhë xi nina nuju me. ¹⁸ Ha hyun hacutjin xi meje rë Nina xi nihñu; hacuaha ngatsë rë xi cachutayun ley ne, chuya nuju tséhë cjuandaja. ¹⁹ Xi má nuju ne, jemu ndaja ningoixun cjuatecun rë xutaxín xi hvíin me Nina; jemu ndaja chuxuhun cjuatecun rë xutaxín xi tsajin hincha me ndiya rë Nina. ²⁰ Xi má nuju ngayun ne, sacuaha maestru rë xutaxín xi hvíin camahani me má ngayun. Cuatecun ningatuhuntacun ta, tséhë xi tjin nuju ley rë Moisés jan xi yaha cjuatecun xi cjuaquixi. ²¹ Ngayun xi vicuyun rë jingu sa ne, ¿há vicuyun suvun rë yojo nuju ni? Ngayun xi chuyiin nuju tséhë nina ndyojo ne, ¿há nichujun cjuañchina rë yungun rë ni? ²² Ngayun xi níjun xi ndajintjin xi nindesun cojo rë ngu chjuun, o cojo ngu xihin xi hacuiin tsajan ne, ¿há cuatjin nihñu suvun ni? Ngayun xi chuyiin nuju tséhë nina ndyojo ne, ¿há nichujun cjuañchina rë yungun rë ni? ²³ Ngayun xi jemu naxunndujun yojo nuju xi tjin nuju ley rë Moisés ne, ¿há choho chja xuta tséhë Nina ngatsë rë xi nihñuchuun cjua xi vitexá ley vë ni? ²⁴ Hacuaha cuatjin camahindu xcun xujun rë Nina: “Xutaxín ne, choho chja me tséhë Nina, ngatsë rë xcusun nuju ngayun xuta tjë rë Israel.” Cuatecun chja xujun.

²⁵ Sa xi nihñuchuun jain sacuatjin vitexá ley ne, cumachji rëhë nuju xi cati chuxin nuju ngatsë rë xi ngu xuta rë Nina ngayun; peru sa xi nihñuchuun sacuatjin vitexá ley ne, ngayun ne, tangun ngayun sacuaha xi cjéé xtí chuxin nuju. ²⁶ Vëhë xi xutaxín xi vatiin me chuxin rë me ne, sa xi sahmi me cjuandaja sacuatjin vitexá ley ne, tangun chuya rë Nina tséhë me sacuaha xi ngu xuta xi cati chuxin rë me. ²⁷ Hane xutaxín xi sahmi me sacuatjin vitexá ley ne, handasa hatuxa vatiin me chuxin rë me, peru cuatjutaha nuju me,

ngayun xi nihñuchuuun sacuatjin chja ley handasa tjin nuju ley jan hacuaha cati chuxin nuju. ²⁸ ¿Yo xi má ngu xuta tjé rë Israel xi cjuaquixi? Hacuiin ngu xuta xi suvá ni xi sahmi me sacuaha xcusun rë xuta jan, hacuiin ngu xuta xi suvá ni xi cati rë chuxin rë ta, ²⁹ ngu xuta xi yaha cjuatacun rë xuta tjé rë Israel, ngu xuta xi cjué me cojo ngasunhndë rë me sacuaha xi cati chuxin rë me, me vëhë xi ngu xuta tjé rë Israel xi cjuaquixi. Hane tsajin rë ley ngahñu xi cuma sahmi cuatjin cahntsua xahasen naja ta suvá Hasen rë Nina xi cuma sahmi cuatjin. Xi cuatjin nihña ne, hacuiin xuta xi cuaxëndaja me tsajan ta Nina ne, me vëhë xi chuya rë me tsajan.

3

¹ Sa quixi cuatjin ne, cuma cuinenguisen ta, ¿mé vengui chjí rë xi xuta tjé rë Israel má ngayaan? ¿Mé vengui chjí rë xi cuatjin cati chuxin naja? ² Peru jemu vengui camahani chjí rë. Titjun ne, vengui chjí rë ta, tséhë xi Nina ne, casuatsja naja me cjuá rë me. ³ Peru sa xi ngujo xuta tjé rë Israel catsismicacun me Nina ne, ¿mé xi cuma? ¿Há vëhë ni sahmi xi tsismicacun Nina ngayaan xuta rë me? ⁴ ¡Jéya! Meje rë xi cuinújan xi Nina ne, hatuxa sahmichihin me yëjë ni cjuá xi chja me. Sahmi me handasa yëjë ni xuta ne, jemu ndacha me. Xcun xujun rë Nina ne, cuitjin camahindu:

Ngayun, Nina naha ne, tséhë yëjë ni cjuá xi nujun ne,
tsajin camahani mé jyé quitjin, hacuaha hatuxa scaa rë cjuá nuju cjué xcun tséhë cjuá rë
xuta xi tsichuva nuju me cojo cjuatacun nuju.

Cuatjin camahindu.

⁵ Sa xi ngatsë rë cjuatsehen xi nihña ne, vëhë tsingacun Jain xi Nina ne, tsajin camahani jyé quitjen me ne, ¿mé cumá cuinújan? ¿Há cuinújan xi Nina ne, hacuaha jyé quitjen me ta sahmi naja me castigu? (Tichjá cojo nuju sacuaha cjuatacun rë ngu xutajyé.) ⁶ ¡Jéya!
quixiin vë ta, sa xi jyé quitjen Nina ne, sehe cumaji tsichuva me xuta ngasunhndë cojo cjuatacun rë me.

⁷ Cuejña xi cuichja sa ngu xuta cuitjin: Sa xi hitsë sa cuaxëndaja Nina cojo cjuaquixi rë me hya xi sahmi Jain me sacuatjin chja me hacuaha hitsë sa ndaja tsejen xi jyé hnga Nina cojo Hasen rë me ngatsë rë cjuandacha naha ne, ¿má sehe cuatjin tsichuva ná me sacuaha ngu xuta tsejen? ⁸ O sa tsajin ne, cuejña xi cuichja sa ngu xuta cuitjin: Cuanguen nihña cjuatsehen, cojo sa xi cuma cuetjucaa sa cjuandaja. Hisca tjin yahnga xuta xi choho chja me tsijin ta chja me xi cjuatacun vëhë vicuyin, peru quixiin vë. Xuta xi cuacun vë ne, hatuxa satë rë me castigu xi vitexa jyé rë me.

⁹ Sa cuatjin ne, ¿há hitsë sa vengui chjí naja ngayaan xuta tjé rë Israel xi cuma rë xutaxín? ¡Jéya! Ha sehe cachjá ta ngayejen ni, sa xuta tjé rë Israel o sa xutaxín ne, ha nechan ngayejen ni ngajñi rë cjuatsehen. ¹⁰ Cuatjin camahindu xcun xujun rë Nina hiscan xi chja cuitjin:

Tsajin xuta xi tsajin jyé quitjen, hisca ngu me tsajin me;

¹¹ tsajin yo xi vijne rcu, tsajin yo xi vanguise ndiya rë Nina.

¹² Yëjë ni xuta ne, cavetjuxin me tséhë ndiya rë Nina, yëjë ni me ne, camachjiriin me.

Tsajin yo xi ndaja sahmi me. Ndastu ngu ni me tsajin me.

¹³ Cahntsua hntsua me ne, chojyihi sacuaha ngu tsjun xi catuxaha;

neje me ne, suvá cjuandacha visiajmi,

chuxin hntsua me ne, xan rë chu yë hincha ngahma rë;

¹⁴ hntsua me ne, suvá cjuahngatacun quitsë rë.

¹⁵ Cojo ntsacu me ne, ngu hñu sasa cjué tsiquehen xicjin me;

¹⁶ Ndiya xi hincha me ne, suvá xi tsinguetsun ni me cjuatacun rë xuta, hacuaha sua me xuta cjuachoho.

¹⁷ Hvíin camahani me ndiya tséhë cjuajeya.

¹⁸ Tsajin ngu hora xi tsingatahacacun me xi tsacjun me Nina.

Cuatjin chja xujun rë Nina.

¹⁹ Ha hyan ta yéjë ni cjuá xi chja ley rë Nina ne, chja cojo xuta xi siu ngahma rë ley vëhë. Cuatjin xi tsajin yo cuma cuichja xi tsajin mé jyé quitjen. Hacuaha cuatjin xi yéjë ni xuta ngasunhndë vi ne, tsichuva Nina me cojo cjuatacun rë me. ²⁰ Nina ne, cuichjaain me tséhë ngu xuta xi tsajin jyé rë me ngatsë rë xi casahmichihin me sacuatjin chja ley ta, ley ne, sua machaya naja xi ngayejen ne ne, xuta tsehen ngayaan.

Nina ne, tsicjë me jyé naja sa xi mangutacun cojo rë me

²¹ Peru Nina ne, casua me camachaya naja hacutjin tsicjë me jyé naja. Hane hacuiin ngatsë rë ley xi cuatjin sahmi me. Cjuatacun rë Nina vë ne, hisca hatsëe camahindu xcun xujun rë me. ²² Cjuatacun vëhë ne, cuitjin fi: Nina ne, tsicjë me jyé rë xuta xi mangucacun cojo Jesucristu. Cuatjin sahmi Nina cojo yéjë ni xuta xi cuatjin mangucacun me cojo Jesucristu ta Nina ne, tangun ni vutsejen me xutaxín cojo xuta tjé rë Israel. ²³ Yéjë ni xuta ne, sahmi me cjuatsehen, hacuaha chaja camaha sa xi cuechutaha me sacuatjin jyé hnga Nina cojo Hasen rë me. ²⁴ Peru cojo cjuandaja rë Nina ne, tu cjuatjo ni tsicjë me jyé rë xuta, ngatsë rë xi Jesucristu ne, cavechjitje me jyé xi quitjen xuta. ²⁵ Nina ne, catsingatju me Jesucristu xi cueya me xi cuechjitje me jyé rë yéjë ni xuta xi cumangucacun cojo rë me. Cuatjin casahmi Nina, cojo sa xi sua me cumachaya naja xi me vëhë ne, jemu tyjahi me cojo cjuatacun rë me hya xi jemu catsijyécacun me cojo xuta xi caviyuju titjun hacuaha catsingatjuhnga me jyé rë xuta xi cuacun vë. ²⁶ Hacuanitjin ni sua me machaya naja xi jemu tyjahi me cojo cjuatacun rë me quihndë xi titsicjë me jyé xi quitjen xuta xi mangucacun cojo Jesús.

²⁷ Xi cuatjin ne, ¿há cuma naxenndajan yojo naja? ¡Jéya, cumaji! Nina ne, hacuiin tsicjë me jyé naja ngatsë rë xcusun xi nihña ta suvá ngatsë rë xi mangutacun cojo Jesucristu. Vëhë xi choho nuhya rë sa xi naxenndajan yojo naja. ²⁸ Vëhë xi tsejen xi meje rë xi ningatahantacun cuitjin: Nina tsicjë me jyé rë ngu xuta ngatsë rë xi mangucacun xuta jan cojo Jesucristu, hacuiin ngatsë rë ngu ley xi vihndë me.

²⁹ Nina ne, ¿há cuma xi suvá ni xuta tjé rë Israel xi Nina rë me má me? ¡O há cojo xutaxín má me Nina tséhë? Juun, cojo me. ³⁰ Ngu ni Nina xi tacun me. Hane me vëhë tsicjë me jyé rë xuta tjé rë Israel ngatsë rë xi mangucacun xuta jan cojo Jesucristu, hacuaha tsicjë me jyé rë xutaxín xi vatiin me chuxin rë me ngatsë rë xi mangucacun xutaxín cojo Jesucristu. ³¹ Quihndë xi tinújan xi jemu vengui chjí rë xi mangutacun cojo Jesucristu ne, ¿há tininguetsun ngahñu rë ley xi cavitexa Nina? ¡Jéya! Ha hyan ta ley rë Nina ne, hatuxa vengui chjí rë.

4

Hacutjin camá xi café jyé rë Abraham

¹ Sa cuatjin ne, ¿mé cuinújan tséhë xutachanga naja Abraham? ¡Mé xi casacu rë me xi caviyuju me nguehe ngasunhndë? ² Sa xi cachja Nina ta tsajin jyé rë Abraham ngatsë rë cjuandaja xi casahmi Abraham ne, tjin rë Abraham chuva rë xi cuaxéndaja suvá me yojo rë me. Peru cumaji sahmi me cuatjin xcun Nina ta, ³ xujun rë Nina ne, chja cuitjin: “Abraham ne, camangucacun me cojo cjuá xi cachja Nina cojo rë me, hane ngatsë rë vëhë xi catsicjë Nina jyé rë me.” Cuatjin chja xujun rë Nina. ⁴ Ngu xuta xi casahmi me ngu xa naja ne, chjí rë me ne, hacuiin catahan rë me sacuaha ngu cjuandaja xi nihña cojo rë me ta catahan rë me tséhë xi quitjen tséhë xa xi casahmi me tsajan. ⁵ Peru sacuaha ngu xuta xi hacuiin vihi hacuiin vëhë sahmi me xi meje rë me xi chuya rë Nina tséhë me ta tu mangucacun ni me cojo Nina, Nina tsicjë jyé rë xuta tsehen jan. Ngatsë rë xi cuatjin mangucacun xuta jan ne, hatuxa tsicjë Nina jyé rë me. ⁶ Xutachanga naja David ne, hacuaha cachja me hatsëe nixtin tséhë cjuasua xi tjin rë ngu xuta xi Nina tsicjë jyé rë me, hane tsimii sahmi rë há ndaja há ndajin casahmi xuta jan. ⁷ Cuitjin cachja David:

Jemu ndaja tséhë ngu xuta xi catsinchataha Nina jyé rë me, hacuaha xi cafahacuendaain
Nina cjuatsehen xi casahmi me.

⁸ Jemu ndaja tséhë ngu xuta xi hatuxa tsicjë Nai naja jyé rë me.
Cuatjin cachja David.

⁹ Cjuandaja vëhë ne, ¿há suvá cuma tséhë xuta xi cati chuxin rë? ¡Jéya! ta, hacuaha
cojo xuta xi vatiin me chuxin rë cuma ta, tséhë xi ha cachjá ta Nina catsicjë me jyé rë
Abraham ngatsë rë xi camangucacun Abraham cojo Nina. ¹⁰ ¿Janihya catsicjë Nina jyé
rë Abraham? ¿Há cachja me cjua jan hya xi cavatju cati chuxin rë me ne?, o há tsajin
ne, ¿há hya xi cjëe xtí chuxin rë me? Hacuiin hya xi ha cati chuxin rë me ta cachja me
hya xi chaja sa xtí. ¹¹ Hisca xi camá ngascan ne, sehe cati chuxin rë Abraham sacuaha
ngu sellu xi casetaha rë me xi tsejen xi Nina ne, catsicjë me jyé rë Abraham ngatsë rë xi
ha camangucacun me cojo Nina. Cuatjin xi Abraham ne, camatitjun me sacuaha nahmi
tséhë yéjë xuta xi cjuë jyé rë me ngatsë rë xi cumangucacun me cojo Nina handasa
hacuiin xtí chuxin rë me. ¹² Hacuaha Abraham ne, camatitjun me sacuaha nahmi tséhë
yéjë ni xuta xi xtí chuxin rë me hane hacuaha cumangucacun me cojo Nina, ta xuta jan
ne, vetjungui cjuatacun rë xutachanga naja Abraham hya xi chaja sa xtí chuxin rë me.

¹³ Nina ne, cachja me cojo Abraham ta yéjë ngasunhndë ne, cuma tséhë me cojo xuta
xi nduva tjë rë me. Peru hacuiin ngatsë rë xi casahmi Abraham sacuatjin vitexa ley xi
cuatjin cachja Nina cojo rë me ta cachja me cuatjin ngatsë rë xi camangucacun me cojo
Nina. Vëhë xi Nina ne, catsicjë me jyé rë Abraham. ¹⁴ Cuatjin chjá ta, sa xi suvá xuta
xi sahmi sacuatjin chja ley cuma satë rë me cjuandaja xi cachja Nina jan ne, venguiin
chjí rë xi mangutacun cojo Nina, hacuaha machjiriin cjua xi cachja Nina jan. ¹⁵ Cachjá xi
hacuiin ngatsë rë ley xi cuatjin cachja Nina cojo Abraham ta, tséhë xi hiscan xi sahmixa
ley rë Nina ne, ngajan xi cuma xuta castigu. Peru hiscan xi tsajin ley ne, hacuaha tsajin
yo xi vinchajyé rë xuta ta casahmichiin me cjua xi vitexa ley.

¹⁶ Vëhë xi cavejña ngu cacun Nina xi sahmichihiin me cjua rë me cojo xuta xi
cumangucacun cojo rë me, cojo sa xi tsejen ta suvá ngatsë rë cjuandaja rë Nina xi cuatjin
sahmichihiin me cjua rë me cojo xuta. Ngajan xi tjin cjuaquixi xi sahmichihiin Jain Nina
cjua rë me cojo yéjë xuta xi nduva tjë rë Abraham, hacuiin tu suvá cojo xuta xi tjin rë
me ley ta hacuaha cojo xuta xi mangucacun me cojo Nina, sacuatjin casahmi Abraham.
Cuatjin xi Abraham ne, camatitjun me tsajan sacuaha nahmi naja ngayejen ni ngayaan
ngajan xcun Nina. ¹⁷ Nina ne, me vëhë xi camangucacun Abraham cojo me, me vëhë xi
sua cjuañu rë nima, me vëhë xi handasa chaja sa tsindaja me ngu xcusun ne, chja me
tséhë xcusun vëhë sacuaha xi ha catsindaja me. Camahindu xcun xujun rë Nina hiscan
xi cachja me cojo Abraham cuitjin: "Cavejña ri ne, xi cuma titjun ngaye sacuaha nahmi
tséhë jemu cjín xuta." Cuatjin camahindu.

¹⁸ Peru Abraham ne, handasa matsijin hacutjin cuma sahmichihiin Nina cjua xi cachja
me cojo rë me ne, camangucacun me cojo cjua jan, cavetaha cacun me Nina. Cuatjin xi
camatitjun me tséhë jemu cjín xuta, sacuatjin xi ha cachja Nina cojo rë me hya xi cachja
me ta: "Cuitjin cjín cuma xuta xi tjë riji." Cuatjin cachja Nina. ¹⁹ Hane hacuiin quiji
ngaxtun Abraham xi mangucacun me cojo Nina handasa xi ha ngu cientu nu tjin rë me,
hacuaha ha vëe me xi jemu changá camahani camá me cojo chjuun rë me xi sacú rë me
quiñndi. ²⁰ Peru hacuiin quiji ngaxtun me xi mangucacun me cojo cjua xi cachja Nina
cojo rë me ta hitsë sa ndaja camangucacun me. Hacuaha casahmi jyé casahmi hnga me
Nina ²¹ ta, xi tsingatahacacun me ne, hatuxa tjin rë Nina chuva rë xi sahmi chihin me
yéjë ni cjua xi cachja me xi sahmi me. ²² Vëhë xi Nina ne, catsicjë me jyé rë Abraham.

²³ Quiñndi ne, hacuiin suvá tséhë Abraham xi cuatjin camahindu xi catsicjë Nina jyé rë
me ta ²⁴ hacuaha cojo tsajan ngayaan, xi sehe tsicjë Nina jyé naja, ngayaan xi mangutacun
cojo Nina, me xi catsicuya Nai naja Jesucristu cjuañu. ²⁵ Cahme me ngatsë rë cjuatsehen
xi nihña, hacuaha cavuya me cjuañu cojo sa xi cuma cjue jyé naja.

Cavetjuntjen tséhë jyé naja

¹ Quihndë ne, tséhë xi catsicjë Nina jyé naja ngatsë rë xi camangutacun cojo rë me ne, vëhë xi ngayaan ne, ha hindë tsajin sa cjuachan cojo Nina ngatsë rë xi cavaxëtje naja Nai naja Jesucristu. ² Hacuaha ngatsë rë xi camangutacun cojo rë me ne, vëhë xi casacu naja cjuandaja rë me. Hacuaha jemu sua rë xahasen naja cojo ngu cjuetacun xi cuechú nixtin xi cuechuntahan hitsë sacuatjin jyé hnga Nina cojo Hasen rë me. ³ Hane hacuin suvá ngatsë rë cjuetacun vëhë ni ta hacuaha ma sua rë xahasen naja ngatsë rë cjuañihì xi vatjun ta, tséhë xi ha hyan ta cjuañihì ne, vëhë vicuya naja hacutjin scaa naja tu mé ni cjuacjintacun. ⁴ Hane xi scaa naja ne, vëhë sahmi xi chuya rë Nina tsajan, hane xi chuya rë Nina tsajan ne, vëhë sahmi xi cuetahan tacun Nina. ⁵ Hane xi cuatjin cuetahan tacun Nina ne, tsajin nixtin cuetju sava ngayaan ta, tséhë xi Hasen rë Nina xi casua naja me ne, jemu caveya cjuahmutacun rë Nina cahntsua xahasen naja.

⁶ Hya xi tsajin mé camá canihñì suvaan xi naxentjen yojo naja ne, hya cahme Jesucristu xi cuaxëtje me ngayaan xuta tsehen. Cahme me nixtin xi cachja Nina xi cueya me. ⁷ Tsajin cjuaquixi xi ngu xuta sua me yojo rë me xi cueya me ngatsë rë ngu me xi tsajin jyé rë. Hisca ngu xuta ndaja jain ne, hyan sa xi sacu yo xi cuetjucacun xi sua yojo rë xi cueya ngatsë rë me. ⁸ Peru Nina ne, casua me camachaya naja cjuahmutacun xi tjin rë me cojo naja hya xi Jesucristu casua me yojo rë me xi cahme me ngatsë naja, handasa xuta tsehen ngayaan. ⁹ Hane quihndë xi café jyé naja ngatsë rë cjuaveya rë Jesucristu ne, ngajan xi hacuaha tjin cjuaquixi xi ngatsë rë me ne, cuetjuntjen tséhë castigu. ¹⁰ Hya xi condra rë Nina má ngayaan ne, hya camá xutandaja rë me ngayaan ngatsë rë cjuaveya rë Quihndi rë me. Hane quihndë xi camá xutandaja rë me ngayaan ne, tjin cjuaquixi xi ngayaan ne, cuetjuntjen ngatsë rë xi tacun quicun nga me quihndë. ¹¹ Hacuaha jemu sua ma rë xahasen naja ngatsë rë cjuahmutacun rë Nina, cojo ngatsë rë Nai naja Jesucristu, me xi quihndë casahmi xi camá xutandaja rë Nina ngayaan.

Hacutjin casahmi Adán cojo hacutjin casahmi Jesucristu

¹² Ntsacu cavetsihin ne, cavisehen xi hmí cjuatsehen cahntsua cjuatacun rë xuta nguehe ngasunhndë vihi ngatsë rë ngu xuta xi hmí rë Adán. Hane ngatsë rë cjuatsehen ne, cavisehen xi hmí cjuaveya nguehe ngasunhndë. Cuatjin xi yëjë ni xuta ngasunhndë ne, hatuxa hme me ta, tséhë xi yëjë ni me ne, sahmi me cjuatsehen. ¹³ Chaja sa xi sua Nina Moisés ley rë me ne, ha hinchajñi cjuatsehen ngajñi rë cjuatacun rë xuta ngasunhndë. Peru sahmicuendaain me cjuatsehen xi má hiscan xi tsajin ngu ley. ¹⁴ Peru yëjë ni xuta xi caviyuju me ngasunhndë hisca nixtin rë Adán hisca nixtin rë Moisés ne, cahme me. Hisca xuta xi hacuiin tangun cjuatsehen xi casahmi me cojo cjuatsehen xi casahmi Adán ne, hacuaha cojo me cahme me. Hane Adán ne, tjin ngu xcusun hacutjin matangun me cojo Cristu, me xi sehe cuinduva me ta, ngatsë rë Adán ne, cavisehen ngu xcusun nguehe ngasunhndë, hacuaha ngatsë rë Jesucristu, me xi camangascan canduva ne, cavisehen ngu nga xcusun ngasunhndë.

¹⁵ Peru cjuandaja xi sua Nina ne, hacuin tangun cojo cjuatsehen xi casahmi Adán. Ngatsë rë cjuatsehen xi casahmi ngu ni xuta vëhë ne, jemu cjín xuta cahme me. Peru cjuandaja rë Nina cojo cjuandaja xi tisua naja ngu ni xuta xi hmí Jesucristu ne, hitsë sa vengui chjí rë hacuaha jemu ndaja cama rë tséhë jemu cjín xuta. ¹⁶ Cuichjá nga ngu ndiya ta hacuin tangun cavetju tséhë cjuandaja vëhë cojo tséhë cjuatsehen xi casahmi ngu ni Adán. Hya xi Adán casahmi me cjuatsehen vëhë ne, sehe cachja Nina xi sacuha castigu ne, cuechú nixtin xi cueya Adán. Peru quihndë ne handasa xi jemu cjín cjuatsehen sahmi xuta ne, Nina ne, hacuaha sahmi me cjuandaja xi tsicjë me jyé rë xuta. ¹⁷ Ngatsë rë cjuatsehen xi casahmi ngu ni xuta ne, hatuxa cuma rë xuta cjuaveya. Cuanitjin hitsë sa ndaja ta, ngatsë rë ngu ni Jesucristu ne, xuta xi jemu tisacu rë me cjuandaja rë Nina xi tsicjë Nina jyé rë me tu cjuatjo ni ne, hatuxa sacú rë me cjuahñu xatsë.

¹⁸ Véhë xi sacuatjin xi cavetjucaa castigu xi cuma rë yéjë ni xuta ngatsë rë ngu cjuatsehen jan ne, hacuanitjin ni cuetjucaa xi cjuë jyé rë yéjë ni xuta, hacuaha sacú rë me cjuahñu xatsë, ngatsë rë ngu ni cjuandaja jan. ¹⁹ Hacuaha sacuatjin xi jemu cjín xuta camatsehen cjuatacun rë me ngatsë rë xi ngu ni xuta cahndiin me tséhë Nina ne, hacuanitjin ni jemu cjín xuta cuma me xuta xi tsajin jyé rë ngatsë rë xi ngu ni me xi cahndë me tséhë Nina.

²⁰ Cavejña Nina ley hane ngajan xi cama cjín sa cjuatsehen xi sahmi xuta. Peru hiscan xi camacjín sa cjuatsehen ne, ngajan xi cjín sa camatsejen cjuandaja rë Nina. ²¹ Sacuatjin xi hatuxa casahmi xuta cjuatsehen hane cahme me ne, hacuanitjin ni hatuxa sacú rë xuta cjuandaja rë Nina, hane cjuë jyé rë me, sehe sacú rë me cjuahñu xatsë, ngatsë rë Nai naja Jesucristu.

6

Sacuaha xi caveyan xi cuma rë cjuatsehen hane quicun ngayaan xi cuma rë Nina

¹ Xi cuatjin ne, ¿há quixi sa xi cuinújan xi ndatjin xi nihña sa cjuatsehen cojo sa xi vetjutsejen sa cjuandaja rë Nina? ² ¡Jéya, ndajintjin! Ngayaan ne, sacuaha xi caveyan xi cuma rë cjuatsehen. Hane xi ha cavetjuxen tséhë cjuatsehen ne, ha quihndë cumaji camahani cuinechan sa ngajni rë cjuatsehen. ³ ¿Há hyuun ta ngayejen ni ne, hya xi caxtenda ngayaan xi cumatangun ngayaan cojo Jesucristu ne, hacuiin tu xi cuma tangun ni ngayaan cojo rë me ta hacuaha cojo xi cuma tangun ngayaan cojo cjuaveya rë me?

⁴ Ngajan xi sacuaha xi caxinchaniji tangun ngayaan cojo Jesucristu hya xi caxtenda ngayaan, cojo sa xi cuma tsejen xi cumatangun ngayaan cojo cjuaveya rë me. Cuatjin caxinchaniji ngayaan cojo sa xi sacuatjin xi cavuya Jesucristu cjuahñu ngatsë rë Nahmi naja xi jemu jyé hnga me cojo Hasen rë me ne, hacuanitjin ni ngayaan ta sacú naja cjuahñu xatsë xi tivanguen cojo ngasunhndë naja.

⁵ Sa xi camatangun ngayaan cojo ngu cjuaveya sacuaha cjuaveya rë Jesucristu ne, hacuaha cama tangun ngayaan cojo ngu cjuahñu sacuaha cjuahñu xatsë rë me.

⁶ Hacuaha hyan ta ngayaan ne, sacuaha xi casetaha tangun ngayaan cojo Jesucristu xcun cru, cojo sa xi cjuë cuetsun yojo tsehen naja, hane cuatjin xi ha quihndë hacuiin cuanguen nduju sa ndiya rë cjuatsehen. ⁷ Ta yo xi ha cahme ne, ha camandaya tséhë cjuatsehen. ⁸ Sa xi cuatjin caveyan cojo Jesucristu ne, vetahantacun xi hacuaha cuatjin cuinechan cjuahñu cojo rë me. ⁹ Hacuaha hyan ta Jesucristu ne, quihndë xi ha cavuya me cjuahñu ne, ha quihndë cuyaain cueya nga me ngu ndiya. Cjuaveya ne, ha quihndë vitexaain rë me. ¹⁰ Xi cahme me ne, ngu ndiya ni cahme me xi cuma rë cjuatsehen; peru quihndë xi tacun nga me cjuahñu ne, tacun me xi cuma rë Nina. ¹¹ Cuatjin nuju ngayun ne, nihñucuendun ni xi caveyun camahani xi cuma rë cjuatsehen, nihñucuendun xi nechun cjuahñu xi cuma rë Nina xi tjin tangun cjuatacun nuju cojo Jesucristu.

¹² Véhë xi ngayun ne, xicatuun sa cahndë xi cjuatsehen cuitixa nuju; xicanihñuu sa yéjë ni hacutjin meje rë yojo jyé nuju. ¹³ Xicatuun sa yojo nuju cojo cjuatsehen ta tuhun yojo nuju cojo Nina, sacuaha nima xi cavuya cjuahñu ngayun. Yojo nuju ne, mijí rë xi sahmi xa rë cjuatsehen ta meje rë xi sahmi xa rë cjuandaja. ¹⁴ Sacuaha cjuatsehen ne, ha quihndë vitexaain nuju ta, tséhë xi hacuiin ley tivitixa nuju ta cjuandaja rë Nina ne, véhë tivitixa nuju.

Yo meje rë xi tahan yojo naja cojo

¹⁵ Sa cuatjin ne, ¿mé xi ndatjin nihña? ¿Há nihña sa cjuatsehen tséhë xi hacuiin ley tivitixa naja ta cjuandaja rë Nina tivitixa naja? ¡Jéya, hacuiin cuatjin! ¹⁶ Ngayun ne, ha ndaja hyun ta sa xi tuhun yojo nuju cojo cjuatsehen xi cuinuhun tséhë yéjë ni hacutjin vitexa nuju cjuatsehen ne, hatuxa tjihñu ngayun cojo cjuatsehen jan, hacuaha sacú nuju cjuaveya. Peru sa xi tuhun yojo nuju cojo Nina xi cuinuhun tséhë me ne, hatuxa tjihñu ngayun cojo Nina, hacuaha nujuhunyun ndiya rë cjuandaja. ¹⁷ Titjun ne, hatuxa tjihñu ngayun cojo cjuatsehen. Peru nacuechji rë Nina ta quihndë ne, ha canuhun cojo ngu

ñaja xahasen nuju tséhë cjuachacun xi casahmi Nina xi camachaya nuju. ¹⁸ Hane xi ha camandaya ngayun tséhë cjuatsehan ne, catuhun yojo nuju cojo ndiya rë cjuandaja. ¹⁹ Tichjá cojo nuju cojo cjua xi chjaain cuijne rcun, ngatsë rë xi hvë xi jemu chja cuijne rcun cjuatacun xi tichjá cojo nuju. Titjun ne, catuhun yojo nuju cojo cjuatsehan, cojo sa xi suvá cjuatsehan yëjë ni xi nihñu. Peru quihndë ne, cuatjin meje rë xi tuhun yojo nuju cojo ndiya rë cjuandaja cojo sa xi cuma cjué jyé nuju xcun Nina.

²⁰ Hya xi tjihñu ngayun cojo cjuatsehan ne, ndaya tjin ngayun xi cuma rë ndiya rë cjuandaja. ²¹ Peru ¿mé ndajyihi casacu nuju hya? Tsajin, ta quihndë ne, tu ma sava nuju xi ninguitsjun xcusun xi canihñu ta, tséhë xi hya xi cuatjin nihñu ne, suvá cjuaveya sacu naja. ²² Peru quihndë ne, camandaya ngayun tséhë cjuatsehan hacuaha catuhun yojo nuju cojo Nina. Véhë xi tisacu nuju ngu cjuatacun tyjahi xi tsajin cun rë, tisacu nuju ngu xahasen tyjahi, hacuaha hya xi cuijnetaha ne, sacú nuju ngu cjuahñu xatsë. ²³ Sacuaha chjí xi sacu naja tséhë cjuatsehan ne, hacui cjuaveya. Peru cjuandaja xi Nina sua naja me, tu cjuatjo ni sacu naja hya xi tjin tangun cjuatacun naja cojo Nai naja Jesucristu. Hane sacu naja cjuahñu xatsë.

7

Xcusun xi vicuya naja ley rë cjuavixan

¹ Ngayujun ni matsejen ne, ha hyun xi hmí rë ley. Véhë xi ha hyun xi ley ne, vitexa naja jinguyéjë rë xi nechan cjuahñu. ² Sacuaha ngu chjuun xi cavixan na cojo xihin rë na ne, chja ley rë Moisés ta sacuaha xi tjihñu na cojo cha jinguyéjë rë xi tacun cha cjuahñu. Peru sa xi xihin rë na cueya cha ne, na véhë ne, ha ndaya tjin na tséhë cjuavixan xi camá na cojo xihin rë na jan. ³ Véhë xi sa xi tacun cuaha xihin rë na, hane na véhë ne, cjuaha na jingu sa xihin ne, jemu jyé jyé rë na. Peru sa xi cueya xihin rë na jan ne, ndaya tjin na tséhë cjuavixan xi camá na, hacuaha tsajin mé jyé rë na sa xi cuixan nga na ngu ndiya cojo jingu sa xihin.

⁴ Cuanitjin nuju ngayun, sacuaha xi caveyun xi cuma rë ley ngatsë rë Jesucristu cojo sa xi cuma ndaya ngayun tséhë ley, hane cuma tséhë jingu sa me ngayun. Me véhë ne, hacui Jesucristu, me xi cavuya cjuahñu. Cuatjin cavuya me cjuahñu cojo sa xi cuma nihñu cjuandaja xi meje rë Nina. ⁵ Titjun hya xi cavinechan cojo yojo jyé naja ne, ley ne, catsingasca rë cjuatsehan ngajñi rë cjuatacun naja cojo sa xi nihñu cjuatsehan. Hane ngatsë rë cjuatsehan xi canihñu ne, véhë xi cuechuntahan cjuaveya. ⁶ Peru quihndë ne, sacuaha xi caveyan xi cuma rë xcusun xi catsihñu naja, sehe ndaya tjin ngayaan tséhë ley. Cuatjin xi ha quihndë hacuiin tjihñu ngayaan cojo ley changá véhë ta, tjihñu ngayaan cojo cjua xatsë tséhë Hasen rë Nina.

Cjuatsehan xi hincha ngajñi yojo naja

⁷ Tséhë xi quixi cuatjin ne, ¿há cuinújan xi jemu tsehen ley rë Moisés jan? ¡Jéya, hacuiin cuatjin! Peru hveen mé xi hmí rë cjuatsehan hisca xi camachaya ná cjua rë ley jan. Hyá ne hveen xi ndajin tjin xi tsimeje xcusun xi tjin rë jingu sa xuta, hveen hisca xi camachaya ná cjua rë ley xi chja cuitjin: “Xicanimiji xcusun xi tjin rë jingu sa xuta.”

⁸ Ngajan xi ngatsë rë xi camachaya ná cjua rë ley jan ne, cjuatsehan ne, catsingasca rë cjuatacun naha, hane casahmi xi ngahan ne, jemu catsimeje xcusun xi tjin rë jingu sa xuta. Suva hya xi cjéé cumachaya ná cjua rë ley ne, hya xi tsajin mé casahmi cjuatsehan cojo ná. ⁹ Titjun xi hveen xi hmí ley ne, sacuaha xi jemu ndajyihi tejña. Peru hya xi camachaya ná tséhë cjua rë ley jan ne, cavascaya rë cjuatsehan ngajñi rë cjuatacun naha, ¹⁰ hane sacuaha xi cavéya ngahan. Hane cjua rë ley véhë ne, cahndé rë xi cavisecoo ná xi sacú ná ngu cjuahñu xatsë ne, sacuaha xi catsiquehen ná. ¹¹ Cuatjin camá ta, tséhë xi ngatsë rë xi camachaya ná cjua rë ley jan ne, cjuatsehan ne, cavindacha ná. Hane cojo cjua rë ley jan ne, casacu ná cjuaquixi xi xín cavitejña tséhë Nina.

¹² Ngajan xi yëjë ni cjua xi vitexa ley jan ne, hatuxa cjua rë Nina, hatuxa cjuaquixi, hatuxa cjuandaja. ¹³ Xi cuatjin ne, ley xi ndaja jan ne, ¿há cuma xi véhë catsiquehen

ná? ¿Há cuma xi vëhë cavaxëxin ná tsëhë Nina? ¡Jéya, hacuiin cuatjin cama! Cjuatsehen ne, cojo sa xi cumatsejen xi tsehen jain ne, casahmi xa cojo ngu xcusun ndaja cojo sa xi tsiquehen ná. Cuma cuinújan ne, hya xi machaya naja cjua rë ley jan ne, ngajan ma tsejen xi jemu tsehen camahani cjuatsehen.

¹⁴ Ha hyan ta ley rë Moisés jan ne, tsëhë Nina vë. Peru ngahan xi tsëhë ngasunhndë ngahan ne, sacuaha xi caxteña ngahan xi cuíhndë tsëhë cjuatsehen. ¹⁵ Hisca vijniircú xcusun xi sahme. Sahmee xcusun xi meje sahme ta sahme xcusun xi chuyin camahani ná. ¹⁶ Quihndë xi sahme xcusun xi mijí sahme ne, ha ngajan ma tsejen ta ha hvë ta ley ne, jemu ndaja. ¹⁷ Peru xi cuatjin ne, hacuiin ngahan xi sahme cuatjin ta cjuatsehen xi hincha ngajñi yojo naha ne, vëhë xi sahmi cuatjin. ¹⁸ Ha hvë ta sacuaha ngajñi yojo jyé naha vi ne, tsajin camahani hincha rë cjuandaja. Jemu meje sahme cjuandaja, peru maji. ¹⁹ Sahmee cjuandaja xi meje sahme ta tu cjuatsehen xi mijí sahme ne, vëhë sahme. ²⁰ Peru quihndë xi sahme xcusun xi mijí sahme ne, ha ngajan ma tsejen ta hacuiin ngahan xi sahme cuatjin ta, cjuatsehen xi hincha ngajñi yojo naha ne, vëhë xi sahmi cuatjin.

²¹ Ngajan xi ngahan ne, hatuxa cuitjin vátju má: hya xi meje sahme ngu cjuandaja ne, hya vutsején ta tjin mé xi sahmi xi ma sahme cjuatsehen. ²² Ngahan cojo cjuatacun naha ne, jemu chuya ná ley rë Nina. ²³ Peru vutsején ta ngajñi yojo jyé naha ne, jiya sa ngu ley xi hacjahi. Hane ley xi hacjahi jan ne, sacuaha xi ticjan cojo ley xi jiya ngajñi cjuatacun naha. Hacuaha ley xi hacjahi jan ne, hacui ley rë cjuatsehen xi hincha ngajñi yojo naha. Hane vutsején ta ley jan ne, sacuaha xi titsihñu ná. ²⁴ ¡Jemu chocho camahani má ná ngahan! ¿Yo xi cuaxëtje ná tsëhë yojo jyé naha vi ni? ta, ngatsë rë yojo naha vi ne, sacú ná cjuaveya. ²⁵ Suá nacuechji rë Nina ngatsë rë Nai naja Jesucristu ta me vëhë cuaxëtje ná me. Ngajan xi ngahan ne, ngu ladu ne, tjihñu cjuatacun naha cojo ley rë Nina, peru ngu ladu nga ne, tjihñu yojo naha cojo ley rë cjuatsehen.

8

Hacutjin meje rë xi tjenguen ndiya rë Nina

¹ Quihndë ne, tsajin camahani castigu xi cuma naja ngayaan xi tjin tangun cjuatacun naja cojo Jesucristu ta, ² tsëhë xi quihndë xi tjenguen ndiya rë Nina xi sua naja cjuahñu xatsë ngatsë rë xa xi casahmi Jesucristu ne, vëhë xi ha tjin ndaya ngayaan tsëhë ndiya rë cjuatsehen xi sua naja cjuaveya. ³ Xcusun xi camaji casahmi ley rë Moisés ngatsë rë xi caain rë xutajyé sahmi chihin me sacuatjin chja ley ne, Nina ne, camá casahmi me. Nina catsingatju me Quihndi rë me xi cuma me ngu xuta sacuatjin ngayaan xutajyé. Catsingatju Nina Quihndi rë me jan xi tsicjé me cjuatsehen. Vëhë xi quihndi jan xi hmí rë Jesucristu ne, cahme me sacuaha castigu ngatsë rë yéjé ni cjuatsehen xi sahmi xuta jyé. ⁴ Cuatjin casahmi Nina cojo sa xi cuma nihñu sacuatjin vitexa ley ta ngayaan ne, hacuiin tjenguen ndiya hacutjin xi meje rë yojo jyé naja ta tjenguen ndiya hacutjin xi meje rë Hasen rë Nina.

⁵ Xuta xi tjengui me ndiya hacutjin xi meje rë yojo jyé rë me ne, sahmi tangun me cjuatacun rë me cojo xcusun xi meje rë yojo jyé rë me. Peru xuta xi tjengui me ndiya rë Hasen rë Nina ne, sahmi tangun me cjuatacun rë me cojo Hasen rë Nina. ⁶ Xuta xi tsiniya cacun me hacutjin xi meje rë yojo jyé rë me ne, hatuxa sacú rë me ngu cjuaveya ta tsajin jiya Hasen rë Nina cahntsua xahsen rë me, cuechiin me xcun Nina. Peru xuta xi tsiniya cacun me hacutjin meje rë Hasen rë Nina ne, hatuxa sacú rë me ngu cjuahñu xatsë cojo ngu cjuajeya ta ha jiya Hasen jan xahsen rë me hacuaha cuechú me xcun Nina. ⁷ Ngajan xi xuta xi tsiniya cacun me hacutjin xi meje rë yojo jyé rë me ne, hatuxa chocho vëe me Nina ta, tsëhë xi mijí cuihndë me tsëhë cjua xi vitexa Nina. Hisca maji vihndë me tsëhë cjua xi vitexa Nina. ⁸ Xuta xi tjengui me ndiya hacutjin xi meje rë yojo jyé rë me ne, maji sahmi me sacuatjin chuya rë Nina.

⁹ Peru ngayun ne, hacuiin tjengun ndiya hacutjin xi meje rë yojo jyé nuju ta tjengun ndiya rë Hasen rë Nina, sa xi jiya Hasen rë Nina cahntsua cjuatacun nuju. Peru sa xi

ngu xuta tsajin rë me Hasen rë Jesucristu ne, xuta vëhë ne, hacuiin tséhë Jesucristu me. ¹⁰ Peru sa xi jiya Hasen xi sua Jesucristu ngajñi rë cjuatacun nuju ne, yojo nuju ne, sacuaha xi cahme ngatsë rë cjuatsehen, peru hasen nuju ne, sacú rë ngu cjuahñu xatsë ngatsë rë xi Nina ne, tsicjë me jyé nuju. ¹¹ Ha hyan ta Nina ne, catsicuya me Jesús cjuahñu. Hane sa xi jiya Hasen rë Nina ngajñi rë cjuatacun nuju ne, vëhë sahmi xi sua sa Nina cjuahñu rë yojo jyé nuju xi hatuxa hme.

¹² Vëhë xi ngayaan ne, tjin xcusun xi hatuxa meje rë xi nihña, peru mijí rë xi nihña sacuatjin vitexa yojo jyé naja ta ¹³ ngu xuta xi tisahmi me sacuatjin vitexa yojo jyé rë me ne, hatuxa cueya me. Peru ngu xuta xi cojo ngahñu xi sua Hasen rë Nina me ne, titsitjungui me xcusun xi meje rë yojo rë me ne, hatuxa sacú rë me ngu cjuahñu xatsë.

¹⁴ Yëjë ni xuta xi vihndë me tséhë Hasen rë Nina ne, me vëhë xi cjuaquixi xi quihndi rë Nina me. ¹⁵ Hasen xi casacu nuju ne, hacuiin ngu hasen xi tsihñu nuju cojo sa xi rcun nga cuma ngu ndiya ta, hasen vëhë ne, hacui ngu xi sahmi xi cjuaquixi xi cuma ngayun quihndi rë Nina. Hya xi nujan “¡Papá!” Nina Nahmi naja ne, ¹⁶ hya tichja Hasen rë Nina cojo hasen naja xi ngayaan ne, ha quihndi rë Nina ngayaan. ¹⁷ Hane tséhë xi quihndi rë Nina ngayaan ne, vëhë xi hatuxa cuechú nixtin xi satë naja cjuandaja rë me. Hacuaha cojo ngayaan satë naja tséhë cjuandaja xi satë rë Jesucristu ta, tséhë xi quihndë ne, tivatjun cjuañihi sacuatjin cavatju Jesucristu. Vëhë xi hya xi cuma ngascan ne, hacuaha cojo ngayaan cuma yehe cuma hnga ngayaan cojo cjuatacun naja sacuatjin cama jyé cama hnga Jesucristu cojo Hasen rë me.

¹⁸ Xi má ná ngahan ne, tsimii sahmi rë xi tivatjun ngayaan cjuañihi quihndë ta, tséhë xi cjuandaja rë Nina xi sacú naja xi cuma ngascan ne, jercu tu ndaja camahani. ¹⁹ Yëjë ni xcusun xi casahmi Nina nguehe ngasunhndë ne, jemu siuya xi meje xati scuëë hacutjin cún hacutjin má cuma ngayaan quihndi rë Nina. ²⁰ Ta ngasunhndë ne, tu mahya xi siu yëjë ni xi siu. Peru hacuiin hatuxa xcusun xi cacún vë camameje rë xi cuatjin camá ta Nina ne, cuatjin meje rë me xi cuma. Peru tjin ngu cjuetacun. ²¹ Cuechú nixtin xi yëjë ni xi casahmi Nina nguehe ngasunhndë ne, hisca cojo vëhë cuma ndaya ne, ha quihndë hacuiin hatuxa cjuehndu sa ta cuma ndaya sacuatjin cuma ndaya yëjë ni quihndi rë Nina. Hacuaha sacú rë cjuandaja sacuatjin sacú rë quihndi rë Nina cjuandaja. ²² Ha hyan ta hisca quihndë nixtin vihi ne, yëjë ni xi casahmi Nina ngasunhndë vi ne, sacuaha xi tivitsine sacuaha xi vitsine ngu chjuun xi meje tsin rë na quihndi. ²³ Hane hacuiin suvá ni ngasunhndë xi cuatjin tivitsine ta hacuaha cojo ngayaan ne, tivitsine. Ha tjin naja Hasen rë Nina sacuaha hitsë tséhë yëjë ni xi sacú naja xi cuma ngascan. Peru vitsine ta, tséhë xi jemu meje naja xi Nina sahmi naja me quihndi rë me xi cjuaquixi hya xi cuaxëtje me yojo jyé naja. ²⁴ Ngayaan ne, cavetjuntjen cojo sa xi cuetahan tacun Nina. Peru sa xi ha tjin naja ngu xcusun ne, ha quihndë hacuiin cuetahan tacun xi sehe sacú naja xcusun xi ha tjin naja jan. ²⁵ Peru hya xi vetahan tacun xi sacú naja ngu xcusun xi cjëë sacú naja ne, jemu jyé tacun xi nechayan rë.

²⁶ Hacuaha ha chuva vëhë ni ne, Hasen rë Nina ne, visecoo naja, ngayaan xi caain naja nihña cjuandaja. Hisca hyaan jarë cjuandaja rë Nina xi ndatjin xi chjahyan. Peru suvá Hasen rë Nina ne, chjatje ngatsë naja cojo cjuatacun xi hisca cumaji cuinújan cojo cju naja. Vëhë xi sacuaha xi tu fëtacun ni. ²⁷ Hane Nina, me xi vëë yëjë ni xi hincha cjuatacun naja ne, hacuaha vëë me cjuatacun rë Hasen rë me jan ta, tséhë xi Hasen rë me jan ne, hatuxa chjatje ngatsë rë xuta ladu rë Nina sacuatjin meje rë Nina xi cuma.

Nina sahmi me xi cuetjunndajan ngayaan

²⁸ Ha hyan ta yëjë ni xcusun xi má nguehe ngasunhndë vi ne, sahmi Nina xi ndaja tséhë xuta xi hmucacun me Nina, xuta xi cavaxijin Nina sacuatjin xi meje rë me. ²⁹ Hisca ntsacu cavetsihin ne, ha tjin chjinë rë Nina cjuatacun rë yo xi meje rë me xi cuma xuta ladu rë me, hacuaha hisca hya cavejña ngu cacun me xi cuma xuta xi cuacun jan sacuaha Jesucristu Quihndi rë me. Cuatjin meje rë Nina cojo sa xi cuma titjun Jesucristu ngajñi rë jemu cjín xuta xi cuma sacuaha xicjin me. ³⁰ Hacuaha xuta xi cuacun cavejña ngu cacun

Nina jan ne, me vēhë xi cavaxijin Nina me; hacuaha xuta xi cuacun catsicjé Nina jyé rë jan ne, me vēhë xi casahmi yehe casahmi hnga Nina me cojo cjuatacun rë me.

³¹ Quihndé ne, nguehe cuichjá sa ngu cjua cojo nuju. Tséhë xi Nina tacun me ngatsé naja ne, tsajin camahani yo xi cuma sahmi naja condra. ³² Nina ne, catsichuvaain naja me Quihndi rë suvá me ta casua me Quihndi rë me xi cahme ngatsé naja ngayejen ni. Hane vēhë xi hacuaha hatuxa sua naja me yéjë sa xcusun xi ndaja. ³³ Tsajin yo xi cuinchajyé naja, ngayaan xi Nina cavaxijin naja me ta, Nina ne, me vēhë xi tsicjé me jyé naja. ³⁴ Vēhë xi tsajin camahani yo xi ma cjan rë xi ngayaan cún naja. Tsajin ta, Jesucristu ne, me vēhë xi ha cahme me hacuaha ha cavuya me cjuahñu, hane me vēhë xi jemu casahmi jyé casahmi hnga Nina me cojo Hasen rë me ngajan hiscan tacun me cojo rë Nina. Hacuaha me vēhë xi tichjatje me ngatsé naja. ³⁵ Ngajan xi tsajin camahani mé xcusun xi cuaxëxin naja tséhë cjuahmutacun rë Jesucristu, handasa cuatjun cjuañhi, handasa sacuiyiin hacutjin naxentjen yojo naja, handasa yo tsuyihiya tjengui naja cojo cjuahngatacun, handasa cuma jindya nangui naja, handasa cumachaja naja tsian naja, handasa cuinechantahan tsavi xi mé xi cuma naja, handasa tsiquehen naja xuta. Hatuxa tsajin mé xcusun xi cuacun vē xi cuma cuaxëxin naja tséhë cjuahmutacun rë Jesucristu.

³⁶ Hacuaha camahindu ngujo cjua xcun xujun rë Nina xi chja cuitjin: Yéjë ni hora ne, titsiquehen niji xuta ngu jo ngayin ngatsé rë xi ladu nuju ngayin; xi má rë xuta ne, ngayin ne, sacuaha chu tsángá xi cjue cueya chu ngayin. Cuatjin camahindu. Sacuatjin camahindu tséhë xuma xuta xi cuacun jan ne, hacuaha cuatjin tivatjun tijima. ³⁷ Peru caa naja yéjë ni cjuacjintacun vēhë, hisca vetjun ndaja sa ta, tséhë xi Jesucristu ne, visecoo naja me, tséhë xi hmucacun naja me. ³⁸ Hane ngahan ne, camangucácun ta tsajin mé xcusun xi cuma cuaxëxin naja tséhë cjuahmutacun rë Nina: sa cjuaveya sa cjuahñu, sa ángel sa xuta xi ma titjun, sa cjuacjintacun xi tivatjun tijima, sa cjuacjintacun xi sehe nduva, sa xutacjín xi choho vēe naja sa chircun, ³⁹ sa ngajan ngahnga nduva, sa nguehe nangui nduva, o sa tu mé ni xcusun xi yahnga xi casahmi Nina ne, cumaji cuaxëxin naja tséhë cjuahmutacun xi tjin rë Nina cojo naja ngatsé rë xi tjin tangun cjuatacun naja cojo Nai naja Jesucristu.

9

Nina cavaxijin me xuta Israel

¹ Quihndé ne, sacuaha ngahan xi tséhë Jesucristu ngahan ne, nguehe cuichjá cjuaquixi, hacuiin vindácha nuju. Hane tséhë xi jiya Hasen rë Nina ngajñi rë cjuatacun naha ne, vēhë xi hvë cojo cjuatacun naha ta cjua xi chjá ne, cjuaquixi hya xi chjá xi ² jercu tu chocho camahani má ná, jemu jyé cjuava xi jiya cahntsua xahasen naha. ³ Hisca má cúcun ne, cjuéhya rë Nina xi cuaxëxin ná me tséhë Jesucristu sa xi cojo cjuatacun vēhë ne, yéjë ni xuta xi tangun xutachanga naha cojo ne, cuma sacú rë me cjuandaja rë Nina. ⁴ Xuta xi cuacun vē ne, xuta Israel me. Me vēhë xi camá me quihndi rë Nina, camachaya rë me hacutjin jemu jyé hnga Nina cojo Hasen rë me, camachihin ngu jo compromisu rë Nina cojo rë me, casacu rë me ley rë Nina, camachaya rë me hacutjin meje rë xi chjaharcun rë Nina, casacu rë me cjua rë Nina hacutjin sua Nina me cjuandaja. ⁵ Me vēhë xi canduva me tjé rë xutachanga niji, hacuaha tjé rë me vēhë ne, canduva Jesucristu sacuaha ngu xuta. Hane Jesucristu jan ne, me vēhë xi Nina me tséhë jingujyé ni ngasunhndé, hacuaha chjaharcun rë me yéjë nu yéjë nixtin. Cuatjin Jain.

⁶ Hacuiin chjá xi cavetjincaain cjua xi cachja Nina cojo xuta Israel. Ha hyun ta xuta xi canduva tjé rë xutachanga xi hmí rë Israel ne, hacuiin yéjë me xi xuta ladu rë Israel xi cjuaquixi me. ⁷ Hacuaha xuta xi canduva tjé rë Abraham ne, hacuiin yéjë me xi ladu rë Abraham me xi cjuaquixi, ta cuitjin cachja Nina cojo Abraham: "Suvá tjé rë quihndi riji Isaac ne, vēhë ni xuta xi cuma tjé riji xi cjuaquixi." Cuatjin cachja Nina. ⁸ Cuma cuinújan ne, hacuiin yéjë ni xuta xi canduva tjé rë Abraham xi jni xi yojo rë me xi cuma quihndi rë Nina ta, suvá xuta xi tsin me sacuatjin cachja Nina cojo Abraham ne, me vēhë xi cuichjá

Nina xi tjé rë Abraham xi cjuaquixi. ⁹ Cuitjin cachja Nina cojo Abraham hatsëë: “Nixtin xi cuejñá xi cuya nga ne, hya tsin rë na Sara ngu quihndi xihin.” Cuatjin cachja Nina.

¹⁰ Hacuaha hacuiin vëhë ni má yéjé cjua vé ta sacuaha catsijo quihndi rë Rebeca ne, ngu ni nahmi rë, me xi xutachanga niji xi hmí Isaac. ¹¹⁻¹² Hane hisca hya xi cjëe tsin quihndi xi cuacun jan, hacuaha cjëe sahmi xi ndaja xi ndajin ne, hya cachja Nina cojo Rebeca cuitjin: “Quihndi riji xi ngascan ne, cuma titjun tsëhë quihndi tjun.” Cuatjin cachja Nina. Cuatjin camá cojo sa xi cuma tsejen xi Nina ne, tjin rë me chuva rë xi cuaxijin suvá me tu yo ni xi meje rë me, hacuaha tsimii sahmi rë tu mé ni xcusun xi casahmi xuta jan. ¹³ Hacuaha camahindu xcun xujun rë Nina cuitjin: “Cha Jacob ne, catsíhmucacun cha, peru cha Esaú ne, choho cahvë cha.” Cuatjin camahindu.

¹⁴ Xi cuatjin ne, ¿há cuinújan xi Nina ne, cuaaintjin xi sahmi me? ¡Jéya, hacuiin! ta ¹⁵ Nina ne cuitjin cachja me cojo Moisés: “Ngahan ne, sahme cjuandaja cojo yo xi meje sahme cjuandaja cojo, hacuaha cumayuma ná yo xi meje cuma yuma ná.” ¹⁶ Vëhë xi xuta xi sacu rë cjuandaja rë Nina ne, hacuiin xuta xi jemu meje rë, hacuiin xuta xi jemu sahmi vihi sahmi vëhë ta suvá Nina vaxijin me yo xi sua me cjuandaja rë me. ¹⁷ Xcun xujun rë Nina ne, chja Nina cojo me xi ma titjun tsëhë xuta Egipto cuitjin: “Ngahan ne, casahme xi camatitjun ngaye cojo sa xi cuatjin tsingácun rë xuta ngahñu naha, hacuaha cojo sa xi xuta tsëhë yéjé ni ladu ne, cumachaya rë me yo ngahan.” Cuatjin cachja Nina. ¹⁸ Ngajan xi Nina ne, sahmi me cjuandaja cojo yo xi meje sahmi me cjuandaja cojo, hacuaha sahmi me xi mijí cuijne rcu yo xi meje rë me xi cuijnii rcu.

¹⁹ Peru ngu ngayun ne, cuinújun cojo ná cuitjin: “Sa cuatjin ne, ¿mé má chaha rë xuta sahmi Nina? ta, tsëhë xi tsajin yo xi catsingatiin rë xcusun xi meje rë Nina xi cuma.” Cuatjin cuinújun. ²⁰ Peru ngayun xi ngu xutajyé ni ngayun ne, ¿yo ngayun xi cuatjin meje cuinújun cojo Nina? Sacuaha ngu xcusun xi casahmi xuta ne, ¿há cuichja cojo xuta xi casahmi jan cuitjin: “¿Mé má cuitjin jyihí canihñu ná?” Cuatjin cuichja. ²¹ Sacuaha ngu cha chjinetiji ne, hatuxa tjin rë cha xa xi cjuaha cha ngu xtín ndasi ne, tsindaja cha jo tiji. Ngu tiji jan ne, jemu ndajyihi ngu xa xi satë rë, hane tiji xingu jan ne, ngu xa xi chojyihi satë rë.

²² Nina ne, tsëhë xi meje sua me cumachaya rë xuta hacutjin xi jemu cuma cjan rë me hacuaha jemu hñu ngahñu rë me ne, vëhë xi cojo yéjé cjuajeya xi tjin rë me ne, cacaá rë me cojo xuta xi hatuxa cuma cjan rë me cojo, xuta xi cavaxijin me xi hatuxa tsicjé me. ²³ Cuatjin casahmi jyé cacun Nina, cojo sa xi sua me cumachaya rë xuta hacutjin xi jemu tjin rë me cjuandaja cojo xuta xi hatuxa sua me cjuandaja rë me, xuta xi caviyuju chjine Nina cojo tjun sa, cojo sa xi sacú rë xuta jan cjuandaja rë me. ²⁴ Hane xuta xi cuacun vëhë ne, hacui ngayaan xi cavaxijin naja Nina. Hacuiin suvá ngajñi rë xuta Israel cavaxijin me ta hacuaha cojo ngajñi rë xutaxín cavaxijin me. ²⁵ Sacuaha cjua rë Nina xi catsihindu profeta Oseas ne, cuitjin chja:

Xuta xi hacuiin xuta ladu naha me ne, cuechú nixtin xi sahme xuta ladu naha me; hacuaha cojo na xi hacuiin tsíhmucacun ne, cuechú nixtin xi jemu tsíhmucacun na. Cuatjin chja cjua rë Nina.

²⁶ Hacuaha cachja nga Oseas cuitjin:
Ngu cahndé jan ne, cuitjin cachja Nina cojo xuta: “Ngayujun ni ne, hacuiin xuta ladu naha ngayun.” Cuatjin cachja Nina.

Hane handasa cuatjin cachja Nina, peru cuechú nixtin xi ngajan ne, cuma xuta xi cuacun jan quihndi rë Nina quicun.

Cuatjin cachja profeta Oseas.

²⁷ Hacuaha cachja profeta Isaías tsëhë xuta tjé rë Israel cuitjin: “Handasa sacuatjin cjín tsumi tsëhë ndachacun cuatjin cjín cuma xuta tjé rë Israel ne, peru jemu chuva me xi cuetjutje me ta, ²⁸ Nina ne, hatuxa sahmi me castigu nguehe ngasunhndé, hane xi cuechú nixtin vëhë ne, ngutjen ni sahmi me yéjé ni hacutjin xi cavejñá me xi sahmi me.” Cuatjin cachja profeta Isaías. ²⁹ Hacuaha hatsëë ne, cachja nga Isaías cuitjin:

Nina, me xi hatuxa matitjun tséhë yéjë ni xi tjin, sa ngahnga sa ngasunhndë ne, sa xi casuaain naja me xuta xi cuma tjë naja ne,
tangun ni cafë ngayaan sacuatjin cafë camahani xuta nandya Sodoma cojo xuta nandya
Gomorra.
Cuatjin cachja Isaías.

Catsitjungui xuta tjë rë Israel ndiya rë Nina

³⁰ Xi cuatjin ne, cuma cuinújan xi Nina ne, catsicjë me jyé rë xutaxín ngatsë rë xi camangucacun xutaxín jan cojo Jesucristu, handasa hatsëe ne, hisca cuendaain rë xutaxín jan hacutjin sahmi Nina cojo jyé rë me. ³¹ Peru xuta tjë rë Israel ne, handasa jemu casahmi me ngahñu xi meje rë me xi tsicjë Nina jyé rë me ne, peru catsiciin Nina jyé rë me. ³² ¿Mé má cuatjin catsiciin Nina jyé rë me? Catsiciin Nina jyé rë me ta, tséhë xi xuta tjë rë Israel xi cuacun jan ne, meje rë me xi tsicjë Nina jyé rë me ngatsë rë xcusun xi casahmi me xcun ngasunhndë rë me. Peru tséhë xi mijí cumangucacun me cojo Jesucristu ne, vëhë xi sacuaha xi caxtenguiya rë me “ndyojo xi xtenguiya rë xuta”. ³³ Cjua vëhë ne, sacuaha cjua xi cachja Nina xcun xujun rë me xi chja cuitjin:
“Ngahan vejñávasen ngu xihin ngajan ndetjún Sión,
hane xihin jan ne, sacuaha ngu ndyojo xi xtenguiya rë xuta;
peru xuta xi cumangucacun cojo xihin jan ne, tsajin nu tsajin nixtin xi cuetju sava me.”

10

¹ Ngayujun ni matsejen ne, cuichjá cojo nuju ta xahasen naha ne, jemu meje rë xi xuta tjë rë Israel ne, cuetjutje me tséhë jyé rë me. Hacuaha cuatjin féhya rë Nina. ² Cuma cuichjá cojo nuju ta xuta tjë rë Israel ne, hacuaha jercu tsiniya cacun me xi meje rë me Nina. Peru hacuiin ndaja vijnercu me hacutjin chuya rë Nina. ³ Hvíin me hacutjin tsicjë Nina jyé rë xuta. Peru jemu meje tsicjë suvá me jyé rë me. Vëhë xi casuaain me yojo rë me cojo ndiya rë Nina, cojo sa xi Nina tsicjë me jyé rë me. ⁴ Jesucristu ne, me vëhë xi casahmichihin me yéjë ni cjua xi vitexa ley rë Moisés, cojo sa xi yéjë ni xuta xi cumangucacun me cojo Jesucristu ne, cjué jyé rë me.

⁵ Moisés jan ne, hatsëe catsihindu me cjua vihi tséhë xuta xi meje rë me xi cjué jyé rë me ngatsë rë xi sahmi me hacutjin vitexa ley rë Moisés. Cuitjin catsihindu me: “Xuta xi sahmi me sacuatjin vitexa ley ne, sacú rë me cjuahñu xatsë ngatsë rë xi cuatjin sahmi me.” Cuatjin catsihindu Moisés. ⁶ Peru hacuaha cuitjin cachja nga Moisés tséhë xuta xi cjué jyé rë me ngatsë rë xi mangucacun me cojo Nina: “Mijí rë xi ningatehetacuin cuitjin: ¿Yo xi cjueniji hisca ngahnga?” —sacuaha xi cuinduvajne cojo Jesucristu—; ⁷ o ¿Yo xi cjuejne cahntsua nduchin? —sacuaha xi cuinduvaniji cojo Jesucristu xi jiya me ngajñi rë nima. ⁸ ¿Hacutjin chja Moisés xcun cjua rë Nina ni? Cuitjin chja: “Cjua rë Nina ne, ha jemu tiña tacun xi cuma nuju; ha hincha ntsuvun xi cuinújun, hacuaha ha hincha cahntsua xahasen nuju.” Cuatjin cachja Moisés. Cjua rë Nina jan ne, hacui cjua tséhë hacutjin meje rë xi cumangutacun cojo Jesucristu, vëhë cjua xi titihín jimachaya rë xuta. ⁹ Sa xi ninguíxun cojo ntsuvun xi Jesucristu ne, Nina me, Nai nuju me, hacuaha sa xi cojo xahasen nuju macjain nuju xi catsicuya Nina Jesucristu cjuahñu ne, cuétjuntjun tséhë jyé nuju. ¹⁰ Cuatjin cuma ta, tséhë xi macjain naja cojo xahasen naja, sehe tsicjë Nina jyé naja, hacuaha ninguixen cojo ntsuvan hacutjin macjain naja, sehe cuaxëtje naja Nina.

¹¹ Cuatjin ta, cjua rë Nina ne, cuitjin chja: “Yéjë xuta xi mangucacun cojo Nina ne, hatuxa cuetjin savaain me.” Cuatjin chja xujun rë Nina. ¹² Nina ne, tangun ni vutsejen me xuta tjë rë Israel cojo xutaxín ta me xi Nai naja ne, hacui ni me xi Nai rë yéjë ni xuta. Me vëhë xi jemu sua me cjuandaja rë me xi cuma rë yéjë xuta xi fehya rë me. ¹³ Hisca xujun rë Nina ne, cuitjin chja: “Yéjë xuta xi fehya me Nai naja cjuandaja ne, cuetjutje me.” Cuatjin chja xujun rë Nina. ¹⁴ Tjin rë yo xi cuichja cojo ná cuitjin: “Peru ¿hacutjin cuma cjuehya xuta cjuandaja rë ngu xi hisca cjéé cumangucacun me cojo ni?

Hane ¿hacutjin cumangucacun me cojo ngu xi hisca cjëë cumachaya rë me yo ni? Hane ¿hacutjin cumachaya rë me yo jan, sa xi tsajin yo sua cumachaya rë me ni? ¹⁵ Hane ¿hacutjin cuma cjue sua me cumachaya rë xuta yo jan, sa xi cjëë tsingatju Nina me ni?" Cuatjin cuichja. Xujun rë Nina ne, cuitjin chja: "Jemu ndatjin camahani hya xi fehe ngu me xi nduvacojo ngu cjuandajyihu."

¹⁶ Peru chjá ngahan ta hacuiin yéjë xuta cavigndë me tsëhë cjuandajyihu jan. Hacuaha cuatjin chja profeta Isaías xcun xujun rë Nina: "Ngayun, Nai niji, jemu chíuva me xi camangucacun cojo cjua niji." Cuatjin chja Isaías. ¹⁷ Ngajan xi cumangutacun hya xi ha camachaya naja ngu cjua, hane cumachaya naja hya xi yo cuinduva sua cumachaya naja ngu cjua xi chja hacutjin casahmi Cristu.

¹⁸ Peru ¿há cjëë cumachaya rë xuta? chjá han. ¡Jéya, hatuxa camachaya rë me! Chja nga xujun rë Nina cuitjin:

Jingujuyë ni ngasunhndë ne, quiji cjua rë me, hisca hiscan vijnetaha ngasunhndë cavechu cjua rë me.

Cuatjin chja. ¹⁹ Cúya cuichjá nga ngu ndiya: Xuta tjé rë Israel ne, ¿há hvíin me ni? ¡Jéya! hatuxa vëë me ta, tsëhë xi catsihindu Moisés cjua xi cachja Nina cuitjin:

Ngahan ne, sahme xi jemu nihñu cjuaxín ngatsë rë xi sahme cjuandaja cojo xutaxín; tsicján nuju ngatsë rë xi sahme cjuandaja cojo xuta xi hvíin me yo ngahan.

Cuatjin catsihindu Moisés cjua rë Nina. ²⁰ Hacuaha catsacjuiin Isaías hya xi catsihindu me cuitjin:

Xuta xi hacuiin cavanguise ná me ne, me vëhë casacu rë me ngahan;
hacuaha xuta xi cuendaain rë me tsahan ne, me vëhë xi casuá camachaya rë me yo ngahan.

Cuatjin cachja Isaías. ²¹ Peru catsihindu Isaías cjua xi cachja Nina tsëhë xuta Israel cuitjin: "Yéjë nixtin tsahan, xuta xi catsitjungui ná me." Cuatjin catsihindu Isaías cjua rë Nina.

11

Nina ne, cavaxijin me ngu jo xuta Israel

¹ Quihndë ne, tsëhë xi cuatjin catsitjungui xuta Israel ndiya rë Nina ne, cuinengësë nuju ngu cjua: ¿há catsitjungui Nina xuta rë me ni? ¡Jéya, hacuiin cuatjin! Ta ngahan ne, hacuaha ngu xuta Israel ngahan, tjé rë Abraham ngahan, hacuaha tjé rë Benjamín ngahan. ² Hisca ntsacu cavetsihin ne, ha vëë Nina yo xi meje rë me xi cuma xuta ladu rë me, hacuaha tsitjunguiin me xuta xi cuacun vë quihndë. ¿Há vitsijiin nuju hacutjin chja xcun xujun rë Nina hiscan xi catsihindu profeta Elías cjua xi cachjalyë me cojo Nina tsëhë xuta Israel? Cuitjin cachja Elías: ³ "Ngayun, Nai naha, ha catsiquehen xuta profeta nuju hacuaha ha catsinguetsun me cahndé hiscan xi cjue cjuatjo xi cuma nuju. Ha tu suva sa tejña, peru hacuaha hisca cojo ngahan tivanguise ná me xi tsiquehen ná me." Cuatjin cachja Elías. ⁴ Peru ¿hacutjin catsicuya Nina cjua cojo Elías? Cachja Nina: "Ngahan ne, ha cavaxëxen yatu mil xuta, hane xuta xi cuacun jan ne, cjëë cjue cuixcuhnchi me xcun nina ndyojo xi hmí Baal." Cuatjin cachja Nina cojo Elías. ⁵ Hacuanitjin ni quihndë ta handasa jemu camachuva me Peru tjin sa me xi hincha ndiya rë Nina ta, tsëhë xi cavaxijin Nina xuta jan ngatsë rë cjuandaja rë Nina cojo rë me. ⁶ Peru camá ngatsë rë cjuandaja ni rë Nina cojo rë xuta xi cuacun vë, hacuiin ngatsë rë xcusun xi casahmi xuta jan. Ta sa xi cavaxijin Nina me ngatsë rë xcusun xi casahmi me ne, cjuandaja rë Nina ne, sacuaha xi venguiin chjí rë.

⁷ Ngajan xi cuma cuinújan xi hacuiin yéjë xuta Israel xi casacu rë me xi vanguise me ta ngujo ni xuta Israel xi cavaxijin Nina ne, me vëhë ni casacu rë me. Hane me xi yahnga jan ne, Nina casahmi me xi mijí cuijnercu me. ⁸ Camá sacuatjin camahindu xcun xujun rë Nina hiscan xi chja cuitjin: "Nina ne, casua me xuta xi cuacun vë ngu cjuatacun sacuaha cjuatacun rë ngu cha chihi. Vetaain rcu me hacuaha vijnii rcu me. Hisca quihndë ne, cuatjin cún me." Cuatjin camahindu. ⁹ Hacuaha hatsëë cachja David cuitjin cojo Nina:

Meje ná xi yéjë ni cjuandaja xi tuhun rë xuta ne, catuya sacuaha ngu chen, sacuaha ngu changa,

sacuaha ngu xcusun xi xtenguiya rë me, sacuaha ngu castigu xi vangui suvá me.

¹⁰ Meje ná xi catama rcá me, cojo sa xi cumatsijin rë me;
hacuaha catindi ngaxtun me, cojo sa xi tsajin nu tsajin nixtin xi cuma quixi ngaxtun me.
Cuatjin cachja David.

Tivetjutje xutaxín

¹¹ Quihndë ne, cuinengësë nuju ngu cjua vi: Hya xi cavetjuxin xuta tjë rë Israel tséhë ndiya rë Nina ne, ¿há ngu ndiya xa ni cachaja camahani me? ¡Jéya, hacuiin cuatjin! ta ngatsë rë cjuatsehen rë xuta tjë rë Israel xi cuacun jan ne, casua Nina cahndé xi cuetjutje xutaxín, cojo sa xi xuta tjë rë Israel ne, sahmi me cjuachini. ¹² Ngajan xi ngatsë rë cjuatsehen rë xuta tjë rë Israel jan ne, jemu casacu rë xuta ngasunhndë cjuandaja rë Nina. Ngatsë rë xi cachaja xuta tjë rë Israel ndiya rë Nina ne, jemu casacu rë xutaxín cjuandaja rë Nina. Peru sa xi cuatjin camá ne, hya xi sacú nga rë xuta tjë rë Israel ndiya rë Nina ne, jercu sacú sa rë xuta ngasunhndë cjuandaja rë Nina.

¹³ Quihndë ne, ngayun xi xutaxín ngayun ne, nguehe cuichjá sa cojo nuju ngu jo cjua matsejen. Ngahan ne, casuaxa ná Nina xi cjué suá cumachaya rë xutaxín cjua rë Nina. Véhë xi jemu sahme nguñajacacun xa naha, ¹⁴ cojo sa xi cuma chini xuta xi tjë rë xutachanga naha cojo nuju. Hane xi cuatjin ne, cuisécoo rë xi cuetjutje ngu jo me. ¹⁵ Ngatsë rë xi catsitjungui Nina xuta tjë rë Israel ne, véhë cavuxaha ndiya xi cuma xticja si xi tacun ngajñi rë Nina cojo xutaxín. Ngajan xi hya xi cjuahatsja nga Nina xuta tjë rë Israel jan ne, jercu ndajyihi camahani ngu cjuandaja xi cuetjucaa ta, sacuaha xi ngu nima cuya cjuahñu.

¹⁶ Sa xi chjahan ngu rquí nahyu hane cuinújan ta nahyu véhë ne, cuma tséhë Nina, hacuaha cojo yéjë ni nahyu xi vaqui jan ne, hacuaha tséhë Nina. Hacuaha sa xi cuinújan xi tyjama rë ngu ya ne, cuma tséhë Nina, hacuaha hisca cojo tsja rë ya jan ne, hacuaha tséhë Nina.

¹⁷ Hacuaha sa xi xjisun ngujo tsja rë ngu ya olivu ndaja hane cuinduva tsja rë ngu ya olivu nguijña setahacoo cojo ya olivu ndaja jan ne, sehe xi cuatjin cuma ne, tsja rë ya olivu nguijña jan ne, hacuaha sacú rë cjuahñu rë tyjama rë ya olivu ndaja jan. Ngayun xi xutaxín ngayun ne, sacuaha tsja rë ya olivu nguijña má ngayun, xi casacu nuju cjuandaja rë Nina cahndé rë xuta tjë rë Israel xi sacuaha tsja rë ya olivu ndaja má me. ¹⁸ Peru mijí rë xi nihñu yehe yojo nuju hane choho cuinújun tséhë xuta Israel ta, sa xi meje nihñu cuatjin ne, ninguitsjun ta hacuiin tsja rë ya xi tsuvangui rë tyjama rë ta tyjama ne, véhë tsuvanguí rë tsja rë ya.

¹⁹ Cuma cuinújun cojo ná cuitjin: "Peru catsitjungui Nina ngu jo xuta tjë rë Israel cojo sa xi ngahan ne, cuma tséhë Nina ngahan." ²⁰ Cuatjin cuma cuinújun hane cjuaquixi cjua véhë. Ngatsë rë xi camanguaaincacun me cojo Jesucristu ne, véhë xi catsitjungui Nina me. Hane ngayun ne, ngatsë ni rë xi camangutacun cojo Jesucristu ne, véhë xi casacu nuju cahndé vé. Peru mijí rë xi nihñu jyé yojo nuju ta xi meje rë ne, rcun cuma hitsé. ²¹ Cuatjin meje rë ta, tséhë xi Nina ne, sa xi catsinchataain me xuta tjë rë Israel xi hatuxa xuta ladu rë me ne, hacuaha tsinchataain nuju me. ²² Cahyun ni ne, Nina ne, jemu ndaja me peru hacuaha jemu cjan rë me. Ngu ladu ne, jemu cjan rë me cojo xuta xi cavetjuxin me tséhë ndiya rë Nina. Hane ngu ladu nga ne, jemu ndaja Nina cojo nuju, sa xi cuangunxcun cojo cjuandaja rë me. Peru sa tsajin ne, cojo ngayun tsitjungui nuju me.

²³ Hane xuta tjë rë Israel xi cuacun jan ne, sa xi cuiuyuxín me xi manguaaincacun me cojo Nina ne, sacú nga rë me cahndé rë me ta Nina ne, hatuxa cuma sua nga me cahndé véhë. ²⁴ Ngayun xi xutaxín ngayun, hacuiin xuta ladu rë Nina ngayun titjun ne, peru Nina casahmi me ngayun xuta ladu rë me. Hane xi cuatjin sahmi me ne, hitsé sa chjaain sahmi me xi xuta tjë rë Israel ne, cuma nga me xuta ladu rë Nina ta, tséhë xi xuta tjë rë Israel ne, hatuxa xuta ladu rë Nina me titjun.

Cuetjutje xuta tjé rē Israel

²⁵ Ngayujun ni ne, meje ná xi cumachaya nuju ngu cjua xi sehe casua Nina, cjuatahahma xi cjéé cumachaya naja. Meje ná xi cumachaya nuju cojo sa xi hacuiin nihñu yehe yojo nuju. Cjua xi cuichjá cojo nuju ne, cuitjin fi: jemu cjín xuta tjé rē Israel ne, vijnii rcu me cjua rē Nina. Cuatjin cuijnii rcu me hisca hya xi yéjé xutaxín xi cavaxijin Nina ne, cuisehen me ndiya rē Nina. ²⁶ Sehe yéjé xuta tjé rē Israel ne, cuetjutje me tséhë jyé rē me sacuatjin camahindu xcun xujun rē Nina:

Ngajñi rē xuta tjé rē Israel ne, cuetjujñi ngu me xi cuaxëtje rē xuta, hane cuaxëxín me xcusun rē xuta xi tjé rē Jacob xi faharcuaain rē Nina.

²⁷ Hatuxa sahmechehen compromisu naha cojo xuta, hya xi cjuaháxen cjuatsehen rē me. Cuatjin cachja Nina.

²⁸ Ngu ladu ne, tséhë xi catsitjungui xuta tjé rē Israel cjuandajyihi xi chja tséhë Jesucristu ne, vëhë xi chocho vëë Nina me, cojo sa xi ngayun xi xutaxín ngayun ne, satë nuju cjuandajyihi vëhë. Peru ngu ladu nga ne, tséhë xi ha cavaxijin Nina me ne, vëhë xi Nina ne, hmucacun me xuta Israel jan, ngatsé rē xutachanga rē me. ²⁹ Cuatjin ta tséhë xi hya xi vaxijin Nina ngu xuta cojo hya xi sua rē me cjuandaja ne, hatuxa sehe tsindeyaain Nina cjuatacun rē me. ³⁰ Ngayun xi má yun xutaxín, titjun ne, canuhyun tséhë Nina. Peru quihndë ne, camayuma rē Nina ngayun ngatsé rē xi xuta tjé rē Israel ne, hacuaha vihndiin me tséhë Nina. ³¹ Hacuanitjin rē xuta tjé rē Israel jan ta quihndë ne, hacuaha vihndiin me tséhë Nina, cojo sa xi sacú rē me cjuayumatacun rē Nina ngatsé rē xi ngayun ne, casacu nuju cjuayumatacun rē Nina. ³² Nina ne, catsismicacun me yéjé ni xuta, cojo sa xi cuihndiin xuta tséhë me, hane cojo sa xi hacuaha cumayuma rē me ngayéjé ni xuta.

³³ Nina ne, jercu jyihi cjuanchina xi tjin rē me, jercu jyihi cjuatacun xi vechutaha me, jercu vëë me. Maji vijnercun hacutjin tsingatahacacun me. Maji vijnercun hacutjin sahmi Nina. ³⁴ Sacuatjin chja xujun rē Nina ne: “Tsajin yo vëë cjuatacun rē Nina. Tsajin yo camá catsinguixi rē Nina cojo cjua rē me. ³⁵ Tsajin yo xi cojo tjun sa ne, casua rē Nina ngu cjuatjo, cojo sa xi Nina ne, hatuxa sahmi ngojo me cjuatjo rē xuta jan.” Cuatjin chja xujun rē Nina. ³⁶ Yéjé ni xcusun xi tjin ne, Nina catsingatahacacun me sehe catsindaja me ta, tséhë xi meje rē me xcusun xi cuacun vë. Meje rē xi nihña jyé nihña hnga Nina yéjé ni nu yéjé ni nixtin. Cuatjin Jain.

12

Hacutjin meje rē xi cuiyuju xuta ladu rē Jesucristu

¹ Ngayujun ni ne, ngatsé rē yéjé ni xi sehe cachjá cojo nuju ne, vëhë xi meje ná xi ngundiayaxa ni tuhun yojo nuju cojo Nina sacuaha ngu cjuatjo, peru ngu cjuatjo xi quicun, ngu cjuatjo xi hatuxa tséhë Nina, ngu cjuatjo xi chuya rē me. Cuatjin nihñu ta, tséhë xi Nina ne, jemu tjin rē me cjuayumatacun, hacuaha hatuxa ndatjin xi cuatjin chjahanrcun Nina. ² Mijí rē xi cuangun tjengun ndiya rē xuta ngasunhndë vi ta cahndé rē vëhë ne, yéjé ni hora ne, tuhun cahndé xi Nina ne, tsindeya me ngayun xi sua nuju me ngu cjuatacun xatsé. Xi cuatjin ne, sacú nuju cjuaquixi mé xi meje rē Nina xi nihñu, mé xi ndaja, mé xi chuya rē Nina, mé xi cjuaquixi.

³ Nina ne, casuaxa ná me xi cuichjá cojo xuta. Hane vëhë xi chjá cojo nuju ngayujun ni ta, mijí rē xi jemu nihñu yehe yojo nuju ta meje rē xi ningatuhuntacun hacutjin xi cjuaquixi, tu cutjin cjuandaja xi casua nuju Nina xi camá camangutacun jima ngu ngayun cojo Jesucristu. ⁴ Ha hyun ta yojo rē ngu xuta ne, tjin tsja, tjin ntsacu, tjin nguisin, tjin jingu sa xcusun tséhë, peru hacuiin tangun xa xi sahmi yéjé xcusun xi cuacun vë.

⁵ Hacuanitjin naja ngayaan, handasa cjín má ngayaan ne, peru sacuaha ngu ni yojo má ngayaan hya xi tjin tangun cjuatacun naja cojo Jesucristu. Ngu ngu ngayaan ne, sacuaha ntsan má ngayaan ne, ngu ngu ngayaan ne, sacuaha ntsacu má ngayaan, ngu ngayaan ne, sacuaha nguisen má ngayaan, peru ngu ni yojo má ngayaan.

⁶ Vëhë xi xa xi casacu naja jima ngu ngayaan ne, hacuiin tangun ta tu tjin cjuandaja xi casua naja Nina ne, hacuanitjin ni xa xi satë naja. Sa xi casua nuju Nina xa xi

cuinújun cjuatacun rë me cojo xuta ne, tinújun, peru sacuatjin cojo ngahñu xi tjin nuju xi mangutacún cojo Jesucristu ne, cuatjin tinújun. ⁷ Sa xi casua nuju Nina xa xi cuisecun rë jingusa xingueen ne, tisecun rë me. O sa xi casua nuju Nina xa xi cuicuyun cjua rë me ne, ticuyun. ⁸ Sa xi casua nuju Nina xa xi tuhun rë jingu sa xingueen ngu ndiya ndajyihne, cuatjin nihñu. Sa xi casua nuju Nina xa xi cuisecun rë jingu sa xingueen cojo tujún xi ma chaja rë me ne, tisecun rë me cojo ngu xahasen tyjahi, cojo ngu cjuatacun tyjahi. Sa xi casua nuju Nina xa xi chjuhunntsun ngu xa xi satë nuju ne, nihñu xa jan nguñajatacun. Sa xi casua nuju Nina xa xi chjuhuncuendun xuma xingueen xi mé má rë me o mé cjuacjintacun xi tivatju me tijima ne, sehe chjuhuncuendun me cojo cjuasua.

⁹ Mijí rë xi jo xcun jo ntsuvun xi nihmutacún xingu xingu xingueen. Catamachohotacun cojo ndiya rë cjuatsehen, hane tuhun yojo nuju cojo ndiya rë cjuandaja. ¹⁰ Nihmutacun xingun sacuatjin nihñu hmu tacún tsuhun jain. Hacuaha chjuhunrcun xingun sacuaha xi me vëhë xi hitsë sa ma titjun me tsujun. ¹¹ Chjuhuncuendun nguñajatacun cuidadu nuju, hacuiin nihñu tséhë. Meje rë xi sacuaha xi quisechun ngayun xi tisecuun nihñu xa rë Nai naja.

¹² Tuhun cjuasua xahasen nuju ngatsë rë xi Nina vetuhun tacun me. Caticaa nuju yëjë ni cjuañihi xi vatjun má. Hacuaha yëjë ni hora ne, nihñu oración nuju cojo Nina.

¹³ Tisecun rë xuta ladu rë Nina hya xi tjin rë me cjuachaja. Hacuaha cojo cjuandaja chjuhunntsun xuta ngu nangui hya xi fehe me ndya nuju.

¹⁴ Chjahyun cjuandaja rë Nina xi cuma rë xuta xi tsuyiyatiyajengui nuju me cojo cjuahngatacun. Hacuiin chjahyun ngu cjuaxti xi cuma rë me ta ngu cjuandaja chjahyun.

¹⁵ Tuhun cjuasua xahasen nuju cojo xuta xi sua rë me, hane xuta xi jihnda me ne, hacuaha chjiñdun cojo rë me. Xi cuatjin nihñu ne, tsejen xi hmutacún jain me.

¹⁶ Nihñu tangun cjuatacun nuju cojo xingun xingu xingu ngayun. Hacuiin nihñu yehe yojo nuju ta xi meje rë ne, nihñu tangun cojo, handasa xuta xi yuma cjuatacun rë. Hacuaha hacuiin nihñu sacuaha xi jercu vechutaha cjuatacun nuju.

¹⁷ Mijí rë xi nicuyun ngu cjuachan xi casahmi xuta cojo nuju ta xi meje rë ne, nihñu nguyjë xi nihñu cjuandaja xcun yëjë ni xuta. ¹⁸ Sa xi cuma ne, nihñu nguyjë hisca hiscan vechu cjuatacun nuju, cojo sa xi cuma cuinechun ngu cjuandaja ngu cjuajeya cojo yëjë ni xuta. ¹⁹ Cuichjá cojo nuju sacuaha xi quihndi naha ngayun: xicanihñundujun suvun ngu cjuahngatacun xi sahmi xuta cojo nuju ta tuhun cahndé xi Nina ne, cuma cjan rë me cojo xuta xi casahmi jan. Ta Nina ne, cachja me xcun xujun rë me cuitjin: “Ngahan satë ná xi sahme ngojo cojo xuta tsehen; hatuxa ngahan sahme ngojo.” Cuatjin chja Nai naja. ²⁰ Nihñu sacuatjin chja xujun rë Nina xi chja cuitjin: “Xuta xi choho vëë ri me ne, sa xi vojo rë me ne, tehe xi sinë me; hacuaha sa xi xinda rë me ne, tehe xi cuihi me; sa xi cuatjin nihñi cjuandaja vëhë ne, nihñi xi cuma sava rë me.” Cuatjin chja xcun xujun rë Nina. ²¹ Xicatuun cahndé xi cjuatsehan ne, tsinguetsun rë cjuatacun nuju. Cahndé rë vëhë ne, cojo cjuandaja xi nihñu ne, ninguetsun cjuatsehan.

13

Hacutjin cuinuhyan tséhë xutaxa rë

¹ Meje rë xi ngayejen ni ne, cuinuhyan tséhë xutaxa rë ta, tséhë xi tsajin xutaxa rë xi viyuju me sa xi suaain Nina cahndé cuyuju me. Hane xutaxa rë xi siu ne, cuatjin siu me ta, tséhë xi casuaxa Nina me. ² Vëhë xi xuta xi sahmi condra me xutaxa rë ne, sahmi me condra cjua xi Nina cavitexa me. Hacuaha xuta xi cuatjin sahmi condra ne, sacú rë me ngu castigu. ³ Xuta xi sahmi cjuandaja ne, hacuiin tsacjun me xutaxa rë ta xuta xi sahmi cjuatsehan ne, me vëhë xi tsacjun me. ¿Há meje nuju xi tsajin mé rcun xutaxa rë? Nihñu cjuandaja, sehe xutaxa rë ne, cuaxëndaja me ngayun. ⁴ Cuatjin sahmi xutaxa rë ta, tséhë xi casuaxa Nina me xi cuisecoo nuju me. Peru sa xi nihñu cjuatsehan ne, meje rë xi rcun xutaxa rë ta, tséhë xi hacuiin tu mahya xi yaha me xa xi sahmi me castigu ta, tséhë xi casuaxa Nina me xi sahmi me castigu xuta xi hatuxa sahmi cjuatsehan. ⁵ Vëhë xi meje rë xi cuinuhyan tséhë xutaxa rë, hacuiin suvá ni ngatsë rë castigu xi cuatjun cuma ta

hacuaha cojo ngatsë rë xi cojo cjuatacun naja ne, ha hyan ta ndatjin xi cuatjin nuhyan tsëhë me.

⁶ Hacuaha vëhë xi vechjun tujúnsa nuju ta, tsëhë xi hatuxa Nina cavyuju rë me xi fahacuenda me cjuacjintacun vë. ⁷ Tuhun rë jima ngu xutaxa rë xi satë rë me. Me xi faha tujúnsa ne, techjun cojo rë me; me xi faha tujún tsëhë xi xteña ne, hacuaha techjun cojo rë me. Cuatjin tinuhyun tsëhë me xi satë rë xi cuinuhyan tsëhë, hacuanitjin chjuhunrcun me xi satë rë xi chjahanrcun.

Cjuahmutacun ne, vëhë sahmichihin sacuatjin vitexa ley rë Nina

⁸ Mijí rë xi yëjë ni nixtin quitjun tsëhë xuta, ta ngu ni xcusun xi hatuxa quitjen ne, xi nihña hmu tacun xingueen. Cuatjin ta, yo xi sahmi hmu cacun rë xuta ne, ha cojo vëhë ni ne, sahmichihin sacuatjin chja ley rë Moisés. ⁹ Ley vëhë ne, cuitjin chja: “Xicanindesuun cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjë, xicanimuju ngu xcusun xi hacuiin tsujun.” Cjua vëhë cojo yëjë sa cjua xi chja ley jan ne, cuitjin vijne: “Meje rë xi nihñu hmu tacún xuta sacuatjin nihñu hmu tacún suvun yojo nuju.” ¹⁰ Cuatjin chja ley ta, ngu xuta xi tjin rë me cjuahmutacun ne, hacuain choho sahmi me cojo xuta. Vëhë xi hya xi nihña hmu tacun xuta ne, ha nihñachehen sacuatjin chja ley xi cavitexa Nina.

¹¹ Cuatjin meje rë xi nihñu ta, tsëhë xi ha hyun ta ha cavechú nixtin xi ningascun rë cjuatacun nuju ta, tsëhë xi nixtin xi cuetjutjen tsëhë jyé naja ne, hacuiin cjin sa tacun, sacuatjin hya xi sehe tu camangutacun cojo cjua xi chja tsëhë Jesucristu. ¹² Sacuaha xi nixten ne, ha tivatju, hane meje sahasen. Vëhë xi meje rë xi cuejñaxen xcusun xi má nixten, hane cuetseen nihña xcusun xi má nguinixtin. ¹³ Meje rë xi cuetseen nihña cjuandaja, sacuatjin meje rë xi nihña hya xi tuyyehenyan nguinixtin. Mijí rë xi nihña cjuachihi, mijí rë xi va má ngayaan nechan sacuaha xi cheen hya xi tinihña ngu suhi, mijí rë xi nihña cjuachini, mijí rë xi nihña cjuatsehen cojo jingu sa yachjin, o sa xi hisca cojo jingu sa xihin, mijí rë xi chicjanyan tu mé ni xcusun, mijí rë xi nihña cjuaxintacun. ¹⁴ Peru nihñu tangun cjuatacun nuju cojo Nai naja Jesucristu, hane ha quihndë mijí rë xi ningatuhuntacun xi nihñu yëjë ni hacutjin fehya yojo jyé nuju.

14

Mijí rë xi cuinújantahan xingueen

¹ Sacuaha ngu xuta ladu rë Jesucristu xi cjéé ndaja cuijnercu me yëjë ni cjuachacun xi macjain naja ne, tuhun cahndë xi cuisehen me ladu nuju, peru hacuain xi chicjun cojo me ngajñi rë cjuavisiajmi nuju cojo rë me. ² Cuichjá cojo nuju ngu cjua. Yahnga xuta xi ndaja vijne rcu me cjuachacun naja ne, jinë me tu mé ni xcusun comida. Peru yahnga me xi cjéé ndaja cuijne rcu me ne, ndeya ni jinë me. ³ Peru xuta xi jinë me yëjë ni xcusun ne, mijí rë xi sahmi xta me cojo xuta xi jinii yëjë ni xcusun. Hacuaha xuta xi jinii me yëjë ni xcusun ne, mijí rë xi cuichjataha me xuta xi jinë yëjë ni xcusun ta, tsëhë xi ha cafahatsja Nina xuta jan. ⁴ Cuma cuinújin: ¿mé cuenda nuju ngayun xi nújuntuhun rë mosu rë jingu sa xuta ni? Nai rë mosu jan ne, me vëhë cuichja me há ndaja há ndajin xa casahmi mosu rë me. Hane xuta ladu rë Nai naja jan ne, hatuxa cuetju ndaja me ta, tsëhë xi Nai naja ne, ma sahmi me xi cuetju ndaja xuta ladu rë me.

⁵ Cuichjá nga cojo nuju ngu cjua. Yahnga xuta ne, tjin ni nixtin xi jemu faharcun me. Hane yahnga me ne, tangun yëjë ni nixtin xi cuma rë me. Meje rë xi jima ngu xuta ne, catamangucacun me cojo cjuatacun rë suvá me hacutjin meje sahmi me. ⁶ Me xi faharcun nixtin jan ne, hacuaha faharcun me Nai naja xi faharcun me nixtin hya. Hane me xi jinë yëjë ni xcusun comida ne, faharcun me Nai naja xi cuatjin jinë me ta, tsëhë xi sua me nacuechji rë Nina. Hane me xi jinii yëjë xcusun comida ne, hacuaha faharcun me Nai naja xi cuatjin jinii me ta hacuaha sua me nacuechji rë Nina.

⁷ Hisca ngu ngayaan ne, hacuiin nechan cjuahñu ngatsë rë cjuatacun naja suvaan, hacuaha hacuiin cueyan ngatsë rë cjuatacun naja suvaan ta, ⁸ sa xi nechan cjuahñu ne,

nechan ngatsë rë Nai naja, o sa xi cueyan ne, cueyan ngatsë rë Nai naja. Vëhë xi hatuxa tsëhë Nai naja ngayaan ne, sa xi cuinechan cjuahñu o sa xi cueyan. ⁹ Jesucristu ne, cahme me sehe cavuya nga me cjuahñu cojo sa xi cuma me Nai rë nima cojo Nai rë xuta xi siu quicun me.

¹⁰ Vëhë xi tsajin mé tsëhë xi cuatjin nûjantahan rë xingueen, tsajin mé tsëhë xi cuatjin nihña xta cojo xingueen ta, tsëhë xi ngayejen ni ne, hatuxa tjin xi cuechun xcun Nina ne, xi tsichuva me ngayaan cojo cjuatacun naja. ¹¹ Cuitjin camahindu xcun xujun rë Nina cjuá xi cachja me:

Tu tjin xi cjuaquixi xi tejñia ngahan ne,
hacuanitjin ni tjin cjuaquixi cuechú nixtin xi yëjë ni xuta ne, cuinduva cuixcuhnchi me
xcun,
hacuaha yëjë ni xuta ne, cuichja me ta ngahan xi Nina ngahan.
Cuatjin cachja Nina.

¹² Ngajan xi jima ngu jima ngu ngayaan ne, taancuendan rë Nina xcusun xi canihñia.

Mijí rë xi tahan cahndé xi cjuinenguiya xingueen ngajñi rë cjuatsehen

¹³ Vëhë xi ha quihndé mijí rë xi nichuvan xingueen cojo cjuatacun rë. Xi meje rë ne, xi cuejñangutacun xi tsajin nixtin xi nihña ngu xcusun xi sahmi xi cjuinenguiya xingueen ngajñi rë cjuatsehen. ¹⁴ Ngahan ne, tjin tangun cjuatacun naha cojo Nai naja Jesús. Hane ha hvë, hacuaha camangucacun ta tsajin hisca ngu xcusun comida xi hatuxa tsavi xi xinëë. Peru sa xi ngu xuta tsingatahacacun me xi tsavi vihi o tsavi vëhë xi xinëë ne, xi cuma rë suvá me vëhë xi tsavi. ¹⁵ Sa xi cuetsun cjuatacun rë xingun ngatsë rë ngu xcusun xi scuëë me xi xinu ne, ha quihndé tsajin nechunyun ndiya rë cjuahmutacun. Mijí rë xi ninguetun cjuatacun rë xingun ngatsë rë ngu xcusun xi chinu ta, Jesucristu ne, cahme me ngatsë rë me vëhë. ¹⁶ Vëhë xi xicatuun cahndé xi choho cuichja xuta tsëhë xcusun xi ndaja xi nihñu ta, ¹⁷ tsëhë xi hya xi nechan ngahma gubiernu rë Nina ne, cuendaain rë tsëhë tu mé ni xcusun xi chinë o sa xi hyun. Xi sahmi ngu yëjë ne, xi tjin naja ngu xahasen tyjahi, ngu cjuajeya, ngu cjuasua xi sua naja Hasen rë Nina. ¹⁸ Xuta xi cuatjin sahmi me xa rë Jesucristu chuva vëhë ne, hatuxa chuya rë Nina tsëhë me, hacuaha ndaja cuichja xuta tsëhë me.

¹⁹ Vëhë xi cuanguen tjenguen ndiya rë cjuajeya, hacuaha cuisecoon xingueen cojo sa xi cuma jyé sa cjuandaja rë Nina cahntsua xahasen naja xingu xingu ngayaan. ²⁰ Cjuandaja xi casahmi Nina cojo xingueen ne, mijí rë xi ninguetun ngayaan ngatsë rë xcusun xi chinë. Xi cjuaquixi ne, yëjë ni xcusun comida ne, ndatjin xi xinëë. Peru ndajintjin xi xinëë ngu xcusun sa xi vëhë sahmi xi cuixuya ngu xingueen ngajñi rë cjuatsehen. ²¹ Xi ndatjin ne, hacuiin xinë yojo, hacuiin siuhun xan, hacuiin nihña tu mé ni xcusun xi sahmi xi cuixuya ngu xingueen ngajñi rë cjuatsehen. ²² Cjua xi ha macjain nuju ne, catamacjain sa nuju, peru tetjún cjua jan cahntsua cjuatacun nuju suvun cojo sa xi suvá ni Nina vëë me. Jemu ndaja tsëhë xuta xi cjuatacun rë me ne, vinchaainjyé rë me tsëhë cjua xi macjain rë me. ²³ Peru sacuaha ngu xuta xi mangu majo cacun me tsëhë ngu xcusun xi cajinë me ne, quitjen me jyé xi cuatjin cajinë me ta, tsëhë xi hacuiin ngatsë rë xi mangucacun me cojo Jesucristu ne, vëhë xi cajinë me ta mangu majo cacun me xi cajinë me. Hya xi hacuiin ngatsë rë xi mangutacun cojo Jesucristu xi nihña ngu xcusun xi nihña ne, hatuxa quitjen jyé.

15

Meje rë xi nihña xcusun xi chuya rë xingueen

¹ Sacuaha ngayaan xi ndaja vijne rcun cjuatacun xi macjain naja ne, meje rë xi nijyentacun, meje rë xi cuisecoon rë xingueen xi cjëë ndaja cuijne rcu me yëjë ni cjuachacun vëhë. Mijí rë xi nihña sa xcusun xi chuya naja suvaan ni. ² Jima ngu ngayaan ne, meje rë xi nihña xcusun xi chuya rë xingueen, cojo sa xi hacuaha cojo me ndaja tsëhë me, cojo sa xi cuma jyé sa cjuandaja rë Nina cahntsua xahasen rë me. ³ Hisca Jesucristu

ne, hacuiin casahmi me tu cutjin xi cachuya rë suvá me, sacuatjin cjua xi camahindu xcun xujun rë Nina hiscan xi cachja ngu xuta cojo Nina cuitjin: "Cjua xi cachja xuta xi choho cachja tsujun ne, ngahan choho cachja me tsahan." Cuatjin camahindu. ⁴ Yéjë ni cjua xi camahindu xcun xujun rë Nina hatsëë nixtin ne, cuatjin camahindu cojo sa xi sacú naja cjuatacun. Hacuaha camahindu cojo sa xi scaa naja hacuaha sacú naja cjuetacun, sehe hitsé sa ndaja cuetahan tacun Nina. ⁵ Nina xi sahmi xi caa naja, Nina xi sua naja cjuetacun ne, catísua nuju me ngu cjuatacun xi cumatangun cjuatacun nuju cojo xingun xi tjengun ndiya rë Jesucristu. ⁶ Catisua nuju Nina cjuatacun vëhë, cojo sa xi ngayujun ni ne, ngu tangun cuma cjuatacun nuju xi nihñu jyë nihñu hnga Nina Nahmi rë Nai naja Jesucristu.

⁷ Vëhë xi meje rë xi hatuxa chjuhunntsun xingun xingu xingu ngayun sacuatjin cafahatsja naja Jesucristu, cojo sa xi cuma jyë cuma hnga Nina cojo Hasen rë me. ⁸ Chjá cojo nuju ta Jesucristu ne, canduva me xi cuisecoo me ngayun xuta tjé rë Israel. Hane cuatjin sahmichihin Jesucristu cjua xi cachja Nina cojo xutachanga niji. Canduva me xi tsingacun niji me xi Nina ne, hatuxa quixi me cojo cjua xi chja me. ⁹ Hacuaha canduva me cojo sa xi xutaxín ne, sahmi jyë sahmi hnga me Nina ngatsé rë cjuandaja rë Nina. Camahindu xcun xujun rë Nina cuitjin:

Ngahan ne, sahme jyë sahme hnga nuju ngajñi rë xutaxín, hacuaha hisca së tsujun.
Cuatjin camahindu.

¹⁰ Hacuaha chja nga ngu cahndé cuitjin:
Ngayun xi xutaxín ngayun ne, hacuaha tuhun cjuasua xahesen nuju cojo xuta rë Nina.
Cuatjin chja.

¹¹ Hacuaha chja nga cuitjin:
Ngayun xi xutaxín ngayun, nihñu jyë nihñu hnga Nina.
Ngayejen ni xuta ngasunhndé ne, meje rë xi nihña jyë nihña hnga Nina.
Cuatjin chja.

¹² Hacuaha catsihindu Isaías xcun xujun rë Nina cuitjin:
Cuetjucun ngu xuta, tjé rë Isaí,
hane cuma titjun me tséhë yéjë ni xutaxín.
Hane xutaxín jan ne, cuetahacacun me xuta jan.
Cuatjin catsihindu Isaías.

¹³ Nina, me xi sahmi xi ma vetahantacun Nina ne, catísua nuju me cjuasua cojo cjuajeya, ngayujun xi tjin ngu tacún cojo rë Jesucristu, cojo sa xi Hasen rë Nina ne, sua nuju ngahñu xi ndaja cuetuhun tacún Nina.

Sua Pablo machaya rë xuta hacutjin sahmi me xa

¹⁴ Ngayujun ni matsejen ne, ha hvë cojo cjuatacun naha ta ngayun ne, quitsé rë xahesen nuju cojo cjuandaja, ha jemu vechú cjuatacun nuju, hacuaha ma ninguxun cjuatacun rë xingun xingu xingu ngayun. ¹⁵ Ngahan ne, cavetjucáun catsihindu nuju ngu jo cjua vëhë ta, tséhë xi mijí ná xi chaya nuju cjua jan. Cuatjin catsihindu nuju ngatsé rë cjuandaja xi casua ná Nina, ¹⁶ xi sahme xa rë Jesucristu ngajñi rë xutaxín. Tisahme xa sacuaha ngu nahmi, xi tisuá jimachaya rë xutaxín cjuandajyihi xi catsingatju Nina. Cuatjin sahme cojo sa xi cuma suá rë Nina ngu cjuatjo xi chuya rë me. Cjuatjo vëhë ne, hacui xutaxín, xi ha Hasen rë Nina cavaxëxin rë me xi cuma tyjahi cjuatacun rë me xcun Nina.

¹⁷ Vëhë xi ngahan, xi tjin tangun cjuatacun naha cojo Jesucristu ne, ma vaxéndaja hitsé yojo naha tséhë xa rë Nina xi tisahme. ¹⁸ Vetjiincáun xi cuichjá cojo nuju tu mé ni cjua ta, suvá ni cjua tséhë hacutjin cjuatacun xi casua ná Jesucristu xi cachjá cojo xi casahme, cojo sa xi xutaxín ne, cavihndé me tséhë Nina. ¹⁹ Cuatjin camá ta, tséhë xi cojo Hasen rë Nina ne, jemu camá cjuarcun. Cuatjin xi ngahan ne, ha chichihin casuá camachaya rë xuta cjuandajyihi xi chja tséhë Jesucristu, cavétsehen hisca Jerusalén ne, cavéchu hisca hiscan ladu xi hmí Iliria. ²⁰ Hatuxa casahme ngahñu xi casuá camachaya rë xuta cjuandajyihi jan hiscan xi cjëë camahani cumachaya rë xuta yo xi Jesucristu,

cojo sa xi hacuiin hiscan xi tacunvasen xa xi jingu sa casahmi ne, ngajan cjué sahmejyé.
21 Casahme sacuatjin camahindu xcun xujun rë Nina hiscan xi chja cuitjin:
 Xuta xi cjéé cumachaya rë me tséhë me ne, cumachaya rë me;
 hacuaha xuta xi cjéé cuihndë me ne, cuijnercu me.
 Cuatjin camahindu.

Vejña Pablo xi cjue me Roma

22 Ngatsë rë vëhë xi casacuiin camahani ná cahndé xi cjué tjéngë nuju. **23** Peru quihndë xi cajnetaha xa xi sahme ladu vihi, hacuaha jemu hatsëë xi meje cjué tjéngë nuju ne,
24 meje scusehenya nuju xi cuátju nangui nuju hya xi cjué ngajan nación xi hmí España. Hane nixtin xi cuitejñataha hitsë cojo nuju ne, meje ná xi cuisecun ná hitsë xi cjué hisca España. **25** Peru ndicumaha ni ne, cjué nandya Jerusalén, xi cuisécoo rë xuta ladu rë Nina jan ta, **26** tséhë xi xuta ladu rë Nina ngajan estadu Macedonia cojo xuta ladu rë Nina nguehe estadu Acaya ne, ndaja catsingatahacacun me xi tsingatju me ngu cjuandaja xi cuma rë xuta yuma xi siu ngajni rë xuta ladu rë Nina ngajan Jerusalén. **27** Ndatjin xi cuatjin catsingatahacacun xuta xi cuacun vë ta, tséhë xi sacuaha xi quitjen me tséhë xuta nangui Israel. Tséhë xi xutaxín ne, casatë rë me cjuandajiyihi xi casua Nina camachaya rë xuta tjé rë Israel, vëhë xi hacuaha satë rë me xi cuisecoo me xuta nangui Israel tsë tsë tujún xi tjin rë me. **28** Ngajan xi hya xi ha casahmechehen cjuacjintacun vëhë hacuaha ha casahme entregadu tujún jan ne, **29** sehe cuétju cjué España. Hane xi cuátju nangui nuju ne, cjué scusehenya nuju. Hacuaha hvë ta jemu sua naja Jesucristu cjuandaja rë me hya xi cjué tjéngë nuju.

30 Ngayujun ni matsejen ne, ngatsë rë xi tjin tangun cjuatacun nuju cojo Nai naja Jesucristu hacuaha ngatsë rë cjuahmutacun xi sua nuju Hasen rë Nina ne, vëhë xi féhya nuju xi nihñu tangun cjuatacun nuju cojo ná, hane chjahyun rë Nina cjuandaja rë me xi cuma ná. **31** Cuatjin nihñu ngatsë na, cojo sa xi cuaxétje ná Nina tséhë xuta xi vihndiin me tséhë Nina ngajan Judea. Hacuaha chjahyun rë Nina cjuandaja xi cuma ná cojo sa xi hya xi cjuécane tujún ngajan Jerusalén ne, chuya rë xuta ladu rë Nina xi cuatjin sahme. **32** Cuatjin chjahyun rë Nina cojo sa xi, sa meje rë me ne, cuma cjuéjtjéngë nuju cojo cjuasua hacuaha cuitejñajenda hitsë cojo nuju xi cuéchutaha nuju. **33** Nina, me xi sua naja cjuandaja cjuajeya ne, catsicoo nuju me ngayujun ni. Cuatjin Jain.

16

Tsingatju Pablo nina rë me

1 Nguehe cuichjá cojo nuju ta na Febe xingueen ne, jemu xuta ndaja na. Casatë rë na xa xi visecoo na xuta ladu rë Jesucristu xi ma tangun me nguehe nandya Cencrea. **2** Vëhë xi chjá cojo nuju ta, chjuhunntsun na sacuatjin xi meje rë xi nihñu ngayaan xi ladu rë Nina ngayaan. Chjuhunntsun na ta, tséhë xi na vëhë ne, hacuaha tjin tangun cjuatacun rë na cojo Nai naja. Hacuaha tisecun rë na tu mé ni xcusun xi cuma meje rë na ta, tséhë xi na vëhë ne, jemu cjín xingueen xi cavisecoo na. Hacuaha hisca ngahan ne, jemu cavisecoo na ngahan.

3 Tuhun nina naha na Priscila cojo cha Aquila xihin rë na. Xuta xi cuacun vë ne, jemu sahmi me xa rë Jesucristu sacuatjin sahme ngahan, **4** hacuaha hisca cavyujutaha tsavi me yojo rë me xi cavaxétje ná me. Vëhë xi jemu suá nacuechji rë Nina. Hacuaha hacuiin ngahan suva ni ta cojo yéjë xutaxín xi matangun me tséhë xi camá me ladu rë Jesucristu ne, hacuaha sua me nacuechji rë Nina. **5** Hacuaha tuhun nina naha yéjë xuta ladu rë Jesucristu xi matangun me ndava na Priscila cojo cha Aquila. Hacuaha ngu cha xi jemu vinga ná ne, cha Epeneto ne, tuhun rë cha nina naha. Cha vëhë xi tjun tjun camangucacun cha cojo Jesucristu ngajan estadu Asia. **6** Hacuaha tuhun nina naha na María, na xi jemu cavisecoo nuju jan. **7** Hacuaha tuhun nina naha Andrónico cojo Junias xingueen, me xi cavitejñaya tangun cojo ndavaya jan. Me vëhë ne, jemu jyé hnga me

cojo cjuatacun rë me ngajñi rë yéjë ni apóstol, hacuaha hitsë sa tjun me cavisehen me ladu rë Jesucristu xi cuma ná ngahan. ⁸ Tuhun nina naha cha Amplias, cha xi jemu vinga ná, tséhë xi tjin tangun cjuatacun niji cojo Nai naja. ⁹ Tuhun nina naha cha Urbano, cha xi jemu sahmi xa rë Jesucristu sacuatjin tinihña ngayaan. Hacuaha tuhun nina naha cha Estaquis, cha xi jemu vinga ná jan. ¹⁰ Tuhun nina naha cha Apeles, cha xi suvá tsejen xi jemu ndaja tjin tangun cjuatacun rë cojo Jesucristu. Hacuaha tuhun nina naha yéjë ni xuta rë cha Aristóbulo.

¹¹ Tuhun nina naha cha Herodián xingueen. Tuhun nina naha yéjë xuta rë Narciso, me xi hacuaha tjin tangun cjuatacun rë cojo Nai naja. ¹² Tuhun nina naha na Trifena cojo na Trifosa, na xi jemu sahmi xa rë Nai naja. Tuhun nina naha na Pérsida, na xi jemu vinga naja jan. Na vëhë ne, hacuaha jemu casahmi na xa rë Nai naja. ¹³ Tuhun nina naha cha Rufo, cha xi cavaxijin Nina xi tjin tangun cjuatacun rë cojo Nai naja. Hacuaha tuhun ngu nina naha cojo naa rë cha ta, me vëhë ne, sacuaha naa naha me. ¹⁴ Tuhun nina naha cha Asíncrito, cha Flegonte, cha Hermas, cha Patrobas, cha Hermes, hacuaha cojo sa yéjë xingueen xi siu me cojo cha xi cuacun vë. ¹⁵ Tuhun nina naha cha Filólogo, na Julia, cha Nereo cojo na tichja cha, cha Olimpas, hacuaha cojo sa yéjë xuta ladu rë Nina xi siu me cojo me xi cuacun vë.

¹⁶ Tuhun rë xingun nina, cojo cjuandaja cojo cjuahmutacun cuitatsuhun xingun, sacuatjin xcusun naja. Yéjë xuta ladu rë Jesucristu ne, hacuaha tsingatju me nina nuju.

Ngu nga conseju xi sua Pablo

¹⁷ Ngayujun ni ne, cuichjá cojo nuju ta meje rë xi chuhuncuendun yo xuta xi sahmi xi chicjun cojo xingun, yo xuta xi sahmi xi cjuinenguiya ngu xingueen ngajñi rë cjuatsehen ta, tséhë xi xcusun xi sahmi me ne, sahmi condra rë cjuachacun xi ha cachutayun. Naxunxun yojo nuju tséhë xuta xi cuacun vë ta, ¹⁸ tséhë xi vihndiin me tséhë Nai naja Jesucristu ta xi meje ni rë xahasen rë suvá me ne, vëhë ni xi vihndë me tséhë. Hane cojo cjuahaxi xi visiajmi me ne, vindacha me xuta xi hvíñin ndiya rë cjuatsehen. ¹⁹ Yéjë ni xuta ne, ha machaya rë me cjua tséhë hacutjin xi ngayujun ni ne, jemu ndaja nuhyun tséhë Nai naja. Vëhë xi jemu ndama ná. Jemu meje ná xi cuechutaha sa cjuatacun nuju, pero xi nihñu cjuandaja. Hane cjuatsehen ne, meje ná xi sacuaha xi hyuun ndiya rë. ²⁰ Hane cuechú nixtin xi Nina, me xi sua naja cjuandaja cjuajeya ne, ngutjen cuatéçja me cjuatsehen xi sahmi Satanás ngajñi nuju. Cjuandaja rë Nai naja Jesús ne, catisehen cahntsua xahasen nuju.

Jingusa me tsingatju me nina rë me

²¹ Cha Timoteo, cha xi sahmi tangun cojo ná xa rë Jesucristu ne, tsingatju cha nina nuju. Cojo cha Lucio, cha Jasón, cojo cha Sosípater xingueen ne, hacuaha tsingatju cha nina nuju.

²² Ngahan, Tercio, xi titsihindu cjua rë Pablo xcun xujun vihi ne, hacuaha tsingátju nina nuju ngayujun ni xi tjin tangun cjuatacun nuju cojo Nai naja.

²³ Cha Gayo, cha xi casua ndava xi tejña ngahan ne, hacuaha sua cha ndava cha xi ma tangun yéjë ni xuta ladu rë Jesucristu ne, tsingatju cha nina nuju. Cha Erasto, cha xi má tesorero tséhë nandya vihi ne, tsingatju cha nina nuju. Cha Cuarto xingueen ne, hacuaha tsingatju cha nina nuju.

Pablo ne, vaxéndaja me Nina

²⁴ Cjuandaja rë Nai naja Jesucristu ne, catama tsujun ngayujun ni. Cuatjin jain. ²⁵ Tahan nacuechji rë Nina ta, Nina ne, ma sahmi me xi viyuju cahndé cjuatacun nuju cojo cjuandajyঃ ihi xi chja tséhë Jesucristu, cjuandajyঃ ihi xi ngahan cojo jingu sa apóstol ne, tihín machaya rë xuta. Cjuandajyঃ ihi vëhë ne, hacui ngu cjua xi jiyahma hisca hya xi cjéë cumandaja ngasunhndé. ²⁶ Peru hisca quihndé casua Nina camachaya naja cjuandajyঃ ihi jan, quihndé xi casahmi me xi profeta ne, camá catsihindu cjua rë me. Hane Nina xi tsajin nu tsajin nixtin cjué me ne, ngatsé rë xi cuatjin cavitexa me ne, vëhë xi camachaya

rë xuta tséhë yéjë ni nación yéjë ni ladu cjuandajyih vëhë, cojo sa xi yéjë ni xuta ne, cumangucacun me hacuaha cuihndë me tséhë Nina.

²⁷ Ngu ni Nina xi vëe yéjë ni cjuatacun ne, nihñä jyë nihñä hnga me yéjë nu yéjë nixtin ngatsë rë Jesucristu. Cuafjin jaín.

Carta xi tjuntjun catsihindu San Pablo xi cafahatsja xuta nandya Corinto

¹ Ngahan Pablo ne, casuaxa ná Jesucristu xi má ngahan apóstol tséhë me, tséhë xi cuatjin xi meje rë Nina. Hane ngahan cojo cha Sóstenes xingueen ne, ² ningatjin ngu xujun vi tsujun, ngayujun ni xuta Corinto xi hacuaha xuta ladu rë Nina ngayun, ngayun xi cavaxijin Nina ngayun, tséhë xi tjin tyjahi cjuatacun nuju cojo Jesucristu. Hacuaha ningatjin xujun vihi tséhë yéjë xuta xi faharcun me Nai naja Jesucristu jinguyjé ni cahndé. Jesucristu jan ne, Nai rë xuta xi cuacun vëhë me, hacuaha Nai naja ngayaan me. ³ Nina Nahmi naja cojo Nai naja Jesucristu ne, catisua nuju me cjuandaja cjuajeya.

Ximinchacun xi casua Jesucristu

⁴ Yesen ni suá nacuechji rë Nina ngatsë nuju ngayujun ni cojo ngatsë rë cjuandaja rë Nina xi casua nuju me quihndë xi tjin tangun cjuatacun nuju cojo Jesucristu. ⁵ Suá nacuechji rë Nina ta, quihndë xi tjin tangun cjuatacun nuju cojo Jesucristu ne, casua nuju Nina yéjë ni. Casua nuju me chuva rë hacutjin ndaja cuinújun hacuaha ndaja cuijercun cjua rë me. ⁶ Cjuandajyihu xi chja tséhë Jesucristu ne, jemu ndaja cavisehen cahntsua xahasen nuju. ⁷ Véhë xi ngayun ne, tsajin ngu cjuandaja rë Nina xi machaja nuju, jinguyjé rë xi cuinechunyun rë nixtin xi cumatsejen nga Nai naja Jesucristu. ⁸ Cuiseecoo nuju Nina xi cuejñu hñu cjuatacun nuju jinguyjé rë xi nechun cjuahñu, cojo sa xi ngayun ne, tsajin mé jyé tjin nuju nixtin hya xi cuya nga Nai naja Jesucristu. ⁹ Nina ne, hatuxa sahmichihin me yéjë cjua xi chja me, hacuaha me vëhë xi cavaxijin nuju me xi nihñu tangun cjuatacun nuju cojo Quihndi rë me, Nai naja Jesucristu.

Hacuiin ngu tangun ni siu cjuatacun rë xuta rë yungun

¹⁰ Ngatsë rë xi casuaxa ná Nai naja Jesucristu ne, cuichjá cojo nuju ta meje ná xi ngu tangun ni cjua cuinújun ngayujun ni, hacuiin xi cuisecjun cjua nuju. Nihñu tangun cjuatacun nuju cojo xingun. ¹¹ Cuatjin chjá cojo nuju ta, tséhë xi xuta rë Cloé ne, casua me camachaya ná xi tjin si ngajni nuju cojo xingun. ¹² Cuma cuinújan ne, ngujo ngayun ne, nújun cuitjin: “Ladu rë Pablo ngayin”; hane ngujo nga ngayun ne: “Ladu rë Apolos ngayin”; hane ngujo nga ngayun ne: “Ladu rë Pedru ngayin”; hane ngujo nga ngayun ne: “Ladu rë Cristu ngayin.” Cuatjin nújun. ¹³ Peru ¿há tjin jo jyan Cristu? ¿Há Pablo casetaha me xcun cru ngatsë nuju? ¿Há tsajin ne, há caxtenda ngayun xi ladu rë Pablo cuma ngayun? ¡Hacuiin cuatjin! ¹⁴ Hisca suá nacuechji rë Nina ta hisca ngu ngayun ne, cavitendaan nuju, suvá ni cha Crispo cojo cha Gayo xi caviténda cha. ¹⁵ Xi cuatjin camá ne, tsajin yo xi cuichja xi caxtenda ngayun xi cuma ngayun xuta ladu naha. ¹⁶ Haan, hacuaha caviténda sa xuta rë Estéfanas. Peru hveen há tjin sa xi caviténda. ¹⁷ Cuatjin casahme ta, tséhë xi hacuiin catsingatju ná Jesucristu xi cuiténda xuta ta catsingatju ná me xi suá cumachaya rë xuta cjuandajyihu xi chja tséhë me. Hacuaha hacuiin catsingatju ná me xi cuichjá sacuaha chja ngu xuta xi jemu ndaja nuhya rë, hane cuahacuenda xuta cjua naha cahndé rë xi cuahacuenda me ngahñu rë cjuaveya rë Jesucristu ngajan xcun cru.

Tjin rë Jesucristu ngahñu rë Nina hacuaha tjin rë me cjuatacun rë Nina

¹⁸ Cuatjin mijí rë xi chjaháyahá rë ngahñu rë cjua rë cjuaveya rë Jesucristu xcun cru ta, tséhë xi cjua vëhë ne, handasa ngu cjuaveya cjuangarca xi má rë xuta xi tivetjintjiin me, peru xi cuma naja ngayaan xi tivetjuntjeen ne, cjua vëhë ne, tjin rë ngahñu rë Nina.

¹⁹ Cuitjin camahindu xcun xujun rë Nina cjua xi cachja Nina:

Tsinguétsun cjuatacun rë xuta xi jemu vechú cjuatacun rë,
hacuaha cjuatacun rë xuta xi jemu ndaja vijnercu me ne, tsinguejñu rë.
Cuatjin camahindu.

²⁰ ¿Jarë cha xi jemu vechú cjuatacun rë? ¿Jarë cha xi vicuya cjuachacun? Hacuaha ¿jarë cha xi jemu ndaja ma visiajmi nixtin vihi? ¡Nina ne, catsicuya me suvá cjuangarca cjuatacun xi jemu vëë xuta ngasunhndë vi! ²¹ Nina ta vechutaha Jain cjuatacun rë me ne, cavejña ngu cacun me xi xuta ngasunhndë ne, cumaji sacúse rë me cojo suva ni cjuatacun rë me yo xi Nina. Cahndé rë vëhë ne, Nina ne, camameje cuaxëtje me xuta xi mangu cacun cojo rë me ngatsë rë cjuandajyhi xi nujin, handasa xi má rë xuta ne, ngu cjuangarca cjuandajyhi vëhë.

²² Xuta tjé rë Israel ne, meje rë me xi sahmi Nina cjuarcun, hane xutaxín ne, vanguise me xi jemu cuechú cjuatacun rë me. ²³ Peru ngayin ne, tihin machaya rë xuta cjua tséhë me xi catsingatju Nina, me xi cahme xi casetaha xcun cru. Ngu ladu ne, cjua vëhë sahmi xi xuta tjé rë Israel ne, sahmi condra me Nina. Hane ngu ladu nga ne, cjua vëhë ne, ngu cjuangarca xi má rë xutaxín. ²⁴ Peru xi cuma rë xuta xi Nina cavaxijin rë me, sa xuta tjé rë Israel o sa xutaxín ne, me xi Nina catsingatju rë jan ne, tjin rë me ngahñu rë Nina hacuaha tjin rë me cjuatacun rë Nina. ²⁵ Hya xi machaya rë yahnga xuta yéjé xcusun xi choho cavatju Jesucristu camá ne, tsingataha cacun me xi Nina ne, jemu ngarca me hacuaha jemu ndaya cacun me. Peru hacuiin cuatjin ta, xcusun xi cuacun vë ne, tsingacun naja xi Nina ne, hitsë sa jercu vechú cjuatacun rë me xi cuma rë xuta xi jercu vechú cjuatacun rë, hacuaha hitsë sa jercu tjin rë me ngahñu xi cuma rë xuta xi jercu tjin rë ngahñu.

²⁶ Ngayujun ni ngayun ne, ha hyun ta Nina cavaxijin nuju me handasa hacuiin cjín ngayun xi vechú cjuatacun nuju, hacuiin cjín ngayun xi jercu tjin nuju ngahñu, hacuaha hacuiin cjín ngayun xi nchina ngayun. ²⁷ Peru Nina ne, cavaxijin me xuta ngasunhndë xi ngarca, cojo sa xi tsisava me xuta xi jercu vechú cjuatacun rë. Hane cavaxijin me xuta ngasunhndë xi ndaya cacun, cojo sa xi tsisava me xuta xi jercu hñu ngahñu rë. ²⁸ Hacuaha Nina ne, cavaxijin me xuta ngasunhndë xi yuma, xuta xi maxta tséhë, xuta xi venguin chji rë, cojo sa xi tsinguetsun Nina cjuatacun rë xuta xi jemu vengui chji rë xi má rë xuta ngasunhndë. ²⁹ Xi cuatjin ne, yéjé xuta ne, cumaji cuaxëndaja me yojo rë me xcun Nina. ³⁰ Hane ha suvá Nina casahmi tangun me cjuatacun nuju cojo Jesucristu. Hacuaha Nina vuxaha me cjuatacun naja, xi mangutacun cojo Jesucristu. Hacuaha ngatsë rë Jesucristu ne, fë jyé naja xcun Nina, tséhë Nina má ngayaan, hacuaha vetjuntjeen. ³¹ Cuatjin Jain má cojo sa xi nihña sacuatjin quitaha xcun xujun rë Nina hiscan xi chja cuitjin: “Sa xi yo xi meje cuaxëndaja yojo rë ne, catastendaja yojo rë, peru xi tséhë Nai naja.”

2

Chuva rë xi cachja Pablo cjua rë Nina

¹ Peru ngayujun ni ne, hya xi céjé nangui nuju ne, cachjaan cojo nuju cjua rë Nina sacuaha xi jemu ma chjá o sa sacuaha xi jemu vechú cjuatacun naha. ² Cuatjin casahme ta, tséhë xi cavejñá cjuatacun naha xi ngu ni Jesucristu xi cahme me xcun cru tsingátaha cacún tséhë me, jinguyéjé rë xi cuitejñataha cojo nuju. ³ Hacuaha hya xi cavitejñataha cojo nuju ne, jemu ndaya cacún, hisca fatsë ngahan xi tsácjún. ⁴ Hacuaha hya xi cachjá cojo nuju cjua rë Nina ne, hacuiin jemu cjua yehe casahmexa cojo xi meje sahme xi cuijne tacún ta cajne tacún ngatsë rë ngahñu xi tjin rë Hasen rë Nina. ⁵ Cuatjin camá cojo sa xi cumangu tacún cojo Nina, peru hacuiin ngatsë rë cjuatacun rë xuta ta ngatsë rë ngahñu xi tjin rë Nina.

Cjuatacun rë Nina xi jercu vechú

⁶ Peru cojo xuta xi vechútaha cjuatacun rë me xi mangucacun me cojo Jesucristu ne, nujin cjuatacun xi jemu vengui chjí rë. Peru cjuatacun vëhë ne, hacuiin cjuatacun tséhë xuta ngasunhndë vihi, me xi titsinguetsun Nina cjuatacun rë. ⁷ Cjuatacun vëhë ne, vëhë cjuatacun rë Nina xi jiayahma titjun. Peru Nina ne, hisca chaja sa xi cuejña ngasunhndë ne, ha tjin chjine rë me cjuatacun vëhë xi ndaja tsajan. ⁸ Hisca xi ngu xuta xi vitexa quihndë nixtin vihi ne, vijnircu me cjuatacun vëhë. Sa xi cajnercu me ne, hacuaha

catsiquiin me Nai naja, me xi jemu jyë hnga camahani me cojo Hasen rë me. ⁹ Peru tivetjucaa sacuatjin camahindu xcun xujun rë Nina hiscan xi chja cuitjin:

Xcusun xi cjëë camahani scuëë xuta, hisca cjëë camahani cuihndë me cjua tsëhë, hacuaha hisca cjëë camahani tsingatahacacun me tsëhë ne, vëhë xcusun xi cavéhëchjine Nina xi cuma rë xuta xi hmu cacun rë me.

Cuatjin camahindu. ¹⁰ Xcusun vëhë ne, ngayin casua Hasen rë Nina camachaya niji. Hasen rë Nina jan ne, vëë yëjë ngarca ni, hisca cjuatacun rë Nina xi hitsë sa hma jiya.

¹¹ Ngajñi rë yëjë xuta ne, tsajin yo xi ma vëë cjuatacun rë ngu xuta ta suvá ni hasen rë me xi jiya ngajñi yojo rë me ne, vëhë xi vëë. Ha chuva vëhë ni ne, tsajin yo xi vëë cjuatacun rë Nina ta suvá ni Hasen rë Nina ne, vëhë xi vëë. ¹² Ngayaan ne, hacuin cachjahanntsang ngu hasen tsëhë ngasunhndë ta cachjahanntsang Hasen xi catsingatju Nina, cojo sa xi cumachaya naja yëjë ni cjuandaja xi Nina casua naja me.

¹³ Nújan tsëhë cjuandaja vëhë, peru hacuin cojo cjua yehe xi nduva tsëhë cjuatacun rë xuta ngasunhndë ta cojo cjua xi nduva tsëhë Hasen rë Nina. Hane cuatjin xi tahan cjuatacun rë Nina machaya rë xuta xi tjin rë me Hasen rë Nina.

¹⁴ Xuta xi tsajin rë me Hasen rë Nina ne, maji fahatsja me cjuandaja xi sua Hasen rë Nina ta xi má rë me xi cuacun vë ne, suvá cjuangarca cjuandaja xi cuacun vë, hacuaha maji vijnercu me cjuandaja xi cuacun vë, tsëhë xi suvá Hasen rë Nina sahmi xi vijnercuun. ¹⁵ Xuta xi tjin rë me Hasen rë Nina ne, ma tsichuva me yëjë ngarca ni, peru me xi cuacun vëhë ne, tsajin yo xi ma tsichuva rë me. ¹⁶ Cuitjin camahindu xcun xujun rë Nina: “¿Yo xi vëë cjuatacun rë Nina? ¿Yo xi cuicuya rë?” Cuatjin camahindu. Peru ngayaan ne, tjin naja cjuatacun rë Jesucristu.

3

Xuta sahmixa rë Nina

¹ Ngayujun ni ne, camaji cachjá cojo nuju sacuaha chjá cojo xuta xi ha tjin rë me Hasen rë Nina ta, tjin ná xi cachjá cojo nuju sacuaha chjá cojo xuta ngasunhndë, sacuaha xuta xi sehe cavisehen ladu rë Jesucristu. ² Sacuaha xi casuá nuju lechi xi siuhun. Hacuin niñu casuá xi xinu ta, tsëhë xi nixtin hya ne, tangun ngayun cojo quihndi chihndë xi cjëë cuma sinë niñu. Hacuanitjin ni cjëë cuma chjuhunntsun yëjë cjua rë Nina hisca quihndë, ³ tsëhë xi xuta ngasunhndë sa má ngayun. Cuatjin chjá cojo nuju ta jinguyëjë rë xi tjin sa cjuachini hacuaha tjin sa si ngajñi nuju ne, xuta ngasunhndë cuaha sa má ngayun, hacuaha tivanguntjengun sa ndiya rë xuta ngasunhndë. ⁴ Hya xi ngu ngayun nújun: “Ngahan ne, ladu rë Pablo ngahan”, hane ngu nga ngayun ne, nújun: “Ngahan ne, ladu rë Apolos ngahan” ne, ngajan matsejen xi xuta ngasunhndë cuaha má ngayun.

⁵ Xi matsejen ne, ¿mé má Apolos ne, mé má Pablo ni? Ngayin ne, xuta sahmixa rë Nina ni ngayin, xi canújin cojo nuju cjua rë Nina xi camacjain nuju. Jima ngu ngayin ne, canihñi xa xi casua niji Nai naja. ⁶ Sacuaha xi ngahan catsítjé, hane Apolos cavitejnu me nandá, peru Nina casahmi me xi camayehe xitjé. ⁷ Ngajan xi, xi matsejen ne, cha xi tsitjé cojo cha xi vitejnu nandá ne, hacuin jemu vengui chji rë cha ta me xi vengui Jain chji rë ne, Nina, me xi sahmi xi ma yehe xitjé. ⁸ Cha xi tsitjé cojo cha xi vitejnu nandá ne, tangun ni vengui chji rë cha. Jimangu cha ne, cjuahatsja cha chji rë cha, sacuatjin xa xi casahmi jimangu cha. ⁹ Ngayin ne, tangun tinihñi xa rë Nina, hane ngayun ne, sacuaha nangui rë Nina xi tijimaxa cojo má ngayun.

Hacuaha ngayun ne, sacuaha ngu ndihya xi Nina tsindaja me má ngayun. ¹⁰ Ngahan ne, tsëhë cjuandaja xi casua ná Nina ne, casahme sacuaha ngu chjine vexo ne, cavejña ngu xihndënaña, peru xcun xihndënaña xi casahme jan ne, jingu sa xuta canduva casahmi me ngu ndihya. Peru jima ngu xuta xi sahmi me ndihya xcun xihndënaña vëhë ne, meje rë xi tjin rë me cuidadu hacutjin xi sahmi me ta, ¹¹ tsëhë xi tsajin sa cjín xihndënaña xi tjin ta ngu tu tu ni má. Hane xihndënaña xi ha tacun vë ne, hacui Jesucristu. ¹² Quihndë ne, xi nihñi xa rë Nina ne, cuejña xi yahnga xuta sahmixa me cojo oro, o sa quicha tyava, o sa ndyojo xi jercu vengui chji rë. Hane yahnga nga me ne,

sacuaha sahmixa me cojo ya, o sa cojo ndiji, o sa cojo xca ni. ¹³ Peru nixtin hya xi tsichuva naja Nina ne, hya cuma cumatsejen xcusun rë xa xi casahmi jima ngu xuta xi cuacun vë. Nixtin hya ne, cuejña Nina ngu ndihu xi tsichuva xa xi casahmi jima ngu me, cojo sa xi cumatsejen mé xcusun xa vëhë. ¹⁴ Sa xi xa xi casahmi ngu xuta scaa rë cojo suë rë ndihu vëhë ne, sacú rë me ngu cjuandaja rë xi sua Nina. ¹⁵ Peru sa xi xa xi casahmi ngu xuta jan cjuëya cojo suë rë ndihu vëhë ne, tsichajá me yëjë, peru me vëhë ne, cuetjutje me sacuaha ngu xi vetjutje tsëhë ngu ndihu.

¹⁶ Ngayujun ni ne, ha ndaja hyun xi sacuaha yungun rë Nina má ngayun, ta Hasen rë Nina ne, hacuaha tacuncahndé cahntsua xahasen nuju. ¹⁷ Sa xi yo xi tsinguetsun yungun rë Nina, Nina ne, hacuaha jercu sahmi me castigu xuta jan, tsëhë xi yungun rë Nina ne, hatuxa tsëhë Nina. Hane ngayun ne, hacuaha yungun rë Nina má ngayun.

¹⁸ Xicavindachuun suvun rë yojo nuju. Sa xi tjin ngu ngayun xi ningatuhun tacún xi jemu vechú cjuatacun nuju sacuaha cjuatacun rë xuta ngasunhndé vihi ne, nihñucuendun chjuhunxun cjuatacun vëhë sacuaha xi vechiin cjuatacun nuju. Hane xi cuatjin nihñu ne, sehe cuechú tuhun cojo cjuaquixi ngu cjuatacun nuju. ¹⁹ Cuatjin meje rë ta, tsëhë xi cjuatacun rë xuta ngasunhndé vihi ne, xi cuma rë Nina ne, suvá cjuangarca. Hisca camahindu xcun xujun rë Nina cuitjin: “Nina ne, sahmi me xi xuta xi jemu vechú cjuatacun rë me vetju sava me xcun cjuandacha xi sahmi me.” ²⁰ Hacuaha camahindu nga cuitjin: “Nina ne, vëë me xi cjuatacun rë xuta xi jemu vechú cjuatacun rë ne, tu mahya.” ²¹ Vëhë xi hisca ngu ngayaan ne, mijí rë xi naxenndajan cjuatacun rë xuta ngasunhndé ta, tsëhë xi yëjë ngarca ni ne, tsujun: ²² há xi Pablo, há xi Apolos, há xi Pedru, há ngasunhndé, há cjuahñu, há cjuaveya, há xi nixtin quihndé, há xi nixtin nduva ne, ta yëjë ngarca ni ne, tsujun vë. ²³ Hane ngayun ne, tsëhë Jesucristu ngayun, hane Jesucristu ne, tsëhë Nina me.

4

Xa rë apóstol

¹ Meje rë xi nihñucuendun xi ngayin ne, xuta sahmi xa rë Jesucristu má ngayin, hacuaha cachjihinntsín xa xi tihin cumachaya rë xuta tsëhë cjuatahahma xi sehe tisua Nina jimachaya naja. ² Hacuaha jemu sahmi nguyjë xi ngu xuta xi tjin tsjá me xa ne, tsejen tsëhë me xi cuma cumangu tacuun cojo rë me. ³ Xi cuma ná ngahan ne, tsajin mé sahmi rë sa xi chjuhunchuvun ná cojo cjuatacun naha, o sa xi cjuahachuva ná xuta ngasunhndé. Hisca ngahan suva ne, fahachuvaan cjuatacun naha. ⁴ Xi má ná ne, tsajin jyé naha. Peru hacuiin ngatsë rë vëhë xi hatuxa tsajin jyé naha. Nai naja ne, me vëhë xi tsichuva ná me. ⁵ Vëhë xi mijí rë xi yo chjuhunchuvun, xi chaja sa cuechú nixtin xi cuinduva Nai naja ta, tsëhë xi me vëhë cuaxëcatsejen me yëjë ni cjuá xi tsajin yo vëë. Hacuaha cuaxëcatsejen me yëjë cjuatacun rë xuta. Nixtin hya ne, cuaxëndaja Nina jima ngu xuta sacuatjin vechú chuva rë tsëhë jima ngu me.

⁶ Ngayujun ni ne, cachjá cojo nuju yëjë cjuá vëhë tsahan suva cojo tsëhë Apolos, cojo sa xi ndaja tsujun, cojo sa xi cuijnercun mé meje cuichja cjuá xi chja cuitjin: “Nihñuchuhun sacuatjin chja cjuá xi camahindu.” Cuatjin chja cjuá. Cuatjin meje rë cojo sa xi hacuiin nihñu yehe yojo nuju ngatsë rë ngu xi tjengun cjuá rë, hane me xi yahnga ne, nitjungun me. ⁷ ¿Yo casahmi xi hitsë sa vengui chjí nuju ngayun xi cuma rë me xi yahnga? Hacuaha ¿má tjin nuju xi hacuiin Nina casua nuju me? Sa xi Nina casua nuju me ne, ¿má naxunndjun yojo nuju sacuaha xi tsajin yo xi casua nuju ni?

⁸ ¡Sacuaha xi ngayun ne, má nuju xi ha tjin nuju yëjë xi meje rë xahasen nuju, ha jemu nchina camá ngayun! Ha xuta xi matitjun camá ngayun xi má nuju. Hacuaha quihndé tsajin mé xi machaja nuju xi cumatihin nuju. Jemu ndatjin sa xi matitjun Jain ngayun, cojo sa xi ngayin ne, hacuaha cojo ngayin cumatitjun tangun ngayin cojo nuju. ⁹ Xi má ná ngahan ne, casahmi Nina xi vengui chji niji ngayin xi má ngayin apóstol, sacuaha xuta xi cjué cueya me ngatsë rë jyé rë me. Tivutsejen yëjë ni xuta cojo yëjë ni ángel

hacutjin tivatjin tijima. ¹⁰ Ngatsë rë xi tjenguin rë Jesucristu ne, má rë xuta sacuaha xi jemu ngarca ngayin. Peru ngayun ne, xi má nuju ne, jemu quicun tacún ngatsë rë xi tjenguin rë Jesucristu. Ngayin ne, jemu ndaya tacuín, peru ngayun ne, jemu hñu ngahñu nuju. Ngayun ne, chjahárcun nuju, hane ngayin ne, chjharcuaain niji. ¹¹ Hisca quihndë sa ne, jindya niji tséhë xi xini xi sihin, hacuiin ndaja tsjian chijín, chocho sahmi xuta cojo niji, hacuaha tu nujyihinsin ni. ¹² Nihñi xa xi hai. Hora xi chocho chja xuta cojo niji ne, ndaja nújin cojo rë me. Hora xi tsuyiyihiya tjengui niji me cojo cjuahngatacun ne, caa niji cojo xcusun xi sahmi me. Tsajin mé nihñi cojo rë me. ¹³ Hora xi chocho chja xuta tsijin ne, nindijin cjuá cojo rë me. Camá ngayin sacuaha xtë xi tjin ngasunhndë. Hitsë sa chuva vengui chjí niji xi cuma rë yéjë ni xcusun xi tjin. Hisca quihndë ne, cuanitjin vatjin má.

¹⁴ Xi titsihindu nuju cuitjin ne, hacuiin xi tsisava nuju ta xi suá nuju conseju sacuaha quihndi na ha suva xi jemu hmú cacún. ¹⁵ Handasa tjin nuju të mil xuta xi vicuya nuju cjua xi chja tséhë Jesucristu ne, peru nahmi nuju ne, ngu ni ngahan, tséhë xi hya xi casuá camachaya nuju cjuandajyihí xi chja tséhë Jesucristu hacuaha cavisuhun ladu rë me ne, hya camá ngahan sacuaha nahmi nuju. ¹⁶ Véhë xi ngayujun ni ne, meje ná xi nihñu sacuatjin sahme ngahan.

¹⁷ Ngatsë rë véhë ne, titsingátju nuju cha Timoteo, cha véhë xi sacuaha quihndi na ha xi jemu hmú cacún hacuaha jemu ndaja sahmi chihin me xa tséhë Nai naja. Me véhë sahmi me xi cuitsjen nuju hacutjin tifé cojo ndiya rë Jesucristu, sacuatjin vicuyá rë xuta rë yéjë ni yungun jingujyé ni.

¹⁸ Quihndë ne, yahnga ngayun ne, canihñu yehe yojo nuju xi cuatjin caningatuhun tacún xi cjueen cjué scútsejen nuju. ¹⁹ Peru ngahan ne, cuinduva xati scútsejen nuju, sa Nai naja meje rë me. Hane hya cumachaya ná hacuiin sacuatjin xi visiajmi xuta xi cuacun casahmi yehe yojo rë jan ta sacuatjin ngahñu xi tjin rë me. ²⁰ Cuatjin sahme ta sacuaha gubiernu xi sahmi Nina ne, hacuiin cojo suvá cjuá ni rë me xi sahmi me ta cojo ngahñu xi tjin rë me. ²¹ ¿Hacutjin meje nuju xi nduva scútsejen nuju, há xi cojo ngu castigu ne, o há tsajin ne, há cojo ngu cjuahmutacun, cojo cjuandaja cjuajeya?

5

Cjuatsehen xi casahmi ngu cha xuta rë yungun

¹ Tjin cjuá xi ngajñi nuju ngayujun ni ne, jiyajñi ngu cjuatsehen xi hisca xutaxín sa ne, sahmii me. Chja cjuá ta ngu ngayun ne, cachjuhun chjuun rë nahmi nuju, camá chjuun nuju. ² ¡Hane ngayujun ni ne, jercu naxunndujun yojo nuju! Cahndé rë véhë ne, meje rë xi chocho cuma nuju. Cha xi cuatjin sahmi xcusun véhë ne, catetjuxin cha tsujun. ³ Handasa tsajin ngahan tejña cojo nuju ndyá ne, peru cjuatacun naha ne, sacuaha xi ndyá tacun cojo nuju. Hane sacuaha xi tejña cojo nuju ne, ngahan ne, ngatsë rë xi sahme xa rë Nai naja Jesús ne, chjá cojo nuju ta meje rë xi cuma castigu cha xi cuatjin sahmi xcusun véhë. ⁴ Hya xi cuma tangun ngayun, hacuaha cjuatacun naha ne, sacuaha xi tacun cojo nuju ne, cojo ngahñu xi sua naja Nai naja Jesús ne, ⁵ nihñu entregadu cha xi cuajyihí vë cojo Satanás, cojo sa xi cueya cha. Cuatjin nihñu, cojo sa xi cuetjutje hasen rë cha nixtin hya xi cuya nga Nai naja.

⁶ Ndajin tjin xi cuatjin nihñu yehe yojo nuju. Ha hyun cjuá xi chja cuitjin: “Hitsë lihndi ni san rë pan ne, caa rë tsisatjen rë yéjë nahyu.” Cuatjin chja cjuá. ⁷ Meje rë xi chjuhunxun cjuatsehen véhë, xi sahmi sacuaha san rë pan, cojo sa xi cuma tyjahi cjuatacun nuju, sacuaha nahyu xi tsajin san rë. Hacuaha hvé ta hatuxa tyjahi cjuatacun nuju ta, tséhë xi Jesucristu ne, me xi sacuaha chu tsángá tséhë suhi rë Pascua naja ne, ha cahme me. ⁸ Véhë xi meje rë xi nihña suhi, peru hacuiin cojo san rë pan xi changá, cuma cuinújan ne, hacuiin cojo cjuatsehen ta, cojo nahyu xi tsajin san rë, cuma cuinújan ne, cojo cjuandaja cojo cjuaquixi.

⁹ Catsihindu nuju xcun xujun xi ha catsingátju nuju ta mijí rë xi nihñu tangun cojo xuta xi sahmi cjuatsehen cojo ngu chjuun o sa cojo ngu xihin. ¹⁰ Xi cachjá cojo nuju cuatjin

ne, hacuiin meje cuichja xi meje rë xi cuetjunkun camahani tséhë xuta ngasunhndë xi hincha ndiya rë cjuatsehan vëhë, o sa tjenguitaha me xi hacuiin tséhë, o sa ndacha, o sa faharcun me nina ndyojo. Sa xi cuatjin nihñu ne, meje rë xi cuetjun camahani tséhë ngasunhndë. ¹¹ Xi vijne cjua xi catsihindu nuju vë ne, xi hacuiin nihñu tangun cojo ngu xuta xi chja me xi ladu rë Jesús má me hane sahmi me cjuatsehan cojo ngu chjuun o sa cojo ngu xihin, o sa tjenguitaha me xi hacuiin tséhë me, o sa faharcun me nina ndyojo, o sa ndesu me, o sa cha chihi me, o sa xi ndacha me. Ngu xuta rë yungun xi cuatjin xcusun rë ne, hisca mijí rë xi xinu niñu cojo rë me. ¹²⁻¹³ Satiin ná ngahan xi tsichúva xuta xi hacuiin xuta rë yungun má me. Nina ne, me vëhë xi tsichuva rë me. Peru ngayun ne, meje rë xi nichuvun xuta xi xuta rë yungun me. Vëhë xi hacuaha meje rë xi naxunxun cha tsehen vë tséhë ngajñi nuju.

6

Vinchajyé yahnga xuta ladu rë Jesús xicjin me ngajñi rë me

¹ Hya xi tjin ngu ngayun xi tjin ngu jyé xi meje cuinchun tséhë xingun ne, ¿mé má cuatjin vetju tacún xi xcun xuta xi hisca sahmicuendaain me Nina vangun chjahyun xi cumacuenda tsujun, cahndé xi cuangun xcun xuta xi ladu rë Nina me? ² ¿Há hyuun xi cuechú nixtin xi ngayaan xuta ladu rë Nina nichuvan xuta ngasunhndë cojo cjuatacun rë me? Hane sa xi ngayun cuatjin nichuvun xuta ngasunhndë ne, ¿há maji nichuvun ngu jyé lihndi quihndë ni? ³ ¿Há hyuun xi ngayaan nichuvan ángel cojo cjuatacun rë ni? ¡Hitsé guan cjuacjintacun rë ngasunhndë vihi! ⁴ Vëhë xi sa tjin ngu jyé xicjin vëhë xi meje cuinchun ne, ¿há cuangun cuejñu jyé vëhë xcun ngu xutaxín xi faharcuaain me xcusun rë yungun? ⁵ Nguehe cuichjá cojo nuju ngujo cjua cuitjin, cojo sa xi cuma sava nuju: ¿há tsajin ndastu ngu xuta xi vechú hitsé cjuatacun rë me xi cuma sahmi cuenda me tu mé ni si xi nihñu cojo xingun? ⁶ Peru ngu ngayun xuta ladu rë Jesús ne, vinchun jyé rë jingu sa xuta ladu rë Jesús, ¡hane hisca vanguncujun jyé vëhë xcun xuta xi sahmicuendaain me Nina!

⁷ Xi cuatjin vinchun jyé rë xingun xingu xingu ngayun ne, ngajan matsejen xi ngayun canichujún. Hitsé sa ndaja xi ningatuhun xi cumandacha ngayun. Hitsé sa ndaja xi ningatuhun xi cjue chéjé tsujun. ⁸ Cahndé rë xi cuatjin ningatuhun ne, tu ngayun vindachun hacuaha nichujun tséhë xingun ngajñi nuju ngayun xuta rë yungun.

⁹ ¿Há hyuun ta xuta tsehen ne, cumaji cuisehen me hiscan sahmi Nina gubiernu? Ha quihndë xicatuun cahndé xi cuma ndacha sa ngayun ta, yéjé xcusun xuta xi cuicun vi ne, cumaji cuisehen me hiscan sahmi Nina gubiernu: xuta xi sahmi me cjuatsehan cojo chjuun o sa cojo xihin xi hacuiin tséhë me, xuta xi faharcun me nina ndyojo, cha xi chuya rë ngu xihin, ¹⁰ xuta xi chéjé me, xuta xi tjenguitaha me xi hacuiin tséhë me, xuta xi hatuxa xuta chihi me, xuta xi ndesu me, xuta xi ndacha me, yéjé xcusun xuta xi cuacun vë ne, cumaji cuisehen me hiscan sahmi Nina gubiernu. ¹¹ Yahnga ngayun ne, cuatjin cún ngayun titjun. Peru fahaxin me jyé nuju, camá tyjahi cjuatacun nuju, café jyé nuju. Cuatjin camá cojo nuju ngatsé rë Nai naja Jesucristu cojo ngatsé rë Hasen rë Nina naja.

Meje rë xi cojo yojo naja nihña jyé nihña hnga Nina

¹² Yahnga ngayun ne, nûjun cuitjin: “Cuma nihña yéjé ni xcusun.” Cuatjin nûjun. Cuma, peru hacuiin yéjé xcusun xi ndaja tsajan. “Cuma nihña yéjé ni xcusun”, peru ngahan ne, suaan cahndé xi scaa rë suhi rë tu mé ni xcusun cojo ná. ¹³ Yahnga nga ngayun ne, nûjun cuitjin: “Casahmi Nina xi hatuxa matangun xi chinë cojo cahntsuan, hacuaha cahntsuan ne, hatuxa ma tangun cojo xi chinë.” Cuatjin nûjun. Quixi Jain, peru cuechú nixtin xi tsicjé Nina catsijo xcusun vëhë. Peru hacuiin casahmi Nina xi hatuxa matangun yojo naja cojo cjuatsehan ta casahmi me xi hatuxa matangun cojo Nai naja, hacuaha hatuxa matangun Nai naja cojo yojo naja. ¹⁴ Nina ne, catsicuya me Nai naja

cjuahñu, hacuaha cojo ngahñu rë suvá me ne, hacuanitjin ni tsicuya naja me ngayaan cjuahñu.

¹⁵ ¿Há hyuun ta yojo nuju ne, tjin tangun cojo Jesucristu? Quihndé ne, yojo naja xi tjin tangun cojo Jesucristu ne, ¿há nihña tangun cojo ngu na viteña yojo rë ni? ¡Jéya! ¡Catamamiji rë Nina! ¹⁶ Hacuaha ¿há hyuun ta ngu xuta xi sahmi cjuatsehen cojo ngu na xi viteña yojo rë ne, sacuaha xi ngu yojo ni rë me cojo rë na? Cuatjin ma ta chja xujun rë Nina cuitjin: “Catsijo me ne, cuma ngu yojo ni rë me cojo xicjin me.” Cuatjin chja xujun rë Nina. ¹⁷ Peru ngu xuta xi sahmi tangun me cjuatacun rë me cojo Nai naja ne, cuma ngu cjuatacun ni rë cojo rë me.

¹⁸ Naxunxun yojo nuju tséhë cjuatsehen xi sahmi ngu xuta cojo ngu chjuun o sa cojo ngu xihin xi hacuiin tséhë me. Yéjë sa cjuatsehen xi sahmi ngu xuta ne, hacuiin cojo yojo rë me sahmi me. Peru xuta xi sahmi cjuatsehen cojo ngu chjuun o sa ngu xihin xi hacuiin tséhë ne, cojo yojo rë me sahmi me cjuatsehen vëhë. ¹⁹ ¿Há hyuun ta yojo nuju ne, sacuaha ngu yungun rë Hasen rë Nina xi caveya Nina cahntsua xahasen nuju? Ngayun ne, hacuiin tsujun suvun yojo nuju ta, ²⁰ tséhë xi ngayun ne, cojo chji cachaha nuju. Vëhë xi meje rë xi cojo yojo nuju nihñu jyë nihñu hnga Nina.

7

Cjuacjintacun tséhë cjuavixan

¹ Quihndé ne, nguehe tsicúya cjua tsujun tséhë cjua xi canihindun ná.

Ndatjin xi cuixaain xuta. ² Peru ngatsë rë cjuatsehen ne, catiscu chjuun rë jima ngu xihin, hacuaha jima ngu chjuun ne, catiscu xihin rë na. ³ Sa chjuun sa xihin me ne, catisahmi chihin me sacuatjin mameje rë cjuavixan xi casahmi me. ⁴ Sacuaha chjuun ne, hacuiin na vëhë vitexa na yojo rë na ta xihin rë na vitexa cha. Hacuanitjin ni xihin ta hacuiin cha vëhë vitexa cha yojo rë cha ta chjuun rë cha vitexa na. ⁵ Mijí rë xi nichuhun rë xingun yojo nuju sa chjuun sa xihin ngayun. Cuma nihñu cuatjin, peru sa xi catsijo ni ngayun canihñu tangun cjua xi cuejñuxun ngujo nixtin, tséhë xi meje nuju xi ngujo nixtin vëhë ne, nihñu oración nuju cojo Nina. Hane xi cuatju vëhë ne, sehe tuyun nihñuchuhun sacuatjin mameje rë cjuavixan xi canihñu, sá tu ngatsë rë xi scaain nuju ne, sahmi Satanás ngahñu xi nihñu cjuatsehen.

⁶ Cuatjin cachjá cojo nuju cojo sa xi hacuiin chja cuatjun, cachjaan sacuaha xi hatuxa vitexa nuju. ⁷ Xi má ná ngahan ne, ndatjin sa xi yéjë ni xuta ne, scaa rë me sacuaha ngahan. Peru jima ngu xuta ne, casacu rë me jima ngu xcusun cjuandaja xi casua Nina me: ngu me ne, casacu rë me xcusun vihi, ngu nga me ne, casacu rë me xcusun vëhë.

⁸ Quihndé ne, ngu ngu ngayun xi cjéë sacú chjuun nuju, cjéë sacú xihin nuju, hacuaha cojo ngayun xi cahan ngayun ne, cuichjá cojo nuju ta ndatjin xi cuinechun suvun sacuaha ngahan. ⁹ Peru sa xi scaain nuju ne, tixun. Hitsë sa ndaja xi cuixun xi cuma rë xi nicjun suvun yojo nuju cjuandya rë xihin.

¹⁰ Hane ngu ngu ngayun xi cavixun ne, cuichjá cojo nuju ta ngu chjuun ne, mijí rë xi tsismi na xihin rë na. ¹¹ Hane sa xi tacun xín na ne, catejña suvá na, o sa tsajin ne, catisehen nga na cjuandaja cojo xihin rë na. Hacuaha ngu xihin ne, mijí rë xi tsismi cha chjuun rë cha. Hacuiin ngahan xi chjá cuatjin ta Nai naja chja me.

¹² Quihndé ne, hacuiin Nai naja cuichja me ta ngahan cuichjá cojo nuju ngayujun ni xi cjéë cuichjá cojo nuju. Sa xi cachjuhun ngu chjuun xi manguaain cacun na cojo Nai naja, hane tsingatihin na cuejña sa na cojo nuju ne, xicanismuu na. ¹³ O sa xi cachjuhun ngu xihin xi manguaain cacun cha cojo Nai naja, hane tsingatihin cha cuejña sa cha cojo nuju ne, xi canismuu xihin nuju vë. ¹⁴ Cuatjin nihñu ta, xihin nuju xi manguaain cacun cojo Nai naja jan ne, ngatsë nuju ngayun ne, hacuaha cojo cha cumá cha ladu rë Nina. Hacuanitjin ni chjuun nuju xi manguaain cacun cojo Nai naja jan ne, ngatsë nuju ngayun xi ladu rë Jesús ne, hacuaha cojo na cumá na ladu rë Nina. Sa xi hacuiin cuatjin ne, quihndi nuju ne, hacuiin ladu rë Nina má. Peru xi cjuaquixi ne, quihndi nuju ne, ladu rë Nina má. ¹⁵ Peru sa chjuun sa xihin xi manguaain cacun cojo Nai naja ne, sa xi meje

tsismi nuju ne, catitsismi nuju. Sa xi cuatjin cuatjun cuma ne, ngayun xi ladu rë Jesús ngayun ne, ha ndaya tjin ngayun tséhë cjuavixan. Cuatjin meje rë xi nihñu ta, tséhë xi Nina cajindaya nuju me xi cuangun ndiya rë cjuandaja cjuajeya. ¹⁶ Tsajin yo vëë rë hâ cuma naxuntjun chjuun nuju o sa xihin nuju.

Chja Pablo hacutjin meje rë xi cjue xuta cojo ngasunhndë rë me

¹⁷ Meje rë xi ngayujun ni ne, nihñu xa xi casua Nina xi nihñu jima ngu ngayun, hacuaha ha sacuanitjin ni cún ngayun hya xi cavaxijin nuju Nina ne, hacuanitjin ni tángun nduju cojo. Cuatjin chjá cojo xuta tséhë yëjë ni yungun. ¹⁸ Sa xi ha cati rë chuxin nuju hya xi cavaxijin nuju Nina ne, xicavinchuun chuva rë xi nindeyun xcusun vëhë. O sa xi cjëë xtí rë chuxin nuju hya xi cavaxijin nuju Nina ne, xicanihñuu. ¹⁹ Xi xti rë chuxin naja o sa xtiin rë ne, tsajin mé vengui chjí rë ta xi vengui chjí rë ne, xi cuinuhyan cjua xi vitexa Nina. ²⁰ Ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo. ²¹ Sa xi ngu mosu hndixahan ngayun nixtin hya ne, xicamacjiin tacún. Peru sa xi cuma cuetjuntjun tséhë xi má ngayun mosu hndixahan ne, naxuntjun yojo nuju ta, ²² tséhë xi ngu mosu hndixahan xi Nai naja vaxijin me ne, ndaya tjin xi cuma rë Nai naja. Hacuanitjin ni ngu xuta xi hacuiin mosu hndixahan me peru Nai naja cavaxijin rë me ne, mosu hndixahan rë Jesucristu má me. ²³ Cojo chjí cavatsë nuju Nina. Vëhë xi mijí rë xi mosu hndixahan rë xuta cuma ngayun. ²⁴ Ngayujun ni ne, ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo, xi tjin tangun cjuatacun nuju cojo Nina.

Chja Pablo tséhë xuta xi tsajin chjuun tsajin xihin rë me

²⁵ Quihndë ne, sacuaha tséhë xuta xi cjëë cjuaha me chjuun cjëë cjuaha me xihin ne, tsajin ngu cjua xi cavitexa ná Nai naja xi cuichjá cojo nuju. Peru cuichjá cojo nuju sacuatjin tsingátaha cacún, tséhë xi ngatsë rë cjuandaja xi casua ná Nai naja ne, cuma cumangu tacún cojo ná. ²⁶ Xi má ná ne, ngatsë rë cjuandaja xi tjin naja quihndë ne, ngu xihin ne, ndatjin xi cuejña ni cha chuva xi ha tacun cha. ²⁷ Sa xi ha tjin chjuun nuju ne, xicanismuu ná. Hane sa xi tsajin chjuun nuju ne, xicachjuun chjuun. ²⁸ Peru sa xi cuixun ne, tsajin mé jyé nuju tjin, hacuaha sa xi ngu na nixti cuixan na ne, tsajin mé jyé rë na tjin. Peru sa xi ngayun cuixun ne, hatuxa tjin nuju cjuacjintacun nchunchujun ni cahntsua ndya nuju, hane vëhë ngu cjuacjintacun xi mijí ná xi cuatjun cuma.

²⁹ Peru meje cuichjá cojo nuju ngayujun ni ta ha jemu camachúva nixtin. Vëhë xi hacuiin jercu nicjun yojo nuju tséhë cjuandaja rë nguehe ngasunhndë ta xuta xi tjin chjuun rë me ne, catisahmi cuenda me sacuaha xi tsajin chjuun rë me; ³⁰ xuta xi jihnda me ne, catisahmi cuenda me sacuaha xi hacuiin jihnda me; xuta xi jemu tjin rë me cjuasua ne, catisahmi cuenda me sacuaha xi hacuiin jemu tjin rë me cjuasua; xuta xi vatsë me ne, catisahmi cuenda me sacuaha xi hacuiin tséhë me xi cavatsë me; ³¹ hane xuta xi jemu sahmixa cojo yëjë ni xcusun xi tjin ngasunhndë ne, hacuiin cuatjutaha sahmixa me cojo. Cuatjin meje rë xi tsingataha cacun xuta ta, tséhë xi ngasunhndë xi chutsejen vi ne, hatuxa cjuë.

³² Ngahan ne, meje ná xi ngayun ne, tsajin nuju mé cjuandaja. Xuta xi tsajin chjuun rë me ne, marcun rë me tséhë xa rë Nai naja ta, tséhë xi meje sahmi me hacutjin xi chuya rë Nai naja. ³³ Peru xuta xi tjin chjuun rë me ne, marcun rë me tséhë cjuandaja rë ngasunhndë ta, tséhë xi meje sahmi me hacutjin xi chuya rë chjuun rë me. ³⁴ Hane xi cuatjin sahmi me ne, ma jo cjuatacun rë me. Hane ngu chjuun xi tsajin xihin rë o sa xi ngu chjuun xungun ne, marcun rë na tséhë xa rë Nai naja, cojo sa xi cuma tséhë Nina na cojo yojo rë na cojo hasen rë na. Peru na xi cavixan ne, marcun rë na tséhë xa rë ngasunhndë ta, tséhë xi meje sahmi na hacutjin xi chuya rë xihin rë na.

³⁵ Cachjá cuatjin cojo nuju, Peru hacuiin xi cuátëcja cjuatacun nuju ta xi ndaja tsujun. Meje ná xi cuanguncujun ngu ndiya rë cjuandaja. Hacuaha meje ná xi tuhun yojo nuju ngundiyaxa ni xi nihñu xa rë Nai naja.

³⁶ Peru sa xi ngu xuta tsingataha cacun me xi cuaintjin xi sahmi me xi cjëë cuixan me cojo rë na xi tacunvasen cjuavixan rë me cojo, hane na vëhë ne, ha cavechú nixtin rë na xi cuma cuixan na, hacuaha sa xi ha tuxa meje rë xi cuixan na ne, catisahmi me mé xi meje sahmi me. Catixan me cojo rë na ta, tsajin mé jyé rë me xi cuatjin sahmi me. ³⁷ Peru ngu sa xuta xi hacuiin sahmi nguyjé xi cuixan me hacuaha ma vëhëhñu me yojo rë me ne, sa xi ha cavejña cacun me xi cuixaain me ne, ndaja sahmi me xi cuixaain me. ³⁸ Vëhë xi me xi vixan cojo rë na xi tacunvasen cjuavixan rë me cojo ne, ndaja sahmi me. Hane me xi vixaain ne, hitsë sa ndaja sahmi me.

³⁹ Ngu chjuun ne, tsajin ndaya tjin na tsëhë xihin rë na jinguyjé rë xi tacun cha cjuahñu. Peru sa xi cueya xihin rë na ne, ha ndaya tjin na xi cuixan na cojo tu yo ni xi meje rë na, ndastu xi ladu rë Nai naja má cha. ⁴⁰ Peru xi má ná ne, hitsë sa ndaja cuma rë xahasen rë na sa xi cuejña cuanitjin ni na. Hane tsingátaha cacún xi ngahan ne, hacuaha cojo ngahan jiya Hasen rë Nina cahntsua xahasen na.

8

Xichinë xi viyuju xcun nina ndyojo

¹ Quihndë ne, nguehe cuichjá cojo nuju tsëhë xichinë xi viyuju xcun nina ndyojo. Ha hyan ta ngayejen ni ne, tjin cjuatacun xi hyan. Hyo xi jemu cjín cjuatacun xi hyan ne, nihña yehe yojo naja suvaan, peru hya xi tjin naja cjuahmutacun ne, nihña yehe xingueen. ² Sa xi ngu xuta tsingataha cacun me xi ndaja vëë me ngu cjuatacun ne, cjëë sa cuijnercu me sacuatjin xi meje rë. ³ Peru sa xi ngu xuta hmu cacun me Nina ne, me vëhë ne, vëë Nina me.

⁴ Quihndë ne, sacuaha cjuatacun tsëhë xichinë xi viyuju xcun nina ndyojo ne, ha hyan ta tsajin camahani mé vengui chjí rë nina ndyojo jinguyjé ni ngasunhndë, hacuaha ha hyan ta ngu tutu ni Nina xi tacun me. ⁵ Handasa xi jemu tjin xi hmí rë nina, sa ngahnga sa nangui ne, hacuaha handasa jemu cjín nina xi cuacun vë hacuaha jemu cjín nai vihi nai vëhë tjin ne, ⁶ peru xi cuma naja ngayaan ne, ngu tutu ni Nina xi tacun me, me xi Nahmi naja. Me vëhë xi casahmi me ngayjé ni, hacuaha ngayaan ne, nechan nguehe ngasunhndë xi nihña tutjin xi meje rë me. Hacuaha ngu tutu ni Nai naja Jesucristu xi tacun me, me xi hacuaha cojo casahmi Nina jinguyjé ni. Hacuaha ngayaan ne, nechan nguehe ngasunhndë ngatsë rë xi cuatjin meje rë Jesucristu.

⁷ Peru hacuiin yéjé xuta vëë me cjuatacun vëhë. Yahnga xuta ne, ngatsë rë xi cuatjin xcusun rë me hatsëe ne, vutsejen me xichinë vëhë sacuaha ngu cjuatjo xi tsëhë cuaha nina ndyojo. Hane hya xi jinë me ne, jemu choho má cacun me, tsëhë xi, xi má rë me ne, jemu tsavi. ⁸ Peru xcusun xi chinë ne, visecuaain naja xi chuya rë Nina tsajan. Sa xi xinë ngu xcusun ne, tsajin mé nichajan, hacuaha sa xi xinëe ne, tsajin mé ndaja sacú naja. ⁹ Nechun cuidadu, ngayun xi vijne rcun xi tsajin mé sahmi rë xi xinë ngu xcusun xi cavyuju xcun nina ndyojo. Nechun cuidadu, sá tu cuechú nixtin xi ngu xuta ladu rë Jesús xi cjëë ndaja cuijnercu cjuachacun rë Nina ne, tsismi cacun me ndiya rë Nina ngatsë rë xcusun xi nihñu. ¹⁰ Cuatjin nechun cuidadu ta, tsëhë xi ngayun xi vijnercun ne, sa xi yo scuëe nuju xi tichinu niñu yungun rë nina ndyojo ne, me vëhë ne, ngatsë rë xi cjëë ndaja cuijnercu cjuatacun rë me ne, cojo me cuetju cacun me sinë me xi chinu xi cavyuju xcun nina ndyojo. ¹¹ Xi cuatjin cuma ne, xuta ladu rë Jesús xi cjëë cuijnercu ndaja jan ne, chajá me ngatsë rë cjuatacun nuju xi cuatjin nihñu, handasa Jesucristu cahme me ngatsë rë xuta vëhë. ¹² Vëhë xi, xi cuatjin ninguetson cjuatacun rë xuta xi cuacun cjëë cuijnercu ndaja me ne, hacuiin suvá ni me xi cuacun vëhë xi choho nihñu cojo rë me ta hacuaha cojo Jesucristu. ¹³ Vëhë xi sa xi xichinë sahmi xi tsismi cacun ngu xuta ladu rë Jesús ndiya rë Nina ne, tsajin nu tsajin nixtin xi cuya sínë sa vëhë, cojo sa xi sahmee xi tsismi cacun ngu xuta ladu rë Jesús jan ndiya rë Nina.

9

Xcusun xi vechú chuva rë xi sahmi ngu apóstol

¹ Ngahan ne, ngu apóstol ngahan, hane vechú chuva rë xi sahme yëjë ni xcusun xi sahmi ngu apóstol, tséhë xi ngahan ne, cahvë Nai naja Jesús. Ngayun ne, camá ngayun ladu rë Nai naja, ngatsë rë xi céjë casahme xa rë me ngajñi nuju. ² Handasa mijí cumacjain rë yahnga xuta xi apóstol má ngahan ne, peru ngayun ne, macjain nuju ta, tséhë xi tsejen xi apóstol ngahan ngatsë rë xi ngayun ne, cavisuhun ladu rë Nai naja ngatsë rë cjua xi cachjá cojo nuju.

³ Cuitjin tsicúa cjua vihi tséhë xuta xi sahmi chuva ná me ndyá ngajñi nuju: ⁴ Tjin ná chuva rë xi tuhun xi xini xi sihin. ⁵ Tjin ná chuva rë xi chjihín chjuun xi cuma chjuun niji, sacuatjin rë apóstol xi yahnga cojo xicjin Nai naja cojo Pedru. ⁶ ¿Há Bernabé cojo ngahan tutu ni xi meje rë xi nihñi xa sehe sacú xi xini xi sihin? ⁷ Ngu xuta xi má me sindadu ne, ¿há tujún rë suvá me tsicojo me xi sahmi me xa vëhë? Ngu xuta xi sahmi me xitjë ne, ¿há jinii me xitjë xi vunihnga me jan? Ngu xuta xi sahmi cuidadu chu tsángá ne, ¿há hviin me lechi rë chu? ⁸ Ngahan ne, hacuiin suvá cjuatacun rë xuta xi tichjá ta ley rë Moisés ne, hacuaha cuatjin chja. ⁹ Xcun ley rë Moisés ne, cuitjin camahindu: “Ngu ndyaja xi visecoo nuju ne, hacuiin nichaan xi sinë chu ta, hacuaha tjin ru chuva rë xi sinë chu tséhë xa xi sahmi chu.” Cjua vëhë ne, hacuiin meje cuichja xi vityangui cacun Nina tséhë chu ndyaja ta ¹⁰ xi vityangui cacun me ne, tsijin ngayin. Cjua vëhë ne, camahindu ngatsë niji ngayin. Xuta xi vacjan me nanguí cojo xuta xi vechjunne me tutjé ne, hya xi sahmi me xa vëhë ne, meje rë xi cuetaha cacun me xi sacú rë me hitsë tutjé vëhë. ¹¹ Ngayin canitjin cjua rë Nina cahntsua xahasen nuju xingu xingu ngayun. Vëhë xi hacuiin choho tjin sa xi tuhun niji hitsë cjuachaja niji. ¹² Sa xi vechú chuva rë xi tuhun cjuachaja rë jingu sa apóstol ne, ¡hitsë sa guan ngayin!

Peru ngayin ne, cjëe camahani mé xi chjahyin nuju. Cahndé rë vëhë ne, cacaá niji cojo jemu cjín cjuacjintacun, cojo sa xi hacuiin nihñi xi tjin yo xi tsitjungui cjuandajiyihi xi chja tséhë Jesucristu. ¹³ Ngayun ne, ha hyun ta nahmi xi sahmi me xa cahntsua yungun xi matitjun ne, hacuaha ngajan vaxë me cjuachaja rë me. Cuma cuinújan ne, nahmi xi sahmixa me cojo chu xi sua xuta cjuatjo ngajan ngasunscun ne, hacuaha ngajan faha me xi jinë me. ¹⁴ Ha chuva vëhë ni ne, cavitexa Nai naja xi me xi sua machaya rë xuta tséhë cjuandajiyihi xi chja tséhë Jesúus ne, ha xcun xa vëhë ne, ngajan cuaxë me cjuachaja rë me.

¹⁵ Peru ngahan ne, cjëe camahani mé xi cjuéhya rë xuta rë yungun. Hane cjua xi titsihindu nuju vi ne, hacuiin tséhë xi féhya nuju cjuachaja naha. Xi má ná ne, hitsë sa ndaja tsahan xi cueya, xi cuma rë xi chjahátahá rë cjuasua naha xi sahme xa rë Nina tu cjuatjo. ¹⁶ Xi suá machaya rë xuta cjuandajiyihi xi chja tséhë Jesucristu ne, tsajin mé má vaxéndaja suva yojo naha ta, hatuxa tjin ná xi sahme cuatjin. Jemu chojyিhi tsahan sa xi suaan cumachaya rë xuta cjuandajiyihi vëhë. ¹⁷ Vëhë xi, sa xi ngatsë rë xi meje ná suva xi cuatjin suá machaya rë xuta cjuandajiyihi vëhë ne, ha tjin chjí naha. O sa xi sahme handasa mijí ná ne, peru Nina casua ná me xa vëhë. ¹⁸ Peru ¿jaré xi chjí naha ni? Chjí naha ne, xi tu cjuatjo ni suá machaya rë xuta cjuandajiyihi xi chja tséhë Jesucristu. Vëhë xi chjí naha, vëhë xi sua rë xahasen naha cjuasua. Cuma cuinújan xi handasa xi tjin ná chuva rë ne, cjëe camahani cjuéhya rë xuta rë yungun xi sua me cjuachaja naha xi sahme xa rë Nai naja.

¹⁹ Ngahan ne, ha ndaya tjin ngahan. Hacuiin mosu hndixahan rë xuta má ngahan. Peru sahme sacuaha xi mosu hndixahan rë yëjë ni xuta má ngahan, cojo sa xi cjín sa xuta cuisécoo rë me xi cuisehen me ladu rë Jesucristu. ²⁰ Hya xi tejñayajñe ngajñi rë xuta tjé rë Israel ne, sahme sacuaha sahmi xuta xi cuacun vë, cojo sa xi cjín sa xuta tjé rë Israel cuisécoo rë me xi cuisehen me ladu rë Jesucristu. Hya xi tejñayajñe ngajñi rë xuta xi tjengui me ley rë Moisés ne, sahme sacuaha sahmi xuta xi cuacun vë, handasa hacuiin ngahma gubiernu rë ley vëhë tejña. Cuatjin sahme, cojo sa xi cjín sa xuta xi tjengui ley vë cuisécoo rë me xi cuisehen me ladu rë Jesucristu. ²¹ Hya xi tejñayajñe ngajñi rë xuta xi faharcuaain ley rë Moisés ne, sahme sacuaha sahmi xuta xi cuacun vë, handasa fahárcun ngahan ley rë Nina, tséhë xi tejña ngahma gubiernu rë ley rë Jesucristu. Cuatjin sahme,

cojo sa xi cjín sa xuta xi faharcuaain ley rë Moisés vë cuisécoo rë me xi cuisehen me ladu rë Jesucristu. ²² Hya xi tejñayajñe ngajní rë xuta xi cjëë ndaja cijnercu me cjuachacun rë Nina ne, sahme sacuaha sahmi xuta xi cuacun vë, cojo sa xi cjín sa xuta xi cjëë ndaja cijnercu me cjuachacun rë Nina cuisécoo rë me xi ndaja cuisehen me ladu rë Jesucristu. Cuma cuinújan ne, sahme sacuaha sahmi yëjë ni xuta, cojo sa xi sacú ná chuva rë xi cuma cuáxetjë ngujo me. ²³ Cuatjin sahme yëjë xcusun vëhë ngatsë rë cjuandajyihi xi chja tséhë Jesucristu, cojo sa xi hacuaha cojo ngahan saté ná.

²⁴ Ngayaan ne, ha hyan ta cha xi vincha carrera ne, yëjë ni cha sahmi cha ngahñu, Peru ngu ni cha caa rë cha xi fehe titjun cha, hane cha vëhë xi fahatsja cha cjuatjo rë. Ha chuva vëhë ni meje rë xi ngayujun ni ne, nihñu ngahñu, cojo sa xi hacuaha sua nuju Nina ngu premiu xi cuma ngascan. ²⁵ Quihndë ne, cha xi cuatjin vincha carrera ne, hya xi vëhëchjine cha yojo rë cha ne, hatuxa jemu viyuju cha cuidadu tséhë yëjë ni xcusun xi chocho sahmi cojo cha. Cuatjin sahmi cha, cojo sa xi sacú rë cha ngu premiu xi ficanii rë. Peru ngayaan xi ladu rë Jesucristu ngayaan ne, cuatjin nihña, cojo sa xi Nina ne, sua naja me ngu premiu xi tsajin nixtin vetsun. ²⁶ Vëhë xi ngahan ne, hacuiin tujyë vánga, hacuiin tujyë sahme ta ²⁷ jemu tsijénda rë yojo naha, hacuaha sahme rë nguyjë xi sahmi hacutjin xi meje ná. Cuatjin sahme, sá tu ha xcun xi ha casuá camachaya rë xuta cjuandajyihi xi chja tséhë Jesucristu ne, ngahan suva tsichajá.

10

Mijí rë xi chjahanrcun nina ndyojo

¹ Ngayujun ni ne, meje ná xi hacuiin nichayun xcusun xi cavatju xutachanga naja xi caviyuju nixtin rë Moisés. Ngayëjë ni me xi cuacun vë ne, quiji me sacuatjin quiji yuffí, hacuaha yëjë ni me cavatjucja me ndachacun Hani. ² Hane xi casahmi me cuatjin ne, cuatjin camá xi yëjë ni me cavisehen me ladu rë Moisés. ³ Hacuaha yëjë ni me cajinë me niñu xi casua Nina. ⁴ Hacuaha yëjë ni me cahvi me nandá xi casua Nina. Cahvi me nandá xi cavetju rë naxi xi casua Nina xi cjue cojo rë me. Hane naxi vëhë ne, hacui Jesucristu. ⁵ Peru jemu cjín xuta xi cuacun vë xi cachuiin rë Nina tséhë me. Vëhë xi ngajan ngu cahndé xín camahani cahme nguehe cahme ngajan me.

⁶ Cuatjin camá yëjë xcusun vëhë sacuaha ngu ejemplu xi cuma naja, cojo sa xi hacuiin cumameje naja cjuatsehen, sacuatjin camameje rë me xi cuacun vëhë. ⁷ Hacuaha mijí rë xi chjuhunrcun nina ndyojo sacuatjin casahmi ngujo me xi cuacun vëhë. Cuitjin camahindu xcun xujun rë Nina: "Caviyuju xuta cajinë cahvi me, sehe cavisatjenhnga me quiji casua me cjuasua xahasen rë me." Cuatjin camahindu. ⁸ Mijí rë xi nihña cjuatsehen cojo ngu chjuun o sa cojo ngu xihin sacuatjin casahmi ngujo me xi cuacun vëhë. Hane ha nixtin vëhë ni ne, cahme can jyan mil me. ⁹ Hacuaha mijí rë xi chjahanchuvan Nai naja sacuatjin casahmi ngujo me xi cuacun vëhë, hane cahme me xi cafaha chu yë me. ¹⁰ Hacuaha mijí rë xi chocho cuisiajmuhamu tséhë Nina sacuatjin casahmi ngujo me xi cuacun vëhë, hane catsiquehen rë me ángel xi hatuxa tsiquehen naja.

¹¹ Yëjë xcusun vëhë ne, cavatju me xi cuacun vëhë camá sacuaha ejemplu xi cuma naja. Hacuaha camahindu cjua vëhë cojo sa xi sua naja conseju, ngayaan xi nechan quihndë xi ha meje cijnetaha ngasunhndë. ¹² Vëhë xi xuta xi má rë me xi jemu hñu siu cjuatacun rë me xi mangucacun me cojo Nina ne, catiyuju me cuidadu, sá tu chajá me tséhë ndiya rë Nina. ¹³ Ngayun ne, hya xi chjaháchuva nuju ne, chjaháchuva nuju sacuaha chjaháchuva rë yëjë xuta. Peru Nina ne, hatuxa cuma cumangu tacuun cojo rë me ta, tséhë xi me vëhë ne, suaain me cahndé xi chjaháchuva nuju cojo ngu chuva rë xi scaain nuju cojo. Hyá xi chjaháchuva nuju ne, me vëhë sua me chuva rë hacutjin cuetjuntjun, cojo sa xi scaa nuju hisca xi cuetjuntjun.

¹⁴ Vëhë xi ngayujun ni ne, xicavisuhunjñuu cojo xuta xi faharcun me nina ndyojo. ¹⁵ Cuitjin tichjá cojo nuju, tséhë xi jemu xuta quicun cacun ngayun. Nichuvun suvun cjua xi chjá cojo nuju. ¹⁶ Ngayaan ne, hya xi hyuun xi hincha copa rë Nai naja ne, jemu ndaja tsajan. Nihña tangun cjuatacun naja cojo Jesucristu xi ninguitsjen hacutjin cavanga jni rë

me hya xi cahme me. Hane hya xi chinë pan xi chotooncjan ne, nihñña tangun cjuatacun naja cojo Jesucristu xi ninguitsjen hacutjin cavatju me camá xcun cru. ¹⁷ Sacuatjin rë pan xi ngu ni má handasa jemu cjín rquí xtotoho ne, hacuanitjin naja ngayaan ta tjin tangun cjuatacun naja cojo xingueen, handasa jemu cjín má ngayaan. Cuatjin ta, tséhë ngu ni pan ne, chinë ngayejen ni hacuaha ngu ni má ngayaan.

¹⁸ Ningatuhun tacún hitsë tséhë xuta tjë rë Israel. Xuta xi vejña me chu xi cahme sacuaha cjuatjo xcun Nina ne, sahmi tangun me cjuatacun rë me cojo Nina. ¹⁹ Xi chjá cuatjin ne, ¿há chjá xi nina ndyojo ne, jemu vengui chjí rë? ¿Há chjá xi yojo xi cavejña xcun nina ndyojo ne, jemu vengui chjí rë? ²⁰ Hacuiin ta, yojo xi vejña me ne, xcun xitsehen vejña me, hacuiin xcun Nina. Quihndë ne, mijí ná xi ngayun ne, nihñña tangun cjuatacun nuju cojo xitsehen. ²¹ Ngayujun ni ne, cumaji siuhun xi xincha copa rë Nai naja hane hacuaha siuhun xi xincha copa rë xitsehen. Hacuaha cumaji xinu xi viyuju xcun Nina hane hacuaha xinu xi viyuju xcun xitsehen. ²² ¿Há ndatjin xi nihñña xi cuma chini Nai naja? ¿Há hitsë sa hñu ngayaan xi cuma rë me? ¡Hacuiin!

Hacuiin yéjë xcusun xi ndaja tsajan xi nihñña

²³ Yahnga ngayun ne, nújun cuitjin: “Cuma nihñña yéjë ni xcusun.” Cuatjin nújun. Cuma, peru hacuiin yéjë xcusun xi ndaja tsajan. “Cuma nihñña yéjë ni xcusun”, peru hacuiin yéjë xcusun xi cuisecoo naja xi cuanguen nduju cojo cjua rë Nina. ²⁴ Mijí rë xi jima ngu ngayaan nihñña ngahñu xi ndaja tsajan suvaan ta xi meje rë ne, nihñña ngahñu xi ndaja tséhë xingueen.

²⁵ Xinu tu mé ni hiscan xi xteña yojo. Xicachjinengunsuun vihi vëhë tséhë yojo jan ngatsë rë xi chuyiin rë cjuatacun nuju tséhë yojo xi cavejña xcun nina ndyojo. ²⁶ Cuatjin nihñña ta, xcun xujun rë Nina ne, cuitjin camahindu: “Ngasunhndë cojo yéjë ni xi tjin ngasunhndë ne, tséhë Nina.” Cuatjin camahindu.

²⁷ Sa xi ngu xuta xi manguaain cacun cojo Jesucristu cuichja me xi cuangun xinu niñña ndava me ne, tángun. Hacuaha xinu tu mé ni xcusun xi cuiyuju me xi xinu. Xicachjinengunsuun vihi vëhë tséhë xi cavyuju me jan ngatsë rë xi chuyiin rë cjuatacun nuju tséhë yojo xi cavyuju xcun nina ndyojo. ²⁸⁻²⁹ Peru sa xi yo sua cumachaya nuju xi yojo jan ne, cavejña xcun ngasunscun ne, xicachinuu yojo jan ngatsë rë me xi casua camachaya nuju hacuaha ngatsë rë xi chuyiin rë cjuatacun rë me tséhë yojo xi viyuju xcun nina ndyojo. Hacuiin ngatsë rë xi chuyiin nuju suvun.

Peru tjin yahnga xuta xi cuma cjuinenguise me cuitjin: “¿Mé má chjaháchuva rë xcusun xi ngahan cuma sahme ngatsë rë xi chuyiin rë cjuatacu rë jingu sa xuta tséhë?

³⁰ Sa xi suá nacuechji rë Nina tséhë xcusun xi jinë ne, ¿má choho chja me tsahan ngatsë rë xi cuatjin jinë ni?” Cuatjin cjuinenguise me.

³¹ Vëhë xi, sa xi xinu o sa xi siuhun o sa xi tu mé ni xcusun xi nihñña ne, meje rë xi nihñña yéjë cojo sa xi nihñña jyé nihñña hnga Nina. ³² Mijí rë xi nicjun rë xuta, há xi xuta tjë rë Israel ne, o há xi xutaxín ne, o há xi xuta rë yungun rë Nina. ³³ Hya xi sahme tu mé ni xcusun ne, sahme ngahñu xi chuya rë yéjë xuta tsahan. Sahmee ngahñu xi ndaja tsahan suva ta sahme ngahñu xi ndaja tséhë jemu cjín xuta, cojo sa xi cuetjutje me.

11

¹ Vëhë xi ngayujun ni ne, meje rë xi nihñña sacuatjin sahme ngahan, sacuaha ngahan xi sahme sacuatjin casahmi Jesucristu.

¿Há meje rë xi cuetsan rcuun hya xi chjahanrcun Nina?

² Ngayujun ni ne, ngahan ne, vaxéndaja nuju ta, tséhë xi yéjë ni hora ne, vitsjen nuju ngahan, hacuaha tivangun nduju cojo yéjë xcusun xi casuá camachaya nuju. ³ Peru meje ná xi cumachaya nuju ta me xi matitjun tséhë jima ngu xihin ne, hacui Jesucristu, hane xi matitjun tséhë ngu chjuun ne, hacui xihin rë na, hane xi matitjun tséhë Jesucristu ne, hacui Nina. ⁴ Sa xi ngu xihin titsa rcu cha hora xi sahmi cha oración rë cha o sa hora xi chja cha cjua rë Nina cojo xuta ne, jemu choho sahmi cha cojo Jesucristu, me xi matitjun

tséhë cha. ⁵ Hane sa xi ngu chjuun titsa rcu na hora xi sahmi na oración rë na o sa hora xi chja na cjua rë Nina cojo xuta ne, jemu choho sahmi na cojo xihin rë na, cha xi matitjun tséhë na. Ha tangun ni sacuaha xi casejnu rë rcu na. ⁶ Sa xi ngu chjuun vetsaain na rcu na ne, hacuaha catisejnu rë. Peru sa xi sava tsejen xi xjisun rë tsjarcu na o sejnu rë ne, catetsa na rcu na. ⁷ Xuta xi xihin ne, mijí rë xi titsa rcu me ta, me vëhë ne, matitjun me sacuatjin matitjun Nina hacuaha tsingacun me hacutjin jyë hnga Nina cojo Hasen rë me. Peru yachjin ne, tsingacun na hacutjin yehe hnga xuta xi xihin cojo cjuatacun rë me. ⁸ Cuatjin ta hya xi casahmi Nina xuta ne, titjun casahmi me ngu xihin, sehe cafaha me ngu rquí ninda rë xihin jan casahmi me ngu chjuun. ⁹ Hacuaha xuta xi xihin ne, hacuin catsindaja Nina me ngatsë rë yachjin ta yachjin ne, catsindaja Nina ngatsë rë xuta xi xihin. ¹⁰ Vëhë xi ngatsë rë xi tivutsejen ángel ne, yachjin ne, meje rë xi cuetsa na rcu na, cojo sa xi tsingacun na xi ngahma gubiernu rë xihin ran siu na. ¹¹ Ngayejen ni ngayaan xuta ladu rë Jesucristu ne, hacuin suvá ni chjuun o sa xi suvá ni xihin xi vengui chjí rë me ta catsijo xcusun ni ngayaan vengui chjí naja. ¹² Quixi xi cafaha Nina ngu rquí ninda rë xihin xi casahmi me chjuun xi tjun tjun casahmi me. Peru quihndë ne, ngayaan xihin ne, hacuaha tsin ngayaan tséhë yachjin. Peru Nina casahmi me ngayéjë ngarca.

¹³ Ngayujun ni ne, ha hyun ta ngu chjuun ne, ndajin tjin xi cuetsaain na rcu na hya xi sahmi na oración rë na cojo Nina. ¹⁴ Suvá tsejen xi jemu cjuasava xi cuma rë ngu xihin sa xi nduju tsjarcu cha. ¹⁵ Peru yachjin ne, ndaja tsejen na xi nduju tsjarcu na ta, tséhë xi Nina casua me xi cuetsa rë rcu na. ¹⁶ Peru sa xi yo meje cuichja xi ndajin tjin xcusun vëhë ne, catamachaya rë ta ngayin cojo ngayujun ni xuta rë yungun ne, ha vëhë ni xcusun naja.

Cuaain tjin xi má hya xi má suhi rë Comida tséhë Nai naja ngajan Corinto

¹⁷ Nguehe tsihindu nuju ngujo cjua. Vaxeenndajan nuju ta, tséhë xi hya xi matangun ngayun xi chjuhuncun Nina ne, cahndé rë xi ndaja cuetjucaa tsjupun ne, tu chohotjin vetju. ¹⁸ Xi tjutjun ne, fehe cjua tsahan xi hya xi cuatjin matangun ngayun ne, hacuin ngu tangun ni má cjuatacun nuju. Hane ngahan ne, macjain ná hitsë. ¹⁹ Xi má nuju ne, jhatuxa meje rë xi cuatjin cuma, cojo sa xi cuma tsejen yo xi tséhë Jain Nina! ²⁰ Hya xi matangun ngayun ne, hacuin comida rë Nai naja xi chinu ta, ²¹ hora xi chinu niñu ne, jima ngu ngayun vangun titjun chjuhun comida nuju suvun xinu. Hane ngujo ngayun ne, hisca vojo sa nuju. Hane ngujo nga ngayun ne, hisca camachuhun. ²² Sacuaha xi tsajin ndya nuju xinu siuhun! O sa tsajin ne, sacuaha xi nihñuchuvun xuta ladu rë Nina hacuaha chandunsavun xuma me xi tsajin rë. ¿Mé cuichjá cojo nuju ni? ¿Há cuáxendaja nuju? ¡Xi cuatjin nihñu ne, cumaji!

Comida tséhë Nai naja

²³ Cjua xi casuá camachaya nuju ne, hacui cjua xi cafahántsa tséhë Nai naja xi chja cuitjin: Nguixun xi camá entregadu Nai naja Jesús ne, tacun me cojo tejó xuta ladu rë me xi sinë nguixun me tséhë suhi Pascua. Hane hora vëhë ne, cafaha me ngu pan. ²⁴ Hane xi cafë casua me nacuechji rë Nina ne, cavotohocja me pan jan, sehe cachja me cuitjin: “Vihi ne, yojo naha xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná.” Cuatjin cachja Jesús. ²⁵ Hane xi cajnetaha cajinë nguixun me ne, hacuanitjin ni cafaha me copa, sehe cachja me cuitjin: “Xan vihi ne, vihi jni naha xi sahmichihiñ rë compromisu xatsë xi tisahmi Nina cojo xuta. Cuitjin nihñu xcusun vihi jima ngu ndiya xi siuhun cuitjin, cojo sa xi ninguitsjun ná.” Cuatjin cachja me. ²⁶ Vëhë xi jima ngu ndiya xi tichinu pan vëhë hacuaha tjiyhún xi hincha copa vëhë ne, tininguitsjun tséhë cjuaveya rë Nai naja. Hane cuanitjin cjín ni cumá hisca hya xi cuinduva nga me.

Hacutjin meje rë xi xinëe xi hmí rë Comida tséhë Nai naja

²⁷ Ngajan xi tu yo ni xi tujyë jinë pan vëhë o sa xi hvi xan vëhë xcun Comida tséhë Nai naja ne, quitjen jyë xi tsixcuehyu yojo rë Nai naja, quitjen jyë xi tsixcuehyu jni rë me. ²⁸ Vëhë xi meje rë xi jima ngu ngayaan ne, nichuvan suvaan cjuatacun naja, sehe

xinë pan jan hacuaha siuhun xan jan ta, ²⁹ tséhë xi yo xi tsinguitsjiin yojo rë Nai naja hora xi sinë cuihi xcusun vëhë ne, sacú rë ngu castigu xi cuatjin tujyë jinë hvi. ³⁰ Vëhë xi jemu cjín xuta tséhë ngajñi nuju ne, ndaya tjin cacun me hacuaha hmu rë me; yahnga nga me ne, hisca cahme me. ³¹ Peru sa xi ngayaan ndaja nichuvan suvaan cjuatacun naja ne, Nai naja ne, hacuaha sahmii naja me castigu. ³² Peru sa xi Nai naja sahmi naja me castigu ne, cuatjin sahmi me cojo sa xi cueyaquixi naja me ndiya hane hacuiin tangun cuma ngayaan castigu cojo xuta tsehen.

³³ Vëhë xi ngayujun ni ne, hya xi cumatangun ngayun xi xinu niñu ne, tinechunyun xingun xingu xingu ngayun. ³⁴ Sa xi tjin yahnga ngayun xi jemu vojo nuju ne, cojo tjun ni xinu ngajan ndya nuju, cojo sa xi hacuiin sahmi nuju Nina castigu xi cuatjin vinechunyuun xingun. Quihndë ne, sacuaha cjuacjintacun xi yahnga ne, hya xi cuinduvatjëngë nuju ne, hya sahmechehen.

12

Cjuatjo xi sua Nina ngayaan

¹ Ngayujun ni ne, meje ná xi cuijnercun sacuaha tséhë cjuatjo xi cuacun sua naja Nina.

² Ngayun ne, ndaja hyun xi hya xi cjëë cuisuhun ladu rë Nina ne, tujyë caningatuhun cachjuhunrcun nina ndyojo xi hatuxa tsajin cjuahñu rë. ³ Vëhë xi meje ná xi cuijnercun xi ngu xuta xi tichja me ngu cjua xi casua Hasen rë Nina me ne, hatuxa cuichjaain me cjua vihi: “¡Jesús ne, catji me cojo xitsehen!” Hacuaha suvá ni xuta xi jiya Hasen rë Nina cahntsua cjuatacun rë me xi cuma cuichja me cjua vihi: “¡Jesús ne, Nai naha me!”

⁴ Quihndë ne, jemu cjín xcusun cjuatjo xi tjin, peru suvá ni Hasen rë Nina xi sua naja yëjë cjuatjo vëhë. ⁵ Hacuaha jemu cjín xcusun xa rë Nina xi tjin, peru suvá ni Nai naja xi suaxa naja me. ⁶ Hacuaha hacuiin ngu chihin xcusun xa xi Nina sahmi me xcun cjuahñu naja, peru ngu ni Nina sahmi me vëhë ngajñi jima ngu jima ngu ngayaan. ⁷ Nina sahmi me xi ma tsejen xi jiya Hasen rë me cahntsua xahasen naja xingu xingu ngayaan, cojo sa xi ndaja tsajan ngajñi naja ngayejen ni. ⁸ Ngu xuta ne, jemu vechú cjuatacun rë me hya xi chja me ngu cjua xi sua Hasen rë Nina me. Hane ngu nga xuta ne, jemu ndaja vijnercu me hya xi chja me ngu cjua xi sua Hasen rë Nina me. ⁹ Hane ngu nga xuta ne, ha Hasen vëhë ni ne, sahmi xi ndaja mangucacun me cojo Nina. Hane ngu nga xuta ne, ha Hasen vëhë ni sahmi xi ma sahmi me xi mandaja xuta hmu rë. ¹⁰ Hane ngu nga xuta ne, fahatsja me cjuatacun xi sahmi me cjuarcun, hane ngu nga xuta ne, fahatsja me cjuatacun xi cuichja me ngu cjua xi sua Nina me. Ngu nga me ne, fahatsja me cjuatacun xi cuijnercu me mé xcusun hasen catsingatju ngu cjuatacun xi cafahatsja ngu xuta, ¿há hasen ndaja?, o ¿há hasen tsehen? Ngu nga xuta ne, fahatsja me cjuatacun xi cuichja me ngujo xcusun hne xi hvíin me. Hane ngu nga me ne, fahatsja me cjuatacun xi sua me machaya naja mé vijné xi cuacun vëhë. ¹¹ Ngu tu tu ni Hasen rë Nina xi sahmi yëjë cjuandaja vëhë, hacuaha hacui ni Hasen rë Nina xi sua naja jima ngu ngayaan hacutjin xi chuya rë.

Sacuaha ngu ni yojo má ngayejen ni

¹² Ha hyan ta yojo rë ngu xuta ne, tjin tsja, tjin ntsacu, tjin nguisin, tjin jingusa cahndé tséhë. Peru yëjë ni cahndé vëhë ne, má ngu ni yojo rë xuta. Hacuaha cuanitjin rë Jesucristu. ¹³ Hacuaha cuanitjin naja ngayaan ta ngayejen ni ne, hya xi caxtenda ngayaan, handasa xuta ladu rë Nina o sa xutaxín, handasa mosu hndixahan o sa xuta xi ndaya tjin má ngayaan ne, peru camá ngayaan sacuaha ngu ni yojo ngatsë rë ngu tu tu ni Hasen rë Nina. Hacuaha ngayejen ni ne, ngu tu tu ni Hasen rë Nina xi cavisehen cahntsua xahasen naja.

¹⁴ Cuatjin ta yojo rë ngu xuta ne, hacuiin ngu cahndé ni tjin rë ta jemu cjín cahndé tjin rë. ¹⁵ Ntsacun ne, cuma cuichja cuitjin: “Ngatsë rë xi hacuiin ntsun má ngahan ne, vëhë xi hacuiin tséhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vëhë sahmi xi hacuiin tséhë yojo naja má. ¹⁶ Hacuaha tyjavañujú nga ne, cuma cuichja cuitjin: “Ngatsë rë xi hacuiin túxcun má ngahan ne, vëhë xi hacuiin tséhë

yojo nuju má ngahan." Cuatjin cuichja. Peru handasa cuatjin cuichja ne, hacuiin vëhë sahmi xi hacuiin tsëhë yojo naja má. ¹⁷ Sa xi suvá tuxcun má yëjë yojo naja ne, ¿hacutjin cuinuhyan? O sa xi suvá tyjavañujú má yëjë yojo naja ne, ¿hacutjin cuijné naja? ¹⁸ Peru Nina ne, cavyujutahá me jima ngu cahndé tsëhë yojo naja tucutjin ni xi cachuya rë me. ¹⁹ Sa xi yëjë ni yojo naja má ngu ni ntsan o sa xi ngu ni tuxcun ne, vëhë ne, hisca hacuiin yojo naja hmí rë. ²⁰ Cuatjin xi jemu cjín cahndé xi cuacun vëhë xi má ngu ni yojo naja.

²¹ Quihndé ne, tuxcun ne, cumaji cuichja xi mamijí rë ntsan, o sa rcuun ne, cumaji cuichja xi mamijí rë ntsacun ta, ²² xi cjuaquixi ne, cahndé tsëhë yojo naja xi má naja xi hitsë sa tsavi ne, vëhë cahndé xi hitsë sa mameje. ²³ Hane cahndé tsëhë yojo naja xi hitsë sa chjaharcuaain rë ne, vëhë cahndé xi hitsë sa ndaja nicaja rë. Hane cahndé tsëhë yojo naja xi má naja xi mijí rë xi ningacun rë ne, vëhë cahndé xi hitsë sa ndaja cuidadu má. ²⁴ Peru hacuiin sahmi nguyjé nihña cuatjin cojo cahndé tsëhë yojo naja xi ma ningacun rë. Nina ne, hya xi catsindaja me yojo naja ne, casahmi me xi hitsë sa chjahárcun rë cahndé xi hitsë sa tsavi. ²⁵ Cuatjin casahmi Nina yojo naja, cojo sa xi ngu chihin ni sahmixa yëjë yojo naja, hacuaha yëjë ni cahndé tsëhë yojo naja ne, ngu tangun ni marcun rë tsëhë xicjin. ²⁶ Hane sa xi ngu cahndé tsëhë yojo naja choho vatju má ne, hacuaha cojo sa yëjë cahndé tsëhë yojo naja choho má rë. O sa xi ngu cahndé tsëhë yojo naja vaxéndaja xuta ne, hacuaha cojo yëjë sa cahndé tsëhë yojo naja ndamá rë.

²⁷ Quihndé ne, ngayejen ni xuta ladu rë Nina ne, sacuaha yojo rë Jesucristu má ngayaan, hane jima ngu ngayaan ne, má ngayaan sacuaha ngu cahndé tsëhë yojo rë me. ²⁸ Hane ngajñi naja ngayaan xuta ladu rë Nina ne, tjuntjun ne, cavyuju me apóstol; xi ma jo ne, cavyuju me profeta; xi ma jyan ne, cavyuju me xuta xi vicuya cjua rë me; hane xi cjui sa ne, cavyuju me xuta xi ma sahmi cjuarcun, cojo xuta xi ma sahmi xi mandaja xuta hmu rë, xuta xi visecoo me jingu sa xuta, xuta xi vitexa naja, xuta xi ma chja me ngu hne xi hvíin me mé vijne. ²⁹ Tsëhë cjuatjo vihi ne, hacuiin yëjë vihi satë naja jimangu yaan ta, ¿há ngayejen ni má ngayaan apóstol ni? ¿Há ngayejen ni má ngayaan profeta ni? ¿Há ngayejen ni vicuyan cjua rë Nina ni? ¿Há ngayejen ni ma nihña cjuarcun ni? ³⁰ ¿Há ngayejen ni ma nihña xi mandaja xuta hmu rë ni? ¿Há ngayejen ni ma nújan hne xi hisca núhyaan mé vijne ni? ¿Há ngayejen ni ma tahan machaya rë xuta mé vijne hne vëhë ni? ³¹ Vëhë xi meje rë xi ngayun ne, catamameje nuju cjuatjo rë Nina xi hitsë sa vengui chji rë.

Quihndé ne, tsingácun nuju ngu ndiya xi hitsë sa jercu ndaja.

13

Mé vijne xi tjin naja cjuahmutacun

¹ Ngahan ne, sa xi cuichjá yëjë hne rë xuta hacuaha cuichjá hne rë ángel, peru tsajin ná cjuahmutacun ne, tangun ngahan cojo ngu quicha xi choho fane o sa ngu quicha xi hmí platillu xi jercu fane camahani. ² Sa xi cuichjá ngu cjua xi sua ná Nina, sa xi vijnercú yëjë cjua rë Nina xi tjihma, sa xi hvé yëjë cjuatacun, hacuaha sa xi ma tsiniya ngu naxi ngatsë rë xi jercu ndaja mangucacún cojo Nina, peru tsajin ná cjuahmutacun ne, tsajin mé vengui chjí naha. ³ Sa xi suá rë xuta yuma yëjë xi tjin ná, hacuaha hisca suá yojo naha xi cueti, peru tsajin ná cjuahmutacun ne, tsajin mé machjiréhë ná xi cuatjin sahme.

⁴ Hyá xi tjin naja cjuahmutacun ne, hacuaha jyë tacun, ndaja ngayaan, hacuiin chini ngayaan, hacuiin xta ngayaan, hacuiin nihña yehe suvaan yojo naja, ⁵ hacuiin xcuahya ngayaan, hacuiin meje naja xi suvaan ni ndaja tsajan, hacuiin ma cjan naja, hacuiin veyantacun cjuatsehen xi sahmi xuta cojo naja. ⁶ Xi tjin naja cjuahmutacun ne, tsajin mé ndama naja tsëhë cjuatsehen ta xi ndama naja ne, tsëhë cjuaquixi. ⁷ Xi tjin naja cjuahmutacun ne, ngajñi rë tu mé ni cjuacjintacun ne, hatuxa jyë tacuun, hatuxa mangu tacuun, hatuxa vetahan tacun, hatuxa caa naja.

⁸ Cjuahmutacun ne, tsajin nixtin xi cjuë. Peru cuechú nixtin xi ha quihndë suaain sa Nina cjua xi cuichja profeta, ha quihndë cuichjaain sa xuta hne xi vijnii rcu me, hacuaha ha quihndë suaain sa Nina cjuatacun xi ndaja cuijnercu ngu xuta cjua rë me. ⁹ Cuatjin cuma ta cjua rë Nina ne, sehe hitsë xi vijnercuun, hacuaha sehe hitsë cjua rë Nina xi chja profeta. ¹⁰ Peru hya xi cjuehe me xi vëë chichihin yëjë cjua rë Nina ne, hya cjuë xi tsë tsë ni hyan.

¹¹ Hya xi lihndi ngahan ne, cavisajme sacuaha visiajmi langa, catsingátaha cacún sacuaha tsingataha cacun langa, hacuaha cjuatacun naha ne, sacuaha cjuatacun rë langa. Peru xi camachangá ngahan ne, cavejñáxen xcusun rë langa. ¹² Quihndë ne, sehe hitsë vijnercuun cjua rë Nina sacuaha tsejen naja hya xi chutsejenyan ni ngu speju xi hacuin ndaja tsejen. Peru cuechú nixtin xi chutsejen xcun cojo xcun. Quihndë ne, sehe hitsë xi vijnercú. Peru cuechú nixtin xi chichihin ni cuijnercú, sacuatjin vëë ndaja ná Nina. ¹³ Quihndë ne, tjin jyan xcusun xi nihñu xi tsajin nixtin xi cjuë. Tjun ne, xi mangu tacuun cojo Nina. Xi má jo ne, xi vetahan tacun Nina. Xi má jyan ne, xi tjin naja cjuahmutacun. Peru xi hitsë sa matitjun ngajñi rë xi catsijyan vëhë ne, xi tjin naja cjuahmutacun.

14

Hne xi hyaan mé vijne

¹ Quihndë ne, nihñu ngahñu xi tjin nuju cjuahmutacun. Hacuaha catamameje nuju xi sua nuju Nina cjuatjo rë me. Peru hitsë sa chjahyun rë me cjuatacun xi cuinújun cojo xuta ngu cjua xi sua nuju me ta, ² xuta xi chja me ngu hne xi hvíin me mé vijne ne, hacuin chja me cojo xuta ta suvá ni Nina chja me cojo ta, tséhë xi tsajin yo vijnercu. Hasen rë me sahmi xi chja me cjua xi tsajin yo vëë. ³ Peru me xi chja cjua xi casua Nina me ne, chja me cojo xuta, cojo sa xi cuisecoo me xuta hacuaha sua rë me cjuetacun. ⁴ Xuta xi chja me ngu hne xi hvíin me mé vijne ne, visecoo suvá rë me yojo rë me. Peru xuta xi chja me ngu cjua xi casua Nina me ne, visecoo rë yëjë xuta rë yungun.

⁵ Ngayujun ni ne, meje ná xi cuma cuinújun hne xi vijnircun, peru hitsë sa meje ná xi chjuhunntsun cjuatacun xi cuinújun cojo xuta ngu cjua xi sua nuju Nina ta xuta xi chja me cojo xuta ngu cjua xi sua Nina me ne, hitsë sa matitjun me xi cuma rë me xi chja hne xi vijnircuun. Peru sa xi cuma cuichja me cojo naja mé vijne hne vëhë ne, ndatjin ta cuisecoo naja ngayejen ni xuta rë yungun xi cuatjin sahmi me. ⁶ Vëhë xi hya xi cjuétjengë nuju ne, venguiin chjí rë xi cuichjá cojo nuju ngu hne xi vijnircun. Xi vengui chjí rë ne, hacui xi suá cumachaya nuju ngu cjua xi casua ná Nina, o sa xi cuichjá cojo nuju ngu cjuatacun xi sua Nina, o sa xi cuicuyá nuju ngu cjua rë Nina o ngu cjuachacun.

⁷ Cuma cuinújan ne, sa xi ngu tyo o sa ngu arpa hacuin ndaja fane ne, hisca hyaan mé pieza fane. ⁸ Hacuaha sa xi ngu tyo rë sindadu hacuin ndaja sua xta rë ne, tsajin yo cuéhëchjine rë xi cjue xcun si. ⁹ Hacuanitjin nuju ngayun ta sa xi cojo ntsuvun nújun ngu cjua xi nuhyaaín rë ne, tsajin yo xi cuijnercu cjua vëhë ta sacuaha xi ngajñi tjo ni nújun. ¹⁰ Nguehe ngasunhndë ne, hisca hyaan há cjín xcusun hne tjin, hane yëjë ni ne, tjin mé vijne. ¹¹ Peru sa xi vihndeen ngu hne ne, sacuaha ngu xuta ngu nangui ngahan xi cuma rë xuta xi tichja cojo ná jan, hacuaha me vëhë ne, sacuaha xuta ngu nangui me xi cuma ná ngahan. ¹² Vëhë xi quihndë ta ngayujun ni jemu meje nuju cjuatjo rë Nina ne, nihñu ngahñu xi sacú nuju ngu cjuatjo xi visecoo rë yëjë sa xuta rë yungun.

¹³ Vëhë xi xuta xi chja me ngu hne xi hvíin me mé vijne ne, catjehya rë me Nina cojo sa xi cuma suacuenda me mé vijne. ¹⁴ Sa xi sahme oración naha cojo ngu hne xi vijnircú ne, hasen naha ne, sahmixa, peru cjuatacun naha ne, sahmixaain. ¹⁵ ¿Hacutjin sahme ni? Sahme oración naha cojo hasen naha, hacuaha sahme oración naha cojo cjuatacun naha. Sé cojo hasen naha, hacuaha sé cojo cjuatacun naha. ¹⁶ Sa xi ngayun nihñuu cuatjin ne, hya xi tuhun nacuechji rë Nina cojo hasen nuju ne, cumaji cuichja xuta xi yahnga sa: “Cuatjin Jain” ta, tséhë xi cjua xi nûjun ne, vijnircu me. ¹⁷ Handasa jemu ndaja tuhun nacuechji rë Nina, peru xuta xi yahnga ne, visecuaain camahani rë me. ¹⁸ Súa nacuechji

rë Nina ta hitsë sa chjá ngahan hne xi vijniircú xi cuma nuju ngayujun ni. ¹⁹ Peru hya xi ma tangun ngahan cojo xuta ngajan yungun ne, hitsë sa chuya ná xi cuichjá ndastu hñú cjua cojo cjuatacun naha cojo sa xi cuicuyá rë xuta, xi cuma rë xi cuichjá të mil cjua cojo ngu hne xi vijniircu me.

²⁰ Ngayujun ni ne, ha quihndë xicaningatuun tacún sa sacuatjin tsingataha cacun quihndi. Sacuatjin rë ngu quihndi xi hisca hvíin mé xi hmí rë cjuatsehen ne, cuatjin meje rë xi hacuaha hyuun. Peru xi cojo cjuatacun nuju ne, meje rë xi ningatuhun tacún sacuaha tsingataha cacun ngu xuta changá. ²¹ Xcun xujun rë Nina ne, camahindu cjua xi cachja me cuitjin: “Ngahan ne, tsingátju xuta ngu nangui xi chja jingu sa hne, hane hne rë me cuichja me cjua naha cojo yéjë xuta ladu naha. Peru handasa cuatjin sahme ne, cuetaharcuaain me cjua naha, chja Nina.” Cuatjin camahindu. ²² Véhë xi cjuatjo xi casua naja Nina xi ma nújan hne xi hisca hyaan mé vijne ne, hacuiin ngatsë rë xuta xi ha mangu cacun cojo Nina xi casua me ta ngatsë rë xuta xi tsitjungui cjua rë me. Hane cjuatjo xi ma nújan ngu cjua xi sua naja Nina ne, hacuiin ngatsë rë xuta xi tsitjungui cjua rë me xi casua me ta ngatsë rë xuta xi ha mangu cacun me cojo rë me. ²³ Véhë xi hya xi matangun ngayujun ni ngayun xuta rë yungun, sa xi ngayujun ni nújun ngu hne xi hisca hyuun mé vijne hane cjuehe ngujo cha xi hvíin cjua rë Nina hacuaha hisca manguaain cacun cha cojo me ne, ¿háciuin tsingataha cacun cha xi sca nuju ni? ²⁴ Peru sa xi ngayujun ni ngayun nújun ngu cjua xi sua nuju Nina hane cjuehe ngu cha xi manguaain cacun cojo Nina hacuaha hisca hvíin cha cjua rë me ne, xi vihndë cha yéjë cjua véhë ne, cuijnercu cha xi jemu tjin jyé rë cha, suvá ni cha tsichuva cha cjuatacun rë cha, ²⁵ hacuaha cjua xi hinchahma ngajni rë cjuatacun rë cha ne, cuitsjen rë cha. Ngajan xi cjue cuiticjaxcun cha, cjuaharcun cha Nina. Hacuaha tsinguixi cha xi tacun Jain Nina nguehe ngajni nuju.

Meje rë xi ndandaja nihña yéjë ni

²⁶ Ngayujun ni ne, cuitjin vijne cjua xi titsihíndu nuju. Hya xi matangun ngayujun ni ne, ngu ngayun ne, sun tséhë Nina, ngu nga ngayun ne, vicuyun ngu cjua rë Nina, ngu nga ngayun ne, nújun ngu cjua xi casua nuju Nina, ngu nga ngayun ne, nújun ngu hne xi hisca hyuun mé vijne, hane ngu nga ngayun ne, nújun mé vijne cjua rë hne jan. Xi meje rë ne, yéjë ni xcusun xi nihñu vë ne, cuatjin nihñu cojo sa xi cuisecuun xingun ngajni nuju. ²⁷ Sa xi tjin xuta xi cuichja me hne xi vijniircun ne, catichja jo o sa xi jyan ni me, hacuaha chuva ngu me catichja me. Hane meje rë xi cuinújun ngu ngayun mé vijne cjua xi cachja xuta xi cuacun jan. ²⁸ Peru sa xi tsajin ngu ngayun xi cuma nihñu cuatjin ngajan yungun ne, catiyujujyu ni xuta xi cuacun vë. Catichja suvá ni me cahntsua xahasen rë me, o sa suvá ni Nina catichja me cojo me. ²⁹ Hacuanitjin ni sa xi tjin xuta xi cjuahahtsa me ngu cjua tséhë Nina ne, jo jyan ni me catichja me, hane yéjë sa ngayun ne, nichuvun cjua véhë. ³⁰ Sa xi ngu ngayun xi nechun ndyá chjuhunntsun ngu cjua tséhë Nina ne, catisejyu me xi titjun tichja jan. ³¹ Xi cuatjin ne, ngayujun ni cuma cuinújun chuva ngu chuva ngu ngayun ngu cjua xi chjuhunntsun tséhë Nina, cojo sa xi hacuaha cojo yéjë sa ngayun ne, cumachaya nuju hacuaha sacú nuju cjuetacun. ³² Xuta xi chja me ngu cjua xi fahatsja me tséhë Nina ne, cjua véhë cuitexa me cjuatacun rë suvá me ta, ³³ tséhë xi Nina ne, chuijin rë me xi tujyé nihña ta xi chuya rë me ne, ngu cjuandaja cjuajeya.

Sacuatjin xcusun xi nihña ngayejen ni xuta ladu rë Nina ne, ³⁴ yachjin ne, mijí rë xi cojo na cuichja na hya xi tjin tangun ngayaan yungun ta, tséhë xi tsajin cahndë xi cuichja na. Xi meje rë ne, catiyuju na ngahma gubiernu rë xihin rë na, sacuatjin vitexa ley rë Nina. ³⁵ Sa xi tjin ngu cjua xi meje cumachaya rë na ne, ndava na catinenguise na xihin rë suvá na ta, tséhë xi jemu cjuasava xi ngu chjuun cuichja na hya xi tjin tangun ngayaan ngajan yungun.

³⁶ ¿Há tjutjun ngayun canújun cjua rë Nina cojo xuta? ¿Há suvun ni catsingatju nuju Nina cjua véhë ni? ³⁷ Sa xi tjin ngu xuta xi má rë me xi profeta me o sa quitsë rë xahasen rë me cojo Hasen rë Nina ne, catijnercu me ta cjua xi titsihindu nuju vi ne, Nai naja vitexa me. ³⁸ Peru sa xi mijí sahmicuenda me cjua naha ne, hacuaha xicanihñucuenduun cjua rë me.

³⁹ Véhë xi ngayujun ni ne, catamameje nuju xi cuma ngayun profeta, hacuaha xicanichuun rë xuta cahndë xi cuichja me hne xi vijniircu me. ⁴⁰ Xi meje rë ne, yéjë ni xcusun xi nihñu ne, ndandaja nihñu hacuaha chichihin ni nihñu yéjë.

15

Cjuandajyihu xi chja tséhë xi cavuya Jesucristu cjuahñu

¹ Ngayujun ni ne, meje tsinguitsjen nuju tséhë cjuandajyihu xi casuá camachaya nuju, cjuandajyihu xi chja tséhë Jesucristu. Cachjuhunntsun cjuandajyihu véhë, hacuaha ndaja sa tijimangu tacún cojo. ² Hane ngatsë rë cjuandajyihu véhë ne, tivetjuntjun tséhë jyé nuju, sa xi nismutacuun cjuandajyihu véhë. Cuatjin tivetjuntjun sa xi hacuiin tu mahya camangu tacún cojo.

³ Ngahan ne, casuá camachaya nuju cjua xi matitjun xi cafahántsa. Cachjá ta Jesucristu ne, cahme me cojo sa xi tsicjë me jyé naja, sacuatjin camahindu xcun xujun rë Nina. ⁴ Hacuaha cachjá cojo nuju ta caseyaniji me hane xi ma jyan nixtin ne, cavuya nga me cjuahñu, sacuatjin camahindu xcun xujun rë Nina. ⁵ Hacuaha cachjá cojo nuju ta cavëë Pedru Jesucristu, sehe cavëë yéjë tejó apóstol jan me. ⁶ Sehe ngu tangun ni cavëë nga vatju sa hñú cientu xuta ladu rë me me. Hane handasa cahme yahnga me ne, peru jemu cjín me xi siu quicun sa hisca quihndë. ⁷ Sehe cavëë Jacobo me, sehe cavëë nga yéjë apóstol me.

⁸ Hane xi camá ngascan xi cavuya cjuahñu rë me ne, ngahan cahvë me. Ngahan xi sacuaha ngu quihndi xi cavatjutaha tséhë nixtin rë, sehe catsin. ⁹ Cuatjin chjá ta, tséhë xi ngahan ne, hitsë sa chúva vengui chji naха xi cuma rë apóstol xi yahnga. Ngahan ne, hisca vechiin chuva rë xi apóstol cuichja xuta tsahan ta, tséhë xi jemu jyé cjuahñihi casuá rë xuta ladu rë Nina titjun. ¹⁰ Peru ngatsë rë cjuandaja rë Nina ne, ngahan ne, apóstol má ngahan. Hane cjuandaja xi casahmi me cojo ná ne, hacuiin tu mahya ta hitsë sa hñú casahme xa xi cuma rë yéjë sa apóstol. Peru hacuiin suva casahme ta cjuandaja rë Nina cavisecoo ná. ¹¹ Quihndë ne, cuendaain rë ¿há ngahan? o ¿há me véhë ne?, peru cjuandajyihu véhë xi catihin camachaya nuju, hacuaha cjua véhë xi camangu tacún cojo.

Cjuandajyihu xi chja tséhë xi cuya nima cjuahñu

¹² Quihndë ne, quihndë ta tihin machaya rë xuta xi Jesucristu ne, cahme me sehe cavuya nga me cjuahñu ne, ¿hacutjin má xi níjun yahnga ngayun xi nima ne, vuyaain nga cjuahñu ni? ¹³ Sa xi vuyaain nima cjuahñu ne, ngajan xi Jesucristu ne, hacuaha cavuyaain nga me cjuahñu. ¹⁴ Hane sa xi cavuyaain Jesucristu cjuahñu ne, ngajan xi tu mahya xi cuatjin tihin machaya rë xuta, hacuaha ngayun ne, tu mahya xi cuatjin mangu tacún. ¹⁵ Sa xi cuatjin ne, ngajan xi hacuiin cuatjin cjua xi níjin tséhë Nina ta, tséhë xi níjin xi Nina ne, catsicuya me Jesucristu cjuahñu. Peru quixiin xi catsicuya Nina Jesucristu cjuahñu sa xi hatuxa vuyaain nima cjuahñu. ¹⁶ Sa xi hatuxa tsicuyaain Nina nima cjuahñu ne, ngajan xi hacuaha catsicuyaain me Jesucristu cjuahñu. ¹⁷ Hane sa xi catsicuyaain me Jesucristu cjuahñu ne, ngajan xi tsajin mé vengui chji rë xi cuatjin mangu tacún cojo rë me, hacuaha cjëe camahani cjuë jyé nuju. ¹⁸ Hacuaha nima xi camangu cacun cojo Jesucristu ne, hacuaha cachajá me. ¹⁹ Sa xi suvá ni quihndë xi nechan cjuahñu machjirëhë xi cuitjin vetahan tacun Jesucristu ne, hitsë sa jemu chojyihu tsajan xi cuma rë yéjë sa xuta.

²⁰ Peru xi cjuaquixi ne, Jesucristu ne, Nina catsicuya rë me cjuahñu. Tséhë yéjë nima xi cahme ne, me véhë tjutjun me cavuya me cjuahñu. ²¹ Sacuatjin xi ngatsë rë ngu xihin cavisehen cjuaveya ngasunhndë ne, hacuanitjin ni ngatsë rë ngu xihin ne, cavisehen cjuatacun xi nima ne, cuya cjuahñu. ²² Ngatsë rë xi tjë rë Adán má xuta ne, véhë xi yéjë ni me ne, hme me. Hacuanitjin ni ngatsë rë xi sahmitangun xuta cjuatacun rë me cojo Jesucristu ne, véhë xi yéjë ni me xi cuacun vë sacú rë me cjuahñu xatsë. ²³ Peru cuatjin sacú rë jima ngu me hacutjin xi satë rë me: tjutjun ne, Jesucristu; ngaxtun véhë ne, hya xi cuya nga Jesucristu ne, xuta xi ladu rë me ne, tsicuya me cjuahñu, sacú rë me cjuahñu

xatsë. ²⁴ Ngaxtun vëhë nga ne, tsicjë Jesucristu yëjë xutaxa rë xi jemu tsehen, hacuaha tsicjë me yëjë xitsehen. Hane xi matjenguicjin ne, sahmi me entregadu cojo Nina Nahmi naja gubiernu xi sahmi me. Hane hya cijnetaha ngasunhndë. ²⁵ Cuatjin cuma ta meje rë xi Jesucristu ne, sahmi me gubiernu hisca hya xi cuiyuju Nina ngahma gubiernu rë Jesucristu yëjë ni xi sahmi rë me condra. ²⁶ Hane xi cuatju tsicjë Nina yëjë sa xi sahmi rë Jesucristu condra ne, sehe tsicjë me cjuaveya ta, tsëhë xi hatuxa yëjë ngarca ni caviyuju Nina ngahma gubiernu rë Jesucristu. ²⁷ Chja xujun rë Nina xi caviyuju me yëjë ngarca ni ngahma gubiernu rë Jesucristu. Peru ha suvá tsejen xi hacuiin cojo Nina, me xi caviyuju yëjë ngarca ni jan, cavéjña me. ²⁸ Peru hya xi ha yëjë ngarca ni cuiyuju ngahma gubiernu rë Jesucristu, me xi Quihndi rë Nina ne, hya cuejñá suvá Jesucristu yojo rë me ngahma gubiernu rë Nina, me xi caviyuju yëjë ngarca ni ngahma gubiernu rë Jesucristu. Cuatjin cuma, cojo sa xi Nina ne, cuma titjun camahani me tsëhë yëjë ngarca ni.

²⁹ Quihndë ne, sacuaha xuta xi cuatjin xtenda me ngatsë rë nima ne, ¿mé machjirëhë? Sa xi hatuxa vuyaain nima cjuahñu sacuatjin chja yahnga xuta ne, ¿mé má cuatjin xtenda xuta ngatsë rë nima? ³⁰ Hane sacuaha ngayin ne, ¿mé má yëjë ni hora nechintihin tsavi? ³¹ Nina vëé me xi hacuaha ngahan ne, ngu nixtin ngu nixtin ne, tejñataha tsavi tséhë cjuaveya. Ngayujun ni ne, jemu vaxéndaja nuju ngatsë rë xi tjin tangun cjuatacun naja cojo Nai naja Jesucristu. ³² Sa xi ngahan cavitejñataha tsavi nguehe Efeso sacuaha ngu xuta xi hacuiin ladu rë Nina má me ne, ¿mé ndaja tsahan ni? Sa xi hatuxa vuyaain nima cjuahñu ne, sacuatjin chja cjua ne: “¡Jemu sa ndaja xi xinëë siuun ta, nchujun ni nguini ne, cueyan!” ³³ Ha quihndë xicatuun cahndë xi cumandacha sa ngayun ta, tjin ngu cjua xi chja cuitjin: “Xi nihña tangun cojo xuta tsehen ne, vëhë tsinguetsun rë xcusun ndaja xi nihña.” ³⁴ Catuya nga catejñá chihin cjuatacun nuju, hacuaha ha quihndë xicanihñuu sa cjuatsehen. Tjin yahnga ngayun ne, hisca hyuun Nina. Cuatjin chjá cojo nuju cojo sa xi cuma sava nuju.

Xcusun yojo xi sacú rë nima hya xi cuya cjuahñu

³⁵ Peru tjin rë yahnga ngayun xi chjinengunsun cuitjin: “¿Hacutjin nga cuya nima cjuahñu? ¿Mé xcusun yojo rë me xi cuya?” Cuatjin chjinengunsun. ³⁶ ¡Ngarca, xan! Hya xi nitjen ngu tutjé ne, titjun cueya sehe cuetju. ³⁷ Xcusun xi nitjen ne, hacuiin xcusun xi sehe cuma jyë jan, ta ngu tutjé ni xi nitjen, sacuaha ngu trigu o sa tu mé sa xcusun tutjé. ³⁸ Peru Nina sua me xcusun rë hacutjin jyihí xi cachuya rë me. Jima ngu tutjé ne, sua rë me xcusun rë xi tséhë suvá. ³⁹ Yojo ne, hacuiin ngu xcusun ni tjin ta hacjahi xcusun yojo rë xuta, hacjahi xcusun yojo rë chu, hacjahi xcusun yojo rë chu nisë, hacuaha hacjahi xcusun yojo rë chu ti. ⁴⁰ Tjin hasen xi tjin ngajan ngahnga hacuaha tjin hasen rë yëjë xi tjin nguehe nangui. Peru hacjahi tsejen xcusun xi tjin ngajan ngahnga hacuaha hacjahi tsejen yëjë xi tjin nguehe nangui. ⁴¹ Hacjahi hasen ndajyihí rë tsuhi, hacjahi hasen ndajyihí rë sá, hacuaha hacjahi hasen ndajyihí rë niñú. Hisca ngajñi rë niñú ne, hacjahi hacjahi hasen rë jima ngu.

⁴² Hacuaha cuatjin cuma hya xi nima cuya cjuahñu. Hya xi seyaniji nima jan ne, hatuxa fë fehndu yojo rë. Peru hya xi nima cuya nga cjuahñu ne, tsajin nu tsajin nixtin xi cjuehndu yojo rë. ⁴³ Hya xi seyaniji ne, tsajin camahani mé ndajyihí, peru hya xi cuya nga cjuahñu ne, jercu ndajyihí camahani. Hya xi seyaniji ne, tsajin camahani ngahñu rë, peru hya xi cuya nga cjuahñu ne, jemu hñu camahani ngahñu rë. ⁴⁴ Hya xi seyaniji ne, seyaniji ngu yojo naja xi hatuxa tséhë cjuahñu xi tjin nguehe ngasunhndë vihi, peru hya xi cuya nga cjuahñu ne, cuya ngu yojo naja xi hatuxa tséhë cjuahñu xi tjin ngajan ngahnga. Quihndë ta tjin yojo naja xi tséhë cjuahñu xi tjin nguehe ngasunhndë ne, ngajan xi hatuxa tjin yojo naja xi tséhë cjuahñu xi tjin ngajan ngahnga.

⁴⁵ Hacuaha cuatjin camahindu xcun xujun rë Nina hiscan chja cuitjin: “Adán, xihin xi tjutjun camá ne, casua Nina me cjuahñu.” Peru Jesucristu, me xi canduva camá ngascan ne, me vëhë Hasen xi sua cjuahñu. ⁴⁶ Hacuiin titjun sacu naja cjuahñu xi tséhë ngahnga ta tséhë ngasunhndë titjun sacu naja, sehe sacu naja cjuahñu xatsë xi tséhë

ngahnga. ⁴⁷ Xihin xi tjutjun camá jan ne, cojo nihndé camá. Véhë xi tséhë ngasunhndé má. Peru Jesucristu, xihin xi majo jan ne, canduva me tséhë ngahnga. ⁴⁸ Yéjë xuta xi tséhë ngasunhndé me ne, hatuxa tangun me cojo xihin xi nihndé camá jan. Hane yéjë xuta xi tséhë ngahnga me ne, hatuxa tangun me cojo xihin xi canduva tséhë ngahnga. ⁴⁹ Sacuatjin xi camá ngayaan sacuaha xihin xi nihndé camá jan ne, hacuanitjin cuma ngayaan sacuaha xihin xi canduva tséhë ngahnga jan.

⁵⁰ Ngayujun ni ne, nguehe cuichjá cojo nuju ta yojo naja xi yojo cojo jni camá ne, cumaji cuisehen hiscan sahmi Nina gubiernu. Hacuaha ngu xcusun xi hatuxa fehndu ne, cumaji cuisehen hiscan tsajin camahani mé xi fehndu. ⁵¹ Chutsujun ni. Nguehe cuichjá cojo nuju ngu cjuatacun xi jiyahma titjun: Hacuiin ngayejen ngayaan cueyan. Peru ngayejen ni sacú yojo xatsé naja ⁵² ngu marcu macjain ni, sacuaha xi ngu cuechjan ngu chuxahan ni tuxcun, hya xi cjuane sacuaha ngu tyo xi meje cuijnetaha fane ta, cjuane sacuaha ngu tyo, sehe cuya nima cjuahñu cojo yojo xatsé rë xi tsajin nu tsajin nixtin cjuehndu. Hane ngayaan ne, hacuaha sacú naja yojo xatsé naja. ⁵³ Cuatjin cuma ta, yojo naja vi xi hatuxa fehndu ne, meje rë xi cuya ngu yojo xi hatuxa fehndiin. Yojo naja vi xi hatuxa hme ne, meje rë xi cuya ngu yojo xi hatuxa hmii. ⁵⁴ Hane hya xi cuatjin cuma ne, hya cuetjucaa cjuá xi camahindu xcun xujun rë Nina xi chja cuitjin: “Cjuaveya ne, cjué camahani. Cjuahñu xatsé xi fehndiin ne, véhë scaa rë cuetjundaja. ⁵⁵ ¡Cjuaveya ne, ha quihndé tsajin camahani rë ngahñu! ¡Cjuaveya ne, ha quihndé tsajin camahani mé cjuahngatacun xi cuma sahmi cojo naja!” ⁵⁶ Cjuaveya ne, sahmi cjuahngatacun cojo xuta ngatsé rë cjuatseen, hacuaha cjuatseen ne, tjin rë ngahñu ngatsé rë ley rë Moisés. ⁵⁷ Peru nacuechji rë Nina, me xi sahmi xi vetjunndajan ngatsé rë yéjë ni xi casahmi Nai naja Jesucristu.

⁵⁸ Véhë xi ngayujun ni ne, ngayun xi jemu hmú cacún nuju ne, tejñuhñu xahasen nuju, xicavetjunxuun tséhë ndiya rë Nina. Yéjë ni nixtin ne, tángun nduju camaha sa nihñu xa xi casua nuju Nai naja. Ha hyun ta yéjë xa xi nihñu ne, hacuiin tu mahya, xi cuatjin tjin tangun cjuatacun nuju cojo Nai naja.

16

Cuma tangun tujún xi cjue Jerusalén

¹ Quihndé ne, sacuaha tujún xi jima tangun xi cjue cuisecoo rë xuta ladu rë Jesucristu, me xi jemu chocho tivatju tijima ngajan Jerusalén ne, sacuatjin cachjá cojo xuta rë yungun ngajan distritu Galacia ne, cuatjin nihñu. ² Jima ngu domingu ne, meje rë xi ngayujun ni ne, tejñuxun tsé tsé tujún xi nihñu ganar tséhë xa xi nihñu. Tetjún ne, cojo sa xi hya xi cjuéhë ndyá ne, mijí rë xi chjahya nga rë tujún. ³ Hane hya xi cjuéhë ndyá ne, yo xuta xi cuinújun xi cjue ne, tsihindu ngahan xujun xi cuaha me, sehe tsingátju me cjuecani me cjuatjo nuju ngajan Jerusalén. ⁴ Hane sa xi tsejen ta ndatjin xi ngahan cjué ne, cuma cjue me cojo ná.

Sua Pablo machaya rë xuta Corinto xi cjuetjengui me me

⁵ Cuechú nixtin xi cjuéjtengë nuju, peru hya xi ha cavátju distritu Macedonia, tséhë xi hatuxa tjin ná xi cuátu ngajan. ⁶ Cuma rë cuitejñataha cojo nuju ngujo nixtin, o sa xi yéjë nixtin rë chan hnchan. Hane xi cuatjin ha cavitejñataha cojo nuju hitsé ne, cuma cuisecuun ná hitsé xi cjué sa hiscan xi cjué. ⁷ Cuatjin tsingátaha cacún ta, tséhë xi mijí ná xi nduva scútsejen nuju xi tu ñaja cuátu ni ta xi vetahá cárdena, xi cuitejñataha cojo nuju jyé nixtin, sa xi sua Nai naja cahndé.

⁸ Peru cuitejñataha nguehe Efeso xi cuechú suhi tséhë Pentecostés ta, ⁹ tséhë xi jemu casacu ná cahndé xi sahme xa xi ndatjin cuetjucaa, handasa hacuaha jemu tjin xuta xi sahmi ná me condra.

¹⁰ Quihndé ne, sa xi cjue scusehenya nuju Timoteo ne, nihñu xi hacuiin cumacjín cacun me xi cuejña me ngajñi nuju ta, tséhë xi sahmi me xa rë Nai naja sacuatjin sahme ngahan.

¹¹ Véhë xi hisca ngu yun ne, mijí rë xi nihñuchuvun me. Tisecuun rë me xi cjue sa me cojo

cjuandaja cjuajeya, cojo sa xi cuma cuinduvatjengui ná me ta, tséhë xi nguehe tejñaya rë me cojo sa ngujo xuta ladu rë Nai naja xi nduva cojo me.

¹² Quihndë ne, sacuaha Apolos ne, jemu cachjá cojo rë me xi cjue me cojo ngujo sa xuta ladu rë Nai naja jan, cjuetjengui nuju me, peru mijí cjue me xi ngutjen. Peru cjue me nixtin hya xi sua rë me chuva rë.

Cjua xi vijnetaha

¹³ Nechun cuidadu. Ndaja sa catamangu tacún cojo cjuachacun xi macjain naja. Tiyujunhñu cjuatacun nuju hacuaha tuhun ngahñu xahasen nuju. ¹⁴ Yëjë ni xi nihñu ne, nihñu cojo cjuahmutacun.

¹⁵ Ngayujun ni ne, ha hyun ta yëjë me xi siu ndava Estéfanas ne, me xi cuacun vë tjutjun cavisehen me ladu rë Jesucristu ndyá Acaya, hacuaha casua suvá me yojo rë me xi cuisecoo me xuta ladu rë Jesucristu. ¹⁶ Meje ná xi ngayujun ni ne, tinuhun tséhë xuta xi cuatjin sahmi, hacuaha tinuhun tséhë xuta xi visecoo me xcun xa rë me xi cuacun vëhë.

¹⁷ Jemu ndama ná xi cafehe Estéfanas nguehe, cojo Fortunato cojo Acaico. Handasa tsajin ngayujun ni nguehe, ¹⁸ peru ndastu me xi jyan vi ne, casua ná me cjuetacun, sacuatjin casua nuju me ngayun cjuetacun. Xuta xi cuatjin sahmi ne, meje rë xi chjuhunrcun me.

¹⁹ Xuta tséhë yëjë ni yungun nguehe distritu Asia ne, tsingatju me ngu nina rë me tsujun ngayujun ni. Aquila cojo Priscila, cojo yëjë sa xuta ladu rë Jesucristu xi ma tangun me ndava me vëhë ne, hacuaha tsingatju me ngu nina rë me tsujun ngayujun ni xi hacuaha tjin tangun cjuatacun nuju cojo Jesucristu. ²⁰ Yëjë ni xuta ladu rë Jesucristu nguehe ne, tsingatju me ngu nina rë me tsujun. Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

²¹ Suva ngahan, Pablo, tsihindu nuju ngu cjua vihi, xi tisuá nuju ngu nina.

²² Sa xi ngajñi nuju tjin ngu me xi hmaai cacun me Nai naja ne, catisatiin rë me cjuandaja rë Nai naja. ¡Ngayun Nai naja, nduvun!

²³ Nai naja Jesucristu catisua nuju me cjuandaja rë me. ²⁴ Ngahan ne, hacuaha tsingátju cjuahmutacun naha xi cuma nuju ngayujun ni, ngatsë rë xi tjin tangun cjuatacun naja cojo Jesucristu.

Carta xi majo catsingatju San Pablo xi cafahatsja xuta nandya Corinto

¹ Ngahan Pablo ne, casuaxa ná Jesucristu xi má ngahan apóstol tséhë me, tséhë xi cuatjin xi meje rë Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu rë Nina ngayun. Hacuaha ningatjin xujun vi xi scutaya yéjë sa xuta ladu rë Nina jingujyë ni estadu Acaya vë. ² Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxëndaja Pablo Nina ngajñi rë cjuañihì

³ Nina Nahmi rë Nai naja Jesucristu ne, jemu tjin rë me cjuandaja. Me vëhë ne, hatuxa tjin rë me cjuayumatacun cojo niji hacuaha hatuxa sua niji me cjuetacun. ⁴ Sua niji me cjuetacun ngajñi rë yéjë ni cjuañihì xi vatjin má, cojo sa xi ngayin ne, hacuaha cuatjin cuma tihín rë xuta xi yahnga cjuetacun vëhë ngajñi rë yéjë cjuañihì xi vatju me má. ⁵ Chuva rë xi vatjin cjuañihì sacuatjin xi cavatju Jesucristu camá ne, hacuaha cuatjin sua niji me cjuetacun. ⁶ Hya xi cuatjin vatjin cjuañihì ne, hatuxa cuatjin má cojo sa xi ngayun ne, sacú nuju cjuetacun hacuaha cuetjuntjun tséhë jyé nuju. Hacuaha hya xi cuatjin sacu niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vëhë ngatsë rë xi hacuaha caa nuju cojo cjuañihì sacuaha cjuañihì xi vatjin má. ⁷ Ngayin ne, jemu vetihin tacuin nuju ta, tséhë xi hyin ta sacuatjin xi tivatjun cjuañihì ne, hacuaha tisacu nuju cjuetacun.

⁸ Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia. Jemu jyé camahani cjuañihì xi cavatjin camá, hisca ngahñu sa tsajin niji xi scaa niji cojo cjuañihì vëhë; quihndë tsajin niji cjuetacun xi cojo cjuahñu cuijnitihin. ⁹ Peru ngayin ne, hisca hatsëë camangu tacuin cojo cjuaveya niji. Cuatjin camá cojo sa xi hacuin cuetihin tacuin cjuatacun niji suvin ta cuetihin tacuin Nina, me xi tsicuya cjuahñu rë nima. ¹⁰ Nina ne, cavaxëtje niji me tséhë cjuacjintacun jyé xi meje tsiquehen niji jan, hacuaha cuaxëtje sa niji me. Cavetihin tacuin Nina xi cuatjin cuaxëtje sa niji me, ¹¹ tséhë xi ngayun ne, hacuaha tivisecuun niji xi tichjahyun rë Nina ngatsë niji. Hane xi cjín xuta sahmi me cuatjin ne, hacuaha jemu cjín cuma ngayun xi tuhun nacuechji rë Nina tséhë cjuandaja xi sua niji me.

Chja Pablo mé má cjéé cjué me Corinto

¹² Ngayin ne, nihñi yehe yojo niji ngatsë rë xi ha hyin cojo cjuatacun niji ta tyjahi xahesen niji hacuaha nechin nguñaja tacuin xi tivanguin cojo ngasunhndë niji. Peru hacuiin cojo cjuatacun niji suvin xi cuatjin cun ngayin ta cojo cjuandaja rë Nina. Hacuaha hatuxa cuatjin cun ngayin hya xi nechin ngajñi nuju. ¹³⁻¹⁴ Sacuaha cjuáxi nihindin nuju ne, suvá cjuáxi ma chutayun hacuaha vijnercun. Ha vijnercun hitsë, peru meje niji xi ndaja sa cuijnercun cjuetacun vihi: Cuma nihñi yehe yojo nuju ngatsë niji sacuatjin xi cuma nihñi yehe yojo niji ngatsë nuju, hya xi cuya nga Nai naja Jesucristu.

¹⁵ Xi cuatjin catsingátaha cárdena ne, cavejñá xi cjué scusehenya nuju titjun, cojo sa xi jo ndiya sacú nuju cjuandaja. ¹⁶ Meje cuátiju nangui nuju hya xi canduvá nguehe estadu Macedonia. Hane xi cuijnetaha cjuacjintacun naha nguehe Macedonia ne, hacuaha meje cuya scusehenya nga nuju ngu ndiya. Sehe ngajan xi ngayun ne, cuma cuisecun ná cojo sa xi cuma cjué ngajan distritu Judea. ¹⁷ Xi cuatjin cavejñá cjuatacun naha sehe casahmee ne, ¿há tsajin rë cjuaquixi cjuáxi naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhndë xi xcun cojo xcun ne, chja me ta cuma, hane xi taha ngaxtun ne, chja me ta cumaji? ¡Jéya, hacuahn cuatjin!

¹⁸ Nina, me xi hatuxa cjuaquixi ne, vëë me ta hacuahn jo ma tacuin xi nujin cojo nuju.

¹⁹ Sacuaha Jesucristu, Quihndi rë Nina, me xi catihin camachaya nuju cjuáxi rë, cojo cha

Silvanu cojo cha Timoteo ne, hacuiin jo tjin cacun me ta, yéjé ni cjua xi cachja me ne, hatuxa cjuaquixi. ²⁰ Hane Jesucristu vë ne, me vëhë xi sahmi chihin me yéjé ni cjua xi ha cachja Nina xi cuma. Vëhë xi hora xi chjahanrcun Nina xi nûjanyuman cojo Jesucristu ne, nûjan “Amén” (O sa tsajin ne, nûjan “Cuatjin jain.”) ²¹ Nina ne, hacui me xi sahmi xi viyujucahndé cjuatacun naja xi macjain naja Jesucristu. Hacui ni me xi cavaxijin me ngayaan. ²² Sacuaha xi cavisane me sellu rë me ngayaan; caveya me Hasen rë me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yéjé ni xi ha cachja me.

²³ Quihndë ne, quejen cavusehenya nuju sacuatjin xi ha cachjá cojo nuju ngatsë rë xi mijí tsisava nuju xi cuichjátaha nuju. Sa xi quixiin xi chjá ne, catitsingatju Nina cjuaveya xi cuma ná. ²⁴ Hacuiin xi meje cuitexin nuju jarë ngu cjua xi hatuxa meje rë xi cumacjain nuju ta, tséhë xi ngayun ne, ha siucahndé cjuatacun nuju cojo cjuachacun xi macjain naja. Ta ngayin ne, tivisecuiin nuju cojo sa xi cuma sua sa rë xahasen nuju.

2

¹ Hya xi camá ne, cavejñá cjuatacun naha xi hacuiin ngutjen cjuë scusehenya nuju sá tu chocho cuma rë xahasen nuju ngatsë rë cjua xi cuichjá cojo nuju. ² Cuatjin cavejñá cjuatacun naha ta, ngayun tinihñu xi ma sua rë xahasen naha. Vëhë xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha. ³ Vëhë xi cuatjin catsihindu nuju nixtin hya, cojo sa xi hya xi cuinduva ndyá ne, hacuiin cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cárunc cojo nuju ngayujun ni. Mangu cárunc xi tu mé ni xi sahmi xi jemu sua ma rë xahasen naha ne, hacuaha vëhë ni ne, sahmi xi jemu sua ma rë xahasen nuju. ⁴ Hya xi catsihindu nuju cjua vëhë ne, jemu chocho ma ná, jercu cjín catsingátaha cárunc ngatsë nuju, hisca jercu cajíhnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyé camahani.

Ma manchataha me xi cavinchachoho

⁵ Quihndë ne, sacuaha ngu xuta xi cavinchachoho vë ne, hacuiin ngahan ni chocho camá ná ta, ngayujun ni ne, hacuaha chocho camá nuju hitsë. “Hitsë ni” chjá ta, mijí cuátjutaha xi tichjátaha nuju. ⁶ Quihndë xi cjín ngayun canújuntuhun rë xuta jan ne, cojo vëhë ni ne, ha cuma. ⁷ Cahndé rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyé vëhë. ⁸ Vëhë xi chjá cojo nuju ta tuhun nga catamachaya rë me tséhë cjuahmutacun xi tjin nuju cojo me. ⁹ Vëhë jain xi cuatjin catsihindu nuju ta, tséhë xi meje cjuaháchuva nuju ne, há tjin ngu tacún xi nihñu yéjé ni hacutjin chjá cojo nuju. ¹⁰ Quihndë ne, yo xi ninchatuhun rë tséhë ngu jyé xi sahmi ne, ngahan ne, hacuaha tsinchátaha rë ta, tu mé ni xi catsinchátaha ne, vëë Jesucristu ta ngatsë nuju ngayun ne, vëhë xi cuatjin catsinchátaha, ¹¹ cojo sa xi cumoji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehén vë cojo naja.

Cjuacintacun rë Pablo ngajan nandya Troas

¹² Hya xi camá ne, céjé ngajan Troas xi cuichjá cojo xuta cjuandajyihi xi chja tséhë Nai naja Jesucristu. Hane xi caféhë ngajan ne, vutsején ne, jemu casacu ná cahndé xi cuichjá cojo xuta cjuandajyihi jan. ¹³ Peru hacuiin ndaja má cárunc xi casacuiin ná cha Titu xingueen sacuatjin xi catsingátaha cárunc. Vëhë xi catsinguínetaha cjua cojo xuta jan sehe cavétju canduvá nguehe estadu Macedonia.

Tsinguitsojo Pablo cjua rë Nina

¹⁴ Peru nacuechji rë Nina ta hatuxa sahmi me xi caa niji vetjintjin ngatsë rë xi tjin tangun cjuatacun niji cojo Jesucristu. Chuva vëhë xi Nina ne, sahmi me xi cumachaya rë xuta cjuatacun rë me jinguyjé ni. ¹⁵ Ta ngayin ne, sacuaha xta rë tyjungunsa ngayin xi tisua Jesucristu xi cuma rë Nina. Xta ndajyihi vëhë ne, vitsojo vechutaha rë yéjé ni xuta,

sa xuta xi tivetjutje me tséhë jyé rë me o sa xuta xi tivetjintjiin me. ¹⁶ Xi vutsejen niji xuta xi cuacun tivetjintjiin jan ne, sacu rë me cjuaquixi ta quixi Jain xi cuechiin me xcun Nina. Peru xi vutsejen niji xuta xi cuacun tivetjutje jan ne, sacu rë me cjuaquixi xi quixi Jain xi cuechu me xcun Nina. Ngayin ne, cumaji nihñi cojo cjuatacun niji suvin xa vë xi sacu rë xuta cjuaquixi jan. ¹⁷ Ngayin ne, hacuiin tiviteñi cjua rë Nina sacuatjin jemu cjín xuta tisahmi me ta ngayin ne, nechin nguñaja tacuin xi nújin cojo xuta cjua vëhë. Nina casua niji me xa hacuaha vutsejen me xa xi nihñi. Hacuaha tinihñi xa vëhë ta tséhë xi tjin tangün cjuatacun niji cojo Jesucristu.

3

Compromisu xatsë xi casahmi Nina

¹ ¿Há má nuju xi tinaxinndijin suvin nga yojo niji xi cuatjin nújin? O há tsajin ne, ¿há mameje rë xi tihín nuju o sa xi chjahyin nuju ngu carta xi chja ngatsé niji, sacuatjin sahmi yahnga xuta? ² ¡Jéya! mamijí rë ta, ngayun xi má ngayun sacuaha carta niji, sacuaha ngu carta xi camahindu cahntsua xahasen niji, ngu carta xi cuma scutsejen yéjë ni xuta ne, hacuaha cuma scutaya me. ³ Hane suvá tsejen xi Jesucristu catsihindu me carta jan, hane ngayin ne, tu canihñi entregadu ni. Hacuiin cojo tinta camahindu ta cojo Hasen rë Nina xi quicun me. Hacuaha hacuiin xcun ndyojo të camahindu ta cahntsua xahasen rë xuta.

⁴ Cuatjin nújin cojo nuju ta, tséhë xi mangu tacuin cojo Nina ngatsé rë Jesucristu. ⁵ Hacuiin cjuatacun niji suvin, hacuiin ngahñu niji suvin xi ma nihñi mé xi nihñi ta Nina casua niji me cjuatacun, Nina casua niji me ngahñu. ⁶ Me vëhë casahmi me xi machjirëhë rë me ngayin xi tihín cumachaya rë xuta compromisu xatsë xi sehe tivetsihin tisahmi Nina cojo xuta, hane compromisu xatsë vëhë ne, hacuiin ngu ley xi cuinuhan tséhë ta ngu ndiya ndajyihi xi tsingacun naja Hasen rë Nina xi cuanguencjon. Cuatjin casahmi Nina ta tséhë xi xuta xi cumaji sahmichihin me yéjë ni cjua xi vitexa ley ne, sacú rë me ngu castigu xi cuetsun cjuatacun rë me hacuaha tsajin nu tsajin nixtin xi cuechu me xcun Nina. Peru xuta xi tjengui me Hasen rë Nina ne, sacú rë me ngu cjuahñu ndajyihi, hacuaha cuechu me xcun Nina.

⁷ Ngayujun ni ne, ha hyun ta sacuaha ley rë Nina xi catsihindu Moisés ne, catiya xcun ndyojo të hya xi camahindu, hacuaha xuta xi maji sahmi me yéjë hacutjin vitexa ley jan ne, cumaji cuechu me xcun Nina. Hane sacuaha xa xi casahmi Moisés hya xi casua me camachaya rë xuta cjua rë ley jan ne, hacuaha ha hyun xi jercu vengui chji rë ta, tséhë xi camatsejen ngu hasen ndajyihi xi hisca camaji cavutsejenndaja xuta Israel xcun Moisés ta jercu tu seti camahani jyihi xcun me. Peru hasen ndajyihi vëhë ne, tafi tafi ne, cafëya suvá. ⁸ Hacuaha ha hyun ta ngayin ne, titihín tijimachaya rë xuta cjua tséhë hacutjin sua naja Nina Hasen rë me. Quihndë ne, sa xi cuatjin jemu cavengui chjí rë xa xi casahmi Moisés jan ne, hitsë sa jercu vengui chjí rë xa xi tinihñi ngayin. ⁹ Cuma cuinújan ne, sa xi jemu cavengui chjí rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cjua rë ne, hitsë sa jemu vengui chjí rë xa xi tinihñi ngayin, quihndë xi tinújin cojo xuta xi cuma sacú naja ngu xahasen tyjahi, ngu cjuatacun tyjahi. ¹⁰ Cuma cuinújan ne, sacuaha xa rë Nina xi casahmi Moisés xi jemu ndajyihi titjun ne, quihndë ne, sacuaha xi ha quihndë tsajin mé ndajyihi tséhë ta, xa rë Nina xi tinihñi ne, jercu tu ndajyihi camahani. ¹¹ Sa xi jercu ndajyihi ngu xcusun xi hacuiin cuejña tséë ne, hitsë sa ndajyihi ngu xi cuejña tséë.

¹² Ngatsé rë xi cuatjin vetihin tacuin Nina ne, vëhë xi ngayin ne, rcuiin camahani xi nújin cojo xuta. ¹³ Hacuiin nihñi sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjé rë Israel ne, scuiin me hacutjin tifëya suvá hasen ndajyihi xi jyihi xcun Moisés jan. ¹⁴ Peru xuta jan ne, camajñu tséhë cjuatacun rë me. Hisca quihndë nixtin vihi ne, hya xi visiñuju me cjua rë ley changa vëhë ne, maji vijnercu me cjua rë, sacuaha xi titsa rë cjuatacun rë me cojo tsjian jan. Hisca hya xi cumacjain rë me Jesucristu ne, hya sacuaha xi cuetjuxin tsjian jan, hya cuma cuijnercu me. ¹⁵ Peru hisca quihndë ne, hya xi visiñuju me cjua xi catsihindu Moisés ne, sacuaha xi tsjian jan

vechja rë cjuatacun rë me, hane maji vijnercu me. ¹⁶ Peru hya xi ngu xuta cuisehen me ndiya rë Nai naja ne, sacuaha tsjian jan ne, cjuexin tséhë me, hane cuma cuijnercu me. ¹⁷ Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja. ¹⁸ Véhë xi ngayejen ngarcan ni ne, tsajin titsa rë cjuatacun naja cojo tsjian vöhë, hacuaha xi vutsejen xuta ngayaan ne, ma vutsejen me cjuandaja rë Nai naja sacuaha tsejen mé xi tsejen xcun ngu speju. Hane ngayaan ne, jima tiña jima tiña sa cjuatacun naja cojo cjuatacun rë Nai naja ta, tséhë xi jima ngu ndiya ne, tisacu sa naja cjuandaja rë me. Nai naja ne, suvá hasen me, hane hacui me xi cuatjin tisahmi.

4

¹ Nina casahmi me cjuandaja cojo niji, hane casua me xa vöhë xi nihñi. Véhë xi hatuxa hacuiin machuva tacuin. ² Ngayin ne, cavejñi tacuin xi nihñii yéjë ni xi ticojo rë cjuasava xi tahahma má; hacuiin vindachin, hacuiin nindeyin cjua rë Nina ta, suvá cju aquixi yéjë ni xi nújin cojo xuta. Cuatjin nihñi cojo sa xi scuëë yéjë ni xuta ta cuatjin Jain xi nújin. Hacuaha vëë Nina xi cuatjin nújin. ³ Hane sa xi vijniiircu xuta cjuandajiyihi xi chja tséhë Jesucristu xi titihín cumachaya rë me ne, peru suvá xuta xi tivetjintjiin me ne, me vöhë xi cuatjin vijniircu me. ⁴ Xitsejen xi matitjun xi tacun nixtin vihi ne, cavetsa cjuatacun rë xuta xi cuacun macjaain rë Nina xi cju aquixi, cojo sa xi cui siin rë me cjuahsen rë cjuandajiyihi xi chja hacutjin xi jyé hnga Jesucristu cojo cjuatacun rë me. Hya xi machaya naja tséhë Jesucristu ne, hacuaha hyan hacutjin jemu ndaja camahani Nina. ⁵ Ngayin ne, hacuiin nújin cojo xuta xi nai nuju ngayin ta xi nújin ne, Jesucristu xi Nai naja me; hane ngayin ne, tivisecuin nuju sacuaha ngu mosu hndixahan nuju ta, tséhë xi cuatjin cavitexa niji Jesucristu. ⁶ Hane ntsacu cavetsihin ne, cachja Nina ta ngajñi rë jñu ne, cuma hasen. Hane hacui ni me xi caveya me cjuahsen ngajñi rë cjuatacun niji, cojo sa xi ngayin ne, tihín cumachaya rë xuta, cuijnercu me hacutjin jemu ndaja camahani Nina. Hane hya xi machaya naja tséhë Jesucristu ne, hacuaha hyan hacutjin jemu ndaja camahani Nina.

Cjuahñu xatsë xi sua Nina

⁷ Cjuahsen xi casua niji Nina jan ne, quichihin ngajñi rë cjuatacun niji, sacuatjin xi jiya cjuanchina cahntsua ngu tiji xi nihndë ni camá. Cuatjin casahmi Nina cojo sa xi matsejen xi jemu hñu camahani ngahñu xi sua niji Nina. Hacuiin cojo ngahñu niji suvin xi caa niji nihñi yéjë ni xi tinihñi ta Nina ne, me vöhë xi casua niji me ngahñu; hacuaha jemu ndaja camahani ngahñu xi sua niji me. ⁸ Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rë hacutjin xi naxintjin yojo niji; hisca hyiin mé xi ndatjin nihñi. Peru nihñichuviiin cjuatacun niji; ⁹ jemu suaxti niji xuta hacuaha chocho sahmi me cojo niji, peru Nina ne, tsismicacuaain niji me; vaja niji xuta, hisca viticjin, peru hacuiin tsiquehen niji me. ¹⁰ Xi nuyyihinyin cojo cjua rë Nina ne, hatuxa meje tsiquehen niji xuta, sacuatjin catsiquehen me Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rë me ta quixi Jain xi tisacu niji cjuahñu sacuaha cjuahñu rë Jesucristu. ¹¹ Ngayin xi quicun ngayin ne, tjin xuta xi jemu meje tsiquehen niji me ngatsë rë xi quichihin cjuandajiyihi xi chja tséhë Jesús. Cuatjin tijima ne, cojo sa xi cuma tsejen xi yojo jyé niji vi xi hatuxa cueya ne, hacuaha tisacu rë cjuahñu sacuaha cjuahñu rë Jesús. ¹² Ngajan xi ngayin ne, tisacu niji cjuaveya; peru ngayun ne, tisacu nuju cjuahñu xatsë.

¹³ Tjin hiscan xi chja xcun xujun rë Nina cuitjin: “Camac Jain ná, vöhë xi cachjá”; hane ngayin ne, tangun mac Jain niji cojo me xi cuatjin catsihindu cjua jan. Véhë xi hacuanitjin ni nújin ngayin: “Mac Jain niji, vöhë xi nújin.” ¹⁴ Hacuaha hyin ta Nina, me xi catsicuya cjuahñu rë Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahñu niji, hane sahmi tangun me ngayin ngajan hiscan tacun Jesús. Hacuaha cuatjin sahmi me cojo nuju. ¹⁵ Yéjë ni xcusun xi tivatjin tijima ne, ngayun ndaja tsujun ta, xi cuma cjín sa ngayun xi sacu nuju cjuandaja rë Nina ne, ha cuatjin cjín sa cuma ngayun

xi tuhun nacuechji rë me. Hane cuatjin cuma tsejen xi Nina ne, jemu ndaja camahani me.

¹⁶ Véhë xi hatuxa nihñichuviin cjuatacun niji. Handasa tivetsun hitsë tivetsun hitsë yojo niji xi jima changa ngayin ne, peru cjuatacun niji ne, jima xatsë ngu nixtin ngu nixtin. ¹⁷ Hane cjuacjintacun xi tivatjin tijima nguehe ngasunhndë ne, sacuaha xi hacuiin yehe camahani ta, tsëhë xi hya xi ha cacaña niji ne, hya sacú niji cjuandaja, sacú rë xahasen niji ngu cjuasua xi jemu ndajyihu camahani, hacuaha tsajin nixtin xi cjuë. ¹⁸ Ngayin ne, hacuiin tivetihin rciuin yëjë ni xi tsejen ta xi vetihin rciuin ne, xi cjëë cuma tsejen. Cuatjin nihñi ta, tsëhë xi yëjë ni xi tsejen ne, cuechu nixtin xi cjuë, peru xi cjëë cuma tsejen ne, tsajin nu tsajin nixtin cjuë.

5

¹ Hacuaha nihñichuviin cjuatacun niji ta, tsëhë xi ha hyin ta sa xi cueya yojo niji sacuatin vetsun ngu ndihya yuma ne, sacú niji ngu xcusun yojo xatsë ngajan ngahnga xi tsajin nu tsajin nixtin cueya, sacuaha ngu ndihya ndajyihu xi suvá Nina casahmi me xi cuma niji. ² Véhë xi ngayin ne, hisca fë tacuin ta, tsëhë xi jercu meje chjhinnntsacuaha yojo xatsë niji xi sua Nina jan, ³ cojo sa xi chijin yojo xatsë véhë sacuatin chajá rë ngu tsjian. Xi cuatjin ne, cuechiin ngu nixtin xi siu suvá hasen niji xi tsajin yojo niji. ⁴ Ngayin xi nechin cojo yojo jyé niji vi ne, hisca fë tacuin ngatsë rë xi jercu meje niji yojo xatsë xi sehe sacú niji. Hacuaha meje niji xi cueyin ta xi meje niji ne, yojo xatsë niji. Cuatjin meje niji cojo sa xi yojo jyé xi hatuxa cueya ne, cjuëya; hane suvá cjuahñu xatsë véhë cuejña. ⁵ Quihndë ne, me xi cuatjin cavejña cjuatacun rë xi cuitjin cun cuma ngayin ne, hacui Nina. Hacuaha me véhë xi caveya me Hasen rë me cahntsua xahasen niji, cojo sa xi ngutjen tsejen ta quixi Jain xi, hya xi cuma ngascan ne, sua Jain niji me yojo xatsë véhë.

⁶ Véhë xi hatuxa tihín ngahñu xahasen niji. Hyin ta jinguyéjë rë xi nechincahndin cojo yojo jyé niji vi ne, sacuaha xi nechintihin ngu nangui ta, tsëhë xi cjëë cuechin hiscan xi cuinechincahndin cojo Nai naja. ⁷ Ngayin ne, mangu tacuin cojo Nai naja xi tivanguin cojo ngasunhndë niji, handasa matsijin me. ⁸ Cuyin cuinújin cojo nuju ta ngayin ne, titihín ngahñu xahasen niji. Hacuaha xi má niji ne, hitsë sa ndatjin xi cuetjinxin tsëhë yojo jyé niji, hane cjuanguin cuinechincahndin cojo Nai naja. ⁹ Véhë xi sa xi cuinechintihin sa nguehe ngasunhndë, o sa xi cuinechincahndin cojo Nai naja ne, jemu meje nihñi yëjë ni hacutjin chuya rë me ta, ¹⁰ tsëhë xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satë naja ha tucutjin xcusun xi canihña xi cavinechan ngasunhndë, há ndaja ne, há ndajin.

Cjuandajyihu xi sahmi tangun cjuatacun naja cojo Nina

¹¹ Ngayin ne, ha hyin mé vijne xi rciuin Nina. Véhë xi meje nihñi xi cuijne cacun xuta. Nina ne, ha vëë me xi cun xi má ngayin. Hacuaha cojo ngayun ne, vetihin tacuin xi cumachaya nuju xi cun xi má ngayin. ¹² Hacuaha tivétsihin tinihñi yehe suvin nga yojo niji ta tu titihín cumachaya nuju hacutjin cuma naxunndujun niji, cojo sa xi cuma nicuyun cjuatacun rë cha. ¹³ Chja yahnga xuta ta sca niji, hane yahnga me ne, jemu xta ngayin; Peru há sca niji o há xta ngayin ne, Peru nihñi yëjë ni ngatsë rë xi tsëhë Nina ngayin, hacuaha ngatsë rë xi meje cuiseuin nuju. ¹⁴ Cuatjin nihñi ta tsëhë xi cjuahmutacun xi tjin rë Jesucristu cojo niji ne, véhë xi vitexi niji. Cuitjin ningathin tacuin: ngu ni Jesucristu xi cahme me ngatsë rë jyé naja ngayejen ni, véhë xi ngayejen ni ne, sacuaha xi ha caveyan xi cuma rë jyé xi cuacun vë. ¹⁵ Jesucristu ne, cahme me ngatsë naja ngayejen ni ne, cojo sa xi ngayaan xi casacu naja cjuahñu xatsë ne, hacuaha nihñacuenda suvá ni yojo naja ta hacuaha nihñacuenda tsëhë me véhë, me xi cahme hacuaha cavuya me cjuahñu ngatsë naja.

¹⁶ Véhë xi ha quihndë hacuiin nutsijin xuta sacuatjin vutsejen ngu xuta xicjin me cojo cjuatacun rë ngasunhndë. Hatsëe ne, cuatjin canutsijin Jesucristu, peru quihndë ne, hacuiin cuatjin nutsijin me. ¹⁷ Yéjë xuta xi tjin tangun cjuatacun rë me cojo cjuatacun rë Jesucristu ne, ngu xuta xatsë camá me. Xcusun changá xi tjin rë me ne, café, ha cama xatsë. ¹⁸ Nina ne, me vëhë xi tisahmi me yéjë cjuatacun xatsë vëhë. Ngayin xi condra rë Nina camá ngayin hatsëe ne, casahmi me xi camatangun cjuatacun niji cojo cjuatacun rë me ngatsë rë cjuacjintacun xi cavatju Jesucristu. Hacuaha casua niji me xa xi tihín cumachaya rë xuta hacutjin tisahmi tangun me cjuatacun rë xuta cojo cjuatacun rë me. ¹⁹ Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rë xuta cojo rë me, cavetsihin cafahacuendaain me tséhë cjuatsehen xi casahmi xuta, hacuaha cavetsihin casua niji me cjuandajyihi xi tinújin cojo xuta xi Nina ne, meje rë me xi cuma tangun cjuatacun naja cojo rë me. ²⁰ Véhë xi ngayin ne, cuatjin nújin cojo xuta cjua rë Jesucristu ta, Jesucristu casua niji me xa xi cuatjin nújin, sacuaha xi tichja suvá Nina cojo xuta ngajní rë cjua xi nújin. Véhë xi sacuatjin xi vitexa niji Jesucristu ne, chjahyin rë xuta xi catisahmi tangun me cjuatacun rë me cojo Nina. ²¹ Jesucristu ne, tsajin mé jyé rë me xi tjin, peru ngatsë naja ngayaan ne, Nina casahmi me xi Jesucristu ne, sacuaha xi jercu tjin camahani jyé rë me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaha jemu tyjahi camahani cuma cjuatacun naja sacuatjin tyjahi cjuatacun rë Nina.

6

¹ Hane xi tinhñi tangun xa cojo Nina ne, hacuaha nújin cojo nuju ta, mijí rë xi tu mahya xi casacu nuju cjuandaja rë Nina. ² Cachja Nina cuitjin xcun xujun rë me: Ngu hora ndajyihi ne, cahndë cjua xi canoje cojo ná; ngu nixtin xi vetjutje xuta ne, cavisécoo ri.

Quihndë ne, ha cavechu ngu hora ndajyihi vëhë, sacuatjin cachja Nina; ha cavechu ngu nixtin xi tivetjutje xuta.

³ Ngayin ne, nihñii camahani xcusun xi sahmi xi secjan cjuatacun rë xuta, sá tu choho cuichja xuta tséhë xa xi tinhñi. ⁴ Yéjë xcusun xi tivatjin tijima xcun xa xi tinhñi ne, tsingacun rë xuta ta ngayin ne, tivisecuiin Jain rë Nina cojo xa xi meje rë me xi nihñi. Jemu cjín cjuacjintacun xi caca niji: tjin hora ne, jemu cavatjin cjuañihi, tjin hora ne, cavatjin ngu cjuandya jyé, tjin hora ne, casacuinyiin niji hacutjin naxintjin yojo niji. ⁵ Tjin hora ne, cavaja niji xuta, tjin hora ne, cavincha niji me ndavaya, tjin hora ne, choho casahmi xutacjín cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi xiní. ⁶ Hacuaha tsejen xi tivisecuiin Jain rë Nina ngatsë rë xi tyjahi xahasen niji, vechu cjuatacun niji, jemu jyé tacuin, jemu nihñi cjuandaja, jiya Hasen rë Nina cahntsua xahasen niji, nguñaja tacuin xi hmu tacuin xinguin, ⁷ hacuaha suvá cjuaquixi tjin rë cjuatacun niji, Nina ne, sua niji me ngahñu. Hatuxa cjuaquixi cjua xi nújin, há xi titihín jimachaya rë xuta cjua rë Nina, o há xi tinaxintjin yojo niji tséhë xuta xi choho chja tsijin. ⁸ Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rë ngujo xuta ne, jemu ndacha ngayin, handasa quixi ngayin cojo ngasunhndë niji xi tivanguin cijin. ⁹ Yahnga xuta ne, hisca hvíin me yo ngayin, peru yahnga me ne, vëé me ngayin. Ngayin ne, sacuaha xi ha tiveyin, Peru cjéé cueyin ta nechincuihin cjuahñu. Sahmi xuta ngayin castigu, Peru hacuiin tsiquehen niji me. ¹⁰ Sacuaha xi jemu choho má rë xahasen niji, Peru xahasen niji ne, hatuxa jemu sua rë. Sacuaha xi jemu yumi ngayin, Peru jemu nihñi nchina xuta cojo cjua rë Nina. Sacuaha xi tsajin camahani mé xi tjin niji, Peru ha tsijin yéjë ni xi tjin ngasunhndë.

¹¹ Ngayun xuta Corinto ne, ha canújin cojo nuju yéjë ni hacutjin ningatihin tacuin, hacuaha jemu hmu tacuin nuju. ¹² Ngayin ne, hacuiin camachuva cjuahmutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju.

¹³ Véhë xi chjá cojo nuju sacuaha xi quihndi naha ngayun, catamajyë sa cjuahmutacun xi tjin nuju sacuaha cjuahmutacun xi tjin niji cojo nuju.

Yungun rë Nina xi quicun me ngayaan

¹⁴ Peru mijí rë xi nihñu tangun cojo xuta xi macjaain rë me cjua rë Jesucristu sacuatjin ma hñu jo chu ndyaja xi tangun cjue chu. Sacuaha cjuandaja ne, matanguaain camahani cojo cjuatseen. Hacuaha cumaji cuma jñu hiscan xi jemu hasen. ¹⁵ Cumaji camahani cumatangun cjuatacun rë Jesucristu cojo cjuatacun rë Satanás. Hacuaha cumaji camahani cumatangun cjuatacun rë ngu xuta xi macjain rë me cjua rë Jesucristu cojo cjuatacun rë ngu xuta xi macjaain rë me cjua rë Jesucristu. ¹⁶ Sacuaha yungun rë Nina xi cjuaquixi ne, cumaji cuiyuju nina xi tsindaja xuta. Hane ngayaan ne, sacuaha yungun rë Nina xi quicun me ngayaan ta, tséhë xi suvá Nina cachja me cuitjin: Ngahan ne, cuitejñacahndë cahntsua xahesen rë me; hacuaha tsuwyéhëya ngajñi rë me; hane ngahan cuma nina rë me ngahan, hacuaha me xi cuacun véhë ne, cuma me xuta naha.

¹⁷ Hacuaha cachja sa Nina cuitjin:

Véhë xi tetjunxun tséhë xuta xi cuacun faharcun me nina xi mandaja, hacuaha nechunxun tséhë me; mijí rë xi nicujun sa xcusun xi chjá cojo nuju xi tsavi.

Xi cuatjin nihñu ne, cuitejña ngatsë nuju

¹⁸ hacuaha ngahan ne, cuma ngahan nahmi nuju, hane ngayujun ni ne, hacuaha cuma ngayun quihndi naha, chja Nai naja, me xi ma sahmi yéjë ni xcusun.

7

¹ Quihndë ngayujun ni tsan ne, tséhë xi cuatjin cachja Nina xi sahmi me cojo naja ne, meje rë xi cuiyujunxen yéjë ni cjuatseen xi meje rë yojo naja o sa xi ningatahan tacun. Hane xi rcun ngayaan Nina ne, meje rë xi nihña ngahñu xi cuma tyjahi xahesen naja, cuma tyjahi cjuatacun naja.

Cavindeya cjuatacun rë xuta Corinto

² Nuxuhun xahesen nuju xi cuma niji. Hisca ngu ngayun ne, hacuiin choho canihñi cojo nuju; hisca ngu ngayun ne, hacuiin caninguetsin cjuatacun nuju; hisca ngu ngayun ne, hacuiin cavindachin nuju. ³ Hacuiin titsicaneje jyé nuju xi cuatjin chjá cojo nuju. Ha cachjá cojo nuju ta hatuxa jemu vinga niji ngayun, hisca tihín yojo niji ngatsë nuju sa xi cuatjin meje rë. ⁴ Jemu camangu cárunc cojo nuju, hacuaha hya xi visiajme cojo xuta ne, jemu vaxéndaja nuju.

Jemu casacu ná cjuetacun. Jemu sua ma rë xahesen naha ngajñi rë yéjë cjuañihi xi cavatjin camá.

⁵ Hisca nixtin xi cafihin nguehe estadu Macedonia hisca quihndë ne, cjéë cjuahajenda xahesen niji, ta yéjë ni nixtin vihi ne, jercu cjín cjuañihi tivatjin tijima. Ticjan xuta cojo niji, hacuaha jemu macjín tacuin. ⁶ Peru Nina xi sua cjuetacun xuta yuma ne, hacuaha cuatjin casua niji me cjuetacun hya xi cafehe cha Tito. ⁷ Hacuiin tséhë xi cafehe ni cha xi casacu niji cjuetacun ta, hacuaha ngatsë rë cjua xi cachja cha hacutjin xi casacu rë cha cjuetacun ngajñi nuju. Cachja cha cojo niji ta jemu meje nuju xi sacú xingueen. Hacuaha casuacuenda niji cha tséhë cjuachoho xi tjin nuju. Hacuaha cachja cha ta jemu meje nihñu xcusun xi chuya ná. Véhë xi hitsë sa camasua rë xahesen naha quihndë.

⁸ Hacuiin choho ma ná xi cuatjin catsihindu nuju xujun véhë, handasa choho camá nuju ngatsë rë cjua xi cachjá cojo nuju. Chocho camá ná hitsë ta, tséhë xi cahvë ta cjua naha jan ne, casua nuju cjuachoho ndastu ngu hora. ⁹ Peru quihndë ne, jemu ndama ná, hacuiin ngatsë rë xi choho camá nuju ta ngatsë rë xi sacuaha cjuachoho xi camá nuju ne, véhë casahmi xi canindeyun cjuatacun nuju. Hacuaha hya xi choho camá nuju ne, canihñu hacutjin chuya rë Nina, véhë xi tsajin mé xi choho cavatjun camá

ngatsë rë cjuatjin nuju. ¹⁰ Hya xi nihñachehen hacutjin chuya rë Nina hora xi choho ma naja ne, vëhë sahmi xi nindeyan cjuatacun naja cojo sa xi cuetjuntjen tséhë jyé naja. Hane xi cuatjin sahmi ngu xuta ne, tsajin yo xi chuiyin rë. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhndë ne, vëhë sahmi xi cueyan. ¹¹ Chutsujun hacutjin canihñu hya xi canihñu hacutjin chuya rë Nina ngajñii rë cjuachoho xi cavatjun camá: jemu nguñaja tacún; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyjahi Jain cjuatacun nuju hacuaha tyjahi Jain xahasen nuju. ¹² Vëhë xi hya xi cuatjin catsihindu nuju xujun vëhë ne, hacuiin ngatsë rë xuta xi cavangui jyé, hacuiin ngatsë rë xuta xi choho cavatju me camá ta xi cuatjin catsihindu nuju ne, ngatsë rë xi meje ná xi cuma tsejen hacutjin xi meje nihñu xcusun xi chuya niji ta, tséhë xi hyun ta cuatjin xi meje rë Nina. ¹³ Hane hacuaha ngatsë rë vëhë xi ngayin ne, casacu niji cjuetacun.

Peru hacuiin suvá cjuetacun vëhë ni xi casacu niji ta hacuaha jemu ndaja camá rë xahasen niji ngatsë rë cjuasua xi tjin rë cha Tito. Cuatjin tjin rë cha cjuasua ta, tséhë xi ngayujun ni ne, catuhun rë cha cjuandaja cjuajeya. ¹⁴ Jemu cavaxéndaja nuju hya xi cachjá cojo cha Tito, hane hacuiin cavétju sava ngahan xi camá ngascan. Hatuxa cjuaquixi yéjë ni cjuatjo xi canújin cojo nuju. Hacuanitjin ni cjuatjo xi canújin tsujun cojo cha Tito ta hacuaha cavetjucaa cjuaquixi. ¹⁵ Hacuaha jemu hmu cacun nuju cha, xi tsinguitsjen cha hacutjin canihñu yéjë hacutjin xi cachja cha cojo nuju, cojo hacutjin jemu ndaja cachjuhunrcun cha hya xi cachjuhunntsun cha. ¹⁶ Jemu ndama ná ta tséhë xi hvë ta ngayun ne, mangu tacún cojo ná.

8

Cjuatjo xi cjuatjo Jerusalén

¹ Ngayujun ni ne, nguehe tihín cumachaya nuju hacutjin casua Nina cjuandaja rë me cojo xuta xi matangun me yéjë ni yungun xi siu taha ladu tséhë estadu Macedonia vi. ² Xuta xi cuicun vi ne, handasa jercu cavatju me cjuañihi, peru jemu sua ma rë xahasen rë me. Handasa jemu yuma camahani me ne, peru jemu jyé cjuatjo xi cavisecoo me. ³ Cahvë xi casua me tucutjin xi camá casua me, hisca quisun sa casua me. Hacuaha cjuatacun rë suvá me ⁴ xi cafehya me xi tihín cahndé xi cojo me sahmi me cjuandaja xi cuisecoo me xuta ladu rë Jesucristu ngajan Jerusalén. ⁵ Hitsë sa ndaja casahmi me xi cuma rë sacuatjin caningatihin tacuin ngayin. Titjun ne, casua me yojo rë me cojo Nai naja ne, sehe casua me yojo rë me cojo niji ngayin, sacuatjin meje rë Nina. ⁶ Vëhë xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo vëhë ngajñi nuju hatsëe ne, quihndë ne, hacuanitjin ni catitsinguijnetaha cha hiscan xi cavejñavasen. ⁷ Ngayujun ni ne, jemu tjin ngu tacún cojo Jesucristu; jemu ndaja nújun cjuatjo xi niji ngayin, sacuatjin meje rë Nina; jemu vechu cjuatacun nuju; jemu nguñaja tacún xi meje cuisecun; jemu tjin nuju cjuahmutacun cojo niji. Sacuatjin tivangun xcun cojo yéjë ni cjuatacun vëhë ne, hacuaha meje niji xi cuanitjin ni cuangun xcun cojo ngu cjuandaja vi xi cuisecun rë xuta yuma.

⁸ Hacuiin tivitéxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju. ⁹ Ha ndaja hyun hacutjin casahmi Nai naja Jesucristu cjuandaja. Handasa jemu tjin rë me cjuanchina Peru catsiyuma me yojo rë me ngatsë rë xi hmu cacun nuju me, cojo sa xi ngatsë rë xi camayuma me ne, ngayun xi cuisuhun ladu rë me ne, sacú nuju cjuanchina xi sua Nina.

¹⁰ Nguehe cuichjá cojo nuju hacutjin xi tsingátaha cácul. Ngayun xi hatuxa meje cuisecun hacuaha hisca cuyanu cavetsuhun cavisecun ne, ¹¹ quihndë ne, meje rë xi ninguijnutuhun cjuandaja vëhë. Tuhun hitsë xi tjin nuju sacuatjin canihñu titjún xi cojo cjuasua catuhun. ¹² Sa xi ngu ngayaan meje Jain tahan ngu cjuatjo ngu cjuandaja ne,

cuma tahan tucutjin xi tjin naja xi tahan ta, vëhë xi chuya rë Nina. Nina ne, fehyaaín me hisca cojo xi tsajin naja.

¹³ Hacuiin meje rë xi ngayun ne, hisca cuma chaja nuju ngatsë rë xi cuisecun rë jingu sa xuta. Xi meje rë ne, tangun ni cuatjun ngayejen ni. ¹⁴ Ngayun xi cjín tjin nuju quihndë ne, cuma cuisecun rë me xi tsajin rë, cojo sa xi hya xi ngayun tsajin nuju ne, me xi cuacun vë ne, cuma cuisecoo nuju me. Cuatjin xi tangun cuatjun ngayun cuma cojo rë me. ¹⁵ Cuitjin chja ngu cjua xcun xujun rë Nina: "Xuta xi cjín cafaya me ne, cavanguin rë me; hane xuta xi chuva cafaya me ne, camachajin rë me."

Cha Tito cojo xicjin cha

¹⁶ Suá nacuechji rë Nina xi cavuxaha me cjuatacun rë cha Tito cojo sa xi cuma meje cuisecoo nuju cha sacuatjin xi meje ná ngahan. ¹⁷ Hya xi cachjá cojo rë cha xi cjuetjengui nuju cha ne, jemu cachuya rë cha cjua jan. Hane tséhë xi jemu tjin rë cha cjuasua xi sahmi cha tu mé ni xi satëxa rë cha ne, vëhë xi cojo cjuatacun rë suvá ni cha ne, cjuetjengui nuju cha. ¹⁸ Hacuaha ningatjin sa ngu cha ladu naja cojo cha Tito. Xuta xi matangun me yëjë ni yungun ne, jemu vaxëndaja me cha xi cuajyihí vë, xi jemu ndaja xa sahmi cha xi tsinguitsojo cha cjuandajyihí xi chja tséhë Jesucristu. ¹⁹ Hacuaha xuta xi cuacun jan ne, casua me cha xa xi cuisecoo niji cha xi cuanguin chani ngu cjuandaja vihi ngajan Jerusalén. Cuitjin tinihñi cjuandaja vihi cojo sa xi cuma tsejen ta Nai naja ne, jemu jyë hnga me cojo cjuatacun rë me hacuaha cojo sa xi cuma tsejen ta nguñaja tacuin xi visecuin xinguin. ²⁰ Jemu nechin cuidadu, sá tu yo choho cuichja tsijin tséhë cjuatjo rë xuta vi xi tacun ntsin. ²¹ Meje nihñi cjuandaja, hacuiin suvá xcun Nina ni ta hacuaha cojo xcun xuta.

²² Hacuaha cojo cha xi cuacun jan ne, ningatjin sa ngu cha ladu naja. Jemu cjín xcusun casahmi cha xi camatsejen xi jemu nguñaja cacun cha. Quihndë ne, hitsë sa nguñaja cacun cha xi meje cjue cha ta, tséhë xi jemu camangu cacun cha cojo nuju. ²³ Sacuaha cha Tito ne, jemu visecoo ná cha xi cuatjin visecuin nuju. Sacuaha cha ladu naja xi cuacun vë ne, xuta rë yungun catsingatju me cha hacuaha sahmi jyë sahmi hnga cha Jesucristu. ²⁴ Vëhë xi meje ná ngahan xi tuhun cumachaya rë cha xi cuacun vë cjuahmutacun xi tjin nuju, cojo sa xi yëjë ni xuta rë yungun cumachaya rë me ta quixi Jain cjua xi nújin xi cuatjin naxinndijin nuju.

9

Cjuatjo xi cjue Jerusalén

¹ Quihndë ne, hacuiin hatuxa meje rë xi tsihindu nuju hacutjin tijima tséhë cjuatjo xi cjue cuisecoo rë xuta ladu rë Jesucristu ngajan Jerusalén ta, ² tséhë xi ha hvë ta jemu meje cuisecun rë xuta xi cuacun vë. Vëhë xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tséhë xi jemu nguñaja tacún xi cuatjin canihñu ne, vëhë casahmi xi jemu cjín xuta Macedonia xi hacuaha cavyujungu cacun me xi cuisecoo me. ³ Vëhë xi tsingátju nuju ngujo cha ladu naja xi ha cachjá cojo nuju jan, sá tu cuetjicaain yëjë ni cjua xi cachjá tsujun tséhë cjuacjintacun vëhë. Meje ná xi tjin chjine ngayun sacuatjin xi ha cachjá tsujun, ⁴ tuxa má sa xi cojo ngujo xuta Macedonia cuinduva me cojo ná ndyá, hane tsajin tjin chjine ngayun ne, jemu cuixu sava ngayin, hisca cojo ngayun cuixu sava ngayun ta, tséhë xi cuatjin camangu tacuin cojo nuju. ⁵ Vëhë xi catsingátaha cácul xi casahmi ná nguyjë xi caféhya cha xi cuacun vë xi cjuetjengui cha ngayun cojo chaja sa, cuisecoo nuju cha xi ninguiunñuju tujún xi canújun jan. Xi cuatjin tjin chjine cjuandaja nuju vë ne, ngajan cuma tsejen xi hacuiin nguyjë canihñu nuju ta cojo cjuasua nuju xi canihñu.

⁶ Ha hyun ta yo xi chuva tjë cuincha ne, hacuaha chuva tutjë sacú rë; hane yo xi cjín tjë cuincha ne, hacuaha cjín tutjë sacú rë. Hacuanitjin ni ngayun cojo cjuatjo nuju. ⁷ Jima ngu ngayun ne, meje rë xi tuhun hacutjin xi cavejñu tacún xi tuhun, Peru hacuiin taha chocho ma tacún, hacuiin cojo nguyjë. Cuatjin nihñu ta ngu xuta xi cojo cjuasua sua me ne, xuta vëhë xi jemu chuya rë Nina tséhë me. ⁸ Nina ne, cuma sua nuju me yëjë ni

cjuandaja rë me, cojo sa xi tsajin nixtin xi cuma chaja nuju; hisca cuangui sa nuju, cojo sa xi cjín xcusun cjuandaja cuma nihñu. ⁹ Xcun xujun rë Nina ne, cuitjin chja: Xuta ndaja jan ne, chuva cjín sua me xuta yuma.

Hane cjuandaja xi sahmi me vëhë ne, tsajin nu tsajin nixtin xi chaya rë Nina.

¹⁰ Nina, me xi sua tjë xi nitjen cojo niñu xi chinë ne, hacuaha sua nuju me yëjë ni tjë xi mameje nuju, hacuaha me vëhë sahmi me xi cuma cjín sa tutjë xi sacu nuju. Hacuaha sahmi me xi cuma yehe sa yëjë ni cjuandaja xi nihñu. ¹¹ Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rë Nina. ¹² Xi cuitjin cuanguinchani ngu cjuandaja nuju vë ne, hacuiin suvá xi nicjen cjuachaja xi tjin rë xuta ladu rë Jesucristu ta, hacuaha nihña xi jemu cjín xuta ne, sua me nacuechji rë Nina. ¹³ Xi cuitjin nihñi ngu cjuandaja vë ne, ngajan cuma tsejen xi ngayun ne, tiniñu jain sacuatjin xi nújun xi macjain nuju cjuandajyঃ xi chja tséhë Jesucristu. Hacuaha cuma tsejen ta jemu ndaja tivisecun rë xuta Jerusalén, hacuaha jemu ndaja visecun rë yëjë ni xuta yuma xi ladu rë Jesucristu. Vëhë xi ngahan cojo yëjë ni me xi visecoo ná ne, jemu nihñi jyë Nina. ¹⁴ Hacuaha xuta ladu rë Jesucristu ngajan Jerusalén ne, sahmi me oración rë me cojo Nina ngatsé nuju, hacuaha jemu cuinga rë me ngayun xi cumachaya rë me tséhë cjuandaja xi jemu casua nuju Nina. ¹⁵ Nacuechji rë Nina xi casua naja me ngu cjuandaja ngu cjuatjo xi hisca hyaan hacutjin cuinújan xi venguichji rë.

10

Vaxëtje Pablo xa xi casua Nina me

¹ Ngahan Pablo ne, nguehe cuichjá cojo nuju cojo cjuandaja cjuajeya rë Jesucristu. Chja yahnga xuta ta ngahan ne, hya xi tejñataha tangun cojo nuju ne, jemu jeya ngahan; peru hya xi cjin tejñataha tsujun ne, jemu hñu cjua na ha cojo nuju. ² Ndatjin, peru nguehe cjuéhya nuju ngu cjuandaja: xicanihñuu xcusun xi sahmi xi sahme hñu cjua na ha hya xi cjuétjengë nuju. Ha hvë ta cuma sahme hñu cjua na ha cojo xuta xi chja cojo nuju xi ngayin ne, suvá cjuatcun rë xuta ngasunhndë xi quichihin. ³ Quixi jain xi xuta ngasunhndë ngayin, peru hacuiin sí rcuin sacuatjin sí rcu xuta ngasunhndë. ⁴ Hacuiin chicjin cojo quicha ta Nina ne, sua niji me ngahñu xi caa niji ninguetsinyin cjuatcun rë xuta xi tsitjungui me Nina; xi visiajmí ngayin cojo xuta xi cuacun jan ne, ngutjen tsejen ta machjiriin cjuatcun rë me. ⁵ Ninguetsinyin cjuixin xi sahmi xi maji vijnercu me yo xi Nina, hacuaha ninguixin cjuatcun rë xuta cojo sa xi tsingataha cacun me sacuatjin meje rë Jesucristu. ⁶ Hane hya xi cuechu nixtin xi ngayun ne, jemu ndaja camahani cuinuhyun tséhë Nina ne, ha tjin ngu tacuin xi nihñi castigu yëjë ni me xi vîhndiin tséhë Nina.

⁷ Ngayun ne, tiningatuhun tacún sacuaha tsingataha cacun xuta ngasunhndë. Sa xi tjin yahnga xuta xi tsingataha cacun me xi ladu rë Jesucristu me ne, ndatjin; peru hacuaha catitsingataha cacun me xi, sacuatjin xi ladu rë Jesucristu me ne, ngayin ne, hacuaha cojo ngayin ladu rë Jesucristu ngayin. ⁸ Handasa cuátjutaha hitsë xi cuichjá cojo nuju sacuaha tséhë xa xi casua niji Nai naja ne, peru hacuiin cuma sava ná. Nai naja casua niji me xa vëhë, cojo sa xi cuisecuin nuju xi cuangunndujun xi mangu tacún cojo cjua rë Nina, hacuiin xi ninguetsin cjuatcun nuju. ⁹ Hacuaha mijí ná xi ningatuhun tacún xi meje cuinchárcun nuju cojo yëjë cjua xi tsihindu nuju. ¹⁰ Cuinújun ngu ngayun ta jemu hñu cjua na ha xi tsihindu nuju, peru hya xi tejñataha cojo nuju ne, jemu yuma hasen ngahan, hacuaha hisca chuyiin nuju chuva rë xi visiajme. ¹¹ Peru cuidadu xi cuatjin nújun ta, chuva rë xi nújin cojo nuju xcun xujun xi nihindin nuju quihndë xi xín nechintihin tsujun ne, ha chuva vëhë ni nihñi hya xi cuéchintihin nuju.

¹² Ngayin ne, vetjiin tacuin xi cuinújin xi tangun ngayin cojo ngujo me xi vaxëndaja suvá me yojo rë me. Xi cuatjin tsichuva me cjuatcun rë me ngajñi rë suvá me ne, jemu ngarca me. ¹³ Ngayin ne, cuinújin xi jemu ndaja canihñi ngu xa xi hisca canihñii. Ha tucutjin xa xi canihñi ne, ha vëhë ni xi cuinújin. Nina ne, me vëhë xi vitexa niji me jani hiscan cuechin xi nihñi xa, hacuaha me vëhë cavitexa niji me xi catsanguin hisca ngajan

nangui nuju. ¹⁴ Véhë xi hya xi ndaja nújin tsujun ne, hacuiin sacuaha xi vatjintihin rë xa xi casua niji Nina ta, tjun tjun ngayin cafihin nangui nuju cojo cjuandajyihi xi chja tséhë Jesucristu. ¹⁵ Hacuaha hacuiin naxinndijin yojo niji tséhë ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsë sa ndaja cumacjain nuju Jesucristu ne, hacuaha hitsë sa jyë xa cuma nihñi ngajñi nuju. ¹⁶ Ngajan xi cuma cuanguin tihín cumachaya rë xuta cjuandajyihi tséhë Jesucristu hisca ngajan sa tséhë nangui nuju. Xi cuatjin ne, tsajin yo cuichja xi ngayin ne, naxinndijin yojo niji tséhë ngu xa xi jingu sa xuta casahmi me.

¹⁷ Yo xi meje cuaxëndaja rë tu yo ni ne, cataxëndaja me Nai naja, sacuatjin chja xujun rë Nina. ¹⁸ Cuatjin ta, xi naxenndajan suvaan yojo naja ne, machjiriin camahani. Xi machjirëhë ne, xi Nai naja cuaxëndaja naja me.

11

Chja Pablo tséhë apóstol ndacha

¹ Nijyun tacún. Caticaa nuju ndastu ngujo cjuasca xi cuichjá cojo nuju. Handasa hacuiin sca ná peru cuichjá cjuasca ta, ² tséhë xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tséhë xi ngayujun ni ne, sacuaha ngu quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu. ³ Hatsëe ne, chu yë cavindacha chu na Eva cojo cjuatacun tsehen rë chu. Hane hacuaha jemu macjín cárjun tsujun ta sá tu cuatjin ningatuhun cumandacha ngayun, hane ha quihndë hacuiin nguñaja tacún cuangunndujun cojo ndiya rë Jesucristu xi tivanguncujun. ⁴ Hya xi fehe ngu cha xi sua cumachaya nuju ngu cjua xi chja tséhë Jesús xi hacuiin tangun cojo cjua xi cachjá cojo nuju ntsacu cavetsihin ne, ¿mé má cha véhë xi jemu ndaja caa nuju cojo cjua rë cha? O sa xi chjuhunntsun ngu cjuatacun xi hacjahi, xi hacuiin tangun cojo cjuatacun xi cachjuhunntsun ntsacu cavetsihin ne, ¿má cjuatacun véhë xi jemu ndaja caa nuju cojo? O sa xi fehe ngu cjuandajyihi xi hacjahi, xi hacuiin tangun cojo cjuandajyihi xi cachjuhunntsun ntsacu cavetsihin ne, ¿má cjua véhë xi jemu caa nuju cojo?

⁵ Quihndë ne, nguehe cuetsehen cuichjá cojo nuju cjuasca. Caticaa nuju hitsë ta, tséhë xi xi má ná ngahan ne, hacuiin tjéngë ngahan xi cuma rë cha xi cuacun nújun xi apóstol yehe cha. ⁶ Handasa cjëe scutaya hacutjin xi jemu ndaja cuma cuichjá cojo xuta, peru jemu cavutaya cjuatacun rë Nina. Hane ngajñi rë yéjë ni xcusun xi canihñi, ngajñi rë yéjë ni cjua xi canújin ne, cahyun suvun hacutjin vechu cjuatacun niji.

⁷ Catsinguíne suva yojo naha cojo sa xi ngayun ne, cuma yehe cuma hnga ngayun cojo cjuatacun nuju. Hane xi casuá camachaya nuju cjuandajyihi xi chja tséhë Nina ne, cafaan camahani chjí tsujun. ¿Mé jyé quítjen xi cuatjin casahme? ⁸ Ngahan ne, cafahá tujún tséhë xuta xi matangun yungun xi yahnga. Me véhë cavechji ná me cojo sa xi cuma cuiisécoo nuju ngayun. ⁹ Hora xi camachaja ná hya xi caviteñataha cojo nuju ne, hisca ngu ngayun ne, casuandyaan nuju xi cuisecun ná ta, ngujo cha xingueen xi canduva cha tséhë Macedonia ne, cha véhë casua ná cha mé xi casahmi chaja ná. Hatuxa caviteñá cuidadu xi tsajin camahani mé cjuandya xi suá nuju, hacuaha ha cuanitjin ni sahme nchujunni nguini. ¹⁰ Jiya cjuaquixi rë Jesucristu cahntsua xahsen naha. Hatuxa cuichjá sa cojo xuta ngajan yéjë ladu tséhë estadu Acaya hacutjin casuandyaan camahani nuju. ¹¹ ¿Mé má cuatjin cuichjá sa? ¿Há tséhë xi mijí ná ngayun? Véé Nina ta jercu meje ná ngayun.

¹² Peru sacuatjin xcusun xi ha sahme ne, ha cuatjin cjuénduju sa sahme, cojo sa xi tsinguétsun cjua rë cha xi cuacun vanguise chuva rë xi cuichja cha xi xa xi sahmi cha ne, tangun cojo xa xi nihñi. ¹³ Cha véhë ne, hacuiin apóstol xi cjuaquixi cha. Tu vindacha ni cha xi chja cha xi apóstol tséhë Jesucristu má cha. ¹⁴ Peru hacuiin fircun ná xi cuatjin ma vindacha cha ta, hisca Satanás ne, ma vindacha naja xi sahmi yojo rë sacuaha ngu xi catsingatju Nina. ¹⁵ Véhë xi cojo cha xi cuacun sahmi xa rë xitsehen vë ne, hacuiin chja

ma sahmi cha xi cuma cha sacuaha cha xi sahmi cjuacuixi jain. Peru cha xi cuacun vë ne, ha cuatjin cjuë cha sacuatjin meje rë xcusun xi sahmi cha.

Cjuacuixi vatju apóstol Pablo

¹⁶ Cuichjá nga cojo nuju ngu ndiya ta, xicaningatuun tacún xi sca ná. O sa tsajin ne, handasa sacuaha xi sca ná má nuju ne, peru tuhun cahndé xi hacuaha cojo ngahan ne, cuaxéndaja hitsë yojo naha sacuatjin sahmi cha xi vaxéndaja yojo rë vë. ¹⁷ Xi cuitjin vaxéndaja yojo naha ne, hacuiin tichjá sacuatjin chja Nai naja ta tichjá sacuaha xi sca ná. ¹⁸ Jemu cjín xuta xi vaxéndaja me yojo rë me ngatsë rë xcusun xi cun xi má suvá me hacuaha xi vatju suvá me má, vëhë xi hacuaha cojo ngahan ne, cuatjin cuaxéndaja hitsë yojo naha. ¹⁹ Xi má nuju ngayun ne, jemu quicuntacun. Peru jemu ndaja caa nuju cojo cjua rë xuta sca rë. ²⁰ Jemu caa nuju tu yo ni xi vitexa nuju hacuaha xi mosu rë ngayun, sacuaha xi matitjun me tsujun; tu yo ni xi sahmi jyë sahmi hnga suvá yojo rë, tu yo ni xi sahmi chuva nuju. ²¹ Peru savaain camahani ná xi cuichjá cojo nuju xi ngayin ne, sacuaha xi jemu yuma hasen ngayin xi cuatjin nihñi cojo nuju.

Peru sacuatjin vetju cacun cha xi cuacun jan xi vaxéndaja cha yojo rë cha ne, hacuaha ngahan ne, cuatjin vetju cárden xi cuaxéndaja yojo naha. Peru sacuaha xi sca ná xi cuitjin tichjá cojo nuju. ²² ¿Há ma chja cha hne hebreo? Ngahan ne, hacuaha ma chjá. ¿Há xuta tjé rë Israel cha? Ngahan ne, hacuaha xuta tjé rë Israel ngahan. ¿Há tjé rë Abraham cha? Ngahan ne, hacuaha tjé rë Abraham ngahan. ²³ ¿Há sahmi cha xa rë Jesucristu? Sacuaha xi jercu sca ná xi cuitjin chjá, peru ngahan ne, hitsë sa ndaja sahme xa rë Jesucristu. Hitsë sa jercu casahme xa xi cuma rë cha xi cuacun vë. Hitsë sa cjín ndiya cejé ndavaya. Hitsë sa cjín ndiya casehen ná. Jemu cjín ndiya xi hitsë sa ne, caveya ngahan. ²⁴ Xutaxa rë xuta Judea ne, hñú ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya. ²⁵ Jyan ndiya ne, ya cavaja ná xuta; ngundiya ne, cavetaha ná me ndyojo; jyan ndiya nga ne, quijingahma barcu xi cjuicojo ná; ngundiya tséhë jyan ndiya vëhë ne, cavitejñaya ngu nixtin cojo ngu nixten ngajñi ndachacun. ²⁶ Jercu fé camahani ngu nangui; hane xi cuatjin tsuyjéhëya ne, hacuaha jemu tsavi xi vátju ndajyé, jemu tsavi tséhë cha chéjé, jemu tsavi cojo cjuahngatacun xi sahmi xuta nangui na, hacuaha tsavi cojo cjuahngatacun xi sahmi xutaxín; jemu cojo tsavi xi tejñataha ngu nandya; jemu cojo tsavi xi tejñataha ngu nguijña; jemu tsavi xi vátju ndachacun; jemu tsavi xi tsuyjéhëya cojo cha ndacha xi chja cha xi cha ladu naja cha. ²⁷ Jemu chja camahani xa xi casahme hacuaha jemu chja cavátju camá; jemu cjín ndiya xi hisca camaji cafáñafé; tjin hora ne, jemu vojo ná, jemu xinda ná; jemu cjín ndiya xi cajinéé niñu; tjin hora xi jemu hnchan ná, hacuaha camachaja tsjian naha.

²⁸ Hane tséhë yéjé ni cjuacjintacun xi cuacun vëhë ne, nchu nchujunni ne, sesuntaha sa ngu: jemu vityanguë cárden tséhë xuta xi ma tangun me yéjé ni yungun, hacutjin tivatju me tijima. ²⁹ Sa xi choho vatju ngu xingueen má ne, ngahan ne, hacuaha choho ma ná. Sa xi yo sahmi xi cjuinenguiya ngu xingueen ngajñi rë cjuatsehen ne, hacuaha ngahan ne, jemu cuma cjan camahani ná. ³⁰ Sa xi meje rë xi cuaxéndaja yojo naha ne, cuichjá cojo nuju hacutjin yuma hasen ngahan. ³¹ Nina Nahmi rë Nai naja Jesús ne, me vëhë xi hatuxa jyë hnga me yéjé nu yéjé nixtin ne, me vëhë xi vëë jain me ta hacuiin tivindácha xi cuitjin tichjá cojo nuju. ³² Ngundiya hya xi cavitejñataha ngajan nandya Damasco hiscan vitexa Aretas ne, ngu xutaxa rë xi catsingatju Aretas ne, cavyiujutaha me sindadu tingotjo rë nandya jan xi cjuaha cha ngahan cjuecojo ná cha. ³³ Peru ngujo xingueen ne, quijicojo ná me xcun ngu ventana tséhë taha xihndé tséhë hnchua rë nandya jan, caveya ná me cahntsua ngu changa jyë, sehe catsitujne ná me taha candatsen. Cuatjin camá xi cavétjutjé tséhë gobernador jan.

¹ Tjin ná xi cuaxéndaja sa yojo naha. Hacuaha handasa tsajin mé machjiréhë xi cuitjin sahme ne, peru nguehe cuichjá cojo nuju hacutjin casahmi Nai naja xi cuichja nijñá cojo ná ngu jo ndiya. ²⁻³ Ngahan ne, hvé ngu xihin xi ma ladu rë Jesucristu, hane camateñuju nu jan ne, quijicojo rë cha hisca hiscan majyan ngahnga hisca hiscan tacun Nina. (Xihin xi quijicojo rë ne, hacui Pablo.) Hveen ne, ¿há xi cojo yojo rë cha quiji cha? ne, o ¿há xi hasen ni rë cha xi quiji? ta, suvá Nina ni vëe me hacutjin camá. Mé ta cha xi cuajyihu vë ne, ⁴ quijicojo rë cha ngajan ngahnga ngu cahndé ndajyihu xi hmí paraíso, hane ngajan cahndé cha cjua xi hisca sacuiin chuva rë hacutjin cuichja nga cha cojo xuta, hacuaha hisca sacuiin cahndé xi cuya cuichja nga cha cjua jan cojo xuta. ⁵ Cuaxéndaja xcusun xi casahmi Nina cojo rë cha vëhë, peru hacuiin cuaxéndaja yojo naha suva; sa xi cuichjá tsahan ne, cuichjá hacutjin xi yuma hasen ngahan. ⁶ Sa xi meje cuaxéndaja sa yojo naha ne, hacuiin sca ná ta, tséhë xi suvá cjuaquixi xi cuichjá. Peru ha quihndé sahmee sa cuatjin ta, tséhë xi mijí ná xi ngatsë rë cjua vëhë ne, tsingataha cacun ngu xuta xi jemu ngu cha machjiréhë ngahan. Xi meje ná ne, xi catutsejen xuta jan xcusun xi sahme hacuaha catisiñuu me cjua xi chjá, sehe tsingataha cacun me ne, há machjiréhë ne, o há machjiriin ngahan.

⁷ Hacuaha cojo sa xi hacuiin cuátjutaha xi ndaja tsingátaha cárden tsahan suva ngatsë rë cjuandaja xi casahmi Nina cojo ná xi cuatjin cachja nijñá cojo ná ne, vëhë xi casua me cahndé xi Satanás ne, suandyá ná sacuatjin suandyá naja ngu nahyá xi maji naxenxen, cojo sa xi hacuiin cuátjutaha xi ndaja tsingátaha cárden tsahan suva. ⁸ Jyan ndiya caféhya rë Nai naja xi cuetjuxin cjuandya jan; ⁹ peru cachja me cojo ná cuitjin: “Cjuandaja xi suá ri ne, vëhë yéjë ni xi mameje ri ta, tséhë xi hisca nguñaja cárden xi vaxéndaja yojo naha ngatsë rë xi yuma hasen ngahan, cojo sa xi ngahñu rë Jesucristu ne, cuma cuisehen ngajni rë cjuatcacun naha. ¹⁰ Vëhë xi hisca ndama ná xi jeya ngahan, ndama ná hya xi choho chja xuta tsahan, ndama ná xi vátju ngu cjuandya jyé, ndama ná hya xi vátju cjuañihi, ndama ná hya xi sacuiyiin ná hacutjin cuaxéjtë yojo naha. Jemu ndama ná xi cuatjin vátju má cjuacjintacun vëhë ngatsë rë Jesucristu ta, tséhë xi hya xi jemu yuma hasen ngahan ne, hya jemu sacu ná ngahñu rë Nina.

Cjín tsingataha cacun Pablo tséhë xuta rë yungun Corinto

¹¹ Ngahan ne, sacuaha xi sca ná, peru ngayun quitjun jyé xi cuitjin tichjá cojo nuju. Xi meje rë ne, ngayun ndaja cuinújun tsahan ta, tséhë xi handasa chja yahnga xuta ta tsajin mé venguichji ná, peru cumaji cuatjutaha ná cha xi nujun xi apóstol yehe vë. ¹² Xcusun xi casahme ngajni nuju ne, casua machaya nuju ta ngu apóstol xi cjuaquixi ngahan. Jemu cacaá ná cojo nuju xi cuatjin cavisécoo nuju hya. Ngayun ne, jemu quijircun nuju hisca carcun xi cahyun cjuarcun xi casahme. ¹³ Tangun casahme ngajni nuju cojo xi casahme ngajni rë yéjë xuta rë yungun xi yahnga, cuenda xi casuandyaan nuju xi cuisecun ná tséhë gastu naha. Sa xi cuaaintjin xi casahme cojo nuju xi má nuju ne, nijyun tacún cojo ná.

Chja Pablo xi cjue me má jyan ndiya nandya Corinto

¹⁴ Quihndé ne, cuma jyan ndiya xi cjuétjéngë nuju ne, hacuaha suandyáan camahani nuju ta, hacuiin xcusun xi tjin nuju xi meje ná ta suvun xi meje ná ngayun. Mijí rë xi nixti cuetjo tujún xi cuisecoo rë xutacha rë ta xutacha rë cuetjo me tujún xi cuisecoo rë nixti rë me. ¹⁵ Ngahan ne, cojo yéjë ni cjuasua tsicójó tujún naha ngatsë nuju, hisca tsicjé ngahñu naha ngatsë nuju. Xi má ná ne, tucutjin xi hitsë sa vinga ná ngayun ne, ngayun ne, hitsë sa chuva vinga nuju ngahan.

¹⁶ Cuichja yahnga xuta tsahan ne: “Jéya. Hacuiin casuandya naja cha tséhë gastu rë cha, peru tséhë xi jemu quicun cacun cha ne, jemu cavindacha naja cha.” Cuatjin cuichja yahnga xuta tsahan. ¹⁷ ¿Há cavindácha nuju xi catsingájtju nuju ngujo cha xi quijitjengui nuju cojo cjua naha? ¹⁸ Cachjá cojo cha Tito xi cjuetjengui nuju cha, hacuaha catsingájtju

sa ngu cha xingueen cojo cha Tito. ¿Há cavindacha nuju cha Tito vë? Jéya. Ha ndaja hyun ta cha vëhë ne, hya xi quitaha cha cojo nuju ne, tangun cjuatacun rë cha cojo cjuatacun na, hacuaha tangun xcusun xi casahmi cha cojo xcusun xi ha casahme ngahan.

¹⁹ Ngu ngu ngayun ne, ningatuhun tacún xi cojo nuju ngayun titihín cjuaquixi niji. Peru hacuiin cuatjin ta, xcun Nina ne, cuitjin tinújin ngatsé rë xi tjin tangun cjuatacun niji cojo Jesucristu. Peru yëjë ni cjua xi tinújin ne, tinújin ngatsé nuju ngayujun ni, tsan, cojo sa xi cuma yehe sa cjuatacun rë Nina xi tjin nuju. ²⁰ Jemu macjín cárdenas, sá nihñuu tutjin xi meje ná, hacuaha sá sahmee tutjin xi meje nuju, hya xi cjuéhë nangui nuju. Jemu macjín cárdenas, sá tacun si ngajní nuju, sá tjin cjuachini ngajní nuju, sá cjan nuju cojo xingun, sá hnga tacún, sá tjin cjuandesu ngajní nuju, sá tjin cjuachjataha ngajní nuju, sá tjin cjuaxta ngajní nuju, sá tuyé tinhñu. ²¹ Jemu macjín cárdenas sá sahmi chuva Nina ngahan ngajní nuju hya xi cjuéhë nga ngundiya nangui nuju; hacuaha jemu macjín cárdenas, sa choho cuma rë xahesen naha ngatsé rë ngu ngu ngayun xi mijí nindeyun cjuatacun nuju hacuaha hacuiin cavyujunxun cjuatsehén xi nihñu, hacuaha cjuatsehén xi sahmi xuta cojo ngu xi hacuiin chjuun rë me, hacuiin xihin rë me.

13

Conseju xi sua Pablo

¹ Quihndë ne, cuma jyan ndiya xi cjuétjengë nuju. Sacuatjin camahindu xcun xujun rë Nina xi jo o sa xi jyan xuta sua me cjuaquixi rë me tséhë ngu cha xi caxincha jyé rë ne, sehe cuma chihin cjua jan, há cuma cha castigu o há xi cumaji cha castigu. ² Hyá xi cavitejñataha cojo nuju xi ma jo ndiya ne, cachjátaha rë xuta xi casahmi cjuatsehén; hane quihndë xi xín tejñataha ne, cuya cuichjá nga cuatjin cojo nuju ngayujun ni xi cjeé cuichjá cojo nuju ta, hya xi cuinduva nga ngundiya ne, ha quihndë tsajin yo cuetjutje tséhë castigu xi fehya jyé rë. ³ Cuatjin sahme ta, tséhë xi ngayun ne, tivinchunsun chuva rë xi meje cumachaya nuju há cjuaquixi xi Jesucristu ne, sua ná me cjua xi chjá cojo nuju. Me vëhë ne, hya xi tsichuva nuju me ne, hacuiin jemu yuma hasen me ta jemu hñu ngahñu rë me, jemu hñu cjuatacun rë me ngajní nuju. ⁴ Cjuaquixi xi jemu yuma hasen me hya xi catsiquehen xuta me xcun cru; peru tjin rë me ngahñu rë Nina quihndë xi tacun nga me cjuahñu. Hacuaha ngayin ne, xi tjin tangun cjuatacun niji cojo rë me ne, jemu yuma hasen ngayin. Peru cuinechin cjuahñu cojo rë me cojo ngahñu rë Nina cojo sa xi cuma cuisecuin nuju.

⁵ Chjuhunchuvun suvun ni yojo nuju, ¿há nechunyun Jain ndiya rë Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahesen nuju, jiya me ngajní rë cjuatacun nuju. Sa xi tsajin ne, cuetjun ndesu ngayun. ⁶ Hacuaha vetahá cárdenas ta ngayun ne, cumachaya nuju ta ngayin ne, hacuiin ndacha ngayin. ⁷ Tichjahyin rë Nina cojo sa xi ngayun ne, hacuiin nihñu cjuatsehén. Cuatjin chjahyin, peru hacuiin ngatsé rë xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaha xuta ndacha ngayin. ⁸ Ngayin ne, tsajin mé venguichji rë xi nihñi xcusun xi hacuiin cjuaquixi ta xi venguichji rë xi nihñi ne, xcusun xi cjuaquixi. ⁹ Jemu ndama niji hya xi jemu yuma hasen ngayin hane ngayun ne, jemu hñu cjuatacun nuju. Hacuaha chjahyin rë Nina xi xcun ngasunhndë nuju ne, cuyujuchihin cjuatacun nuju, cuma tyjahi xahesen nuju. ¹⁰ Vëhë xi cuatjin titsihindu nuju cjua vëhë xcun xujun vihi quihndë xi chaja sa cjuétjengë nuju, cojo sa xi hya xi cjuéhë ngajan ne, hacuiin jemu hñu cjua naha cojo nuju ta Nai naja ne, casua ná me xa xi cuisécoo nuju, hacuiin xi tsinguétsun cjuatacun nuju.

Tsinguijnetaha Pablo cjua

¹¹ Quihndë ne, ngayujun ni ne, catama sua rë xahesen nuju; tiyujunchuhun cjuatacun nuju; tuhun cjuatsehén xahesen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaha xicamacjiin tacún ta Nina xi sua cjuahmutacun

sua cjuajeya ne, cuisecoo nuju me. ¹² Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja. ¹³ Yëjë xuta ladu rë Jesucristu ne, tsingatju me ngu nina tsujun. ¹⁴ Jesucristu, Nai naja ne, catisua nuju me cjuandaja rë me; Nina ne, catisua nuju me cjuahmutacun rë me; hane Hasen rë Nina ne, catisecoo nuju ngayujun ni.

Carta xi catsingatju San Pablo xi cafahatsja xuta ladu rë Jesucristu ngajan distritu Galacia

¹ Ngahan Pablo ne, má ngahan apóstol, hacuiin ngatsé rë xi xuta catsingatju ná me o sa xi cavetahaxa ná me ta ngatsé rë xi cavetahaxa ná Jesucristu cojo Nina Nahmi naja, me xi catsicuya nga rë Jesucristu cjuahñu tséhë ngajñi rë nima. ² Ngahan cojo yéjë sa xuta ladu naja xi siu cojo ná nguehe ne, ningatjin nuju carta vihi, ngayujun ni xuta ladu rë Nina xi tséhë yéjë ni nandya ngajan distritu Galacia. ³ Nina Nahmi naja cojo Nai naja Jesucristu ne, catisua nuju me cjuandaja cjuajeya. ⁴ Jesucristu ne, casua me yojo rë me xi cueya me ngatsé rë yéjë ni jyé naja, cojo sa xi cuéhëndaya naja me tséhë nixtin tsehen vihi, sacuatjin meje rë Nina Nahmi naja. ⁵ Catamajyé catamahnga Nina cojo Hasen rë me yéjë ni nu yéjë ni nixtin. Cuatjin Jain.

Ngu ni má cjuandajyihi xi chja tséhë Jesucristu

⁶ Jercu fircun ná xi ngayujun ni ne, jercu xati tiniñu cjin tséhë Nina, me xi cajindaya nuju cojo cjuandaja rë Cristu, hane tiniñu tiña tséhë ngu nga cjuachacun. ⁷ Xi cjuaquixi ne, tsajin sa ngu cjuachacun ndajyihi xi hacjahi xi cuaxëtje naja. Peru tjin yahnga me xi tisuandya nuju hacuaha meje tsindeya me cjuandajyihi xi chja tséhë Jesucristu. ⁸ Peru sa xi tjin ngu me xi sua cumachaya nuju ngu cjuandajyihi xi tanguaain cojo xi ha catihín camachaya nuju ne, ¡catji me cojo nai rë me! Cuatjin catama, handasa ngahan suva o sa xi ngu ángel tséhë ngahnga cuichja cjua jan. ⁹ Sacuatjin canújin cojo nuju titjun ne, hacuanitjin ni cuya cuichjá cojo nuju quihndë cjua vihi: Sa xi tjin ngu me xi tisua tijimachaya nuju ngu cjuandajyihi xi tanguaain cojo xi ha camacjain nuju ne, ¡catji me cojo nai rë me!

¹⁰ Ngahan ne, tsajin jercu meje ná xi chuya rë xuta tsahan ta xi meje ná ne, xi Nina chuya rë me tsahan. Sa xi meje sa ná xi xuta chuya rë me tsahan sacuatjin camameje ná hatsëe ne, hacuaha hacuiin mosu hndixahan rë Cristu ngahan.

Hacutjin camá xi camá Pablo apóstol

¹¹ Nguehe cuichjá cojo nuju ngayujun ni xi cjuandajyihi xi suá machaya rë xuta ne, hacuiin cjuatacun rë xuta. ¹² Hacuiin xuta casua ná me cjuandajyihi vë, hacuaha hacuiin xuta cavicuya ná me ta Jesucristu ne, me vëhë xi casua me camachaya ná.

¹³ Ngayujun ni ne, ha camachaya nuju hacutjin xi casahme hatsëe, hya xi jemu cavétaha yojo naha cjuachacun rë xuta tjé rë Israel. Camachaya nuju tséhë hacutjin jercu tisuá rë xuta ladu rë Nina cjuañihi nixtin hya hacuaha jercu tisahme ngahñu xi tsicjéya me. ¹⁴ Hane ngahan ne, tséhë yéjë xuta xi hacuaha tjé rë Israel xi tangun nu naha cojo ne, cavátjutaha rë xi casahmechehen yéjë ni xcusun rë xuta naha ta, tséhë xi jercu tu cavétaha camahani yojo naha cojo xcusun rë xutachanga naha. ¹⁵ Peru Nina ne, cavaxijin ná me chaja sa xi tsin ngahan, hane cojo cjuandaja rë me ne, casuaxa ná me. Hya xi Nina cavejña ngu cacun me ¹⁶ xi tsingacun me ngahan Quihndi rë me, cojo sa xi suá cumachaya rë xutaxín tséhë cjuandajyihi tséhë me ne, hya tsajin yo xuta xi cëjë cavinengësë rë, ¹⁷ hacuaha cejen ngajan Jerusalén xi cjuétjëngë me xi ha má apóstol chaja sa xi cuma ngahan apóstol. Cahndé rë vëhë ne, ngutjen cëjéxen ngajan distritu Arabia, sehe cavúya nga nandya Damasco.

¹⁸ Hya xi camá ne, xi cavatju jyan nu ne, cëjë ngajan Jerusalén, cëjëtjëngë Pedru, hane cavitejñataha cojo rë me tyjuhun nixtin. ¹⁹ Peru cahveen apóstol xi yahnga ta ngu ni Jacobo, xicjin Nai naja, xi cahvë. ²⁰ Cjua xi tichjá cojo nuju ne, vëë Nina ta hacuiin vindácha.

²¹ Hya xi camá ne, cëjë distritu Siria cojo distritu Cilicia. ²² Hane xuta ladu rë Cristu ngajan distritu Judea ne, hisca cjeë sa scuëë me ngahan. ²³ Sehe tu vihndë me cjua

vihi: "Cha xi jercu casua naja cjuañihi hatsëë ne, quihndë ne, tisua cha tijimachaya rë xuta tsëhë cjuachacun xi jercu casahmi cha ngahñu xi tsicjëya cha." Cuatjin vihndë me.
²⁴ Hane casahmi jyë casahmi hnga me Nina cojo Hasen rë me ngatsë nah.

2

Quiji tjengui Pablo apóstol xi yahnga

¹ Hyá xi camá ne, xi cavatju teñuju nu ne, cavúya ngahan nga ngu ndiya ngajan Jerusalén. Hacuaha Bernabé ne, quijitangun me cojo ná. Hacuaha cøjécojo cha Tito.
² Cøjé ta cuatjin cachja Nina. Hane xcun ngu junta xi camá cojo suvá xuta matitjun ne, cachjá cojo rë me hacutjin fi cjuandajyihi xi suá machaya rë xutaxín. Cuatjin casahme, tsëhë xi mijí ná xi xa xi tisahme o xi ha casahme ne, tu mahya ni. ³ Peru hisca cha Tito xi quitahátangun cha cojo ná ne, handasa xutaxín má cha ne, camaji cha nguyjë xi xtí chuxin rë cha. ⁴ Ngujo cha ndacha xi chja cha xi ladu rë Jesucristu má cha ne, cavisehen tahahma cha ngajñi niji xi scutsejen cha hacutjin xcusun niji xi tjin ndaya ngayin ngatsë rë xi tjin tangun cjuatacun niji cojo Jesucristu. Meje rë cha xi cuetihin nga yojo niji cojo ley rë Moisés. ⁵ Peru ngayin ne, caningatiin rë cha hisca hitsë, cojo sa xi cjuandajyihi xi hatuxa cjuaquixi ne, chajin xi cuma nuju.

⁶ Peru me xi chjahárcun rë sacuaha xuta xi matitjun jan ne, (cuatjin chjá ta xa xi quitahá me jan ne, hisca cuendaain ná ta, Nina ne, texta ni vutsejen naja me ngayejen ni), me xi cuacun matitjun jan ne, cavesintaain me hisca ngu cjua tsëhë cjuandajyihi xi chjá cojo xuta, tsëhë xi ha tjin chihin. ⁷ Hacuaha cajnercu me xi Nina casua ná me xa xi cuichjá cjuandajyihi cojo xutaxín, sacuahatjin rë Pedru xi casatë rë me xi cuichja me cojo xuta tjë rë Israel. ⁸ Nina ne, me xi catsingatju rë Pedru xi cuma me apóstol ngajñi rë xuta tjë rë Israel ne, hacuaha hacui ni me xi catsingatju ná xi cuma ngahan apóstol ngajñi rë xutaxín.

⁹ Hane Jacobo cojo Pedru cojo Juan, me xi chjahárcun rë sacuaha xuta xi matitjun ne, hyá xi cuatjin cajnercu me xi Nina casua ná me cjuandaja jan ne, cafaha me ntsin, ngahan cojo Bernabé, hane cuatjin catsingacun me xi ngayin ne, tinihñitangun cojo rë me xa rë Nina. Hane camangu tacuín xi ngayin ne, nihñu xa ngajñi rë xutaxín, hane me xi cuacun jan ne, sahmi me xa ngajñi rë xuta tjë rë Israel. ¹⁰ Ngu tu tu ni xi cafehya niji me ne, xi cuisecuin ngajñi rë cjuachaja rë xuta yuma xi hinchajñi ngajñi me. Sacuatjin xcusun vëhë ne, hatuxa jercu vejñá xi sahme.

Cachjataha Pablo Pedru ngajan Antioquía

¹¹ Peru hyá xi quiji Pedru ngajan nandyá Antioquía ne, cachjátáha rë me xcun cojo xcun ta, tsëhë xi suvá tsejen xi cuaain tjin xi tisahmi me. ¹² Chaja sa xi cjuehe ngujo cha xi catsingatju Jacobo ne, tjiné tangun Pedru niñu cojo xutaxín xi ladu naja. Peru tu ngu cafehe cha xi cuacun jan ne, cavetsihin cavejñaxin me xi jiné tangun me cojo xutaxín xi cuacun jan ta, tsëhë xi tsacjun me yahnga xuta tjë rë Israel xi ladu naja xi meje rë xi xtí chuxin rë yëjë ni xuta xi visehen ladu rë Nina. ¹³ Hacuaha yëjë sa xuta tjë rë Israel xi siu ngajan ne, cavetsihin casahmi jo xcun jo hntsua me sacuatjin rë Pedru, hane hisca cojo Bernabé camatangun me cojo me xi cuacun jan cojo xcusun xi casahmi me. ¹⁴ Peru hyá xi cahvë xi xcusun xi tisahmi me ne, matanguaain cojo cjuaquixi xi vicuya naja cjuandajyihi ne, xcun yëjë ni xuta jan ne, cuitjin cachjá cojo rë Pedru: "Ngayun xi ngu xuta tjë rë Israel má ngayun ne, sa xi nihñu sacuaha sahmi xutaxín, hacuiin sacuaha sahmi xuta tjë rë Israel ne, ¿hacutjin meje nihñu nguyjë xi xutaxín jan ne, sahmi me sacuaha nihñu ngayaan xuta tjë rë Israel?"

Xi mangu tacuun cojo Jesucristu ne, vetjuntje xuta, sa xuta tjë rë Israel o sa xutaxín

¹⁵ Ngayaan ne, hatuxa xuta tjë rë Israel má ngayaan, hacuiin xuta tsehen má ngayaan.
¹⁶ Handasa cuatjin ne, ha hyan xi ngu xuta ne, tsicjiin Nina jyé rë me ngatsë rë xi vihndë me tsëhë ley rë Moisés ta suvá ni ngatsë rë xi mangu cacun me cojo Jesucristu. Hane cojo ngayaan ne, hacuaha camangu tacun cojo Jesucristu, cojo sa xi tsicjé Nina jyé naja

ngatsë rë xi mangu tacun cojo rë Cristu, hacuiin ngatsë rë xi canuhyaan tséhë ley jan ta, tséhë xi tsajin camahani yo xi cjuë jyé rë ngatsë rë xi vihndë tséhë ley rë Moisés jan.

¹⁷ Hya xi canihña tangun cjuatacun naja cojo Cristu cojo sa xi cjuë jyé naja ne, sa xi hya camatsejen xi hacuaha ngayaan xuta tsehen yaan ne, ¿há vëhë vijne xi Cristu ne, casahmi me xi caxincha ngayaan ndiya rë cjuatsejen? ¡léya, hacuiin cuatjin vijne! ¹⁸ Sa xi cuya tsindaja nga xcusun xi ha catsinguëtsun ne, ngajan matsejen xi xuta tsehen má ngahan.

¹⁹ Ngahan ne, xi cuma rë ley rë Moisés ne, sacuaha xi cavéya, sacuaha xi suvá ley jan catsiquehen ná. Cuatjin camá cojo sa xi cuma ngahan tséhë Nina. Sacuaha xi casetaha tangun ngahan xcun cru cojo Cristu. ²⁰ Ngajan xi sacuaha xi ha quihndë hacuiin cjuahñu naха xi tjin ná ta sacuaha cjuahñu rë Cristu. Peru quihndë xi tjin ná cjuahñu cojo yojo naха ne, mangu cacún cojo Quihndi rë Nina, me xi catsihmu cacun ná hacuaha casua me yojo rë me xi cueya ngatsë naха. ²¹ Hacuiin tsitjungë cjuandaja rë Nina. Sa xi cuma cjuë jyé rë xuta ngatsë rë xi vihndë me tséhë ley rë Moisés ne, ha tu mahya ni cahme Cristu.

3

¿Há cojo ley o há cojo Jesucristu mangutacuun?

¹ Ngayujun ni xuta Galacia ne, jercu yuma hasen yun! ¿Há tjin yo cafehya cacun tsujun xi cuatjin ningatuhuntacún? Jercu tu ndaja camachaya nuju hacutjin xi cahme Jesucristu xcun cru. ² Ngu tu tu ni cjuá xi meje cuinengësé nuju ne: ¿Há cachjuhunntsun Hasen rë Nina ngatsë rë xi canihñu sacuatjin vitexa ley jan, o sa tsajin ne, há ngatsë rë xi camacjain nuju cjuandajyihu xi cavisiñuju? ³ ¿Há tuxa yuma hasen ngayun? Quihndë xi cavetsuhun cojo Hasen rë Nina ne, ¿há meje nihñuchuhun cojo ngahñu nuju suvun ni? ⁴ ¿Há tu mahya ni xi cuatjin cjín xcusun cavatjun ni? ¡Hatuxa hacuiin tu mahya! ⁵ Hya xi Nina sua nuju me Hasen rë me hacuaha sahmi me cjuarcun ngajñi nuju ne, ¿mé má cuatjin casahmi me? Hacuiin ngatsë rë xi nihñu sacuatjin vitexa ley ta, ngatsë rë xi macjain nuju cjuandajyihu xi visiñuju.

Compromisu rë Nina cojo Abraham

⁶ Xcun xujun rë Nina ne, cuitjin camahindu: “Abraham ne, camangu cacun me cojo cjuá xi cachja Nina cojo rë me, hane ngatsë rë vëhë xi catsicjë Nina jyé rë me.” Cuatjin camahindu. ⁷ Ngajan xi meje rë xi cuijnercun xi xuta xi mangu cacun me cojo Nina ne, me vëhë Jain xi quihndi rë Abraham me. ⁸ Xujun rë Nina jan ne, ha tjun sa vëë xi tsicjë Nina jyé rë xutaxín ngatsë rë xi cumangu cacun xutaxín jan cojo rë me. Vëhë xi xcun xujun rë Nina ne, camahindu cjuá xi cuitjin cachja Nina cojo Abraham: “Ngatsë riji ngaye ne, cumanchacuntihin yéjë ni xuta ngasunhndë.” ⁹ Ngajan xi yéjë ni xuta xi mangu cacun me cojo Nina ne, cumanchacun tangun me cojo Abraham, me xi hacuaha camangu cacun.

¹⁰ Yéjë ni xuta xi mangu cacun me cojo ley rë Moisés ne, hatuxa cuatju me castigu, tséhë xi xcun xujun rë Nina ne, cuitjin camahindu: “Nina ne, sahmi rë me castigu yéjë ni xuta xi vihndiin me tséhë yéjë ni cjuá xi camahindu xcun xujun rë ley rë Moisés.” Cuatjin camahindu. ¹¹ Ngajan xi suvá tsejen xi xcun Nina ne, cjuin jyé rë hisca xi ngu xuta ngatsë rë xi cahndë me tséhë ley jan, tséhë xi xcun xujun rë Nina ne, cuitjin camahindu: “Xuta xi tsajin jyé rë me ngatsë rë xi mangu cacun me cojo Nina ne, sacú rë me cjuahñu xatsë.” Cuatjin camahindu. ¹² Peru ley rë Moisés jan ne, cuendaain camahani rë xi mangu tacuun cojo Nina ta, xcun xujun rë Nina ne, cuitjin camahindu: “Xuta xi sahmi me sacuatjin vitexa ley ne, sacú rë me cjuahñu xatsë sa xi sahmi chihin me ley jan.” Cuatjin camahindu.

¹³ Cristu ne, cavéhëndaya naja me tséhë castigu xi vitexa ley jan, hya xi cavatju me castigu jan ngatsë naja. Camahindu nga cuitjin xcun xujun rë Nina: “Yéjë nima xi xtyangui tséhë ngu ya ne, hatuxa cuatju me castigu rë Nina cuma.” Cuatjin camahindu.

¹⁴ Cristu ne, cuatjin cavéhëndaya naja me, cojo sa xi cjuaninchacuntihin xi cachja Nina xi sua me Abraham ne, hacuaha satë rë xutaxín ngatsë rë Jesucristu, hacuaha cojo sa xi

ngatsë rë xi mangu tacuun cojo Jesucristu ne, sacú naja Hasen rë Nina xi cachja Nina xi sua me.

¿Há ley o cjua xi cachja Nina mangutacun?

¹⁵ Ngayujun ni ne, cuichjá cojo nuju ngu ejemplu xi ha ndaja hyan. Hya xi ha camachihin xujun tséhë ngu compromisu ne, tsajin yo xi tsicjëya rë o sa cuesuntaha sa rë ngu cjua. ¹⁶ Nina ne, cachja me cojo Abraham xi sua me cjuandaja rë me xi cuma rë Abraham cojo tjë rë me. Chjaain xujun rë Nina xi “yëjë tjë rë”, sacuaha xi jercu cjin xuta tichja tséhë ta xi chja ne, “cojo tjë riji”, sacuaha xi ngu ni xuta tichja tséhë. Hane tjë vëhë ne, hacui Cristu. ¹⁷ Xi meje cuichjá ne, Nina ne, casahmi me ngu compromisu cojo Abraham titjun. Vëhë xi ley rë Moisés, xi cavejña Nina xi cavatju ñuju cientu cojo cantë nu ne, maji tsicjëya rë compromisu jan, maji tsinguetsun rë cjua xi cachja Nina jan. ¹⁸ Sa xi sacú naja cjuandaja xi sua Nina ngatsë rë xi vinuhyan tséhë ley rë Moisés ne, ngajan xi hacuiin ngatsë ni rë xi cuatjin cachja Nina xi sacú naja. Peru Nina ne, casua me cjuandaja jan Abraham ngatsë ni rë xi cuatjin cachja me titjun.

Mé ngatsë rë xi tjin ley rë Moisés

¹⁹ Sa xi cuatjin ne, ¿mé machjiréhë ley rë Moisés? Xi camá ngascan ni, Nina casua me ley jan, cojo sa xi cumatsejen xi xuta ne, hatuxa vihndiin me cjua xi vitexa Nina. Ley jan ne, cavitexa hisca xi cafehe tjë rë Abraham jan, me xi cachja Nina xi sacú rë cjuandaja. Hacuaha ley jan ne, casahmi entregadu ángel tsja Moisés, me xi cavéjña vasentjin ngajni rë Nina cojo xuta. ²⁰ Peru hindë ne, tséhë cjua rë Nina ne, mamijí sa ngu me xi vëjña vasentjin, ta ngu tu tu ni me ne, tifahacuenda me.

²¹ ¿Há vëhë vijne xi ley rë Moisés ne, sahmi rë condra cjua xi cachja Nina jan ni? ¡Jéya, hacuiin cuatjin! ta, sa xi ley jan camá casua naja cjuahñu xatsë ne, ha cafë jyé naja ngatsë rë xi canuhyan tséhë ley jan. ²² Peru xujun rë Nina ne, chja xi cjuatsehen vitexa rë yëjë ngarca ni, cojo sa xi xuta xi mangu cacun me cojo Jesucristu ne, cuma cjuahatsja me cjuandaja xi cachja Nina xi sua me.

²³ Peru chaja sa xi nduva nixtin xi camá camangu tacun cojo Jesucristu ne, ley jan ne, cavinchahñu naja sacuaha xi ndavaya cavinechanyaan, hisca nixtin xi casacu camachaya naja xi fë jyé naja ngatsë rë xi mangu tacuun cojo Jesucristu. ²⁴ Cuatjin xi ley ne, cavitexa naja hisca xi canduva Cristu cojo sa xi cjuë jyé naja ngatsë rë xi mangu tacuun cojo Jesucristu. ²⁵ Peru quihndë xi ha cafehe nixtin xi mangu tacuun cojo Jesucristu ne, ha quihndë vitexaain sa naja ley rë Moisés jan. ²⁶ Cuatjin ta, tséhë xi quihndë xi tjin tangun cjuatacun nuju cojo Jesucristu ne, ngayujun ni ne, quihndi rë Nina má ngayun ngatsë rë xi mangu tacún cojo rë me. ²⁷ Ngayujun ni xi caxtenda ngayun xi nihñutangun cjuatacun nuju cojo Cristu ne, hacuaha cavisehen nuju cjuatacun rë me jan sacuaha xi cachujun ngu tsjian xatsë. ²⁸ Ngajan xi cuendaain rë sa xi xuta tjë rë Israel o sa xi xutaxín ngayun, cuendaain rë sa xi xuta caxteña o sa xi xuta tjin ndaya ngayun, cuendaain rë sa xi chjuun o sa xi xihin ngayun ta, tséhë xi ngayujun ni ne, xi tjin tangun cjuatacun nuju cojo Jesucristu ne, ngu tangun ni cún yun xi cuma rë Nina. ²⁹ Hane sa xi tséhë Cristu má yun ne, ngajan xi hacuaha tjë rë Abraham má yun, hane satë nuju cjuandaja xi cachja Nina xi sua me.

4

¹ Cuma cuinújan ne, sacuaha cha xi cjuahatsja cjuanchina rë xutacha rë ne, nguyëjë rë xi chúa nu rë cha ne, tangun cha cojo ngu mosu xi cachahá rë, handasa cjuaquixindaja xi cha vëhë má cha nai rë yëjë ni cjuanchina jan. ² Tjin xuta xi sahmi rë cha cuidadu hacuaha fahacuenda me cjuacjintacun rë cha, hisca nixtin xi cachja nahmi rë cha xi cuatjin cuma cojo cha. ³ Cuanitjin ni naja ngayaan ta, hya xi cjualanga naja ne, hatuxa cavinuhyan tséhë xitsehen xi vitexa rë ngasunhndë, sacuaha xi má ngayaan hndixahan xi cachahá rë. ⁴ Peru hya xi cavechútáha rë nixtin rë ne, Nina ne, catsingatju me Quihndi rë me, xi catsin sacuaha tsin ngayaan xuta ngasunhndë, hacuaha ley rë Moisés cavitexa rë jan. ⁵ Cuatjin catsingatju me, cojo sa xi Quihndi rë me jan ne, cuéhëndaya naja ngayejen ni

xi cavitexa naja ley jan, hacuaha cojo sa xi cuma ngayaan quihndi rë Nina. ⁶ Cojo sa xi cumatsejen xi quihndi rë Nina má ngayun ne, Nina ne, caveya me Hasen rë Quihndi rë me cahntsua cjuatacun naja. Hane Hasen jan ne, cuitjin chja cojo Nina: “¡Papá, Nahmi naha!” ⁷ Véhë xi ngayun ne, hindë hacuiin má ngayun mosu hndixahan xi caxteña ta quihndi rë Nina. Hane xi cuatjin quihndi rë me ngayun ne, Nina ne, sua nuju me yëjë ni xi satë rë quihndi rë me.

Macjincacun Pablo tsëhë xuta Galacia

⁸ Hatsëë nixtin ne, hya xi chaja sa cumachaya nuju yo xi Nina ne, jemu cavetuhun yojo nuju cojo jemu cjín xcusun nina xi hatuxa hacuiin nina. ⁹ Peru quihndë xi ha camachaya nuju yo xi Nina ne, o cuma cuinújan ne, quihndë xi Nina ne, vutsejen nuju me cojo cjuandaja ne, ¿hacutjin nga meje cuyun cuisuhun cojo cjuahesen xi chúa ngahñu rë hacuaha yuma cojo cjuatacun rë ni? ¿Hacutjin nga meje cuetuhun yojo nuju cojo cjuahesen xi cuacun jan ni? ¹⁰ Jercu nihñu suhi. Tjin nixtin xi jercu chjuhunrcun, tjin suhi xi nihñu chuva sá o sa xi chuva nu. ¹¹ Macjín cacún, sá tu xa xi casahme ngajñi nuju ne, tu mahya ni camá.

¹² Ngayujun ni ne, cjuéhya nuju favor ne, catama ngayun sacuaha ngahan ta, tsëhë xi ngahan ne, ha camá ngahan sacuaha ngayun. Tsajin mé xi choho canihñu cojo ná.

¹³ Hacuaha hyun xi titjun ne, casuá camachaya nuju tsëhë cjuandajyihu xi chja tsëhë Jesucristu ngatsë rë ngu chíhin xi yaha ná. ¹⁴ Peru handasa casuándya nuju cojo chíhin naha jan ne, ngayun ne, tsajin canitjungun ná hacuaha tsajin canihñuchuvun ná. Cahndë rë véhë ne, cachjuhunntsun ná sacuaha xi ngu ángel xi catsingatju Nina má ngahan, o sacuaha xi suvá Jesucristu má ngahan. ¹⁵ ¿Mé camá cojo cjuandaja xi tjin nuju hatsëë ni? Ngahan ne, tsinguixë xi ngayun ne, hisca canaxun túxcun tuhun ná nixtin hya, sa xi camá canaxun. ¹⁶ ¿Há camá ngahan condra nuju ngatsë rë xi cachjá cojo nuju cjuaquixi?

¹⁷ Tjin xuta xi jercu meje cuisecoo nuju me, peru hacuiin cojo cjuandaja ta xi meje rë me ne, xi cuaxëxin nuju mé tsahan, cojo sa xi ngayun ne, ninguisuhunjñurcun cojo rë me. ¹⁸ Jercu ndatjin xi meje cuisecoon rë xingueen, hya xi cojo cjuandaja. Peru meje rë xi yëjë ni nixtin cuatjin nihñá, hacuiin suvá ni hya xi tejñataha cojo nuju. ¹⁹ Ngayujun ni tsan, jercu jyé cjuahmu xi tivátju nga tijima ngatsë nuju, sacuaha vatju ngu chjuun xi tsin quihndi rë me. Hacuaha cuatjin cjuéndujú cojo cjuahmu vihi hisca xi cumatsejen xi jiya té Cristu ngajñi cjuatacun nuju hacuaha cuitexa me cjuatacun nuju tsëhë yëjë ni xcusun xi nihñu. ²⁰ Jercu meje cuitejña cojo nuju ndicumaha ni, cojo sa xi cuma tsindéya cjuavisiajmi naha cojo nuju ta, tsëhë xi jercu vityangë cacún tsujun.

Ejemplu tsëhë Agar cojo Sara

²¹ Ngayujun ni xi meje nuju xi ley rë Moisés cuitexa nuju ne, tinújun cojo ná, ¿há cjëë cuinuhyun cjuá rë ley jan? ²² Camahindu xi Abraham ne, jo xu camá quihndi rë me: ngu ne, tsëhë na mosu hndixahan xi sahmi xa rë chjuun rë me, hane xingu jan ne, tsëhë chjuun rë suvá me, na xi hacuiin hndixahan ta hatuxa xuta ndaya tjin. ²³ Quihndi rë na mosu hndixahan jan ne, catsin sacuaha tsin yëjë ni langa; peru quihndi rë na ndaya jan ne, camá tsëhë cjuarcun rë Nina. ²⁴ Cjuá xi cuicun vi ne, sacuaha ngu ejemplu: jo chjuun jan ne, sacuaha jo compromisu má na. Ngu na ne, Agar hmí rë na, hane yëjë ni quihndi rë na ne, hatuxa hndixahan cachahá rë. Hane chjuun jan ne, sacuaha compromisu xi casahmi Nina cojo Moisés ngajan Naxi Sinaí. ²⁵ Na Agar, na xi sacuaha Naxi Sinaí ngajan Arabia ne, sacuaha ngu ejemplu tsëhë nandya Jerusalén xi tacun quihndë. Hane yëjë ni xuta tsëhë Jerusalén véhë ne, sacuaha hndixahan cachahá rë má me. ²⁶ Peru yëjë ni xuta tsëhë Jerusalén xi tacun ngahnga ne, hatuxa ndaya tjin me. Hane ngayaan ne, quihndi rë nandya Jerusalén véhë má ngayaan. ²⁷ Cuitjin chja xujun rë Nina:

Catamasua ri ngaye chjuun xi maji sacu ri quihndi;
chjindaye cjuasua, ngaye xi cjëë cuatji cjuahmu xi tsin ri quihndi.
Tsëhë xi ngaye xi cavixin cojo ra, hitsë sa cjín cuma ye cojo quihndi riji
xi cuma ran xi fi vejña na cojo cha.

²⁸ Ngayujun ni ne, hacuaha quihndi rë Nina má ngayun, sacuatjin rë Isaac, ngatsë rë xi cuatjin cachja Nina. ²⁹ Nixtin hya ne, cha xi catsin sacuaha tsin yëjë ni langa ne, catsujiyihya tjengui cha cojo cjuahngatacun cha xi catsin ngatsë rë Hasen rë Nina. Quihndë ne, ha cuanitjin ni tijima. ³⁰ Peru ¿mé chja xujun rë Nina? Cuitjin chja: “Naxendihye na mosu hndixahan jan cojo quihndi rë na ta, tsëhë xi quihndi rë na hndixahan jan ne, hatuxa cumaji sacu tangun rë cjuanchina rë nahmi rë cojo quihndi rë na xi ndaya tjin.” Cuatjin chja xujun rë Nina. ³¹ Vëhë xi ngayehen ni ne, hacuiin quihndi rë na mosu hndixahan má ngayaan ta quihndi rë na xi ndaya tjin.

5

Meje rë xi cuanguenndujun xi tjin ndaya ngayaan

¹ Cristu ne, cavëhëndaya naja me, cojo sa xi ndaya tjin ngayaan. Vëhë xi tiyujunhñu cjuatacun nuju, xicaninguisunjñuu rcun nga cojo ngu xcusun xi sahmi xi cuyun nga ngayun sacuaha hndixahan.

² Nutsujun ni. Ngahan Pablo ne, cuichjá cojo nuju ta, sa xi xtí chuxin nuju sacuatjin xcusun rë xuta tjé rë Israel ne, Cristu ne, cumachjiriin nuju me. ³ Cuya cuichjá cojo nuju ta yëjë ni xihin xi cuatjin xtí chuxin rë ne, hatuxa tjin rë xi sahmi yëjë ni hacutjin chja ley rë Moisés. ⁴ Ngayun xi meje nuju xi cjué jyé nuju ngatsë rë xi vinuhyun tsëhë ley rë Moisés ne, hindë tsajin tjin tangun cjuatacun nuju cojo Cristu, hacuaha jemu cjin nechun tsëhë cjuandaja rë Nina. ⁵ Peru ngayin ne, jercu vetihin tacuín xi tsicjé Nina jyé niji. Hacuaha jercu nechinyin xi cuatjin sahmi Nina ta, tsëhë xi Hasen rë Nina ne, visecoo niji xi mangu tacuín cojo Jesucristu. ⁶ Hya xi tjin tangun cjuatacun naja cojo Jesucristu ne, venguiin chji rë sa cati rë o sa xi catiin rë chuxin naja. Xi vengui chji rë ne, xi mangu tacuun cojo Jesucristu, hane ngatsë rë vëhë ne, xi hacuaha tjin naja cjuahmutacun.

⁷ Ngayun ne, ha jercu ndaja titsangun titjun. ¿Yo xi casuandya nuju xi mijí cuanguenndujun xi cuinuhyun tsëhë cjuaquixi rë Nina? ⁸ Nina xi tsingatju me cjua nuju ne, hacuiin me vëhë xi cuatjin casuandya nuju. ⁹ Ha hyan cjua xi chja cuitjin: “Hitsë lihndi ni san rë pan ne, caa rë tsisatjen rë yëjë nahyu.” Cuatjin chja cjua. ¹⁰ Macjiin cacún tsujun ta, ngatsë rë xi tjin tangun cjuatacun naja cojo Nai naja ne, xi má ná ne, ningatuhun tacún sacuatjin tsingátaha cacún ngahan. Hane tu yo ni xi tisuandya nuju ne, cuatju castigu cuma.

¹¹ Sacuaha ngahan ne, sa xi quixi xi tichjá sa cojo xuta xi sahmi nguyjë xi xtí chuxin naja ne, ¿mé tsëhë xi yahnga me ne, tsujiyihiyatjengui sa ná me cojo cjuahngatacun? Sa xi quixi xi cuatjin sahme sa ne, ngajan xi hya xi chjá cojo xuta tsëhë hacutjin cahme Jesucristu xcun cru ne, tsajin cjuandya xi cuma rë yahnga xuta xi cuacun jan. ¹² Jercu ndatjin sa xi xuta jan xi cuatjin tisuandya nuju me ne, catatëxin suvá me yojo rë me ngu ndiya xa ni!

¹³ Sacuaha ngayujun ni ne, catsingatju Nina cjua nuju, cojo sa xi cumandaya ngayun. Peru hacuiin tu cuaain rë xi cavëhëndaya nuju Nina xi ningatuhun rë cjuatacun nuju yëjë ni xcusun tsehen xi vitexa nuju. Cahndé rë vëhë ne, tisecun xingun ngatsë rë cjuahmutacun xi tjin ngajñi nuju. ¹⁴ Cuatjin nihñu ta, yëjë ni cjua xi vitexa ley rë Moisés ne, cumachihin hya xi nihña ngu ni cjua vihi: “Meje rë xi nihmu tacún xingun sacuatjin nihmu tacún suvun yojo nuju.” ¹⁵ Peru sa xi choho nihñu cojo xingun sacuatjin sahmi chu xi cjan rë xi jinëxcuen xicjin chu ne, nechun cuidadu, sá tu nicjuyun cjuandaja xi tjin ngajñi nuju.

Hacutjin sahmi Hasen rë Nina, hacuaha hacutjin sahmi cjuatacun tsehen naja

¹⁶ Nutsujun ni. Tuhun cahndé xi Hasen rë Nina ne, cuitexa rë cjuatacun nuju. Hane xi cuatjin ne, hatuxa nihñuu yëjë ni xi fehya cjuatacun tsehen nuju. ¹⁷ Cjuatacun tsehen naja ne, sahmi condra cojo Hasen rë Nina, hacuaha Hasen rë Nina ne, sahmi condra cojo cjuatacun tsehen naja. Catsijo ni vihi ne, sahmi condra cojo xicjin. Ngajan xi ngayujun ni

ne, maji nihñu tu mé ni xcusun xi meje nihñu. ¹⁸ Sa xi Hasen rë Nina vitexa rë cjuatacun nuju ne, ngajan xi cuitexaain nuju ley rë Moisés.

¹⁹ Quihndë ne, ha ndaja ni hyan xcusun tsehen xi nihña hya xi vitexa naja cjuatacun tsehen naja. Nihña cjuatsehen xi sahmi ngu xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me, o tu mé sa xcusun cjuatsehen jan. ²⁰ Chjahanrcun nina ndyojo, hacuaha nihña cjuasurqui. Chocho hyaan xingueen, nihña si ngajñi naja cojo xingueen, hacuaha tjin naja cjuachini. Jercu ma cjan naja, jercu hnga tacun, jercu chicjan cojo xingueen, ngujo yaan ne, naxenxeen yojo naja tséhë xingueen. ²¹ Jercu tjin naja cjuaxin, jercu xuta chihi má ngayaan, jercu maxti nuju ngayaan hya xi nihñu ngu suhi, cojo jercu cjín sa xcusun vëhë xi nihña. Cojo tjun sa ne, cuichjá cojo nuju sacuatjin xi ha cachjá cojo nuju ta xuta xi sahmi me sacuahatjin rë xcusun vëhë ne, satiin rë me xi cuisehen me hiscan xi sahmi Nina gubiernu.

²² Peru hya xi Hasen rë Nina vincha cjuandaja ngajñi rë cjuatacun naja ne, jercu tjin naja cjuahmutacun, tjin naja cjuasua, tjin naja cjuajeya, yehe tacun, tjin naja cjuandaja, cuma cumangu cacun xuta cojo naja, ²³ jeya ngayaan, caa naja xi hacuiin ningatehen rë cjuatacun tsehen naja cojo xcusun xi fehya xi nihña. Sacuaha yéjë ni cjuandaja vëhë ne, tsajin camahani ley xi vitexa xi cumaji nihña. ²⁴ Hane yéjë ni xuta ladu rë Jesucristu ne, ha cavyujuxin me cjuatacun tsehen rë me cojo yéjë ni xcusun tsehen xi fehya rë me xi sahmi me. ²⁵ Sa xi Hasen rë Nina casua naja cjuahñu xatsë ne, meje rë xi hacuaha ningatehen xi Hasen jan cuitexa rë cjuatacun naja.

²⁶ Mijí rë xi xta ngayaan, mijí rë xi si rcun, mijí rë xi tjin naja cjuaxin cojo xingueen.

6

Meje rë xi cuiseecoon xingueen

¹ Ngayujun ni ne, sa xi yo sacutsja rë ngu xuta xi tisahmi me cjuatsehen ne, ngayun xi ningatuhun xi vitexa Hasen rë Nina cjuatacun nuju ne, meje rë xi cuiseecun rë me xi cuya ndaja me, peru tisecun rë me cojo yéjë ni cjuandaja cjuajeya. Hacuaha meje rë xi tjin nuju cuidadu, sá tu cojo ngayun cuinengunyun ngajñi rë cjuatsehen. ² Tisecun xingun cojo sa xi scaa nuju cojo cjuacjintacun xi quichuhun xingu xingu ngayun. Hane xi cuatjin nihñu ne, ngajan xi machihin ley xi cavicuya naja Cristu. ³ Sa xi yo sahmi jyë yojo rë handasa tsajin mé vechú ne, vindacha suvá yojo rë. ⁴ Xingu xingu ngayaan ne, meje rë xi nichuvan suvaan yojo naja cojo xcusun naja. Xi cuatjin nihña ne, cumasua naja cojo xcusun ndaja xi canihñia suvaan, hisca sahmii nguyjë xi nutsejen xcusun xi sahmi xingueen. ⁵ Xingu xingu ngayaan ne, tjin naja xi chaan cjuacjintacun naja suvaan.

⁶ Xuta xi vutaya cjuandajyিhi xi chja tséhë Jesucristu ne, hacuaha meje rë xi cuiseecoo me xuta xi tivicuya rë me jan cojo yéjë ni xcusun ndaja xi tjin rë me.

⁷ Xicavindachuun suvun rë yojo nuju ta Nina ne, cumaji cumandacha me. Xcusun xi nitjen ne, ha vëhë ni sacú naja. ⁸ Xuta xi fi tjengui me ndiya rë cjuatacun tsehen xi fehya yojo rë me ne, cuechú nixtin xi sacú chjí rë me xi yojo rë me jan ne, cjuehndu. Peru xuta xi fi tjengui me ndiya rë Hasen rë Nina ne, cuechú nixtin xi sacú chjí rë me xi Hasen rë Nina ne, sua rë me cjuahñu xatsë. ⁹ Sacuaha ngayaan ne, mijí rë xi nihñachuvan ngajñi rë yéjë ni cjuandaja xi tinihñia ta, tséhë xi hya xi cuechú Jain nixtin rë ne, sacú chjí naja, sa xi scaa naja. ¹⁰ Vëhë xi nguyjë rë xi tjin sa nixtin ne, ha tuxa meje rë xi nihña cjuandaja cojo yéjë ni me xi sacuaha xingueen tséhë xi hacuaha mangucacun me cojo Jesucristu. Hacuaha meje rë xi nihña cjuandaja cojo ngayjë ni xuta.

Sua Pablo conseju, hacuaha sua me Nina rë me cojo xuta Galacia

¹¹ Ngayujun ni ne, jnutschun letra yehe vihi xi titsihindu nuju cojo hntsa suva! ¹² Xuta xi meje rë me xi ndaja cuichja xuta tséhë me ne, me vëhë xi meje sahmi nuju me nguyjë xi xtí chuxin nuju. Cuatjin sahmi me, cojo sa xi tsajin cuatju me cjuañihi ngatsë rë xi chja me tséhë cru rë Cristu. ¹³ Hisca me xi ti chuxin rë ne, vihndiin me tséhë ley rë Moisés. Peru meje rë me xi xtí chuxin nuju, cojo sa xi cuaxëndaja me yojo rë me xi cuatjin

camá cojo nuju. ¹⁴ Peru sacuaha ngahan ne, ngatsë ni rë cru rë Nai naja Jesucristu xi cuáxendaja yojo naha. Cuatjin sahme, tséhë xi ngatsë rë cru rë Cristu jan ne, sacuaha xi cahme ngasunhndë xi cuma ná ngahan, hacuaha ngahan ne, sacuaha xi cavéya xi cuma rë ngasunhndë. ¹⁵ Tsajin mé vengui chjí rë xi cati o xi catiin rë chuxin naja ta xi vengui chji rë ne, xi cuma ngayaan xuta xatsë. ¹⁶ Ngayujun ni xi tsangunndujun cojo cjuatacun xi sehe cachjá cojo nuju jan ne, Nina catisua nuju me cjuajeya cojo cjuayumatacun. Hacuaha cojo yëjë sa me xi má xuta ladu rë Nina ne, cuatjin catisua Nina me.

¹⁷ Nchujun ni nguini ne, mijí ná xi yo sua sa ná cjuandya ta, tséhë xi yëjë yanda xi yaha yojo naha ne, vëhë tsingacun xi sahme xa rë Jesús sacuaha mosu hndixahan rë me.

¹⁸ Nai naja Jesucristu ne, catisua nuju me cjuandaja ngayujun ni. Cuatjin jain.

Carta xi catsingatju San Pablo tséhë xuta nandya Efeso

Pablo tsihindu me xuta rë yungun

¹ Ngahan Pablo ne, apóstol tséhë Jesucristu ngahan ta, tséhë xi cuatjin camameje rë Nina. Tsingátju nuju carta vihi ngayun xuta nandya Efeso, ngayujun ni xuta ladu rë Nina xi jercu ndaja titsangunndujun cojo ndiya rë me. ² Nina Nahmi naja cojo Nai naja Jesucristu ne, catisua nuju me cjuandaja cjuajeya rë me xi cuma nuju.

Ximinchacun xi cachjahantsan tséhë Cristu

³ ¡Nina ne, me vëhë xi Nina rë hacuaha nahmi rë Jesucristu me xi matitjun tsajan, jemu jyë hnga camahani me cojo hasen rë me! Me vëhë ne, ngatsë rë xi tséhë Cristu ngayaan ne, catsinchacun naja me cojo yëjë ni xcusun cjuandaja xi siu tsja me. ⁴ Nihña jyë hnga Nina cojo hasen rë me ta hisca hya xi chajasa casahesen ngasunhndë ne, hya cavaxijin naja Nina ngatsë rë xi tséhë Cristu ngayaan, hane ngatsë rë xi casahmi tséhë me ngayaan ne, camatyjahi cjuatacun naja hacuaha tsajin xi cún naja. Hacuaha Nina cojo cjuahmutacun xi tjin rë me cojo naja ne, ⁵ vëhë xi ha tjin chjine rë me cjuatacun xi ngatsë rë mé xi casahmi Jesucristu ne, ngayaan ne, quihndi ndaja Jain rë me má ngayaan. Cuatjin tjin cacun me xi cumá, cuatjin cavejñacacun me. ⁶ Cuatjin nihña jyë hnga me cojo hasen rë me tséhë cjuandaja rë me. Jemu cavincha naja me cjuandaja ngatsë rë xi ngayaan ne, tséhë Cristu yaan; hane Nina ne, hmucacun me Cristu. ⁷ Cojo jni rë Cristu xi cavanga hya xi cahme me, vëhë machji rë xi camandaya yaan tséhë castigu xi satë naja, cavaxëtje rë cjuatsehen xi canihña, tucu cjuahmucacun rë me xi jercu jyë camahani. ⁸ Tjercu tu ndaja casahmi me cjuandaja cojo naja xi cavuxaha ndaja me cjuatacun naja xi vijnercun cjua rë me ta, ⁹ casua camachaya naja tséhë cjuatahahma xi tjin cacun me xi cumá, tséhë cjuatacun xi cavejñangucacun suva me xi cumachihin. ¹⁰ Cjuatahahma vë ne, cumachihin hya xi cuetjucaa xi cuechu nixtin rë. Hya ne, Nina sahmitangun me ngu nguyëjë ni ngahma Cristu, me xi matitjun rë. Sahmitangun me yëjë xi siu ngahnga hacuaha yëjë xi siu nangu, hane sacuaha ngu ni cjuatacun cuma.

¹¹ Hacuaha ngatsë rë xi tséhë Cristu ngayaan ne, Nina cavaxijin niji xi satë niji hitsë tséhë mé xi satë rë Cristu ta, Nina sahmichihin me yëjë ni mé xi sua má rë me sacuahatjin ha cavejñacacun me xi cumá. ¹² Cuatjin casahmi me cojo sa xi ngayin xuta tje rë Israel xi tjun tjun cavinechinyin rë xi nduva Cristu ne, nihñi jyë hnga Nina cojo hasen rë me ngajñi rë yëjë ni mé xi nihñi. ¹³ Hacuaha ngayun ni, hya xi canuhyun rë cjuaquixi cjuandajyihi xi chja hacutjin cuma cuetjuntjun tséhë jyë nuju ne, camatangun cjuatacun nuju cojo Cristu. Hane sacuaha xi setaha sellu ngu xujun rë nangu xi tsejen xi quixi xi tséhë me, cuatjin caveya Nina Hasen rë me sacuaha cavejña me cjua xi sua nuju me, cojo sa xi tsejen xi tséhë me yun. ¹⁴ Hane tséhë xi hincha naja Hasen rë Nina ne, vëhë tsinguixi rë xi chjahanntsan yëjë xi cavejñacacun Nina xi cumá tsajan, tsinguixi rë xi sahmi ndaya me yaan tséhë jyë naja, hane ngatsë rë vëhë ne, me vëhë cuma jyë hnga sa me cojo hasen rë me.

Pablo ne, fehya me Nina xi scuxaha me cjuatacun rë xuta xi ndaja macjain rë me Jesucristu

¹⁵ Hindë ta cuatjin catsinchacun Nina yaan ne, vëhë xi ngahan, hisca xi camachaya ná xi naxunndujun Jesucristu hane xi tjin nuju cjuahmutacun cojo yëjë ni xuta xi tséhë Nina me, ¹⁶ suá cuaha nacuechji rë Nina ngatsë nuju. Hane yëjë ni hora xi tisahme oración naha, veyanangë nuju, chjayuma ngatsë nuju. ¹⁷ Féhya rë Nina rë Nai naja Jesucristu, Nina Nahmi naja xi jemu hnga me cojo hasen rë me. Féhya rë me xi sua me yun cjuatacun rë Hasen rë me cojo sa xi cuijnercun mé xi tséhë me hane xi hitsë sa ndaja chun yo me. ¹⁸ Féhya rë Nina xi scuxaha me cjuatacun nuju cojo sa xi cumachaya nuju tséhë xcusun vëhë xi vetahan tacun ngatsë rë xi cavaxijin naja Nina. Xi machaya nuju xi jercu vatjutaha ndajyihi cjuatjo rë me xi cuatëcja me ngajñi xuta ladu rë me. ¹⁹ Hacuaha

xi machaya nuju ta ngahñu rë me ne, tsajin chuva rë ne, hane tacunntsaan. Hacuaha ngahñu jan catsingacun me ta jemu hñu cjuá. ²⁰ Catsingacun me chuva rë ngahñu jan hya xi catsicuya me cjuahñu rë Cristu tséhë cjuaveya hane hacuaha hya xi casahmi jyë hnga me Cristu xi cavejña me cahndé ladu quixi rë me ngajan ngahngá. ²¹ Jercu hñu camahani cjuá rë Jesucristu xi cumá rë yéjë ni hasen, yéjë ni ángel, yéjë ni rey hasen xi hacuaha vitexá ngajan sa xi nixtin quihndé o sa xi nixtin xi nduva ngascan. Hacuaha hitsé sa jyë hnga ñíhi rë xa xi tacuntsja me. ²² Hacuaha yéjë xcusun xi siu, Nina ne, caviyuju me ngahma gubiernu rë Cristu. Hacuaha ha Cristu nga ni, casua me xi cumá titjun me tséhë yéjë ni xuta rë yungun hane vitexá me xuta ladu rë Nina sacuatjin rë rcuun xi vitexá rë yojo naja. ²³ Hane sacuaha vitsojo cjuatcun rë rcuun ngajñi yéjë yojo naja ne, cuatjin vitsojo Cristu ngajñi rë jingujujë ni xuta yungun, hane cojo Cristu ne, majingu jinguyëjë ni xcusun.

2

Ngatsë rë xi hmucacun naja Nina ne, cavaxëtje naja me

¹ Hacuaha ngayun ne, catsingasca Nina cjuatcun nuju ta, titjun ne, camá ngayun sacuaha xi caveyun xi cumá rë Nina ngatsë rë xi canuhuyun tséhë Nina hane canihñu cjuatsehen. ² Cavanguntengun cjuatsehen sacuaha xcusun rë xuta tsehen rë ngasunhndé. Canuhuyun tséhë rey xi hacui hasen tsehen xi vitexá rë yahnga hasen tsehen ngajan ngahngá, rey jan xi vitexá rë xuta xi vihndiin me tséhë Nina. ³ Hacuaha ngayëjë ni ngayaan ni, cuatjin xcusun naja hatsé. Canihñá yéjë cjuatsehen xi cafehyá rë yojo jyë naja, xi masua rë xahasen naja. Tséhë xi hatuxa xuta tsehen yaan, ngatsë rë vëhë ne, tacunya castigu xi cuma naja sacuaha yéjë sa yahnga xuta. ⁴ Peru Nina ne, tjercu tu tjin rë me cjuayumatacun ngatsë rë xi jemu tu jyihi camahani cjuahmutacun xi tjin rë me cojo naja. ⁵ Hane handasa xi camá sacuaha xi caveyan ngayaan xi cuma rë Nina ta canuhyaan tséhë me, peru hindé ne, sacuaha xi casacu naja cjuahñu xatsë tangun cojo Cristu. (Cjuanijutacun rë Nina ne, vëhë casahmi xi cavaxëtje nuju me tséhë cjuatsehen xi canihñu.) ⁶ Hacuaha sacuaha catsicuya nga naja Nina cjuahñu tangun cojo Cristu hane casahmi jyë hnga me yaan xi cavejña me yaan cojo Cristu ngajan ngahngá ngatsë rë xi tséhë Jesucristu yaan. ⁷ Cuatjin casahmi me cojo sa xi hisca nixtin xi sehe nduva ne, cumatsejen xi jercu vatjutaha cjuanijyëtacun xi tjin rë me cojo naja, cjuanijyëtacun vë xi matsejen ngajñi rë cjuahmutacun xi tsingacun me yaan ngatsë rë Jesucristu. ⁸ Cuatjin jan ne, cjuanijyëtacun rë Nina ne, vëhë casahmi xi cavaxëtje nuju me tséhë jyë nuju hya xi camacjain nuju ta, hacuiin suvun cavinchunsun chuva rë xi cavetjuntjun ta tséhë xi Nina ne, tu cuatjo ni casua nuju me cahndé. ⁹ Hacuiin tséhë xi canihñu suvun xi jemu ndaja xi cavéchuntuhun xcusun vë ne, ngatsë rë vëhë ne, hisca ngu xuta cumaji sahmi jyë me yojo rë me. ¹⁰ Ta sacuajyihí ngayaan ne, Nina casahmi naja me. Hane ngatsë rë xi tséhë Jesucristu yaan, vëhë xi catsindaja me ngayaan cojo sa xi ndaja nihñia, sacuatjin xi ha cojo tjun sa cavejñacacun me xi má xcusun naja.

Ngatsë rë jni rë Cristu ne, ma vetjutje xutaxín

¹¹ Ngajan xi ninguitsjun ta, ngayun ne, xutaxín yun ta hacuiin tséhë xuta tjë rë Israel catsin ngayun. Hacuaha xuta tjë rë Israel jan ta casahmi suva me sacuaha vitexá ley rë Moisés, me vëhë chja me tsujun ta, xuta xi catiin rë chuxin rë; hane chja me suva me ta, xuta xi cati rë chuxin rë. ¹² Hacuaha hya ne, hisca tsajin quitahatacun xi sacuse nuju Cristu. Casatiin nuju cahndé cojo xuta tjë rë Israel hacuaha casatiin nuju compromisu xi vetaha cacun me. Jemu va cavinechun cojo ngasunhndé nuju ta hacuiin vinga nuju Nina xi cjuaquixi. ¹³ Peru quihndé xi camá tséhë Cristu yun, handasa xi hya jemu xin nechun xi cuma rë Nina, peru hindé casacu cahndé camatiña yun ngatsë rë jni rë Cristu xi cavanga hya xi cahme me. ¹⁴ Ta Cristu ne, me vëhë casahmi me xi cavisehen naja ngayëjë ni cjuandaja cjuajeya. Hane xi cuatjin casahmi me ne, sa xuta tjë rë Israel yaan o sa xutaxín yaan, sacuaha ngu ni xuta má ngayaan. Ta hya xi cahme me, cafahaxin

me cjuachan xi vetsuntaha naja. ¹⁵ Catsicjë me ngahñu rë ley rë Moisés cojo yéjë ni cjua xi vitexá jan. Hane cuatjin ne, tséhë catsijo tjé rë xuta jan ne, tsajin sa cjuachan ta casahmitangun Cristu me xi sacuaha ngu ni xuta má me xi tséhë me suva me. Cuatjin cavisehen me cjuandaja tséhë xcusun xi cavetsutaha rë me titjun. ¹⁶ Hacuaha cuatjin casahmitangun me catsijo tjé jan xi cumá ngu ni hane tangun catsindajacacun me me jan cojo Nina ngatsë rë xi cahme me xcun cru. Hane cuatjin cavatëcja me cjuachan xi tjin ngajñi rë me jan.

¹⁷ Cuatjin camá xi canduva Jesucristu cachja me cjuandajyihí tséhë cjuajeya cojo nuju ngayun xutaxín xi xín nechun xi cuma rë Nina, hacuaha cojo xuta nangui Israel xi tiña siu me xi cuma rë Nina. ¹⁸ Véhë xi ngatsë rë mé xi casahmi Cristu hane cojo ngu ni Hasen rë Nina ne, xingu xingu ngayaan ne tjin naja cahndé cojo Nina Nahmi naja. ¹⁹ Véhë xi ngayun ne, hindë hacuiin xutaxín yun hacuiin xín tujuhunyun ni xi cumá rë xuta rë Nina ta hindë ne, sacuaha camá ngu nangui nuju ngayujun ni hacuaha cojo rë me ne xuta rë Nina má ngayun. ²⁰ Cojo rë me ne, ngayun ne tangun ngayun sacuaha xihndë rë ngu yungun xi sehe tjunihnga rë. Xihndénaña rë ne, véhë casahmi apóstol cojo profeta hya xi cachja me cjua rë Nina. Hane Jesucristu ne, me véhë má me ndyojo xi matitjun xi vejña yuju rë, ²¹ ta sacuaha ndyojo jan vaniji hai rë ndihya xi ndaja hñu cuejña xihndë rë xi cuijin, hacuaha ngatsë rë Jesucristu sacuaha ndaja setahacoo ngu xihndë ne, cuatjin vetahacoo Jesucristu xuta rë yungun hya xi scunihnga me xi cuma me sacuaha ngu yungun quicun xi camanchacun tséhë me. ²² Hacuaha cuanitjin ngayun ne, cavinchajñi me yun sehe cojo yun cumá ngayun sacuaha yungun quicun jan rë Nina hiscan cuejña me.

3

Cjua tséhë xa xi sahmi Pablo ngajñi rë xutaxín

¹ Cuatjin camá xi ngahan Pablo ne, tejñaya ndavaya ngatsë rë xa rë Jesucristu, xa jan xi sahme ngajñi nuju xutaxín. ² Cuejña ni xi há machaya nuju tséhë cjuanijyétacun xi Nina cavincha ná me xi satë ná sahme xa ngatsë nuju ta, ³ Nina casua me camachaya ná tséhë cjuatacun hma jan sacuaha xi ha catshindu nuju hitsë tséhë. ⁴ Hane xi chutahayun tséhë ne, mangutacun xi ngahan ne vijnercu cjuatahahma jan xi sahmichihin Jesucristu. ⁵ Cjuatacun jan ne, hatsëe nixtin tsajin yo camachaya rë tséhë. Peru hindë ne, cojo Hasen rë me catsingacun me tséhë xi cumachaya rë apóstol cojo profeta xi cavaxijin me. ⁶ Cjuatacun hma jan ne, cuatjin fi: Camá xi cojo cjuandajyihí rë Nina ne, xutaxín ne, fahatsja tangun me cuatjo rë Nina cojo xuta tjé rë Israel, hacuaha cojo me ngu xuta má me. Hacuaha ngatsë rë xi tséhë Jesucristu me ne, hacuaha satë rë me compromisu xi vetahacacun xuta tjé rë Israel.

⁷ Sacuaha cjuatahahma véhë ne, casatë ná ngahan xi sahme xa xi cuichja tséhë. Cuatjin casatë ná ngatsë rë cjuanijyétacun xi casua Nina ngahan xi cojo ngahñu rë me cuma. ⁸ Ngahan ne, handasa tsajin chuva rë xi ngahan sahme xi cuma rë xi sahmi tu yo sa yahnga xuta tséhë Nina, peru casua ná Nina cjuanijyétacun xi satë ná xa xi cuichjá cojo xutaxín xi cumachaya rë me tséhë cjuanchina ndajyihi rë Cristu xi tsajin cojo chuva rë. ⁹ Hacuaha cavetahaxa ná Nina xi scuxáha cjuatacun rë xuta cojo sa xi cumachaya rë me cjuatacun hma jan. Nina, xi casahmi me yéjë ni ne, hisca ntsacu cavetsihin cavejñacacun hma me xi cuatjin cumá. ¹⁰ Cuatjin camá cojo sa xi nixtin quihndë ne, ngajñi xuta yungun rë Nina ne, tsingacun rë cjuahasen rë Nina, cojo sa xi yéjë ni hasen, yéjë ni ángel xi hacuaha vitexá ngajan ngahnga, machaya rë xi jemu cjín xcusun rë cjuahasen jan ta, ¹¹ cjuatacun jan ne, hisca ntsacu cavetsihin cuatjin cavejñacacun me, hane casahmichihin me cojo Cristu Jesús, me xi matitjun tsajan. ¹² Hacuaha ngatsë rë xi tséhë Cristu yaan hane ngatsë rë xi mangutacun cojo me ne, rcuun nihñia tiña tséhë Nina cuinújan cojo me ta, tjin ngutacun xi sacu naja cahndé. ¹³ Véhë xi cojo cjuatacun véhë ne, cuichjá cojo nuju ta hacuiin nihñuchuvuntacun ngatsë na ha ngahan xi choho tivatju

tijima tséhë xa xi sahme ngatsë nuju, ta ngajñi rë xi cuatjin tivatju ngahan ne, hitsë sa tivaxëndaja nuju.

Cjuahmutacun xi tjin rë Nina

¹⁴ Cuatjin camá xi ngatsë rë vëhë ne, vixcuhnchëtaha xcun Nina nahmi rë Jesucristu me xi matitjun tsajan. ¹⁵ Yëjë ni tjë rë xuta o sa ángel, sa ngahnga o sa ngasunhndë viyuju me ne, faha ñihi me tséhë Nina sacuha tséhë Nahmi rë me. ¹⁶ Nina Nahmi naja ne, tjemu tjin rë me ngahñu xi casahmi hnga hasen me ngajan ngahnga. Chjáhya rë me xi tucu chuva rë yëjë cjuandaja rë me jan ne, sua nuju me xi cuiyuhñu xahesen nuju cojo ngahñu rë Hasen rë me. ¹⁷ Hane ngatsë rë xi cuatjin macjain nuju Cristu ne, hacuaha cuejña cahndé me cahntsua xahesen nuju. Hane cjuahmutacun xi hincha nuju ne, cuma sacuha ngu tyjama xi sua nuju ngahñu hane tsuvangui nuju, ¹⁸ cojo sa xi hacuaha cuijnercunndujun ngayun cojo yëjë yahnga xuta xi macjain rë me, ta tsajin hisca cjuë ta jemu tu jyë hnga cjuahmutacun xi tjin rë Cristu cojo naja. ¹⁹ Hacuaha cjuehyá xi sacuse nuju cjuahmutacun xi tjin rë Cristu cojo nuju, ngu cjuahmutacun xi jercu vatjutaha rë hisca tsajin chuva rë xi hatuxa hyan, cojo sa xi ma tsë rë cjuatacun nuju suva cojo yëjë ni xi tséhë Nina.

²⁰ Quihndë ne, catama jyë catama hnga Nina. Me vëhë cojo ngahñu rë me xi sahmixa ngajñi naja ne, hitsë sa cjín cuma sahmi me tséhë xi cuma chjahyan o sa xi matacun xi ma sahmi me. ²¹ Catama jyë catama hnga me ngajñi xuta yungun rë me hacuaha ngajñi Jesucristu; catama jyë catama hnga me yëjë ni nu yëjë ni nixtin. Cuatjin Jain.

4

Tjin tangun yaan ngatsë rë Hasen rë Nina

¹ Ngatsë rë vëhë ne, ngahan xi tejñaya ndavaya ngatsë rë xa xi sahme tséhë Nina, ngahan fehya nuju xi tangun nduju cojo ngasunhndë nuju sacuha meje rë xi sahmi me xi cavaxijin Nina, sacuhatjin ngayun xi catuxijin nuju. ² Tjin nuju cjuajeya hacuaha ninguijnu yojo nuju cojo xingun. Hacuaha jyëtacun xingu xingu yun cojo xingun ngatsë rë cjuahmutacun xi tjin nuju. ³ Nihñu nguyjë xi yëjë nixtin tjin tangun yun, cojo ngahñu rë cjuajeya xi sua Hasen rë Nina xi sahmi tangun nuju ngayun ngayujun ni. ⁴ Ngayaan ne, ngu ni yojo má yaan, hacuaha ngu ni má Hasen rë Nina. Hacuaha cuanitjin ne, ngu ni cju xi cuetaha tacun xi sacu naja cjuahñu xatsë, ngayaan xi cajindaya naja me. ⁵ Hacuaha ngu ni Jesucristu xi Nai naja, ngu ni cjuachacun xi macjain naja, hacuaha ngu cjuatacun ni xi xtenda yaan. ⁶ Ngu ni Nina Nahmi naja ngayejen ni. Hane Nina ne, matitjun me tséhë ngayëjë ngarca ni ne, tsinguitsojo me jinguyjë ni ngajñi yojo naja, hacuaha tacun me ngajñi naja.

⁷ Peru jimangu yaan ne, ha casua naja me cjuatjo cjuatacun xi satë naja xa xi nihñä jimangu yaan, sacuha chuva rë xi casua Cristu. ⁸ Vëhë xi xujun rë Nina chja cuitjin: Hya xi camiji me ngahnga, hacuaha quiji cojo me xuta presu xi cafaha me. Hane casua me cjuatjo xi cafahatsja xuta rë me.

⁹ ¿Hane mé vijne cjuá xi camiji me? Cjuá vëhë ne, vijne xi titjun ne cajne me hiscan xi hitsë sa nangui tséhë ngasunhndë. ¹⁰ Hane xi cajne jan ne, hacui ni me xi hacuaha camiji hiscan xi hitsë sa hnga tséhë ngahnga, cojo sa xi jinguyjë ni cuejña cahndé me. ¹¹ Ha me vëhë ni casua me cjuatjo cjuatacun xingu xingu. Casua me xi yahnaga me ne, cumá me apóstol, yahnaga me ne xi sua me xi cumachaya rë xuta cjuá xi cafahatsja me tséhë Nina, hane yahnaga nga me ne, cuichja me cojo xuta tséhë cjuá xi cuaxëtje naja, hane yahnaga nga me ne, pastor xi vicuya. ¹² Cuatjin cavéhëchjine me xuta rë me jan cojo sa xi xa xi sahmi me jan ne, cuisecoo rë xuta yungun xi sacu hñu rë me. ¹³ Hisca xi ngayejen ni ne, cuma tangun yaan cojo ngu ni cjuachacun xi macjain naja hacuaha cojo yëjë cjuá xi machaya naja tséhë me xi Quihndi rë Nina. Hane xi cuatjin cuma tangun yaan, cumacha yaan hane cuiyuju cahndé cjuatacun naja sacuha tjin chihin yëjë cjuatacun rë Cristu. ¹⁴ Hane sehe hacuiin tangun yaan cojo langa xi tsindeya cjuatacun rë hane fi tjengui

ndiya rë tu mé ni cjuachacun xatsë sehe vixuya ngajñi cjuandacha rë xuta xi vincha haxi me. ¹⁵ Hitsë sa ndaja xi cuinújan cjuaquixi ngatsë rë cjuahmutacun xi tjin naja cojo rë me cojo sa xi cumacha yaan cojo sa xi yëjë ni xcusun naja cuma sacuaha Cristu, me xi matitjun tsajan. ¹⁶ Hane ngatsë rë ngahñu rë me vëhë ne, yëjë xuta xi macjain rë me Nina ne, ndaja yahangui xicjin me, sacuaha naxahñu naja ne, tsuvangui rë yojo naja, ngatsë rë xi hincha xicjin. Hacuaha ngatsë rë xi jima ngu xuta jan ndaja sahmi me xa ne, ngu tangun ni cuma yehe me, hacuaha sacu hñu rë me ngajñi rë cjuahmutacun jan.

Xcusun xatsë xi casacu naja ngatsë rë xi macjain naja Cristu

¹⁷ Ha cuanitjin ne, sacuaha tichjá cojo nuju cojo cjua rë Nai naja Jesucristu xi quihndë hacuiin cuinechun sa sacuaha siu xuta xi hvíin me yo xi Nina, ta me vëhë ne, siu me cojo cjuatacun jñu rë me xi tsajin me vetjuncaa. ¹⁸ Vijnircu me ta tséhë xi tsajin rë me cjuahñu xi sua Nina ta, tséhë xi taja rcu me ngatsë rë xi taja xahasen rë me. ¹⁹ Hacuaha cachaja cjuatacun rë me, hane casuatë me yojo rë me, vëhë xi jercu macacun me xi sahmi me yëjë xcusun cjuatsehen xi tjin ngasunhndë. ²⁰ Peru ngayun ne, hacuiin cuatjin camá nuju tséhë Cristu ²¹ ta ngayun ne, hatuxa cachutayun Jain tséhë me, hacuaha camá nuju tséhë me, cojo cjuaquixi xi tjin rë Cristu. ²² Sacuaha cjuatacun changá xi canduvuncujun ne, tejñuxun ta tséhë xi vëhë xi tsitsehen cojo cjuandacha xi jercu matacun cojo. ²³ Meje rë cuma xatsë yun cojo cjuatacun nuju hacuaha cojo hasen nuju. ²⁴ Hane nihñu tsujun cjuatacun xatsë xi ha tjin ndaja xi fayangui xcusun xi tséhë Nina ta xcusun vëhë ne, tsingacun ngu cjuahñu xi hatuxa cjuaquixi hacuaha tyjahi.

²⁵ Quihndë ta cuatjin ne, canújuun cjuandacha cojo cjuandesu ta, jima ngu yun ne, tinújun cjuaquixi cojo xingun tséhë xi ngayëjë ni ngayaan ne, camatangun yaan ta ngu ni yojo má ngayaan.

²⁶ Handasa cjan nuju ne, cavinchun ngu jyé, hane cjuacjan jan ne, hacuiin xi cjuecani rë cuaha nixtin, ²⁷ hane hisca xi hitsë ne, caningatjuun rë xitsehan xi sahmi xi nihñu ngu jyé.

²⁸ Xuta xi catsichëjë me ne, catejñaxin me xcusun vëhë, hane catisahmi me xa nguñajacacun me cojo sa xi cuechutaha me yëjë xcusun xi machaja rë me. Hane hacuaha cuma cuisecoo me xuta xi machaja rë.

²⁹ Canújuun cjuatsehen. Nújun ngu cjua xi ndajyihi xi cuincha ndiya rë xuta xi cuiseñuju me cojo sa xi tséhë me ndaja. ³⁰ Xi canihñuu xi cuma va rë Hasen rë Nina ta, cojo Hasen rë me jan ne, ngayun ne, casetaha nuju chuva xi tsingacun xi sacu nuju cjuahñu xatsë nixtin xi cuaxëtje nuju me tséhë jyé nuju.

³¹ Hacuaha tiyujunxun yëjë ni cjuachan, yëjë ni cjuasuë, yëjë ni cjuahnga, yëjë ni cjuachjataha cojo yëjë sa xcusun cjuatsehen ³² ta cahndé rë vëhë ne, nihñu cjuandaja cjuajeya xingu xingu yun cojo xingun. Tjin nuju cjuayumatacun cojo xingun. Hacuaha ninchatuhun xingun sacuaha catsinchataha Nina yun ngatsë rë Cristu.

5

Hacutjin meje rë xi cuiyuju xuta ladu rë Nina

¹ Ngatsë rë xi jemu hmucacun nuju Nina ta, tséhë xi quihndi rë me yun, vëhë xi chjayunnungun tséhë me. ² Hane nechun cojo cjuahmutacun xi catsihmucacun naja Cristu hane hisca casua me yojo rë me ngatsë naja sacuaha ngu tsángä ndajyihi xi cueya chu hane cuma tséhë Nina sacuaha ngu cuatjo xi chuya rë me.

³ Quihndë ta ngayun ne, tséhë Nina yun ne, hisca xi caveyunnanguun cjuatsehan xi matacun cojo yojo jyé nuju ngajñi nuju. Caveyunnanguun hisca ngu sa cjuatacun chocun cojo cjuachan ta, ngayun ne, tsajin chuva rë xi nihñu xcusun vëhë. ⁴ Cavisiajmuun xcusun xi cjuasava, cojo cjuangarca cojo cjuaxcuehyu hya xi hacuiin mameje rë ta cahndé rë vëhë ne, tuhun nacuechji rë Nina. ⁵ Ha hyun ta xuta xi sahmi me cjuatsehan xi sahmi ngu xuta cojo ngu xi hacuiin tséhë me, o sa ngajñi ni xihin me o ngajñi ni chjuun me o tu mé sa xcusun cjuatsehan jan o sa xi choho me, tangun cún me sacuaha me xi

faharcu me nina ndyojo hane sacuiin r  me cahnd  hiscan sahmi gubiernu Cristu cojo Nina. ⁶ Cuidadu cojo sa xi tsajin yo xi cuindacha nuju cojo cjuangarca ta, hatuxa ngats  r  cjuachocun xi cuicun vihi ne, vinduva castigu jy  xi sua Nina xi cuma r  xuta xi vihndiin ts h  me. ⁷ V h  xi ngayun ne, caninguisuunj uu cojo r  me.

⁸ Ta handasa xi hats e  ne, ngayun cavinechun ngaj i j nu v , peru quihnd  xi tjin tangun yaan cojo Nai naja ne, cam  hasen tsujun, hane nih u sacuaha sahmi xuta xi cama hasen cjuatacun r  me. ⁹ Ta ts h  hasen jan ne, vetjucun xi jemu ndaja xuta jan hacuaha tyjahi cjuatacun r  me, hacuaha quixi me cojo xcusun r  me. ¹⁰ Nih u xatitacun xi cuma nuju m  xi chuya r  Nina. ¹¹ Caninguisuunj uu cojo xcusun xi venguichjiin r h  xcun Nina xi sahmi xuta xi j nu cjuatacun r  me. Hits  sa ndaja ne, ningacun tsejen cjuatsehen v h  ta, ¹² ts h  xi cjuatsehen v h  xi sahmihma me ne, hisca mij  r  xi cueyananguen ta sava tsejen. ¹³ Ta hya xi vetjucaa tsejen xcusun xi sahmihma me jan ne, matsejen ndaja xi hatuxa cjuatsehen. ¹⁴ Cuatjin ta hya xi vetjuaatsejen ne, ma quixi y ej  xcusun, sa xi cjuatsehen o sa xi cjuandaja. V h  xi chja cjuatsejen:

Ningascun r  cjuatacun nuju, ngayun xi catuhun r  cahnd  xi cjuahajenda
hane nduvunxun ts h  xuta xi cachaja cjuatacun r  me,
hane sehe Cristu ne, sua hasen nuju me.

¹⁵ V h  xi ngats  r  y ej  ni cjuatsejen o sa xi cjuatacun nuju ne, chjuhun chuvun hacutjin cuangun cojo ngasunhnd  nuju, hacuiin nechun sacuaha xuta xi j nu cjuatacun r  me, ta nechun sacuaha siu xuta xi jemu chutaha cjuatacun r  me. ¹⁶ Chjavunvuhun hora nuju ne, tetj n cjuandaja ta nixtin vihi ne, jemu tjin cjuatsejen. ¹⁷ V h  xi hacuiin ngarca yun ta, nih u xati tacun xi cuma nuju m  xi chuya r  Nina. ¹⁸ Hacuiin nih u cjuachihi ta, v h  ne, tsinguetsun r  cjuatacun nuju ne, hane cahnd  r  xi ningatjuntuhun xi siuhun nand  xi cuitexa r  cjuatacun nuju jan ne, tuhun cahnd  xi Hasen r  Nina ne, cuitexa r  cjuatacun nuju. ¹⁹ V h  xi ngaj i cjuavisiajmi nuju ne, teyunngangun cjuatsejen o sa xi cjuatacun nuju. ²⁰ V h  xi ngaj i cjuavisiajmi nuju ne, teyunngangun cjuatsejen o sa xi cjuatacun nuju. ²¹ V h  xi ngaj i cjuavisiajmi nuju ne, teyunngangun cjuatsejen o sa xi cjuatacun nuju. ²² Hacuaha tuhun nacuechji r  Nina Nahmi naja yasen ni ts h  y ej  ni xcusun xi vatjun m , hane nih u cojo nih u r  Nai naja Jesucristu.

Hacutjin cuinechan cahntsua ndya naja

²³ Ningijnu yojo nuju cojo sa xi cuma chjuhunrcun xingu xingu ngayun, cuatjin nih u ngats  r  xi chjuhun rcun Nina.

²⁴ Ngayun yachjin ne, ningijnu yojo nuju tinuhun ts h  xihin nuju ta, cuatjin vitexa Nai naja. ²⁵ Ta xihin nuju ne, vitexa nuju me sacuaha rcun, cuanitjin sacuaha Cristu vitexa r  y ej  xuta xi macjain r  me sacuaha rcu me. Hane Cristu cavax tje me xuta yungun jan sacuaha xi hacui yojo r  suva me. ²⁶ Cuanitjin ne, sacuaha xuta yungun ne, vihnd  me ts h  Cristu ne, cuanitjin ni ngayun yachjin ne, y ej  xi nih u xcun cjuah u nuju ne, tinuhun ts h  xihin nuju.

²⁷ Hacuaha ngayun xihin ne, nihmutacun chjuun nuju, sacuatjin Cristu ne, catsihmu-
cacun me xuta r  yungun hane casua me yojo r  me ngats  r  xuta jan. ²⁸ Cuatjin casahmi
me cojo sa xi sahmi tyjahi me cjuatacun r  xuta yungun jan cojo sa xi cuma xats  me,
hane catsityjahi me cojo cjuatsejen o sa xi cjuatacun nuju ne, cun tyjahi tyjahi me, ta hisca hits  tsajin
m  cam  chojyih  cjuatacun r  me. ²⁹ V h  xi ngayun xihin ne, meje r  xi nihmutacun
chjuun nuju sacuaha yojo nuju suvun ta, yo xi tsihmucacun chjuun r  ne, tsihmucacun
suva yojo r . ³⁰ Tsajin yo xi tsitjunngui suva yojo r  ta, hatuxa vangui me xi xin  me sehe
sacuh u r  yojo r  me, hacuaha sahmi me cuidadu ts h . Hacuaha Cristu ne, cuanitjin
ni sahmi me cojo xuta r  yungun ta, ³¹ ts h  xi sacuaha yojo r  me m  xuta jan. Cuatjin
ngayaan ta cam  yaan ts h  yojo ts h  ninda r  me casahmi me yaan sacuaha xcusun
r  suva me. ³² Ngats  r  vihi ne, xihin ne, cuiyuju cha nahmi ra cojo naa r  cha, sehe
cumatangun cha cojo chjuun ra, hane catsijo ni jan ne, cumatangun sacuaha xi ngu ni
yojo. ³³ Vihi ngu cjuatacun xi jemu chja vinuhy  r  Peru hacuaha jemu ndajyih  ta, chj 

cojo nuju ta cjua vëhë ne, tichja tsëhë Cristu cojo xuta yungun. ³³ Peru handasa cuatjin vijne cjua vëhë ne, hacuaha sahmi nguyjë xi jimangu yun ne, nihmutacun chjuun nuju, sacuaha yojo nuju suvun. Hane ngayun chjuun ne, mameje rë xi chjuhunrcun xihin nuju.

6

¹ Ngayun quihndi ne, xi vitexa tsujun sacuaha xuta xi macjain rë me Nina ne, tinuhun tsëhë xutacha nuju ta, tsëhë xi cuatjin mameje rë ta, ² cuitjin chja cjua tsëhë ley: "Chjuhunrcun chjuhunjeyun nahmi nuju cojo naa nuju." Hane cjua rë ley jan, vihi xi tjun cachja Nina xi hacuaha ticojo rë ngu cjuandaja xi hacui vi: ³ "Cuatjin nihñu cojo sa xi ndatjin cuinechun hacuaha jyë nixtin cjuecani nuju nguehe xcun cjuahñu nuju."

⁴ Hacuaha ngayun nahmi ne, hacuiin xi tuhun xti rë quihndi nuju ta, xi hitsë sa ndaja ne, nichun hacuaha tinújuntuhun rë cojo cjuandaja cojo cjuajeya hacuaha ningacun rë xi cumacjain rë Nina.

⁵ Hacuaha ngayun xi nihñu xa handasa mosu xi cavatsë me yun ne, tinuhun tsëhë patrón nuju nguehe xcun cjuahñu vihi, tjin ngutacun xi nihñu xa, hacuaha nihñu nguñajatacun, sacuaha xi tiniñu ngatsë rë Cristu. ⁶ Nihñu nguñajatacun, hacuiin suva hya xi tivutsejen nuju me cojo sa xi cuichja ndaja me tsujun ta, nihñu sacuaha meje rë xi sahmi mosu xi cachaha rë xi sahmi xa rë Cristu. ⁷ Nihñu nguñaja ni cjuasua, sacuaha xi tiniñu tsëhë Nina, hane hacuiin tsëhë ngu xuta. ⁸ Cuatjin nihñu ta, ha hyun ta yëjë xcusun ndaja xi nihñu ne, Nina ne, sua me chjí nuju.

⁹ Hacuaha ngayun patrón ne, ha chuva vëhë ni nihñu cojo mosu xi siu ntsun hane hacuiin cojo cjuachan ta, ninguitsun ta sa ngayun sa me vëhë ne, Nina siu tsja nuju me. Hane Nina ne, texta ni vutsejen naja me ngayéjë ni.

Xcusun ndaja xi sua Nina yaan xi cusecoo naja xi nihñu si cojo xitsehen

¹⁰ Sacuaha ngu sa cjua xi cuichjá cojo nuju ngayun xingueen, cojo ngahñu xi sua me xi tjercu hñu camahani ne, tiyujuhñu cjuatacun nuju xi tjin tangun yun cojo Nai naja.

¹¹ Chjuhun yëjë ni xcusun xi siu ntsun xi casua Nina yun cojo sa xi cuiyujunhñu cjuatacun nuju tsëhë cjuandacha xi sahmi xitsehen xi matitjun ta, ¹² si xi nihñu ne, hacuiin cojo ngu xuta ngasunhndë má ta, cojo jingu sa hasen tsehen xi matitjun hacuaha cojo yëjë xi vitexa rë ngasunhndë jñu vi cojo yëjë sa xi siu ngahnga. ¹³ Vëhë xi quihndë ne, chjuhun yëjë ni xcusun xi siu ntsun xi casua Nina yun cojo sa xi scaa nuju cuangun xcun hya xi nduva cjuacjintacun vë, hane handasa cuatjun vëhë ne, cuiyujunhñu cuaha cjuatacun nuju. ¹⁴ Cuiyujunhñu cjuatacun nuju sacuaha ngu sindadu xi tjin chjine cha. Nechun cojo cjuaquixi rë Nina ta, vëhë cumachji rëhë nuju sacuaha ngu cinturón xi cuetuhun cahntsua nuju. Hacuaha quixi yun cojo cjuatacun nuju ta, vëhë sahmi chjí rëhë nuju sacuaha chingá quicha rë sindadu xi cuetjo rë ndanisin rë cha. ¹⁵ Hacuaha tjin chjine yun cojo cjua rë Nina xi chja tsëhë cjuajeya sacuaha tjin chjine cha sindadu xi vincha ntsacu cha zapatu. ¹⁶ Hacuaha cojo yëjë sa vihi ne, ndaja catamacjain nuju cojo sa xi cuma tsicangui rë yojo nuju hane tsicjë ngahñu rë cjuañihi xi sahmi si xitsehen cojo nuju, sacuaha sahmi ngu quichatë xi yahatsja sindadu xi tsicangui rë yojo rë cha.

¹⁷ Chjuhunntsun cjuanchataha rë Nina xi vetahatacun xi cumachji rëhë sacuaha ngu cascú xi vaxétje rë rciun, hacuaha chjuhunntsun cjua rë Nina sacuaha ngu espada xi sua nuju Hasen rë Nina. ¹⁸ Hacuaha quitaha tiniñu oración nuju yëjë ni hora. Tinújun hacuaha chjahyun rë Nina ngatsë rë Hasen rë Nina. Cojo sa xi cuma nihñu vihi, quitaha nechun cuidadu, hacuaha tiniñu oración nuju ngatsë rë yëjë xuta ladu rë Nina. ¹⁹ Hacuaha tiniñu oración ngatsë naha. Chjahyun xi Nina ne, sua sa ná me cjua hya xi cuichjá, hane cuma cuichjá nguñajacacun cojo sa xi suá cumachaya rë xuta tsëhë cjua ndajiyahi rë Nina xi cuaxétje rë xuta ta, ²⁰ ngatsë rë cjua vëhë ne, Nina catsingatju me ngahan, hacuaha ngatsë rë cjua vëhë ne, tejñaya ndavaya quihndë. Vëhë xi nihñu oración cojo sa xi cuma cuichjá cjua vihi cojo yëjë ngahñu xi mameje rë.

Nina rë Pablo xi titsinguijnetaha me cjua

²¹ Tíquico, xingueen, xi vinga ná hacuaha ndaja cjuinduju me cojo xa rë Nai naja ne, sua me vëhë xi cumachaya nuju tsëhë yëjë ni xcusun xi tivatju tijima, cojo tsëhë yëjë ni xcusun xi tisahme. ²² Vëhë xi tsingátju nuju me cojo sa xi cuichja me cojo nuju hacutjin nechin hane cojo vëhë ne, cuma suatacun.

²³ Hane Nina nahmi naja ne cojo Nai naja Jesucristu ne, catisua nuju me ngayun xingueen cjuandaja cjuajeya cojo cjuahmutacun ngajñi xi cumangutacun. ²⁴ Hane Nina ne, catsinchacuntihin me yëjë xuta xi hmucacun me Nai naja Jesucristu cojo ngu cjuahmutacun xi tsajin nixtin fëya. Cuatjin jain.

Carta xi catsingatju San Pablo xi cafahatsja xuta nandya Filipos

Cristu má me cjuahñu rë xuta xi macjain rë me

¹ Ngahan Pablo cojo Timoteo ne, sacuaha mosu hndixahan rë Jesucristu ngayin. Ningatjin nuju ngu nina niji, ngayujun ni xi tséhë Nina ngayun, hacuaha macjain nuju Jesucristu ndyá nandya Filipos. Hacuaha cojo me xi matitjun tsujun sacuaha obispos hacuaha cojo me xi visecoo rë me ne, ningatjin nina niji tséhë me. ² Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rë me.

Oración xi sahmi Pablo tséhë xuta xi macjain rë me Nina

³ Hyá xi tsingáta hacacun ngatsé nuju ne, suá nacuechji rë Nina. ⁴ Hyá xi féhya rë Nina ngatsé nuju ngayujun ni ne, hatuxa tjin ná cjuasua ta, ⁵ tséhë xi ngayun ne, cuatjin visecun ná xi cumachaya rë xuta cjuá ndajiyihi tséhë Jesucristu. Cuatjin visecun ná hisca hyá xi caféhë tjéngë nuju ne, hisca quihndé. ⁶ Cavetsihin casahmi ndajiyihi Nina cjuatacun nuju. Véhë xi ngahan ne, tjin ngucacun xi cuatjincin ni sahmi me hisca nixtin xi cuya Jesucristu. ⁷ Hacuaha ndatjin xi cuatjin tsingáta hacacun ngatsé nuju ngayujun ni ta, tséhë xi jemu vinga ná ngayun. Vinga ná ngayun ta, tséhë xi ngayujun ngarcun ni ne, cojo ngayun tinihñu tsé tsé xa xi casua ná Nina cojo cjuandaja rë me, quihndé xi tejñaya ndavaya nguehe, hora xi tisuá cjuaquixi na ha cojo xutaxa rë, xi cjuá ndajiyihi tséhë Jesucristu ne, jemu ndaja camahani hacuaha hatuxa cjuaquixi. ⁸ Hisca vëë jain me ta jemu meje cuinduva tjéngë nga nuju ta, tséhë xi ngahan ne, hmú cacún nuju ngayujun ni sacuatjin hmucacun nuju Jesucristu.

⁹ Féhya rë Nina xi cuma jyé sa cjuahmutacun xi tjin nuju, hacuaha féhya rë me xi cuechutaha sa cjuatacun nuju, ¹⁰ cojo sa xi cuijnercun jaré xcusun xi ndatjin xi nihñu. Sehe ngajan xi cuma tyjahi xahasen nuju, hacuaha ha café jyé nuju nixtin xi cuya nga Jesucristu ta, ¹¹ tséhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaha jemu ndaja cuichja me tséhë me.

Cjuasua ne, caa rë fi xcun handasa vatju me cjuañihi

¹² Meje ná xi cumachaya nuju tsan, ta handasa cuitjin tejñaya ndavaya ne, hacuin ndajintjin ta xuta ne, hitsé sa tijima chaya rë me cjuá ndajiyihi tséhë Jesucristu. ¹³ Hisca yéjé sindadu xi jiyahñu rë ngahan cojo yéjé ni xuta xi yahnga ne, vëë me xi tséhë xi jemu xuta rë Jesucristu ngahan ne, véhë xi caveya ná me ndavaya. ¹⁴ Hacuaha jemu cjin xingueen ne, tséhë xi camachaya rë me hacutjin vatju quihndé xi tejñaya ndavaya ne, hitsé sa mangucacun me cojo Nina. Hane véhë xi macjiin cacun me xi chja me cjuá rë Nina.

¹⁵ Quixi ta hacuaha tjin xuta xi sua me machaya rë xuta cjuá tséhë Jesucristu. Peru tséhë xi sahmi xín cacun me cojo ná, hacuaha mijí rë me xi cjuá na ha cjuexcun, véhë xi cojo me chja me. Peru yahnga nga me ne, cuatjin chja me ta, tséhë xi jemu tjin rë me cjuandaja. ¹⁶ Cuma cuinújan ne, me xi cuacun tjin rë cjuandaja jan ne, sua me machaya rë xuta cjuá tséhë Jesucristu ngatsé rë cjuahmutacun xi tjin rë me cojo ná, tséhë xi ha vëë me ta Nina ne, casua ná me xa xi cuichjátē ngatsé rë cjuá ndajiyihi tséhë Jesucristu. ¹⁷ Peru me xi cuacun tjin rë cjuaxintacun jan ne, sua me machaya rë xuta cjuá véhë ngatsé rë xi meje sahmi yehe suvá me yojo rë me. Tsajin rë me ngu cjuatacun xi ndajiyihi xi cuatjin chja me. Xi má rë me ne, ngahan ne, xi tejñaya ndavaya nguehe ne, cumacjincacun ngatsé rë xcusun xi tisahmi me. ¹⁸ Tsimii sahmi rë xi cuatjin cjuatacun rë me xi chja me cjuá rë Nina, ¿há xi nguñajacacun me ne?, o ¿há xi hacuiin nguñajacacun me ne?, ndastu cuenda xi cjuá tséhë Jesucristu ne, tijimachaya rë xuta. Véhë xi jemu ndama ná.

¹⁹ Hya xi ha cuatju cjuacjintacun naha ne, hacuaha ndaja cuma ná ta tséhë xi ha hvë ta hya cuma tsejen xi tsajin jyé naha. Cuatjin cuma ta tséhë xi tichjahyun rë Nina ngatsë naha, hacuaha tséhë xi Hasen xi casua naja Jesucristu ne, cuisecoo ná. ²⁰ Jemu meje ná xi ngajñi rë yéjë ni xcusun xi sahme ne, tsajin mé xi sua sava ná. Hacuaha meje ná xi cumaciin cacún ngajñi rë tu mé ni cjuacjintacun, cojo sa xi xuta ne, hatuxa sahmi jyé hnga me Jesucristu ngatsë naha, sa xi tsismi ná xutaxa rë ne, o sa tsajin ne, sa xi tsiquehen ná me. ²¹ Peru jinguyéjë rë xi tejña cjuahñu ne, hatuxa meje sahme nguñajacacun yéjë ni hacutjin xi Jesucristu meje rë me. Hacuaha sa xi cueya ne, jemu ndaja tsahan. ²² O sa xi cuitejña sa cjuahñu ne, xa xi sahme ngatsë rë Jesucristu ne, ndatjin cuetju. Véhë xi hisca hveen ne, jarë xi hitsë sa chuya ná, ¿há xi cueya ne?, ¿há xi cuitejña cjuahñu? ²³ Cuma cuinújan ne, jemu chja sacuse ná jarë xcusun xi ndatjin. Jercu meje cjué tjéngë Jesucristu ngajan hiscan tacun me ta, jemu sa ndaja tsahan xi cuatjin. ²⁴ Peru hitsë sa mameje rë xi cuitejña cjuahñu ngatsë nuju. ²⁵ Tséhë xi cajnecacún tséhë cjuatacun véhë ne, véhë xi hvë ta cuitejña sa cjuahñu. Cuitejña sa cojo nuju ngayujun ni ne, cojo sa xi cuisécoo nuju xi tuxaha sa cjuatacun nuju xi chutayun cjuachacun xi macjain naja, hacuaha hitsë sa ndaja cuma rë xahasen nuju tséhë cjua véhë. ²⁶ Hacuaha hya xi cuinduvá cuitejña nga cojo nuju ne, cuinújun ta jemu ndaja Jesucristu, ngatsë rë xi cavétju ndavaya.

²⁷ Nihñu yéjë ni hacutjin xi meje rë xi sahmi xuta xi ha macjain jain rë me cjua ndajyhi tséhë Jesucristu. Cuatjin nihñu, cojo sa xi ndaja cjua sacu ná tsujun, ¿há xi cuinduvá tjéngë nuju?, o sa tsajin ne, ¿há xi tejñataha jingu sa ladu? Peru meje cumachaya ná xi ngayun ne, tjin tangun cjuatacun nuju, hacuaha visecuun xingun xi nújun tjun ngatsë rë cjua ndajyhi xi macjain naja. ²⁸ Hacuaha meje cumachaya ná xi ngayun ne, rcuun camahani tséhë xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihi, peru ngayun ne, cuaxëtje nuju me. ²⁹ Nina ne, ndaja casahmi me cojo nuju xi hacuiin suvá xi cumacjain ni nuju Jesucristu ta hacuaha cuatjun cjuañhi ngatsë rë xi macjain nuju me. ³⁰ Titjun ne, cahyun cjuañhi xi cavátju camá. Quihndë ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivatjun tijima quihndë.

2

Meje rë xi chjayanguen tséhë Cristu sacuaha catsinguijne me yojo rë me

¹ Tjin rë xahasen nuju cjuasua ta, tséhë xi tjin tangun cjuatacun nuju cojo Jesucristu. Tjin nuju cjuetacun ta, tséhë xi me véhë ne, hmucacun nuju me. Tjin tangun cjuatacun nuju cojo Hasen rë Nina. Hacuaha tjin nuju cjuahmutacun cjuayumatacun cojo xingun, xingu xingu ngayun. ² Quihndë ne, cojo sa xi cuma chihin cjuasua xi tjin rë xahasen naha ne, cuitjin nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju. ³ Sa xi meje nuju xi suvun ni xi ndajyhi cuatjun cuma ne, ndajin tjin. Hacuaha mijí rë xi nihñu yehe yojo nuju ta, xi meje rë ne, jeya ngayun. Hacuaha meje rë xi chutsujun xingun sacuaha xi hitsë sa vengui chjí rë me xi cumá nuju ngayun. ⁴ Mijí rë xi tsujun suvun ni cuinchunsun xi ndaja ta, hacuaha meje rë xi tinchunsun xi ndaja xi cumá rë jingu sa xuta.

⁵ Meje rë xi ningatuhuntacun sacuaha catsingatahacacun Jesucristu. ⁶ Me véhë ne, handasa ha Nina me ne, peru hacuiin casahmi jyé hnga me yojo rë me xi meje cuejña me sacuaha Nina ta, ⁷ cahndé rë véhë ne, cavejñaxin me cahndé rë me xcun Nina, hane casahmicuenda me xuta camá me ngu xuta sacuaha yaan, cojo sa xi sahmi me yéjë ni hacutjin cuitexa Nina me. Hya xi ha camá me xuta ne, ⁸ cahndé me yéjë ni hacutjin cachja Nina, hacuaha catsingatihi me xi catsisava xuta me, hisca catsingatihi me xi catsiquehen xuta me xcun cru, sacuaha xi jemu jyé jyé rë me. ⁹ Véhë xi Nina ne, hya xi catsicuya me Jesucristu cjuahñu ne, hya casahmi jyé hnga me Jesucristu, hacuaha ngu ni me véhë xi jemu vengui chjí rë ñihi rë me. ¹⁰ Cuatjin casahmi Nina, cojo sa xi yéjë ni

ángel, yéjé ni xuta, cojo yéjé ni xitsehen ne, cuechú nixtin xi cuixcuhnchi xcun Jesucristu xi cjuaharcun rē me. ¹¹ Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyé hnga me cojo cjuatacun rē me.

Xuta xi macjain rē me Nina ne, tsejen xcusun rē me xcun yahnga xuta

¹² Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsë sa nguñajatacun tinuhyun tsahan quihndë xi xín tejñataha. Hacuaha meje rē xi nihñu yéjé ni hacutjin xi chuya rē Nina ta, tséhë xi me vëhë xi vaxëtje nuju me. Ndaja cuidadu cojo sa xi cumachihin cjuatacun vëhë. ¹³ Hacuaha scaa nuju nihñu cuatjin ta, tséhë xi Nina sahmi me xi meje nihñu yéjé ni hacutjin xi chuya rē me, hacuaha sua nuju me ngahñu xi scaa nuju nihñu cuatjin.

¹⁴ Ngajñi rē yéjé ni cjuacjintacun xi tjin nuju ne, xi canújunjyuun cojo xingun xi chuiin nuju, xi canujuun cuitjin cuatjin. ¹⁵ Xi cuatjin ne, tsajin jyé nuju hacuaha tyjahi xahasen nuju. Cuma cuinújan ne, ngayun xi ha quihndi rē Nina ngayun ne, tsajin jyé nuju, xi nechun ngajñi rē xuta tsehen xuta ndajin xi siu ngasunhndë. Meje rē xi cumatsejen xi jemu ndaja ngayun ngajñi rē xuta tsehen, ¹⁶ xi tuhun machaya rē xuta cjua ndajyihi xi sua naja cjuahñu xatsé. Cuatjin nihñu ne, cojo sa xi ndaja cuma ná ngatsë nuju nixtin xi cuya nga Jesucristu ta, tséhë xi xi cuatjin ne, hya cumatsejen xi hacuiin tu mahya casahme ngahñu xi sahme hacutjin xi chuya rē Jesucristu, hacuaha hacuiin tu mahya casahme xá. ¹⁷ Ha ndasa tsiquehen ná xutaxa rē tséhë xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rē me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rē me. ¹⁸ Ha chuva vëhë ni ne, ndaja catama nuju ngatsë rē cjuandaja vë, hacuaha ndaja catama nuju ngatsë naha.

Ejemplu xi sua apóstol

¹⁹ Sa xi meje rē Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju me cojo xati, cojo sa xi ngahan ne, hacuaha ndaja cuma rē xahasen naha, hya xi cuya nga me cojo cjua hacutjin tivatjun tijima. ²⁰ Me vëhë tsingátju me ta, tséhë xi tsajin sa ná ngu xuta xi vinga nuju sacuaha me vëhë. Me vëhë ne, jemu meje rē me xi ndaja cuatjun cuma. ²¹ Peru yéjé me xi yahnga ne, sahmi cuenda me cjuandya rē suvá ni me, sahmi cuendaain me xa xi meje rē Jesucristu xi cumá. ²² Peru ha hyun xcusun rē Timoteo. Ha hyun ta hya xi cavisécoo ná me xi catihin cumachaya rē xuta cjua rē Nina ne, cavisécoo ná me sacuaha visecoo ngu quihndi nahmi rē. ²³ Vëhë xi, xi tu sacú cumachaya ná mé xi cuátju cuma ne, me vëhë xi meje tsingátju nuju me. ²⁴ Hacuaha xi má ná ne, me xi matitjun tsajan ne, sua me cahndé xi cojo xati ne, cuinduvá tjéngé nuju.

²⁵ Peru xi má ná ne, hacuaha sahmi nguyjé xi tsingátju nuju Epafroditoxingueen. Me vëhë ne, casahmi me coná xa, hane cojo me vëhë cacaña niji cojo cjuahngatacun rē xuta xi chohovëe naja. Hacuaha cavisécoo ná me sacuatjin xi meje nuju ngayun xi caningatjun me. ²⁶ Hane me vëhë ne, jemu tjin cacun me xi meje scuëé nuju me ngayujun ni ta, tséhë xi choho camá rē me xi camachaya nuju cjua xi hmu rē me. ²⁷ Hacuaha quixi xi jemu cama hmu rē Epafroditoxingueen. Ña meje cueya me. Peru cahmii me ta, tséhë xi camayuma rē Nina me. Hacuaha camayuma rē Nina ngahan ta, tséhë xi mijí rē me xi cuma jyé sa cjuachoho xi tivátju tijima. ²⁸ Vëhë xi cojo xati ne, tsingátju nuju Epafroditoxingueen, sehe cuma sua rē xahasen nuju xi chun nga me ngu ndiya. Hacuaha ngahan ne, cuma chuva hitsë cjuachoho xi tivátju tijima. ²⁹ Vëhë xi chjuhunntsun me cojo cjuasua, tséhë xi me vëhë ne, hacuaha macjain rē me me xi matitjun tsajan. Hacuaha chjuhunrcun yéjé ni xuta xi tangun cjuatacun rē cojo rē me. ³⁰ Me vëhë ne, tséhë xi jercu casahmi me xa tséhë cjua rē Jesucristu ne, vëhë xi hitsë sa ne, cahme me. Handasa cavetaha tsavi me yojo rē me xi cavisécoo ná me ne, peru camaciincacun me xi cavisécoo ná me cahndé nuju ngayun.

Xcusun xi jemu vengui chjí camahani rë

¹ Quihndë tsan ne, catamasua rë xahasen nuju ngatsë rë me xi matitjun tsajan.

Ngahan ne, hacuiin ndya ma ná xi cuya tsihindu nga nuju cjua xi ha cachjá cojo nuju ta, tséhë xi cjua vëhë ne, cuisecoo nuju xi tsajin yo tsinguetsun cjuatacun nuju xi macjain nuju Jesucristu. ² Nechun cuidadu cojo xuta machjiriin xi vindacha xi chja xi hachu meje rë xi xtí yojo naja, sehe tsejen xi tséhë Nina ngayaan. ³ Quixiin cjua rë me ta ngayaan xi tsejen xi tséhë Nina ngayaan. Hane Hasen rë Nina ne, visecoo naja xi ma chjahanrcun Nina, hacuaha nechan cjuasua ngatsë rë Jesucristu. Ha hyan ta hatuxa cumaji cuetjuntjen ngatsë rë xcusun xi cun ngayaan cojo xcusun xi nihñä. ⁴ Peru sa xi cuatjin cuma cuetjuntjen suvaan ne, ngahan ne, hitsë sa tjin ná chuva rë xi cuétjutjë xi cumá rë xuta xi yahnga. ⁵ Ngahan ne, hacuaha cati ná xi cavéchu xi jyin nixtin, sacuaha xcusun rë xutachanga naha. Ngahan ne, tjé rë xuta nangui Israel ngahan. Hacuaha quihndindai cjin rë Benjamín ngahan. Ha tuxa xuta tjé rë Israel ngahan ta xutacha naha ne, hacuaha xuta tjé rë Israel me. Ngahan ne, tséhë partidu fariseo ngahan hacuaha casahme yéjë ni hacutjin chja ley rë yungun naha. ⁶ Ngahan ne, jercu cavétaharcu xcusun rë xutachanga naha, hane vëhë xi hisca casuá cjuañihi xi cuma rë xuta xi macjain rë Jesucristu. Ngahan ne, tséhë xi casahme sacuatjin chja ley rë yungun naha ne, vëhë xi camaji catsicanji ná xuta hisca ngu jyé. ⁷ Xi catsingáta hacacun hatsëë ne, jemu vengui chjí rë yéjë xcusun vëhë. Peru ngatsë rë Jesucristu ne, xi má ná quihndë ne, venguiin camahani chjí rë xcusun vëhë ta, cumaji cuaxëtje ná. ⁸ Hisca venguiin chjí rë yéjë sa xcusun, má ná ta, tséhë xi jercu vengui chjí rë xi tjin tangun cjuatacun naha cojo Jesucristu, me xi matitjun tsajan. Ngatsë rë me vëhë ne, ngahan ne, cacandëxen yéjë ni xcusun, sacuaha xi chanden xtë, cojo sa xi ngahan ne, cuma tséhë Jesucristu ngahan. ⁹ Hacuaha cuma tangun cjuatacun naha cojo rë me. Xi cuatjin ne, cjue jyé naha, hacuiin ngatsë rë xi sahme hacutjin chja ley rë yungun ta ngatsë rë xi macjain ná Jesucristu. Nina ne, tsicjé me jyé naja ngatsë rë xi macjain naja Jesucristu. ¹⁰ Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacu ná ngahñu xi catsingacun Nina, hya xi camá catsicuya me Jesucristu cjuahñu. Sa xi meje rë Nina ne, ngahan ne, tsingatehen xi cuátju cjuañihi hacuaha hisca tsingatehen xi tsiquehen ná xuta ta, tséhë xi cuatjin cavatju Jesucristu camá. ¹¹ Hane hya xi cueya ne, meje rë Nina xi hacuaha tsicuya ná me cjuahñu xi tejña ngajñi rë nima.

¹² Cjëë cuma chihin yéjë ni cjuatacun xi meje ná vë, hacuaha chaja sa cuma tyjahi cjuatacun naha. Peru tisahme sa ngahñu, cojo sa xi cuma sahme chehen cjuatacun vëhë. Cuatjin sahme ta, tséhë xi Jesucristu ne, ha casahmi tséhë me ngahan. ¹³ Cuya cuichjá cojo nuju tsan ta, cjëë sahme chehen cjuatacun vëhë. Peru cuitjin meje sahme: tsicháya xcusun xi ha cavátju camá, hacuaha sahme ngahñu xi cuma sahme xcusun xi vengui chjí rë xi sehe nduva. ¹⁴ Tisahme ngahñu xi cuma sahme chehen xcusun vëhë, cojo sa xi sacú ná cuatjo xi sua ná Nina ngatsë rë xi macjain ná Jesucristu. Nina ne, cuaxijin ná me xi cuitejña ngajan ngahnga hiscan tacun me.

Meje rë xi tjin tangun yaan xi macjain naja Nina

¹⁵ Vëhë xi ngayaan xi ha ndaja macjain naja Jesucristu ne, meje rë xi cuatjin cuiyujun cjuatacun naja. Hane sa xi tjin yahnga ngayun xi hacuiin cuatjin cuiyujun cjuatacun nuju ne, Nina tsingacun nuju me hacutjin xi cjuaquixi. ¹⁶ Ndastu sahmi nguijyë xi nihñä cuenda tséhë cjuaquixi xi ha hyan ne, cuatjin meje rë xi nihñä.

¹⁷ Vëhë xi meje rë xi nihñä hacutjin xi sahme, tsan. Hacuaha tetuhunrcun xcusun rë xuta xi sahmi hacutjin xi sahme. ¹⁸ Ha jemu cachjá cojo nuju ta jemu cjin xuta xi condra me tséhë cjua ndajyihi xi sua machaya naja hacutjin cahme Jesucristu xcun cru. Ña tijíhnda xi tichjá nga ngu ndiya cojo nuju cjua vëhë. ¹⁹ Peru xuta xi sahmi me condra cjua ndajyihi vë ne, cjue me xcun ndihi. Cahndé rë xi cjuaharcun me Nina xi cjuaquixi ne, hitsë sa faharcun me tu mé ni xcusun xi chuya rë me. Cahndé rë xi cuma sava rë

me tséhë xcusun xi sahmi me ne, tu hitsë sa sahmi yehe me yojo rë me. Cuma cuinújan ne, tjin tangun cjuatacun rë me cojo cjuatacun rë ngasunhndë. ²⁰ Peru ngayaan ne, xuta tséhë ngahnga ngayaan. Hacuaha ha nechayan rë Jesucristu, me xi matitjun tsajan, ta cuinduva me tséhë ngajan xi cuaxëtje naja me. ²¹ Me vëhë tsindeya me yojo jyé naja xi tsajin mé machji rëhë, hane sahmi me sacuaha yojo rë suvá me xi jercu vengui chjí rë. Cojo ngahñu rë suvá me ne, sahmi me ta, tséhë xi me vëhë matitjun me tséhë yëjë ni xcusun.

4

Tahan cjuasua yëjë ni nixtin ngatsë rë Nai naja

¹ Vëhë xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhndë nuju. Jercu meje cuinduvá tjëngë nuju tsan. Jemu ma sua rë xahasen naha ta, tséhë xi ngayun ne, tivangun nduju cojo cjuatacun nuju xi macjain nuju Jesucristu.

² Quihndë ne, féhya nuju ngayun Evodia cojo ngayun Síntique nihñu favor ne, ngu tangun ni catama cjuatacun nuju cojo xingun, sacuatjin meje rë xi nihña ngayejen ni xi tséhë me xi matitjun tsajan ngayaan. ³ Hacuaha ngaye xi ndaja compañeru naha ngaye ne, nihñi favor ne, tisecuee rë na xi cuacun vë, xi cuijnetaha si xi tisahmi na cojo xicjin na. Ta na xi cuacun vë ne, jercu casahmi na cojo ná xa, hya xi catihin camachaya rë xuta cjua ndajiyihi tséhë Jesucristu. Hacuaha cojo cha Clemente cojo sa yahnga compañeru naha ne, caviseecoo ná me. Xuta xi cuacun vë ne, hatuxa sacú rë me cjuahñu xatsë ta, tséhë xi ha tséhë Nina me.

⁴ Ndaja catama rë xahasen nuju ngatsë rë xi tjin tangun cjuatacun nuju cojo me xi matitjun tsajan. Cuya cuichjá nga cojo nuju, ndaja catama rë xahasen nuju. ⁵ Meje rë xi cuma tsejen xi tjin nuju cjuandaja cojo yëjë ni xuta ta, tséhë xi me xi matitjun tsajan ne, ha tacun xati xi cuinduva nga me. ⁶ Ngajñi rë yëjë ni cjuacjintacun nuju ne, xi camaciintacun. Tinújun cojo Nina hacuaha chjahyun rë me cjuandaja rë me. Hacuaha tuhun nacuechji rë me. Cuatjin meje rë xi tuhun cumachaya rë Nina tu mé ni xi meje nuju. ⁷ Ngajan xi cjuajeya xi sua nuju Nina ne, vëhë cuetjo nuju, cojo sa xi cumaciintacun, xi tjin tangun cjuatacun nuju cojo Jesucristu. Sacuaha cjuajeya xi sua nuju Nina jan ne, hisca vijniircun ndandaja ta, tséhë xi jemu tu ndaja camahani cjuajeya vëhë.

Xcusun ndaja xi meje rë xi cuinchan cjuatacun naja

⁸ Quihndë tsan ne, nihñu tangun cjuatacun nuju cojo cjuatacun xi cuicun vihi: cjuatacun xi cjuaquixi, cjuatacun xi chjaharcun rë, cjuatacun xi ndatjin, cjuatacun xi tyjahi, cjuatacun xi ndacun, cjuatacun xi chuya rë xuta ndaja. Cuma cuinújan ne, tu jarë ni cjuatacun xi jemu ndaja o sa xi hatuxa tjin chuva rë xi chjaharcun rë ne, vëhë nihñu tangun cjuatacun nuju cojo. ⁹ Hacuaha nihñu yëjë ni hacutjin xi camá nuju hya xi cavicyá nuju hacutjin meje rë xi nihñu. Peru hacuiin suvá cjua xi cachjá cojo nuju ta hacuaha cojo xcusun xi casahme ngajñi nuju ne, cojo vëhë meje rë xi nihñu. Hane cuatjin ne, Nina xi sua naja cjuajeya ne, tacun me cojo nuju.

Cjuatjo tséhë xuta nandy Filipo xi cuma rë Pablo

¹⁰ Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindë cavuyun caningatuhuntacun nga ngatsë naha. Hacuiin hatuxa canichayun ná ta, cuenda xi casacuinyiin nuju hacutjin cuma xi cuisecun ná hisca quihndë. ¹¹ Hacuiin tichjá cojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuva rë hacutjin cumangucacún cojo tu mé ni cjuacjintacun xi nduva. ¹² Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsimii sahmi rë ta ngahan ne, ha catuxaha cjuatacun naha xi cumangucacún cojo tu mé ni cjuacjintacun xi nduva. ¹³ Scaa ná cojo tu mé ni cjuacjintacun ta, tséhë xi Jesucristu ne, tisua ná me ngahñu. ¹⁴ Peru, jemu ndaja canihñu xi caviseecun ná ngajñi rë cjuañihi xi tivátju tijima.

¹⁵ Ngayun xuta nandya Filipo ne, ha hyun ta hya xi tjutjun casuá camachaya nuju cjua ndajyihi tséhë Jesucristu hacuaha sehe cavétju tséhë distritu Macedonia ne, hisca ngu yungun cavisequaain ná cojo tujún hya. Suvun tutu xi cavisecun ná. ¹⁶ Hacuaha hya xi tejñataha ngajan nandya Tesalónica ne, ngu jo ndiya ne, caningatjun tujún tséhë cjuachaja xi tjin ná. ¹⁷ Hacuiin jercu meje ná cjuandaja xi ningatjun ná ta xi hitsë sa meje ná ne, xi sacu nuju cjuandaja rë Nina ngatsë rë cjuandaja xi nihñu. ¹⁸ Ha cafahántsa yëjë ni xi caningatjun ná cojo Epafrido. Vëhë xi ha tjin ná yëjë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndajajne, xi vejñaa xcun ngasunscun. Hane Nina ne, fahatsja me cuatjo jan ta jemu chuya rë me tséhë. ¹⁹ Hacuaha Nina naja ne, tséhë cjuanchina ndajyihi xi tjin rë me ne, hatuxa sua nuju me tu mé ni xi machaja nuju, ngayujun ni xi tjin tangun cjuatacun nuju cojo Jesucristu. ²⁰ Quihndë ne, catichja xuta ta Nina Nahmi naja ne, jercu ndaja camahani me yëjë ni nu yëjë ni nixtin. Cuatjin jain.

Cjua xi vijnetaha

²¹ Yëjë ni xuta xi tjin tangun cjuatacun rë cojo Jesucristu ndyá ne, tuhun rë me nina na. Hacuaha xingueen xi siu cojo ná nguehe ne, tsingatju me ngu nina nuju. ²² Hacuaha cojo sa yëjë me xi tséhë Nina, hisca cojo me xi siu ngajan ndava me xi matitjun camahani tséhë xuta Roma ne, tsingatju me nina nuju.

²³ Cjuandaja rë Jesucristu, me xi matitjun tsajan ne, catejña cojo nuju.

Carta xi catsingatju San Pablo xi cafahatsja xuta ladu rë Jesucristu ngajan nandya Colosas

¹ Ngahan Pablo ne, apóstol tséhë Jesucristu ngahan ta, tséhë xi cuatjin camameje rë Nina. Ngahan cojo Timoteo xingueen ne, ² ningátjin nuju carta vihi ngayun xuta nandya Colosas, ngayujun ni xuta ladu rë Nina xi jercu ndaja titsangunndujun cojo ndiya rë me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

Sua Pablo nacuechji rë Nina ngatsë rë xuta nandya Colosas

³ Jercu tihín nacuechji rë Nina Nahmi rë Nai naja Jesucristu yasen yasen ni, hya xi nihñi oración ngatsë nuju. ⁴ Tihín nacuechji rë Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yéjë ni xuta ladu rë Nina. ⁵ Cuatjin tinihñu ta, jercu vetuhun tacún cjuandaja xi Nina tacunxin rë me ngajan ngahnga xi cuma nuju ngayujun ni. Cavetsuhun cavetuhun tacún cuatjin, hatsëë hya xi canuhyun cjuandajyihu xi cjuaquixi, xi chja tséhë Jesucristu. ⁶ Cjuandajyihu jan ne, casacu camachaya nuju sacuatjin sa rë yahnga xuta tséhë jercu cjín sa cahndé. Hane xi macjain rë xuta cjuandajyihu jan ne, jercu tisahmi me cjuandaja, hacuaha jercu cjín sa xuta tijimacjain rë me. Cuanitjin tivatju ngajñi nuju ngayujun ni, hisca hya xi camachaya nuju cjua jan hacuaha ndaja cavijercun xi Nina ne, jercu sahmi me cjuandaja. ⁷ Cuatjin cachja cojo nuju Epafras, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vëhë ne, jercu ndaja cjuinduju me tifahacuenda me tséhë xa jan cojo sa xi tsujun ndaja. ⁸ Hacuaha casua me camachaya niji xi ngayujun ni ne, tjin nuju cjuahmutacun cojo yéjë ni xuta ladu rë Nina, cojo cjuahmutacun xi sua nuju Hasen rë Nina.

⁹ Ngatsë rë xi cuatjin camachaya niji tséhë cjua xi chja tsujun ngayujun ni ne, vëhë xi tinihñi oración tsujun ngayujun ni yasen yasen ni hisca hya xi camachaya niji. Tichjahyin rë Nina xi cuijercun yéjë hacutjin xi meje rë Nina xi nihñu. Tichjahyin rë me xi ndaja tuxaha cjuatacun nuju hacuaha cuijercun cojo cjuatacun xi sua nuju Hasen rë Nina. ¹⁰ Cuatjin tichjahyin rë me, cojo sa xi ngayujun ni ne, cuangunndujun cojo ngasunhndë nuju sacuatjin meje rë xi sahmi xuta ladu rë Nai naja, cojo sa xi chuya rë me tséhë yéjë ni xi nihñu. Cuatjin tichjahyin rë me, cojo sa xi ngayujun ni ne, nihñu yéjë ni xcusun cjuandaja, hacuaha ndaja sa chun Nina ngu nixtin ngu nixtin. ¹¹ Nina catisua nuju me ndaja cjín ngahñu, tucu ngahñu xi tjin rë me, cojo sa xi yéjë ni nixtin scaa nuju cojo yéjë ni xcusun xi vatjun má hacuaha nijyun tacún cojo xuta, táha tijimasua nuju. ¹² Cuatjin tichjahyin rë Nina, cojo sa xi ngayujun ni ne, tuhun nacuechji rë Nahmi naja ngatsë rë xi me vëhë ne, cavéhëchjine nuju me cojo sa xi cojo ngayun satë nuju cjuandaja xi sua me xuta ladu rë me ngajan ngahnga. ¹³ Nina Nahmi naja ne, cavaxëtje naja me tséhë xitsehen xi matitjun tséhë yéjë ni cjuatsehen, hane cavejña naja me tsja Quihndi rë me xi jercu hmucacun me. ¹⁴ Cojo xcusun xi casahmi Quihndi rë me jan ne, Nina ne, cavechjite me yéjë ni jyé xi quitjen xuta, hane catsinchataha me ngayaan.

Sahmi Nina xi cuya cumandaja ngayaan cojo rë me

¹⁵ Quihndi rë me jan ne, tsingacun naja hacutjin xcusun rë Nina cojo Hasen rë me, handasa maji matsejen Nina. Quihndi rë me jan ne, hatuxa matitjun me tséhë yéjë ni xi casahmi Nina ta, ¹⁶ tséhë xi cojo me ne, Nina ne, casahmi me yéjë ni xi tjin ngasunhndë xi tsejen, cojo yéjë ni xi tjin ngahnga xi matsijin, sacuaha yéjë ni xcusun hasen xi matitjun sa hasen ndaja sa hasen tsehen. Cojo me vëhë ne, casahmi Nina yéjë ni, cojo sa xi yéjë ni xi cuacun jan ne, sahmi jyé sahmi hnga rë me. ¹⁷ Quihndi rë me jan ne, hatuxa matitjun me tséhë yéjë ni xi casahmi Nina ta, tséhë xi me vëhë xi tjun sa tacun me xi cuma rë yéjë ni hacuaha ngatsë rë me vëhë ne, siuchihin yéjë ni. ¹⁸ Me vëhë ne, vitexa me xuta ladu rë

Nina sacuatjin rë rcuun xi vitexa rë yojo naja. Hacuaha sua me cjuahñu xatsë xuta ladu rë Nina ta, tsëhë xi me vëhë tjun tjun me cavuya me cjuahñu tsëhë ngajñi rë yëjë nima, cojo sa xi cumatitjun camahani me.¹⁹ Quihndi rë Nina jan ne, tsingacun naja hacutjin xcusun rë Nina cojo Hasen rë me ta, tsëhë xi cachuya rë Nina xi cuisehentë me cuejñacahndë suvá me cahntsua xahasen rë Quihndi rë me.²⁰ Nina Nahmi naja ne, cavejña naja me tsja Quihndi rë me, tsëhë xi cavejñangucacun me xi cojo Quihndi rë me ne, tsicuya me ladu rë me ngayëjë ngarca ni, sa ngahnga sa ngasunhndë, cojo sa xi cumajyë cumahnga Quihndi rë me jan. Hane ngatsë rë jni rë Quihndi rë me xi cavanga xcun cru ne, hindë tsajin mé cjuachan.

²¹ Ngayujun ni ne, handasa hatsëe ne, jemu cjin nechun tsëhë Nina hacuaha condra nuju me ngatsë rë xi jemu tsehen cjuatacun nuju hacuaha jemu tsehen xcusun xi canihñu,²² pero quihndë ne, casahmi Nina xi cavuya nga camandaja yun cojo rë me. Cuatjin casahmi me cojo cjuaveya tsëhë yojo rë Quihndi rë me, cojo sa xi ngayujun ni ne, tsëhë me yun hacuaha tsajin camahani jyé nuju, hya xi squindaya nuju me xi cuangun xcun me.²³ Cuatjin cuma sa xi cjuenduju xi siu cahndë cjuatacun nuju xi macjain nuju cjuandajyihí xi chja tsëhë Cristu, hacuaha cjuenduju xi vetuhun tacún cjuandajyihí xi canuhyun jan. Hane cjuandajyihí jan ne, casacu camachaya rë xuta tsëhë jercu cjin cahndë. Hane ngahan Pablo ne, casatëxa ná xi suá machaya rë xuta cjuandajyihí jan.

Casuaxa Nina Pablo xi cuichjatë me cjuatahahma ndajyihí xi chja tsëhë Jesucristu

²⁴ Quihndë ne, ma sua ná xi tivátju cjuañihi cojo sa xi tsujun ndaja. Tisahmechehen tsëhë yëjë ni cjuañihi xi cachja Cristu xi cuátu cuma cojo yojo nahá, cojo sa xi tsëhë xuta ladu rë me ndaja, hane ngayejen ni xi ladu rë me ne, sacuaha yojo rë me ngayaan.²⁵ Ngahan ne, camá ngahan ngu xuta xi visécoo rë xuta ladu rë Cristu, tsëhë xi Nina casuaxa ná me xi cuisécoo nuju ngayun xutaxín, cojo sa xi suá cumachaya nuju tsëhë yëjë ni cjuandajyihí xi cachja me.²⁶ Cjuandajyihí jan xi cachja me ne, hacui cjuatahahma. Cjua vëhë ne, cavetjo Nina tsëhë yëjë ni xuta xi caviyuju me yëjë ni nixtin xi cavatju, pero quihndë ne, casua me camachaya rë yëjë ni xuta ladu rë me.²⁷ Nina ne, cavejñangucacun me xi sua me cumachaya rë xuta xi cuacun jan xi cjuatahahma vihi ne, chja xi jercu tsinchacuntihin Nina xutaxín jan. Cuma cuinújan ne, Cristu ne, cuejñacahndë me cahntsua xahasen nuju ngayun xutaxín. Hane cuetuhun tacún xi sehe cuaxëndaja me yun.²⁸ Ngayin ne, tihín cumachaya rë xuta tsëhë cjua xi chja tsëhë Cristu. Yëjë ni xcusun xuta ne, viyijin me cuidadu hacuaha vicuyin rë me cojo yëjë ni cjuahsen xi tjin niji. Cuatjin nihñi, cojo sa xi yëjë ni xuta xi cuacun jan ne, tyjahi camahani me xi tjin tangun cjuatacun rë me cojo Cristu, hya xi ningacuin me xcun Nina.²⁹ Ngatsë rë vëhë ne, ngahan ne, hacuaha hñu tisahme xa, hacuaha tisahme ngahñu cojo yëjë ni ngahñu xi tisua ná Cristu.

2

¹ Hacuaha meje ná xi cumachaya nuju xi jercu tisahme ngahñu ngatsë nuju cojo ngatsë rë me xi siu ngajan nandya Laodicea cojo tsëhë yëjë sa me xi cjëë scuëë ná.² Cuatjin sahme, cojo sa xi ngayujun ni ne, sacú hñu rë xahasen nuju ngatsë rë xi tjin tangun cjuatacun nuju cojo xingun cojo yëjë ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahahma ndajyihí rë Nina, xi chja tsëhë Cristu.³ Cristu ne, suvá ni me vëhë cuma sua naja me cjuatacun xi jercu ndaja cuijnercun yëjë ni cjuatahahma ndajyihí jan.⁴ Cuitjin tichjá cojo nuju, cojo sa xi tsajin yo cuma cuindacha nuju cojo cjua xi matanguaain cojo cjua xi cjuaquixi, handasa jercu ndaja nuhya rë, xi má nuju.⁵ Handasa tsajin tejñataha cojo nuju ne, pero jercu vityangë cacún tsujun ngayujun ni. Hacuaha ma sua ná, tsëhë xi hvë xi ngayujun ni ne, tjin tangun cjuatacun nuju cojo xingun hacuaha jercu ndaja mangu tacún cojo Cristu.

Vitexa Pablo xi nihña sacuatjin meje rë xi sahmi xuta ladu rë Jesucristu

⁶ Véhë xi, sacuatjin xi camacjain nuju cjuandajyhi xi chja tséhë Jesucristu, me xi Nai naja ne, cuatjin tángunndujun cojo ngasunhndë nuju xi tjin tangun cjuatacun nuju cojo rë me. ⁷ Catjinduju xi ndaja macjain nuju cjua jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndé cjuatacun nuju cojo cjuachacun xi macjain naja, sacuatjin cavicuya nuju Epafras. Hacuaha catjinduju xi jercu tuhun nacuechji rë Nina Nahmí naja.

Tsavi cojo ngu cjuachacun xatsë xi vicuya xuta ndacha

⁸ Nechun cuidadu, sá tu yo sahmi xi cuisuhun ladu rë ngatsë rë xi cuindacha nuju cojo ngu cjuachacun xi venguiin chjí rë, tséhë xi cjuachacun jan ne, nduva tséhë xcusun rë xuta ngasunhndë ni, hacuaha tséhë suvá ngasunhndë vihi yéjë ni cjua rë jan, hacuín tséhë Cristu. ⁹ Nihñu cuidadu ta, yéjë xcusun rë Nina ne, tjin Cristu, ta Nina ne, vejñacahndë me yojo rë Cristu, ¹⁰ hacuaha ngayun ne, tsajin mé xi chaja rë hasen nuju, tséhë xi tjin tangun cjuatacun nuju cojo Cristu, me xi matitjun camahani tséhë yéjë ni hasen xi hacuaha vitexa, sa hasen ndaja sa hasen tsehen. ¹¹ Ngatsë rë xi tjin tangun cjuatacun nuju ngayujun ni cojo rë me ne, ha sacuaha xi me véhë cavatë me chuxin nuju. Hane véhë ne, hacuín vijne xi cati Jain chuxin nuju sacuaha sahmi xuta cojo quihndi langa ta xi vijne jan ne, yéjë ni cjuatsehen xi tjin naja cojo yojo naja ne, cavaxëxin camahani Cristu. ¹² Hya xi caxtenda ngayun ne, ha sacuaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rë me, ngatsë rë xi camangu tacún cojo ngahñu rë Nina, me xi catsicuya rë Cristu cjuahñu tséhë ngajni rë yéjë nima. ¹³ Hatsëe ne, ha sacuaha xi nima má ngayun ngatsë rë jyé nuju hacuaha ngatsë rë yéjë cjuatsehen xi tjin nuju cojo yojo nuju. Peru quihndë ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yéjë jyé naja. ¹⁴ Cuma cuinújan ne, sacuaha xi cavujnu Nina cjua xi hincha xcul xujun xi tsicaniji jyé naja. Sacuaha xi catsicjéya me xujun jan, hya xi cahme Cristu xcul cru. ¹⁵ Nina ne, cafahaxin me xa xi siutahá yéjë ni hasen ndaja cojo hasen tsehen xi cavitexa, hane catsingacuntë me xi cuatjin casahmi me. Cacaa rë me cavinchangahma me hasen xi cuacun jan, cojo yéjë ni xi casahmi Cristu.

¹⁶ Xicachjasuun tséhë xuta xi tsicanijiyé me ngayun ngatsë rë xcusun xi chinu o xi hyun, o ngatsë rë suhi xi nihñu, há chuva nu, há chuva sá, o há chuva totje. ¹⁷ Xicachasuun ta yéjë ni xcusun xi cuacun jan ne, sacuaha tjahnguen ni rë yéjë ni cjuandaja xi casua nuju Cristu. ¹⁸ Xicachasuun tséhë xuta xi cuatjin tsicanijiyé nuju me xi chja me xi hatuxa meje rë xi ninguijnu yojo nuju hacuaha chjuhunrcun ángel. Xuta xi cuacun jan ne, chja me xi chja xu nijñá cojo rë me hacuaha sahmi yehe me yojo rë me suvá me ngatsë rë cjuatacun tsehen xi vitexa rë me. ¹⁹ Cuatjin sahmi me ta, vicuyaain me cjuachacun cjuaquixi tséhë Cristu, me xi sahmi xi cumatangun cjuatacun rë yéjë ni xuta ladu rë Nina cojo xicjin hacuaha sahmi xi cuijin xcul xi cjuenduju me cojo ndiya rë Nina sacuatjin xi meje rë Nina.

²⁰⁻²¹ Ngayujun ni ne, ngatsë rë xi tjin tangun cjuatacun nuju cojo Cristu, me xi cahme ne, véhë xi camandaya ngayun tséhë xcusun rë xuta ngasunhndë, sacuaha mandaya ngu xuta tséhë yéjë ni cjuandya rë me hya xi hme me. Véhë xi mijí rë xi cuanguntjengun xcul xuta xi chja xi cumaji chjahan vihi, cumaji xinëë véhë, cumaji nicojon xingu vë, sacuaha xi tuxa sahmi nguyjé xi cuinuhun jan. ²² Mijí rë xi cuanguntjengun xcul xuta xi cuacun jan ta, tséhë xi xichiné cojo xi hyun ne, hatuxa fë hya xi nicojo rë. Hacuaha xcul xuta xi cuacun jan ne, nduva tséhë cjua xi vitexa xuta ngasunhndë ni, nduva tséhë cjua xi vicuya xuta ngasunhndë ni. ²³ Hacuaha xcul xuta xi cuacun jan ne, sahmi xi xuta ne, sahmi me yéjë ni xi meje rë cjuatacun tsehen xi vitexa rë me, handasa tsejen sacuaha xcul xuta, ngatsë rë xi vitexa naja xi chjahanrcun nina sacuatjin meje rë xuta ngasunhndë ni hacuaha xi ninguijne yojo naja hacuaha xi chjahanñehe cojo yojo naja. Peru xcul xuta xi cuacun jan ne, vitexaain camahani xi nihñu cjuandaja.

Catamameje naja yéjë ni xi tséhë ngahnga

¹ Ngayujun ni ne, casua nuju Nina cjuahñu xatsë, ha sacuaha xi catsicuya nuju me cjuahñu tangun cojo Cristu. Véhë xi yéjë ni hora ne, catamameje nuju yéjë ni xi tséhë ngahnga, hiscan tacun Cristu, me xi Nina casahmi jyé casahmi hnga rë xi cuitexa me ngayéjë ni. ² Catamameje nuju yéjë ni xi tséhë ngahnga, hacuiin cjuatsehen xi tséhë ngasunhndë ta, ³ tséhë xi ngayun ne, ha cavyujunxun xcusun xi canihñu hatsëë, sacuatjin rë nima xi ha quihndë tsajin mé cuma sahmi sacuaha hya xi tacun sa xcun cjuahñu. Hacuaha quihndë ne, tjin nuju cjuahñu xatsë tangun cojo Cristu, me xi tacun xcun Nina. Hane xcusun véhë ne, hatuxa matsijin. ⁴ Hya xi Nina tsingacuntë me Cristu, me xi sua nuju cjuahñu xatsë ne, hya tsingacuntë nuju me hacuaha sahmi jyé sahmi hnga nuju me tangun cojo rë Cristu jan.

Xcusun changá cojo xcusun xatsë

⁵ Véhë xi xicanihñuu cjuatsehen, sacuatjin rë nima xi maji sahmi cjuatsehen. Xicanihñuu cjuatsehen sacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vë, cojo yéjë sa xcusun cjuatsehen. Mijí rë xi jercu nihmu tacún cjuanchina ta, sa xi cuatjin nihñu ne, hitsë sa nihmu tacún cjuanchina jan xi cuma rë Nina. ⁶ Nina ne, sahmi me castigu yéjë ni xuta xi vihndiin tséhë me, xi cuatjin sahmi. ⁷ Hacuaha ngayujun ni ne, cuatjin canihñu hatsëë, hya xi tivinuhyuun tséhë Nina. ⁸ Peru quihndë ne, mijí rë xi nihñu yéjë ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin chocho cuinújun tséhë xingun, ⁹ hacuiin cuinújun cjuandacha cojo xingun. Xicanihñuu cuatjin ta, tséhë xi ha cavyujunxun cjuatacun changá cojo yéjë ni xcusun xi canihñu xi cavitexa nuju cjuatacun jan, ¹⁰ hane ha cavisehen nuju cjuatacun xatsë xi Nina tisahmi me xi cuijin xcun xi cuma sacuaha cjuatacun rë suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me. ¹¹ Ngajan xi cuendaain rë ¿há xutaxín o há xuta tjé rë Israel má ngayaan?, ¿há cati chuxin naja o há catiin rë?, ¿há xuta ngu nangui ngayaan?, ¿há tichjá cjuatacun naja?, ¿há xuta caxteña ngayaan, o há xuta ndaya tjin ngayaan? ta Cristu ni ne, me véhë xi jercu tu vengui chjí camahani rë me.

¹² Ngayujun ni ne, tséhë xi cavaxijin nuju Nina, hacuaha cavyujuxin nuju me, hacuaha hmu cacun nuju me ne, véhë xi meje rë xi tjin nuju cjuayumatacun cojo xingun, meje rë xi tjin nuju cjuandaja cojo xingun, meje rë xi tjin nuju cjuajeya cojo xingun, meje rë xi yehe tacún cojo xingun. ¹³ Hacuaha meje rë xi scaa nuju cojo xingun hacuaha ninchatuhun xingun, sa xi tjin mé tséhë xi cuinchunjyun xingun. Sacuatjin rë Nai naja xi catsinchataha nuju me ne, cuanitjin ni nuju ngayujun ni cojo xingun. ¹⁴ Peru xi jercu vengui chjí sa rë xi cuma rë yéjë ni cjuajeya cojo nuju jan ne, meje rë xi tjin nuju cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu ngayun.

¹⁵ Cjuajeya xi casua nuju Cristu ne, catitexa rë cjuatacun nuju ta, tséhë xi Nina ne, cavaxijin nuju me cojo sa xi cuinechun cojo cjuajeya ngajñi nuju cojo xingun. Hane meje rë xi yasen yasen ni ne, tuhun nacuechji rë Nina. ¹⁶ Cjuandajiyihi xi chja tséhë Cristu ne, catiyujucahndé cahntsua xahasen nuju. Ticuyun xingun hacuaha tiyujun xingun cuidadu xingu xingu ngayun cojo yéjë cjuahassen xi sua nuju Nina. Sún nguñaja tacún tséhë Nina, sacuaha salmo cojo himno cojo yéjë sa xcusun xi sen xi tséhë Nina, sacuaha ngu nacuechji rë me xi tuhun.

¹⁷ Tu mé ni xi cuinújun o xi nihñu ne, catama sacuatjin meje rë xi sahmi xuta xi tjin tangun cjuatacun rë me cojo Nai naja Jesús. Hacuaha tuhun nacuechji rë Nina Nahmi naja, xi nihñu oración cojo Jesús.

Chja Pablo hacutjin meje rë xi nihña cojo xingueen cahntsua ndya naja

¹⁸ Ngayujun ni yachjin ne, tinuhyun tséhë xihin nuju ta, tséhë xi cuatjin ndatjin xi cuma ta, tjin tangun cjuatacun nuju cojo Nai naja. ¹⁹ Ngayujun ni xihin ne, hacuaha meje rë xi nihmu tacún chjuun nuju, hacuiin chocho xcusun nuju cojo rë me.

²⁰ Ngayujun ni xi siucuaha xutacha nuju ne, tinuhyun tséhë me tséhë yëjë ni xi cuichja me cojo nuju ta, hya xi cuatjin nihñu ngayujun ni xi tjin tangun cjuatacun nuju cojo Nai naja Jesús ne, jercu chuya rë Nina. ²¹ Ngayujun ni xi má yun nahmi ne, xicaningatjuntuun xi cuinújuntuhun rë quihndi nuju, ta sá tu sahmi chuvacacun.

²² Ngayujun ni xi má yun mosu hndixahan ne, tinuhyun tséhë xuta xi má me nai nuju tséhë yëjë ni xi cuichja me cojo nuju, hacuiin suvá hya xi tivutsejen me ngayun, sacuatjin sahmi yahnga xuta xi meje cuaxéndaja suvá me yojo rë me xcun xuta, ta tinuhyun tséhë me cojo ngu xahasen tyjahi ngatsë rë xi chjuhunrcun Nai naja. ²³ Tu mé ni xcusun xi nihñu ne, nihñu nguñaja tacún, sacuaha xi tinihñu tséhë Nai naja, hacuiin tséhë xuta ni. ²⁴ Cuatjin nihñu, tséhë xi ha hyun ta Cristu Nai naja ne, me vëhë cuechji nuju me ta hacui me xi tivisecun rë. ²⁵ Peru sa xi tjin ngajñi nuju xi hatuxa chocho tisahmi ne, Nina sahmi rë me castigu tucu xcusun tsehen xi casahmi me, hacuaha Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë me.

4

¹ Ngayujun ni xi má yun nai tséhë mosu hndixahan ne, ndaja nihñu cojo mosu hndixahan xi siu ntsun, sacuatjin mameje rë ta, tséhë xi ha hyun xi hacuaha cojo ngayun ne, tjin nai nuju xi tacun ngajan ngahnga.

Vitexa Pablo xi nihña oración hacuaha cuisiajme cjuandaja

² Ngayujun ni ne, nihñu oración yasen yasen ni. Mijí rë xi cuma tséhë tacún. Tuhun nacuechji rë Nina. ³ Hacuaha nihñu oración ngatsë niji. Chjahyun rë Nina xi tuxaha ndiya xi cuisiajmi cojo xuta, cojo sa xi cuma tihín cumachaya rë me tséhë cjuatahahma ndajyihí xi chja tséhë Cristu. Hane ngatsë rë cjuandajyihí jan ne, tejñaya ndavaya. ⁴ Nihñu oración ngatsë naha, cojo sa xi ngahan ne, cuichjátë cjuatahahma jan, sacuatjin meje rë xi cuichjá.

⁵ Hacuaha yëjë ni xuta xi hacuiin ladu rë Nai naja me ne, meje rë xi ndaja nihñu cojo rë me cojo yëjë ni cjuahasen xi tjin nuju, yëjë ni hora xi cuma. ⁶ Hacuaha yëjë ni cjuavisiajmi nuju ne, meje rë xi cojo cjuandaja cuinújun yëjë ni hora. Xi cuatjin nihñu ne, sacú cumachaya nuju hacutjin chjayunngun cju tséhë xingu xingu xuta xi cuacun jan.

Tsinguijnetaha Pablo cju rë me

⁷ Yëjë ni xi tivátju tijima ne, Tíquico ne, sua me cumachaya nuju. Me vëhë ne, ngu xuta ladu rë Jesús xi jercu vinga ná, hacuaha jercu ndaja cjuinduju me tivisecoo me ngahan xi tangun fahacuenda me cojo ná xa xi vitexa Cristu. ⁸ Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyétacun. ⁹ Hane cojo me vëhë ne, titsingátju nuju cha Onésimo, cha nangui nuju. Cha vëhë ne, cha ladu rë Nina xi jercu ndaja cjuinduju cha cojo ndiya rë me, hacuaha jercu vinga ná cha. Catsijo me xi cuacun vë ne, sua me cumachaya nuju tséhë yëjë ni xi cavatju nguehe camá.

¹⁰ Aristarco ne, me xi jiyatangun cojo ná nguehe ndavaya ne, tsingatju me nina nuju. Hacuanitjin ni Marcos, xicjin Bernabé. Ha cachjá cojo nuju tséhë Marcos jan. Vëhë xi sa xi cjuhe me nangui nuju ne, chjuhunntsun me cojo cjuandaja. ¹¹ Jesús, me xi hacuaha hmí rë Justo ne, hacuaha tsingatju me nina nuju. Ngajñi rë yëjë ni xuta tjé rë Israel ne, jyan tu tu ni me vëhë xi tisahmitangun cojo ná xa, cojo sa xi xuta ne, tsingatihin me xi Nina cuitexa rë me. Jyan me xi cuacun jan ne, casua ná me cjuajyétacun. ¹² Hacuaha Epafras, me xi tangun nangui nuju cojo hacuaha fahacuenda tséhë xa xi vitexa Cristu ne, tsingatju me nina nuju. Me vëhë ne, jercu sahmi me oración ngatsë nuju yasen yasen ni, cojo sa xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yëjë ni hacutjin xi meje rë Nina. ¹³ Ngahan ne, cuichjá cojo nuju ta

Epafras jan ne, jercu vityanguicacun me tsujun cojo xuta Laodicea cojo xuta Hierápolis.
¹⁴ Hacuaha tsingatju nina nuju Demas cojo Lucas, me xi doctor xi jercu vinga ná.

¹⁵ Tuhun rë ngu nina yëjë ni xuta ladu rë Nina ngajan nandya Laodicea. Hacuaha tuhun rë Ninfa ngu nina cojo yëjë sa me xi matangun me ndava na. ¹⁶ Hane xi cjuë chutahaya të rë xujun vi ngajñi nuju ne, nihñu xi hacuaha catichutahaya të rë ngajñi rë xuta ladu rë Nina ngajan nandya Laodicea. Hacuaha xujun xi catsingátju tséhë xuta Laodicea ne, hacuaha chutahayun të ngajñi nuju. ¹⁷ Hane tinújun cojo Arquipo cjuva vihi: “Catjiniya tacún xi nihñuchuhun xa xi casatëxa nuju, xi tjin tangun cjuatacun nuju cojo Nai naja.” nina vi.

¹⁸ Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.

Cjua xi titjun catsihindu San Pablo xi camá rë xuta nandya Tesalónica

¹ Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi matangun ngayun tséhë xi macjain nuju Nina Nahmi naja cojo Nai naja Jesucristu, ngajan nandya Tesalónica. Catisua nuju Nina cjuandaja cjuajeya.

Macjain ndaja rë xuta nandya Tesalónica

² Jercu tihin nacuechji rë Nina Nahmi naja ngatsë nuju ngayujun ni, hacuaha hatuxa veyinnanguin nuju tu ya ni hya xi nihñi oración. ³ Hya ninguitsjin hacutjin jercu nihñu xa tséhë xi ndaja macjain nuju, hacutjin jercu nihñu cjuandaja tséhë xi hmu tacún Nina cojo xuta yumacujun, hacuaha hacutjin jercu ndaja ticaa nuju xi tinechunyun rë Nai naja Jesucristu. ⁴ Ngayun ne, jemu hmucacun nuju Nina, hacuaha hyin xi cavaxijin nuju me.

⁵ Cuatjin ta xi catihin camachaya nuju cjua rë Nina ne, hacuiin suvá cjua ta hacuaha Hasen rë Nina ne, casua niji ngahñu xi cuatjin canújin cojo nuju cjua jan xi hatuxa cjuaquixi. Ngayun ne, ha hyun hacutjin xcusun niji ngajñi nuju, xi ndajyihi xi cuma nuju.

⁶ Ngayun ne, sacuaha canihñi hacuaha sacuaha casahmi Nai naja ne, ha cuanitjin ni canihñú xi cachjuhunntsun cjua jan cojo cjuasua xi casua nuju Hasen rë Nina, handasa jemu choho cavatjun camá. ⁷ Cuatjin camá xi ngayéjë ni me xi macjain rë Nina ngajan ladu tséhë Macedonia cojo Acaya ne, hisca casahmi me sacuatjin canihñú ngayun. ⁸ Hisca hya xi titjun ngayun cachjuhunntsun cjua rë Nai naja ne, sehe jercu cjin quiji cjua jan, Peru hacuiin tu ngajan ni Macedonia cojo Acaya ta hisca jingujyë ni. Hacuaha camachaya rë xuta xi jemu ndaja camacjain nuju tséhë Nina. Cuatjin ne, ha quihndë tsajin sa mé xi cuinújin ta ⁹ suvá xuta ne, chja me hacutjin cojo cjuandaja cachjuhunntsun niji hacuaha hacutjin caviyujunxun nina xi macjain nuju titjun, hane camacjain nuju ngu Nina xi cjuaquixi xi quicun. ¹⁰ Hacuaha chja me hacutjin tinechunyun rë Jesús, Quihndi rë Nina, xi cuya me tséhë ngahnga. Jesús jan ne, me vëhë xi catsicuya Nina cjuahñu rë me xi cavaxë Nina me ngajñi rë nima, hacuaha me vëhë ni xi cuaxëtje naja me tséhë castigu xi nduva.

2

Xa xi casahmi Pablo ngajan nandya Tesalónica

¹ Ngayun ne, ha hyun ta xi catsanguin tjenguin nuju ne, hacuiin tu mahya ta ² handasa jemu choho cavatjin camá ngajan nandya Filipos sacuatjin xi ha hyun, Peru camacjain tacuin xi canújin cojo nuju cjua rë Nina ta, tséhë xi Nina jan ne, cavisecoo niji me, handasa jemu camacjan rë yahnga xuta. ³ Hacuaha xi nújin cojo nuju ne, hatuxa cojo cjuaquixi cojo cjuandaja. Hacuiin vindachin. ⁴ Nina ne, me vëhë xi cafahachuva niji me, hane cachuya rë me tsijin, hacuaha casua me ngayin xa xi cuinújin cjua rë me cojo xuta. Vëhë xi cuatjin nújin. Hacuiin xi xuta chuya rë me ta xi Nina chuya rë me, tséhë xi Nina ne, me vëhë xi vëë me cjuatacun niji cojo xahasen niji. ⁵ Ngayun ne, ha hyun ta hacuiin cjuahaxi xi canújin cojo nuju, hacuaha vëë Nina Jain ta hacuiin xi tujún meje niji.

⁶ Hacuiin jemu meje niji xi cjuaharcun niji xuta, sa ngayun sa xuta xi yahnga, handasa tjin niji chuva rë xi chjaharcun niji tséhë xi apóstol rë Cristu ngayin. ⁷ Peru jemu cojo cjuajeya cavinechin ngajñi nuju, sacuaha xi sahmi ngu naa xi sahmi cuidadu me quihndi rë me. ⁸ Jemu cavinga niji ngayun. Hacuaha meje niji xi hacuiin tu suvá cjua rë Nina xi canújin cojo nuju ta hisca mé sa cjuacjintacun ne, cavejñitacuin xi cuisecuin nuju ta, tséhë xi jemu cachuya niji tsujun. ⁹ Ngayun ne, vitsjen rë nuju tséhë xi jemu jyë xa canihñi. Canihñi nixtin nixten, tséhë xi hisca ngu ngayun mijí tihin nuju ngu cjuandaya hya xi canújin cojo nuju cjua rë Nina.

¹⁰ Ngayun xi macjain nuju Nina ne, cahyun, hacuaha hisca Nina ne, vëë jain me ta jemu ndaja cavinechin cojo nuju. Hisca ngu jyé cumaji nicanuju niji. ¹¹ Hacuaha ngayun ne, ha hyun hacutjin canújin cjuandaja cojo nuju jima ngu ngayun, sacuaha chja ngu nahmi cojo quihndi rë me. ¹² Hacuaha catihin nuju cjua xi nchunchujun ni ne, nihñu cjuandaja sacuatjin meje rë ndiya rë Nina ta, Nina ne, me vëhë xi vaxijin me ngayun xi sacú nuju cahndé hiscan xi me vëhë tacun tsja me. Ngajan ne, jemu cahndé ndajyihi camahani.

¹³ Vëhë xi jercu tihin nacuechji rë Nina, tséhë xi hya xi canuhyun cjua rë Nina xi canújin cojo nuju ne, camacjain nuju cjua jan. Hane ndatjin sacuatjin caningatuhuntacun ta cjua rë Nina jain, hacuiin cjua rë ngu xuta. Hacuaha jemu ndajyihi tsujun xi cuatjin macjain nuju cjua jan. ¹⁴ Hacuaha ngayun ne, cavatjun camá sacuaha cavatju me camá titjun, me xi camacjain rë Jesucristu ngajan nangui Judea. Sacuaha xuta nangui rë me ne, jercu casuandya rë me, hacuanitjin ni xuta nangui nuju ne, jercu casuandya nuju me. ¹⁵ Nai naja Jesús ne, catsiquehen xuta nangui Judea me, hacuanitjin catsiquehen xuta jan xutachanga xi cachja cjua rë Nina hatsëë. Hisca cojo ngayin ne, hacuaha casuandya niji me. Chuiyin rë Nina tséhë xuta jan xi cuatjin sahmi me. Hacuaha choho vëë me me xi yahnga sa ta, ¹⁶ tséhë xi mijí sua me cahndé xi cuinújin cjua rë Nina cojo xuta xi hacuiin tséhë nangui Judea ne, catamacjain rë me hacuaha cuetjutje me. Jercu tu jyé camahani jyé rë me xi cuatjin sahmi me. Peru quihndé ne, cavechu nixtin xi cuma me castigu xi cuichja Nina.

Pablo ne, meje cjue scutsejen nga me xuta Tesalónica

¹⁷ Hyá xi ha catsanguinxin ngu jo nixtin tsujun ne, handasa cahyiín nuju, peru hatuxa ninguitsjin nuju cojo xahasen niji. Hacuaha jercu meje cuanguin tjenguin nga nuju.

¹⁸ Cavejñi xi cuanguin. Ngahan Pablo ne, ngu jo ndiya ne, cavejñá xi cjué, peru Satanás ne, casuaain cahndé. ¹⁹⁻²⁰ ¿Mé ngatsë rë xi tivinechinyin rë Jesús? ¿Mé ngatsë rë xi tjin niji cjuasua? ¿Mé ngatsë rë xi ndaja cuichja xuta tsijin? Ngatsë nuju ngayun xi camacjain nuju cjua rë Nina xi canújin cojo nuju. Ngatsë rë vëhë xi hya xi cuinduva Jesús Nai naja ne, jemu ndaja cuichja xuta tsijin hacuaha jercu ndaja cuma niji.

3

¹ Xi camá ne, tséhë xi ha quihndé cacain niji xi meje niji cumachaya niji hacutjin tivatjun tijima ne, vëhë xi camangutacuin xi cuinechin suvin ngajan nandya xi hmí Atenas. ² Hane caningatjin cha Timoteo xingueen xi quiyi tjengui cha ngayun. Cuatjin caningatjin cha ta, tséhë xi mosu rë Nina cha, xi chja cha cjua ndajyihi tséhë Cristu. Cuatjin caningatjin cha, cojo sa xi tsinguixi nuju cha hacuaha cuichja sa cha cjua cojo nuju, cojo sa xi hitsë sa ndaja cumacjain nuju ³ hacuaha hacuiin cuma chuva tacún ngajñi rë cjuacjintacun xi tivatjun tijima. Hane ngayun ne, ha hyun xi hatuxa cuatjin cuatjuun cjuacjintacun xi choho scuëë naja xuta, ⁴ tséhë xi hisca hya xi cavinechin cojo nuju ne, hya catihin camachaya nuju xi hatuxa cuatjun cjuañihi. Xi camá ne, cuatjin camá, sacuatjin xi ha hyun. ⁵ Hane ngahan ne, xi meje xati ná cumachaya ná hacutjin tivatjun tijima, vëhë xi catsingátju cha Timoteo, quiyi cjaha cha cjua sa xi ngayun ne, macjain cuaha nuju. Cuatjin casahme, tséhë xi camacjíncácul ngatsë nuju tséhë xi sa cavindacha nuju naain xi cuinengun ngajñi cjuatsehan ne, xa xi canihñi ne, tu mahya.

⁶ Peru quihndé ne, cavuya cha Timoteo xi quiyi tjengui cha ngayun. Hane ndajyihi cjua yaha cha tsujun, tséhë xi macjain cuaha nuju cjua rë Nina hacuaha hmutacun cuaha yëjë ni xuta. Hacuaha cachja cha cojo niji ta ninguitsjun cuaha niji cojo cjuandaja, hacuaha xi jercu meje chun niji sacuahatjin jercu meje chin nuju. ⁷ Cuatjin xi handasa jemu ndya tivatjin tijima cojo cjuañihi cojo cjuaxti, peru jemu casacu niji cjuetacun, tséhë xi ngayun ne, macjain cuaha nuju. ⁸ Quihndé ne, jercu tu ndaja camahani cuma niji ngayin, sa xi ngayun ne, ha ndatjin siu nuju cjuatcun nuju cojo Nai naja. ⁹ Hacuaha jemu meje tihin nacuechji rë Nina naja tséhë yëjë ni cjuasua xi casua niji me ngatsë nuju. ¹⁰ Nixtin

nixten ne, jemu tichjahyin rë Nina xi sua me cahndé xi tjin ngu hora tjin ngu nixtin sacú xingueen ne, cuicuyin sa nuju cjua rë Nina xi cjéé cumachaya nuju.

¹¹ Meje niji xi Nina Nahmi naja cojo Nai naja Jesús ne, catisecoo niji me xi cuechintihin nuju. ¹² Hacuaha Nai naja meje rë me xi catamajyé sa cjuahmutacun ngajñi nuju cojo xingun hacuaha cojo xuta xi yahnga sa, sacuatjin ngajñi naja cojo nuju. ¹³ Nina Nahmi naja catisahmi me cuatjin, cojo sa xi tsajin jyé nuju xcun me hya xi cuya Nai naja Jesús cojo yéjé ni ángel rë me.

4

Xcusun xi Nina chuya rë me hacutjin xi nihña

¹ Quihndé ne, ha tinihñú hacutjin xi cavicuyin nuju xi meje rë xi cumá, cojo sa xi chuya rë Nina tsujun. Véhë xi jemu nújin cojo nuju tsan ta hitsé sa nihñu cuatjin ta, tséhë xi hatuxa cuatjin meje rë Nai naja Jesús.

² Hane ngayun ne, ha hyun cjua rë Nai naja Jesús xi ha cavicuyin nuju. ³ Cjuatacun xi meje rë Nina ne; xi cuma tyjahi cjuatacun nuju, xi canindesuun cojo chjuun xi xín, xi canindesuun cojo xihin xi xín. ⁴ Meje rë me xi jima ngu ngayun ne, catisacu chjuun nuju, Peru cojo cjuandaja, xi tyjahi cjuatacun nuju. ⁵ Mijí rë xi cojo cjuatsehen, sacuatjin sahmi xuta xi hvíin me Nina. ⁶ Sacuaha cjuacjintacun véhë ne, xi canihñuu xi cuindachun rë xingun ta, tséhë xi Nai naja ne, sahmi me castigu ngayéjé ni cjuatsehen véhë, sacuatjin xi ha canújin cojo nuju. ⁷ Hacuaha hacuiin cajindaya naja Nina xi cjuatsehen nihña ta cajindaya naja me xi fë jyé naja. ⁸ Véhë xi me xi tsitjungui cjuatacun véhë ne, hacuiin xuta tsitjungui me ta Nina xi tisua nuju Hasen rë ne, véhë tsitjungui me.

⁹ Quihndé ne, tsajin sahmi ngu jyé xi nihindin nuju xi nihñu hmutacun xingun ta, tséhë xi suvá Nina ne, ha cavicuya nuju me hacutjin meje rë me xi nihñu hmutacun xingun. ¹⁰ Hacuaha tinihñú Jain hmutacun yéjé ni xuta xi macjain rë Nina ngajan yéjé ni nandya tséhë distritu Macedonia. Peru nújin cojo nuju ta cuatjin ndaja sa nihñu. ¹¹ Hacuaha tejñu tacún xi jyuu nechun, nihñucuendun xi tsujun. Peru nihñu xa, sacuatjin xi ha cavicuyin nuju. ¹² Sa xi cuatjin nihñu ne, hisca cojo xuta xi macjaain rë Nina ne, cjuaharcun nuju me, hacuaha sacú nuju yéjé ni xi cuma meje nuju.

Cuinduva nga Nai naja

¹³ Quihndé ne, meje niji xi cuma chaya nuju hacutjin cuatju nima xi ha cahme, cojo sa xi hacuiin jemu choho cuma nuju sacuatjin rë xuta xi sacuiin rë me ngu cjuetacun, tséhë xi macjaain rë me Nina. ¹⁴ Tséhë xi macjain naja xi cahme Jain Jesús hacuaha cavascaya nga rë me ne, véhë xi hacuaha macjain naja xi Nina ne, tsingascaya rë me nima xi xcun cjuahñu rë camacjain rë me Jesús.

¹⁵ Véhë xi nguehe tihin cumachaya nuju ngu cjua tséhë Nai naja ta jarë ngayaan xi nechan quicun hisca xi cuya Nai naja ne, hacuiin cuma titjun ngayaan tséhë me xi ha cahme. ¹⁶ Tséhë xi suvá Nai naja ne, cuinduvajne me tséhë ngahnga. Cuinuhya rë sacuaha cjua rë ngu me xi vitexa Jain. Cuinuhya rë sacuaha cjua rë ngu ángel xi ma titjun. Cuinuhya rë sacuaha xta rë tyjo xi tséhë Nina. Xi camá ne, nima xi camacjain rë me Cristu ne, tjun tjun me cuascaya rë me, ¹⁷ sehe ngayaan xi nechan quicun ne, cjuaha Nina ngayaan ngajñi rë yuffí, hacuaha cojo nima xi cuacun jan, cumatangun ngayejen ni cojo Nai naja ngajan ngajñi tjo. Sehe yéjé ni hora yéjé ni nixtin cuinechan cojo rë Nai naja. ¹⁸ Véhë xi meje rë xi tinújun cojo xingun cjua vihi ne, sacú nuju cjuetacun.

5

¹ Peru sacuaha nixtin xi cuma cjuacjintacun véhë ne, sáhmii ngujyé nihindin nuju ta,

² tséhë xi ngayun ne, ha hyun ta, hya xi cuya Nai naja ne, jemu cjuercun camahani rë ngayéjé ni xuta, tséhë xi tu ñahñu ni cuinduva me. ³ Hyá xi cuichja xuta xi macjain rë Nina ta: "Jemu ndatjin ta jemu jyuu tjin", Peru hya ne, tu ñahñu ni ne cuatju me ngu cjuañihi, sacuatjin vatju ma ngu chjuun xi tu ñahñu meje tsin quihndi rë me.

Hane cuatjin cuatju me ta hisca ngu me cuatjinhngaain me. ⁴ Xi nguixun cjuehe ngu chëjë ne, jemu cjuercun naja. Peru ngayun ne, hacuiin jñu camaha tsujun xi nihñu cjuatsehen, xi cjuercun nuju hya xi cuechutaha nixtin xi cuya Nai naja ta, ⁵ ngayujun ni ne, nechun sacuaha hasen rë nguinxitin. Ngayaan ne, hacuiin jñu camaha tsajan xi nihña cjuatsehen. ⁶ Cuatjin xi mijí rë xi nechan sacuaha xi titsjuñafen, sacuaha viyuju yahnga xuta xi macjain rë me Jesús ta, meje rë xi nechan quicun, nguñajatacun. ⁷ Hatuxa xcusun naja xi nguixun xi tsjuñafen. Hacuaha xcusun rë xuta chihi ne, nguixun ma chihi me. ⁸ Peru ngayaan ne, tséhë xi nechan sacuaha ndavá rë nguinxitin ne, vëhë xi meje rë xi nechan nguñajatacun. Meje rë xi ndaja cumacjain naja hacuaha nihña hmu tacun xingueen. Xi cuatjin nihña ne, hacuaha vëhë ne, cuisecoo naja ta cuetjo naja Nina. Hacuanitjin ni meje rë xi cuetahan tacun ta cjuaquixi xi cuaxëtje naja Nina. ⁹ Cuatjin meje rë ta, tséhë xi Nina ne, hacuiin cavaxijin me ngayaan xi cuatjun castigu rë me ta, cavaxijin naja me xi cuaxëtje naja me, ngayaan xi macjain naja Nai naja Jesucristu ta, ¹⁰ Jesucristu ne, cahme me ngatsë naja, cojo sa xi tangun cuinechan cojo rë me, sa xi nechancuaan cjuahñu o sa xi nima camá ngayaan. ¹¹ Vëhë xi meje rë xi tinújun cojo xingun cjua vëhë, hane sacu nuju cjuetacun, sacuatjin xi ha tinihñú.

Pablo ne, tisua me cjua xuta xi macjain rë Nina

¹² Ngayun ne, nihña favor ne, chjuhunrcun rë xuta xi cavaxijin Nai naja xi cuma titjun tsujun, xi sahmi xa ngajñi nuju, xi tsinguixi nuju. ¹³ Jemu meje rë xi chjuhunrcun me hacuaha nihña hmu tacun me tséhë xi tisahmi me xa vëhë. Ndaja tinechun cojo xingun.

¹⁴ Hacuaha nújin cojo nuju ta xuta xi mijí sahmi xa ne, tinújun cojo rë me catisahmi me xa. Hane xuta xi jima chuvacacun ne, tinújun cojo rë me, hane sacú rë me cjuetacun. Hacuaha tisecuun rë me xi cjëë ndaja cumacjain rë. Hane tjin nuju cjuajeya cojo ngayëjë ni me.

¹⁵ Hacuaha nechun cuidadu xi hacuiin choho nihña cojo rë me xi choho sahmi cojo nuju ta, xi meje rë ne, yëjë ni hora yëjë ni nixtin ne, suvá cjuandaja nihña cojo xingun hacuaha cojo yëjë ni xuta.

¹⁶ Ndaja catama nuju yëjë ni nixtin. ¹⁷ Meje rë xi jemu nihña oración. ¹⁸ Hacuaha hatuxa tuhun nacuechji rë Nina, handasa choho cuatjun cuma. Cuatjin meje rë Nina xi nihña, ngayujun ni xi macjain nuju Jesucristu.

¹⁹ Hacuiin nitjunngun xcusun xi sahmi Hasen rë Nina ngajñi nuju. ²⁰ Hacuiin nitjunngun cjua rë me xi chja cjua xi casua Nina. ²¹ Peru chjuhunchuvun ngayëjë ni cjua. Hane jarë cjua xi ndaja ne, vëhë tiseñuju hacuaha tinuhyun. ²² Peru tétxunxun tséhë ngayëjë ni cjuatsehen.

²³ Nina xi tsicjë me cjuachan ne, catisahmi tyjahi tyjahi me hasen nuju cojo cjuatacun nuju cojo yojo nuju, cojo sa xi nixtin hya xi cuya Nai naja Jesucristu ne, tsajin camahani jyé nuju. ²⁴ Me xi tivaxijin nuju ne, cjuaquixi xi chja me. Hatuxa sahmichihin me hacutjin xi chja me.

Cjua xi cuijnetaha

²⁵ Ngayun ne, nihña oración ngatsë niji.

²⁶ Nuvuncjun yëjë ni me xi macjain rë Jesús xi tuhun rë me ngu nina niji, sacuaha xcusun naja.

²⁷ Tséhë xi cavaxijin ná Nai naja ne, vëhë xi vitéxa nuju xi nýjun cojo xujun vi xi cuihndë yëjë ni me xi macjain rë Jesús.

²⁸ Cjuandaja rë Nai naja Jesucristu ne, catisehen xahasen nuju.

Cjua xi ma jo catsihindu San Pablo xi cumá rë xuta nandya Tesalónica

¹ Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tséhë xi macjain nuju Nina Nahmi naja cojo Nai naja Jesucristu, ngajan nandya Tesalónica. ² Nina Nahmi naja cojo Nai naja Jesucristu ne, catisua nuju me cjuandaja cjuajeya.

Hya xi cuinduva Cristu ne, Nina ne, sahmi me castigu xuta xi tjin jyé rë

³ Hachu tjin niji xi tihin nacuechji rë Nina ngatsë nuju ngayun. Hacuaha ndatjin xi cuatjin nihñi ta, tséhë xi jemu xcun tivangun xi macjain nuju, hacuaha hitsë sa jima tsejen cjuahmutacun xi tjin nuju jima ngu ngayun cojo xingun. ⁴ Véhë xi ngayin ne, hya xi ma tangun me xi macjain rë Nina ne, nújin cojo rë me ta jemu sua má niji tséhë xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima. ⁵ Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndé hiscan xi me vëhë má titjun me, ta ngatsë rë vëhë xi jercu choho tivatjun tijima.

⁶ Xi tsingatahacacun Nina ne, yéjé ni xuta xi choho tisahmi cojo nuju ne, ndatjin xi hacuaha cuma ngojo cojo rë me, ⁷ hacuaha ndatjin xi ngayaan xi choho tivatjuun tijima ne, sacú naja ngu cahndé xcun Nina xi chjahanjendan, hya xi Nai naja Jesús cuya me tséhë ngahnga ngajñi rë ngu ndihi jyé cojo ángel rë me xi jercu hñu ngahñu rë. ⁸ Hya sahmingojo me cojo xuta xi macjaain rë Nina, xi hacuaha hndiin me tséhë cjua ndajyihi tséhë Nai naja Jesús. ⁹ Hane castigu xi cuma xuta xi cuacun vë ne, cuaxëxin Nina me ngu ladu hiscan xín, xi tsajin nu tsajin nixtin xi cuechu me xcun Nai naja. Cuatjin ne, xi scuiin me hasen ndajyihi cojo ngahñu rë Nai naja. ¹⁰ Cuatjin cumá nixtin xi cuinduva Nai naja xi cuma jyé cuma hnga me. Hya ne, cuinduva me, cojo sa xi ngayéjé ni xuta xi camacjain rë me ne, cjuaharcun rë me hacuaha cjuercun rë me, hisca cojo ngayujun ni ta tséhë xi camacjain nuju cjua ndajyihi xi canújin cojo nuju.

¹¹ Véhë xi ngayin ne, jercu chjahyin rë Nina naja xi ngayun xi má yun ladu rë me ne, catamachji rëhë rë me ngayun. Hacuaha chjahyin rë Nina xi cojo ngahñu rë me ne, cuetjucaa Jain yéjé ni cjuandaja xi ningatuhuntacun hacuaha yéjé ni xa xi nihñu tséhë xi macjain nuju me. ¹² Hacuaha xi cuatjin cumá ne, xuta xi vutsejen me ne, sahmi jyé sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsë rë cjuandaja rë Nina naja cojo cjuandaja rë Nai naja Jesucristu.

2

Cuinduva ngu cha tsehen

¹ Quihndé ne, ha hyun xi Nai naja Jesucristu ne, cuinduva nga me xi sahmi tangun naja me. Véhë xi nújin cojo nuju ta ² hacuiin ngutjen cumacjintacun, hacuiin rcun cuma, sa xi sacú nuju cjua xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunntsungu xujun xi cuichja cuatjin sacuaha xi ngayin caningatjin, Peru hacuiin cumacjain nuju ta, quixiin. ³ Catuun camahani cahndé xi cumandacha ngayun, tséhë xi chaja sa xi cuechu nixtin vëhë ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina. ⁴ Cha tsehen jan ne, choho scuëë cha yéjé ni xi hmí nina, hacuaha choho scuëë cha yéjé ni xi vechu chuva rë xi chjaharcun rë. Hane hisca cjue cha cuejña cha cahntsua yungun xi matitjun xi tséhë Nina, hane cuichja cha ta cha vëhë nina cha.

⁵ ¿Há vitsjiin nuju ta ha cachjá cojo nuju cjua vihi, hya xi cavitejña nandya nuju?

⁶ Hacuaha ha hyun ta xi ngutjen ne, tsajin cahndé cuinduva cha tsehen jan ta, cuinduva

cha hisca xi cuechu nixtin xi Nina sua me cahndé. ⁷ Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndé ne, ⁸ sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjé me cha, hya xi cuinduva me. ⁹ Hya xi cuinduva cha tsehen jan ne, tséhë xi Satanás tsingatju rë cha ne, jemu hñu ngahñu rë cha hacuaha jemu cjín xcusun cjuarcun ndacha xi sahmi cha. ¹⁰ Hacuaha sahmi cha yéjë ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tséhë xi mijí rë me chuiyin rë me cjuaquixi xi vaxëtje naja. ¹¹ Ngatsé rë vëhë ne, sua Nina cahndé xi cumandacha xuta jan, cojo sa xi cumacjain rë me cjuandesu jan. ¹² Ngajan xi cuma me castigu, ngayëjë ni me xi camacjaain rë cjuaquixi jan ta, tu cjuatsehen jan cachuya rë me.

Nina cavaxijin nuju me xi cuetjuntjun

¹³ Peru ngayin ne, meje rë xi jercu tihin nacuechji rë Nina ngatsé nuju ngayun xi hmucacun nuju Nai naja ta, tséhë xi Nina ne, cavaxijin nuju me xi tjun tjun ngayun cuetjuntjun. Ngatsé rë xi Hasen rë Nina ne, titsityahi rë xahasen nuju xi tsajin xi cún nuju xcun Nina, hacuaha ngatsé rë xi macjain nuju cjuaquixi ne, vëhë xi cuetjuntjun. ¹⁴ Hya xi canújin cojo nuju cjuandajyihi rë Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajyihi sacuaha xi tjin rë Nai naja Jesucristu. ¹⁵ Vëhë xi nujin cojo nuju ta xi camacjintacun, hacuaha xi canichayuun cjua xi cavicyuin nuju, cjua xi canújin jan cojo cjua xi canihindín jan. ¹⁶ Nai naja Jesucristu cojo Nina Nahmi naja ne, casahmi hmucacun me ngayaan, hacuaha cojo cjuandaja rë me casua naja me cjuetacun xi tsajin hora tsajin nixtin xi cjuë, hacuaha casua naja me ngu cjua ndajyihi xi nechayan ni rë nixtin xi cuetjucaa. ¹⁷ Me vëhë ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yéjë ni cjuandaja.

3

Nihñu oración ngatsé niji

¹ Quihndé ne, nihñu oración ngatsé niji, cojo sa xi cjua rë Nai naja ne, xati cuechu jinguje ni, hacuaha cojo cjuasua cjuahatsja xuta cjua rë me, sacuatjin camá ngajñi nuju. ² Hacuaha nihñu oración, cojo sa xi cuetjintjin tséhë xuta tsehen ta, hacuiin ngayëjë xuta xi macjain rë me Nina. ³ Peru Nai naja ne, hatuxa quixi me cojo cjua rë me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju. ⁴ Ngatsé rë Nai naja ne, fë mangutacuin ta ngayun ne tininhñú jain, hacuaha nihñu sa cjua xi vitexin nuju. ⁵ Nai naja ne, catincha me cjuahmutacun rë Nina xahasen nuju, hacuaha catisua nuju me ngahñu rë Cristu xi scaa nuju tséhë yéjë ni cjuacjintacun.

Meje rë xi nihña xa

⁶ Quihndé ne, sacuahatjin meje rë Nai naja Jesucristu ne, vitexin nuju xi naxunxun yojo nuju tséhë yéjë ni me xi jemu tséhë me sahmi me xa, hacuaha xi sáhmii hacutjin xi cavicyuin nuju xi nihñu. ⁷ Ngayun ne, ha hyun ta meje rë xi nihñu ngu xa sehe sacú xi xinu, sacuatjin xi cahyun xi canihñí. Hacuiin tu jyuu ni cavinechinyinjñi ngajñi nuju ne, ⁸ hacuiin tu cjuatjo ni casacu niji niñu xi cachini ta, nixtin nixten ne, jercu canihñí xa, cojo sa xi hacuiin ngayun nihñu gastu ngatsé niji. ⁹ Handasa saté niji cahndé xi chjahyin nuju xi cuiseun niji, peru cachjahyiin ta canihñíxin xa, xi cueñí ngu xcusun xi cuatjin nihñu. ¹⁰ Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinë me. ¹¹ Cuitjin tinújin cojo nuju ta, tséhë xi casacu niji cjua xi ngajñi nuju ne, hinchajñi me xi sáhmii xa. Tu tsinguisehenjñi me xcun cjuacjintacun xi ña cuendaain rë me. ¹² Ngajan xi vitexin rë me xi cuacun vë, sacuatjin meje rë Nai naja Jesucristu, xi catiyujujyuu cjuatacun rë me, hane catisahmi me xa xi sacú sinë me.

¹³ Hacuaha ngayun ne, xi camacjintacun tséhë cjuandaja xi tininhñú. ¹⁴ Sa xi tjin jarë me xi mijí cuihndé cjua xi tinújin xcun xujun vihi ne, chjuhuncuendun jarë me jan, hacuaha xi caninguisuunjñuu cojo rë me, sehe me vëhë ne, cuma sava rë me. ¹⁵ Peru hacuiin choho chun me ta, tuhun rë me cjua cojo cjuandaja ta, tséhë xi xingun me.

Cjua xi cuijnetaha

¹⁶ Hane Nai naja, me xi tséhë cjua jeya ne, catisua nuju me cjua jeya yëjë ni nixtin hacuaha xcun yëjë ni cjuacjintacun. Hacuaha Nai naja yaha nuju me ngayujun ni. ¹⁷ Suva ngahan, Pablo, tsihindu nuju ngu cjua vi, xi tisuá nuju ngu nina. Hatuxa xcusun naha xi cuitjin tsihindu xcun yëjë ni xujun xi tsingátju. ¹⁸ Cjuandaja rë Nai naja Jesucristu ne, catisehen xahasen nuju ngayujun ni.

Xujun xi titjun catsihindu San Pablo cha Timoteo

¹ Ngahan Pablo ne, apóstol tséhë Cristu Jesús má ngahan ta, tséhë xi cuatjin cavitexa Nina, me xi vaxëtje naja, hacuaha cuatjin cavitexa Cristu Jesús, me xi vetahan tacun. ² Tsihindu ri xujun vihi, ngaye Timoteo. Ngaye ne, sacuaha quihndi ndaja naha ngaye ta, tséhë xi camacjain ri cjua rë Nina, hora xi cachjá cojo ri cjua jan. Nina Nahmi naja cojo Nai naja Cristu Jesús ne, catamayuma rë me ngaye, catisua ri me cjuandaja cjuajeya.

Tjin xuta xi vicuya ngu cjuachacun xi machjiriin

³ Sacuahatjin xi ha cachjá cojo ri, hora xi cavétju cëjë hiscan ladu tséhë Macedonia ne, tinechintehe sa ngajan nandya Efeso. Tjin ngu jo cha ngajan xi tivicuya cha cjuachacun xi hacjahi. Hane ngaye ne, titexe rë cha xi cuacun vë ta ha quihndé cuicuyaain sa cha cuatjin. ⁴ Hacuaha titexe rë cha ne, hacuiin cuetaharcu cha yëjë cuentu rë xutachanga naja ta, tséhë xi hacuiin yëjë xi cjuaquixi. Ngu jo cuentu xi cuacun vëhë ne, jemu nduju fi, hane tsajin mé machjiréhë ta suvá ni xi si vangui, hacuaha tsajin mé visecoo naja xi nihña hacutjin xi meje rë Nina. Tséhë xi macjain naja cjua rë Nina ne, vëhë xi hyan hacutjin xi Nina meje rë me xi nihña.

⁵ Tichjá cojo ri xi cuatjin titexe rë cha xi cuacun vë, sehe cuma tyjahi xahasen rë cha, cuma ndajyihi cjuatacun rë cha, hacuaha cumacjain nguñajacacun rë cha. Xi cuatjin ne, hacuaha sacú rë cha cjuandaja xi cuma tsihmucacun xicjin cha. ⁶ Peru ngu jo cha xi cuacun vë ne, cachaja cha ndiya rë cjuaquixi, cavetjuxin cha tséhë cjuandaja jan, hane tu cjua xi machjiriin, vëhë tivisiajmi cha. ⁷ Meje sahmi cha maestru tséhë cjua xi cavitexa Nina xutachanga naja. Peru hvíin cha mé vijne cjua xi visiajmi cha, hisca suvá cha vijnircu cha cjua xi vicuya nguñaja nguñajacacun cha.

⁸ Quihndé ne, ha hyan ta cjua xi cavitexa Nina jan ne, jemu ndaja. Peru meje rë xi cuijnercun, mé ngatsë rë xi Nina ne, cavitexa me cjua jan. ⁹ Nina ne cavitexa me cjua jan, peru hacuiin ngatsë rë xuta xi ndaja sahmi ta, ngatsë rë xuta xi choho sahmi, xuta xi hndiin tséhë ngu xuta xi matitjun tséhë, xuta xi cuendaain rë tséhë Nina, xuta xi sahmi cjuatsehen, cojo xuta xi faharcuaain rë Nina, xuta xi macjaain rë cjua rë Nina, xuta xi tsiquehen nahmi rë, tsiquehen naa rë, cojo sa tsiquehen xicjin. ¹⁰ Hacuaha cavitexa Nina cjua jan ngatsë rë xuta xihin xuta chjuun xi tjin chjuunnahñu rë, xuta xi xanda, xuta xi vinchahma ngu xuta sehe fehya tujún xuta rë, xuta xi chja cjuandacha cojo xicjin, xuta xi chja cjuandacha hisca xcun xutaxa rë, hacuaha xuta xi sahmi vihi sahmi vëhë xi matanguaain cojo cjuaquixi. ¹¹ Peru cjuaquixi jan ne, matangan cojo cjua ndajyihi tséhë Nina. Hacuaha Nina xi jercu ndaja me ne, me vëhë casua ná me cjua xi cuatjin cuichjá.

Nacuechji rë Nina tséhë cjuandaja rë me

¹² Suá nacuechji rë Nai naja Cristu Jesús ta, tséhë xi camangucacun me cojo ná xi casua ná me xa rë me, hacuaha tisua ná me ngahñu cjua xi scaa ná sahme xa jan. ¹³ Cuatjin casahmi me cjuandaja cojo ná quihndé, handasa hatsëe ne, jemu choho cachjá tséhë me hacuaha jemu choho casahme, xi jemu yehe cjuañhi casuá rë xuta ladu rë me. Peru Nai naja ne, cama yuma rë me ngahan ta, tséhë xi cjëe xi cumacjain ná me, hane vëhë xi hveen mé xi casahme. ¹⁴ Hane jemu casahmi camahani me cjuandaja cojo ná, xi casua me cahndé xi camacjain ná me hacuaha xi caveya me cjuahmutacun cahntsua xahasen naha. Cuatjin sahmi me cojo naja xi nihña tangun cjuatacun naja cojo Cristu Jesús.

¹⁵ Cjua xi cuichjá nguehe ne, jemu cjuaquixi, hacuaha ndaja tjin xi cumacjain rë ngayëjë ni xuta ta, Cristu Jesús ne, canduva me nguehe ngasunhndé xi cuaxëtje me xuta xi sahmi cjuatsehen. Tséhë yëjë xuta tsehen xi cuacun jan ne, ngahan hitsë sa tsehen ngahan. ¹⁶ Peru Jesucristu ne, camayuma rë me ngahan ta, tséhë xi meje rë me xi cumachaya rë yëjë ni xuta ta jemu sahmi jyë cacun me cojo ngu xuta xi jercu sahmi cjuatsehen. Sacuatjin xi casahmi me cjuandaja cojo ná ne, hacuaha ni tjin sahmi me

cjuandaja cojo yéjë ni xuta xi cumacjain rë cjua rë me. Sehe sacú rë xuta jan cjuahñu xatsë xcun Nina. ¹⁷ Véhë xi meje rë xi hatuxa chjahanrcun rë Nina, ndaja cuinújan tséhë Nina yéjë ni nixtin ta, me véhë xi matitjun me, xi vitexa me yéjë ni nixtin ta, suvá ni me véhë xi Nina me, hacuaha matsijin naja me. Hacuaha tsajin nixtin tsajin hora cueya me. Cuatjin jain.

¹⁸ Ngaye Timoteo ne, sacuatjin cjuatacun xi ha cachja me xi hmí profeta tsiji hatsëë nixtin tsan ne, ha chuva véhë ni tivitéxa ri xi nihñi. Hane cjuatacun véhë ne, cumachjiréhë riji xcun xa rë Nina xi tinihñi sacuaha tjin machjiréhë ngu quicha ngajñi rë ngu si. ¹⁹ Mijí rë xi cuihin ngaxtin xi macjain ri cjua rë Nina ta, meje rë xi nihñicuende cjuatacun ndajyihì xi quichehe. Ngu jo xuta ne, casahmi cuendaain me cjuatacun ndajyihì xi cavaha me, hane cuatjin catsichaja me cjuatacun rë me, hacuaha ha quihndë macjaain rë me Jesucristu. ²⁰ Cuatjin cavatju cha Himeneo cojo cha Alejandro camá. Véhë xi ngahan ne, casuá cahndé xi suandya hitsë Satanás cha xi cuacun vë, sehe cumachaya rë cha ta cuaaintjin camahani xi choho chja cha tséhë Nina.

2

Meje rë xi nihñia oración

¹ Véhë xi nguehe cuichjá cojo ri ta jemu meje rë xi chjahyan rë Nina cjuandaja, meje rë xi tahan nacuechji rë me, hacuaha meje rë xi nihñia oración ngatsë rë yéjë ni xuta. ² Meje rë xi nihñia oración ngatsë rë xutaxa rë, hacuaha ngatsë rë ngayéjë ni xuta xi vitexa naja, sehe ngayaan ne, tsajin yo suandya naja suaxti naja, xi tsejen xi chjahanrcun rë Nina, hacuaha xi nihñia cjuandaja. ³ Jercu ndaja tjin xi cuatjin nihñia oración ta, Nina, me xi vaxëtje naja ne, cuatjin chuya rë me. ⁴ Meje rë me xi ngayejen ni xuta ne, cuetjuntjen hacuaha ndaja cuijnercun cjua xi cjuaquixi. ⁵ Ngu ni Nina xi tacun me, hacuaha ngu ni me xi sahmi xi matangun cjuatacun naja ngayaan xuta cojo Nina. Me xi cuatjin sahmi jan ne, hacui ngu xuta xi hmí Cristu Jesús. ⁶ Me véhë xi casua me yojo rë me xi cuechjítje me jyé naja ngayejen ni ngayaan. Hane hya xi cavetjucaa nixtin ne, cuatjin cama tsejen xi Nina ne, meje rë me xi cuetjuntjen. ⁷ Véhë xi casatë ná xi má ngahan apóstol, xi cuicuyá rë xuta xi xín nangui rë me, cuichjá cojo rë me cjua xi cjuaquixi xi macjain naja. Hatuxa cjuaquixi cjua xi chjá cojo ri. Hacuiin vindácha.

⁸ Hacuaha meje ná xi xuta xihin ne, sahmi me oración ha tu jani ni hiscan xi matangun me. Hyá xi scunitjen me tsja me xi sahmi me oración ne, meje rë cojo ngu xahasen tyjahi. Mijí rë xi quitaha cjan rë me, hacuaha mijí rë xi cojo si. ⁹ Hacuaha yachjin ne, cataja me tsjian rë me hacutjin xi ndaja tjin, hacuiin ngu xcusun xi jemu nchina tsejen. Mijí rë xi cuircu cun sahmi me tsjarcu me. Mijí rë xi tsindaja me yojo rë me cojo oro, cojo tuseti xi jemu hnga chjí rë, cojo tsjian hnga chjí rë. ¹⁰ Meje rë xi sahmi me cjuandaja ta, cuatjin ndaja tsejen tséhë yachjin xi macjain rë me Nina. ¹¹ Hacuaha hya xi viseñuju me ngu cjua rë Nina ne, catitsinguijne me yojo rë me, jyuu ni catiyuju me. ¹² Hacuaha suaan cahndé xi yachjin ne, cuicuya me ngajñi rë xuta cjín, hacuaha suaan cahndé xi me véhë cuitexa me xuta xihin. Xi meje rë ne, tu catiseñuju ni me. ¹³ Cuatjin meje rë ta, tséhë xi hya xi casahmi Nina xuta ne, titjun casahmi me xutachanga naja Adán, sehe má jo ne, casahmi me Eva. ¹⁴ Hane Adán ne, hacuiin camandacha me ta, chjuun jan ne, me véhë xi camandacha me, hane cuatjin camá xi casahmichiin chjuun jan cjua xi cavitexa Nina. ¹⁵ Peru yachjin ne, meje rë xi catisacu rë me quihndi. Cuatjin xi cuetjutje me, sa xi macjain rë me Nina, sa xi tsíhmu cacun xicjin me, sa xi tyjahi xahasen rë me, hacuaha sa xi vetjo me cjuatacun rë me.

3

Xuta xi vitexa ngajñi rë xuta ladu rë Nina

¹ Nguehe cuichjá cojo ri ngu cjua xi cuatjin jain: yo xi meje cuitexa sacuaha obispo ngajñi rë xuta ladu rë Nina ne, jemu ndaja xa xi meje rë xuta jan. ² Ngajan xi me xi cuitexa ngajñi rë xuta ladu rë Nina ne, meje rë xi ngu xuta ndaja xi tsajin mé choho

sahmi. Meje rë xi ngu xuta xi ngu ni chjuun rë, hacuaha xi vetjo yojo rë, xi tacun cahndé cjuatacun rë. Mijí rë xi tujyé sahmi me. Meje rë xi ngu xuta xi cojo cjuandaja cjuahatsja me xuta xi nduva tjengui rë me ndava me. Hacuaha meje rë xi chutaha cjuatacun rë me xi cuicuya me xuta. ³ Mijí rë xi ngu xuta chihi. Mijí rë xi choyo xuta me ta, meje rë xi tjin rë me cjuandaja cjuajeya. Mijí rë xi jercu tsimeje me tujún. ⁴ Hacuaha me xi vitexa ngajñi rë xuta ladu rë Nina jan ne, meje rë xi ngu xuta xi ndaja sahmi gubiernu ndava, hacuaha quihndi rë ne, vihndé tséhë hacuaha faharcun rë. ⁵ Ta sa xi hacuiin ndaja ma sahmi me gubiernu ndava me ne, *¿*hacutjin cuma cjuahacuenda me xuta ladu rë Nina? ⁶ Hacuaha mijí rë xi ngu xuta xi sehe tiña nixtin cavisehen me ndiya rë Nina, sá tu jemu sahmi jyé xuta jan yojo rë me, cjué ne, cuatju me castigu rë Nina, sacuaha tjin cavatju xitsehen matitjun camá. ⁷ Hane meje rë xi ngu xuta xi ha chjaharcun rë me, xi hisca cojo xuta xi hacuiin ladu rë Nina ne, ha tifaharcun rë me. Cuatjin xi xuta xi vitexa jan ne, hacuiin cuetju sava me, hacuaha hacuiin tsinguetsun xitsehen xi matitjun cjuatacun rë me.

Xuta xi visecoo ngu me xi vitexa

⁸ Hacuaha ni tjin ni xuta xi visecoo rë ngu me xi vitexa jan ne, meje rë xi ngu xuta xi ha chjaharcun rë, ngu xuta xi hacuiin jo xcun jo hntsua. Mijí rë xi ngu xuta xi jercu hvi xan. Mijí rë xi ngu xuta xi jercu tsimeje tujún. ⁹ Meje rë xi ngu xuta xi cojo ngu cjuatacun tyjahi macjain rë cjua xi cama ngascan casuacuenda naja Nina, cjua xi tsajin yo vëë rë hatsëë nixtin. ¹⁰ Tjun tjun ne, meje rë xi chjahachuva rë xuta jan. Hane sa xi tsejen ta tsajin mé jyé rë xuta jan ne, cuma cjue me xa xi cuisecoo me xuta xi vitexa. ¹¹ Hacuaha chjuun rë me ne, meje rë xi ngu chjuun xi ha chjaharcun rë, ngu chjuun xi visiajmii cjuandesu. Meje rë xi ngu chjuun xi vetjo me cjuatacun rë me, ngu chjuun xi ha sahmi chihin xa rë. ¹² Hane xuta xi visecoo rë ngu me xi vitexa jan ne, meje rë xi ngu ni chjuun rë me. Hacuaha meje rë xi ngu xuta xi ndaja sahmi me gubiernu ndava me cojo quihndi rë me. ¹³ Hane me xi jemu ndaja Jain xa sahmi ne, jercu cjuaharcun xuta me, hacuaha hitsë sa tsacjuiin me xi cuichja me cjua ndajyhi tséhë Cristu Jesúxi macjain naja.

Ngu cjua rë Nina xi tsajin yo vëë

¹⁴ Quihndé xi titsihindu ri cjua vihi ne, vetahá cárunc ta xati cuma cjué tjéngé ri. ¹⁵ Peru sa xi cuindeya ná ne, cjua xi titsingátju ri vi ne, sua cumachaya ri hacutjin xi mameje rë xi sahmi xuta rë Nina. Hane xuta rë Nina jan ne, hacui ngayaan xi macjain naja Nina xi quicun, hacui ngayaan xi nýjantjen ngatsë rë cjuaquixi. ¹⁶ Cjuatacun rë Nina xi tsajin yo vëë, xi macjain naja vi ne, suvá tsejen ta jemu vengui chjí rë:

Cristu Jesúxi ne, hya xi canduva me nguehe ngasunhndé vihi ne, camá me ngu xuta sacuahatjin ngayaan xuta.

Peru tsajin camahani jyé rë me, chja Hasen xi tséhë Nina.

Hacuaha cavéë ángel me.

Hane camachaya rë xuta tséhë me yéjë ni nangui.

Hacuaha camacjain rë xuta me jinguyjé ni ngasunhndé.

Hacuaha cafahatsja Nina me ngajan ngahnga.

Xuta xi vicuya cjuandacha

¹ Quihndé ne, Hasen rë Nina ne, chja quixi ta cuechu nixtin xi yahnga xuta ne, cuuyuxin me cjua tséhë Cristu Jesúxi, cjua xi macjain naja, hane tu cjua tséhë xitsehen xi vindacha ne, vëhë scutaya me hacuaha vëhë cuetaharcu me. ² Hacuaha cuetaharcu me cjua xi cuicuya xuta xi jo xcun jo hntsua xi vindacha. Sacuahatjin má taja chuxin rë ndyaja hiscan xi faha chu quicha ne, cuatjin cuetsun cjuatacun rë xuta ndacha xi cuacun vë. ³ Cjuavixan ne, suaain me cahndé cuma, hacuaha cuichja me ta tjin yahnga xcusun xi ndajin xi xinë. Peru Nina ne, casahmi me yéjë ni xcusun ne, cuma xinë ngayejen ni

xi macjain naja me, ngayejen ni xi cavijnercun cjuatacun xi cjuaquixi. Peru meje rë xi tahan nacuechji rë me ta,⁴ yéjé ni xcusun xi Nina casahmi me ne, jemu ndaja. Véhë xi mijí rë xi nitjunnguen tu mé ni xcusun, ta meje rë xi chjahanntsan, peru tahan nacuechji rë Nina.⁵ Hane ngatsë rë cjua rë Nina cojo cjua xi nújan hya xi tahan nacuechji rë me ne, véhë sahmi xi tsajin tsavi tséhë tu mé ni xcusun.

Ngu me xi ndaja sahmi xa rë Cristu Jesús

⁶ Sa xi tehe rë xuta ladu rë Nina yéjé ni cjua xi sehe catsihindu ri vë ne, jemu ndaja nihñi, xi tinihñi xa rë Cristu Jesús. Hacuaha hitsë sa cuma jyé cjuatacun riji ngatsë rë cjua xi macjain naja, hacuaha ngatsë rë cjuandaja xi cachutaye xi nihñi.⁷ Peru xi canihñicuendiin yéjé ni cuentu rë xutachanga naja ta, hacuiin yéjé xi machjiréhë ta, ngu jo ne, suvá ni xutachanga naja, me véhë xi cavaxëcun me. Cahndé rë véhë ne, ngaye ne, nihñii ngahñi yéjé ni nixtin xi tsejen xi chjehercuin rë Nina nguñajatacuin.⁸ Xi niniyan yojo naja ne, jemu ndaja tjin. Peru hitsë sa ndaja tjin xi tsejen xi chjahanrcun rë Nina ta, tséhë xi hya xi cuatjin nihña ne, sacu naja cjuandaja rë Nina quihndë nguehe xcun cjuañu naja, hacuaha ni tjin ngajan xcun Nina.⁹ Cjua xi titsihindu vi ne, hatuxa vechu chuva rë xi cumacjain naja ta, tséhë xi jemu cjuaquixi.¹⁰ Véhë xi jercu tinihñi xa, tséhë xi ha vetahan tacun Nina xi quicun, Nina xi vaxëtje naja ngayejen ni ngayaan xuta, hacutjin ngayejen ni ngayaan xi macjain naja me.

¹¹ Ticoye rë xuta cjuatacun xi catsihindu vë, hane hisca titexe rë me. ¹² Nihñi cjuandaja ne, sehe tsajin yo xi chuyiin rë tsiji ngatsë rë xi chuva nu riji. Nihñi cjuandaja ne, sehe xuta xi macjain rë Nina ne, xi scuëë me hacutjin nihñi ne, hacuaha ni tjin sahmi me; sacuaha tjin xi ha noje, sacuaha tjin xi nihñi, sacuaha tjin xi hmu tacuin xinguin, sacuaha tjin xi macjain ri Nina, sacuaha tjin xi ndajyihi xahasen riji. ¹³ Nguyéjé rë xi cjëë cjuéhë ne, hñu tinoje cojo xujun rë Nina, hya xi ma tangun xuta ngajan yungun. Ndaja tinoje cojo rë me ne, catisahmi me cjuandaja, hacuaha ticoye rë me. ¹⁴ Nihñixe cojo cjuatjo xi Nina casua ri me, nixtin hya xi me xi vitexa xuta ladu rë Nina ne, cavetahatsja ri me. Cuatjin camá ta, tséhë xi cuatjin cachja Nina cojo ngu xuta xi hmí profeta xi cuatjin meje rë me xi cuma.

¹⁵ Nihñi nguñajatacuin ngayéjé ni hacutjin xi vitexa xujun vi. Xi cuatjin ne, ngayéjé ni xuta scuëë me hacutjin tihmi xcun cojo cjuandaja rë Nina. ¹⁶ Cuidadu ni tjin ri tsiji sove, hacuaha cojo cjuatacun xi vicoye. Tu chihin ni tihincueje cjuatacun vë. Sa xi cuatjin nihñi ne, cuma naxetje yojo riji, hacuaha cuma naxetje me xi cuiseñuju cjua xi vicoye.

5

Hacutjin xi cuitexe rë xuta ladu rë Cristu

¹ Sa xi ngu me xi ha nchava ne, choho sahmi me ne, hacuiin cuinojetehe rë me ta, cojo jeya tinoje cojo rë me, hacutjin xi sahmi me cjuandaja, sacuaha tjin xi nújan cojo nahmi naja. Hacuaha cojo xuta xihin, me xi vasen xuta ni ne, tinoje cojo rë me sacuaha tjin xi nújan cojo tseen. ² Hane yachjin xi ha chicuhun me ne, cojo cjuandaja tinoje cojo rë me sacuaha tjin xi nújan cojo naa naja. Hacuaha cojo yachjin xi vasen xuta ni me ne, tinoje cojo rë me sacuaha tjin xi nújan cojo na xi tichjan, cojo ngu xahasen ndajyihi.

³ Yachjin cahan xi cjuaquixi xi tsajin yo ngatsë rë me ne, meje rë xi chjahanrcun rë me, cuisecoon rë me. ⁴ Peru ngu chjuun cahan ne, sa xi tjin rë na quihndi o quihndindai ne, catisahmi nixti jan cjuandaja, catisecoo rë na, cojo sa xi cuatjin sahmingojo nixti jan cojo xutacha rë. Xi cuatjin cuma ne, hatuxa chuya rë Nina. ⁵ Tjin chjuun xi cjuaquixi xi cahan me, me xi ha siu suvá. Me véhë xi vetaha cacun me Nina, hane sahmi me oración, fehya me cjuandaja rë Nina nixtin nixten. ⁶ Peru hacuaha tjin chjuun cahan xi sahmi ni me hacutjin xi ma sua rë xahasen rë me. Hane chjuun cahan xi cuatjin sahmi jan ne, handasa ndaja cun cjuañu rë me ne, peru cjuatacun xi sahmi me ne, tsajin mé machjiréhë. ⁷ Cuatjin tinoje cojo xuta ladu rë Cristu, sehe tsajin mé jyé rë me cojo xutacha rë me. ⁸ Peru sa xi ngu xuta marcuaain rë me tséhë xuta rë me, o sa xi marcuaain rë me tséhë cahntsua ndava me ne, véhë tsingacun naja xi catsitjungui me cjua rë Nina xi

macjain naja. Hacuaha hitsë sa choho sahmi me xi cuma rë ngu xuta xi hatuxa macjaain rë Nina.

⁹ Xcun xujun xi yaja ñihí ré yéjé ni yachjin cahan ne, cumahindu ñihí ré na xi ha cafahá rë xi jyanchan nu, na xi cavejña cojo ngu ni xihin, ¹⁰ na xi ha vëë xuta xi ndaja xcusun rë, xi ha casahmi yéjé ni cjuandaja vihi: ha catsicha na quihndi, ha cafahatsja na cojo cjuandaja xuta xi quiji tjengui me na ndava na, ha cavisecoo na yahnga me xi ladu rë Cristu, ha casua na cjuetacun me xi tjin rë ngu cjuacjintacun, hacuaha ha casahmi na jingu sa xcusun xi ndatjin.

¹¹ Peru xcun xujun jan ne, mijí rë xi cuaquí ñihí rë na cahan xi chuva nu rë, sá cuechu ngu nixtin xi ha quihndé sahmii na xa rë Cristu nguñajacacun na, hane meje nga cuixan na ngu ndiya. ¹² Xi cuatjin sahmi na ne, cuetjucaa jyé rë na, tséhë xi tsichaja na cjua xi ha catsinguisenhenjní na. ¹³ Hacuaha cuma tséhë na xi tu tsujihya ni na ndava xuta. Hane hacuiin tu suvá ni cuma tséhë na ta, hisca cuetsihin cuichja na cjuandesu, cuetsihin tsinguisehenjní na jingu sa cjuatacun xi cuendaain rë na, hacuaha cuetsihin cuisiajmi na cjua xi mamijí rë xi cuichja na. ¹⁴ Véhë xi meje ná xi catixan nga na cahan xi chuva nixtin rë. Catisacu rë na quihndi, hacuaha catjahacuenda na cahntsua ndava na. Sehe xuta xi chuyiin rë me tsajan ne, sacuiin rë me hacutjin choho cuichja me tséhë xcusun xi ndaja sahmi na yachjin cahan jan. ¹⁵ Cuatjin chjá ta, tséhë xi tjin ngu jo na cahan xi ha cavetjuxin na tséhë ndiya rë Nina, cavisehen na ndiya rë Satanás.

¹⁶ Ngu chjuun xi ladu rë Cristu me ne, sa xi tjin ngu chjuun xi xicjin me xi cahan ne, mijí rë xi xuta ladu rë Cristu sahmi me gastu ngatsë rë chjuun cahan jan ta, me xi xicjin ni na ne, catisecoo me na. Xi cuatjin ne, xuta ladu rë Cristu ne, cuma cuisecoo me yachjin cahan xi tsajin yo ngatsë rë.

¹⁷ Yéjé ni xuta changá xi ndaja vitexa me ngajñi rë xuta ladu rë Cristu ne, vechu chuva rë xi chjaharcun rë me hacuaha ndaja chjí sacu rë me. Peru me xi sahmi nguyjé xi chjaharcun rë hacuaha ndaja chjí sacú rë me ne, me xi sua machaya rë xuta cjua tséhë Jesús cojo me xi vicuya naja cjuachacun. ¹⁸ Cuatjin chjá ta, tséhë xi xcun xujun rë Nina ne, cuitjin camahindu cjua vihi: “Mijí rë xi cueyún changa hntsua ngu ndyaja hya xi sahmi chu xa nuju xi sunesun chu naxu rë trigu xi cuetju trigu rë.” Hacuaha: “Ngu mosu ne, tjin rë cha chuva rë xi cjuaha cha chjí rë cha.”

¹⁹ Hya xi xinchajyé rë ngu xuta changá xi vitexa me xuta ladu rë Cristu ne, xi canihñicuendiin jyé jan sa xi ngu ni cha tichja cha. Hisca xi cjuehe jo jyan cha xi cavëë cha xcusun xi casahmi xuta changá jan ne, sehe nihñicuende jyé xi vincha cha. ²⁰ Peru me xi tisahmi jain cjuatsehen ne, tinoje cojo rë me xcun ni ngayéjé xuta ne, hacuaha yéjé ni xuta jan ne, tsacjun me cuma, hane sahmii me cjuatsehen. ²¹ Nihñi ngayéjé ni cjua hacutjin xi titsihindu ri. Hacuaha meje rë xi chuva xi nihñi cojo ngu ne, nihñi cojo ngayéjé ni xuta, sa xi vinga ri me o sa xi vingaain ri me. Hisca Nina cojo Cristu Jesús cojo ángel xi cavaxijin me ne, vëë me hacutjin xi titsihindu ri vi. ²² Cuechu nixtin xi cuma meje sa xuta xi cjuahatsja me xa ngajñi rë xuta ladu rë Cristu, sacuha ngu me xi cuitexa, o ngu me xi sahmi tu mé ni ngu xa xi cuma meje. Peru hacuiin marcu macjain cuinoje yo xuta xi satë rë xa jan. Ndaja ningatehetacuin titjun yo xuta xi ndaja me ta, tséhë xi mijí rë xi nenguishinjní cojo xuta tsehen. Hisca sove ne, mijí rë xi nihñi cjuatsehen.

²³ Ha quihndé xi cahyiin suvá ni nandá ta, sihi hitsë xan rë uva ngatsë rë cahntsue, hacuaha ngatsë rë chíhin xi tu quitaha tu quitaha sacu ri.

²⁴ Tjin xuta xi suvá tsejen tséhë me xi sahmi me cjuatsehen. Hane cjuatsehen ni rë me jan ne, vëhë sahmi xi cuma me castigu. Hacuaha tjin yahnga xuta xi matsijin tséhë me xi sahmi me cjuatsehen. Peru xi cuma ngascan ne, cuma tsejen xi cun xi má me cojo jyé rë me. ²⁵ Hacuaha ni tjin xcusun xi ndaja ta suvá tsejen. Hane ha ndaja sa hacuiin ngutjen cuma tsejen, peru hatuxa cumaji cuiyuhma ta, tjin xi cuma tsejen.

6

¹ Xuta ladu rē Cristu xi má mosu hndixahan rē ngu xuta ne, jemu meje rē xi cjuaharcun me xuta xi má nai rē me. Sa tsajin ne, choho cuma cuichja xuta tséhë Nina hacuaha cojo tséhë cjuachacun xi vicuyan. ² Hane me xi nai rē mosu hndixahan jan ne, sa xi macjain rē me Cristu ne, mijí rē xi choho scuëe hndixahan jan me, tséhë xi tangun ni macjain rē me Cristu. Cahndé rē xi choho scuëe rē me ne, meje rē xi cusecoo hndixahan jan me yéjé ni xa xi cuitexa me ta, tséhë xi me xi cuma tséhë yéjé ni cjuandaja xi sahmi hndixahan jan ne, xuta ladu rē Cristu me. Hane vëhë xi jemu hmucacun hndixahan jan me. Tinoje cojo xuta yéjé ni cjuá vëhë, hya xi cuicoye rē me.

Cjuandacha cojo cjuanchina

³ Sa xi ngu xuta vicuya me ngu cjuachacun xi hacjahi fi ne, sa xi manguaaincacun me cojo cjuá xi cjuaquixi xi cachja Nai naja Jesucristu ne, hacuaha manguaaincacun me cojo cjuachacun xi tséhë Nina ne, ⁴ me vëhë ne, ngu xuta xi jemu sahmi yjé me yojo rē me. Peru hvíin camaha ni me, hacuaha machjiriin cjuatacun rē me ta, tséhë xi jemu meje cisiajmi me tséhë tu mé ni cjuá: “Cuitjin vijne cjuá vëhë; jéya, cuatjin vijne”, chja me. Hatuxa jemu meje scaan me cojo cjuá ngajni rē cjuavisiajmi rē me. Hane xi cuatjin visiajmi me ne, vetjucaa cjuaxintacun, vetjucaa cjuahngatacun, hacuaha choho chja me tséhë xicjin me, choho tsingatahacacun me tséhë xicjin me, ⁵ hacuaha ngajan fë ngajan vetsihin ticjan me cojo cjuá, xi tsajin hiscan cijnetaha. Cuatjin sahmi me ta, tséhë xi ha cavetsun cjuatacun rē me ne, cjuá xi cjuaquixi ne, hvíin camahani me. Xi tsingatahacacun me ne, xuta xi faharcun rē Nina ne, jemu ndaja cuatju me cuma ta, jercu sacú rē me cjuanchina. ⁶ Bueno, quixi ta ndaja cuatjun cuma xi tsejen xi chjahanrcun rē Nina, sa xi cumangutacun cojo xi tjin naja. ⁷ Ta tsajin camahani mé quichahan xi catsin yaan xi cafehen ngasunhndé vi, hacuaha tsajin camahani mé xi cuma cuanguencojon, hya xi cueyan. ⁸ Peru sa xi ha tjin naja xi xiné cojo xi chajan ne, meje rē xi cojo vëhë ne, cumangutacun. ⁹ Peru xuta xi jemu meje rē me cuma nchina me ne, ndaya ndaya ni tsingatihin me xi cumandacha me xi sahmi me cjuatsehen. Xitu tsinguisenjní me ngajni rē cjuatsehen jan ne, ha quihndé cumaji cuetjuxin me, sacuatjin rē ngu chu xi jiyahñu cahntsua ngu chen. Hacuaha jemu cjín xcusun yumahasen xi meje rē me. Peru machjiriin xcusun jan ta, tu tsichaja tu tsinguetsun ni rē cjuatacun rē me. ¹⁰ Sacuaha xuta xi jercu meje rē me tujún ne, jemu cjín xcusun cjuatsehen sahmi me xi sacú rē me tujún. Yahnga me xi cuacun jan ne, hisca cavyujuxin me cjuachacun xi macjain naja. Hane ngatsé rē xi cavetjuxin me ne, vëhë xi jemu choho tivatju me jima.

Pablo ne, tsinguixi me Timoteo

¹¹ Peru ngaye xi ladu rē Nina ngaye ne, tihinxin tséhë xcusun xi cuacun vëhë. Tihin tjengui ndiya xi tséhë cjuaquixi, hacuaha nihñi hacutjin xi Nina chuya rē me. Ndaja catamacjain ri me, hacuaha ndaja nihmutacuin me. Caticaa ri xcun ngayéjé ni cjuacjintacun xi cuátji cuma, hacuaha nihñi jeya cjuatacun riji. ¹² Nihñi ngahñu xi yéjé ni xcusun xi nihñi ne, cumatangun cojo cjuatacun xi macjain ri, sehe sacú ri cjuahñu xatsé ngajan xcun Nina xi tsajin nixtin cjué. Tséhë vëhë xi Nina cavaxjin ri me. Hacuaha ha catehe cjuaquixi riji xcun jemu cjín xuta hacutjin xi macjain Jain ri Nina. ¹³ Nina xi tisua me cjuahñu rē ngayéjé ni xi tjin ne, vëë me hacutjin tivitexa ri. Hacuaha Cristu Jesús, me xi casua cjuaquixi rē xcun Poncio Pilatu ne, vëë me hacutjin tivitexa ri. ¹⁴ Cjuá xi tivitexa ri ne, tinohye. Hacuiin nindeye cjuá vëë ta nihñichihin, hisca xi cuechu nixtin xi cuinduva nga Nai naja Jesucristu. ¹⁵ Hane hya xi cuechutaha nixtin vëhë ne, Nina tsingatju nga me Jesucristu. Nina ne, me vëhë xi ndaja me, me vëhë xi tyahi me. Ngu ni me vëhë xi matitjun me. Matitjun me tséhë ngayéjé ni xi matitjun. Matitjun me tséhë ngayéjé ni xi vitexa. ¹⁶ Ngu ni me vëhë xi tsajin nixtin cueya me. Tacun me xcun ngu ndavá seti ndajyihí, xi tsajin yo cuma cuechu. Hacuaha tsajin yo cavëë rē me, hacuaha hisca ngu cumaji scutsejen rē me. Me vëhë xi catjaharcun xuta me. Me vëhë xi catitexa me yéjé ni nixtin yéjé ni hora. Cuatjin Jain.

¹⁷ Xuta xi jemu tjin rë me cjuanchina rë ngasunhndë vihi ne, titexe rë me xi hacuin sahmi yehe me yojo rë me. Hacuiin cuetaha cacun me cjuanchina xi tjin rë me ta, vëhë ne, tsajin cjuaquixi xi cjuecani rë. Peru catetaha cacun me Nina ta, Nina ne, hacuin choho me ta, me vëhë xi sua naja me yëjë ni xcusun xi ndajyih tsajan. ¹⁸ Hacuaha tinoje cojo rë xuta nchina xi cuacun jan ne, yehe cjuandaja catisahmi me cojo ngayëjë ni xuta. Mijí rë xi choho me. ¹⁹ Xi cuatjin sahmi me ne, tivetjo me cjuandaja xi sehe cumachjirëhë rë me, hacuaha sacú rë me cjuahñu xi cjuaquixi.

Cjua xi vijnetaha

²⁰ Ngaye Timoteo ne, chjehecende cjua xi ha ntse siu. Xi cavetinrcuiin cjuavisiajmi yumahesen xi chuyiin rë Nina tsëhë. Hacuaha xi cavetinrcuiin yëjë ni cjua rë xuta xi hisca ngajñi rë me matanguaain cjua rë me, handasa chja me xi jemu vechu cjuatacun rë me xi vijnercu me cjua. ²¹ Peru me xi cuatjin chja ne, ha cavetjuxin me tsëhë cjuachacun xi macjain naja.

Nina catisua nuju me ngayujun ni cjuandaja rë me.

Xujun xi majo xi catsihindu San Pablo cojo Timoteo

¹ Ngahan Pablo ne, apóstol tséhë Cristu Jesús má ngahan ta, tséhë xi cuatjin meje rë Nina. Véhë xi catsingatju ná me, xi cuichjá cojo xuta ta sua naja me ngu cjuahñu ndajyíhi, sa xi nihña tangun cjuatacun naja cojo Cristu Jesús. ² Ngaye Timoteo ne, tsihindu ri xujun vihi ta, tséhë xi sacuaha quihndi ndaja naha ngaye. Nina Nahmi naja cojo Cristu Jesús Nai naja ne, catamayuma rë me ngaye, catisua ri me cjuandaja, cjuajeya.

Tisua me cjuaquixi tséhë Nina

³ Nixtin nixten, hora xi sahme oración naha ne, jercu veyanangë ri, hacuaha suá nacuechji rë Nina. Hacuaha sahme xa rë Nina cojo ngu cjuatacun tyjahi, sacuahatjin casahmi xutachanga naha. ⁴ Vitsjen ná hacutjin cachjhinde, ngatsë rë xi cavétju cejé tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná. ⁵ Hacuaha vitsjen ná hacutjin xi jemu ndaja macjain ri cjua rë Nina, sacuaha tjin xi titjun camacjain rë chicuhun riji, chicuhun Loida, cojo na Eunice naa riji. Hane fémangúcacun xi cojo ngaye ne, ha cuatjin ndaja macjain ri.

⁶ Véhë xi chjá cojo ri ta xi catiin cahndé xi cjuë cjuatacun xi casua ri Nina, hya xi cavéhantza ri. ⁷ Ta Nina ne, hacuiin casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja. ⁸ Véhë xi hacuiin nihñi savá, hya xi cuinoje cjuandajyíhi tséhë Nai naja. Hacuaha hacuiin nihñi savá ngatsë naha ngahan xi tejñaya ndavaya, ngatsë rë xi chjá cjua rë me. Hacuiin nihñi savá ta, nihñi ngahñu cojo yéjë ni cjuañhi xi cuátji cuma, ngatsë rë cjuandajyíhi xi tinoje. Cuatjin nihñi hacutjin chutaha ngahñu xi tisua ri Nina. ⁹ Nina ne, cavaxëtje naja me hacuaha cavaxijin naja me, xi cuma tséhë me ngayaan. Hacuiin ngatsë rë xi jemu ndaja canihña xi cuatjin casahmi me ta ngatsë rë xi cuatjin meje rë me, tséhë xi jemu ndaja me. Hisca xi chaja sa cuejña ngasunhndë ne, ha catsingatahacacun Nina xi sua naja me cjuandaja rë me, ngayejen ni xi tséhë Cristu Jesús ngayaan. ¹⁰ Hane hya xi cafehe Cristu Jesús, me xi vaxëtje naja ne, hya camachaya Jain naja cjuandaja rë Nina jan. Hane Cristu jan ne, catsicjé me ngahñu rë cjuaveya, hacuaha casuacuenda naja me ta sua naja Nina ngu cjuahñu ndajyíhi, xi tsajin nu tsajin nixtin cueyan nga. Véhë cjuatacun xi vicuya naja cjuandajyíhi rë me.

¹¹ Nina ne, casua ná me xa xi suá cumachaya rë xuta hacuaha cuicuyá rë xuta cjuandajyíhi rë me. ¹² Ngatsë rë xa véhë ne, jemu cjín cjuañhi tivátju jima. Peru ma savaain ná, tséhë xi ha hvé Cristu, hacuaha camangucácun cojo rë me. Hacuaha tjin ná cjuaquixi xi me véhë ne, jyé me cojo cjuatacun rë me xi cuetjo ná me, hisca nixtin xi cuinduva nga me nguehe ngasunhndë.

¹³ Nihñi sacuaha tjin cjuaquixi xi ha cachjá cojo ri. Hacuaha nguñajatacuin catamacjain ri Nina, hacuaha nihñi hmutacuin xinguin, tséhë xi ngaye ne, ladu rë Cristu ngaye.

¹⁴ Nihñicuende cjuaquixi xi casua ri Nina. Hane Hasen rë Nina xi tacun cahntsua xahasen naja ngayejen ni xi macjain naja me ne, Hasen véhë xi sua ri ngahñu xi cuatjin nihñi.

¹⁵ Ngaye ne ha hye xi ngayéjë ni xuta xi tséhë ladu xi hmí rë Asia ne, casmicacun ná me. Ngajñi rë xuta xi cuacun jan ne, hinchajñi cha Figelo cojo cha Hermógenes. ¹⁶ Peru cha Onesíforo ne, catamayuma rë Nina yéjë ni ndava cha ta, tséhë xi jemu cjín ndiya xi casahmi cha cjuandaja xi cavisecoo ná cha. Hane cama savaain rë cha xi tejñaya ndavaya.

¹⁷ Xi tu cafehe cha nguehe nandya Roma ne, cavetsihin cavanguise cha ngahan, hisca xi casacu rë cha ngahan. ¹⁸ Nai naja ne, catamayuma rë me cha, nixtin hya xi cuinduva nga me nguehe ngasunhndë. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

Xuta xi ndaja sahmi me xa rë Cristu

¹ Peru ngaye tsan ne, catisua ri Cristu Jesús cjuandaja rë me, xi cuma cuinechin nguñajatacuin. ² Jemu cjín xuta xi hacuaha caviseñuju me yéjé ni cjua xi cachjá cojo ri. Peru quihndé ne, meje rë xi ticoye rë ngujo cha cjua jan, cha xi tsejen xi mangutacuin cojo rë hacuaha chutaha cjuatacun rë, sehe cha xi cuacun jan ne, hacuaha cuicuya cha xuta xi yahnga.

³ Ngaye ne, nihñi ngahñu xi scaa ri cojo yéjé ni cjuañihi xi cuátji cuma ngatsé rë Cristu Jesús, sacuaha tjin caa rë ngu sindadu xcun ngu si. ⁴ Hane sindadu xi hinchajñi cha tséhë xa xi yaha cha ne, cumaji tsinguisenhenjñi cha tu mé ni xa ta, tjin rë cha xi sahmi cha hacutjin xi chuya rë me xi matitjun tséhë cha. ⁵ Hacuaha ngu cha xi cuisehen xcun ngu juegu xi ntsavë cha ne, sa xi chohotjin ntsavë cha ne, sacuiin rë cha cjuatjo, handasa tjun cha cuetju cha. ⁶ Hacuaha cha xi sahmi xa nguijña ne, meje rë xi cha vëhë xi titjun satë rë cha tséhë xitjé xi casahmi cha. ⁷ Ndaja ningatehetacuin hacutjin cjua xi tichjá cojo ri. Sehe Nai naja ne, me vëhë sahmi me xi cuijnercui cjua vë.

⁸ Ninguitsjin xi Jesucristu ne, cavascaya rë me ngajñi rë nima, hacuaha canduva tjé rë me xutachanga naja David. Vëhë cjuandajyihu xi ngahan visiajme cojo xuta. ⁹ Hane ngatsé rë xi cuatjin visiajme cjuandajyihu jan ne, vëhë xi choho tivátju jima. Hisca quitahahñu rë xuta ngahan nguehe ndavaya, sacuaha tjin rë ngu xuta tsehen xi yehe jyé rë. Peru cjua rë Nina ne, hacuiin quitahahñu. ¹⁰ Vëhë xi ticaa ná ngayéjé ni cjuañihi xi tivátju jima, cojo sa xi yéjé ni xuta xi cavaxijin Nina ne, cuetjutje me ngatsé rë xi macjain rë me Cristu Jesús, hacuaha cuechu me xcun Nina ngajan cuiyuju me nu cjuí nu nduva.

¹¹ Cjua vihi ne jemu cjuaquixi:

Sa xi ha macjain naja Cristu hya xi cueyan ne, hacuaha cuinechan quicun nga cojo rë me;

¹² sa xi ha caca naja ne, hacuaha cuisecoon rë me cuitexan.

Sa xi ha canújan xi hyaan yo me ne, hacuaha ni tjin cuichja me ta hvíin me yo ngayaan.

¹³ Handasa ngayaan ne, nihñacheen cjua naja, peru me vëhë ne, hatuxa sahmi chihin me cjua rë me ta,

tséhë xi hatuxa vindachaain me.

Hacutjin xi Nina chuya rë me

¹⁴ Ninguitsjin rë xuta jan cjua xi chjá cojo ri. Hacuaha tinojetehe rë me xi ha quihndé scaain me cojo cjuavisiajmi rë me ta, tséhë xi cuatjin meje rë Nina. Venguiin camahani chjí rë xi cuatjin ticjan me cojo cjua ta, xi cuatjin sahmi me ne, tu titsinguetsun me cjuatacun rë xuta xi viseñuju. ¹⁵ Nihñi ngujyé xi Nina ne, chuya rë me tséhë xa xi tinihñi. Xi cuatjin ne, tsajin mé nihñi sava ta, tséhë xi ha chihin tivicoye rë xuta cjua xi cjuaquixi.

¹⁶ Xi caninguisinjñii ngajñi rë cjuavisiajmi ngarca xi tsajin mé machjiréhë xi visiajmi xuta ta, me xi cuatjin visiajmi ne, quihndé nga nchujun ne, tijima yehe sa cjuatsehen xi tjin rë me. ¹⁷ Hacuaha cjuavisiajmi rë me xi cuacun jan ne, tangun cojo hiscan xi hmu, xi quihndé nga nchujun ne, tijima tojo sa. Cuatjin tivatju cha Himeneo cojo cha Fileto ta,

¹⁸ tséhë xi ha cavetjuxin cha tséhë ndiya rë cjuaquixi. Chja cha ta quixiin xi cuascaya naja hya xi ha caveyan. Hane cojo cjua vëhë ne, titsinguetsun cha cjuatacun rë ngujo xuta xi macjain rë me Nina. ¹⁹ Peru Nina ne, cavejña me ngu cjuatacun xi hatuxa cjuaquixi, xi tsajin yo cuma tsinguetsun rë. Hacuaha jo cjua rë Nina xi hatuxa cjuaquixi. Ngu ne, chja cuitjin: “Nai naja ne, vëë me jarë xuta xi tséhë me”; ngu nga ne, chja cuitjin: “Yéjé ni xuta xi chja me xi ladu rë Nai naja me ne, meje rë xi catiyujuxin me tséhë cjuatsehen.”

²⁰ Ndava ngu xuta xi ndaja vatju me ne, jemu cjín xcusun trasti xi tjin. Tjin trasti xi tséhë oro cojo xi tséhë quicha. Hacuaha tjin xi tséhë ya cojo xi tséhë nihndé. Ngujo trasti jan ne, jemu machjiréhë. Hane ngujo nga ne, chuva machjiréhë. ²¹ Cuatjin naja ngayaan xuta ladu rë Cristu ta, jemu tecjanjñi ngayaan. Peru xi cuma yaan xuta xi vengui chjí rë ne, meje rë xi cuiyuju xen yéjé ni cjuatsehen. Xi cuatjin ne, cuma tyjahi cjuatacun

naja, cumachjirëhë rë Nai naja ngayaan, hacuaha tjin ndaja ngayaan xi nihñä yëjë ni cjuandaja.

²² Yëjë ni cjuatacun tsehen xi meje rë xuta xi chihndë me ne, ngaye ne, tiyijixin. Tihin tjengui ndiya rë cjuaquixi. Catjë catamac Jain ri. Tihin tjengui cjuahmutacun. Tihin tjengui cjuajeya, sacuaha tjin sahmi yëjë ni xuta xi cojo ngu cjuatacun tyahi fehya rë me Nai naja xi cuisecoo rë me. ²³ Hya xi tivinenguise xicjin xuta tsëhë cjua ngarca xi venguiin chjí rë ne, xi canihñicuendiin cjua xi chja me. Tsëhë xi ha hye ta tsëhë cjua vëhë ne, hatuxa cuetjucaa ngu si. ²⁴ Hane xuta xi sahmi xa rë Nai naja ne, mijí rë xi sircu me ta meje rë xi ndaja me cojo ngayëjë ni xuta. Meje rë xi quicun cacun me xi cuicuya me xuta. Meje rë xi yehe cacun me. ²⁵ Hacuaha xuta xi chuiin rë me tsëhë cjuaquixi ne, meje rë xi cuma quixi me, peru cojo cjuandaja cojo cjuajeya. Xi cuatjin ne, cuma xi sua Nina cahndé xi cuindeya cjuatacun rë xuta xi cuacun jan, hacuaha xi cuijnercu Jain me cjua xi cjuaquixi. ²⁶ Sehe hacuaha sacú nga rë me cjuatacun ndajyihi, hacuaha cuetjutje me tsëhë xitsehen matitjun xi cavindacha rë me. Cavindacha xitsehen xuta jan, xi casahmi me yëjë ni hacutjin xi meje rë xitsehen jan.

3

Nixtin xi cuijnetaha

¹ Catijnercui cjua vihi: hya xi cuma tiña nixtin xi cjuë ngasunhndë ne, jemu choho cuatju xuta cuma ta, ² tsëhë xi xuta ne, cuitjin sahmi me: meje rë me xi suvá ni me ndajyihi cuatju me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngamacun me; choho cuichja me tsëhë xicjin me hacuaha choho cuichja me tsëhë Nina. Cuihndiin me tsëhë xutacha rë me. Hisca ngu nacuechji naja suaain me, hisca ngu nacuechji rë Nina suaain me. Cuendaain rë me tsëhë Nina; ³ tsajin rë me cjuahmutacun; tsajin rë me cjuayumatacun; cuichja me cjuandesu. Hacuiin cuetjo me yojo rë me; jemu sahmi xcuahya me; chuiin rë me tsëhë yëjë ni cjuandaja. ⁴ Jo xcun jo hntsua me ta, cuiteña xicjin me; jemu tujyë sahmi me; jemu sahmi yehe me yojo rë me. Chuiin rë me tsëhë Nina ta cjuasua xi tsëhë ngasunhndë ne, vëhë jemu chuya rë me tsëhë. ⁵ Hacuaha sahmi me xcusun rë xuta xi macjain Jain rë Nina, peru tsitjungui me hacutjin xi cjuaquixi.

Xi caninguisnjñii cojo xuta xi cuacun vë ta, ⁶ tsëhë xi ngajñi rë me ne, hinchajñi cha xi vanguise chuva rë xi cuma cuisehen ndava xuta, hane cuindacha cha yachjin xi ha tsingatihiin mandacha. Tsingatihiin na mandacha na ta, tsëhë xi jemu va tjin cacun na tsëhë jyé rë na, xi tisahmi na yëjë ni hacutjin xi xahasen rë na meje rë. ⁷ Hacuaha yachjin jan ne, jemu vutaya na yëjë ni cjuatacun xatsë, peru hatuxa vijnircu na cjua xi cjuaquixi. ⁸ Ha hye ta hatsëë nixtin ne, jo cha surqui xi hmí Janes cojo Jambres ne, casahmi cha condra xutachanga naja Moisés. Hacuaha ni tjin rë cha ndacha xi cuacun jan ne, sahmi cha condra cjua xi cjuaquixi ta, cavetsun cjuatacun rë cha, hacuaha machjiriin cha xi cumac Jain rë cha Nina. ⁹ Hane hacuiin jemu xcun cuma cjue cha cojo cjua ndacha rë cha ta, tsëhë xi ngayëjë ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsëë nixtin.

Pablo ne, tsinguixi me Timoteo

¹⁰ Peru ngaye ne, jemu ndaja tichutaye cjua xi vicuyá cojo xcusun xi sahme cojo cjuatacun xi tjëngë. Hacuaha jemu ndaja hye hacutjin xi fë macjain ná, hacutjin xi jyé cùcun, hacutjin xi hmu cùcun, cojo hacutjin xi ndaja ticaa ná. ¹¹ Hacuaha ndaja camachaya ri tsëhë yëjë ni cjuañihi xi cavátju camá. Jercu choho cavátju camá ngajan nandya Antioquía cojo Iconio cojo Listra. Peru Nai naja ne, cavaxëtje ná me tsëhë yëjë ni cjuañihi xi cavátju camá jan. ¹² Hacuaha yëjë ni xuta xi meje cjuaharcun me Nina ta tsëhë xi macjain rë me Cristu Jesús ne, hatuxa tjin xi cuatju me cjuañihi. ¹³ Peru xuta tsehen cojo xuta ndacha ne, quihndë nga nchujun ne, tichaja sa cjuatacun rë me, xi vindacha me yahnga xuta ne, hacuaha jima ndacha suvá me.

¹⁴ Ngaye ne, hacuiin cuejñixin cjua xi cachutaye, cjua xi caf  ma ngu tacuin cojo. Ha hye yo xi cavicuya ri ta, ¹⁵ ts h  xi hisca cjuaquihndi riji ne, cachutaye xujun r  Nina. Hane xujun jan ne, v h  sua machaya ri xi Nina ne, cuax tje naja me, ngayaan xi macjain naja Cristu Jes s. ¹⁶ Nina ne, casua me cjuatacun r  me ngujo xuta, sehe xuta jan ne, catsihindu me xujun r  Nina. V h  xi xujun jan ne, jemu machjir h  xi cuicuya naja, xi cuichjataha naja, xi tsinguixi naja, xi cuincha naja ndiya r  cjuaquixi, ¹⁷ cojo sa xi ngayaan xuta ladu r  Nina ne, cuechutaha cjuatacun naja xi cuma nih n  y ej  ni cjuandaja.

4

¹ Tivutsejen naja Nina. Hacuaha tivutsejen naja Cristu Jes s, me xi tsichuva naja ngay ej  ni ngayaan xuta, sa xi quicun cuaha ngayaan, o sa xi caveyan. Ts h  xi cuinduva nga me, hacuaha ts h  xi cuitexa naja me ne, v h  xi chj  cojo ri ta ² tinoje cjua r  Nina cojo xuta. ¿H  chuya r  me? ¿h  chuyiin r  me? peru tsimii sahmi r , tinoje cojo r  me. Hacuaha tinojetehe r  me. Ninguixi me. Ticoye r  me. Peru niyy tacuin cojo r  me. ³ Cuatjin nih n  ta, ts h  xi cuetjucaa nixtin xi xuta ne, ha quihnd  chuyiin r  me ts h  cjua xi cjuaquixi. Sahmi me hacutjin xi meje r  me, hane cuihnd  me tu m  ni cjua xi cuicuya maestru xi yahnga ta, maestru xi cuacun jan ne, suv  cjua xi chuya r  xuta ne, v h  cuicuya me. ⁴ Cuatjin xi xuta ne, sahmi ngaxtun me cjua xi cjuaquixi ne, tu cuentu xi machjiriin ne, v h  cuetaha rcu me. ⁵ Peru ngaye ne, meje r  xi tacun cahnd  cjuatacun riji ngaj n  r  tu m  ni ngu cjuacjintacun. Hacuaha tehe tacuin ts h  y ej  ni cjuanihi. Tinoje cojo xuta cjua r  Nina, nih nichihin x  xi casua ri me.

⁶ Ngahan ne, chuva sa nixtin xi cju  ngahan. Ha cama ti n  nixtin xi cueya. ⁷ Ndaja casahme xa, casahmechehen xa xi casua n  Nina. Hacuaha ndaja macjain cuaha n  Nina. ⁸ V h  xi ha tjin ndaja cjuatjo xi sac  n , ts h  xi tyjahi cjuatacun naha. Nai naja, me xi tsichuva naja cojo cjuaquixi ne, me v h  xi sua n  me cjuatjo jan hya xi cuechutaha nixtin. Hacuaha hacuiin tu suva ni ngahan xi sua n  me ta cojo ngay ej  ni xuta xi jemu meje r  me xi cuya nga Nai naja.

Pablo ne, fehya me ngu cjuandaja

⁹ Nih n  xati tacuin ndove tjengui n  ta, ¹⁰ ts h  xi cha Demas ne, cavetjuxin cha tsahan, quiji cha ngajan nandya Tesal nica. Cuatjin casahmi cha ta, ts h  xi hits  sa chuya r  cha ts h  xcusun r  ngasunhnd . Cha Crescente ne, quiji cha ladu ts h  Galacia. Hane cha Tito ne, quiji cha ladu ts h  Dalmacia. ¹¹ Hane suv  ni cha Lucas quitaha cha cojo n . Noje cojo cha Marcos ne, sehe ndove cojo cha ta, ts h  xi jemu machjir h  cha xi cuisecoo n  cha ts h  xa xi sahme. ¹² Cha T quico ne, catsing tju cha ngajan nandya Efeso. ¹³ Hya xi cuindove ne, ndovecueje tsjian tsang  naha xi cavej n  ndava cha Carpo, ngajan nandya Troas. Hacuaha cojo xujun naha, hacuaha cojo y ej  ni sa xujun naha ne, ndovecueje.

¹⁴ Cha Alejandro chjine quicha ne, jemu choho casahmi cha cojo n . Peru Nai naja ne, sehe sahmingojo me cojo r  cha, chuva r  jy  xi tjin r  cha. ¹⁵ Hane ngaye ne, tjin ri cuidadu ts h  cha ta, ts h  xi jemu casahmi cha condra cjua r  Nina xi can ujin.

¹⁶ Hya xi tjun tjun casu  cjuaquixi naha xcun xutaxa r  ne, tsajin yo cavisecoo n . Y ej  ni amigu naha ne, cavetjuxin me tsahan. Hane catitsijy cacun Nina cojo me xi cuacun cavetjuxin tsahan jan. ¹⁷ Peru Nina ne, cavisecoo n  me, casua n  me ngah n , xi cama cachj  cjua r  me cojo y ej  ni xuta xi hacuiin ts h  naci n ts h  Israel. Hacuaha Nina ne, cavax tje n  me ts h  xuta xi meje tsiquehen n . ¹⁸ Hacuaha cuax tje n  Nai naja ts h  ngay ej  ni cjuatsehen, sehe cjuahatsja n  me ngajan ngahnga hiscan xi vitexa me. Me v h  xi hatuxa jy  me, hatuxa h n  me y ej  ni nixtin. Cuatjin Jain.

Tsinguijnetaha me cjua

¹⁹ Cha Aquila cojo chjuun r  cha, na Prisca ne, tehe r  me ngu nina naha. Hacuaha cojo xuta r  cha Ones foro ne, tehe r  me ngu nina naha. ²⁰ Cha Erasto ne, casetaha cha

nandya Corinto. Hane cha Trófimo ne, tséhë xi hmu rë cha ne, cafaña cha ngajan nandya Mileto. ²¹ Nihñi xati tacuin, ndove tjengui ná quihndë xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayejë ni xuta xi macjain rë cjua rë Cristu Jesús ne, tsingatju me nina riji.

²² Nai naja yaha ri me. Nina catisua nuju me cjuandaja rë me ngayujun ni.

Carta xi catsingatju San Pablo xi cafahatsja Tito

¹ Ngahan Pablo, sacuaha ngu mosu hndixahan tséhë Nina ngahan, hacuaha apóstol tséhë Jesucristu ngahan.

Jesucristu casuaxa me ngahan xi cuisécoo rë xuta xi cavaxijinjñi Nina, cojo sa xi cumacjain rë me tséhë Jesucristu, hacuaha cojo tséhë xi cumachaya rë me cjuaquixi rë Nina hane ndaja tsejen xi má me tséhë Nina. ² Jercu vetahan tacun xi sacú naja cjuahñu xatsë, tséhë xi cuatjin cachja Nina hisca hya xi chaja sa cuma ngasunhndë. Hacuaha Nina ne, vindachaain me cojo cjuá rë me. ³ Quihndë ne, jercu nixtin rë xi casua me camachaya naja tséhë cjuá rë me. Ngahan ne, casatëxa ná xi suá cumachaya rë xuta tséhë cjuá vëhë, tséhë xi Nina xi vaxëtje naja ne, cuatjin cavitexa me.

⁴ Tito, tsihindu ri carta vihi, ngaye xi sacuaha quihndi na ha ngaye, tséhë xi tangun mangutacun cojo Jesucristu. Nina Nahmi naja cojo Jesucristu xi vaxëtje naja ne, catisua ri me cjuandaja cjuajeya.

Xa xi sahmi Tito ngajan distritu Creta

⁵ Cavejñá ri hiscan distritu Creta, cojo sa xi ngaye nihñichihin yéjë xi cavyuju vasen, hacuaha cojo sa xi tehe xa ngu jo xuta xi cumatitjun me tséhë yungun tséhë jima ngu nandya sacuahatjin cavitexa ri. ⁶ Xuta xi cuatjin tehe xa rë me ne, meje rë xi jercu tyjahi xahesen rë me, hacuaha ngu ni chjuun rë xingu xingu me. Hacuaha meje rë xi quihndi rë me ne, ladu rë Jesucristu me, hacuaha xi tsajin cjuá rë me xi choho sahmi me o sa xi vihndiin me. ⁷ Cuatjin meje rë, tséhë xi xuta xi matitjun me sacuaha obispo ngajñi rë xuta rë yungun ne, me vëhë fahacuenda me tséhë ngu tsé ntu tséhë Nina. Vëhë xi meje rë xi jercu tyjahi xahesen rë me. Mijí rë xi xta me, mijí rë xi ngutjen ma xti rë me, mijí rë xi cha chihi me, mijí rë xi hngacacun me, mijí rë xi jercu vetahacacun me tujún xi sacu rë me ngajñi rë ngu cjuandacha cojo xicjin me. ⁸ Xi meje rë ne, xuta xi cumatitjun me jan ne, tjin rë me cjuandaja cojo xuta hincha ndiya, hatuxa sahmi me cjuandaja, yehe cacun me, tsajin jyé rë me, hacuaha jiya me ndiya rë Nina, hacuaha jercu yehe xahesen rë me. ⁹ Hacuaha meje rë xi cuetaha me yojo rë me tséhë cjuá xi cjuaquixi xi ha camá rë me, cojo sa xi cuma cueya me xahesen rë xingu xingu sa xuta cjuachacun xi cjuaquixi, hacuaha cojo sa xi cuma sahmi me xi cuijnecacun xuta xi chjataha me tséhë cjuachacun vëhë.

¹⁰ Meje rë xi xuta xi cuacun vë ne, tséhë xi jercu tjin xuta xi vihndiin me tséhë xutaxa rë yungun ne, jercu tjin xuta xi tujyé visiajmi me, jercu tjin xuta xi vindacha. Hatuxa ngajñi rë xuta tjé rë Israel xi cavisehen ladu tséhë Jesucristu ne, jercu tjin xuta xi cuacun vë. ¹¹ Sahmi nguyjé xi nihña xi hindé cuichjaain me, tséhë xi tsinguetsun me cjuatacun rë xuta tséhë yéjë ngu ndihya. Cuatjin sahmi me hya xi vicuya me ngu cjuá xi hisca mijí rë xi cuatjin cuicuya me. Hane cuatjin sahmi me, cojo sa xi sacú rë me tujún ngajñi rë ngu cjuandacha.

¹² Ngu profeta tséhë distritu Creta ne, ha suvá me vëhë xi cachja me tséhë xuta rë nangui rë me cuitjin: Yéjë ni xuta Creta ne, hatuxa ndacha me, jercu chu me, jercu vatjutaha jiné me, hacuaha jercu tséhë me. Cuatjin cachja me. ¹³ Hane jercu quixi xi cachja me. Vëhë xi hñu nojetehe rë me, cojo sa xi ndaja cumacjain rë me cjuachacun, ¹⁴ hacuaha cojo sa xi cuetaharcuaain me tséhë cuentu tséhë xuta tjé rë Israel o sa xi cjuá xi vitexa xuta xi tsindeya me cojo cjuandacha cjuá xi cjuaquixi.

¹⁵ Me xi tyjahi cjuatacun rë ne, tsajin mé xi tsavi xi cuma rë me. Peru me xi macjaain rë cjuachacun ne, tsajin mé xi tsavi xi cuma rë me ta hisca cjuatacun cojo xahesen rë me ne, ha camachocun. ¹⁶ Chja me xi vëe me Nina, peru yéjë ni xi sahmi me ne, tsingacun me xi quixiin. Xuta xi cuatjin cun ne, sahmi xi choho vëe Nina me. Hatuxa vihndiin me, hane machjiriin me xi sahmi me cjuandaja.

2

Cjuachacun xi cjuaquixi

¹ Cjua xi noje ne, meje rë xi matangun cojo cjuachacun xi cjuaquixi. ² Tinoje cojo yéjé ni xihin changá, hacuiin tsingatjutaha me xi cuihi me o sa xi siné me, hacuaha meje rë xi cuma chjahárcun rë me, meje rë xi yehe cacun me. Meje rë xi ndaja cumangucacun me cojo Nina, hacuaha ndaja tjin rë me cjuahmutacun, hacuaha ndaja scaa rë me tu mé ni cjuacjintacun. ³ Hacuanitjin ni tinoje cojo yéjé ni yachjin changá ne, meje rë xi jeya me, hacuaha mijí rë xi ndesu me, hacuaha mijí rë xi cuetaha me yojo rë me vinu. Meje rë xi cuicuya me yéjé ni xi ndaja. ⁴ Meje rë xi cuicuya me yéjé yachjin xi hitsé ni chuva nu rë ta meje rë xi tsilmucacun me xihin rë me cojo quihndi rë me, ⁵ hacuaha xi yehe cacun me, tyjahi xahasen rë me, hacuaha xi ndaja cjuahacuenda me cahntsua ndava me, hacuaha xi ndaja me, hacuaha xi cuihndé me tséhë xihin rë me. Cuatjin meje rë xi cuicuya na me, cojo sa xi tsajin yo choho cuichja tséhë cjua rë Nina.

⁶ Hacuaha ni tjin ni tinoje cojo yéjé ni xuta xi xihin xi hitsé ni chúva nu rë ta hacuaha meje rë xi yehe cacun me. ⁷ Hacuaha ngaye sove tejñi ntsacu tséhë cjuandaja. Hane hya xi cuicoye ne, meje rë xi jercu tyjahi cjuatacun riji, hacuiin xcuehyu cuinoje ta ⁸ suvá cjua xi ndaja, xi tsajin yo cuma cuichjataha tséhë. Cuatjin meje rë, cojo sa xi xuta condra riji ne, cuma sava rë me, tséhë xi tsajin mé xi choho cuichja me tsajan.

⁹ Tinoje cojo mosu hndixahan ne, meje rë xi cuihndé me tséhë yéjé cjua xi cuichja nai rë me. Meje rë xi ndaja me, hacuiin choho cjuayangu me tséhë nai rë me. ¹⁰ Mijí rë xi tsichéjé me ta meje rë xi tsingacun me xi cuma cumangutacun cojo rë me. Cuatjin meje rë xi sahmi me, cojo sa xi yéjé xuta ne, cumachaya rë me xi jercu ndajyihí cjuachacun rë Nina, me xi vaxétje naja.

¹¹ Nina ne, catsingacun me cjuandaja rë me, hane cjuandaja vë ne, hacui xi cuaxétje naja ngayejen ni xuta. ¹² Hacuaha cjuandaja vëhë ne, vicuya naja xi meje rë xi cueñaxen yéjé ni cjuatsehen cojo yéjé ni xcusun tséhë ngasunhndé xi meje naja, hacuaha vicuya naja xi meje rë xi tyjahi cjuatacun naja, meje rë xi tsajin jyé naja, meje rë xi nechanyan ndiya rë Nina xi tivanguen cojo ngasunhndé naja. ¹³ Meje rë xi cuatjin nihñá nguyéjé rë xi nechanyan rë nixtin ndajyihí xi jercu vetahantacun, nixtin xi cuetjuacatsejen cjuahasen ndajyihí rë Nina naja Jesucristu, me xi cuaxétje naja, me xi jercu jyé hnga me cojo hasen rë me. ¹⁴ Me vëhë ne, casua me yojo rë me xi cueya me ngatsé naja, cojo sa xi cuaxétje naja me tséhë yéjé ni cjuatsehen, hacuaha tsityjahi me ngayaan ne, sehe sahmi tséhë me ngayaan, hane ngayaan ne, jercu meje nihñá cjuandaja.

¹⁵ Tinoje yéjé cjua vëhë. Tinche ndiya xuta hacuaha tinojetehe rë me nguñajatacuin. Catiin cahndé xi yo sahmi chúva ri cojo cjuatacun riji.

3

Yéjé ni xcusun xi meje rë xi sahmi xuta ladu rë Jesucristu

¹ Ninguitsjin rë yéjé xuta ladu rë Jesucristu xi meje rë xi cuihndé me tséhë xutaxa rë xi vitexa, hacuaha meje rë xi yéjé ni nixtin ne, tjin ngu cacun me xi sahmi me cjuandaja. ² Tinoje cojo rë me ta mijí rë xi choho cuichja me tséhë hisca ngu xuta. Meje rë xi hacuiin hngacacun me ta xi meje rë ne, jeya me, hacuaha ndaja me cojo xcusun rë me cojo yéjé ni xuta. ³ Cuatjin noje cojo rë me, tséhë xi ngayaan ne, hacuaha jemu chúva ningatahantacun hatséé, hacuaha cavinuhyaan tséhë Nina, hacuaha cavinechanyaan ngu ndiya xi hacuiin hacui. Caninguisehen rcun cojo yéjé ni xcusun cjuasua. Cavinechanyan ngu ndiya rë cjuatsehen, ngu ndiya rë cjuixin. Xuta ne, choho cavéé me ngayaan, hacuaha choho cahyan xingueen xingu xingu ngayaan. ⁴ Peru Nina, me xi vaxétje naja ne, hya xi catsingacun me cjuandaja rë me cojo cjuahmutacun xi tjin rë me xi cuma rë yéjé ni xuta ngasunhndé ne, ⁵ cavaxétje me ngayaan. Hacuiin tséhë xi jercu ndaja canihñá ta tséhë xi yuma camá rë me ngayaan xi cavaxétje me ngayaan. Cuatjin cavaxétje me ngayaan hya xi casahmi me xi cavuya catsin ngayaan

hya xi catsityahi me ngayaan. Hacuaha cuatjin cavaxëtje me ngayaan hya xi casua naja me cjuahñu xatsë hya xi casua me ngayaan Hasen rë me. ⁶ Hane ngatsë rë cjuandaja xi casahmi Jesucristu, me xi vaxëtje naja ne, vëhë xi cuatjin jemu casua Nina ngayaan Hasen rë me, ⁷ cojo sa xi cjué jyé naja ngatsë rë cjuandaja rë Jesucristu, hacuaha chjahanntsan cjuahñu xatsë xi jercu vetahan tacun.

⁸ Yëjë ni cjua xi cachjá cojo ri vëhë ne, jemu cjuaquixi. Hacuaha meje ná xi cuinoje yasen yasen ni yëjë cjua vëhë cojo xuta xi camangucacun me cojo Nina, cojo sa xi me xi cuacun jan ne, sahmi me ngahñu xi sahmi me suvá cjuandaja. Yëjë ni cjua vëhë ne, jercu ndaja hacuaha jercu machjirëhë rë xuta. ⁹ Xín tejñi yëjë ni cjuavisiajmi xi hacuin machjirëhë; xín tejñi cjuavisiajmi tséhë ñihi rë yëjë xutachanga rë xingu xingu me; xín tejñi yëjë ni cjuavisiajmi tséhë xuta xi cjan cojo xicjin; xín tejñi yëjë ni cjuavixcan tséhë ley rë Moisés. Yëjë ni cjuavisiajmi vëhë ne, machjiriin hacuaha tu mahya cuisiajme. ¹⁰ Ngu xuta xi vaxë me ngu ngu xuta tséhë ngajñi rë xuta yungun xi cjue ladu rë me ne, tinojetehe rë me ngu ndiya o hisca jo ndiya. Xi cjué vëhë ne, hindë xicachasiin tséhë me, ¹¹ tséhë xi ngaye ne, ha hye xi ngu xuta xi cuatjin sahmi ne, jiya me ngu ndiya xi xín cjui, hacuaha sahmi me cjuatsehen. Hane cjuatsehen rë me jan ne, vëhë tsingacun xi cuaaintjin xi sahmi me.

Cjuacintacun tséhë suvá Pablo cojo Tito

¹² Hyá xi tsingátju Artemas o sa Tíquico xi cjuetjengui ri ne, nihñi nguyjë xi cuindove tjengui ná ngajan Nicópolis, tséhë xi tuxa ngajan cavejñángucácun xi tsingátju chan hnchan. ¹³ Tisecuee rë Zenas, me xi abogado me, cojo Apolos ne, catjindujú me cojo ndiya rë me, hane chjehécuende xi tsajin mé tsichaja rë me ndiya. ¹⁴ Hacuaha meje rë xi xuta naja ne, cuma rë me hacutjin sahmi me cjuandaja, cojo sa xi cuisecoo me ngajñi rë ngu cjuachaja xi jercu sahmi nguyjë. Meje rë xi cuengui chjí rë me cojo ngasunhndë rë me.

Pablo ne, tisua me ngu nina

¹⁵ Yëjë ni me xi siutahá cojo ná ne, tsingatju me ngu nina riji. Hacuaha tehe rë xuta xi hmucacun me ngayaan ngatsë rë xi tjin tangun cjuatcun naja cojo Jesucristu ngu nina. Nina ne, catisua nuju me cjuandaja ngayujun ni. Cuatjin Jain.

Carta xi Catsingatju San Pablo tséhë Filemón

¹ Ngahan Pablo, xi tejñaya ndavaya ngatsë rë xi sahme xa rë Jesucristu ne, tsihindu cojo Timoteo xingueen xujun vihi xi ningatjin nuju ngayun Filemón, ngayun xi jemu hmutacuin nuju, ngayun xi visecun niji xcun xa xi nechantahan. ² Hacuaha ningatjin nuju xujun vihi ngayun Apia, ngayun xi hacuaha xinguin nuju, cojo ngayun Arquipo, ngayun xi tangun canihñña cojo nuju ngahñu ngatsë rë cjuá rë Nina, cojo ngayujun sa xuta ladu rë Nina xi ma tangun ngayun ngajan ndava me vëhë. ³ Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxéndaja Pablo Filemón

⁴ Ngayun Filemón, hya xi veyanangë nuju ngajñi rë oración naha xi tisahme ne, nchunchujun ni ne, suá nacuechji rë Nina naha ta, ⁵ tséhë xi tivechutaha ná cjuá xi jemu tjin nuju cjuahmutacun cojo yëjë xuta ladu rë Nina hacuaha jemu tjin ngu tacún cojo Nai naja Jesús. ⁶ Hacuaha féhya rë Nina xi ngayun xi mangutacun cojo Nai naja sacuatjin niji ngayin ne, catuxaha sa me cjuatacun nuju xi cuijnercun yëjë ni cjuandaja xi tjin naja ngatsë rë xi tjin tangun cjuatacun naja cojo Jesucristu. ⁷ Jemu ndama ná, tai, hacuaha jemu sacu ná cjuetacun ngatsë rë cjuahmutacun xi tjin nuju ta, tséhë xi ngatsë nuju ne, casacu rë xahasen rë xuta ladu rë Nina cjuetacun.

Pablo fehya rë Filemón cjuandaja xi cuma rë Onésimo

⁸ Vëhë xi handasa tsacjun xi cuitéxa nuju mé xi ndatjin nihñu tséhë xi tjin tangun cjuatacun naha cojo Jesucristu ne, ⁹ peru hitsë sa chuya ná xi cjuéhya nuju tséhë xi ngajñi naja ne, jiya vasen xi hmí cjuahmutacun. Ngahan, Pablo ne, jemu changá ngahan hacuaha tejñaya ndavaya quihndë ngatsë rë xi sahme xa rë Jesucristu ne, ¹⁰ tiféhya nuju ngu cjuandaja xi cuma rë cha Onésimo, cha xi sacuaha quihndi naha tséhë xi camá cafaha cha cjuandajyঃ xi chja tséhë Jesucristu xi casuá rë cha nguehe ndavaya.

¹¹ Handasa camachjiriin nuju cha mosu hndixahan nuju cha Onésimo hatsëe nixtin jan ne, peru quihndë ne, hisca ngayun hisca ngahan ne, jemu machjiréhë naja cha.

¹² Quihndë ne, titsingátju nga nuju cha, hane meje ná xi chjuhunntsun cha sacuaha xi ngahan suva xi chjuhunntsun ná. ¹³ Hacuaha meje ná xi cuejña cha cojo ná, cojo sa xi cjuahacuenda ná cha ngojo nuju jinguyëjë rë xi tejñaya ndavaya ngatsë rë cjuandajyঃ xi chja tséhë Jesucristu. ¹⁴ Peru mijí sahme tu mé ni hya xi chaja sa cuinújun mé xi ndatjin xi sahme. Cuatjin ta, tséhë xi meje ná xi cjuandaja xi nihñu ne, hacuiin cojo cjuachan ta suvá cojo cjuasua nuju. ¹⁵ Cavetjuxin rë xuma quihndi tsujun ngujo nixtin cojo sa xi quihndë xi cuya cha ne, cuejñacahndë nga cha cojo nuju yëjë ni nu yëjë ni nixtin. ¹⁶ Peru ha quihndë hacuiin sacuaha ngu mosu hndixahan nuju cha xi cuejña cha cojo nuju ta sacuaha ngu xuta xi jemu vengui sa chjí rë me, sacuaha ngu xingun xi jercu hmutacún. Ngahan ne, jercu hmú cacún cha, hacuaha ngayun ne, hitsë sa ndaja hmutacún cha, hacuiin suvá sacuaha ngu xuta ni ta sacuaha ngu xuta ladu rë Nai naja.

¹⁷ Quihndë ne, ngayun Filemón ne, ngatsë rë xi ha hyun ta ngayaan ne, tangun ni mangutacun cojo Jesucristu ne, vëhë xi quihndë ne, chjuhunntsun cha sacuaha xi chjuhunntsun ná ngahan. ¹⁸ Hane sa xi mé choho casahmi cha cojo nuju, o sa xi quitjen cha tsujun ne, vëhë ne, tejñu ladu naha. ¹⁹ Ngahan Pablo ne, cojo letra naha suva titsihindu cjuá vihi; ngahan cuejñangojo vëhë. Mijí tsinguitsjén nuju xi ngayun ne, jemu quitjun camahani tsahan, tséhë xi casuá camachaya nuju cjuandajyঃ xi chja tséhë Jesucristu. ²⁰ Quihndë tai ne, tisecun ná hitsë ta ngayaan ne, tjin tangun cjuatacun naja cojo Nai naja; tuhun hitsë cjuetacun xahasen naha ta ngayaan ne, tjin tangun cjuatacun naja cojo Jesucristu.

²¹ Cuitjin tsihindu nuju ta, tséhë xi tjin ngu cácul cojo nuju ta cuinuhyun tsahan, hacuaha hvë ta hisca quisun sa nihñu tséhë cjuá xi chjá cojo nuju. ²² Hacuaha

tuhunndujun ngu cahndé hiscan xi cuitejña ta, ngahan ne, vetahácacun xi Nina ne, sua me cahndé cjuétjëngë nga nuju ngatsë rë xi cuatjin chjahyun rë me.

Tsinguijnetaha Pablo cja

²³ Epafras, me xi hacuaha jiya ndavaya cojo ná ngatsë rë xi sahmi me xa rë Jesucristu ne, hacuaha tsingatju me ngu nina tsujun ngayun Filemón. ²⁴ Hacuanitjin ni Marcos, Aristarco, Demas, cojo Lucas, me xi cuacun tangun sahmi xa cojo ná ne, hacuaha tsingatju me ngu nina tsujun.

²⁵ Catisehen cjuandaja rë Nai naja Jesucristu cahntsua xahasen nuju ngayujun ni. Cuatjin Jain.

Xujun xi camahindu xi cjuahatsja xuta xi visiajmi Hebreo

¹ Nixtin titjun ne, jemu cjín ndiya hacuaha jemu cjín chuva rë xi casua Nina camachaya rë xutachanga naja ngu cjua hya xi catsingatju me cjua cojo profeta rë me. ² Peru quihndé nixtin vihi ne, casua me camachaya naja hya xi catsingatju me cjua cojo Quihndi rë me. Hane me vëhë xi cachja Nina xi cuma Nai rë yëjë ni xcusun xi tjin ngasunhndé, hacuaha casuaxa Nina Quihndi rë me jan xi me vëhë casahmi me ngasunhndé. ³ Hacuaha sacuatjin jemu jyë hnga Nina cojo hasen ndajyihi rë me ne, cuatjin jyë hnga Quihndi rë me cojo hasen rë. Hacuaha sacuajyihi suvá Nina ne, cuajyihi camahani Quihndi rë me. Hacuaha Quihndi rë Nina jan ne, yahangui me yëjë ni xcusun xi tjin ngasunhndé cojo cjua rë me xi jemu hñu ngahñu rë. Hane xi cafë catsityjahi me xuta tsëhë jyë rë ne, sehe quiji me ngahnga, cavejña me taha ladu quixi tsëhë Nina.

Hitsë sa matitjun Quihndi rë Nina xi cumá rë yëjë ni ángel

⁴ Hacuaha tu tjin xi hitsë sa jemu ndajyihi xa xi casacu rë Quihndi rë Nina xi cumá rë xa xi casacu rë ángel ne, hacuanitjin ni cavechutaha me xi hitsë sa jemu camatitjun me tsëhë ángel xi cuacun jan, hya xi quiji cavejña me cojo Nina. ⁵ Hisca xi ngu ángel ne, cachjaain Nina cojo cjua vihi, sacuatjin cachja me cojo Quihndi rë me:

Ngaye xi quihndi naha ngaye;
hacuaha quihndé casuáxa ri.

Cuatjin cachja me. Hacuaha cachjaain me tsëhë ngu ángel cuitjin:

Ngahan cumá ngahan nahmi rë cha,
hane cha vëhë ne, cumá cha quihndi naha.

Cachjaain me cuatjin cojo ángel. ⁶ Hane ngu ndiya nga, hya xi tsingatju me Quihndi ngu rë me ngasunhndé ne, cuitjin chja me tsëhë Quihndi rë me:

Yëjë ni ángel naha ne, catjharcun rë me.

Cuatjin cachja me. ⁷ Hane xi tsëhë ángel rë me ne, cuitjin chja me:

Ngahan sahme xi ángel naha ne, tangun xcusun rë cojo tjo,
hane ángel xi fahacuenda xa naha ne, sahme xi tangun xcusun rë cojo ndihu.

Cuatjin cachja me. ⁸ Peru xi tsëhë Quihndi rë me ne, cuitjin chja me:

Ngayun Nina, tsajin nu tsajin nixtin cuijnetaha gubiernu nuju,
hacuaha gubiernu xi nihñu ne, hatuxa cjuaquixi.

⁹ Canihmutacun cjuaquixi hane choho cahyun cjuatsehan;

hane vëhë xi ngahan Nina nuju ne, cavaxejen nuju,
hacuaha hitsë sa jyë cjuasua casuá nuju ngayun
xi cuma rë xingun.

Cuatjin cachja me. ¹⁰ Hacuaha chja nga me cuitjin:

Ngayun, Nai naha, ntsacu cavetsihin ne, ngayun canindujun nangui;
hacuanitjin ni ngahnga, hacuaha ngayun canindujun.

¹¹ Yëjë xcusun vëhë ne, cuechu nixtin xi cjuë,
peru ngayun ne, tsajin nu tsajin nixtin xi cjuë ngayun.

Hacuaha yëjë xcusun vëhë ne, cuma changá sacuatjin rë ngu tsjian xi chajá rë;

¹² hacuaha cuechu nixtin xi nijeyun xcusun xi cuacun vë sacuaha ngu tsjian tsjanga,
hacuaha nindeyun sacuaha vindeya ngu tsjian xi chajá rë.

Peru ngayun ne, hatuxa vindeyaain ngayun;
hacuaha nixtin nuju ne, hatuxa cuijnitaain.

Cuatjin cachja me. ¹³ Hacuaha hisca ngu ángel ne, cachjaain Nina cojo rë cjua vihi,
sacuatjin cachja me cojo Quihndi rë me:

Tinechin nguehe ladu quixi naha,
hisca hya xi yëjë ni xi sahmi ri condra ne, cuiyujú ngahan ngahma gubiernu riji.

¹⁴ Sacuaha ángel ne hacui hasen xi tsuyihiya tixa tséhë Nina. Nina tsingatju me ángel xi cuacun vë xi fehe visecoo naja ngayaan xi cuetjuntjen tséhë jyé naja.

2

Mijí rë xi chasen cjuandajyihí xi chja hacutjin cuetjuntjen

¹ Véhë xi meje rë xi hitsë sa ndaja cuetahanrcun cjuandajyihí xi cavisiñuju, cojo sa xi hacuiin tu hitsë tu hitsë ne, cuetjunxen tséhë ndajyihí xi tivanguen. ² Ta sacuaha ley rë Nina xi cachja ángel hatsëë nixtin ne, tjin Jain rë ngahñu. Hane yéjë xuta xi casahmi cjuatsehén hacuaha cahndiin me tséhë ley jan ne, camá me castigu sacuatjin xi mameje rë jyé rë me. ³ Hacuaha ngayaan ne, cumaji cuatjuhnga ngayaan tséhë castigu xi satë naja, sa xi chasen cjuandajyihí xi jercu tu ndajyihí camahani xi chja hacutjin cuetjuntjen. Cjuandajyihí véhë ne, titjun Nai naja cachja me, hane xuta xi cahndé me cjua rë Nai naja ne, hacuanitjin ni cachja me cojo naja xi camá ngascan. ⁴ Hacuaha Nina ne, cojo jemu cjín cjuarcun xi ña qujircun naja hisca carcun cachutsejen ne, casua me camachaya naja xi cjuandajyihí véhë ne, cjuaquixi Jain. Hacuaha hya xi casua naja Nina Hasen rë me sacuatjin cavejñangucacun me ne, cuatjin xi casua me camachaya naja xi cjuandajyihí véhë ne, cjuaquixi Jain.

Hacutjin vaxéte naja cjuaveya rë Jesús

⁵ Nina ne, cachjaain me xi ngahma gubiernu rë ángel cuejña ngasunhndé, hya xi cuinduva me sahmi me gubiernu ngasunhndé xi tinújan tséhë vi. ⁶ Tjin ngu cahndé tséhë xujun rë Nina xi cachja ngu xuta cojo Nina cuitjin:

¿Mé vengui chjí niji ngayin xuta, xi cuatjin ninguitsjun niji?

¿Mé vengui chji niji xi cuatjin chjuhuncuendun niji?

⁷ Ngayun ne, ngujo nixtin ne, hitsë sa caninguijnu niji xi cuma rë ángel, Peru canihñu yehe canihñu hnga niji cojo cjuatacun niji hacuaha canihñu xi chjihin-jedin;

⁸ yéjë ni xcusun xi tjin ngasunhndé ne, caviyujun ngahma gubiernu niji ngayin xuta.

Cuatjin cachja ngu xuta cojo Nina. Hya xi cuatjin caviyujun Nina yéjë xcusun xi cuacun vë ngahma gubiernu rë xuta ne, yéjë ni caviyujun me, hisca ngu xcusun catsicanguin me. Peru hisca quihndé ne, cjéë chan xi yéjë xcusun xi cuacun vë ne, cuiyujun ngahma gubiernu rë xuta. ⁹ Peru xi hyan ne, Jesús, xi ngu jo nixtin ne, hitsë sa catsinguijne Nina me xi cumá rë ángel, Peru quihndé ne, casahmi jyé casahmi hnga Nina me cojo hasen rë me hacuaha casahmi me xi Jesús ne, cjuahájenda me. Cuatjin casahmi Nina cojo rë me tséhë xi jemu jyé cjuañihi cavatju me hya xi cahme me. Cuatjin camá cojo sa xi cojo cjuandaja rë Nina ne, Jesús cueya me ngatsë rë yéjë ni xuta.

¹⁰ Nina ne, casahmi me yéjë ni xcusun xi tjin, tséhë xi cuatjin chuya rë me. Hacuaha meje rë me xi jemu cjín quihndi rë me xi cuma yehe cuma hnga cojo cjuatacun rë. Véhë xi ndatjin xi sahmi Nina xi ngajñi rë cjuañihi xi cavatju Jesús, me xi vaxéte naja ne, cuechutaha me yéjë ni hacutjin xi meje rë Nina xi cuechutaha me. ¹¹ Me xi tiviyujuxin rë xuta xi cumá tséhë Nina me cojo yéjë ni xuta xi tiviyujuxin ne, ngu ni nahmi rë me. Hane véhë xi me xi Quihndi rë Nina ne, ma savaain rë me xi chja me xi xicjin me xuta xi cuacun jan, ¹² sacuatjin chja me xcun xujun rë Nina xi chja me cuitjin:

Suá cumachaya rë yéjë xingueen yo ngayun,

hacuaha cuaxéndaja nuju sé tsujun ngajñi rë me hiscan xi matangun me.

Cuatjin cachja Quihndi rë Nina. ¹³ Hacuaha chja nga me cuitjin:

Hacuaha ngayun xi cumangu cácul cojo nuju.

Cuatjin cachja nga me. Chja nga me cuitjin:

Nguehe cuajyihí ngahan cojo yéjë quihndi nuju xi catuhun ná.

Cuatjin cachja me.

¹⁴ Tséhë xi ngayaan quihndi rë Nina ne, tjin jni tjin yojo naja ne, vëhë xi Jesús ne, hacuaha casacu rë me jni casacu rë me yojo rë me, cojo sa xi ngatsë rë cjuaveya rë me ne, cjuahataha me ngahñu rë xitsehén xi matitjun xi vitexá rë cjuaveya. ¹⁵ Hacuaha ngatsë rë cjuaveya rë me ne, ma sahmi ndaya naja me ngayejen ni xuta xi rcun cjuaveya. Hane tséhë xi cuatjin rcun cjuaveya ne, vëhë xi sacuaha xi cjuaveya ne, cavitexa naja xcun cjuahñu naja. ¹⁶ Ha cjuaquixi ta hacuin canduva me xi cuisecoo me ángel ta xi canduva me ne, tséhë xi cuisecoo naja me ngayaan xuta tjé rë Abraham. ¹⁷ Hane ngatsë rë vëhë xi casahmi nguyjé xi camá me sacuaha ngayaan cojo ngayéjé ni chuva rë sacuatjin cun ngayaan xicjin me, cojo sa xi hacuaha cuma me ngu nahmi xi matitjun xi tjin rë me cjuayumatacun, hacuaha jemu ndaja sahmichihin me xa rë Nina, hacuaha cojo sa xi cuechjitje me jyé naja. ¹⁸ Hane tséhë xi cuatjin suvá Jesús cavatju me cjuañihi hya xi cafhachuva xitsehén me ne, vëhë xi quihndé ne, hacuaha cuma cuisecoo naja me ngayaan hya xi tifahachuva naja xitsehén.

3

Hitsé sa jyé hnga Jesús cojo hasen rë me xi cumá rë Moisés

¹ Ngayujun ni xuta ladu rë Nina xi cavaxijin nuju me xi cuma tséhë me ngayun ne, cuiasajme hitsé tséhë Jesús, me xi catsingatju Nina xi sua cumachaya naja tséhë cjuachacun xi nújan xi macjain naja, me xi hacuaha má nahmi xi matitjun tséhë cjuachacun xi nújan xi macjain naja. ² Jesús ne, jemu ndaja casahmichihin me yéjé hacutjin xi meje rë Nina xi casuaxa rë me, sacuatjin casahmi xutachanga naja Moisés hatséxi hacuaha jemu ndaja casahmichihin me xa xi cavisecoo me xuta rë Nina. ³ Jesús ne, vechú chuva rë xi hitsé sa cuma jyé cuma hnga me cojo hasen rë me xi cuma rë Moisés. Má sacuatjin rë ngu cha xi sahmi ngu ndihya, xi vechú chuva rë xi hitsé sa chjaharcun rë cha xi cuma rë ndihya xi casahmi cha jan ta, ⁴ tséhë xi yéjé ni ndihya ne, tjin ngu xuta xi casahmi me, vëhë xi camá, peru me xi casahmi yéjé ni xcusun xi tjin ngasunhndé ne, hacui Nina. ⁵ Moisés ne, ngu xuta xi sahmi xa rë Nina ni má me, hane jemu ndaja chihin casahmi me xa xi casatéxa rë me ngajní rë yéjé ni xuta rë Nina. Hane xa xi casahmi me jan ne, xi catsingasca rë me cjuatacun rë xuta tséhë cjua xi cuichja Nina cuma ngascan. ⁶ Peru Cristu ne, Quihndi rë Nina camahani má me, hane jemu ndaja chihin casahmi me cuidadu yéjé ni xuta rë Nina. Xuta xi cuacun vë ne, hacui ngayaan, sa xi hacuin nismetacun cjuatacun xi rcun camahani hacuaha sa xi hacuin nismetacun cjuasua xi tjin rë xahasen naja xi vetahan tacun Nina.

Cjuahajenda tangun xuta rë Nina cojo rë me

⁷ Vëhë xi meje rë xi cuetuñuncun cjua xi chja Hasen rë Nina xi chja cuitjin:
Sa xi cuiñuju cjua xi chjá quihndé ne,
⁸ hacuin nihñu taja tacún sacuatjin casahmi xuta hya xi cachjataha me Moisés
hacuaha cafhachuva ná me ngajan hiscan jemu xín tséhë nandya.
⁹ Hane ngajan cafhachuva ná xutachanga nuju,
handasa ha cavëe me yéjé cjuandaja xi casahme cahntsua yachan nu xi catsuyihiya me
jan.

¹⁰ Vëhë xi camacjan ná cojo yéjé xuta xi caviyuju nixtin hya,
cuitjin cachjá tséhë me: "Cjuatacun rë me ne, hatuxa hacjahi ndiya fi,
hvín me ndiya naña." Cuatjin cachjá.

¹¹ Vëhë xi camacjan ná cojo rë me hane cachjá quixi xi
tsajin nu tsajin nixtin xi cuisehen cjuahajenda tangun me cojo ná.
Cuatjin cachja Hasen rë Nina.

¹² Nechun cuidadu, ngayujun ni, cojo sa xi tsajin hisca ngu ngayun xi cumatseen
cjuatacun nuju hacuaha cumacjaain nuju tséhë me, sa tu cjuatacun tsehen jan ne,
cuaxëxin nuju tséhë Nina xi quicun me. ¹³ Cahndé rë vëhë ne, nchunchujun ni ne, tuhun
cjuetacun xingun xingu xingu ngayun jinguyéjé rë xi tjin sa hora quihndé, cojo sa xi

tsajin ngu ngayun xi cuma taja cjuatacun nuju ngatsë rë cjuandacha xi sahmi cjuatsehan.
¹⁴ Ta cojo ngayaan satë naja cjuandaja xi tjin rë Cristu, sa xi scaa jain naja cumangutacun hisca xi cuijnetaha nixtin naja, sacuatjin camangutacun ntsacu cavetsihin.

¹⁵ Tetuhunrcun nga sacuatjin chja xujun rë Nina xi chja cuitjin:
 Sa xi cuišnuju cjua xi chjá quihndë ne,
 hacuiin nihñu taja tacún sacuatjin casahmi xuta hya xi cachjataha me Moisés.
 Cuatjin chja xujun rë Nina. ¹⁶ ¿Yo me xi cuatjin cachjataha rë Moisés hya xi cavatju cavisiňuju me cjua rë Nina ni? Yéjë ni xutachanga naja xi cavaxëxin Moisés tséhë nangu Egipto. ¹⁷ Hane ¿yo me xi camacjan rë Nina cojo rë cahntsua yachan nu ni? Ha hacui ni me changá xi cuacun vë xi casahmi cjuatsehan hane cahme me ngajan hiscan jemu xín tséhë nandya. ¹⁸ Hane ¿yo me xi cachja quixi Nina cojo xi tsajin nu tsajin nixtin xi cuisehen cjuahajenda tangun cojo me ni? Ha hacui ni me changá xi cuacun vë xi cahndiin tséhë Nina. ¹⁹ Hane cuatjin camá xi camaji cavisehen cafahajenda me ngajan, tséhë xi camacjaain rë me.

4

¹ Véhë xi jinguyéjë rë xi tacun quicun cjua xi cachja Nina xi ciesen chjahanjandan tangun cojo rë me ne, meje rë xi cumacjíntacun sá tu tjin ngu ngayun xi cuechuntuun xcusun ndajyihi vëhë. ² Ngayaan ne, hacuaha cojo ngayaan camachaya naja cjuandajyihi vëhë sacuatjin camachaya rë xutachanga naja xi cuacun jan; peru me xi cuacun jan ne, tsajin mé camachjiréhë rë me cjua xi cavisiňuju me jan ta, tséhë xi hya xi cavisiňuju me cjua jan ne, camacjaain rë me. ³ Peru ngayaan xi camacjain naja ne, cuma ciesen chjahanjandan tangun cojo rë Nina. Sacuatjin xi ha cachja me tséhë cjuandajyihi vëhë, xi cachja me cuitjin:

Véhë xi camacjan ná cojo rë me hane cachjá xi
 tsajin nu tsajin nixtin xi cuisehen cjuahajenda tangun me cojo ná.
 Cuatjin cachja me. Nina ne, catsinguijnetaha me xa xi sahmi me hisca hya xi casahmi me ngasunhndë; ⁴ hacuaha tjin ngu cahndé tséhë xcun xujun rë me ne, cachja me tséhë nixtin xi má yatu jan cuitjin:

Ngahan ne, nixtin xi má yatu ne, cafahájenda tséhë yéjë ni xa xi casahme.
 Cuatjin cachja me. ⁵ Hacuaha ha xujun vëhë ni ne, cachja nga me cuitjin:
 Tsajin nu tsajin nixtin xi cuisehen cjuahajenda tangun me cojo ná.
 Cuatjin cachja me. ⁶ Hane tséhë xi chaja sa cuisehen yahnga xuta xi cjuahajenda tangun me cojo Nina ne, hacuaha tséhë xi xutachanga naja xi cojo tjun camachaya rë cjuandajyihi jan ne, cavisiin me cafahajenda tangun me, ngatsë rë xi cahndiin me tséhë cjua xi tjun camachaya rë me jan ne, ⁷ vëhë xi Nina ne, cavejña nga me ngu nixtin, xi hacui quihndë. Jemu tséé cavatju nixtin xi cavitexa Moisés, hya xi catsihindu xutachanga naja David cjua rë Nina xi ha canújan titjun xi chja cuitjin:

Sa xi cuišnuju cjua xi chjá quihndë ne,
 hacuiin nihñu taja tacún.
 Cuatjin cachja Nina. ⁸ Sa xi xutachanga naja Josué quijicojo me xuta xi cjuahajenda tangun cojo Nina ne, Nina ne, hacuaha cachjaain me xi camangascan xi tjin sa ngu nixtin xi cuiseen chjahanjandan tangun cojo rë me. ⁹ Ngajan xi tjin sa ngu nixtin xi cuisehen xuta rë Nina cjuahajenda tangun me cojo Nina. ¹⁰ Ta xuta xi visehen fahajenda tangun cojo Nina ne, hacuaha fahajenda me tséhë xa xi casahmi me sacuatjin cafahajenda Nina tséhë xa xi casahmi me. ¹¹ Ngajan xi meje rë xi nihñu ngahñu xi cuma ciesen chjahanjandan cojo rë Nina, cojo sa xi hisca ngu ngayaan ne, hacuiin nihñu sacuatjin casahmi xuta xi cahndiin me tséhë Nina.

¹² Cjua xi chja Nina ne, quicun jain, hacuaha jemu tjin rë ngahñu, hatuxa vetjucaa. Sacuaha xi hitsë sa yuju xi cumá rë quicha xi jo yuju rë, xi vatjucja rë hisca hasen naja, hacuaha handasa hiscan hinchacoo ninda naja ne, cuatju, cuechu hisca ngajñi rë

xineninda naja. Cjua xi chja Nina jan ne, vëë hacutjin ningatahantacun, hachuha vëë hacutjin má rë xahasen naja.

¹³ Hisca ngu xcusun xi Nina catsindaja me ne, cumaji chahma xi cumá rë me; yëjë ni xcusun vëhë ne, tjin tsejen xi cuma rë Nina, me xi tahancuendan rë yëjë ni xcusun xi canihña.

Jesús ne, hacui me xi má nahmi xi matitjun

¹⁴ Jesús, Quihndi rë Nina ne, hacui me xi nahmi xi matitjun xi tjin naja. Jemu ndaja camahani me, hachuha cavatjutaha me ngahnga, sehe cavechu me xcun Nina. Vëhë xi meje rë xi hacuiin nismetacun cjuachacun xi nújan xi macjain naja. Cuatjin meje rë ta, ¹⁵ tséhë xi nahmi xi matitjun xi tjin naja ne, ma mayuma rë me ngayaan xi jemu chuva tacun ta, tséhë xi me vëhë ne, hachuha cavatju me camá yëjë ni cjuacjintacun sacuatjin vatjun ngayaan má. Peru handasa cuatjin cavatju me camá ne, hisca ngu cjuatsehen ne, casahmii me. ¹⁶ Vëhë xi meje rë xi rcun camahani xi nihña tiña tséhë Nina, me xi sahmi naja gubiernu cojo cjuandaja. Nihña tiña cojo sa xi chjahanntsan cjuayumatacun rë me, hane hachuha sacú naja cjuandaja rë me xi cuisecoo naja hora xi mameje rë.

5

¹ Yëjë ni nahmi xi matitjun xi tuxijin rë ngajñi rë xuta ne, satë xa rë me xi visecoo me xuta, cojo sa xi sahmi tiña xuta tséhë Nina. Hachuha nahmi xi cuacun vë ne, satëxa rë me xi sua me yëjë ni xcusun cjuatjo cojo Nina ngatsë rë cjuatsehen xi sahmi xuta. ² Nahmi xi cuacun vë ne, ma tsijyécacun me cojo xuta xi hvíin camahani hachuha cachaja tséhë ndiya rë Nina ta, tséhë xi nahmi vë ne, hachuha chuva cacun me. ³ Vëhë xi tjin rë me xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi jingu sa xuta.

⁴ Tsajin ngu xuta xi cojo cjuatacun rë suvá ni me ne, cjuaha me ngu xa ndajiyi vëhë ta me xi cjuaha ne, me xi suvá Nina cuichja me xi satë rë, sacuatjin cavatju xutachanga naja Aarón camá. ⁵ Hacuanitjin ni rë Cristu ta, hacuiin casahmi jyé casahmi hnga suvá me yojo rë me xi cuma me ngu nahmi xi matitjun ta me xi cachja xi cuma me nahmi ne, hachuha Nahmi, xi cachja me cuitjin:

Ngaye xi quihndi naha ngaye;
hachuha quihndé casuá xa ri.

Cuatjin cachja Nina. ⁶ Hachuha chja me jingu sa cahndé tséhë xujun rë me cuitjin:

Ngaye xi nahmi ngaye yëjë nu yëjë nixtin
sacuaha camá Melquisedec hatsëë nixtin.

Cuatjin cachja Nina. ⁷ Hane jinguyéjë rë xi Cristu tacun sa me cjuahñu cojo yojo rë me ne, hora xi cafehya rë me Nina, Nina xi tjin rë chuva rë xi cuaxëtje rë me tséhë cjuaveya ne, jercu cajindaya me hachuha jercu cajihnda me. Hane cafahacuenda Nina cjua rë me ta, tséhë xi jemu cafaharcun me Nina. ⁸ Cristu ne, handasa Quihndi rë Nina me xi cjuaquixi, peru cjuañihi xi cavatju me camá nguehe ngasunhndé ne, vëhë hitsë sa cavicuya rë me mé vijne xi nuhyan tséhë Nina. ⁹ Hane xi cuatjin casahmi Nina xi cavechutaha Jesús yëjë ni hacutjin xi meje rë Nina xi cuechutaha me ne, vëhë xi Jesús ne, ma vaxëtje me yëjë ni xuta xi vihndé tséhë me, hachuha tsajin nu tsajin nixtin xi cuatju xuta xi cuacun vë castigu.

¹⁰ Hane hachuha Nina casuaxa me Jesús xi má me nahmi xi matitjun sacuaha camá Melquisedec hatsëë nixtin.

Mijí rë xi nismetacun ndiya rë Nina

¹¹ Sacuaha tséhë cjuatacun vëhë ne, jemu tjin cjua xi cuinújin cojo nuju, peru jemu chja cuátjin xi tihincuendin nuju ta, tséhë xi hacuiin ndaja meje cuiñuju. ¹² Ngayun xi ha jemu tséë nduvun chutayun cjua rë Nina ne, ha tivicuyun rë xuta cjua rë Nina. Peru cahndé rë xi ha tivicuyun ne, tu ngayun meje rë ngu xi cuicuya nga nuju cjua xi tjun tjun chutaya rë tséhë cjua rë Nina. Sacuaha xi mameje rë xi cuyun siuhun nga lechi,

cahndé rë xi xinu niñu. ¹³ Sacuaha quihndi langa ne, vëhë xi suvá lechi hvi, hacuaha hvíin camahani mé xi ndaja o mé xi ndajin. ¹⁴ Peru sacuaha niñu xi chinë ne, xuta changá xi jinë me, xuta xi ha vëë me mé xi ndaja mé xi ndajin ta, tséhë xi cjuatacun rë me ne, ha jemu nduva sahmixa.

6

¹ Quihndé ne, meje rë xi cuejñaxen hitsë cjuachacun xi cachutayan hya xi tjun tjun camangutacun cojo Cristu, hane chutayan jingu sa cjua xi hitsë sa chja, cojo sa xi cuejñachihin ndaja cjuatacun naja. Mijí rë xi cuyan chutayan nga cjua xi ha cama naja titjun, sacuaha cjua xi chja xi meje rë xi cuejñaxen rë yëjë xcusun xi machjiriin xi nihñu; sacuaha cjua xi chja xi meje rë xi cumangutacun cojo Nina; ² sacuaha cjua xi chja xi meje rë xi cuma tyjahi vihi cuma tyjahi vëhë xi cuma rë Nina; sacuaha cjua xi chja xi meje rë xi cuisanentsan ngu xuta; sacuaha cjua xi chja xi cuya nima cjuahñu; sacuaha cjua xi chja xi cuechu nixtin xi Nina ne, tsichuva naja me ngayejen ni cojo cjuatacun naja. ³ Vëhë xi quihndé ne, cuejñaxen hitsë cjua xi cuacun vë, hane chutayan jingu sa cjua xi hitsë sa chja cuijnercuun, sa xi sua Nina cahndé.

⁴ Xuta xi ha cavisehen cjuahasen rë Nina ngajñi rë cjuatacun rë me ne, hacuaha casacu rë me hitsë cjuandaja xi Nina sua me, hacuaha cavisehen Hasen rë Nina cahntsua xahasen rë me, ⁵ hacuaha cavejña rë me hitsë cjuandajyihi rë Nina, hacuaha camachaya rë me hitsë cjuarcun xi hitsë sa rcu cjín cuma nixtin xi sehe nduva. ⁶ Sa xi xuta xi cuacun vë tsismicacun me ndiya rë Nina ne, cumaji cuisecoon rë me xi tsindeya me cjuatacun rë me ngu ndiya nga ta, xcusun xi tisahmi me ne, titsixcuehyu me Quihndi rë Nina, sacuaha xi tivuya tivetaha suvá me me xcun cru. ⁷ Xuta xi cuacun vë ne, tangun me cojo nanguxi hvi rë tsi xi vaha xcun: sa xi nangu vëhë ma ngu xcusun xitjë xi cumachjirëhë rë xuta xi nai rë ne, tsinchacun Nina nangu vëhë; ⁸ peru sa xi suvá nahyá cuetju xcun nangu vëhë ne, venguiin camahani chjí rë. Hacuaha chocho cuichja Nina cojo, hane hiscan xi cuijnetaha ne, cueti.

Cuanguen nduju cuetahantacun Nina

⁹ Peru handasa cuatjin nújin cojo nuju, ngayujun ni xi jemu hmutacuin nuju ne, peru ha hyin cojo cjuatacun niji xi ngayun ne, ndaja tivatjun tijima, cuma cuinújan ne, ha tivanguncujun ndiya xi cuaxëtje nuju. ¹⁰ Nina ne, quixi me cojo cjua rë me. Vëhë xi tsichayaain me yëjë xcusun xi canihñu, hacuaha tsichayaain me cjuahmutacun xi camatsejen xi tjin nuju cojo rë me, hya xi caviseun rë xuta ladu rë me, sacuatjin xi tiniñu hisca quihndé. ¹¹ Xi meje niji ngayin ne, jima ngu ngayun ne, hacuanitjin ni tinechun ngunajatacún jinguyëjë rë xi nechun cjuahñu, cojo sa xi sacú nuju yëjë cjuandaja rë Nina xi vetuhun tacun. ¹² Hacuaha meje niji xi hacuiin cuma tséhë ngayun ta xi meje niji ne, nihñu sacuatjin sahmi xuta xi ngatsë rë xi jemu ndaja ticaa rë me xi mangucacun me cojo Nina ne, vëhë xi tifahatsja me cjuandaja xi ha cachja Nina xi sacú rë me.

¹³⁻¹⁴ Hya xi cachja quixi Nina cojo Abraham xi sua rë me ngu cjuandaja ne, tséhë xi ha quihndé tsajin sa yo xi matitjun xi cuma rë Nina ne, vëhë xi cachja me cuitjin: "Ngahan suva hvë xi cjuaquixi xi tsinchácun ri, hacuaha jemu cjín sahme ri cojo xuta riji." Cuatjin cachja me. ¹⁵ Hane xi cuatjin caca rë Abraham cavejñaya me cojo cjuajeya cjua xi cachja Nina ne, cavechu nixtin xi casacu Jain rë me cjuandaja xi ha cachja Nina xi sua rë me.

¹⁶ Hya xi ngu xuta sua me ngu cjua rë me xi cjuaquixindaja ne, hisca veyanangui me ngu xi hitsë sa matitjun xi cumá rë me, xi hacui Nina; hane hya xi jo xuta tisua cjua rë me ne, sa xi cuetjuyñi ngu me xi cuacun vë xi cuichja me: "Vëë Nina Jain xi quixi" ne, ngajan ma chihin cjuavisiajmi rë me. ¹⁷ Vëhë xi hya xi cachja Nina xi sua rë me Abraham ngu cjuandaja ne, cuitjin cachja me: "Ngahan suva hvë." Cuatjin cachja me cojo sa xi ngayaan xi chjahanntsan cjuandaja vëhë ne, cumachayandaja naja ta Nina ne, hya xi cuichja me ngu cjua ne, tsindeyaain me cjuatacun rë me. ¹⁸ Cuatjin cachja Nina cojo sa xi jercu ndaja sacú naja cjuetacun ngatsë rë jo xcusun xi hatuxa cumaji cuindeya.

Ngu xcusun jan ne, hacui suvá Nina, hane xi ma jo jan ne, hacui cjua xi cachja me cojo Abraham. Hacuaha Nina ne, hatuxa maji vindacha me. Hane ngayaan xi vetahan tacun Nina ne, sacú naja cjuetacun vëhë, cojo sa xi cumangutacun cojo cjua xi Nina cachja me xi cuechu nixtin xi cuiseen chjahanjendan tangun cojo rë me. ¹⁹ Hane xi cuatjin vetahan tacun Nina ne, tsajin camahani mé cuma rë hasen naja, hacuaha cuma cuechun hisca hiscan tacun Nina, ²⁰ hiscan xi quiyi Jesús cavuxaha me ndiya tsajan. Hane Nina casua xa me Jesús xi camá Jesús nahmi xi matitjun xi tsajin nu tsajin nixtin xi cjuë xa rë me, sacuaha camá Melquisedec hatsëe nixtin.

7

Jesús ne, má me nahmi sacuaha camá Melquisedec

¹ Melquisedec vë ne, matitjun me tsëhë nandya Salem, hacuaha má me nahmi xi sahmi me xa tsëhë Nina xi hatuxa jyë hnga cojo Hasen rë. Hane hya xi cavuya Abraham xi quiyi cavaxëtje me quihndi rë hntsë me tsëhë condra rë ne, cavetju Melquisedec tsëhë nandya Salem quiijtengui me Abraham hiscan nduva, hane xi casacu xicjin me ndiya ne, catsinchacun Melquisedec Abraham. ² Hya xi camá ne, të cahndé cavatëcja Abraham yëjë ni xcusun xi camá sa cafaha me tsëhë xuta xi cuacun condra jan ne, casua rë me Melquisedec ngu cahndé tsëhë të cahndé jan, tsëhë xi Abraham ne, faharcun me Nina. Ñihi xi Melquisedec ne, meje cuichja “ngu me xi matitjun xi vitexa cojo yëjë ni cjuauquixi”; hacuaha ñihi xi chja Me xi Matitjun tsëhë Salem ne, meje cuichja “ngu me xi matitjun xi vitexa cojo yëjë ni cjuajeya.” ³ Xcun xujun rë Nina ne, tsajin camahani hiscan xi chja tsëhë naa tsëhë nahmi rë Melquisedec. Hisca tsëhë xutachanga rë me ne, tsajin hiscan xi chja. Hacuaha chjaain hacutjin catsin me ne, chjaain hacutjin cahme me. Cuatjin xi Melquisedec ne, meje tangun me cojo Quihndi rë Nina, tsëhë xi hacuaha ngu nahmi má me xi tsajin nu tsajin nixtin fë xa rë me.

⁴ Chutsujun hacutjin jercu vengui chjí rë Melquisedec, xi hisca xutachanga naja Abraham ne, casua me me ngu cahndé tsëhë yëjë xcusun xi cavatëcja me të cahndé jan. ⁵ Ley xi casua Nina rë Moisés xi camá ngascan ne, chja ta nahmi xi nduva tjë rë Leví ne, tjin rë me chuva rë xi cjuehya me cojo naja ngayaan xuta tjë rë xuta Israel xi cuichancjan të cahndé yëjë ni xcusun xi tjin naja, cjuaha nahmi vëhë ngu cahndé tsëhë të cahndé jan. Cuatjin chja ley rë Moisés xi cuechjen diezmu naja, handasa xicjin nahmi jan má ngayaan, hacuaha tjë rë Abraham ngayejen ni. ⁶ Melquisedec ne, handasa hacuiin tjë rë Leví má me, perucafahatsja me ngu cahndé tsëhë xi camá të cahndé jan, xi casua Abraham. Hacuaha catsinchacun Melquisedec Abraham, me xi ha cachja Nina xi sacú rë cjuandaja. ⁷ Ngayejen ni ne, ha hyan ta me xi tsinchacun ne, me vëhë xi matitjun me tsëhë me xi manchacun. ⁸ Nguehe xcun cjuahñu naja vi ne, nahmi xi fahatsja me diezmu tsëhë yëjë xcusun xi ticja të cahndé ne, hacuaha xuta ngayaan ni me xi hacuaha hme me; peru xcun xujun rë Nina ne, chja tsëhë Melquisedec sacuaha xi tacun cuaha me. ⁹ Nahmi xi nduva tjë rë Leví xi hacuaha cojo me tifahatsja me diezmu ne, cuma cuinújan ne, sacuaha xi cojo me cavechji me diezmu rë me hya xi casua Abraham cojo Melquisedec jan diezmu rë me. ¹⁰ Cuatjin sacuaha xi cavechji nahmi xi cuacun jan ta, tsëhë xi Abraham ne, ha cojo tjë xi cuacun vë yaha me hya xi casua me diezmu rë me cojo Melquisedec.

¹¹ Xuta Israel ne, cafahatsja me cjua xi chja hacutjin meje rë Nina xi sahmi yëjë xuta xi tjë rë Leví xi sahmi me xa sacuaha nahmi. Quihndë ne, sa xi nahmi xi cuacun vë camá casahmi me xi cavechutaha xuta yëjë ni hacutjin xi meje rë Nina xi sahmi me ne, ha quihndë hacuiin sahmi nguyjë xi cuetujñi sa ngu nahmi xi hacjahi xcusun rë, ngu nahmi xi hacuiin tangun xcusun rë cojo Aarón ta ngu nahmi xi tangun xcusun rë cojo Melquisedec. ¹² Hane hya xi vindeya xcusun rë xa xi sahmi nahmi ne, hacuaha hatuxa vindeya ley xi vitexa rë me. ¹³ Hane Nai naja, me xi cuatjin chja xujun rë Nina tsëhë ne, hacjahi tjë me, hane sacuaha tjë vëhë ne, hisca ngu nahmi cjeë cuetujñi me. ¹⁴ Hacuaha

ha hyan ta Nai naja ne, tséhë tjë rë Judá canduva me, hane Moisés ne, cachjaain camahani me xi tjë vëhë ne, ngajan cuetjujñi ngu nahmi.

¹⁵ Yëjë cjua xi tinújan vi ne, tsejen xi jemu cjuaquixi, hya xi vetjujñi sa ngu nahmi sacuaha Melquisedec. ¹⁶ Hane nahmi xingu jan ne, hacui Nai naja, me xi cavechutaha xi camá nahmi, hacuiin ngatsë rë ngu ley xi chja yo tjë rë xi cuma nahmi ta ngatsë rë ngahñu rë ngu cjuahñu xi tjin rë me xi tsajin nu tsajin nixtin vetsun. Ngatsë rë vëhë xi cavechutaha me xi camá me nahmi.

¹⁷ Hacuaha Nina ne, cuitjin chja me tséhë Nai naja:

Ngaye xi nahmi ngaye yëjë nu yëjë nixtin
sacuaha camá Melquisedec hatsëe nixtin.

Cuatjin cachja Nina. ¹⁸ Sacuaha cjua rë ley xi cavitexa titjun ne, cavetsunya, tséhë xi hatuxa tsajin rë ngahñu hacuaha machjiriin ta, ¹⁹ tséhë xi camaji casahmi xi cavechutaha xuta yëjë ni hacutjin xi meje rë Nina xi cuechutaha me. Hane cahndé rë ley vëhë ne, vetahan tacun ngu cjua xi hitsë sa ndajyihi, hane ngatsë rë xi cuatjin vetahan tacun ne, vëhë xi nihña tiña tséhë Nina.

²⁰ Hyo xi casua xa Nina Jesús xi cuma me nahmi xi matitjun ne, cachja me cjua vihi: “Ngahan suva hvë.” Cuatjin cachja me. Peru hya xi cafaha xa nahmi xi yahnga jan ne, cachjaain Nina: “Ngahan suva hvë.” ²¹ Peru sacuaha tséhë Nai naja ne, xujun rë Nina ne, cuitjin chja:

Nai naja ne, cachja me cjua vihi: “Ngahan suva hvë.” Cuatjin cachja me,
hacuaha tsajin hora tsindeya me cjuatacun rë me xi cachja me cjua vihi:
“Ngaye xi nahmi ngaye yëjë nu yëjë nixtin
sacuaha camá Melquisedec.”

Cuatjin cachja me. ²² Hane xi cuatjin casua xa Nina Jesús xi camá me nahmi xi matitjun tsajan ne, vëhë xi sacu naja cjuaquixindaja xi Nina ne, sahmichihin jain me compromisu xi sehe tisahmi me. Hane compromisu vëhë ne, hitsë sa ndajyihi xi cuma rë xi casahmi me titjun. ²³ Sacuatjin rë nahmi xi yahnga jan ne, sacuiin rë me cahndé xi cjuenduju me sahmi me xa yëjë nu yëjë nixtin ta, tséhë xi hatuxa hme me. Vëhë xi hisca ntsacu cavetsihin hisca quihndé ne jemu cjín camá me cojo yëjë sa tjë rë me xi yahnga xi hacuaha camá nahmi. ²⁴ Peru Jesús ne, tséhë xi tsajin nu tsajin nixtin xi cueya me ne, vëhë xi hacuaha tsajin nu tsajin nixtin xi jingu sa cjuahatsja xa rë me xi má me nahmi. ²⁵ Vëhë xi ma vaxëtje me xuta xi sahmi tiña tséhë Nina ngatsë rë xi camangucacun xuta jan cojo Jesús. Hane hya xi vaxëtje me xuta xi cuacun vë ne, ha quihndé tsajin nu tsajin nixtin xi cumameje nga cuetjutje me ta, tséhë xi Jesús ne, tacun me yëjë nixtin xi cjuehya rë me Nina ngatsë rë xuta xi cuacun vë.

²⁶ Jemu ndatjin xi tjin naja ngu nahmi xi matitjun xi cuatjin xcusun rë me. Jesús, nahmi xi matitjun jan ne, jemu tyjahi me, tsajin rë me cjuatsehen, tsajin mé jyিhi mé má me, cavetjuxin me tséhë xuta tsehen, quiji me hisca ngajan sa tséhë ngahnga. ²⁷ Me vëhë ne, hacuiin tangun me cojo nahmi xi matitjun xi yahnga jan ta, me vëhë ne, tsajin mé má xi cojo me nchunchujun ni sua rë me Nina ngu chu xi cahme ngatsë rë jyé rë suvá me, hane xi cuma ngascan ne, sua nga me ngu chu xi cahme ngatsë rë jyé rë xuta. Jesús ne, ngu ndiya ni casua me ngu cjuatjo cojo Nina ngatsë rë jyé rë xuta, hya xi casua me yojo rë me xi cahme me. ²⁸ Sacuaha ley rë Moisés ne, sua xa rë xuta xi cuma me nahmi xi matitjun tséhë yëjë ni nahmi. Hane xuta ne, hatuxa caain rë cjuatacun rë me xi suvá cjuandaja sahmi me. Peru sacuaha cjua xi cachja Nina hya xi cachja me xi “Ngahan suva hvë” ne, cjua vëhë casua xa rë Quihndi rë Nina xi cuma me ngu nahmi xi matitjun. Hane cjua xi cachja Nina jan ne, camá ngascan canduva xi cuma rë ley. Hacuaha Quihndi rë Nina ne, tsajin nu tsajin nixtin xi caain rë cjuatacun rë me xi suvá cjuandaja sahmi me.

¹ Quihndé ne, cjua xi hitsë sa matitjun tséhë yéjë ni cjua xi tinújan vi ne, hacui cjua vihi: tjin naja ngu nahmi xi matitjun xi cuatjin xcusun rë me. Quiji me ngahnga, cavejña me taha ladu quixi tséhë Nina xi jemu jyë hnga cojo hasen rë. ² Ngajan sahmi me xa xi má me nahmi ngajan ndava Nina. Peru ndava Nina jan ne, hacuiin ngu ndihya xi catsindaja ngu xuta ta cahndé vëhë ne, suvá Nai naja catsindaja me.

³ Yéjë ni nahmi xi matitjun ne, hatuxa xa rë me xi sua me cjuatjo cojo Nina sua me ngu chu xi tsiquehen xuta. Vëhë xi cojo Jesús camameje rë xi tjin mé xi sua me cjuatjo cojo Nina. ⁴ Sa xi nguehe ngasunhndé tacun cuaha me quihndé ne, hacuiin cojo me má me nahmi ta nguehe ne ha tjin nahmi xi sua cjuatjo cojo Nina sacuatjin vitexa ley rë Moisés. ⁵ Sacuaha xa xi sahmi nahmi nguehe ngasunhndé vi ne, hacuiin tangun cojo xa xi má ngajan ngahnga ta, sacuaha ejemplu o tjahnguen ni rë xa xi má jan ne, vëhë xi má nguehe. Hya xi ha cuetsihin sahmi Moisés ndava Nina jan ne, cuitjin cachja Nina cojo rë me: “Nechin cuidadu ne ndandaja nihñi yéjë ni xcusun vë sacuaha xcusun xi ha catsingácun ri ngajan hiscan naxi jan.” Cuatjin cachja Nina. ⁶ Quihndé ne, Jesús casacu rë me ngu xa xi hitsë sa ndaja, tséhë xi hacuaha me vëhë sahmi tangun me xuta cojo Nina ngatsë rë ngu compromisu vëhë hane hitsë sa ndaja cjua cachja me.

⁷ Sa xi ndatjin tjin chihin compromisu xi casahmi Nina titjun ne, sehe camamiji rë ngu nga compromisu xi ma jo xi hitsë sa ndaja. ⁸ Peru Nina ne, cavëe me xi xutachanga naja ne, quitjen me jyé, vëhë xi cachja me cuitjin:

Ngahan Nai nuju ne, cuichjá cojo nuju ta cuechu nixtin
xi sahme nga ngu compromisu xatsë cojo nuju ngayun xuta tjë rë Israel cojo xuta tjë rë
Judá.

⁹ Peru ha quihndé hacuiin sacuaha compromisu xi casahme titjun cojo xutachanga nuju, hya xi cojo cjuahmutacun naha ne, cavaxëen me tséhë nangui Egipto; hane tséhë xi hacuiin quiji nduju me sacuatjin compromisu xi casahme cojo rë me ne, vëhë xi ngahan ne, casahmecuendaan me, cuatjin chjá ngahan, Nai nuju.

¹⁰ Sacuaha compromisu xatsë xi sahme cojo nuju ngayun xuta tjë rë Israel
hya xi cuma ngascan tséhë nixtin vëhë ne, hacui vihi:

Cueyá ley naha cahntsua cjuatacun nuju,
sacuaha xi cuma hindu cjua rë ley vëhë cahntsua cjuatacun nuju.
Hacuaha ngahan cuma ngahan Nina nuju
hane ngayun cuma ngayun xuta naha.

¹¹ Tsajin yo xi cuicuya xicjin,
tsajin yo xi cuichja cojo xicjin cuitjin: “Meje rë xi cumachaya ri yo xi Nai naja.”

Tsajin yo xi cuichja cuatjin ta tséhë xi yéjë ni sa quihndi sa changá ne,
ha camachaya rë yo ngahan.

¹² Nixtin hya ne, jemu tjin ná cjuaninchataha cojo cjuatsehni xi cún me
hacuaha ha quihndé tsajin nixtin tsinguítsjen jyé rë me.

Cuatjin cachja Nina. ¹³ Hya xi chja Nina tséhë ngu compromisu xi tjun jan ne, casahmi changá me. Hane xcusun xi ha jima changá jan ne, ha meje cjuëya.

Ndava Nina nguehe nangui

¹ Quihndé ne, ngajñi rë cjua tséhë compromisu xi casahmi Nina titjun ne, cachja me hacutjin xi chjahanrcun rë me, cojo xi cuma ndava me nguehe ngasunhndé. ² Vëhë xi camá ngu ndihya tsjian xi camá ndava Nina. Ngu cahntsua xi tjun tjun tacun, xi hmí rë Cahndé Rcun ne, ngajan tacun candeleru, tacun maxë, siu pan xi viyuju xcun Nina. ³ Ngu cahntsua xi tacun cahnchun taha cahntsua tsjian xi tyjangui má jo cahndé jan ne, ngajan tacun cahndé xi hmí Cahndé Xi Jercu Tu Rcun Camahani. ⁴ Ngajan tacun ngasunscun xi suvá oro camá hiscan xi tí tyjungunsa. Hacuaha ngajan tacun caxa tséhë compromisu xi suvá oro casaxtë rë yéjë ni ladu rë. Hane cahntsua caxa jan ne, ngajan jiya tilu xi suvá

oro cama, hane cahntsua tilu jan hinchandaja scuan cjuarcun xi hmí rë maná. Hacuaha bastón tséhë Aarón xi cavetjusehen jan ne, cahntsua caxa jan jiyandaja. Hacuaha ngajan hinchandaja ndyojo té xi camahindu cjua rë ley.⁵ Xcun caxa jan ne, hinchacun jo quicha, xi sacuaha ángel rë Nina, xi fehma rë tyjunga rë xcun caxa jan. Hane xcun tyjavaxcun caxa jan ne, ngajan tsejen hasen rë ngahñu cjua rë Nina hiscan tsicjë me jyë rë xuta. Peru quihndë ne, tséhë cjua xi ha cachjá cojo nuju vë ne, ha quihndë cuichjaan chichihin sa cojo nuju.

⁶ Quihndë xi ha cavyuju chihin yëjë ni xcusun vëhë cuatjin ne, yëjë ni nahmi ne, visehen me nchunchujun ni cahntsua xi tjun tjun tacun tséhë ndihya tsjian jan, xi sahmi me xa rë me sacuaha nahmi. ⁷ Peru cahntsua xi má jo tacun tséhë ndihya jan ne, suvá ni nahmi xi matitjun visehen me ngu ndiya xi ngu nu, hane hatuxa vaha me jni rë chu xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi xuta xi hisca hvíin me xi tjin rë me jyé. ⁸ Cojo cjuatacun vëhë ne, Hasen rë Nina ne, sua machaya naja xi ndiya xi cjuecani naja xcun Nina ne, cjem tuxaha, jinguyéjë rë xi ndava Nina jan ne, tisahmi xa cuaha. ⁹ Yëjë cjuatacun xi cuatjin má vë ne, machjiréhë naja ngayaan sacuaha ngu ejemplu ni, quihndë nixtin vihi. Ta sacuaha cjuatjo xi sua me cojo Nina ngajan ndihya vëhë cojo chu xi tsiquehen xuta ne, maji tsityjahi rë cjuatacun rë xuta xi cuatjin faharcun me Nina. ¹⁰ Yëjë cjuatacun vëhë ne, vitexa suvá tséhë xi chinë xi hyun ni cojo tséhë xi ma tyjahi vihi ma tyjahi vëhë xi cumá rë Nina. Cjuatacun vëhë ne, vitexa suvá ni tséhë taha xcun, hacuiin tséhë cahntsua xahasen naja. Peru cjuatacun vëhë ne, cuitexa hisca nixtin xi Nina tsindeya me cjuatacun vëhë.

Ndava Nina ngajan ngahnga

¹¹ Peru Cristu ne, ha cavetjucun me xi má me nahmi xi matitjun xi sua naja me yëjë ni cjuandaja xi titsingatju Nina. Sacuaha cahndé hiscan xi tisahmi me xa xi má me nahmi ne, hitsë sa vengui chjí rë hacuaha hitsë sa tjin rë cjuaquixi. Hacuaha hacuiin xuta casahmi me, cuma cuinújan ne, hacuiin nguehe ngasunhndë vihi tacun. ¹² Hacuaha hacuiin ngatsë rë jni rë chu tentsun cojo jni rë chu ndyaja chihndë xi cavisehen me xcun Nina ta ngatsë rë jni rë suvá me. Hane ngu ndiya cavisehen ni me, hya xi ha cavaxëtje naja me xi quihndë tsajin nu tsajin nixtin chajá ngayaan. ¹³ Hane jni rë chu tentsun cojo jni rë chu ndyaja cojo ndesu rë chu ndyaja chihndë ne, hora xi xinchutaha rë xuta xi camachocun yojo rë ne, caa rë tsityjahi rë yojo rë xuta jan cojo sa xi cuma tyjahi me xcun Nina. ¹⁴ Ha hitsë sa jni rë Cristu, me xi tsajin nu tsajin nixtin cjuë Hasen rë, hacuaha casua suvá me yojo rë me cojo Nina, ngu cjuatjo xi hatuxa jercu tu tyjahi camahani. Jni rë me jan ne, tsityjahi rë cjuatacun naja tséhë yëjë xcusun xi machjiriin xi nihña, cojo sa xi cuma nihña xa rë Nina, me xi quicun.

Ngatsë rë jni ne, ma tyjahi yëjë ni xcusun

¹⁵ Vëhë xi Cristu ne, me vëhë xi sahmi tangun me xuta cojo Nina ngatsë rë ngu compromisu xatsë. Cahme me xi cuaxëtje me xuta tséhë cjuatsehen xi casahmi xuta jinguyéjë rë xi sahmi xa cuaha compromisu xi tjun casahmi Nina. Hane ngatsë rë xi cuatjin cahme Cristu ne, vëhë xi xuta xi cavaxijin Nina ne cuma cjuahatsja me cjuandaja xi ha cachja Nina xi sua rë me, cjuandaja xi tsajin nu tsajin nixtin chjahataha rë. ¹⁶ Hiscan xi tjin rë xuta ngu testamentu ne, cuma sahmi xa, peru hisca hya xi ha tjin cjuaquixi xi ha cahme me xi casahmi xujun jan. ¹⁷ Ta ngu testamentu ne, vetsihin sahmi xa ngatsë rë ngu cjuaveya ta, tséhë xi jinguyéjë rë xi tacun quicun me xi casahmi ne, hatuxa tsajin rë ngahñu. ¹⁸ Vëhë xi hisca compromisu xi tjun casahmi Nina cojo xutachanga naja ne, hacuaha cojo jni rë chu camachihin. ¹⁹ Xi cavatju casua Moisés camachaya rë yëjë ni xuta yëjë ni cjua tséhë ley xi casua Nina ne, sehe cafaha me hitsë tsanga hani cojo ngu tsja rë ya xi hmí rë hisopo, sehe catsicahnchi me cojo jni rë chu hndindyaja cojo jni rë chu tentsun, cavisejan rë me nandá ne, sehe cavinchutaha rë me libru tséhë ley hacuaha cavinchutaha rë me yëjë ni xuta. ²⁰ Ngajan xi cachja Moisés cojo xuta cuitjin: “Vihi

jni xi sahmichihin rë compromisu xi cavitexa Nina hacutjin xi meje rë me xi nihña." Cuatjin cachja me. ²¹ Hacuanitjin ni cojo yëjë ni xcusun xi sahmi xa cahntsua ndihya jan. ²² Sacuatjin vitexa ley ne, ha ña meje yëjë ni xcusun ne, ma tyjahi ngatsë rë jni. Hane sa xi cuangaain jni ne, hacuaha sacuiin cjuaninchataha.

Casua Cristu yojo rë me xi cjuahaxin me cjuatsehen

²³ Vëhë xi camameje rë xi cuatjin camatyjahi rë yëjë xcusun xi sacuaha tjahnguen rë xcusun xi tjin ngajan hiscan tacun Nina. Peru xcusun xi tjin ngajan hiscan tacun Nina ne, camameje rë xi camatyjahi ngatsë rë cjuaveya xi hitsë sa ndacun xi cuma rë cjuaveya xi cuacun vë. ²⁴ Cristu ne, hacuiin cavisehen me ndava Nina xi xuta catsindaja me, ndihya xi tu cavetjutaha ni tsëhë hiscan xi cjuaquixi xi tacun Nina ta hisca ngahnga hiscan xi tacun Nina ne, ngajan xi cavisehen me. Cuatjin cavisehen me cojo sa xi quihndë ne, cuejña me xcun Nina, cuichjatje me ngatsë naja. ²⁵ Peru hacuiin cavisehen me xi sua me yojo rë me cojo Nina jemu cjín ndiya, sacuatjin sahmi nahmi xi matitjun xi chuva nu chuva nu visehen me ndava Nina cojo jni xi hacuiin jni rë me. ²⁶ Sa xi cuatjin cjín ndiya cavisehen Cristu ne, hacuaha cuatjin cjín ndiya camameje rë xi cueya me hisca hya xi cavetsihin ngasunhndë ne hisca quihndë. Peru quihndë xi ha tivijnetaha nixtin changá vëhë ne, Cristu ne, ngu ndiya canduva ni me xi sua me yojo rë me xi cueya me cojo sa xi cjuahaxin me cjuatsehen. ²⁷ Ngayejen ni ne, hatuxa ngu ndiya ni cueyan. Ngaxtun vëhë ne, sehe tsichuva naja Nina cojo cjuatcun naja. ²⁸ Hacuanitjin ni Cristu ta hacuaha ngu ndiya ni casua me yojo rë me xi cjuahaxin me jyé rë jemu cjín xuta. Ngaxtun vëhë ne, cuinduva nga me xi ma jo ndiya, peru ha quihndë hacuiin tsëhë jyé rë xuta ta tsëhë xi cuaxétje me xuta xi siuya rë me.

10

¹ Peru ley rë Moisés ne, sacuaha tjahnguen ni rë yëjë cjuandaja xi sehe sua naja Nina. Hacuiin ndandaja sua ley vëhë machaya naja hacutjin Jain cun cjuandaja vëhë. Vëhë xi ley ne, tsajin nixtin xi cuma tsityjahi rë cjuatcun rë xuta xi tu nu tu fi me ndava Nina cojo chu xi tsiquehen me jan xi sua me cjuatjo cojo Nina. ² Sa xi cjuaveya rë chu vëhë cacaa rë catsityjahi Jain rë cjuatcun rë xuta xi cafaharcun rë me ne, hacuaha ha quihndë tsiquiin sa me chu ta, tsëhë xi xi má rë me ne, ha quihndë tsajin jyé rë me. ³ Peru xi cuatjin tsiquehen xuta chu ne, tu nu tu nu tsinguitsjen rë me tsëhë jyé rë me ta, ⁴ tsëhë xi jni rë chu ndyaja cojo jni rë chu tentsun ne, hatuxa maji fahixin rë jyé rë xuta.

⁵ Vëhë xi hya xi cavéjña Cristu ngasunhndë ne, cachja me cojo Nina cuitjin: Ngayun ne, hacuiin suvá cjuaveya rë chu xi meje nuju, hacuiin suvá cjuatjo xi meje nuju, vëhë xi canihñu yojo naha.

⁶ Hacuiin suvá cjuatjo xi tí xi chuya nuju tsëhë, hacuaha hacuiin suvá ni jingu sa cjuatjo xi sua nuju xuta ngatsë rë jyé rë me xi chuya nuju tsëhë.

⁷ Sehe ngajan xi cachja nga Cristu: "Cuajyahi ngahan nguehe, xi sahme yëjë ni hacutjin xi meje nuju, ngayun Nina naha, sacuatjin camahindu tsahan xcun xujun nuju."

Cuatjin cachja Cristu cojo Nina. ⁸ Xi tjun tjun ne, cachja Cristu xi Nina ne, mijí rë me hacuaha chuyiin rë me tsëhë cjuaveya rë chu cojo jingu sa cjuatjo, cojo cjuatjo xi tí, cojo cjuatjo xi sua xuta ngatsë rë jyé rë me, handasa cuatjin vitexa ley xi cuatjin sahmi xuta.

⁹ Ngaxtun vëhë ne, cachja nga me xi tacun me xi sahmi me yëjë ni hacutjin xi meje rë Nina. Cuma cuinújan ne, tsicjé me xcusun changá xi hme chu, cojo sa xi cuejña me ngu xcusun xatsë xi sahmi xuta yëjë hacutjin xi meje rë Nina. ¹⁰ Nina ne, catsityjahi me cjuatcun naja ngatsë rë xi Jesucristu ne, casahmi me yëjë ni hacutjin xi meje rë Nina, ngatsë rë cjuatjo xi casua Jesucristu xi casua me yojo rë me ngu ndiya ni.

¹¹ Yëjë ni nahmi ne, nchunchujun ni hincharcun me fahacuenda me xa rë me xi má me nahmi, hacuaha cuatjin cjín ndiya vuya sua me cjuatjo xi tu vëhë tu vëhë ni, xi hatuxa tsajin nixtin xi ma fahixin rë jyé rë xuta. ¹² Peru Cristu ne, xi cavatju casua me ngu ni

cjuatjo cojo Nina ngatsë rë jyé rë xuta ne, sehe quiji me ngahnga cavejña me taha ladu quixi tséhë Nina. Hane cjuatjo xi casua me jan ne, tsajin nu tsajin nixtin xi meje rë xi cuya cjue nga xcun Nina. ¹³ Hane quiji me ngajan, cojo sa xi nixtin xi cjui sa ne, ngajan cuejñaya me hisca hya xi yéjë ni xi sahmi rë me condra ne, cuiyuju ngahma gubiernu rë me. ¹⁴ Véhë xi ngatsë rë ngu ni cjuatjo vëhë ne, catsityjahi Cristu cjuatacun rë xuta xi ha Nina tiviyujuxin rë me xi cuma tséhë me me, hane tsajin nu tsajin nixtin xi cuya cuetsun nga cjuatacun rë xuta xi cuacun vë. ¹⁵ Hasen rë Nina ne, ha cuanitjin ni sua machaya naja cuitjin:

¹⁶ Sacuaha compromisu xi sahme cojo xuta xi cuacun vë hya xi cuma ngascan tséhë nixtin vëhë ne, hacui vihi:

Cueyá ley naha cahntsua cjuatacun rë me,
sacuaha xi cumahindu cjua rë ley vëhë cahntsua cjuatacun rë me.

¹⁷ Hacuaha jyé rë me cojo cjuatsehen xi sahmi me ne,
ha quihndë tsajin nixtin xi tsinguítsjen.

Cuatjin cachja Hasen rë Nina. ¹⁸ Hya xi ha camanchataha jyé ne, ha quihndë mamijí rë xi cjue sa cjuatjo xcun Nina ngatsë rë jyé vëhë.

Meje rë xi nihña tiña tséhë Nina

¹⁹ Véhë xi ngayejen ni ne, rcuun camahani xi cuiseen xcun Nina quihndë ngatsë rë jni rë Jesús. ²⁰ Jesús ne, cavuxaha me ngu ndiya xatsë xi cuma naja, ngu ndiya xi cjuecojo naja xcun cjuahñu, ngu ndiya xi cjuecojo naja xcun Nina ngatsë rë cjuaveya rë Jesús.

²¹ Jesús ne, me vëhë má me nahmi xi jercu tu vengui camahani chjí rë, hacuaha sahmi naja me cuidadu ngayejen ni xi má ngayaan ladu rë Nina. ²² Ngatsë rë yéjë cjuatacun vëhë ne, meje rë xi nihña tiña tséhë Nina cojo nguñajatacun, meje rë xi tjin ngu tacun xi macjain naja Jesús ta, tséhë xi cjuatacun naja ne, cachjahaxin rë cjuatsehen xi cún tséhë xi sacuaha xi caxinchutaha rë jni, hane yojo naja ne, sacuaha xi cafengui cojo nandá tyjahi. ²³ Meje rë xi hacuin nismetacun cjuandaja xi nújan xi vetahan tacun ta, tséhë xi me xi cachja cojo naja yéjë cjuandaja xi sahmi me ngascan ne, hatuxa sahmichihin me yéjë cjuandaja vëhë. ²⁴ Meje rë xi cuinchan chuva rë hacutjin cuisecoon xingueen xingu xingu ngayaan cojo sa xi tjin naja cjuahmutacun hacuaha nihña cjuandaja. ²⁵ Mijí rë xi cuejñaxen xi ma tangun ngayaan sacuaha xcusun rë jingu sa xingueen. Xi meje rë ne, cuma tangun ngayaan cojo sa xi tahan cjuetacun xingueen xingu xingu ngayaan, hitsë guan ta nixtin xi cuinduva Jesús ne, chutsejen ta ha tijima tiña.

Handajasa cjuatjo casacu naja cjuahñu xatsë, Peru suaain cahndë xi tujyé nihña cjuatsehen

²⁶ Cuatjin meje rë xi nihña ta sa xi ngu xingueen xi ha ndaja cafahatsja me cjua xi ha cjuaquixi cjuenduju me cojo ngu ndiya rë cjuatsehen ne, ha quihndë tsajin sa mé cjuatjo xi cuma cjue ngatsë rë jyé rë me. ²⁷ Cahndë rë vëhë ne, hatuxa sacú rë me castigu, cjue cuetí me xcun ndihi xi ha jima tiña nixtin xi tsicjé rë yéjë xi choho vëë rë Nina. ²⁸ Hya xi ngu xuta tsitjungui me ley rë Moisés ne, cojo jo cojo jyan ni xuta xi tsinguixi me xi cuaaintjin sahmi xuta vëhë ne, chja ley ta hatuxa cueya me, hacuaha hisca ngu tsajin yo cumayuma rë tséhë me. ²⁹ Ngayun ne, ha ndaja hyun ta hitsë sa jercu jyahi camahani castigu meje rë xi cuma xuta xi sune tsufé me Quihndi rë Nina, hacuaha tsingatahacacun me xi tsajin mé vengui chjí rë jni rë Quihndi rë Nina jan, hacuaha choho chja me tséhë Hasen rë Nina xi jercu casua rë xuta jan cjuandaja. Jni xi tsitjungui xuta jan ne, jni vëhë xi casahmichihin rë compromisu xi cachja Nina, hacuaha ngatsë rë jni vëhë ne, camatyjahi cjuatacun rë xutajan. ³⁰ Ngayaan ne, ha hyan Nai naja, hane me vëhë xi cachja me cuitjin: “Ngahan saté ná xi sahmengojo cojo xuta tsehen; hatuxa ngahan sahmengojo.” Hacuaha chja nga me ngu ndiya cuitjin: “Ngahan Nai nuju ne, cjuahá chuva xuta naha.” Cuatjin cachja Nai naja. ³¹ ¡Jemu jyé chircun sa xi ngayaan cjuinenguenyan ngajñi rë castigu xi sahmi Nina, me xi quicun!

³² Peru ninguitsjun nixtin titjun, hya xi ha cafë cachjuhunntsun cjuahesen rë Nina sehe cacaña nuju cojo ngu cjuacjintacun jyé xi casua nuju cjuañihi xi cavatjun camá.

³³ Jiya hora ne, xcun cojo xcun ni choho cachja xuta tsujun hacuaha casua nuju me cjuañhi, hacuaha jiya hora nga ne, cavisecuun rë xuta xi cuatjin cavatju me camá. ³⁴ Chjá cuatjin ta hacuaha hvë xi hacuaha camayuma nuju me xi hincha ndavaya. Hacuaha hisca cojo cjuasua caningatuhun xi cachjahataha cjuachan rë yéjë ni xcusun xi ngayun tsujun, tséhë xi ha hyun ta ngajan ngahnga ne, ha tjin nuju ngu xcusun xi hitsë sa ndaja, xi tsajin nu tsajin nixtin cjué. ³⁵ Xicanismutacuun cjuatacun xi rcun camahani, ta xi cuatjin cuanguncujun cjuatacun vëhë ne, Nina ne, hatuxa jemu jyé cjuatjo xi sua nuju me. ³⁶ Ngayun ne, meje rë xi scaa nuju cojo cjuacjintacun xi vatjun má, cojo sa xi hya xi cuatjin cafë canilñu hacutjin xi meje rë Nina ne, sacú nuju cjuandaja xi ha cachja Nina xi sua nuju me. ³⁷ Xujun rë Nina ne, cuitjin chja:

Ha tu chúva sa nixtin ne,
me xi cuinduva ne, hatuxa cuinduva me, ha quihndë cuindeyaain rë me.

³⁸ Xuta naha xi tsajin jyé rë me ne, sacú rë me cjuahñu xatsë ngatsë rë xi mangucacun me cojo ná;

peru sa xi cuya me cjue ngaxtun me ne, chuiyiin ná tséhë me.

Cuatjin chja xujun rë Nina. ³⁹ Peru ngayaan ne, hacuiin tangun ngayaan cojo xuta xi vuya fi ngaxtun me sehe tsicjé Nina me ta ngayaan ne, tangun ngayaan cojo xuta xi mangucacun me cojo Nina sehe cuaxétje Nina me.

11

Ninguitsjen xutachanga naja xi jemu camangucacun me cojo Nina

¹ Quihndë ne, hya xi ha camangutacun cojo ngu cjua ne, sacuaha xi ha tjin naja cjuaquixi xi hatuxa sacú naja ngu xcusun xi vetahan tacun, sacuaha xi ha hyan xi xcusun xi matsijin ne, hacuaha cjuaquixi. ² Tséhë xi xutachanga naja ne, camangucacun me cojo Nina, vëhë xi Nina cachja tséhë me xi tsajin xi cún rë me xcun Nina.

³ Tséhë xi mangutacun cojo Nina ne, vijnercun xi Nina cojo cjua ni rë me ne, catsindaja me ngasunhndë, hacuiin cafaha me ngu xcusun xi matsejen xi catsindaja me ngasunhndë vi xi tsejen naja.

⁴ Tséhë xi camangucacun xutachanga naja Abel cojo Nina ne, hitsë sa ndaja cjuatjo xi casua rë me Nina xi cuma rë cjuatjo xi casua xutachanga naja Caín. Vëhë xi Nina ne, cachja me xi Abel ne, tyjahi me cojo cjuatacun rë me. Hacuaha suvá Nina catsingacun me xi cjuatjo xi casua Abel ne, jemu ndaja. Hane tséhë xi cuatjin camangucacun Abel cojo Nina ne, vëhë xi handasa cahme me, peru hisca quihndë ne, cumachjirëhë sa naja cjuatacun rë me.

⁵ Tséhë xi camangucacun xutachanga naja Enoc cojo Nina ne, cachjahataha rë me tséhë ngasunhndë vi, cojo sa xi cueyaain me. Hane ha quihndë casacuun me ta, tséhë xi Nina cafahataha rë me. Peru chaja sa xi cjuaquixi Nina me ne, ha camatsejen xi Nina ne, jemu cachuya rë me tséhë Enoc. ⁶ Peru sa xi manguaaintacuun cojo Nina ne, cumaji nihña xi chuya rë me tsajin. Xuta xi sahmi tiña me tséhë Nina ne, meje rë xi macjain rë me xi tjin Jain Nina, hacuaha Nina vëhë xi jemu jyé cjuatjo xi sua rë me xuta xi cuacun vanguí rë me.

⁷ Tséhë xi camangucacun xutachanga naja Noé cojo Nina ne, hya xi casua Nina camachaya rë me tséhë xcusun xi cjéé cuma ne, casahmi me ngu barcu cojo sa xi cuetjutje me cojo xuta rë me. Cuatjin casahmi me ta, tséhë xi faharcun me Nina. Hane xi cuatjin camangucacun me cojo Nina hacuaha casahmi me cuatjin ne, ngajan camatsejen xi yéjë sa xuta tséhë ngasunhndë ne, chajá me. Hane Noé ne, cuatjin camatyahi me cojo cjuatacun rë me sacuatjin matyahi ngayaan cojo cjuatacun naja xi mangutacun cojo Nina.

⁸ Tséhë xi camangucacun xutachanga naja Abraham cojo Nina ne, hya xi cachja Nina xi cuetjutje me tséhë nangui hiscan xi tacun me xi cjue me ngu cahndé hiscan xi sua Nina xi cuma tséhë me ne Abraham ne, cahndé me tséhë Nina hane cavetju me quiji me, handasa hvíin me jani cuechú me. ⁹ Tséhë xi camangucacun Abraham cojo Nina

ne, cavyujutaha me ngu nangui xín xi cachja Nina xi sua rë me. Hane ndihya tsjian ni cavyuju me cojo quihndi rë me, Isaac cojo Jacob, quihndi xi hacuaha cojo cjuahatsja cjuandaja xi ha cachja Nina xi sua me jan. ¹⁰ Cuatjin cavyuju Abraham ta, tséhë xi jemu meje rë me xi cuechú me ngu nandya xi ndaja hñu cun ndihya rë cojo xihndënaña rë, ngu nandya xi Nina cavejña me cjuatacun rë me hacutjin cuma, hacuaha me vëhë casahmi me. ¹¹ Tséhë xi camangucacun Abraham cojo Nina ne, Nina casua rë me ngahñu xi cuma sacú rë chjuun rë me quihndi, handasa Sara chjuun rë me ne, hatuxa maji sacu rë me quihndi hacuaha Abraham ne, jemu changá me xi sehe sacú rë chjuun rë me quihndi. Cuatjin camá ta, tséhë xi camangucacun Abraham xi Nina ne, hatuxa sahmichihin me cjuá xi cachja me. ¹² Vëhë xi ngatsë rë ngu ni Abraham ne, handasa hatuxa ha quihndë tsajin rë me ngahñu xi sacú rë chjuun rë me quihndi ne, peru tjé rë me ne, tangun cjin camá cojo niñu xi yaja ngahnga, tangun cojo tsumi rë tjehen ndachacun xi maji maxqui.

¹³ Yëjë ni xutachanga naja xi cuacun vë ne, mangucacun cuaha me cojo Nina hya xi cahme me. Casacuiin rë me cjuandaja xi cachja Nina xi sua rë me, Peru sacuaha xi ha cavëe me cjuandaja vëhë hane jemu ndama rë me. Cachja quixi me xi sacuaha xuta ngu nangui me xi cavyujutaha me nguehe ngasunhndé. ¹⁴ Hane xuta xi chja cuatjin ne, jemu quixi sua me machaya naja xi tivangui sa me ngu nangui xi cuma tséhë suvá me. ¹⁵ Sa xi catsinguitsjen sa me nangui hiscan cavetju me ne, tjin sa rë me chuva rë xi camá cavuya me jan. ¹⁶ Peru me xi cuacun vë ne, xi meje rë me ne, ngu nangui xi cuma tséhë suvá me ngajan ngahnga hiscan tacun Nina. Vëhë xi Nina ne, ma savaain rë me xi hmí rë me Nina rë xutachanga naja xi cuacun vë, tséhë xi ha tjin ndaja rë Nina ngu nandya xi cumá rë me.

¹⁷ Tséhë xi camangucacun xutachanga naja Abraham cojo Nina ne, hya xi catsichuva Nina me cojo cjuatacun rë me ne, casua Abraham cojo Nina quihndi rë me Isaac. Hane Abraham, me xi cachja Nina xi sua rë cjuandaja ne, cavejñangucacun me xi sua me quihndi ngu rë me, ¹⁸ handasa cuitjin cachja Nina cojo rë me: "Suvá tjé rë quihndi riji Isaac ne, vëhë ni xuta xi cumá tjé riji xi cjuaquixi." Cuatjin cachja Nina. ¹⁹ Abraham ne, camacjain rë me xi Nina ne, tjin Jain rë me chuva rë xi hisca nima ne, tsicuya me cjuahñu. Cuatjin camá xi sacuaha xi ngajñi rë nima Jain cavuya cafahatsja Abraham quihndi rë me.

²⁰ Tséhë xi camangucacun xutachanga naja Isaac cojo Nina ne, catsinchacun me quihndi rë me Jacob cojo Esaú. Cachja me yëjë mé xi nduva ngascan xi cuma rë quihndi rë me.

²¹ Tséhë xi camangucacun xutachanga naja Jacob cojo Nina ne, hya xi ha meje cueya me ne, catsinchacun me jima ngu quihndindai rë me xi quihndi rë xutachanga naja José, hacuaha cafaharcun me Nina taha yahangui me bastón rë me.

²² Tséhë xi camangucacun José cojo Nina ne, hya xi ha meje cueya me ne, caveyanangu me xi cuechú nixtin xi yëjë ni xutachanga naja ne, cuetjuxin me tséhë nangui Egípto, hacuaha cavitexa me hacutjin cuma cojo rë ninda rë me hya xi ha cahme me.

²³ Tséhë xi camangucacun xutacha rë xutachanga naja Moisés cojo Nina ne, hya xi catsin Moisés ne, jyan sá caveyahma me, tséhë xi cavëe me xi quihndinda jan ne, jemu ndajyih camahani, hane cavincharcuaain rë me yojo rë me tséhë cjuá xi cavitexa me xi matitjun xi cueya yëjë ni quihndinda xi xihin tséhë xutachanga naja.

²⁴ Tséhë xi camangucacun Moisés cojo Nina ne, hya xi camachangá me ne, catsitjungui me cahndé rë me xi má me quihndi rë na quihndi rë me xi matitjun tséhë nangui Egípto. ²⁵ Hitsé sa cachuya rë me xi cjue me choho cuatju me cuma cojo xuta rë Nina, xi cuma rë xi sua me cjuasua xahesen rë me nguhñu ngu hora ni ngajñi rë cjuatseen.

²⁶ Catsingatahacacun me xi hitsé sa vengui chjí rë xi scaa rë me xi choho cuichja xuta tséhë me ngatsë rë xi sahmi tangun me cojo xutachanga naja xi ha Nina cavaxijin me, xi cuma rë xi sacú rë me cjuanchina rë Egípto. Cuatjin catsingatahacacun me ta, tséhë xi hatuxa quitahacacun me cjuatjo xi sua Nina me ngascan. ²⁷ Tséhë xi mangucacun me cojo Nina ne, cavetjuxin me tséhë nangui Egípto, hacuaha hisca cavincharcuaain rë me yojo rë me tséhë xi cjan rë me xi matitjun jan. Caca rë me cojo yëjë ni cjuacjintacun

véhë sacuaha xi tivutsejen me Nina xi matsijin. ²⁸ Tséhë xi mangucacun me cojo Nina ne, casahmi me suhi tséhë Pascua, hane cavitexa me yéjë ni xutachanga naja xi cuinchataha me jni rë chu ngajan ya ngahñu rë tingotjo ndava me xingu xingu me, cojo sa xi hora xi cjuehe hasen xi tsiquehen rë quihndi tjun rë yéjë ni xuta ne, tsiquin rë hisca xi ngu quihndi tjun rë xutachanga naja.

²⁹ Tséhë xi mangucacun xutachanga naja cojo Nina ne, cavatjucja me Ndachacun Hani sacuaha vatju me nangui quixí. Hya xi camá ne, xi canduva xuta Egípto tivatju me ne, hora véhë cavuya camatangun nga nandá hane ngajan café xuta xi cuacun vë.

³⁰ Tséhë xi mangucacun xutachanga naja cojo Nina ne, cavitijñundee me hnchua xondyojo tséhë nandya Jericó, hane xi cavatju yatu nixtin ne, cavixujne hnchua véhë. ³¹ Hacuaha tséhë xi mangucacun ngu na Jericó xi hmí rë Rahab cojo Nina ne, hacuiin hya xi cahme yéjë sa xuta Jericó xi cahndiin tséhë Nina, hya cahme na xi viteña yojo rë vë ta, tséhë xi cojo cjuandaja cafahatsja na ngu jo xutachanga naja xi quiji cavutsejensun me nandya Jericó jan.

³² ¿Mé sa xi meje nuju xi cuichjá cojo nuju? ta hisca chuttaain sa hora xi cuichjá cojo nuju tséhë xutachanga naja Gedeón, cojo Barac, cojo Sansón, cojo Jefté, cojo David, cojo Samuel, cojo yéjë sa profeta. ³³ Xuta xi cuacun vë ne, tséhë xi camangucacun me cojo Nina ne, cacaña rë me hya xi casahmi me si cojo xuta tséhë jingu sa nandya, casahmi me xi ndiya rë cjuaquixi, cavetjucaa ngu jo cjua xi cachja Nina cojo rë me. Camaji cavuxaha chu xa hntsua chu hora xi meje sinë chu me. ³⁴ Catiin me hya xi cavincha xuta me ngajñi ndihi xi meje cuaca me me. Cavatjuhnga me tséhë xuta xi meje tsiquehen rë me cojo quicha. Handasa jemu ndaya tjin cacun me ne, casacu rë me ngahñu. Jemu casacu rë me ngahñu hya xi casahmi me si cojo xuta tséhë jingu sa nandya, cacaña rë me catsinguijne me xuta xi chocho vëe rë me. ³⁵ Ngu jo yachjin ne, cavuya cafahatsja me xuta rë me xi cavuya cjuahñu hya xi cahme.

Peru ngu jo nga xutachanga naja ne, jercu cavaja xuta me. Peru catsingatiin me xi sehenndaya me ta, tséhë xi mijí tsismicacun me Nina hacuaha meje rë me sacú rë me ngu cjuahñu xatsë xi hitsë sa ndajyি. Véhë xi cacaña rë me hya xi cavaja xuta me hisca xi cahme me. ³⁶ Hane ngu jo nga me ne, catsixcuehyu xuta me, hacuaha cavaja xuta me cojo cuarta rë chu, hisca quiji me ndavaya hacuaha camahñu me cojo cadena. ³⁷ Catsiquehen xuta me cojo ndyojo, cavatëcja vasen xuta me cojo quicha nehñu, catsiquehen xuta me cojo quicha, catsujihiya nguehe catsujihiya ngajan me tixtë rë me chuxin rë chu tsánga cojo chuxin rë chu tentsun. Jemu camachaja rë me, jemu jyé cjuañihi cavatju me camá, chocho casahmi xuta cojo rë me. ³⁸ Xutachanga naja xi cuacun vë ne, hisca vechiin chuva rë xi sacú rë ngasunhndë me. Catsujihiya me ngajan ngu xín camahani hiscan naxindya, hiscan nguijo, hisca ngu ngojo naxi caviyuju me.

³⁹ Peru xuta xi cuacun vë ne, handasa ha cavetjundaja me ngatsë rë xi mangucacun me cojo Nina ne, peru hisca xi ngu me casacuuiin rë me cjuandaja xi ha cachja Nina xi sua rë me, ⁴⁰ tséhë xi Nina ne, hya xi catsingatahacacun me ngatsë naja ne, ha cavejñangucacun me xi sahmi me ngu xcusun xi hitsë sa ndaja, xi hisca nixtin quihndë ne, sahmi Nina xi cuechutaha xutachanga naja xi cuacun vë yéjë ni hacutjin xi meje rë Nina xi cuechutaha me, sacuatjin tisahmi Nina cojo naja ngayaan quihndë.

12

Meje rë xi cuejñahñu cjuatacun naja cojo Jesú

¹ Véhë xi ngayaan ta ha jemu cjín xutachanga naja xi machaya naja xi camangucacun me cojo Nina ne, meje rë xi cuejñaxen yéjë ni xcusun xi sahmindyá naja, hacuaha cuejñaxen cjuatsehen xi mijí cjuehin tsajan, hacuaha nihñá ngahñu xi scaa naja cuanguen nduju cojo ndiya xi Nina cavejña me xi cuma naja. ² Hacuaha meje rë xi cuejñahñu cjuatacun naja cojo Jesú, me xi cavejña ntsacu cjuachacun xi macjain naja hacuaha catsichihin me. Ngatsë rë cjuasua xi cavejña Nina xi cuma rë Jesú ne, cacaña rë me cojo cjuañihi xi casetaha me xcun cru, hisca casahmicuendaain me xi jemu cjuasava

xi cuatjin cahme me. Hya xi camá ne, sehe quiji me ngahnga, hane ngajan tacun me taha ladu quixi tséhë Nina.

Meje rë xi ningatehen xi cueyaquixi naja Nina ndiya

³ Véhë xi ninguitsjun Jesùs, me xi cacaas rë cojo yëjë xcusun xi casahmi xuta tsehen hya xi catsitjungui me Jesùs. Ninguitsjun me, cojo sa xi hacuiin cjuenda rë cjuatacun nuju, hacuiin cuma ndaya tacún. ⁴ Ta ngayun ne, hisca cjuaveya cjëë cuechuntuhun xi nihñu ngahñu xi ningatuun rë cjuatseen. ⁵ Sacuaha xi ngayun ne, canichayun cjua xi chja Nina cojo nuju sacuaha chja ngu nahmi cojo quihndi rë me xi chja cuitjin:

Hacuiin tu xcuehyu ni cumacjain ri hya xi Nai naja tiveyaquixi me ngaye ndiya, tsan, hacuaha hacuiin cuma ndaya tacuin hya xi tichjataha me ngaye.

⁶ Ta Nai naja ne, quihndi xi hmucacun me ne, veyaquixi me ndiya, hacuaha sahmi me castigu yëjë ni xuta xi fahatsja me sacuaha quihndi rë me. Cuatjin chja cjua jan. ⁷ Ngayun ne, caticaa nuju cojo yëjë ni cjuacjintacun, ta xi cuatjin vatjun má ne, Nina tiveyaquixi nuju me ndiya. Nina ne, vutsejen me ngayun sacuaha quihndi rë me ta, cjuaquixi xi tsajin ngu quihndi xi nahmi rë ne, veyaquixiin rë ndiya. ⁸ Peru sa xi Nina cueyaquixiin nuju me ndiya sacuatin veyaquixi me ndiya tsajan ngayejen ni ne, ngajan matsejen xi hacuiin quihndindaja rë me ngayun. ⁹ Ngayaan ne, hacuaha tjin xutacha naja nguehe ngasunhndë xi cavinchaquixi naja me ndiya, hacuaha cachjahanrcun me. Peru hitsë sa meje rë xi cuinuhyan tséhë Nina Nahmi naja xi tacun me ngahnga. Xi cuatjin ne, cuechuntahan ngu cjuahñu xatsë. ¹⁰ Me xi cuacun vë ne, cavinchaquixi naja me ndiya ngu jo nixtin ni hacutjin xi má rë me xi ndatjin. Peru xi vinchaquixi naja Nina ndiya ne, ngayaan ndaja tsajan, cojo sa xi cuma tyjahi cjuatacun naja sacuatin tyjahi cjuatacun rë suvá me. ¹¹ Hya xi tjin yo vinchaquixi naja ndiya ne, hacuiin ndama naja ta choho má naja, hora xi tichja me cojo naja. Peru sa xi cuinuhyan ne, xi cuma ngascan ne, sacú naja cjuandaja cjuajeya xi cuma tyjahi cjuatacun naja.

Mijí rë xi nitjunguen Nina

¹² Véhë xi ngayun xi ndaya tjin tacún xi tivangun cojo ndiya rë Jesùs ne, tuhun ngahñu xahesen nuju. ¹³ Ngu quixi tángun ni cojo ndiya rë Jesùs, cojo sa xi yo xi ndaya tjin cacun ne, hacuiin chajá tséhë ndiya rë Jesùs ta sacú rë ndiya xi cjuaquixi.

¹⁴ Nihñu ngahñu xi cuinechun ngu cjuandaja ngu cjuajeya cojo yëjë ni xuta, hacuaha nihñu ngahñu xi cuma tyjahi cjuatacun nuju, ta hisca xi ngu xuta ne, cuechiin me xcun Nai naja sa xi hacuiin tyjahi cjuatacun rë me. ¹⁵ Nechun cuidadu cojo sa xi tsajin ngu xuta xi cuechintaain me cjuandaja rë Nina, ta ngaxtun véhë ne, choho cuma rë me hane tu hitsë tu hitsë ne, tsinguetsun me cjuatacun rë jemu cjín xuta. ¹⁶ Nechun cuidadu cojo sa xi tsajin ngu xuta xi sahmi me cjuatseen cojo ngu xi hacuiin chjuun rë me. Hacuaha nechun cuidadu cojo sa xi tsajin ngu xuta xi hisca sahmicuendaain me Nina, sacuatin rë xutachanga naja Esaú, xi casua me yëjë cjuanchina xi satë rë me xi má me quihndi tjún, ngatsë rë ngu comida xi cajinë me. ¹⁷ Ngayun ne, ha hyun ta xi camá ngascan hya xi meje cjuahatsja me ximincharacun rë nahmi rë me ne, cavitjungui me, tséhë xi ha quihndë tsajin chuva rë xi tsindeya me cjuatacun rë me, handasa hisca cajihnda me xi meje rë me xi cuatjin cuma.

¹⁸ Ha jemu hatsëxi xutachanga naja ne, quiji casahmi tiña me tséhë ngu naxi xi tacun nguehe ngasunhndë hiscan xi catí ngu ndihí jyé, hiscan xi jemu jñu camahani, hiscan xi jercu hñu camahani cavanga tjo, ¹⁹ hiscan xi canuhya rë xi fane ngu tyjo, hiscan xi canuhya rë cjua xi cachja Nina. Hane xuta xi cahndë me cjua véhë ne, jercu cafehya rë me xutachanga naja Moisés xi ha quihndë cuichjaain sa Nina cojo xuta xi cuacun vë.

²⁰ Cuatjin cachja me ta, tséhë xi cacaain rë me cojo cjua xi cachja Nina hya xi cachja me cuitjin: “Yo xi cjue cuisane ntsacu hiscan naxi vë ne, meje rë xi cueya cojo ndyojo, handasa ngu chu.” Cuatjin cachja Nina. ²¹ Xcusun véhë ne, ngu chircun jyé, véhë xi hisca Moisés ne, cuitjin cachja me: “Jemu tsácjun, ña fatsë ngahan.” Cuatjin cachja me.

²² Peru ngayun ne, casatiin sa nuju cjuacjintacun vëhë ta ngayun ne, canihñutangun cjuatacun nuju cojo Nina xi quicun, me xi tacun ngajan ngahnga, sacuaha nandya xi hmí rë Jerusalén, ndetjún xi hmí Sión. Canihñutangun cjuatacun nuju cojo yëjë jercu tu cjín camahani ángel xi tjin tangun xi sahmi jyë sahmi hnga rë Nina. ²³ Ngayun ne, canihñutangun cjuatacun nuju cojo yëjë xuta xi cahme xi quihndi rë Nina xi tjin tangun ngajan ngahnga hiscan xi siutahaxujun ñihí rë. Yëjë nima vëhë ne, vëhë xi sacuaha quihndi tjun rë Nina. Canihñutangun cjuatacun nuju cojo Nina, Nina xi tsichuva rë yëjë ni xuta cojo cjuatacun rë me. Ngayun ne, canihñutangun cjuatacun nuju cojo hasen rë xuta xi tsajin jyë rë, xi casahmi Nina xi cavechutaha me yëjë ni hacutjin xi meje rë Nina xi cuechutaha me. ²⁴ Ngayun ne, canihñutangun cjuatacun nuju cojo Jesús, me xi sahmitangun rë xuta cojo Nina ngatsë rë ngu compromisu xatsë. Hacuaha canihñutangun cjuatacun nuju cojo jni rë Jesús jan ne, hitsë sa ndaja sua machaya naja tséhë cjuandaja rë Nina xi cuma rë jni rë xutachanga naja Abel.

²⁵ Nechun cuidadu, hacuiin nitjungun Nina, me xi tichja cojo naja. Ta sa xi xutachanga naja cavatjinhngaain me tséhë castigu hya xi catsitjungui me Moisés, me xi cachja cjua rë Nina cojo xuta nguehe ngasunhndë ne, hitsë guan ngayaan, sa xi nicuyan taha ngaxtuun tséhë Jesús, me xi tichja cojo naja hisca ngajan ngahnga. ²⁶ Sacuaha nixtin rë xutachanga naja jan ne, ña nangui cafiniya cojo cjua xi cachja Nina, peru quihndë ne, chja me cuitjin: “Ngu ndiya sa tsiniya nangui, peru hacuiin suvá nangui ni tsiniya ta cojo ngahnga tsiniya.” Cuatjin chja Nina. ²⁷ Hya xi chja me cjua xi “ngu ndiya sa” ne, sua machaya naja xi chjahaxin rë yëjë ni xcusun xi finiya, cuma cuinújan ne, yëjë ni xcusun xi Nina casahmi me, cojo sa xi cuiyuju xcusun xi maji finiya. ²⁸ Vëhë xi quihndë ne, tahan nacuechji rë Nina ngatsë rë xi tiviseen ngahma gubiernu rë me; gubiernu vëhë ne, vëhë xi maji finiya. Hane xi cuatjin nihña ne, chjahanrcun Nina sacuatjin xi chuya rë me, cojo yëjë ni cjuandaja cjuajeya tséhë xi ngayaan ne, rcun me. ²⁹ Cuatjin meje rë xi nihña ta Nina naja ne, tsicjë me yëjë ni xi cjuatsehen sacuatjin rë ngu ndihi jyë xi tsicjë cuaca rë yëjë ni xcusun xi ma tí.

13

Meje rë xi nihña hacutjin xi chuya rë Nina

¹ Tángun nduju cojo xcusun naja xi nihñahmutacun xingueen sacuaha xi ngu jni ngu yojo naja. ² Hacuiin nichayun xi cojo cjuandaja chjuhunntsun xuta ngu nangui xi cjuehe nangui nuju ta tjin ngu jo xutachanga naja ne, cuatjin cafahatsja me xuta ngu nangui xi cafehe nangui rë me ne, hisca hvíin me ne, ángel xi cafahatsja me jan.

³ Ninguitsjun xuta xi hincha me ndavaya. Nihñucuendun sacuaha xi cojo ngayun nechunyun cojo rë me ndavaya. Hacuaha ninguitsjun xuta xi choho sahmi jingu sa xuta cojo ta, tséhë xi ngayun ne, tjin ngu nixtin ne, hacuaha cuma cuatjun cuatjin. ⁴ Ngayujun ni ne, meje rë xi chjuhunrcun xi hmí rë cjuavixan. Hisca ngu ngayun ne, mijí rë xi ninguelsun ngu cjuavixan xi ha tjin ndaja ta cuechu nixtin xi Nina ne, sahmi me castigu xuta xi sahmi me cjuatsehen cojo ngu xi hacuiin chjuun hacuiin xihin rë me, há tjin chjuun tjin xihin rë me ne, o há tsajin chjuun tsajin xihin rë me.

⁵ Hacuiin jercu meje nicujun tujún xi tivangun cojo nixtin nuju. Catamangutacun ni cojo xi ha tjin nuju. Cuatjin nihña ta, tséhë xi Nina ne, cuitjin cachja me: “Hatuxa tsajin nixtin xi tsismecácun nuju.” Cuatjin cachja me. ⁶ Vëhë xi jemu ndama naja xi cuitjin nújan:

Nai naja ne, me vëhë xi visecoo ná me; vëhë xi tsacjuun.

¡Ndastu mé sahmi xuta cojo ná ngahan!

Cuatjin nújan.

⁷ Ninguitsjun me xi matitjun ngajñi nuju, me xi cuacun cachja cojo nuju cjua rë Nina. Ningatuhuntacún tséhë cjuandaja xi cavetjucaa tséhë xcusun xi casahmi me, hacuaha catamangutacún cojo Nina sacuatjin camangucacun me xi cuacun vë.

⁸ Yéjë ni cjuatacun xi tjin rë Jesucristu hisca ntsacu cavetsihin ne, cjuatacun vëhë tjin rë me hisca quihndë, hacuaha cjuatacun vëhë tjin rë me yéjë nixtin xi cjui sa.

⁹ Xicatsanguun ndiya rë jingu sa cjuachacun xi hacuiin tangun cojo cjuachacun xi cjuaquixi. Hitsë sa ndaja xi ngayaan ne, cumangutacun cojo Nina ngatsë rë cjuandaja rë me, xi cuma rë ngatsë rë cjuachacun xi vicuya yahnga xuta hacutjin xi meje rë xi xinë xi siuhun ta, tséhë xi cjuachacun xi vicuya xuta xi cuacun vë ne, tsajin mé machjirëhë rë xuta xi tjengui me cjuachacun vëhë.

¹⁰ Cjuaveya rë Jesucristu ne, tangun hitsë cojo cjuatjo xi tu nu tu nu ni cjue xcun Nina ngatsë rë jyé rë yéjë ni xuta. Tangun hitsë ta, tséhë xi sacuaha nahmi xi sahmi me xcusun rë xutachanga naja ne, hatuxa cumaji sinë me yojo rë chu xi hme xi sua me sacuaha ngu cjuatjo vëhë. ¹¹ Ngayujun ni ne, ha ndaja hyun ta nahmi xi matitjun ne, vaha me jni rë chu xi cahme, ficojo me ngajan Cahndé Rcun, xi sua rë me Nina sacuaha ngu cjuatjo ngatsë rë jyé rë xuta, peru yojo rë chu ne, cahndé rë xi sinë me ne, cjue ngajan ngu xín tséhë nandya, hane ngajan cjuë cueti. ¹² Cuanitjin rë Jesús ta ngajan ngu xín tséhë nandya cahme me. Cahme me cojo sa xi tsityjahi me cjuatacun rë xuta ngatsë rë jni rë suvá me.

¹³ Ngajan xi ngayaan ne, cuetjunxen tséhë nandya, cuma cuinújan ne, cuetjunxen tséhë xcusun rë xutachanga naja, cuanguentjenguen Jesús, hacuaha meje rë xi scaa naja xi choho chja xuta tsajan sacuatjin choho cachja me tséhë Jesús. ¹⁴ Cuma cuetjunxen tséhë nandya vë ta, tséhë xi nguehe ngasunhndë vi ne, tsajin naja ngu nandya xi cuejña yéjë nu yéjë nixtin ta ngayaan ne, tivinchasen sa nandya xi tsindaja Nina xi cuma ngascan, cuma cuinújan ne, ngajan ngahnga. ¹⁵ Vëhë xi ngayaan ne, xi tivanguen ndiya rë Jesús ne, meje rë xi yéjë ni hora naxenndajan Nina, sacuaha xi titahan ngu cjuatjo xi cuma rë me, cuma cuinújan ne, meje rë xi ndaja cuinújan tséhë me, meje rë xi cuinújanquixen xi tséhë me ngayaan. ¹⁶ Hacuiin nichayun xi nihñu cjuandaja hacuaha cuisecun xingun xingu xingu ngayun ta xi cuatjin nihñu ne, sacuaha xi tituhun rë Nina ngu cjuatjo xi jemu chuya camahani rë me tséhë.

¹⁷ Tinuhyun tséhë me xi matitjun ngajñi nuju, hacuaha nihñu yéjë hacutjin xi meje rë me xi cuacun vë ta me vëhë xi sahmi cuidadu nuju me hacuaha vëe me xi cuechu nixtin xi sua me cuenta cojo Nina. Nihñu ngahñu xi me xi cuacun vë ne, cuma sua rë xahasen rë me, hacuiin choho cuma rë me xi tisahmi me xa cuatjin ta sa xi choho cuma rë me ne, tsajin mé machjirëhë xi cuma nuju.

¹⁸ Nihñu oración ngatsë niji ta, tséhë xi ngayin ne, hyin cojo cjuatacun niji xi cjuatacun niji ne, tyjahi, hacuaha hatuxa meje nihñi cjuandaja ngajñi rë tu mé ni cjuacintacun.

¹⁹ Hacuaha ngahan ne, jercu cjuéhya sa nuju xi cuatjin nihñu oración ngatsë niji, cojo sa xi sua Nina cahndé xi hitsë sa xati cuinduvatjëngë nuju.

Nguehe cijnetaha cjua

²⁰ Quihndë ne, ngayaan ne, ha hyan ta Nina ne, sua naja me cjuandaja cjuajeya, hacuaha catsicuya me Nai naja cjuahñu, me xi cavejña ngajñi rë nima. Nai naja ne, hacuaha jemu ndaja sahmi naja me cuidadu sacuaha sahmi cuidadu ngu xuta chu tsángä rë me. Cuatjin ma sahmi Nai naja ngatsë rë jni rë me xi cavetju hya xi cahme me, jni xi casahmichihin rë compromisu xi yéjë nu yéjë nixtin sahmi xa. ²¹ Nina catisua nuju me yéjë cjuandaja rë me, cojo sa xi ngayun ne, cuma nihñu yéjë hacutjin xi meje rë me. Hacuaha catisahmi me cojo naja hacutjin xi chuya rë me, ngatsë rë xi ngayaan ne, tjin tangun cjuatacun naja cojo Jesucristu. Hane ngayaan ne, meje rë xi nihñña jyé nihñña hnga Jesucristu yéjë nu yéjë nixtin. Cuatjin Jain.

²² Ngayujun ni ne, nihñu favor ne, tisiñuju cojo cjuasua cjua xi catsihindu nuju vë ta hacuaha hacuiin cjín cjua vë xi catsihindu nuju. ²³ Nguehe tisuá tijimachaya nuju ta cha Timoteo xingueen ne, ha camandaya cha tséhë cjuañihi. Sa xi cjuehe xati cha ne, cuinduvintjenguin nuju ndyá, hane ndyá sacú xingueen. ²⁴ Tuhun ngu nina naha cojo yéjë me xi matitjun ngajñi nuju cojo yéjë sa me xi má ladu rë Nina. Xuta Italia xi xuta rë Nina ne, hacuaha tsingatju me ngu nina nuju.

²⁵ Nina catisua nuju me cjuandaja rë me. Cuatjin jain.

Carta xi catsihindu Santiago

Cjua xi catsihindu Santiago me xi hacuaha yahañihu rë Jacobo

¹ Ngahan Santiago, xi mosu hndixahan tséhë Nina cojo tséhë Nai naja Jesucristu ne, tsingátju ngu nina tsujun, ngayujun ni xi xuta ladu rë Nina ngayun, ngayujun ni xi cavitsojo yun ngasunhndë.

Cjuatacun ndaja xi nduva tséhë Nina

² Ngayujun ni tsan ne, ngajñi rë yéjë ni xcusun cjuacjintacun xi cuátmun cuma ne, meje rë xi ndaja catama rë xahasan nuju ta, ³ tséhë xi ha hyun ta, hya xi cavatju xi cacaña nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vëhë cuisecoo nuju xi hitsë sa scaa nuju tu mé ni cjuacjintacun xi cuátmun sa cuma.

⁴ Peru nihñu nguyjë xi scaa nuju cojo yéjë ni cjuacjintacun jan hisca xi cuijnetaha. Sehe ngajan xi cuma yun xuta tyahi xi chutaha cjuatacun rë xi cuma sahmi yéjë ni cjuandaja.

⁵ Peru sa xi yo yun xi sahmi chaja nuju cjuatacun ne, chjahyun rë Nina, hane sacú nuju ta, tséhë xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rë me. ⁶ Peru meje rë xi catamangutacún hora xi chjahyun rë me, hacuiin jo cuma tacún ta, tséhë xi xuta xi jo má cacun me ne, tangun me cojo tsindyu rë ndachacun xi ficojo rë tjo, xi fi nguehe fi ngajan. ⁷ Xuta xi cuatjin cun me ne, catijnercu me ta tsajin mé xi sua Nina me ta, ⁸ tséhë xi jo má cacun me, jo xcun jo hntsua me tséhë yéjë ni xcusun xi sahmi me.

⁹ Peru xuta yuma xi ladu rë Nina me ne, ndaja catama rë xahasan rë me ta, xcun Nina ne, jercu vengui chjí rë me. ¹⁰ Hane xuta nchina xi ladu rë Nina me ne, hacuaha ndaja catama rë xahasan rë me, hya xi cuijnercu me xi yéjë ni cjuanchina rë me ne, hisca venguiin chjí rë xi cuma rë Nina. Xuta nchina ne, cjuë me sacuatjin fë naxu ndexin. ¹¹ Hya xi tjercu ma suë chan ndavá ne, xca jan ne, fë yéjë xi. Hacuaha naxu rë ne, fë vixu. Xcusun rë ne, handasa tjercu ndajyihu camahani ne, fë vetsun. Hacuanitjin ni cjuë xuta nchina ngajñi rë cjuayuma xi sahmi me.

Cjuatacun tsehen

¹² Jemu ndaja tsajan ngayaan, sa xi scaa naja cojo yéjë ni cjuacjintacun xi cuátmun cuma ta, hya xi cavatju xi cacaña naja ne, hya sacú naja ngu cjuahñu ndajyihu ngajan xcun Nina. Ta cachja Nina xi, sa xi hmutacun me ne, sua naja me ngu cjuahñu ndajyihu jan. ¹³ Hya xi xahasan naja meje rë xi nihñu ngu cjuatacun tsehen ne, mijí rë xi cuinújan xi Nina casua naja me cjuatacun tsehen jan, ta Nina ne, hatuxa tsajin rë me cjuatacun tsehen, hacuaha hatuxa suaain naja me cjuatacun tsehen xi nihñu. ¹⁴ Peru cjuatacun tsehen xi meje nihñu ne, hatuxa vetju tséhë xahasan naja suvaan. ¹⁵ Hya xi ningatahantacun xi meje nihñu cjuatsehen ne, cjuatacun jan sahmi xi nihñu cjuatsehen. Hane sa xi hatuxa ningatehen rë yéjë ni cjuatsehen xi nihñu ne, sacuiin cahndé cuechun xcun Nina.

¹⁶ Ngayujun ni tsan ne, mijí ná xi cuma ndacha ngayun. ¹⁷ Yéjë ni cjuandaja ndajyihu xi sacu naja ne, nduva tséhë ngahnga ta, Nina xi casahmi me yéjë ni ndihi xi siutaha ngahnga ne, me vëhë sua naja me yéjë ni cjuandaja jan. Ndihi xi siutaha ngahnga jan ne, vindeya xcusun rë ta, tjin hora sua ndavá rë ne, tjin hora suaain ndavá rë. Peru Nina ne, chuva xi tacun ni me, tsajin vindeya cjuatacun rë me. ¹⁸ Hane hora xi camacjain naja cjua xi cjuaquixi ne, hora hya casua naja me ngu cjuahñu xatsë. Cuatjin casua naja me ta, tséhë xi meje rë me xi ngayaan ne, tjun tjun cuma yaan xuta ladu rë me. Sehe ngaxtun vëhë ne, cjín sa xuta xi hacuaha cuma me ladu rë Nina.

Cuitjin xi chjahanrcun Jain Nina

¹⁹ Ngayujun ni tsan ne, hya xi yo cuichja cojo nuju ngu cjua ne, titjun tinuhunndujun mé cjua xi cuichja me. Hacuiin ngutjen chjayunngun, hacuiin ngutjen cuma cjan nuju.

²⁰ Ta sa xi cjan nuju ne, nihñuu cjuandaja sacuahatjin xi meje rë Nina. ²¹ Peru yëjë ni cjuatsehen ne, meje rë xi tiyujunxun. Hane cjua rë Nina xi camacjain nuju ne, tetjún cojo cjuandaja cojo cjuajeya cahntsua xahesen nuju ta, tsëhë xi cjua vëhë ne, cuma cuaxëtje nuju.

²² Hane sa xi tu cuiśniuju ni cjua rë Nina jan, hane nihñuu hacutjin xi chja ne, tu cuindachun suvun ni rë yojo nuju. Vëhë xi hacuiin tu cuiśniuju ni ta, meje rë xi nihñu yëjë ni hacutjin xi vitexa cjua rë Nina. ²³ Sa xi tu cuiśniuju ni hane nihñuu hacutjin xi vitexa cjua jan ne, tangun yun cojo ngu cha xi vutsejenya cha xcun cha cojo espeju.

²⁴ Cavutsejenya cha xcun cha hacutjin jyihi cha ne, peru xi cafe cha ne, ngutjen cachaya rë cha hacutjin jyihi cha. ²⁵ Peru hya xi cuiśniuju cjua xi vitexa Nina jan ne, sa xi chutayun sa cjua, sa xi chayaain nuju cjua, sa xi nihñu jain hacutjin xi vitexa cjua jan ne, sacú nuju cjuandaja rë Nina xcun ngasunhndë nuju. Cjua rë Nina xi cuacun jan ne, hatuxa cjuaquixi, hacuaha cjua vëhë xi vëhëndaya naja tsëhë ngajñi rë cjuatsehen.

²⁶ Sa xi tiningatuhuntacún xi jemu ndaja tichjhunrcun jain rë Nina, ngajñi rë xi tujyë chocho vetju ntsuvun nújun ne, tu mahya xi chjuhunrcun rë Nina ta, tu tivindachun suvun ni rë yojo nuju. ²⁷ Jyan xcusun vihi xi chuya rë Nina Nahmi naja xi nihñña: ngu ne, xi chjahanrcun jain me cojo ngu xahesen xi tyjahi; má jo ne, xi cuiseecoon rë hndixahan cojo chjuun cahan ngajñi rë cjuacjintacun rë me; xi ma jyan ne, xi hacuiin nihñña cjuatsehen.

2

Meje rë xi chjahanrcun yëjë ni xuta

¹ Ngayujun ni tsan ne, quihndë xi macjain nuju Nai naja Jesucristu, me xi tjemu tjin rë cjuandaja ne, mijí rë xi nihñu jyë ngu xuta ne, hane nihñu chuvun nga ngu me. ² Sa xi cuisehen ngu xuta nchina cahntsua yungun nuju, xi hisca oro xtungun rë me hacuaha tjercu ndajyঃ ihi tsjian rë me ne, hacuaha cuisehen nga ngu xuta xi yuma cojo tsjian rë me xi jyihi ntsun ntsun me ne, ¿mé cuinújun cojo rë me? ³ Me xi ndajyঃ ihi tsjian rë jan ne, ¿há jemu chjuhunrcun me, xi cuitjin cuinújun cojo rë me?: “Tinechun nguehe cahndé ndajyঃ ihi vihi.” Hane me xi yuma jan ne, ¿há cuitjin cuinújun cojo rë me?: “Ngaye ne, ngajan nechin jan”, o sa tsajin ne: “Nguehe nechin nguehe nangui.” ⁴ Sa xi cuatjin cuinújun ne, ngajan matsejen xi hisca ngajñi nuju ne, hacuiin tangun xcusun nuju xi nihñu cojo ngayëjë ni xuta. Tinichuvun xingun ni ne, peru cojo ngu cjuatacun tsehen.

⁵ Ngayujun ni tsan ne, tinuhun cjua vihi. Nina ne, cavaxijin me xuta xi yuma xcun ngasunhndë, cojo sa xi tjemu ndaja cumacjain rë xuta jan me, hacuaha sacú rë xuta jan cahndé ndajyঃ ihi nixtin xi cuetsihin cuitexa jain me ngajñi rë yëjë ni xuta ngasunhndë, sacuatjin xi ha cachja me xi sacú rë yëjë ni xuta xi tsihmucacun me Nina. ⁶ Peru ngayun ne, nisavun rë xuta yuma. Peru ¿yo xi chocho sahmi cojo nuju ni? ¿Yo xi faha nuju, fi vinchajyঃ nuju xcun xutaxa rë? Xuta nchina xi cuatjin sahmi cojo nuju. ⁷ Hacui jain me. Hacuaha xuta xi nchina ne, me vëhë xi chocho chja me tsëhë Jesucristu. Hane Jesucristu jan ne, hacui me xi casua naja ñihi xi tsëhë suvá me.

⁸ Xcun xujun rë Nina ne, camahindu ngu cjua xi cavitexa Nina, xi chja cuitjin: “Meje rë xi nihmitacuin xinguin sacuahatjin nihmitacuin yojo riji.” Sa xi cuatjin jain nihñu ne, jemu ndaja tjin. ⁹ Peru sa xi nihñu jyë ngu xuta hane nihñu chuvun nga ngu me ne, ha canichujún cjua xi cavitexa Nina. Hacuaha suvá cjua jan ne, vëhë cuinchajyঃ nuju ta canihñuu hacutjin chja cjua jan. ¹⁰ Ta sa xi nichujún ngu cjua xi cavitexa Nina ne, handasa nihñu yëjë ni cjua xi yahnga ne, peru tangun jyঃ nuju cojo jyঃ rë ngu xuta xi hndiin camahani tsëhë yëjë ni cjua xi cavitexa Nina jan. ¹¹ Cuatjin ta, tsëhë xi ngu ni Nina xi cavitexa me catsijo cjua vihi. Ngu ne: “Xi canindesiin cojo rë ngu chjuun, o cojo rë ngu xihin xi xín.” Ngu nga ne: “Xi caniquiin xuta.” Vëhë xi handasa hacuiin nindesun cojo rë ngu chjuun, peru sa xi nicuhun ngu xuta ne, ha canichujún cjua xi cavitexa Nina jan, hane tjin jyঃ nuju xcun cjua vëhë. ¹² Ngajan xi meje rë xi tinújun hacuaha nihñu cjuandaja, sacuaha xi ha ndiya tsichuva nuju Nina, scutsejen me hacutjin canihñu xi

vitexa cjua xi vēhēndaya naja. ¹³ Hane sa xi tsajin nuju cjuayumatacun cojo jingu sa ne, hacuaha tsajin rē Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rē Nina cjuayumatacun cojo nuju nixtin hya.

Sa xi macjain Jain naja ne, nihña cjuandaja

¹⁴ Ngayujun ni tsan ne, sa xi cuinújun xi macjain nuju Jesucristu, peru nihñuu cjuandaja ne, hisca vengui chjiin rē ta, tséhë xi Nina ne, cuaxintjiin nuju me xi cuatjin nihñu. ¹⁵ Hya xi sacú xingun cojo ngu xuta ladu rē Jesucristu xi jemu yuma camahani, xi jercu ntsun tsjian rē me, hacuaha hisca tsajin niñu xi sinë me ne, ¹⁶ ¿jhá cuitjin cuinújun cojo rē me? “Tangún ni tsan. Xicamacjiintacún. Ndaja tetsun yojo nuju ta jemu hnchan, hacuaha ndaja xinu niñu ta quihi hora.” Peru sa xi tsajin mé catuhun rē me xi cuaja xi sinë me ne, vengui chjiin camahani rē xi cuatjin cuinújun cojo rē me. ¹⁷ Vēhë xi vengui chjiin rē xi tu suvá cuinújan ni xi macjain naja Jesucristu nguyéjé rē xi mijí nihña cjuandaja.

¹⁸ Peru tjin ngu cha xi cuichja cuitjin: “Hacjahi xuta xi macjain rē me Jesucristu, handasa sahmii me cjuandaja. Hacjahi xuta xi sahmi me cjuandaja, handasa macjaain rē me Jesucristu.” Peru ngahan cuichjá cojo rē cha jan ta hacuiin hacjahi xuta ta ¿hacutjin cuma xi macjain Jain naja, sa xi hacuiin nihña cjuandaja? Ngatsé rē cjuandaja xi nihña ne, vēhë tsejen xi macjain Jain naja Jesucristu. ¹⁹ Cha vēhë ne, ¿jhá macjain Jain rē cha xi tjin ngu ni Nina? Tjemu ndaja tjin xi cuatjin macjain rē cha. Peru hacuaha xitsehen ne, cuatjin macjain rē, hane ña fatsé xitsehen má xi tsacjun. ²⁰ Tjemu yumahesen cha xi cuatjin cuichja jan. Peru nguehe cuichjá cojo rē cha ngu jo cjua, cojo sa xi cuijnercu cha ta, vengui chjiin rē xi cuinújan xi jercu macjain naja Jesucristu, sa xi mijí nihña cjuandaja. ²¹ Sacuaha xutachanga naja Abraham ne, ha hyan xi hatséé nixtin ne, camangucacun me xi tsiquehen me quihndi rē me xi hmí Isaac ngajan xcun ngasunscun, sacuatjin xi ha cachja Nina cojo rē me. Hane ngatsé rē xi cuatjin cahndé me tséhë Nina ne, vēhë xi cachja Nina xi ngu xuta ndaja me, ngu xuta tyjahi me. ²² Ngajan matsejen ta xcusun xi casahmi me ne, cama tangun cojo cjua xi macjain rē me. Hacuaha ngatsé rē xi cuatjin casahmi me ne, vēhë xi camatsejen ta macjain Jain rē me. ²³ Cuatjin camá sacuatjin chja ngu cjua xi camahindu xcun xujun rē Nina, xi chja cuitjin: “Abraham ne, camacjain rē me Nina. Vēhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tséhë me ta amigu rē me.

²⁴ Cuatjin xi hyan xi chja Nina xi xuta tyjahi yaan sa xi nihña cjuandaja, hacuiin sa xi tu suvá ni macjain naja. ²⁵ Hacuaha ni tjin ni cavatju na xi hmí rē Rahab, na xi caviteña na yojo rē na. Cama tyjahi xahasen rē na ta, tséhë xi casahmi na ngu cjuandaja, hya xi cojo cjuandaja casua na cahndé xi caviyuju xuta ndava na, xuta xi catsingatju xutachanga naja ngajan nangui rē na. Hacuaha hacjahi ndiya xi catsingacun na me, xi cuetju me cjue me hiscan xi tsajin condra rē me. ²⁶ Sacuatjin xi machjiriin yojo rē ngu nima ta tsajin hasen rē ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

3

Hacutjin sahmi neje

¹ Mijí rē xi cjín ngayun cuma yun maestru tséhë cjuachacun tsan ta, ha hyun ta ngayin xi vicuyin cjuachacun ne, hitsé sa tsichuva niji Nina xi cuma rē xuta xi yahnga.

² Ngayejen ni ne, hatuxa cjín cjuatseen xi nihña. Peru sa xi suvá cjuandaja chja ngu xuta, hane hisca ngu cjua choyihin chjaain me ne, me vēhë ne, ngu xuta ndaja me, ngu xuta tyjahi me. Hacuaha ma vetjo me yojo rē me. ³ Sacuaha ngu naxin ne, sa xi cueyan frenu hntsua chu cojo sa xi cuihndé chu tsajan ne, vēhë sahmi xi cuma cuanguen cojo chu tu cutjin hiscan xi meje naja. ⁴ Hacuaha sacuaha tjin barcu ne, handasa tjercu jyihí, handasa jemu hñu ngahñu rē tjo xi tsivaha rē ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rē timú, sehe ficojo cha tu cutjin hiscan xi meje cjue cha.

⁵ Hacuaha ni tjin ni neje ta, ngu rquí lihndi ni tséhë yéjé ni yojo naja. Peru handasa lihndi

ne, tjemu yehe cjuahaxi xi nújan cojo rë. Sacuaha ngayaan ne, xi cuetahan rë ngu ndihi ne, handasa ngu ndihi lihndi ni ne, peru cuma cuaca rë yéjë ni ngu nguijñacha. ⁶ Hane neje ne, tangun cojo ndihi ta tjemu cjan rë. Tjercu ma chja cjuatsehen. Handasa tjin cahndé rë xi quitaha ngajñi yojo naja ne, peru caa rë tsinguetsun naja. Véhë xi tjercu choho vatjun má xcun ngasunhndé naja ta, tséhë xi xitsehen ne, véhë sahmi xi choho nújan. ⁷ Ngayaan xuta ne, camá canímaxun yéjë ni xcusun chu, sacuaha chu nguijña, chu nisë, chu yë, cojo chu ti. ⁸ Peru neje ne, tsajin yo cuma tsimaxu rë ta, hatuxa tsehen yojo véhë. Suaain cahndé xi cuma maxu. Hacuaha sacuaha nehnú chu yë cjan rë, xi quitsë rë xan rë chu xi tsiquehen naja hya xi faha chu ne, cuatjin neje ta, quitsë rë cjuatsehen xi choho nújan. ⁹ Ha cojo neje ni ne, ndaja nújan tséhë Nina Nahmi naja, hane ha cojo véhë ni ne, nchaten tséhë xingueen, handasa casahmi naja Nina sacuaha jyihí suvá ni me. ¹⁰ Tséhë ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan. ¹¹ Ngu nandan ne, hatuxa cumaji cuetju tangun nandá xi hyun cojo nandá xi sa. ¹² Hane ngu ya laxa ne, cumaji cuaqui rë tsé. Hacuaha ngu nahñu tutsejé ne, cumaji sua laxa rë. Hacuaha ni tjin ni nandá xtya ne, suaain nandá yufa.

Cjuatacun xi vengui chjí rë

¹³ Sa xi tjin ngajñi nuju ngu ngayun xi tjemu vechutaha cjuatacun nuju ne, meje rë xi nihñu cjuandaja. Meje rë xi cuma tsejen xi xuta ndaja xuta jeya ngayun, ngatsë rë xi nihñu cjuandaja xi vitexa cjuatacun nuju. ¹⁴ Peru sa xi tjin nuju cjuaxin cahntsua xahasen nuju, hane sa xi meje nuju xi suvun ni ngayun xi ndajyihí cuátjun cuma ne, meje rë xi hacuiin nihñu yehe yojo nuju, hacuiin nújun xi tjercu vechutaha cjuatacun nuju ta, quixiin vë. ¹⁵ Ta cjuatacun véhë ne, hacuiin ngu cjuatacun xi casua Nina ta cjuatacun ni rë xutajyé ngasunhndé vihi, sacuaha cjuatacun rë xitsehen. ¹⁶ Hiscan xi tjin cjuaxin, hiscan xi tjemu choho me, ngajan ne, tjemu tujyé sahmi xuta, tjemu sahmi me yéjë ni cjuatsehen. ¹⁷ Peru sa xi tjin naja cjuatacun xi nduva tséhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yéjë ni ngu cjuandaja, tjin naja cjuayumatacun cojo xuta, tacun cahndé cjuatacun naja, hacuiin jo má tacun. ¹⁸ Hane sa xi ngatsë rë cjuandaja xi nihña cuma cuijnetaha si xi tjin ngajñi rë xingueen ne, cjuandaja cuinechan cojo xingueen, hane yahnga sa xuta ne, hacuaha cuetsihin sahmi me cjuandaja.

4

Xuta xi tjercu macacun me cojo ngasunhndé

¹ ¿Mé má cuatjin tjercu nihñu si ngajñi nuju? ¿Mé má cuatjin chicjun cojo xingun? Nihñu ngatsë rë yéjë ni cjuatsehen xi tjercu meje rë xahasen nuju. ² Tu mé ni ne, meje nuju, peru ngatsë rë xi sacuiin nuju ne, véhë xi nicuhun xingun. Tjin nuju ngu cjuaxin tséhë tu mé ni, peru ngatsë rë xi sacuiin nuju ne, véhë xi vetsuhun si cojo xingun, vetsuhun chicjun cojo xingun. Sacuiin nuju xi meje nuju ta, tséhë xi chjahyuun rë Nina. ³ Hacuaha handasa chjahyun ne, peru sacuiin nuju ta, tséhë xi hacuiin tséhë cjuandaja xi chjahyun ta, xi chjahyun ne, tu nicujun ngajñi rë ngu cjuasua xi fehya xahasen nuju. ⁴ Ngayun xi jo xcun jo ntsuvun ne, ¿há hyuun ta sa xi tjenguen xcusun rë xuta ngasunhndé ne, má yaan condra tséhë Nina? Véhë xi tu yo ni xi vejñangucacun xi tjengui xcusun rë xuta ngasunhndé ne, sahmi me condra Nina. ⁵ Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndé cahntsua xahasen naja. Véhë xi mijí rë Nina xi cuetjunxen tséhë ladu rë me.” ⁶ Hacuaha Nina ne, visecoo naja me cojo yéjë ni cjuandaja rë me, ta tjin sa ngu cahndé ngajan xujun rë me xi chja cjua rë me cuitjin: “Nina ne, chuyiin rë me tséhë xuta xi sahmi yehe yojo rë, peru xuta xi jeya me ne, sua Nina me cjuandaja.” ⁷ Véhë xi meje rë xi tinuhun tséhë Nina. Sa xi nihñuu hacutjin xi meje rë xitsehen ne, cuetjuxin xitsehen tsujun. ⁸ Tejñutsja Nina cjuatacun nuju, hane sehe Nina ne, cuaha nuju me. Tiyujunxun cjuatsehen xi tinhñu, hane ngayun xi jo má tacún ne, nihñu tyjahi xahasen

nuju. ⁹ Catamavatacún, hacuaha chjihndun, tséhë xi canihñu cjuatsehen. Cahndé rë xi cuéjnu ne, chjihndun, hane cahndé rë xi sua ma nuju ne, choho catama nuju. ¹⁰ Ninguijnu cjuatacun nuju xi chjuhunrcun Nai naja, sehe Nai naja ne, sahmi yehe nuju me.

Mijí rë xi nichuvan xingueen

¹¹ Hacuiin choho nújun tséhë xingun tsan ta, sa xi choho nújun tséhë xingun ne, tangun vëhë cojo xi choho nújun tséhë cjua xi vitexa Nina. O sa xi nichuvun xingun ne, tangun vëhë cojo xi nichuvun cjua xi vitexa Nina. Hane sa xi nichuvun cjua xi vitexa Nina jan ne, hacuiin tinihñu hacutjin xi vitexa ta, tinihñu yojo nuju sacuaha ngu xutaxa rë. ¹² Peru ngu ni me xi cavitexa hacutjin xi nihña, hane ngu ni me vëhë xi tsichuva me. Me vëhë ni xi cuma cuaxëtje naja me, me vëhë ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

Tsajin yo vëë rë mé xi cuma nchujun ni

¹³ Nguehe cuichjá ngu cjua. Tjin ngu jo yun xi cuitjin nújun cojo xingun: “Nchujun ni nguini ne, cuétjun cuanguen ngu nangui. Ngajan cuinechan ngu nu xi nihña cjuayuma naja. Cuatjin nihña, sehe sacú naja tujún.” ¹⁴ Peru hisca hyúun hacutjin cuátjun cuma nchujun ni nguini. Ngayaan xcun ngasunhndé naja ne, tangun yaan cojo yufí nangui ta, yufí jan ne, tsejen hora xi nduva. Peru xi tu ngu hora ne, ha cavatjucjin, cafëya. ¹⁵ Vëhë xi hitsë sa ndatjin xi cuitjin cuinújun: “Sa xi Nai naja meje rë me ne, sua sa me cjuahñu naja xi nihña cuitjin cuatjin xa.” ¹⁶ Peru ngayun ne, tjercu nihña yehe yojo nuju xi nújun cojo xingun hacutjin xi meje nihña. Hane xi cuatjin nihña yehe yojo nuju ne, ngu cjuatsehen vëhë. ¹⁷ Hane sa xi ha hyan hacutjin fi yëjë ni cjuandaja, peru mijí nihña ne, tjin jyé naja xcun Nina.

5

Hacutjin cuatju xuta nchina cuma

¹ Quihndé ne, ngayujun ni xi nchina yun ne, meje rë xi chjindayun chjihndun, ngatsë rë yëjë ni cjuachoho xi cuátjun cuma. ² Yëjë ni cjuanchina nuju ne, cuenguichjiin rë ta, tséhë xi cjuë yëjë cjuehndu. Sacuaha tsjian ndaja nuju ne, cjuë sinë chu quixún. ³ Sacuaha tujún ndaja nuju ne, cuma xutsë. Hane tséhë xi cuatjin xutsë tujún nuju ne, vëhë tsejen xi canihñuu cjuandaja cojo tujún jan, hane ngatsë rë vëhë ne, cuátjun castigu cuma. Tjercu tivetjun camahani cjuanchina nuju quihndé, nixtin xi ha ndiya cuijnetaha cjuë ngasunhndé. ⁴ Cjëë cjuë cuechjun yëjë ni chjí rë mosu nuju xi casahmi xa nguijña nuju, hane Nai naja ne, me xi ma titjun tséhë yëjë ni ne, vihndé me cjua xi tivinchajé yëjë ni mosu nuju xi quitjun tséhë. ⁵ Nguehe ngasunhndé vihi ne, tjercu ndajyihi cavatjun camá, tjercu catuhun rë cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma. ⁶ Ngayun ne, canihñu castigu canicuhun xuta ndaja xuta tyjahi. Hane xuta ndaja xi cuacun jan ne, joho ni rë me xi canihñu cojo rë me.

Meje rë xi cuinechanyan rë Nina cojo jeya hacuaha chjahyan rë Nina

⁷ Vëhë xi tinechunyun cojo jeya tsan, hisca xi cuinduva nga Nai naja. Cha xi sahmi xa nguijña ne, xi cjuë cuincha cha tjë ne, cuejñaya cha cojo jeya hisca xi cuatju chan tsi ne, sehe cuma sacú rë cha ngu cosecha xi ndajyihi tséhë xitjë rë cha. ⁸ Hacuaha ni tjin ni, meje rë xi tinechunyun cojo jeya, hacuaha tejñuhñu xahesen nuju ta, tséhë xi jima tiña nixtin xi cuinduva nga Nai naja. ⁹ Sa xi cuinchunjyun xingun tsan ne, hacuaha cojo ngayun cuma yun castigu. Vëhë xi mijí rë xi cuinchunjyun xingun ta, tséhë xi me xi tsichuva naja ne, chaja sa hitsë xi cuinduva nga me. ¹⁰ ¿Há vitsjiin nuju hacutjin caca rë yëjë ni xutachanga naja xi cachja me cjua xi caveya Nina cjuatacun rë me hatsëe nixtin? Me xi cuacun vëhë ne, casahmi me cjuetacun ngajñi rë yëjë ni cjuañihi xi cavatju me camá. Hacuaha cuatjin meje rë xi nihña tsan. ¹¹ Hatuxa nújan xi tjercu ndaja tséhë me xi caca rë cojo cjuañihi. Ngayujun ni ne, ha machaya nuju cjua xi chja hacutjin caca rë ngu xutachanga naja xi hmí rë Job, hya xi cavatju me cjuañihi camá. Hacuaha ha hyun

ta, hya xi cajnetaha cjuañihi xi cavatju me camá ne, tjemu ndaja casahmi Nai naja cojo rë me ta, tséhë xi Nai naja ne, hatuxa tjin rë me cjuandaja, tjin rë me cjuayumatacun.

¹² Nguehe cuichjá cojo nuju ngu cjua xi tjemu vengui chjí rë tsan. Hora xi tivisiajmu cojo xingun ne, hacuiin cuinújun xi vëë Nina, vëë tsuhi, hacuiin cuinújun xi vëë tu mé sa ni xcusun. Meje rë xi yéjë ni xi cuinújun ne, cjuaquixi, hacuiin cuindachun. Sehe ngajan xi Nina ne, sahmii nuju me castigu.

¹³ Sa xi choho tivatjun jima ne, chjahyun cjuandaja rë Nina. Sa xi tjemu sua nuju ne, sun ngu xi nihñu jyë nihñu hnga Nina. ¹⁴ Sa xi hmu nuju ne, chjindayun rë xuta changá xi vitexa ngajñi rë xuta ladu rë Nina, xi tsufë nuju me aceite hacuaha cjuehya me cjuandaja rë Nai naja ngatsë nuju. ¹⁵ Sa xi nguñajatacun hora xi chjahyan cjuandaja rë Nina ne, xuta hmu rë jan ne, cumandaja me ta, Nai naja ne, sua rë me cjuahñu. Hane sa xi casahmi xuta hmu rë jan ngu cjuatsehen ne, Nina tsinchataha jyé rë me. ¹⁶ Véhë xi tijacun jyé nuju cojo xingun, hacuaha chjahyun cjuandaja rë Nina ngatsë rë xingun, sehe cumandaja me. Ngu xuta xi tyahi cjuatacun rë me xcun Nina ne, hya xi fehya me cjuandaja rë Nina ne, tjercu vengui chjí rë cjua rë me ta, Nina ne, visecoo rë me. ¹⁷ Ngu xutachanga naja xi hmí rë Elías ne, véhë ngu xuta sacuaha ngayaan. Peru cafehya nguñajacacun me cojo Nina xi cuaain tsi. Hane chuva rë jyan nu vasen ne, cavaain camahani tsi xcun nangui. ¹⁸ Hya xi camá ne, cafehya nga rë me Nina xi cataha tsi, hane cavuya cavaha nga tsi, hacuaha camá nga yéjë ni xitjë.

¹⁹ Ngayujun ni tsan ne, sa xi tjin ngu xuta ngajñi nuju xi cuetjuxin me tséhë ndiya rë cjuaquixi, hane sa xi tjin ngu yun xi cuisecun rë me xi cuya cuisehen nga me ndiya rë cjuaquixi ne, ²⁰ ninguitsjun cjua vihi: yo yun xi cuisecun rë ngu xuta tsehen xi cuetjuxin me tséhë cjuatsehen xi sahmi me ne, ngatsë nuju ne, cuetjutje me tséhë castigu xi cuatju me cuma. Hacuaha ngatsë nuju ne, tjercu cjín jyé xi cumanchataha.

Carta xi tjun tjun catsingatju San Pedru

¹ Ngahan Pedru, apóstol tséhë Jesucristu ne, tsingátju carta vihi xi cuma nuju ngayujun ni xi cavitsojo ngayun ngajan distritu Ponto, distritu Galacia, distritu Capadocia, distritu Asia, cojo distritu Bitinia, cahndé xi nechuntuhun. ² Hisca hatsëe ne, Nina ne, cavejñangucacun me cavaxijin me ngayun, hacuaha Hasen rë me ne, cavyujuxin nuju, cojo sa xi cuinuhyun tséhë Jesucristu hacuaha cuma tyjahi xahasen nuju ngatsë rë jni rë me. Nina ne, catitsixuva me cjuandaja cjuajeya xi cuma nuju ngayujun ni.

Cuetahantacun ngu cjuahñu xatsë

³ Nihña jyé nihña hnga me xi Nina Nahmi rë Nai naja Jesucristu cojo Hasen rë me. Jercu hmu camá rë Nina ngayaan, hane ngatsë rë xi Jesucristu cavuya me cjuahñu tséhë ngajñi rë nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsë, ⁴ hacuaha cojo sa xi satë naja ngu cjuandaja rë Nina xi tsajin nixtin xi cuetsun, hatuxa tyjahi, hacuaha tsajin nixtin cjuéya. Hane yéjë ni cjuandaja vëhë ne, tetjo vëhë ngahnga xi cuma nuju ngayujun ni. ⁵ Hane tséhë xi ngayujun ne, mangutacun cojo Nina ne, vëhë xi me vëhë tisahmi me cuidadu ngayujun ni cojo ngahñu rë me, cojo sa xi cuechuntuhun cjuandaja xi cuaxëtje me ngayun. Hane cjuandaja vëhë ne, ha tjin ndaja rë Nina cojo sa xi tsingacun me hya xi cjuë nixtin xi nechantahan ngasunhndë.

⁶ Tséhë vëhë xi ngayujun ni ndama nuju, handasa hitsë sa nixtin ne, sahmi nguyjë xi jemu cuatjun cjuañihi cuma. ⁷ Cuatjin meje rë xi chutaha nuju, cojo sa xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma chutahachuva rë cojo ndihi. Hacuaha ni tjin ni nuju ngayun ne, meje rë xi chutaha chuva rë xi mangutacun cojo Nina. Hane xi cuatjin mangutacun cojo Nina ne, jercu sa vengui chjí rë xi cuma rë oro. Hane xi cuatjin ndaja mangutacun cojo Nina ne, Nina ne, sahmi jyé sahmi hnga me ngayun, jemu ndajyihi cjuandaja xi sua nuju me, hacuaha cjuaharcun nuju me nixtin hya xi cuya cumatsejen nga Jesucristu. ⁸ Ngayun ne, hmutacún Jesucristu handasa cahyuun me, hacuaha mangutacun cojo rë me handasa hacuiin tinutsujun me. Vëhë xi jercu ndama rë xahasen nuju ne, xi hisca maji nýjun mé xi má nuju cojo xahasen nuju. ⁹ Ngajan xi Nina ne, cuaxëtje me ngayun, ngatsë rë xi jercu ndaja camangutacun cojo rë me.

¹⁰ Profeta ne, jercu cavutahahya camahani me hacutjin xi Nina cuaxëtje me xuta. Hacui me vëhë xi ha tjun sa cachja me tséhë cjuandaja xi ngascan sua Nina ngayujun ni. ¹¹ Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rë Cristu xi jiya cahntsua xahasen rë me, hya xi tjun sa casua me camachaya rë xuta tséhë yéjë ni cjuañihi xi ngascan cuatju Cristu cuma cojo cjuandaja ndajyihi xi satë rë me ngascan. ¹² Nina ne, casua me camachaya rë profeta xi cuacun jan ta cjua xi cachja me ne, hacuiin tséhë me ndaja ta tsujun ndaja. Hane cjua vëhë ne, hacui cjua xi cachja xuta xi casua me camachaya nuju cjuandajyihi xi chja tséhë Jesucristu ngatsë rë xi Hasen rë Nina xi caningatjun rë tséhë ngahnga ne, cuatjin casua rë me chuva rë xi cuichja me. Cjua vëhë ne, hisca ángel ne, jercu meje cuijnercu.

Meje rë xi naxenxen yojo naja tséhë cjuatsehen

¹³ Vëhë xi meje rë xi tjin chjine ngayujun ni, hacuaha catiyuju chihin cjuatacun nuju. Ndaja tetuhun tacún tséhë cjuandaja xi sua nuju Nina nixtin hya xi cuya cumatsejen nga Jesucristu. ¹⁴ Sacuaha quihndi xi ndaja vihndë ne, xicatuun cahndé xi cuitexa nuju cjuatacun tsehen xi tjin nuju hatsëë, hya xi jñu cjuatacun nuju. ¹⁵ Cahndé rë vëhë ne, ngajñi rë yéjë xi nihñu ne, naxunxun yojo nuju tséhë cjuatsehen cojo sa xi tséhë Nina cuma ngayun, sacuahatjin Nina, me xi cavaxijinjñi nuju ne, tuxa jercu xín me tséhë yéjë ni cjuatsehen. ¹⁶ Tséhë xi xcun xujun rë Nina ne, cuitjin camahindu cjua xi cachja Nina: “Meje rë xi naxunxun yojo nuju tséhë cjuatsehen cojo sa xi tsahan cuma ngayun ta, ngahan ne, tuxa jercu xín ngahan tséhë yéjë ni cjuatsehen.”

¹⁷ Ngayujun ni ne, tséhë xi “Nahmi” nújun tséhë me xi texta ni tsichuva cjuatacun rë xingu xingu tucu xcusun xi sahmi me ne, vëhë xi meje rë xi ndaja chjuhunrcun Nina nguyéjë rë xi nechuntuhun nguehe ngasunhndë vi. ¹⁸ Ha hyun xi Nina ne, cavaxétje nuju me tséhë ndiya xi hacuiin machjirëhë, ndiya xi caviyuju nuju xutachanga nuju. Hacuaha hyun xi hacuiin ngatsë rë ngu xcusun xi cuma cuetsun sacuaha plata cojo oro xi cuatjin casahmi Nina ta ¹⁹ ngatsë rë jni rë Cristu xi cavanga xi jercu machjirëhë, sacuahatjin machjirëhë jni rë cjuaveya rë ngu chu hnditsánga xi tsajin camahani mé má rë chu. ²⁰ Cristu jan ne, casuaxa Nina me hisca chaja sa xi cuejña ngasunhndë, peru quihndë xi tijima chuva nixtin xi nechantahan ngasunhndë vi ne, casua Nina xi catimachaya naja tséhë me cojo sa xi ndaja cuatjun. ²¹ Ngatsë rë me vëhë ne, ngayun ne, camangutacun cojo Nina, me xi catsicuya Cristu cjuahñu tséhë ngajní rë yéjë nima hacuaha casahmi jyë casahmi hnga me Cristu. Vëhë xi mangutacun cojo Nina hacuaha vetuhun tacun me.

²² Ngayujun ni ne, xi tivinuhyun cjuauquixi rë Nina ne, cuatjin canitsuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yéjë sa me xi ladu rë Jesucristu. Ngajan xi meje rë xi hñu nihmutacún xingun cojo nguñaja xahasen nuju. ²³ Ngayujun ni ne, hacuaha cavuya catsin nga ngayun, peru hacuiin tséhë xuta xi hatuxa hme ta tséhë ngu tjë xi cueyaain ta cjua rë Nina, cjua xi sua naja cjuahñu hacuaha tsajin nixtin cjuëya. ²⁴ Xujun rë Nina ne, cuitjin chja:

Yéjë ni xuta ne, sacuaha xca nguijña me,
yéjë ni xi ndaja tséhë me ne, sacuaha naxu rë xca jan.

Xca nguijña jan ne, xí ne, naxu ne, vixu,

²⁵ peru cjua rë Nai naja ne, tsajin nixtin xi cjuëya.

Hane cjua vëhë ne, hacui cjuandajyihi xi casacu camachaya nuju.

2

¹ Vëhë xi ngayujun ni ne, meje rë xi tiyujunxun yéjë ni cjuatsehen, yéjë ni cjuandacha, yéjë xcusun xi sahmi xuta xi jo xcun jo hntsua tjin rë me, yéjë ni cjuaxin, yéjë ni cjuachjataha. ² Sacuatjin rë ngu quihndinda xi meje rë suvá lechi ne, cuatjin catamameje nuju cjua rë Nina, cojo sa xi nguyéjë rë xi tivisehen nuju cjua jan ne, tuxaha sa cjuatacun nuju hisca xi cuetjuntjun. ³ Cuatjin nihñu, sa xi ha camachaya nuju xi Nai naja ne, jercu ndaja me.

Sacuaha ngu ndyojo xi jercu vengui chjí rë ne, cuitjin rë Jesucristu

⁴ Nihñutiñu tséhë me ta me vëhë ne, quicun me. Me vëhë ne, sacuaha ngu ndyojo xi handasa catsitjungui xuta ne, peru xi cuma rë Nina ne, hatuxa catuxijin rë hacuaha jercu vengui chjí rë. ⁵ Hacuaha ngayujun ni ne, sacuaha ndyojo xi quicun ne, tuhun cahndé xi cjuaha nuju Nina, cojo sa xi cuma ngayun sacuaha ngu yungun hiscan xi nechunxun, hane satëxa nuju nihñu xa rë Nina sacuaha nahmi, xi tuhun cjuandaja nuju xcun Nina. Hane yéjë ni cjuandaja vëhë ne, chuya rë Nina ngatsë rë Jesucristu. ⁶ Xcun xujun rë Nina ne, cuitjin camahindu cjua xi cachja Nina:

Ngahan vejñávasen ngu xihin ngajan ndetjún Sión,

hane xihin jan ne, sacuaha ngu ndyojo xi jercu vengui chjí rë, xi hacuaha catuxijin rë xi cuma titjun tséhë xihndénaña;

hane xuta xi cumangucacun cojo xihin jan ne, tsajin nu tsajin nixtin xi cuetju sava me.

⁷ Hane xi cuma nuju ngayujun ni xi mangutacun cojo Jesucristu jan ne, jercu vengui chjí rë me. Peru xi cuma rë xuta xi manguaaincacun me ne, cuetjucaa cjua xi camahindu xcun xujun rë Nina xi cuitjin chja:

Me xi catsitjungui xuta sacuaha tsitjungui chjinevexo ngu ndyojo xi chuiyiin rë me tséhë ne,

me vëhë ne, camatitjun me tsajan ngayejen ni.

Cuatjin camahindu. ⁸ Hacuaha cuetjucaa cjua vihi:

Xihin jan ne, sacuaha ngu ndyojo xi xtenguiya rë xuta, ngu ndyojo xi sahmi xi tsichaja me ndiya rë me.

Cuatjin chja cjua. Xuta xi manguaaincacin me ne, xtenguiya rë me, tséhë xi vihndiin me cjuandajyihì xi chja tséhë Jesucristu. Hatuxa cuatjin cavejña Nina xi cuatjin cuatju me cuma.

Xuta xi tséhë Nina me

⁹ Ngayujun ni ne, ngu tjë xi cavaxijin Nina ngayun, sacuaha nahmi xi fahacuenda yëjë ni xi tséhë Nina ngayun, xuta xi hatuxa siuxin rë Nina ngayun, hacuaha xuta xi hatuxa tséhë Nina ngayun. Cuatjin cun ngayujun ni, cojo sa xi ninguitsujun cjuandajyihì xi chja tséhë yëjë ni cjuandaja xi casahmi Nina, me xi cajindaya nuju xi cavetjunxun tséhë ngajñi jñu, xi cuisuhun ngajñi hasen ndajyihì rë me. ¹⁰ Hatsëë ne, hisca hacuiin xuta rë Nina ngayun, peru quihndë ne, xuta rë Nina camá ngayun. Hatsëë ne, hisca tsajin camayuma rë Nina ngayun, peru quihndë ne, camayuma rë me ngayun.

Meje rë xi cuinechan ndiya rë Nina

¹¹ Ngayujun ni xi sacuaha xuta ngu nangui xi nechunyun ndiya nguehe ngasunhndë vihi ne, vinchangë nuju xi nechunxun tséhë yëjë ni cjuatsehen xi fehya rë xahasen naja, tséhë xi sacuaha ngayaan xi vixcaan cojo xingueen ne, cuatjin rë yëjë ni cjuatsehen vëhë cojo hasen naja. ¹² Ndaja nihñu ngajñi rë xuta xi hvíin me Nina, cojo sa xi me xi cuacun vë ne, handasa choho cuichja me tsujun quihndë sacuaha xi ngayun xuta tsehen má yun ne, peru scuëë me yëjë ni cjuandaja xi tiniñu, sehe sahmi jyé sahmi hnga me Nina nixtin hya xi cjuahataha Nina jyé rë xingu xingu me.

¹³ Ngatsë rë Nai naja ne, tinuhyun tséhë yëjë ni xutaxa rë ngasunhndë vihi, há xi me xi matitjun camahani, ¹⁴ há xi xuta xi tsingatju me xi sahmi castigu rë xuta xi choho sahmi hacuaha cuaxëndaja me xuta xi ndaja sahmi. ¹⁵ Cuatjin nihñu ta, tséhë xi Nina ne, meje rë me xi cjuandaja xi ngayun nihñu ne, sahmi xi xuta xi hvíin ne, cumaji choho cuichja me tsujun. ¹⁶ Tángun cojo ngasunhndë nuju sacuaha xuta xi tsajin camahani mé xi tjin tsavi xi cuma rë me, Peru hacuiin ngatsë rë vëhë xi nihñu ngu xcusun cjuatsehen ta, xi meje rë ne, tángun cojo ngasunhndë nuju sacuaha xi mosu hndixahan rë Nina má ngayujun ni. ¹⁷ Chjuhunrcun ni yëjë xuta. Nihmu tacún yëjë ni xi hacuaha ladu rë Jesucristu me, meje rë xi rcún Nina, hacuaha chjuhunrcun me xi matitjun camahani.

Cjuahmu xi cavatju Jesucristu camá

¹⁸ Ngayujun ni mosu hndixahan ne, tinuhyun tséhë nai nuju, hacuaha chjuhunrcun me, hacuiin suvá me xi xuta ndaja cojo me xi jeya ta cojo me xi hngamacun. ¹⁹ Cuatjin nihñu ta jercu chuya rë Nina sacuatjin rë ngu me xi caa rë cojo ngu cjuañihi ngatsë rë xi vihndë me tséhë Nina, handasa tsajin jyé rë me xi cuatjin vatju me má. ²⁰ Sa xi ngayun choho nihñu hane má yun castigu ne, ¿yo ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rë Nina sa xi ngayun scaa nuju. ²¹ Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsë nuju, hane cuatjin cavejña me ntsacu, cojo sa xi ngayun nihñu sacuatjin casahmi me. ²² Me vëhë ne, hisca ngu cjuatsehen casahmii me, hacuaha hisca ngu cjuandacha ne, cavetjiin cachja me. ²³ Hya xi xuta choho cachja cojo rë me ne, me vëhë ne, hacuiin choho catsicuya me tséhë xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rë xuta cojo cjuatacun rë me cojo cjuaquixi. ²⁴ Suvá Cristu jan ne, cavaha me yëjë cjuatsehen naja ngajñi yojo rë me, ngajan xcun cru, cojo sa xi cuma cuetjunxen tséhë cjuatsehen, hane cuma cuangentjenguen ndiya rë cjuaquixi. Ngayun ne, cavetjuntjun ngatsë rë cjuahmu xi me vëhë cavatju me camá. ²⁵ Titjun ne, sacuaha chu tsángá xi cachaja tjin nuju ngayun, Peru quihndë ne, cavuyun nga ladu rë Cristu, me xi fahacuenda nuju sacuaha ngu xuta xi fahacuenda rë chu tsángá, cuatjin sahmi nuju me cuidadu.

¹ Quihndé ne, ngayujun ni yachjin ne, tinuhun tséhë xihin nuju xingu xingu ngayun, cojo sa xi yahnga me xi vihndiin me tséhë cjua rë Nina ne, cuijnecacun me, xi scuëë me xcusun nuju, handasa tsajin mé xi níjun, ² cuenda xi scuëë me xcusun ndaja xcusun jeya nuju. ³ Mijí rë xi jercu nihñuxun cojo yéjë ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaha cojo hya xi nihñuxun cojo adorno tséhë oro, hacuaha cojo hya xi chujun ngu tsjian hnga chjí rë. ⁴ Cahndé rë vëhë ne, meje rë xi nihñuxun cojo yéjë ni ngu xcusun xi hincha cahntsua xahasen nuju sacuatjin hya xi ningacun cjuajeya xi cun yun ta yéjë cjuandaja vëhë ne, jercu vengui chjí rë xcun Nina. ⁵ Hatsëë ne, cuatjin casahmi yachjin xi siuxin me xi cuma rë Nina, yachjin xi cavetaha cacun me Nina. Me xi cuacun jan ne, cavihndé me tséhë xihin rë me. ⁶ Nima Sara ne, cuatjin cahndé me tséhë xutachanga naja Abraham, xihin rë me, hane “nai naha” cachja me tséhë me. Hane ngayujun ni ne, quihndi rë me ngayun, sa xi nihñu yéjë ni cjuandaja hacuaha tsajin mé xi rcún.

⁷ Cuanitjin ni nuju ngayujun ni xihin, xi nechun tangun cojo chjuun nuju xingu xingu yun ne, meje rë xi hyun xi hitsë ni chúva ngahñu rë yachjin. Chjuhunrcun me ta, me xi cuacun vë ne, hacuaha chjuhunntsun tangun cojo rë me cjuahñu xatsë xi sua nuju Nina cojo cjuandaja rë me. Cuatjin nihñu ngayun ne, cojo sa xi tsajin mé sahmínda rë oración xi nihñu.

Hya xi vatjun cjuañihi ngatsë rë nihña cjuandaja

⁸ Quihndé xi tsinguínetaha cuichjá cojo nuju ne, ngayujun ni ne, meje rë xi tjin tangun cjuatacun nuju cojo xingun, meje rë xi tjin tangun xahasen nuju cojo xingun, meje rë xi nihmutacún xingun xingu xingu ngayun sacuaha xi ngu naa ngu nahmi nuju ngayujun ni. Meje rë xi tjin nuju cjuayumatacun, hacuaha meje rë xi jeya ngayun cojo cjuatacun nuju. ⁹ Hacuaha cuéyanangé nuju xi mijí rë xi choho nihñu cojo yo xi choho sahmi cojo nuju, hacuaha sa xi yo choho cuichja cojo nuju ne, mijí rë xi choho chjayunngun tséhë ta xi meje rë ne, ninchacuntuhun rë. Cuatjin meje rë xi nihñu ta, Nina ne, cajindaya me ngayujun ni xi chjuhunntsun ngu cjuaninchacuntihin. ¹⁰ Tjin ngu cahndé xcun xujun rë Nina xi chja cuitjin:

Me xi meje rë xi ndaja cjue cojo ngasunhndé rë hacuaha meje rë xi ndaja cuatju cuma ne,

mijí rë xi choho cuichja me hacuaha mijí rë xi cuichja me cjuandacha;

¹¹ catetjuxin me tséhë ndiya rë cjuatsehen, hane catisahmi me cjuandaja, catanguise me ndiya rë cjuajeya, hane vëhë catjicojo me.

¹² Cuatjin meje rë ta Nai naja ne, fahacuenda me xuta xi tsajin jyé rë, hacuaha vihndé me oración xi sahmi xuta jan,

peru Nai naja ne, chuyiin camahani rë me tséhë xuta xi sahmi cjuatsehen.

Cuatjin chja xujun rë Nina.

¹³ ¿Yo choho sahmi cojo nuju sa xi ngayun hatuxa nihñu cjuandaja? ¹⁴ Peru handasa cuatjun cjuañihi cuma ngatsë rë xi nihñu cjuandaja ne, tsimii sahmi rë ta ha tsujun ndaja. Hane xicarcuun hisca xi ngu, hacuaha hacuiin cumacjintacún. ¹⁵ Meje rë xi chjuhunrcun Cristu cojo cjuatacun nuju ta me vëhë xi Nai nuju me. Hacuaha meje rë xi yéjë ni hora ne, tjin chjine ngayujun ni, cojo sa xi tuhun cjuauixi nuju cojo tu yo ni xi cjuinenguise nuju mé má cuatjin vetuhun tacún Nina, ¹⁶ peru tinújun cojo nguñaja ni cjuandaja cjuajeya. Tángun cojo ngasunhndé nuju cojo ngu xcusun xi ngascan ne, hisca hitsë tsajin cuma sava nuju, cojo sa xi xuta xi choho cuichja me tséhë cjuandaja xi nihñu ngatsë rë xi tjin tangun cjuatacun nuju cojo Cristu ne, cuetju sava me tséhë yéjë xi choho chja me tsujun.

¹⁷ Hitsë sa ndaja xi cuatjun cjuañihi ngatsë rë xi nihña ngu cjuatsehen. ¹⁸ Cristu ne, ngundiya ni cahme me ngatsë rë jyé naja. Me vëhë ne, tsajin xi cún rë me xcun Nina, peru cahme me ngatsë naja xi tjercu tjin jyé naja, cojo sa xi cuma cuiseen ladu rë Nina. Cristu ne, sacuaha xihin xi má me ne, catsiquehen xuta me, peru sacuaha hasen xi hacuaha

má me ne, catsicuya Nina me cjuahñu. ¹⁹ Hane sacuaha hasen me jan ne, quiji cachja me ngu cjua cojo yéjé ni hasen xi hinchahñu. ²⁰ Hane hasen xi cuacun jan ne, hacui xi cahndiin tséhë Nina, hya xi tacunya tacunya Nina cojo jeya nguyéjé rë xi Noé titsindaja me barcu rë me. Hane ngu jo me xi caxinchá me cahntsua barcu jan ne, chuva rë jyin má me xi yéjé me, cavetjutje me hya xi cavatju me xcun nandá. ²¹ Hane nandá jan ne, sacuaha nandá xi xtenda yaan xi vaxétje naja quihndë. Hya xi xtenda yaan ne, hacuiin xi tinityjahin yojo naja ta tichjahyan rë Nina ngu cjuatacun tyjahi, ngu cjuatacun ndaja, hane cuatjin vetjuntjen ngatsé rë xi Jesucristu ne, cavuya nga me cjuahñu. ²² Me vëhë ne, quiji me ngahnga, hane tacun me ladu quixi rë Nina. Quihndë ne, me vëhë vitexa me ángel cojo jingu sa xcusun hasen sa hasen ndaja sa hasen tsehen xi hacuaha matitjun ngajan ngahnga.

4

Meje rë xi ningatahantacun sacuaha catsingatahacacun Jesucristu

¹ Vëhë xi, sacuatjin Cristu cavatju me cjuañihi nguehe ngasunhndë vihi ne, cuanitjin ni ngayujun ni, meje rë xi taha catamangutacun cojo cjuañihi quihndë, tuxa má sa xi ngascan cuatjun cuma. Cuatjin meje rë ta, me xi ha cavatju cjuañihi camá ne, ha quihndë cuitexaain rë me cjuatseen, ² hane cjuenduju me cojo ngasunhndë rë me sacuatjin meje rë Nina, hacuiin sacuaha meje rë cjuatacun naja ngayaan xuta ngasunhndë. ³ Ha jercu canichujun nixtin hatséë, hya xi canihñu xcusun xi chuya rë xutaxín tséhë. Jercu choho ndiya cavinechunyun, jercu camameje nuju cjuatseen, jercu camachuhun, jercu catsangun suhi hisca xi jercu si rcu xuta hacuaha jercu vatjutaha hvi me, hacuaha jercu cachjuhunrcun nina ndyojo, xcusun xi hatuxa ndajintjin. ⁴ Quihndë ne, xutaxín jan ne, fircun rë me hisca choho chja me, hya xi ngayun ne, matanguaain yun cojo rë me hya xi me vëhë findujú me cojo ndiya rë cjuatseen xi hincha me. ⁵ Peru me vëhë ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatacun rë xingu xingu. ⁶ Vëhë xi hisca yéjé nima ne, casacu camachaya rë tséhë cjuandajyihi xi chja tséhë Jesucristu, cojo sa xi, sacuaha hasen xi má jan ne, sacú rë cjuahñu sacuaha cjuahñu rë Nina. Cuatjin camá handasa, sacuaha xuta ngasunhndë xi má nima xi cuacun jan ne, ha cachjaháchuva rë xingu xingu cojo cjuatacun rë, sacuaha chjaháchuva rë yéjé xuta ngasunhndë.

Hacutjin meje rë xi cuisecon xingueen cojo cjuandaja xi sua naja Nina

⁷ Quihndë ne, ha camatiña nixtin xi cjuë ngasunhndë. Vëhë xi meje rë xi ngayujun ni ne, tiyujun chihin cjuatacun nuju hacuaha tjin chjine ngayun, xi nihñu oración. ⁸ Hitsé meje sa rë xi nihmutacún xingun xingu xingu ngayun nguñajatacún ta, tséhë xi cjuahmutacun ne, vujnu rë jercu cjín jyé naja. ⁹ Hacuaha chjuhunntsun xingun xingu xingu ngayun ndya nuju, xi hisca hitsé tsajin choho cuma tacún hya xi chjuhunntsun xingun. ¹⁰ Ngayun xi jercu cachjuhunntsun cjuandaja rë Nina hacuaha satëxa nuju xi ninguitsujun cjuandaja jan ne, meje rë xi xingu xingu ngayun ne, cuisecun rë xuta xi yahnga, ha chuva rë xi casua nuju Nina ngu cjuandaja. ¹¹ Yo ngayun xi cuinújun ne, tinújun sacuaha ngu xi chja cjua rë Nina. Hane yo ngayun xi cuisecun xingun ne, tisecun rë me cojo yéjé ni ngahñu xi sua nuju Nina. Cuatjin meje rë xi nihñu, cojo sa xi ngajni rë tu mé ni cjuacjintacun ne, Nina ne, cuma jyé cuma hnga me cojo Hasen rë me ngatsé rë Jesucristu. Me vëhë ne, hatuxa jyé hnga me cojo Hasen rë me hacuaha jercu hñu me cojo cjuatacun rë me yéjé nu yéjé nixtin. Cuatjin Jain.

Cjuañihi xi cuatjun ngayaan xuta ladu rë Jesucristu

¹² Ngayujun ni ne, mijí rë xi cjuercun nuju tséhë cjuañihi jyé xi vatjun má xi chutahachuva nuju ta, tséhë xi hacuiin hacui ngu xcusun xi cjuercun naja. ¹³ Cahndé xi cjuercun nuju ne, meje rë xi catamasua nuju táha hacutjin tivatjun cjuañihi tijima sacuaha cjuañihi xi cavatju Jesucristu camá. Cuatjin catamasua nuju, cojo sa xi hacuaha jercu cumasua nuju nixtin hya xi cumatsejen hacutjin jyé hnga Jesucristu cojo Hasen rë

me. ¹⁴ Sa xi xuta choho chja me tsujun ngatsë rë xi tjin tangun cjuatacun nuju cojo Cristu ne, tsujun ndaja ta, vëhë meje cuichja xi Hasen rë Nina xi jercu jyé hnga ne, tivéjña cojo nuju. (Xuta xi cuacun jan ne, hatuxa choho chja me tséhë Jesucristu, peru ngayun ne, nihñu jyé nihñu hnga me.) ¹⁵ Sa xi yahnga ngayun cuatjun cjuañihi ne, mijí rë xi tséhë xi caniquuhun ngu xuta o sa tséhë xi canihñu cjuachéjé o sa tséhë xi tu mé sa ngu cjuatsehen o sa tséhë xi visuhunjñu ngajñi rë cjuacjintacun rë xuta xi yahnga. ¹⁶ Peru sa xi yahnga ngayun cuatjun cjuañihi ngatsë rë xi ladu rë Cristu ngayun ne, mijí rë xi cumasava nuju ta meje rë xi nihñu jyé nihñu hnga Nina ngatsë rë vëhë.

¹⁷ Ha cavechú nixtin xi cuetsihin tsichuva Nina xuta cojo cjuatacun rë xingu xingu me, hane cuetsihin me cojo naja ngayaan quihndi rë me. Hane sa xi tjun ngayaan tsichuva Nina ngayaan cojo cjuatacun naja ne, ¿hacutjin cuatju me xi vihndiin tséhë cjuandajiyi xi cachja Nina? ¹⁸ Hacuaha tjin ngu cahndé xcun xujun rë Nina xi cuitjin chja:

Sa xi xuta xi cafë jyé rë sehe tu ma vetjutje me ne,
¿hacutjin cuatju me xi hisca cuendaain rë tséhë Nina cojo me xi jercu sahmi cjuatsehen?
Cuatjin chja xujun rë Nina. ¹⁹ Vëhë xi yéjé me xi vatju cjuañihi tséhë xi cuatjin meje rë
Nina ne, meje rë xi catjindujú me cojo cjuandaja xi sahmi me hacuaha catejña me yojo
rë me tsja Nina, me xi catsindaja rë me ta, Nina ne, hatuxa sahmi chihin me yéjé cjua rë
me.

5

Cjua rë Pedru xi vinchangui me xuta ladu rë Jesucristu

¹ Quihndé ne, meje cuichjá cojo nuju ngayujun ni xuta changá xi vitexun ngajñi rë yéjé xuta ladu rë Jesucristu. Ngahan ne, hacuaha xuta changá ngahan xi cavëë hacutjin cavatju Jesucristu cjuañihi camá. Hacuaha satë ná ngahan sacuatjin rë me xi cuacun jan cjuandaja xi cuetjucaa ngascan. ² Cuichjá cojo nuju xi hacuaha meje rë xi chjuhuncuendun xuta ladu rë Nina xi siuntsun, sacuaha ngu cha xi fahacuenda rë chu tsánga. Cuatjin nihñu nguñaja cjuasua sacuatjin meje rë Nina, hacuiin cjuachan hacuaha hacuiin ngatsë rë xi jercu meje nuju tujún. Chjuhuncuendun me nguñajatacún, ³ hacuiin sacuaha xi ngayun má yun nai tséhë me ta meje rë xi tejñu ntsacu, cojo sa xi xuta ne, tjengui me ngayun cojo xcusun nuju. ⁴ Ngajan xi hya xi cuinduva nga me xi matitjun ne, ngayun ne, chjuhunntsun cjuandaja xi sua nuju Nina, cjuandaja xi tsajin nu tsajin nixtin cjuéya.

⁵ Cuatjin ngayujun ni xihin xi hitsë ni chúva nu nuju ne, tinuhyun tséhë xuta changá. Hane ngayujun ni ne, meje rë xi jeya ngayun cojo cjuatacun nuju hacuiin xta yun ngajñi nuju cojo xingun ta tjin ngu cahndé xcun xujun rë Nina xi cuitjin chja:

Nina ne, tsitjungui me xuta xi jercu tjin rë cjuaxta cahntsua xahasen rë,
peru xuta xi jercu tjin rë cjuajeya cahntsua xahasen rë me ne, Nina ne, jercu sua rë me
cjuandaja.

Cuatjin chja xcun xujun rë Nina. ⁶ Vëhë xi ngayujun ni ne, meje rë xi ninguijnu yojo nuju xi cuinuhyun tséhë Nina, me xi jercu hñu cojo cjuatacun rë. Cuatjin nihñu cojo sa xi me vëhë ne, sahmi jyé sahmi hnga me yun, hya xi cuechú nixtin rë. ⁷ Tiyujunxun yéjé ni cjuacjintacun nuju, tiyujun tsja Nina, tséhë xi me vëhë ne, vutsejen me ngatsë nuju.

⁸ Ngayujun ni ne, meje rë xi tjin chjine yun hacuaha nechun quicun ta, tséhë xi Satanás ne, xitsehen xi maji vëë nuju ne, tsujiyihi sacuaha ngu chu xa xi jercu titsichan chu, xi vangui chu yo xi sacú ru xi sinë chu. ⁹ Xicaningatuun rë, hane tiyujunhñu cjuatacun nuju xi mangutacún cojo Nina. Cuatjin nihñu ta ha hyun xi yéjé sa me xi hacuaha cojo ladu rë Cristu hincha jinguyé ni ngasunhndé ne, hatuxa tjin rë me xi cuatju me yéjé ni cjuañihi vëhë cuma. ¹⁰ Peru xi ha cavatjun cjuañihi hitsë nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me xahasen nuju, hacuaha cuiyuju cahndé me cjuatacun nuju. Nina xi sahmi cuatjin jan ne, hacui me xi tjin rë yéjé ni cjuandaja, hacui me xi cajindaya nuju me xi satë nuju cjuahesen ndajiyihi rë me xi

tsajin nu tsajin nixtin xi cjuëya, ngayujun ni xi tjin tangun cjuatacun nuju cojo Cristu.
11 Nina ne, hatuxa jemu hñu me cojo cjuatacun rë me yëjë nu yëjë nixtin. Cuatjin Jain.

Cjua xi vijnetaha

12 Ngahan ne, catsihindu nuju ngu jo cjua vëhë, cojo sa xi cuinchangë nuju hacuaha tsinguixë nuju xi cjua vëhë ne, hacui cjuandaja Jain rë Nina. Tiyujunhñu cjuatacun nuju xi cuangunndujun cojo cjuandaja vëhë. Silvanu ne, me xi ndaja fitjengui rë ndiya rë Cristu ne, caviseecoo ná me xi catsihindu nuju.

13 Xuta rë yungun nguehe Babilonia, xi hacuaha cavaxijin rë me Nina ne, tsingatju me nina nuju. Hacuaha Marcos xi sacuaha quihndi naha ne, tsingatju cha nina nuju.

14 Tuhun rë xingun ngu nina, cojo cjuandaja cojo cjuahmutacun tindatsuhun xingun, sacuahatjin xcusun naja. Catisua nuju Nina cjuandaja cjuajeya ngayujun ni xi tjin tangun cjuatacun nuju cojo Cristu.

Carta xi majo xi catsingatju San Pedru

Pedru ne, tsingatju me cjua tséhë xuta xi macjain rë me Nina

¹ Ngahan xi hmí ná Simón Pedru, mosu rë Jesucristu, hacuaha apóstol tséhë me ne, tsingátju carta vihi tsujun ngayujun ngayun xi Nina naja Jesucristu cavaxétje nuju me xi casua nuju ngu cjuatacun xi macjain nuju cuanitjin sacuahatjin ngayin. Cuatjin casahmi me ta Nina hatuxa jyahi tyjahi cjuatacun rë me. ²Nina ne, catitsixa me cjuandaja cjuajeya xi cuma nuju ngayujun ni ngatsë rë xi ndaja hyun Nina cojo Jesús, Nai naja.

Hacutjin cun xuta xi macjain rë me Nina

³ Jesucristu xi cojo ngahñu ndajyihí rë me, jyé hnaga me ne, cajindaya me yaan xi chan yo me. Hane cuatjin casua naja me yéjé ni xi mameje rë tséhë cjuahñu xatsë hacuaha tséhë ngu cjuatacun tyjahi. ⁴ Cojo ngahñu vëhë casua naja Nina cjua rë me xi tjercu tu ndaja vengui chjí rë. Cojo sa xi ngatsë rë cjua vë ne, ngayun ne cuechuntuhun ngu cjuatacun sacuaha Nina, hacuaha cojo sa xi cuetjuntjun tséhë xi cuetsun cjuatacun nuju cojo cjuatsehen xi fehya rë xuta. ⁵ Hindë ngatsë rë vihi ne, ndaja nihñu ngahñu cojo sa xi ha macjain nuju Nina ne, má tyjahi cjuatacun nuju. ⁶ Hane hacuiin cuanitjin ni, ta hacuaha ningascunyun cjuatacun nuju. Sehe tuhun hñu yojo nuju tséhë cjuatsehen. Hacuaha cuanitjin ne cojo xi nihñu jyé tacún. ⁷ Hacuaha cojo xi chjuhunrcun Nina, hacuaha cojo xi chjuhunrcun xingun, hane hacuiin tu cuanitjin chjuhunrcun xingun ta cojo ngu cjuahmutacun.

⁸ Sa xi cuatjin ndaja xcusun nuju, hane sa xi nihñu Jain sacuatjin vitexa ne, xcun cjuahñu nuju ne, tjercu cuengui chjí nuju hacuaha hacuiin tu mahya ni camachaya nuju tséhë Nai naja Jesucristu. ⁹ Peru xuta xi cuaaintjin jyahi xcusun rë me ne, cumá jñu cjuatacun rë me sacuaha ngu rcá me o sacuaha ngu cha xi vutsejen hiscan xi cjin peru hvín cha mé xi tivutsejen cha. Ngatsë rë xi cachaya rë me xi camanchataha jyé rë me xi ha casahmi me. ¹⁰ Vëhë xi ngayujun ni xingueen ne, sa xi nihñu Jain sacuatjin vitexa xcusun ndaja jan ne, ngajan machihin cjua ta Nina ne, cajindaya nuju me hacuaha cavaxijin nuju me ne, hane cuatjin ha tuxa tsajin ngu nixtin xi cuetjunxun tséhë ndiya rë Nina. ¹¹ Cuahatjin jemu ndaja sacu nuju cahndé xi cuisuhun hiscan xi sahmi gubiernu Nai naja Jesucristu, me xi vaxétje naja, hane tsajin nu tsajin nixtin cuetjunxun.

¹² Vëhë xi vejñacacun xi cuya tsinguitsjen nuju cjuandaja vihi ha ndasa ha hyun hane hacuaha quitahatacún cjuatacun nuju yéjé ni cjuaquixi xi camachaya nuju. ¹³ Peru jinguyéjë rë xi tjin ná cjuahñu ne, xi má ná ne, sahmi nguyjë xi cuascaya rë cjuatacun nuju xi tsinguitsjen nuju vi ta, ¹⁴ tséhë xi tacun xati nixtin xi cuejñá ngasunhndë vi, sacuaha ha casua Nai naja Jesucristu camachaya ndaja ná. ¹⁵ Hisca hacuaha xati tisahmecácun ne sehe ngajan xi handasa cavéya ne tu mé ni hora cuma cuitsjen nuju tséhë yéjé ni cjua vihi.

Cavindeya xcusun rë Jesucristu, hacuaha cavaxéndaja Nina me

¹⁶ Catihin camachaya nuju cjua sacuaha tséhë ngahñu xi tjin rë Nai naja Jesucristu cojo tséhë hya xi ciinduva me. Cjua vëhë hacuiin ngu cuentu ndacha xi ndaja nuhya rë Peru cjuaquixi Jain. Quixi ta cahyin cojo tuxcuin ta Jesucristu ne, jemu rcun me ta jemu jyé hnaga hasen rë me. ¹⁷ Hya ne, Nina nahmi naja ne cafaharcun rë me hacuaha cavaxéndaja me Jesús ta cjua rë Nina ne canduva tséhë ngahngá xi cachja cojo rë me cuitjin: “Vih quihndi naha xi hmucácun ne, xi ngatsë rë me ne tjercu ndaja má ná.” ¹⁸ Hindë ngayin suvin canuhayin cjua vë ta canduva tséhë ngahngá hya xi cavinechintihin ngajan cojo Nai naja rcu naxi hiscan cavatju camá.

¹⁹ Cojo xcusun xi cahyin ne, vëhë catsinguixi rë cjua changá xi catsihindu profeta. Ngayujun ni ne jemu ndaja nihñu xi tivetuhun rcun yéjé ni cjua changá jan. Cjua jan ne, tangun sahmi sacuaha ngu ndihi xi sua hasen rë hiscan xi jñu, hane cjuecani rë hisca

xi sahasen ne. Hane sacuaha sua hasen rē tiña sahasen xi cuetju niñú seti ne hacuaha Jesucristu sua hasen rē xahasen nuju. ²⁰ Cjua xi hitsë sa sahmi ngujyë xi meje rē xi machaya nuju ne, cjua vihi má: sacuaha yéjé cjua xi catsihindu profeta xcun xujun rē Nina ne, cumajin sesuntaha sa ngu cjuatacun rē xuta ta, ²¹ hisca ngu cjua jan tsajin xi catsihindu profeta cojo cjuatacun rē suva ni me, ta Hasen rē Nina casua rē me cjuatacun xi cuichja me cjua jan xi tséhë Nina.

2

Cuinduva maestru ndacha

¹ Peru nixtin hatsëë ne ngajan nangui rē Israel ne, hacuaha cavetjuiñi xuta xi tsejen sacuaha profeta peru tu vindacha me. Hacuaha cuanitjin hindë ne cuetjucun maestru xindacha xi xinchajñi me ngajñi nuju. Me xi cuacun vë ne, tsinguissehnenma me cjuanchacun ndacha. Hisca tsitjungui me Nai naja xi cavaxëtje rē me. Véhë xi nguhñusasa cuechutaha rē me castigu xi satë rē me. ² Ngajan xi tjemu cjín xuta cuisehen cojo me ndiya tsehen véhë, hacuaha ngatsë rē me ne, choho cuichja yahnga xuta tséhë ndiya rē cjuaquixi xi cjuecojo naja xcun Nina. ³ Maestru xi cuacun ne, jercu sahmi me cojo tujún. Véhë xi cuaxë me tsujun cojo cjuandacha xi ndaja nuhya rē. Peru me xi cuacun ne, hisca hatsëë ne tacunvasen castigu xi cuechutaha rē me, tacun cuaha hatuxa maji cuetjutje me tséhë.

⁴ Cahyun ni ta Nina ne catsinchataain me ángel hya xi casahmi ángel cjuatseen, ta cacandiya me catsihñu me cojo cadena hiscan jñu cojo sa xi siucuaha hisca cuechutaha nixtin xi sahmi cuenda me tséhë. ⁵ Hacuanitjin ne, catsinchataain Nina xuta ngasunhndë hatsëë nixtin ta hisca catsingatju me ngu tsi cjuarcun xi catsicjë rē ngayéjé ni xuta tsehen jan. Cavetjutje me ngu tu tu xihin xi hmí rē Noé, ngu xihin xi casua camachaya rē xuta tséhë ndiya rē cjuaquixi. Hacuaha yatu sa xuta cavetjutje me hya. ⁶ Hacuanitjin ne, casahmi Nina xi cavetsunya nandya Sodoma cojo nandya Gomorra, cavaca me ne hisca xi camá suva ndesu sa rē. Véhë camá sacuaha ngu ejemplu xi chja xi cuatjin cuatju yéjé ni xuta xi sahmi me cjuatseen. ⁷ Peru hya ne, cavaxëtjejñi Nina ngu cha xi tyjahi cjuatacun rē xi hmí rē Lot, cha véhë ne jemu choho má rē xahasen rē cha tséhë yéjé ni cjuatseen xi casahmi xuta nandya jan.

⁸ Jemu camá rē cha jan cjuaxti ta, tyjahi cjuatacun rē cha hane nchunchujun ni cavutsejen cha cavihndë cha xcusun tsehen xi casahmi xuta ta tséhë xi cha véhë jan ne, jiyajñi cha ngajñi rē me. ⁹ Cuatjin tsejen ta Nina ne, ma vaxëtjejñi me xuta tyjahi tséhë cjuañihi hacuaha ma viyujuvasen me xuta tsehen nguihma castigu rē me xi cueñaya me hisca xi cuechutaha nixtin xi cumacuenda tséhë me. ¹⁰ Quixi Jain ta xuta xi sahmi me cjuatseen xi fehya yojo jyé rē me hacuaha xuta xi tsitjungui me xi tjin rē Nai naja derechu xi vitexa me ne, xuta véhë ne, viyujuvasen me nguihma castigu. Me xi cuacun jan ne, jemu hñu jni rē me, sehñu me cojo cjuatacun rē me hane tsacjuiin me xi choho cuichja me tséhë ángel xi siu cojo Nina. ¹¹ Peru ha ndasa sa xi ángel ne hitsë sa hñu cjua me xi cumá rē me xi cuacun jan, hacjahi xcusun sahmi ángel ta vetjiincacun cuinchajyé xcun Nai naja.

¹² Xuta tsehen xi cuacun vë ne, jemu chu me, ta ngu chu ne, cjuatacun rē chu xi vitexa ru, hacuiin tsingatahatacun chu. Hacuaha siu chu cojo sa xi chjaha ru sehe cueya chu, hane cuatjin cumachjiréhë chu. Cuanitjin ne xuta jan choho chja me tséhë yéjé ni xcusun xi vijniircu me ta, tsingataaincacin me hacuaha sacuatjin catsijehnduya me cjuatacun hacuaha cjuë cjuehndu me suva me tangun me cojo ngu chu. ¹³ Cuatjin cuatju me ngu cjuañihi sacuaha casahmi me xi cavatju ñihu xuta. Xi má rē me ne, tjemu tjin rē me cjuasua xi tisahmi me ha tu cutjin ni xi masua rē xahasen rē me hora hya. Nguyéjé rē xi tichinu tangun tséhë suhi xi tjin nuju ne, me xi cuacun véhë ne, ngu cjuasava me, ngu xcuehyu hinchajñi me cojo nuju xi tisua me cjuasua yojo rē me cojo ngu cjuandacha.

¹⁴ Xi tu scutsejen ni me jan ngu chjuun ne, hachu cuehya ran xahasen rē me. Fendaain rē me xi sahmi me cjuatseen. Tsitsejen me xuta xi ndaya cacun. Yéjé fehya rē xahasen

rë me ta cuatjin camanga rë. Ha tjinchihin xujun jyé rë me xcun Nina. ¹⁵ Cachaja me ndiya ta, tséhë xi cavetjuxin me tséhë ndiya quixi rë Nina. Cafayangui me xcusun xi casahmi Balaam quihndi rë cha Beor. Cha vë ne, jercu casahmi cha cojo tujún, hisca meje rë cha chjí rë cjuatsehen. ¹⁶ Hacuaha Nina casahmi me xi ngu chu burra xi majin tsingatahacacun chu cojo cjuatacun ru, peru cojo xta rë xuta cachjataha chu cha jan hane casuaain chu cahndé xi cjue sa cha cojo cjuasca rë cha.

¹⁷ Maestru jan ne, machjiriin cjua rë me. Tangun me cojo ngu ndava nandá xi quixýa, hacuaha tangun me cojo yuffí xi ficojo rë tjojne. Nina tjin ndaja rë me ngu cahndé xi cuisehen me hiscan xi jñu cjín ni. ¹⁸ Maestru jan ne, jindayatë me cjua xi sahmi yehe me xi ndastu venguichji rë. Hacuaha tsingascaya rë me cjuatacun rë jingu sa xuta xi cuma meje rë me cjuatsehen xi fehya yojo rë me. Xuta jan ne, sehe tisahmi me ngahñu xi tivetjutje me tséhë ngajñi rë xuta xi hincha ndiya rë cjuandacha. ¹⁹ Chja ndacha maestru xi cuacun ta cuma ndaya xuta jan tséhë cjua xi vitexa ley, cuatjin chja me. Peru suva ni me ne, cjëë cuma ndaya me tséhë cjuatsehen. Hane jima ngu ngayaan ne, ha tu jarë ni xi scaa rë tsinguijne naja ne, vëhë scaa rë cuitexa naja tsihñu cjuatacun naja. ²⁰ Cuatjin ne, xuta xi ha vëë me yo xi Nai naja Jesucristu xi vaxëtje naja hane yo xi cavetjuxin me tséhë yëjë ni ngu cjuatsehen tséhë ngasunhndë ne, sa xi tsingatihiin me xi cuixuya nga me ngajñi cjuatsehen jan ngu ndiya nga ne, hane cjuatsehen jan scaa rë cuitexa rë me ne, hitsë sa sahmi yehe me jyé rë me xi cuma rë titjun. ²¹ Hya hitsë sa ndatjin tséhë me sa xi camachayiin rë me ndiya quixi jan tséhë xi cuma rë xi titjun quiji ndaja me ne, peru sehe catsismicacun me tséhë cjua ndajyihi rë Nina xi cafahatsja me. ²² Hya xi cuatjin sahmi xuta ne, ngajan tsejen xi quixi Jain cjua xi chja cuitjin: “Naña xi cavesu rë chu ne, vuya jinë chu tséhë chu hane chu chinga xi sehe tu cafë catsinduya me chu ne, vuya vinduyachojo chu ngajñi ndasi.”

3

Handajasa vindeya rë Nai naja, peru cuiduva me

¹ Vihi má jo carta xi tsihindú nuju, ngayujun ni xingueen. Catsijo carta vi ne, yaha conseju xi ha hyun peru xi meje ná xi tsingascaya rë cjuatacun nuju cojo. ² Ninguitsjun tséhë cjua xi hatsëë cachja profeta rë Nina, hacuaha ninguitsjun tséhë cjua xi cachja Nai naja xi vaxëtje naja, cjua jan xi apóstol cavicuya nuju.

³ Hacuaha hatuxa nihñucuendun tséhë cjua vihi: nixtin ngascan rë ngasunhndë ne, hya cumatsejen xuta xi sahmi me cjuatsehen tu cutjin cuehya rë yojo rë me. Me vëhë ne, cuejnucëë me ⁴ cuinenguise me cuitjin: “¿Jani tsejen Cristu? ta, tacunvasen cuaha cjua xi cuinduva nga me. Peru cafë cahme xuta changá naja ne, hane ha nduva ni chuva xi nduva, cuanitjin sacuahatjin camá hisca xi casahasen ngasunhndë.” Cuatjin chja me. ⁵ Peru quixiin cjua xi chja me ta, hatuxa mijí cjuahacuenda me tséhë xcusun xi cama vi: cojo cjua xi cachja Nina ne, ngasunhndë ne, ha tacun cuaha hisca hatsëë nixtin. Nangui ne, camatangun ngajñi nandá, hacuaha nandá ni ne, casua ngahñu rë ngasunhndë. ⁶ Sehe hacuaha nandá vëhë ni ne, catsinguetsun rë hya xi casesuntë nandá ngasunhndë nixtin vë. ⁷ Hindë ne hacuaha cojo cjua rë Nina jan ne, ngahnga cojo nangui xi tsejen quihndë ne, ha tetjo cuaha rë Nina Peru cojo cjua vëhë ni ne, sehe cueti cojo ndihi. Ndihi vëhë ne cuaca rë hya xi cjuaháchuva Nina yëjë ni xuta tsehen nixtin xi cjuëya me xi cuma rë Nina.

⁸ Peru ngayun xingueen, chjuhuncuendun tséhë cjuaquixi vi: xi má rë Nai naja ne, ngu nixtin ne, tangun ni nduju sacuaha ngu mil nu, hane xi ngu mil nu ne, tangun chuva sacuaha ngu nixtin. ⁹ Handasa xi ma tsingatahacacun xuta xi jemu tivindeya rë Nina xi cuma chihin cjua xi cachja me ne, Peru quixiin vë. Nina ne, ta tsijyëcacun me cojo nuju, tisua sa nuju cahndé cojo sa xi tsajin hisca ngu xuta xi chaja me ta, meje rë me xi yëjë ni xuta ne, tsindeya me cjuatacun rë me hane cuisehen me ndajyihi.

¹⁰ Peru xi cuechun nixtin xi cuinduva Nai naja ne, ha sacutsja r  cjuehe me sacuah
xi cjuehe ngu ch j  xi m a nguixun. Sehe ngajan cum  xi ngahnga ne, cuetsunya cojo
ngu chircun xi tjercu cjuaneya camahani, hane y j  xcusun xi cam  cojo ne, cju ya
tundecjaya cojo ndihi. Hacuaha nangui ne, cju  cueti cojo y j  xcusun xi tjin r . ¹¹ Ts h 
xi quixi jain xi hatuxa cuatjin cju  cuetsunya y j  xcusun v  ni, ngajan xi sahmi ngujy 
xi ngayun ne, ndandaja nih n  ngayun hacuaha tyjahi cjuatacun nuju. ¹² Nechunyun
r  nixtin xi cuinduva Nina hane nih n  xati tacun xi xati cum  cjuehe. Nixtin v h  ne,
ngahnga ne cuetsunya cojo ndihi, hane y j  xcusun xi cam  cojo ne, tundecjaya r  ne,
cju ya. ¹³ Peru ngayaan ne, nechayan r  cahnd  xi cachja Nina xi cuiseen, ngu ngahnga
xats , ngu nangui xats  hiscan cuinechancahnden cojo suva m  xi tsajin jy  r .

¹⁴ Véhë xi ngayujun ni xingueen ne, jinguyéjë rë xi nechunyun rë yéjë ni xcusun vihi ne, nihñu nguñajatacun xi ndandaja nihñu cojo sa xi hya xi cuechutaha me yun ne, tyjahi cjuatacun nuju, tsajin xi cún nuju, hane hacuiin mé cjuachan tjin. ¹⁵ Ningatuhuntacun ngayun ta hindë xi titsijyécacun Nai naja cojo naja ne xi jemu tafi me ne, vaxëcun rë xi xuta ne, cuetjutje me. Tangun ni chja Pablo xingueen ne, hane hacuanitjin catsihindu nuju tséhë, sacuahatjin cjuatacun ndajyihi xi casua Nina me. ¹⁶ Ngajan xi xcun yéjë ni carta xi catsihindu me ne, hacuaha chja me cojo nuju tséhë yéjë ni xcusun vihi, handasa hinchajñi yahnga cjuá xi tjemu chja vijnercu. Xuta ngarca ne, xuta xi hacuiin nguñajacacun me ne, titsindeya me cjuatacun rë cjuá jan xi chja vijnercu hane hacuaha tsindeya me cjuatacun rë yahnga xujun rë Nina. Xi cuatjin sahmi me ne, tivangui me suva me jyé rë me.

¹⁷ Ngajan xi ngayun, xingueen, hangu ta hya xi chaja sa cumá ne ha camachaya nuju tséhë cjuacjintacun vihi, nechun cuidadu tséhë. Sehe ngajan hacuiin mahinda tacun cojo cjuandacha tséhë xuta tsehen ta sehñu cuaha cojo cjuatacun quixi. ¹⁸ Peru catamajyë sa tsujun cjuandaja rë Nina hacuaha catuxaha sa cjuatacun xi tjin nuju tséhë Nai naja Jesucristu, me xi vaxëtje naja. Catama jyë catama hnga me yëjë nu yëjë nixtin. Cuatjin Jain.

Xujun titjun, xi catsihindu San Juan

Cumangutacun ta Jesús camá me Quihndi rë Xuta

¹ Tihín cumachaya nuju ngujo cjua tséhë Jesucristu, me xi sua cjuahñu xatsë. Me vëhë xi ha tacun me hisca xi casahasen ngasunhndë. Canuhinyin cjua xi cachja me. Cahyin yëjë ni hacutjin xi casahmi me. Hisca casatë ntsin me. ² Me xi sua cjuahñu jan ne, camatsejen me. Hane ngayin ne, cahyin me. Vëhë xi titihín cjuaquixi niji, xi titihín tijimachaya nuju ta me vëhë ne, tsajin nu tsajin nixtin xi cavetsihin cjuahñu rë me, hacuaha tsajin nu tsajin nixtin xi cuijnetaha cjuahñu rë me. Ha tacun me ngajan cojo Nahmi rë me ne, peru canduva me nguehe, cama tsejen me ngajñi niji. ³ Vëhë xi titihín tijimachaya nuju cjua xi canuhinyin cojo xcusun xi cahyin, sehe ngajan xi cuma tangun cjuatacun nuju cojo Nina sacuatjin tjin tangun cjuatacun niji cojo Nina Nahmi naja cojo Jesucristu, Quihndi rë me. ⁴ Vëhë xi cuitjin tinihindin nuju, cojo sa xi jemu ndaja cuma rë xahasen niji.

Xi cuanguen nduju cojo Nina ne, má sacuaha casua hasen rë cjuatacun naja

⁵ Cjua xi cachja Jesucristu cojo niji ne, cuitjin fi: Nina ne, hatuxa tjemu ndaja me. Tsajin camahani cjuatsehen hiscan tacun me. Hane ha cjua vëhë ni xi tinújin cojo nuju. ⁶ Sa xi cuinújan xi tjin tangun cjuatacun naja cojo Nina hya xi tinhñña cjuatsehen ne, tu vindachan ni ta, cjuatsehen xi tinhñña ne, chuiyiin rë Nina tséhë. ⁷ Peru sa xi nechan ngajñi rë cjuandaja, sacuatjin rë Nina xi hatuxa tacun me ngajñi rë cjuandaja ne, cuatjin xi cuma tangun cjuatacun naja. Hacuaha cuatjin xi cjuengui xahasen naja tséhë yëjë ni jyé naja, ngatsë rë xi cahme Jesús, Quihndi rë Nina.

Sa xi cuijacun cojo Nina ne, cumanchataha jyé naja

⁸ Sa xi cuinújan xi tsajin jyé naja ne, tu cuindachan suvaan ni rë yojo naja ta, quixiin xi nújan. ⁹ Peru sa xi cuijacun jyé naja cojo Nina ne, tsinchataha naja me, hacuaha cuaxëxin me yëjë ni cjuatsehen xi hincha xahasen naja. Cuatjin sahmi me ta tjercu ndaja me. Yëjë ni cjua xi chja me ne, hatuxa sahmi chihin me. ¹⁰ Sa xi cuinújan xi hisca ngu cjuatsehen cjéé camahani nihñña ne, tangun vëhë cojo xi cuinújan xi Nina ne, jemu ndacha me xi chja me xi tjin jyé naja, hacuaha cuatjin cumatsejen xi cjua rë Nina ne, cavigiin camahani ngajñi rë cjuatacun naja.

2

Cristu, me xi chjatje ngatsë naja

¹ Titsihindu nuju yëjë ni cjua vihi tsan ta, tséhë xi cjua vihi ne, cuicuya nuju xi hacuini nihñu cjuatsehen. Peru sa xi tjin yo yaan xi nihñña ngu cjuatsehen ne, hacuaha tjin naja ngu me xi cuichjatje ngatsë naja xcun Nahmi naja. Me vëhë ne, hacui Jesucristu, me xi hatuxa tyjahi. ² Hacuaha me vëhë ne, cavechjite me tséhë yëjë ni jyé naja. Peru hacuiin tu suvá ni jyé naja ta hacuaha cojo jyé rë yëjë sa xuta.

³ Sa xi nihñña Jain hacutjin xi vitexa Nina ne, ngajan matsejen xi cjuaquixi xi xuta rë me ngayaan. ⁴ Peru sa xi cuinújan xi hatuxa xuta rë Nina ngayaan hya xi mijí nihñña hacutjin vitexa me ne, tjercu ndacha yaan ta quixiin xi nújan. ⁵ Peru hya xi nihñña Jain hacutjin xi vitexa me ne, hya matsejen xi nihmutacun Jain me. Sa cuatjin ne, hyan ta tjin tangun cjuatacun naja cojo me. ⁶ Sa xi cuinújan xi tjin tangun cjuatacun naja cojo me ne, meje rë xi nechan ngajñi rë cjuandaja sacuatjin cavejña Jesucristu.

Cjuatacun xatsë

⁷ Cjua xi titsihindu nuju vihi tsan ne, hacuiin ngu cjuatacun xatsë xi sehe tivitéxa nuju xi nihmutacun xingueen ta, ha hacui ni cjuatacun xi cavitéxa nuju hya xi tjun tjun camacjain nuju. ⁸ Peru cjuatacun xi titsihindu nuju vihi ne, cuma cuinújan xi sacuaha ngu cjuatacun xatsë ta, hiscan xi ha cavechu cjuatacun jan ne, tivetsihin tisahmi xuta

cjuandaja. Hane vēhē sahmi xi tivetsihin tifē cjuatsehen xi tjercu tjin ngasunhndē. Jesucristu ne, casahmi jain me yējē ni hacutjin xi vitexa cjuatacun xatsē vihi, hacuaha ngayujun ni ne, tinihñu hacutjin vitexa cjuatacun xatsē jan. ⁹ Sa xi cuinújan xi nechan ngajñi rē cjuandaja, hya xi choho hyan xingueen ne, quixiin xi nújan ta nechancuaan ngajñi rē cjuatsehen. ¹⁰ Peru sa xi hmutacun xingueen ne, cuatjin matsejen xi nechan ngajñi rē cjuandaja. Hane tsajin mé nihña xi sahmi xi cuixuya xingueen ngajñi rē cjuatsehen jan. ¹¹ Peru sa xi choho hyan xingueen ne, nechan ngajñi rē cjuatsehen, hacuaha sacuiyiin naja hacutjin ndatjin nihña ta tséhē xi cjuatsehen xi tinihña ne, sahmi jñu tsajan.

¹² Ngayujun ni tsan ne, tsihindu nuju ta, jyē nuju ne, ha camanchataha ngatsē rē Jesucristu. ¹³ Ngayujun ni xi xuta changá yun ne, tsihindu nuju ta, tséhē xi ha hyun me xi ha tacun hisca xi casahasen ngasunhndē. Hane ngayujun ni xi cjëe cuma changá yun ne, hacuaha tsihindu nuju ta ha caca nuju cojo xitsehen má titjun.

¹⁴ Ngayujun ni tsan ne, tsihindu nuju ta ha hyun Nina Nahmi naja. Ngayujun ni xi xuta changá yun ne, tsihindu nuju ta ha hyun me xi ha tacun hisca xi casahasen ngasunhndē. Hane ngayujun ni xi hacuiin changá yun ne, hacuaha tsihindu nuju ta nechun nguñajatacún xi macjain nuju cjua rē Nina, cjua xi quichuhun cahntsua xahasen nuju, hacuaha caca nuju cojo xitsehen ma titjun.

¹⁵ Mijí rē xi chuya naja cjuatacun xi tjin ngasunhndē ta, sa xi chuya naja ne, cumaji nihmutacun Nina Nahmi naja. ¹⁶ Cuatjin ta, tséhē xi yējē ni cjuatacun xi tjin ngasunhndē vihi, sacuaha cjuatacun tsehen xi ningatahantacun, sacuaha cjuatacun xi tjercu meje naja yējē ni xcusun xi chutsejen, sacuaha cjuatacun xi tjercu nihña yehe yojo naja ne, yējē ni cjuatacun xi cuacun vēhē ne, hacuiin nduva tséhē Nina Nahmi naja ta nduva tséhē suvá ngasunhndē vihi. ¹⁷ Hane xcusun rē ngasunhndē vihi ne, cojo yējē ni cjuatacun xi tjercu chuya rē xuta ne, cjuëya. Peru xuta xi sahmi jain me hacutjin meje rē Nina ne, me vēhē ne, tsajin nu tsajin nixtin cjuëya me.

Cjuaquixi cojo cjuandesu

¹⁸ Ngayujun ni tsan ne, ha tijima tiña nixtin xi cjuë ngasunhndē. Ha canuhyun ta cuinduva xu ngu cha xi sahmi condra tséhē Cristu. Peru quihndē ne, tjemu cjín xuta xi ha tijimatsejen xi condra tséhē Cristu me. Hane vēhē xi ha hyin ta cama tiña nixtin xi cjuë ngasunhndē. ¹⁹ Xuta xi cuacun jan ne, cavetjuxin me tsajan. Peru hatuxa hacuiin ladu naja me ta, sa xi quixi xi ladu naja me ne, caviyuju me ngajñi naja. Peru cavetjuxin me tsajan, cojo sa xi cuma tsejen ta hacuiin ladu naja me.

²⁰ Ngayujun ni ne, casua nuju Jesucristu Hasen xi tséhē Nina. Vēhē xi vijnercun cjua xi cjuaquixi. ²¹ Hacuiin tsingáta hacacun xi vijnircun cjua xi cjuaquixi ta ha hvē xi vijnercun. Hacuaha hyun ta cjuandacha ne, hatuxa sacuiin naja ngajñi rē cjua xi cjuaquixi. Vēhē xi cuitjin tsihindu nuju cjua vihi.

²² Tjin xuta xi chja xi Jesús ne, hacuiin Cristu me, hacuiin me xi cavaxijin Nina xi cuaxëtje naja. Hane xuta xi cuatjin chja me ne, hatuxa tjemu ndacha me. Hacuaha xuta xi tsitjungui me Nahmi naja xi tacun ngahnga cojo Quihndi rē ne, me vēhē xi sahmi condra tséhē Cristu. ²³ Yējē ni xuta xi tsitjungui Quihndi rē Nina jan ne, tsajin tjin tangun cjuatacun rē me cojo Nahmi rē Quihndi jan. Peru xuta xi macjain rē Quihndi jan ne, hacuaha tjin tangun cjuatacun rē me cojo Nahmi jan.

²⁴ Ninguitsjun yējē ni cjua xi canuhyun hisca nixtin hya xi tjun tjun camacjain nuju. Sa xi quichuhun cjua jan cahntsua xahasen nuju ne, hacuatjin tjin tangun cjuatacun nuju cojo Quihndi cojo Nahmi rē. ²⁵ Hacuaha cachja Cristu xi sua naja me ngu cjuahñu xatsē.

²⁶ Cuitjin tsihindu nuju ta, tséhē xi tjin xuta xi meje cuindacha nuju me. ²⁷ Peru ngayun ne, Hasen xi tséhē Nina xi casua Cristu ngayun ne, quichuhun cahntsua xahasen nuju. Vēhē xi hacuiin sahmi nguyjé xi cuinduva xuta cuicuya nuju me ta, tséhē xi Hasen xi casua me jan ne, tivicuya nuju yējē ni cjua. Hane cjua xi tivicuya nuju ne, hatuxa

cjuaquixi, hacuiin cjuandacha. Quihndë ne, cuatjin tangunndujun cojo xi ha macjain nuju Jesucristu, sacuatjin xi ha cavicuya nuju Hasen xi tséhë Nina jan.

²⁸ Quihndë tsan ne, cuya cuichjá cojo nuju ta tangun nduju cojo xi ha macjain nuju Jesucristu, sehe ngajan xi nixtin xi cuinduva nga me ne, ngayaan ne, hacuiin rcun cuma, hacuaha hacuiin tsisava naja me. ²⁹ Ha hyan ta Cristu ne, hatuxa tyjahi me. Véhë xi cumangutacun ta yéjë ni xuta ndaja xuta tyjahi ne, me véhë xi ha camá me quihndi rë Nina.

3

Me xi tsin ngatsë rë Hasen rë Nina ne, sacu rë me cjuahñu xatsë

¹ Tjercu tsihmucacun naja Nina Nahmi naja. Hisca chja me xi quihndi rë me ngayaan. Peru hacuiin tu suvá chja ni me ta cjuaquixi jain xi quihndi rë me ngayaan. Peru xuta tsehen ne, hvíin me xi quihndi rë Nina ngayaan ta, tséhë xi hacuiin xuta rë Nina me. ² Ngayaan tsan ne, quihndë ne, quihndi rë Nina ngayaan. Peru cjëe cumachaya naja mé xcusun xuta cuma ngayaan xi cuma ngascan. Peru ha hyan ta, hya xi cuinduva Cristu ne, cuma ngayaan sacuaha me véhë ta, tséhë xi hya ne, chan Jain me hacutjin xi jyiji me. ³ Yéjë ni xuta xi tivetahacacun me Cristu ne, sahmi tyjahi suvá me xahasen rë me, sacuatjin tyjahi xahasen rë Cristu.

⁴ Peru yéjë ni xuta xi hinchajni ngajni rë cjuatsehen ne, hatuxa hndiin me tséhë cju xi cavitexa Nina. Ta xi hacuiin nuhyaan tséhë cjua xi cavitexa Nina ne, véhë xi hmí cjuatsehen. ⁵ Peru ha hyun ta Cristu ne, canduva me nguehe ngasunhndë, xi cjuahaxin me yéjë ni jyé naja. Hane me véhë ne, hatuxa tsajin camahani jyé rë me. ⁶ Véhë xi yéjë ni xuta xi cjuatseen ne, me cojo xi macjain rë me Jesucristu ne, ha quihndë tsajin hinchajni me ngajni rë cjuatseen. Peru yéjë ni xuta xi hinchajni cuaha me ngajni rë cjuatseen ne, me véhë xi hatuxa cavijniircu me hacutjin cjuatacun rë Jesucristu, hacuaha hacuiin xuta rë Jesucristu me.

⁷ Ngayujun ni tsan ne, nechun cuidadu xi tsajin yo cuindacha nuju. Xuta xi hatuxa hinchajni me ngajni rë cjuandaja ne, me véhë xi tyjahi xahasen rë me, sacuatjin tyjahi xahasen rë Cristu. ⁸ Peru xuta xi hatuxa hinchajni me ngajni rë cjuatseen ne, tséhë xitseen matitjun me ta, tséhë xi xitseen matitjun jan ne, hatuxa hisca ntsacu cavetsihin ne, sahmi cjuatseen. Véhë xi canduva Quihndi rë Nina ta, tséhë xi meje tsicjëya me yéjë ni cjuatseen xi sahmi xitseen matitjun jan.

⁹ Xuta xi camá me quihndi rë Nina ne, tsajin hinchajni me ngajni rë cjuatseen ta, tséhë xi yaha me cjuatacun rë Nina. Hatuxa cumaji xinchajni me ngajni rë cjuatseen ta, tséhë xi quihndi rë Nina me. ¹⁰ Suvá tsejen yo xi quihndi rë Nina, hacuaha suvá tsejen yo xi quihndi rë xitseen. Ta tu yo ni xi tsajin hinchajni ngajni rë cjuandaja, tu yo ni xi tsihmaaicacun xicjin ne, hacuiin quihndi rë Nina.

Nihmu tacun xingu xingu xingu yaan

¹¹ Cjua rë Nina xi canuhyun hisca ntsacu cavetsihin ne, cuitjin chja: meje rë xi nihmutacun xingueen. ¹² Mijí rë xi nihña sacuatjin casahmi cha Caín ta cha véhë ne, quihndi rë xitseen cha, hacuaha catsiquehen cha hntsë cha. Peru ¿há hyun mé ngatsë rë xi cjuatjin catsiquehen cha hntsë cha ni? Catsiquehen cha hntsë cha ngatsë rë cjuaxin ta, tséhë xi yéjë ni xi casahmi cha ne, hatuxa suvá cjuatseen, hane xi casahmi hntsë cha ne, hatuxa suvá cjuandaja.

¹³ Véhë xi hacuiin cjuercun nuju tsan, hya xi choho scuëe nuju xuta tsehen. ¹⁴ Ngayaan ne, nihmutacun xingueen. Hane cjuatjin matsejen xi ha cavetjunxen tséhë ngajni rë cjuatseen, caviseen ndiya rë cjuandaja. Peru yo xi tsihmaaicacun xicjin ne, hincha cuaha ngajni rë cjuatseen. ¹⁵ Yéjë ni xuta xi choho vëë xicjin ne, tangun me cojo xuta xi tsiquehen xicjin. Hane ha hyun ta, yéjë ni xuta xi tsiquehen xicjin ne, tsajin rë me cjuahñu xatsë. ¹⁶ Cristu ne, ngatsë rë xi tsihmucacun naja me ne, joho ni rë me xi tsiquehen xuta me. Cuatjin camatsejen xi hmí cjuahmutacun. Hane hacuatin ngayaan ne, meje rë xi ningatehen xi tsiquehen naja xuta, sa xi cjuatjin mameje rë, ngatsë

rë xi nihmutacun xingueen. ¹⁷ Ngayaan xi tjin chinë tjin hyun ne, sa xi tsajin naja cjuayumatacun hya xi ma chaya naja xi tjin ngu xingueen xi tsajin mé sinë me tsajin mé cuihi me ne, cuatjin matsejen ta tsajin camahani cjuahmutacun rë Nina cahntsua xahsen naja. ¹⁸ Mijí rë xi tu cuinújan ni xi nihmutacun xingueen tsan ta meje rë xi nihña cjuandaja, cojo sa xi cumatsejen xi tjin jain naja cjuahmutacun cojo xingueen.

¹⁹ Sa xi cuatjin nihña ne, vëhë matsejen xi tsëhë Nina xi cjuaquixi jain ngayaan, hacuaha vëhë xi cumangutacun tu ya ni ni hya xi chjahyan rë me cjuandaja rë me.

²⁰ Hane ha ndasa xahsen naja cuinchajyë naja xcun Nina xi choho nihña ne, peru mijí rë xi cumacjintacun ta, tsëhë xi Nina ne, hitsë sa jyë me cojo cjuatacun rë me xi cumá rë xahsen naja ta, tsëhë xi me vëhë ne, vëë me yëjë ni cjuatacun. ²¹ Ngajan xi sa xi tsajin mé cuinchajyë naja xahsen naja ne, hacuiin cumacjintacun hya xi chjahyan rë me cjuandaja rë me. ²² Hane me vehe ne, sua naja me yëjë ni xi chjahyan rë me ta, tsëhë xi tinihña yëjë ni hacutjin xi cavitexa me, hacuaha tsëhë xi yëjë ni xi chuya rë me ne, cuatjin tinihña. ²³ Cjua xi cavitexa naja Nina ne, cuitjin chja: meje rë me xi catamacjain naja Jesucristu, Quihndi rë me, hacuaha meje rë me xi nihmutacun xingueen. Cuatjin cavitexa me. ²⁴ Hane yëjë ni xuta xi vihndë cjua xi cavitexa Nina ne, tjin tangun cjuatacun rë me cojo Nina, hacuaha Nina ne, jiya cahntsua xahsen rë me. Ngayaan ne, hyan xi jiya Nina cahntsua xahsen naja ta, tsëhë xi casua naja me Hasen rë me.

4

Chuva rë profeta ndacha

¹ Ngayujun ni tsan ne, mijí rë xi ngutjen cumacjain nuju tsëhë yëjë ni cjuatacun xi cuichja xuta cojo nuju ta titjun chjuhunchuvun cjuatacun jan, ¿há ma tangun cojo cjuatacun rë Nina? Cuatjin meje rë ta, tsëhë xi ngasunhndë ne, tjemu cjín xuta xi tivindacha me. Chja suvá me ta cjuatacun xi vicuya me ne, cjuatacun rë Nina, peru quixiin vë. ² Peru sa xi ngu xuta cuichja quixi me ta Jesucristu ne, camá me ngu xuta ngasunhndë vihi ne, cumangutacún ta, ngajan matsejen xi me vëhë ne, chja jain me cjuatacun rë Nina. ³ Peru xuta xi hacuiin cuatjin chja quixi tsëhë Jesús ne, hatuxa tsajin camahani rë me cjuatacun rë Nina ta tjin rë me cjuatacun tsëhë xuta xi sahmi condra tsëhë Cristu. Ha canuhyun ta hatuxa cuechu nixtin xi cjuehe ngu cjuatacun xi sahmi condra tsëhë Cristu, peru cuichjá cojo nuju ta cjuatacun vëhë ne, ha hisca hinchajñi ngajñi naja nguehe ngasunhndë. ⁴ Ngayujun ni tsan ne, tjin tangun cjuatacun nuju cojo Nina. Vëhë xi cacaa nuju xi camacaain nuju tsëhë xuta ndacha xi cuacun jan. Camá cacaa nuju cuatjin ta, tsëhë xi Nina xi jiya xahsen nuju ne, hitsë sa jyë me xi cuma rë xitsehen matitjun xi jiya xahsen rë xuta xi macjaain rë Jesucristu. ⁵ Xuta ndacha xi cuacun jan ne, hatuxa tjin rë me cjuatacun rë xuta xi macjaain rë Jesucristu. Vëhë xi cjuatacun xi vicuya me ne, cjuatacun rë xuta xi macjaain rë Jesucristu, hacuaha yëjë ni xuta xi macjaain rë Jesucristu ne, vetaharcu me cjua jan. ⁶ Peru ngayaan ne, tjin tangun cjuatacun naja cojo Nina. Yëjë ni xuta xi hacuaha tjin tangun cjuatacun rë me cojo Nina ne, vetaharcu me cjua xi vicuyan. Peru yëjë ni xuta xi tsajin tjin tangun cjuatacun rë me cojo Nina ne, vetaharcuaain me cjua xi vicuyan. Cuatjin xi ma sacuse naja yo xi chja cjuaquixi ne, o yo xi vindacha.

Xuta xi tsëhë Nina ne, hacuaha tjin rë me cjuahmutacun xi nduva tsëhë Nina

⁷ Meje rë xi nihmutacun xingueen tsan ta, yëjë ni cjuahmutacun ne, hatuxa nduva tsëhë Nina. Yëjë ni xuta xi tjin rë me cjuahmutacun ne, quihndi rë Nina me, hacuaha amigu rë Nina me. ⁸ Peru me xi hacuiin tsihmucacun xicjin ne, hacuiin amigu rë Nina me ta, Nina ne, hatuxa tjin rë me cjuahmutacun. ⁹ Nina ne, ngu tutu ni Quihndi xi tjin rë me. Hane ngayaan ne, hyan ta Nina ne, tjin rë me cjuahmutacun cojo naja, tsëhë xi catsingatju me Quihndi rë me nguehe ngasunhndë. Cuatjin catsingatju me Quihndi rë me, cojo sa xi sacú naja cjuahñu xatsë ngatsë rë Quihndi jan. ¹⁰ Ngayaan ne, nihmutacun

Nina. Peru Nina ne, hitsë sa tsihmucacun naja me. Véhë xi hisca catsingatju me Quihndi rë me xi cuechjite ngatsë rë yéjë ni jyé naja.

¹¹ Hane tséhë xi cuatjin catsihmucacun naja Nina tsan ne, vëhë xi hacuaha meje rë xi nihmutacun xingueen. ¹² Nina ne, hatuxa tsajin yo xi cavëë rë me. Peru sa xi nihmutacun xingueen ne, Nina ne, jiya me cahntsua xahasen naja, hane cuatjin matsejen xi tjin jain naja sacuaha cjuahmutacun xi tjin rë Nina.

¹³ Ngayaan ne, hyan ta tjin tangun cjuatacun naja cojo Nina hacuaha hyan ta jiya me cahntsua xahasen naja, tséhë xi casua naja me Hasen rë me. ¹⁴ Hane ngayin ne, cahyin jain cojo tuxcuin Quihndi rë Nina. Véhë xi tinújin cojo cjuaquixi ta Nina Nahmi naja ne, catsingatju me Quihndi rë me, xi cuaxëtje rë xuta ngasunhndë. ¹⁵ Tu yo ni xi chja cjuaquixi xi Jesús ne, Quihndi rë Nina jain me ne, me vëhë ne, jiya Nina cahntsua xahasen rë, hacuaha tjin tangun cjuatacun rë cojo Nina. ¹⁶ Ngayaan ne, macjain naja hacuaha ha hyan ta Nina ne, hmucacun jain me ngayaan. Nina ne, hatuxa tjin rë me cjuahmutacun. Hane xuta xi tjin rë cjuahmutacun ne, tjin tangun cjuatacun rë me cojo Nina, hacuaha Nina ne, jiya cahntsua xahasen rë me. ¹⁷ Hane hya xi cumachihin cjuahmutacun xi tjin naja ne, ngajan xi hacuiin rcun cuma, hya xi cuechutaha nixtin xi tsichuva naja Nina. Cuatjin ta, tséhë xi nguehe ngasunhndë ne, hacuaha quihndi rë Nina ngayaan sacuatjin rë Jesucristu, xi Quihndi rë Nina me. ¹⁸ Hiscan xi tjin cjuahmutacun ne, tsajin mé chircun hinchajní ta hya xi ha tjin chihin cjuahmutacun xi tjin naja ne, hisca hitsë ne, tsajin rcun cuma. Sa xi ningatahantacun xi Nina sahmi naja me castigu ne, vëhë xi rcun cuma. Peru sa xi cuatjin rcun cuma ne, ngajan matsejen xi tsajin tjin chihin cjuahmutacun xi tjin naja.

¹⁹ Ngayaan ne, tjin naja cjuahmutacun ta, tséhë xi Nina ne, tjun me catsihmucacun naja me. ²⁰ Peru sa xi nújan xi nihmutacun Nina, hane choho hyan xingueen ne, tu vindachan ni xi nújan. Cuatjin ta, tséhë xi sa xi hacuiin nihmutacun xingueen xi tsejen naja cojo tuxcun ne, hacuaha cumaji nihmutacun Nina xi cjëë camahani chaan me. ²¹ Nina ne, cavitexa naja me cjua vihi: yo xi tjin rë cjuahmutacun cojo Nina ne, hacuaha meje rë xi tjin rë cjuahmutacun cojo xicjin.

5

Me xi má hya xi macjain naja Jesucristu

¹ Jesús ne, hacui me xi Cristu, me xi cavaxijin Nina xi cuaxëtje naja. Hane ngayejen ni xi cuatjin macjain naja tséhë cjua vëhë ne, quihndi rë Nina ngayaan. Yéjë ni xuta xi tsihmucacun me xi má xutacha rë ngu quihndi ne, hacuaha cojo quihndi jan tsihmucacun me. ² Sa xi nihmutacun jain Nina hacuaha nihñia sacuatjin xi cavitexa me ne, ngajan matsejen xi tjin naja cjuahmutacun cojo yéjë ni xuta xi quihndi rë Nina me. ³ Hacuaha sa xi chjahanrcun jain yéjë ni cjua xi cavitexa Nina ne, ngajan matsejen xi nihmutacun jain me. Hane yéjë ni cjua xi cavitexa me ne, hacuiin jercu chja xi nihñia ta, ⁴ tséhë xi yéjë ni xuta xi quihndi rë Nina ne, scaa rë me cojo yéjë ni cjuatsehen xi tjin nguehe ngasunhndë. Cuatjin caa naja cojo cjuatsehen jan ta, tséhë xi macjain naja Jesucristu. ⁵ Hane suvá ni xuta xi macjain rë tséhë Jesús xi Quihndi rë Nina jain me ne, me vëhë xi caa rë me cojo yéjë ni cjuatsehen xi tjin ngasunhndë.

Hasen rë Nina ne, tsinguixi xi Jesús ne, hacui Quihndi rë Nina me

⁶ Hyo xi canduva Jesucristu ne, camatsejen xi Quihndi rë Nina me nixtin xi cojo nandá caxtenda me cojo nixtin xi cavixujni rë me hya xi cahme me. Peru hacuiin suvá ni nixtin xi caxtenda ni me ta cojo nixtin xi cahme me ne, hya camatsejen xi Quihndi rë Nina me. Hasen xi tséhë Nina ne, cuatjin tisua naja cjuaquixi ta, tséhë xi Hasen jan ne, hatuxa cjuaquixi xi chja. ⁷ Siu jyan xcusun xi tisua machaya naja ta Jesús ne, Quihndi rë Nina jain me. ⁸ Ngu ne, cuatjin chja quixi Hasen xi tséhë Nina. Ma jo ne, cuatjin camatsejen hya xi caxtenda Jesús. Ma jyan ne, hacuaha cuatjin cama tsejen hya xi cahme me. Hane catsijyan xcusun xi cuacun jan ne, tjin rë ngu ni cjuatacun. ⁹ Ngayaan ne, macjain naja

tséhë cjua xi chja xuta cojo naja. Peru hitsë sa vengui chjí rë cjua xi chja Nina. Hane Nina ne, casua me camachaya naja yo xi Quihndi rë me. ¹⁰ Xuta xi macjain rë me tséhë Quihndi rë Nina ne, hatuxa vëë me cojo cjuatacun rë me ta quixi jain cjua xi cachja Nina. Xuta xi macjaain rë me tséhë cjua xi cachja Nina ne, sacuaha xi cuichja me xi Nina ne, jemu ndacha me. Cuatjin chja me tséhë Nina ta, tséhë xi macjaain rë me tséhë cjua xi cachja quixi Nina, yo xi Quihndi rë me. ¹¹ Hane Nina ne, cachja cjuahñu xatsë jan ngatsë rë Quihndi rë me. ¹² Xuta xi tjin tangun cjuatacun rë me cojo Quihndi jan ne, tjin rë me cjuahñu xatsë vëhë. Peru xuta xi tsajin tjin tangun cjuatacun rë me cojo Quihndi rë Nina jan ne, hacuaha tsajin rë me cjuahñu xatsë jan.

Conseju xi sua Juan xi cajnetaha

¹³ Vëhë xi cuitjin titsihindu nuju ngayujun ni xi macjain nuju tséhë Quihndi rë Nina. Titsihindu nuju yëjë ni cjua vihi, cojo sa xi cumangutacun ta quixi xi tjin jain nuju ngu cjuahñu xatsë xi tsajin nu tsajin nixtin xi cjuë. ¹⁴ Ngayaan ne, mangutacun jain cojo Nina ta, tséhë xi ha hyan ta sa xi tjin tangun cjuatacun naja cojo rë me hora xi tichjahyan rë me ne, cuihndë me xi cuinújan. ¹⁵ Hane tséhë xi hyan ta vihndë me yëjë ni cjua xi nújan cojo rë me ne, vëhë xi hacuaha hyan ta sacú naja xi cachjahyan rë me.

¹⁶ Yo ngayaan xi chutsejen xi tivixuya ngu xingueen ngajñi rë ngu cjuatsehen xi cuma cumanchataha ne, meje rë xi cuinújanyumatahan tséhë me, hane cuatjin sacú rë me cjuahñu xatsë. Peru tjin cjuatsehen xi cumaji cumanchataha. Hane hacuiin tichjá cojo nuju xi cuinújunyumuntuhun tséhë xuta xi tjin rë me jyé vëhë. ¹⁷ Yëjë ni cjuatsehen ne, Nina ne, chja me ta hatuxa jyé hmí rë. Peru tjin cjuatsehen xi cuma cumanchataha.

¹⁸ Ngayaan ne, hyan ta yëjë ni xuta xi cjuaquixi xi quihndi rë Nina me ne, hatuxa tsajin hinchajñi me ngajñi rë cjuatsehen. Cuatjin ta, tséhë xi Quihndi rë Nina ne, sahmi rë me cuidadu, hane xitsehen matitjun ne, cumaji mé sahmi cojo rë me.

¹⁹ Ngayaan ne, ha hyan ta tséhë Nina ngayaan. Hane yëjë sa xuta xi yahnga ne, tséhë xitsehen má titjun me.

²⁰ Ngayaan ne, hacuaha hyan ta ha canduva Quihndi rë Nina. Hacuaha casua naja me cjuatacun, cojo sa xi cuijnercun yo xi Nina xi hatuxa cjuaquixi. Tjin tangun cjuatacun naja cojo me xi hatuxa cjuaquixi ta, tséhë xi tjin tangun cjuatacun naja cojo Jesucristu, Quihndi rë me. Me vëhë xi Nina xi hatuxa cjuaquixi, hacuaha me vëhë xi sua naja cjuahñu xatsë xi tsajin nu tsajin nixtin xi cjuë.

²¹ Ngayujun ni tsan ne, mijí camahani rë xi chjuhunrcun nina xi hacuiin cjuaquixi.

Xujun má jo, xi catsihindu San Juan

Cjuaquixi cojo cjuaahmutacun

¹ Ngahan, ngu xuta changá matitjun tséhë yungun ne, tsihindu nuju ngayun, ngu chjuun xi cavaxijin Nina. Hacuaha cojo yéjë ni quihndi nuju ne, tsingátju nuju ngayujun ni ngu nina na ha ta, tséhë xi tjemu hmú cákun nuju cojo nguñaja cjuaquixi. Peru hacuiin tu suva ni ngahan ta yéjë ni me xi vëë jain me cjua xi hatuxa cjuaquixi ne, hacuaha tsihmucacun nuju me. ² Cuatjin nihmitacuin nuju, ngatsë rë cjuaquixi xi ha siu cahndé ngajñi rë cjuatacun naja. Hane cjuaquixi xi cuacun jan ne, tsajin nu tsajin nixtin xi cuetjuxin tsajan. ³ Nina nahmi naja cojo Jesucristu Quihndi rë me ne, hatuxa sua naja me cjuandaja cjuajeya cojo cjuayumatacun, cuatjin xi ma vanguen tjenguen cjua xi cjuaquixi, hacuaha ma nihmutacun jain xingueen.

Cuanguennduju cojo cjuaachacun rë Cristu

⁴ Tjemu ndaja camá rë xahasen naha ta, tséhë xi cavéchutaha ngu jo quihndi nuju xi hatuxa hinchajñi me ngajñi rë cjuaquixi, sacuahatjin Nina Nahmi naja cavitexa naja me. ⁵ Quihndé ne, nguehe cuichjá cojo nuju tsan ta meje rë xi ngayejen ni ne, nihmutacun xingueen. Hane cjua vihi xi tichjá cojo nuju ne, hacuiin ngu cjua xatsë xi sehe cavitexa naja Nina ta cjua vihi ne, hacui xi tacun hisca hya xi sehe cavetseen camacjain naja cjua rë Nina. ⁶ Hane sa xi nihñña jain yéjë ni cjua xi cavitexa naja Nina ne, ngajan matsejen xi tjin jain naja cjuaahmutacun. Hane cjua xi cavitexa Nina ne, hacui vihi: meje rë xi nihmutacun xingueen. Hacuaha hacui cjua vëhë xi camachaya nuju hisca hya xi sehe cavetsuhun camacjain nuju cjua rë Nina.

Cjua xi tanguiin cojo cjua rë Nina ne, má cjua ndacha

⁷ Cuatjin chjá cojo nuju ta, tséhë xi ngasunhndé vihi ne, tjemu tjin xuta ndacha xi macjaain rë me xi Jesucristu ne, camá jain me ngu xuta ngasunhndé vihi. Xuta ndacha jan ne, hacui me xi vindacha, hacuaha hacui me xi má condra rë Cristu. ⁸ Tjin nuju cuidadu, sehe ngajan xi hacuiin nichayun cjuandaja xi canihñí ngajñi nuju. Cahndé rë vëhë ne, sacú nuju yéjë ni cjuatjo xi sua nuju Nina.

⁹ Yéjë ni xuta xi vatjutaha me tséhë cjua xi cavicuya Cristu ne, tsajin tjin tangun cjuatacun rë me cojo Nina. Peru yéjë ni xuta xi vetaharcu me suvá ni cjua xi cavicuya Cristu jan ne, me vëhë ne, tjin tangun cjuatacun rë me cojo Nina Nahmi naja cojo Quihndi rë me. ¹⁰ Hya xi cjuehe ngu me xi cuichja xi vicuya me cjua rë Nina, perú sa xi cuicuyaain me cjua xi cavicuya Cristu ne, xi catuun cahndé cuisehen me cueñña me ndya nuju. Hisca ngu nina cachjayunnguu tséhë me ta, ¹¹ sa xi cuatjin tuhun rë me nina ne, sacuaha xi ma tangun yun cojo cjuatsehen xi sahmi me.

Cjua xi vijnetaha

¹² Tjemu cjín sa cjuavisiajmi xi meje cuichjá cojo nuju ngayujun ni. Peru tsihinduun sa nuju sacuahatjin xcun ngu xujun vihi ta, tséhë xi hatuxa vejñá xi cjuë tjëngë nuju, sehe cuinújan xcun cojo xcun, sehe ngajan xi tjemu ndaja cuma rë xahasen naja.

¹³ Na tichjun, xi hacuaha cavaxijin Nina na ne, tsingatju quihndi rë na ngu nina tsujun.

Xujun ma jyan, xi catsihindu San Juan

Juan sua suva me nina rë me

¹ Ngahan, ngu xuta changá matitjun tséhë yungun ne, tsihindu ri ngaye Gayo, ta ngaye ne, tjemu vinga ná ngaye, tjemu hmú cákun ri cojo nguñaja cjuaquixi.

² Catisecoo ri Nina, tsan, xi cuma cuihin xcun cojo yëjë ni cjuandaja, hacuaha xi ndajyihí cjuahñu riji, sacuahatjin xi ha ndajyihí xahasen riji. ³ Tjemu ndaja camá rë xahasen naha ta, tséhë xi jima ngu ndiya xi cafehe ngu ngu xingueen ne, tjemu ndaja cachja me tsiji. Ha tuxa chja me ta ngaye ne, nguñajatacuin hmi tjengui ndiya rë cjuaquixi. ⁴ Tjemu ndaja má camahani rë xahasen naha, hya xi machaya ná xi yëjë ni xingueen xi sacuaha quihndi naha ne, cjui tjengui me ndiya rë cjuaquixi.

Conseju xi cuma rë xinguén xi chja me cjua rë Nina

⁵ Tjemu ndaja tinihñi, tsan, xi cuatjin tivisecue rë jingu sa xingueen, hisca cojo sa xingueen xi hyiin yo jan ta, tséhë xi cjin nandya nduva me. ⁶ Hane ngujo me xi cuacun vëhë ne, sehe cavuya cafehe nga me nguehe. Hane hya xi cama tangun ngayin yungun ne, cachja me cojo niji ngayijin ni xi tjemu tjin ri cjuahmutacun. Quihndë ne, tu jani hya ni xi cuatju nga me nandya riji ne, tjemu ndatjin xi cuisecue rë me, cojo sa xi tsajin mé xi sahmi chaja rë me xi cuetju me cjue me ndiya ta, tséhë xi cuatjin chuya rë Nina xi nihña. ⁷ Cuatjin meje rë xi nihña ta, tséhë xi xuta xi cuacun jan ne, cavetju quiji me ngu nangui xi cuichja me cjua rë Jesucristu. Hane hisca ngu hñú ngu té ne, faain me tséhë xuta xi macjaain rë Nina. ⁸ Vëhë xi ngayaan ne, meje rë xi cuatjin cuisecoon rë me xi cuacun jan ta, tséhë xi cuatjin ne, hacuaha cuisecoon rë cjua xi cjuaquixi.

Diótrefes ne, choho chja cha tséhë Juan

⁹ Ha catsihindu ngu xujun xi tsingátju rë xuta xi ma tangun ngajan yungun. Peru cha Diótrefes, xi tjemu meje sahmi tjun cha ngajñi rë me ne, handasa hacuaha xingueen cha, pera faharcuaain cha cjua xi nújin. ¹⁰ Vëhë xi hya xi cjuéhë ndyá ne, cuichjájyé cojo nuju ngayujun ni yëjë ni xcusun xi sahmi cha jan. Cuichjá quixë hacutjin choho chja cha tsijin. Hane manguaaincacin cha cojo xi choho chja ni cha ta hacuaha tsitjungui cha ngu ngu xingueen xi nduva jingu sa nandya. Hane hya xi yahnga me xi meje sahmi me cjuandaja cojo xingueen xi cuacun nduva jan ne, mijí sua cha cahndé, hacuaha hisca mijí rë cha xi cuisehen nga me yungun.

¹¹ Xi canihñii cjuatsehan xi tisahmi yahnga xuta, tsan, ta tu tjin tisahmi xuta xi tisahmi cjuandaja ne, cuatjin meje rë xi nihñi. Xuta xi sahmi cjuandaja ne, tséhë Nina me. Peru xuta xi sahmi cjuatsehan ne, hacuiin amigu rë Nina me.

¹² Yëjë ni xuta ne, ndaja chja me tséhë cha Demetrio. Hacuaha suvá tsejen xi sahmi Jain cha sacuaha tjin vitexa Nina. Hisca ngayin ne, ndaja nújin tséhë cha. Hane ngaye ne, ha hye ta xi nújin ne, ha tuxa cjuaquixi.

Cjua xi vijnetaha

¹³ Tjemu tjin vasen sa xi meje cuichjá cojo ri, pera mijí cuichjá cojo ri sacuaha tjin xcun ngu xujun vihi. ¹⁴ Cahndé rë vëhë ne, tu tjenhñu ni ne, vejñá xi cjué tjëngë ri, sehe cuiisiajme xcun cojo xcun.

¹⁵ Quihndë ne, tsingátju ngu nina tsiji, hacuaha yëjë ni amigu riji ne, tsingatju me ngu nina tsiji. Nihñi favor ne, yëjë ni amigu niji xi siutaha ndyá ne, tehe rë me ngu nina niji jima ngu jima ngu me.

Carta tséhë San Judas

Judas ne, tichja me nina cojo yéjé ni xuta xi cavaxijin Nina

¹ Ngahan Judas, xi mosu hndixahan rë Jesucristu, hacuaha xi hntsë cha Jacobo ne, tsihindu xujun vihi xi chutayun ngayujun ni xi cavaxijin nuju Nina Nahmi naja, tséhë xi tjercu hmucacun me ngayun. Hane ngayujun ni xi camacjain nuju Jesucristu ne, Nina tisahmi cuidadu nuju me. ² Yéjé ni cjuandaja cojo cjuajeya cojo cjuahmutacun tséhë Nina ne, catamacjín sa ngajñi nuju.

Xuta xi vicuya cjuandacha

³ Ngayujun ni tsan ne, casahme xati cacun xi tsihindu nuju tséhë cjuandaja rë Nina xi cuaxëtje naja. Peru quihndë ne, hacuaha sahmi nguyé xi tsihindu nuju, cojo sa xi cuichjá cojo nuju xi cuinújuntjun ngatsë rë cjuachacun xi ha casua Nina ngayaan xi macjain naja me. ⁴ Tséhë xi tjin xuta xi cavindacha xi caxinchajñi me ngajñi nuju. Peru hatsëë nixtin ne, camahindu xcun xujun rë Nina tséhë castigu xi cuatju me cuma. Hatuxa xuta tsehen me, xi handasa tsejen sacuaha xi tjin rë me cjuandaja rë Nina naja ne, peru vatjutaha me yéjé ni cjuatsehen xi sahmi me, hacuaha tsitjungui me ngu ni Nai naja Jesucristu.

⁵ Quihndë ne, handasa ha hyun cjuva vihi ne, cuya cuichjá cojo nuju hacutjin casahmi Nai naja. Ngu ne, xuta nangui Israel ne, handasa cavaxëtje Nai naja me tséhë nangui Egipto ne, peru cama ngascan ne, ngajñi rë xuta nangui Israel jan ne, hacuaha casahmi me castigu xuta xi camacjaain rë tséhë me. ⁶ Ma jo ne, ángel xi cavyijin hiscan xi cachja Nai naja xi cuiyuju ta tu cavetjuxin tséhë cahndé rë ne, cavinchahñu me hiscan jñu, hisca xi cuechutaha nixtin xi cuichja Nai naja mé castigu cuatju ángel jan cuma nu cjui nu nduva. ⁷ Hane xi ma jyan ne, xuta nandya xi hmí rë Sodoma cojo xuta nandya Gomorra cojo sa xuta xi siu tahndee rë jan ne, hacuanitjin ni cahndiin me tséhë Nina. Tjercu casahmi me cjuatsehen xi tjin chjuunnahñu rë me. Hisca cavatjutaha sa me cjuatsehen ta ngajñi xihin ni me ne, casahmi me cjuatsehen sacuaha xi chjuunnahñu rë me xicjin me. Véhë xi suvá sa cahndé rë nandya xi cuacun véhë ne, siu cuaha xi ninguitsjen tséhë castigu xi cavatju camá, xi café catí cojo ndihi rë Nina.

⁸ Hacuanitjin ni tisahmi xuta tsehen xi hinchajñi ngajñi nuju jan ta, ngajñi rë cjuatcun rë me ne, tichja cojo rë me xi catisahmi me cjuatsehen jan, xi sahmii me cjuva xi vitexa Nai naja, hacuaha xi chocho catichja me tséhë ángel xi siu cojo Nina. ⁹ Peru suvá ángel matitjun xi hmí Miguel ne, hya xi ticjanya cojo xitsehen matitjun yojo rë Moisés ne, cavetjiincacun xi chocho cuichja cojo xitsehen jan ta tu cuinitjin cachja: “Nina catichjataha me ngaye.” ¹⁰ Peru xuta tsehen xi cuacun vé ne, chocho chja me tséhë yéjé ni xcusun xi vijnircu me. Hane hitsë sa chu me xi cuma rë chu ta, handasa vé me xi hmí rë cjuatsehen ne, hatuxa sahmi me. Hane cjuatsehen xi sahmi me jan ne, véhë xi tsinguetsun rë cjuatcun rë me.

¹¹ Jemu chocho cuatju me cuma, tséhë xi fi me ndiya tsehen sacuatjin qui ji xutachanga naja Caín, sahmi me cjuatsehen ngatsë rë tujún xi jercu meje rë me sacuatjin casahmi cha Balaam, hacuaha cueya me sacuatjin cahme cha Coré, ngatsë rë xi meje cjuahaxin cha xutaxa rë. ¹² Xuta tsehen xi cuacun jan ne, ngu cjuasava me hora xi tichinutangun tséhë cjuahmutacun xi tjin nuju cojo xingun ta, tséhë xi hisca jiné hisca hvi me cojo nguñaja ni cjuasua, peru fahacuendaain me yo xi cajiné yo xi cajinii ta tu tséhë suvá ni me fahacuenda me. Sacuaha yufí xi cavaain ta cavatjucjin xi cavaha rë tjo qui ji ne, hacuaha cuatjin machjiriin me. Sacuaha ya xi machjiriin xi vaquiin tú rë nixtin rë ne, tjune ni rë hisca tyjama rë sehe xi ne, hacuaha cuatjin machjiriin me. ¹³ Machjiriin me sacuaha tsindyu rë ndachacun xi hisca xu jima xcun xi cjan rë ne, hacuaha cuanitjin ni hisca xu jima cjuasava ngajñi rë me. Machjiriin me sacuaha machjiriin niñú xi siutaha ngahnga xi vejñaai cahndé rë ne, hacuaha cuatjin machjiriin me. Hane castigu xi cuatju

me cumá ne, xi tsajin nu tsajin nixtin xi cuma ndaya me tséhë hiscan xi tjercu tu jñu camahani.

¹⁴ Hane ngu xutachanga niji xi hmí rë Enoc, xi quihndindaicjin rë Adán ne, hya xi cachja me ngu cjua xi caveya Nina cjuatacun rë me xi cuma ne, hacuaha cachja me tséhë xuta tsehen xi cuacun vë, cuitjin cachja me: "Cahvë Nai naja xi nduva me ngajñi rë ángel rë me xi tjercu tu cjín camahani. ¹⁵ Nduva me xi cjuahachuva me ngayejen ni, sehe cuichja me mé castigu xi cuatju yëjë ni xuta tsehen tséhë yëjë ni cjuatsehen xi casahmi me, hacuaha tséhë yëjë ni cjua xi choho cachja xuta tsehen xi cuacun jan tséhë Nina." ¹⁶ Xuta tsehen jan ne, hatuxa choho chja me tséhë yëjë ni, hacuaha sahmi me tu cutjin xi macacun me. Sahmi yehe suvá me yojo rë me, hacuaha chja me cjuahaxi cojo xuta, tséhë xi meje rë me xi sahmi yehe xuta me.

Conseju xi sua Judas xuta xi macjain rë Nina

¹⁷ Peru ngayujun ni tsan ne, ninguitsjun cjua xi ha cachja apóstol tséhë Nai naja Jesucristu, ¹⁸ xi cachja me cuitjin: "Hya xi ha jima tiña cuya Nai naja ne, hya tjin xuta xi cuejnucëë me tséhë yëjë ni cjuandaja rë Nina, hacuaha sahmi me yëjë ni cjuatsehen xi cuetju tséhë xahasen rë me." ¹⁹ Xuta tsehen xi hinchajñi ngajñi nuju jan ne, vatëcja me ngajñi rë yëjë ni ngu cjuandaja xi cuma. Tsingatahabacacun ni me xi sinë xi cuihi me, hane Hasen rë Nina ne, tsajin camahani rë me.

²⁰ Peru ngayujun ni tsan ne, sacuaha cjua rë Nina xi ha camacjain nuju ne, nihñu nguyë xi catamacjain sa nuju. Tinújunyumu ha tu cutjin xi visecoo nuju Hasen rë Nina.

²¹ Nihñu cuidadu xi hacuiin nichayun cjuahmutacun rë Nina. Hacuaha tinechunyun rë nixtin xi Nai naja Jesucristu ne, cojo cjuandaja rë me ne, sua naja me cjuahñu naja xi tsajin nu tsajin nixtin xi cueyan.

²² Xuta xi jo má cacun me tséhë cjuandaja rë Nina ne, nújun cojo rë me ne, cojo sa xi hacuiin jo cuma cacun me. ²³ Naxuntjun me sacuaha ngu xuta xi naxentjen me xi ha ndiya cueti me. Hane yahnga me ne, tjin nuju cjuayumatacun cojo rë me, peru cojo cuidadu, xi satiin nuju jyé rë me.

Tsinguijnetaha Judas cjua

²⁴⁻²⁵ Ngu ni Nina xi vaxétje naja ngatsë rë Nai naja Jesucristu ne, me vëhë xi cuma sahmi cuidadu me ngayun xi tsajin xtundiya yun ngajñi rë cjuatsehen, hacuaha cuiyuju me ngayun xcun me xi cun tyjahi tyjahi xahasen nuju ne, cojo yëjë ni cjuasua. Me vëhë xi tjin rë me yëjë ni ngu cjuandaja, hacuaha jyé me, hacuaha ma vitexa me, hacuaha ma sahmi me, hisca xi chaja sa xi cumandaja ngasunhndë, hisca quihndë, hacuaha hisca xi cuatju xi cjué ngasunhndë. Cuatjin Jain.

Apocalipsis, cjua xi sua cumachaya naja

Cjua tséhë Jesucristu xi cafehecani chini rë Juan

¹ Cjua vihi ne, cjua tséhë Jesucristu xi casua Nina cojo sa xi tsingacun Jesucristu xuta ladu rë me xcusun xi hatuxa sahmi nguyjë xi cuatjú. Cjua jan ne, ngu ángel cafehecani ná, ngahan xi hmí ná Juan, ngu mosu hndixahan rë me. ² Hane ngahan ne, tsinguíxë ta cjuaquixi yéjë xcusun xi cahvë hya, xcusun tséhë cjua rë Nina cojo tséhë cjuaquixi xi chja Jesucristu. ³ Jemu ndaja tséhë me xi cuichjasun me cjua rë xujun vihi, hacuaha jemu ndaja tséhë me xi cuihndë me cuincha me xahasen rë me cjua xi camahindu xcun xujun vihi, tséhë xi ha camá tiña nixtin xi cuma chihin cjua rë.

Cjua xi catsihindu Juan xi cafahatsja yatu yungun xi tjin ngajan Asia

⁴ Ngahan Juan ne, tsihindú cjua vihi xi cjuahatsja yatu yungun xi tjin ngajan nangui Asia. Chjhunntsun cjuandaja cjuajeya tséhë Nina, me xi hacui, hacui ni me xi cavejña me hatséë, hacuaha hacui ni me xi cuejña cuaha, hane cojo tséhë Hasen rë me xi siu xcun me xi hacui sacuaha yatu hasen. ⁵ Hacuaha cojo tséhë Jesucristu, me xi má testigu cjuaquixi, me xi tjun tjun cavuya cjuahñu tséhë ngajñi rë nima, me xi hacuaha matitjun tséhë yéjë ni xuta xi matitjun tséhë ngasunhndë, hane me xi hmucacun naja hacuaha cavaxëtje naja tséhë jyé naja hya xi cavanga jni rë me xi cahme me. ⁶ Hacuaha Jesucristu ne, casahmi me xi ngayaan ne, satë naja xi cuitexan ne, hacuaha cuma yaan sacuaha nahmi xi chjahancuendan Nina, Nina xi hacuaha má me nahmi rë me. Me vëhë ne, catimá jyé hnga me hacuaha catimá titjun me yéjë ni nu, yéjë ni nixtin. Cuatjin Jain.

⁷ ¡Nutsujun, ta cuinduva me cojo yuff! Hacuaha yéjë ni tuxcun ne, scuëë rë me. Hisca cojo me xi cahndiin tséhë me ne, scuëë rë me. Hane yéjë xuta tséhë jimangu tjë rë xuta ngasunhndë ne, cuatju me cjuandusin ngatsë rë me. ¡Cuatjin cumá! ¡Cuatjin Jain!

⁸ Cuitjin chja Nina: “Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin. Ngahan xi tejñia, hane ngahan xi vijnetaha. Cavéjña hatséë, hacuaha cuéjña cuaha. Yéjë ni má sahme.”

Juan ne, cavutsejen me xi jyé hnga Jesucristu

⁹ Ngahan Juan ne, xingun má ngahan, tangun satë naja cjuañihi, tangun nechan ngahma gubiernu hacuaha tangun caa naja ngatsë rë xi mangutacun cojo Jesús. Ngahan cavitejñataha ngu nandya xi hmí rë Patmos xi vetjucaa tséhë ndachacun. Ngajan tejñataha ngatsë rë xi cachjá cjua rë Nina cojo tséhë cjuaquixi xi chja Jesús. ¹⁰ Hya xi camá ne, nixtin xi chjharcun Nina ne, Hasen rë Nina ne, cavisehentë cjuatacun naha. Hora vëhë ni ne, tséhë taha ngaxtun ne, cahndë ngu xta xi jemu hñu camahani nuhya rë, nuhya rë sacuaha xta rë tyo ¹¹ hane cuitjin cachja:

—Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Chjehe ngu xtë xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

¹² Hya xi camá ne, cavuya xi scutséjen yo xi tichja cojo ná, peru xi tu cavuya ne, xi cahvë ni ne, yatu candeleru xi camá tséhë oro. ¹³ Hane vasencja rë candeleru jan ne, jiyajñi ngu xihin xi tsejen sacuaha Quihndi rë Xuta Jain. Yaja me ngu tsjian tjin té ni xi vechu hisca ntsacu me, hane tjihnucja hiscan ndanisin rë me cojo ngu pañu nduju camá cojo nachjun tséhë oro. ¹⁴ Hane rcu cojo tsjarcu me ne, tyava tsejen sacuaha tsejen tyava tsja rë chu tsángä o sacuaha tsejen hnchan xi vixu. Hane tuxcun me ne, tsejen sacuaha ndihi xi ña vitjen. ¹⁵ Ntsacu me ne, seti sacuaha quicha sine xi catsicjé ndihi xutsë rë; hane xta rë ne, nuhya rë sacuaha xta rë nandan xi tjemu hñu vanga. ¹⁶ Tsja xi ladu quixi ne, vahangui me yatu niñú. Hane tséhë hntsua me ne, vetju ngu espada yuju xi vatë taha

xcun cojo taha ngaxtun. Hane xcun ne, tsejen sacuaha tsuhi hya xi sua hasen cojo yéjé ni ngahñu rë.

¹⁷ Ngajan xi ngahan ne, xi cahvë xcusun rë me ne, catíja taha ntsacu me sacuaha xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuiin. Ngahan xi ntsacu vetsihin ne, hacui ni ngahan xi vijnetaha. ¹⁸ Ngahan, quicun ngahan. Cavéya, peru quihndë tacunntsa llavi tséhë cjuaveya cojo tséhë Hades, cahndé hiscan siu nima. ¹⁹ Hindë ngaye ne, nihindi xcusun xi cahye vi cojo xcusun xi tijima quihndë cojo xcusun xi sehe cumá. ²⁰ Sacuaha yatu niñú xi cahye hntsa ladu quixi naha cojo yatu candeleru xi camá tséhë oro jan ne, cuitjin vijne cjuatacun hma jan: yatu niñú jan ne, hacui ángel xi sua cumachaya rë xuta rë yatu yungun jan cjua rë Nina, hane yatu candeleru jan ne, hacui yatu yungun jan.

2

Cjua xi cjuahatsja yungun ngajan nandya Efeso

¹ 'Hindë nihindi cjua vi xi cjuahatsja ángel rë yungun ngajan nandya Efeso. Cuitjin nihindi: "Cjua vihi ne, cjua rë cha xi vahangui yatu niñú jan tsja ladu quixi cha hacuaha tsuyiyhiya cha vasencia rë yatu candeleru jan xi camá tséhë oro: ² Ha ndaja hvë tséhë xa nuju sacuaha cjuandaja xi nihñu, jemu chja tivatjun Peru ticaa nuju titsangun nduju cojo. Hvë xi tuun rë xuta tsehen cahndé ta, nichuvun cjuatacun rë xuta xi vindacha me sacuaha xi má me apóstol. Hane camachaya nuju xi tu vindacha ni me.

³ Hacuaha titsangun nduju hacuaha ticaa nuju cojo cjuacjintacun xi tivatjun ngatsé rë xi veyunnangun ñihi naha, hacuaha machuvaain cjuatacun nuju ngajni rë cjuacjintacun jan. ⁴ Peru cojo yéjé sa ne, tjin ná vihi condra nuju ta, hacuiin jemu nihmutacún ná sacuaha xi canihmutacún ná hya xi titjun camangutacún cojo ná. ⁵ Véhë xi ninguitsjun hacutjin cavatjun hya xi tjin nuju cjuahmutacun véhë, hane nindeyun cjuatacun nuju ne, cuyun nihñu nga xcusun sacuaha xi canihñu titjun. Cuatjin nihñu ta, sa tsajin ne, cuinduvá tjéngë nuju ne, cuaxëxen candeleru xi saté nuju tséhë cahndé rë. ⁶ Peru hacuaha tjin sa nuju ngu xcusun xi ndaja tsujun ta, ndaja tsujun tséhë xi chocho hyun xcusun xi sahmi xuta xi tjengui me cjuachacun tséhë Nicolás, ta cjuachacun jan ne, hacuaha cojo ngahan ne, chocho hvë. ⁷ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun. Cuitjin chja: Yo xi scaa rë cjue xcun tséhë cjuatsehen ne, suá rë cahndé xi siné tuhaxi xi sua cjuahñu xi vaqui rë ya xi secun cahndé ndajyihi xi tséhë Nina."

Cjua xi cjuahatsja yungun ngajan nandya Esmirna

⁸ 'Hindë nihindi cjua vi xi cjuahatsja ángel rë yungun ngajan nandya Esmirna. Cuitjin nihindi: "Cjua vihi ne, cjua rë cha xi matitjun hacuaha matjengui. Cjua rë cha xi cahme jan hane hacuaha cavuya nga cjuahñu. Hacui cjua vihi: ⁹ Ha hvë cjuacjintacun xi tivatjun cojo cjuayuma nuju. Peru ngajni rë véhë ne, jnchina ngayun! Hacuaha hvë cjua chjataha rë xuta vé xi chja me xi xuta tjé rë Israel, o sa xuta rë Nina, má me, Peru quixiin ta, xuta ladu rë Satanás má me. ¹⁰ Xi carcuun tséhë xcusun xi cùatjun cuatjin. Naain ne, tsitsehén cha xuta cojo sa xi scandiya me yahnga ngayun ndavaya sehe chjahachuva nuju. Hacuaha tsujihiyta tjengui nuju xuta jan cojo cjuañihi xcun té nixtin ni. Peru tangunnduju cojo cjuatacun nuju handasa xi cueyun, hane ngahan ne, suá nuju corona rë cjuahñu. ¹¹ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun. Cuitjin chja: Yo me xi scaa rë cjue xcun ne, tsajin mé chocho cuatju me tséhë cjuaveya xi majo."

Cjua xi cjuahatsja yungun ngajan nandya Pérgamo

¹² 'Quihndë nihindi cjua vi xi cuahatsja ángel rë yungun ngajan nandya Pérgamo. Cuitjin nihindi: "Cjua vihi ne, cjua rë cha xi tjin rë quicha yuju, xi vaté taha xcun cojo

taha ngaxtun. Cuitjin chja cha: ¹³ Ha hvë cahndé janí hisca nechuntuhun, ta cahndé vëhë ne, cahndé hñu xi vitexá Satanás. Peru cojo yëjë sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuauixi naha ngajan cahndé hñu xi vitexá Satanás ne, hisca hya ne, hacuiin cavitijayun ndiya rë xuta xi macjain rë me ngahan. ¹⁴ Peru hacuiin yëjë tsujun ndaja ta, tjin ná ngu jo xcusun condra nuju ta niyyuntacún tséhë ngu jo me ngajni nuju xi tjengui me cjuachacun rë cha Balaam. Cha vëhë catsingacun cha Balac chuva rë hacutjin tsitsehén cha xuta nangui Israel nixtin hatsëe. Hane casahmi me jyé xi cajinë me yojo tséhë cjuatjo rë nina ndyojo, hacuaha xi casahmi me cjuatsehén xi satë rë cjuachacun jan. ¹⁵ Hane hacuanitjin ngayun, ta ngajni nuju siu me xi hacuaha tjengui rë cjuachacun jan, cjuachacun rë cha Nicolás. ¹⁶ ¡Nindeyun cjuatacun nuju! ta, sa tsajin ne, ha nduvá tjëngë nuju, hane sahme si cojo rë me xi cuacun vë cojo quicha rë cjua xi vetju ntsuva. ¹⁷ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun. Cuitjin chja: Yo xi scaa rë cjue xcun ne, suá rë comida cjuarcun xi hmí rë maná xi jiyahma, hacuaha suá rë ngu ndyojo lihndi tyava hiscan camahindu ngu ñihi xatsë, ngu ñihi xi tsajin yo vëe rë, ta suva me xi cjuahatsja rë ne, suva ni me vëe me.”

Cjua xi cjuahatsja yungun ngajan nandya Tiatira

¹⁸ ’Hacuaha nihndi cjua vihi xi cjuahatsja ángel rë yungun ngajan nandya Tiatira. Cuitjin fi cjua: “Vihi cjua rë Quihndi rë Nina Jain, me vëhë ne, tuxcun me, sacuaha ndihi tsejen, hane ntsacu me sacuaha quicha sine xi catsicjé ndihi xutsë rë: ¹⁹ Ha machaya ná tséhë xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvë xa xi tininhñu cojo sa xi ndaja cjuecani nuju. Cjuandaja xi nihñu quihndé ne, quisun sa xi cuma rë xi canihñu ntsacu cavetsihin. ²⁰ Peru cojo yëjë sa ne, tjin ná vihi condra nuju ta, niyyuntacún tséhë na chjuun Jezabel vë, na xi chja suva na xi profeta má na. Na vëhë ne, cojo cjuachacun rë na ne, tsinguetsun na hacuaha tsitsehén na xuta ladu naha cojo sa xi sahmi me cjuatsehén ngajni xicjin ni me, hacuaha sinë me yojo rë chu xi cahme sacuaha ngu cjuatjo rë nina ndyojo. ²¹ Na vëhë ne, casuá ran cahndé xi tsindeya na cjuatacun ran, peru mijí choho cuma ran tséhë xcusun tsehén rë xi sahmi na cojo xicjin na. ²² Vëhë xi tsijaña rë na xcun ngu cahndé tséhë cjuahmu, hane me xi sahmi cjuatsehén cojo na ne, suá rë me ngu cjuañihi jyé, sa tsajin choho cuma rë me hane cuindeyaaín cjuatacun rë me tséhë xcusun chocun rë na xi catsitsehén rë me xi casahmi me cjuatsehén jan. ²³ Hane me xi má sacuaha quihndi tjé rë na ne, cjué tsiquéhen me, cojo sa xi cuatjin ne, cumachaya rë yëjë sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu satë nuju tséhë xcusun xi canihñu. ²⁴ Peru yahnga ngayun xuta Tiatira xi hacuiin cojo ngayun cachjuhunntsun cjuachacun jan ne, ngayun hyuun mé xi vijne cjua xi cahntsua nungun tséhë Satanás. Ngayun ne, ndastu mé sa cuichjá xi nihñu ta, ²⁵ xi sahmi nguyjë ne, xi cuangunndujun tuhunhñu mé xi tjin nuju tséhë Nina hisca hya xi nduvá ngahan. ²⁶ Yo xi scaa rë xi cjue xcun, hacuaha sahmi chihin me cjuandaja naha hisca xi cuijnetaha ne, suá rë me ngahñu xi sahmi me gubiernu rë nanguicjín. ²⁷ Hane me vëhë ne, cuitixa rë me xuta nanguicjín jan cojo ngahñu xi tjin rë me, sacuaha cojo ngu cuarta xi camá tséhë quicha, hane sacuaha cuma xuva rë ngu tiji xi nihndé camá ne, cuatjin cumá cojo xuta cjín jan. Sacuaha ngahan ne, cafahántsa xa jan tséhë nahmi naha, cuanitjin suáxa rë me xi sahmi me gubiernu. ²⁸ Hane suá rë me hasen rë niñú seti xi vetjucaa nguitajñu. ²⁹ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

Cjua xi cjuahatsja yungun ngajan Sardis

¹ ’Cjua vihi nihndi cojo sa xi cjuahatsja ángel tséhë yungun ngajan nandya Sardis. Cuitjin fi cjua: “Cjua vihi xi cachja me xi tsuvangui rë yatu hasen rë Nina cojo yatu niñú:

Hvë xa nuju. Tjin cjua nuju xi quicun yun, peru quixiin ta hvë ta cahme yun. ² ¡Catasca nuju! Mé tsujun xi siu quicun handasa ndiya cueya ne, tuhun rë ngahñu ta, xi má rë Nina na ha ne, xa xi nihñu ne, hacuiin tsejen sacuaha xi ha camá chihin xa jan. ³ Tetuhunrcun nguyéjë ni cjua xi ha cachjuhunntsun tséhë Nina, tangunndujun cojo, hane nindeyun xcusun nuju. Cuatjin nihñu ta, sa xi cuascaain rë cjuatacun nuju ne, sehe cjué tjéngë nuju sacuaha cjue tjengui rë xuta ngu cha chéjë, ta hyuun hora xi cuinduva tjéngë nuju. ⁴ Peru cojo yéjë sa ne, tjin ngajñi nuju ngu jo xuta ngajan Sardis xi cjéé tsinguetsun me tsjian rë me cojo cjuatsehen. Me xi cuacun vë ne, cojo ná tsuyiyhiya me; hane cojo ngahan ne, cuaja me tsjian tyava tyjahi, tséhë xi cuatjin ndatjin vechu chuva rë xi casahmi me. ⁵ Me xi scaa rë cjue xcun ne, cojo me nicaja rë me tsjian tyava, sacuaha me xi cuacun vë. Hacuaha tsajin nixtin xi scujñu ñihi rë me tséhë libru xi yaha ñihi rë xuta xi sacu rë cjuahñu ta, hisca cueyanangë ñihi rë me xcun Nahmi na ha cojo xcun ángel rë me. ⁶ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

Cjua xi cjuahatsja xuta rë yungun ngajan nandya Filadelfia

⁷ 'Cjua vihi nihndi cojo sa xi cjuahatsja ángel tséhë yungun ngajan nandya Filadelfia. Cuitjin fi cjua: “Cjua vihi ne, cjua rë me xi ndastu mé cjuatsehen tjin rë, hacuaha quixi me. Me vëhë ne, tacuntsja me llavi xi casatë rë nima David, me xi cavitexa. Hane cahndé xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.” ⁸ Cuatjin fi cjua: “Hvë xa nuju. Casuá nuju cahndé xi tixaha tingotjo xi cumá nuju, hane tsajin yo cuma cuechja xi cumá nuju. Hacuaha hvë ta, chuva má ngahñu nuju, peru handasa cuatjin ne, cavetjun cjua na ha hacuaha cjéé cjuahmu ñihi na ha. ⁹ Tuhun cjuasua ta, chutsujun mé cumá rë xuta jan xi vihndé me tséhë Satanás. Xuta jan ne, chja me xi tjé rë Israel má me, peru hacuiin xuta na ha me ta, xuta ndacha me. Sahme xi xuta jan ne, cuinduva me cuiticjaxcun me ntsacun, hane scuëë me ta ngahan ne, meje ná ngayun. ¹⁰ Cavetjun cjuajeya xahasen nuju sacuaha xi ngahan catsingácun nuju. Ngatsé rë vëhë ne, ngahan ne, hacuaha cuetjo nuju cojo sa xi satiin nuju cjuacjintacun tséhë hora xi chjahachuva rë xuta. Hora vëhë ne, ha tacun xati xi nduva xcun jinguyjé ni ngasunhndé, hane hya chjahachuva rë jinguyéjë ni me. ¹¹ Ngutjen ni cjuéhë. Tangunndujun cojo cjua xi ha camachaya nuju tséhë, cojo sa xi tsajin yo cjue cojo corona xi satë nuju. ¹² Yo xi scaa rë cjue xcun tséhë cjuatsehen, ngahan ne, sahme xi cumá me sacuaha xihndé xi secun vasencja rë yungun xi vaniji hai rë yungun rë Nina. Hane quihndé cuetjuxiin me. Setaha rë me ñihi rë Nina na ha cojo ñihi rë nandya rë Nina, Jerusalén xatsé. Nandya jan ne, sahmi Nina xi nduvajne tséhë ngahnga. Hacuaha hisca setaha rë me ñihi xatsé na ha. ¹³ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

Cjua xi cjuahatsja yungun ngajan Laodicea

¹⁴ 'Cjua vihi nihndi cojo sa xi cjuahatsja ángel tséhë yungun ngajan nandya Laodicea: “Cjua vihi ne, cjua rë me xi cjuaquixindaja, cjua xi chja me ne, quixi hacuaha cuatjin Jain. Ngatsé rë me vë jan ne, cavetjucaa yéjë xi casahmi Nina. Cuitjin fi cjua jan: ¹⁵ Ndaja machaya ná hacutjin nihñu xa nuju. Hacuiin jemu ndaja Peru hacuaha hacuiin jemu chojyihí, tu vasentjin siu. Xi má ná ne, hitsé sa ndaja sa xi hatuxa ndaja o sa xi hatuxa chojyihí. ¹⁶ Ngayun ne, ha maji sa tu ngu tsé vë ngayun, Peru ngayun ne, jemu va xcusun nuju, vëhë xi cuaxéxin nuju sacuaha xi cuéhë natya cojo ntsuva. ¹⁷ Vihi cjua xi nújun: Ngayin ne, nchina ngayin. Jercu cavetjin tujún hane tsajin mé machaja niji. Cuatjin nújun. Peru machayiin nuju tséhë cjuaquixi ta, xi quixi ne, jemu chojyihí tsujun, cojo cjuatsehen nuju, yuma yun, rcá yun, hane hacuaha quixti ngayun. ¹⁸ Vinchajyé nuju xi chuhun tsahan. Tjin ná oro ndaja xi catsicjé ndihi xutsé rë, hane cojo vëhë cuma nchina Jain yun. Tjin ná tsjian tyava xi cuma chujun cojo sa xi hacuiin tu yo ni scuëë cjuasava nuju xi quixti ngayun. Hacuaha tjin ná rqui xi cuincha tuxcun, hane cumatsejen

jain nuju. ¹⁹ Tichjátaha nuju ta, hya xi tjin yo me xi ngahan meje ná me ne, chjátaha rë me hacuaha vicuya rë me. Tséhë vëhë ne, catamachinitacun hane choho catama nuju, nindeyun xcusun nuju. ²⁰ Nguehe tejña xi tichjá cojo nuju. Tu yo ni xi cuihndë xta na ha ne, sehe sua cahndé ne, ngahan ne, cuisehen ngajan, hacuaha siné niñu cojo me, hane me vëhë ne, siné me cojo ná ngahan. ²¹ Yo ngayun xi scaa nuju cuangun xcun tséhë cjuatsehen, suá nuju cahndé xi cuinechun cojo ná cahndé hñu na ha. Cuatjin cumá cojo nuju tangun ni sacuaha xi ngahan ta, hacuaha cacaá ná cëjë xcun, hane tejña cojo Nahmi na ha cahndé hñu rë me. ²² Yo ngayun xi tjin nuju cjuasua xi cuinuhuyun cjua xi chja Hasen rë Nina cojo yungun jan ne, ndaja tetuhunrcun.”

4

Cavëe Juan cahndé rcun ngajan ngahnga

¹ Hya xi cavatju vihi ne, cahvë xi ngajan ngahnga ne, tsejen ngu tingotjo xi tixaha. Hane xta rë me xi cahndé xi cachja cojo ná titjun jan xi nuhya rë sacuaha nuhya rë ngu tyo, xta vëhë cachja cojo ná cuitjin:

—Ndoveniji nguehe sehe tsingácun ri xcusun xi sehe cumá.

² Hora vëhë ne, catsuva ná ngahñu rë Hasen rë Nina, ngajan cahvë xi ngajan ngahnga ne, tacun ngu cahndé rcun cojo ngu me xi tacun xcun. ³ Hane me xi tacun xcun jan ne, xcusun rë me ne, seti tsejen sacuaha ndyojo seti xi hmí rë jaspe o cornalina. Hane ngu yejña sacuaha ndyojo seti xi hmí rë esmeralda, vëhë vindee rë cahndé rcun jan.

⁴ Tahndee rë cahndé rcun jan ne, siu sa can ñuju cahndé rcun, hane xcun jan ne, siu can ñuju xuta changá. Me vëhë ne, yaja me tsjian tyava hacuaha hinchasun rcu me corona tséhë oro. ⁵ Tséhë cahndé rcun jan ne, vatë ndihichuhún hacuaha tsingá chuhun. Hacuaha xcun cahndé rcun jan ne, ti ndihi rë yatu lámpara xi hacui yatu Hasen rë Nina.

⁶ Hacuaha nangui xcun cahndé rcun jan ne, tsejen sacuaha ngu ndachacun tséhë vidriu xi hasen sacuaha hasen ndyojo tsin. Hane tséhë tahndee rë cahndé rcun jan ne, chuva ngu yuju rë, siu ñuju xcusun xi quicun. Hane xcusun jan ne, yaja tuxcun jingujyë yojo rë, sa taha xcun, sa taha ngaxtun. ⁷ Ngu xi quicun jan ne, xcusun rë ne, sacuaha chu xa tsejen. Xi majo ne, sacuaha ndyaja, hane xi má jyan ne, sacuaha xcun xuta jyahi xcun. Xi má ñuju ne, sacuaha ngu chu jya xi tivitjen chu, cuatjin tsejen. ⁸ Jima ngu xi quicun jan ne, tjin jyun tyunga rë. Hane jingujyë ni tséhë yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejyiin ta, chja cuitjin:

Tyjahi, tyjahi, tyjahi

camahani Nina xi jemu hñu cjua.

Nina tacun me, cavejña me hatsëë, hacuaha cuejña cuaha me.

Cuitjin chja.

⁹ Hane sahmi jyë hnga ñihi rë Nina hacuaha sua nacuechji rëhë hacuaha vaxëndaja rë Nina xi tacun xcun cahndé rcun jan, Nina xi tacun cuaha me yëjë nu, yëjë nixtin. Hane jimangu ndiya xi vaxëndaja rë Nina ne, hora hya ne, ¹⁰ can ñuju xuta changá xi siu jan, viticjaxcun me xcun me xi tacun cahndé rcun jan, hane faharcun me me xi tacun nu cjiu nu nduva. Hacuaha xuta changá jan ne, candisun me corona rë me xcun cahndé rcun jan, sehe chja me cuitjin:

¹¹ Ngayun Nai niji, ngayun Nina niji,

vechu chuva rë xi cuma jyë cuma hnga yun hacuaha sacu nuju ngahñu cjua.

Ngayun canihñu yëjë ni xcusun,

hane ngatsë rë cjuandaja nuju siu yëjë ni hacuaha camá yëjë ni.

5

Xtë xujun cojo yatu sellu

¹ Sehe cahvë xi tsja ladu quixi me xi tacun xcun cahndé rcun jan, yaha me ngu xtë xujun xi camahindu xcun cojo ngaxtun, hacuaha xujun jan ne, tine rë yatu sellu. ² Hane hya ne, cahvë ngu ángel xi jemu hñu cjua, hane titsiquindé cojo yéjé ni ngahñu rë cjua vihi:

—¿Yo ngayun xi vechu chuva rë xi cuicheyun sellu rë sehe nixingun xtë xujun vihi?

³ Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtë rë xujun jan, o sa xi scutsejen mé xi chja.

⁴ Hane ngahan ne, cajíhnda nguñajacácul, tséhë xi casacuín yo xi cuechu chuva rë xi tsixinga xtë rë xujun jan, sehe scutsejen mé xi chja. ⁵ Ngajan xi ngu xuta changá jan ne, cachja me cojo ná cuitjin:

—¡Xi cachjihndiin sa! Chutsijin ta, me xi hmí rë Chu Xa tséhë tjë rë cha Judá ne, me xi cavetjusehen tséhë David xi cavitexa hatsëe ne, me vëhë cacaá rë me quiij me xcun. Hane me vëhë cuma tsixinga me xtë rë xujun cojo yatu sellu rë.

Cristu, ta xuta matitjun má me, cafaha me xtë xujun

⁶ Xi cavutsejen, ngajan secun vasencia rë cahndé rcun jan cojo tahndee rë, ngajñi rë ñuju xi quicun jan cojo xuta changá jan, ngajan secunhñu ngu xihin sacuaha Chu Tsángá, xi tsejen sacuaha ngu chu xi cahme. Me xi sacuaha tsángá jan ne, tjin yatu ndyaja rë cojo yatu tuxcun xi hacui yatu hasen rë Nina xi visehen jingujuyé ni ngasunhndé. ⁷ Hane me xi sacuaha tsángá jan ne, canduva me cafaha me xtë rë xujun tséhë tsja quixi me xi tacun xcun cahndé rcun jan.

Xuta changá ne, faharcun me Jesucristu

⁸ Hane hora xi cafahatsja me xtë rë xujun jan ne, catsiñuju xcusun xi quicun jan cojo can ñuju xuta changá jan ne, caticjaxcun me xcun Tsángá jan. Jimangu me ne, yaha me ngu arpa hacuaha jimangu me hinchangui tsja me tyucu ndixuhi tséhë oro xi quitsë rë cojo tyjungunsa. Hane tyjungunsa jan ne, hacui oración rë me xi nguñajacacun macjain rë me. ⁹ Hane me vëhë ne, tisë me ngu sun xatsë xi cuitjin fi cjua rë:

Vechu chuva rë xi chjuhun xtë rë xujun vë, hane nuxuhun sellu rë;
tséhë xi catsiquehen me yun,

hane cojo jni nuju xi cavanga ne, cachuhun xi cumá rë Nina
xuta tséhë yéjé ni tjë, yéjé ni hne, yéjé ni nandya, cojo yéjé nación.

¹⁰ Hacuaha ngayun ne, canihñu xi xuta jan ne, cumá me xuta xi vitexa me,
hacuaha cumá me sacuaha nahmi xi cjuahancuenda rë Nina xi faharcun me,
hane cuitexa me nguehe xcun nangui.

Cjín ángel ne, faharcun rë Jesucristu

¹¹ Sehe cavutsejen jemu cjín camahani ángel xi cavindee rë cahndé hñu hiscan siu xcusun xi quicun jan cojo xuta changá jan. Hane tjin xqui sacuaha tséhë té mil ndiya xi té mil. Hacuaha cahndé xta rë ángel cjín jan ¹² cachja hñu cuitjin:

Me xi má Tsángá xi catsiquehen xuta me ne,
vechu chuva rë xi cjuahatsja me ngahñu xi cuitexa me,
cojo cjuanchina, cojo cjuahasen,
hacuaha hñu cumá cjua rë me, tjin rë me cjuandaja rë xuta, cuma jyé hnga me hane yéjé
ni me ne, tsinchacuntihin rë me.

Yéjé ngarca ni ne, faharcun rë Jesucristu

¹³ Sehe cahndé xi nguyéjé ni xi siu ngahnga cojo nguyéjé ni xi siu ngasunhndé cojo nguyéjé ni xi siu nguihma nangui cojo ngajñi ndachacun, yéjé ngarca xi cuacun vë ne, tichja cuitjin:

Cuitjin cumá tséhë me xi tacun cahndé rcun hacuaha cumá tséhë Tsángá jan:

¡Catama tséhë me xi tsinchacuntihin rë me, xi chjaharcun rë me, xi cuma jyé hnga me,
xi tjin rë me ngahñu!

¡Cuatjin catama me tséhë me nu cjuí nu nduva!

¹⁴ Hane catsiñuju xcusun xi quicun jan ne, cachja cuitjin:
—¡Cuatjin jain!
Hane xuta changá jan ne, caticjaxcun me sehe cafaharcun rë me.

6

Sellu tjun

¹ Cavutsejen ngahan hya xi Tsángá jan ne, cavuxaha me ngu sellu tséhë yatu sellu jan. Hane tséhë catsiñuju xcusun xi quicun jan ne, cahndë ngu xta xi nuhya rë sacuaha xi faneya. Cuitjin cachja:

—¡Ndove!

² Hane cavutsejen xi cavetjutsejen ngu nixin tyava. Hane me xi quisun rë chu jan ne, yaha me ngu yanchijnu, sehe casacu rë me ngu corona hane cavetju me sacuaha ngu cha xi cjue sahmi si xi tjin ngucacun cha xi scaa rë cha xi cjue cha xcun.

Sellu xi majo

³ Hane hya xi cavuxaha Tsángá jan sellu xi majo ne, cahndë ta, xcusun xi majo xi quicun jan ne, cajindaya cuitjin:

—¡Ndove!

⁴ Ngajan cavetjutsejen ngu nga nixin xi hani hñu xcusun ru. Hane me xi quisun rë chu vë ne, ngu me xi casatë xa rë xi cjuahaxin me cjuajeya xi tjin nangui, cojo sa xi xuta ne, tsiquehen xicjin me ngajñi rë me. Hane suva me vëhë ne, cafahatsja me ngu quicha jyë.

Sellu xi majyan

⁵ Hya xi cavuxaha me sellu xi majyan ne, cahndë xcusun xi quicun xi majyan jan, hane cuitjin cachja:

—¡Ndove!

Hane cavutsejen xi cavetjutsejen ngu nixin jma. Hane me xi quisun rë chu vë ne, yahatsja me ngu nisu chuva. ⁶ Sehe cahndë sacuaha ngu xta xi vetju tséhë ngajñi rë catsiñuju xcusun xi quicun jan xi cachja cuitjin:

—Ngu ni kilu trigu sacu chjí rë mosu, o sa jyan kilu ni cebada sacu rë me; peru aceite cojo xan rë uva ne, cumachajiin.

Sellu xi má ñuju

⁷ Hane xi cavuxaha me sellu xi má nuju ne, cahndë xcusun xi quicun xi má nuju jan, hane cuitjin cachja:

—¡Ndove!

⁸ Hane cavutsejen xi cavetjutsejen ngu nixin xi jemu va jyihi. Hane me xi quisun rë chu jan ne, Cjuaveya hmí rë me, hane tjengui tiña rë me, me xi hmí rë Hades, cahndë hiscan xi má hasen rë nima castigu. Hane me vëhë jan ne, tjin rë me cahndë xi tséhë ngu tséhë ñuju rquí xuta ngasunhndë xi cuma tsiquehen me ngu rquí vë cojo espada o cojo jindya o cojo chíhin o sa xi cojo chu cjan rë xi tjin xcun nangui.

Sellu xi má hñu

⁹ Hya xi catuxaha sellu xi má hñu ne, ngajan ngahma rë ngasunscun ne, cahvë hasen rë nima xi catsiquehen xuta ngatsë rë xi camacjain rë me cjua rë Nina cojo ngatsë rë cjuaquixi rë me xi casua me. ¹⁰ Me vëhë ne, cajindaya me cachja me cuitjin:

—Ngayun Nai rë yéjë ni, jemu tyjahi yun, quixi cjua nuju. ¿Janihya nihñu cuendun jyé rë xuta xi siu me xcun nangui, hane nihñu ngojo jni niji? —Cuatjin cachja me.

¹¹ Ngajan xi cafahatsja me jimangu me ngu tsjian tyava, hane cafaha me cjua xi cueñajyuu me ngu jo nixtin sa. Vindeya sa rë hisca hya xi cumachihin xqui rë xuta ladu rë me cojo me xi hacuaha tangun cueya sahmi xuta sacuaha cavatju me suva me.

Sellu xi má jyun

¹² Hacuaha cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tsuhi ne, camá jma. Jemu va jyihi camá, sacuaha ngu tsjian jma. Hane sá xatsé ne, camá hani sacuaha jni. ¹³ Hane niñú tséhë ngahnga ne, cavixu xcun nangui sacuaha vixu tu rë ya higo hya xi vanga tjo hñu. ¹⁴ Ngahnga ne, cafëya sacuaha ngu xujun tē xi catsijeyu, hane hisca tjin ngu naxi o ngu nangui xi hincha vasencia rë ndachacun ne, catjune rë cahndé rë. ¹⁵ Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán, cojo xuta xi hñu cjua, cojo yéjë sa xuta, sa xuta xi caxteña o sa xuta xi ndaya tjin, nguyéjë ni me quiji cavangahma me cahntsua nguijo cojo ngajñi naxindya rë nguijña cha. ¹⁶ Sehe cafehyataha rë me nguijña cojo naxindya jan cuitjin:

—¡Catixusun niji cojo sa xi tinchunhmu niji! Cuatjin cuma cuinechinhmi tséhë xcun me xi tacun cahndé rcun hane satiin niji cjuaxti rë Tsángá jan.

¹⁷ Cuatjin cumá ta cavechu nixtin xi jercu choho cumá ngatsé rë cjuaxti rë me, hane ¿há tjin yo scaa rë cojo?

7

Xuta xi macjain rë Nina

¹ Xi cavutsejen vihi ne, cahvë ñuju ángel xi hinchacun quixi catsiñuju yuju rë ngasunhndë. Hane ángel jan ne, casuaain cahndé xi cuanga catsiñuju tjo xi vanga ngasunhndë ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya. ² Sehe cahvë ngu ángel xi hacjahi. Hane camiji ángel jan hiscan xi vetjucaa tsuhi, hacuaha yaha ángel sellu rë Nina quicun. Hane cajindayahñu ángel jan cojo catsiñuju vë ta tacuntsja ángel vë xi choho sahmi cojo nangui cojo ndachacun. ³ Cuitjin cachja me cojo:

—Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsé Nina naja.

⁴ Ngajan xi cahndé xi cachja me xqui rë me xi casetaha rë chuva cojo sellu jan: ngu cientu cojo yachan ñuju mil má me tséhë yéjë xuta tjé rë Israel. ⁵ Tséhë xuta tjé rë Judá ne, tejó mil má me xi yaha sellu; hacuaha tejó mil má me tséhë xuta tjé rë Rubén, tejó mil tséhë xuta tjé rë Gad. ⁶ Tejó mil má me tséhë xuta tjé rë Aser, tejó mil tséhë xuta tjé rë Neftalí, hacuaha tejó mil tséhë xuta tjé rë Manasés. ⁷ Tséhë xuta tjé rë Simeón ne, tejó mil má me xi yaha sellu; hacuaha tejó mil má me tséhë xuta tjé rë Leví, tejó mil tséhë xuta tjé rë Isacar. ⁸ Tséhë xuta tjé rë Zebulón ne, tejó mil má me xi yaha sellu; hacuaha tejó mil má me tséhë xuta tjé rë José, tejó mil tséhë xuta tjé rë Benjamín.

Xutaxín xi hacuaha camacjain rë me

⁹ Xi cavatju xcusun vihi ne, cavutsejen, hane cahvë xutacjín. Hisca tsajin yo cuma cuexqui rë me. Canduva me tséhë ngajñi rë jimangu nación, jimangu tjé rë xuta, jimangu nandya cojo jimangu hne. Hane cafehe me hinchacun me xcun cahndé rcun cojo xcun Tsángá jan. Yaja me tsjian tyava hacuaha yahatsja me jne. ¹⁰ Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsé rë Nina naja
xi tacun me cahndé rcun
cojo ngatsé rë Tsángá jan.

Cuatjin cachja me. ¹¹ Ngajan xi yéjë ni ángel ne, hinchacun quixi tahndee rë cahndé rcun jan hacuaha cavindee rë xuta changá jan cojo catsiñuju xcusun xi quicun jan. Hane caticjarcun ángel xcun cahndé rcun hane cafaharcun rë Nina, ¹² tichja cuitjin:
¡Cuitjin Jain!

Nina ne, yéjë ni tsinchacuntihin me. Jyë hnga me.

Tjin rë me cjuahasen. Taan nacuechji rë me.

Xuta ne, vaxéndaja me. Vechu chuva rë xi cjuahatsja me ngahñu xi cuitexa me. Hacuaha hñu cjuá rë me.

Cuanitjin cjue me yëjë nu yëjë nixtin.
¡Cuatjin Jain!

¹³ Hya xi camá ne, ngu xuta changá jan, cakinenguise me ngahan cuitjin:
—Me xi cuicun xi yaja tsjian tyava ne, ¿yo má me? hane ¿hisca jani canduva me?

¹⁴ Ngajan xi cafayanguë cuitjin:
—Tatá, xcusun vëhë ne, ngayun hyun, hacuiin ngahan.
Sehe cachja me cojo ná cuitjin:

—Me vihi cacaa rë me cjuañihi cjuacjintacun jyë. Cavane me tsjian rë me, camá tyava cojo jni rë Tsángá. ¹⁵ Vëhë xi tjin rë me cahndé xcun cahndé rcun rë Nina, hane fahacuenda me nixtin nixten cahntsua yungun rë me. Hane Nina xi tacun xcun cahndé rcun ne, ngu tangun ni cuejnándaja me cojo xuta jan. ¹⁶ Hindë tsajin nu tsajin nixtin cuma vojo rë me. Cuma xindaain rë me, cuacaain rë me tsuhi; hacuaha tsijendaain rë me cojo hnde rë, ¹⁷ ta cahndé rë vëhë ne, Tsángá xi tacun cavasencia rë cahndé rcun ne, cuahacuenda rë me, hane cuincha ndiya rë me xcun nandá xi sua cjuahñu. Hane Nina ne, tsixiya me yëjë ndatuxcun xuta jan.

8

Sellu xi má yatu

¹ Hane xi cavuxaha me xi sacuaha Tsángá jan sellu xi má yatu ne, ngahnga ne, cavejña jyuu camahani sacuaha chuva rë vasen hora. ² Cuatjin camá. Sehe cahvë xi yatu ángel vë xi siucahndé xcun Nina ne, cafahatsja yatu tyjo. ³ Sehe canduva sa ngu ángel xi yaha ngu tyucu ndixuhi tséhë oro, hane casecunquixi cojo tiña ngasunscun. Ngajan cafahatsja me cjín tyjungunsa cojo sa xi cuaca me xcun ngasunscun tséhë oro jan xi tacun xcun Nina. Hane hnde rë ne, camatangun cojo oración rë yëjë me xi tyahi cjuatacun rë me cojo sa xi cuma chihin cjuá. ⁴ Hane nihndi rë tyjungunsa xi yahatsja ángel jan ne, casecjan cojo oración rë me xi tyahi cjuatacun rë me, hane camiji tangun hiscan tacun Nina. ⁵ Ngajan xi ángel jan ne, cafaha tyucu ndixuhi jan, catsinguitsé rë cojo ndihi tséhë ngasunscun jan hane catsingatjen rë xcun ngasunhndé. Hane hora vëhë crafaneya cjuachan cavatë hacuaha cafani nangui.

Yatu tyjo xi tsijane ángel

⁶ Hya xi camá ne, yatu ángel xi yaha yatu tyjo jan ne, caviyujucacun xi tsijane tyjo rë. ⁷ Ángel xi tjun jan ne, catsijane tyjo rë. Hane jercu cavaha tsi ndyojo xcun nangui. Hacuaha cavixu ndihi xi tecjan cojo jni. Cojo vëhë ne, tséhë yëjë ni ya xi tjin ne, tséhë chuva jyan ne, ngu cati. Hisca cojo jingujyë nguijña xi xcuen ne, cafë cati.

⁸ Sehe catsijane ángel xi majo jan tyjo rë. Hane hora vëhë ne, camatsejen sacuaha ngu nguijñacha jyë xi yaha rë ndihi xi cjanenguiya ngajñi ndachacun. Hane tséhë yëjë ndachacun ne, tséhë chuva jyan cahndé, ngu ni cavuya jni. ⁹ Ngajan xi tséhë yëjë chu xi hincha nandá jan, tséhë chuva jyan chu ne, ngu chu cahme chu; hacuaha tséhë chuva jyan barcu xi hinchasun ne, ngu cafë cati.

¹⁰ Sehe catsijane ángel xi majyan jan tyjo rë. Hane hora vëhë ne, canenguiya tséhë ngahnga ngu niñú jyë xi jercu ndaja seti sacuaha seti ngu ndihi jyë. Hane niñú jan ne, casatë rë ndajyë cojo hiscan vetju nandá. Hane tséhë yëjë nandan jan ne, ngu tséhë chuva jyan cahndé casatë rë. ¹¹ Niñú jan ne, yaha ñihi rë xca sa xi hmí rë Ajenjo, ta cavuya sa nandá hiscan cjanenguiya niñú. Hane jemu cjín xuta cahme me xi cahvi me nandá sa jan.

¹² Sehe catsijane ángel xi ma ñuju tyjo rë, hane choho casahmi cojo tsuhi cojo sá ta jemu camachuva hasen rë. Hacuaha chuva rë jyan niñú ne, ngu ni cafë ngahñu rë cahvo. Ngajan xi tséhë ngu cuaha nixtin o tséhë ngu cuaha nixten ne, ngu tséhë chuva jyan cahndé ne, camajñu hane casacuiin hasen rë.

¹³ Hya xi camá ne, ngajan vasencia rë ngahnga tititjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehen nuju, ngayun xuta xi nechun ngasunhndë ta, tséhë xi vangui sa jyan sa ángel xi chaja sa tsijane tyo rë.

9

¹ Hya xi camá ne, catsijane ángel xi má hñu jan tyo xi yaha, hane cahvë ngu niñú xi cjanengui tséhë ngahnga xcun nangui. Hane cafahatsja niñú jan llavi tséhë ngojo rë nduchin. ² Sehe cavuxaha nduchin ne, hane jemu camiji nihndi rë sacuaha nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsë rë nihndi xi vetju tséhë nduchin jan. ³ Hane tséhë ngajñii rë nihndi jan ne, cavixu chu nchahva xcun nangui. Hane chu jan ne, tsavi cojo chu sacuaha tsavi cojo chu naya xi siu ngasunhndë. ⁴ Hane cafaha chu cjua xi tsajin mé sahmi chu cojo nguijña o cojo xca o sa cojo ya ta, suva xi satë chu xuta xi siutaain xten me sellu rë Nina. ⁵ Casacuiin rë chu cahndé xi tsiquehen chu xuta jan ta, cuenda jemu cuiyujuhmu me cahntsua hñu sa. Hane cjuahmu xi cuiyuju me cojo ne, jineya sacuaha jineya hiscan cjuaha chu naya.

⁶ Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuehyacacun me cjuaveya, peru sacuiin.

⁷ Chu nchahva jan ne, tjin chjine chu sacuaha naxin xi tjin chjine chu xi cjue chu si. Hinchasun rcu chu ngu xcusun sacuaha ngu corona tséhë oro, hane xcun chu ne, tsejen sacuaha xcusun rë xcun xuta. ⁸ Tsa rë chu ne, sacuaha tsarcu yachjin, hane nehñu chu ne, sacuaha nehñu xa cjan rë. ⁹ Tixtë cun ru cojo ngu xcusun sacuaha chinga quicha, hane xi nuhya rë xi fane tyjunga ru ne, hñu nuhya rë sacuaha cjín camahani carreta xi tijuvë naxin xi cuetsihin si. ¹⁰ Ndetsihin chu yaha quicha rë chu naya. Hane cojo quicha jan ne, tjin ru cahndé xi sua chu cjuañihi xuta xcun xi hñu sa jan. ¹¹ Hane sacuaha rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cjua vë ne, vijne Ngu xi Tsiqueya rë.

¹² Véhë má cjuañihi xi tjun cuma. Jo sa má xi ha meje cuatju.

¹³ Hya xi camá ne, catsijane ángel xi má jyun tyo rë. Ngajan xi canuhya rë ngu xta xi cavetju tséhë tjehen rë ngasunscun xi tacun xcun Nina, hiscan xi jyihi sacuaha ndyaja ru. ¹⁴ Xta jan ne, cachja cojo ángel xi má jyun xi catsijane tyo jan. Cuitjin cachja:

—Nismi catsiñuju ángel xi tjiñu tjehen rë ndajyë jyë xi hmí rë Eufrates.

¹⁵ Hane camandaya catsiñuju ángel jan. Ángel jan ne, cavyujuya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuva jyan chuva jyan xuta ne, ngu ngu me cueya me. ¹⁶ Hane xqui rë sindadu xi vitexa ángel jan ne, jo cientu millón má xi hinchasun naxin. Hane ngahan suva cahndé xqui rë.

¹⁷ Naxin cojo cha xi hinchasun rë chu xi cahvë ngajñi nijñña naha ne, cuitjin cun. Cha xi hinchasun rë chu ne, yaja cha chinga quicha xcusun hani rë ndihi, xcusun rë susë hñu hacuaha xcusun sine. Hane rcu chu naxin jan ne, sacuaha rcu chu xa cjan rë cun. Hane tséhë hntsua chu ne, tivetju ndihi tivetju nihndi cojo azufre. ¹⁸ Hane ngatsë rë jyan cjuañihi jan xi vetju tséhë hntsua chu matsejen ne, ngatsë rë ndihi, cojo nihndi cojo azufre ne, ngu cahndé tséhë chuva jyan cahndé xuta cahme me. ¹⁹ Jemu tsavi cojo hntsua chu, peru hacuaha tsavi cojo ndetsihin chu. Ndetsihin chu ne, sacuaha chu yë cun ta, tjin rcu. Hane rcu vëhë ne, má sahmi chu dañu cojo.

²⁰ Peru handasa cuatjin camá, xuta xi cacaá rë me ta cahmii me cojo cjuacjintacun vëhë ne, tsajin camacjincacun me tséhë cjuatsehen xi casahmi me ta, cafaharcun cuaha me xitsehen cojo nina xi camá tséhë oro, tséhë plata, tséhë quicha sine, tséhë ndyojo, cojo tséhë ya. Cafaharcun cuaha me nina jan xi maji vutsejen, maji hndë, maji tsujihiya.

²¹ Hacuaha tsajin camacjincacun me tséhë xi catsiquehen xicjin me, o tséhë xcusun xi sahmi me ngatsë rë xi ma rë me cjua surqui, o tséhë cjuatsehen xi sahmi ngajñi rë me sa chjuun cojo chjuun o sa xihin cojo xihin, o sa tséhë cjuachëjë rë me. Catsindeyaain me xcusun rë me.

10

Ángel xi yaha xtë lihndi xujun

¹ Hya xi camá ne, ngajan cahvë ngu ángel xi hñu cjua, nduvajne tséhë ngahnga tixtécun rë yufí. Hacuaha ngu yejña cavindee rë rcu ángel jan. Xcun ne, seti sacuaha tsuhí; hane tyuhmi rë ne, tsejen sacuaha ngu ndihí hndë xi vitjen. ² Hane yahatsja ngu xtë lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí. ³ Ángel jan ne, cajindaya cojo ngu xta hñu, hane nuhya rë sacuaha xi tsichan ngu chu xa. Hacuaha hora xi cajindaya ne, cachja xta rë yatu chuhun vatë. ⁴ Hora xi cachja yatu chuhun jan ne, cavéjñacácun xi tsihindú cjua jan Peru casahmee ta, cahndë ngu xta tséhë ngahnga xi cachja cojo ná cuitjin:

—Caveni nihindi cjua rë yatu chuhun vë ta, cuiyujuhma cjua vë.

⁵ Hya xi camá ne, ángel xi cahvë xi secun xcun ndachacun cojo xcun nangui quixí jan ne, catsiquijin tsja quixi ngahnga. ⁶ Hane casua cjuaquixi rë hisca caveyanangui rë Nina xi tacun yéjë nu yéjë nixtin, me xi hacuaha catsicha rë ngahnga cojo yéjë ni xi tjin rë, cojo nangui cojo yéjë xi tjin rë, cojo ndachacun cojo yéjë xi tjin rë. Cuitjin cachja xi casua cjuaquixi rë:

—Vindeyaain sa rë ta, ⁷ ha ndiya jiya nixtin xi suacuenda ángel xi má yatu. Hya tsijkeo tyo rë ne, hane cumachihin cjua xi jiyahma rë Nina, cjua xi casua me camachaya rë profeta xi sahmi xa rë me.

⁸ Hya xi camá ne, ngajan cahndé nga xta xi cachja tséhë ngahnga cojo ná cuitjin:

—Tihin chjehe xujun lihndi xi tjin të jan tséhë tsja ángel xi secun xcun ndachacun cojo xcun nangui quixí. —Cuatjin cachja xta cojo ná.

⁹ Véhë xi céjétjéngé ángel hane cafehyá rë xi catisua ná xujun lihndi jan. Hane cachja cojo ná cuitjin:

—Juhun, chjehe xini cjua rë cojo sa xi titehercui. Cjua jan ne, sahmi sa rë cahntsue, Peru ntsove ne, sahmi haxi rë.

¹⁰ Sehe cafaha xujun lihndi jan tséhë tsja ángel, hane cajínë. Hane ntsuva ne, camá haxi rë sacuaha xi cajínë tsjen, Peru xi cafë cajínë ne, cahntsua canangui naha ne, camahmu. ¹¹ Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsé rë Nina. Cuinoje tséhë xutacjín, xuta xi hacjahi hacjahi nación rë me, xuta xi hacjahi hne chja me, hacuaha cojo xuta xi hñu cjua me ngatsé rë xi vitexa me.

11

Jo testigu xi cahme ne, cavuya nga cjuahñu rë

¹ Hya xi camá cajinë ne, casua ná ngu rquí ya naxu xi machjiréhë sacuaha ngu ya chuva. Sehe cachja ángel jan cojo ná cuitjin:

—Tihin chjehe chuva rë yungun xi matitjun rë Nina cojo tséhë ngasunscun. Hacuaha texqui me xi faharcun ngajan. ² Xi nichove yungun xi matitjun ne, hacuiin cojo cahndé xi má ndatsen rë nichove. Xi canichuviin vë. Cahndé véhë ne, satétsja xutaxín xi macjaain rë me Nina. Me xi cuacun vë ne, tsinguetsun rë vë, hacuaha tsinguetsun rë nandya rë Nina xcun xi yachan jo sá cojo xcusun tsehen xi cún me. ³ Xcun nixtin véhë ne, tsingátju jo testigu naha, hane me xi cuacun vë ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjua naha, hacuaha cuaja me tsjian rë cjuachoho.

⁴ Jo me véhë ne, hacui jo ya olivu xi tjin cjua tséhë, hacuaha hacui me xi jo candeleru xi siu xcun Nina, me xi vitexa ngasunhndë. ⁵ Sa tjin ngu xuta xi meje sahmi me dañu me ne, cuetju ndihí tséhë hntsua me hane tsicjéya rë xi chohovëë rë me. Chuva véhë cueya tu yo ni xi meje xi choho sahmi cojo rë me. ⁶ Jo me véhë ne, siutsja me ngahñu xi cuechja me ngahnga sehe cuaain tsi nixtin xi cuehya me. Hacuaha satë rë me ngahñu xi sahmi

me xi nandá ne cuya jni o xi cuanguihmu rë me nangui cojo yëjë xcusun cjuacjintacun. Cuatjin cumá tu cutjin cjín ndiya cuma meje sahmi me.

⁷ Ndatjin, peru hya xi cafë casua me cjuaquixi rë me ne, ngu me sacuaha ngu chu chojyihí xi miji tséhë nduchin ne, sahmi chu si cojo rë me, hane scaa ru cjue chu xcun hane tsiquehen chu me. ⁸ Hane nima jan ne, hacuiin xinchaniji ta cuiyuju ndiyatë rë ciudad jyë. Ciudad jyë jan ne, sa xi chjahanchuvan ne, cuma cuinújan xi hmí rë Sodoma cojo Egipto. Ngajan ni ne, cahme Nai naja xcun cru, hane ngajan cuiyuju nima. ⁹ Xcun xi jyan nixtin vasen ne, jemu cjuehe xuta. Cjuehe me tséhë yëjë ni nandya, tséhë yëjë ni tjë, tséhë yëjë ni hne cojo tséhë yëjë ni nación. Cjuehe me scutsejen me nima, hane tsingatiin me xi xinchaniji nima. ¹⁰ Hane xuta xi siu ngajan ne, jercu ndama rë me ngatsë rë cjuaveya jan. Hisca cuiyuju me suhi hane tsingatju me cuatjo ngajñi xicjin me. Cuatjin sahmi me ta tjin rë me cjuasua xi cafë jo profeta jan xi jercu casua me cjuañihi.

¹¹ Peru xi cafë jyan nixtin vasen jan ne, xta xi sua Nina xi tséhë cjuahñu ne, cavisehen nga rë nima. Hane caxinchacun quixi me. Ngajan xi ngu chircun jyë cavisehen rë xuta xi cavutsejen rë me. ¹² Hya xi camá ne, me xi cavuya xta rë ne, cahndë me ngu xta hñu xi cachja tséhë ngahnga cuitjin:

—Nduvun nuju nguehe.

Ngajan xi quijiniji me ngahnga ngajñi ngu yufí. Hane cavëë xuta xi chohovëë rë me ta quijiniji me. ¹³ Ha hora vëhë ni ne, jercu cjuachan cafani nangui hane tséhë chuva rë tē rquí tséhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

¹⁴ Cojo vëhë cajnetaha cjuacjintacun xi majo. Peru ha cjuehe xi ma jyan.

Xcusun xi camá hya xi cafane tyjo xi má yatu

¹⁵ Hya xi camá ne, catsijane ángel xi má yatu tyjo rë, sehe canuhya rë tséhë ngahnga xta hñu xi cachja cuitjin:

Jingujyë rë nandya xi vitexa xuta ngasunhndë xi matitjun ne,
cavisehen gubiernu rë Nina naja cojo Cristu, me xi catsingatju me.
Hane me vëhë sahmi me gubiernu yëjë nu yëjë nixtin.

¹⁶ Ngajan xi catsiyéjë can ñuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafaharcun me Nina. ¹⁷ Hane cuitjin cachja me:
Tihin nacuechji nuju, Tatá Nina. Ngayun jercu hñu camahani ngayun.
Hacui ni yun hya, hacui ni yun quihndë, hane hacui ni yun yëjë nixtin.
Hindë ticujun ngahñu jyë nuju xi satë nuju
hane ha tivetsuhun nihñu gubiernu.

¹⁸ Xuta ne, choho hvë me yun,
peru cavechu nixtin xi macjan nuju cojo cjuahngatacun rë me.
Cafehe hora xi nihñu cuendun tséhë nima.
Tuhun chjí rë me xi casahmi xa nuju sacuaha profeta,
sacuaha xuta nuju, sacuaha xutaxín xi faharcun me ñihi nuju.
Tuhun rë yëjë ni me, sa yehe sa langa me.

Hane me xi tsicjëya rë cojo xcusun rë ne, tuhun rë me xi cjueya me.

¹⁹ Ngajan xi cachjahaxin rë tsjian rë tingotjo rë yungun rë Nina ngajan ngahnga, hane cahntsua yungun jan ne, camatsejen caxa ximinchacun xi yaha contratu xi casahmi Nina cojo xuta rë me. Cavatë ndihichuhún, cafaneya, catsinga chuhun, cafani nangui hacuaha cavaha ngu tsi ndyojo xi jercu hñu camahani. Cuatjin camá.

Scaanya yë xitsehen cojo quihndi xi catsingatju Nina

¹ Hya xi camá ne, camatsejen cjuarcun xi sahmi sen ngajan ngahnga. Camatsejen ngu chjuun xi tixtécun ran tsuhi. Hane sá ne, tacun ngahma rë ntsacu na. Hane ngu corona

xi camá tséhë tejó niñú ne, vëhë quitaha xten na. ² Hane chjuun jan ne, meje tsin quihndi ran. Jercu jindaya na ngatsë rë cjuahmu cojo cjuachoho tséhë hacutjin tivatju ran. ³ Hane camatsejen nga ngu sen ngajan ngahnga ta, camatsejen ngu yë xi jercu jyihi chu; hani xcusun ru. Chu jan ne, yatu má rcu chu, të má ndyaja ru. Hane jima ngu rcu chu hincha sun ngu corona. ⁴ Cojo ndetsihin chu ne cajavéjne chu ngu cahndé tséhë jyan cahndé rë niñú rë ngahnga, hane cacandi chu nangui. Hane yë jan ne, crafaria vasen chu xcun chjuun xi ha hindëya tsin quihndi ran cojo sa xi tsinguijne jingu chu quihndi rë na hora xi tsin. ⁵ Hya xi camá ne, na vëhë ne, catsin rë na ngu quihndi xihin. Hane quihndi xihin jan ne, yaha bastón xi cuitexa me cojo yëjë ni nación cojo ngahñu cjua xi tjin rë me. Hane quihndi ran jan ne, cachjaha rë xcun Nina, ngajan xcun cahndé rcun rë me. ⁶ Hane chjuun jan ne, cavanga na quihi na ngu xín. Ngu cahndé xi Nina tjin chjine rë me xi cumá ran. Hane ngajan sacu xi sinë na xcun ngu mil cojo jo cientu cojo jyanchan nixtin.

⁷ Hya xi camá ne, cavetsihin ngu si ngajan ngahnga. Miguel cojo yahnga ángel ladu rë me ne, casahmi me si cojo yë xitsehen jan hacuaha cojo ángel ladu rë xitsehen. ⁸ Hane cacaain rë yë jan cojo ángel ru, hacuaha catsichaja chu cahndé ru ngajan ngahnga. ⁹ Vëhë xi caningatjen ru xcun ngasunhndë. Yë jan ne, jemu changá chu. Xitsehen xi matitjun o Satanás hmí ru. Chu ndacha chu, vindacha ru xuta ngasunhndë. Hane caningatjixin ru cojo ángel ru hiscan ngasunhndë.

¹⁰ Hya xi camá ne, cahndé ngu xta xi jemu hñu cachja ngajan ngahnga cuitjin:

—Quihndë cavechu nixtin xi Nina cuaxëtje me xuta, cumatsejen ngahñu rë me cojo gubiernu rë me. Hacuaha tsejen xi hñu cjua rë Cristu, me xi catsingatju me ta, cama catsingatjixin me chu xi vinchajyé xingueen. Nixtin nixten cavinchajyé rë me xcun Nina naja, peru hindë tsajin. ¹¹ Hane xingueen jan ne, cacaai rë quihi me xcun ngatsë rë jni rë Tsánga jan cojo ngatsë rë cjuaquixi rë me xi casua me tséhë Nina ta, hacuui machuvacacun me xi cjue xcun me cojo Nina handasa cjueya me. ¹² Hane ngatsë rë vëhë ne, jcatama sua rë ngahnga cojo me xi siu xcun! Peru jay tséhë nangui cojo ndachacun! ta, tséhë xi canduva tjengui rë xitsehen xi matitjun. Hacuaha jemu quitsë rë cjuahti tséhë xi vëë xi nixtin rë ne, meje cuijnetaha. —Cuatjin cachja xta jan.

¹³ Hya xi camachaya ru xi caningatjen ru nangui ne, cavetsihin cavanga cojo chu chjuun xi catsi ran quihndi xihin jan. ¹⁴ Peru chjuun jan ne, cafahatsja na jo tyjunga rë chu jya xi jercu jyihi cojo sa xi cuma cuitjen na tséhë chu yë hiscan cahndé xi tjin chjine xi cuma ran ngajan ngu xín. Hane ngajan sacu xi sinë na xcun ngu chan cojo jo chan cojo vasen chan, hane cuechiintaain chu yë na. ¹⁵ Ngajan xi chu yë jan ne, cavaxë chu tséhë hntsua chu nandá sacuaha ngu ndajyé cojo sa xi cuechutaha rë chjuun jan ne, cjue tyjava na cojo ngahñu rë ndajyé. ¹⁶ Peru nangui ne, cavisecoo rë chjuun jan, hane caseya tsjuhun ne, cavingui rë ndajyé xi cavetju rë yë jan. ¹⁷ Vëhë xi yë jan ne, jercu camaxti ru cojo chjuun jan hane sehe quihi casahmi chu si cojo tjé rë na xi cavangui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi rë Jesús.

13

Yë xitsehen ne, casua chu ngahñu xi cjuahatsja chu chojyihu

¹ Hya xi camá ne, cavejña chu yë jan tjehen ndachacun, hane cahvë xi ngu chu chojyihu ne, tivetju chu tséhë ndachacun. Të má ndyaja ru hacuaha yatu má rcu chu. Hane të corona seja xcun ndyaja ru. Hane jima ngu rcu chu ne, yaja ngu ñihi xi tsitjungui rë Nina.

² Chu chojyihu xi cahvë vë ne, sacuaha ngu xa hindu jyé cuatjin jyihi chu, peru ntsacu chu cojo tsja chu ne, sacuaha ntsacu cojo tsja chu oso; hane hntsua chu ne, sacuaha hntsua chu xa sine cjan rë. Hane yë jan ne, casua chu vë ngahñu ru cojo cahndé rcun rë chu, hacuaha casua xa rë chu. ³ Hane ngu rcu chu jan ne, casacuhmu rë hane tsejen xi tsajin rqui rë, ta cueya. Peru cojo yëjë sa ne, camandaja. Hane jingujyé ni xuta ngasunhndë ne, jercu quijircun rë me xi camandaja. Hane cojo cjuasua tjengui me chu. ⁴ Hane xuta

ne, caticjan xcun me cafaharcu me chu yë jan ta, tsëhë xi casua yë cahndé xi vitexa chu. Hacuaha cafaharcun me chu chojihi jan. Cuitjin cachja me tsëhë chu:

—Ndastu yo xi cuechu xi cumá sacuaha chu vi. Ndastu yo cuma scaanya cojo chu.
—Cuatjin cachja xuta tsëhë chu.

⁵ Chu jan ne, casetaha ngu hntsua chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá. ⁶ Hane cavetsihin xi choho cachja chu tsëhë Nina, canchatu chu tsëhë ñihi rë cojo tsëhë cahndé hiscan viyuju Nina, hane tsëhë yëjë sa me xi siu me ngahnga. ⁷ Hane cafahaxa chu xi sahmi si chu cojo xuta xi tyjahi cjuatacun rë me cojo me xi ndaja cjuinduju me cojo Nina. Hane caa ru cjué chu xcun. Hacuaha cafaha xa chu xi cuitexa chu xuta rë yëjë ni tjë, yëjë nandya, yëjë hne cojo yëjë nangui. ⁸ Hane jinguyéjë me xi viyuju me ngasunhndë ne, cafaharcun me chu. Yëjë ni me xi tsajin ñihi rë me xcun xujun rë Tsángä rë Nina xi hisca ntsacu cavetsihin ngasunhndë ne, cavejña xi cueya. Tsajin ñihi rë me jan ta, tsajin rë me ngahñu xatsë. Hane me vëhë cafaharcun me chu.

⁹ Yo ngayun xi tjin nuju cjuasua xi cuinuhyun cjuá vihi, ndaja tetuhunrcun. ¹⁰ Me xi satë rë xi cuma me presu, cuatjin cumá. Me xi satë rë me xi cueya me cojo quicha, cuetjucaa jain. Jinguyéjë rë vëhë ne, mameje rë xi xuta xi macjain rë me Nina ne, cjuecani rë xi cumacjain sa rë me.

¹¹ Ngaxtun vëhë ne, cahvë nga ngu chu chojihi, hane tivetju chu tsëhë nangui. Chu chojihi xi majo ne, tjin jo ndyaja ru sacuaha tjin chu tsángä, peru chja chu sacuaha ngu yë jyë. ¹² Hane hacuaha cojo chu vëhë casatë rë chu ngahñu xi casatë rë chu xicjin cojo ñihi ru. Hane casahmi chu vë xi yëjë ni xuta xi siu ngasunhndë ne, cjuaharcun me chu chojihi xi tjun jan, chu xi handasa cueya chu xi casacuhmu rë ne, camandaja.

¹³ Hane cama casahmi chu vë cjuarcun yehe cojo seña. Casahmi chu xi cuixu ndihi tsëhë ngahnga, hane xuta ngasunhndë ne, cavutsejen me cjuarcun. ¹⁴ Cuatjin cavindacha chu vë xuta ngasunhndë cojo cjuarcun xi cama casahmi chu ngatsë rë chu xi tjun. Hane cavitexa chu xi xuta ne, cuaxëtaha me ngu xcusun rë chu tjun jan xi casacuhmu rë cojo quicha Peru cojo yëjë sa ne, quicun chu. Hane cuatjin casahmi me. ¹⁵ Hane chu xi majo jan ne, casacu ru cahndé xi sua chu xta rë xcusun jan cojo sa xi cuma cuichja xcusun jan, hacuaha cuma sahmi xcusun jan xi cueya tu cutjin cjín me xi tsingatiin xi cjuarcun xcusun jan. ¹⁶ Hane xcusun jan ne, casahmi nguyjë xi yëjë ni xuta ne, setaha ngu sellu tsja ladu quixi o sa xten me. Cuatjin casetaha rë xuta, sa quihndi, sa changá me, sa nchina, sa yuma me, sa xuta ndaya tjin o sa xi mosu hndixahan; yëjë ni me casetaha rë me. ¹⁷ Hane chuva vëhë ne, sacuiin cahndé xteña hacuaha sacuiin cahndé cuatsë sa xi casetaain rë me sellu jan cojo ñihi rë chu chojihi jan o cojo xqui rë letra rë ñihi ru.

¹⁸ Cjuatacun vihi ne, tjin mé vijné, Peru meje rë xi cuacjantaha me cjuatacun rë me ta cuitjin fi cjuá: Catitschuva me xqui rë chu jan ta, hatuxa xqui rë ngu xuta xihin. Hane xqui rë jan ne, jyan cientu cojo jyanchan jyun má.

14

Ngu cientu cojo yachan ñuju mil me xi cavatsë Nina

¹ Hyá xi camá ne, cavutsejen nga, hane ngajan secun Tsángä jan, secun quixi xcun naxi xi hmí rë Sion. Hacuaha siu cojo me ngu cientu cojo yachan ñuju mil xuta xi casetaha xten me ñihi rë Tsángä jan cojo ñihi rë Nahmi rë me. ² Hacuaha canuhya rë ngu xta tsëhë ngahnga xi nuhya rë sacuaha fane jemu cjín nandan xi vanga o sacuaha xi jemu hñu faneya. Hacuaha nuhya rë sacuaha xi tsijane cha chjine arpa rë cha. ³ Hane xuta jan ne, tisë me ngu sun xatsë xcun cahndé rcun rë Nina hacuaha xcun ñuju xcusun xi quicun cojo can ñuju xuta changá xi viyuju me ngajan. Hacuiin yëjë me xi tjin rë me cahndé xi cuma rë me sun jan ta, suvá ngu cientu cojo yachan ñuju mil me xi cuacun jan xi cachaha rë me tsëhë ngasunhndë, me vëhë cuma rë me. ⁴ Me xi cuacun vë ne, catsinguetsiin me cjuatacun rë me cojo yachjin, ta caviyuju suva me. Me xi cuacun vë

ne, tjengui me Tsánga tu jani xi cji. Me xi cuacun vë ne, hacuaha me xi cachjahaxin rë tséhë ngajñi rë yahnga xuta xi cuma me sacuaha ngu cuatjo xi cumá rë Nina cojo Tsánga.
⁵ Me xi cuacun vë ne, hisca xi ngu cjuandesu cavetjiin tséhë hntsua me; ta tsajin xi cún rë me.

Jyan ángel xi cachja hacutjin cumá cojo xuta xi faharcun rë chu chojyihu

⁶ Sehe cahvë ngu ángel xi hacjahi xi vitjen vasencia rë ngahnga. Ángel vëhë ne, cjuecani rë cjuandajyihu rë Nina xi machuvaain ngahñu rë. Hane sua rë xuta ngasunhndë tséhë yëjë ni nación, o tjë, o hne, o nandya xi cumachaya rë me cjua jan. ⁷ Hane cachja cojo xta hñu cuitjin:

—Chjuhunrcun rë Nina hacuaha nihñu jyë nihñu hnga me ta, tséhë xi ha cavechu hora xi sahmicuenda me yëjë ni. Chjuhunrcun me xi casahmi ngahnga cojo nangui cojo ndachacun cojo nanda yufa.

⁸ Sehe tjengui rë me ngu ángel xi majo, hane cachja cuitjin:

—Camá cafë ngahñu cjua rë gubiernu xi vitexa rë nandya Babilonia. Xuta rë nandya jan ne, catsitsehen yahnga xuta tséhë xi sacuaha catsichihi rë me cojo xan xi hacui cjuatsehen xi sahmi ngu xihin cojo chjuun xi hacuii tséhë.

⁹ Sehe tjengui rë me ngu ángel xi majyan, hane cachja hñu cuitjin:

—Yo xi cjuaharcun rë chu chojyihu o sa xi cjuaharcun rë xcusun ru, hane setaha sellu ru xten o sa tsja me ne, ¹⁰ xuta jan ne, tjin rë me xi cuihingui me xan xi hacui cjuacjan rë Nina, hane tsajin mé xi tsinguijne rë ngahñu rë cjuacjan jan. Xuta jan ne, cuatju me cjuahmu tséhë ndihi tséhë azufre xi seti, cuatjin cuatju me xcun ángel cojo Tsánga. ¹¹ Hane nihndi rë ndihi rë cjuahmu rë me ne, cuiji yëjë nu yëjë nixtin. Sa nixtin sa nixten ne, sacuiin rë me cahndé cjuahajenda me tséhë. Cuatjin cumá cojo me xi faharcun ru cojo xcusun ru. Cuatjin cumá cojo me xi siutaha rë sellu ru.

¹² Jinguyëjë rë xi vatju vëhë ne, mameje rë xi xuta xi macjain rë me Nina ne, cjuecani rë xi cuetjo me cjua xi cavitexa Nina hacuaha cumacjain sa rë me.

¹³ Hya xi camá ne, cahndé ngu xta tséhë ngahnga xi cachja cojo ná cuitjin:

—Nihndi cjua vihi: “Xuta xi ha cueya me quihndé cojo nixtin xi sehe nduva ne, jercu ndaja tséhë me sa xi tjengui me ndiya rë Nina.”

Hasen rë Nina ne, chja tséhë me cuitjin:

—Juun, cjuahajenda me tséhë xi tsijenda rë me ta, tséhë xi cumatsejen chjí rë xa xi casahmi me. —Cuatjin chja Hasen rë Nina.

Ángel ne, fanga me xuta ngasunhndë xi satë rë me cjuacjan rë Nina

¹⁴ Hya xi camá ne, cavutsejen ngu yufí tyava, hane xcun yufí ne, tacun ngu xi tsejen sacuaha quihndi rë xuta. Quisun rcu me ngu corona tséhë oro hane yahatsja me quicha yuju ta cuatë me xitjë. ¹⁵ Ngajan xi cavetju nga ngu ángel tséhë ndava Nina hane hñu cajindaya cojo ángel xi tacun xcun yufí jan. Cuitjin cachja:

—Chjuhun quicha nuju nangun ta, ha cavechu nixtin xi xtí ta, tséhë xi camá quichji cosecha tséhë ngasunhndë.

¹⁶ Hya xi camá ne, me xi tacun xcun yufí jan ne, cavaja me nangui cojo quicha rë me, hane tjë rë ngasunhndë ne, camá cachaya rë.

¹⁷ Hya xi camá ne, hacuaha cavetju ngu ángel xi cavetju tséhë ndava Nina xi tacun ngahnga ne, hacuaha yaha ngu quicha yuju. ¹⁸ Hane cavetju ngu ángel xi majo. Ángel vë ne, tacuntsja rë ndihi. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju riji ne, tiche yëjë hne rë uva tséhë xcun ngasunhndë ta tséhë xi uva rë ne, jemu quichji.

¹⁹ Hya xi camá ne, ángel jan ne, catsingatju quicha rë xcun nangui ne, cavatë rë uva xi hacui xuta tsehen. Hane cavincha rë cahndé hiscan xinune rë cojo sa xi cumatsyuhun ne cuetju nandá rë sacuaha satë rë matsyuhun cjuacjan rë Nina. ²⁰ Camatsyuhun hiscan xín hitsë tséhë nandya, hane jemu cavetju jni hiscan camatsyuhun uva jan. Xi camiji jni

ne, cavechutaha rë hiscan frenu rë chu naxin hacuaha cavanga ngu chuva rë jyan cientu cojo can kilómetro.

15

Yatu ángel xi siutsja cjuacjintacun

¹ Hya xi camá ne, cahvë ngajan ngahnga ngu nga sen cjuarcun xi jemu fircun naja. Cahvë yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañhi xi cumá ta, sejyu cjuacjan rë Nina.

² Hacuaha cahvë sacuaha ngu ndachacun hasen sacuaha hasen ndyojo tsin, hane tsejen sacuaha tecjan cojo ndihi. Hane ngajan hinchacun xuta xi cacaá rë me quiji xcun tséhë chu chojiyi cojo xcusun ru cojo xqui rë ñihi ru. Secun me cojo arpa xi cafahatsja me tséhë Nina. ³ Me vëhë ne, së me sun xi tséhë Moisés, me xi casahmi xa rë Nina hane hacuaha tséhë Tsángá. Cuitjin fi cjuar rë:

Jemu má nihñu xa, jemu fircun niji tséhë.

Nai niji ngayun. Ngayun, tsajin mé xi maji nihñu.

Quixi nújun, hacuaha chichihin ndiya nuju.

Ngayun vitexun jinguyéjé ni nación.

⁴ ¿Yo xi tsacjuiin nuju, tatá? Tsajin yo.

Yëjë ni me sahmi jyë sahmi hnga me yun ta tséhë xi ngu ni ngayun xi tyjahi cjuatacun nuju.

Vëhë xi yëjë ni nación cuinduva cuiticja xcun nuju tséhë xi cumatsejen ndaja xa cjuaquixi nuju.

⁵ Hya xi camá xi cavatju vihi ne, cavutsejen nga ngahnga ne, hane tixaha hiscan cahndé rcun rë ndihya tsjian rë Nina hiscan hincha acuerdu xi camá cojo Nina. ⁶ Hane tséhë ngajan ne, cavetju yatu ángel xi cuacun jan xi siutsja me xa rë yatu cjuacjintacun xi cumá. Ángel jan ne, yaja tsjian rë nachjun ndaja xi ndaja tyjahi. Hacuaha tjihñucja ndanisin rë cojo cinturón tséhë oro. ⁷ Ngajan xi ngu xi quicun jan xi ñuju má ne, casua rë yatu ángel xi cuacun jan ngu ngu tyucu rë oro xi ndaja teya. Hane tyucu jan ne, quitsë rë cojo cjuacjan rë Nina, Nina xi tacun cuaha me yëjë nu yëjë nixtin. ⁸ Hane ndihya tsjian rë Nina jan ne, catsë rë cojo nihndi xi nduva tséhë cjuahasen rë Nina xi seti cojo ngahñu rë me. Cuatjin camá xi tsajin yo ma visehen ngajan hisca xi cuijnetaha nixtin rë cjuañhi xi yahatsja yatu ángel jan.

Tyucu xi hincha cjuacjan rë Nina

16

¹ Hya xi camá ne, cahndé ngu xta hñu xi vetju tséhë ndava Nina hane cachja xta jan cojo yatu ángel jan cuitjin:

—Tangun titejnu tyucu jan cojo sa xi cjuacjan rë Nina ne, satë rë ngasunhndé.

² Cojo vëhë ne, quiji ángel xi tjun jan ne, cavitsingaxten rë tyucu rë xcun nangui. Hane yëjë xuta xi yaha me sellu rë chu hacuaha faharcun me xcusun ru ne, casetaha rë me ngu xcusun chíhin vetju xi jemu cjan rë.

³ Sehe ángel xi majo ne, cavitsingaxten tyucu rë xcun ndachacun. Hane ndachacun ne, cavuya jni sacuaha jni rë ngu nima. Ngajan café cahme xi hincha rë ndachacun.

⁴ Sehe ángel xi majyan ne, cavitsingaxten tyucu rë cojo sa xi casaté rë nandan ndajyé cojo hiscan xi vetjun nandá. Hane nandan jan ne, hacuaha cavuya jni. ⁵ Ngajan xi cahndé xi cachja ángel xi tacuntsja nandan jan cuitjin:

—Quixi yun chuva vihi. Ngayun nechun cuaha, hacuaha cavinechun. ⁶ Quixi yun chuva vihi ta catsinguitsojo me jni rë xuta nuju cojo profeta xi chja cjuar nuju. Hane canicuyun chuva rë ta hacuaha cavanga jni rë me.

⁷ Hacuaha canuhya rë xi ngasunscun rë yungun ne, cafayangui cuitjin:

—Juun, cuatjin camameje rë. Tatá, Nina yun, hane tu mé ni ne, ma nuju. Jemu quixi cjuar xi vitexun.

⁸ Hya xi camá ne, ángel xi má ñuju ne, cavitsingaxten rë tyucu rë xcun tsuhi. Ngajan casacu rë ngahñu xi jemu cuaca rë xuta cojo ndavá rë. ⁹ Hane xuta ngasunhndë ne, cati me cojo ndavá hñu. Peru cahndé xi sahmi jyé sahmi hnga me Nina ne, canchati me tséhë ñihi rë Nina, me xi vitexa me xcun yéjé cjuacjintacun vihi.

¹⁰ Hya xi camá ne, ángel xi má hñu ne, cavitsingaxten rë tyucu rë xcun cahndé rcu rë chu jan. Hane ngajan camá xi nación xi sahmi chu gubiernu tséhë ne, jemu jñu camahani camá jingujyé ni. Hane xuta ne, cajinéne me neje me tséhë xi jercu má rë me. ¹¹ Hane nchati me tséhë Nina rë ngahnga ngatsé rë cjuahmu rë me cojo tséhë nindu xi vetju yojo rë me. Nchati me tséhë Nina cahndé rë xi choho camá rë me tséhë cjuatsehen rë me.

¹² Hya xi camá ne, ángel xi má jyun ne, cavitsingaxten rë tyucu rë xcun ndajyé jyé xi hmí rë Eufrates. Ngajan xi nandan jan ne, caxiya hane camandaja ndiya rë cojo sa xi ma vatjucja rey xi nduva ladu vetjucaa tsuhi.

¹³ Sehe cahvë jyan hasen tsehen xi cun sacuaha licuen, cavitju tséhë hntsua chu yé jyé jan, tséhë hntsua chu tjun cojo tséhë hntsua chu ndacha. ¹⁴ Hane hasen jan ne, hacui hasen tsehen xi ma sahmi seña cjuarcun hacuaha hacui xi sahmi tangun rey, xuta matitjun rë jingujyé ni ngasunhndë cojo sa xi xuta jan ne, sahmi si condra rë Nina xi ma sahmi me yéjé ni hya xi cuetjucaa nixtin rë Nina.

¹⁵ Tetuhunrcun cjuá rë Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chéjé. Jercu ndaja tséhë yo xi tacun quicun, sacuaha ngu me xi tacun chjine tsjian rë me xi cuaja me cojo sa xi tsajin yo sacutsejentë cjuasava rë me.” Cuatjin chja cjuá jan.

¹⁶ Hane casahmi xi cama tangun rey jan ngajan ngu cahndé xi hne hebreo ne, hmí rë Armagedón.

¹⁷ Hya xi camá ne, ángel xi má yatu ne, cavitejnu tséhë tyucu rë ngajñi tjo. Ngajan xi hiscan ndava Nina, hiscan cahndé rcun rë me, canuhya rë ngu xta hñu xi chja cuitjin:

—¡Ha camá cajnetaha!

¹⁸ Ngajan xi sehe cavetsihin cavatë ndihi chuhun, cafenaya, catsinga chuhun, cojo xi jemu hñu cafani nangui. Hisca cjéé cjuani nangui cuatjin jinguyéjé rë xi cavyuju xuta xcun ngasunhndë ta, jercu cjuachan camahani cafani nangui. ¹⁹ Hane ciudad jyé ne, jyan rquí caseya tsuhun. Hacuaha yahnga nandya rë ngasunhndë ne, cavixujne. Hane Nina ne, catsinguitsen me cjuatsehen rë nandya Babilonia jyé hane casahmi me xi hacuaha cuma rë nandya jan castigu tséhë cjuacjan rë Nina xi hincha tyucu. ²⁰ Hacuaha nangui xi vetju vasencja ndachacun cojo naxi ne, hya cafëya. ²¹ Hane tséhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaha yachan kilu hai. Hane xuta ne, canchati me choho cachja me tséhë Nina ngatsé rë cjuacjintacun tséhë tsi ndyojo jan ta, cjuacjintacun jan ne, jemu chircun camahani.

17

Hacutjin cjué na xi viteña yojo rë

¹ Hya xi camá ne, ngu tséhë yatu ángel jan xi yaha tyucu ne, canduva tjengui ná ne, cachja cuitjin:

—Ndove ne, tsingácun ri castigu rë na xi viteña yojo rë, na xi tacun na xcun jemu cjín nandá. ² Cojo na vëhë ne, rey tséhë nangui ne, casahmi me cjuatsehen; hane xuta ngasunhndë ne, catsichihi rë me cojo xan xi hacui cjuatsehen ran. —Cuatjin cachja ángel cojo ná.

³ Ngajan xi ángel ne, quijicojo ná ngajñi nguijña ngu cahndé xín. Hane ngajan cahvë ngu chjuun xi quisun na ngu chu chojyিhi xi hani xi yatu rcu chu cojo të ndyaja ru. Hane chu jan ne, yaha ñihi xi tsitjungui rë Nina. ⁴ Chjuun jan ne, yaja na tsjian chacun xi moradu cojo hani. Hacuaha tsjian vëhë hisca seti jyihi cojo oro cojo ndyojo ndacun hane cojo tu seti xi cavaqui rë. Hane yahatsja na ngu tyucu tséhë oro xi quitsé rë cojo xcusun tsehen cojo xi chocun rë cjuatsehen rë na. ⁵ Hane xten na ne, camahindu cjuá vihi: “Ngu

cjua xi meje rë cjuatacun: Babilonia, nangui xi matitjun. Nangui xi hacui na xi viteña yojo rë cojo yahnga xuta xi sahmi me cjuatsehen ne, fayangui xuta xcusun rë na.” Cuatjin camahindu.⁶ Hane camachaya ná ta na vëhë ne, chihi na ta cahvi na jni rë nima xi cahme me ngatsë rë xi macjain rë me Nina cojo jni rë nima xi casua cjuaquixi rë Jesús.

Hane hya xi cahvë na ne, ngahan ne, jercu quijircu camahani ná.⁷ Ngajan xi cachja ángel cojo ná:

—¿Mé má fircun ri? Ngahan ne, suacuenda ri cjuatacunhma tséhë chjuun jan cojo tséhë chu chojihi xi quisun na, chu xi tjin yatu rcu chu cojo të ndyaja ru.⁸ Chu chojihi jan ne, quicun chu hatsëë, peru quihndë tsajin chu. Hane xi cuinduvaniji chu tséhë nduchin ne, jiya ndiya chu xi cjuéya chu. Hane xuta xi viyuju me ngasunhndë ne, me xi casetaain ñihi rë xcun xujun, xujun xi hisca ntsacu cavetsihin ngasunhndë, hincha ñihi rë me xi satë rë me cjuahñu xatsë xi sua Nina ne, me vëhë cjuercun rë me. Cjuercun rë me hya xi scuëë me chu ta quicun chu hatsëë, tsajin chu quihndë, peru cuya cuejña nga chu.

⁹ Mameje rë cjuatacun ta chja nuhya rë, peru yatu rcu chu ne, nuhya rë xi má yatu ndetjun hiscan quisun na o sa nandya hiscan vitexa na jan. Hacuaha nuhya rë xi má yatu me xi vitexa ngajan.¹⁰ Hñu me vëhë ne, ha cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi nguyjë xi hacuiin cjín nixtin scaa rë me.¹¹ Hane chu chojihi xi quicun chu hatsëë, peru quihndë tsajin chu, cojo chu vëhë cuma jyin me xi cuitexa me ngajan. Chu jan ne, ma jyin, peru hacuiin xín cuinduva chu ta, tséhë ngajñi rë me xi yatu jan ne, ngajan cuinduva chu hane cjuahñu hiscan cjuéya cha.

¹² Hane të ndyaja ru xi cahye ne, hacui të xuta xi cjéë cjuahatsja me xa xi cuitexa me. Hane me vëhë ne, sacu rë me cahndë xi cuitexa me tangun cojo chu, peru ngu hora ni cjuecani rë nixtin rë me.¹³ Hane me vëhë ne, cama sacuha ngu ni cjuatacun rë me. Hane sahmi tangun me ngahñu rë me cojo gubiernu rë me sehe sua me xi cjuahatsja chu chojihi.¹⁴ Hane hya xi sahmi me si cojo Tsánga jan, scaa rë xi cjue xcun Tsánga cojo xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui rë ta, Tsánga jan ne, Nai rë yëjë ni nai má me. Hacuaha vitexa me xuta xi vitexa. —Cuatjin cachja ángel cojo ná tséhë na vëhë.

¹⁵ Cachja sa ángel cojo ná cuitjin:

—Sacuha nandá xi cahye hiscan xi tacun na xi viteña yojo rë na, nuhya rë xi má xuta tséhë yëjë ni tjë, yëjë nandya, xuta cjín, xuta xi chja yëjë hne.¹⁶ Hane me xi sacuha tē ndyaja ru ne, cuya xi chocho scuëë me na xi viteña yojo rë, tsismi me na, hacuaha cuejña cuatjin na. Hane xi cavejña suva na ne, sehe sinë chu yojo ran sehe cuaca ran cojo ndihi.¹⁷ Të me jan ne, cojo ngu ni cjuatacun meje sua me xa rë me cojo ngahñu cjua rë me xi cjuahatsja chu chojihi jan. Xi cuatjin casahmi me ne, camá hacuatjin cavincha Nina xahasen rë me xi cumá hisca nixtin xi cuma chihin hacutjin cavejñacacun Nina xi cumá.¹⁸ Hane sacuha chjuun xi cahye jan ne, nuhya rë xi má ciudad rcun xi satë rë xi cumatitjun tséhë yëjë ni xuta xi vitexa xuta ngasunhndë.

18

Cjanengui nandya Babilonia

¹ Hyá xi cavatju vihi ne, cahvë nga ngu ángel xi nduvajne tséhë ngahnga xi jemu tjin rë ngahñu cjua rë. Hane nangui ne, casahasen rë cojo hasen rë ngahñu jan.² Hane ángel jan ne, cojo ngu xta hñu cajindaya cuitjin:

—¡Cjanengui! ¡Café ngahñu rë Babilonia jyë! Quihndë suva machji rë tséhë xitsehan. Ngajan tsuyjihya hasen tsehen, ngajan vangui yëjë chu nisë xi jinë chu ngu xcusun chocun, chu xi chofovëë xuta chu.³ Cuatjin camá rë ta tséhë xi xuta ngasunhndë ne, cavincha sca rë me cojo xan rë cjuatsehen ran. Cojo na vëhë ne, me xi vitexa me ne, casahmi me cjuatsehen. Hacuanitjin tséhë xuta xi sahmi me negocio ta, camanchina me ngatsë rë cjuatsehen ran. —Cuatjin cachja ángel.

⁴ Sehe cahndë nga ngu xta tséhë ngahnga xi cachja cuitjin:

—Ngayun xi xuta na ha ne, tetjun tséhë nandya vihi. Tangunxun cojo sa xi cuajiin yun cuatjunxcun jyé rë, hane satiin nuju cjuanihi xi satë rë xuta vëhë. ⁵ Jyé rë na xi hacui nandya vëhë ne, casexohnga rë hisca cavechu ngahnga. Hane Nina ne, cjuaha cuenda me tséhë cjuatsehen ran. ⁶ Nicuyun tséhë na chuva xi casahmi na. Jo cuatjin vechutaha castigu xi cumá ran. Tisecjun rë copa ran jo cuatjin sa sehe hitsé sa cumá cjan xi cuma rë copa xi cavincha na tséhë xuta. ⁷ Ngojo rë cjuaxta rë na xi jercu sahmi na mé xi fehya cjuatacun tsehen rë na ne, ndaja tuhun ran cjuanihi cjuachoho. Cuatjin cumá ran ta, cuitjin catsingatahacacun na cachja na: “Tejña cahndë rcun ta matitjun ngahan. Hacuiin cahan ngahan, satiin ná cjuachoho.” Cuatjin tsingatahacacun na. ⁸ Vëhë xi xcun ngu ni nixtin, cuechutaha ran yëjë ni, ta cuechutaha ran cjuachoho, cuechutaha ran jindya. Hacuaha tsicjëya ran ndihi. Cuatjin cumá ta, tséhë xi Nina, me xi sahmi cuenda rë jyé ran ne, ma sahmi me yëjë ni.

⁹ Ngajan xi xuta xi rcun xi casahmi cjuatsehen ngajan hacuaha casua cjuasua xahasen rë ngajan ne, scuëë me nihndi rë, hane squihnda me hacuaha cuiyuju va me. ¹⁰ Hane cjuercun rë me ngatsë rë chircun xi tivatju ngajan, sehe squindaya me cuichja me cuitjin:

—¡Ay! Jercu chocho cavatju ciudad ndajyihi, ciudad rcun. Tu ñahñu ni ne casatë rë yëjë ni cjuacjintacun xi cuma castigu rë.

¹¹ Hacuaha xuta xi sahmi me negocio ne, squihnda me hacuaha chocho cumá rë me tséhë xi quihndë ne, tsajin yo cuatsë chaha xi viteña me, ¹² chaha xi camá tséhë oro, tséhë quicha tyava, cojo ndyojo ndacun, cojo tu seti, cojo tsjian ndacun sa lino sa seda, sa xcusun hani sa moradu. Chaha rë ya xi ndaja jne, chaha xi camá tséhë nehñu elefante, o tséhë ya xi hnga chjí rë o tséhë quicha sine, quicha hinda o tséhë ndyojo seti. ¹³ Tsajin yo cuatsë rë chaha rë canela cojo yahnga xcusun xi sahmi xi ndaja chinë comida o sa tyjungurisa, sa balsamo xi hmí rë muro, sa vinu, sa aceite, sa ndyaja, sa chu tsángä, sa naxin o sa carreta, sa mosu cachaha rë xi hacui cjuahñu rë xuta. Tsajin yo cuatsë tséhë me. ¹⁴ Cuitjin chja tséhë nandya jan:

—Xcusun ndacun xi jercu cafehya xahasen riji ne, quijixin tsijin. Yëjë ni cjuanchina riji xi ndajyihi ne, cafëya, hane tsajin nu tsajin nixtin cuya sacu ri.

¹⁵ Ngajan xi me xi caviteña ngajan hane cojo vëhë cama nchina me ne, cjuercun rë me ngatsë rë chircun xi tivatju ngajan, xinchacun me cjin tséhë, hane squihnda me hacuaha chocho cumá rë me. ¹⁶ Cuitjin cuichja me tséhë:

—¡Jemu va jyihi nandya! Camá ngu nandya jyé, jemu ndacun tsjian catsicaja rë xuta rë. Tsjian ndaja xcusun hani moradu. Tsjian xi cavaqui rë nachjun oro cojo ndyojo ndacun cojo tu seti. ¹⁷ Peru xcun xi ngu hora ne, cafë cavetsunya cjuanchina vë.

Hane yëjë me xi matitjun xi vitexa tséhë barcu cojo xuta xi hincha me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tséhë. ¹⁸ Squindayava me hya xi scuëë me nihndi rë xi seti hane cuichja me cuitjin:

—Hatuxa tsajin sa ngu ciudad xi cuanitjin ndajyihi sacuha camá ciudad jyé vi.

¹⁹ Hane cuitejnu me scuan rcu me ta jemu chocho má rë me hacuaha squihndava me cuichja me cuitjin:

—¡Cojo cjuatsehen rë xuta nandya vi! Ngatsë rë cjuanchina rë me ne, tu yo ni me xi tjin rë ngu barcu rë chaha ne, cama nchina me. Peru ngu ñahñu ne, cavetsunya.

²⁰ Catamasua nuju tséhë na, ngahnga. Catamasua nuju ngayun xi tyjahi cjuatacun nuju, ngayun xi má apóstol cojo ngayun xi má profeta. Catamasua nuju ta hindë casahmi Nina castigu na, casahmi cuenda me tséhë na chuva xi casahmi na cojo nuju.

²¹ Ngajan xi ngu ángel xi jercu tjin rë ngahñu ne, cafaha me ngu ndyojo jyé chuva rë natsi rë molinu, hane catsingatjeya rë ngajñi ndachacun. Sehe cachja cuitjin:

—Chuva ngahñu vihi, cuanitjin ngahñu xi cjuinengui cojo nandya jyé xi hmí rë Babilonia. Hane tsajin nixtin xi cuya cumá. ²² Tsajin nixtin xi cuinuhya rë xi tsijane cha chjine arpa ngajan, o sa ngu sun, o sa fane chiruvi o sa fane tyjo. Hisca ngu cha chjine

tséhë tu mé ni xcusun ne, cuyaain sahmi xa ngajan. Hacuaha cuyaain nuhya rë ndyojo rë molinu xi sahmi scuan rë pan. ²³ Ndihi rë ngu lámpara ne, cuyaain tsejen hasen rë ngajan. Tsajin nu tsajin nixtin xi ngajan cuma cjuavixan. Cuatjin cumá cojo ta, xuta xi casahmi me negocio ngajan ne, jemu hñu cjua rë me cojo yéjë ni xuta ngasunhndë. Hane cavincha sca me xuta ne, cavindacha me cojo xcusun rë me.

²⁴ Hacuaha ngajan cavanga jni rë profeta cojo tséhë xuta xi tyjahi cjuatacun rë me xcun Nina cojo jni rë yéjë ni xicjin me xi camá catsiquehen me nguehe ngasunhndë.

19

Xutacjín xi cuaxéndaja me Nina

¹ Hya xi camá cavatju vihi ne, cahndë sacuaha xta rë xutacjín ngajan ngahnga xi chja cuitjin:

—¡Catama jyë, catama hngna Nina! Nina ne, vaxétje me xuta, tjin rë me hasen ndajyhi xi seti, hacuaha ma sahmi me yéjë ni.

² Jemu quixi cjua xi vitexa me ta, casahmi me xujun jyé rë na xi caviteña yojo rë, na xi hñu cjua na.

Na véhë ne, catsinguetsun na cjuatacun rë ngayéjë ni cojo cjuatsehen rë na.
Hane Nina ne, casahmingojo me cojo rë na jni rë xuta xi sahmi xa rë me. Jni rë me xi casahmi na xi cavanga.

³ Sehe cavuya cachja me cuitjin:

—¡Catama jyë, catama hngna Ninal ta, nihndi ran ne, miji nchunchujun ni, nu nu ni.

⁴ Ngajan xi can ñuju xuta changá cojo catsiñuju xcusun xi quicun ne, caviticja xcun Nina xi cjuaharcun rë me xi tacun me cahndé rcun. Cuitjin cachja me:

—¡Cuatjin Jain! ¡Nihñu jyé nihñu hngna Nina!

⁵ Sehe cavetju tséhë cahndé rcun ngu xta xi chja cuitjin:

Nihñu jyé nihñu hngna Nina, ngayun xi nihñu xa rë me.

Nihñu jyé hngna me sa quihndi sa changá yun.

⁶ Hya xi camá ne, cahndë sacuaha xi tisé xutacjín. Nuhya rë sacuaha fane nandan xi jemu hñu vanga o sacuaha faneya xi tsinga chuhun. Hane cjua rë ne cuitjin chja:

—¡Catamajyé catamahnga Nina naja ta, ha cavetsihin sahmi me gubiernu hane ma sahmi me yéjë ni!

⁷ Catamasua naja. Tahan cjuasua xahesen naja. Nihñu jyé hngna me tséhë xi cavechu cjuavixan rë Tsángä.

Chjuun rë ne, ha catsindaja na yojo ran.

⁸ Casacu rë na cahndé. Hane cuaja na tsjian ndaja xi seti, xi tyjahi.

Tsjian jan ne, hacui xcusun ndaja xi sahmi xuta xi tyjahi cjuatacun rë me xcun Nina.

Cuatjin cachja xutacjín jan.

Sinésuhi me tséhë cjuavixan rë Tsángä

⁹ Hya xi camá ne, cachja ángel cojo ná cuitjin:

—Nihndi cjua vi: “Jercu ndaja tséhë me xi camachaya rë xi nduva me sinésuhi me tséhë cjuavixan rë Tsángä.”

Hane cachja sa ángel cuitjin:

—Cjua xi cachjá ne, cjuaquixi Jain rë Nina.

¹⁰ Hane ngahan ne, caticjátaha ntsacu ángel xi cjuahárcun rë. Peru cachja cojo ná cuitjin:

—¡Xicanihñii! ta, tangun ni chjí naja, ta xa na ha ne, tangun cojo xa xi nihñu cojo xingun xi sua cumachaya rë cjuaquixi rë Jesús ne, hacui xa xi vitexa Nina. Nina ne, me véhë chjuhunrcun me.

Hacuaha cjuaquixi rë Jesús ne, véhë sacuaha cacun rë cjua xi cachja profeta.

Me xi quisun rë naxin tyava

¹¹ Sehe cahvë xi tixaha ngahnga, hane ngajan ne, cahvë ngu chu naxi tyava. Hane me xi quisun rë chu ne, chja tséhë me ta, sahmi chihin me cjua rë me hacuaha quixi me. Jemu quixi cjua me hya xi tsichuva me xuta cojo sa xi hya xi sahmi me si. ¹² Tuxcun me ne, sacuaha ndihi xi ña vitjen. Rcu me ne, jercu hinchasun corona. Hane camahindu ngu ñihi rë me xi tsajin yo vëë rë, peru suva me vëë me. ¹³ Yaja me ngu tsjian xi tjintë ni ne, xi caseyaquinda cojo jni. Hane sacuaha ñihi rë me ne, Cjua rë Nina hmí rë me. ¹⁴ Hane tjengui rë me sindadu cjín tséhë ngahnga. Sindadu jan ne, cuaja me tsjian ndaja xi tyava, xi tyjahi. Hane hacuanitjin hinchasun me nixin tyava. ¹⁵ Hane suva me ne, tséhë hntsua me ne, vetju ngu quicha yuju xi cuanguihmu rë xutacjín. Hane hacuiin yuma cumá rë me xuta ta, cuitexa rë me cojo yaxti rë quicha. Hane sune me cahndé hisca nune rë uva cojo sa xi cuaxë me xan rë cjuacjan rë Nina, me xi ma sahmi yëjë ni. ¹⁶ Hacuaha xcun tsjian rë me cojo tyuhmi rë me ne, camahindu ñihi vi: “Me xi matitjun tséhë ngayëjë ni xi matitjun. Me xi matitjun tséhë ngayëjë ni xi vitexa.”

¹⁷ Hane cahvë xi ngu ángel ne, secun xcun tsuhi. Hane jindayahñu tséhë nisë xi jemu hngua vitjen chu. Cuitjin cachja cojo chu:

—Nduvun. Catamatangun yun tséhë suhi jyë rë Nina. ¹⁸ Ngajan xinu yojo rë xuta xi camatitjun, cojo yojo rë capitán rë sindadu cojo yojo rë xuta xi hñu cjua, cojo yojo rë chu nixin cojo yojo rë xuta xi caxinchasun rë chu. XINU yojo rë xuta, sa ndaya tjin me o sa xi caxteña me, sa langa me, sa changá me, xinu yojo rë me. —Cuatjin cachja me cojo chu nisë jan.

¹⁹ Hane cahvë chu chojihi jan cojo xuta xi vitexa me cojo sindadu cjín rë, hane camatangun cojo sa xi sahmi si cojo me xi hinchasun chu nixin tyava jan. ²⁰ Hane ngajñi si vëhë ne, cachjaha rë chu chojihi jan camá presu chu. Hacuanitjin ne camá presu chu xi casahmi cjuarcun ngatsë rë chu chojihi cojo sa xi cavindacha chu xuta sehe setaha sellu rë chu xten me hacuaha faharcun me xcusun ru. Sehe cacandiya quicu me catsijo chu ngajñi ndachacun xi ti cojo azufre. ²¹ Hane xicjin chu xi cavangui ne, catsiquehen me cojo quicha xi vetju tséhë hntsua me xi miji rë nixin. Sehe yëjë ni nisë ne, cajinësua chu hisca xi cavechu rë xahasen ru cojo yojo rë xi cuicun vi.

20

Ngu mil nu xi seyahñu xitsehen

¹ Sehe cahvë ngu ángel xi nduvajne tséhë ngahnga, hane yahatsja ángel vë llavi tséhë nduchin hacuaha yahatsja ngu cadena jyë. ² Hane cafaha rë yë jyë jan. Chu vëhë ne, hisca hatsëe tacun chu. Chu vëhë ne, hacui naain o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu. ³ Hacuaha catsingatjenya ru cahntsua nduchin. Sehe casechjahñu tingotjo rë cojo llavi hane casetaha xcun ngu sellu. Cuatjin camá cojo sa xi sacuiin sa cahndé cuindacha ru xutacjín hisca xi cuijnetaha ngu mil nu. Hane xi cuatju vëhë ne, cumandaya nga chu ngu jo nixtin.

⁴ Hya xi camá ne, cahvë cahndé rcun hane xcun sillia jan ne, siu me xi casatë rë xa xi cuitexa me. Hacuaha cahvë hasen rë me xi catisun rë riu ngatsë rë cjuaquixi rë me xi casua me tséhë Jesús hacuaha ngatsë rë cjua rë Nina. Me vëhë ne, cafaharcuaain rë me chu chojihi cojo xcusun ru, hacuaha casetaain rë me sellu rë chu sa xten me o sa tsja me. Hane cahvë xi cavuya nga cjuahñu rë me sehe cojo Cristu casahmi me gubiernu xcun ngu mil nu. ⁵ (Yahnga nima ne, cuyaain cjuahñu hisca xi cjuë mil nu jan.) Matsejen ta vëhë nixtin xi tjun cuya cjuahñu rë nima. ⁶ Jercu ndaja tséhë me hacuaha tyjahi cjuatacun rë me xi cojo me satë rë me xi tjun cuya me cjuahñu. Cjuaveya xi majo ne, satiin rë me ta, tsajin mé ma sahmi cojo me. Cumá me sacuaha nahmi xcun Nina cojo Cristu hane sahmi me gubiernu cojo me xcun ngu mil nu.

⁷ Hane xi cuijnetaha mil nu jan ne, cumandaya nga Satanás tséhë ndavaya hiscan caveya me. ⁸ Sehe cuya cuindacha xutacjín rë jingujyë ni ngasunhndë, cuindacha me xuta rë Gog cojo xuta rë Magog, cojo sa xi sahmitangun rë tséhë si. Hane xqui rë me xi cumatangun me ne, cuechu sacuaha tsumi tjehen rë ndajyë. ⁹ Hane xi camatangun me

condra jan ne, cjue me jingujyë ni xcun nangui. Hane ngajñi si ne, cuyujuhndee rë me cahndé xi siu sindadu cjín rë Nina cojo nandya xi tsihmucacun me. Peru ndihi ne, cuijne tséhë ngahnga hane cjue cueti xuta condra jan.

¹⁰ Hane Naain xi cavindacha rë ne, ningatjenya rë ngajñi laguna tséhë azufre xi seti. Hane ha cuanitjin ne catundiya chu chojyিhi jan cojo chu xi cavindacha. Hane ngajan ne, cuatju chu cjuañhi nixtin nixten, nu cjui, nu nduva.

Camacuenda tséhë nima xcun cahndé rcun tyava

¹¹ Hya xi camá ne, cahvë nga cahndé rcun tyava xi matitjun cojo me xi tacun xcun. Hane ngatsë rë cavatjuxcun me, cafëya nangui cojo ngahnga, hane casacuiin cahndé xi cuma rë. ¹² Hacuaha cahvë nima. Sa changá, sa quihndi, hinchacun yéjë ni nima xcun cahndé rcun jan. Hya xi camá ne, ngu jo libru ne catuxaha. Hacuaha catuxaha ngu libru xi hacjahi. Hane libru vëhë ne, libru rë cjuahñu. Sehe camacuenda tséhë, sacuaha xcusun xi casahmi nima, hacutjin xi camahindu xcun libru tjun. ¹³ Ndachacun ne, casua nima xi tjintsja. Cjuaveya cojo tsjun ne, hacuaha casua nima xi tjintsja. Hane jima ngu nima ne, camacuenda tséhë hacutjin xcusun xi casahmi me. ¹⁴ Hya xi camá ne, tsajin sa cjuaveya, tsajin Hades, cahndé xi viyuju nima ta, catundiya ngajñi laguna xi seti cojo ndihi. Hane ndihi vëhë ne, hacui cjuaveya majo. ¹⁵ Ngajan xi nima xi casetaain ñihi rë me xcun libru tséhë cjuahñu ne, cavixuya ngajñi laguna tséhë ndihi jan.

21

Ngahnga cojo ngasunhndé ne, camá xatsë

¹ Xi cavatju vëhë ne, cahvë ngu ngahnga xatsë cojo ngu ngasunhndé xatsë ta, tséhë xi ngahnga xi tjun cojo nangui xi tjun ne, cafëya. Hane sacuaha ndachacun ne, tsajin.

² Hane ngahan, Juan, cahvë nandya xi catsinchacun Nina xi hmí rë Jerusalén xatsë. Canduvajne tséhë Nina ngajan ngahnga. Jemu ndaja tsejen nandya vë ta, tsejen sacuaha ngu na xi cuixan xi canicaja rë na tsjian ndajyিhi tséhë xi nduva cha xi cuixan cojo rë na.

³ Sehe cahndé ngu xta hñu xi cachja tséhë cahndé rcun. Cuitjin cachja:

—Ha quihndé cjue cuyuju tangun Nina cojo xuta. Hane xuta jan ne, cumá xuta rë me, hane suva me ne, cumá me Nina rë me. ⁴ Hane Nina ne, tsixiya me yéjë ndatuxcun me. Quihndé tsajin sa cjuaveya. Tsajin sa cjuachoho. Tsajin mé má squihnda me. Tsajin cjuahmu. Cuatjin cumá ta, tséhë xi xcusun changá ne, ha cavatju.

⁵ Hane me xi tacun xcun cahndé rcun ne, cachja me cuitjin:

—Tisahme xatsë yéjë ni xcusun!

Hane cachja me cojo ná cuitjin:

—Nihindi cjuvihi ta, hacui cjuaquixindaja hane macjain naja tséhë.

⁶ Hane cachja sa cojo ná cuitjin:

—Ha camachihin. Sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rë xahasen rë me ne, tu cuatjo ni suá cuihi me tséhë nandá xi sua cjuahñu xatsë. ⁷ Me xi scaa rë cjue xcun ne, sacu rë me cjuatjo rë Nina. Hane cumá ngahan Nina rë me, hacuaha cumá me quihndi naha. ⁸ Peru yo xi tsacjun, yo xi macjaain rë, yo xi hngacacun, cha tsiquehen, me xi sahmi cjuatseen ngajñi xihin o sa ngajñi chjuun, o xi sahmi surqui, o xi faharcun nina ndacha, o xi chjaain me cjuaquixi ne, yéjë ni me vëhë ne, sacu rë me cahndé ngajñi laguna tséhë ndihi xi ti cojo azufre. Hane vëhë ne, hacui cjuaveya xi majo.

Hacutjin jyihi ciudad xatsë xi hmí Jerusalén

⁹ Hane ngu ángel tséhë yatu jan xi yahatsja tyucu të xi quitsë rë cojo yatu cjuacjintacun xi vijnetaha jan ne, canduvatjengui ná ne, cachja cojo ná cuitjin:

—Ndove ta, tsingácun ri na xuta vixan, na xi camá chjuun rë Tsánga.

¹⁰ Hane ángel jan ne, quijicojo ná ngajñi nijña naha hiscan ngu ndetjun naxi hnga. Sehe catsingacun ná nandya xi catsinchacun Nina, nandya xi hmí rë Jerusalén ta

tinduvajne tséhë Nina ngajan ngahnga. ¹¹ Hane ña tsejen xi seti cojo hasen tséhë ngahñu rë Nina, hisca sua hasen rë sacuaha ngu ndyojo seti xi yufa sacuaha ndyojo tsin. ¹² Hane cavindee rë ngu xondyojo teya hacuaha hnng. Tejó má tingotjo rë, hane jimangu tingotjo jan ne, ngajan siu ngu ángel. Hacuaha ngajan camahindu ñihí rë tejó tjé rë xuta nangui Israel. ¹³ Xondyojo jan ne, tjin jyan tingotjo jimangu ladu. Jyan má ladu vetjucaa tsuhi. Jyan má ladu ngatihin. Jyan má ladu canangui. Hacuaha jyan má ladu vetje tsuhi. ¹⁴ Xondyojo rë ne, tacun xcun tejó xihndë naña. Hane xihndë naña ne, yaha ñihí rë tejó apóstol rë Tsánga xi camahindu xcun.

¹⁵ Ángel xi chja cojo ná ne, yaha ngu ya naxu tséhë oro xi machjiréhë sacuaha ya chuva xi cjua hachuva rë nandya cojo xondyojo cojo tingotjo rë. ¹⁶ Nandya jan ne, cuadradu jyihi. Jimangu tjeñen rë ne, jo mil jo cientu kilómetro má xi nduju. Hane hacuanitjin ne má xi hnng. ¹⁷ Hane catsichuva xondyojo rë. Véhë tjin rë ngu cientu cojo yachan ñuju nda sacuaha chuva rë xuta ta véhë casahmixa ángel cojo.

¹⁸ Sacuaha xondyojo rë ne, camá cojo ndyojo seti xi hmí rë jaspe, hane nandya ne, suva oro camá hane seti sacuaha ndyojo tsin. ¹⁹ Xihndë naña rë xondyojo rë nandya ne, camá cojo ndyojo seti rë yéjë ni xcusun xi sacuaha xcusun rë yéjña. Xihndë naña rë xi tjun ne, camá tséhë jaspe. Xi majo ne, tséhë zafiro. Xi majyan ne, tséhë ágata, má ñuju ne, tséhë esmeralda, ²⁰ má hñu ne, tséhë ónica, má jyun ne, tséhë cornalina, má yatu ne, tséhë crisólito, má jyin ne, tséhë berilo, má ñaja ne, tséhë topacio, má té ne tséhë círsopraso, má tengu ne, tséhë jacinto, hane má tejó ne, tséhë amatista. ²¹ Sacuaha tejó tingotjo jan ne, camá tséhë tu seti xi hmí perla. Hane jimangu tingotjo camá tséhë ngu perla. Hane ndiyaté rë nandya jan, tséhë suva oro camá peru sacuaha ndyojo seti xi ñia hasen tsejen.

²² Ngajan ciudad véhë ne, cahveen ngu yungun. Mamijí rë ta tséhë xi ngajan cuiyuju Nina, Nai naja xi ma sahmi me yéjë ni, cojo Tsánga xi hacui me sacuaha yungun. ²³ Cuanitjin ne, mamijí rë tsuhi cojo sá xi sua hasen rë ta, tséhë xi hasen rë ngahñu rë Nina ne, sua hasen rë ngajan, hane Tsánga ne, má ndihi rë. ²⁴ Yéjë xutacjín ne, tsujiyihia me cojo ndihi vé xi cjue me cojo ngasunhndë rë me, hane xuta matitjun rë me ne, ngajan cjue cani me ngahñu rë xa xi vitexa me cojo xi cuaxéndaja me. ²⁵ Ngajan hisca xi ngu nixtin ne, sechjaain tingotjo rë, tséhë xi ngajan ne, tsajin nixtin cuma nguixun. ²⁶ Hane xutacjín tséhë ngasunhndë ne, cjue cani me ngahñu cjua rë me cojo cjuanchina rë me.

²⁷ Hatuxa tsajin cahndé xi cuma rë tu mé ni xi hacuiin tyjahi xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ñihí rë xcun libru rë Tsánga, libru xi yaha ñihí rë me xi sacu rë cjuahñu xatsë ne, me véhë sacu rë me cahndé.

22

¹ Sehe ángel ne, catsingacun ná ndajyé xi hacui nandá xi sua cjuahñu. Nandá véhë ne, nandá yufa xi hasen sacuaha ndyojo tsin. Hane nandá véhë ne, vetju tséhë cahndé rcun rë Nina cojo Tsánga, ² hane vanga taha ndiyaté cavasen nandya. Xingu xingu ladu tséhë ndajyé ne, secun ya tséhë cjuahñu. Ya véhë ne, tejó ndiya xi ngu nu tjin chan tséhë tu rë ta, chuva sá sua tu rë. Hane xca rë ya ne, machjiréhë xi tsirqui rë xutacjín jan. ³ Ngajan ne, tsajin mé xi chofovëe Nina tséhë. Ngajan nandya vé tacun cahndé rcun xi tséhë Nina cojo Tsánga. Hane ngajan ne, me xi tacun xi xa rë me ne, cjuahacuenda rë me. ⁴ Scuée me xcun Nina, hane ñihí rë Nina ne, setaha xten me. ⁵ Mamijí rë ndihi, sa ndihi rë lámpara o sa tséhë tsuhi ta, Nina Nai naja ne, sua rë me hasen rë me. Hacuaha gubiernu xi sahmi me ne, cjuecani rë yéjë nu, yéjë nixtin.

Camatiña nixtin xi cuya Jesucristu

⁶ Hyá xi camá ne, cachja ángel jan cojo ná cuitjin:

—Cjua vihi ne, cumacjain nuju tséhë ta, quixi jain. Nina, Nai naja ne, catsingatju me ángel rë me xi sua cumachaya rë hasen rë xuta xi chja cjua rë me tséhë xcusun xi xati cumá.

⁷ Chja cjua ta:

—Tuhuncuendun xi ngutjen cuinduvá. Jercu ndaja tséhë xuta xi vetjondaja me sahmichihin me cjua rë libru vihi xi chja tséhë xcusun xi sehe cumá.

⁸ Juan hmí ná. Cahndé, hacuaha cahvë xcusun vihi. Hane hya xi camá cahndé cahvë ne, caticjaxcun taha ntsacu ángel jan xi catsingacun ná xcusun vihi ta, cjuaharcun ángel jan. ⁹ Peru cachja ángel cuitjin:

—¡Xicanihñii! ta, tangun ni chjí naja, ta xa na ha ne, tangun cojo xa xi nihñu cojo xingun xi má profeta cojo yahnga xingun xi vetjo me cjua rë libru vihi. Nina ne, me vëhë chjuhunrcun me.

¹⁰ Hacuaha cachja me cuitjin:

—Xicavisiin sellu cjua xi sehe cumachihin xi hincha libru vihi, ta nixtin rë ne, ha meje cuechu. ¹¹ Cuejña xi xuta xi cho ho sahmi me ne, catjinduju xi cho ho sahmi me, hane xuta tsehen ne, catjinduju me cojo cjuatsehen rë me, hacuanitjin ni xuta xi quixi me ne, catjinduju me cojo ndiya rë cjuaquixi, hane xuta xi tyjahi cjuatacun rë me, catjinduju me cojo ndiya rë cjuatacun tyjahi.

¹² Chja me cuitjin:

—Tuhuncuendun xi ngutjen cuya. Hane xi cuya ne, nduva cojo chjí nuju. Suá rë jimangu me chuva rë hacutjin xi casahmi me. ¹³ Ngahan ne, sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Tejña hisca ntsacu cavetsihin yëjë ni, hane tejña cuaha hya xi cjué. Matitjun, matjengui ngahan.

¹⁴ Jemu ndaja tséhë xuta xi catsityjahi me tsjian rë me cojo sa xi sacu rë me cahndé xi sinë me tséhë ya rë cjuahñu xatsë. Xi cuatjin ne, cuma cuisehen me taha tingotjo rë nandya jan. ¹⁵ Peru xuta tsehen cuiyuju me ndatsen cojo xuta xi sahmi cjuasurqui, o xi sahmi cjuatsehen ngajñi xihin o sa ngajñi chjuun, o xi tsiquehen, o xi faharcun nina ndyojo o me xi tsihmucacun cjuandacha. Yëjë ni me vëhë cuiyuju me ndatsen nandya.

¹⁶ —Ngahan, Jesús ne, catsingátu ángel naha xi tsinguixi xcun ngayun xuta yungun cjuaquixi vihi. Ngahan ne, tjé rë David má ngahan. Quihndindaicjin rë David má ngahan. Niñú seti tséhë nguitajñu má ngahan. —Cuatjin chja Jesús.

¹⁷ Ngajan xi Hasen rë Nina cojo na xi cuixan cojo Tsángá ne, cjuayangui me cuitjin:

—Nduvun.

Hacuaha me xi cuihndé cjua vëhë ne, cuichja me cuinitjin ni:

—Nduvun.

Sa xi xinda nuju ne, nduvun. Sa xi cjuayatacun ne, siuhun tu cuatjo ni nandá rë cjuahñu.

¹⁸ Suá cumachaya nuju ngayun xi visiñuju cjua rë xujun vihi xi sehe cumachihin ta, sa xi tjin yo xi cuesuntaha sa cjua cojo cjua xi camahindu nguehe, Nina ne, cuesúntaha me cjuañihi xi camahindu xcun xujun vi. ¹⁹ Hacuanitjin ne, sa xi tjin yo xi cjuahataha rë cjua vihi xi sehe cumachihin, Nina ne, cjuahaxin me cahndé xi cumá rë me xcun xujun rë cjuahñu cojo tséhë nandya xi catsinchacun Nina cojo tséhë xcusun ndaja xi camahindu xcun libru vihi.

²⁰ Hane me xi sua cjuaquixi xi cuicun vi ne, chja me cuitjin:

—Hatusá nduva xati.

Cuatjin chja me. Cuatjin ndatjin. Nduvun, Tatá Jesús.

²¹ Quihndé ne, catisaté nuju cjuandaja rë Nai naja, Jesucristu. Cuatjin Jain cumá.